


El Nuevo Testamento
en mixe de Coatlán



New Testament in Mixe, Coatlán (MX:mco:Mixe, Coatlán)

El Nuevo Testamento en mixe de Coatlán
New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 21 Feb 2024 from source files dated 29 Jan 2022
4190de74-18ab-52cf-ba4e-5f99ab05892f

Contents

SAN MATEO	1
SAN MARCOS	58
SAN LUCAS	98
SAN JUAN	156
HECHOS	207
ROMANOS	260
1 CORINTIOS	289
2 CORINTIOS	317
GÁLATAS	336
EFESIOS	347
FILIPENSES	357
COLOSENSES	364
1 TESALONICENSES	371
2 TESALONICENSES	377
1 TIMOTEO	381
2 TIMOTEO	388
TITO	393
FILEMÓN	397
HEBREOS	399
SANTIAGO	419
1 PEDRO	426
2 PEDRO	434
1 JUAN	439
2 JUAN	446
3 JUAN	448
JUDAS	450
APOCALIPSIS	452

SAN MATEO

Jaayhui'my Jadu'n Nej Jesucristo Ytun Yjajti

Je Jesucristo ymij'ap ymijteedy

¹ Cham ngapxa'ñ nmiydäga'ñich pin Jesucristo y'ap'ajt yteedy'ajt jadu'n nej yhui'my jaybety. Jesucristo je' oy ap'adyii teedy'adyii David etz Abraham.

² Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc. ³ Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴ Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵ Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶ Isaí oy ung'adyii rey David. Je rey David je' oy ytöxyijc'adyii huidi anajty Urías ytöxyijc'ajtpy. E je' ajcxy y'ung'ajti Salomón.

⁷ Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸ Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹ Uzías oy ung'adyii Jotam. Jotam oy ung'adyii Acaz. Acaz oy ung'adyii Ezequías. ¹⁰ Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹ Josías oy ung'adyii Jeconías mïid y'ajchytijc y'uchytijc. Huin'it Babilonia jäy oy mach je israelitas jäy. Chi minicxy jim Babilonia y'it.

¹² Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. ¹³ Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor. ¹⁴ Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. ¹⁵ Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. ¹⁶ Jacob oy ung'adyii José huidi oy ñäy'adyii María. E je María oy ung'adyii Jesús huidi yxii Cristo.

¹⁷ Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzimiy yajmajch ma Babilonia y'it, e nañ jamajmactz najtzquëxi' chiini oy ymiñ yja'ty je Cristo.

Jesucristo yma'xung'ajtin

¹⁸ Jadayab capxy ayuc jadu'n nej ymiñ yja'ty je Jesucristo. Jesús ytaj, huidi anajty yxii María, yi' ti anajty ycapxytungixy co ypigaangixy mïid José; e ma anajty ca'ni ñaybudigiiyigixy, chi María oy y'ungdzimigy mïid yi Dios yjihui'ñ ymic'ajt. ¹⁹ José, yi' ñäy, hue' anajty yi' yajpaty janch tudägy. Ca' anajty xihua'ñ María mayjäyjoty. Hue' janchtiy yhuinma'ñybaty co ixmadza'ñ ayüch ameech ca' pin yajnejhuíhua'ñ. ²⁰ Huin'it ma jadu'n anajty nihuinmayiy, chi Huindzin Dios tüg y'ángel ñayquëxici cumäyjoty ma José, chi ñimaayi:

—José, David y'ap y'oc, ca' mijcajee mdzachhuinmay nej m'octöxyijc'adiiyb María, com yi' y'ung huidibi yajma'xung'adamy hue' mïid Dios yjihui'ñ ymic'ajt ycixpi. ²¹ Yi' ypadamy tüg y'ung e mximöhuipy Jesús. Jadu'n yi' xii'adiiyb com jégix co yi' yajpocyniñhuádzam ñaax ycajp.

²² Tüg'óciy jada ytundaayi yajtaayi yciyxy yca'pxy jadu'n nej je Dios anajty ti nimäy je profeta, je jäy huidi Dios y'ayuc najtzcapxiyip ma anajty jadu'n yjaybetyity:

²³ Je töxyjäy huidibi ca' yëydijc mïiddzinäy hue' je' ung tzimicip. Chi ypadamyb tüg je y'ung hue' je' yxii'adaanip Emanuel. Emanuel hue' yhuimbizimiy Dios mïid ich ajt.

²⁴ Co José ymäyhuijy, chi cuyduñ jadu'n nej anajty Dios y'ángel ti nímäyii, chi huoy María jadu'n nej jihuüy töxyijc'adyii. ²⁵ Per ni ca' ajcxy jadu'n chinaay jadu'n nej jäy ypicxy chinäy ixti cooni oy María y'ung yajma'xung'aty. Chi yxímoy Jesús.

2

Madza' ni'ixpigüyb oy co'ixüygüxy pi'c'ung

¹ Jesús yma'xung'ajty ma tüg cajp huidi yxü Belén, jim ma Judea ñaaxjot, huin'it co anajty Herodes yrey'aty ma yí jimbi naaxjot. Chi huin'it yja'ty ma Jerusalén cajp nijëjity yëdyictijc huidibi anajty ti choñ ma xü ypidzimy, yí huidibi anajty ajcxy xü madza' ti ni'ixpigüygüxy. ² Chi ajcxy yajty:

—¿Ma je judíojäy yrey tüibi yma'xung'aty? Ti üch ajcxy n'ijxi yí ymadza' jim ma xü ypidzimy, e yí üch ajcxy ya miñ nhuindzigühuaangüxy.

³ Co je rey Herodes jadu'n midooy, chi ooy ytigüy tajpi maybi müd tüg'óciy cajpjäy jim Jerusalén. ⁴ Huin'it je rey huomujctay tüg'óciy teedytjic huindzindijc huidibi anajty yaj'ixpijcp yí Dios yley, chi yajty ma anajty yma'xung'ada'ñ yí Cristo. ⁵ Chi ajcxy y'adzooy:

—Jim Belén ma Judea ñaaxjot, com Dios y'ayucnajtzcaxüybi jadu'n je' cojaay:

⁶ E müich Belén, mabi Judea ñaaxjot, mij'ajtp mgix'ajtp ca'ydi jac huidi naax jac huidi cajp, com ma müich chona'ñ tüg Huindzin huidi ane' mam yí israeljäy.

⁷ Huin'it Herodes oy yajhuoyii ameech huidibi anajty ti ijxcüxy yí madza'. Chi tybijcy yajxon mina anajty oga'n ti ijxcüxy je madza'. ⁸ E huin'it ajcxy quejxy jim Belén. Chi jadu'n nímay:

—Níxcüx jim e ocnidü ocyajtügüxy je pi'c'anäg; e co anajty ti mbatcüxy, miñ müich ajcxy xyajnimáaygüxyich jaydebi üch nicüxy nañ jadu'n nhuindzigüyich.

⁹ Co jadu'n rey najtzcaxüyday, chi ajcxy choñ. E je madza' tüibi anajty ijxcüxy ma xü ypidzimy, chi ajcxy ijxy jayjip je' anajty ñicüxy ma je' ajcxy, ixti coní oy je madza' yhuäcxüpy ma anajty je pi'c'anäg yajpaady. ¹⁰ Co je rey ixpicütjic jadu'n ijxy yí madza', chi ajcxy oy janch jotcujc ñayjihuüyii. ¹¹ Co ajcxy ytictigüy, chi ajcxy ijxy je pi'c'anäg müd ytaj je María. Chi jada' ajcxy ñaygojxtinaydaaci huindzigüy ojadajty ajcxy je pi'c'anäg. Chi ajcxy yaj'ahuach yxuumy aguejtucy abijctucy, chi ajcxy yajpidzimy oori, poom, etz tüg tzooy huidi yxü mirra. Chi ajcxy moy je pi'c'anäg. ¹² Chi cumäjoty ajcxy nimaayí co ca' huaad yhuimbijtcüxy ma Herodes, chi ajcxy ñicxni ma ycajp, jüyöyñaxy ajcxy je Herodes, huingbi tü'aa ajcxy ycuynícx.

Co José etz María yqueegyñicxüxy Egipto

¹³ Co je rey ixpicütjic ajcxy yhuimbijttaayñi, chi cumäjoty José ijxy tüg Dios y'ángel, chi nimaayi:

—Pidíg, nicx jim Egipto ñaaxjot müd yí pi'c'anäg etz müd yí ytaj, e jim mhui'müpy ixti cooni üch müich nímahuüpy. Com yí Herodes y'ixtähuamy yí yí pi'c'anäg e yaj'öga'ñ yí'.

¹⁴ Chi huin'it José ypidigü müd tzoön coodz je pi'c'anäg müd ytaj, chi ajcxy ñicüxy jim Egipto. ¹⁵ Jim ajcxy y'ijty ixti cooni oy y'ögy je Herodes. Jada je' jadu'n yajcuydun jadu'n nej Dios anajty ti yminañ ma yí y'ayucnajtzcaxüybi: “Jim Egipto üch n'ung ti nhuoy.”

Herodes pidacy y'ane'min co huen pi'c'anäg yaj'öctäyii ajcxy

¹⁶ Co Herodes oy huinma'ñ yajyöy co ti anajty ooy yhuin'üñyii je rey ixpicütjic ajcxy co ca' anajty ti ñihuimbidyii, chi ooy yjot'ambijcy, chi

ni'ane'mdiy co huen nicxy jim Belén etz majaty cajp mihuingon Belén, yaj'öctaaygixy tüg'óciy yi pi'c'anäg huidibi mejtz jimijt etz huidibi ca'ni nigooty mejtz jimijt. ¹⁷ E jadu'n jada yajcuyduñ jadu'n nej anajty Dios y'ayucnajtzcaxiybi, je Jeremías, anajty ti cojaay:

¹⁸ Jim Ramá yajmidoy co anajty chachjy chachyaxy jäy ajcxy; yi Raquel tzachjy tzachyaaxp müd y'ung ajcxy ycixpi, ca' ajcxy anajty yjotcuj'aty müd co anajty y'ung ti y'öctäy.

¹⁹ Co oy y'öcni Herodes huin'it jim Egipto, Dios tüg y'ánel ñayguëxi cumäyjoty ma José. Chi ñimayi:

²⁰ —Pidig, müdnicx yi pi'c'anäg etz yi' ytaj jim ma yi Israel ñaaxjot jadügtecy com ti y'öctaayni yi huidibi anajty yaj'ögam yi pi'c'anäg.

²¹ Huin'it José ypidigy, müd nicxy yi pi'c'anäg etz yi' ytaj jim ma Israel ñaaxjot. ²² Per co José nejhuüy co je Arquelao yi' anajty jim ane'mb jadu'n nej anajty je yteedy Herodes, ooy chigiy nej ñicxip jim. E co jadu'n anajty ti ycumäy co ca' jim ñicxip, chi ajcxy ñicxy jim Galilea ñaaxjot. ²³ Co jim yjäty, chi jim chinaydapijcy ma je cajp huidi yxi Nazaret. Jadayaabi je' jadu'n tun jajt jadu'n nej anajty ycojaayty ma Dios y'ayucnajtzcaxiybi ñecy co Jesús xh'adiyb Nazareno.

3

Juan el Bautista y'ayuc capxhuäcxy ma tidz naax it

¹ Huin'it tiempo nañ jadu'n Juan je Bautista (huidibi jäy yajñibejtpi) ymiñ tüg tigidum ma Judea ñaaxjot capxhuäcx Dios y'ayuc, ² yminañ:

—Jothuimbijtcix ma Dios com yi Dios y'ane'min huingoniñ yi'.

³ Jada Juan yi' je' huidibi je profeta Isaías nigapxy yminañ: Jim mijtigidum yajmidoy tüg ayuc minañ: “Ni'ixiygixy yi mHuindzin ytü'aa, ni'ixiygixy tüg tü'aa tiybi.”

⁴ Je Juan hue' anajty yhuinip iyujc ac, e yi' anajty yjicxy'ajtpy mu' etz tijaty iyujc päg jim tüg tigiduum. ⁵ Chi choon jim Jerusalén jäy etz tüg'óciy huidijaty tzinaayb ma Judea ñaaxjot, nañ jadu'n huidijaty tzinaayb ma Jordán mijñiba', ñicx ajcxy ma Juan amido'ijty yi' y'ayuc. ⁶ Co anajty ajcxy nigapxtaaygixy yi ypocy huidi anajty ti tundigooygixy, huin'it anajty ajcxy Juan yajñibedyii ma Jordán mijñi.

⁷ Per yi Juan y'ix co may fariseo jäy etz saduceo jäy miñ anajty ajcxy ñibejtcixy, chi ajcxy ñimay:

—¡Miich ajcxy, m'ajuugy m'amigüg ahua'n iyujc! ¿Pin ti xyajni'ixiygixy nej jëbi huaad mgögueeccixy yi ayo'n huidibi huingomb? ⁸ Yajxon jäy'ajtcix tiydudägy huen niguëxigy co ti mjothuimbijtcixy. ⁹ Ca' jadu'n mdzachminaangixy co Abraham xy'ap'adyii xy'oc'adyii. Hich miich ajcxy yam ndimnimaayb co Dios ixti jëbi yi' yaj'ap'adyii yaj'oc'adyii Abraham jada tzaajot ca'ydi miich ajcxy. ¹⁰ Yi jach ni'ixi yi' y'ijtni ma quipy y'ijx, tüg'óciy quipy huidi ca' oy ytim'aty yajpujx yi', e chi jada' yajnögy jijnjoty. ¹¹ Hich, janch yajñibejtpich müd ni, yi' yi' jadu'n nej tüg ixpejt co ti mjothuimbijtcixy; per jacminamb tzojc huidi ajcxy xyajñibedipy müd Dios yjihuñ etz müd jijn. Je' ymüd mic'ajtin etz cötujcin, nigä ca'ydi ich, ni xycapaadyich nicxy ycig nyajtecyjendügyich. ¹² Ymüd mic'ajtin pijc-huäcxamy yi jäy jadu'n nej jäy huimbojy moc, abicy pidäga'ñ actz, abicy moc pajc. Yujcpiga'ñ moc pajc ma tze'x ninögihua'ñ yi moc actz moc jaam jijnjoty ma je jijn huidibi nicaminaaxii ycapich.

Co Jesús ñiibejty

¹³ Huin'it Jesús chooñ ma Galilea ñaaxjot, chi ñicxy ma Jordán mij ñi ma ana-jty Juan yjāyayñibety, ñibedam anajty yí' nañ jadu'n. ¹⁴ Juan ca'jadim'a'ixiy, chi ñimay Jesús:

—Ñich miich xiyipy xyajñibejtpich, ¿e miich mimb ma ñichi?

¹⁵ Chi Jesús y'adzooy:

—Jadachambi oc'a'ixi jadu'n, com ooy yí' ycopityity co nguydundayim tüg'óciy tiibi Dios xyaj'ane'mim.

Huin'it Juan a'ixiy chi yajñibejty Jesús. ¹⁶ Co Jesús ñibejttay, chi Jesús ijxy Dios yjihui'ñ ñigidägyi jadu'n nej tüg pi'cmuuxy. ¹⁷ E huin'it yajmidoy tzajpcíxy tüg ayuc ymina'ñ:

—Jada je' ñich n'ung'ajtypich huídibi ooy ndzocyich huídibi ooy mñd jotcuje nayjihuiyijich.

4

Je mujcu' tuñ ijxta'ni Jesús

¹ Chi Dios yjihui'ñ yajnicxy Jesús mjtigíduum jaydēbi je ca'oybi yjot'ixiyb yhuinma'ñ'ixiyb. ² Jim y'ijty jaygay huixchigui'px xii huixchigui'px tzuum, e huin'itni ooy yiböccodyi. ³ Chi je ca'oybi nimijhuägy Jesús ocjot'ixa'ñ oc-huinma'ñ'ixa'ñ, chi ñimay:

⁴ —Pen Dios miich xy'ung'ajtp, ñima' jada tzaa huen naygojyii tzajcaagy.

Chi Jesús y'adzooy:

—Jaybety jadu'n ymiñ ma Dios ñecy: “Ca'p jäy tzajcaagyti'ajty nitzinähuiipy, nañ jadu'n nitzinähuiipy tüg'óciy yí' ayuc huídibi Dios ycapxp.”

⁵ Chi je ca'oybi mñdnicxy Jesús jim Jerusalén, chi ymñdpejty tzajptijc cöduum. ⁶ Chi ñimay:

—Pen janch co miich Dios xy'ung'adyii, cödiypnax jiiby naaxcíxy, ca' yí' nej mjadipy com jaybety jadu'n ymiñ co jadu'n ymina'ñ:

Dios yquexyp yí' y'ángeles jigix xycuend'adipy xyhuidzipy mñd yci', ca'ydi ninej mgönepy ma tzaagop.

⁷ Chi Jesús y'adzooy:

—Nañ jadu'n ymiñ jaybety: “Ca' mjt'ixipy mhuinma'ñ'ixipy yí' mhuindzin Dios.”

⁸ Jadüg'oc je ca'oybi ymñd'ajty Jesús ma tüg copñicx janch cijxpi, e jim yajni'ixiyday tüg'óciy naax cajp co ooy mñdity oy'ajtin etz mic'ajt. ⁹ E chi ñimay:

—Ñich jada miich nmoydähuiipy tüg'óciy, pen miich cojxtina' xyhuindzigi'yich xy'ojadatyich.

¹⁰ Huin'it Jesús y'adzooy:

—Huinhuäctucich miich mujcu', com jadu'n yjaybetyity: “Tügpaic yí' mhuindzin Dios yí' mhuindzigi'huipy m'ojadadipy.”

¹¹ Huin'it je ca'oybi huinhuäctucy Jesús, chi Jesús ñimiini ángeles ycuend'ajti.

Jesús ytung yajtzondacy jim Galilea

¹² Co Jesús nejhuüy co Juan ti anajty yajpidägy pujxtigoty, chi yhuimbijtni jadüg'oc jim Galilea. ¹³ E ni ca' yhui'müy jim Nazaret, chi ñicxy jim Capernaum, jim ma Zabulón etz Neftalí y'it. ¹⁴ Jada je' jadu'n tuni jaiti jadu'n nej Dios y'ayucnajtzcapxiybi Isaías anajty ti cojaay:

¹⁵ Zabulón etz Neftalí ñaaxjot. Je tü'aa huídibi mejypa' huídibi a'oy'amy ma Jordán mij ñi. Jim Galileajäy chinäy huídibi ca' yjudiojäyity.

16 Yi jäy ajcxy huídibi jim tzinaayb agootztuuby ijxpaty ajcxy tüg tücxin jajin. Je huídijaty anajty ajcxy tzinaayb ma je jibicpi y'anicíy, chi ajcxy ycodicxiy tügi tücxin jajin.

17 Ixti huin'it Jesús ytigíy ayuccapxhuäcxp ymíñañ:

—Jothuimbijtcix, yajmingix yajmejtzcix mjot mhuinma'ñ ma Dios, com yi Dios y'ane'min huígonip yi'.

Jesús nimay nimídaax je acxmajtzpi: “Pajamgich”

18 Jesús tüyöyb anajty ma Galilea mejypa', co ijxpaty metz yëydíj ac tüg quëxpi, hue' anajty yi' je' je Simón, huídibi nañ jadu'n yxii Pedro, e je jadügpí hue' je' anajty Andrés. Acxmadzi anajty ajcxy yi' ytung'ajty e jim anajty ajcxy yi' tzachnigöhuich y'acxmadzi'ñ. 19 Chi Jesús nimay ajcxy:

—Pajamgich, ich miich ajcxy nyajni'ixihuipy nej jäy myaj'ixpiipy je Dios ytiy'ajt.

20 Huin'it je' ajcxy ixmajtztay tüg'óciy yi' y'acxtzaay, chi ajcxy panícxxy Jesús.

21 Hueeni jac'amijci'm Jesús ijxy janimetz Zebedeo ajcxy ymang, je Jacobo etz Juan. Jim anajty yi' ajcxy ma tüg barco müd yteedy, yi' anajty ajcxy yi' jim chach'adagíy y huídibi mi'acxmajtzciy. Chi ajcxy Jesús yhuoohui. 22 E huin'it ajcxy ixmajtztay je barco etz yi' yteedy, chi ajcxy panícxxy Jesús.

Jesús yaj'ixpiy mayjäy

23 Huídijtay Jesús ma tüg'óciy Galilea ñaaxjot, yaj'ixpiy jäy majaty je nay-mujctac cajp cajp. Capxhuäcxxy yi' Dios ytiy'ajt etz nañ jadu'n pa'mjäy yajtzocy huen ytimyhuídipá'mity anajty ajcxy ymüd. 24 Chi Jesús oy yajnejhuíyñi ma tüg'óciy yi' Siria ñaaxjot, e chi ajcxy müdmiñ ma Jesús tüg'óciy huídijaty anajty ajcxy ca'oybi müd, etz huídijaty anajty ajcxy cíxuxy tecyxuxy, chi Jesús yajtzocy. 25 Huin'it Jesús ypanícxxy mayjäy huídijaty anajty ajcxy tzinaayb ma Galilea ñaaxjot etz yi' Decapolis jäy, nañ jadu'n Jerusalén jäy etz huídijaty tzinaayb ma Judea ñaaxjot, nañ jadu'n huídijaty anajty ajcxy tzinaayb a'oy'amy ma Jordán mij nií.

5

Je tiy'ajt huídibi Jesús ycapx ma tüg cögop

1 Co Jesús ijxy tüg'óciy je mayjäy, chi nícxxy ma tüg copnícx, e chi jim y'ixtacy. E huin'it je' y'ixpijcpídiíj ajcxy yjübigíy. 2 Chi Jesús ytigíy yaj'ixpijcp ymíñañ jadu'n:

Je pinjaty ajcxy jotcújcp

3—Janch jotcuyc je jäy ajcxy huídibi nejhuíy co yajmayajtpy Dios y'oy'ajt, yi' ajcxy paatip Dios y'ane'min.

4 Janch jotcuyc je jäy ajcxy huídi yajpatp taj may, yi' ajcxy yajmöhuam jotcuyc'ajtin.

5 Janch jotcuyc je jäy ajcxy huídibi yung naxpy jäy'ajtp, yi' ajcxy padaamb tüg'óciy je huídi Dios ti yaj'ahuaníyíi.

6 Janch jotcuyc je jäy ajcxy huídibi cuydunamb huídibi Dios chojcpy, Dios yi' ajcxy pubedíib.

7 Janch jotcuyc je jäy ajcxy huídibi pa'ayoob huenyimpinjäyity, Dios nañ jadu'n ajcxy pa'ayohuíib.

8 Janch jotcuyc je jäy ajcxy huídibi huädz yjot yhuinma'ñ, yi' ajcxy y'ixipy yi' Dios.

9 Janch jotcuyc je jäy ajcxy huídibi ca' ti tzip tzojccixy, com yi' ajcxy Dios ung'adíib.

¹⁰ Janch jotcuje je jäy ajcxy huidibi yajnixiicp yajniGapxp mïd je Dios ytiy'ajt ycixpi. Yi' ajcxy idamb ma Dios y'ane'min.

¹¹ Janch jotcuje miich ajcxy co jäy jibic xytungixy co nigoob xyñihuambejtcixy etz capxcixy huidijaty ca' ytiy'ajtiy mïd ïich ycixpi. ¹² Xondaaccix jotcuj'ajtcix co mbadaangixy tüg oy'ajtin jii by tzajpjoty. Nañ jadu'n ajcxy ixhuidijty pahuidijty je Dios y'ayucnajtzcaxiib; jecy'ajty.

Miich ajcxy je tudägyjäy ya naaxhuiñ

¹³ Jadu'n nej caan ca' yajpüch je tzüch jücxym tim jadu'n miich ajcxy myajpaady ya naaxhuiñ. Pen je caan ca' mïd ti xücx'ajtin, ¿nej jëbi nyajtuunim? Ca' y'oc'oyajtunim, chi yajnajtzcaxidiiyñi, chi yhuaani tembejt hua'cpejt.

¹⁴ Oc'ix tüg je cajp jim copcix, ca' jëbi mhuijtyüzdim mgoyüdzim. ¹⁵ Co tüg jün nyajtoyicim, ca' huaad tu'tz ngöjupim. Hue janchtiy co nyajticxim cix, huin'it jëbi xycodicxtaayim jadu'n nej ajt nyajpaatim ma tijc. ¹⁶ Nañ jadu'n miich ajcxy mdzinaaygixy tudägy ma ajcxy je mayjäy jaydëbi ajcxy ixipy je oybi huidi miich ajcxy mdumyb. Huin'it ajcxy ojadadipy je mDios teedy huidibi jii by tzajpjoty.

Jesús yaj'ixpiy nej yi' yi Dios ycötujcin

¹⁷ Ca' mhuinmay co ïich ti nmiñich ya co nbiganich je Dios y'ayuc je' huidibi anajty ti jaay Moisés etz je profetiijc. Ca' ïich nyajmijaagixa'ñ je cötujcin, ïich ti nmiñich co nguyduna'ñich jadu'n nej ymiñ jaaybety. ¹⁸ Janch tiy'ajt jadu'n nej nimaaygixy, je huidibi mimb jaaybety jadu'n tundähuam jajtähuam. Ni tüg letra oy mabaad ymúdzity nicxy ycayajcuyduñ. ¹⁹ Je jäy huidibi ca' nimidooy je Dios ytiy'ajt oy yjadim mutzjaty etz yaj'ixpiy jäy jadu'n, je' ajcxy padamb je mutzpi tigiydac ma Dios y'ane'min. Paady je jäy huidibi yaj'ixpijcp jadu'n nej tiy'ajt ymina'ñ, e paduñ jadu'n nej yaj'ixpiy, je' ajcxy padamb tüg je mijpi tigiydac ma Dios y'ane'min. ²⁰ ïich miich ajcxy nimaayb, pen ca' miich ajcxy jac'oy mdungixy ca' ydi fariseos etz escribas ajcxy, ca' nimina mdigihuipy ma Dios y'ane'min.

Jesús yaj'ixpiy co ca'p huaad pin yjotmädy

²¹ Miich ajcxy mnejhuigixy jadu'n nej yi' m'ap mdeedy ajcxy ayuc yajhuimy: “Ca' jäy myajögip; e pin anajty jäy yaj'öcp ypaadip je tzaachypi.” ²² ïich miich ajcxy jadu'n nimaayb pinjaty ymigügtijc mijotma'tp, je' Dios tiydunaanipy; e pin ymigüg xiidijp tzuudijp, yajtiydunipy je' ma Dios tiydundac; e pin ymigüg tzuudijp locidijp ayo'ndumb, je' y'ity co ñicxip ayoodactuuby.

²³ Pen myajnicxpy miich mhuindzigi'ñ ma Dios ytiyc, e pen jim jäy metzgodyi co mmigüg ti xyhuin'innaxy ti xyhuincapxynaxy yinjaty hueenjaty, ²⁴ jim myajhuim je huindzigi'ñ ma je altar yhuinduu, e nicx jayijp nayyaj'oyihuim mïd je migüg, huin'it mhuimbedip e chimgyeyecy je mhuindzigi'ñ.

²⁵ Tzojc naygapxjotcidägi mïd je midzip, pen yam mïd tüyöy ni'am tü'am, ca' jecyity co je midzip xcyeyegip ma juez, e je juez xcyeyegip ma je policia, e je' nicxy xpidägy pujxtigoty. ²⁶ Janch tiy'ajt ïich miich nimäy co ca' jii by mbidzimipy ixti cooni mgüejtähuipy je meeñ.

Jesús yaj'ixpiy co ca'p ndundigóoyimipy mïd huingbi töxyjäy

²⁷ Miich ajcxy mnejhuib co jecyip tiy'ajt ymina'ñ: “Ca' mmidundigoyipy huingbi töxyjäy.” ²⁸ ïich miich ajcxy nimaayb, pen ji pin huindicxy tüg töxyjäy, e jot'adib; nejaty, ti je' anajty ñitundigóoyi ma yjot yhuinma'ñ.

²⁹ Pen yi' mhuin a'oy'amybi xyajtundigoyamb tim yajpidzim; jac'oy co tüg'idu'mbi mhuin ytiyoyipy ca' ydi co cixyca'px mnicxipy jünjoty. ³⁰ E pen yi'

mgí' a'oy'amybi xyajtundigoyamb tím ixpux etz najtzjibibi' jiguem; jac'oy co tüg mgí' ytigoyipy ca'ydí co mminicxipy metz mgí' jijnjoty.

Jesús yaj'ixpicy co jäy ca'p huaad ytöxyijc ixmach mañ'ajtningixy

³¹ Nañ jadu'n ymiñ jaaybety: “Pín ixmajtzp ytöxyijc, huen möhuipy tüg necy ti ycixpi co ñay'ixmájtzigixy.” ³² Hich miich ajcxy nimaayb, pen ji pín ixmach ytöxyijc, e ca' anajty ti ytundigooy miid huingbi yéydijc, je yéydijc anajty nigiydeyiyb ytöxyijc co anajty ytundigooy miid huingbi yéydijc; pín yéydijc pijcp miid je töxyjäy huidibi anajty ti yaj'ixmach, pocytumyb je' anajty.

Jesús yaj'ixpicy nej nguyduunim tibi n'ahuaniyim ma Dios yhuinduu

³³ Miich ajcxy mnejhuuyb nej jecy'ajty m'aptijc mdeedytjic ajcxy yajnimay: “Ca' nigo ti m'ahuanihuipy, mguyduipy jadu'n nej anajty ti mminañ.” ³⁴⁻³⁶ Per ich miich ajcxy nimaayb: ni mga'ibaadip ni mgacapxpaadip; ni mgamina'nip; “y'ijxpy tzajpjoty,” com yí' Dios chinaydac. E ni mgamina'nip; “y'ijxpy naaxhuiñybi,” com Dios yajpatp oy ytimyaaajty. E ni mgamina'nip; “y'ijxpy Jerusalén,” com jim je' Dios chajptijc; ni mga'ibaadip ni mgacapxpaadip mgohuajc, com ca' mjaty myaj'ahuimbity poob o tzixy tüg cöhuay. ³⁷ Hue' janchtiy, tiydudägy minaangixy: “oy” o “ca'.” E pen miich ajcxy anaxy jaccapx jadu'n mujcu' y'ayuc je' anajty ajcxy mgapxpy.

Jesús yaj'ixpicy co ca'p huaad jibic nyajhuimbijtim

³⁸ Miich ajcxy mnejhuuyb co jecy'ajty yajminañ: “Pen ji jäy mhuin xyajpidzimi, nañ tím jadu'n yhuin myajpidzimipy; pen ji migüg mditz xyajpidzimi, nañ jadu'n myaj'ahuimbidity.” ³⁹ Per ich miich ajcxy nimaayb: Ca' myaj'ahuimbidity jibicpi ma migügtjic; pen ji pín xycoxy ma mhuiñyijp tüg adu'mbi, jac tím mo' jadüg adu'm'amybi. ⁴⁰ Pen ji pín xyxiy e xypigaani yí mnijen, najtz'ixi', huen xyajnicxi nañ jadu'n mjocx huit. ⁴¹ Pen ji pín adzip tzimy xyajminicxañ tüg kilómetro jiguemity, yajnicx jac tím jadüg kilómetro. ⁴² Pen tijaty xypijctzoohei, mo'. E pen ji pín xyminuucxañ, yajnuucx.

Co ndzojcm nmidzip

⁴³ Jadu'n ymiñ jaaybety nej jecy'ip Moisés yjay: “Migüg'adii yí' huidibi xymigüg'ajtp, e midzip'adii yí' huidibi xymidzip'ajtp.” ⁴⁴ Hich miich ajcxy nimaayb: Tzoc yí' huidibi ajcxy xymidzip'ajtp, etz mibijctzoohei ma Dios huen y'oy'ajtin paady yí' huidibi xyñigapx xyni'ojuyb, e nañ mi'oyjäy'at yí' huidibi xyca'ixamb. ⁴⁵ Huin'it miich ajcxy xy'ung'adii by yí' Dios tzajpjotyí' huidibi xyii yajtixcp yajjajp ma oyjäydijc etz ma jibicjäydijc, nañ jadu'n yajtüy ma jibicjäydijc etz ma oyjäydijc. ⁴⁶ Pen miich ajcxy mdzojcpy je' huidibi xychojcp, ¿ti jäygidaacin yí' m'ocpadamyb? Nañ jadu'n yí' ajcxy yja'iditzp yí' pocyjäydijc etz yí' yajcogüejtpidijc. ⁴⁷ Pen miich ajcxy mgapxpocxyp yí' mjugymigüg, ¿ti oybi yí'? Nañ jadu'n ajcxy yí' yja'iditzp yí' huidibi ajcxy ca' Dios nejhuuygixy. ⁴⁸ Jäy'ajtcix tudägy jadu'n nej ajcxy yí' mdeedy tzajpjotyí' ytudägy.

6

Jesús yaj'ixpicy co nduunim oy yjäy'ajtin

¹ Ca' mdungixy je' oybi ma jäy y'ixy yhuindicxy miid co mdzachya-huindicxaangixy co mdungixy oybi. Pen jadu'n m'iditzcixy mDios Teedy huidi jii by tzajpjoty tzinaayb, ca' ajcxy xymöhua'ñ je' oy'ajtin. ² Paady co mbubedipy mmigüg, je' ayoo bi jäy huidi yajmayajtpy tijaty, ca' huaad mni-gapxy mnimiydägy o mnaygömayii co anajty ti mmöy tijaty. Yí' jadu'n iditzp je' jäy huidi mij cix najjihuuyip huidi anidaacp co huen jäy y'ixyii mijpidägyii co

anajty jadu'n y'idíich. Janch ñich miich ajcxy jadu'n nimaaygix co yí' ti patcixy je oy'ajtín. ³ Co miich mmöhuipy mmigüg tijaty yajmayjajtpy, hue' janchtiy mdunipy ca' myajnejhuíhuipy huídi mïd mnaymigüg'adyii. ⁴ E co miich amoñ m'idípy, mDios Teedy huídi iixp co amoñ tijaty mduñ, je' xymöhuamb tüg oy'ajtín mayjäyduum.

Jesús yaj'ixpicy nej Dios nmibijctzoohuim

⁵ Co miich ajcxy Dios mmibijctzoy, ca' jadu'n m'idíctzixy jadu'n nej je jäy huídibi capxtacp ma Dios huin aguy ahuac aguy. Yí' ajcxy capxtacp ma Dios huáctina' jii by tzajptigoty jaydebi jäy y'ixiib etz ymijpidägiiyb. ñich jëyi jadu'n nimaayb, co jadu'n oy'ajtín'adiib. ⁶ E co miich Dios mmibijctzoy, nixc tigoty etz m'agíhuipy je mdijc aguu. Huin'it Dios mibijctzou. E je Dios y'ijxpy ymidooyb co jadu'n mmibijctzoy, e je' je m'oy'ajtín xymöhuipy mayjäyduum.

⁷ Com Dios mmibijctzoy, ca' m'agapxiyo'cip je huídi anajty ti m'occapxi, jadu'n nej ajcxy y'idíctzixy huídi ca' nejhuíygixy Dios ytiy'ajt. Yí' ajcxy huinma'ñyidägy co mïd ajcxy ymay'ayuc huin'it ajcxy ymidoohuuyb. ⁸ Ca' jadu'n m'idíctzixy jadu'n nej je' ajcxy; mDios ñejhuuyb ti miich ajcxy myajmayjajtpy ma anajty ca'ni mbijctzooyñi. ⁹ E jadu'n miich ajcxy Dios mibijctzohuipy, jadu'n mina'nip:

Dios Teedy, miich huídibi tzajpjoty tzinaayb; huindzigíy miich mxii y'ity.

¹⁰ Huen miñ ya miich yí' m'ane'min. Huen mdzojcin yajcuyduñ ma je jäy yjot yhuinma'ñ jadu'n nej yajcuyduñ jii by tzajpjoty.

¹¹ Mooygich ajcxy ngaayin n'uucin jabom jabom.

¹² Méecxibich ajcxy nbocy ngaydey huídibi ñich ajcxy ndundigooyb, jadu'n nej ñich ajcxy meecxyich huídibi ajcxy xymidundigooybich.

¹³ Ca' m'aixíy co ñich ajcxy nhuinma'ñ tigoyipich. Yajñhuaatzcich ajcxy ma yí' jibicpi. Co miich yí' mje' je cötujcin, je mic'ajtín etz je oy'ajtín huinixii huinitempo. Amén.

¹⁴ Pen miich ajcxy mhuinmeecxyp je huídibi xymidundigooygixp, je mDios Teedy huídibi tzajpjoty je' nañ jadu'n xyhuinmeecxip miich ajcxy mbocy. ¹⁵ E pen miich ajcxy ca' pin jäy mhuinmeecxy nej xymidundigooygixy, nañ jadu'n mDios ca' xyhuinmeecxip ajcxy ma ti mdundigooygixy.

Jesús yaj'ixpicy nej huaad n'ijtím jaygaay

¹⁶ Com ajcxy m'ida'nip jaygaay jay'ügy (mina Dios mmibijctzoogixy), ca' mnaybidáaccigixy tajy may, jadu'n nej ajcxy idíctzixy yí' huídibi ajcxy minamb co Dios mibijccixy e ca' yjanchity. Yí' ajcxy yajtigajchpy yhuiñyijp jigix jäy ajcxy oc'ixiib co jaygaay jay'ügy y'ijtcixy; jëyi jadu'n oy'ajt'adiib.

¹⁷ Miich ajcxy co m'idípy jaygaay jay'ügy jotcujc naybidägii, caax mgohuajc etz puj mhuin mjijp, ¹⁸ ca'ydi myajniguëxig mayjäyjoty co m'ity jaygaay jay'ügy, hue' janchtiy myajniguëxig ma je mDeedy huídibi ca' yaj'ijxy; e je mDeedy huídibi iixp huídibi miich ajcxy ca' mduñ iixna' quëxna' yí' xymöhuipy oy'ajtín mayjäyduum.

Je jugy'ajtín tzajpjoty

¹⁹ Ca' nigí m'adzocy huídibi ya naaxhuiñ, je' co ya huindigooyb oy ytimtijty huídibi yí' huech yajhuindigooyb, huídibi tougaayip etz ma je meetzpi ajcxy meetzcixy pigiccixy tijaty. ²⁰ Je' miich nijot'ajtcixy je' oy'ajt huídibi miich ajcxy Dios xymöhuamb jii by tzajpjoty ma ca' huech yajhuindigooy ni ti, e nañ ni ycatougaayii ni ti, etz ma je meetzpi ca' ajcxy meetzcixy pigiccixy tijaty.

²¹ Ma miich ajcxy mïdity je oy'ajt nañ jii by ajcxy mjot mhuinma'ñ pidäg.

Yí' mhuin jadu'n yí' nej tüg tñcxin

22 Yi mhuiin yi' yi' jadu'nip nej tüg tücxin jain ma mninix, e paady pen ca' miich yi' mhuiin xyajtundigoy, tüg'óciy mjot mhuiinma'n huadz yi'. 23 Pen miich mhuiin xyajtundigoyb nañ jadu'n mjot mhuiinma'n huadi miich mïd ca' y'oyity, jadu'n yi' nej coodzpï jac tim nigï ca' y'oyity ca'ydi je coodzpï!

Dios etz je comeeñ'ajtin

24 Ni tüg pin ca' huaad mïd tuñ metz huindzin com mijotma'ti tüg je', e jadügpi chogipy; o ixtijipy tüg e jadüg ymigüg'adiyb. Nañ jadu'n ca' huaad miich ajcxy metz m'ojadajtcixy, Dios etz je meeñ.

Dios ycuend'ajtpy yi' yjyä

25 Paady iich miich ajcxy nimaaygixy: Ca' mdzachhuinmaaygixy ti ajcxy mnitzinahuipy, ti ajcxy mgayipy m'ügipy o ti ajcxy mhuit'adiyb mducxy'adiyb. MDios yi' ti xymooygixy je mjogy'ajtin, e paady ycixpi yi' nejhuïyb ti ajcxy myajmayajtpy. 26 Oc'ix miich ajcxy yi' joon huadi queec-huidijtp. Yi' ajcxy ycaniipcixy ycatungixy, nañ ni ca' yi' ajcxy yujcpijccixy ma tze'x. Miich ajcxy mDios Teedy huadi tzajpjoty tzinaayb, je' moydaayb huadi ajcxy yi' yjïcxyp. E miich ajcxy mjactzoobatp ca'ydi yi' joon. 27 ¿Pin ji ma miich ajcxy, ooy mij jahuinmay, jëbi tüg nuux yjacyeegyï?

28 ¿E na'amy co miich ajcxy mdzachnidajy mdzachnimay mïd je mhuit mducxy ycixpi? Oc'ix miich ajcxy nej yoñ tüg je pijy huadi yajpatp tun nigap. Ni yi' ycatuñ ni piidy. 29 Per janch tïy'ajt jadu'n nej nimaaygixy, ni je comeeñjyä huadi yxiï rey Solomón, ni ycaquipxiy je' yxoixin mïd je pijy. 30 E pen mDios xojxpy jadu'n je aay ujtz cham etz tzojcy ytïtztäy ñicxtäy, jac nigï miich ajcxy Dios xymöhua'n huadibi myajmayajtpy, miich ajcxy huadibi hueeni mmibjcin. 31 Paady ca' nigooibi mdzachhuinmaaygixy ma ajcxy mbaadip ti mgayipy m'ügipy o ti mhuit'adiyb mducxy'adiyb. 32 Yi' jäy ajcxy huadibi ca' mibicy yi' Dios oy tzach nijot'ajtcixy jadayaabi, per miich mDeedy huadibi tzajpjoty je' ñejhuïyb ti miich ajcxy myajmayajtpy. 33 E pen miich ajcxy mïdacy Dios jayjip ma mjot mhuiinma'n etz mguydun ajcxy yi' y'ane'min, huin'it miich ajcxy Dios xymöhuiipy tijaty myajmayajtpy. 34 Paady ca' mhuiinmaaygixy cham mïd je jabom cixpi, je' co je jabombi ymimiñ je tajin mayin. Tzoc mijotcujc'ajtim je tajin mayin huadi cham mninajx nyajnajxim.

7

Ca' mbocy icy yi' mmigüg

1 Ca' m'ix'ijxpy mba'ijxpy ti mmigügtjic ytundigooyb, jigix ca' Dios xtyidunipy chaachytunipy. 2 Pen miich m'ix'ijxpy mba'ijxpy mmigügtjic ti ytundigooyb, nañ jadu'n miich Dios xtyidunipy xychaachytunipy, e yi' quipxi'n huadibi miich mhuaamyb quipxi'n, nañ yi' Dios yajtunamyb ma miich. 3 ¿Nej co miich m'ixy huadibi mmigüg ytumy e hueeni ytundigooyb, e ca' mnay'ixyï huadibi miich jac mij mdundigooybi? 4 ¿Nej jëbi mmigüg m'ocnimäy: “Nbubedamybich miich ca'ydi mjacpocytuñ”, e miich yam m'ocmïdipi jac mij pocy? 5 Miich ci'm mnayhuin'ïñyï. Nicx jayjip mbocy mgaydey ocyajhuadz, huin'it jëbi mbubety je mmigüg.

6 Ca' mmöy yi' jibicjäydjic huadibi Dios yjë'ajty co nicx camij'ijx camijpidaaccixy; ni mgayegipy Dios y'ayuc ytiy'ajt ma yi' jäy ajcxy huadibi ca' tzojccixy Dios y'ayuc ytiy'ajt.

Nbijctzoohuim n'amidoohuim Dios

7 Mibijctzougix yi' Dios e yi' xymöhuiipy ajcxy; ixtaaygix, huin'it mbáatcixipy; cogapxiygix e ahuadzïp ajcxy mdiçc agu. 8 Com pin tijaty pijctzoob

ypaatyp yí; e pin tijaty ixtaayb ypaatyp yí; e pin cogapxiiyb ma tijc aguu, yaj'ahuaatzip ytiyc aguu.

⁹ ¿Nej ji jada' miich ajcxy nidügti co m'ung pijtzoohuipy tzajcaagy nej mmöhuipy tüg tzaaji? ¹⁰ ¿O pen ypijctzooby tüg acx nej mmöhuipy tüg tza'ñi?

¹¹ Miich ajcxy oy mjbicjäyity e mjaipcy ajcxy nej m'ung m'anäg mmöhuipy je oybi. ¡Nīgi Dios Teedy tzajpjotipi möhua'ñ je oybi pinjaty pijtzoob!

¹² Tzinaaygix tiydudägy mïd je mmigügtijc, pen miich ajcxy mdzojcpy co je mmigügtijc chinähuipy tudägy mïd miich ajcxy; com jadu'n y'ane'my Moisés yley etz yí Dios y'ayuc najtzcaxiiyb ajcxy ñecy.

Je xützpi tü'aa

¹³ Tigiigix ma yí tigiyyidac xützpi: yí tigiyyidac etz yí tü'aa huídibi ja'tp ca'oydactuuby mij huin yí, e may jäy ajcxy oy ji ytiigiygixy. ¹⁴ E janch je tigiyyidac etz yí tü'aa huídibi ja'tp ma je jugy'ajtin huinixibi, xüdz je' etz tzip naxiiyñi; janch tim hueeni jäy huídibi ji nicxiiyb.

Yí jäy yhuinma'ñ mïd ñiguëxigy pen ojjäy o pen ca'

¹⁵ Nayguend'ájtigix mïd yí jäy anijatyipi huídibi ajcxy minamb co Dios ytiy'ajt yaj'ixpijcp, huídibi ajcxy huídijtp janch yung janch naxy ñaybidaaccixy nejhuíy ooy oy huinma'ñ mïdity; nigoobi ajcxy jadu'n ñaybidägyii, ymïd ajcxy jibic-huinma'ñ. ¹⁶ Miich ajcxy jëbi m'ijxcapy nejaty ajcxy mïdity chinaayin yjugy'ajtin; ca' pin caamuxy cha'm tucy ma apy quipy, e nañ jadu'n ca' pin higo tim tucy ma jaam'apy quipy. ¹⁷ Je quipy huídibi ooy y'oyity, oy yí ytiim'aty. Je quipy huídibi ca' y'oyity, ca' yí oy ytiim'aty. ¹⁸ E je oybi quipy ca' huaad ytiim'aty jibic. E je quipy huídibi ca' y'oyity ca' ytiim'aty oy. ¹⁹ Tüg'óciy je quipy huídi ca' oy ytiim'aty, cixy yajpujxp je'. Chi jada' yajnögy. ²⁰ Nañ jadu'n miich ajcxy jëbi mnejhuíy jadu'n nej jäy yjäy'aty co m'ixipy nej chinäy.

Ca' nidüg'óciy jäy ajcxy ytiigihuipy ma Dios

²¹ Ca' nminaanim nidüg'óciy jäy ajcxy ytiigihuipy jii by tzajpjoty huídibi xyñimaaybich: “Huindzin, Huindzin”, jëda'ajty ajcxy tigihuamb huídibi ycapxymidooyb je Dios chojcín y'ane'min. ²² Mayjäy oy mina'na'ñ huin'it xi huin'it tiempo: “Huindzin, Huindzin”, ti ich ajcxy ngapxhuäcxy miich m'ayuc, e mïd miich mxii ti ich ajcxy nyajpidzimy je ca'oybi; etz mïd miich mxii ti nduñ ich ajcxy mij huinma'ñ. ²³ Huin'it nimähuipy: “Caminaabi miich ajcxy ti nga'ixy'adyii; huinhuäctutcich miich jibic tumbidijc ajcxy.”

Je mejtznajxpi je tiy'ajt cop

²⁴ Nidüg'óciy pinjäy huídibi xymibijcpich etz midooyb jadu'n nej ich n'ane'myich yí ajcxy quipxyjaty mïd je jäy huídibi cohuinma'ñ huídibi ytiyc ycojp ma yhuingixity. ²⁵ Co ymicpojtüy etz ycomy je mij nii, ca' ypadyii nügom je tijc, je' co anajty cixy je' ycojyity. ²⁶ Per yí ajcxy huídibi midoob e ca' cuyduñ huídibi ngapxpich, je' jadu'nip nej tüg jäy huídi janch loci huídi ytiycocj ma pu' jot. ²⁷ Co ymiñ je mic poj tuu, chi ycomy je mij nii. Chi yciday je ytiyc; mij ayo'n oy yjajti.

²⁸ Co Jesús ycapxtay ymiydactay, chi je jäy ooy huinmay jadu'n nej anajty ti yaj'ixpicy. ²⁹ Com je' co Jesús anajty yaj'ixpicy nej tüg huídibi cötujcín mïd, ca' yjadu'nity nej je escribas ajcxy.

8

Jesús yajtzögy tüg jibic nibützpa'mmïdipi

¹ Co Jesús oy chooni ma je cögop, chi ypagidaci mayjäy. ² Huin'it ñimiini tüg jäy jibic pützpa'mmiidpi. Chi ycojxtinay'ahuñy ma Jesús yhuinduu. Chi minañ: —Huindzin, pen m'a'ixiñyb jëbi xyajtözgyich.

³ Huin'it Jesús nïdooñ je jäy. Chi ñimay:

—Ndzojcpyich, jëbi mdzögy.

Co Jesús jadu'n ñimay je pa'mjäy huin'ítty je ypützpa'm oy ytigooy. ⁴ Chi Jesús ñimay:

—Ca' pin myajnimäy; ñicx janchtiy ma je teedy. Minicx tüg huindzigi'ñ huidi Moisés y'ane'my. Huin'it jëbi y' jäy ajcxy ixipy co ti m'agidägy.

Jesús yajtzögy tüg capitán romano ymang

⁵ Co Jesús yja'ty jim Capernaum huin'it tüg capitán ñimiini e ycohuanñy. ⁶ Chi ñimaay:

—Huindzin, jim ñich tüg ndumbi ma ñich ndijc huidi tim cöcnaayñip, ca' y'ocyücxni.

⁷ Chi Jesús minañ:

—Ñich ñicxy nyajtzögy.

⁸ Chi je capitán y'adzooy:

—Huindzin, ca'p ñich n'oyjäyity, ca' yhuaadity mdigihuipy ma ñich ndijc, jëyi miich ñigoo capxy e ti anajty ñich ndumbi chögy. ⁹ Ñich nañ jadu'n ane'my n'ityich, e nañ nmïdich soldadtijc c'am. Co ñich ñimäy: “Ñicx”, ñicxp; e co ñich ñimäy: “Min”, mimb; e co n'ane'myich je nbödumbich huen tijaty tun, ytumyb.

¹⁰ Co Jesús jadu'n midooy, chi ñigoobi yciñy ycuejty. Chi ajcxy ñimay huidi pahuidijtip:

—Janch tiy'ajt jadu'n nej ñimaaygixy, ma Israeljäy ymiñ, ca' jadu'n ti nbaadyich huidi oy mibicy jadu'n nej jadyaabi yëdyjc. ¹¹ Ñich jadu'n ñimaayb co mayjäy oy miinaangixy xipidzimy'amy xicidägy'amy, chi ixtäga'ñ quipxyi miid Abraham, Isaac etz Jacob jiihy ma Dios y'ane'min. ¹² Je judíojäy huidibi ixipy ajcxy jëbi yjatzinäy jiihy tzajpjoty, je' ajcxy ñicxamb agootztuby, jiihy ajcxy yjihuipy yäxipy etz y tützmúcxipy ytützqueedipy.

¹³ Huin'it Jesús ñimay je capitán:

—Ñicx ma mdijc. Jadu'n nej miich xymibicyich, ti ñich yam nguyduñ.

Chi je tumbi oy chögy tim huin'it hora.

Jesús yajtzögy Pedro ymïd töxyjäybi

¹⁴ Chi Jesús ñicxy ma Pedro ytijc. Chi ijxy je Pedro ymïd co jim cijx'am ycöcnäy miid je toyba'm. ¹⁵ Co Jesús cñixajy huin'it je toyba'm ñajxy. Chi pidigy. Chi mic'amy ni'ixñy je caayin uucin.

Jesús yajtzögy mayba'mjäy

¹⁶ Co oy chu'ñyñi ycoodzñyñi huin'it yajmimiñ ma Jesús may je huidi ca'oybi miid. E miid y' y'ayuc yjeda'ajty ypidzimiday je ca'oybi, e huin'it tüg'ócy je pa'mjäy chooctay. ¹⁷ Jadyaabi je' ytuni yjajti jigix yajcuyduñ jadu'n nej je profeta Isaias minañ: “Yi' c'm ajt nyuu nba'm ti xyajzocaañim etz y' pijcin ixin ti yajnicxtäy.”

Je pinjaty anajty panicxam Jesús

¹⁸ Co Jesús ijxy janch mayjäy anajty ti yjübigiyii, chi ñimay co huen najxcixy jim'amy mejy ninaxy. ¹⁹ Huin'it ñimiini tüg escriba. Chi ñimay:

—Huindzin, nbanicxamybich miich oy janch tim ma'amy ma anajty mnicxy.

²⁰ Chi Jesús y'adzooy:

—Je huaax ymíid je' ajcxy yjut, e je joon ymíid je' ajcxy ype'ñ. Per ñch, je jäy huídibi tzoon jiiby tzajpjoty, ca' nmíididyich ma nmähuiibich ma nbócxibich.

²¹ E jadügpí ydiscípulo ymíinañ:

—Huindzin, nicx jayíjp ndeedyich n'ocyajnaaxtigíyich huin'it nbanicxip.

²² Huin'it Jesús y'adzooy:

—Pamiingich, ixmajtzicx yí öcpi huen ymí'öcpi yajnaaxtigíyii.

Jesús jijpcogapxíy je micpoj etz je mejy co anajty ooy ypidígy

²³ Huin'it Jesús oy ybarcotigíyñi. Chi ypadzooni je ydiscípulos ajcxy.

²⁴ E jim anajty ytüyöy mejyhuingíxy, huin'it mic poj ñaymíbidzimí. Janch mic y'ocpidicni je mejy jigo jigo je barco cayajnidigoy, pero Jesús anajty chachmaab. ²⁵ Huin'it oy ymígapxyii yajmäybidígyii je' ydiscípulos ajcxy. Chi ñímaayi:

—¡Huindzin, ocyajtzoogich ajcxy! ¡Cheeby ñch ajt n'ocquiniim!

²⁶ Huin'it Jesús y'adzooy:

—¿Na'amy co mdzachtzigíyixni? ¡Miich ajcxy hueeni miidity mibijcin!

Huin'it Jesús ypidígy. Chi mígapxy je poj etz je mejy. Huin'it je mejy etz je poj yhua'cxijptay. ²⁷ E je' ydiscípulos ajcxy nigoobi y'occix y'occuejtni chachminaangíxy:

—¿Pín yéydijc jada jada', co je mejy je poj ti ycapxymídooyii?

Je Gadara jäy ajcxy huídibi anajty ca'oybi míid

²⁸ Co Jesús yja'ty ma yí níiba' ma yí Gadara ñaax ycajp, chi metz yéydijc, huídi anajty ca'oybi míid oy yijpcoyöyíyii anajty ajcxy, ti chooñ ma je öcpi jut. Yí jäy ajcxy ooy janch ahua'n, e ca' anajty huaad jim ni pín ñaxy ma je tü'aa. ²⁹ E co anajty Jesús jim ñaxy huin'it janch ahua'n ymígapxqueeci:

—¿Ti miich mdunamyb míid ñch ajcxy, Jesús, miich Dios y'ung? ¿Nej ti mmiñ jayíjp co xychaachtúngixich ma ca'ni xi tiempo paady?

³⁰ Jiguem ma anajty ajcxy je' yajpaady jim anajty may'idzim y'ojccixy. ³¹ Chi je ca'oybi ymíinañ:

—Pen miich xyajpidzim ñch ajcxy, xyaj'adigíyixy xyajjottigíyixy yí may'idzim.

³² Chi Jesús ñimay yí' ajcxy:

—Nícxicx.

Huin'it ñíhuaatzi je yéydijc je ca'oybi. Chi oy ytigíyixy je ca'oybi ma je idzim. Huin'it je idzim oy ñígöboyictäy. Jiiby ajcxy yjicxtäy.

³³ E je jäy ajcxy huídibi anajty idzim ycuend'ajtp, huin'it ajcxy yqueegy míid je tzigí'ñ. Chi co ajcxy yja'ty cajpjoty, huin'it ajcxy ytigíy míydaacpi jadu'n nej anajty ti ytuñyii ti yjadyii. ³⁴ E huin'it chonday je mayjäy ma je cajp. Chi ajcxy ninicxy je Jesús. E co ajcxy ijxpaty, huin'it ajcxy cohuaníy co huen pidzimni ma je naax je cajp.

9

Jesús yajtzögy tüg jäy címätpi tecymätpi

¹ Chi Jesús ybarcitigíy. Chi ñicxy jim'amy mejyñaxy. Chi ooyjäty ma yci'mgajp. ² E jim yajmimiñ tüg yéydijc huídibi anajty címät tecymät. Yajcíy ymiñ ma'ndzaayjoty. E co Jesús íjxy co ymíid je mibijcin, chi nimay je pa'mjäy:

—Jotcugi' miich, ti je mbocy nhuinmeecxyich.

³ Huin'it nijéjty je escribas ajcxy, je ley yhuindzin, jot'ajti: “Jadayaabi yéydijc capxtigooyb yí' ma Dios co jadu'n ymíina'ñ.” ⁴ Com Jesús ñejhuíy jadu'n nej anajty ajcxy je jäy tzachjot'ájtigíxy, chi ajcxy nimay:

—¿Nej co ajcxy jibic mdzachjot'ájtigixy jotjoty huinma'ñyjoty? ⁵ ¿Huidibi ca' chipity, co nminá'ñibich: “Ti yi mbocy nhuinmeecxich”, o co nminá'ñibich: “Pidig etz tüyöy”? ⁶ Hich ndzojcpyich co miich ajcxy mhujnhuñhuip co hich ti ndzooñich tzajpjoty e paady nmüdich je cötujcin ya naaxhuiñ e jëbi nhuinméecxibich pocyjäy ajcxy.

Huin'it Jesús nimay je cämätpi tecymätpi:

—Pidig, huijtzig yi mdögy etz nicxni ma mdijc.

⁷ Chi je cämätpi tecymätpi ypidigy. Chi ñicxy ma ytijc. ⁸ E co je mayjäy jadu'n ijxy, huin'it ajcxy ooy jihuiy huinmay. Chi ajcxy ooy ojadaty yi Dios co anajty ti yecy je mic'ajtin ma mayjäy.

Jesús nimay Mateo: “Pajamgich”

⁹ Co Jesús oy chooni jim, huin'it ijxy tüg yëydijc, yxii Mateo, huidibi anajty iñaayb ma yajcogüejttac. Chi nimay:

—Pajamgich.

Huin'it Mateo ytinayigy. Chi panicxy Jesús.

¹⁰ Jadu'n ytuni yjati co Jesús jim ycaj ma Mateo ytijc, e may nañ jadu'n ymiñ yajcogüejtpidijc etz pocyjäydijc. Chi ajcxy jim tú'ciy y'ixtactay müd Jesús etz müd yi' ydiscípulos. ¹¹ Co je fariseos jadu'n ijxy ajcxy, chi nimay ajcxy je' ydiscípulos:

—¿Na'amy co yi mHuindzin ycaymucy müd je yajcogüejtpidijc je pocyjäydijc?

¹² Co Jesús jadu'n midooy huin'it nimay ajcxy:

—Ca' yajmayjaty tzoydumbi huidi ca' ajcxy ypigyii, jëyi huidi ajcxy pijcip.

¹³ Nicx ixpijccixy nej ymiñ jaaybety ma Dios ñecy: “Hich ndzojcpyich co miich ajcxy müd'adipy je pa'ayo'n, ca'ydi co myajhuindzigiy tijaty iyujc.” Ca' hich ti nmiiñich ma je jäy ajcxy huidibi ca' pocy müdity. Hich ti nmiiñich müd yi pocyjäy ycixpi co huen jothuimbijttaaygixy ma Dios.

Amidoogixy Jesús müd je' ycixpi co jaygay y'ijtcixy

¹⁴ Huin'it ajcxy ymiñ Juan ydiscípulos ma Jesús. Chi je ajcxy nimay Jesús:

—¿Na'amy co hich ajcxy etz fariseo ajcxy ayuu'ijtcixy, e yi' ajcxy huidibi xymüdhuidijtp ca' ajcxy ayuu'ijtcixy?

¹⁵ Huin'it Jesús y'adzooy:

—¿Nej jëbi yaj'ayuu'aty jäy ajcxy huidi yajpaatpi ma je pijcipi yajnixiñduñyi, pen quipxyi yam yajpaady müd je huidibi pijcip? Minamb je xii je tiempo mina je pijcipi yajtzonñiyb, huin'it janchtiy ajcxy jëbi y'ayuu'ajtcixy.

¹⁶ Ni pin tuc huit ca' agiyii müd tüg pedas jemyhuit, com nigi je tuc huit ñajtzüdziiy, chi nigi o'ctiy yjajtni. ¹⁷ Ca' pin pidägy vino nii ma tucpi cochac, yciidzip je', e tüg'óciy anajty ti y'ayoodäy je vino nii müd ñigochac. Pidägipy ajcxy jemy vino ma jemy cochac, chi jadu'n ca' ayoohuipy je vino, ni huindigoyipy je cochac.

Je Jairo ñix, etz je töxyjäy huidibi Jesús yhuit nïdoni

¹⁸ Ma anajty Jesús jim ycapxy ymiydägy huin'it ymiñ tüg mijjäy. Chi ñaygojxtinay'ahuiy ma Jesús yhuinduu. Chi yminañ:

—Nniiñich ti y'ögy. Nicx ma hich ndijc etz mginixajipy, jugypigipy ya.

¹⁹ Huin'it Jesús ypidigy. Chi ñicxy müd je ydiscípulos ajcxy. ²⁰ Ma anajty ajcxy jim ytüyöy huin'it ymiñ jixci'py'amy tüg töxyjäy huidi yxii ybo' ti mi'ijtiyñi majmetz jimijt. Chi nïdoni Jesús yhuitpa'. Huin'it ñajxy je' ypa'm. ²¹⁻²² Jadu'n anajty ti yjot'adyii: “Oy Jesús jëda'ajty yhuitpa' nnidónibich, ti

ñich anajty n'agidäygiçh." Huin'it Jesús yhuäc-huimbijty. Chi huindixpejty je töxyjäy. Chi nimay:

—Jotcuje'at miich, ti m'agidägy jigix co xymibicyich.

E tim huin'it hora oychögy je pa'mjäy. ²³ Chi Jesús oy yjätý ma je mijjäy ytijc. Chi ijxy je xuuxpidijc mïd je ymïgügtijc ajcxy huïdi chachyaaxcixy co anajty ti y'ögy je töxy'anäg. ²⁴ Huin'it Jesús nimay ajcxy:

—Queccix ya, yi pi'ctöxy'anäg ca' yi' ti y'ögy. Hue' yi' maab.

Huin'it ajcxy nigo nixiicy yajxiicy Jesús. ²⁵ Co anajty je jäy ti ixquejxtäy, chi Jesús ytijctigïy ma anajty je töxy'anäg huijtnäy. Chi majch ma yci'. Chi ypidïgy. ²⁶ Chi je jäy oy yajnejhuïydaayñi ma je jïmbi naax cajp nej anajty ti ytuñyii ti yjadyii.

Jesús yajtzögy metz jäy huintzpi

²⁷ Ma anajty jim ti choñ huin'it metz jäy huintzpi ypamiini. Chachñimäyïi jadu'n:

—¡Pa'ayoogich ajcxy, miich David y'ap y'oc!

²⁸ Chi Jesús yajpajätý ma anajty ti yjättägy. Co ytigïy tigoty, chi Jesús yajtiy:

—¿Nej mmibijcpy miich ajcxy co jëbi nyajhuindixiccixy?

Huin'it je' ajcxy y'adzooy:

—Mibijcy ñich ajcxy, Huindzin.

²⁹ Huin'it Jesús nidoñ je jäy ajcxy huintzpi ma yhuin. Chi nimay ajcxy:

—Jadu'n nej miich ajcxy mmibicy, jadu'n ytunïb yjadïb.

³⁰ Chi je' ajcxy y'ijxïgy. Huin'it Jesús y'ane'min pidacy:

—Ca' huaad pin myajnejhuïygiçy.

³¹ Co je' ajcxy ñicxni, chi ajcxy ooy nigapxy nimïydacy co Jesús anajty ti yaj'ijxicigixy.

Jesús yajtzögy tüg jäy uumbi

³² Co anajty je' jim ti chongixy, huin'it ajcxy mimiñ ma Jesús tüg yëdyjç huïdibi uum huïdibi anajty ca'oybi mïd. ³³ E co Jesús yajpidzïmy je ca'oybi, chi je mayjäy ooy ycïjxy ycuejty ajcxy. Chi ajcxy mïnaangixy:

—Ni camina jadu'n ycayaj'ixy ya ma jada Israel naax cajp.

³⁴ Per je fariseos jadu'n ymïnaangixy co Jesús je' mïd je ca'oybi ymic'ajt yajpidzïmy ca'oybi ma jäy.

Jesús ymïd pa'ayo'n ma mayjäy

³⁵ Jesús jadu'n yhuïdijty cajp cajp yaj'ixpiçy majaty tzajptijc. Yajhuin-gapxiy je jäy Dios y'ayuc. Etz nañ jadu'n yaj'agidacy huen ytim huïdi yuu huen ytim huïdi pa'mity. ³⁶ Co Jesús jadu'n ijxy je mayjäy, chi oy pa'ayooni co yi' ajcxy ca' mïdity ni pin huïdibi jëbi ñajtzcapxiy Dios y'ane'min. Yi' ajcxy jadu'n yajpatp nej cöbixy huïdi ca' mïdity cuend'ajtpi. Ca' nejhuïygiçy pin y'ane'mip e pin ypanicxip. ³⁷ Huin'it Jesús nimay yi' ydiscípulos ajcxy:

—Tiy'ajt yi', janch mij je tung e hueeni je tumbidijc. ³⁸ Paady pijctzou miich ajcxy ma Dios co huen quexy tumbidijc ma yi' ytung.

10

Jesús huin'ixy je majmetz ydiscípulos

¹ Huin'it Jesús huoy je nimajmetz discípulos. Chi moy ajcxy cötujcin jëbi huaad yajnihuäch je huïdi ca'oybi mïd. Etz nañ jadu'n yaj'agidägip huen ytim huïdi yuu huen ytim huïdi pa'mity.

² Jada je' je nimajmetzp yxï: Simón, huïdi nañ jadu'n yajtijp Pedro, etz ymïguëx Andrés; Jacobo etz y'uch Juan, Zebedeo ymang; ³ Felipe, Bartolomé,

Tomás, Mateo, je yajcogüejtpi; Jacobo, Alfeo ymang; Lebeo, huidi nañ jadu'n yajtijp Tadeo; ⁴ Simón, je cananista; e Judas Iscariote, je huidi ycíyeyc Jesús agojix.

Jesús quejxy je' ydiscípulos ajcxy ayuccapxhuäcxpi

⁵ Chi Jesús quejxy yi nimajmetzpi, e jadu'n najtzcapxíy ajcxy:

—Ca' ajcxy mnícxípy ma je naax cajp ma ajcxy je jäy chinäy huídibi ca' ajcxy Israeljäyity. Ni mgatigíhuipy ajcxy ma Samaria naax cajp. ⁶ Nigi jac'oy co ajcxy mnícxípy ma je Israeljäy huídibi ca' nejhuíy huídibi ca' paduñ Dios ytiy'ájtín. ⁷ Nicx miich ajcxy capxhuäcx Dios y'ayuc co ti yhuingoni Dios y'ane'mín. ⁸ Yaj'agídaaccíxy yuujäy pa'mjäy huídijaty pützpa'm ymíid. Myajjugypíccíxy tíibi ögy. Myajnihuädzip huídi ca'oybi ymíid. Ninigoobi miich jada cötujcín ti myajmoogyíxy, nañ ninigoobi yejccíxy.

⁹ Ca' ni ti meeñ mmíníxcíxy. ¹⁰ Ca' mbijty mmíníxcíxy tü'amgíxpi. Mmíníxcíxy jéda'ajty yi mhuit huídi míid ma mníncx. Ni mgamínícxíp huíngbi mgíg etz mdajc; com ycopícity co je cajpjäy xyajcáaygíxípy xyaj'úuccíxípy miich ajcxy.

¹¹ Co anajty mjäty miich ajcxy ma tüg cajp nídiu yajtiú pinjäy jim tudäcyíp. Jim ajcxy mhui'mípy ma je' ytíjc íxti cooni ajcxy mdzooníp. ¹² Co anajty miich ajcxy mdígíy tígoty huín'it mgapxpócxíxípy je codíjc jadu'n nej tzocy. ¹³ E pen je codíjc ymíhuaad'ajtpy, yejccíxy jim íbocxín capxpooxín. E pen je jäy ca' ytudägyíty, ñaadigí'adíp huídi anajty ti mgapxcíxy. ¹⁴ E pen ca' pin xycöbígaaangíxy, e ni pin xycamidohuaani ajcxy m'ayuc, pídzímgíx jim ma je tíjc o ma je cajp. Chi ajcxy mdecy huínnebípy, je' je' je tíy'ajt co ca' miich ajcxy ti pocy míidity. ¹⁵ Janch tíy'ajt jadu'n nej nimaaygíxy co anajty je xíi tiempo paady ma anajty yajtiyduna'ñ je naaxhuíñjyä, jac nígi yajtzaachytuna'ñ yi' ajcxy ca'ydi yi jäy ajcxy huídibi tzínaayb ma Sodoma cajp etz ma Gomorra cajp.

Ixhuídijtín pahúidijtín

¹⁶ ¡Ocmídoogíx! Íich yam miich ajcxy nguejxyp majaty yi jäy huídi jíbíc-huínma'ñ míid. Jadu'n nipaady nej íich nguexyích cöbixy ma je lobi. Huijy cujc ajcxy mnaypídägíib jadu'n nej tza'ñ, per yung naxy jadu'n nej muuxy. ¹⁷ Mnayguend'adiib ajcxy je' co yi jäy ajcxy xycíyegaangíxy ma ajcxy míjtungmíidpi etz myajhuobaangíxy ma je judíojäy ajcxy ñaymujctac, ¹⁸ íxti xyajnicxaangíxy ajcxy ma je gobernador etz je reydíjc ajcxy míid íich ycíxpi; e jim íich miich ajcxy xyñigapxípy ma je jäy ajcxy yhuínduu, e nañ jadu'n majaty anajty je jäy ajcxy huídibi ca' yjudíojäyity. ¹⁹ Co anajty ajcxy xyajcídígíy je míjtungmíidpi, ca' ajcxy oy mhuímmaayípy nej m'ocnimáhuipy. Co anajty paady je tiempo, huín'it íich miich ajcxy myajnimáhuipy nej ajcxy mgapxípy. ²⁰ E je ayuc huídibi miich anajty ajcxy mgapxpy, ca' miich anajty je' ajcxy m'ayuc'ájtígíxy, je Dios Teedy anajty yjihuí'ñ, je Espíritu Santo, xyajcapxp miich ajcxy.

²¹ Huín'it yi jäy ajcxy ñaygíyegáanígíxy miñ xyipy tüg quéxtíjc co huen yaj'ögyii. E je ungededy cíyega'ñ y'ung; je ung'anäg míbídíga'ñ je ytaj yteedy etz yaj'ócíp ajcxy. ²² Tüg'ócíy je jäy ajcxy ca' ajcxy xy'ix'anípy xychoga' nípy míid íich nxíi ycíxpi. E pin xymíbíjcpích amumdügjot íxti mabaad y'ögy, yi' ajcxy y'alma tzögípy. ²³ E co anajty miich ajcxy jäy xy'ixhuídity xypahúidity ma tüg cajp, níxcíx ma huíngbi cajp. Janch tíy'ajt jadu'n nej nimaaygíxy co ca'ni anajty mgapxhuäcxty ayuc tíy'ajt ma tüg'ócíy je Israelcajp co nhuím-bídípyích, íich, je jäy huídibi tzoon tzajpjoty.

²⁴ Tüg yaj'ixpijcpí jac nīgi mij'ajtin miiđity ca'ydi je huidi ixpijcp, e tüg huindzin jac nīgi mij'ajtin miiđity ca'ydi je' ytumbi. ²⁵ Jëb jotcuyc idipy je discípulo co jadu'n yajpaadipy jadu'n nej yhuindzin, e je tumbi jotcuyc idipy nej yhuindzin. Pen jāy minamb co ñch nmiiđich ca'oybi, jac nīgi ymina'na'ñ co miich ajcxy miiđity.

Pin jëbi yajtzigiy

²⁶ Ca' ajcxy mdzigiy yi jāy ajcxy. Ca' ji ni ti yüch ity nicx ycaniguëxigy; nañ ni ti ji ycayajtuñ ayüch ameech nicx ycayajnejhuïy. ²⁷ Huidi ñch miich ajcxy ayüch nyajniimaayb, capxpídzimgix miich yi' mayjäyjoty, e huidi ajcxy midooyb ameech, capxpídzimgix miich yi' mic ma tüg cögop. ²⁸ Ca' ajcxy mdzigihuip je jāy huídib ninicx yaj'öcp etz ca' huaad yi' ajcxy yaj'ögy je alma. Yi' miich ajcxy mdzigiygixy je Dios huídib pidacp je alma etz je ninicx mijjinjoty.

²⁹ ¿Nej ca' jāy ajcxy toogy metz pi'cjoon miiđ tügpi pi'cmeëñi? Per ca' ni tüg huaad ycäy naaxhuiñ, pen ca' tzocy je mDios Teedy huidi jiiby tzajpjoty. ³⁰ Miich ajcxy mgöhuay ac michoy yi'. ³¹ Paady miich ajcxy ca' mdzigihuipy, jac nīgi miich ajcxy mdzoubaady ca'ydi je joon.

Pinjaty ca'p midzöydu'ñ Jesucristo mayjäyjoty

³² Yi jāy ajcxy huidi xymibijcpich etz xyñidiy'ajtyich ma jāy yhuinduu, nañ jadu'n ñch yi' nidiy'ajtyich ma ñch nDeedy huídibi jiiby tzajpjoty. ³³ Per je jāy ajcxy huidi ñch xycoyützpich ma mayjäy ajcxy yhuinduu, nañ jadu'n yi' ngoyützip ma ñch nDeedy yhuinduu huídibi jiiby tzajpjoty.

Miid Jesús ycixpi yjiijity naymidzip'adi

³⁴ Ca' miich ajcxy mhuinmay co ñch ya ti nmiñich miiđ co nmöhuaangixy jotcuyc'ajtin ya naaxhuiñ. ³⁵ ñch ti nmiñich co nyajtziptunipyich jāy miiđ yteedy; töxyjäy miiđ ytaj etz xecy miiđ yxecy. ³⁶ E jadu'n miich ajcxy mdzip'adiyb mgi'mjuugy mgi'mmigüg.

³⁷ Yi jāy ajcxy huídibi tzojcp ytaj yteedy jac nīgi ca'ydi ñch, ca' yi' ypaadyii co njäy'adiybich; e pin ymang o ñix tzojcp nīgi ca'ydi ñch, ca' ypadyii co njäy'adiybich; ³⁸ e pin ca' yci'mdzojcin y'ijxmajztäy etz ca' ñaybidägyii ycixjot huinjot ma ñch, ca' mihuaadity nicx njäy'adiybich. ³⁹ Pin yjugy'ajtin najtztzogyb, yajtigoyipy yi'; e pin yjugy'ajtin tigooyb miiđ ñch ycixpi, ypaadipy jugy'ajtin huinixii tzajpjoty.

Premio nganar'ajtim

⁴⁰ Pin miich ajcxy xycöbijcp, ñch yi' anajty xycöbijcp; e pin ñch anajty xycöbijcp, nañ ycöbijcpy anajty je huídibi ñch ti xyquejxyich ya naaxhuiñ. ⁴¹ Je huídibi cöbijcp je jāy huídibi Dios y'ayuc capxhuacxip, je' co yi' ymiñ miiđ Dios ycixpi, yi' jadu'mbi je oy'ajtin ypaadipy. Nañ jadu'n je huidi cöbijcp je oybi jāy miiđ co oy yjäyity, yi' jadu'mbi oy'ajtin ypaadipy. ⁴² Je huidi yaj'ucp tüg vaso ñi ma huenyimpinjäy miiđ co xymibicyich, janch ñch miich nimaaygixy, ypaadipy oy'ajtin.

11

Juan je Bautista yquexyöybi

¹ E co Jesús anajty ti najtzcaxiydäy je tiyy'ajt ma je nimajmetzpi ydiscípulos ajcxy, chi Jesús ñicxy yaj'ixpijcp etz ayuccapxhuäcxp majaty cajp huinduy agonbi.

² E Juan je Bautista hue' je' anajty yajpaady pujxtigoty. E co nejhuiy tijaty mijhuinma'ñ anajty Jesús ytumyib, chi quejxy metz je' ydiscípulos ajcxy ma Jesús yajpaady. ³ Chi Juan ydiscípulos ajcxy y'amidooy Jesús:

—¿Nej miich je' je Cristo huidibi anajty minamb o jëbi ñch ajcxy huingbi n'ahuijxcixy?

⁴ Chi Jesús y'adzooy:

—Ñicxcix miich ajcxy nimaaygix yi Juan, je Bautista, tijaty miich ajcxy m'ijxpy mmidooyb co ndumyibich. ⁵ Miich ajcxy yajmüdmüydäg je Juan, jadu'n nej je huintzpi nyajhuindicxigiyich; je címät tecymät nyajtzoocypich; je huidibi jibic nübützpa'm ymüid nyajtzoocpyich; je' ajcxy huidibi cönat nyajmidohücpich; je öcpi ajcxy nyajjugypijcypich; etz je ayoobtijc, je huidibi yung naxy yjothuinma'ñ nyajmüdmüydacypich Dios y'ayuc. ⁶ Jotcuyc y' ajcxy pinjaty xymibijcpich amumdügiot etz ca' ni nej yjotmetzci' müid ñch.

⁷ Co Juan je Bautista ydiscípulos ajcxy ñicxni, chi Jesús ytigüiy nimüydaccoty Juan je Bautista ytung ma je mayjäy, chi ymüinañ:

—¿Ti miich ajcxy oy m'ixy jim müjtigüduum? ¿Tüg nähuaax huidibi poj xijpi?

⁸ ¿Ti ajcxy oy m'ixy? ¿Ti oy m'ixy, tüg jäy huidibi ooy y'oyxöxyity? ⁹ ¿Ti miich ajcxy oy m'ixy? ¿Nej ti m'ixy tüg Dios y'ayucnajtzcaxiibybi? Janch co ti m'ijxcixy tüg jäy jac mij ca'ydi tüg Dios y'ayucnajtzcaxiibybi. ¹⁰ Je' jada je jäy huidibi Dios nigapxy ma ñecy co Dios jadu'n ymüinañ:

Cham nguexyich ñch nguexyöyp jayijp ma miich. Je' yaj'oyihuip je jäy yjot yhuinma'ñ müid ñch ycixpi, tim jadu'n nipaady nej jihuüy jäy tü'aa yaj'oyiy co rey ymiinañ.

¹¹ Co yi jäy ajcxy huidibi ti chinaaygixy ixti chambaad ni pin ti ca' yajpaady mij jadu'n nej Juan je Bautista; per pinjaty ñch xymibijcp, yi' jac mij naxam ma Dios y'ane'my ca'ydi Juan.

¹² Maabi Juan je Bautista ytundigiy, ixti chamni janch mayjäy amumdügiot ñejhuühua'ñ Dios y'ayuc, je' co ajcxy ytigühua'ñ ma Dios y'ane'my. ¹³ Tüg'öciy ajcxy je Dios y'ayucnajtzcaxiibybi etz Moisés ycötujcin ñigapxy ajcxy je ané'min ixti cooni Juan oy ymiñ. ¹⁴ Pen miich ajcxy mübijcpi Moisés ycötujcin etz Dios y'ayucnajtzcaxiibybi ajcxy, Juan je Bautista je' je' je Elías huidibi anajty miinamb. ¹⁵ Pinjaty mido'n müid huen mido'mbügipy ñch n'ayuc.

¹⁶ Jesús yjacmüinañ:

—¿Pin müid n'ocyajtügühuibyich yi jäy huidi ajcxy cham tzinaayb? Tim jadu'n yi' ajcxy nej pi'ctijc huidibi ajcxy iyiyb ma mayjäy yjuygixy ytooccixy, müyaaxcixy müdinaaygixy ymüigütiyc: ¹⁷ “Ti njayajxüxyich flauta e ni ca' ti m'ejtzcixy; ti ñch ajcxy öcpi njahuinyäxich, e miich ajcxy ca' ti müäxy.” ¹⁸ Chi Juan, je Bautista, anajty müiñ, e je' ca' ycay y'ügy. E miich ajcxy münaangixy co Juan ca'oybi ymüidity. Jada pi'c'anäctijc nipaady nej miich ajcxy. ¹⁹ Chi ñch je' je jäy huidibi tsoon tzajpjoty nmüiñich, e caaybich uucpich, e miich ajcxy münaangixy: “Ijxcix, cha tüg yëydijc, janch cax janch vino'ucp huidibi mügüg'ajtpy yajcuetpidijc etz pocyjäydijc.” Je Dios tiy'ajt ji je' ñiguëxigü.

Je cajp huidibi ca' ycapxymüidoogixy

²⁰ Chi Jesús ojcoty je maygajpjäy ma anajty may mijhuinma'ñ ti tuñ, com je mayjäy ca' anajty yjothuimbidaangixy ma Dios. Chi Jesús ymüinañ:

²¹ —¡Ay miich ayooob ajcxy huidibi tzinaayb jim Corazín! ¡Ay miich ayooob ajcxy huidibi tzinaayb jim Betsaida! Co ixypy ñch ti nduñich jecy'ajty je mijhuinma'ñ müjtzög'ajtin ma je Tiro etz Sidón cajp, jadu'n nej ñch ti nduñich ma miich ajcxy, ti ixypy je Tiro jäy etz Sidón jäy nijothuimbijtcixy etz iñaaygixy saco ñjen ñcuyjam ixcuyjam, je' je tiy'ajt co ooy ytajcixy ymaygixy

müid ypocy ycixpi. ²² Paady miich ajcxy yam nimaaygixy. Co anajty Dios tıyduna'n je naaxhuiñybi jäy, huin'it miich ajcxy Dios xychaachytuna'n jac nigı, ca'ydi je jäy ajcxy huıdibi jecy'ajty tzınay jim Tiro etz Sidón.

²³ Miich ajcxy, Capernaum jäy, mnaybidáacigixy jadu'n nej jihuıy mdigıhuaangixy jiıby tzajpjoty. Per ca' yjadu'nıty. Mdigıhuam miich ajcxy ayoodactuuby. Ayo'n tzaachypi mbadaangixy. Co ixypıy ıch ti nduñıch jecy'ajty je mıjhuınma'n mıj tzög'ajtin ma Sodoma cajp, jadu'n nej ti nduñıch ma miich ajcxy mgajp, chambaad ixypıy ity yı jadu'mbi cajp, ca' ixypıy Dios cayajtigooy. ²⁴ Paady ıch miich yam nimaaygixy. Co anajty Dios tıyduna'n je naaxhuiñyjäy, huin'it miich ajcxy myajtzaachytuna'n jac nigı, ca'ydi je jäy huıdibi jecy'ajty tzınay ma Sodoma ñaaxjot.

Mingixy ma ıch e mbóocxıxıpy

²⁵ Chi Jesús ytigıy Dios mıbijctzooyb, ymınañ:

—Dios Teedy, ıch miich n'ıbaatpıch ngapxpaatpıch. Miich müid je mıj cötujcın jiıby tzajpjoty etz ya naaxhuiñ. Com miich ti mnajtzcapxıy yı m'ixpijcin ma je ayooıbtıj huıdibi tzınaayb jotxeemy, e ti myüch yı m'ixpijcin ma yı ixpıcytıj cohıınma'ñyđıj. ²⁶ Jadu'n, Tat, ti mduñ, com jadu'n miich ti mdzocy ti mjäygidägy.

²⁷ Jesús yjacmınañ:

—ıch nDeedy ti xyajcıdıgydıyich tüg'ócıy mıc'ajtı oy'ajtı. Ni pın ca' ijxcapy pın je' y'ung, jäy nDeedyıch tügpajc. Ni pın ca' ijxcapy pın je' nDeedy'ajtpıyıch, jäy ıch, je Dios y'ung tügpajc, etz jacjadyı huıdibi ıch, je Dios y'ung, nya-jnıguëxıgamyıch. ²⁸ Min ma ıch nidüg'ócıy miich ajcxy huıdıjaty taj mayb myajpatp ma mjot mhuınma'ñ, ıch miich ajcxy nmöhuamyb jotujc'ajtin. ²⁹ Cöbıcy ycögi'. İjxpıcy ajcxy ıch ndıy'ajtı etz cuydun ıch n'ayuc, com ıch nmıdıch mecxtujcın etz ca' ıch amıj agıx nayjıhuıyııjıch. ³⁰ Ca' ıch n'ane'mın ymıcity, e ıch ndung ca' nımjaaajty.

12

Je discıpulos ajcxy moc cojc yajmujcp pocxxıduum

¹ Chi tüg xıı Jesús yhuıdıty müid ymıgügtıjcy ma tüg camjot. E hue' anajty sábadı xıı, je pocxın xıı. Chi Jesús ydiscıpulos ajcxy oy anajty yubögyıı. Chi ajcxy ytıgıy trıgo tım nıxajztutp etz yjıcxıy ajcxy je ypajc. ² E co je farıseos ajcxy ijxy nej Jesús ydiscıpulos ajcxy y'ıdııtzıxıy, chí ajcxy nımay Jesús:

—Oc'ıx nej miich mdiscıpulos ajcxy y'ıdıch. Hue' ajcxy tumıyb huıdibi ca' huaad ma sábadı xıı yajtuñ.

³ Per Jesús mınañ:

—¿Nej ca' miich ajcxy mgapxyñı ma Dios ñecy, jadu'n nej David etz ymıgügtıjcy ajcxy ıdıch jecy'ajty co yuböccıty? ⁴ Pues yı' ajcxy tıgıy ma Dios ytıjcy. Chí cay ajcxy je tzajcaagy huıdibi anajty jäy ajcxy ti yajhuındzıgıy Dios. Je' je tzajcaagy huıdibi teedy ajcxy anajty paatıp cayıpy. ⁵ ¿Nej ca' miich ajcxy ti mgapxyñı Moısés ycötujcın necy co je teedy ajcxy jėbi ytuñ ma Dios ytıjcy sábadı xıı, e ca' nan tundıgooyb je' ajcxy?

⁶ ıch miich ajcxy nımaaygıxyp, jac nigı mıj cötujcın nmıdıdııch, ca'ydi je cötujcın huıdibi je teedy ajcxy yajtuñ ma Dios ytıjcy. ⁷ Pen miich ajcxy ti mhuınjıhuıy nej yhuımbıdzımy jada Dios y'ayuc, co Dios jadu'n ymınañ: “ıch ndzojcpy co miich ajcxy müid'ıdıpy pa'ayo'n ca'ydi co ajcxy myegıpy huındzıgı'ñ.” Pen miich ajcxy ti mhuınjıhuıy jada ayuc, ca' ixypıy mbocy'ıxy ma ıch nmıgügtıjcy huıdibi ca' ma ti ytundıgooy. ⁸ ıch, je jäy huıdibi tzoon

tzajpjoty, nm̄dich ane'min, jaydēbi nimāyich je jāy ajcxy ti jēbi tungixy sábado x̄i.

Je yēydijc huīdibi anajty yci'itdzip

⁹ Chi Jesús choñ jim, ñicxy ma je judío jāy ñaymujctac. ¹⁰ E jiiby ma je naymujctac anajty tūg yēydijc huīdibi yci'itdz. Je fariseo ajcxy x̄ihuamyb Jesús, paady ajcxy y'amidooy, ymīnañ:

—¿Nej jēbi tūg pa'mjāy chōgy sábado x̄iij?

¹¹ Chi Jesús y'adzooy:

—Pen ya ma miich ajcxy ji tūg jāy huīdibi cōbixy yjutcōgāy sábado x̄i, ¿nej ca' je' ñicxy yajp̄idzimy mic'amy? ¹² Nīgi tzoaatp tūg yēydijc ca'ydi tūg cōbixy, paady Moisés ycōtujcin ca' capx'aducy co tūg oy'ajtin nduunim sábado x̄i, je pōocxin x̄i.

¹³ Chi Jesús nimay je yēydijc:

—Xajtiy yī mgi'.

¹⁴ Co xajtiy yci', chi choocy, e huī'my quipxyjaty m̄id je yci' oybi. Chi je fariseos ajcxy yjotmātcoty, yhuinma'ñ ixtaaygixy ajcxy nej huaad Jesús ocyaj'o'ccixy.

Tūg ayucnajtzcax̄iyin m̄id Jesús yci'ixpi

¹⁵ E co Jesús nejhuīy nej yī' ajcxy yhuinma'ñ m̄idity, chi jim choñ. E ooy mayjāy ypanicxi Jesús, Jesús yajtzoocy anajty tūg'óciy pinjaty pa'm m̄id.

¹⁶ Jesús ane'my je pa'mjāy ajcxy co ca' huaad nigapxy nimīydāgy co yī' je' je Cristo. ¹⁷ Jadu'n Jesús ane'my je pa'mjāy jigix yci'ixpi yca'pxi'py je ayuc huīdibi je profeta Isaias yaay jecy'ajty, co Dios jadu'n ymīnañ:

¹⁸ Jada je' iich ndumbi huīdi ti nhuin'ixyich. Yī' iich ooy ndzocyich njihuīyich etz ooy njotcujcich m̄id yī'. Iich yī' nmōhuamybich iich njihuī'ñ mic'ajt. Yī' capxhuācxip iich n'ayuc jadu'n nej ndzaachytuna'ñich naaxhuiñjāy ajcxy m̄id ajcxy ypocy yci'ixpi.

¹⁹ Yī' ni ymīgūgtijc ca' oja'ñ, ni yca'ya'ñ, ni ycatināhua'ñ, ni pin ca' m̄idoohuīpy ma cajp cujc.

²⁰ Ca' yī' tzaachytuna'ñ ayoobitijc etz huīdibi ayo'ndumb ijtp. Etz nañ ni ca' yajtigoya'ñ huīdibi ayoobitijc yco'ōgy'ungdijc yjijp'ijxpy. Jadu'n nej jāy cayajhuindigoy tzajcapy huīdi huīdyip etz ni cayajpich je mecha huīdibi uuxy uuxy t̄icxp. Ixti mabaad anajty yajcopicy y'ane'min tudāgyipi.

²¹ E yī' mayjāy ooy yjijp'ixa'ñyii.

X̄igixy Jesús co m̄idity mujcu' ymic'ajt

²² Chi m̄id miiñ ajcxy ma Jesús tūg jāy huīdibi huīntzip etz uum. Je' anajty m̄id ca'oybi. Chi Jesús yajtzoogy, e chi y'ijx̄igy etz ycapx̄igy. ²³ Co Jesús jadu'n tuñ, chi je mayjāy yti'gy huīnmay'ahuīdijt, chi ajcxy ymīnañ:

—¿Nej jada je', je David y'ap y'oc huīdibi rey'adam?

²⁴ Per co je fariseos ajcxy nejhuīy nej je jāy huīnmay, chi ajcxy ymīnañ:

—Jadaabi yēydijc yajp̄idzimy ca'oybi m̄id je mujcu' huīndzin ymic'ajt (ca' yī' yjējity je Cristo).

²⁵ Per Jesús ñejhuīyib anajty ti je fariseos ajcxy yhuinmaayb, chi ymīnañ:

—Pen tūgpicy tungm̄idpi ix̄yipy ñaybijc-huācxigixy, etz ñaym̄idziptzōonigixy ix̄yipy ac jēyi, pues cixipy yī' ajcxy y'ane'min. Pen tūg cajp o tūgpicy jugymīgūg ix̄yipy ñaybijc-huācxigixy, pues ca' ajcxy y'idaangixy tūgmucy. ²⁶ Pen Satanás, je ca'oybi huīndzin, yajp̄idzimy ix̄yipy ca'oybi ma je jāy ajcxy, chi ci'm ix̄yipy je ca'oybi ti ñaybijc-huācxigixy, e je Satanás ymic'ajt ca' y'ida'ñ. ²⁷ Miich ajcxy minamb co iich nyajp̄idzimyich ca'oybi m̄id je ca'oybi huīndzin, je

Beelzebú ymic'ajt. Pen t'iy'ajt jadu'n nej miich ajcxy m'ina'ñ, je j'äy ajcxy hu'idibi xymijnicxpejt miich ajcxy, ¿nej y'i' ajcxy paady mic'ajt ma je mujcu' co ajcxy yajpidzimy ca'oybi ma je pa'm j'äy? Pues ca', paady y'i' ajcxy t'iy'ajt yejcp co miich ajcxy ti mgapxtigoy co ym'inaangixy co ñich nyajpidzimyich ca'oybi m'iid Satanás ymic'ajt. ²⁸ Per ñich nyajpidzimyich ca'oybi ma pa'mj'äy m'iid Dios y'ihui'ñ ymic'ajt. Paady miich ajcxy nejhu'iyb co ti ymiiñ yj'äty je Dios y'ane'm'in ma miich ajcxy.

²⁹ (Dios ycötujcin jac mic ca'ydi je ca'oybi ycötujcin, paady j'ëbi nyajpidzimyich ca'oybi.) ¿Nej j'ëbi t'üg j'äy ytigüy ma t'üg micpi j'äy yti'c etz p'igaani tijaty y'i' ym'iid, pen ca' j'ayijp yci' ytecy xojtz'ity? Pues ca'. Cooni j'ayijp yci' ytecy xojtz'ity, huin'it j'ëb p'ijcip tijaty ym'iid. ³⁰ P'injaty ca' xymijnicxpetyich, xymidzipich y'i'. P'injaty ca' tuñ m'iid ñich co j'äy nyaj'ixpicyich, hue' je' ajcxy j'äy yajhuinma'ñy'digooyb.

³¹ Janch ñich miich ajcxy nim'äy co Dios j'ëbi huinmecxip t'üg'óciy pocy hu'idibi j'äy ytungixp etz t'üg'óciy j'ibicpi hu'idibi j'äy ycapxcixp. J'ëyi janchtiy co p'injaty capxtigooyb m'iid je Esp'iritu Santo, je Dios y'ihui'ñ ymic'ajt, ca' Dios huinmecxip nim'ina. ³² P'injaty j'ibic xyñigapxpich xyñimiydaccpich, je' huinmecxam. Per je hu'idibi j'ibic ñigapxpy je Esp'iritu Santo, je' ca' huinmecxa'ñ ni jadachambi tiempo, etz ni cam'ina xii.

Y'i quipy y'i' yt'im y'i' m'iid yaj'ijxcapy

³³ Pen miich ajcxy mnejhu'ihuamy je quipy pen oy quipy, o pen ca', j'ëbi mnejhu'ihuapy co je quipy nicxy yt'im'aty. Pen oy je yt'im, miich m'ina'nip co oy je quipy. E pen ca' oy yt'im'aty, huin'it miich ajcxy m'ina'nip co ca' y'oy'ity je quipy. ³⁴ J'ibic j'äy miich ajcxy, jadu'n nipaady nej j'ihu'iy ahua'n iyujc xy'ung'ajtp. Pen miich ajcxy j'ibic j'äy'ajtp, ¿nej j'ëbi miich ajcxy oybi ayuc mgapxipy? Jadu'n nej j'äy ajcxy yjot yhuinma'ñ m'iidity, ac tim jadu'n ajcxy ycapxy. ³⁵ Je j'äy hu'idibi oy ayuc ycapxy, ym'iid oyjot oyhuinma'ñ paady oy ayuc capxy. Je j'äy hu'idibi j'ibic ayuc capxp, ym'iid j'ibic jot j'ibic huinma'ñ, paady j'ibic ayuc capxy. ³⁶ ñich miich ajcxy nimay co anajty paady je xii je tiempo m'ina Dios t'iyduna'ñ je naaxhuiñy'äy, huin'it ajcxy y'adzohu'ipy m'iid huen tim hu'idibi ayuc hu'idibi anajty ajcxy ti mgapxy. ³⁷ Com nejaty miich anajty ajcxy ti mgapxy je m'ayuc jadu'n miich ajcxy Dios xyt'iydunip. Com m'iid y'i' mgi'm ayuc y'i' m'iid m'oybidzimipy mhuätzpidzimipy. E nañ jadu'n m'iid y'i' mgi'm ayuc y'i' m'iid mbocyc'ahuipy.

J'ibicj'äydijc ajcxy pijctzoogixy t'üg ijxpejt m'ijhuinma'ñybi

³⁸ Chi nij'ëjity fariseos ajcxy etz escribas ajcxy Jesús nimay'i:

—Huindzin, n'ixamy ñich ajcxy miich t'üg m'ijxpejt.

³⁹ Chi Jesús y'adzooy:

—Y'i j'ibic j'äydijc ajcxy etz ajcxy hu'idibi ca' m'ibiga'ñ Dios ypijctzooyb t'üg ijxpejt hu'idibi tzomb tzajpjoty. Per Dios ca' yega'ñ jadüg ijxpejt. Ti Dios yecy t'üg ijxpejt ma Jonás. ⁴⁰ Com jadu'n nej Jonás jecy'ajty ijxpejt yejcy co y'ijty tug'üg xii tug'üg tzuum mejyoty ma acx ymoxac, nañ tim jadu'n ñich, je j'äy hu'idibi tzoon tzajpjoty, nyegamy ijxpejt jadachambi tiempo co n'idipyich tug'üg xii etz tug'üg tzuum naaxjoty. ⁴¹ Je mayj'äy hu'idibi anajty tz'inaayb ma Nínive cajp, ti jothuimbijtcixy etz ti ixmach ajcxy hu'idijaty j'ibicpi ajcxy ytumyib co Jonás capxhu'äcxy Dios y'ayuc ma y'i' ajcxy. Cha ñich ngapxhu'äcxyich Dios y'ayuc ma miich ajcxy, etz jac n'igi cötujcin nm'iididyich, ca'ydi Jonás; e ca' miich ajcxy mjothuimbity. Paady co anajty Dios t'iyduna'ñ je naaxhuiñy'äy, je Nínive j'äy miich ajcxy xyajpocyc'ahuam. ⁴² Nañ jadu'n je töxyj'äy reina hu'idibi tz'inay jecy'ajty ma madza'cruudz ypidzimy, y'i' je' x'id'ahuam je j'äy ajcxy hu'idibi

tzinaayb jadachambi tiempo, etz yajpocycähüüb ajcxy. Je reina tzoon jiguëgy nïcxy co amido'ida'ñ je rey Salomón ma capxhuäcxi Dios y'ayuc. Ji naaxhuiñ jadachambi tüg Dios ytiy'ajtmüdpí jac nügí ymijity, ca'ydi Salomón anajty, e ca' je jäy ajcxy mijpídäga'ñ.

Je jibic espíritu co jadüg'oc yhuimbity

⁴³⁻⁴⁴ Yi jäy ajcxy huidibi cham tzinaayb, quipxyjaty ajcxy müd je ca'oybi. Co je ca'oybi ypidzimy ma je jäy, chi je' ñïcxy jim mijtigüduum y'ijxtacy. Co ca' paty ypocxtac, huin'it ymína'ñ: "Huimbidaambich ma je jäy yjot yhuinma'ñ ma ñich ti n'octzombi." Co je ca'oybi yjäty ma anajty ti chinäy, chi paty je jäy yjot yhuinma'ñ ooy yhuätzity etz yajxon ypedigity oy oyduñ. ⁴⁵ Chi je ca'oybi ñïcxy oy yajtzoñ jahuixtuc ca'oybi jac jibicpi ca'ydi je'. Chi ajcxy ytigüy ma je jäy yjot yhuinma'ñ, e chinay ajcxy jüby. Huin'it je jäy jac'öctiy oy yjajtni, ca'ydi jadu'n nej anajty jayjip'aty.

Jesús ytaj etz y'uch miguëx ajcxy

⁴⁶ Jesús yaj'ixpijcpy anajty je mayjäy, co oy yja'ty je' ytaj etz y'uch miguëx ajcxy. Hue' ajcxy yhui'my tiba'y. Je' ajcxy anajty ymígapxamy Jesús. ⁴⁷ Chi jäy yajnimay Jesús:

—Yi mdaj etz m'uch miguëx ajcxy, chiiby ajcxy tiba'y, miich xyjamígapxamb.

⁴⁸ Jesús y'adzooy, nimay je jäy huidibi ytaj y'ayuc yajnajxi ma yi':

—¿Pin jäy miich ajcxy mdijy co ñich ndaj'adyii etz ñich n'uch'adyii nmigüg'adyii?

⁴⁹ Huin'it Jesús nitziihuüy je' ydiscípulos ajcxy e ymínañ:

—Jada ñich ndiscípulos ajcxy jadu'n nipaady nej ñich ndaj etz ñich n'uch nmiguëx. ⁵⁰ Huen ytipinüty huidibi ytumyb ñich nDeedy chojcín, huidibi jüby tzajpjoty, pues jadu'n yi' ajcxy nipaady nej ñich ndaj etz ñich n'uch miguëx.

13

Je ayuccapxhuäcxi y'ijxpejt (niipi ijxpejt)

¹ Je huin'it xi Jesús choñ ma je tijc. Chi ñïcxy ma je mejypa' jim oy y'iñay'ihuüy. ² E co mayjäy ooy ñaymujci jim ma anajty Jesús iñay, chi Jesús ytigüy barcojoty. Per tüg'ócüy je mayjäy yhui'mday ma mejypa'. ³ Jesús ytigüy jäy yaj'ixpijcp müd jihuimbit ayuc, ymínañ:

—Tüg jäy choñ trigotim huijp. ⁴ E ma anajty jim ytimhuüy, huin'it je ytim oy naagity ycäy ma tü'aa. Chi jada' je joon ajcxy oy ymüñ etz ypiihuüy je tim. ⁵ Nijëjity ytim ycäy ma tzaanïc x ma anajty hueeni naax. Jada tim tzojc ymujxy. ⁶ Com hueeni anajty je naax ma je tzaanïc x, chi co oy xi'an ypadyii, chi ytütztay, com ca' anajty je ytictz yeegity. ⁷ Nijëjity tim oy ycäy ma ujtz'aajjot ma apyjot, e ujtz'öctay je trigo mang. ⁸ Per je tim huidibi ca'u ma oy ñaax, je' yon yajxon e tim'ajt may'amy; tüg ypi'cpajc üpxmajc oy yco'ity, jadüg pi'cpajc tugi'px oy yco'ity, jadüg pi'cpajc migo'px oy yco'ity. ⁹ Pinjaty mido'n müd huen mido'mbicy jada ayuc.

Ti ycxipi je ijxpejt

¹⁰ Chi je' ydiscípulos ajcxy nimijhua'cy Jesús, chi ajcxy yajtiy:

—¿Na'amy co myajtuñ jihuimbit ayuc co myaj'ixpicy je mayjäy?

¹¹ Chi Jesús y'adzooy, ymínañ:

—Miich ajcxy jaydeb mnejhuühuüpy huidibi Dios ñigapxyp ñimiydacpy coyüch'amy ma y'ane'mín. Jacjadyii jäy ca' ajcxy huinjihuühuüpy. ¹² Pinjaty

ymiid yajmöhuiꝑ nīgi, pinjaty hueen miid yajꝑigipy nīgi, oy ixyipy hueen jadim miidity. ¹³ Paady jihuimbit'amy nyajnimaaꝑich; jaydebi pinjaty ijxcixy, ñipaty nejihuıꝑ ca' ti ijxcixy; etz co ajcxy midoogixy, ca' ajcxy huinjihuıꝑ, ñipaty nejihuıꝑ ca' ti midoogixy. ¹⁴ Jadayaabi ytunyii yjadyii jadu'n nej je profeta Isaías jaaybejty yajhui'my ma jadu'n ymınañ:

Miich ajcxy midohuamy, per ca' mhuijihuıꝑhuangixy. Miich ajcxy m'ixamy, nañ ca' mhuijihuıꝑhuaangixy huıdibi ti m'ijxcixy.

¹⁵ Com jadayaabi jāy ooy ajcxy yjot yhuinma'ñ ti y'ahuimbity juuñ. Nej ajcxy yjamıdoy, ca' ajcxy ymidohui'mgixy. Nej ajcxy ja'ixy, ca' y'ijxhuı'mgixy. Nej ajcxy yjahuinjihuıꝑgixy, per ca' yhuinjihuıꝑ ma yjot yhuinma'ñ. Yı' ajcxy ca' yjothuimbidaangixy ma iich, jaydebi nyajnidzögibich ajcxy.

¹⁶ Per jotcuꝑc miich ajcxy, co miich ajcxy ijxhuı'my miid mhuiin huıdibi ndumybiꝑ, e mmıdo'mbiꝑy ajcxy iich n'ayuc. ¹⁷ Janch tiy'ajt jadu'n nej iich miich nımaaygixy. Janch tiy'ajt co may profetas ajcxy etz tudägy jāy ajcxy huıdibi tzinaayb jecy'ajty, ooy ajcxy ja'ixañ huıdibi miich ajcxy m'ijxyp cham, per ca' ajcxy ixy. E ooy ajcxy jamıdohuañ je ayuc huıdibi miich ajcxy midooyb cham, per ca' ajcxy midoy.

Jesús najtzcapxıꝑ je ijxpejt ma je niıꝑi

¹⁸ Amıdo'ıt miich ajcxy, jadu'n nej yhuimbıdzımy jada jihuimbit ayuc maabi je tım huıꝑi. ¹⁹ Je jāy ajcxy huıdibi amıdo'ıjtp Dios y'ayuc, e miꝑ'amy je ca'oybi yajꝑıdzımy Dios y'ayuc ma ajcxy yjot yhuinma'ñ, jadu'n ajcxy nıpaady nej trigo tım huıdibi cāb tūgıꝑc, e je joon ajcxy miꝑ'amy yꝑıımuꝑctay. ²⁰⁻²¹ Je jāy ajcxy huıdibi amıdo'ıjtp Dios y'ayuc janch jotcuꝑc, per co agapxıꝑyb paady, co tzaachꝑi mınaꝑy yajnaꝑy miid Dios y'ayuc ycıꝑi, chi miꝑ'amy ajcxy ixmajtznı Dios y'ayuc, jadu'n ajcxy nej je trigotım huıdibi ti ycāy ma tzaanıcx, huıdibi ca' oy ytictz miidity. ²² Je jāy ajcxy huıdibi amıdo'ıjtp Dios y'ayuc, e co ñıcxni, chi jāy dıgooyñı Dios y'ayuc miid jotcuꝑc'ajtıñ tzinaayın, comeeñ'ajtıñ etz adzoꝑcın. Jadu'n ajcxy nıpaady nej trigotım huıdibi ti ycāy ujtꝑjoty, e ca' ytım'aty miid co oy y'ujtz'ögy. ²³ Je jāy ajcxy huıdibi amıdo'ıjtp etz cöbıꝑc yajxon Dios y'ayuc amumdüꝑjot etz Dios y'ayuc ytumyꝑ ma ajcxy yjot yhuinma'ñ, jadu'n ajcxy nıpaady nej je tım huıdibi ti ycāy ma oy ñıax etz ti ytım'aty may'amy. Tūꝑ ꝑı'cꝑıꝑc iıꝑx majc oy yco'ity, etz jadüꝑ ꝑı'cꝑıꝑc tugi'ꝑx oy yco'ity, etz jadüꝑ ꝑı'cꝑıꝑc mıgo'ꝑx oy yco'ity.

Je ijxpejt co je jıbic ujtꝑ ymıxy ma je trigo cam

²⁴ Chi Jesús yaj'ıꝑıꝑcy jadüꝑ jihuimbit ayuc, ymınañ:
—Je Dios y'ane'mın jadu'n nıpaady nej tūꝑ yēyđıꝑc huıdibi trigo tım huıꝑ ma je' ycam. ²⁵ Per co ajcxy yma'öctay nidüꝑ'óciꝑy je cogam, chi ytıꝑıꝑy tūꝑ ymıdzıꝑ ma je ycamjot. Chi je midꝑıꝑ jıbic ujtꝑ tım oy huıꝑy ma je trigo cam. Chi ñıcxñı. ²⁶ E co je trigo oy yooñ, chi yꝑıꝑy. Nañ jadu'n je jıbic ujtꝑ oy yooñ. ²⁷ Chi je ytumbıdıꝑc oy yhuındzın yajnimay: “Huındzın, ¿nej ca' ti mnıꝑy ac trigotım? ¿Nej co jım nañ jadu'n jıbic ujtꝑ yajpaady?” ²⁸ Chi je cogam ymınañ: “Huen jada' nmıdzıꝑıꝑc jadu'n ti y'ıdıꝑc.” Chi je tumbıdıꝑc y'amıdoohui: “¿Nej mdzoꝑcꝑy co iich ajcxy nhuijxıꝑıꝑc je jıbic ujtꝑı?” ²⁹ Chi je cogam ymınañ: “Ca'. Pen miich ajcxy mhuijxıꝑıꝑy je jıbic ujtꝑ, ca' jecyıty co m'ahuijxmıꝑıꝑy nañ jadu'n je trigo. ³⁰ Ixmıatz, huen je jıbic ujtꝑ yeegy tūꝑmıꝑy miid je trigo, ixtı coonı anajty yꝑıdıꝑy je cosecha. Co cosecha paty, huın'ıt nguexa'ñıch je ndumbıdıꝑc co huen jayıꝑ ꝑıꝑıꝑy je jıbic ujtꝑ etz axotꝑıꝑy etz nõꝑıꝑy. E co yajꝑıdıꝑctay je jıbic ujtꝑ, chi yajꝑıdıꝑıꝑy je trigo e ıdıdıꝑıꝑy ma je tze'x.”

Je ijxpejt ma je mostazapıꝑc

31-32 Nañ jadu'n Jesús yaj'ixpijcy jadüg jihuimbit ayuc, ymínañ:

—Je Dios y'ane'mín jadu'n nipaady nej tüg mostazapajc huídibi tüg jáy ñiip ma je' ycam. E je mostaza ytiim je' jac tím mutz ca'ydi ni huídibi ujtz tím. Per co je mostaza ytiim ymujx etz yoñ, chi y'ahuimbijty jac mij ca'ydi jacjadyii ujtz. E hue' ñicxy yjaty janch mij, ixti joon ajcxy oy yqueec miiñ yqueec xijpy jim, pidägy je ype'ñ ma je mostaza y'aacx.

Je iixpejt ma je levadura huídibi ca' y'oyity

33 Nañ jadu'n Jesús yaj'ixpijcy jadüg jihuimbit ayuc, ymínañ:

—Je Dios y'ane'mín jadu'n nipaady nej levadura huídibi tüg töxyjäy ypidacpy miiid je harina, jigix je harina oy ypidägy.

Nej anajty Jesús yajtuñ je iixpejt

34 Tüg'óciy Jesús yaj'ixpijcy je mayjäy, jihuimbit'amy yaj'ixpijcy, e ni ti ca' jáy yaj'ixpijcy cayajnimäy jihuimbit ayuc. 35 Jadu'n Jesús ytúuñ, jigix yajcuyduñ je ayuc huídibi je profeta Isaías yjaayhui'm jecy'ajty, co jadu'n ymínañ: ñich ngapxamyich ac tím jihuimbit ayuc. ñich nigapxamybich tijaty huídibi ca' pin nejhuíy, mabaad Dios oga'n yajcojy je naaxhuiñybi.

Jesús capxticxni nej yhuimbizimye je jibic ujtz ma je trigo cam

36 Chi Jesús capxycijxy miiid je mayjäy, chi ñicxy ma tüg tijc. Chi ytiigiy tigoty miiid je' ydiscípulos ajcxy. Chi Jesús ydiscípulos ajcxy nimijhua'cy Jesús, ymínañ ajcxy:

—Tun may'ajt ñich ajcxy xyajhuinjihuíygy je jihuimbit ayuc co ti mnigapxy je jibic ujtz ma je trigo cam.

37 Chi Jesús yajnimay:

—Ñich, je jáy huídibi tsoon tzajpjoty, jadu'n ñich nipaady nej je jáy huídibi niip je oybi tím ma je ycam. 38 Je cam jadu'n nipaady nej tüg'óciy naaxhuiñyjäy. Je oybi tím jadu'n nipaady nej je jáy ajcxy huídibi cöbijcp Dios y'ane'mín. Je jibic ujtz jadu'n nipaady nej je jáy ajcxy huídibi cöbijcy ajcxy je mujcu' y'ane'mín. 39 Je jáy huídibi niipy je jibic ujtz, jadu'n yi' nipaady nej je ca'oybi. Je jibic ujtz cosecha, jadu'n nipaady nej je tiempo co anajty je naaxhuiñ ycixy ytiigoy. Je ajcxy huídibi yajpidic je cosecha, nipaady nej je ángeles ajcxy. 40 Jadu'n nej je jibic ujtz oy yajpujxigy etz yajpidacy jinjoty, nañ tím jadu'n ñicxy yjaty miiid je jáy ajcxy huídibi cöbijcp je mujcu' y'ane'mín co anajty je naaxhuiñ cixy ytiigoy. 41 Co anajty je naaxhuiñ ycixy ytiigoy, chi ñich, je jáy huídibi tsoon tzajpjoty, nguexamyich n'ángeles huen yajmujctäy je jáy huídibi je ymigüg yajtundigooyb, etz yi huídibi ajcxy jibic-huinma'ñ tumb. 42 Co yajmujctähuipy je jibicjäydic, chi ajcxy yajpidägipy mijjinjoty, jiiiby ajcxy yäxa'ñ etz ytitzmucxy ytitzqueecy miiid je ayo'n ycixpi. 43 Per je jáy ajcxy huídibi cuydumb Dios chojcín, idam ajcxy miiid Dios Teedy jiiiby tzajpjoty. Ymii'idamy ajcxy tüg oy'ajti, jadu'n nipaadip nej je xii ytícxin yjajin. Pen miich ajcxy mido'n miiid, mido'mbijc ajcxy ñich n'ayuc.

Je y'ixpejt je meen huídii yüchip

44 Je Dios y'ane'mín jadu'n nipaady nej meen huídibi yüch ijtp ma tüg cam. Per co tüg jáy paady je meen, chi mic'amy jadüg'oc yüdz tigach. Chi ooy yxondägy. Chi ñicxy etz tooctäy tüg'óciy huídibi ymiiid etz juy je naax.

Je y'ixpejt je perla huídibi tzoohuip

45 Nañ jadu'n Dios y'ane'mín jadu'n nipaady nej tüg ajuuyb adoocpi huídibi ijxtaayb tüg oybi perla huídibi tzoobatp. 46 E co anajty paady tüg perla huídibi janch tzou, chi ñicxy tooctigoydäy tüg'óciy huídibi ymiiid etz juy je perla.

Je acxmadzi'ñ y'ixpejt

⁴⁷ E nañ jadu'n Dios y'ane'min jadu'n nipaady nej tüg acxmadzi'ñ huidibi jäy mïd ycojibibby mejyjoty. Chi jibby ytigiy huen ytim huidibi acxity. ⁴⁸ E co anajty je acxmadzi'ñ y'uch mïd je acx, chi je jäy ajcxy yajpidzimy ma mejypa'áy. Chi ñay ajcxy jim mejypa'áy etz huin'ixy ajcxy je oyjatypi acx etz pidaaccixy ma ycach. Je acx huidijaty ca' y'oyity, je' ajcxy y'ixjibijp. ⁴⁹ Tim jadu'n nej ti yjaty mïd je acx, nañ jadu'n jada'ñ, co anajty ycixy ytigoy je naaxhuiñ. Huin'it je ángeles ajcxy ñicxa'ñ huindu'my naaxhuiñ huin'ixa'ñ je jibic jäydijc e pidäga'ñ ajcxy abicy, nañ jadu'n huin'ixa'ñ je oy jäydijc, e pidäga'ñ ajcxy nañ jadu'n abicy. ⁵⁰ Chi je ángeles ajcxy pidäga'ñ je jibicjäydijc mij jijnjoty. Jibby jijnjoty ajcxy yäxa'ñ ytinähua'ñ etz ytüztmucxaangixy ytüzqueedaangixy mïd je ayo'n mïd je tzaachypí ycixpi.

Je jäy huidibi jajtp nej oybi etz nej jibicpi yajpidzimity

⁵¹ Chi Jesús y'amidooy ajcxy:

—¿Nej mhujinhuibby mïch ajcxy tüg'óciy huidibi ñch ti ngapxich?

Chi ajcxy y'adzooy:

—Huindzin, ti nhujinhuibby ñch ajcxy.

⁵² Chi Jesús ajcxy nimay:

—Nidüg nidüg escriba co ti ixpiçytäy tüg'óciy Dios ytiy'ajt y'ane'min huidibi tzajpjoty tsoon, hue' jadu'n nipaady nej tüg codijc comeñybi huidijaty ymïd yjajty nej yajpidzimipy jemybi etz tucpi.

Jesús yajpaady jim Nazaret

⁵³ Co Jesús yaj'ixpiçtay jada jihuimbit ayuc, chi chooñ jim. ⁵⁴ Co Jesús chooñ jim, chi ñicxy ma yci'mnaax yci'mgajp. Chi Jesús ytigiy ma je judio ñaymujctac, e ytigiy yaj'ixpiçp. Chi je mayjäy jibby ooy jihuibby huinmay nej yí' yaj'ixpiçy, ymïnañ ajcxy:

—¿Ma jada' jada yëydijc ti paady jada ixpiçin? ¿Ma mic'ajt paady co ooy mijhuinma'ñ tzachtuñ? ⁵⁵ Jadayaabi yëydijc hue' yteedy'ajtpy je tzejtzpi, etz ytaj'ajtpy María. E ñch ajcxy n'ix'ajtpyich je y'uch ajcxy; Jacobo, José, Simón, etz Judas. ⁵⁶ Nañ jadu'n ya chinay ma ñch ajt je' y'uch ajcxy töxyjäy. ¿Ma oy ti paady jada ixpiçin jada mic'ajtin?

⁵⁷ Paady je maycogajpi ajcxy ca' ytunicuend. Paady Jesús ajcxy nimay:

—Huen ma'amity tüg'óciy je mayjäy ajcxy ooy yajmij'aty yí' jäy ajcxy huidibi najtzcapxiyb Dios y'ayuc, ca' ydi huidibi y'ayucnajtzcapxiyb ma yci'mnaax yci'mgajp yci'mjin yci'mdijc.

⁵⁸ Ma yci'mnaax yci'mgajp Jesús ca' jaty nej mijhuinma'ñ tunip anajty, mïd co je jäy ajcxy ca' mijpidägyii.

14

Juan el Bautista co y'ögy

¹ Je huin'it tiempo Herodes huidibi anajty ane'mb jim Galilea tiy'ajt paty nej Jesús ytuñ. ² E yí' nimay je ymidungmïdpidijc:

—Yijibi jäy huidibi tzachtumb mijhuinma'ñ, yí' je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt mïd jaydëb mijhuinma'ñ tuñ.

³ Herodes ti anajty ni'ane'mdiy co Juan huen yajmach, e yajpidägipy pujxtigoty. Jadu'n Herodes tuñ mïd Herodías ycixpi. Je Herodías je' anajty mïd jayjip'aty ti ypiçy Felipe, je Herodes y'ajch, chi ti ixmajch Felipe, chi ypiçy mïd Herodes. ⁴ Juan ti anajty nimäy Herodes co ti ytundigooy co ti piçy mïd Herodías.

⁵ Je rey Herodes ooy anajty jayaj'öga'ñ yí Juan, per tzigüyb anajty müid je mayjäy. Com je mayjäy ti anajty mibicy ajcxy co Juan hue' anajty tügí Dios tüy'ajt müidpi, tüg profeta. ⁶ Co Herodes yjimijtprejty, chi anajty ñayñixíduñyí, e chi Herodías ñix ñicxy ejtzp ma Herodes yhuinduu. Je rey ooy jäygidacy nej anajty Herodías ñix y'ejch. Paady Herodes Herodías ñix nimay:

⁷ —Dios ích yam ngapxpatpy co nmöhuamyb ti mdimypijctzooyb.

⁸ Chi Herodías nimay je' ñix co huen pijctzoohui je Juan, je Bautista, ycohuajc ma tüg texy. Chi Herodías ñix je rey nimay:

—Ndzojcyích co miich xymöhuip Juan, je Bautista, ycohuajc ma tüg texy.

⁹⁻¹⁰ Co jadu'n midooy je rey, chi ytigüy tajp maybi mij cajee. Per co ti anajty Dios capxpaatni, ymínaaní mayjäy yhuinduu co ymöhuamyb tijaty ypijctzooyb. Paady ane'my tüg soldado co huen nicxy yajtzoñyí Juan ycohuajc, e möhuipy Herodías ñix. ¹¹ Huin'it je soldado oy je Juan ycohuajc yajmínajci jilby pujxtigoty. Chi moy je töxy'anäg, e je töxy'anäg yejcnajxni ma ytaj.

¹² Huin'it xí je Juan ydiscípulos ajcxy yja'ty. Chi ajcxy oy yajnaaxtigüy je Juan ñinícx. Chi ajcxy oy Jesús yajnimäy.

Jesús yajcay migoox mil jäy

¹³ Co Jesús nejhuüy ti anajty ti ytuñyí ti yjadyí müid Juan, chi ytigüy ma tüg barco naydüg, e nicxni ma tüg it ma ca' pín chinäy. Co je mayjäy nejhuüy co Jesús ti ñicxy, chi ajcxy choday canaag agajp, nicxy ajcxy ma Jesús yajpaady, hue' tecygi'm ajcxy nicxy. ¹⁴ Co Jesús ypidzimy barcojoty, chi ijxy mayjäy. Jesús ooy pa'ayoy je mayjäy, e yajtzoocy je pa'mjäy huidibi anajty ajcxy jim ymüid miiñ. ¹⁵ Com ti anajty chuu'íñi, paady je' ydiscípulos ajcxy nimíjhua'cy Jesús, e nimay ajcxy:

—Ti chuu'íñi, e ca' ya pín china'y, paady capxcíxy müid jada mayjäy ajcxy, jaydeb ajcxy nicxy íxtäy ycaayín y'uucín ma yí mutz cajp ajcxy huíngonbi.

¹⁶ Chi Jesús ymínañ:

—Ca' ycopícyíty co ajcxy nicxy jícxí íxtäy. Miich ajcxy möhuip caayín uucín.

¹⁷ Chi je' ajcxy ymínañ:

—Per ích ajcxy jeyí yeeby nmüidity migoox tzajcaagy etz metz acx.

¹⁸ Chi Jesús ymínañ:

—Mimiingix yam'amy.

¹⁹ Chi Jesús nimay je mayjäy co huen íñay'ihuíydaaygíxy ma pí'cmüy'ung nícx. Huin'it Jesús je migooxpí tzajcaagy conígy etz je metzpi acx. Chi ypa'tíjxy jilby tzajpcíxy, e yajnajxy Dioscojuyipy. Chi tujc-huäcxy je tzajcaagy etz moy je' ydiscípulos ajcxy, co huen yajhuäcxycíxy ma je mayjäy.

²⁰ Nidüg'óciy je mayjäy ajcxy ycaý cüxyí. Co je mayjäy ycaýday, chi je discípulos ajcxy yajmujcy je cayduc jícxí, e yaj'ujch ajcxy majmetz cach.

²¹ Migoox mil anajty ajcxy je yéydíjctíjch huidibi cay uuc. E ca' ajcxy michoy je töxyjäydíjch ajcxy etz je y'ung y'anäg ajcxy.

Jesús yöy ñíhuíngíxy

²² Chi Jesús ane'my yí ydiscípulos ajcxy co huen barco tigüygíxy mic'amy, jigix ñicxípy ajcxy jim mejy nínaxy. Nami yí ydiscípulos ajcxy choñ barcojoty, Jesús ycapxcíjxy müid je mayjäy huen nícxíxni. ²³ Co anajty Jesús ti ycapxcíxy müid je mayjäy, chi ñicxy naydüg ma tüg cögop Dios mibíjctzoobi. Co ycoodzíñ Jesús naydüg anajty yajpaady. ²⁴ Co ycoodzíñ, mejy cujc anajty je barco cujc nicxy. E je ñí ooy anajty ymíjjetzpety ma je barco, je' co ooy anajty mic yjanchpojy. ²⁵ E co oy ymoñyí, huin'it Jesús ymíjhua'cy ma je'

ydiscípulos ajcxy, ñicxy adüyöyb mejyhuingíxy. ²⁶ E co je discípulos ajcxy ijxy co Jesús anajty ymiiñ mejyhuingíxy, chi ajcxy ooy ñay'adzigiíy. Ooy ajcxy yaaxqueecy ymíñañ ajcxy:

—Hue' ñich ajt ijxmaníyím.

²⁷ Chi Jesús mic'amy ymígapxy ajcxy etz nimay:

—Huinmic jotmic naybidáacigíxy, ñich yí'. Ca' mdzigiíyigíxy.

²⁸ Chi oy Pedro Jesús ymígapxyii, nimaayí:

—Huindzin, pen janch miichíty, ane'mgích co huen ñich miich ninícxíp adüyöyíp mejyhuingíxy.

²⁹ Chi Jesús Pedro nimay:

—Min.

Huin'it Pedro ymínajcy ma je barco etz ñicx ma Jesús adüyöyíp mejyhuingíxy. ³⁰ Per co Pedro jihui'ñybijcy jadu'n nej anajty ooy mic yjanchpojoy, chi ooy chígy, chi oy oga'n ytigíyñi quimbi, chi yaaxqueecy, ymíñañ:

—¡Huindzin, ñich yajtzóocigích!

³¹ Huin'it Jesús oy yci' mímajtzí, chi nimay:

—Miich, janch hueeni mmíbíjcin. ¿Nej co ca' yajxon xymíbicyích?

³² Co Pedro etz Jesús ytigíy barcojoty, huin'it je mic poj ñajxy. ³³ Huin'it je' ajcxy jibby barcojoty ycojxtínay'ihuíydaay ma Jesús yhuinduu. Chi ymíñañ ajcxy:

—Janch tíy'ajt co miich Dios xy'ung'adyii.

Jesús yajtzoctay je pa'mjäy ajcxy jím Genesaret

³⁴ Co ajcxy ymejyñajxtay, chi ajcxy oy ja'ty ma je Genesaret naaxjot. ³⁵ E co je jäy ajcxy nejhuíy co Jesús tí yjäty ma yí' ajcxy naaxjot, chi ajcxy tíy'ajt quejxy ma tüg'óciy cajp etz rancho huinduy agonbí co Jesús yjímíty. Chi je mayjäy míd miiñ tüg'óciy je pa'mjäy ma Jesús. ³⁶ Chi ajcxy cohuaníy Jesús, pen jéb je pa'mjäy ñidoñyí je yhuit. E tüg'óciy je huídijaty ñidoníp je' yhuit, je' ajcxy chooctay y'agídactay.

15

Huídí jäy yaj'ahuimbíjty janch jibí

¹ Chi ymiiñ ma Jesús nijéjity fariseo jäy ajcxy, je huindzindíj huídibí tzachpadumb judío ycostumbre. Nañ jadu'n miiñ nijéjity escribas, je huindzindíj huídibí ajcxy níjaydutr anajty Dios ñecy. Je fariseos etz escribas ajcxy tí choongíxy anajty jím Jerusalén, chi ajcxy y'amidooy Jesús:

² —¿Na'amy co miich mdiscípulos ajcxy ca' cuydungíxy judío ñi'ap costumbre? Yí' ajcxy ycaaygíxy y'uuccíxy, e ca' jayíj y'cíbujcíxy, ca' íxpujcxíxy íxjétxcíxy ypocy.

³ Chi Jesús y'adzooy, yajtíy:

—¿Na'amy co miich ajcxy mgapxycómíodögy Dios? Mdzachcuydungíxy mgí'mgostumbre ma yjapadyí mguydungíxy íxyipy Dios ycötújcin. ⁴ Com Dios tí y'ane'my ma ycötujcin: “Yajmíj'at mdaj mdeedy, e pínjaty jibí nígapxy ní'ojíyb ytaj yteedy, ögípy yí'.” ⁵ Per miich ajcxy mínamb co tüg je yéydíj jébi nímäy ytaj yteedy: “Ca' ñich miich ajcxy nbubeda'ñ, com tí n'ahuaníyích ma Dios tüg'óciy tíjaty nmídích.” ⁶ Chi huen y'timpínity jadu'n mínamb, ca' ocpubedaaníp ytaj yteedy, e jadu'n miich ajcxy myajtigoy Dios y'ane'mín com tzachtunaangíxy mgí'mgostumbre. ⁷ Miich ajcxy naybídaacíp jadu'n nej jíhuíy tudägy jäy, e ca' yjanchíty. Janch tíy'ajt jadu'n nej jecyíp Isaías jaaybejty yajhuí'my co Dios jadu'n ymíñañ:

⁸ Jadayaabi jāy xyajmij'ajtpich ahuac aguy, per ca' ajcxy xyajmij'atyich cixyot huinjot.

⁹ Naadigi' co ajcxy xyhuin'iygixyich xyhuinyáaxcixyich. Mnayyaj'ixpíjicixy ayuc tiy'ajt huídibi jāy ajcxy ti cojy ti maacxy.

¹⁰ Huin'it Jesús huomujctay je mayjāy, ymīnañ:

—Amidoo'ijtcixy ich n'ayuc etz mhuinjihu'iygixip. ¹¹ Ca' ji ni ti jicxy huídi jāy ypidacpy ma y'ahuac nicxy yajpocycāyī. Yi' janchtiy je jibic ayuc huídibi pidzim ma jāy ajcxy y'ahuac, yi' ajcxy yajpocycāhuīb.

¹² Chi ymīñ ma Jesús je' ydiscípulos ajcxy, chi ajcxy ñimaayi:

—¿Nej miich mnejhu'iyb co je fariseos ajcxy ñijotma'tpy co ajcxy midoy je ayuc jadu'n nej miich mīnañ?

¹³ Chi Jesús y'adzooy, ymīnañ:

—Huen tim huídibi ane'min huídibi ca' Dios ti pidāgy, Dios yajtigoyam, tim jadu'n nej jāy ajcxy huixigy ujtz huídibi ca' y'oy'ujtzy. ¹⁴ Ixmajtzcix yi fariseos etz escribas ajcxy. Ca' ajcxy huinjihu'iy Dios ytiy'ajt. Jadu'n ajcxy nipaady nej jāy huintzpi, e co tūg huintzpi huijtzhuidity jadūg huintzpi, chi nimetz nicxy yjutcōgāgixy.

¹⁵ Huin'it Pedro nimay Jesús:

—Yajhuinjihu'iyg ich ajcxy jada jihuimbit ayuc.

¹⁶ Chi Jesús ymīnañ:

—¿Nej miich ajcxy nañ jadu'n ca' mhuinjihu'iy jada jihuimbit ayuc? ¹⁷ ¿Nej ca' miich ajcxy mnejhu'iy co tūg'óciy huídibi tig'iyb ma miich ajcxy m'ahuac, je' nicxp ma miich ajcxy mjot etz ypidzimy ma ajcxy mninix? ¹⁸ Per je jāy huídibi jibic capxp, capxp je' je jibic ayuc huídibi ymīd ma yjot yhuinma'ñ. Jada jibic ayuc yajpocychimīcp je jāy. ¹⁹ Yi' jibicpi huídibi tzomb ma jāy ajcxy yjot yhuinma'ñ, yi' je' jāyyaj'ōgī huinma'ñ, je töxyjāy migapxtigoyī huinma'ñ, meedzi huinma'ñ, je indāgī huinma'ñ, je piitz capx huinma'ñ. ²⁰ Yijadu'mbi jibic-huinma'ñ yajpocycāb jāy ajcxy ma Dios. Per co jāy ajcxy ycaay y'ūgy, ma ca'ni ajcxy pocy ixpujicixy jayijp, ca' je' ypocycāy ajcxy ma Dios.

Tūg töxyjāy huídibi ca' judíojäy mibijc Jesús

²¹ Chi Jesús jim choñ, nicxy ma je Tiro etz Sidón naaxjot. ²² Jim anajty tūg töxyjāy chināy. Jada töxyjāy hue' anajty cananeajāy, canan judíojäy. Chi yi' nimīñ Jesús, chi nimay:

—Huindzin, David y'ap y'oc, pa'ayoogich. Ich nmīdich tūg nix huídibi ymīd ca'oybi etz oy tzaachypī paady.

²³ Per ca' ni nej Jesús y'adzohui. Huin'it je' ydiscípulos ajcxy mīñ ma Jesús, e ycohuanīy, mīnañ ajcxy:

—Capxycix mīd jada töxyjāy, com nigo xypayaax xypadinaayim.

²⁴ Chi Jesús ymīnañ:

—Dios ich ti xyquexyich jēda'ajty ma je israelitasjäy huídibi y'alma tigoyam.

²⁵ Chi je töxyjāy ymijhua'ci ma Jesús, e ycojxtinay'ihuiy ma je yhuinduu, chi ymīnañ:

—Huindzin, tun may'ajt pubejtcich.

²⁶ Chi Jesús ymīnañ:

—Ca' jadu'n y'oyity co n'ixmadzipich je israelitasjäy (Dios yjāy), e nbubedipich miich ajcxy. Co jadu'n ndunipich, jadu'n nipaadip nej jāy ajcxy y'idich co ajcxy pijci je ajcxy y'ung ycaagy, e möy je uc.

²⁷ Huin'it je töxyjāy y'adzooy:

—Janch tiy'ajt jadu'n nej miich mīnañ, per ixti ycaayb je uc je tzajcaagy y'abu'x huídibi cāb ma yhuindzin mesa.

28 Chi Jesús je töxyjäy nimay:

—Janch mij mmibijcin. Hich ndunaamybich jadu'n nej miich mdzocy. Huin'it hori je töxyjäy ñix choocy.

Jesús yajtzögy mayba'mjäy

29 Chi Jesús jim chooñ. Chi ñajxy ma Galilea mejypa'. Chi ypejty ma tüg cögop, jim ñay'ihuüy. 30 E huin'it oy mayjäy miidmiñ pa'mjäy huidibi huintz, uum, címucy tecymucy, etz huen tim huidibi pa'mjäy. Pidacy ajcxy je pa'mjäy ma Jesús yhuinduu, e yi' yajzooctay. 31 E je mayjäy ooy tzachjihuüy tzachhuinmaay ajcxy co anajty je uumbi ti capxigy, je huintzpi ti y'ixxigy, je címucpy tecymucpy ti yöyigy. Chi je mayjäy ytiigy ñbaady capxpaady Dios, je Dios huidibi je Israel jäy ymijpidacy.

Jesús yajcay midaan mil jäy

32 Chi Jesús mijhuoy je' ydiscípulos ajcxy, nimay:

—Ooy nba'ayooyich jadaaab jäy ajcxy. Com cujc midugig xii ijtcixy ya miid hich etz ca' ajcxy miidity ti ycaayipy. Ca' nguexhuimbida'ñich ajcxy ayuu ma ytijc, ca' yjetyity yajpa'mgojip ajcxy tü'am.

33 Chi je' ydiscípulos ajcxy minañ:

—¿Per ma n'ocpatim ti jada jäy ajcxy ycaayipy yjicxipy ya ma jada abac it ma ca' pin chinäy? Co ooy mayjäyity.

34 Chi Jesús yajtiy:

—¿Naag jüby tzajcaagy miich ajcxy mjacmidity?

Chi ajcxy y'adzooy:

—Jeyi huixtujc tzajcaagy etz hueen acx.

35 Chi Jesús nimay je mayjäy co huen ñay'ihuüydaaygixy naaxcixy. 36 Chi Jesús conigy je huixtujcpi tzajcaagy etz je hueenip acx, e yajnajx Dioscojuyip ma Dios. Chi tujc-hua'cx etz moy je' ydiscípulos ajcxy. E yi' ajcxy yajhua'cx je jicxy picy ma je mayjäy. 37 Chi je mayjäy nidüg'ócay ycaay cüxi. Jesús ydiscípulos ajcxy yajpidigy huixtujc cach cayduc uuctuc tüibi anajty yconaxy. 38 E je huidibi ajcxy cay hue' anajty naybaatigixy nimidaan mil, abicy je töxyjäydic etz pi'ctijc ajcxy. 39 Chi Jesús ycapxycixy miid je mayjäy huen ajcxy nicxixyñi ma ytijc. Chi Jesús ytiigy barcojoty etz ñicxni ma Magdala naax jot.

16

Je fariseos etz je saduceos ajcxy pijtzoogixy tüg ijxpejt mijhuinma'ñybi

1 Chi je fariseos etz saduceos y'oy ajcxy ixxy Jesús. Yi' ajcxy ijxta'n octu-naangixy miid Jesús, paady ajcxy pijtzoy co Jesús huen yaj'ixyii ajcxy tüg ijxpejt huidibi tzomb tzajpjoty. 2 Chi Jesús y'adzooy je' ajcxy:

—Co miich ajcxy m'ixy tzuu yi' tzajp tzaptz, chi miich ajcxy minañ com jabom oy tiempo yajpada'ñ. 3 Per co miich ajcxy m'ixy jopy je tzajp tzaptz etz huimbicy, chi ajcxy minañ co ca' y'oyity yi' tiempo. Miich ajcxy ooy mnaybidägyii nejihuüy ooy m'ixpicity ma Dios ytiy'ajt, e ca' yjanchity. Miich ajcxy jëbi yi' tzajp myajcapxy, per ca' mnejhuüygixy nej yhuimbidezimy yi' mijhuinma'ñ ijxpejt huidibi Dios ytumyb ma jadachambi xii tiempo. 4 Yi' jäy ajcxy huidibi cham tzinaayb, ooy yjibicjäyity ajcxy, ca' ajcxy capxymidooy Dios. Yi' ajcxy chojcpy co nyaj'ixipyich tüg ijxpejt mijhuinma'ñ huidibi tzomb tzajpjoty. Ca' Dios yaj'ixa'ñ ajcxy jadüg mijhuinma'ñ, com miid miich ajcxy jaybetyity je mijhuinma'ñ ijxpejt huidibi Dios ytuun miid Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jäy ajcxy y'ixpicin

⁵ Co Jesús etz ydiscípulos ajcxy yja'ty ma jadüg niiba', chi je' ajcxy yjäydigoy je tzajcaagy. ⁶ Chi Jesús ymínañ:

—Naygüend'ájtigix miid yi fariseos etz saduceos ajcxy, ca' mijpidaaci yi' ajcxy y'ayuc ytiy'ajt, com jadu'n yi' nipaady nej levadura.

⁷ Chi Jesús ydiscípulos ñayñimáayigixy miñ xyipy:

—Paady jadu'n ymínañ, je' co ti ñich ajt je tzajcaagy njäydigooym.

⁸ Jesús nejhuíy nej ajcxy nayñimáayigixy miñ xyipy, chi nimay ajcxy:

—¿Na'amy co miich ajcxy mīnaangixy co ca' ajcxy tzajcaagy mīdity? Janch hueeni miich ajcxy mmībijcīn. ⁹ ¿Nej ca'ni miich ajcxy mhujñihuíy? ¿Nej ca' mjäymechyii co ñich migoox tzajcaayg nyajhuäcxy etz ni migoox mil je yēdyjtījc anajty huīdibi ajcxy cay? ¿E ni mga'ajihuíyii ajcxy naag cach cayduc uuctuc ti myajpidīgy? ¹⁰ ¿E ni mga'ajihuíyii ajcxy co huixtuc tzajcaagy nyajhuäcxyich ma nimīdaax mil yēdyjc ajcxy huīdibi caay etz naag cach cayduc uuctuc myajpidīgy ajcxy? ¹¹ ¿Nej co ca' miich ajcxy mhujñihuíy, co ca' ñich yam nigapxy yi' tzajcaagy huīdibi miich ajcxy ti mjäydgoy, co ti nyajñimaaygixy je levadura huīdibi je fariseos etz saduceos ajcxy ymīd?

¹² Huin'it Jesús ydiscípulos ajcxy huinjihuíy co Jesús ca' anajty je' ti yajñimāyii ajcxy co huen naygüend'ájtigixy mīd tzajcaagy levadura. Hue' janchtiy Jesús yajñimay ajcxy co huen naygüend'ájtigixy mīd je fariseos etz saduceos ajcxy y'ixpijcin.

Pedro nidīy'aty co Jesús yi' je' je Cristo

¹³ Co Jesús yja'ty ma Cesarea Filipino naaxjot, chi Jesús y'amīdooy je' ydiscípulos ajcxy:

—¿Nej jäy ajcxy ymīna'ñ, pīnic ñich?

¹⁴ Chi ajcxy ymīna'ñ:

—Nijējity jäy ymīna'ñ co miich je' Juan je Bautista. Nijējity jäy ymīna'ñ co miich je' Elías, e nijējity ymīna'ñ co miich je' Jeremías o jadüg profeta (huīdibi tzīnay jecy'ajty).

¹⁵ Chi Jesús ymīnañ:

—¿E miich ajcxy nej mīnaangixy, pīn ñich?

¹⁶ Huin'it Simón Pedro y'adzooy:

—Miich je' je Cristo, je Dios y'ung.

¹⁷ Chi Jesús y'adzooy:

—Jotcujc miich Simón, Jonás y'ung, je' co ni pīn xycayajñimāy jada tiy'ajt, tūgpajc je Dios Teedy nDeedyich huīdibi jīiby tzajpjoty, yi' ti xyajnejhuíy jada tiy'ajt. ¹⁸ ñich miich nīmaayb co miich mxī'adiyib Pedro, e hue' yhuimbīdzīmy tzaa (hue' je', je tzaa tija'ñ je ayuc huīdibi Simón ycapxy co je Cristo hue' je' anajty Dios), e ma jada tzaa ji ngoja'ñich ñich ndzajptījc (hue' yhuimbīdzīmy, ma ñich n'ane'mīn chondāga'ñ), e ni ca' oybi ymic'ajt ycamīmadāgīpy. ¹⁹ ñich miich nmōhuamyb je cōtujcīn jadu'n nipaady nej tūg ahuaast huīdibi mīd myaj'ahuädzīpy Dios y'ayuc ytiy'ajt. Tūg'óciy huīdibi miich mgapx'adujcpy ya naaxhuíñ, Dios nañ jadu'n capx'adugīpy jīiby tzajpjoty, e huīdibi miich ya naaxhuíñ ca' capx'aducy, Dios nañ ca' capx'adugīpy jīiby tzajpjoty.

²⁰ Huin'it Jesús nīmay je' ydiscípulos ajcxy, co ca' huaad ni pīn nīmāy co yi' je' je Cristo.

Jesús nigapxy je' y'öcīn

²¹ Ixti huin'itni Jesús ytiy'ayajñimay je' ydiscípulos ajcxy co nīcxamb jīm Jerusalén etz co jīm ooy y'ayoohua'ñ. Jīm Jerusalén je judío mījjäydyjc, je teedytījc huīdibi tungmīdipi, etz yi' escribas ajcxy ooy chaachytuna'ñyīi etz

yaj'ōga'ñyii. Per codug'ig xii huin'it yjugyp'iga'ñ jadüg'oc. ²² Huin'it Pedro m'iidn'icxy Jesús ahuingujc, e oy ogy, yminañ:

—Huindzin, ca' Dios tzocy nicx jadu'n m'jaty. M'iid miich ca' jëbi jadu'n m'jadipy.

²³ Per Jesús yhuäc-huimbijty, chi nimay Pedro:

—Huinhuäctuatc'ich Pedro, je mujcu' miich jadu'n xyajcapxp. Ca' nigoo xy'adzipy'ich. Ca' miich mhuinma'ñbidägy nej Dios tzocy. Yi' janchtiy miich mhuinma'ñ'ajty nej jäy ajcxy tzocy.

²⁴ Huin'it Jesús je' ydiscípulos ajcxy nimay:

—Pen je pinjaty xypamina'ñich, huen yci'mdzojcin ixmajztäy etz huen yhuinma'ñypidägy co ayoohipy m'iid ñich ycixpi, ixti mabaad y'ögy. ²⁵ Huen pinjäy hu'idibi ca' ayoohua'ñ m'iid ñich ycixpi, hue' je' yajtigoyamy yi' yjugy'ajtin. Per pinjaty xypan'icxp'ich oy nej ytimyjadipy, hue' je' ypadamyb yjugy'ajtin hu'idibi ca' ycixipy ytigoyipy nimina. ²⁶ ¿Ti jäy'idaacin yi' co tüg jäy y'ocnayaajpadiiyb yi' meen etz mic'ajtin huindu'my ñaaxhuiñybi, e yjugy'ajtin cixipy tigoyipy tücci'y? ¿Jadu'ñyi jëbi jäy y'alma yjugy'ajtin occojuyi? N'igi choohuity jäy ajcxy y'alma yjugy'ajtin, ca'ydi jac ni ti. ²⁷ ñich, je jäy hu'idibi tzoon tzajpjoty, miinaamb'ich jadüg'oc ya naaxhuiñ m'iid je ángeles ajcxy etz m'iid nDeedy'ich y'oy'ajtin. Huin'it m'icuejtähua'ñ tüg'óciy je jäy nej anajty ti ytuungixy, pen oy, o ca' y'oyity. ²⁸ Janch tiy'ajt jadu'n nej nimaaygixy co ji ya naagity hu'idibi ca' y'ōga'ñ ixti cooni xy'ixipy'ich jadüg'oc co ñich anajty nmiñ ane'mbi.

17

Co Jesús ñin'icx yajtigach

¹ Codudujc xii huin'it Jesús m'iidn'icxy Pedro, Jacobo, etz y'uch Juan ma tüg m'ijcop, ma tüg cop hu'idibi ooy ycixity. ² E jim copcixy Jesús ñin'icx ñaygojtigajtzi ma Pedro, Jacobo etz Juan ajcxy yhuinduu. Jesús yhuiñy'ijp ytig'iy ad'icxp nej je xii yt'icxin. E Jesús yhu'it y'ahuimbijty janch poob jadu'n nej tüg t'icxin. ³ E timetiini oy ijxcixy Moisés etz Elías ycapxy m'iydägy anajty m'iid Jesús. ⁴ Chi Pedro nimay Jesús:

—Huindzin, oy y'oyity co ñich ajt ya. Pen miich mdzojcpy jëbi ñich ajcxy nyaj'oy'iy tug'ig tijcquemy. Tüg miich mje', tüg Moisés yje', etz tüg Elías yje'.

⁵ Pedro capxp anajty, tim huin'ity tüg joc yajnidigoyday je' ajcxy hu'idibi ooy ad'icxp anajty. E ma je joc yajmidoy tüg ayuc hu'idibi yminañ:

—Jadayaabi yëydijc ñich je' n'ung'ajtpy hu'idibi ooy ndzocy njihu'iy'ich etz yi' ñich m'iid njotcujcity. Am'idoo'it miich ajcxy yi' y'ayuc.

⁶ Co Pedro, Jacobo, etz Juan jadu'n midooy je ayuc chooñ jocjoty, chi ajcxy ooy ch'ig'iy etz ñayñitziitc'idaaci ajcxy.

⁷ Huin'it ajcxy Jesús ñimiini etz n'idoñ ajcxy, e yminañ:

—Pid'ic'ix, ca' mdz'ig'iygixy.

⁸ E co ajcxy y'ijx'igy, ca' anajty jim Elías etz Moisés. Naydügpajc Jesús yjac-hui'my m'iid je' ajcxy. ⁹ E co ajcxy yminajcy ma je cop, chi ajcxy Jesús nimay:

—Ca' ni pin miich ajcxy nyajnim'ahu'ipy jadu'n nej ti m'ijxcixy cham, ixti cooni ñich anajty ti njugyp'icy'ich jadüg'oc ma anajty ti n'ög'ich.

¹⁰ Huin'it je' ydiscípulos ajcxy yajtiy Jesús:

—¿Nej co yi' escribas, yi' ajcxy hu'idibi nijayd'utp etz yajnig'uejp Dios y'ayuc, yminaangixy co Elías yi' miinaam jayijp etz axam je Cristo?

¹¹ Chi Jesús y'adzooy:

—Janch tiy'ajt co Elías ymiina'ñ etz yaj'oy'idähuamy tüg'óciy m'iid Dios ycixpi. ¹² Per ñich miich ajcxy n'imaayb co Elías ti y'oy. E je jäy ajcxy ca' nejhu'iy

pin yi', e ooy jibic tuuñ ajcxy, nej tim tzojccixy. E nañ jadu'n ich, je jäy huídibi tsoon tzajpjoty ayoohuaambich ma yi' ajcxy.

¹³ Huin'it je' ydiscípulos ajcxy huinjihuüy co Jesús hue' anajty ñigapxyp je Juan, el Bautista.

Jesús yajtzögy tüg jäy mo'tpa'mmüdpí

¹⁴ Co Jesús, Pedro, Jacobo etz Juan yjäty jim ma je mayjäy ajcxy, chi ñimiini tüg jäy. Chi je jäy ycoxtinay'ihuüy ma Jesús yhuinduu, chi ymíñañ:

¹⁵ —Huindzin, ich nmang pa'ayoohuic. Je' co ymüd mo'tpa'm etz oy yaj'yooyii. Canaag'oc ti ycäy jünjoty ñijoty. ¹⁶ Paady ich ti nmüdmíñich ma miich mdiscípulos ajcxy, per ca' ajcxy ymadacy yajtzögípy.

¹⁷ Chi Jesús y'adzooy:

—Miich ajcxy huídibi jugy'ajtp jadachambi xü tiempo, ca' miich ajcxy mmíbigañ Dios, ca' miich ajcxy mgapxymídoohuañ Dios. ¿Naag xü naag tiempo ich miich ajcxy njacmímecxtugípy? Yajmíingix yi yeeg'anäg.

¹⁸ Co je yeeg'anäg yajmüdjaty ma Jesús, huin'it Jesús ane'my je ca'oybi co huen pidzim ma je yeeg'anäg. E mic'amy je' chögy.

¹⁹ Jac co hueeñi, je' ydiscípulos ajcxy müdmíydac Jesús ahuingujc, chi ajcxy yajtiy ma Jesús:

—¿Nej co ich ajcxy ca' ti nmadägy nicx nyajpidzímgixyich je ca'oybi ma je yeeg'anäg?

²⁰ Chi Jesús ymíñañ:

—Je' co miich ajcxy hueeni mmíbjcin. Janch tiy'ajt jadu'n nej nnímaaygíxy, co ixípy miich ajcxy xy'ocmíbicyich, ooy ixípy jéda'ajty jadu'n nej je jac mutzpi ujtz tim, huin'it jébi ixípy mnímäy jadayaabi cop co huen jühuäcy ya etz huen nicxy huingduum, chi ñicxip je cop. Ni ti ji ycatzipity pen janch miich ajcxy müdity míbjin. ²¹ Jadayaabi pícy ca'oybi pidzimípy co Dios nmíbjctzoohuim mictägy etz ayuu'ijit, ca' jac ti huinmañ.

Jesús nigapxy jadüg'oc y'öcín

²²⁻²³ Co anajty ajcxy yhuidity tügmucy jim ma Galilea y'it, chi Jesús ñimay je' ydiscípulos ajcxy:

—Ich, je jäy huídibi tsoon tzajpjoty, yajcüyegípyich ma jäy. E yi' ajcxy xyajögibich etz codugüg xü njugypígípyich jadüg'oc. Co je' ydiscípulos ajcxy jadu'n mídooy, chi ajcxy ooy yjotmaybaty.

Je cogüejtín ma je tzajptijc

²⁴ Co Jesús yjaty müd je' ydiscípulos ajcxy jim ma je Capernaum cajp, chi huídi anajty ajcxy meeñ yajmujcp müd tzajptijc ycíxpi, oy ajcxy ijxcíxy je Pedro, chí ajcxy y'amídooy:

—¿Nej miich mhüindzin ycuejcpy meeñ müd tzajptijc ycíxpi?

²⁵ Chí Pedro y'adzooy:

—Cuejtpy.

E huin'it hora co anajty Pedro ytigíy tigoty, chi Jesús jayíjp ymígapxy, ñimay:

—Simón, ¿nej mmíñañ? ¿Pin je rey ajcxy yajcuejcpy? ¿Yi' yjäy o huingjäyí?

²⁶ Chí Pedro y'adzooy:

—Ma huingjäy huídibi ane'my ijtp.

Chi Jesús y'adzooy:

—Ah, ca'tz yi' yjäy huaad ti cuejtcíxy. ²⁷ Per ca' ndzocyich co je cogüejtpi nyajcapxmayíym, nicx miich ma yi' mij laguun e cohüidzi' jüby mxu'ñ, e je acx huídibi anajty jayíjp huomb, je' myajpidzimípy, e ma y'ahuac jüby mbaadípy tüg meeñ, yajpidzim je meeñ e nicx cuet müd ich ycíxpi etz müd miich ycíxpi.

18

¿Pin je' jac nigi mijip?

¹ Je huin'it hora je' ydiscípulos ajcxy ymijhuäctay Jesús etz yajtiy:

—¿Pinjäy je'jac nig ymiid je mij'ajtin ma Dios y'ane'my jii by tzajpjoty?

² Chi Jesús mijhuoy tüg je pi'c'anäg. Chi pidacy je pi'c'anäg cujc'amy ma yi' ajcxy. ³ Chi Jesús yminañ:

—Janch tiy'ajt ich miich ajcxy nimäy, pen ca' miich ajcxy jothuimbijtcixy etz naybidaaccixy mhuinma'ñ jadu'n nej jada pi'c'anäg huinma'ñ miid, pues ca' mdigihuipy ma Dios Teedy y'ane'my jii by tzajpjoty. ⁴ Paady, pinjaty miid yhuinma'ñ yung nax jadu'n nej jada yaabi pi'c'anäg miid yhuinma'ñ yung nax, je' je' je huidiib jac nigi mij'ajtin ymiid jii by ma Dios y'ane'my. ⁵ Hueñypinity huidibi miid ich ycixpi cöbigipy etz tzogipy tüg pi'c'anäg, jadu'n nej jada pi'c'anäg ti ndzocyich ti ngöbicyich, hue' jadu'n nipaady nej jihuüy ti xycöbicyich ti xychocyich.

Je huidibi ooy ycojotmayity co nbocycähuim

⁶ Hueñypinity huidibi jibic-huinma'ñ ymibidzimy, e yajpocycäy yi jadu'mbi pi'ctijc huidibi ajcxy xymijnicxpejtpich, jac'oy ixypy co yi jadu'mbi jäy ytimyñayyöcxodziyüi tüg paandzaa etz ñayñajtzjibibihuipy mejyoty. ⁷ Ooy ayo'ñity ooy jibicity co ji naaxhuiñybi yajpaady tijaty huidibi yajtundigooby jäy ajcxy. Ni mina xii ca' tigoy y'idipy tijaty huidi yajtundigoy je jäy ajcxy. Per mij ayo'n padañ miid yi Dios pinjaty cojp tundigooyii. ⁸ Pen miich mgi' o miich mdecy xyajtundigooyb, jac'oy ixypy co mdim'ixpuxy etz ixjibipy jiguem. Nigi oy co mdigihuipy ciduc tecytuc jii by tzajpjoty etz ca'ydi co mdigihuipy miid metz mgi' etz metz mdecy mijjinjoty huidibi nimina ycapich. ⁹ E pen yi mhuiin tug xyajpocycähuamb, tim yajpidzim etz ixcätz jiguem. Com jac'oy mdigihuipy miid tüg mhuiin ma jugy'ajtin huinixibi, ca'ydi co mdigihuipy miid metz mhuiin ma yi jin huidibi camina xii ycapich.

Je y'ixpejt, je cöbixy huidibi tigooy

¹⁰ Ca' m'ixtijcixy ni tüg pi'c'anäg huidibi xymibijcpich. Yi' ajcxy je' y'ángeles tim ijtiib jii by tzajpjoty ma Dios Teedy, ich nDeedy yhuinduu. ¹¹ Ich je jäy huidibi tsoon tzajpjoty, ti nmiiñich ya naaxhuiñ, je' co nyajnitzöga'ñich je jäy ajcxy y'alma huidibi tigooyam. ¹² ¿Nej miich ajcxy mina'ñ? Pen tüg jäy ymiid migo'px cöbixy, etz pen yöydgoooyb nidügti cöbixy, ¿nej ca' jebi ixmach je nimida'px majmocx midaax cöbixy etz nicxy ixtäy je jadügp huidibi yöydgoooy? ¹³ E pen ypatpy je tügp huidibi yöydgoooyb, chi ooy xondägy miid co anajty ti paady huidibi anajty ti ytigooy, ca' jadu'n yxondägy miid je nimida'px majmocx midaax huidibi ca' anajty ti yöytigooygixy. ¹⁴ Tim jadu'n nipaady miid Dios Teedy jii by tzajpjoty, ca' tzocy co ni tüg jäy y'alma tigooypy.

Nej huaad tüg mmigüg nhuinmeecxim

¹⁵ Pen miich mmigüg xytuñ jibic, mhidmiydac ahuingujc e yajhuinjihu' ma ti ytundigooy, pen xy'ayuchuinjihuüyb ti anajty mmnaymigügpigyii je mmigüg. ¹⁶ Pen ca' xy'ayuc-huinjihuüy, chi huominipy tüg o metz mmigüg huidibi jebi nidiy'ajt'adipy miich m'ayuc. ¹⁷ E pen nañ ca' je' ajcxy ayuc-huinjihuühua'ñ, miidnicxip ma mibijcpidijc yöymujctac e jim ajcxy myajnaxipy jadu'n nej tüg huidibi ca' Dios mibicy etz jadu'n nej tüg yajcogüejtpi huidibi ooy pocymidity. ¹⁸ Janch tiy'ajt ich miich ajcxy nimäy, tüg'ociy huidibi miich ajcxy mgapx'adujcya ya naaxhuiñ, Dios nañ jadu'n capx'adugipy jii by tzajpjoty, e huidibi miich ajcxy ya naaxhuiñ ca' capx'aducy, Dios nañ ca' capx'adugipy jii by tzajpjoty. ¹⁹ E nañ jadu'n ich miich ajcxy nimäy, pen ya

naaxhuiñ miich ajcxy nimetz mnaygáp̄xigixy co tijaty mmibijctzohuaangixy ma Dios, Dios, ñch nDeedy huídibi jiiiby tzajpjoty, xymöhuipy huídibi ajcxy mbijctzooyb. ²⁰ Com ma miich ajcxy nimetz o nidugiig naymújcigixy, jim ñch n'ity cuj'amy ma miich ajcxy.

²¹ Chi Pedro y'amidooy Jesús ymíñañ:

—Huindzin, ¿naag'oc huaad nhuinmeecxyich yi' ajcxy huídibi xymidundigooybich? ¿Nej nméecxibich ixti cooni huixtujc'oci?

²² Chi Jesús y'adzooy:

—Ca' yhuixtujc'ócity, hue' meecxipy mídaax migo'px jamída'px majmox mídaax'oc.

Je tumbi y'ijxpejt huídibi ca'p ymígüg huinmeecxy

²³ Dios y'ane'min jiiiby tzajpjoty jadu'n nipaady nej tüg rey huídibi huijtz'oyiib mïd je ytumbidijc jajadu'ñi ajcxy yjacminucxy'adyii. ²⁴ Je rey ytimyhuijtz'oyiichondacyñi anajty cuentas, co oy yjady tüg ytumbi huídibi anajty minuucxy'ajtip canaag millón. ²⁵ Com je' ytumbi ca' anajty mïdity ti mïd migüediib je' yhuindzin. Huin'it je huindzin ane'my co huen je' ytumbi yajtoocnax quipxyi mïd y'ungdöxyijc etz tüg'ócity tijaty ymïd, jaydeb ñuucxy y'adujctähuipy. ²⁶ Huin'it ytumbi ycoxtinay'ihuüy ma yhuindzin yhuinduu etz nimay: “Huindzin, pa'ayoogich, etz ñch miich nmigüejtähuipy.” ²⁷ Chi je tumbi yhuindzin yajtuñ pa'ayo'n, chi huinmeecxip je nuucxy, e yajpidzimy pujxtigoty. ²⁸ E mic'amy co je' ypidzimy pujxtigoty, chi yminaybati tüg ymígüg huídibi anajty mïd quipxyi ti ytuñ. Je' anajty minuucx'ajtip tim hueeni, chi je' yöcmimadziy je' ymígüg huídibi mïd ytuñ, chi nimay: “Cuet huídibi mnuucx'ajtpy ma ñch.” ²⁹ Huin'it ymígüg ycojxtinay'ihuüy ma je' yhuinduu. Chi minuucxtaacy nimay: “Pa'ayoogich. ñch miich nmigüejtähuipy.” ³⁰ Chi je jadügp̄i ca' mecxtujcin yajtuñ. Chi oy ymígüg pidägy pujxtigoty, ixti cooni anajty micuedyii. ³¹ Co je jacjadyii ymidumbidijc oy ixy jadu'n nej ti yajtuñ je' ymígüg, chi ooy ajcxy jihuüy. Chi ajcxy nicx ma je yhuindzin etz yajnimayday tüg'ócity nejaty anajty ti ijxcixy. ³² Huin'it je' ajcxy yhuindzin oy yajhuoyii je huídibi minuucx'ajtip canaag millón. Chi nimay: “Miich ooy mdzachjibicjäyity. Ti ñch miich nhuinmeecxi tüg'ócity je mnuucxy, mïd co miich pa'ayohuin mbijctzooy ma ñch. ³³ E miich nañ jadu'n ixypy ti mba'ayoy je migüg huídibi mïd mïduñ, huídibi xyminuucxy'ajtp, jadu'n nej ñch miich ti nba'ayooy.” ³⁴ Chi je huindzin ooy chachjotma'ty, chi pidacy ane'min co huen yajtzaachytuñ je' ytumbi mabaad cuejttäy tüg'ócity huídibi ñuucxy'ajtpy. ³⁵ Chi Jesús ycapxycijxni, mínañ:

—Tim jadu'n nej jada rey ti tuñ mïd je ytumbi, nañ tim jadu'n Dios tunipy mïd miich ajcxy, pen ca' nidüg nidügti miich ajcxy ca' mhuinmeecxy je mmigügtijc amumdügjot.

19

Jesús yaj'ixpicy mïd co jäy ytöxyijc ixmach

¹ E co Jesús capxtay jada ayuc, chi choñ Galilea, chi oy yjady ma Judea it jim Jordán mij niñ nínaxy. ² Chi ooy mayjäy ypanicxi, e jim yajtzoocy huídijaty anajty yuu mïd pa'm mïd.

³ Huin'it nijëjity je fariseos ajcxy nimiiñ Jesús co yajmachcähuaangixy anajty. Chi ajcxy y'amidooy:

—¿Nej janch co Dios ti xymooyim cötujcin co jëbi tüg yëdyijc ixmadzip ytöxyijc mïd tim hueeni ti capxy ti ayuc?

⁴ Chi Jesús y'adzooy:

—¿Nej ca'ni miich ajcxy m'ixy mgapxy ma ymiiñ jaybety ma Dios ñecy co je naaxhuiñybi chondacy, co Dios ogañ yajcojy tüg'óciy tijaty huidibi ji'ajtp co “Dios yajcojy tüg yëydijc etz tüg töxyjäy”? ⁵ Nañ jadu'n Dios ymïnañ: “Je yëydijc y'ixmadzip ytaj yteedy etz pudigihuipy je' ytöxyijc. E je yëydijc etz ytöxyijc tú'ciy idaangixy.” ⁶ Paady ca' ñimetzity ajcxy, com je yëydijc etz ytöxyijc tügmucy y'idaangixy. Com Dios ti huijtzmucy je yëydijc miid je töxyjäy, paady ca' huaadity co jäy ajcxy huijtzhuäcxyp tiibi Dios huijtzmucy.

⁷ Huin'it je fariseos ajcxy y'amidooy Jesús:

—¿Na'amy co Moisés cötujcin ti yejcy jecy'ajty co tüg yëydijc jëbi huaad ixmach ytöxyijc, e möhuipy ñinecy ñidiy'ajt e jadu'n jëbi ixmach?

⁸ Chi Jesús ymïnañ:

—Moisés jada cötujcin ti xymooygixy co jëbi m'ixmajtzciy mdöxyijc miid co miich ajcxy mdzachcöjuuñity, ca' mgapxymidohuaangixy Dios. Per co je naaxhuiñybi chondacy ca' anajty jadu'nity. ⁹ Janch tiy'ajt jadu'n nej ñch miich ajcxy nimaaygixy co je yëydijc huidibi yajjayhuäcxp miid je ytöxyjäy, e je ytöxyjäy ca' anajty ti ytundigooyb miid huingbi yëydijc, hue' je' yëydijc ytundigooy co ixmach ytöxyijc etz ypijctigach miid huingbi. Nañ tim jadu'n pen tüg yëydijc ypiy miid tüg töxyjäy huidibi ñäy ti y'ixmachyii, hue' tundigooyb anajty je yëydijc.

¹⁰ Co Jesús ydiscípulos ajcxy midooy jada ayuc, chi ajcxy ymïnañ:

—Pen jadu'n jëdu'n je tiy'ajt co je yëydijc ca' huaad ixmadzip ytoxyjäy, jac'oy co ca' nbijcin.

¹¹ Chi Jesús ymïnañ:

—Ca' tüg'óciy je jäy huinjihuüy jadayaabi tiy'ajt. Jëyi ajcxy huinjihuüip pin ajcxy Dios pidaaci co huinjihuüip. ¹² Ji canaagnax je ayuc je huinmañ nej ca' yjëbity ypiy je yëydijc. Naagity pi'ctijc yma'xung'aty e ca' yca'pxity ñinicxy, paady ca' picy ajcxy. E nijëjity je yëydijc ca' huaad ypiy, miid jëgixpi co anajty je' ti ymïjaapigyii. E nijëjity yëydijc hui'my jaybicy miid jëgixp co ajcxy ytuñ ma Dios ytung, je Dios huidibi ane'myb tzajpjoty. Pinjaty cöbigamy ñch n'ayuc huen cöbicy.

Jesús conucxy maybi'ctijc

¹³ Chi naagity je jäy miidnicxy y'ung y'anäg ma Jesús jaydëb yajcïnixajipy etz Dios miibijctzoy miid yi' ajcxy ycixpi. Chi Jesús ydiscípulos ajcxy oty je jäy ajcxy huidibi anajty miid miimb je y'ung y'anäg, nimaaygixy co ca' jadu'n y'oyity.

¹⁴ Per Jesús ymïnañ:

—Huen miid miin ajcxy pi'c'anäg ma ñch, ca' mjijpcogapxiygixy. Com pinjaty ymibijcp ñch ngapxy n'ayuc, jadu'n nej jadayaabi pi'c'anäg ajcxy ymibicy, je' ajcxy tigihuam ma Dios y'ane'my jüby tzajpjoty.

¹⁵ Chi Jesús cïnixajy je pi'c'anäg ajcxy. Chi ñicxni.

Tüg yeeg'anägnip comeñybi mïdmïydägy Jesús

¹⁶ Chi tüg yëydijc oy icy Jesús. Chi y'amidooy:

—Huindzin, ¿ti jada' co oy ñch ndunipyich jaydëb nbaadibich jugy'ajtin huidibi ca' ycixipy ytigoyipy?

¹⁷ Chi Jesús y'adzooy:

—¿Na'amy co xyñimäyich co oy huindzin ñch? Dios tügpajc oyip, ca' jac pin. Pen miich mdzojcpy co mbadañ jugy'ajtin huidibi ca' ycixipy ytigoyipy nimina mguydunipy je Dios ycötujcin huidibi Moisés ycojaay jecy'ajty.

¹⁸ Chi je yeeg'anäg yajtiñhuimbijty:

—¿Huidibi cötujcin miich mdiip?

Chi Jesús ymïnañ:

—Ca' miügüg myaj'ögipy. Ca' miügüg ytöxyijc miügapxtigooyipy. Ca' mmeedzip. Ca' mmügüg mhuiñ'ñip. ¹⁹ Yajmij'at mdaj mdeedy. Mdzogipy mjihuñhuip miich mmügüg'tijc, tim jadu'n nej miich ci'm mnaychogyii.

²⁰ Chi je yeeg'anäg Jesús nimaayi:

—Ti nguyduñdäyich jadaayaabi cötujcin ajcxy maabi ñich nbi'c'atyich. ¿Ti jada njacyajtigoy'ijtpyich?

²¹ Chi Jesús jadüg'oc y'adzooy:

—Pen miich m'idam tudägy, nicx tooctigoyda' huñdijaty miich müid, etz mo' je meeñ je jäy ajcxy huñdijaty ayoob. Co jadu'n mdunipy, chi mbaadipy oy'ajtñ jii by tzajpjoty. Co jadu'n mdooctähuipy tijaty miich müid, chi miñip jadüg'oc ma ñich nyajpaadyich, e pajamgich.

²² Co je yeeg'anäg jadu'n midooy, chi ñicxñi taj may com ooy anajty chachcomeñity.

²³ Huin'it Jesús nimay je' ydiscípulos ajcxy:

—Janch tiy'ajt jadu'n nej nimaaygixy co ooy ymijhuinma'ñity co tüg comeñiyjäy ytiñhuipy ma Dios y'ane'my jii by tzajpjoty. ²⁴ Jadüg'oc nmñina'ñich co ooy chipity co tüg comeñiyjäy tiñhuipy ma Dios y'ane'my, niñi ca' chipity co tüg camello ñaxipy ma tüg xu'ñ'ijx yxutity.

²⁵ Co Jesús ydiscípulos ajcxy jadu'n midoy, chi ajcxy ooy jihuñy huinmay. Chi ajcxy ñay'amidoohui miñ xyipy:

—¿Pñin jëbi paady je' y'alma nidoocin?

²⁶ Chi Jesús ajcxy huñdixpejty etz nimay:

—Je huñdibi jäy ajcxy chipihuñy, müid Dios ca' ni ti chipity.

²⁷ Huin'it Pedro ymñina'ñ:

—Huñdzin, ñich ajcxy ti n'ixmajtztäyich tüg'óciy huñdijaty anajty ñich ajcxy nmüid etz nbanicx ñich ajcxy miich. ¿E ti jada' ñich ajcxy nbaadaamybich?

²⁸ Chi Jesús y'adzooy:

—Janch tiy'ajt nmñina'ñich co anajty je xii je tiempo paady mñina Dios yajtigajtztähuipy je tzajp etz naaxhuñybi, co anajty ñich, je jäy huñdibi tzoon tzajpjoty, n'ityich ma ngötujctacich oybi jii by tzajpjoty, chi miich ajcxy huñdi ti xypahuñdityich, miich ajcxy mbadamy majmetz cötujctac, e miich ajcxy mdiydunipy je majmetz picypñi Israeljäy ajcxy. ²⁹ E tüg'óciy jäy ajcxy huñdibi ti ixmajtztäy yñin ytijc, y'uch ymiügüg, y'ung ytöxyijc, y'ung y'anäg, ytaj yteedy, o ycam ytu' müid ñich ycixpi, yi' ajcxy ypadamyb migo'px'oc, ca'ydñ huñdibi ti ixmach. E ypadamy je jugy'ajtñ huñdibi ca' ycixipy ytiñgoyipy ni mñina.

³⁰ Mayjäy ajcxy huñdibi cham ymüid mij'ajtñ cötujcin, tzajpjoty ca' ajcxy müid'adañ mij'ajtñ cötujcin. E mayjäy huñdibi cham ca' müidity ajcxy mij'ajtñ cötujcin, tzajpjoty ymüid'adamy ajcxy mij'ajtñ cötujcin.

20

Je naymiduniptijc y'ijxpejt

¹ Jadu'n Jesús ymñinañ:

—Je Dios y'ane'mñin jii by tzajpjoty jadu'n nipaady nej tüg cogambi huñdibi ooy mij cam müidity. Chi je cogam jopyñi choñ ma oy nicxy ixtäy tumbidijc ajcxy huñdibi yajpidigipy yi uva cosecha. ² Chi ycapxytuñ müid nidüg nidüg ytumbi co mujuyañ tüg denario meeñ tüg xii bi. Chi quejxy nidüg nidüg ytumbi ma je uva cam. ³ Chi petyxiñ je cogam ñicxy jadüg'oc tumbi ixtaayb. Chi paty cajp cujc nijëjity tumbi huñdibi ca' ti tung müidity. ⁴ Chi je cogam je tumbi ajcxy nimay: “Ñicx miich ajcxy tuñ ma ñich ngosecha. Cham nmujuyipy jadu'n nej ytiy'ajtity.” Chi ñicxy ajcxy midumbi. ⁵ Chi je cogam ñicxy jadüg'oc cujcxñi tumbi ijxtaayb. Nañ jadu'n nicxy jadüg'oc mñinacyxiñ.

⁶ Nañ tim jadu'n tzuu jadüg'oc je cogam ñicxy tumbi ijxtaayb, chi paty nijëjty cajpcujc huidibi ca' ti tung mädity ajcxy, chi ajcxy nimay: “¿Na'amy co miich ajcxy myaajity? ¿Nej co ca' mnicxy mdungixy?” ⁷ Chi je' ajcxy y'adzooy: “Je' co ca' ñich ajcxy pin ti xycapxytuñ.” Chi je cogam ajcxy nimay: “Nix miich ajcxy tun ma ñich nnaaxjot. Cham iya nmujuyipy jadu'n nej ypaadyii.” ⁸ Co oy ycodzyñi, chi je huindzin nimay je huidibi nigop'ajtp je tung: “Nix miihuodäy je tumbidijc etz mujuyipy. Mujuy jayjip huidibi ti ymiñ axam tumbi etz jim nicxy myajcogixiy ma huidibi anajty ti miñ jayjip tumbi.” ⁹ Chi ajcxy jayjip yajmujuy je tumbi ajcxy huidibi anajty ti ytiñy tumbi axam. Chi yajmujuy ajcxy jadu'n nej anajty jäy ñaymujuyii je tüg xibi. ¹⁰ Co miñ je tumbi ajcxy je huidibi ajcxy jayjip tiñy tumb. Chi ajcxy jot'ajti co jac'anaxy yajmujuya'ñ. Per quipxyjaty ajcxy paty tüg meñ nidüg'ocy je tumbidijc. ¹¹ E co ajcxy quipxyjaty yajmujuy, chi ajcxy ytiñy jotma'tpi. ¹² Chi ajcxy nimay je cam huindzin: “¿Na'amy co quipxyjaty ñich ajcxy ti xymujuyich mäd je huidibi ti miñ axam tumbi? Yi' ajcxy tüg jaxigy ti ytuñ, e ñich ajcxy tüg xi je anbi ti ngöbicyich.” ¹³ Chi je cam huindzin y'adzooy, nimay nidügti je' ajcxy: “Miich, ñich nmigüg, ca' ñich jibic ti nduñich mäd miich. ¿Nej ca' ñich ajt ngapxytuunim co jadu'n nmujuya'ñ tüg denario meñi? ¹⁴ Con yi mmeñ, e nicxni. Jadu'n ndzocyich co quipxyjaty nmujuya'ñich miich mäd huidibi ti ymiñ axam ma je tung. ¹⁵ ¿Nej ca' huaad ñich nduñich mäd ñich mmeñ nej ndzócyichi? ¿O co xyajca'oyixyich, co ñich ooy n'oyjäyity?” ¹⁶ E huidibi ajcxy jaccogixiyb, yi' ajcxy jayjip'adam. E huidibi ajcxy jayjip'ajtp cham, yi' ajcxy yjaccogixihuamb. May ooy yjayajhuoomiñ e hueeni huidi huin'ijxipy.

Jesús capxyidzimy jadüg'oc co y'öga'ñ

¹⁷ E co Jesús anajty ñicxy ma Jerusalén tü'aa, chi mäd nicxy ahuingujc je nimajmetzpi ydiscípulos. Chi ajcxy nimay:

¹⁸ —Jadu'n nej miich ajcxy m'ijxy mnejhuüy cham ñich ajt nba'ttigiyim jim Jerusalén. Jim Jerusalén ñich, je jäy huidibi tsoon tzajpjoty, xyajcüyegaamich je teedy mjtungmädpi etz escribas ajcxy. Nyajtíyduna'ñich etz pidäga'ñ ajcxy ané'min co n'ögibich. ¹⁹ E yi' ajcxy xycüyega'ñich ma je huidibi ca' yjudiojäyity, jigix xyñixigibich xyajxigibich, xycoxipich, etz xyajcruutzpedipich ajcxy. E co n'ögibich, chi njugypigipyich codugüg xi.

Huidibi Jacobo etz Juan ytajyijctzou

²⁰ Chi je Zebedeo ytöxyjc nimiiñ Jesús mäd metz je ymang; Jacobo etz Juan. Huin'it je ungdaj huingojxtinay'ihuüy Jesús, pijctzoy may'ajt. ²¹ Chi yajtiñ Jesús:

—¿Ti mdzojcpy?

Chi je ungdaj y'adzooy:

—Tun may'ajt möhuipy ñich metzpi yi nmang yi jacmjtung ma miich m'ane'min, jaydeb iñahuipy ma miich mmijc, tüg a'oy'amy etz jadüg anajty'amy.

²² Chi Jesús y'adzooy:

—Miich ajcxy ca' mhuinjihuüy ti ajcxy mbijctzooyb. ¿Nej mmínaxa'ñ myajna'ñ miich ajcxy je tzaachypi huidibi ñich nmínaxamy nyajna'ñich? Jadu'n nej jihuy m'üga'ñ ajcxy je ta'm nñ huidibi ñich n'ügamy e mbaada'ñ je nñbejtin huidibi ñich nbadamyb.

Chi je' ajcxy y'adzooy:

—Jëbi.

²³ Chi Jesús ymína'ñ:

—Janch tiy'ajt nej miich ajcxy mīna'ñ co mminájxcixipy myajnájxcixipy je tzaachypi huídibi nnaxa'ñich. Per ca' ñich cōtujcīn nmīdīdyich co ñich miich ajcxy nbīdāgipy mījtungmīd, co myajpaadip tūg ma ñich nmījc a'oy'amy e jadūg anajty'amy. Hue' janchtiy Dios Teedy ymīd ni'ixi' pīnjaty ti huin'ixy jaydēb yajñicxip je mījtung ma ñich n'ane'mdac.

²⁴ Co je nimajcpi ydiscípulos ajcxy nejhuīy jadu'n nej Jacobo etz Juan pījctzooy may'ajt ma Jesús, chi ajcxy ooy mījotma'ty Jacobo etz Juan.

²⁵ Huin'it Jesús mījcapxy je' ydiscípulos ajcxy, chi nīmay jadu'n:

—Miich ajcxy mnejhuīy co yī jāy ajcxy huídibi mījtungmīdipi ma je maybi naax cajp, mīc ajcxy ane'my je naax cajp. Nañ jadu'n yī' ajcxy huídibi mīc'ajt mīd ma je maybi naax cajp, mīc ajcxy ane'my je jāy ajcxy. ²⁶ Per miich ajcxy ca' mjadu'nity nej je mījtungmīdipi ma je maybi naax cajp. Pīnjaty miich ajcxy je mīj tung yajñicxip, copīcy ñaybīdāgīyb nej tūg tumbi. ²⁷ Pen ji miich ajcxy nidūg nigohuajc'ada'ñ, copīcy ñaybīdāgīyb nej tūg tumbi. ²⁸ Com ñich nañ jadu'n, je jāy huídibi tzoon tzajpjoty, ti nmīñich ya naaxhuīñ jaydēbi nbubedīpyich yī mayjāy ajcxy. E canan yī' ajcxy xypubedīpich. Ngīyegaamyich njugy'ajtīn ma yī o'cīn mīd je mayjāy ycīxpi, jaydēbi ngo-hua'nich jāy ajcxy y'alma huídibi tīgoyam.

Jesús yajtzoocy metz jay huintzpi

²⁹ E co Jesús etz ydiscípulos ajcxy ycajppīdzīmy jīm Jericó, chi ypanīcxi ajcxy mayjāy. ³⁰ E jīm anajty iñāay nīmetz huintzpi tūba'áy. E co ajcxy nejhuīy co jīm anajty ñaxy Jesús, chi ajcxy yaaxpi jōjcpī:

—Huīndzīn, David y'ap y'oc, tun may'ajt ñich pa'ayoog.

³¹ Chi je mayjāy ajcxy ojcooty je metzpi jāy huintzpi, nīmay ajcxy co huen amoñ. Per je huintzpi nīgi mīnan'idīch:

—Huīndzīn, David y'ap y'oc, tun may'ajt ñich pa'ayoog.

³² Huin'it Jesús ytinayxījp, e ymīnañ:

—Ocmin miich ajcxy ya.

Huin'it yajtiy:

—¿Ti mdzojcpy ndunīpyich mīd miich?

³³ Chi ajcxy ñīmaayi:

—Huīndzīn, ndzojcpyich co xyajhuīndīcxīgībīch.

³⁴ Huin'it Jesús pa'ayoogoty ajcxy. Chi ajcxy nīdoni ma je' yhuīn, e mīc'amy je huintzpi ajcxy y'ijxīgy. Chi Jesús ajcxy panīcxy.

21

Jesús ytiḡy jīm Jerusalén

¹ E co anajty Jesús etz je mayjāy ajcxy ti mīhuīngoni Jerusalén, chi yja'ty ma Betfagé cajp mīhuīngon je Olivos cōgop. E jīm Jesús quejxy nīmetz ydiscípulos ajcxy. ² Chi ajcxy nīmay:

—Nīcxcīx ma je cajp huídibi jīm'amy. E jīm tūg burro ycoxochīty mīd y'ung. Coguejtūdīp ajcxy je burro e yajmīngīx ya ma ñich. ³ E pen jīm pīn nej xyñīmāy, nīma' co je Huīndzīn yajtunam, e yajhuīmbīda'ñ mīc'amy.

⁴ Jadayaabi oy jadu'n ytuñyīi yjadyīi ycīxy yca'pxy jadu'n nej je profeta jecyīp jaay, co jadu'n ymīnañ:

⁵ Yajñīma' je jāy ajcxy huídibi tzīnaayb jīm Sión (Jerusalén), oc'ijxcīx, chi mīñ ajcxy je mrey, yung nax yjot yhuīnma'ñ mīdīty je mrey, etz burrocīxy mīñ. Ma tūg burro mang huídibi ytaj tzīmy yajyōyp.

⁶ Chi je metz ydiscípulos ajcxy cuyduñ nej anajty Jesús ti y'ane'myīi.

⁷ Yajja'ty ajcxy je burro mīd ymang. Chi Jesús ydiscípulos ajcxy jūbe'ñ je

metzpi burro m̄id ajcxy yjocxhuit, chi Jesús yaj'iñay je burro mang. ⁸ E je mayjāy ooy yajhuinyēb̄iy ajcxy je tū'aa m̄id yhuit, chi ajcxy oy ypuxy quipy y'aacx. Chi ajcxy pidacy ma je tū'aa. ⁹ E jim ñajxy je burro, e je mayjāy huídib̄i n̄icxp jayijp, e nañ jadu'n huídib̄i anajty mimb axam, ooy ajcxy ytiḡīy huambi jihūīyb, chach m̄inaangixy:

—¡Hosana! ¡Gloria a Dios! ¡Ooy ycōmaȳity Dios! Huen capxpaady idipy jada yēyd̄ijc huídib̄i mimb ma ȳi n̄Huindz̄in Dios yx̄īi etz m̄id ym̄ic'ajt. ¡Gloria a Dios!

¹⁰ Co Jesús ytiḡīy jim Jerusalén, chi tūg'óc̄iy je mayjāy huinmay'ahuídijty, chi ñay'amidóohuiḡixy miñ xyipy:

—¿P̄in ȳi' ȳij̄ībi jāy?

¹¹ Chi mayjāy y'adzooy:

—Ȳi' je' je profeta Jesús huídib̄i tzoon ma Nazaret cajp ma Galilea it.

¹² Huin'it Jesús ytiḡīy ma Dios yt̄ijc. Chi ixquejxtay tūg'óc̄iy je ajuyb̄i adoocpi huídib̄i anajty yajpatp j̄īby. Chi tijhuimb̄ijttay tūg'óc̄iy je mesa ma anajty jāy jim ymeeñyhuingogongixy, etz nañ jadu'n tijhuimb̄ijttay je muuxytoocpi ñaybejt. ¹³ Chi jadu'n n̄imay ajcxy:

—Jaaybety jadu'n ym̄iñ ma Dios ñecy: “ñich nd̄ijc je' ȳi' ma jāy ajcxy Dios m̄ib̄ijctzoy”, per miich ajcxy hue' ȳi' mhua'ñ meetzpi t̄ijc.

¹⁴ E co anajty j̄īby tzajpt̄igoty Jesús, chi j̄īby ñimiini huídijaty anajty huintz, huídijaty anajty c̄ima'ty tecyma'ty, chi Jesús yajtzooc̄tay. ¹⁵ Per je teedy ajcxy huídib̄i m̄ijtungm̄id etz je escribas ajcxy ooy m̄ijotma'ty Jesús co ajcxy ijxy nejhūīy jadu'n nej Jesús anajty tuñ m̄ijhuinma'ñ. Etz nañ jadu'n ajcxy ijxy co je pi'c'anäg anajty ajcxy yhuaangixy ȳj̄ihūīyḡixy j̄īby tzajpt̄igoty, ym̄inaangixy: “¡Huen cōmay'idipy je rey David y'ap y'oc!” ¹⁶ Chi je teedy etz escribas ajcxy Jesús n̄imay:

—¿Nej ca' miich mm̄idooy nej je pi'c'anäg chach m̄inaangixy?

Chi Jesús y'adzooy:

—Nm̄idooyb̄ich. ¿Nej ca' miich ajcxy mgapxyñi Dios ñecy ma ym̄iñ jaaybety co jadu'n ym̄ina'ñiy?:

Ti myaj'ixp̄icy ñy ma je pi'ct̄ijc ma'xungd̄ijc jaydēb̄i ajcxy ñbaad̄ip capxpaad̄ip Dios.

¹⁷ Chi Jesús ycapxyc̄ijxy m̄id je teedy etz escribas ajcxy etz chooñ j̄īby tzajpt̄igoty. Chi ñicxy ma Betania cajp, e jim yajnajxy je tzumbi.

Jesús capxpojcy je higueri ca'p anajty yt̄im'aty

¹⁸ E co yx̄im̄iy yt̄icx̄igy, chi Jesús yhuimb̄ijty Jerusalén. E ma anajty t̄im̄ yt̄üyöy, jim yuuböccooti. ¹⁹ E jim ijxy ma tūba' tūg cop je higueri quipy. Chi ninicxy. Chi p̄ät'ijxy, per ca' anajty ni tūg yt̄im, jēda'ajty je' y'aay. Chi Jesús n̄imay je higueri quipy:

—¡Ni ca m̄inaa x̄īi md̄im'adipy!

E m̄ic m̄ic̄iȳi je higueri quipy yt̄ich. ²⁰ E co je' ydisc̄ipulos ajcxy jadu'n ijxy, chi ajcxy ooy huinmay. Chi ajcxy y'amidooy Jesús:

—¿Na'amy co ȳi higueri quipy m̄ic'amy ti yt̄ich?

²¹ Chi Jesús y'adzooy:

—Janch t̄iy'ajt jadu'n nej n̄n̄imaaygixy. Pen miich ajcxy m̄id je m̄ib̄ijc̄in, etz ca' ajcxy mm̄ib̄icy aametz jotmetz, jēbi m̄ijhuinma'n mdungixy nej ñich ti nduñich. E nañ jadu'n jēbi jac m̄ijp̄i m̄ijhuinma'ñ mdun̄ipy ajcxy. Jēbi ajcxy tun cop mn̄im̄ay: “Quēg ya, t̄iḡi' mejyoty” e xycapxym̄idohuipy ajcxy je tun je cop. ²² E tūg'óc̄iy tijaty miich ajcxy m̄b̄ijctzooyb huen yt̄im̄yt̄ijȳity, pen mm̄ib̄ijcp ajcxy, m̄baad̄ip ajcxy.

Jesús ycötujcín

²³ Co Jesús yja'ty Jerusalén, chi ytiñiy jadüg'oc ma Dios ytiñc. E jiihy anajty yaj'ixpicy je mayjäy, chi ñimiini je teedy miñtungmüdpí etz judío miñjäydijc ajcxy. Chi ajcxy y'amidoohui:

—¿Ma cötujcín ti mbaady co jadu'n mduñ tzajtigoty? ¿Pín jada cötujcín ti xymöy?

²⁴ Chi Jesús y'adzooy:

—Nañ jadu'n ñich miich ajcxy nyaj'amidoohuamy tüg ayuc. Pen m'adzooyb ajcxy jada ayuc, huin'it ñich miich ajcxy nyajnimähuipy ti cötujcín ñich müd nduñ huidijaty. ²⁵ ¿Pín quejxy je Juan, je Bautista, yajniñbejtpí, Dios o jäy ajcxy?

Chi ajcxy ñayñimáayigixy miñ xyipy:

—Co ixypy ajt n'adzoohuim co Dios Juan quejx, huin'it xy'adzoohuim: “¿Na'amy co miich ajcxy ca' mmibijcy Juan?” ²⁶ Per nañ jadu'n ca' huaad nmínaaním co jäy ajcxy yajniñbijcy Juan, com nejhuiñyím co yí mayjäy miñbijcixy co je' anajty Dios tüg y'ayucnajtzcapxiñybi.

²⁷ E paady ajcxy jadu'n adzooy Jesús:

—Ca' ñich ajcxy nejhuiñyigixy.

Huin'it Jesús ymínañ:

—Nañ jadu'n ñich ca' nigapxa'ñich pín je' ycötujcín müd nduñich huidijaty.

Je metzpi ung iñxpejt

²⁸ Chi Jesús ymínañ:

—¿Nej m'oc'ixy m'ocjaygugi' jadyaabi iñxpejt? Tüg je yëydijc ymíid anajty metz je' ymang. Chi ñimay je mijpi: “Ñicx cham m'octuñ ma ñich n'uva cam.” ²⁹ Huin'it je' ymang y'adzoohui: “¿Ca' ñicxa'ñich!” Chi jacobhueñyí je' ymang yhuinmaydigajch, chi ñicxy tumbi. ³⁰ Chi je ungedeedy oy ixy je ymang mutzpi. Chi nañ jadu'n ñimaay co huen ñicxy tuñ. Chi je' ymang mutzpi y'adzooy: “Oy, cham ñicxiñich.” Per ca' ñicxy. ³¹ ¿Huidi je' nidügti ycuuyduuñ nej anajty yteedy tzocy?

Chi ajcxy ymínañ:

—Je' ymang mijpi huidibi jayijp ñimay.

Huin'it Jesús ñimay ajcxy:

—Janch tiy'ajt jadu'n nej ñimaaygixy co je huidibi ajcxy yajcogüejtpí etz je töxyjäy ajcxy huidibi tundigooyb müd yëydijc, je' ajcxy tigihuamb jayijp ma Dios y'ane'my jiihy tzajpjoty, ca'ydi miich ajcxy. ³² Paady ycixpi oy ymíñ je Juan huidibi jäy ajcxy yajniñbejt, Juan yajni'ixiñyigixy je mayjäy nej ajcxy jëbi yjothuimbidiñy ma Dios. E miich ajcxy ca' miñbijcy jadu'n nej Juan ymínañ. Per je' ajcxy huidibi yajcogüejtp etz je töxyjäydijc huidibi tundigooyb müd yëydijctijc, ymibijc je' ajcxy Juan. Oy miich ajcxy mja'ijxy, per ca' mjothuimbidaangixy etz ca' miñbigaangixy.

Je naymiduuniptijc jibicjäybi ajcxy y'ijxpejt

³³ Chi Jesús ymínañ:

—Oc'amídooiñtix jadyaabi iñxpejt. Ji anajty tüg je huidibi niñuindzin'ajtp mijpi je tundac. Chi je cogam uvas cojy ma je ytundac etz jügajy. Chi yaj'oyiñy ma anajty jëbi je uvas ñiñ yajniñidagaani. Nañ jadu'n cojy tüg tzaaboch cixpi, jigix jëbi cuend'aty ycam. Co yaj'oyiyday, chi je cogam yeycy pijctzoy je ycam ma je jäy ajcxy huidibi naymidunaanip. Chi oy chooni je cogam ñicxy viaje tumbi. ³⁴ Je huin'it tiempo co yhuaad'ajtni je cosecha, chi je cogam quejxy nijëjity ytumbi jim ma huidibi anajty ti yajpijctzoy je ñaax co huen möyii je huidibi yí paadaanip. ³⁵ Per je jäy huidibi anajty ti naax pijctzoy, chi

ajcxy majch je tumbi. Chi ajcxy ooy huinhuojpy jiphuojpy tüg. Chi ajcxy huingäch jipcäch jadüg. Chi ajcxy je midugigpi yaj'o'cy. ³⁶ Chi je conaax cogam huingbi ytumbidijc quejxy. E nañ jadu'n ajcxy oy tungixy jadu'n nej anajty ti tungixy je jayijp'atypi. ³⁷ Chi yci'm'ung oy quejx cogixiyñi. Hue' jot'ajti co yajmij'adiyb je' y'ung. ³⁸ Per co ajcxy je tumbidijc ijxpaty je cogam je' y'ung, chi ajcxy ñaygapxi: “Tzoc ajt yaj'o'cim je cogam ymang, com yi' je' mihui'mamb je' yteedy je yjugy'ajtin je ypidägy. E co ajt nyaj'o'cim, chi ñch ajt nmihui'mim je cam.” ³⁹ Chi ajcxy majch je cogam ymang. Chi ajcxy huijtzpidzimy ma je tundac. Chi oy yaj'öccixy.

⁴⁰ Huin'it Jesús ymīnañ:

—Co anajty ti miiñ je conaax je cogam, ¿ti jada' y'octunipy mīd je tumbidijc ajcxy?

⁴¹ Chi je teedytjic etz mijjäydijc y'adzooy:

—Je cogam yaj'ögipy yijibi jibicjäydijc, ca' ajcxy pa'ayoohuipy, etz yegipy je uvas cam pijctzoy ma je huingbi jäy huidibi yegipy je pidägy huidibi cogam paatip.

⁴² Chi Jesús ymīnañ:

—¿Nej ca'ni miich ajcxy mgapxy ma miiñ jaaybety ma Dios ñecyi? Jadu'n ymīnañ:

Je yëydijc huidibi je jäy ajcxy ca' anajty tzocy, Dios ti pidägy mij'ane'mbi.

Tim jadu'n nipaady nej tüg tzaa oybi huidibi je pojtzpidijc ca' ajcxy yajtuna'ñ, e je' je' oy ti yhui'mni ma anajty yjaccopicyity. Je Huindzin Dios jada tung ti tuñ, e ooy oy n'ijxim yi' ytung.

⁴³ E paady jadu'n ñch miich ajcxy nimäy co miich ajcxy myajpiga'ñ yi' m'it mlu-gar jiihy tzajpjoty ma Dios y'ane'my etz yajmöhua'ñ je huingbi jäy je huidibi amuumdügjot naygiyejcip ma Dios. ⁴⁴ Pinjaty ca' cöbīga'ñ jada mij'ane'mbi, ayo'n ypadaamb, ytimnipatp nej jihuiy jim ycixciday ma je tzaa ñicx, tijhuïdz yjajtähuiipy. O pen je mij'ane'mbi midziptzoñ je jäy, chi ytigoydähuiipy ajcxy, tim jadu'n nej jihuiy je tzaa ñigidaagoodyi ajcxy, e janch jaam püx nicxy yjaty.

⁴⁵ Co ajcxy midooy, chi je teedytjic etz je fariseostijc huinjihuuy co yi' ajcxy yajni gapxyp, ⁴⁶ chi Jesús ajcxy jamadzaañ. Per tzigiyb anajty ajcxy mīd je mayjäy, je' co je mayjäy anajty mibijccixy co Jesús najtzcapxiyb Dios ytiy'ajt.

22

Je ijxpejt ma jäy anajty pijcpidijc nixīduuñ

¹ Chi Jesús jadüg'oc ytiğiycapxp mīd ijxpejt, ymīnañ jadu'n:

² —Je Dios y'ane'min jadu'n nipaady nej je rey ymang ocnixīduñ co ti ypicy. ³ Chi je rey quejxhuäcxtay je ytumbi co huen nicxy huoomujctaaygixy je huidijaty anajty ti yaj'nimaaygixy co míngixipy ma ytuna'ñyii yjada'ñyii je pijcin. Per ca' je' ajcxy ymīnañ ma je pijcin nixīduñ. ⁴ Chi quejxnip huingbi ytumbi, nimay ajcxy: “Nimaaygix je tiibi oy jayijp'aty mnimaaygix jadu'n co huen mmiingixy ma yam je caayin uucin ni'ixi' y'ity. Ti je huaj ñicxpi nyaj'ögyich. E ni'ixi' ijtaayñi, huen miiñ ajcxy ma je pijcin ytuna'ñyii yjada'ñyii.” ⁵ E je' ajcxy tiibi anajty yaj'nimaaygixy, ca' ajcxy je' ytimy tuñ cuendi. Nijëjity ajcxy ñicxy ma ytundac. Nijëjity ajcxy ñicxy toocp yejcp; ⁶ e nijëjity ajcxy majch je rey yquejxyöybi ajcxy, chi ajcxy oy chaachytuñ, chi yaj'o'cy. ⁷ Chi je rey ooy chachjotma'ty. Chi je soldados ajcxy quejxy co huen nicxy yaj'öctäyii je jäyyaj'öcp ajcxy etz ytoydhuiip je ycajp. ⁸ Chi je rey nimay je ytumbi ajcxy: “Ni'ixi' ijttäy ma jadayaabi je pijcin yajnixīduna'ñ. Per je huidibi ajcxy ti yajnimäy ca' ajcxy mihuaadity co ymíngixipy. ⁹ Nicx miich ajcxy majaty jäy yjin ytiyc. Nimaaygixy tüg'öciy pinjaty ajcxy mbaty, co huen

miingixy ma je pijcpi.” ¹⁰ Chi ñicxy je rey ytumbi ajcxy. Chi ajcxy mĩdmiinday je mayjāy, je oyjāybi etz je jibicjāybi. Chi y'ujztay je rey ytijc mĩd je mayjāy. ¹¹ Huin'it je rey ytigĩy mayjāyjoty, ixa'ñ anajty huĩdijaty ti yajhuomiñ. E jũby tũg yēydijc ti ijxpaty huĩdibi ca' anajty ti ñayxoxyii, jadu'n nej jāy nayxójxigixy co ajcxy ñicxy ma tũg pijcin. ¹² Huin'it je rey minañ: “Mĩgũg, ¿nej ya ti mdĩgĩy tigoty, e ca' mxojx mĩdity nej ypaadyii?” E je yēydijc amoñyi je' yhui'my. ¹³ Chi je rey nimay huĩdibi anajty jim pubejtp: “Cĩxotz tecyxotz jada yēydijc etz pidāg agootztuuby. E jũby yjĩhuĩpy yāxĩpy, jũby ytĩtz huĩnqueedĩp mĩd jotmay.” ¹⁴ Com may je jāy ajcxy huĩdibi ti yajhuooy, e hueeni ajcxy huĩdibi ti yajhuin'ixy.

Je cogũejtin ñimĩydāgy

¹⁵ Je huin'it tiempo je fariseos ajcxy tuuñ quipxycapxy co anajty xĩhuaangixy nihuambedaangixy Jesús. ¹⁶ E jadu'n ajcxy quejxy ma Jesús yajpaady naagity huĩdibi minicxpejt je fariseos ajcxy ytiy'ajt etz naagity huĩdibi mijnicxpejt je Herodes ytiy'ajt. Chi ajcxy Jesús nimay:

—Huĩdzĩn, nejhuĩybiich iich ajcxy co miich mgapxy je tiy'ajt. Tudāgy myaj'ixpĩcy jāy ajcxy jadu'n nej huaad ajcxy cuychĩnaangixy Dios ytiy'ajt. E ca' mgũendituñ nej jāy ajcxy ymĩnaangixy. Tú'ciy miich mduñ mĩd comeeñy jāy etz mĩd ayoobtijc, ca' huin'ixpety myaj'ixpĩcy. ¹⁷ Nejhuĩhuamy iich ajcxy nej miich minañ pen tiy'ajt jadu'n: ¿Nej ndundĩgooyim ma Dios ycõtujcin, co ngũejtim ma César, je romano mij'ane'mbi?

¹⁸ Per Jesús ñejhuĩybi anajty ajcxy yjibic-huinma'ñ, e chi ajcxy nimay:

—Ooy miich ajcxy naybidāacigixy nej jĩhuĩy ooy mdudāgyity, e ca' yjanchity. ¿Na'amy co ajcxy xychachjot'ixy xychachhuinma'ñ'ixyich? ¹⁹ Yaj'ijxcich tũg meeñ huĩdi mĩd mĩgũejtigixy César.

Chi ajcxy mĩmĩñ tũg meeñ. ²⁰ Chi co Jesús y'ijxy je meeñ, chi yajtĩy:

—¿Pĩn y'ahuĩnax e pĩn yxii cixjaay ma jada meeñ?

²¹ Chi ajcxy y'adzooy:

—Je romano mij'ane'mbi y'ahuĩnax etz yi' yxii.

Huin'it Jesús je' ajcxy nimay:

—Mo' je César huĩdibi yi' yjē'ajtpy, etz mo' Dios huĩdibi Dios yjē'ajtpy.

²² E co ajcxy jadu'n mĩdooy, chi ajcxy ooy jĩhuĩy huĩnmay. Chi ajcxy ixmajch Jesús, e ñicxni ajcxy.

Yaj'amĩdooy ajcxy je jugypĩcin co pĩn ti y'ōgy

²³ Je huin'it xii je saduceos ajcxy oy ixy Jesús. Yi' ajcxy ymĩnañ co ca' yjugypĩga'ñ je õcpĩ ajcxy. E jadu'n ajcxy huĩnma'ñ pidāgy, e ymĩnaangixy:

²⁴ —Huĩdzĩn, jadu'n mĩñ ma Moĩsēs ycõtũjcin co je yēydijc huĩdibi ypijcychĩnaayb mĩd ytõxyijc, e pen õcp je yēydijc, e ca' ni tũg y'ung yajhuĩ'my, copĩcy co co'õcytõxyjāy ypijctĩgadziy mĩd je yēydijc ymĩguēx. ²⁵ Pues jii ma iich ajcxy anajty tũg quēx je yēydijc nihuĩxtujc. Je ungoob ypijcy, e chi ix'ōgy ytõxyijc, e ca' ni tũg y'ung yajhuĩ'my. Chi je mĩguēx ypijctĩgajch mĩd je tõxyjāy.

²⁶ Nañ jadu'n je mĩmetzpi yēydijc ix'o'cy ytõxyijc. Nañ jadu'n je mĩdugĩgpi yēydijc ix'o'cy ytõxyijc. E jadu'n oytuñyii yjadyii mĩd je tõxyjāy co ti anajty mĩddzĩnay'abĩdzĩmdāy je nihuĩxtujcpi yēydijc tũg quēxpi. E je nihuĩxtujcpi ajcxy ix'o'cy je tõxyjāy, e ca' ni tũg y'ung ajcxy yajhuĩ'my. ²⁷ Chi nañ jadu'n oy y'õcni je tõxyjāy. ²⁸ E co anajty xii tiempo paty, co anajty Dios yajjugypĩcy yi' tĩbi ajcxy y'ōgy, ¿huĩdibi jada' ajcxy nidũgti je yēydijc tõxyijc'adaanĩp je tõxyjāy? Com ti ajcxy jadu'n nihuĩxtujcpi mĩddzĩnay'abĩdzĩmgixy.

²⁹ Chi Jesús je' ajcxy y'adzooy:

—Miich ajcxy ca' mhuinjihuüy je t'iy'ajt, com ca' mnejhuüygyxy Dios y'ayuc yt'iy'ajt, e com ni ca' mnejhuüygyxy je mic'ajt huídibi Dios ymüd. ³⁰ Pues co anajty yjugypijccixy je jäy t'ibi y'öccixy, chi ca' ajcxy ypiga'ñ, e nañ jadu'n ni ca' ajcxy ñaymöhüüyb y'ung huen pijccixy. Hue' ajcxy yjugy'adaangixy chinähuaangixy jiiby tzajpjoty, tim jadu'n nej je ángeles ajcxy chinaaygixy jugy'ajtcixy. ³¹ Per je t'iy'ajt co jäy ajcxy t'ibi y'öccixy yjucypigaangixy jadüg'oc, jëbi mbaatcixy jada t'iy'ajt ma Dios ñecy. Dios ci'm jadu'n minañ: ³² “Ích je' je Dios huídibi Abraham, Isaac etz Jacob yDios'ajtpy.” Com yi Dios ca' yi' yDios'aty ma yi' öcpi ajcxy. Yi Dios Dios'ajtp yi' ma yi' juugypí ajcxy.

³³ E co je mayjäy jadu'n midooy, chi ajcxy ooy tzachjihuüy tzachhuinmaay je Jesús y'ixpijcin.

Je ane'min huídibi ooy ycopicyty

³⁴ E co je fariseos ajcxy nejhuüy co Jesús anajty ti yaj'amoñyii je saduceos ajcxy, chi ajcxy ñayyöymujctaayi. ³⁵ E jim anajty tüg leyhuindzin huídibi Jesús anajty jot'ijxyp huinma'ñ'ijxyp, chi y'amidooy:

³⁶ —Huindzin, ¿ma yi maybi Dios ycötujcin, huídibi yi' jaccopicyip?

³⁷ Chi Jesús y'adzooy:

—Tzoc jihui' etz yajmij'at nHuindzin'ajtim Dios müd tüg'óciy m'aa mjot, etz müd tüg'óciy m'alma, etz müd tüg'óciy mhuinma'ñ. ³⁸ Jada je' jadu'n je Dios ycötujcin huídibi jaccopicyip, etz huídibi tim jayijpi. ³⁹ Je mimetzpi Dios ycötujcin jahueengi tú'ciy ñaybadyii müd je jayijpi, yi' huídibi jadu'n minamb: “Tzojccix jihüügix yi' mmigügtijc, tim jadu'n nej mnaychogyii nayjihüüyii ci'm.” ⁴⁰ Jada Dios metzpi ycötujcin jaccopicy jacmic'ajt müd ca' jac huídibi cötujcin huídibi Moisés etz je profetas ajcxy yejc.

¿Pin je' y'ung je Cristo?

⁴¹ E ma anajty jim tüg'mucy yjac'ijtcixy je fariseos, huin'it Jesús yajtiy:

⁴² —¿Nej miich ajcxy huinmay müd Cristo? ¿Pin je' y'apmang?

Chi ajcxy y'adzooy:

—Je David je' y'apmang.

⁴³ Chi Jesús ajcxy nimay:

—¿Na'amy co David anajty ti ymina'ñ co Cristo hue' je' yi' yhuindzin? Jadu'n ti capxy David anajty müd je Dios yjihui'ñ ymic'ajt, ymina'ñ:

⁴⁴ Je Huindzin Dios nimay ich nHuindzin: “Íña' ma ich n'a'oy'amy, ixti cooni ich miich nyajmimadägip ma je mmidzip ajcxy.”

⁴⁵ ¿Nej jëbi David ymij'ap'adyii je Cristo? Com David ci'm ymina'ñ co Cristo yi' je' yhuindzin.

⁴⁶ E nitüg'aa ajcxy yca'adzohuimbijty. E jadu'n nej je xii tiempo yjacnicx anajty ca' ni pin ocjacyajtiyñi huídijaty ayuc.

23

Jesús xiy ajcxy je fariseos etz escribas

¹ Chi Jesús nimay je mayjäy etz yi' ydiscípulos ajcxy:

² —Je escribas etz je fariseos ajcxy chachnaygömáayigixy co yi' ajcxy jajtp nej capxti'cxipy je cötujcin huídibi Moisés yjaay jecy'ajty. ³ Oy co ajcxy mguydunipy jadu'n nej yi' ajcxy xyaj'ixpijccixy Dios y'ayuc, capxymidoogix nej xyñimaaygixy per ca' mdungixy huídibi yi' ajcxy ytumb, com yi' ajcxy oy ycapxcixy e ca' ajcxy cuydungixy. ⁴ Yi' ajcxy nigo yajcojcxixy canaag costumbre huídi je jäy ajcxy ca' mimadäga'ñ, e ca' ajcxy pa'ayoy je jäy, tim jadu'n nipaady nej jihüüy tüg tziy ti mooygixy jemxypí huídibi ca' je jäy ajcxy mimadäga'ñ, e yi' escribas etz fariseos ajcxy ni ca' ycihuax

yajpaadaangixy je tziomy. ⁵ Tüg'óciy huidi yi' ajcxy ytumyb, je' ajcxy ytumyb co huen jäy ajcxy ixyii, jaydëbi yajcömay ajcxy. Yi' ajcxy yajhuimboc-huiniyigixy etz ñayyajcihuiniyigixy Dios y'ayuc. Nayxojxcixy müd huit yooñjatypi co chachcömayaangixy. ⁶ Ooy ajcxy tzocy iñaybejt ma je' iñay je ane'mbi ma jäy ajcxy yxiidun. Ooy ajcxy tzocy yi' cödumbi iñaybejt ma je naymujctac. ⁷ Yi' escribas etz fariseos ajcxy oy tzojccixy co ajcxy yajcapxpooxip huindzigi'ñ'amy mayjäyduum. Etz nañ jadu'n ajcxy tzocy co jäy ajcxy yajmij'adüyb nej huindzindijc ixpiyijc. ⁸ Miich ajcxy ca' jadu'n m'a'ixihuipy co ajcxy xytijipy huindzin com nidüg'óciy miich ajcxy mnaymigüg'ájtigixy, etz tügpajc je' huidibi miich ajcxy mhuindzin'ajtpy yi' je' Cristo. ⁹ E nañ jadu'n miich ajcxy ya naaxhuiñ, ca' oy ni pin mdeedy'adüyb co müd miich ajcxy tügpajc je mDeedy, huidibi jiiby tzajpjoty. ¹⁰ E nañ ni mganaydijüyb ajcxy mij ane'mbi, com yi' Cristo je' tügpajc miich ajcxy mmij'ane'mbi. ¹¹ Je pin jaccapxymidoob ymigügtijc, je' je' mij'ajtin müd ma miich ajcxy. ¹² Pinjaty huidibi ci'm naygömayip, tzöydu'nbaadip je', e pinjaty naybidaacip nicy xeemy, je' je' capxpaady y'idipy.

¹³ ¡Ay miich ayoob ajcxy fariseos etz escribas ajcxy! Miich ajcxy mnaybidáacigixy nej jihuüy ooy mdudägyjäy, e ca' yjanchity. Miich ajcxy mgoyüchpy je Dios ytiy'ajtin nej huaad jäy ajcxy ytiyü jiiby tzajpjoty ma Dios y'ane'my. Ni miich ajcxy mgatigüygixy, e nañ ni mga'a'ixiygixy co huingbi ytiyühuip.

¹⁴ ¡Ay miich ayoob ajcxy fariseos etz escribas ajcxy! ¡Miich ajcxy m'aanüdacp! Miich ajcxy myajcijxtaayi yi' co'ögy ytöxyjäy ypidägy müd ajcxy m'adzojcin, e mdungixy ooy jecy tzajpcapxycapxi, jigix capxpaady mbidzimipy. Dios nigi chaachytunip miich ajcxy müd mbocoy ycipi, ca'ydi jac pin jäy.

¹⁵ ¡Ay miich ayoob ajcxy fariseos etz escribas, miich ajcxy naybidaacigixy tudägy, e ca' yjanchity! Mhuinyöy'abidzimyb miich ajcxy je naaxhuiñybi, co mgapxhuäcxa'ñ je m'ixpijcin ma je tügpä jäy. E co ajcxy je' myajmibicy, huin'it mejtz jadu'ñyi je pocy anajty müdity je jäy, ca'ydi miich ajcxy.

¹⁶ ¡Ay miich ayoob ajcxy huidibi jadu'n idüitzp nej tügi huintzpi huinhuoy! Miich ajcxy minamb co pen tüg jäy tuñ yhuandaacin, e iibaati capxpaati Dios ytiyc, chi ca' cuyduñ je huandaacin. Per pen iibatpy capxpatpy je oori huidibi jiiby ma Dios ytiyc, huin'it janchity cuyduñ je huandaacin. ¹⁷ Tzuudijc locidijc huidibi ca' huinjihuüy je tiy'ajt. ¿Huidibi jaccopicyip: je oori o je Dios ytiyc ma je oori yoxy ity?

¹⁸ Nañ jadu'n miich ajcxy mina'ñ: “Pen tüg jäy huandaacin tuñ, e capxpaady je altar ma Dios yajhuindzigiy, chi ca' cuyduñ je huandaacin. Per pen capxpaady je huindzigi'ñ tzüch ma je altar ma Dios yajhuindzigiy, chi cuyduñ yhuandaacin.” ¹⁹ ¡Tzuudijc locidijc huidibi ca' huinjihuüy je tiy'ajt! ¿Huidibi jacmij'ajtin ymüd je huidibi ti yajyoxy o je altar? ²⁰ Pinjaty capxpatp je Dios ytiyc ma Dios yajhuindzigiy y'agapxmuctaayb anajty huidijaty jiiby yajpaatp ma Dios yajhuindzigiy. ²¹ Pinjaty capxpatp je Dios ytiyc, ca' anajty jeyi capxpaady Dios ytiyc, nañ ycapxpatp anajty Dios huidibi jiiby tzinaayb. ²² Pinjaty capxpatp je tzajp, nañ capxpatp anajty Dios y'ane'mdac quipxy müd Dios huidi tzinaayb jiiby.

²³ ¡Ay miich ayoob ajcxy fariseos etz escribas ajcxy, huidi naybidaacip tudägy, e ca' yjanchity! Miich ajcxy mooyb Dios je tügpicy je majcpi huidibi je' paatip, ixti yi' tzajnimang, yi' ruda etz je pi'c'ujtz'ay ung. Per ca' ajcxy mduñcuenti je cötujcin huidibi jaccopicyity. Miich ajcxy ca' mdzinäy tiydudägy

müid je mügügtijc. Müich ajcxy ca' müüidity pa'ayo'n müid je' ajcxy hüidibi ayooob jottigooyb, etz ca' müübijccixy Dios. Jada ixypy ajcxy mbaadumyb, e mooygixy Dios je tügpicy je majcpi. ²⁴ ¡Tzuudijc locitijc! Müich ajcxy ti m'anajxyp je uux, e mgojüinnaaxcixy je camello, je müjpi iyujc.

²⁵ ¡Ay müich ayooob ajcxy fariseos etz escribas ajcxy, müich ajcxy naybidaacip nej tudägy jäy, e ca' yjanchity! Jüiby jotjoty hüinma'ñyoty müich ajcxy müidity jübicpi. Müich ajcxy müid je ca'oy'ixü etz je adzojcün. Tim jadu'n nipaady nej jühuüy myajhuächpy ajcxy yi tasi ninücx yi texy ninücx, e chi myajhuü'my jübicpi ma tasiyot ma texyot. ²⁶ ¡Tzuudijc müich ajcxy! Jayijp yajhuädz jüiby jotjoty texy tasi, hüin'it hüi'm nañ jadu'n huädz nügix'amy.

²⁷ ¡Ay müich ayooob ajcxy fariseos etz escribas ajcxy, müich ajcxy naybidaacip nej tudägy jäy, e ca' yjanchity! Jadu'n müich ajcxy nipaady nej öcpi jut. Je öcpi jut nügix janch oy yquëxügy, per jüiby jutjoty ujtz jüiby müid je öcpi pajc etz müid jübicpi. ²⁸ Jadu'n ajcxy mguëxügy mayjäyduum nej jühuüy ooy m'oyjäyity, per jüiby jotjoty müid jübic-hüinma'ñ.

²⁹ ¡Ay müich ayooob ajcxy fariseos etz escribas ajcxy, müich ajcxy naybidaacip nej tudägy jäy, e ca' yjanchity! Müich ajcxy mgo'abojtzcixy yajxon je öcpi jut ma profeta ajcxy ñaaxtügiy, etz mxoxy ajcxy müid je pijy ma ñaaxtügiy je tudägy jäy ajcxy, ³⁰ e müich ajcxy nayñimaayigixy müñ xyipy: “Co ixypy anajty n'octzinaayim jecy'ajty ca' ngapubejtim co ajt nmüj'ap nmüjteedy yaj'ögy je profetas ajcxy etz je tudägy jäy ajcxy.” ³¹ Müid jada ycixpi müich ajcxy nejhuüy co müich ajcxy m'ap'adyii mdeedy'adyii je jübicjäydijc ajcxy hüidibi yaj'öc je profetas. ³² Müich ajcxy yajcüjxcixy je jübicpi hüidibi ajcxy müüj'ap müüjteedy yajtzondac!

³³ ¡Jadu'n müich ajcxy nipaady nej mayxoox! Ca' müich ajcxy madägiipy cöguëgiipy je tzaachypi jüiby ayoodactuuby. ³⁴ E paady nguexaamybich ma müich ajcxy profetas etz hüidibi ixpicyip ma Dios y'ayuc, etz hüidibi xyaj'ixpigamb ajcxy yi Dios ñecy. Per müich ajcxy myaj'ögamyb myajcruutzpedamyb nüjüjity, etz nüjüjity mgoxamyb mhüobamyb ajcxy jüiby tzajtigoty etz m'ixhüidida'ñ mbahüidida'ñ ajcxy cajp cajp. ³⁵ Je müjpocy xyñigüidaccoda'ñ müich ajcxy, jadu'n nej je oyjäy ñi'py temy yojcy jecy'ajty, oga'ñ chondacy müid je oyjäy Abel etz ycogixü müid Zacarías, je Berequías y'ung hüidibi müich ajcxy müüj'ap müüjteedy myaj'o'c jüiby tzajtigoty ma altar. ³⁶ Janch tüy'ajt jadu'n nej nümaaygixy co je müjpocy ñigüidaccoda'ñ je jäy ajcxy hüidibi tzinaayb jadachambi tiempo.

Jesús yäxy müid Jerusalén cajp ycixpi

³⁷ Müich ajcxy Jerusalén jäy! Müich ajcxy Jerusalén jäy! Jerusalén jäy hüidibi jecy'ajty yaj'ögy je profetitijc etz ycögächpy ajcxy je Dios ycogapxy. Canaag'oc ti njayajtügmujctähua'ñich müich ajcxy, jadu'n nej tzeydaj yajtügmujtäy je' y'ung ma yqueec pät, per müich ca' m'a'ixüygixy. ³⁸ Oc'ix müich ajcxy nej mdijc abac yhuü'maangixy. ³⁹ Janch tüy'ajt jadu'n nej nümaaygixy co camina müich ajcxy xy'ixipyich jadüg'oc, ixti cooni paadipy je xü je tiempo co jäy ajcxy ymüina'nipy: “Cömay yi hüidibi müimb müid nhuindzin Dios yxü etz ymüic'ajt.”

24

Jesús ymüina'ñ co Dios ytijc yhuindigoyipy

¹ Ma anajty Jesús ti ypidzimni ma Dios ytijc, nücxp anajty, hüin'it Jesús ydiscípulos ajcxy nüüjühuäci. Yi' ajcxy anajty yaj'ixüydähuamyb je Dios ytijc, com ooy anajty chachmüjtijcity.

² Chi Jesús ymüinañ:

—Huindicx miich ajcxy jada maybi mijjaty ytjc. Miinipy xii tiempo mina tüg'óciy jada tijc nicxy yhui'my taj xit, ca' ma tzaamacxy. Huindigoydáhuipy tüg'óciy.

Je t'iy'ajt ma ca'ni naaxhuiñybi ycixa'ñyi ytigoya'ñyi

³ Chi oy ñicxni ajcxy ma Olivos cōgop. E co anajty jim, Jesús y'iñäy, chi ñimaayi ameech je' ydiscipulos ajcxy:

—Hich ajcxy nejhuñhuamyb mina jëdu'n ytuna'ñyii yjada'ñyii. ¿Ti je' quëxigamb co anajty miich mhuimbida'ñ ya naaxhuiñ, e co anajty je naaxhuiñybi ytigoya'ñ?

⁴ Chi Jesús nimay ajcxy:

—Mnaygüend'adib ajcxy, ca'ydi pin xyhuin'ingixy. ⁵ Ooy mayjäy ñaybidägáanigixy müd hich nxi, naybidägáanigixy co je' ajcxy je Cristo, ymina'na'ñ ajcxy: “Hich je' je Cristo.” ⁶ Co miich ajcxy ayuc midohuipy co jäy ajcxy chachtziptungixy ñayñibidigigixy xi ya, chi ca' ajcxy mdzig'iygixip, com ooy ycopicyity co jadu'n jayijp ytuniyb yjadiyb. Ca' nan hue' je' anajty tim cijxp tim tigooyb je xii je tiempo. ⁷ Nayñibidigib naax cajp müd huingbi naax huingbi cajp, e gobierno müd huingbi gobierno. E miinip mic'ujx canaag'it etz mij yuu etz mij pa'm xi ya. ⁸ Jada tzaachypi ayo'n oga'ni anajty chondägy huidibi nminaxaanim nyajnaxaanim. ⁹ Huin'it xii huin'it tiempo miich ajcxy myajc'iyegipy, jigix xychaachtungixipy e xyaj'ögixipy. E tüg'óciy je maynaaxhuiñjäy xyca'ixáangixipy, müd hich nxi ycipi. ¹⁰ Je huin'it tiempo may je jäy ajcxy yajtigoya'ñ ymibjcin. E nañ jadu'n ñayca'oy'ixáanigixy etz ñayñigapxáanigixy ñi'ojihuáanigixy miñ xyipy. ¹¹ Ooy may quëxigaangixy aanidaacpidjic mina'naangixy co Dios y'ayuc ytiy' ajt nimiydaci, e mayjäy oy huin'inaangixy. ¹² E je' co ajcxy xii jimijt ñajtninicxiyñi jac tim nigijibicpi tunaangixy, ca' ajcxy y'ocnaychójcinipy miñ xyipy. ¹³ Per pinjaty tiydudägy panixp je mibjcin, je' ajcxy ypaadip y'alma nidoocin. ¹⁴ Copicy co jayijp yajcapxhuäcxa'ñ huindu'ñybi naaxhuiñybi Dios y'ayuc ytiy'ajt jemybi, jaydebä jäy ajcxy nidüg'ociy nejhuñy Dios ytiy'ajt. Huin'it je naaxhuiñybi ycijxni ytigooyñi.

¹⁵⁻¹⁶ Je profeta Daniel jaay jecy'ajty jada ayuc (miich ajcxy pinjaty capx jada necy huinjihuñygyxy) ma minañ: Miich ajcxy co m'ixy pinjaty jibic-huinma'ñ tumb nej ca' ypadyii ma Dios ytjc, huidibi ooy ycodzig'ijity, chi miich ajcxy huidibi tzinaayb jim Judea, co jadu'n m'ijxcixy, chi nicx mgueectzóocixipy mic'amy ma tungop. ¹⁷ Pinjaty huidibi yajpatp ma ytjcnicx ca' nicxy tijaty yajpidzimy ma ytjc. ¹⁸ Yi jäy ajcxy huidibi yajpatp camjoty, ca' ajcxy huimbidity co yajpidzimipy tijaty ma ytjc. ¹⁹ Huin'it tiempo ayo'n ypadamy je töxyjäy ajcxy huidibi anajty y'ungdzim'ijt, e nañ jadu'n je' ajcxy huidibi müd y'ungma'xung. ²⁰ May'ajt ajcxy mbijctzoohuipy yi Dios co jada jadu'mbi ayo'n ca' ytuniyb yjadiyb ma anajty ytichtiempojity, etz ma anajty pocxinxiijoty. ²¹ Huin'it oy ayo'n jotmay ytuna'ñyii yjada'ñyii huidibi nicamina ycatuñyii ycajadyiini mabi naaxhuiñybi chondägy e nicamina jadu'n ycajactuniyb ycajacjadiyb. ²² Pen ca' Dios capx'aduga'ñ yjiibi ayo'n xii ayo'n tiempo, ni pin ca' chögipy. Per Dios ycapx'adugamy yjiibi ayo'n tiempo müd je mibjcpidjic ycipi huidibi Dios ti huin'ixy. ²³ Co yi jadu'mbi xii tiempo anajty ymiñ, ca' mmibijccixipy, pen ji pinjaty xyñimaagyxy: “Ijxcix, cha yajpaady je Cristo”, o “Jim'amy yajpaady je Cristo.” Ca' mmibijccixipy. ²⁴ Pues miinip jäy ajcxy huidibi huin'inaangixy ymigügtjc. Ci'm ñayajnaxáanigixy jadu'n nej jihuñy je' yCrístity, e ymináangixipy co capxhuäcxy ajcxy Dios y'ayuc, e ca' yjanchity. Ytunip ajcxy mijhuinma'ñ etz mijpi ijxpejt, ixti jëbi jahuin'ingixip je mayjäy

huidibi Dios ti yhuin'ixyii. Per ca' Dios a'ixihuipy co yhuin'innyb yi' yjáy. ²⁵ Ti ich yi' jayijpni nigapxich. ²⁶ E co pinjaty ajcxy xyñimähuiipy: “Chim je' je Cristo mijtigädumb”, ca' ajcxy mninicxip. O co pinjaty ajcxy xyñimähuiipy: “Chiiby je' tigoty yhuingoyüch”, ca' ajcxy mmibigipy. ²⁷ Ich je' je jäy huidibi tsoon tzajpjoty, nhuimbidaambich ya naaxhuiñ mäd je tücxin je jájin, jadu'n nej je huizuc huidi tücxp xibidzimyb ixti xigidägy. ²⁸ Ma je öcp ninicx yajpaady jim ñimujctähua'ñ je luud ajcxy.

Nejjada' je' Dios y'ung ymiinipy

²⁹ Co anajty ti ñaxy je ayo'n xii ayo'n tiempo, huin'it je xii ycoodzygidäga'ñ, je po' ca' ytücxan, je madza' ycädähua'ñ etz janch mic je tzajp yücxan. ³⁰ Co yi' jadu'mbi ytunnyb yjadnyb, chi quëxiga'ñ tzajpjoty je ijxpejt co ich, je jäy huidibi tsoon tzajpjoty, nhuimbida'ñich ya naaxhuiñ. E chi tüg'óciy je mayjäy tájip máyip yjihuipy yäxipy, chi ajcxy ixipy je jäy huidi tsoon tzajpjoty miñ anajty jocjoty mäd ymic'ajt y'oy'ajt. ³¹ Chi nguexipyich ángeles ajcxy co huen mic yajxüxy ajcxy ytrompeta, jigix yöymujctähuiipy tüg'óciy pinjaty huin'ijxyp xi ya ma ajcxy yajpaady ya naaxhuiñ; ma xii pidzimyb, ma xii cidägy, ma jinboj pidzimyb, ma tichpoj pidzimyb.

³² Jim miich ajcxy ijxpejt mbigipy ma je higueri quipy jadu'n nej je xii tiempo ymiñ cidägy. Co je higueri quipy jadüg'oc pidägy je' y'aay'ung, huin'it miich ajcxy nejhuipy co yhuingoni mina ypottignyñi. ³³ Tim jadu'n nej tiy'ajt mbijccixy ma je higueri quipy co jada ajcxy jadu'n ixipy nejhuipy co yhuingoni anajty je xii je tiempo jin'aguy tijc'aguy. ³⁴ Janch tiy'ajt jadu'n nej nimaaygixy co tüg'óciy ytuna'nyii yjada'nyii ma ca'ni anajty je jäy y'öctäy huidibi anajty jactzinaayb huin'it tiempo. ³⁵ Je tzajp etz je naaxhuiñybi cixam tigoyam yi', per ich n'ayuc ca' ycixan ytigoya'ñ nimina.

³⁶ Ca' ni pin nejhuipy je xii je hora mina nhuimbida'ñich ya naaxhuiñybi. Ni je ángeles ajcxy canejhuipy, ni je Dios y'ung canejhuipy. Tüg'pajc je Dios Teedy nejhuipy.

³⁷ Com jadu'n nej yjajti ya naaxhuiñ jecy'ajty, co je Noé chinay, nañ tim jadu'n yjadipy co anajty nhuimbityich, yi' jäy huidibi tsoon tzajpjoty, ya naaxhuiñ. ³⁸ Jecy'ajty co anajty ca'ni je ayo'nduu ymiñ ya naaxhuiñybi, hue' je' mayjäy ajcxy chinay agujc jotcujc, ycaaygixy y'uuccixy etz yajpccixy je y'ung y'anäg, ixti cooni paty je xii tzuu co ytigny Noé barcojoty. ³⁹ Je mayjäy ajcxy ca' ajcxy cuenttuñ co ayo'n miina'ñ anajty, ixti cooni je ayo'nduu miin e öctay ajcxy je jäy nijoty. Jadu'n nej yjajty jecy'ajty mäd je mayjäy huidibi tzinaayb anajty quipxy mäd Noé, nañ tim jadu'n yjada'ñ mäd je jäy ajcxy huidibi tzinähuip jac jini co ich anajty nhuimbityich ya naaxhuiñ jadüg'oc. ⁴⁰ Je huin'it tiempo co nhuimbidityich jadüg'oc ya naaxhuiñ, chi metz yëdyjc yajpaadipy ma ytundac, tüg je' yajminicxa'ñ, e tüg je' yhui'ma'ñ. ⁴¹ E mejtz töxyjäy yajpaadip anajty yjich, tüg je' yajminicxa'ñ, e tüg je' yhui'ma'ñ.

⁴² E paady miich ajcxy ni'ixi ijtcix, xyjip'ixipyich com ca' mnejhuigyixy mina miich ajcxy je mhuindzin ymiina'ñ. ⁴³ Mnejhuigyixy miich jada co ixypy je ungededy nejhuipy ti hora je meetzpi miina'ñ, ca'p je' ymähuiipy, e ca'p a'ixihuipy co je meetzpi ytigihuipy tigoty. ⁴⁴ Nañ tim jadu'n miich ajcxy ni'ixi ijtcix, je' co ich, je jäy huidibi tsoon tzajpjoty, nhuimbida'ñich ma ca' ni pin anajty nejhuipy.

Je tumbi tudägyti etz je huidibi ca'p ytudägyty

⁴⁵ ¿Huidibi tumbi je' ya huidibi tumb mäd yhuindzin janch cixyjot huinjot huidibi mäd ixpjcän, huidibi je' yhuindzin moopy ane'min ma ytijc, huidibi

yajniḡdagihuiḡpy ma ymiḡḡtjic caayin uucin mina ypadyii? ⁴⁶ Janch jotcuje je tumbi co yhuimbidiḡpy je' yhuindzin, e je' cuyduñ jadu'n nej je' yhuindzin ti ñimäyii. ⁴⁷ Janch tiy'ajt jadu'n nej nimaayḡixy co je huindzin ytumbi yajniḡohuajc'adyii tüḡ'óciy huidibi ymiid. ⁴⁸ Pen je tumbi jibicjäybi mina'ñ jotjoty huinma'ñyoty: "Huäcxijpni ñich je nhuindzin." ⁴⁹ E chi ñimajztägip ymiḡḡtjic, e ytiḡihuiḡpy caaybi uucpi miid amüḡyjäydijc; ⁵⁰ chi je tumbi yhuindzin minipy ma ytijc huidi xi mina je tumbi ca' anajty aa'ixy jip'ixy e ni je hora anajty canejhuiḡ. ⁵¹ Chi huindzin tzaachytunip je' ytumbi, etz ypidägipy miid je jacjadyii jäy ajcxy yajpaady huidibi naybidáacigixp nej tudäḡyjäyity e ca' yjanchity. Jiiby ayoodactuuby yjihua'ñ yäxa'ñ etz huinmucxa'ñ huingueeda'ñ ytiitz miid jotmay.

25

Je ijxpejt ma je majcpi töxy'anäg

¹ Co anajty nhuimbityich jadüḡ'oc ya naaxhuiñybi jadu'n nipaadip nej je nimajcpi töxy'anäg co ñicxy ajcxy ñayjipcobadihuáanigixy miid je yëydijc huidi pigamb. Chi minicxy ajcxy aceite lámpara co yajticxaangixy. ²⁻⁴ Nimigoox je töxy'anäg huidi cohuinma'ñity etz ahuing minicxy jadüḡ quiig ujtz miid aceite. E nimigoox je töxy'anäg ca'pi ajcxy cohuinma'ñity, e ca' ajcxy ahuing minicxy jadüḡ quiig aceite. ⁵ E je yëydijc huidibi anajty pigamb huäcxijpni ooy, chi je töxy'anäg ajcxy ooy ytiḡiyñi mä'uuybi. ⁶ E mijcuctz ajcxy midoy co tüḡ jäy mic mina'ñ: "Chi miñ je yëydijc huidibi pigamb, nicx jipcobadigixy." ⁷ E huin'it je nimajcpi töxy'anäg ajcxy ypidictay. Chi ajcxy yjin ni'ixiy nidüg nidüg. ⁸ Chi je nimigooxpi huidibi ca' ycohuinma'ñity nimay je nimigooxpi huidibi cohuinma'ñip: "Ñich ajcxy hueeni mooygich yi m'aceite, co pidzaanip ñich ajcxy njin." ⁹ Chi y'adzooy je cohuinma'ñybi ajcxy: "Ca' nyega'ñich, je' co ca' ñich ajcxy nje' yhuaadihua'ñ. Nicx miich ajcxy juy jim ma ytoogyii." ¹⁰ E ti anajty ajcxy ñicxy aceite juuyb je huidibi ajcxy ca' ycohuinma'ñity, co oy yjäty je yëydijc huidibi pigaanip. Chi je cohuinma'ñybi ajcxy miid tigiy tigoty je yëydijc huidibi pigaanip. Chi tijc yaj'agiiy. ¹¹ E com jecyñi oy yhuimbity ajcxy je huidibi ca' ycohuinma'ñity. Chi ajcxy yminañ: "¡Huindzin, Huindzin, ocyaj'ahuadz mdijc!" ¹² Chi je' y'adzooy: "Ca' ñich miich ajcxy n'ixy'adyii."

¹³ Chi Jesús yminañ:

—Nayñi'ixiyigix, je' co ca' mnejhuiḡyigixy mina ñich nhuimbida'ñich jadüḡ'oc ya naaxhuiñ.

Je ijxpejt ma je meeñ

¹⁴ Co ñich anajty nhuimbida'ñich jadüḡ'oc ya naaxhuiñybi, jadu'n nipaadip nej jadayaabi ijxpejt, co anajty tüḡ comeñyjäy chona'ñ viajetumbi, chi je' ytumbi ajcxy mooy je meeñ co huen cuend'ajtcixy. ¹⁵ Je ymidüḡpi tumbi moy migoox mil meeñ. Je mimetzpi moy mejtz mil. E je ymidüḡgpi moy tüḡ mil. E jadu'n ajcxy moy nje' nje' nej huaad cuend'ajtcixy. Chi choñ je huindzin viajetumbi. ¹⁶ Je tumbi huidibi cidigiiy migoox mil meeñ, ytiḡiy ajuybi adoocpi. Chi je' ymeeñ y'ung'ajty jamigoox mil. ¹⁷ Nañ jadu'n huidibi cidigiiy mejtz mil, ytiḡiy tumbi miid je meeñ. Chi je' ymeeñ y'ung'ajty ja mejtz mil. ¹⁸ Je huidibi cidigiiy tüḡ mil hue' oy pidägy je meeñ tützjoty. Chi tajiy, e yützi je yhuindzin ymeeñ. ¹⁹ E com jecyñi oy yhuimbity je huindzin. Chi ytiḡiy cuenta yaj'oyiyb miid je ytumbi ajcxy. ²⁰ Chi miñ jayjip je huidibi anajty ti cidigiiy migoox mil meeñ. Chi je tumbi yajcidigiiy je' yhuindzin majc mil meeñ. Chi yminañ: "Miich ti xymooyich migoox mil meeñ, e ñich ti nyaj'ung'atyich jamigoox mil."

²¹ Chi je' yhuindzin mīnaañ: “Janch jotcuje ñich cham co jadu'n ti mduñ mīd je hueenbi meen. Miich ooy mdudägy etz oy ti mduñ, e paady njacmōhuamyb jacmay. Tig'i ma ñich, e xondäg mīd ñich.” ²² Chi ymiñ je huídibi anajty ti cidigiyii mejtz mil meen. Chi nimay je yhuindzin: “Miich xymooyich mejtz mil meen, e ti nyaj'ung'atyich jamejtz mil.” ²³ Huin'it je' yhuindzin ñimaayi: “Janch jotcuje ñich cham, co jadu'n oy ti mduñ mīd ñich nmeen, e paady njacmōhuamy jacmay. Tig'i xondäg mīd ñich.”

²⁴ E co oy yja'ty je huídibi cidigiyb tüg mil meen, chi nimay je' yhuindzin: “Huindzin, hue' ndijyich miich myēdyjc'aty janch jibic jāy. Miich cosecha myajpidīcypy ma ca' ti mnīpy etz miich mgosecha myajpidīcypy ma ca' ti ti mhuijy. ²⁵ Paady ooy ndzigiyich co je meen ngayaj'ung'adīpyich. E co miich mhumbida'ñ, mdzogamy je mmeen, e paady je mgi'mmeen ti nyüchich, je' co ndzigiyich co nicxy nyajtigooyich miich mmeen. Cha je meen huídibi ti xymooyich.”

²⁶ Chi je' yhuindzin ñimaayi: “Jibic tumbi miich, ooy mnuuxity. ¿Nej ti mnejhuīy miich co ñich cosecha nyajpidīgyich ma ca' ti ti nnībyich, etz cosecha nyajpidīgyich ma ca' ti ti nhuijyich? ²⁷ Oy co ixipy miich je ñich nmeen ti myejc'anuucxy, e jim ixipy y'ung'at. E cham co ti nhuimbityich cham ixipy je nmeenich xycidigiyich mīd nimeen'ung.”

²⁸ Chi je huindzin nimay je jacjadyii tumbidijc: “Pijci ajcxy yi meen huídibi ymīd, e mooygix yi huídibi majc mil ymīd. ²⁹ Je huídibi oy tumb jacyajmōhuamb je' anaxy, e ymīd'adamy je' conaxpi. Je' huídibi hueen mīd yajpigamb je' huídibi ymīd, je' co ca' oy ti ytuñ mīd je hueenbi. ³⁰ Yi jibi tumbi huídibi ca' oy ytuñ, pidäg ajcxy agootztuuby ma yjihuipy yāxipy, ma ytiitz huinmuucx huingueedip mīd jotmay.”

Co anajty naaxhuiñjāy ajcxy yajtyduñ

³¹ Co ñich, je jāy huídibi tsoon tzajpjoty, nhuimbity ñich anajty jadüg'oc ya naaxhuiñybi, huin'it n'ixtāga'ñich ma ñich n'ane'mdac etz ane'mañich mīd ñich nmij'ajtīn etz n'oy'ajtīn. ³² Chi tüg'ócy je naaxhuiñjāy yajtūgmujctāhua'ñ ma ñich. Nhuäcxamybich jadüg jadüg jadu'n nej jāy ajcxy huäcxy je cōbixy etz je chiibo ajcxy. ³³ Nbidāgaamybich a'oy'amy je jāy ajcxy huídibi oy ti ytungixy mīd ñich. E yi' ajcxy jadu'n nipaadip nej cōbixy. Nbidāgaamybich anajty'amy yi jāy ajcxy huídibi jibic ti ytungixy mīd ñich. E yi' ajcxy jadu'n nipaadip nej chiibi.

³⁴ Chi nnimāhuībich yi jāy ajcxy huídibi a'oy'amy: “Miingix miich ajcxy huídibi Dios Teedy ti xyconuucxy ajcxy. Je' ajtigix ane'mdac huídibi ijtp ni'ixi mīd miich ajcxy ycixpi maabi naaxhuiñybi chondägy. ³⁵ Ma anajty ñich nyuubōgyii miich ajcxy ti xyajcaayich; ma anajty ñich ndidziyii, miich ajcxy ti xyajni'ügyich; ma anajty ñich nihuídityich, miich ajcxy jättac ti xymōyich; ³⁶ ma anajty ñich je nhuit ti nyajmayjatyich, miich ajcxy ti xymōyich je huit; ma anajty ñich nbigyijich, miich ajcxy ti xycuend'atyich; etz co anajty ñich pujxtigoty nyajpaady, miich ajcxy ti xycogapxīyich.”

³⁷ Huin'it ymīna'na'ñ je jāy ajcxy huídibi oy ti ytungixy mīd ñich: “Huindzin, ¿mīna ñich miich ajcxy ti n'ixy ayuu, e ti nyajcay? O ¿mīna ñich miich ajcxy ti n'ixy co mdidziyii, e ti nyajni'ügy? ³⁸ ¿Mīna ñich miich ajcxy ti n'ixy co miich mnihuídity, e ti nmōy jättac? O ¿mīna mhuit ti myajmayjaty, e ti nmōy je mhuit? ³⁹ ¿Mīna ñich miich ajcxy ti n'ixy, co miich mbigyii, e oy ti ngüend'aty? etz ¿mīna ñich miich ajcxy ti n'ixy co pujxtigoty myajpaady, e oy ti ngogapxīy?” ⁴⁰ ñich, je mij'ane'mbi, n'adzohuimbidityich: “Janch tīy'ajt jadu'n nej nnimaaygixy co yi jāy ajcxy huídibi oy ti ytungixy mīd pinjaty

huidibi xymijnicxpejtpich, nañ jadu'n oy ti ytungixy müd ich. Ca' ñejity co jäy ajcxy ymíañ co ca' ypínity je jäy huidibi xymijnicxpejtpich.”

⁴¹ Chi ich, je mij'ane'mbi, nimähuiwich je jäy ajcxy huidibi yajpatp: “Huin-huäctuutcich miich ajcxy jibicjäydijc. Nicxy miich ajcxy mijjinjoty, huidibi ijtp ni'ixi müd je mujcu' ycixpi etz müd je' y'ángeles ajcxy ycixpi. ⁴² Ma anajty ich nyuubögyii, ca' miich ajcxy xyajcaayich; ma anajty ich ndidziyii, ca' miich ajcxy xyajni'ucyich; ⁴³ ma anajty nnihuidityich, ca' miich ajcxy xyajjätagyich; ma anajty ich nhuit xytigoy'igtigich, ca' miich ajcxy huit xy-mooyich; etz ma anajty ich nbigyii e nyajpaadyich pujxtigoty, ca' miich ajcxy xycogapxiyich.” ⁴⁴ E chi je' ajcxy ymíañ: “Huindzin, ¿míañ ich ajcxy miich ti n'ijxcixy co anajty miich yubögyii tidziyii, o co anajty mnihuidity? ¿Míañ ti n'ijxcixy co ca' mhuit müdity, o co mbigyii, o co anajty pujxtigoty myajpaady, e ca' ich ajcxy miich nbubejty?”

⁴⁵ Chi ich, je mij'ane'mbi, n'adzohuañich: “Janch tiy'ajt jadu'n nej nnímaayixy. Huen tim pínity huidibi ca' müdity pa'ayo'n müd je' ajcxy huidibi xymijnicxpejtpich, oy jäy ymíañ co ca' ypínity, ich miich ajcxy anajty jadu'n ti xytuñich.” ⁴⁶ E jada ajcxy nicxip huinixi ayoodactuuby, e yi tudägyi ajcxy nicxip ma yi jugy'ajtin huinixibi.

26

Je huinmañ nej anajty Jesús madzaangixy

¹ Co Jesús nigapxtay tüg'óciy jadayaabi ayuc, chi nimay yi' ydiscípulos ajcxy:

² —Miich ajcxy mnejhuüyb co huixtic je amayxi, je pascua xi. Pascua xijoty ich, je jäy huidibi tsoon tzajpjoty, nyajciyegañich ma nmidzipich etz xyajcruutzpedañich, xyaj'ögañich ajcxy.

³ Je huin'it xi je teedy huidibi tungmüd ajcxy, je escribas, etz je mijjäydijc ajcxy ñayöymujctayi ma je' ytiba' je teedy huidi jacmijtungmüd huidi anajty yxi Caifás. ⁴ E jim ma Caifás ytiba' jim ajcxy huinmañyixtay nej jebi yaj-machycägixy Jesús müd anii etz yaj'ögaangixy. ⁵ Chi ajcxy ñayñímaayi miñ xyipy:

—Ca' y'oyity co xijoty nmajtzim Jesús. Ca' jecyity co je mayjäy xymijotma'ttayim etz ytiñhuip ajcxy huambi jihuüybi.

Tüg töxyjäy pidacy aceite ma Jesús ycohuajc

⁶ Jesús anajty yajpaady Betania ma Simón ytijc, je Simón huidibi anajty ymüd je jibic nibüdz pa'm. ⁷ E ma anajty Jesús yca, huin'it ymíñ tüg töxyjäy müd tüg quig ujtz müd perfume huidibi ooy oy yxuugy, jada perfume ooy anajty choohuity. Chi je töxyjäy yaj'ahuäch je quig, e yajcöyogiy Jesús je perfume huidibi ooy oy yxuugy. ⁸ Co Jesús ydiscípulos ajcxy jadu'n ijxy, chi ajcxy mijotma'ty je töxyjäy. Chi ajcxy ñayñímaayi miñ xyipy:

—¿Ti co jada perfume huidibi ooy oy xuugy ayoy? ⁹ Tzou ixypy ooy jada yajtoocy, jaydëbi ixypy müd yajpubet je ayoobtijc.

¹⁰ E co Jesús nejhuüy nej ajcxy ymíañ, chi nimay:

—¿Na'amy co m'amayiy jadayaabi töxyjäy? Yi' huidibi ti tuñ, je' yi' tüg oybi.

¹¹ Je ayoobtijc ca' ytigoy'idañ ma miich ajcxy nimíña. Huen huidibi xi huen huidibi tiempo jebi miich ajcxy mbubedipy ayoobtijc. Ich ca' n'idañich jecy ya müd miich ajcxy. ¹² Jada töxyjäy ti pidägy ma ich nninix perfume huidibi ooy oy xuugy, jayijp ca'ni nnaaxtigiyich. Jadu'n je' jipp'ijxpy míña nnaaxtigihuañich. ¹³ E huentimma'amyity je Dios y'ayuc anajty yajcapx-huäcxy huindu'my naaxhuiñ jim yajnigapxañ jadu'n nej je töxyjäy ti tuñ cham müd ich, e jadu'n je mayjäy jäymedzipy jada töxyjäy.

Judas c̄iyecy yi Jesús ma ymidzip agoj̄ix

¹⁴ Chi nidüg je' ydiscípulos huídibi yx̄i Judas Iscariote oy nimäy je teedy mijtungm̄idpi, ¹⁵ nimay ajcxy:

—¿Ti ajcxy xymöhuibich co nḡiyegipyich Jesús?

Chi ajcxy moy iipxmajc plata meeñ. ¹⁶ Co ajcxy meeñ ymooy, chi mic'amy Judas yhuinma'ñ'ixtay nej jēbi c̄iyecy Jesús ma ymidzip.

Jesús y'adzuu'ajty pascua x̄ijoty

¹⁷ Je ymidügp̄i x̄i, je amayx̄i, je pascua x̄i ma anajty yajcay je tzajcaagy huídi ca' levadura m̄idty, huin'it je' ydiscípulos ajcxy nimiiñ Jesús. Chi ajcxy yajtiy:

—¿Ma mdzocy co ñch ajcxy ni'ix̄ihuip huídi ngayamy je pascua x̄i c̄ixpi?

¹⁸ Chi Jesús y'adzooy:

—Ñicx miich ajcxy jim Jerusalén ma tüg jāy ytjc, e mnimāhuip: “ñch nHuindzin jadu'n minamb co yhuingoñ je' yx̄i yhora, e paady ma miich mdjcy yi' tuna'ñ je pascua x̄i adzu'ajt̄in m̄id ydiscípulos ajcxy.”

¹⁹ Huin'it Jesús ydiscípulos ajcxy cuyduñ jadu'n nej Jesús anajty ti ñimäyii. Chi ni'ix̄iy ajcxy je pascua adzuu'ibi.

²⁰ E co chu'iy, chi Jesús y'ixtacy ma je mesa m̄id je nimajmetzpi ydiscípulos.

²¹ E ma anajty ycaaygixy, huin'it nimay je nimajmetzpi:

—Nidügti miich ajcxy huídibi xyc̄iyegaambich ma nm̄idzipich.

²² Huin'it ajcxy yajtay taj may. Chi ajcxy yajtiy:

—Huindzin, ¿nej ñch jada'ji?

²³ Chi Jesús y'adzooy:

—Yi huídi m̄id ndocxmucyich, yi' je' jadu'n xyc̄iyegaambich ma nm̄idzipich. ²⁴ Janch tiy'ajt co ñch n'oga'ñich, jadu'n nej je profeta jaay jecy'ajty. ¡Ay ayoob je yēdyjc huídi xyc̄iyegaambich! Jac'oy co ca' ycama'xung'aty je huídibi xyc̄iyegaambich.

²⁵ Chi Judas yminañ:

—Huindzin, ¿nej ñch jada'ji?

Chi Jesús y'adzooy:

—Miich jadu'n minamb.

²⁶ E ma anajty ajcxy yca, huin'it Jesús tzajcaagy con̄igy. Chi yajnaxxy Dioscojuyip. E chi jada' tujchuäcxy je tzajcaagy. Chi moy je nimajmetzpi ajcxy je tzajcaagy, e yminañ:

—Cay miich ajcxy jadayaabi tzajcaagy, yi' je' ñch je nnin̄icxich.

²⁷ Huin'it Jesús c̄iȳgy je y'ügy. Chi yajnaxxy Dioscojuyip. E huin'it moy je ügy je nimajmetzpi ajcxy, e yminañ:

—Üc miich ajcxy jadayaabi ügy, ²⁸ yi' je' ñch je nni'pyich. Yi' ñigapxy co Dios ti yaj'aducy je jemybi ayuc. E ñch nni'py ytema'ñ yoga'ñ m̄id je mayjāy yc̄ixpi, jaydēbi ajcxy paadip je huinmeecx̄in m̄id je ypocy yc̄ixpi. ²⁹ Janch tiy'ajt jadu'n nej nnimaaygixy, co ca' n'oc'ügaanich jadüg'oc je pascua x̄i ügy, ixti cooni je x̄i tiempo paadip co ñch ajt n'uucim huinjemybi je pascua x̄i ügy ma ñch nDeedy y'ane'min.

Jesús nigapxy co Pedro ycoyütza'ñyii

³⁰ E co ti y'iidäy, chi ajcxy chooñ ñcxy ma Olivos cögop. ³¹ Chi Jesús je' ydiscípulos ajcxy nimay:

—Nidüg'óciy miich ajcxy xy'ixmajtztähua'ñich cham coodz. Je' co jaay-bejty jadu'n miiñ ma je Dios ñecy: “Ögip je cuend'ajtpi, huin'it je cōbixy

yöyhuäcxtähua'ñ." ³² E co anajty ñch njugypicyich jadüg'oc ma anajty ti n'ögyich, chi jayijpni nñicxa'ñich ma Galilea, e jim naybaatim nidüg'óciy.

³³ Chi Pedro ymíñañ:

—Oy yi jacjadyiibi migügtijcich xyjadim'ixmajtztäy, per ni camina xii ñch miich n'ixmadzipy.

³⁴ Chi Jesús Pedro nimay:

—Janch tiy'ajt jadu'n nimäyich, cham coodz ca'ni anajty je tzey yaxigy, miich tugig'oc mina'nip co ca' xy'ixy'adyiijich.

³⁵ Chi Pedro ymíñañ:

—Oy ñch ndim'ögip müd miich, ni camina ngaminá'nibich co ca' miich n'ix'adyii.

E nidüg'óciy je' ydiscípulos ac tim jadu'n ymíñañ.

Jesús mibijctzoy Dios jim Getsemaní

³⁶ Chi Jesús ñicxy müd je' ydiscípulos ajcxy, oy yja'tcixy jim Getsemaní. Chi jim Jesús nimay je ydiscípulos ajcxy:

—Ya miich ajcxy oc'iña', miin ñch n'ocnicxyich jim'amy Dios mibijctzoobi.

³⁷ E chi Jesús ñicxy müd Pedro etz nañ jadu'n müd je Zebedeo ymang nimetzpi. E jim Jesús ñayjihuiyij janch tajy may mij cajee. ³⁸ E chi jim yajnimay je nidugiigpi discípulos:

—Nayjihuiybich taj may ma njot nhuinma'ñ, ixti mabaad anajty n'ögich müd tájin máyin. Hui'm miich ajcxy ya müd ñch etz ca' mmaagixy.

³⁹ Huin'it Jesús ñajtzyöyiy mijci'm jahui'. Chi jim ñaygojxtinaydaci naaxcíxy, e ytiigiy Dios mibijctzoobi, ymíñañ:

—Dios Teedy, ñch nDios, pen jëbi jadu'n, mduñ may'ajt píjciyich jadayaabi tzaachypi ayo'n, per ca' yjadu'nity nej ñch ndzojcin mdunipy, jadu'n mdunipy janchtiy nej miich mdzojcin.

⁴⁰ Huin'it Jesús yhuimbijty jim ma anajty ti yajhui'my je nidugiigpi. E oy paady ac tim maab anajty ajcxy. Chi nimay je Pedro:

—¿Nej ca' madäga'ñ miich ajcxy co m'idipy juugy tüg hora müd ñch ycixpi? ⁴¹ Hui'mi' ya, juugy m'idipy etz mibijctzoo Dios, jaydeb ca' je ca'oybi xymimadägip. Janch tiy'ajt co jotjoty ooy mnijot'ajtcixy com tunaangixy yi oybi. Per yi mninix ca' ymadäga'ñ nicxy tuñ oybi.

⁴² Chi mimetz'oc Jesús ñicxy oy Dios mibijctzoy, ymíñañ:

—Dios Teedy, pen copicy co ñch nbaadibich je ayo'n, huen jadu'n yjadiyb müd ñch nej miich mdzojcin.

⁴³ Chi jadüg'oc Jesús huimbijty ma je nidugiigpi discípulos, e oy pátnibi maab ajcxy, je' co ca' anajty ajcxy mimadägy máhui. ⁴⁴ Chi yajhui'my ajcxy, e midugig'oc ñicxy Dios mibijctzoobi. E nañ tim jadu'n oy minaanip jadu'n nej anajty ti y'ocminamb. ⁴⁵ Chi jadüg'oc huimbijtni jim ma je nidugiigpi, chi nimay ajcxy:

—¿Máagixni? Póxcix jadachambi. Ti je tiempo yhuaad'ajtni mina ñch, je jäy huidibi tsoon tzajpjoty, nyajciyega'ñich ma yi jibicjäydijc ajcxy. ⁴⁶ Pidiccix, tzoc jámim, chi ymiñ je huidibi xyciyegaambich ma nmidzipich.

Tzummy mach ajcxy Jesús yajnicxy

⁴⁷ Jesús capxni anajty jim co yjaty je Judas. Judas hue' je' nidügti je majmetzpi discípulos huidibi Jesús yhuin'ijx. E je Judas müd ja'ty mayjäy, je huidibi anajty ti quexy je judío teedy mijtungmüdpí etz je mijjäydijc. E je mayjäy hue' anajty ajcxy müd ypujx etz quipy. ⁴⁸ Judas, je huidibi anajty cïyejcp Jesús, ti anajty jayijp yecy tüg ijxpejt huidibi müd jëbi ajcxy ijxcapy Jesús. Jadu'n jayijp Judas ycapxtuñ müd je' ajcxy, e ymíñañ:

—Je jäy hu'idibi anajty ndzücxypich, yí je' Jesús. Májtzcix.

⁴⁹ Huin'it Judas nimijhuägy Jesús co capxpocha'ñ, chi yminañ:

—¡Huindzin!

Chi tzücx.

⁵⁰ Chi Jesús ñimay:

—Migüg, ¿na'amy co xyñimijhuägyich?

E co jadu'n ñimay, chi mic'amy yí' ajcxy majch Jesús. Chi ajcxy yajnicxy tzumy mach.

⁵¹ E huin'it nidüg je Jesús ymigüg, juudy je ypujx. Chi tatzpujxtucy je teedy migtungmüdpí ytumbí. ⁵² Chi Jesús ñimay je' ydiscípulo:

—Pidäg yí mbujx ma ytijc. Com pinjaty tziptumb müd pujx, nañ jadu'n y'ögipy müd pujx. ⁵³ ¿Nej ca' mnejhuíy co ich jébi nbijctzooyich cham adzu'x may ángeles, je hu'idibi xyñihuá'ñibich ma nmidzipich? ⁵⁴ ¿Per nej ycixipy yca'pxipy nej miiñ jaaybety, jadu'n nej cham ytuñyí yjadyí müd ich ycixpi?

⁵⁵ Chi Jesús ñimay je mayjäy:

—Miich ajcxy ti xyñidzoníyich müd je pujx müd je quiipy. ¿Nej mdiy ich meetzpi o jäy yaj'öcpich? Ich jabom jabom anajty iñäyich nyaj'ixpicyich miich ajcxy jiby ma Dios ytijc. E ca' miich ajcxy xymajchich. ⁵⁶ Huinjihu' miich ajcxy co tüg'óciy yam ytuñyí yjadyí ca'px tim jadu'n nej je profeta ajcxy cojaay jecy'ajty.

Huin'it nidüg'óciy je' ydiscípulos ajcxy yqueectay. Chi Jesús yhu'ny maydügpajc.

Jesús ma naymujcpidijc yhuinduu

⁵⁷ Je' ajcxy hu'idibi anajty ti mach Jesús, yajnicx ajcxy jim ma Caifás ytijc. E jim ma Caifás ytijc ma anajty ti ñayöymujctáayigixy je escribas etz je mijjäydijc ajcxy. ⁵⁸ E je Pedro anajty axam nicxy jigügy jihuíy, ixti cooni yajja'ty ma Caifás ytiba'. Chi jim ytigiy. Chi ixtacy müd je cuend'ajtpí ajcxy, je' co oc'ixa'ñ ocnejhuíhua'ñ nej Jesús yjada'ñ.

⁵⁹ Je teedy ajcxy migtungmüdpí etz tüg'óciy je judíojäy migtungmüdpí ajcxy huinma'ñ ixtaaygixy nej jébi Jesús yajpocycägixy müd ajcxy xihuín, e jadu'n jébi mooygixy yí o'cin. ⁶⁰ Mayjäy ñihuambejty Jesús müd aní, per ni pin anajty ca' müdity tiy'ajt co Jesús anajty ti ytundigooy müd judíojäy ajcxy ycötujcin. Jac com jecy miin metz testigos müd aaní. ⁶¹ Je' ajcxy yminañ:

—Jadayaabi yéydijc minañ co jébi nyajhuindigooyich Dios ymijtzajtpijc, e codugüg xí ti anajty nyaj'oyíyich jadüg'oc.

⁶² Huin'it je teedy migtungmüdpí ytinayigy, e ñimay Jesús:

—¿Nej co ca' m'adzooy? ¿Nej janch tiy'ajt nej jadayaabi metzpi testigo yminañ?

⁶³ Per Jesús ca' y'adzooy. E huin'it je teedy migtungmüdpí ñimaay:

—Ñimaay ich ajcxy Dios ycixpi, pen janch miich je' je Cristo je Dios y'ung.

⁶⁴ Chi Jesús yminañ:

—Miich jadu'n minamb. Nañ jadu'n ich miich ajcxy ñimäy, co ich je jäy hu'idibi tzoon tzajpjoty, miich ajcxy xy'ixipyich tzajpjoty ma Dios ymijc a'oy'amy. Nañ jadu'n miich ajcxy xy'ixipyich jocjoty co anajty nhuimbityich jadüg'oc ya naaxhuiñ.

⁶⁵ Chi je teedy jacmigtungmüdpí oy yhuít huindzeczy huinma'ch, chi yminañ:

—Jadayaabi yéydijc ti capxtigooy Dios. ¿Ti testigo njac-huaanim? Miich ajcxy ci'm ti mmidoogixy co yí ti ycapxytigooy ma Dios, e minañ: ⁶⁶ ¿Nej miich ajcxy minaangixy?

Chi ajcxy ymīnañ:

—Ti ycapxytigooy, copicy co y'ögipy.

⁶⁷ Chi ajcxy huindzuju jįptzuju etz cojxy ajcxy. Chi jacjadyii huingojxy jįpcojxy. ⁶⁸ E chi ajcxy nīmay:

—Pen janch co miich je' je Cristo octiygapx pīn ti xycoxy.

Pedro ymīnañ co ca'p Jesús ixy'adyii

⁶⁹ Je huin'it moñi Pedro anajty iñay tībāguj. Chi ñimiini tūg tōxy'anāg tumbi, chi ñīmaayi:

—Miich nañ jadu'n ti mhuidity mīd Jesús je Galilea jāy.

⁷⁰ Chi Pedro ymīnañ mayjāyjoty:

—Ca' nhuinjihūyich ti mgapxpy.

⁷¹ Pedro hue' anajty pīdzimnīp co ñimiini huingbi tōxy'anāg. Chi je tōxy'anāg nīmay je' ymīgūgtijc:

—Jadayaabi yēydijc ti yhuidity nañ jadu'n mīd Jesús je Nazaretpi.

⁷² Chi Pedro jadūg'oc coyūch je Jesús cixyjot huinijot ymīnañ:

—Ca' n'ixy'adyiijich yijūbi yēydijc.

⁷³ Jac co hueeni, je jāy huīdibi anajty ajcxy jimīp ñīmay ajcxy je Pedro:

—Janch co miich nañ jadu'n anajty mīd mhuidity yi Jesús, com yi m'ayuc yi' xyajniquēxīcp.

⁷⁴ Chi Pedro tigīy capxpi janch oy ñinej mīnañ huinijot:

—Ca' n'ix'adyiijich yi yēydijc.

E tīm huin'itīy je tzey yaxīgy. ⁷⁵ Chi Pedro jāymejtzcody jadu'n nej anajty Jesús ti ñīmāyīi: “Ma ca'ni anajty tzey yaxīgy cham coodz, miich tugīg'oc xycoyūtzibich.” Chi Pedro pīdzimīy tība', e jīiby oy yāxy mībaad yjotcidāgy.

27

Chi Jesús yajcīeyjcy ma Pilato

¹ E co oy yxīmīy yticxīy, chi je teedy mįjtungmīdipi etz je mįjjāydijc ajcxy quipxycapxy co yaj'ōgaangixy Jesús. ² Chi ajcxy yajnicxy cīxoch oy ajcxy cīyecy ma Poncio Pilato je gobernador.

Judas ñayyōctīyī

³ Co je Judas je huīdibi anajty ti cīyecy Jesús, co ijxy co yaj'ōgaanīp Jesús, chi oy yjotmaybaatni. Chi conhuimbijty je iipxmajcpi plata meeñ ma je teedy mįjtungmīdipi etz mįjjāydijc ajcxy. ⁴ Chi Judas nīmay je teedy mįjtungmīdipi etz je mįjjāydijc ajcxy:

—İch ti ndundigooyich co ti ngīyecyich yi tudāgyjāy ma miich ajcxy.

Chi je' ajcxy y'adzooy:

—Ti İch ajcxy n'occuent. Miich yi' mnīgīxp tībī mduñ.

⁵ Huin'it Judas cohūijīy je meeñ jīiby tzajtīgoty. Chi ñīcxy. Chi ñayyōctīyī.

⁶ Huin'it je teedy mįjtungmīdipi yajpīdīgy je meeñ. Chi ajcxy ñayñīmaayi mīñ xyipy:

—Jadayaabi meeñ ca' yjēbity co nbīdaacīm ma ofrenda ñīgīdāgy. Je' co yi' yjējity je huīdi nī'py ti tzoo'adyii.

⁷ Huin'it je teedy ajcxy tuñ je quipxycapxy co juyaangixy mīd je meeñ tūg naax huīdibi jāy ytīp, tūtznaax it, ma ajcxy yajnaxtigīhuīpy pīnjaty ca' ycogajpity jim Jerusalén. ⁸ İxti chambaad jadu'n xī'adyii jejīmībi it: Nī'py naax. ⁹ E jadu'n ycījx yca'px nej je profeta Jeremías ymīnañ: “E jadu'n ajcxy je' yajpīdīgy meeñ iipx majcpi plata meeñ (je' choou nej anajty ajcxy İraeljāy

ti yajniğöduğiy), ¹⁰ e miid je meen ajcxy juy je tütznaax it, jadu'n nej anajty ti xy'ane'myich Dios.”

Pilato y'amidooy Jesús

¹¹ Jesús yajpaady jim anajty ytinäy ma je gobernador Poncio Pilato yhuindu, chi y'amidoohui:

—¿Nej miich je' judíos jäy xyrey'ajtp?

Chi Jesús y'adzooy:

—Miich jadu'n minamb.

¹² Je judío teedy ajcxy huidibi mijtungmiidpi etz je mijjäydijc tzachxigixy Jesús ma je gobernador. Ni jadu'ñyi Jesús ca' y'adzooy. ¹³ Chi je Pilato ñimay Jesús:

—¿Nej ca' mmidooy nej yi' ajcxy yxiiyi?

¹⁴ Per Jesús ni jadu'ñyi ca' y'adzooy. E paady je gobernador oy mij huinmay, ni ca' ocnejhuuñi ti ycapxy.

Jesús ycödujcy y'o'cin

¹⁵ Je gobernador jadu'n anajty ycostumbre miidity co jimijt jimijt najtzmaziy tüg machyjäy pascua xijoty, je huidibi je mayjäy ti ytimychojcpy. ¹⁶ E jim anajty tüg je machjäy huidibi anajty ajcxy ix'y'ajttaayb, e yxiiyty Barrabás. ¹⁷ E co anajty jim ti ytügmujctaaygixy, chi Pilato ajcxy y'amidooy:

—¿Pin miich ajcxy mdzojcpy co ich nnajtzmazihuibichi? ¿Najtzmaziyich Barrabás o Jesús huidibi jäy ajcxy ytijpy je Cristo? ¹⁸ Pilato ñejhuuyb anajty co mañ'ájtngix anajty ti ciyejccixy Jesús.

¹⁹ Jimni anajty iñäy Pilato me je ycötujctac co je ytöxyijc tiy'ajt quejxy ma yi', ymíañ: “Ca' huaad myajtzaachytuñ yi tudägyjäy. Je' co ich amygoodz ti ngumäyich janch jibic miid yi' ycixpi.”

²⁰ Per je teedy ajcxy etz je mijjäydijc ti anajty capxyjotcidaaccixy je mayjäy co huen yajnajtzmaziy Barrabás etz huen yaj'öccixy Jesús. ²¹ Paady co jadüg'oc je gobernador y'amidooy je mayjäy:

—¿Huidibi machyjäy mdzojcpy co nnajtzmazihuibich?

Chi je mayjäy y'adzooy:

—Najtzmaziy Barrabás.

²² Chi Pilato y'amidooy je mayjäy:

—¿E nej ndunipyich yi' Jesús, huidibi jäy ytijpy Cristo?

Huin'it ajcxy nidüg'óciy y'adzoday:

—¡Yajcruutzpet yi' Jesús!

²³ Chi Pilato ymíañ:

—Pues, ¿nej ti ytundigooy?

Per je mayjäy ni goob y'adzoday:

—¡Yajcruutzpet! ¡Yajcruutzpet!

²⁴ Pilato yjapubedaan Jesús, per co ijxy nejhuuy co je mayjäy ca' ni nej niducy. Hue' ajcxy oy ytigiy huambi jihuiybi, chach ñayñajtztijiygixy miid jot'an. Huin'it Pilato capxyñiguejxy je huadz ni. Chi ytigiy cibujp ma je mayjäy yhuindu, e ymíañ:

—Ca' ich ngo'adzohuipyich jadayaabi tudägyyëydijc y'o'cin. Miich ajcxy yi' mgo'adzoohuipy.

²⁵ Chi je mayjäy y'adzoday:

—Ich ajcxy ngo'adzohuipyich yi' y'o'cin miid n'ung anäg etz n'ap n'oc.

²⁶ Chi Pilato najtzmaziy je Barrabás. Per Pilato ane'my co huen Jesús yajhuojp. E co yajhuojptay, chi ciyejcy, co huen yajcruutzpedy. ²⁷ Chi Pilato ysoldados ajcxy yajnicxy Jesús ma agujctijc. E jiiyby tüg'óciy soldadtijc

ñayyöymujci ma Jesús. ²⁸ Chi je soldado ajcxy je' yhuit yajniñenducy. Chi ajcxy yajniñeniy je tzapx huit huídibi je rey ajcxy yajtuumyb. ²⁹ Chi ajcxy tacy tüg corona mïd apy. Chi ajcxy yajcöjeniy ma Jesús. E huin'it ajcxy a'oy'amy yajcigabiiy tüg je paxy. Chi ajcxy huingoxtinay'ahuñy. Chi ajcxy nixiicy yajxiicy, e ymïnaangixy:

—¡Ooy ymijity yjanchity, je judíos ajcxy yrey!

³⁰ Chi ajcxy huindzujy jiptzujy. Chi ajcxy yajcigajptucy je paxy, e yajcöhuojpïgy ajcxy. ³¹ E co ajcxy nixiictay yajxiictay, chi yajniñenducy je rey yhuit etz yajniñeniy je yci'm huit. Chi ajcxy yajnicxy ma yajcruutzpedaangixy.

Co Jesús yajcruutzpejti

³² E jim ma anajty hueeni ti ytüyöy, jim ti paty tüg Cirene yëydijc anajty yxijity Simón. Chi ajcxy adzip nimay Simón co huen jaccapi Jesús ycruudz.

³³ E co ajcxy yja'ty ma tüg je it yxijip Gólgota, jadu'n yhuimbizim Öcpi Cohuajc Cögor. ³⁴ E jim ajcxy Jesús jayaj'üga'ñ vino temhuídity mïd tzooy, jigix ca' jihuihuip je tzaachypi. Per co uucmajch, chi jihui'ñybijc co ca' y'oy'uucnity.

³⁵ E co anajty ajcxy yajcruutzpety Jesús, chi je soldadtijc suerte ijxy, pin jëbi ocjë'adyii Jesús yhuit, chi yciyxy yca'pxy jadu'n nej je profeta cojaay jecy'ajty: “Yajhuäcxipy ajcxy ñch nhuit e mïd ñch nhuit yciyxi ixipy ajcxy suerte.” ³⁶ E jim anajty ajcxy ññaaygixy cuend'ajtcixy. ³⁷ Je xihuñ ayuc huídibi ajcxy yjaay ma Jesús ycöduu jadu'n ymïnañ: “Jadayaabi je' Jesús, je judíos ajcxy je yrey.”

³⁸ Quipxy mïd Jesús ajcxy yajcruutzpejty metz meetzpi. Tüg a'oy'amy, e jadüg anajty'amy. ³⁹ Je mayjäy huídibi ajcxy naxiyyb anajty ma Jesús, ooy anajty oy ycöjigiñ, nixigy yajxigy ajcxy Jesús, ⁴⁰ ymïna'ñ ajcxy:

—Bah, miich huídibi Dios ytijc jidaanip, e codugig xii huingbi myajpidäga'ñ. Miich ci'm cham naygohuäñi, e minac cruudzcixy, pen janch miich Dios xy'ung'adyii.

⁴¹ Nañ jadu'n je teedy ajcxy huídibi mijtungmïdipi, etz je escribas, etz je fariseos ajcxy etz je mijjäydijc nixiicy yajxiicy ajcxy Jesús, ñayñimáayigixy miñ xyipy:

⁴² —Huingbi ti cohua'ñ, e ca' jaty nej ci'm ñaygohua'niiyb. Pen janch co yi' jëjity je Cristo je Israel jäy rey, huen minacy jadachambi ma cruudz, huin'it nmibijcim. ⁴³ Yi' ti pidägy ymibijcin ma Dios; huen jadachambi je Dios yajniñdzögyii, pen janch Dios chogyii; yi' ti ymïna'ñ co Dios y'ung'adyii.

⁴⁴ Nañ jadu'n je metzpi meetzpi ajcxy huídibi cruudzpejt quipxy mïd Jesús nixiicy yajxiicy ajcxy ooy Jesús.

Jesús y'ögy cruudzcixy

⁴⁵ Co ycuycxijiiy, chi ycoodziyday tüg'ócüy naaxhuiñybi. E jadu'n je naaxhuiñybi y'ijty coodz, ixti minacy yxii. ⁴⁶ Huin'ity Jesús ycapxyqueecy janch mic ymïnañ:

—Elí, Elí, ¿lama sabactani? —yi' jadu'mbi ayuc hue' yhuimbizimy: Dios Teedy, Dios Teedy, ¿ti co ti xy'ixmachich?

⁴⁷ Nijëjity jäy huídibi anajty jim yajpatp huington ma Jesús co jadu'n midoogixy Jesús y'ayuc, chi ajcxy ymïnañ:

—Jadayaabi yëydijc cham yaaxtaayb je profeta Elías.

⁴⁸ Huin'it nidüg jäy ñicxy janch poyigy etz oy yajtzoñ je pixy. Chi je pixy yajxoogy mïd je xun vino. Chi pidacy je pixy ma je paxyjip. Chi yujctijy ma Jesús y'ahuac co huen ügy. ⁴⁹ Huin'it nijëjity ajcxy ymïnañ:

—Ixmatz, tzoc ajt oc'ixim, pen nimiinip Elías, pen janch yajniñdzögyii.

⁵⁰ Jadüg'oc Jesús yaaxqueegy janch mic. Chi oy y'o'cni. ⁵¹ Co Jesús y'o'cy, tim huin'ítiy jim ma Dios ytijc je mapxy yhuít yciitzhua'cxy tiná'amy. E nañ jadu'n je naaxhuiñybi ooy chuyuy mïd ujx micpi etz je mijjatychaa oy jüitzhua'cxy. ⁵² May öcpi jut y'ahuach etz yjugypijcy mayjäy tiibi anajty y'o'ccixy tiibi anajty mibijccixy Dios. ⁵³ Co Jesús yjugypijcy, chi je may'öcpi tiibi anajty jugypijccixy etz tiibi anajty pidzimgixy ma öcpi jut, chi ajcxy ytigiiy ma je Dios ycajp, je Jerusalén. E mayjäy ajcxy ijxy. ⁵⁴ Co je mic ujx oy ñaxy etz jac tijaty anajty ti ytuñyii ti yjadyii, chi je capitán etz mïd jadyii ymígügtijc huídibi anajty cuend'ajtp Jesús ooy ajcxy chigiy yjihuiy, e minaangixy:

—Janch tiy'ajt co yijiibi yëydijc Dios yi' anajty y'ung.

⁵⁵ May anajty nañ jadu'n töxyjäydijc ymij'ijxcixy jigüem huídibi anajty ajcxy Jesús ti mïddzoon jim Galilea. Yi' anajty ajcxy Jesús ypubejtp. ⁵⁶ E ma je' ajcxy jim anajty chooñity, María Magdalena, María huídibi Jacobo etz José ytaj'ajtpy, etz je huídibi Zebedeo y'ung ytaj'ajtpy.

Jesús yajnaaxtigiiy

⁵⁷ Co oy chuu'iiyñi ycoodziiyñi, huin'it chooñ ma Arimatea tüg comeeñyjäy huídibi yxi José. E je' ymijnicxpejty anajty Jesús. ⁵⁸ Chi José ninicxy Pilato oy pijctzou Jesús ñinicx. Huin'it Pilato pidacy y'ane'min co huen möyii. ⁵⁹ Chi José ycidigiiy Jesús ñinicx. Chi huinmojch mïd tüg poob sávana. ⁶⁰ Chi yajnaaxtigiiy ma je yci'm jut jemybi huídibi anajty ti yajtzejtütüty ti yajpädüty ma tüg tzahuingueetz. Chi adigüejectujcy je öcpi jut mïd tüg tzaa. ⁶¹ Chi José ñicxni. E jim yhuí'my María Magdalena etz je jadügpí María, y'ñäy ajcxy ymihuingon öcpi jut.

Je cuend'ajtpi ajcxy ma Jesús ñaaxtigiiy

⁶² E com jabom ma anajty Jesús ixiiybi ti y'ögy, ma anajty ti ni'ixiydäy mïd je sávano xii yciixpi, chi je teedy ajcxy huídibi tungmïd etz je fariseos ajcxy ñayyöymujci ma je Pilato. ⁶³ Chi ajcxy ymínañ:

—Huindzin, yi' ñich ajcxy njäymejchpyich co je anidacpi ymínañ ma anajty yjuugyity co codugüig xii jugypiga'ñ jadüg'oc co anajty ti y'ögy. ⁶⁴ E paady tunmay'ajt quexipy soldados ajcxy ma Jesús ti ñaaxtigiiy huen cuend'ajtcixy ixti cooni tugüig xii paadipy. Ca' yjeyity co ñiminib adzuum agoodz je' ajcxy huídibi mijnicxpejtip etz tzingüegipy ajcxy Jesús ñinicx. E chi nicxy jäy ymínañ: “Ti yjugypicy je öcpi.” Chi anajty jac'anaxy je anii ti yajtni ca'ydi je jayijpi.

⁶⁵ Chi Pilato ajcxy nimay:

—Miich ajcxy mïd tüg picy soldados huídib cuend'ajtp ma miich ajcxy. Níxcix miich ajcxy yaj'adujccixy je öcpi jut, jadu'n nej m'a'ixiiygixy.

⁶⁶ Chi ajcxy choni ma je Pilato. Chi ajcxy quejxy je tüg picypí soldados ma je öcpi jut. Chi ajcxy pidacy ijxhui'min ma je tzaa huídibi ajcxy je jut yaj'adigüejectujcy.

28

Co Jesús yjugypijcy

¹ E com jabom co yximiiy yticxigy je domingo xii, huin'it ñicxy María Magdalena etz je jadügpí María ma Jesús ñaaxtigiiy. ² Chi tüg mij ujx ñajxy. Huin'it ycidacy Dios tüg y'ángel huídibi tzomb tzajpjoty. Chi jidigejcy je tzaa ma je öcpi jut aguu. Chi y'ixtacy ma tzaa ñicx. ³ Janch adicxp je ángel anajty yhuinjip jadu'n nej huídizuc, e je yhuít janch poob'ögy. ⁴ E co je soldados ajcxy ijxpaty je ángel, chi ajcxy ooy chuyuygooty. Chi ajcxy yhuí'my jahuengi ögy. ⁵ Huin'it je ángel y'adzooy je metz töxyjäy:

—Ca' miich ajcxy mdzig'iy. Hich nejhuybich co miich ajcxy m'ixtäy Jesús je huídibi ajcxy yajcruudzpejty. ⁶ Per ca' je' cham ya. Ti je' yjugypicy, jadu'n nej ymínañ. Min miich ajcxy oc'ix ma ñaaxtig'iy. ⁷ Nicx miich ajcxy jottigooyb ma je' ydiscípulos ajcxy e nima': "Ti Jesús yjugypicy jadüg'oc, e yi' ñicxip jim Galilea e jim ajcxy mmídnaybad'iyb." Hich miich ajcxy yam nnímaaygixy.

⁸ Huin'it je töxyjäy ajcxy chooñ janch poygy ma anajty ti ñaaxtig'iy Jesús. Chi ajcxy ñicxy m'íd tzigi'ñ, per agujc jotcuyc. Poygy ajcxy oy t'iy'ajt yecy ma je discípulos ajcxy. ⁹ E jim anajty je metzpi töxyjäy ytüöy, timetini Jesús ñayguéxici ma je' ajcxy yhuinduu. Chi Jesús ajcxy capxocxy. Chi je' ajcxy mihuingoñ Jesús etz mineeni je' ytecy. Chi ajcxy huindzig'iygixy. ¹⁰ Jesús m'inañ:

—Ca' mdzig'iygixy. Nicx miich ajcxy nima' je nmigügtijcich co huen ajcxy nicxy jim Galilea, e jim naybad'iybich m'íd yi' ajcxy.

Huídibi ajcxy je soldadotjc ñigapx

¹¹ E t'üöybñi anajty je töxyjäy nimetzpi co nijjity je soldados ajcxy chooñ ma Jesús ñaaxtig'iy ñicxy jim Jerusalén, m'ídmíydäga'ñ je teedy huídibi tungm'ídpí nej anajty ti ytuñyí ti yjadyí ma Jesús ñaaxtig'iy. ¹² E huin'it je teedy ajcxy ñayöymujctayí m'íd je mijjäydijc, tunaangixy quipxy capxy. Huin'it je teedy ajcxy etz je mijjäydijc moy ajcxy je soldados may meeñ. ¹³ Chi ajcxy nimay:

—Miich ajcxy m'ina'nip co maab anajty miich ajcxy mijcoodz co ymíñ Jesús ydiscípulos ajcxy etz tzingueeci Jesús ñin'icx. ¹⁴ Etz pen ym'ídooyb anajty yí gobernador, hich ajcxy ngapxjotcidägich, jigix ca' nej xytúngixipy.

¹⁵ E huin'it ajcxy je soldados y'c'ídg'iyí je meeñ. Chi ajcxy ñicxy cuyduñ jadu'n nej anajty ajcxy ti ñimäyí. E ixti chambaad jadu'n judíojäy capx je ayuc.

Huídibi Jesús yajnibijc ydiscípulos ajcxy

¹⁶ E jadu'n ajcxy ñicxy je nimajtügpi Jesús ydiscípulos ajcxy jim Galilea. Chi ajcxy ñicxy ma je cögop jadu'n nej anajty Jesús ti ñimáayigixy. ¹⁷ E co ajcxy ijxpaty Jesús, chi ajcxy oy huindzig'iy. Per jim nijjity huídibi ca' m'ibijcy co anajty yjéjity. ¹⁸ Huin'it Jesús ym'ijhua'cy ma yi' ajcxy, e nimay:

—Hich ti nyajmöyich je cötujcín jii by tzajpjoty etz ya naaxhuiñ. Hich ti nyajmöyich je mij cötujcín, jaydëbi n'ane'myich jii by tzajpjoty etz ya naaxhuiñ. ¹⁹ E paady nicx miich ajcxy huindu'my naaxhuiñ capxhuäcxix je ayuc, jaydëbi jäy ajcxy xym'ibig'ipyich. Tüg'ócy jäy ajcxy huídibi xym'ibijcpich myajníbedipy ajcxy m'íd Dios yxí, Dios y'ung yxí, etz m'íd je Espíritu Santo yxí. ²⁰ Miich ajcxy myaj'ixpig'ipy je mayjäy co copicy cuydunipy ajcxy hich ngötujcín tüg'ócy jadu'n nej ti n'ane'myich miich ajcxy. E miich ajcxy mnejhu'iyb co nm'ídt'ityich miich ajcxy huin'ixí huin'tiempo, ixti mabaad naaxhuiñybi anajty ycixpi ytigooy. Jibaad ycixy. Amén.

SAN MARCOS

Jaayhui'my Jadu'n Nej Jesucristo Ytun Yjajti

¹ Jadu'n oga'ñ chondacy je oybi ayuc t̄y'ajt jadu'n nej Jesucristo, je Dios y'ung ytun etz yjajti.

² Je Dios y'ayucnajtzc̄apx̄īybi je Isaías jecy'ajty jayhui'my jadu'n nej Dios nimay je Cristo:

Nguexaamyich ñich ngogapxy jayijp ma nidüg nidüg cajp ma miich m̄nicxa'ñ jac'axam, jigix jëb je cogapxy nimähuīpy je jāy ajcxy co huen nayñi'ix̄īyigixy ma yjot yhuinma'ñ m̄id miich yc̄ixpi, jadu'n nipaady nej jihūy jāy ajcxy ni'ix̄īy tū'aa co tūg rey yjāda'ñ.

³ Nañ jadu'n jadüg it Isaías jayhui'my jada ayuc ma jadu'n ym̄inañ:

Jim m̄j̄tiḡiduum jāy ajcxy m̄idooy co tūg jāy y'ayuccapxhuäcxy, jadu'n ym̄inañ: “Nayñi'ix̄īyigix ma mjot m̄huinma'ñ ajcxy jaydëb naybaatim m̄id ajt nHuindzin Dios. Ixm̄ajtz̄c̄ixy yi m̄j̄bicjot m̄j̄bic-huinma'ñ. Jadu'n nipaady nej jāy ajcxy yajtiy tū'aa hūidibi ooy y'adijy y'a'och.”

⁴ Jim m̄j̄tiḡiduum anajty Juan je Bautista miñ e ytiḡīy mayjāy yajñibejtp̄i. Chi Juan capxhuäcxy Dios y'ayuc ma je mayjāy ajcxy hūidibi anajty mimb ñibejtp̄. Juan ayuc capxhuäcx co cop̄icy co jāy ajcxy huen jothuimb̄j̄tc̄ixy etz ixm̄ajtz̄c̄ixy ajcxy je yj̄ibichuinma'ñ, etz ñibéjtc̄ixy, jigix jëbi Dios yhuinmecz̄ib ajcxy ypocy. ⁵ Tūg'óciy je mayjāy ajcxy hūidibi anajty tzinaayb jim Judea ñaaxjot etz jim Jerusalén mimb anajty ajcxy ma Juan, e y'am̄idoo'ijty anajty ajcxy je'y'ayuc. Co je jāy ajcxy capxp̄idzīmy nej anajty ypocytungixy, chi Juan yajñibejty ajcxy ma je Jordán m̄ijn̄i.

⁶ Juan hue' anajty yhuit'ajtpy camello ñibijc, e nañ jeyim anajty m̄id ñayhuiñȳii, e hue' anajty yj̄icx'ajtpy mu' etz uxpäg. ⁷ Juan ycapxhuäcxy anajty Dios y'ayuc ma je mayjāy, e ym̄inañ:

—Ñich jayijp ti nmiñich ngapxhuäcxy Dios y'ayuc. Jac'axam min̄ipy tūg jāy hūidibi jacn̄igi m̄ic'ajt m̄id̄ity ca'ydi ñich, ca' xypaadyich ñicxy nguejyich yi' yc̄ighuin. ⁸ Ñich ti nyajñibetyich miich ajcxy m̄id ñi. Per je jāy hūidibi yjacm̄id Dios ym̄ic'ajt, ca'ydi ñich. Yi' xyaj'adiḡihuip xyajjotiḡihuip Dios yj̄ihu'ñ ym̄ic'ajt, jadu'n nipaadip nej jihūy xyajñibedip m̄id Dios yj̄ihu'ñ ym̄ic'ajt.

Co Jesús ñibejty

⁹ Je huin'it x̄ī huin'it tiempo Jesús chooñ ma je cajp hūidibi yx̄ī Nazaret, jim Galilea ñaaxjot, e ymiñ ma Juan el Bautista anajty yajpaady. Huin'it x̄ī Juan yajñibejty Jesús ma je Jordán m̄ijn̄i. ¹⁰ Pidzim̄b anajty Jesús ma je m̄ijn̄i, e tim huin'ityi Jesús iix co je tzajp anajty y'ahuäch, e iix je Esp̄iritu Santo chooñ tzajpjoty, e ycidägy ma yi'. Jadu'n je Esp̄iritu Santo yquëx̄igy anajty nej tūg muuxy. ¹¹ Chi Jesús m̄idooy capxy ayuc choñ tzajpjoty, ñimäȳii:

—Ñich miich n'ung'ajtpy. Ooy ñich miich ndzocy njihūy. Ooy jotcuyc nayjihuīȳīj̄ich m̄id miich.

Je mujcu' tuñ ijxta'ni ma Jesús

¹² Huin'it m̄ic'amy je Esp̄iritu Santo yajñicxy Jesús m̄j̄tiḡiduum. ¹³ E hue' Jesús yhui'miy jim m̄j̄tiḡiduum huixchiḡulpx x̄ī ahua'n iyujc agujc. Huin'it je mujcu' jot'ijxy yhuinma'ñ'ijxy je Jesús. Chi je ángeles ajcxy miñ ypubejty ypuđiḡīy je Jesús.

Jesús yitung yajtzondägy jim Galilea

¹⁴ Ti anajty Juan yajpidägy pujxtigoty, jac'axam Jesús ñicxy jim Galilea. Jim Galilea Jesús capxhuäcxy Dios y'ayuc etz yi Dios y'ané'min. ¹⁵ Jesús yminañ:

—Ti je xii je tiempo yhuaad'ajtñi. Ti nigoody je xii je tiempo mina Dios pidäga'ñ yi y'ané'min ya naaxhuiñ. Jothuimbijtcix ajcxy, etz ixmajtzcix ajcxy mjibicjot mjibic-huinma'ñ. Mibijccix Dios y'ayuc jadu'n nej jëb ajcxy m'alma ñidzögipy.

Jesús huodzoñ midaax jäy huidibi anajty acxmajtzp

¹⁶ Jesús huidijtp anajty ma je mejypa' huidib yxii Galilea mejy, co oy'ixpaady Simón etz y'uch Andrés. Simón etz Andrés acxmadzi anajty yitung'ajtpy, ytipidacpy anajty y'acxmadzi'ñ mejyjoty co ajcxy Jesús ixpaty.

¹⁷ Chi Jesús nimay Simón etz Andrés:

—Min mïd ñich. ñich miich ajcxy huingbi tung nmöhuipy. Jadu'n mdung nipaadip nej jihuïy mjäymájtzcixipy.

¹⁸ Mic'amy Simón etz Andrés ajcxy ixmajch y'acxmadzi'ñ, e ñicxy ajcxy mïd Jesús.

¹⁹ Chi Jesús yjacyöy anajty hueen, e ixpaty Jacobo etz y'uch Juan, je Zebedeo ajcxy ymang. Je Jacobo etz Juan tumb anajty barcojoty. Hue' anajty ajcxy yaj'oyiïyb je' y'acxmadzi'ñ. ²⁰ Chi Jesús mijhuooy ajcxy Jacobo etz Juan, e nimay co huen ñicxy mïd yi'. Mic'amy je' ajcxy ixmajch yteedy, je Zebedeo, barcojoty mïd ytumbi, chi ajcxy ñicxy mïd Jesús.

Tüg jäy huidibi anajty jibic espíritu mïd

²¹ Huin'it Jesús mïd ymigügtijc yja'ty jim Capernaum. Je huin'it sábado, je pocxin xii, Jesús ytigiiy ma je judíojäy ajcxy ñaymujctac jim Capernaum, chi yjäyyaj'ixpijctzondacy. ²² Je mayjäy ooy ajcxy jihuïy huinmay je ayuc huidibi Jesús anajty ajcxy yaj'ixpijcp. Com Jesús hue' anajty yaj'ixpijcy jadu'n nej jihuïy yci'm'ané'min mïdity. Ca' Jesús anajty yaj'ixpijcy jadu'n nej je jäy ajcxy huidibi yaj'ixpijcp anajty Moisés ycötújcïn je jécyip. ²³ E ma je naymujctac tüg yëydijc huidibi mïd anajty ca'oybi. Chi je ca'oybi ooy mic ycapxcoody, e yminañ:

²⁴ —¿Ti co xy'amayïy ñich ajcxy, Jesús huidibi tzomb jim Nazaret? ¿Nej ti mmiñ co xyajhuindigoyáangixyichi? ñich n'ijxajpy miich, e nejhuïybich co miich je' je Huätzpi Dios.

²⁵ Chi Jesús ix'oïy je ca'oybi, e nimay:

—Amon miich, e pidzim ma jada yëydijc.

²⁶ Huin'it je ca'oybi yajyajch yajquidy je yëydijc, e mic yaaxqueegy, e ypidzimy ma je yëydijc. ²⁷ Tüg'ócïy je mayjäy jiiïy ma je naymujctac ooy ajcxy ñay'adzigiiyi, e ñayñimaayi ajcxy miñ xyipy:

—¿Ti jada' yi'? Jada yëydijc ymïd jemybi ixpijcin. Yi' mïd mic'ajt etz ane'm'ajt, paady yciïpi yi' ane'my yi' ca'oybi, e ycapxmidoohuip.

²⁸ Mic'amy je mayjäy ajcxy huidijaty tzinaayb ma tüg tüg cajp jim Galilea nejhuïy ajcxy nej Jesús ytuñ, e cömaagyxy Jesús.

Jesús yajtzögy Simón Pedro ymïd töxyjäybi

²⁹ Tim huin'itïy Jesús ypidzimy ma je naymujctac, chi ñicxy mïd Jacobo etz Juan jim ma Simón etz Andrés ytijc. ³⁰ Simón ymïd töxyjäybi píjcp anajty. Cijx'am anajty y'ity, e mic anajty ooy ytoyii. Tim huin'itïy Jesús ñimaayi co Simón ymïd ooy mic ypiïy. ³¹ Chi Jesús nimijhuägy je pa'mjäy. Chi majtzi yci', e huijtzigy. Tim huin'itïy yi toyii y'ixmajtzi, e chi yajcay yaj'uucy Jesús etz ymigügtijc.

Jesús yajtzögy may pa'mjäy

³² Co xii oy ycidacni, e chuu'iiyñi, chi je mayjäy miid miñ ajcxy ma Jesús tüg'óciy pa'mjäydijc, etz huidijaty ajcxy ca'oybi ymiid. ³³ Tüg'óciy je mayjäy ajcxy ma je jimbi mij cajp nimujcy je tijc ma Jesús anajty ti yjättägy. ³⁴ Jesús yajtzoocay tüg'óciy je may pa'mjäy huenytimytiibá'mity, etz yajpidzimy may ca'oybi majaty jäy ajcxy. Per Jesús ca' anajty a'ixiy nicxy je ca'oybi ñigapxyii, com y'ixy'ajttaayb anajty ajcxy Jesús.

Jesús y'ayuc t'iy'ajt capxhuäcxy jim Galilea

³⁵ Tim mooñi Jesús ymaybidigy, ca' anajty yximiiyñi, e ypidzimy ma je cajp. Chi ñicxy ma tüg mijtig'ituduum Dios miibictzooi. ³⁶ Huin'it je Simón etz je ymigügtijc ooy ajcxy ja'ijxtäy Jesús. ³⁷ Co ajcxy paty je Jesús, chi ajcxy nimay: —Tüg'óciy je mayjäy xyjadim'ixtäy.

³⁸ Chi Jesús nimay Simón etz je ymigügtijc ajcxy:

—Tzoc ajt jámim ma yi jacjadyii cajp huinduy agonbi, jaydeb ngapxhuäcxibich Dios y'ayuc nañ jadu'n ma yi jäy ajcxy jim. Paady yciixpi ndzooñich tzajpjoty, jigix jëbi ngapxhuäcxibich Dios y'ayuc.

³⁹ Jesús nicxp anajty ma nidüg nidüg cajp jim Galilea ycapxhuäcx anajty Dios y'ayuc ma nidüg nidüg judíojäy ñaymujctac, e yajpidzimy anajty ca'oybi majaty jäy.

Jesús yajtzögy tüg jäy nibützpa'mmüdpí

⁴⁰ Tüg jäy huidibi ymiid anajty jibic pützpa'm, je micpi, chi nimijhuägy Jesús, e ycojxtinay'ahuüy ma Jesús yhuinduu, ymiñañ:

—Pen miich jadu'n tzojcpy, jëb xyajtzögich.

⁴¹ Chi Jesús pa'ayoy je pa'mjäy, e pidacy yci' ma je pa'mjäy ñinicx, e ymiñañ: —Ndzojcpyich, cham nyajtzögy.

⁴² Co Jesús jadu'n ymiñañ, chi mic'amy je jäy huidibi anajty miid je jibic püd chögy. ⁴³⁻⁴⁴ Mic'amy Jesús ycapxcijxy miid je jäy huidibi anajty ti chögy, e nimay:

—Ix pin myajnimäy co ti mdzögy. Nicx jayijp jibby ma Dios ytijc ma je judío teedy ajcxy, e mo' Dios yhuindzigi'ñ jadu'n nej Moisés ycötújcín ane'my, jigix jëbi huadz mbidzimipy ma Dios ycötújcín. Cuydun miich huidibi Moisés ñajtz'ane'miyy jecy'ajty, jigix jëbi je mayjäy ajcxy nejhuñhuip co ti mdzögy.

⁴⁵ Per je yëydijc ca' capxymidooy Jesús. Co ñicxy, chi ytigiiy capxy yajyöybi jadu'n nej anajty ti yajtzögyii. Com je mayjäy nejhuñyib huidibi anajty Jesús ti tuñ, paady yciixpi Jesús ca' anajty ocjajtni nej ytigñhuipy iixna' jigüe'xna' majaty cajp. Hue' anajty huidity ma ca' pin chinäy. Per miñ anajty y'oy'ixyii huenytimypinjäyity, chooñ ma nidüg'óciy cajp huinduy agonbi.

2

Jesús yajtzögy tüg jäy c'ima'tpi tecyma'tpi

¹ Ti anajty xii tiempo ñajtninicxiiyñi co Jesús yhuimbijty jadüg'oc jim Capernaum. Je mayjäy ñejhuñyib anajty co Jesús yajpaady ma tüg tijc. ² Chi mic'amy mayjäy ñayyöymujci ma anajty Jesús yajpaady, e ca' anajty tigiycac ma je tijc, miid co tzach mayjäy anajty ti miingixy. Y'adujctaayb anajty ajcxy je tijc'aguu. E Jesús ycapxhua'xyp anajty Dios y'ayuc. ³ Huin'it xii, midaax yëydijc ciymiñ cijx'am ma Jesús yajpaady tüg pa'mjäy huidibi yci' ytecy ti yxujxtäy anajty. ⁴ E com ca' anajty ni nej y'oyiy nej yajjadip ajcxy ma Jesús je pa'mjäy, je' co anajty chach újtzyty je tijc miid je mayjäy, chi ajcxy yajcöhuaach hueeni je tijcñicx ma anajty Jesús yajpaady. Chi ajcxy cödiyñajxy je pa'mjäy cijx'am. ⁵ Co Jesús ijxy je jäy ajcxy ymiibijcín, chi nimay je pa'mjäy:

—Migügich, yi mbocy ti yajhuinmecxtäy.

⁶ Per nijëjity huindzindijc huídibi ajcxy nijaydutp anajty Dios ñecy co ajcxy midoy nej Jesús ymínañ, chi ajcxy ymínañ jotjoty huinmañjoty: ⁷ “¿Nej co jada jäy jadu'n ymínañ co ti yajhuinmecxy jada pa'mjäy ypocy? Capxtigooyb yi' miid Dios. Com ca' nipinjäy jëb ypocyhuinmecxy. Tügpaic Dios yi' huídibi jëb ypocyhuinmecxy.” ⁸ Per Jesús ñejhuiyb anajty nej je' ajcxy chachmínañ jotjoty huinmañjoty, paady mic'amy ymínañ:

—¿Na'amy co mdzachhuinmaaygixy? ⁹ ¿Huídibi jada jac'ooy co nnimäyich yi pa'mjäy: “Ti mbocy yajhuinmecxytäy.” O jac'ooy co nnimähuiich: “Pidig, e yajpidig yi mdögy, e tüyöy?” Tú'ciy yi'.

¹⁰ Chi Jesús yjacmínañ:

—Jadachambi janchtiy nyajquëxigañich co ñich, je jäy huídib tzoon tza-ppjoty, e huídibi cham yajpaady ya naaxhuiñ, nmíidich mic'ajt jaydeb nhuinmecxyich jäy ypocy.

Co Jesús jadu'n ymínañ, chi nimay je pa'mjäy huídibi yci' ytecy anajty xuxy:

¹¹ —Ñich miich yam jadu'n nimäy: “Tinayig, yajpidig yi mmabejt e nicx ma mdijc.”

¹² E mic'amy je pa'mjäy ypidigy, e yajpidigy ymabejt, chi ytüyöchoñ jüiby ma je mayjäy ajcxy anajty y'ixy yhuindicxy. Paady ycixpi tüg'óciy je mayjäy ooy jihuiy huinmay etz jäymejch ojadajty ajcxy Dios, ymínaangixy:

—Nimínaabi ajt jadu'n nga'íxim mijhuinmañ jadu'n nej cham ti n'íxim.

Jesús nimay je Leví: “Pajamgich”

¹³ Chi jadüg'oc Jesús ycajppidzimy, ñicxy jim ma mejypa'. E co mayjäy ñayöymujcy jim ma Jesús anajty yajpaady, chi Jesús yaj'ixpijc je mayjäy. ¹⁴ Co Jesús yjactüyöy anajty, chi ijxpaady Leví je Alfeo ymang. E Leví ñaayb anajty ma je yajcogüejttac jäy yajcogüejtp anajty. Chi Jesús nimay Leví:

—Pajamgich.

Tim huin'ítiy Leví ytínayigy, ixmajch ytung, e panicxy Jesús.

¹⁵ Jadu'n yajti co tüg xii Jesús caayb anajty me Leví ytijc. Mayjäy huídibi ytung'ajtpy anajty yajcogüedii, etz jacjadyii jäy huídibi anajty tundigooyb miid judío jäy ycostumbre y'ñaaygixy ma je caydac quipxy miid Jesús etz je' ydiscípulos ajcxy. Com may jäy anajty ooy Jesús tzach miid huídijtcixy.

¹⁶ Jim anajty ma Leví ytijc nijëjity fariseojäy, je huindzindijc huídibi tzach padumb judíojäy ycostumbre. E co je' ajcxy ijxy co Jesús caayb uucp anajty tügmucy miid tüg'óciy je mayjäy ajcxy huídibi tundigooyb miid judíojäy ytiy'ajt ycötújcín, etz yajcogüejtpidijc, chi ajcxy migapxy Jesús ydiscípulos, je' ajcxy huídibi mijnicxpejtp anajty Jesús, nimay ajcxy:

—¿Nej co Jesús miich ajcxy mhuindzin ycaymucy y'ucmucy miid yi yajcogüejtpidijc ajcxy, etz jacjadyii jäy ajcxy huídibi tundigooyb miid judíojäy ycötújcín?

¹⁷ Co Jesús jadu'n midoy nej je fariseo jäy nigapxyii, chi ajcxy nimay:

—Ca' tzocy tzoydumbi yi jäy ajcxy huídibi mic'ajtp oy'ajtp. Yi' janchtiy yi huídibi ajcxy yuuba'm ymiid chojcpy ajcxy tzoydumbi. Nañ tim jadu'n yi jäy ajcxy huídibi ca' ypocymíidity, ca' ajcxy tzocy pocyhuinmeecxin. Ñich ti nmiñich co nyajjothuimbidipyich pocyjäydijc. Ñich ca' ti nmiñich co nyajjothuimbidipyich oyjäydijc tudägyjäydijc.

Jesús yaj'amidoogixy nej co jäy y'ity jaygay

¹⁸ Jadu'n yajti tüg tiempo ayuu'ijtp anajty je jäy ajcxy huídibi mijnicxpejtp anajty Juan je Bautista. Nañ jadu'n ayuu'ajtp anajty je fariseojäy ajcxy. Chi nijëjity ajcxy ymiñ ma Jesús e amidoy:

—¿Nej co yi jäy ajcxy huídibi mijnicxpejtp ajcxy Juan etz nañ jadu'n yi fariseojäy ajcxy ayuu'ajtp ajcxy, e je jäy ajcxy huídib miich xymijnicxpejtp, ca' y'ayuu'ájtcixy?

¹⁹ Chi Jesús y'adzooy:

—Co ya nyajpaadyich ya naaxhuiñ, ca' ycopicity co ich ndiscípulos ajcxy y'ayuu'adip. Jadu'n nipaady nej jäy ajcxy huídibi píjcin nixidumy ca' ajcxy y'ayuu'aty ma yam yi píjcin nixiduñ, e peni ca'ni je píjcpí ymígügtijc y'ixmajtztäyíi. Nami je píjcpí ca'ni choñ, chi ca' pin y'ayuu'adañ huídibi nixidum je píjcin. ²⁰ E paadip je xii je tiempo mina ca' nmíid'idañich ya naaxhuiñ yi' huídibi ajcxy xymijnicxpejtpich, e huin'it ajcxy y'ayuu'adaangixy.

²¹ Com jemybi Dios y'ayuc nyaj'ixpicpyich, paady ca' ytügíy miiid je jécyp ayuc huídibi je fariseo jäy ajcxy yaj'ixpíjcpí. Jadu'n nej miich ajcxy mnejhuíy co ni pin ca' agiyíy tuc huit miiid tüg pedaas jemy huit, con je' co je jemy huit nímujcp je', e chi nígi najtzcídzihuip je tuc huit. ²² E nañ ni pin ca' jéb huaad pídagy jemy vino ma tuc cochac. Je' co je vino jemybi ycídzamy je tuc cochac, e chi y'ixyojctáhuip je vino etz je cochac ñitigoydáhuip. Hue' janchtiy jéb ajcxy pídac yemy vino ma jemy cochac.

Je discípulos ajcxy yajmújcixy je moc cojc sábado xii

²³ Tüg sábado xii Jesús miiid ydiscípulos ajcxy ñaxiiy ma tüg trigo cam. E huin'ítíyí je ydiscípulos ajcxy ytígíy je trigo tujcp. ²⁴ Co je fariseo jäy ajcxy ijxy jadu'n nej Jesús ydiscípulos ajcxy anajty tujcmujc trigo tím, chi ajcxy nímay Jesús:

—Ix miich. ¿Na'amy co miich mdiscípulos túngixy huídibi judío ycötújcin capx'adujcpy sábado xii?

²⁵ Per Jesús ymínañ:

—¿Nej ca'miich ajcxy mguendtuñ Dios y'ayuc co mnecycapxy, jadu'n nej David ytuñ tügtecy jecy'ajty, co David etz ymígügtijc yuu'ögaangixy anajty? ²⁶ Je huin'it tiempo jecy'ajty co je judío teedy Abiatar mjtungmíidpí anajty ma Dios ytíj, chi David ytígíy ma Dios ytíj, e caay je tzajcaagy huídibi ti anajty yoxy ma Dios yhuinduu. Dios ycötújcin ymínañ co je teedy ajcxy ycaagy'ajtpy jada tzajcaagy, ca' jac'ooyñipín. Nañ jadu'n David moy je tzajcaagy je jäy huídib anajty ajcxy ymíid.

²⁷ Nañ jadu'n Jesús yjacmínañ:

—Ich, je jäy huídibi tsoon tzajpjoty, nmíidich ané'mín, jaydéb nímäyich je jäy ajcxy ti jéb túngixy sábado xii. ²⁸ Com Dios ti ixmach je sábado xii, paady ycíxpi, ich je jäy huídibi tsoon tzajpjoty, nmíidich ané'mín jaydéb nímäyich jäy ajcxy co jéb tijaty tuñ sábado xii.

3

Je yéydijc huídibi anajty yci' tídzip

¹ Jesús ytígíy jadüg'oc ma je judío naymujctac. Jiiby anajty tüg yéydijc huídibi anajty ymíid tüg yci' títz. ² Je fariseojäy jiiby ma je naymujctac y'ijx'ijtpy anajty Jesús, co anajty nejhuíhuañ pen Jesús yajtzögamy je pa'mjäy sábado xii, jigix jébi ajcxy xihuip Jesús co ti ytundigoy miiid judíojäy ycötújcin.

³ Jesús nímay je jäy huídibi miiid tüg yci' títz:

—Pídíg, mín ya ma ich.

⁴ Huin'it Jesús y'amídooy je jäy ajcxy e nímay:

—¿Nej miich ajcxy mínaangixy: Nej jébi jada nduñich je oybi o je jibicpi sábado xiioty? ¿Jébi nyajtzögích jäy o jébi nyajtigoyich jugy'ájtín?

Per je jāy amoñ ajcxy ijty, ca' ajcxy je' y'adzooy. ⁵ Huin'it Jesús huindicxpejty je jāy ajcxy m̄id chip y'ahua'n, e m̄id jotmay, je' co ooy ajcxy jotjuuñity, e chi nimay je yēydijc:

—Xajt̄u ȳi m̄gi'.

Chi je yēydijc xajt̄y yci', e chi yci' oy chögy. ⁶ Chi je fariseojāy ypidzimday ma je naymujctac, ooy yjotmädy ajcxy, e ñicxy ajcxy ñaymújcip m̄id je jadügpiçy judío huindzindijc huidibi ymijnicxpejt je rey Herodes. Huinma'ñ ixtaayb anajty ajcxy nej jēb ocyaj'ögip Jesús.

Mayjäy ma tüg n̄iba'

⁷ Per Jesús chooñ m̄id ȳi ydiscípulos ajcxy, ñicxy ma mejypa'. E ooy mayjäy huidibi ajcxy tzomb Galilea ñaaxjot etz Judea ñaaxjot panicxy ajcxy Jesús. ⁸ Nañ jadu'n mayjäy panicx ajcxy Jesús huidibi ajcxy tzomb jim Jerusalén, huidibi ajcxy tzomb jim Idumea ñaaxjot, huidibi ajcxy tzomb jim Jordán mijniñ n̄inaxy ma x̄i ypidzimyb, huidibi ajcxy tzomb jim Tiro etz Sidón ñaaxjot. Ñicxtāy je mayjäy ma Jesús yajpaady, com ñejhuñyb anajty ajcxy je mijhuinma'ñ huidibi Jesús anajty ytumyb. ⁹ Com tzach mayjäy anajty ymingixy, paady Jesús ni'ane'mdiy ma ȳi ydiscípulos ajcxy tüg barco ma jēb iñāy, ca'ty je mayjäy ooy y'adij̄ȳii y'agod̄ȳii. ¹⁰ Com Jesús ti anajty yajtzögy may jāy, paady yciçpi tüg'óc̄iy je pa'mjäy nimujcy Jesús, adzip tzachnidonaangixy. ¹¹ Co je jāy ajcxy huidibi ca'oybi ym̄id ijxpaty Jesús, chi ajcxy ñayhuijotaci ma Jesús yhuinduu, e mic ycapxcooty, ym̄inaangixy:

—Miich je' Dios y'ung.

¹² Per Jesús nimay m̄ictāgy je ca'oybi ajcxy co ca' huaad nigapxcixy nim̄ydaaccixy pin je' anajty.

Jesús huin'ixy majmetzpi discípulos

¹³ Huin'it Jesús ypejty ma tüg cögop, e capxyñiguexy co huen miñ ma ȳi' je ym̄igügtijc huidibi yhuin'ixamy co ytunam m̄id ȳi'. Chi ajcxy ymiñ ma Jesús. ¹⁴ Chi Jesús yhuin'ijx majmetz ajcxy huidibi ym̄id'idamy, e huidibi yquexamy y'ayuccapxhuäçp. ¹⁵ Jesús moy je majmetzpi discípulos ajcxy huidibi anajty ti yhuin'ixy mic'ajt jaydēb yajtzögip pa'mjäy ajcxy, e ymoy ajcxy ymic'ajt jaydēb ca'oybi yajpidzimy ma jāy ajcxy. ¹⁶⁻¹⁷ Jada je nimajmetzpi discípulos ajcxy yx̄iñ nidüg nidüg: Simón, je huidibi Jesús yximoy Pedro; Jacobo m̄id y'uch Juan, ȳi Zebedeo y'ung y'anäg, je huidibi ajcxy Jesús yximoy Boanerges (je ayuc Boanerges jadu'n yhuimbizimy: “Enee ymang”). ¹⁸ E jacjadyii huidib Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huidibi Alfeo ymang'ajtpy; Tadeo; e je jadügpi Simón, je cananista. ¹⁹ Nañ jadu'n Jesús huin'ijxy Judas Iscariote, je huidibi agoj̄ix c̄yeyc Jesús ma ymidzip.

Yajn̄ibijccixy Jesús co m̄idity mujcu'ymic'ajt

(Co jadu'n huin'ijxtaay je majcmetzpi discípulos ajcxy), Jesús ytiḡiy ma tüḡt̄ijc m̄id ȳi' ajcxy. ²⁰ Huin'ityi tzach mayjäy ñayyöymújcigixy ma je tijc ma Jesús y'ity, ixti Jesús etz ym̄igügtijc ca' y'oȳiy nej jēb ycaaygixy y'uuccixy. ²¹ Co Jesús y'amigügtijc jadu'n nejhuñy, chi ajcxy nimiiñ Jesús yajnicxaangixy anajty mach, com hue' anajty t̄ijcixy co Jesús yloc̄ib.

²² Nijējity escribas ajcxy, je huindzindijc huidibi nijaydutr anajty Dios ñecy, miin ma Jesús co choñ ajcxy Jesusalén, ym̄inaangixy:

—Jada Jesús ym̄id Beelzebú, je ca'oybi yhuindzin, ma y'aa yjot. E ȳi' yajpidzimy je ca'oybi ajcxy ma jāy ajcxy yjothuinma'ñ m̄id Beelzebú ymic'ajt.

²³ Chi Jesús huoomiñ ma ȳi' je escribas ajcxy, e yajm̄idm̄iydacy ajcxy tüg jihuimb̄it ayuc. Chi Jesús ym̄inañ:

—¿Nej tiy'ajt jada nej miich ajcxy mīna'ñ co Satanás jēb ci'm ñayyajpidzimyii ma jāy ajcxy y'aa yjot? Ca' tiy'ajt nej miich ajcxy mīna'ñ. ²⁴ Pen tūgpicxy tungmīdipi ixyipy ñaybijc-huá'cxigixy, etz ñaymidziptzoonigixy ixyipy ac jēyi. Pues cixip yī' ajcxy y'ané'min. ²⁵ Nañ jadu'n pen tūgpicxy tūg juugy tūg migūg ixyipy ñaybijc-huá'cxigixy, ca' ajcxy y'idaangixy tūgmucy. ²⁶ Nañ jadu'n pen Satanás ixyipy ti ñaybijc-huācxyii, e ci'm ixyipy ti nayñibidīguyii, ca' ixyipy yī' ymic'ajt ida'ñ. Hue' janchtiy Satanás cixipy tigoyipy. (Paady ca'tiy'ajtity nej miich ajcxy ymīnañ.) ²⁷ Ca' ni pīn jēb huaad ytīgihuip ma tūg micpi jāy ytijc etz meedzipy tijaty ymīd, pen ca' jayijp cixoch tecyoch je jāy micpi. Pen ti cixoch tecyoch ixyipy je micjāy, huin'it janchtiy mīmadāgipy, e pījcip tijaty ymīd.

²⁸ Janch iich miich ajcxy nimāy co Dios jēb huinmeecxip tūg'óciy pocy huidibi jāy ytūngixp etz tūg'óciy jibicpi huidibi jāy ycapxp. ²⁹ Jēyi janchtiy co pīnjaty capxtigooyb mīd je Espīritu Santo, je Dios yjihui'ñ ymic'ajt, ca' Dios huinmecxi nimīna. Huinixii y'ida'ñ pocymīd.

³⁰ Mīd co jāy ajcxy chach ymīnaangixy co Jesús anajty mīdity ca'oybi, paady Jesús jadu'n ymīnañ.

Jesús ytaj etz y'uch miguēxy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty ytīnaaygixy tība'y, e chi ajcxy capxñiguejxy Jesús. ³² Je mayjāy huidibi anajty ajcxy iñaayb jūhuiditi ma Jesús, ymīnañ ajcxy:

—Mīich mdaj etz m'uch cheeby ajcxy tība'y miich ixtaayb.

³³ Chi Jesús ymīnañ:

—¿Pīnjāy miich ajcxy mdijy co iich ndaj'adyii etz iich n'uch'adyii?

³⁴ Huin'it Jesús huindixpejty je jāy ajcxy huidibi anajty iñaayb ajcxy jūhudity ma je', e ymīnañ:

—Tūg'óciy jada jāy ya jadu'n ajcxy nipaady nej iich ndaj etz iich n'uch.

³⁵ Huenytimypīnity huidibi ajcxy cuydumb yī Dios chójcīn, yī' je' jadu'n nipaady nej iich n'uch, iich n'ajch, iich ndzi' etz iich ndaj.

4

Je niipi y'ijxpejt

¹ Jadūg'oc Jesús ytīgīy yaj'ixpijcpī ma mejypa'. E ooy mayjāy ymujcpejty ma anajty Jesús yajpaady. Mīd co ooy anajty chachmayjāyity, paady Jesús ytīgīy ma tūg barco jahuengi mejyjoty. Jesús iñaayb anajty barcojoty, e je mayjāy iñaayb anajty ajcxy ma mejypa'. ² Huin'it Jesús yaj'ixpijcy je mayjāy mīd canaag jihuibit ayuc. Co yaj'ixpicxy, chi ymīnañ:

³ —Amīdoo'ijtcix miich ajcxy iich jada n'ayuc. Tūg jāy choñ niipi. ⁴ Co je niipi yhuijpy anajty trigo tīm, chi je trigo tīm nijējity oy ycāy tīm tūgūj. Chi je joon ajcxy ymīñ jicxy je trigo tīm huidibi tūgūj ti ycāy. ⁵⁻⁶ E nijējity trigo tīm oycāy ma tzaanīcx, ma nihueñ oyñaax yajpaady. E je trigo tīm ca' tzip mujx je', je'co ca'anajty ooy naax mápxity. E co je xīi ypidzimy, chi no'cy je trigo mang, com ca' anajty ytictz mīdity naaxjoty, chi ytīch. ⁷ E nijējity trigo tīm oycāy ma apyjot. Co jada trigo tīm ymujxy, chi y'ujtz'ōgtāy je trigo mang, e ca' ytīm'ajty. ⁸ Per jacjadyii trigo tīm oycāy ma oyñaax, chi ymujxy, e ytīm'ajt may'amy: tūg pi'c pajc iipxmajc oyco'ity, jadūg pi'c pajc tugi'px oyco'ity, jadūg pi'c pajc migo'px oyco'ity.

⁹ Co Jesús je mīydāgīi yajmay, chi ymīnañ:

—Pīnjaty mīd ytāzacc, pīn midohuamy, huen mīdo'mbicy jada ayuc.

Ti yī' ñigapxyp yī' ijxpejt

10 Co je mayjäy ñicxni, e Jesús yhuim'y naydüg, chi je nimajmetzpi ydiscípulos ajcxy etz jacjadyii huídib mijnicxpejt Jesús ñimijhua'cy, e amidoy nej yhuimbídzim'y je jihuimbit ayuc. 11 E Jesús ymínañ:

—Miich ajcxy jaydëb mnejhuíhuipy huídibi Dios ñigapxpy ñimiydacpy coyüch'amy ma y'ané'min ycötújcin. Jacjadyii jäy ajcxy jihuimbit'amy nyajmídmíydaacyich. 12 Jadu'n jihuimbit'amy nyaj'ixpijcpyich je mayjäy, jaydëb co pinjaty ijxp, ca' ajcxy ixipy; etz pinjaty mídoob, ca' ajcxy mído'mbígiipy. E jadu'n ca' ajcxy yjothuimbidip, e nañ ni ycayajmeecxipy ajcxy ypocy.

Jesús najtzcapxiy nej yhuimbídzim'y je niipi'y'ijxpejt

13 Chi Jesús yjacmínañ:

—¿Nej ca' miich ajcxy mhujnjíhuíy jada jihuimbit ayuc? Pen ca' miich ajcxy mhujnjíhuíy jada jihuimbit ayuc, ca' miich ajcxy mhujnjíhuíhuip yí jacjadyii jihuimbit ayuc. 14 Je huídibi capxhuäcxp Dios y'ayuc, jadu'n yí' nipaady nej je huídibi niip trigo tím. 15 Je jäy ajcxy huídibi amído'o'ijtp Dios y'ayuc, e mic'amy je ca'oybi yajpidzim'y Dios y'ayuc ma ajcxy yjot yhuinma'ñ, jadu'n ajcxy nipaady nej trigo tím huídibi cáb tügujc, e je joon ajcxy mic'amy piimujctay. 16-17 Je jäy ajcxy huídibi amído'o'ijtp Dios y'ayuc janch jotcujc, e mibíjccixy tzojccix, chi ajcxy ixmajtzí Dios y'ayuc co agapxiy paady, e co tzaachypí minaxy yajnaxy míd Dios y'ayuc ycixpi. Jadu'n ajcxy nipaady nej je trigo tím huídibi tí ycäy ma tzaanícx. 18-19 Je jäy ajcxy huídibi amído'o'ijtp Dios y'ayuc, e co ñicxni, chi jäy digooyñi Dios y'ayuc míd jotcujc'ájtín tzaaayín, etz comeeñ'ájtín etz adzójcin. Jadu'n ajcxy nipaady nej trigo tím huídibi tí ycäy ujtjoty, e ca' ytím'aty míd co oy y'ujtz'ögy. 20 Je jäy ajcxy huídibi amído'o'ijtp etz cöbijcp Dios y'ayuc amumdüjot etz Dios y'ayuc tumb ma ajcxy yjot yhuinma'ñ, jadu'n ajcxy nipaady nej je trigo tím huídibi tí cáb ma oyñaax etz ytím'aty may'amy: tüg pí'cpajc iipxmajc, etz jadüg pí'cpajc tugi'px, etz jadüg pí'cpajc migo'px.

Je lámpara ñi'ijxpejt

21 Chi Jesús yjacmínañ:

—Co jäy ajcxy jindicxi'ñ nöctzoy, chi canan ajcxy cöjujpy míd tu'tz, ni ca' ajcxy pidacy cijxpa'tci'py, hue' janchtiy pidaaccixy ma jindicxpejt jaydëb mij ytíicxy. 22 E nañ ni ca' ni pin ni ti jëb ameech tunípy, e nicxy ycayajnejhuíy. E ca' ni pin ni ti ayüch tunípy, e nicxy ycayajnejhuíy. 23 Pinjaty ytátzac ymíd, pin mídoohuamb, huen mído'mbíjccixy ích n'ayuc.

24 Nañ jadu'n Jesús ymínañ:

—Cuendtúngix jada ayuc huídibi miich ajcxy yam mmídooyb. Yí quipxi'ñ huídibi ajcxy myajquipxiy, nañ jadu'n yí' míd Dios ajcxy xyquipxyhuimbidípy, e ixtí jacyajmöhuiip ajcxy huídijaty mídoob ích n'ayuc. 25 Pinjaty ymíd, yajmöhuiip nígi, pinjaty hueen míd, yajpigípy nígi (oy ixipy hueen jadím mídity).

Je tím huídibi yeecp ñi'ijxpejt

26 Nañ jadu'n Jesús ymínañ:

—Yí Dios y'ané'min jadu'n yí' nej co tüg jäy nicxy ñípy ma ycamjot. 27 Chi jada' co ñiíptay ñicxni ma ytíjc e ymí'o'cni ymäybidígni com jabom, e jadu'n yajnaxy canaag xíi tzuu. E je moc pajc mujxp je' etz yomb. Per je cogam ni ca' nejhuíy nej je moc yoñ, ma mic'ajt paady. 28 Je' co yí naax ci'm mic'ajt mídity jaydëb yajyoñ je moc. Jayíjp ypidzim'y je moc ung, jac'axam ypidzim'y yí moc

píjy, e chi jada' ytiim'ajtni. ²⁹ Co je moc ymajaani, chi je jäy ajcxy nicxy moc tzijcp, com ti yhuindiy je moc.

Ijxpejt ma je mostazi pajc

³⁰ Nañ jadu'n Jesús yminañ:

—¿Nej m'oc'a'ixíygyxy yi Dios y'ané'min? ¿Ti mïid n'ocyajquipyxíhuibich?
³¹ Jadu'n Dios y'ané'min nipaady nej mostaza pajc huídibi tüg jäy nicxy niipy ma ycam. Yi mostaza pajc jacnigi ymúztity ca'ydi jacjadyii ujtzpajc huídibi yajpatp ya naaxhuiñ. ³² E co yajniipy je mostaza pajc, chi yoñ, e chi yeegy ooy janch mij, ca'ydi jacjadyii ujtz. E janch mij yeegy tüg'ócíy yci' y'aacx, ixti joon ajcxy pe'mb ma je yci'y'aacx y'anicíy.

Nej anajty Jesús yecy je tiy'ajt mïid je ijxpejt ycixpi

³³ Jadu'n anajty Jesús yaj'ixpicy je mayjäy ajcxy Dios ytiy'ajt mïid canaag jihuimbit ayuc, ixti mibaad ajcxy jëb huinjihuíy. ³⁴ Ac jihuimbit ayuc Jesús yajnimay je mayjäy. Per mïid yi'ydiscípulos Jesús ycapxticxtaayb anajty je jihuimbit ayuc.

Jesús capxticx nej huimbizimy je ijxpejt

³⁵ Je huin'it xii co ycoodzíy, chi Jesús nimay yi ydiscípulos ajcxy:

—Tzoc ajt jámim jim'amy ahuin ma yi jadügpí mejypa'.

³⁶ Huin'it Jesús ydiscípulos ajcxy ixmajztay je mayjäy, e mïid tzoón Jesús barcojoty. Nañ jadu'n jacjadyii barco ajcxy choñ quipxy mïid Jesús ydiscípulos ajcxy ybarco. ³⁷ Je huin'it coodz tüg poj miiñ janch mic. E je mejy nigoo anajty y'ocpidígni. Janch tigíyib anajty nií barcojoty, jagoo jagoo yca'ujztay je barco mïid nií. ³⁸ Jesús maab anajty ma je barco ijx ma tüg mabejt. Chi yajmäybidígi, e nimay ajcxy:

—Huindzin, ¿nej ca'mduñcuend co ích ajt yam nguinaanim?

³⁹ Huin'it Jesús ymäybidígy, e jipcogapxy je poj. Etz nimay je mejy:

—¡Amon! ¡Huäcxíp!

Chi mic'amy je poj ymongidactay yhuäcxíjptay jadu'ñyi. ⁴⁰ Huin'it Jesús yminañ:

—¿Na'amy co mdzachtzigíygyxy ajcxy? ¿Nej ca' mmibíjccixy co nmïidich Dios ymic'ajt?

⁴¹ Jesús ydiscípulos ajcxy ooy chigíy, e ñayñimaayi ajcxy miñ xyipy:

—¿Pín jäy jada' jada Jesús? Ooy chachmijhuinma'ñ co yi poj etz je mejy ycapxymídoyii.

5

Je Gadarajäy huídibi anajty ca'oybi mïid

¹ Chi Jesús mïid ydiscípulos ajcxy oyja'tcixy ma je mejypa' ma je Gadara jäy ñaaxjot. ² Tim mic'amy co Jesús ybarcobizimy, chi nimiiñ tüg jäy huídibi ca'oybi mïid anajty. Hue' anajty choñ ma ócpi jut. ³ Je yëdíj, ca'oybimídpí, tzinaayb anajty ma ócpi jut. E ni pín anajty ycamímadägyii. Ni pín camímadacy nicx cíxoch tecyxoch jada je ca'oybimídpí, e ni ca' ajcxy mimadacy mïid cadena. ⁴ Canaag'oc ajcxy jacíxojch jatecyxojch mïid cadena, e ypojtaayb anajty je cadena. Ni pín camíhuinma'ñybaady nej jëb ocmímadaaccixy je ca'oybimídpí. ⁵ Je ca'oybimídpí xim tzuum anajty yhuídity tüg yuugjot etz ma ócpi it, janch mic anajty yäxytinäy. E chachnayya-jtzaachíyii anajty mïid tzaa.

⁶ Jiguëgy anajty je ca'oybimüdpí ymiiñ, co ijxpaty Jesús, chi poyígy ninicxy Jesús, e ycojxtinay'ahuíy ma Jesús yhuinduu. ⁷ Je ca'oybimüdpí mic migapxcooty Jesús, e nimay:

—Jesús, je mijpi Dios y'ung, ¿na'amy co xymidziptzooñich? May'ajt nbijctzooybich ma Dios co ca' ich jëb huaad xychaachytuñich. ⁸ Je ca'oybi jadu'n yminañ, com Jesús ti anajty nimäy:

—Ca'oybi, pidzimb ma jada yëydijc.

⁹ Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Ich nxii hue' je' “ni may”, com ni may ich ajcxy huidibi yajpatp ma jada yëydijc.

¹⁰ Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyí ma huingbi it lugar. ¹¹ Huingon anajty je cop ma anajty may idzim yjicxcixy. ¹² Chi je ca'oybi ajcxy may'ajt pijctzoy, e nimay ajcxy:

—Najtzquexiig ma yi may idzim, jigix jëbi n'adigiyich njottigiyich yi may idzim.

¹³ Chi Jesús jadu'n a'ixiy co jëbi adigiyigixy jotigiyigixy je may idzim. Chi je ca'oybi ypidzimday ma je yëydijc, e yajtigiyday je may idzim ajcxy. Jim anajty yajpaady jahuengi mejtz mil idzim. Chi je idzim ylocjydaay, e ycögänaxtaay ajcxy ma tüg tzajijp, e oy ycädaaygixy nijoty, e chi ajcxy ñii'ögtay.

¹⁴ Je idzim cuend'ajtp ajcxy ooy ajcxy ñay'adzigiyi, e nicxtay ajcxy poyígy ma ytijc. E oy nimiydaaccixy cajpjoty etz majaty tundac nej anajty ajcxy y'idzim y'öctaaygixy. Mayjäy ajcxy choñ mic'amy oy íxcixy nej anajty ti ytunyí ti yjadyí. ¹⁵ Co je mayjäy ajcxy yja'ty ma Jesús yajpaady, chi ajcxy ijxy je yëydijc huidibi anajty mayca'oybi ymüid. Ijxy ajcxy co inäy huit müid etz huijycujc, ti anajty y'oyíy. E huin'it ooy ajcxy je mayjäy ñay'adzigiyi. ¹⁶ Je jäy ajcxy huidibi anajty huindixp co anajty je ca'oybimüdpí ti y'oyíy, etz íxcixy nej ti ytunyí ti yjadyí müid je may idzim, chi yajmiydactay je maycajpyä jadu'n nej anajty ti ijxcixy. ¹⁷ Huin'it ajcxy pijctzoy may'ajt ma je Jesús, co huen tzooñ ma ajcxy je ñaaxjot.

¹⁸ Co Jesús ytigiy jadüg'oc ma je barco, chi je yëydijc huidibi anajty ca'oybi ti ñibidzimyí ti ycöbidzimyí, pijctzoy may'ajt ma Jesús co huen a'ixiy möhuip co huen müid'idyí Jesús. ¹⁹ Per Jesús ca' a'ixiy co ymüid'idyí, chi nimay:

—Huimbit ma mdijc etz mjugymigüg, e yajmüidmüydäg jada mijpi tung mijpi huinmañ huidibi je Huindzin Dios ti tuñ müid miich. Müidmüydägipy jadu'n nej je Huindzin Dios ti xypa'ayoy.

²⁰ Chi je yëydijc yhuimbijtni, e huidijtp anajty cajp cajp jim Decápolis ñaaxjot, e nimiydactay tüg'óciy jadu'n nej Jesús ti yajtzögyí, e tüg'óciy je mayjäy ooy jihuíy huinmay.

Je Jairo ñix etz je töxyjäy huidibi Jesús yhuít nïdoni

²¹ Co Jesús huimbijty barcojoty ma je mejypa' ma anajty ti chooñ, chi mayjäy ymiiñ ma Jesús yajpaady, chi Jesús yhuäcxipy ma je mejypa'. ²² Huin'it Jesús ñija'ti tüg mijtungmüdpí ma yi judíojäy ajcxy ñaymujctac. Je yëydijc hue' anajty xijity Jairo. Co Jairo ijxpaty Jesús, chi ñayhuíjotac ma Jesús yhuinduu. ²³ Jairo may'ajt pijctzoy, yminañ:

—Huindzin, ögaanip ich nnix. Tun may'ajt nicxy ma ich ndijc, e mginixájip ma ich nnix, jigix jëbi myajtzögip, e yjactzinähuiip.

²⁴ E Jesús nicxp anajty müid Jairo, e mayjäy panicxy anajty Jesús. E je mayjäy ooy anajty tzach'adiji'y tzach'agodi'y Jesús. ²⁵ E ma je mayjäy ymiiñ anajty tüg töxyjäy pa'm müid, jécyiñ anajty ymijtacni. Majmetz jimijt yxi ybo' anajty cujc

payöy, ca' anajty y'oc-huäcxijpni je ni'py. ²⁶ Jada töxyjäy ti anajty yajtzoyduñ mïid may tzoydumbi, ti anajty ymeen yajtundäy ma je tzoydumbi ajcxy. E je'ni anajty ypa'm'ity. Ni ti pubéjtin ti capaady, ixti nigü anajty ypa'm mijhua'ñ.

²⁷ Jada töxyjäy ti anajty ayuc midoy nej Jesús anajty pa'mjäy yajtzögy, paady nimiiñ etz nimijhuägy jixci'py'amy, chi nidooni Jesús yhuitpa'. ²⁸ Jada töxyjäy nayñimaayi jotjoty huinma'ñyoty: "Co nnidónibich Jesús yhuitpa', mïid tim yi'yi ndzögibich." ²⁹ Co je töxyjäy nidoñ Jesús yhuitpa', tim huin'ítiy mic'amy yhuäcxijp je ni'py. Huin'it je töxyjäy jihuüy co anajty ti chögy.

³⁰ E Jesús jihuüy co anajty ti yajtzögy tüg jäy mïid ymic'ajt, paady ni'ijxhuimbijty je mayjäy huídibi anajty pamíinip, y'amidooy ajcxy:

—¿Pín ich nhuit ti xyñidoni?

³¹ Huin'it Jesús ñimaayi ajcxy ydiscípulos:

—Miich m'ijxpy co yi mayjäy xychach'adijy xychach'agodiy, e miich mina'ñ: "¿Pín ti xyñidónich?"

³² Per Jesús huindixypejty je mayjäy jühuidity ma yi', oc'ixañ ocne-jhuíhua'ñ pín anajty ti ñidonyii. ³³ Huin'it je töxyjäy, com ñejhuüy anajty jadu'n nej Jesús ti yajtzögyii, paady nimijhua'cy Jesús janch tziyuuyb mïid tzig'iñ ñayhuíjotaci ma yi' yhuinduu. ³⁴ Jesús ymina'ñ:

—Töxyjäy huídibi ooy ndzócyich, ti mdzögy mïid co ti xymibícyich. Nicx agujc jotcujc, ti mba'm ñaxy.

³⁵ Capxp miydacp anajty Jesús mïid je töxyjäy co nijéjity jäy ñimiini, choñ ma je judío jäy ñaymujctac mijtungmïidpi ytijc, e nimay je töxy'anäg yteedy:

—Yi mnix ti je y'ögy. Ca' huaad mjac'amayiy nig yi Huindzin Jesús.

³⁶ Per Jesús ca' tuñcuend jadu'n nej ajcxy yjamina'ñ, chi nimay je naymujctac huindzin:

—Ca' mdzigiy, mibic nigoda'ajty.

³⁷ E ni ca' jac'a'ixiy nicxy yjacmïidnicxyii jacpinjaty. Jëda'ajty mïidnicxy je Pedro, Jacobo etz Juan, je Jacobo y'uch. ³⁸ E co Jesús ytijctigiy ma yi naymujctac huindzin ytijc, chi ijxy jadu'n nej jäy jii by chachne'mgixy chachjyigixy chachyaaxcixy. ³⁹ Co Jesús tijctigiy, chi nimay je jäy ajcxy:

—¿Nej co nigoo ajcxy mdzachne'mni, e mdzachyáaxcixni? Yi pi'c töxy'anäg ca' yi' ti y'ögy, maab yi'.

⁴⁰ Per nigoo ajcxy Jesús nixiicy co jadu'n ymina'ñ. Huin'it Jesús yajpidzimday tüg'óciy pinjaty anajty jii by tigoty, e mïid tijc tigiy jëda'ajty je ungedeedy etz ungday, e nañ je tugigpi ydiscípulos huídibi anajty ti mïid miiñ. Chi ajcxy ytigiy jii by ma anajty je töxy'anäg yajpaady. ⁴¹ Chi Jesús májtziy yi töxy'anäg yci', e chi nimay:

—Talita, cumni —jadayaab ayuc hue' yi' yhuimbizimy: Töxy'anäg, ich miich yam nimaayb, pidig.

⁴² Huin'ítiy je töxy'anäg, je huídibi anajty majmetz yjimijt, ypidigy e ytüyöychoñ. E tüg'óciy yi mayjäy ooy ajcxy jihuüy huinmay. ⁴³ Huin'it Jesús najtzcapxii co ca' huaad pín yajnimay jadu'n nej je töxy'anäg ti chögy, nañ jadu'n ni'ane'mdiy co huen ajcxy yajcay je pi'c töxy'anäg.

6

Jesús yajpaady jim Nazaret

¹ Huin'it Jesús choñ ma je jimbi it lugar, e yhuimbijty ma yci'mgajp. E mïid ñicxy yi' ydiscípulos ajcxy. ² Sábado xijoty Jesús ytigiy yaj'ixpijcp ma je mayjäy huídibi yöymújccixp ma je judío jäy ñaymujctac. E je mayjäy huídibi amidooy'ijtp anajty ooy jihuüy huinmay ajcxy, e ñayñimaayi ajcxy miñ xyipy:

—¿Ma jada' jadayaab jäy ti ni'ixpi'gíy jadayaab ixpí'cín? ¿Ma ti paady jada huivy'ajt cujc'ajt huídibi ymíid? ¿Ma jada' ti paady yí mic'ajt huídibi míid mijhuima'ñ tumyb? ³ Je' jada je tzejtzpi, yí María y'ung. Yí' y'uch ymígüg, yí Jacobo, yí José, yí Judas, etz yí Simón. Nañ jadu'n yí' y'uch töxyjäybí cha ajcxy chinäy quipxy míid ñch ajt.

E je mayjäy ca'ajcxy anajty ixa'ñ cöbígá'ñ Jesús. ⁴ Huin'it Jesús nimay je mayjäy ajcxy:

—Huenma'ámyity tüg'óciy je mayjäy ooy yajmíj'aty je jäy ajcxy huídibi najtzcapxíyb Dios y'ayuc. Jéyi janchtiy, ma yci'm naax ma yci'mgajp ca' je jäy ajcxy yajmíj'adyii, etz nañ ytim jadu'n yí' y'amígügtijc etz ymíjín ymíidijc.

⁵ Ma yci'm naax yci'm gajp Jesús ca' jaty nej mijhuinma'ñ tunípy míid co ca' ajcxy mijpidägyii. Jéyi yci'pidacy ma nijéjity pa'mjäy etz yajtzoocy. ⁶ Jesús ooy jihuivy huinmay nej je jäy ajcxy ca' ymíjpidägyii ma yci'm naax yci'm gajp. Chi Jesús chooñ jim ñicxy ma jacjadyii cajp huinduy agonbí, e yaj'ixpijcy anajty je mayjäy ajcxy.

Jesús quexy ydiscípulos ayuccapxhuäcxp

⁷ Huin'it Jesús mijhuoy je majmetz ydiscípulos ajcxy, e chi quejxhuäcxy nimetz nimetz ma canaag cajp. E chi mooy mic'ajt, jigix jéb yajpidzimy ajcxy ca'oybí ma jäy ajcxy. ⁸ Nañ jadu'n y'ane'my Jesús je' ydiscípulos ajcxy co ca' huaad ti miníxcixy tü'amgixpi, jéyi jéb miníxcixy tüg tajc nidüg nidügti. Ca' huaad miníxcixy ymorral, e ca' huaad miníxcixy ycaagy, e ca' huaad miníxcixy ymeeñ. ⁹ Jéyi je ycíg etz je yhuit huídibi anajty ajcxy ymíid huen miníxcixy. ¹⁰ Chi Jesús ymíinañ:

—Co anajty ajcxy mjättaccixy ma tüg tijc, jim ajcxy mhuí'mípy ixti coon mdzóonip ma yijimbi cajp. ¹¹ Pen mdígíygixp ma tüg cajp, e je jäy ajcxy ca' ajcxy xycöbígá'ñ, ca' ajcxy amído'ida'ñ miich m'ayuc, mbídzimgix ma je cajp, chi mhuinhuójpíxípy mgíg. Jada je' je tíy'ajt co ca' ajcxy mjotcújcity. Janch ñch miich ajcxy nimäy co Dios anajty ytiyduñ jada naaxhuiñ jäy, jacniği tzaachypi paada'ñ yí jäy ajcxy huídibi ajcxy anajty ca' xycöbíjccixy, ca'ydi je' ajcxy huídibi tzinaay jecy'aty ma Sodoma etz Gomorra cajp.

¹² Chi je nimajmetzpi ajcxy chon Dios y'ayuccapxhuäcxy co huen jäy ajcxy jothuimbíjtcixy, huen ixmajtzaaygixy yí pocytuní. ¹³ Nañ jadu'n ajcxy yajpidzimy ca'oybí majaty jäy, e pídaaccixy aceite majaty pa'mjäy, e yajtzóoccixy anajty.

Co Juan je Bautista y'ögy

¹⁴ Huin'it je rey Herodes nejhuíy co Jesús canaag mijhuinma'ñ tzachytuñ anajty, com tüg'óciy je mayjäy anajty nimíydaaccixy Jesús. Herodes ymíinañ co Juan je Bautista ti yjugypicy jadüg'oc ma anajty ti y'ögy, paady mic'ajt míidíty jaydéb mijhuinma'ñ tuñ. ¹⁵ Nijéjity jäy ymíinaangixy:

—Jesús yí' je' Elías.

E naagity jäy ymíinángixy:

—Yí' je' tüg Dios tíy'ajtmíidpi huídibi quipxyíby míid je Dios ytiy'ajtmíidpi huídibi tzínay jecy'ajty.

¹⁶ Co Herodes nejhuíy nej je mayjäy nimíydaaccixy Jesús, chi ymíinañ:

—Janch jada co Juan ti yjugypicy, je huídibi nni'ane'mdíyich co huen yajmíinagyii ycohuajc.

¹⁷ Míid Herodías, Herodes ytöxytíjc yci'xpi, Herodes n'ane'mdíy co Juan yajmach, e pídagyii pujxtigoty. Jada Herodías jayíjp ypijcy míid je rey Herodes y'ajch Felipe, per ti anajty ixmach Felipe, e ypijctigajch míid je ycapy Herodes.

¹⁸ Hue' anajty Juan ti nimay Herodes:

—Ca' jadu'n paadyii co yí m'ajch Felipe ytöxytjic miich mïddzinaayi.

¹⁹ Paady ycixpi Herodías mijotma'ty Juan, e ytimy yaj'ögamy anajty. Per ca' mic'amy yhuinma'ñybaty nej ocyaj'ögip; ²⁰ com je rey Herodes ñejhuñyb co tudägy jäy huädz jäy anajty je Juan, e tzigñyb anajty mïd Juan. Paady ycixpi anajty je rey Herodes Juan mïdity cuend'aty pujxtigoty. Naag'oc naag'oc anajty Herodes ñicxy amido'ity Juan y'ayuc, ooy anajty huinmay nej yhuimbizimy, per jotcujc anajty amido'ijty.

²¹ Huin'it Herodías ypat huinma'ñ nej jëb yaj'ögy Juan je huin'it xii co je rey Herodes anajty ñayñixiuduñyii. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'óciy yí mic jäydijc huñdibi ajcxy tzinaayb naag naag cajp jim Galilea. ²² Xiñduñyoty anajty co Herodías ñix oy y'ech ma je rey anajty yajpaady mïd je may jäy huñdibi anajty yajcaayb yaj'uucy. E jadu'n nej je Herodías ñix y'ejch, ooy je rey jadu'n jäygidacy, etz tüg'óciy je jäy je huñdijaty anajty mïd ajcxy ycaaygixy y'uuccixy. Chi je rey ñimay je töxy'anäg:

—Pijctzóohuigich ti mdimdzojcxy, ñich miich nmöhuipy.

²³ Je rey ñigi capxcödujcy janch cixyot huñijot co möhua'ñ ti ytimy ypijctzooyb, ixti jëb jamöy cuñhuäcxy yí y'ané'min, mibaad anajty ane'my je naaxjot. ²⁴ Chi je töxy'anäg ñicxy ma ytaj oy amidoy, ñimay:

—¿Ti nbijctzohuipich?

Chi je' ytaj y'adzooy:

—Pijctzoohui yí Juan je Bautista ycohuajc.

²⁵ Mic'amy je Herodías ñix niñuimbity je rey e ymíñañ:

—Ndzojcy pich co xymöhuibich mic'amy je Juan je Bautista ycohuajc ma tüg texy.

²⁶ Co jadu'n midoy je rey, chi ytigñy tajp mayb janch mijcajee. Per ti y'octunipy. Com ti anajty jadu'n capxcöducy, ti anajty mayjäy midoy ti anajty ti yaj'ahuanñy je töxy'anäg, ca' y'ayuc yajxiicy. ²⁷ Paady ycixpi je rey mic'amy ane'my tüg soldado, co huen ñicxy yajtzoni Juan ycohuajc. ²⁸ Chi je soldado ñicxy ma pujxtijc, e yöcpujxtuuty Juan. Chi je soldado mimiñ Juan ycohuajc ma tüg texy, e yajcñidigiy je töxy'anäg, e je töxy'anäg yajcñidigiy ytaj.

²⁹ Co je jäy ajcxy huñdibi anajty mijñicxpejtp Juan ñejhuñy ajcxy co je rey ti yaj'ögy Juan, chi ajcxy y'oy e yajpñidici Juan ñinñcx, e yajnaaxtigñy ajcxy.

Jesús yajcaay migoox mil yëydijc

³⁰ Co je majmetzpi apóstoles ajcxy yhuimbijty huñdibi anajty Jesús ti quexy y'ayuccapxhuäcxi ma canaag cajp, chi ajcxy yajmïdmïydacy Jesús tüg'óciy tijaty anajty ti tüngixy, etz tüg'óciy ayuc huñdijaty ti yaj'ixpijccixy. ³¹ Huin'it Jesús ñimay je ñimajmetzpi huñdibi anajty ti quexy y'ayuccapxhuäcxi:

—Tzoc jámim ma tüg it ma ca' pin, jaydëb nbócxim tüg xii metz xii.

Paady ycixpi Jesús jadu'n ymíñañ, com tzach mayjäy ja'ttiñb tzondñb ma Jesús yajpaady, e ca' ajcxy tiempo anajty mïdity mina ycáaygixipy y'úuccixipy mïd je mayjäy ycixpi. ³² E Jesús mïd ydiscípulos ajcxy ñicxy barcojoty ma ca' pin. Ac jëyí ajcxy ñicxy ca' jac pin jäy mïd ñicxy. ³³ E mayjäy ijxy co Jesús ajcxy choñ, e nañ ijxcajpy pin anajty tzoñ barcojoty. Paady mayjäy choñ ma canaag cajp tegyí'm, ñicxcixy poyigy anajty ma Jesús ñicxa'ñ. Mayjäy oy yja'ty jayijp ca'ydi Jesús ajcxy, e jim ajcxy yöymujctay. ³⁴ Co Jesús ybarcopidzimy, chi ixy janch mayjäy, e Jesús ooy pa'ayoy je mayjäy, com jadu'n anajty ajcxy nej maycöbixy huñdibi ca' mïdity ycuend'ajtpi. Chi Jesús ytigiy yaj'ixpijcp, canaag nax ixpijcin anajty yecy. ³⁵⁻³⁶ Co anajty ti chu'ñyñi, chi Jesús ydiscípulos ajcxy ñimaayi:

—Ca' ni pin chinäy ma jadaayaabi it lugar, e ti chu'ñyñi. Capxycix müid jada mayjäy ajcxy, jaydëb ñíxcixyñi ma yi cajp huinduy agonbi, huen nicxy júygixipy ycaayin y'uucin.

³⁷ Huin'it Jesús y'adzooy yi' ydiscipulos ajcxy:

—Miich ajcxy móoygix jada mayjäy caayin úcin.

Chi ajcxy Jesús y'adzooy:

—¿Huaad ñich ajcxy nicxy njuy mejtz migo'px denario tzajcaagy, jigix ycaayipy y'ügipy jada mayjäy?

³⁸ Chi Jesús y'amidooy ydiscipulos ajcxy:

—¿Naag tzajcaagy miich ajcxy müidity ya? Nicx íjxcix.

Co ajcxy tiy'ajt paty, chi ajcxy Jesús nimay:

—Ñich ajcxy nmüid migoox tzajcaagy etz metz acx.

³⁹ Chi Jesús ni'ane'mdüy co je mayjäy huen ixtaaccixy naaxcixy tügpicyjaty.

⁴⁰ Chi je mayjäy y'ixtactay canaagpicy. Canaagpicy migo'px jatypi, e canaagpicy huixchiguüpxmajjatypi.

⁴¹ Chi Jesús conigy je migooxpi tzajcaagy etz je metzpi acx, e ypa'tijxy tzajpcixy, e yajnajxy Dios cojuyip ma Dios müid je tzajcaagy etz je acx ycixpi. Huin'it Jesús tujc-huäcxy je migooxpi tzajcaagy, e yajcídigi'y je' ydiscipulos ajcxy, jaydëb ajcxy yajhuäcxip ma je mayjäy. Nañ jadu'n Jesús yajcídigi'y je metzpi acx je' ydiscipulos ajcxy, jaydëb yajhuäcxip ma je mayjäy. ⁴² Nidüg'ócay je mayjäy ajcxy yca'y uucy cüxyi. ⁴³ Co je mayjäy yca'yday, chi je discipulos ajcxy yajmujcy je cayduc tzütztuc, e yaj'ujch ajcxy majmetz cach. ⁴⁴ Migoox mil anajty ajcxy je yéydijctijc huídibi cay uuc.

Jesús yöy nñhuingíxy

⁴⁵ Huin'it Jesús ane'my je' ydiscipulos ajcxy co huen barcotigüygixy mic'amy. Huen nicxícixy jayijp jim Betsaida jim mejy ññajxy. Co yi discipulos ajcxy ybarcotigüyday, chi Jesús ycapxycijxy müid je mayjäy. ⁴⁶ Co anajty Jesús ti ycapxycixy müid je mayjäy, chi ñicxy ma tüg cögop Dios mibijctzoob. ⁴⁷ Co ycoodzñyñi je discipulos ajcxy anajty yajpaady mejyjoty ma je barco. Jesús naydüg anajty yajpaady mejypa'. ⁴⁸ Jesús y'ijx co je'ydiscipulos ajcxy anajty ti y'anucñygyxy müid mejycabi, je' co je barco anajty chachijpcoboñy. E co oy moñy, chi Jesús ymijhuägy ma je barco. Jesús yöyp anajty mejyhuingíxy, e hue' anajty jüyöyñaxamy je discipulos ajcxy. ⁴⁹ Co ajcxy ijxpaty Jesús yöyp anajty mejyhuingíxy, chi ajcxy ooy yaxqueegy, com hue' anajty ajcxy tijy co nigo y'ijxmaññygyxy. ⁵⁰ Com tüg'ócay yi discipulos ajcxy anajty ti íjxcixy Jesús, e ooy ajcxy chigüy, paady mic'amy Jesús migapxy je' ydiscipulos ajcxy, e nimay: —Jotmic naybidáacigixy, ca' mdzigüygixy. ñich yi'.

⁵¹ Huin'it Jesús ybarcotigüy, e mic'amy je poj yxeemy, e je discipulos ajcxy ooy jihuy huinmay. ⁵² Ooy ajcxy jihüügixy huinmaaygixy, com ca' ajcxy huinjihuügixy anajty nej Jesús je mayjäy yajcay müid je migooxpi tzajcaagy. Com je'ni anajty ajcxy ooy yjotjuuñity ycöjuuñity.

Jesús yajtzögy pa'mjäy ajcxy jim Genesaret

⁵³ Chi ajcxy ymejch ma je mejypa' ma je Genesaret ñaaxjot. E coxojch ajcxy je barco ma mejypa'. ⁵⁴ Co ajcxy ybarcopidzimy, chi mic'amy je mayjäy ajcxy jim íjxcaypy Jesús. ⁵⁵ Poyigy je jäy ajcxy chooñ, e yajyöyñajxtay je cajp ajcxy huinduy agonbi, capxhuäcxixy co Jesús anajty ti yjädy jim. E jäy ajcxy yajmiindzondacy may pa'mjäy cijx'am jim ma anajty Jesús yajpaady. ⁵⁶ E hueñytim ma'amyty anajty Jesús ñicxy majaty mij cajp, mutz cajp, o majaty jäy y'ujtztzinäy, ooy anajty ajcxy pidáccixy pa'mjäy majaty majaty yi mij tüba',

e cohuaniiygixy Jesús co huen nidoñyii yi yhuitpa', e tüg'óciy huídijaty anajty ajcxy nídomb, najxp ajcxy anajty je' ypa'm.

7

Huidi jäy yaj'ahuimbijt pocyjayity

¹ Huin'it ymiiñ ma Jesús nijējity fariseojäy ajcxy, je huindzindijc huídibi tzachpadumb judío ycostumbre. Nañ jadu'n miiid miiñ nijējity escribas, je huindzindijc huídibi ajcxy nijaydutr anajty Dios ñecy. Hue' je fariseos etz escribas ajcxy anajty ti choongixy Jerusalén. ² Je fariseos etz escribas ajcxy ijxy co Jesús ydiscípulos ajcxy ytiğiy caaybi uucpi jayğibuju, ca' anajty cuydúngixy judíojäy ycostumbre. ³ (Com yi fariseojäy etz jacjadyii judíojäy ajcxy cuydumby anajty ajcxy ñi'ap costumbre, e ixpocypújcixy jayijp ma ca'ni ytiğiygixy caaybi uucpi. Com yi judíojäy ajcxy co ajcxy ñicxy mayjäyoty etz yhuimbijtcixy jadüg'oc ma ytiğc, ca' ajcxy yca yixti cooni jayijp ajcxy ycibújcixy canaag'oc. ⁴ Yi judíojäy ymiiid canaagnax costumbre huídibi cuydúngixyp jadu'n nej ajcxy yajhuaatzcixy ajcxy ytaasi ytexy ytütz etz ypujxtexy.) ⁵ Chi je fariseos etz escribas ajcxy y'amidooy Jesús, nimaayi:

—¿Na'amy co miich mdiscípulos ajcxy ca' cuydúngixy judíojäy ñi'ap costumbre? ¿Na'amy co ajcxy ycaaygixy y'úccixy, e ca' jayijp ixpújcixy yi' ypocyi?

⁶ Chi Jesús y'adzooy:

—Janch tiy'ajt jadu'n nej je Dios ytiy'ajtmiiidpi Isaías jayhui'my jecy'ajty miiid miich ajcxy yciłpi. Miich ajcxy huídibi naybidaacip jadu'n nej jihuüy ajcxy tudägyjäy, e ca' yjánchity. Com jadu'n Isaías jaybejty co Dios jadu'n ymínañ: Jada jäy jadu'n ajcxy ycapxcixy ymiydaaccixy jadu'n nej jihuüy xyajmij'atyich. Per ca' ajcxy xyajmij'atyich cixyot huiniłot.

⁷ Naadigi co ajcxy xyhuin'igixich xyhuinyáaxcixich. Ñayyaj'ixpíjcigixy ayuc tiy'ajt huídibi jäy ajcxy ti cojy ti macxy.

⁸ Chi Jesús ymínañ:

—Miich ajcxy ti m'ixmájtzcixy Dios ycötújcín, e myajmij'ájtzcixy ayuc huinma'ñ huídibi jäy ci'm ti cojy ti macxy. ⁹ Miich ajcxy ca' mgüendtúngixy Dios ycötújcín Dios ytiy'ajt jigix jēbi cuydúngixy mgi'm costumbre. ¹⁰ Com Moisés je cötújcín ypidac jecy'ajty: “Yajmij'at mdaj mdeedy”, e “Pínjaty jibic nigapx ni'ojuyb ytaj yteedy, copicy y'ögip.” ¹¹ E miich ajcxy mínañ co tüg jäy nimáhuip ytaj yteedy co ca' pubeda'ñ ajcxy jadu'n nej padyii, miiid co tüg'óciy tijaty yi' ymiiid huídibi ytaj yteedy jē'adánip, hue' ti ahuanüy nigoo ma Dios. ¹² E pen jadu'n mínañ, chi miich ajcxy mínaangixy co ca' copicyity mbubéjtcixipy mdaj mdeedy. ¹³ Miich ajcxy midundigooyb Dios ycötújcín miiid mgostumbre huídibi myajnajxyp myajtiğiyb, etz jacjadyii jibic-huinma'ñ myaj'ixpíjccixy.

¹⁴ Jadüg'oc Jesús mijhuoy yi mayjäy ajcxy, e chi nimay:

—Mido'mbíjccix miich ajcxy iłch n'ayuc, e mhujnihuihuip ajcxy. ¹⁵ Ca' yi' yajpocycähuüy huídibi jäy ajcxy ypidacy ma yhuin y'ahuac. Yi' janchtiy huídibi pidzim ma jäy ajcxy yjot yhuinma'ñ, yi' yi' yajpocycähuüb. ¹⁶ Miich ajcxy mmiiid mdätzac, mido'mbíjccix iłch n'ayuc.

¹⁷ Co Jesús ixmajch je mayjäy, e ytiğtiğiy, chi je discípulos ajcxy yaj'amidoohui nej yhuimbizimy jada ayuc. ¹⁸ Chi Jesús ydiscípulos ajcxy nimay:

—¿Nej nañ jadu'n miich ajcxy ca' mhujnihuiy jada ayuc? ¿Nej ca' mhujnihuiygixy co huídibi tiğiy ma yi jäy y'ahuac (yi caayin uucin), ca' yi' yajpocycäy yi jäy? ¹⁹ Yi caayin uucin hue' yi jäy ypidägy ma y'aa ymoox ca' nan ma yjot yhuinma'ñ, e co ñax ma y'aa ymox, chi ypidzimni.

Co Jesús jadu'n ymína'ñ, chi nejhuyim co Dios ca' capx'aducy ni ti caayin ni ti uucin. ²⁰ E Jesús yjacmínañ:

—Dios yajpocycáhuip jáy ajcxy m'id huídibi pidzimb ma ajcxy yhuinma'ñ. ²¹⁻²² Ma yí jáy ajcxy yhuinma'ñ jiiby chooñ jibic-huinma'ñ; jiiby chooñ migapxtigoyi töxyjäy yhuinma'ñ; jiiby chooñ je tundigooyi yéydijc m'id töxyjäy etz töxyjäy m'id yéydijc huinma'ñ; jiiby chooñ jáyyaj'ögü huinma'ñ; jiiby chooñ meedzi huinma'ñ; jiiby chooñ mügü huídidi huinma'ñ; jiiby chooñ jibic-huinma'ñ; jiiby chooñ je huin'in huinma'ñ; jiiby chooñ nayca'oy'ixi huinma'ñ; jiiby chooñ je piitzcapxi huinma'ñ; jiiby chooñ je amij agix huinma'ñ; jiiby chooñ je tzuu huinma'ñ je loci huinma'ñ. ²³ Yí jadu'mbi jibicpi jiiby chooñ ma jáy ajcxy yjot yhuinma'ñ, paady jibicpi jáy ajcxy túngixy, e ypocycäy ajcxy ma Dios.

Tüg töxyjäy huídi ca' yjudiojáyity mibijc Jesús

²⁴ Chooñ Jesús ma yijimbi it, e ñicxy jim ma Tiro etz Sidón ñaaxjot. Jesús ytigiy ma tüg jáy ytijc, e ca' anajty tzocy co je mayjäy ñejhuíhuíyb ma y'ity. Per ca' jajty nicx yhuingoyüch. ²⁵ Mic'amy tüg töxyjäy nejhuyi ma Jesús anajty yajpaady. Hue' je töxyjäy ypi'cnix ymiid anajty ca'oybi. Je töxyjäy ymiñ ma Jesús, e ycojxtinay'ahuíy ma yí yhuinduu. ²⁶ Je töxyjäy hue' anajty ycojápiy Sirofencia (e hue' anajty griegojäy). Yí töxyjäy may'ajt pijctzoy ma Jesús co huen yajpidzimy je ca'oybi ma ypi'cnix yjot yhuinma'ñ. ²⁷ Chi Jesús je töxyjäy nimay:

—Ooy ycopicyity co nbubedipyich jayijp Dios yjäy (yí judiojäy). Jadu'n nipaady nej tüg ungedeedy. Tim copicy co je ungedeedy yajcayipy jayijp yci'm ung, e ca' möhuip uc je huídibi y'ung yajjicxaamy.

²⁸ Chi je töxyjäy y'adzooy:

—Huindzin, tiy'ajt nej miich mmína'ñ, per nañ jadu'n yí uc ajcxy yjicxyp je caagy abu'x huídi cáb naaxcíxy ma mesi'pa't ma je jáy y'ung ajcxy ycaay.

²⁹ Chi Jesús je töxyjäy nimay:

—Tiy'ajt jadu'n nej ich miich ti xy'adzooy, paady yci'xpí jéb mhuimbidipy ma mdijc jotcuyc, je ca'oybi ti ypidzimy ma mnix yjot yhuinma'ñ.

³⁰ Co je töxyjäy huimbijty ma ytijc, chi paty ypi'cnix cijx'am, ti anajty je ca'oybi ñibidzimyii ycobidzimyii.

Jesús yajtzögy tüg jáy huídibi cónat etz ahui'mb

³¹ Chi Jesús jim tzojci chooni Tiro ñaaxjot. Chi chooñ jim ñicxy anajty Galilea, e nicxy ma je tü'aa huídibi najxp Sidón etz je cajp huídibi yajpatp jim Decápolis ñaaxjot, chi yja'ty ma Galilea mij laguunba'. ³² Jim ajcxy m'id miñ tüg jáy huídibi cónatip etz aahuí'mb. Chi ajcxy may'ajt pijctzooy ma Jesús huen cínixajy je pa'mjäy. ³³ Chi Jesús m'idnicxy je pa'mjäy ahuingujc ma ca' mayjäy, e pidacy ycihua'x ma je pa'mjäy ytätzac. Chi chujy, e huin'it nidoni je ytoodz.

³⁴ Chi Jesús ypa't'ijxy tzajpcix, e ymicxejy, e chi ymínañ Aramaico'amy:

—Efata —jada ayuc hue' yhuimbidzimy: Ahuädz.

³⁵ E mic'amy je jáy cónatpi ytätzac y'ahuaach etz ytoodz yungüy etz ycapxni yajxon. ³⁶ Chi Jesús ane'my je pa'mjäy etz ymigügtijc co ca' huaad ni pin yajm'idmiydägiy jadu'n nej anajty ti chögy. Co Jesús jadu'n mictägy ane'my co ca' huaad ni pin yajm'idmiydägiy je mijhuinma'ñ huídibi ytumyb, chi nigí je pa'mjäy etz ymigügtijc m'idmiydaaccixy hueñypínity. ³⁷ Je mayjäy ooy tzachjihuíy huinmay ajcxy, ñayñimaayi ajcxy miñ xyipy:

—Jada Jesús ooy oy chachtuñ. Ymimadactaayb yí'huenytimytíjity, ixti yajmidohuicpy yí yí cónatpi etz yajcapxigy yí uumbi.

8

Jesús yajcay midax milyëdyjc

¹ Je huin'it xii je huin'it tiempo mayjäy anajty ti ñaymújcigixy ma Jesús yajpaady, e ca' anajty je mayjäy ajcxy midity ti ycaaygixipy y'úuccixipy. Jesús capxyñiguejxy je' ydiscípulos ajcxy, co huen miingixy ma yi' yajpaady. Co ajcxy ymiiñ, chi nimay:

² —Ooy nba'ayooyich yi mayjäy. Yi' co cham midugiiig xii maabi ya mid y'ityich je mayjäy, e ni ca' ajcxy midity ti ycaipy. ³ Co ixypy nguexhuimbityich ajcxy ma ytijc ayuu, ca' yjécyty yajpa'mgójipy ajcxy tü'am, com nijëjity ajcxy jigüëgy ti choongixy.

⁴ Chi je discípulos ajcxy Jesús adzooy:

—¿Ma ich ajt nbaatim je caayin uucin huidibi jëb mid nyajcaayim nyaj'úucim jada mayjäy? Com mijtigíduum ya nyajpaatim ma ca' pin chinäy.

⁵ Chi Jesús y'amidooy je' ydiscípulos ajcxy:

—¿Naag tzajcaagy miich ajcxy midity?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjäy, co huen iñay'ahuüygixy naaxcixy. Huin'it Jesús conigy je huixtujcp tzajcaagy, e yajnaxxy Dioscojuyip ma Dios mid tzajcaagy ycixpi. Chi tujc-huäcxy je tzajcaagy, e moy je' ydiscípulos ajcxy, e je' ydiscípulos ajcxy yajhuäcxy je tzajcaagy ma je mayjäy. ⁷ Je Jesús ydiscípulos ajcxy ymid anajty nijëjity pi'c acx. Chi Jesús yajnaxxy Dioscojuyip ma Dios mid je pi'c acx ycixpi, e moy je' ydiscípulos ajcxy huen yajhuäcxtaygixy ma je mayjäy. ⁸ Chi je mayjäy nidüg'óciy yca cüxyi, e co ajcxy ycayday, chi je Jesús ydiscípulos ajcxy yajpidigy huixtujc cach cayduc jicxtuc tiibi anajty yconaxy. ⁹ Jahueeni anajty ycamidaaxmility je jäy huidibi ajcxy cay uuc cüxyi. Chi Jesús ycapxy ycixxy mid je mayjäy, e nimay ajcxy co huen nicxcixy ma ytijc. ¹⁰ E mic'amy Jesús ybarcotigiy mid ydiscípulos ajcxy, e chi ñicxy ajcxy jim Dalmanuta ñaaxjot.

Yi fariseos ajcxy tüg ijxpejt pijctzooob mijhuinma'ñybi

¹¹ Nijëjity fariseos ajcxy, je huindzindijc huidibi padumb judío ycostumbre, ymiiñ ajcxy ma Jesús yajpaady, e ytigiy ajcxy ijxquípcixy y'ixpijcin mid Jesús. Pijctzoogixy co Jesús huen yaj'ixyii ajcxy tüg ijxpejt huidibi tzomb tzajpjoty. Ijxta'n octunaangixy mid Jesús. ¹² Chi Jesús tajy may ñayjihuiiyi jotjoty huinma'ñyoty, chi ymicxejy, e yminañ:

—¿Na'amy co jada jäy ajcxy huidibi jugy'ajtp cham, pijctzoogixy ijxpejt huidibi tzomb tzajpjoty? Janch ich miich nimaaygixy co ca' nyaj'ixaangixy ijxpejt huidibi tzomb tzajpjoty.

¹³ E Jesús ytimycapxycixy mid je fariseos ajcxy, e chi puyöyduuty ajcxy. Chi Jesús ybarcotigiy, e ñicxy mid ydiscípulos ajcxy ma mij laguun ñinaxy.

Fariseojäy ajcxy yaj'ixpijcin

¹⁴ Je' ydiscípulos ajcxy ti anajty jaydigoygixy je jicxy picy co ajcxy ybarcotigiy. Jëyi ajcxy mimiñ tüg pi'c tzajcaagy. ¹⁵ Chi Jesús ane'myb je' ydiscípulos ajcxy, e yminañ:

—Ca' mmijpidaaccixy yi fariseojäy ajcxy y'ayuc ytiy'ajt etz ni rey Herodes y'ayuc ytiy'ajt, com jadu'n ajcxy y'ayuc nipaady nej levadura huidibi ca' y'óyity.

¹⁶ E je Jesús ydiscípulos ajcxy nimydaaccixy Jesús y'ayuc ñayñimáayigixy ajcxy miñ xyipy:

—Je' co ca' ich ajt nmimiinim caayin uucin.

17 E Jesús ñejhuñyb anajty nej je' ydiscípulos ajcxy ñayñimaay; miñ xyipy, paady ymíñañ:

—¿Na'amy co mdzachnimíydaaccixy je caayín uucín huídibi ti mjäydi-gooygixy? ¿Nej ca' mhujñihuiygyixy e ca' mguendítungixy ñich n'ayuc? ¿Nej co ajcxy mdzachcöjuuñity? 18 Miich ajcxy mñid mhuiin: ¿Nej co ca' m'ijxcixy huídibi ndumybich? Miich ajcxy mñid mdädzac: ¿Nej co ca' mmido'mbíjccixy ñich n'ayuc? ¿Nej co ca' mjäyméjtzcixy ti ti nduñich? 19 Jayhuin co ndujc-huäcxyich je migooxpi tzajcaagy e nyajcaayich migoox mil jäy: ¿Naag cach cayduc jicxtuc ti ajcxy myajpidígy?

Chi ajcxy y'adzooy:

—Hue' ñich ajcxy nyajpidígyich majmetz cach cayduc jicxtuc.

20 Chi Jesús ymíñañ:

—E jayhuin co ndujc-huäcxyich je huixtujcpi tzajcaagy, e nyajcaayich mídaax mil jäy: ¿Naag cach cayduc ti ajcxy myajpidígy?

Chi ajcxy y'adzooy:

—Hue' ñich ajcxy nyajpidígyich huixtujc cach cayduc jicxtuc.

21 Chi Jesús ymíñañ:

—¿Nej chambaad miich ajcxy ca' mhujñihuiy?

Jesús yajtzögy tüg jäy huintzpi jim Betsaida

22 Jesús etz ydiscípulos ajcxy oy yjá'tcixy jim Betsaida. Jim Betsaida nijéjity jäy mñid miiñ ma Jesús tüg huintzpi, e pijctzoy ajcxy may'ajt co huen nidoñ jigix je huintzpi y'ijxigipy. 23 Huin'it Jesús huixtztzooñ je huintzpi ma yci', chi mñid cajppidzimy. E chi Jesús yajjaaxy yi chujyñi je huintzpi yhuin, etz cñixajy, e chi amidoy pen y'ijxpy anajty tigati yinjaty huenjaty. 24 Chi je huintzpi huindicxpejty Jesús, e nimay:

—N'ijxpyich yëydijctijc, e jadu'n ajcxy yquëxígy nej quipy, per yöyp ajcxy.

25 E jadüg'oc Jesús yci' pidacy ma je huintzpi yhuin, e chi je huintzpi yhuindicxpejpty anajty, e chi yhuin y'oyñy yajxon, huin'it oy huadz y'ijxy.

26 E Jesús ycapxycíjxy mñid je', e quejxhuimbijty ma ytijc. Chi ymíñañ:

—Ca' mdigihuij cajpjoty, e ni pin jada mgayajmñidmíydägy.

Pedro capxpidzimy co Jesús yi' je' je Cristo

27 Chi Jesús ñicxy mñid ydiscípulos ajcxy jim ma nijéjity mutz cajp mihuingon je mij cajp Cesarea Filipo. E tü'am Jesús amidoy ajcxy ydiscípulos, nimay:

—¿Nej jäy ymíñaangixy pin ñich?

28 Chi ajcxy je' ydiscípulos y'adzooy:

—Nijéjity jäy ymíñaangixy co miich je' je Juan, je Bautista. E nijéjity ymíñaangixy co miich je' je Elías. E jacjadyii ymíñaangixy co miich je' tüg Dios y'ayucnajtzcaxñybi huídibi tügñyb mñid nijéjity Dios ytiy'ajtmñidpi huídibi tzinaay jecy'ajty.

29 Jesús y'amidooy je' ydiscípulos ajcxy:

—Miich ajcxy, ¿nej miich mmíñaangixy pin ñich?

Chi Pedro y'adzooy:

—Miich je' je Cristo.

30 Chi Jesús nimay je' ydiscípulos ajcxy co ca' huaad ni pin nimaaygixy, co yi' je' je Cristo.

Jesús capxpidzimy co y'ögañ

31 Chi Jesús jacyaj'ixpijcy je' ydiscípulos ajcxy, e ymíñañ:

—Copicy co ñich, je jäy huídi tzoön tzajpjoty, nyajnaxipyich mij tzaachpyi etz mij ayo'n. Yi mijjäydijc ajcxy, yi judío teedy mñitngmñidpi, etz yi escribas,

je huindzindijc huídibi nįjayduutćixyp Dios necy, ca' ajcxy xy'ixa'ñich, e xyaj'öga'ñ ajcxy, e codugüig xii njugypigipyich jadüg'oc co ñich anajty ti n'ögy. ³² Co Jesús jadu'n nigapxy nimıydacy huädz huädz nej yjada'ñyii anajty, chi Pedro huobıbzımy Jesús ahuingujc, chi ooy ooy. ³³ Chi Jesús ni'ijxhuimbijty ydiscípulos ajcxy, e ooy je Pedro, ñımay:

—Huinhuäctuutćich, miich Satanás. Com miich ca' mhuinma'ñ mbıdägy nej Dios tzocy. Yi' janchtıy miich mhuinma'ñ'ajtpy nej jäy ajcxy tzocy.

³⁴ Huin'ıt Jesús huoomiñ yi' ydiscípulos ajcxy etz yi mayjäy, e chi nımay:

—Pen ji pinjaty xypanıcxax'ñich, huen jäydgoydäy yci'mdzójcin etz huen xypanıcxıch jabom jabom. Oy nej ytimyjadıpy ytimy'ayoohuıpy. Jadu'n nıpaady nej jıhuıy ajcxy anajty mgruudz mgabıccıxy, etz naygıyėjcıgıxy ma yi ó'cin huen ytimyñėjıty mıid ñich ycıxpi. ³⁵ Huenpinjäy huídibi ca' yega'ñ yi yjugy'ajtın ma yi ó'cin mıid ñich ycıxpi, hue' je' yajtıgoyamy yi'yjugy'ajtın. E huenpinjäy huídibi yegamy yjugy'ajtın ma yi ó'cin mıid ñich ycıxpi etz ñich y'ayuc oybi ycıxpi, hue' je' ypadamyb yi jugy'ajtın huídibi ca' cıxıpy tıgoyıpy ni mınaa. ³⁶ ¿Ti oy'ajtın yi' co tüg jäy y'ocnayıajpadıybi yi meeñ etz mıc'ajtın (huıdi yajpaatp ya ñaaxhuiñybi) e y'alma yjugy'ajtın cıxıpy tıgoyıpy tügćıy? ³⁷ ¿Jadu'ñyi jėb jäy y'alma yjugy'ajtınoccojuyi? Nıgi tzoohuın mııdıty jäy ajcxy y'alma yjugy'ajtın, ca' jac ti. ³⁸ Huentımpıńıty yi huídibi xymıdzoydúnıbıch yi n'ayucıch ndıy'ajtıch ma yi pocyjäyđıj yhuınduu huídibi tziıaayb cham ma jada naaxhuiñybi. Pues nañ jadu'n ñich, je jäy huídibi tzoon tza-jpıoty, nmıdzoydúnıbıch yi jadu'mbi jäy co ñich anajty nhuımbıty ya naaxhuiñybi mıid ñich nDeedy, je Dios Teedy, ymıc'ajt y'oy'ajt etz mıid tüg'ócıy yi may'angeles ajcxy tudägypı.

9

¹ Jadu'n Jesús yjacmınañ:

—Janch tıy'ajt jadu'n nej ñich miich ajcxy cham nımäy, co nijėjıty miich ajcxy huídibi cham ma ñich nhuınduu, ca' m'ögaangıxy, ıxtı coonı ajcxy jayıjp m'ıxıpy je Dios y'ané'mın etz ymıc'ajt.

Co Jesús ñinıcx yajtıgajch

² Co tuctujc xii naxy, chi Jesús mıid tzoon Pedro, Santiago etz Juan, e mııdpa'ttıgıy ma tüg mııcop ma tüg it ooy ycıxıty. E jım copcıxy Jesús ñinıcx naygojtıgajtznı ma Pedro ajcxy yhuınduu. ³ Chi Jesús yhuıt oy y'ahuımbıty janch poob, e janch adıcxp. E ni pin jadu'n yhuıt cayajhuäch janch poob jadu'n nej je' anajty yhuıt mııdıty. ⁴ E chi oy nayguėxıgyıı ma ajcxy yhuııdu Elıas etz Moısés. Elıas etz Moısés mıydacp anajty ajcxy mıid Jesús. ⁵ Huin'ıt Pedro nımay Jesús:

—Huındzın, janch oy jadu'n co ñich nyáajıty. N'occojyıch ajcxy tugüıg tıjćquemy: tüg miich mje'; tüg Moısés yje'; etz tüg Elıas yje'.

⁶ Com Pedro, Jacobo etz Juan ooy anajty chıgıygyıxy, paady Pedro ca' anajty nejhuıy ti ycapxyp. ⁷ Tım huın'ıtıy tüg joc yajnıdıgoy je' ajcxy, e mııdooy ajcxy ayuc jocıoty, e je ayuc ymınañ:

—Jada je' ñich n'ung, huídibi ooy ndzocyıch. Mııdo'mbıc miich ajcxy Jesús y'ayuc.

⁸ E tım huın'ıtıy Pedro, Jacobo etz Juan ajcxy yujc'ıjxy, e yja'ıjxhuıdıjty ajcxy, e ca' ni pin ma ocjac'ıjxnı, jėda'ajty Jesús naydügıajc.

⁹⁻¹⁰ Tı anajty choongıxy copcıxy, e cidacp anajty ajcxy, co Jesús nımay Pedro, Jacobo etz Juan, co ca' huaad yajmııdmıydaaccıxy pinjaty huídibi ajcxy

anajty ti íjxcíxy, ixti cooni ñich, je jäy huídibi tzoon tzajpjoty, n'ögibich etz njugypigipyich jadüg'oc. Pedro, Jacobo, etz Juan ca' yjacmíydägy mïd jacpínjaty huídibi anajty ti íjxcíxy. Per ooy ajcxy huinmay etz naymïdmíydáacígixy miñ xyípy ti Jesús ytijamy co ymínañ: “N'ögibich etz njugypigipyich jadüg'oc.”

¹¹ Huin'it ajcxy Jesús y'amídooy:

—¿Na'amy co yi escribas ymínañ co yi Elías huídibi chinay jecy'ajty jayíjp miínañ ca'ydí je Cristo?

¹² Chi Jesús y'adzooy:

—Tíy'ajt jadu'n co miñ jaybety ma Dios ñecy jecy'ajty co Elías yhuimbidity jacjayíjp ca'ydí je Cristo, e yaj'oyíydáhuípy huinjemybi tüg'ócíy mïd Dios ycíxpi. E nañ tíy'ajt jadu'n co jaybety ymíñ ma Dios ñecy co je Cristo, je jäy huídib tzoon tzajpjoty, yajnaxañ ayo'n etz tzaachypí etz mayjäy ca' y'íxa'níby. ¹³ ñich miích ajcxy nimaayb co je Elías ti je' yhuimbity ya naaxhuiñ, e je mayjäy ti túngixy mïd Elías nej anajty tím tzójcíxy. E cuyduñ ajcxy nej jaybety miíñ ma Dios ñecy mïd Elías ycíxpi.

Jesús yajtzögy tüg mutz'anäg huídibi ca'oybi mïd

¹⁴ Co Jesús, Pedro, Jacobo etz Juan yhuimbity ma je jacjadyii Jesús ydiscípulos ajcxy anajty ti yhuí'míy, chi ajcxy íjxy mayjäy jühuidity ma Jesús ydiscípulos ajcxy. Etz íjxy ajcxy nijéjity escribas huídibi ayuc tzachyajtzyb mïd Jesús ydiscípulos ajcxy. ¹⁵ E co je mayjäy íjxcíxy nejhuíyígixy co Jesús ti yhuimbity anajty, chi mic'amy ajcxy ninícxxy Jesús poyígy, e capxpooxcíxy, e may je' ajcxy ooy jíhuíy huinmay. ¹⁶ Chi Jesús y'amídooy je mayjäy, nímay:

—¿Ti ayuc miích ajcxy mdzachyajyomyb mïd ñich ndiscípulos ajcxy?

¹⁷ Chi nidüg je jäy ajcxy y'adzooy:

—Huindzin, ti nmïdmíñ ñich nmang huídibi ymïd ca'oybi, e je ca'oybi ti yaj'umíyíi. ¹⁸ E janam jadojic je ca'oybi yajyachyíi yajquídyíi ñich nmang, e oy cäy naaxcíxy, e ooy y'aa'opy ypidzímíy, e nañ jadu'n oy ytíitz queety etz ñinícx janch ögy yhuí'my. Ti nbíjctzoyích may'ajt mïd miích ndiscípulos ajcxy co huen yajpidzímígixy je ca'oybi ma ñich nmang, e ca' ajcxy ymadacy nícxxy yajpidzímígixy.

¹⁹ Jesús nímay je mayjäy:

—Miích ajcxy huídibi jugy'ajtp jadachambi xíi tiempo huídibi ca' mïjpidägy Dios y'ayuc, ¿naag xíi naag po' ñich njac-huí'mmíhuíbich mïd miích ajcxy? ¿Naag xíi naag po' n'ocmímecxtuguípich miích ajcxy? Mïdmiín yi mmang ya ma ñich nhuínduu.

²⁰ Chi ajcxy mïdmiñ je pa'mjäy ma Jesús yhuínduu. E co je ca'oybi íjxpaady Jesús, chi mic'amy yajyajch yajquídy je pa'mjäy, e chi oy ciday naaxcíxy, e ooy yajch yquídy, yajpidzímíy ooy y'aa'opy ma y'ahuac. ²¹⁻²² Jesús y'amídooy je pa'mjäy yteedy:

—¿Mínaag jíimíjt cujc yöy maabi mmang ypa'mbety?

Chi je ungedeedy y'adzooy:

—Ma'xung anajty co pa'mbedyíi. Canaag'oc je ca'oybi yajyachyíi yajquídyíi ñich nmang, ixti ti oy ycogidahuíy jíinjoty etz níjoty. Je ca'oybi canaag'oc jayaj'ögy ñich nmang. Pen miích mïd tzóc'ajt mic'ajt jaydéb xypubedípyích, tun may'ajt pa'ayoogích etz pubejtcích.

²³ Chi Jesús y'adzooy nímay je pa'mjäy yteedy:

—Pen miích mibíjcpí, ca' ti chípity ma pín mibíjcp.

²⁴ Mic'amy je pa'mjäy yteedy mic'ycapxy ymínañ:

—Nmibíjcyích, pubéjtcích nej huaad jacmíj nmibícyích.

25 E co Jesús ijxy co nīgi mayjäy chach ymiiñ poyigy ma yí', chi ix'ojy je ca'oybi, e ymíñañ:

—Miich ca'oybi huídib ti yajhui'my jada pi'c'anäg uum etz nat, ñich miich yam n'ane'myb: “Pidzim ma yí pa'mjäy, e ca' mjactigihuiipy ma yí yjot yhuinma'ñ jadüg'oc.”

26 Jayijp je ca'oybi yaaxqueecy janch mic, yajyajch yajquidy je pa'mjäy. Co jadu'n tuñ, chi ypidzimy. Je pa'mjäy oy ñinícx yhui'my nej jihuiy ti y'o'cni. Je mayjäy huídibi anajty ajcxy jim huindícxp ymínaangixy:

—Ti ayoob y'ögy.

27 Chi Jesús majtz je pa'mjäy yci', e yajpidigy e huin'it je pa'mjäy ytinayigy mic oy.

28 Co Jesús ytigiy ma tüg tijc, chi je' ydiscípulos ajcxy y'amidou ameech, míñañ ajcxy:

—¿Na'amy co ñich ajcxy ca' ti nmadägyich nej nyajpidzimip ñich ajcxy yí ca'oybi?

29 Chi Jesús y'adzooy:

—Yijiibi ca'oybi ca' yí' huaad ypidzimy jadu'ñyi. Hue' janchtiy copicy mibijctzou Dios mictägy, e huin'it ypidzimipy je ca'oybi ma je pa'mjäy. Ca' jac ni nej huaad ypidzimy yí jadu'mbi ca'oybi, jeyi co Dios nmibijctzoohuim n'íjtim ayuu.

Jesús capxidzimnip jadüg'oc co y'ögañ

30 Chi Jesús míd yí' ydiscípulos ajcxy choñ ma je jimbi it, e yajyöyñajxtay ajcxy Galilea naaxjot. Jesús ca' anajty tzocy co je mayjäy ñejhuihuíyb ma yí' ñícx. 31 Com Jesús hue' anajty yaj'ixpicy yí' ydiscípulos ajcxy, co ooy ycopícyity co yí jäy huídibi tzoon tzajpjoty, yajcüyegipy ma yí ymidzip, etz yaj'ögíyb, e co anajty ti y'ögy codugüg xii jadüg'oc yjugypigipy. 32 Jesús ydiscípulos ajcxy ca' huinjihuíy anajty Jesús y'ayuc, e nañ jadu'n tzigíyb anajty ajcxy co Jesús yaj'ójip, paady ca' ajcxy amidoy nej huimbídzimy yijiibi ayuc.

¿Pín je' nīgi jacmíjip?

33 E Jesús míd ydiscípulos ajcxy oyjäty jim Capernaum. Co ajcxy ytijectigy, chi Jesús yaj'amidou ydiscípulos ajcxy, nimay:

—¿Ti ayuc miich ajcxy naymídmíydáacigixy jim ma anajty mdüyöygixy?

34 Per amonday ajcxy, com jégixpi co anajty ajcxy ooy ti ñaymídmíydáacigixy tüyöyjoty co pín jada' ajcxy nidügti ocjaccopícyip.

35 Huin'it Jesús y'ixtacy, e chi mijhuoy je nimajmetzpi ydiscípulos ajcxy, chi ajcxy nimay:

—Pín nayyajnaxaanip mij, huen ity nej jihuiy ca' ytiijity e huen capxmídy ymigügtijc.

36 Chi Jesús tzenigy tüg pi'c'anäg, e chi pidacy cujc'amy ma yí' ydiscípulos ajcxy. Chi tzenigy jadüg'oc, e nimay ajcxy:

37 —Pín cöbíc tügpajc pi'c'anäg jadu'n nej jada pi'c'anäg míd ñich nxii ycixpi, ñich yí' anajty ti xycöbicyich, e pín ñich xycöbijcpich, ca nan ñich anajty naydügpajc ti xycöbijcyich, nañ jadu'n anajty ti cöbicy huídi ti xyquejxich.

Pín ñich ajt xycamidzip'ájtím, ñich ajt je' míd y'ity

38 Juan Jesús nimay:

—Huindzin, ti ñich ajcxy n'ijxpaady tüg jäy co ca'oybi yajpidzimy míd miich mxii, e ti ngapx'aducyich míd co ca' yí' ñich ajt xypahuídíjtim.

39 Per Jesús ymíñañ:

—Ca' mgapx'adugipy yi' jadu'mbi jäy, com huenpínity huidibi mijhuinma'ñ tumb miid ñich nxii, ca' yi' jibic xyñigapxich. ⁴⁰ Com yi' huidibi ajt ca' xymidzip'ájtím, yi' yi' miid ñich ajt nbidzimim. ⁴¹ Janch janch ñich miich ajcxy jadu'n nimäy co huenpinjäy huidibi ixypy miich ajcxy xyajñi'uucp tüg vaso ni miid co miich ajcxy ti mmijnicxpety je Cristo, yi' jadu'mbi jäy ypadamy yi' y'oy'ájtín ma Dios.

Je huidibi ooy ycojotmáiyty co nicxy nbocycáhuim

⁴² Huenpínity huidibi jibic-huinma'ñ mibidzim, e yajpocycäy yi' jadu'mbi pi'ctijc huidibi ajcxy xymijnicxpejtpich, jac'oy ixypy co yi' jadu'mbi jäy ytimyñayajyöcxodzyii tüg paandzaa etz ñayñajtzjibibihuuyb mejyoty. ⁴³ Pen miich mgi' xyajtundigoyamb jac'oy co mdim'ixpuxipy, com jac'oy co mdigihuipy ma yi' jugy'ájtín huinixibi ciduc, ca'ydí co Dios xypidägip miid metz mgi' jii by jijnoty ca'oydactuuby, ma yi' jijn ni camina ycapich. ⁴⁴ Jii by ca'oydactuuby yi' ucxyting ca' y'ögy etz ni jijn ycapich nicaminaaxii. ⁴⁵ E pen miich yi' mdecy xyajpocycáhuamb, ixpux, com jac'oy co mdigihuip ma yi' jugy'ájtín huinixibi tecytuc ca'ydí co mdigihuip miid metz mdecy jii by ca'oydactuuby, ma yi' jijn ni camina ycapich. ⁴⁶ Jii by ca'oydactuuby yi' ucxyting ca' y'ögy etz ni jijn ycapich ni caminaaxii. ⁴⁷ E pen yi' mhuiin tüg xyajpocycáhuamb, tim yajpidzim, jac'oy yi' co mdigihuip ma yi' Dios y'ane'mdac miid tügpajc mhuiin, ca'ydí co mdigihuip ca'oydactuuby miid metz mhuiin. ⁴⁸ Ma yi' ucxyting ni caminaaxii yca'ögy etz yi' jijn ni caminaaxii ycapich, ⁴⁹ e ma nidüg'óciy ñi'cágooda'ñ jijn xut jijn ye'n tim jadu'n nej jäy tzüch caan xiducy. ⁵⁰ Yi' caan ooy yi' y'óyity, pen ymiid xücx'ájtín. Co je caan ytigoy yxücx'ájtín, ca' ji ni ti huidibi jeb miid nyajxücxiiyim. Miid'ájtíx ñich n'ayuc ma mjot mhuiinma'ñ, jadu'n ñich n'ayuc nipaady nej caan, e tzina' miich ajcxy jotcuyc miid mmigügtijc nidüg nidüg.

10

Jesús yaj'ixpiy miid co jäy ytöxyijc ixmach

¹ Chi Jesús chooñ jim Capernaum, nicxy jim Judea ñaaxjot ma je it lugar Jordán mijñi nínaxi xii ypidzimy'amy. E mayjäy ooy ñayyöymujci ma Jesús anajty yajpaady. E Jesús yaj'ixpiy je mayjäy jadu'n nej anajty yaj'ixpiy'adyii. ² Chi nijëjity fariseos ajcxy ñicxy ma Jesús anajty yajpaady. Hue' ajcxy yhuinma'ñ pidaaccixy co anajty Jesús tzu'ixaangixy. Chi ajcxy y'amidooy, pen huaad tüg yëydijc ixmach ytöxyijc. ³ Chi Jesús y'adzooy, yminañ:

—¿Nej Moisés ymina'ñ ma yi' ycötújcín ñecy?

⁴ Chi je fariseos ajcxy Jesús y'adzooy:

—Moisés cötújcín yecy co tüg yëydijc jeb huaad ixmach ytöxyijc, e möhuipy ñinecy ñidiy'ajt co nej ñay'ixmájtzigixy, e jadu'n anajty ti y'oyiy nej jeb yi' ytöxyijc ixmach.

⁵ Chi Jesús yminañ:

—Moisés cojaay jada ycötújcín miid miich ajcxy ycipi, co ooy miich ajcxy mdzachcapxycömídodaaccixy ca' mgapxymidohuaangixy Dios. ⁶ Per co je naaxhuiñybi chondacy, co Dios oga'n yajcojy tüg'óciy tijaty huidi ji'ajtp, chi Dios yajcojy yëydijc etz töxyjäy. ⁷ E je yëydijc ixmadzipy ytaj yteedy etz pudigihuipy yi' ytöxyijc. ⁸ E je yëydijc etz ytöxyijc tú'ciy idaangixy. Paady je yëydijc tügmucy yajpaady miid ytöxyijc. ⁹ Com yi' huidibi Dios ti huijtzmucy, ca' ni pin huaad huijtzhuägy.

¹⁰ Co Jesús m̄id ydiscípulos ajcxy yhuimbijt ma anajty ti yjättáccixy, chi Jesús ydiscípulos ajcxy yajtihuimbijtcixy je ayuc huídibi anajty ti yaj'ixpicy ma je píjcin. ¹¹ Chi Jesús ym̄inañ:

—Je yēydijc huídibi ti ixmach yí ytōxyijc, e pícy m̄id huingbi, hue' yí anajty ymidundigooyb yí ytōxyijc huídibi m̄id jayijp ypijcy. ¹² Nañ tim jadu'n co tūg tōxyjāy ixmach je yēydijc huídibi m̄id ti ypic yjayijp, e ypijctigach m̄id huingbi yēydijc, hue' ymidundigooyb je yēydijc huídibi m̄id ti ypic yjayijp.

Jesús conucxy pi'ctijc

¹³ Je huin'it tiempo jāy ajcxy m̄id miñ pi'ctijc ma Jesús, jaydēb c̄in̄ixajy etz conuucxip. Co Jesús ydiscípulos ajcxy jadu'n ijxy co jāy ajcxy nimijhuāgy Jesús m̄id ajcxy ypi'c'ung, chi je' ydiscípulos ajcxy ix'o'y je jāy ajcxy. ¹⁴ Co Jesús jadu'n ijxy nejhuñy nej yí ydiscípulos ajcxy y'idich, chi o'y ajcxy, ym̄inañ:

—Ooy y'óyity co je pi'ctijc ajcxy xyñimijhuāgyich, ca' miich ajcxy mgapx'aducy. Com yí jāy ajcxy huídibi yajpatp ma Dios y'ané'min, jadu'n ajcxy nipaady nej pi'ctijc. ¹⁵ Janch ich miich ajcxy nimāy co pinjaty huídibi ca' cōbigañ Dios y'ané'min, jadu'n nej pi'ctijc cōb̄ijccixy Dios y'ané'min, hue' yí jadu'mbi jāy ajcxy ca' ytigihua'ñ ma yí Dios y'it lugar.

¹⁶ Chi Jesús aminenmujctay je pi'ctijc ajcxy, e chi c̄in̄ixajiy etz conuucxcixy.

Tūg mutz'anāg comeñybi ym̄ydāgy m̄id Jesús

¹⁷ Co Jesús chooñ jadūg'oc, chi ñimiini poyigy tūg yēydijc, ycojxtinay'ahuñy ma Jesús yhuinduu, e ym̄inañ:

—Miich, oybi Huindzin, ¿ti huaad ndunipyich jigix jēbi nbadipyich jugy'ájtin huídibi ca' ycixipy ytigoyipy?

¹⁸ Chi Jesús ym̄inañ:

—¿Na'amy co xyñimāyich co oy huindzin ich? Dios tūgpajc óyip, ca' jac ni pin. ¹⁹ Miich mnejhuñyb Dios ycōtújcin huídibi jadu'n m̄inaam: “Ca' mm̄igapxtigoyip tōxyjāydijc; ca' mjāyyaj'ōgipy; ca' mmeedzip; ca' m'ñndaacip; ca' pin mhuin'ñip; etz myajmij'adip mdaj mdeedy.”

²⁰ Chi je jāy Jesús nimay:

—Huindzin, ti nguydudāyich jadyaab cōtújcin ajcxy maabi ich nbi'c'atyich.

²¹ Chi Jesús huindcxpejty je yēydijc m̄id tzójcin jihuñyñ, e chi nimay:

—Per jactigoy'ijtni jadūgnax. N̄icx toog tūg'óciy huídijaty miich mm̄id, etz mo' yí ayoobtijc. Co jadu'n mdunipy, chi mbaadipy oy'ájtin jibby tzajpjoty. Co jadu'n mdooctāhuipy tijaty miich m̄id, chi minip jadūg'oc ma nyajpaadyich, e xypan̄icxibich, e mnaybidāḡib cixyjot huinjot oy nej md̄imyjadipy m̄id ich ycixpi.

²² Co jadu'n je yēydijc midoy nej anajty Jesús ti ñimāyii, chi yhuñmy taj may e co ñicxni, chi ooy ytajy ymay, com hue' je' anajty ooy ycomeñity.

²³ Co Jesús jadu'n ixxy co je comeñybi taj may yhuimbijtni, chi huindcxpejty je' ydiscípulos ajcxy huídibi tinaayb jūhuídity ma yí, e ym̄inañ:

—Ooy chachtzípity co tūg comeñybi ytigihuiipy ma Dios y'it lugar.

²⁴ Jesús ydiscípulos ajcxy ooy tzachhuinmay'ahuídity m̄id jada ayuc nej Jesús anajty ti ym̄inañ. Paady Jesús yjacm̄inañ jadūg'oc:

—Miich ajcxy migügtijc huídibi ooy ndzocyich, ooy chachtzípity co ytigihuiip ma Dios y'ane'mdac tūg comeñyñy huídibi tzachnijot'ajt ycomeñ'adi.

²⁵ N̄igi chípity co tūg comeñ jāy ytigihuiip ma Dios y'ane'my, ca'ydi co tūg camello ñaxipy ma tūg xu'ñ'ijx yxūtity.

²⁶ Co jadu'n ajcxy midoy nej Jesús ym̄inañ, chi ooy ajcxy yhuinmay'ahuídity, e nayñimāyigixy miñ xyipy:

—Pen janch t̄y'ajt jadu'n, ¿p̄injäy jada' huaad jëb y'alma ñüdözögipy?

²⁷ Je huídibi jäy ajcxy ca' ni minaxi huaad ca' yaj'oyīy, Dios yi' yaj'oyihuip, com m̄id Dios ca' yi' ni ti chípity.

²⁸ Chi Pedro ym̄inañ:

—Huindzin, occuendtun, ñch ajcxy ti n'ixmajztäyich t̄üg'óc̄y tijaty anajty nm̄idich, e ñch ajcxy nbanicxp̄ich miich.

²⁹⁻³⁰ Chi Jesús y'adzooy, minañ:

—Janch t̄y'ajt nej ñch miich ajcxy n̄imäy co huenp̄in̄ity huídibi m̄id ñch yc̄ixpi ti ixmach yt̄ijc, ti ixmach y'uch ym̄igüg ajcxy etz ytaj yteedy, etz yt̄oxyijc, etz y'ung ajcxy, etz nañ jadu'n ti ixmach ycam ñch yc̄ixpi, etz ñch n'ayucich etz m̄id Dios yt̄iy'ajt yc̄ixpi, yi' ypadamy n̄igi oy'ájt̄in ya naaxhuiñ, ixti ypadamy m̄igo'px jadu'ñyi yt̄ijc ajcxy, y'uch ajcxy, ytaj ajcxy, y'ung ajcxy, etz ypadamy n̄igi ym̄ij cam, m̄id tzaachyp̄i m̄id ayo'n m̄id ñch n'ayuc yc̄ixpi. Etz nañ jadu'n ma je xi tiempo huídibi mimb cidacpi ypadamy jugy'ájt̄in huídibi ca' yc̄ixipy yt̄igoyipy. ³¹ Ji yajpaady ya naaxhuiñ nijëjity jäy huídibi cōmay ijtp, e co yjät̄y ajcxy tzajpjoty, chi ca' ajcxy cōmay ida'ñ. Nañ jadu'n ji yajpaady ya naaxhuiñ nijëjity huídibi ca' cōmay y'ity, e co ajcxy yjad̄ipy tzajpjoty, chi j̄iiby ajcxy cōmay y'idipy.

Jadüg'oc Jesús capxp̄idz̄im̄ip co y'öga'ñ

³² Jesús m̄id ydiscípulos t̄üyöyp anajty ajcxy, hue' anajty ypättiḡiyḡixy j̄im Jerusalén. Jesús jayijp anajty ñicxy, e je' ydiscípulos ajcxy etz nañ jadu'n mayjäy panicxy anajty ajcxy Jesús. Je Jesús ydiscípulos ajcxy ooy chachhuinmay'ahuíd̄j̄tc̄ixy, e jacjadyii jäy huídibi anajty ypanicxy Jesús ooy ajcxy chiḡiyḡixy. Chi Jesús huodzooñ ab̄icy je majmetzpi ajcxy, e yajm̄idmiydactay je' ajcxy jadu'n nej ytuna'ñyii yjada'ñyii j̄im Jerusalén co anajty ajcxy j̄im yja'tc̄ixy. ³³ Jesús je nimajmetzpi n̄imay:

—Miich ajcxy m'ijxpy mnejhūiyb co nn̄icxim cham j̄im Jerusalén. E j̄im Jerusalén, ñch je jäy huídibi t̄zoon tzajpjoty, nyajc̄iyega'ñich mach ma yi Teedy m̄ijtungm̄idpi, etz ma yi escribas ajcxy. E chi ajcxy ane'm̄in pidäga'ñ co huen xyaj'öc̄ixich. Nañ jadu'n xyc̄iyegaanḡixich mach ma yi' ajcxy huídibi ca' yjudioj̄äyity. ³⁴ Yi' ajcxy xyñixiḡipy xyajxiḡibyich, xyhuobipyich ajcxy m̄id coochac, xyhuindzuj xyjijptz̄új̄ibich ajcxy, e xyaj'öḡibich ajcxy. Coduḡiḡ x̄i maabi anajty xyaj'öccixyich, chi njugyp̄iḡipyich jadüg'oc.

Jacobo etz Juan p̄ijctz̄óoḡixy t̄üg may'ajt

³⁵ Huin'it Jacobo etz Juan, yi Zebedeo ajcxy ymang, nimijhuägy Jesús, n̄imay:

—Huindzin, ndzojcpyich ajcxy co mdunipy may'ajt jadu'n nej yam n̄imaayḡixy.

³⁶ E Jesús ym̄inañ:

—¿Ti mdzojcpy co ndunip̄ich m̄id miich ajcxy yc̄ixpi?

³⁷ Chi ajcxy ym̄inañ:

—Tun may'ajt co anajty mbaady yi m'ané'm̄in etz m'oy'ájt̄in, xym̄öhuibich yi m̄ij tung ma m'ané'm̄in jaydëb n'ññhuibich ma miich mm̄ijc. Nidüḡti ñch ajcxy n'ññhuipy a'oy'amy ma miich etz jadüḡ anajty'amy.

³⁸ Chi Jesús n̄imay Jacobo etz Juan:

—Ca' miich ajcxy mnejhūiy ti ti mb̄ijctz̄ooḡixy. ¿Nej myajnaxamyb miich ajcxy je tzaachyp̄i ayo'n huídibi nyajnaxaamybich, jadu'n nej j̄ihūiy m'üga'ñ ajcxy ñch n'üḡy e mbaada'ñ ajcxy ñch nn̄ibéjt̄in?

³⁹ Jacobo etz Juan y'adzooy:

—Ich ajcxy nmimadägibich minaxipyich nyajnaxipyich ajcxy yi tzaachypi huidibi mminaxamyb myajnaxamyb.

Chi Jesús ymínañ:

—Janch tiy'ajt jadu'n nej miich ajcxy mínañ co mminaxaangixy myaj-naxaangixy yi tzaachypi jadu'n nej ich nminaxaamyich nyajnaxaamyich yi tzaachypi, tim jadu'n nej jihuïy m'ügaangixy ich n'ügy, e mbadaangixy ich nniibéjtin. ⁴⁰ Per ca' ich cötújcin nmídidyich co ich miich ajcxy nbidägipy tungmíid, co myajpaadip tüg ma ich nmíjc a'oy'amy, e jadüg anajty'amy. Hue' janchtiy Dios Teedy ymíid ni'ixi' pinjaty ti huin'ixy jaydeb yajnicxip je míitung ma ich n'ané'min.

⁴¹ Co je jacjadyii Jesús ydiscípulos ajcxy nejhuïy jadu'n nej Jacobo etz Juan may'ajt pijctzoy ma Jesús, chi ajcxy ooy míjotmäty Jacobo etz Juan. ⁴² Per Jesús huomiñ yi jacjadyii ydiscípulos ajcxy, e ymínañ:

—Jadu'n nej miich ajcxy mnejhuïygyxy, yi jäy ajcxy huidibi míitungmíid ma je maybi naax cajp, mic ajcxy ane'my je naax cajp. Nañ jadu'n yi' ajcxy huidibi mic'ajt míid ma je maybi naax cajp, mic ajcxy ane'my je jäy ajcxy. ⁴³ Per miich ajcxy ca' mjadú'nity nej míitungmíidpi ma je maybi naax cajp. Pinjaty ma miich ajcxy míitung yajnicxaamb, copicy ñaybidägíyb nej tüg tumbi. ⁴⁴ Pinjaty miich ajcxy huidibi nigohuajc'ajtp, copicy ñaybidägíyb nej tüg tumbi. ⁴⁵ Com ich nañ jadu'n, je jäy huidibi tzoon tzajpjoty, ti nmiñich ya naaxhuñ jaydeb nbubedipyich yi mayjäy ajcxy, e ca' nan yi mayjäy ich xpubedipy. Ti nmiñich jaydeb nyegípyich njugy'ájtín ma yi o'cin. E co jadu'n nyegípyich njugy'ájtín ma yi o'cin, chi ngohua'nañich yi jäy ajcxy y'alma.

Jesús yajtzögy Bartimeo huidi anajty huíntzpi

⁴⁶ Chi oy jäty Jesús míid ydiscípulos ajcxy jim Jericó. E co Jesús tzoñ Jericó ytübicy jadüg'oc, chi yi' ydiscípulos ajcxy etz janch mayjäy ñíxcixy anajty míid Jesús. Co ajcxy ycajp pidzimy, chi túba'ay anajty yajpaady tüg huíntzpi huidibi limosna anajty ypijctzooyb jabom jabom. Hue' anajty yxi Bartimeo, e Timeo anajty xijity yi' yteedy. ⁴⁷ Co Bartimeo nejhuïy co Jesús je Nazaretpi najxp anajty ma je tü'aa, chi mic yaaxqueegy ymínañ:

—Jesús, David y'ap y'oc, tun may'ajt ich pa'ayoog.

⁴⁸ Chi je mayjäy ajcxy ogy je huíntzpi, nímaj ajcxy co huen amoñ. Per je huíntzpi ñgi yminan'idíich:

—Miich, David y'ap y'oc, tun may'ajt ich pa'ayoog.

⁴⁹ Chi Jesús ytinayxíjpy, e ymínañ:

—Huomiingix yi huíntzpi.

Chi je jäy ajcxy oy yajtzoongixy je huíntzpi, nímaygyxy:

—Jotcugi', e pidíg, com Jesús xyaaxtzoob.

⁵⁰ Chi mic'amy je huíntzpi, najtz'oxíy je ñibe'ñ, chi ypidígy, e ninícxxy Jesús.

⁵¹ Chi Jesús je huíntzpi y'amídooy:

—¿Ti mdzojcpy ndunípyich míid miich ycíxpi?

Chi je huíntzpi ymínañ:

—Huindzin, ndzójcpyich co xyajhuíndícxígbich.

⁵² Chi Jesús je huíntzpi nímaj:

—Jéb mnicxy ma mdíjc. Com ti xymibicyich, paady ti mhuíndícxígy.

Tim huin'ít je huíntzpi yhuin'oyíy, e yhuíndícxígy, e panícxxy Jesús co ytübicy jadüg'oc.

11

Jesús ytiği y jim Jerusalén

¹ Co Jesús etz je mayjäy oyjá'tcixy huington ma je Jerusalén cajp ma yajpaady mejtz mutz cajp huidi xiijipy Betfagé etz Betania, huington ma je cop huidibi xiijip Olivos, chi Jesús quejxy metz ydiscípulos huen nicxy jayijp. ² Jesús nimay je metzpi ydiscípulos:

—Nicx miich ajcxy ma yijimbi cajp huingtonbi. Co jim mjädipy, chi mic'amy mbaadip tög burro ycoxóchity huidibi ca' pin yaj'iñayñi chambaad. Coguejtuutcix je burro e yajmiingix ya ma ich. ³ Pen jim pinjaty xy'amidoogixy: “¿Na'amy co mmidzonaangixy yi burro?” Chi miich ajcxy mmimähuipy: “Je Huindzin (Jesús) yajtunamyb tzojc, e yajhuimbidamy mic'amy.”

⁴ Chi je metzpi ydiscípulos ñicxy ma je cajp huingtonbi, e oypaatcixy tög burro ycoxóchity huington ma tög tijc'aguu. Chi ajcxy coguejtuuty je burro.

⁵ Ycoguejtuutyp anajty ajcxy je burro co nijejity jäy jim huington yminañ:

—¿Ti mdungixyp? ¿Na'amy co mgoguejtuutcixy yi burro?

⁶ Chi je metzpi Jesús ydiscípulos je jäy ajcxy yajmüdmüydacy Jesús y'ayuc nej anajty ti ñimäyii. Je jäy ajcxy yminaangixy co jëb yajnicxcixy je burro.

⁷ Mic'amy ajcxy mija'ty je burro ma Jesús yajpaady. Je Jesús ydiscípulos ajcxy jibeñ je burro ajcxy müd yjocxhuit, chi Jesús yaj'iñay je burro. ⁸ Mayjäy ajcxy ooy yëby yhuit tögujc ma Jesús anajty ñaxa'ñ, e jacjadyii jäy pujxy ajcxy quipy'aacx, e pidaaccixy tögujc.

⁹ Je mayjäy huidibi anajty ajcxy nicxp jayijp etz axam ma Jesús, chi ajcxy ytigüy capxp mic, yminaangixy:

—¡Hosana! ¡Gloria a Dios, ooy yömáyity Dios! Huen capxpaady y'idipy jada yëdyjc huidibi mimb müd yi nHuindzin Dios yxii etz ymic'ajt. ¹⁰ Huen capxpaady y'idipy je ané'min huidibi jada Jesús yajtzondacp cham. Jada je' je ané'min huidibi nmij'ap nmijteedy David anajty ymüd. Hosana, huen je tzajpjoty tzinaayb ajcxy iibaatcixy capxpaatcixy jada mij'ane'mbi.

¹¹ E jadu'ñyi Jesús ycajptigüy jim Jerusalén, e ytigüy tigoty ma Dios ytijc. Co huindixtay tög'óciy tijaty jii by tzajtigoty, chi chooñ jii by, e ñicxy jim ma je cajp huidibi yxii Betania. Chi Jesús je majmetz ydiscípulos ajcxy müdnicxy.

Jesús capxpcy je higueri ca'pi anajty ytiim

¹² Je com jabom co ajcxy chooñ jim Betania, chi Jesús yuböccooti. ¹³ Chi Jesús ijxpaty jigügy tög higueri ooy anajty yco'aayity. Chi Jesús ñicxy ma je higueri yajpaady, ixa'ñ pen ymüd ytiim. Co Jesús ymech ma je higueri, chi ijxy co je higueri ca' anajty ytiim müdity, jëyi müdity anajty y'aay, com ca' anajty ni tiempity mina higo ytiim'aty. ¹⁴ Chi Jesús migapxy je higueri nimay:

—Jadu'n nej tiempo yjacnicxni, ni pin cajacpaadipy higo tiim ma miich.

Chi Jesús ydiscípulos ajcxy midoy nej Jesús nimay je higueri.

Jesús quejxpídzimday ajuybi adoocpi ma Dios ytijc

¹⁵ Co ajcxy oy yjädy jim Jerusalén, co Jesús ytigüy jadüg'oc jii by ma Dios ytijc, chi Jesús yajpídzimday je ajuuybi adoocpi ajcxy jii by tzajptigoty. Chi Jesús tijhuimbijtay je mesa ajcxy me je meñ yajhuäcxpi ytuñ ajcxy. Nañ jadu'n tijhuimbijty je jäy ajcxy iñaybejt huidibi muuxy toocp. ¹⁶ Jesús ca' anajty tzocy co pinjaty midigihuipy juydoogy ma Dios ytijc. ¹⁷ Jesús yaj'ixpijcpy anajty je mayjäy, e yminañ:

—Ma Dios y'ayuc necy Dios jadu'n yminañ: “Fich ndijc hue' je' tzajpcapx-capxtac ma tög'óciy jäy ajcxy chooñ ma nidüg'óciy naax cajp ymiingixy Dios ojadajp”, per miich ajcxy hue' yi' mhua'ñ meetzpitijc.

¹⁸ Co ajcxy je teedy mijtungmüdpí etz je escribas nejhuüy nej anajty Jesús ti y'idich jii by ma Dios ytijc, chi ajcxy ooy ijxtaaygixy nej ajcxy jëb yaj'ögipy Jesús. Per ca' ajcxy yhuinmañybaady mic'amy nej yaj'ögipy, tzigüyb ajcxy

müid je mayjäy com je mayjäy ooy tzachjihuiy huinmay jadu'n nej Jesús yaj'ixpíjigixy. ¹⁹ Co oycoodzyñi, chi Jesús ycajppidzimy.

Je higueri ytitzni

²⁰ Je com jabom Jesús müid ydiscípulos ajcxy najxp anajty tim jopyñi ma je higueri anajty ytinäy. E je higueri ti anajty ytitztay mabaad ytictz. ²¹ Huin'it Pedro jäymejtzcooty nej Jesús nimay je higueri, chi Pedro Jesús nimay:

—Huindzin, ix jada higueri huidibi ixiy mgapxpoj, ti yi' ytich.

²² Chi Jesús Pedro nimay:

—Mibic yi Dios. ²³ Janch ich miich ajcxy nimäy, co ixypy pin migapxy jada huingtonbi cop, e nimäy ixypy: “Miich cop pidig, e nicx cidäg mejyoty”, pen ca' ti mijotmetzcüy, e mibicy co jadaanip nej yi' ti ane'my je cop, chi jadu'n ytunüyb yjadüyb. ²⁴ Paady ich miich ajcxy nimäy co tüg'óciy tijaty miich ajcxy mbijctzooyb ma Dios, chi Dios xymöhüipy ajcxy huidibi ti mbijctzoogixy. Pen janch miich ajcxy mibicy co Dios ti xymoogixy ajcxy je huidibi ti mbijctzooyb. ²⁵ Co miich ajcxy mgapxtaaccixy, pen ca' oy m'ity ajcxy müid tüg jäy, huinméxcix yi mmidzip tim jayijp, jigix jëbi Dios Teedy huidib jüby tzajpjoty xyhuinmecxip miich ajcxy ma ti mduñigoogixy. ²⁶ Pen ca' miich ajcxy mhuinmecxy yi mmidzip huidibi ti xymidundigoogixy, ca' miich ajcxy xyhuinmecxa'ñ Dios Teedy huidibi yajpatp tzajpjoty.

Jesús je'ycötújcín

²⁷⁻²⁸ Je huin'it tiempo Jesús müid je' ydiscípulos ajcxy yhuimbijty jim Jerusalén. E co Jesús anajty yhuidity tzajtigoty, chi nijëjty huindzindijc huidibi nigohuajc'ajtp anajty je teedytjic etz escribas ajcxy huidibi nijayduutpi Dios ñecy, nimiiñ ajcxy Jesús, e ymíñañ ajcxy:

—¿Pin cötújcín ti xymöy huidibi ti mduñ ya tzajtigoty? ¿Ma cötújcín ti mbaady co jëb m'ane'my ya tzajtigoty?

²⁹⁻³⁰ Chi Jesús ymíñañ:

—Ich miich ajcxy nañ jadu'n nyaj'amidohuamyb tüg ayuc. E pen mni'adzooyb ajcxy, huin'it ajcxy nyajnimähüipy ma ich ti nbaady yi mic'ajt etz yi cötújcín, co jadu'n nduñich jüby tigoty ma Dios ytjic. ¿Pin yajñibjic Juan, je Bautista, co huen jäy yajñibety? ¿Dios, o naaxhuiñjy? Adzoogich ajcxy.

³¹ Chi ajcxy ytigüy huinmay'ahuidijtpi, ñayñimáayigixy miñ xyipy:

—Pen minaanim co Dios tzajpjotypi ti yajñibicy Juan, chi Jesús xyñimáayimipy: “¿Nej co ca' miich ajcxy mibicy Juan y'ayuc?” ³² Nañ ni ca' jëbi ich ajt minaanim co jäy ajcxy ti quejxy Juan.

Com chigüyb anajty jäy com ñehuiyb anajty ajcxy co Juan je Bautista Dios anajty ytiy'ajt ymüid. ³³ Chi ajcxy Jesús nimay:

—Ca' ich ajcxy nejhuiy pin ti yajñibicy Juan.

Chi Jesús ymíñañ:

—Ich nañ jadu'n ca' nnigapxa'ñich pin ti xycötujcmöyich co jëb nduñich huidibi ndumybich.

12

Je naymidúnipitjic jibicjäybi ajcxy y'ixpejt

¹ Je huin'it xü Jesús jacmigapxy je mayjäy müid jihuimbit ayuc, ymíñañ:

—Ji yajpaady tüg yëdjic huidibi camuuxy ti cojy ma ycam, e ti co'aguemy je camuuxy cam, e yaj'oyüy tüg tang ma huinmicxa'ñ je camuuxy. Nañ jadu'n je yëdjic tüg poch yajpidigy ma ycamuuxy yaj'ixhua'ñ co cuent'aty. Co anajty ti ni'ixidäy ti a'ixidäy, chi ycamuuxy cam yejcy ajuyducy ma nijëjty tumbidijc. Chi chooñ viaje tumbi jigüegy it. ² Je huin'it tiempo co yhuaad'ajtni

je cosechi, chi je cogam quejxy tüg ytumbi jim ma je' ycam yajpaady, co hueen je tumbidijc yéjccixy je cosechi, jadu'n nej anajty ti ycapxytuñ miid je' ajcxy. ³ Chi je cam tumbidijc ajcxy majch je cogam yquexyöyp, chi huinhuojpy jijphuojpy ajcxy. Chi ajcxy quejxhuimbijty jadu'ñyi, ni ti ajcxy camoy. ⁴ Chi je cogam quejxy jadüg ytumbi ma je ycam yajpaady. Chi tumbidijc ajcxy tzaagäch je mimetzpi quexyöyp etz yajzachiy ajcxy ma ycohuajc, chi ajcxy ooy ogy oyñinej. ⁵ Chi je cogam jacquejxy jadüg ytumbi e ajcxy tumbidijc yaj'o'cy je midugigpi quexyöpy. Chi je cogam jac tim quejxy jadyii ytumbi. Chi je tumbidijc ajcxy je cogam ytumbi huinhuojpi jijphuojpi nijëjity, e nijëjity ajcxy yaj'o'cy.

⁶ Je cogam ymiid anajty tügpajc ymang huidibi anajty ooy tzocy jihuüy. Je' oy quejxcogixiy ma je ycam yajpaady. Je cogam huinmay jadu'n co je tumbidijc ajcxy yajmij'adüyb je' ymang. ⁷ Chi je tumbidijc ajcxy ñayñimaayi miñ xyipy: “Jada yëydijc je cogam jada ymang huidibi jë'adaanip je yteedy ypidägy. Tzoc yaj'ó'cim, e jadu'n je cam një'ájtím.” ⁸ E jadu'n ajcxy majch je cogam ymang yaj'ögy ajcxy. Chi ajcxy yajpidzimy camjoty, e jibijptacy agajjixci'py.

⁹ Co Jesús jadu'n miydactay je jihuimbit ayuc, chi ymiinañ:

—¿Ti ytunamyb je cogam miid je tumbidijc ajcxy? Hue' min ci'm ma je' ycam, e yaj'öctähuiipy je tumbidijc ajcxy huidibi tundigoy. E yegipy pijctzoy je' ycam miid huingbi jäy ajcxy.

¹⁰ ¿Nej ca'ni miich ajcxy mgapxy yi Dios ñecy ma jadu'n ymiinañ?

Je yëydijc huidibi je jäy ajcxy ca' anajty tzocy, Dios ti pidägy mij'ane'mbi.

Tim jadu'n nipaady nej tzaa oyjatypi huidibi je pojtzpidijc ca' ajcxy yajtuna'ñ, e je' oy ti yhui'mni ma anajty yjaccopicyity.

¹¹ Jada tung je Huindzin Dios ti tuñ, e ooy oy n'íjxim njäygiidaacim.

¹² E huin'it je judíojäy ajcxy ytungmiidpi ooy jamadzaañ anajty Jesús, com ñejhuüyb anajty ajcxy co Jesús ñigapxyii yi' ajcxy. Com tzigüiyb anajty ajcxy miid je mayjäy, chi ajcxy tim huinyöyducy, chi ñíxcixni.

Yajnidüygixy pen jëbi cogüéjtin yajyecy o pen ca'

¹³ Jac'axam je judíojäy ajcxy ytungmiidpi quejxy ajcxy ma Jesús yajpaady mejtzpicy ixpicytjic. Tügpicy anajty ñaygomájtzigixy miid yi fariseos ajcxy, etz jadügpicy ma je rey Herodes. Hue' anajty ajcxy huinma'ñ ixtaayb nej ajcxy ocxihuipy Jesús. ¹⁴ Jada mejtzpicyi ixpicytjic ñicxy ajcxy ma Jesús, e ymiinañ ajcxy:

—Huindzin, ich ajcxy nejhuüyb co myaj'ixpijcy je tiy'ajt, ca' jäy mdzigiy, com ca' huin'ixpety myaj'ixpicy. Tú'ciy miich mduñ miid mic jäy, miid comeñyjäy, etz miid ayoob jäy. Tudägy jäy ajcxy myaj'ixpicy jadu'n nej huaad ajcxy cuychinaaygixy Dios ytiy'ajt. Nejhuíhuaamybich ajcxy nej miich yaj'ixpijcpy je mayjäy. ¿Nej tundigooyim miid yi Dios ycötújcín co nmigüéjtim César, je romano jäy mij'ane'mbi, o ca'ji? ¿Nej jëb nmigüéjtim, o ca'ji?

¹⁵ Per Jesús ñejhuüyb anajty ajcxy yjibic-huinma'ñ, e chi ajcxy nimay:

—¿Na'amy co miich ajcxy xyjot'ixy xyhuinma'ñ'íxyich? Yajmiingix tüg meeñ jigix n'oc'ixipyich.

¹⁶ Chi ajcxy mimiin tüg meeñ e co Jesús ijxy je meeñ, chi ymiinañ:

—¿Pin y'ahuanax etz pin yxi ijtp ma jada meeñ?

Chi ajcxy y'adzooy:

—Hue' yi' César.

¹⁷ Chi Jesús ymiinañ:

—Mo' je César huidibi yi' yjë'ajtpy, e mo' Dios huidibi Dios yjë'ajtpy.

Chi ajcxy ooy jihuüy huinmay jadu'n nej anajty Jesús ti y'adzooy.

Yajnidiiygixy pen je tibi öccixy jugypigipy jadüg'oc

¹⁸ Je huin'it tiempo nijëjity saduceos ajcxy ymiiñ ma Jesús. Yi saduceos ajcxy ymınaangixy co ca' pin yjugypigañ tibi y'o'ccixy. ¹⁹ Chi je saduceos ajcxy Jesús nimay:

—Huindzin, Moisés jayhui'my je cötújcın co tüg yëydijc y'ögy, e co'ögy yhui'my je ytöxyijc e ca'ni ytöxyijc ung'ixy. Pues copicy je co'ögy ytöxyjäy ypigipy mïid ña'y y'uch yëydijcpi jigix jëbi je töxyjäy y'ung'ixipy huıdibi huı'mıhuıp jadu'n nej codijc cobıdägy ma je yteedy y'ajch ypidägy. ²⁰ Pues jim ma tüg cajp anajty chinäy huıxtujc yëydijc tüg que'x. Je ungoob ypijcy, e chi ix'o'cy ytöxyijc, e ca' ni tüg y'ung yajhui'my. ²¹ Je mımetzpi yëydijc ypijcy mïid je co'ögytöxyjäy, e nañ jadu'n ix'o'cy ytöxyijc e ca' ni tüg ung yajhui'my. E nañ jadu'n je midugıgpi mïid ypijcy je töxyjäy, e nañ jadu'n ix'o'cy je ytöxyijc, e ca' ni tüg y'ung yajhui'my. ²² E jadu'n oytuñyii yjadyii mïid je töxyjäy co ti anajty mïiddzinay'abıdzımdäy je nihuıxtujcpi yëydijc tüg que'xpi. E je nihuıxtujcpi ix'o'cy ajcxy je töxyjäy, e ca' ni tüg y'ung ajcxy yajhui'my. E chi je töxyjäy oy y'öcni. ²³ E co anajty xii tiempo paaty, co anajty Dios yajjugypicy yi tibi ajcxy y'ögy, ¿huıdibi jada' ajcxy nidücti je yëydijc töxyijc'adaanıp je töxyjäy? Com ti ajcxy jadu'n nihuıxtujcpi mïid tzinay'abıdzımgixy.

²⁴ Chi Jesús je saduceos ajcxy nimay:

—Miich ajcxy ca' mhuinjıhuıy je tiy'ajt, com ca' mhuinjıhuıygixy Dios y'ayuc ytiy'ajt, e com ni ca' mnejhuıygixy je mic'ajt huıdibi Dios ymïid. ²⁵ Pues co anajty yjugypıjccixy je jäy tibi y'o'ccixy, chi ca' ajcxy ypiğañ, e nañ jadu'n ni ca' ajcxy ñaymöhııyb y'ung huen pijccixy. Hue' ajcxy yjugy'adaangixy chinähuaangixy jııby tzajpjoty, tim jadu'n nej je ángel ajcxy chinaaygixy yjugy'ajtcixy. ²⁶ Per je tiy'ajt co jäy ajcxy tibi y'o'ccixy yjugypıgaangixy, ¿nej ca'ni mgapxyıni Moisés ytiy'ajt ma anajty Dios ymıgapxyııi co je aay ujtz anajty chachtoy? Chi ymınañ: “İich je' je Dios huıdib Abraham, Isaac etz Jacob yDios'ajtpy.” ²⁷ Com yi Dios ca' yi' yDios'aty ma yi öcpi ajcxy huıdibi y'alma ti ycixy ti ytıgoy. Yi Dios Dios'ajtp yi' ma yi juugypı ajcxy. Paady miich ajcxy ooy mij mduıdıgooygixy co ca' mhuinjıhuıygixy Dios ytiy'ajt.

Je ané'mın huıdibi ooy nıgi ycopıcyıty

²⁸ Nañ jadu'n je huin'it tiempo nimiiñ Jesús tüg escriba. E yi' anajty y'amıdo'ıjtpy co Jesús adzooy je jäy huıdibi ca' mıbıcy co yi öcpi yjugypıgipy ajcxy jadüg'oc. Jada escriba ñejhuııyb co Jesús ooy oy ti y'adzooy je saduceos ajcxy, paady yi' Jesús amıdooyı:

—¿Huıdibi je' Dios y'ané'mın jacmıjpi?

²⁹ Chi Jesús y'adzooy:

—Yi Dios ycötújcın huıdibi jaccopıcyıp, yi' je' huıdibi mınamb: “Mıdoogıx Israel jäy, je Huindzin Dios huıdibi nDios'ajtim, yi' je' ajt nHuindzin Dios tügıpajcpi. ³⁰ Tzoc jıhuı' etz yajmıj'at mHuindzin Dios mïid tüg'ócıy m'aa mıot etz mïid tüg'ócıy m'alma, etz mïid tüg'ócıy mhuınma'ñ, etz mïid tüg'ócıy mmıc'ajt.” Jada je' je jaccopıcyıp ané'mın. ³¹ Je mımetzpi Dios ycötújcın jahueengi tú'cıy ñaybadyii mïid je jayıjpi, yi' huıdibi jadu'n mınamb: “Tzojccıx jıhuıygıx yi mmıgügtıjc tim jadu'n nej mnaychogyııi mnayjıhuıyııi cı'm.” Jada metz Dios ycötújcın jaccopıcyıp jacmıc'ajt mïid ca'ydı jac huıdibi cötújcın.

³² Chi je escriba ymınañ:

—Ooy oy ti m'adzooy. Janch tiy'ajt jadu'n nej miich mına'ñ, co ji yajpaady tügıpajcpi Dios, e ca' ji jadüg Dios mic'ajt mııdpi. ³³ E janch tiy'ajt co copicy nmıjıııdaacım nyajmıj'ajtim Dios cıxyjot huıııjot mïid tüg'ócıy ajt nhuınma'ñ, mïid tüg'ócıy ajt n'alma, etz mïid tüg'ócıy ajt nmıc'ajt. E copıcyı

ndzójcim njihuiyim nmigügtjc tim jadu'n nej naychójcim nayjihuiyim ci'm. Jactzoobatp jada ca'ydi co tüg'óciy yi huindzig'iñ huidibi anajty yajno'cpi miid Dios ycixpi.

³⁴ Co Jesús ijxy jadu'n nej je escriba tıydudägy anajty ti y'adzoyii, chi ymınañ:

—Jahuenjaty miich mmıbıjcin ytıgoy'ıtyñi jaydëb mdıgıhuıpy ma Dios y'ane'my.

Co Jesús anajty jadu'n ti y'adzooy je escriba, chi ca' jac pın ti ayuc yjacaj'amıdoohui.

¿Pın je' y'ung je Cristo?

³⁵ Jesús yaj'ixpijcpy anajty je mayjäy jıiby ma Dios ytıjc, e ymınañ:

—¿Na'amy co yi escribas ajcxy ymınaangıxy co Cristo hue' je' David y'ap y'oc? ³⁶ Com je Espıritu Santo ymoy David jada ayuc huidibi jaybety ma je Salmo necy ma jadu'n ymınañ:

Yi Huindzin Dios nımay ıch nHuindzin: “İña' ya a'oy'amy ma ıch nmıjc, ıxtı cooni anajty miich mmıdzip ti nmımadactäyıch, jadu'n nıpaadıpy nej jıhuıy ti nbıdägyıch miich mmıdzip jadu'n nej tüg tinaybejt.”

³⁷ ¿Per nej co yjadu'nıty co jäy ajcxy ymınaangıxy co je Cristo David je' y'ap y'oc? ¿E David ci'm ymınañ co je Cristo yi' yHuindzin'ajtpy?

Jotcuyc anajty je mayjäy amıdoo'ıjti Jesús y'ayuc.

Jesús ca'p jäygidaci leyhuindzin ajcxy yhuınma'ñ

³⁸ Jesús yaj'ixpijcpy anajty je mayjäy, e ymınañ:

—Naycuend'ájıgıx miid yi escribas ajcxy. Com yi escribas ajcxy ooy jotcuyc co nayxójıgıxy miid yhuıt oyjatypı yoñjatypı. Ooy ajcxy tzocy co yajcapxpócxııpy huindzig'iñ'amy mayjäyduum. ³⁹ Yi escribas ooy ajcxy tzójccıxy yi cödumbı iñaybejt ma je naymujctac, etz ooy ajcxy tzójccıxy iñaybejt ma yi cömaybı jäy iñay ma jäy ajcxy yxııduñ. ⁴⁰ Yi escribas ajcxy yajcıjxtaayıpy yi co'ögy ytöxyjäy ypidägy miid ajcxy y'adzójcin. Yi' ajcxy ooy túngıxy jecy tzajpcapxycapxıı jıgıx ajcxy capxpaady idıpy. Dios nıgı tzaachytunıpy yi escribas ajcxy miid ypocy ycıxpi, ca'ydi jac ni pın.

Je ayoobı töxyjäy y'ofrendı

⁴¹ Tüg xıı anajty Jesús iñay jıiby tıgoty ma Dios ytıjc. İñaayb anajty ma je limosna caja huıduu. Jesús yhuındıcxyp anajty je jäy ajcxy huidibi meeñ pıdaaccıxp ma je ofrenda caja. E maycomeeñyjäy ooy ymeeñ pıdaaccıxy janch may. ⁴² Tım huın'ıtıy yja'ty tüg co'ögy töxyjäy janch ayoob pıdacy metz pı'c meeñyhuäcxy, huidibi ca' ooy choobaady. ⁴³ Chi Jesús huoomujcy je' ydiscıpuıos, e nımay ajcxy:

—Janch tıy'ajt jadu'n nımaaygıxy co jada co'ögy ytöxyjäy ayoob jac'anaxy jada ti pidägy ofrenda, ca'ydi jac ni pın. ⁴⁴ Tüg'óciy comeeñydıjc ajcxy ypidacpy ma y'ofrenda yi meeñ huidibi yajconajxyp. Jadayaabi co'ögytöxyjäy ti pıdacy tüg'óciy huidibi anajty ymıd, je meeñ tüg'óciy huidibi anajty ñıgayamy yi' ymooyb Dios.

Jesús ymına'ñ co Dios ytıjc yhuındıgooyıpy

13

¹ Co Jesús ypidzımy ma Dios ytıjc, chi nidügtı ydiscıpuıos ñımayı:

—Huındzin, ıx jada maychaa mıjıjatypı etz jada maybı tıjc ooy y'oy'oydúñıty.

² Per Jesús y'adzooy, ymınañ:

—Huindicx miich ajcxy jada maybi mijjaty ytjic. Minip tiempo mina tüg'óciy jada tjc nicxy yhui'my taj xit, ca' ma tzaa macxy. Huindigoydähuiip tüg'óciy.

Je t'ajt ma ca'ni naaxhuiñybi ycixa'ñi ytigoya'ñi

³ Jesús m'ad d ydiscípulos ajcxy ñicxy ma je cop huidibi xijip Olivos. Jim ajcxy co'ijxnaxy je Dios ytjic. Ñaayb anajty Jesús jim copcíxy co Pedro, Jacob, Juan etz Andrés ameech migapxy Jesús, ym'inaangixy:

⁴ —Tun may'ajt ñich ajcxy yajni maayg mina jada ytuna'ñyii yjada'ñyii co huindigoydähuiip Jerusalén cajp. ¿Ti ijxpejt'adam co anajty jadayaabi jadu'n ytuna'ñyii yjada'ñyii?

⁵ Chi Jesús y'adzooy ajcxy je' ydiscípulos ym'inañ:

—Ix pinjaty xyhuin'ñingixy. ⁶ Ooy jäy may ymiinañ m'ad ñich nxii. Ñaydijáangixy co je' ajcxy je' je Cristo, ym'ina'na'ñ ajcxy: “Ñich je' je Cristo.” E ooy jäy may huin'ñinaangixy.

⁷ Co miich ajcxy ayuc mmidohuipy co jäy chachchiptúngixy xii ya, ca' mdzig'iygixip, com ooy ycopícyity co jada jadu'n jayip ytun'iyb yjad'iyb. Ca' nan hue' je' anajty tim cijxp tim tigooyb je xii je tiempo. ⁸ Nayñibidig'ib tüg naax cajp m'ad huingbi naax cajp, e gobierno m'ad huingbi gobierno. E minipy mic uyx canaag'it etz mij yuu mijpa'm xii ya. E jäy ajcxy ooy yhuänipy yjihuihuipy ycanaymijotcuyc'ájtigixipy. Jada tzaachypi ayo'n tzondacni yi' anajty.

⁹ Chi Jesús yjacm'inañ:

—Nayguend'ájtigix miich ajcxy, com yi' mmidzip ajcxy xymájtzcixip, e xyc'iyéjccixip ma tungm'iddpidijc, e xychachytúngixip xyhuópcixip ma yi' judío jäy ñaymujctac ajcxy. Xyajnicxcixip mach ma rey etz ma gobernador ajcxy yhuinduu m'ad ñich ycixpi com miich ajcxy xymibicyich. E miich ajcxy t'ajt myegipy m'ad ñich ycixpi, ixti ma rey ajcxy etz ma gobernador ajcxy yhuinduu. ¹⁰ Ca' anajty xii tiempo paady mina ycixa'ñ naaxhuiñybi, chi ajcxy capxhuäcxtähuiipy ñich n'ayuc huindu'myb ñaaxhuiñ ma tüg'óciy naax cajp. ¹¹ Co jäy ajcxy xyajnicxip mach ma codungdijc co xyt'ydúngixipy, chi ca' ni nej m'jot'ad'iyb, ni ca' mhuinmayipy nej m'adzógixipy. Mgápxcixipy je ayuc huidibi Dios xymóoygixipy, com je ayuc huidibi mgápxcixip, ca' nan miich je' anajty ajcxy m'ayuc. Hue' je' je Espíritu Santo xymóoygixipy capxy ayuc. ¹² Yéydijc ajcxy yc'iyegamyb ma tungm'iddpi yci'm y'uch ajcxy co huen yaj'ögyii. E ñañ jadu'n je ungedeedy yc'iyegamy yci'm y'ung ajcxy ma tungm'iddpi. Nañ jadu'n yi' y'ung ajcxy c'iyegipy yci'mdeedy co huen yaj'ögyii. ¹³ May naaxhuiñjäy ca' xychogipy xyjihuihuipy miich ajcxy m'ad ñich ycixpi. Pen miich ajcxy mmictinaayb ma mmib'ijcin, ypaadip miich ajcxy m'alma n'idzoocin.

¹⁴ Chi Jesús yjacm'inañ:

—Co anajty m'ijxcixy je huidibi Daniel ñimiydac jecy'ajty, co pinjaty jibic-huinma'ñ tumb ma ca' ypadyii ma Dios ytjic, huidibi ooy ycodzig'ijity. Miich ajcxy huidibi tzinaayb jim Judea, co jadu'n m'ijxcixipy, chi nicx mgueect-zoocix ma tungop. ¹⁵ Yi' jäy ajcxy huidibi yajpatp ma ytjicnicxy ca' ñicxity tigoty ma ytjic. E ni ti jibiy cayajpidzimipy. ¹⁶ Yi' jäy ajcxy huidibi yajpatp camjoty, ca' ajcxy nihuimbidity je' yjocxy huit huidibi ym'ad. ¹⁷ Huin'it xii huin'it tiempo ayo'n pada'ñ je töxyjäy huidibi anajty ti y'ungtzim'igy, e ñañ jadu'n yi' ajcxy huidib m'ad y'ung ma'xung yajtzitzp. ¹⁸ May'ajt ajcxy mbijctzoohuipy ma Dios, co jada jadu'mbi ayo'n ca' ytun'iyb yjad'iyb ma

anajty ytich tiempity. ¹⁹ Yi jadu'mbi xii tiempo jäy ajcxy ayo'n tzaachypi minaxipy yajnaxipy. Ni caminaaxii jäy jadu'n tzaachypi mijcajee ti minaxy ti yajnaxy maabi Dios cojy naaxhuiñybi oga'n, ixti chambaad. E caminaaxii jadüg'oc ycajadıyb jadu'n. ²⁰ Pen ca' Dios capx'aduga'n yjiibi ayo'n xii ayo'n tiempo, ca' ni pin chögipy. Per Dios ycapx'adugamyb yjiibi ayo'n tiempo mid je mibijcpıdıjc ycıxpi huıdıbi Dios ti huin'ixy.

²¹ Co yi jadu'mbi xii tiempo anajty ymiin, ca' mmıbigıpy, pen ji pinjaty xyñımaaygıxy: "Ijxcıx, cha yajpaady je Cristo", o "jim'amy yajpaady je Cristo." Ca' mmıbıjccıxıpy jäy y'ayuc. ²² Minıp jäy ajcxy huıdıbi ñayajnaxáanıgıxy nej Cristo, e ymınáangıxıpy co capxhuácxı ajcxy Dios y'ayuc, e ca' yjánchıty. Ytunıpy ajcxy mij huinma'n etz mijpi ijxpejt, ixti jahuin'ına'n je mayjäy ajcxy huıdıbi Dios ti yhuin'ixy. ²³ Nayquend'ájtıgıx mid yi jadu'mbi jäy ajcxy, com jayıjp ıch miıch ajcxy yi' ti nyajmıdmıydägy.

Nej jada' je Dios y'ung ymınıpy jadüg'oc

²⁴ Chi Jesús yjacmınañ:

—Co anajty yi jadu'mbi ayo'n tiempo ti ñaxy, ycoodzıhua'n etz je po' ca' y'ana'n. ²⁵ Maymadza' ycáhuıp, e nañ yücıxıp huıdıjaty mıc'ajt mid tzajpjoty. ²⁶ Je huin'ıt xii je huin'ıt tiempo co jadu'n anajty ytunyıı yjadyıı, huin'ıt ajcxy m'ıxıpy, ıch je jäy huıdıbi tzoön tzajpjoty, co ıch anajty nmııñıch jocjoty mid tüg'ócıy nmıc'ajt n'oy'ajtıch. ²⁷ Co jadu'n anajty nmııñıch, chi mıc'amy nguexıpyıch ıch n'ángeles ajcxy ma xii ypidzımy, ma xii ycıdägy, ma jimboj ypidzımy etz ma tıchpoj ypidzımy. N'ángeles ajcxy yajmuga'n tüg'ócıy ıch njäy, huıdıbi ti nhuin'ıxyıch, xım yam ma ajcxy yajpaady ya naaxhuiñ, etz jııby tzajpjoty.

²⁸ Chi Jesús yjacmınañ:

—Jeb miıch ajcxy tıy'ajt mbıgıpy ma yi hıgueri jadu'n nej je xii je tiempo mımı cıdaacni. Co je hıgueri jadüg'oc ñıhuamıy, chi miıch ajcxy mnejhuıy co ti yhuıgonı mına ypottıgıyñı. ²⁹ Nañ tım jadu'n co m'ıxıpy tunııyb yjadııyb tüg'ócıy ijxpejt nej ti nmımaaygıxy, chi mnejhuıhuıp co ti yhuıgonı je tiempo mına nhuımbıdıpyıch jadüg'oc ya naaxhuiñybi. ³⁰ Janch ıch miıch ajcxy nmıy co jada huıdıbi ti nmııydacyıch tunııb jadııb ca'ni anajty y'öctay je jäy ajcxy huıdıbi jacjugy'ajtp jadachambı xii jadachambı tiempo. ³¹ Je tzajp etz je naaxhuiñybi cıxıpy tıgoyıpy. ıch n'ayuc huıdıbi ngapxyıch, ca' ycıxıpy ytıgoyıpy ni camınaxıı. ³² Ca' ni pin nejhuıy je xii je tiempo mına ytuna'ñyıı yjada'ñyıı jadu'n nej ti ıch miıch ajcxy nmımaaygıxy. Ni je ángeles ajcxy jııby tzajpjoty ca' nejhuııygıxy, nañ ni ıch, Dios y'ung', ca' nejhuıyıch. Jeyı Dios Teedy tügpajc nejhuıy.

³³ Ni'ixı' ahııjxcıx. Mıbjctzoogıx Dios jabom jabom, com ca' mnejhuııygıxy mına anajty ytuna'ñyıı yjada'ñyıı yi huıdıbi ti nyajnmımaaygıxy. ³⁴ Yi xii yi tiempo huıdıbi mınp jadu'n nıpaady nej tüg comeeñyjäy huıdıbi ñıcxa'n ma tüg ıt lugar huıdıbi jıgüegy yajpatp. Jayıjp ca'ni anajty choon, chi yajnıbjcy je ytumbı ajcxy nidüg nidüg je' ytung. E nmıy je' ytumbı huıdıbi cuend'ajtp je tıjc'aguu co huen ni'ixı' y'ıdıpy ma tıjc'aguu. ³⁵ Ni'ixı' m'ıdıpy miıch ajcxy. Com ca' mnejhuııygıxy mına je codıjc yhuımbıda'n ma ytıjc, pen namgodzıy, o mıj coodz, o moñı, o ma anajty ti yxımııyñı. ³⁶ Ca' jıcyıty co yjadıpy tımetııni, e xyajyöybıjtcıxıpy anajty mdzachmaagıxy. ³⁷ Yi huıdıbi ıch miıch ajcxy ti nyajnmımaaygıxy, nañ jadu'n nmıyıch tüg'ócıy jäy co huen ajcxy nidüg'ócıy ahııjxcıxıp ni'ixı' je xii je tiempo mına nhuımbıdıpyıch jadüg'oc ya naaxhuiñ.

14

Xicmujccixy capxmujccixy co Jesús madzaangixy

¹ Tigoy'ijtni anajty mejtz xii co judíoJay ajcxy nixiiduna'nñ je pascua xii, mina ajcxy tzajcaagy cay huidibi ca' levadura miiidity. Je judío teedy ajcxy huidibi jacmijtungmiiid etz je escribas ajcxy huinma'nñixtaaygixy nej jëb ameech májtzciixipy Jesús, e yaj'ögaangixy, ca'ydi je mayjäy nejhuüy. ² Chi ajcxy ñayñimayi miñ xyipy:

—Ca' y'óyity co nmájtzim Jesús xiiyoty. Com ca' yjécyity co je mayjäy yjotmätcottähuipy, e ytiñhuip huambi jihuüyb ajcxy.

Tüg töxyjäy pidacy aceite ma Jesús ycohuajc

³ E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huidibi anajty ymiiid nibüdz pa'm. Jesús iñaayb anajty ma caydac co ymiiñ tüg töxyjäy miiid tüg tzaadüdz quiiig ujtz miiid perfume huidibi ooy oy yxuugy. Jada perfume ooy anajty chóohuüty. Chi je töxyjäy yaj'ahuäch je quiiig, e yajcöyogiy Jesús je perfume huidibi ooy oy yxuugy. ⁴ E nijéjity jäy ajcxy huidibi anajty jim, ca' anajty ajcxy yjotcújcity miiid huidibi je töxyjäy ti tuñ, e ñayñimayi ajcxy miñ xyipy:

—¿Nej jada co ocyaj'ayooni yi perfume huidibi ooy oy yxuugy? ⁵ Jac'oy co ixyipy yajtoogy yi perfume tugiiig migo'px peexy, jigix yajpubedipy ayoohtijc.

E ca' jadu'n ajcxy tim jäygidacy nej je töxyjäy ytuuñ miiid Jesús, chi ix'ojy ajcxy je töxyjäy ayooob.

⁶ Chi Jesús yminañ:

—Ixmajtzciix jada töxyjäy. ¿Nej co m'amayiygixy? Yi huidibi ti tuñ miiid iich, ooy yi' y'óyity. ⁷ Je ayoohtijc ca' ytigoy'idipy ma miich ajcxy nimina. Huen huidibi xii huen huidibi tiempo jëb mbubedip ajcxy ayoohtijc. Per iich ca' n'ida'nñich ya jecy miiid miich ajcxy. ⁸ Jada töxyjäy ti tuñ miiid iich jadu'n nej ti ymadägy. Yi' ti pidägy ma iich nninicx perfume huidibi ooy oy yxuugy. Yi' jijp'ixpy mina naaxtigihua'nñich. ⁹ Janch iich miich ajcxy nimaaygixy co huen yma'amyity ya naaxhuiñ ma anajty yaj'ihuächy yajcapxhuächy jada ayuc jada tiy'ajt huidibi nidzoocin miiid, yajnimiydägipy huidi jada töxyjäy ti tuñ, jigix capxpaady y'idipy.

Judas cïyecy yi Jesús ma ymidzip

¹⁰ Huin'it tiempo je Judas Iscariote, nidüg je nimajmetzpi huidibi Jesús anajty ti huin'ixy, oy miiid ñaygapxyii je teedy mijtungmiiidpi nej jëb cïyeycy Jesús ma yi teedy ajcxy. ¹¹ Co je teedy mijtungmiiidpi ajcxy jadu'n midoy, co je Judas cïyega'nñ Jesús ma yi' ajcxy, chi ajcxy ooy yjotcugiiy. Chi ajcxy Judas meeñ yajhuinhuaniiy. Chi Judas yhuinma'nñixtay nej jëb occïyecy Jesús ma yi' ajcxy.

Co Jesús y'adzu'ajty pascua xiiyoty

¹² Chi paty je mij xii mina je xii'ajtpidijc tzajcaagy cay huidibi ca'p levadura miiidity, e yaj'öccixy je cöbixy huidibi ajcxy yajhuindzigiiyb anajty Dios. Chi ydiscípulos ajcxy y'amidooy Jesús:

—¿Ma'amy mdzocy co ni'ixiiyim je pascua xii adzu'ajtin?

¹³ Chi Jesús quejxy metz ydiscípulos ajcxy cajpjoty, chi nimay:

—Jim miiid mnaybadiiyb tüg yëydijc huidibi nii tzimnicxp ma tüg majt. Miich ajcxy mbanicxiiyb je yëydijc. ¹⁴ Mbanicxipy ajcxy je yëydijc, ixti coon mbajädipy ma ytijc. E miich ajcxy mnimähuiipy je codijc: “Je Huindzin Jesús ñejhuñhuam ma miich miiidity tüg cuarto ma je Huindzin Jesús miiid ydiscípulos ajcxy jëb caaygixy yi pascua xii adzu'ajtin.” ¹⁵ Je codijc ci'm xyajni'ixiiygixyipy

tüg cuarto mijpi ma je mîmetz piso huidibi ti yajni'ixîy. Ma yijîmbi cuarto miich ajcxy mni'ixîhuipy yi pascua xî adzu'ájtîn.

¹⁶ Chi je metz Jesús ydiscípulos ajcxy tüyöychooñ. Co ajcxy yja'ty cajpjoty, chi ajcxy paty je cuarto, tim jadu'n nej Jesús jayîjp ymînañ. E jim ajcxy ni'ixîy je pascua xî adzu'îbi.

¹⁷ Nam coodzîyîni anajty co Jesús yja'ty ma je cuarto mîid jacjadyii ydiscípulos ajcxy. ¹⁸ Co anajty jim ycaaygîxy ma je caydac, chi Jesús ymînañ:

—Janch îch miich ajcxy nimay co nidüg miich ajcxy huidibi cham caayb mîid îch, xycîyegaambich ma nmîdzîpich.

¹⁹ Co je Jesús ydiscípulos jadu'n midooy, chi ooy ytigîy tajpi maybi ajcxy, e ñay'amîdóohuigîxy miñ xyipy, e tüg ymînañ:

—¿Nej îch jada'ji?

E jadüg ymînañ:

—¿Nej îch jada'ji?

²⁰ Chi Jesús ymînañ:

—Yî' yi' nidügti yi nimajmetzp huidibi tocxmujcp mîd îch ma tügpi texy.

²¹ Pues janch îch je', je jây huidibi tsoon tzajpjoty, nbadaamybich tzaachypî ayo'n jadu'n nej yjaybétyity ma yi Dios ñecy. Per mij ayo'n pada'ñ je jây huidibi xycîyegaamich ma îch nmîdzîp. Jac'oy co ca' ycadîmma'xung'ajty jada yéydîjc.

²² Caayb ajcxy anajty, co Jesús conîgy tüg tzajcaagy, e jayîjp yajnajx Dioscojuyip ma Dios, e chi tujc-huäcxy je tzajcaagy, moy je' ydiscípulos ajcxy. E co Jesús jadu'n tuñ, chi ymînañ:

—Caaygîx jada tzajcaagy. Jada tzajcaagy îch jada nnîncx.

²³ Chi Jesús conîgy je ügy vaso, e co Dioscojuyip yajnajxy, chi moyday ajcxy je ügy, e nidüg'ócîy ajcxy uucy je ügy. ²⁴ Chi Jesús ymînañ:

—Jada ügy îch nni'py'ajtpy huidibi temamb yogamb. Je' jada jemybi Dios ycötûjcîn huidibi Dios yejc mîid jây ajcxy ycîxpî. ²⁵ Janch tîy'ajt jadu'n nej îch miich ajcxy nîmaaygîxy, co ca' jadüg'oc n'ûga'ñîch vino nîi, îxtî coonî anajty njädyîch tzajpjoty ma yi Dios y'ane'my.

Jesús capxpîdzîmy co Pedro ymîna'na'ñ co ca' y'ixy'adyii

²⁶ E co Jesús etz ydiscípulos ajcxy îy tüg himno, chi ñîcxy ajcxy ma je cop huidibi xîjîp Olivos. ²⁷ Chi Jesús ymînañ:

—Cham coodz xycöguëgaambich miich ajcxy, com jaybety jadu'n ma Dios ñecy ma jadu'n ymînañ: “Nyaj'ôgaamybich je cöbîxy cuend'ajtpî, e huin'it je cöbîxy queeg-huäcxtâhuip.” ²⁸ Per co îch anajty njugypîcyîch jadüg'oc, co îch anajty ti n'ögyîch, nîcxîbîch jim Galilea jacjayîjp, ca'ydi miich ajcxy.

²⁹ Chi Pedro Jesús nîmaayî:

—Oy îxyipy yi jacjadyii miich mdiscípulos ajcxy xycöguectây, per îch ca' miich ngöguëga'ñ.

³⁰ Per Jesús nimay Pedro:

—Janch tîy'ajt jadu'n nej yam nîmäy, jadachambi coodz ma ca'nî anajty tzeyyaxîgy mejtz'oc miich xycoyüdz'a'ñîch tugîg'oc, mîna'na'ñ co miich ca' xy'ixy'adyiîjîch.

³¹ E Pedro ca' anajty cöbîga'ñ nej Jesús ymînañ, chi mîctägy mînañ:

—Ca' îch miich ngoyüdz'a'ñ, oy îxyipy ndîm'o'cîch quipxy mîd miich.

E nañ actîm jadu'n jacjadyii Jesús ydiscípulos ajcxy ymînañ nej Pedro ti ymînañ.

Jesús mîbîjctzoy Dios jim Getsemanî

³² Jesús miid ydiscípulos ajcxy oyja'ty ma tüg it huídibi xíjip Getsemaní, chi Jesús je ydiscípulos ajcxy nimay:

—Íña' miich ajcxy ya, nami n'ocnicxyich jim'amy Dios mibijctzoob.

³³ Chi Jesús miid nicxy jëda'ajty Pedro, Jacobo etz Juan ma tüg it ahuingujc. Chi Jesús ytigüy tajpi maybi jihuüy jotmay. ³⁴ Chi Jesús yminañ:

—Njihuüybich tüg jotmay nej n'öga'ñich. Huí'ngix miich ajcxy ya etz juugy m'íjtcixipy, ca' mmáagixipy.

³⁵ Chi Jesús ñicxy jac'amijci'm, Dios mibijctzoy, e may'ajt pijctzoy co ixipy ca' minaxy yajnaxy je tzaachypi huídi anajty ypadamy je huin'it hora. ³⁶ E Jesús anajty Dios mibijctzoy yminañ:

—Dios, miid miich ca' ni ti chípiy. Píjicigich jadayaabi tzaachypi ayo'n, per ca' yjadú'nity nej ñch ndzójcin, huen tuñyíi jadu'n nej miich mdzójcin.

³⁷ Co Jesús nihuimbijty Pedro, Juan, etz Jacobo, chi oy ajcxy paady ti anajty ymi'ó'ccixy. Chi Jesús Pedro nimay:

—Simón, ¿nej ti mmi'ögy? ¿Nej ca' mmadäga'ñ m'idipy juugy tüg hora?

³⁸ Jugy'íjtcix, e mibijctzoogix Dios ca'ydi jibictuuyb mdigüygixy. Janch tiy'ajt co jotjoty ooy mnijot'ájtciy mdunaangixy yi oybi. Per yi mninix oy amaayty.

³⁹ Chi Jesús jadüg'oc huinhuäctuity je' ydiscípulos ajcxy, e jadüg'oc ñicxy Dios mibijctzoob. May'ajt pijctzoy tim jadu'n nej je jayijp'atypí anajty ti yminañ. ⁴⁰ Chi Jesús yhuimbijty ma anajty ajcxy ydiscípulos yajpaady, e jadüg'oc oy pátcixy ti anajty ymi'öccixy, com ca' ajcxy mimadägy máhuüi, e ni ca' ajcxy jayty nej adzohuüpy Jesús. ⁴¹ Midugüig'oc Jesús ñicxy ma je' ydiscípulos ajcxy, e yminañ:

—¿Nej ya mjacmáagixp mjacpooxcixp? Maagix pooxcix jadachambi. Ti miid jadu'nyí. Ti je tiempo huaad'ájtñi mina ñch, je jäy huídibi tzoön tzajpjoty, xycüyegüpy ajcxy ma yi jibic jäydijc. ⁴² Maybidügcix, tzoc jámim. Chi ymiñ je jäy huídibi xycüyegaambich ma nmídzípich.

Mach ajcxy Jesús yajnicxixy

⁴³ Capxp anajty Jesús, co Judas oyjäty ma Jesús yajpaady. Judas hue' je' nidügti je majmetzpi huídibi Jesús yhuin'ijx. Judas miid miñ mayjäy huídibi ajcxy miid pujx etz quipy. Je teedy mïjtungmïdpi, je escribas ajcxy, etz je mïjjäydijc ajcxy ti anajty quexy je mayjäy huídibi anajty madzamb Jesús. ⁴⁴ Judas, je huídibi anajty cüyegamb Jesús, hue' anajty jayijp ti moy je mayjäy tüg ijxpejt huídibi miid jëb ajcxy ijxcabip Jesús. Jadu'n jayijp Judas ycapxytuñ miid yi' ajcxy, e yminañ:

—Je jäy huídibi anajty ndzücxypich, yi' je' anajty Jesús. Madzipy ajcxy, e myajnicxip miich ajcxy yajxon cuend'aty.

⁴⁵ Mïc'amy co Judas oyjädy ma Jesús yajpaady, chi nimijhua'cy, e nimay:

—Huindzin, Huindzin.

E co jadu'n yminañ, chi Judas Jesús tzüxcy. ⁴⁶ Chi mïc'amy je mayjäy Jesús mach, e yajnicxy ajcxy mach.

⁴⁷ Per nidügti Jesús ydiscípulos juudy ypujxy ma ytijc, chi je teedy mïjtungmïdpi tüg ytumbi yajtzaachüyi, quejtzpujxi tüg ytätzac. ⁴⁸ Chi Jesús je mayjäy nimay:

—¿Ti co miich ajcxy xyñimiñich miid pujx etz quipy, jadu'n nej jihuüy ñch tüg meetzpi? ⁴⁹ Jabom jabom nyaj'ixpijcyich jäy jüby ma Dios ytijc ma miich ajcxy myajpaady, e ni ca' miich ajcxy xymajchich. Paady jadu'n ytunyüi yjadyüi jigix yi' yajcuydumb nej ity jaybety ma Dios ñecy.

⁵⁰ Chi je' ydiscípulos ajcxy yajhuí'my Jesús naydügpajc. Chi je' ajcxy yqueegy.

Je jäy mutz'anägnip huídibi quectzög

⁵¹ Per tüg yujcyeeg anäg huídibi anajty payöy Jesús nímóchity anajty müd tüg sávana. Chi Jesús ymidzip ajcxy majch je yujcyeegpi. ⁵² Chi je yujcyeegpi cíqueegtuty je mayjäy, yajhui'my ysábana, e yquectzögy nihuädz ixhuädz.

Jesús mij juntajoty

⁵³ Chi ajcxy yajnicxy Jesús mach ma je teedy mǎitungmǎidpi yajpaady. Chi mic'amy ñaymujci tüg'óciy teedy ajcxy huídibi mǎitungmǎidp, e tüg'óciy mijjäydijc, etz tüg'óciy escribas ajcxy. ⁵⁴ Chi Pedro jiguëgy anajty panicxy je mayjäy ajcxy ixti oy yja'ty ma je teedy mǎitungmǎidpi ytíba'. E jim ixtacy quipxy müd policia ajcxy agujc, yxaamgixy anajty ma jǎnba'.

⁵⁵ Je teedy ajcxy mǎitungmǎidpi etz tüg'óciy je judíojäy ytungmǎidpi ajcxy yhuinma'ñ'ixtaaygixy nej ajcxy jëb Jesús yajpocyc'a müd ajcxy yxíhuin, e jadu'n jëb mooygixy yi ócin. Per ca' ajcxy paady huinma'ñ. ⁵⁶ Mayjäy nihuambejty Jesús müd anii, e ca' ajcxy y'ayuc ytügíy. ⁵⁷ Nijëjity jäy ytínayígy juntajoty, e nihuambety ajcxy Jesús, ymínaangixy:

⁵⁸ —Ich ajcxy amido'ijt Jesús y'ayuc tüg tecz, co jadu'n ymínañ: “Njidaamybich jada Dios ytijc huídibi jäy ti cójciy, e codugüig xii gojtigadzipich huingbi huídibi ca' jäy cojy.”

⁵⁹ Per ni ca' ytügiy ajcxy y'ayuc nej ajcxy Jesús nihuambejty, ac tigachjaty nidüg nidüg ymínañ ajcxy.

⁶⁰ Chi je teedy huídibi je jacmǎitungmǎid ytínayígy juntajoty, chi y'amidooy Jesús e nimay:

—Jesús, ¿ca' nej m'adzohua'ñiy? ¿Ca' mmidooy nej xychachxígixy?

⁶¹ Per Jesús amon y'ijty. Ca' ti ayuc adzohuimbijty. Chi je teedy jadüg'oc migapxy Jesús nimay:

—¿Nej miich je' je Cristo, je Dios y'ung?

⁶² Chi Jesús ymínañ:

—Janch jadu'n, ich je' je Cristo, je jäy huídibi tsoon tzajpjoty, e miich ajcxy xy'ixipich iñäyich ma je mijpi Dios ymijc a'oy'amy. Nañ jadu'n xy'ixipyich miich ajcxy jocjoty co anajty nhuimbityich jadüg'oc ya naaxhuñ.

⁶³ Chi je teedy huindzech huinhuocy yci'm yhuit, je' je' tiy'ájtíp co ca' anajty yjotcújcity müd Jesús y'ayuc, chi ymínañ:

—¿Ti testigo njac-huaanim? ⁶⁴ Miich ajcxy ci'm ti mmidoogixy yi' y'ayuc, jadu'n nej ycapxtigoy müd Dios. ¿Nej miich ajcxy mínaangixy?

Chi nidüg'óciy ajcxy ymínañ co janch jadu'n Jesús mij oy ti ycapxtigoy müd Dios ytiy'ajt, paady huaad mooygixy yi ócin.

⁶⁵ Chi nijëjity jäy yhuindzujígy Jesús. Chi ajcxy huingoxodziy, cójciy, e chi ajcxy nimay:

—Octiygapx. ¿Pin ti xycojxy?

E je policiatijc ajcxy cojxy Jesús ma yhuñyijp.

Pedro ycoyüch Jesús

⁶⁶ Pedro tibäy anajty y'ahuixy. Chi ñimijhuäci tüg tumbi töxyjäybi huídibi anajty tumb ma je teedy ytijc. ⁶⁷ Co je töxyjäy ijxpaty Pedro iñäy anajty jǎnba'áy, yxaamb anajty. Chi huindicxpejty Pedro, e nimay:

—Miich nañ müdhuídijtpy anajty je Jesús yi Nazaretpi.

⁶⁸ Per Pedro ca' cöbijcy je töxyjäy y'ayuc, e ymínañ:

—Ca' n'ixy'adyiijich jada Jesús. Ni ca' nhuinjihuñyich ti miich nimiydacpy.

E mic'amy Pedro ypidzimy jiiiby, e tim huin'ítiy tüg tzeyñi'aa oy yaaxígy.

⁶⁹ Chi jadüg'oc je tumbi töxyjäybi huindicxpejty Pedro, e nimay je jäy ajcxy huídibi jim yajpatp huingon, e ymínañ:

—Jada je' nidügti huïdi anajty müd huïdity Jesús.

⁷⁰ Chi Pedro jadüg'oc ymïnañ co ca' ix'adyii. Co hueeñi, je jäy ajcxy jadüg'oc Pedro nimay:

—Janch co miich je' nidügti ma Jesús yjäy miñ, Galileo jäy miich, com nmïdooybich miich m'ayuc nej Galileo jäy ycápxcixy.

⁷¹ Co ajcxy jadu'n ymïnañ, chi Pedro mictägy ñaygogapxi co ca' yï müdhuidity Jesús, ymïnañ:

—Dios y'ijxpy ñejhuiyb co tiy'ajt ngapxyich, co ca' n'ixy'adyiijich yï Jesús huïdibi miich ajcxy mnigapxyp.

⁷² Co Pedro ycapxymaayi tim huin'itiy tüg tzeyñi'aa yaaxïgy mïmejtz'ocpi. Huin'it Pedro jäymetzcoody nej Jesús ñimäyii: “Cham coodz jayijp ca'ni anajty tzeyñi'aa yaaxïgy metz'oc, ti anajty miich mïna'ñ tugüg'oc co ca' xy'ix'adyiijich.” Co Pedro jadu'n jäymejtzcoody Jesús y'ayuc, chi tajy may ñayjihuiyi, e ytigïy yaaxpi.

15

Jesús ma Pilato yhuinduu

¹ Co yximïy, chi je teedy ajcxy huïdibi mij tung müd, je mijjäydijc, je escribas ajcxy, etz tüg'ócïy judíojäy huïdibi mij tung müd yöymujctay ajcxy. Chi nidüg'ócïy ajcxy yajñíxcixy Jesús cïxoch ma Pilato, je gobernador. ² Pilato Jesús y'amïdooy, nimay:

—¿Nej miich rey'ajtp ma yï judíojäy ajcxyi?

Chi Jesús ymïnañ:

—Miich jadu'n mïnamb.

³ Je judío teedy ajcxy huïdibi mijtungmïdipi mictägy tzachxïgixy Jesús müd canaagnax xïhuin. ⁴ Chi Pilato jadüg'oc Jesús y'amïdooy, nimay:

—¿Ca' nej m'adzohua'ñi? Ix nej yï mmïdzip ajcxy xychachxïgixy.

⁵ Chi Jesús ca' ni nej y'adzooy. E Pilato ooy chachhuinmay'ahuïdijty.

Jesús yajmoy ysentencia co y'ögipy

⁶ Com xïjoty anajty, je gobernador Pilato najtzmazïy tüg machyjäy, je huïdibi je mayjäy anajty ypijctzoogixyp. ⁷ Pujxtijc iñaayb anajty jim Jerusalén tüg machyjäy huïdibi anajty yxi Barrabás. Barrabás pujxtijc iñaayb anajty quipxy müd jacjadyii jäy huïdibi anajty ti midziptzoon je gobierno romano, e ti anajty yjäyyaj'ó'ccixy. ⁸⁻⁹ Co anajty je may yxi'ajtpidijc may'ajt pijctzoogixy ma Pilato co najtzmazïhuip tüg machyjäy, chi Pilato ymïnañ:

—¿Nej mdzojccixyp co nnajtzmazïhuibich je judíojäy ajcxy yrey?

¹⁰ Pilato ñejhuiyb anajty co mañ'ajtingïxy anajty ajcxy je teedy mijtungmïdipi ti cïyejccixy Jesús. ¹¹ Per co Pilato jadu'n ymïnañ, chi je teedy ajcxy mijtungmïdipi ooy ajcxy yajhuamgoty yajjihuiygoty je mayjäy co huen je Pilato najtzmazïy je Barrabás. ¹² Chi Pilato y'amïdooy je mayjäy jadüg'oc:

—¿Nej miich ajcxy mdzocy ndunipyich müd jada yëydijc huïdibi jäy ajcxy ytijpy co yrey'aty ma yï judíojäy ajcxy?

¹³ Chi je mayjäy mic ymïnangottay:

—Yajcruutzpet.

¹⁴ Chi Pilato ymïnañ:

—Per ¿ti yï' ti tundigoy?

Huin'it je mayjäy nïgi mic ymïnañ:

—¡Yajcruutzpet!

¹⁵ Co jadu'n je mayjäy ajcxy mictägy ymínanday, chi Pilato anajty yajjotcujc'adaangixy je mayjäy, chi najtzmadzhy je Barrabás. E co yajc'i'ajttay yi Jesús, chi c'iyecni co huen yajcruutzpedyii.

¹⁶ Chi je soldados ajcxy yajnicxy Jesús ma je agujctijc t'iba', e jim ñaymujci tüg'óciy soldados ajcxy huidibi yajpatp anajty jim Jerusalén. ¹⁷ Chi ajcxy yajnjenhy je Jesús tüg rey yhuit, color ucypí e yajcojenhy ajcxy apy corona.

¹⁸ Chi je soldados ajcxy ymíñañ:

—¡Viva jada judío rey!

¹⁹ Chi je soldados ajcxy huoippy Jesús ma ycohuajc m'iid paxy, e huindzuj j'ijptzujcixy ooy, e huingojxtinay'ahuhygixy janch ypaad nej j'ihuhy ooy huindzig'hygixy. ²⁰ Co je soldados ajcxy nixiictay yajxiictay Jesús, chi ajcxy jeeni je yreyhuit color ucypí, e yajnjenhy ajcxy yci'm yhuit jadüg'oc. Chi ajcxy Jesús m'iidcajppidzimy co anajty yajcruutzpedaangixy.

Co Jesús yajcruutzpejtí

²¹ Tü'am ajcxy tüg jäy m'iidnaybati, hue' anajty yxí, Simón, ycogájpity jim Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip nimay Simón co huen jaccajpi Jesús ycrudz.

²² Chi ajcxy yajnicxy Jesús ma tüg it lugar huidibi yxí Gólgota, je ayuc Gólgota jadu'n yhuimb'izimy o'cpi cohuajc. ²³ Chi ajcxy moy Jesús vino huen ügy tem huidity m'iid mirra tzoy. Per ca' Jesús cöbijcy je vino n'í. ²⁴ Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuit yajhuäcxaani, oc'ixaangixy pin anajty ocj'e'ájtíp.

²⁵ Petyxí anajty co ajcxy yajcruutzpejty Jesús. ²⁶ Je ayuc huidibi ajcxy yjaay ma Jesús cruudz, jadu'n ymíñañ:

—Je judíojäy ajcxy yRey. ²⁷ Quipxy m'iid Jesús ajcxy yajcruutzpejty metz meetzpi. Tüg meetzpi ajcxy yajcruutzpejty a'oy'amy ma Jesús ymijc, e jadüg anajty'amy. ²⁸ Yajcuyduñ nej anajty jaybety miñ ma Dios ñecy, ma jadu'n ymíñañ: “Yaj'amichoomujc je Cristo m'iid je pocyjäy ajcxy.”

²⁹⁻³⁰ Je mayjäy huidibi ajcxy nax'hyb anajty ma Jesús yajpaady cruutzc'ixy, ooy anajty ajcxy ycöjig'hyñ, nixiicy yajxiicy ajcxy Jesús, ymíñañ ajcxy:

—Bah, miich huidibi Dios ytijc m'ijdaanip, e codug'ig xí huingbi myajpid'iga'ñ, miich ci'm cham naygohuaani, e minac cruutzc'ixy.

³¹⁻³² Nañ jadu'n je teedy ajcxy m'ijtungm'iidpi etz je escribas ajcxy nixiicy yajxiicy ajcxy Jesús ñayñimayi miñ xyipy:

—Jada Jesús ti cohua'ñ jacjadyii jäy, e ca' jaty nej ci'm ñaygohua'n'hyb. Pen janch, co jada Jesús yj'ejty je Cristo huidibi rey'adamb ma yi judíojäy ajcxy, ym'iid ixypy mic'ajt jayd'eb ci'm ymínag'ipy cruutzc'ixy. Co jadu'n ixypy n'íxim co ci'm ti ymínacy cruutzc'ixy, huin'it m'ib'icim co janch jada j'ejty je Cristo huidibi rey'ajtp ma yi Israel jäy.

Nañ jadu'n je metz meetzpi ajcxy huidibi cruutzpejt quipxy m'iid Jesús nixiicy yajxiicy ajcxy je Jesús.

Co Jesús y'ögy

³³ Co yucjcx'ijhy, chi ycoodz'iyg'iday tüg'óciy naaxhuiñ. E jadu'n je naaxhuiñ y'ijty coodz'ixti minacyxí. ³⁴ Minacyxí Jesús mic ymíñañ m'iid aramaico ayuc:

—Eloi, Eloi, ¿lama sabactani? —yi jadu'mbi ayuc hue' yhuimb'izimy: Tat Dios. Tat Dios. ¿Na'amy co ti xy'ix'ixyich?

³⁵ Nij'ejty jäy huidibi anajty jim yajpatp huingon ma Jesús, co midoo jadu'n ajcxy Jesús y'ayuc, chi ajcxy ymíñañ:

—Midoogix, Elías yi' yaaxtaayb.

³⁶ Chi nidügti ajcxy ninicxy Jesús poyigy, ti anajty yajxoogy pixy miid vinoni ta'mbi, e yajjijpxodziy je pixy ma tüg paxy, e jadu'n yajja'ty je vino ni ta'mbi ma Jesús y'ahuac, huen muucip je vino ni ta'mbi. Co jadu'n tuñ, chi yminañ: —Tzoc oc'ahuixim pen mimb Elías, e miñ yajminagyii ma yi cruudz.

³⁷ Chi Jesús mic ycapxqueegy, chi y'o'cy. ³⁸ Co Jesús y'o'cy, chi je mapxhuit yciitzhua'cxy tinä'amy huidibi anajty miid y'adiydútyty je Dios ycuarto ma je teedy mijtungmiidpi ytigiy tüg tecypajc jimijt jimijt. ³⁹ Je soldado huindzin huidibi anajty tinaayb ma Jesús yhuinduu, co jadu'n midoy nej Jesús mic yaaxqueegy, e ijxy nej y'ögy, chi yminañ:

—Janch co jadayaabi yeydijc anajty Dios ung'adyii.

⁴⁰ Nañ jim anajty nijejty töxyjäydijc ymij'ijxcixy jigüegy. Jim anajty yajpaady María Magdalena, etz je jadügpí María, Jacobo je mutz'anägnip ytaj, etz José ytaj. Nañ jim anajty yajpaady Salomé. ⁴¹ Jadayaabi töxyjäy ajcxy miidhuidijt Jesús, e ti anajty pubéjtcixy taabi anajty Jesús yajpaady jim Galilea ñaaxjot. Nañ jadu'n anajty jim yajpaady jacnaagity töxyjäydijc ajcxy huidibi anajty ti ycoody jim Jerusalén quipxy miid Jesús.

Jesús yajnaaxtigiyii

⁴²⁻⁴³ Paady co chu'iyñi hue' anajty viernes mina judíojäy ñayajpocyñihuáatzigixy, jaydëb anajty amay'adaangixy je sábado xi je com jabom. Chi José huidibi anajty cogajp Arimatea yjotmictuñ, chi ytigiy ma je gobernador Pilato, pijctzooy may'ajt co yajnaaxtigihuaani Jesús ñinix. E hue' je' José anajty tungmiid ma yi judíojäy ajcxy. José yjijp'ijxpy anajty mina Dios pidäga'ñ yi' y'ané'min ya naaxhuiñ. ⁴⁴ Pilato ooy tzachhuinmay co Jesús tim mic'amy ti y'ögy anajty, paady huoodzoy je soldado huindzin, e t'y'ajt pijctzoy pen janch co Jesús ti anajty y'ögy. ⁴⁵ Co je soldado huindzin t'y'ajt yejcy co Jesús ti anajty y'ögy, chi nimay José co huen yajnaxtigihuiipy Jesús. ⁴⁶ Chi José juy poob huit, e co yajminajcy Jesús ñinix, chi mo'ñ miid je poob huit, e chi pidacy ma tüg tzaajut huidibi anajty ti yajtzejtztüdy ti yajpadüdy ma tüg tzaahuingueetz. E chi yaj'adujcy je öcpi jut miid tüg mij tzaa. ⁴⁷ E je metzpi töxyjäy María Magdalena etz je jadügpí María huidibi José ytaj'ajtpy huindicxp anajty ajcxy co Jesús ñaaxtigiy.

16

Jesús yjugypicy jadüg'oc

¹ Com jabom jopy, domingo, chi je tugüg töxyjäy ajcxy María Magdalena, María Jacobo ytaj etz Salomé juy ajcxy tzoy huidibi ooy oy xuugy, pidägaangixy anajty ma Jesús ñinix. ² Je tugügpi töxyjäy choñ domingo, semaan ixtigi', tim jopyñi. Ti anajty ypidzimni je xi co ajcxy oyjädya ma je öcpi jut. ³ Chi je tugügpi töxyjäy ajcxy nayñimaayi miñ xyipy:

—¿Pin xy'ocpubéjtim jigihuiipy je mij tzaa huidibi miid agiyity je öcpi jut?

⁴ Per co ajcxy ijxy je öcpi jut, chi ajcxy ijxy ahuingujc je mij tzaa anajty ytiguejcnäy huidibi je öcpi jut anajty agiydujcp. ⁵ Chi ajcxy ytigiy jutjoty. E chi ajcxy ijxy tüg yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymiid. Co ajcxy jadu'n ijxy je yeeg'anäg jüby jutjoty, chi je töxyjäy ajcxy ooy chigiy. ⁶ Chi je yeeg'anäg nimay je töxyjäy ajcxy:

—Ca' ooy mdzigiygixy. Miich ajcxy je' m'ijxtaaygixp je Jesús huidibi cogajp Nazaret, je huidibi jäy ajcxy yajcruutzpejt. Ti je' yjugypicy. Ca' je' ya. Oc'ijxcix ya ma ajcxy pidaacci. ⁷ Nicxcix, nimaaygix Pedro etz yi jacjadyii Jesús ydiscípulos ajcxy co Jesús nicxip jayjip jim Galilea, e jim Galilea ñaybadiiyb ajcxy miid Jesús, jadu'n nej ajcxy ñimaayi jayjip'aty.

⁸ Chi je töxyjäy ajcxy jim yqueegy ma je öcpi jut, com ti anajty ooy chigiiygixy. Ooy anajty ajcxy chiyuy miid tzig'iñ. E ni ca' ajcxy nimay ni pin nej anajty ti íjxcixy, com ooy anajty chigiiygixy.

Jesús ñaygue'xici ma María Magdalena

⁹ Je domingo, semana ixtigi', co Jesús yjugypicy, chi ñayguëxici jayjip ma María Magdalena, je' je' je töxyjäy huidibi anajty Jesús ti yajpidzimi huixtujc ca'oybi ma yjot yhuinma'ñ. ¹⁰ Chi María Magdalena ñicxy ma Jesús ydiscípulos ajcxy huidibi miid yhuidijty, e nimaaygixy nej anajty yi' ti ixy Jesús co ti yjugypicy jadüg'oc. E Jesús ydiscípulos ajcxy ooy anajty ytájycixy ymáygixy etz yaaxcixy. ¹¹ E co ajcxy midoohui je María y'ayuc, co anajty ti ixy Jesús juugy, chi ca' ajcxy mijpidaaci y'ayuc.

Jesús nayguëxici ma metz ydiscípulos

¹² Co hueeñi, Jesús ñayguëxici nañ jadu'n ma metz je' ydiscípulos huidibi ñicxp anajty ajcxy camjoty. ¹³ Chi je metzpi discípulos ñicxy ajcxy mic'amy oy nimaaygixy je jacjadyii discípulos ajcxy co ti íjxcixy Jesús. E je jacjadyii discípulos ca' ajcxy mijpidaaci je metzpi discípulos y'ayuc.

Huidi Jesús ydiscípulos yajñibijc

¹⁴ Jac com jecy, Jesús ñayguëxici ma je majctügpi discípulos ajcxy ma anajty y'ñaaygixy ma caydac. Chi Jesús ogy ajcxy co ca' ajcxy mibijccixy co ooy ajcxy yjot yjuuñity, ca' ajcxy mijpidägy jacjadyii pin anajty ti y'íjxcixy Jesús. ¹⁵ Jesús je' ydiscípulos ajcxy nimay:

—Ñicxcix miich ajcxy ma tüg'óciy naaxhuiñyjäy, ma tüg'óciy naax cajp, e capxhuäcxcix ajcxy je oybi ayuc nej jäy ajcxy jëb y'almanidzögipy. ¹⁶ Pinjaty mibijc etz ñiibejtixy, ypaadip ajcxy y'almanidzoocin. Per, pinjaty ca' mijpidägy tiy'ajt hue' ajcxy y'alma tigoyip miid ypocy ycixpi. ¹⁷ Yi jäy ajcxy huidibi mibijcp, ooy ajcxy iixpejt túngixipy. Miid iich nxi iich nmic'ajt yajpidzimipy ajcxy ca'oybi ma jäy ajcxy yjot yhuinma'ñ. Nañ jadu'n ycápxgixipy huingbi ayuc. ¹⁸ Ymadzipy ajcxy tza'ñ, e ca' nej yjajtcixipy. E co ajcxy veneno ügip, ca' ajcxy ypa'mdunib. E co ajcxy cñixáipy pa'mjäy, tzögip je pa'mjäy.

Jesús ypätigiiyñi tzajpjoty

¹⁹ E co je Huindzin Jesús ycapxy ycixy miid je' ydiscípulos ajcxy, chi ypätigiiyñi tzajpjoty. Jiiby tzajpjoty Jesús yajpaady ma Dios ymijc a'oy'amy, miid mij'ane'min. ²⁰ Chi Jesús ydiscípulos ajcxy chooñ ñicxcixy cajp cajp capxhuäcxy ajcxy Jesús y'ayuc ma nidüg'óciy naax cajp. E je Huindzin Jesús ooy ajcxy ypubejti ypuđigiiyi, mic'ajt moy je' ajcxy miid je iixpejt je mijhuinma'ñ huidibi ajcxy tumyb. Jadu'ñyi jadu'n. Amén.

SAN LUCAS

Jaayhui'my Jadu'n Nej Jesucristo Ytun Yjajti

¹ Mayjäy ti cojaay je ayuc je tıy'ajt huıdi ıch ajt nejhuıym co janch ytiy'ajtıty, tög'óciy jadu'n nej Jesús chondacy yjugy'ajtin ya naaxhuiñ ixti mabaad ycogixııy. ² Tög'óciy je tıy'ajt jadu'n nej ajt xyñimaayım huıdi ci'm ijx midou nej chondacy ixti mabaad ycogixııy, je' ajcxy huidibi capxhuäcxy Jesús y'ayuc ytiy'ajt. ³ İch nañ jadu'n ti nyajcıyöyich ti nyajtecyöyich yajxon je tıy'ajt nej Jesús chondacy je' chinaayın ya naaxhuiñ ixti mabaad ycogixııy. Paady ycıxpı ıch nhuinma'ñ pidägy co ıch miich nyajnijayıhua'ñ tög'óciy je tıy'ajt, miich oyjäybı, Teófilo. ⁴ Jıgıx miich nañ jadu'n mnejhuıhuıpy yajxon je tıy'ajt, jadu'n nej miich ti m'ixpıcy.

Tüg ángel nigapxy co Juan el Bautista ypi'c'ada'ñ

⁵ Jadu'n ytuni yjajti co anajty Herodes yrey'aty ma Judea naax cajp, jim anajty tög judıo teedy hue' anajty yxıı Zacarías. Je' anajty semandumb müd Abías y'ajugytıjc y'amıgügtıjc. Je Zacarías ypijcy müd Aarón y'ocnıx, hue' je' anajty yxıı Elisabet. ⁶ Dios y'ijxyp ñejhuıyb co je' anajty ajcxy ytudägyjäyıtıy nimetz. Je' ajcxy ycuydumyb tög'óciy yı Huindzin Dios ycapxy y'ané'mın. ⁷ Je' ca'p anajty ajcxy y'ung ni tög, e jadu'n ajcxy ymıjäyıñ nimetz.

⁸ Chi tögtecy Zacarías müd y'ajugy y'amıgüg yteedy'ajtcıxy anajty ma Dios ytıjc. ⁹ Jadu'n nej teedy ajcxy ycostumbre müdity, chi ñıgootı tung je Zacarías mına ypoomjogıpy jııby ma yı Huindzin Dios ytıjc. ¹⁰ Tög'óciy je mayjäy ooy anajty Dios mıbijctzoogıxy tıba'y. Yam Zacarías tzajtigoty ypoomjocy, ¹¹ co ñayquëxıci Huindzin Dios y'ángel tög ytinäy a'oy'amy ma je poomjoctac. ¹² Co Zacarías ijxy je ángel, chi ooy chıgııy. ¹³ Chi je ángel nımaay Zacarías:

—Ca' mdzigıy, ti Dios midooy yı mjuydácin mnucxtácin. Yı mdöxyıjc Elisabet ypaadıpy tög ung yëydıjcpı, e mxımöhuıpy Juan. ¹⁴ Mjotcujc'adıp mxondägıp miich etz mdöxyıjc, nañ may yı jäy yjotcugıhuıpy co anajty m'ung ti ypi'c'aty. ¹⁵ Chi yı m'ung ycömay'ida'ñ ma Dios. Ni ca' ügıpy vino ni jocnıı. Ma ca'ni anajty yma'xung'aty ymıd'adıpy yı Dios yjıhui'ñ ymic'ajt. ¹⁶ Yı' yajjothuımbıdıpy may Israel jäy ma yı' ajcxy yHuindzin Dios. ¹⁷ Je' nıcxy ycogapxy'aty ma yı jäy ajcxy huınmıc jotmıc müd Dios yjıhui'ñ ymic'ajt, tim jadu'n nej Elías jecy'ajty ycogapxy'ajty huınmıc jotmıc müd Dios yjıhui'ñ ymic'ajt. Je' m'ung yajjothuımbıdıpy je ungdeedy ajcxy huıdibi ca' y'ung ixaangıxy, nañ yajjothuımbıdıpy je jäy ajcxy huıdibi ca' capxycöbıcy yı Dios, jıgıx ajcxy paadıpy oyjot oyhuınma'ñ. Nañ m'ung ñımähuıpy je jäy ajcxy huen nayñı'ixııyigıxy müd yHuindzin Dios ycıxpı.

¹⁸ Chi Zacarías nımay je ángel:

—¿Nej jada ıch nejhuıhuıpy penı janch huıdibi xyajnimaaıybıch? Ti nmıjjäyıyñıch, cham ndöxyıjcıch nañ ti ymıjjäyıyñı.

¹⁹ Chi je ángel y'adzooy:

—İch Gabriel, ma Dios yhuınduu ni'ixı' n'ıtyıch. Dios ti xyquexııch cogapxy'ajtpı ma miich co nyajnimähuıpy jada oybı ayuc. ²⁰ Jadachambı miich mhui'mıpy uum, ni ca' m'ocjájtnıp nej mgápıpy, müd co ca' mmıbıcy jada ıch n'ayuc huıdibi yajcuydunıp co anajty tiempo patni.

²¹ Yam je mayjäy ooy ja'ahuıjxcıxy Zacarías, ooy anajty ajcxy tzachhuınmaaygıxy ti co chachhuäcıpy jııby ma Dios ytıjc. ²² Co Zacarías ypidzımy, chi

ca' anajty y'occapxni. Chi je jäy ajcxy huinjihu#y co ti anajty ixy tijaty jiiy ma Dios ytijc. Hue' je' yjacmiydacy a'ixiy'amy, e oyhuimiy uum.

²³ Co je semandung yajmay, chi Zacarías ñicxni ma ytijc. ²⁴⁻²⁵ Co jadu'n yjajty, chi Elisabet jihu#y co ti anajty y'ung tzi#migy ciy# gy. Chi yüch'ijty migoox po', e ymíñañ: “Jadu'n yi Huindzin Dios ti ytuñ m#id #ch jadachambi tiempo, ti xyjäy#mechich ti yajquëgy #ch ndzöydu'n ma yi mayjäy ajcxy.”

Tüg ángel nigapxy co Jesús ypi'c'adañ

²⁶ Co tudujc po' maabi Elisabet anajty y'ungtzi#migy, chi Dios quejxy je' y'ángel Gabriel jim Galilea naaxjot ma je cajp huidi anajty yx# Nazaret. ²⁷ Chi Dios quejxy Gabriel ma anajty tüg töxy'anäg y'ity huidibi anajty ca'ni midzinäy yëydijc. Je töxy'anäg ti anajty co'adzoy co piga'ñ m#id tüg yëydijc huidi yx# José. José hue' anajty David y'ap y'oc. Je töxy'anäg hue' anajty yx#ijty María. ²⁸ Co je ángel yti#iy ma anajty María, chi nimay:

—María, Dios ti xy'ijxtiy, je Huindzin Dios y'oy'ajt m#id miich. Miich je' cömay y'idip ma tüg'óciy töxyjäydijc.

²⁹ Chi María co y'ijxy je ángel, chi chig#iy m#id je' y'ayuc, chi huinmay ooy m#id jada copxpócxin nej co yjadú'ñity. ³⁰ Chi je ángel ymíñañ:

—María, ca' mdzig#iy, miich Dios ti xy'ijxtiy. ³¹ Jadachambi, m'ungdzimigip, myajpi'c'adipy tüg mang, huidibi mx#imöhuipy JESUS. ³² Je Jesús mij y'idipy, hue' je' yajtjipy Dios tzajpjotypi y'ung. Chi je Huindzin Dios möhu#yb je ané'min huidi yi' ymij'ap ymijteedy David ym#id anajty. ³³ Je Jesús ané'mip huinix# ma yi Jacob y'ap y'oc. Je' y'ané'min camina ycixipy.

³⁴ Chi María je ángel nimaay:

—¿Nej jada co yjadú'ñity? #ch ca'ni nyëydijc m#id tzinäy.

³⁵ Chi je ángel y'adzooy:

—Je Dios yjihu#ñ ymic'ajt minip ma miich, je Dios tzajpjotypi ymic'ájtin xyajnidujttähui, je oyjäybi jäy huidi pi'c'adam, hue' yajtjipy Dios y'ung. ³⁶ E cham Elisabet miich m'amigüg nañ jadu'n yajpi'c'adamy tüg mang ma ti ymijjäy#yñi. Cham midudujc po'bi maabi y'ung tzi#migy je huidibi jäy ytijpy ca' y'ung'ixaani, ³⁷ com m#idi Dios ca'ni ti chípity.

³⁸ Chi María ymíñañ:

—Jotujc nguydunipyich yi Huindzin Dios chójc#n, huen jadu'n tuñy# jady# ma #ch jadu'n nej miich m'ayuc xymöyich.

Chi je ángel ñicxni.

María y'oy cogapxy Elisabet

³⁹ Huin'it x# María choñ, ñicxy jottigoy ma yugjot, ma tüg cajp jim Judea naaxjot. ⁴⁰ Chi yti#iy ma Zacarías ytijc, e capxpocxy Elisabet. ⁴¹ Chi jadu'n yjajty co Elisabet midoohui María ycapxpócxin, chi jihu#y co y'ung yücx# ma yjot. E chi je Elisabet ooy yjotcugiy m#id je Dios yjihu#ñ ymic'ajt. ⁴² Chi ymíñañ janch mic:

—Cömay miich ma tüg'óciy töxyjäydijc, e cömay y'ida'ñ m'ung huidibi pi'c'adamb. ⁴³ ¿Nej #ch jada co jadu'n ti n'ahuäg#y co nHuindzinich ytaj miñ xycó'ixiyich? ⁴⁴ Co ti nmidooyich yi mgapxpócxin, ti #ch n'ung yücx# ma #ch njot co chachjotjúcity. ⁴⁵ Jotujc'adip pinjaty ti ymibicy, co cuyduñ y'ida'ñ je ayuc m#id je Huindzin Dios ycixpi. ⁴⁶ Chi María ymíñañ:

Ooy mij n'ojadatyich yi Huindzin Dios.

⁴⁷ Ooy nxondägyich m#id Dios ycixpi, #ch nnihuambi nyajtzoocpi,

⁴⁸ co yi' ti xyñi'ijxcidägyich, co #ch ayoobi xytumbi'adyíjich. Jadachambi etz jacnicxp x# tiempo, tüg'óciy jäy ajcxy oy m#ina'nip co jotujc'ájt#ich.

- 49 Yi Dios tügpajc mijip, tibi tun mid ich, ooy yi' yxi ymijity.
- 50 Dios ypa'ayooyb hueñypinity huidibi huindziguyip jadachambi etz jancixni xi tiempo.
- 51 Dios ti ooy tuñ mijpi huinma'ñ, ti jibicy pinjaty amij agix nayjihuiyip ma yjot yhuinma'ñ.
- 52 Dios ti yajpidzimy yi mijpi rey ma y'ane'my, ti mij'ajt möy ayoobidijc.
- 53 Pinjaty ayuu'ijtp anajty ymooy ti mid yjotcujc'adip, etz yi comeenyjäydijc ajcxy ti ixmach ca' ni ti.
- 54 Dios ti pubety yi Israel jäy, yi' ajcxy ytumbi, mid co anajty ti pa'ayogoty je' ajcxy,
- 55 jadu'n nej jecy'ajty Dios yajnimay je' n'ap ndeedy, je Abraham etz je'y'ap y'oc, co tunamb mid je' ajcxy huinixi.
- 56 Chi María tugig po' jim y'ijty mid Elisabet, chi yhuimbijtni ma ytijc.

Juan el Bautista co ypi'c'ajty

- 57 Co je Elisabet oy yajhuaad'ajtni xi tiempo, chi yajpi'c'ajty tüg ymang.
- 58 Chi ayuc midooy ajcxy je ymijin ymidijc etz y'ajugy y'amigüg jadu'n nej Dios may'ajt ti tuñ mid Elisabet. Chi ajcxy ooy yjotcugiy mid je' ycixpi. 59 Chi jadu'n yajty coductujc xi je ymijin ymidijc etz y'ajugy y'amigüg miñ ma Zacarías ytijc co anajty tiy'ajttihuaangixy je pi'c'anäg. Chi ajcxy yajxi'ada'nyii anajty jadu'n nej yteedy yxi Zacarías. 60 Chi ytaj yminañ:

—Ca' xii'adiyb Zacarías, hue' yi' huen xii'adyii Juan.

61 Chi je' ymigügtijc ajcxy yminañ:

—¿Na'amy? Ni tüg miich m'amigüg jadu'n ca' xijity.

62 Chi ajcxy y'amidoohui je' yteedy jadu'n a'ixiy'amy, nej yi' yajxi'ada'nyii.

63 Chi Zacarías pijctzoy tüg necy, e jaay jadu'n: “Juan huen xii'adyii.” Chi je ymigügtijc ajcxy nidüg'óciy ooy jihuiy huinmaay. 64 Chi mic'amy Zacarías y'ahuac ahua'cxy e ytoodz yunguy, chi oy ycapxigy e jäymejch cömay yi Dios.

65 Chi tüg'óciy ymijin ymidijc ooy chiguy. Chi ajcxy nimydactay nej Zacarías ti yjaty ma tüg'óciy jäy huidibi tzinaayb Judea yuugjotypi tzinaaydac. 66 Tüg'óciy pinjaty anajty midoob je ayuc, chi jäymejtzhui'm ajcxy ma yjot yhuinma'ñ, chi ñayñimáayigixy:

—¿Ti jada' ytunamyb jada pi'c'anäg?

Com je Huindzin Dios je' mid y'ity.

Je Zacarías y'iy

67 Chi je ungedeedy Zacarías mid je Dios yjihuiñ ymic'ajt Dios y'ayuc najtzcaxiyi yminañ:

68 Cömay yi Israel jäy yHuindzin Dios, co ti ni'ijxcidägy, ti cohua'ñ yi' ñaax ycajp,

69 Dios ti quexy tüg mij nihuaambi yajtzoopi, ma yi' ytumbi, David y'ap y'oc ajcxy.

70 Com Dios jadu'n yminañ jecy'ajty mid yi' y'ayuc najtzcaxiyb huidibi huätzjäyip;

71 je' xyñihuãnaanim ma ich ajt nmidzip, nañ xypubedaanim xypudigihuaanim ca'ydi xycigähuiyim huidibi ca' xy'ixaanim xychogaanim.

72 Jaydëbi pa'ayoohuipy ich ajt nmij'ap nmijteedy, etz jäymedziyb jadu'n nej ayuc ahuanuy mid je' ajcxy.

73 Jadu'n nej Dios janch huinjot y'ayuc ahuanuy mid ich ajt nmij'ap nmijteedy Abraham jecy'ajty huidi anajty xymöhuaanim.

- 74 Co nihuätzictuutim ma nmidzip, huin'it jaydëbi miyaaxim n'ojadajtim ca' ma tzigi'ñ jihu'i'ñ,
- 75 mïid huätzhuinma'ñ etz tudägy huinma'ñ ma yi' yhuinduu jabom jabom ixti mibaad ndzinaayim.
- 76 Miich ma'xung, jäy hue' myajtijip mijpi Dios y'ayucnajtzcapxiiybi. Miich n'icxip cogapxy, nicx yajni'ixi jäy mïid Huindzin Dios ycixpi.
- 77 Yajni'ixi' yi cajpjäy jadu'n nej huaad ajcxy y'alma paadipy nihuáanin yajnidzoocin, etz jadu'n nej huaad ajcxy ypocy huinmecxiiyb.
- 78 Jadu'n nej Dios ich ajt ti xypa'ayoohuim co ti xyñi'ijxcidaacim etz xymooyim t'icxin jájin huidibi tzomb tzajpjoty,
- 79 jaydëbi yajmöhuiipy jäy ajcxy Dios ytiy'ajt huidibi ajcxy tzinaayb agootz-tuum etz o'c j'ijp'am, jigix ajcxy xytümooyim ma je tudägypi tü'aa.
- 80 Je pi'c'anäg yeeg yjodijy huinmic jotmic mïid yi Dios yjihu'i'ñ ymic'ajt. Chi chinaay adügtuum ma ca' pin, ixti cooni xii tiempo paty mina n'icxipy cogapxy ma Israeljäy ajcxy.

2

Jesús yma'xung'ajty

1 Huin'it xii Augusto César pidacy y'ané'min huen tüg'óciy jäy nicxy necype-jttaaygixy. 2 Je jayijp'atyp'i padrón hue' je'yaj'oyiiy Cirenio huidibi anajty gobernador'ajtp jim Siria ñaaxjot. 3 Chi jäy ajcxy nidüg'óciy n'icxtay yajco-jayiiybi nidüg nidüg ma yci'mgajp. 4 Chi José chooñ jim Galilea naaxjot ma je cajp huidi yxii Nazaret, ñicxy ajcxy jim Judea naaxjot ma je David ycajp, huidi yxii Belén. Yi José ñicxy jim Belén com ymij'ap'ajtpy ymijteedy'ajtpy je David. 5 Chi José yajcojayiiy padrónjoty mïid María, je töxyjäy huidibi anajty ymïid capxytuñ, huidi anajty ung tzim'ijtp. 6 Chi jadu'n yajty co ajcxy anajty yjimity Belén, chi oyhuaad'aty co María paadipy y'ung. 7 Chi yma'xung'ajty je ungoob, e chi ñibe'ñ nímüxy mïid ymotz, e chi agögiiy ma iyujc pëcx'i'ñ, co ca' anajty ti paady jättac.

Je ángeles ajcxy etz je cöbixycuend'ajtpi ajcxy

8 Chi mihuingon je cajp anajty jäy ycöbixycuend'aty. Hue' anajty ajcxy yhuin'iñaayb huintzuumnajxyp je' ycöbixy ajcxy. 9 Chi Huindzin Dios tüg y'ángel ñigidaaci je' ajcxy, e yi Huindzin Dios y'oy'ájtin y'adixcoody jühuidity ma je' anajty ajcxy ymijc, chi ajcxy ooy chigiiy. 10 Huin'it je ángel yminañ:

—Ca' mdzigiiygixy, cham ich miich nyajnimaaaygixy oybi ayuc huidibi yajjotcugihuiipy tüg'óciy naax cajp. 11 Mïid miich ajcxy ycixpi ti ypi'c'aty cham ma je David ycajp tüg jäy huidibi miich ajcxy xyñihuánaam xycohuánaam ma ajcxy mmidzip. Hue' je' je CRISTO, je Huindzin Dios. 12 Yi' je' ijxpéjtip huidi mïid m'ijxcabipy. Mbáadipy ajcxy je ung ma'xung ñimóchity mïid ymotz, ycöcnäy ma iyujc pëcx'i'ñ.

13 Chi janch mic'amy ñayguëxici mïid je ángel may yi tzajpjotychinaaybi, chach Dios ojadajtcixy yminaangixy:

14 ¡Ooy ycómáity ooy ymijity yi Dios tzajpjotypi, ji naaxhuiñ jotcuyc'ajt mïid jäy ajcxy ycixpi huidibi Dios yjäygidacpy!

15 Jadu'n yajty co je ángel ajcxy n'icxtay tzajpjoty, chi je cöbixy cuend'ajtpi ajcxy ñayñimayi:

—Tzoc jámim jim Belén, jaydëbi n'ijxim ti ti ytunyii ti yjadyii huidibi nHuindzin'ajtim Dios ti xyajnimáayim.

16 Chi ajcxy ñicxy jottigoy, chi oy pátcixy María, José etz je ung ma'xung y'agögiiyity ma je iyujc pëcx'i'ñ. 17 Co ajcxy ijxy je María etz je ung ma'xung,

huin'it ajcxy nigapxtay nimiydactay jadu'n nej je ángel ajcxy ñimayi mïid je pi'c'anäg ycixpi. ¹⁸ Tüg'óciy jäy huïdi midou ooy jihuïy huinmay jadu'n nej je cöbixycuend'ajtpi ajcxy yminañ. ¹⁹ Chi María mido'mbijctay, e yajhui'my ma yjot yhuinma'ñ. ²⁰ Chi yhuimbijty je cöbixycuend'ajtpi ajcxy cömay jäy mech ajcxy yi Dios, etz ooy alabanza ajcxy ñy mïid Dios ycixpi mïid tüg'óciy jadu'n nej anajty ti ñjxcixy ti midóogixy, etz jadu'n nej anajty ti ñimáayigixy.

Pi'c Jesús yajcapxquëxigya ma Dios ytijc

²¹ Coductujc xii maabi anajty yma'xung'aty, huin'it je' ajcxy tiy'ajttiy je ung ma'xung. Chi ajcxy yxii moy JESUS, jadu'n nej je ángel anajty jayijp ti yminañ ca'ni anajty chimigiyii yciyigiyii.

²² Co je xii oypaatni mina je María anajty yhuätzpidzimaamni, jadu'n nej Moisés ycötújcïn je jécyip yminañ. Chi ajcxy mïidnicxy je ung ma'xung jim Jerusalén capxquëxigaangixy ma yi Huindzin Dios yhuinduu. ²³ Com jadu'n anajty yjaybétyity ma Huindzin Dios ñecy:

Tüg'óciy ungoob yëydijcpi huïdi ma'xung'ajtp, abicy yhuimipy mïid je Huindzin Dios ycixpi.

²⁴ José etz María ooyéjccixy huindzigi'ñ jadu'n nej Huindzin Dios ñecy yminañ co jëbi yecy metzc jam muuxy o pajctza'm muuxy.

²⁵ Jim Jerusalén anajty chinäy tüg jäy huïdi anajty yxii Simeón, tudägyjäy je', etz ooy Dios jäy mech. Simeón y'ahuijxyp anajty mina Dios miñ yajjotcujc'ada'ñ Israeljäy ajcxy, e mïid je' anajty Dios yjihui'ñ ymic'ajt. ²⁶ Dios yjihui'ñ ymic'ajt ti anajty yajnejhuïyii co ca' chojc öga'ñ, jayijpni oc'ixipy je Huindzin Dios yCristo. ²⁷ Je Dios yjihui'ñ ymic'ajt yajmin yajmejtzi Simeón yhuinma'ñ huen nicxy ma Dios ytijc; huin'it Jesús ytaj yteedy ymïidnicxi ma Dios ytijc, cuyduñ ajcxy jadu'n nej Dios ñecy y'ane'my. ²⁸ Chi Simeón tzendzoy etz capxpaady je ung ma'xung, e chi Dios mïbijctzoy mïid je' ycixpi, chi yminañ:

²⁹ Jadachambi capxcix jotcujc, Huindzin Dios, mïid ñch miich mdumbi, com ti mguyduñ jadu'n nej ti xyñimäyich co n'ixipyich je Cristo.

³⁰ Cham ti n'ixyich je nihuambi cohuambi,

³¹ huïdibi ti mni'ixiy ma tüg'óciy jäy ajcxy yhuinduu.

³² Jada ung ma'xung ytij'ajt yegip ma yi jäy ajcxy huïdi ca' yjudiojäyity. Jadu'n yi' nipaady nej tüg jin huïdi codicxp je jäy. Cömay y'idipy yi Israel jäy mïid yi' ycixpi.

³³ José etz Jesús ytaj ooy jihuiy huinmaay jadu'n nej Simeón ñigapxy je pi'c ma'xung. ³⁴⁻³⁵ Chi Simeón conuucx yi' ajcxy, e nimay María, Jesús ytaj:

—Jadayaabi pi'c'anäg hue' jada aminiy co may Israel jäy yjothuinma'ñ yaj'oyihuipy mïid yi Dios etz nañ jadu'n may Israel jäy yjothuinma'ñ ca' yaj'oyihuipy mïid yi Dios. Yi' je' tüg ijxpejt co ca' jäy y'ixa'nnyb choga'nnyb, e jadu'n tüg'óciy yajnejhuïhuipy nej ajcxy nidüg nidüg yjothuinma'ñ mïidity. E miich m'idipy jotmaymïid jadu'n nejihuïy tüg espada ti xyajtzaachiy.

³⁶⁻³⁷ Nañ jim Jerusalén anajty tüg töxyjäy huïdibi anajty yxii Ana, Dios je' anajty y'ayucnajtzcapxiybi. Fanuel anajty yteedy'ajtpy, hue' je' Aser y'ap y'oc, mij jäy anajty ooy. Janch mutz'anägni ypijcy e jëyi huixtujc jimijt chinay mïid yña'y, mada'px mïdaax jimijt anajty cujc co'ögy chinäy, e ca' anajty ytigoy'ity ma Dios ytijc. Ana ytumb anajty tzajtigoty xii m tzuum jopy ayuu anajty ycapxtägy. ³⁸ Chi Ana nimiñ José etz María jiiy ma Dios ytijc, e quipxy mïid ajcxy huingapxtacy je Huindzin Dios. Chi je Ana nimiydacy je pi'c Jesús mïid tüg'óciy jäy jim Jerusalén huïdi anajty ajcxy jijp'ijxp mina Dios cohua'na'ñ Jerusalén ma ymidzip.

Co ajcxy nicxni jim Nazaret

³⁹ Co oy yajcuydundäy tüg'óciy jadu'n nej je Huindzin Dios ñecy ymina'ñ, chi José etz María ñícxcixni jim Galilea ma ajcxy yci'mgajp Nazaret. ⁴⁰ Je pi'c Jesús anajty yeegy mic ooy mïid huijy'ajt cujc'ajt, etz ymïid je' Dios ymay'ájtin y'oy'ájtin.

Je pi'c Jesús yajpaady ma Dios ytijc

⁴¹ Jimijt jimijt yi ungdaj ungedeedy ñicxy anajty ajcxy jim Jerusalén co anajty je Pascua xii paady. ⁴² Co Jesús anajty ymajmetzjimijt'ajty, chi ajcxy ypättigiiy jim Jerusalén jadu'n anajty ajcxy costumbre mïidity co xii paady. ⁴³ Co je xii ñaxtäy, chi ajcxy huimbítcixni, e Jesús yhuimiiy je' jim Jerusalén. Ca' José etz ytaj nejhuüy ajcxy co ti anajty yhuimiy. ⁴⁴ Hue' ajcxy anajty tijj je' ymiñ axaam mïid ymígügtijc. Co tüg xii yöyixni, chi ajcxy ixtay je' y'ung ma y'amigügtijc ajcxy, etz huidi mïid ñay'ixy'adyii ñaymígüg'adyii. ⁴⁵ Co ca' ajcxy y'ung paady, chi yhuimbítcixni jim Jerusalén ung ixtaaybi.

⁴⁶ Chi jadu'n yajty codugüig xii oypaatcixy jim ma Dios ytijc, Jesús y'iñäy anajty agujc'amy ma je huindzindijc. Yi' anajty y'amido'ijtyp yi huindzindijc y'ayuc, e ñañ yaj'amidooy anajty tijaty. ⁴⁷ Tüg'óciy je huindzindijc huidibi midou Jesús y'ayuc, chi ooy ajcxy huinmay etz jihuüy jadu'n nej je Jesús huinjihuüydäy etz jadu'n nej anajty tiydudägy y'adzooy. ⁴⁸ Co Jesús ytajyteedy y'ixpati, chi ooy ajcxy tzachjihuüy. Chi ungdaj yminañ:

—Aay ung, ¿nej co miich jadu'n xytúngixyich? Yi mdeedy etz iich yam tzachjottigooyb nay'adzigiüijich n'ixtáaygixich miich.

⁴⁹ Chi Jesús y'adzooy:

—¿Na'amy co miich xy'ixtáaygixyich? ¿Ca' mnejhuüygixy co copity n'ida'ñich ma nDéedyich ytung?

⁵⁰ Chi ajcxy ca' huinjihuüyi Jesús y'ayuc huidibi ycapxy.

⁵¹ Chi Jesús mïid nicxy je' ajcxy jim Nazaret. Chi Jesús capxymidooy ytaj yteedy. Chi yi' ytaj yajhuimday ma yjot yhuinmañ tüg'óciy nej ytunyüi yjadyii. ⁵² Chi Jesús ixpijc'aditzp anajty ooy, etz yeegy yjäygojy huijycujc. E yi Dios etz jäy ajcxy ooy anajty jäygidaccixy.

3

Juan el Bautista y'ayuccapxhuäcxy mijtigüduum

¹ Ma anajty je Tiberio César yjimijtyoty, mimajmocx jimijt anajty maabi y'ane'mtigüy, chi je Poncio Pilato anajty gobernador'ajtp jim Judea, je Herodes anajty rey'ajtp jim Galilea, je' y'uch Felipe anajty rey'ajtp jim Iturea etz jim Traconite ñaaxjot. Chi Lisanas anajty rey'ajtp jim Abilina. ² Chi je Anás etz Caifás je' ajcxy anajty teedy mijtungmïid ma Dios ytijc. Je huin'it tiempo Dios y'ayuc yja'ty ma je Juan, Zacarías ymang, huidibi anajty tzinaayb mijtigüduum. ³ Chi Juan choñ ñicxy ma tüg'óciy cajp mihuingon je Jordán mijñi, capxhuijy je jäy ajcxy, co huen jothuimbijttaaygixy etz huen ñibejtcixy jigix ajcxy ypocy yajhuinmeecxip. ⁴ Jada jadu'n tuni jajtí nej je ayucnajtzcaxiiybi Isaías anajty ti cojaay:

Jim mijtigüduum yajmidooy tüg jäy mina'ñ: “Yaj'oyüygix yi Dios ytü'aa, tim jadu'n nej jäy ajcxy yaj'oyüygixy yi jibic tü'aa co tüg rey mina'ñ.” Yajtüygixy yi tü'aa huidibi ooy y'adijy y'a'och.

⁵ Tüg'óciy anii ahuoc huen joyüydäy, tüg'óciy tungop huen ñañ jadu'n joyüydäy. Tüg'óciy ñi'aa tü'aa huidibi tijmin tijxijp huen tüydäy. Yi tü'aa huidibi ca' quipxyjatyity huen quipxyjaty tüydäy.

⁶ Tüg'óciy yi jäy ajcxy ixipy ñejhuühipy nej Dios yega'ñ je nihuambi cohuambi.

7 Chi Juan ogy ajcxy je jäy pinjaty anajty miimb n̄ibejtpi, ym̄inañ:

—iMiich ajcxy tza'ñ ajcxy y'ajugy y'amigüg! ¿Pin miich ajcxy ti xynimäy quëg ma yi ayo'n huidibi Dios yquexaamy? 8 Túngix oybi, jothuimbjtcix, ca' ajcxy m̄inaangixy miñ xyipy: “Abraham iich ajcxy n'ap'ajtpy ndeedy'ajtpy”. Hich miich ajcxy n̄imaayb co Dios ixti jëbi yi' yaj'ung'adyii yaj'anäg'adyii Abraham jada tzaa ca'ydi miich ajcxy. 9 Dios ni'ixi y'ity jaydëbi yajcödigoyipy jäy ajcxy y'alma huidibi jibic-huinma'ñ m̄iid. Tim jadu'n nipaady nej jäy ni'ixi y'ity m̄iid jacha co pujxiga'ñ tüg quipy huidi ca' oy ytim'aty, etz yajnögtähua'ñ.

10 Chi je mayjäy ajcxy y'amidooy je Juan:

—¿Ti iich ajcxy jëbi nduñ?

11 Chi je Juan y'adzooy, ym̄inañ:

—Pinjaty yhuitt m̄iid metz, jaydëbi möy pin ca' m̄iidity ni tüg. Etz pinjaty caagy m̄iid nañ jadu'n möhuipy pinjaty ca' m̄iidity.

12 Chi miñ jadyii yajcogüejtpi co anajty ñibeadaangixy, ym̄inañ ajcxy:

—¿Ti huaad iich ajcxy nduñ (jigix Dios xymijotcujc'adipyich)?

13 Chi Juan y'adzooy:

—Ca' n̄igi anaxy myajcogüety jadu'n nej je cötújc̄in y'ane'my.

14 Chi soldado ajcxy ym̄inañ:

—¿Ti iich ajcxy ndunipy (jigix Dios xymijotcujc'adipyich)?

Chi Juan y'adzooy:

—Ni pin ajcxy ti mgapj̄icy, ni mgan̄ihuambedipy ajcxy. Nañ jadu'n mijotcujc'ajtcixy nej myajmujuuycixy.

15 Je mayjäy yjip'ijxyp anajty ajcxy ooy, etz ooy jihuiy huinmaay ne-jhuñhuaangixy pen yi Juan je' anajty Cristo. 16 Chi Juan n̄imay ajcxy nidüg'óc̄iy:

—Hich janch nyajn̄ibéjtypich jäy m̄iid n̄i. Miimb je' axaam huidibi jacm̄ij ca'ydi iich, ca' huaad yi' ycighuin ngejich. Je' miich ajcxy xyajn̄ibedipy m̄iidi Dios yjihui'ñ ymic'ajt etz m̄iidi j̄in. 17 Je Cristo ni'ixi y'ity co oybi möhua'ñ je jäy huidibi ajcxy oyhuinma'ñ m̄iid, etz ym̄ohuaamy tzaachyp̄i je jäy ajcxy huidibi jibic-huinma'ñ m̄iid, tzaachyp̄i huidibi nicam̄ina ycixipy. Tim jadu'n nipaady nej tüg jäy ni'ixi y'ity co ymoc-huimboja'n, e chi je oybi mocpajc pidäga'ñ ma che'x, etz je mocjaam ninögihua'ñ, e cam̄inax̄i ycapidza'ñ je j̄in.

18 Je Juan ooy jäy capxhuijy, etz canaagnax oybi ayuc capxhuäcxy. 19 Chi yi' ogy je rey Herodes, co y'uch Felipe ytöxyjc̄ Herodías m̄iid tzinaayi, etz jacjaydiiybi jibic-huinma'ñ t̄ibi Herodes anajty tuñ. 20 Chi je rey Herodes n̄igi pocytuñ co Juan pidacy pujxtigoty.

Je Jesús ñibejt̄in

21-22 Chi jadu'n yjajty co jadu'n tüg'óc̄iy jäy ñibejttay nañ jadu'n Jesús ñibejty. Yam anajty Jesús ycapxtägy co je tzajp y'ahuaach, etz je Dios yjihui'ñ ymic'ajt ym̄inajcy ma Jesús ycöduu m̄iid ñin̄icx jadu'n nej muuxy ñin̄icx. Nañ jadu'n yajm̄idoy tüg ayuc choñ tzajpjoty ym̄inañ:

—Miich n'ung'ajtpy, ooy iich miich ndzocy ooy njihuïy, ooy njotcújc̄idyich m̄iid miich.

Jesús ym̄ij'ap ym̄ijteedy

23 Jesús hue' anajty yjim̄ijt oy ni iipxmajc co ytungtiḡiy. Hue' je' anajty jadu'n jäy tijy José ymang, José yteedy hue' je' Elí, 24 Elí yteedy hue' je' Matat, Matat yteedy hue' je' Leví, je Leví yteedy hue' je' Melqui, je Melqui yteedy hue' je' Jana, je Jana yteedy hue' je' José, 25 Je José yteedy hue' je' Matatías, je Matatías yteedy hue' je' Amós, je Amós yteedy hue' je' Nahum, je Nahum yteedy hue' je' Esli, je Esli yteedy hue' je' Nagai, 26 je Nagai yteedy hue' je'

Maat, je Maat yteedy hue' je' Matatías, je Matatías yteedy hue' je' Semei, je Semei yteedy hue' je' José, je José yteedy hue' je' Judá, ²⁷ je Judá yteedy hue' je' Joana, je Joana yteedy hue' je' Resa, je Resa yteedy hue' je' Zorobabel, je Zorobabel yteedy hue' je' Salatiel, je Salatiel yteedy hue' je' Neri, ²⁸ je Neri yteedy hue' je' Melqui, je Melqui yteedy hue' je' Adi, je Adi yteedy hue' je' Cosam, je Cosam yteedy hue' je' Elmodam, je Elmodam yteedy hue' je' Er, ²⁹ je Er yteedy hue' je' Josué, je Josué yteedy hue' je' Eliezer, je Eliezer yteedy hue' je' Jorim, je Jorim yteedy hue' je' Matat, ³⁰ je Matat yteedy hue' je' Leví, je Leví yteedy hue' je' Simeón, je Simeón yteedy hue' je' Judá, je Judá yteedy hue' je' José, je José yteedy hue' je' Jonán, je Jonán yteedy hue' je' Eliaquim, ³¹ je Eliaquim yteedy hue' je' Melea, je Melea yteedy hue' je' Mainán, je Mainán yteedy hue' je' Matata, je Matata yteedy hue' je' Natán, ³² je Natán yteedy hue' je' David, je David yteedy hue' je' Isaí, je Isaí yteedy hue' je' Obed, je Obed yteedy hue' je' Booz, je Booz yteedy hue' je' Salmón, je Salmón yteedy hue' je' Naasón, ³³ je Naasón yteedy hue' je' Aminadab, je Aminadab yteedy hue' je' Aram, je Aram yteedy hue' je' Esrom, je Esrom yteedy hue' je' Fares, je Fares yteedy hue' je' Judá, ³⁴ je Judá yteedy hue' je' Jacob, je Jacob yteedy hue' je' Isaac, je Isaac yteedy hue' je' Abraham, je Abraham yteedy hue' je' Taré, je Taré yteedy hue' je' Nacor, ³⁵ je Nacor yteedy hue' je' Serug, je Serug yteedy hue' je' Ragau, je Ragau yteedy hue' je' Peleg, je Peleg yteedy hue' je' Heber, je Heber yteedy hue' je' Sala, ³⁶ je Sala yteedy hue' je' Cainán, je Cainán yteedy hue' je' Arfaxad, je Arfaxad yteedy hue' je' Sem, je Sem yteedy hue' je' Noé, je Noé yteedy hue' je' Lamec, ³⁷ je Lamec yteedy hue' je' Matusalén, je Matusalén yteedy hue' je' Enoc, je Enoc yteedy hue' je' Jared, je Jared yteedy hue' je' Mahalaleel, je Mahalaleel yteedy hue' je' Cainán, ³⁸ je Cainán yteedy hue' je' Enós, je Enós yteedy hue' je' Set, je Set yteedy hue' je' Adán, je Adán yteedy hue' je' Dios.

4

Je mujcu' tuñ ijxta'ni ma Jesús

¹ Jesús ym'iid'ajtpy anajty je Dios yjihui'ñ ymic'ajt. Co Jesús jim choñ ma Jordán mij nii, chi je Dios yjihui'ñ ymic'ajt yajnicxi m'ijtig'íduum. ² Jesús y'ijty huixchigui'px xii jim m'ijtig'íduum. Chi je mujcu' yjot'ijxi huinma'ñ'ijxi. Jaygay jim y'ijty, e co huixchigui'px xii ñajxni, chi oy yuuböccodyii. ³ Chi je mujcu' nimay:

—Peni janch miich Dios xy'ung'adyii, nimay jada tzaa huen ahuimbity tzajcaagy.

⁴ Chi Jesús y'adzooy:

—Jaybety ity ma Dios ñecy co ca'nan m'iid tzajcaagy t'ajty jäy ajcxy yjugy'aty, nañ jadu'n tzocy t'üg'óciy Dios y'ayuc.

⁵ Chi je mujcu' m'iidpejty Jesús ma t'üg cop janch cixpi, chi t'üg jaxigy yajni'ixiiy t'üg'óciy je naax cajp hu'idi jii naaxhuiñbi. ⁶ Chi je mujcu' y'minañ:

—Hich miich möhuipy t'üg'óciy mic'ájtin ané'min etz oy'ájtin, com hich ng'i'am y'ity t'üg'óciy, e nmöhuibich hueñyimp'inity. ⁷ Pen xyhuingoxtinäybych xy'ojadajtpich miich, ac miich jada mje' t'üg'óciy.

⁸ Chi Jesús y'adzooy, y'minañ:

—Huinhuägtuutcich miich mujcu', com jadu'n jaybéty y'ity: “Co yi Huindzin miich m'Dios mhuingoxtinähui'py m'ojadadipy, etz yi' je' t'üg pajc myajmij'adipy.”

⁹ Chi je mujcu' m'iidnicxy Jesús jim Jerusalén, chi m'iid pejty ma Dios ytijc coduu, e nimay:

—Pen Dios miich xy'ung'ajtp cödijpnax naaxcíxy, ¹⁰ com jaybety jadu'n y'ity ma Dios ñecy co quexipy Dios yí y'ángeles ajcxy e xycuend'adipy. ¹¹ Cígíxy ajcxy xyhuidzipy, ca'ydi mdzaachiy ma tzaajot.

¹² Chi Jesús ymínañ:

—Ji Dios y'ayuc huídi jadu'n minam co ca' mjot'ixipy mhuinmañ'ixipy yí mHuindzin Dios.

¹³ Co je mujcu' yajcixy jadu'n nej anajty jot'ixañ huinmañ'ixañ Jesús, chi huinhuágtuuty tüg tiempo.

Jesús yajtzondägy je' ytung jim Galilea

¹⁴ Chi Jesús nicxy jim Galilea, e Jesús miid'ajtpy je Dios yjihuiñ ymic'ajt. Chi Jesús ooy cömay y'ijty ma tüg'óciy cajp huinduy agonbi. ¹⁵ Hue' Jesús anajty yaj'ixpicy majaty je' ajcxy naymujctac. Chi je jäy ajcxy tüg'óciy ooy cömay Jesús.

Jesús yajpaady jim Nazaret

¹⁶ Chi Jesús ymíñ Nazaret ma anajty ti yeegy. Chi Jesús ytigiy ma naymujctac, jadu'n nej costumbre anajty miidity pocxxiiduum. Chi ytinaay'ahuíy, chi ytigíy necycapxi. ¹⁷ Chi ajcxy mooy je necy huídibi je Dios y'ayucnajtzcaxxiybi Isaías yjaay. Chi ciyhuácxy je necy, paty jiiby tüg it ma anajty yjaybétyity jadu'n:

¹⁸ Je Huindzin Dios yjihuiñ ymic'ajt xymíid'ajtpich, co xyajnimáhuibich co nyajnimáhuibich ayoobitijc je oybi ayuc. Ti xyquexyich co nyajjotcugíhuibich je jäy ajcxy huídi jotmay ymíid, etz nhuinméecxibich huídibi ajcxy pujxtigótyip, nañ jadu'n ajcxy je huídibi huíntzíp nyajhuindicxigibich, e nbidägibich ahuátztuum huídibi yajtzaachytumb.

¹⁹ Ti xyquexyich co ngapxhuácxibich je tiempo mina Huindzin Dios may'ajt oy'ajt tunañ miid je jäy ajcxy ycixpi.

²⁰ Chi jada' Jesús abidijty je ñecy, yajcídigiíy je tungmiidpi, huin'it y'ixtacy. Chi tüg'óciy mayjäy jiiby ma naymujctac ooy ajcxy huídicxy je Jesús. ²¹ Chi Jesús yminandacy:

—Cham yajcuydun je' huídi jaybety ma Dios ñecy jadu'n nej miich ajcxy cham ti mmidooy.

²² Chi nidüg'óciy ajcxy ooy jäygidacy nej Jesús mínañ, etz huinmay ajcxy ooy je ayuc huídibi Jesús ycapxy, chi ñayñimáayigixy:

—¿Nej ca'y José jada jada' y'ung?

²³ Chi Jesús ymínañ:

—Ca' yjécyity miich ajcxy xyajnimáhuibich jada ayuc: “Tzoydumbi naychoyíhuí ci'm. Tüg'óciy jadu'n nej ich ajcxy nmidooyich ti mduñ jim Capernaum, nañ jadu'n miich octun ma mgi'mgajp.”

²⁴ Chi Jesús yjacmínañ:

—Janch ich miich ajcxy nnimäy co ni tüg jäy huídibi Dios y'ayucnajtzcaxxiy ca' jäy ajcxy cöbicy ma yc'mgajp. ²⁵ Janch ich miich ajcxy nimäy co ooy anajty may co'ögy ytöxyjäy ya Israel jecy'ajty co Elías chinaay, co je tzajp adujcy tugig jimíjt jatudujc po', co oy yuu miñ ma tüg'óciy naax cajp. ²⁶ E Dios ca' quejxy je Elías ma yí Israeljäy co'ögy töxyjäy ajcxy. Hue' janch quejxy huinduum jim Sarepta ma Sidón naaxjot ma tüg co'ögy töxyjäy huídi jim. ²⁷ Nañ jadu'n anajty ooy mayjäy püd pa'm miidity ya Israel jecy'ajty co je Dios y'ayucnajtzcaxxiybi Eliseo chinay. Chi ni tüg jäy huin'it catzoocy, jéyi tügpajc choocy pa'mjäy huídibi anajty yxí Naamán huídi tzoon Siria naaxjot.

28 Huin'it tög'óciy jäy huidi anajty jii by ma naymujctac ooy yjotma'tcoty co jadayaab ayuc ajcxy midooy. 29 Chi je mayjäy ajcxy nibidígy Jesús etz yajpidzimy ma je cajp. Chi ajcxy yajnicxy jim ma je tzaahuingueetz, co je cajp copcíxy anajty yajpaady, e jim anajty cödijpnaxaangixy. 30 Chi Jesús ñajxy cujc'amy ma je' ajcxy, chi ñicxni.

Tüg yëydijc huidibi anajty mïid jibic espíritu

31 Chi Jesús y'idacy jim Capernaum, tüg cajp jim Galilea naaxjot, chi Jesús jäy ajcxy yaj'ixpicy pocxxiduum. 32 Huinmay ooy ajcxy jadu'n nej je' yaj'ixpicy. Ñayñimáayigixy co je Jesús yaj'ixpicy nejihuïy mijtung mij'ané'min mïidity.

33 Jii by ma je naymujctac jii by anajty tüg yëydijc huidibi mïid tüg ca'oybi, chi je ca'oybi mic yaaxqueecy yminañ:

34 —Ixmajtcich ajcxy, ¿ti mdunamy mïid ñich ajcxy Jesús je nazaretpi? ¿Nej ti mmiñ co xyajhuindigoyáanigixyich? ñich miich n'ijxcapy co miich je' je Huätzpi Dios.

35 Chi Jesús je ca'oybi ooy, nimay:

—Amon, pidzim ma yi jäy.

Chi je ca'oybi najztijiy je yëydijc agujc'amy ma je jäy ajcxy, huin'it ypidzimy, e ca' ni nej jactuuñ. 36 Tüg'óciy jäy jim ooy ajcxy ñay'adzigiiyi miñ xyipy yjanayñimáayigixy:

—¿Ti ayuc jada' yi? Co mïid y'ané'min etz mic'ajt ane'my ca'oybi etz yajpidzimy ma jäy.

37 Chi Jesús capxpaady y'ijty ma tüg'óciy cajp huidi huinduy agónip.

Jesús yajtzoocy Pedro ymïd töxyjäybi

38 Chi Jesús ypidígy choñ ma naymujctac, ytigiiy ma Simón ytijc. Jadu'n anajty Simón ymïd töxyjäybi mic ytoyii. Chi ajcxy cohuaniiy Jesús mïid je' ycixpi. 39 Chi Jesús yhuindacy ma je' yhuinduu, ix'ooy je toyii, e jadu'ñi ñajxy. Chi je' mic'amy ypidígy, yajcay yaj'uucy ajcxy.

Jesús yajtzoocy mayba'mjäy

40 Tzuu tzuu anajty jäy ajcxy yajnicxy tüg'óciy jäy ajcxy pa'mmïidpi ma Jesús. Chi Jesús cñixajy nidüg nidüg, e jadu'n anajty ajcxy chögy. 41 Chi nañ jadu'n je' ca'oybi yajpidzimy ma mayjäy, mic je ca'oybi anajty yhua'ñ yjihuïy, yminañ:

—Miich je' Dios xy'ung'ajtp.

Chi Jesús ñigi ix'ooy, ca' anajty yajhuäcxipy nicxy yjaccapxy, com ti anajty nejhuüygixy co yi' je' je Cristo.

Jesús y'ayuccapxhuäcxy jim Galilea

42 Co yximiiy, chi choñ Jesús, ñicxy mijtigïduum. Ooy jäy yja'ixtäyii, chi ajcxy oy paatcixy, yajhuäcxijpy ajcxy ooy, ca' anajty oc'ixmadzáangixni. 43 Chi Jesús yminañ:

—Ooy jada chachcopícyty co canaag agajp ñich jada ngapxhuäcxibich je oybi ayuc jadu'n nej Dios y'ane'my. Paady Dios ti xyquexyich ya naaxhuiñ.

44 Jadu'n anajty je' capxhuäcxy majaty jäy ñaymujctac jim Galilea.

5

Je acxmajtzin mijhuinma'ñybi

1 Tügtecy jadu'n yajti, jim anajty Jesús ma je Genesaret mejypa', co jäy ñimiini janch ñay'adijiiy ñay'agodiiygixy, tzach'amidohuaangixy Dios y'ayuc.

2 Chi yí' i'xpaty mejtz barco jahueengi mejypa'áy. Je acxmajtzpidijc ti anajty ypidzímgi'xy ma je barco, jim anajty y'acxxuomy pújccixy. 3 Chi Jesús yajtigiyíy tüg barco huidi Simón anajty je'ajtpy. Chi may'ajt pijctzoy co huen yajjihuägy hueeni yí' barco mejypa'áy. Chi Jesús y'ixtacy barcojoty, e jadu'n yaj'ixpijcy je mayjäy ajcxy. 4 Co ycapxymaayi, chi Jesús Simón nimay:

—Nícx pidäg m'acxmadzi'ñ mejyjoty, jaydëbi májtzci'ixipy acx.

5 Chi Simón y'adzooy:

—Huindzin, ti ñich ajcxy ooy njatuñ tüg tzuum, ni ti ti ngapáatci'ixyich. Per miid miich m'ayuc ycixpi yí' acxmadzi'ñ nbidägibich mejyjoty.

6 Co ajcxy pidacy je acxmadzi'ñ mejyjoty, chi yajco'adujcy ooy may acx, jahueeni acxmadzi'ñ ycaci'ch miid je may acx ycixpi. 7 Chi Pedro yemi ymigügtijc huidi anajty jim ma je jadügpí barco, huen miñ ajcxy pubedyii. Chi ajcxy ymiñ pubejtp, yaj'ujch ajcxy metzpi barco miid may acx, jagoo jagoo ycaquiñ je barco miid may acx ycixpi. 8 Co Simón Pedro ijxy jadu'n, chi ycojxtinaay'ahuíy ma Jesús yhuinduu, nimay:

—Huinhuäctútcich, Huindzin, com ñich pocyjäy ñich.

9 Com Pedro janch tzigíy' b anajty, etz nañ tzigíy' b tüg'óciy huidi anajty miid ti ytuñ, co anajty ooy may acx tzachyajnibéjtcixy. 10 Nañ jadu'n tzigíy' b anajty je Jacobo etz Juan je Zebedeo ymang ajcxy huídibi Simón anajty ti pubety. Chi Jesús ñimay Simón:

—Ca' mdzigíy, jadachambi etz jacnicxni xii tiempo mdunipy jäymadzii.

11 Co je barco yajmejypidzimy, chi ajcxy y'ixmajch tüg'óciy, chi ajcxy panícxty Jesús.

Jesús yajtzögy tüg jäy nibützpa'mmiidpi

12 Chi jadu'n yjajti co anajty Jesús yjimíty ma tüg cajp, co ñimiini tüg yëdijc ymiid anajty pützpa'm. Co je pa'mjäy ijxy Jesús, chi nihuindacy ma yhuinduu, minucxtacy, nimay:

—Huindzin, pen mdzojcpy jëbi xyajtzögibich.

13 Chi Jesús yci' najtzxajíy nidoon, nimay:

—Ndzojcpyich, hui'm huädz.

Chi mic'amy je jäy choocy. 14 Chi Jesús ane'my, nimay:

—Ca' ni pin myajnimähuipy, nícx janchtiy nayguëxigíib ma teedy, jaydëbi möhuipy Dios huindzigi'ñ, jadu'n nej Moisés ycötújcín je jécyip y'ane'my, miid yí' ycixpi co ti mhuätzpidzimy, jaydëbi jäy ajcxy nejhuihuipy co ti mdzögy.

15 Je capxy'ayuc nígi y'oc-huäcx'aditzni, e janch mayjäy y'ocnimújcin, jim pin ayuc midohuaam, e jim huidi tzögaam. 16 Jesús ycögueecpy anajty je mayjäy, ñícxty anajty migtigíduum Dios ojadaajtpi.

Jesús yajtzögy tüg jäy cixuxypi tecyxuxypi

17 Tüg teczy yjajti, Jesús anajty yaj'ixpijcp, e jim anajty ajcxy iñäy ma Jesús yhuinduu fariseojäy ajcxy, etz huidi jäy yaj'ixpijcp Dios ñecy huídijaty anajty ti choongíxy canaag agajp ma Galilea naaxjot Judea naaxjot, etz cham huídijaty anajty ti choon Jerusalén. E Jesús ymiid anajty Huindzin Dios ymic'ajt co jäy yajtzögipy. 18 Chi nijëjity jäy yajja'ty cijx'am tüg pa'mjäy yëdijcpi huidi ca' anajty yci' ytecy yücxy. Chi ajcxy ixtaay ma yajtijctigíhuipy pidäga'ñ anajty ajcxy je pa'mjäy ma Jesús yhuinduu. 19 Com ca' anajty ni ma tigiyíydac miid co je tijc anajty ooy y'újtziy miid mayjäy. Chi ajcxy miidpejty tijc nígíxy, chi ajcxy tijc yajcöhuach, e chi ajcxy cödiyñajxy cijx'am je pa'mjäy ma Jesús yhuinduu. 20 Co Jesús ijxy jadu'n nej je' ajcxy ymibicy, chi nimay:

—Yëdijc, yajmeecxp mbocy.

21 Chi je' ajcxy huidi yaj'ixpijcp Dios ñecy etz je judío ixpicytjc huidi naydíjigixp fariseojäy huinmaygoty, ñayñimáayigixy: “Jada Jesús ooy ycapxtigoy müd Dios. Ni pin yéydjic huaad ca' ti pocymeecxy. Tügpaic nHuindzin'ájtím Dios huidi pocyhuinmecxp.”

22 Jesús ñejhuiy je' ajcxy yjot yhuinma'ñ, paady ajcxy nimay:

—¿Ti mdzachhuinmaayb ajcxy ma mjot mhuinma'ñ? 23 ¿Ti jactzip co minaaním co ti mbocy yajmeecxy o minaaním: “Pidíg etz nicxni?” 24 Jaydëbi miich ajcxy mnejhuíhuipy co ñich je' je jäy huidi tsoon tzajpjoty, nmüdich ané'mín etz mic'ajt ya naaxhuíñ jëbi jäy nbocyhuinmeecxyich, paady cham nnimäyich yi pa'mjäy: “Pidíg etz yajpidíg mmaabejt, nicx ma mdijc.”

25 Chi mic'amy je pa'mjäy ytinayigy ma je jäy ajcxy yhuinduu, etz yajpidigy je' ymaabejt ma anajty ycögnäy. Chi ñicxni ma ytjic, chi ooy cömay jäymejch Dios. 26 Huin'it nidüg'óciy je mayjäy ooy ajcxy jihuíy, e chi ajcxy ooy cömay etz jäymejch Dios. Chi ajcxy ooy chigíygixy, ymínaangixy:

—Cham janchtüy n'íxim mijhuinma'ñ.

Jesús huodzoñ je Leví

27 Co jadu'n ytuni yjajti, chi Jesús jim choñ, chi ijxy tüg yajcogüejtpi huidi anajty yxi Leví. Leví jim anajty ññäy ma yajgogüejttac. Chi Jesús nimay je Leví: —Pajaamgich.

28 Chi je Leví ixmajtztay huidi anajty ytuumy b etz padzoñ je Jesús.

29 Chi Leví mayjäy yajcay yaj'uucy ma ytjic, cham may yajcogüejtpi ajcxy etz jacjadyi jäy huidi ññaayb ma yi mesa müd Jesús etz yi' ydiscípulos ajcxy. 30 Chi je' ajcxy huidibi yaj'ixpijcp Dios ñecy etz je ixpicytjc huidi naydíjigixp fariseojäy tzachni'ameechycápxcixy ni'ojíygixy je Jesús ydiscípulos ajcxy, ymínaangixy:

—¿Na'amy co mgaaygixy m'uuccixy müd yajcogüejtpi etz müd pocyjäy ajcxy?

31 Chi Jesús ymínañ:

—Ca' yajmayjaty tzoydumbi huidibi ca' ajcxy ypigyii, jëyi huidi ajcxy píjcip.

32 Ca' ñich ti nmiñich ma je jäy ajcxy huidibi ca' pocy müdity. ñich ti nmiñich müd yi pocyjäy ycixpi co huen jothuimbijttaaygixy ma Dios.

Yaj'amidooy ajcxy Jesús ti co jäy ajcxy y'ayunas'ájticy

33 Chi je mayjäy ajcxy Jesús nimay:

—Nej co yi' (Juan) ydiscípulos ajcxy janam jadojc jaygay y'íjticy etz ycapxtáccixy, nañ jadu'n je fariseojäy ydiscípulos ajcxy janam jadojc jaygay y'íjticy. Chi miich mdiscípulos ajcxy ca' ajcxy jaygay y'íjticy, caaby uucp ajcxy jabom jabom.

34 Chi Jesús ymínañ:

—¿Nej jëbi yaj'ayuu'aty jäy ajcxy huidi yajpatpi ma je píjcpí yajnixñduñ, pen quipxyi yam yajpaady müd je huidibi píjcp? 35 Minamb je xii je tiempo mína je píjcpí yajtzoníy b, huin'it janchtüy ajcxy jëbi y'ayuu'ájticy.

36 Nañ jadu'n ajcxy yajnimay tüg jihuimbit ayuc:

—Ni pin ca' huaad agíyíy tuc-huit müd jemyhuit, canaan jëyi ycídzip yi jemybi, nañ jadu'n je tucpi ca' oy yhuí'mañ müd je jemyhuit agíyíñ. 37 Ni pin ca' pidägy jemy vino ma je tucpi cochac, pen janch jadu'n octuñ, je vino jemybi ycídzip je tucpi cochac, chi y'ixyojctáhuipy je vino etz je cochac ñitigoydáhuipy. 38 Pidägipy ajcxy jemy vino ma tüg jemybi cochac, chi jadu'n ca' ytigoyipy je vino ni je cochac. 39 Ca' ni pin tzocy vino jemybi, pen ti anajty ügy vino tíibi yjejcni, co jadu'n ymínañ co jac oy je tíibi yjejcni.

6

Je discípulos ajcxy yajmújccixy trigo cojc pocxx#duum

¹ Chi jadu'n yjajti tüg pocxx#duum co Jesús oy ñaxy ma tüg trigo cam, e yí ydiscípulos ajcxy oy anajty yajminájccixy trigo tiim, chi ajcxy nixajztüdy, e chi ajcxy jicxy. ² Chi nidügti fariseojäy ymínañ:

—¿Ti co ajcxy jadu'n mdundigooy co mdúngixy huidi ca' ñigodúcyity ajcxy mdunipy pocxin x#duum?

³ Chi Jesús ymínañ:

—¿Nej ca'ní miich ajcxy mgapxy Dios ñecy nijadu'ñy? ¿Nej ca' mnehuiygixy ti David ytuun co anajty yuubögyii etz nañ co ymigügtijc anajty yuubögyii? ⁴ David ytigíy ma Dios ytiç, chi conígy je tzajcaagy huídibi anajty jiiby ma Dios yhuinduu, chi caay, nañ jadu'n moy je ymigügtijc ajcxy. Je' tzajcaagy ca' anajty ypadyii nicxy je' ajcxy cay. Teedy je' anajty ajcxy paatip cáaygixip.

⁵ Chi Jesús yjacmínañ:

—Hich je' je jäy huídibi tzoon tzajpjoty, jébi nnimäyich je jäy ajcxy ti jébi huaad ytúngixy sábado xii.

Je yëdyjc huídibi anajty yci' t'ádzip

⁶ Chi jadügtecy yjajti tüg pocxx#duum, co Jesús ytigíy ma tüg naymujctac, chi jäy yaj'ixpijcy. Jiiby anajty tüg yëdyjc huidi y'a'oygi' anajty t'ádzip. ⁷ Chi huidi ajcxy yaj'ixpijcp Dios ñecy etz fariseojäy ajcxy ix'ijxy pa'íjxcixy Jesús nej pen jäy yajtzögam pocxx#duum, e je' ajcxy anajty m#d ycixpi xíhua'ñ. ⁸ Jesús ñejhuíyb je' anajty ajcxy yjot yhuinma'ñ. Chi Jesús nimay je yëdyjc huídibi anajty yci' t'ádzip:

—Pidig, tinayig mayjäy'agujc.

Chi je' ytinaayigy. ⁹ Chi Jesús ymínañ:

—Nyaj'amidohuaamybich miich ajcxy tüg ayuc. ¿Nej Dios ñecy ymína'ñ, jébi oybi nduunim pocxx#duum o jébi jibicpi nduunim, nyajtzoocim jäy o nyajtgooyim jäy yjugy'ajt?

¹⁰ Chi Jesús ajcxy huindixpejtay nidüg'ócay, chi nimay je pa'mjäy:

—Xajtiu mgi'.

Chi je' yci' xajtiy, huin'it je' yci' choocy. ¹¹ Chi je' ajcxy huidi yaj'ixpijcp Dios ñecy etz je ixpiçytijc huidi ajcxy mijpidacp judío ycostumbre ooy ajcxy yjot'ambijcy, ñayñimáayigixy miñ xyipy:

—¿Nej ajt n'octuunim jada Jesús?

Jesús huin'ixy je majmetzpi discípulos ajcxy

¹² Jadu'n yjajti huin'it xii Jesús ñicxy mijtig#duum Dios ojadajtpi. Tüg tzuum ooy Dios mibijctzooy. ¹³ Co yximíy, chi Jesús huoomiñ yí ydiscípulos ajcxy. Chi huin'ijxy je majmetzpi, etz yximoy ajcxy, apóstoles. ¹⁴⁻¹⁶ Chi Jesús yhuin'ijxy je Simón huidi yximoy Pedro; je Andrés, Pedro y'uch; Jacobo etz Juan; Felipe etz Bartolomé; Mateo etz Tomás, Jacobo hue' je' Alfeo ymang; etz Simón huidi jäy ytijpy Zelote; Judas, Jacobo y'uch; etz Judas Iscariote huídibi nañ jadu'n Jesús cäyejc ma ymidzip.

Jesús yaj'ixpiçy mayjäy

¹⁷ Chi Jesús m#d'idacy je discípulos ajcxy, chi oy yhuäcxipy ma tüg ajoy m#d ydiscípulos ajcxy etz mayjäy huidi anajty ti choongixy Judea naaxjot, etz Jerusalén, etz ma mejypa' jim Tiro etz Sidón. Ymiñ ajcxy je mayjäy co am#doo'idáani Jesús y'ayuc etz nañ chögaangixy je pa'm huidi ajcxy ym#d.

¹⁸ Cham je huidi anajty ayo'n tzachpaatp m#d ca'oybi, nañ tzoocp je' anajty

ajcxy. ¹⁹ Chi tüg'óciy je jäy ajcxy janch ñidonamy anajty ajcxy je Jesús, co ymüid mic'ajt co jäy tüg'óciy yajtzög.

Je jotcuyc'ajt etz je cajotcuyc'ajt

²⁰ Chi Jesús huindicxpejttay je mayjäy huüdi ajcxy ixpigaam yi' y'ayuc, e ymüinañ:

—Jotcuyc miich ajcxy ayoobtijc, com miich ajcxy cham xypaat Dios y'ané'min.

²¹ Jotcuyc miich ajcxy huüdi cham yuubó'cip, co mgüxüüb miich ajcxy. Jotcuyc miich ajcxy huüdi cham jotmay müid, co ypáadip xü tiempo müna mxondáaccixipy.

²² Jotcuyc miich ajcxy müna anajty jäy ca' xy'ixaangixy, co pin xy'ixtíjixipy, e co jäy ajcxy jibic xyñigapxa'ñ xyñixiga'ñ müid üch ycixpi, je jäy huüdi tzoon tzajpjoty. ²³ Mxondäg miich ajcxy huin'it xü, etz mjotcugüygixip, com ooy chachmüjity huüdi ajcxy mbadaamy tzajpjoty. Com jadu'n anajty jecy'ajty miich mmij'ap mmijteedy ca' ixangixy je huüdi anajty Dios y'ayucnajtzcapxüipy.

²⁴ Miich ayoob ajcxy comeñyjäy, com ca' ti jotcuyc'ájtün mjacpadaangixy huin'it xü (co Dios tüydunip je naaxhuiñyjäy).

²⁵ Miich ayoob ajcxy huüdi cham oc'agujc'ajtp ocjotcuyc'ajtp, ayo'n jotmay ajcxy mbaadip, e myajmayjadipy miich ajcxy tijaty.

²⁶ Miich ayoob ajcxy co ajcxy myajnigapxipy myajnimüydägipy, com jadu'n jecy'ajty miich ajcxy mmij'ap mmijteedy nümay je jäy ajcxy co ooy y'oyjäy huüdi ajcxy anajty najtzcapxüyb ayuc huüdibi ca' ytiy yjáñchity.

Nej huaad nmügüg ndzójim

²⁷ Chi Jesús yjacmüinañ:

—Miich ajcxy huüdi cham amüdo'ijtp üch n'ayuc, üch miich ajcxy nümäayb: Tzójccix mmüdzip, mü'oyjäy'ájtix huüdijaty ca' xy'ixaangixy. ²⁸ Mügapx je jäy ajcxy müid oyjot oyhuinma'ñ huüdi ajcxy jibic xyñigapxp xyñi'ojüyb. Mübijctzoogixy yi Dios müid je' ajcxy ycixpi huüdibi xyñigapxp xyñi'ojüyb. ²⁹ Pen ji pin xycojxy ma yi mhüinjüjp, mo' jadüg adu'm'amy ahüin hueñ coxy. Pen ji pin xypügaani yi mjocxhuit, jactimmo' müñjen huen yajnicx. ³⁰ Pin xypüjctzohüip tijaty, mo'. Pin xypüjcip huüdi miich mjé'ajtpy, ca' mübijctzohüipy jadüg'oc. ³¹ Nej mdzocy tunipy jäy müid miich ajcxy, nañ jadu'n miich ajcxy mdunipy müid yi' ajcxy.

³² Pen miich ajcxy jeyi mdzojccixpy pinjaty xychojccixp, ¿ti oyjäy'ájtün jada' miich ajcxy m'ocpaadipy? Nañ jadu'n je pocyjäy ajcxy chojcpy pinjaty yi' ajcxy tzójcip. ³³ Pen mdumyb oybi huüdijaty müid ooy mnaymügüg'adyii. ¿Ti oyjäy'ájtün jada' miich ajcxy m'ocpáadip? Nañ jadu'n je pocyjäy ajcxy tuñ oybi müid ymügügtijc. ³⁴ Pen myejcipjctzou müid je jäy huüdibi miich ajcxy müjüjp'ijxpy co nañ jadu'n xymöhuüipy tigatii, ¿ti oyjäy'ájtün miich ajcxy mdumyb? Nañ jadu'n yi jibic jäydijc jayejcpi tijaty püjctzoy co nañ jadu'n jüjp'üjxcixy co ymöhuüipy tigatii. ³⁵ Miich ajcxy, tzójccix mmüdzip, mü'oyjäy'ájtix mmüdzip, yajpüjctzoogix tijaty, e ca' ni ti müjüjp'üjxcixipy co ajcxy jac müj mbaadip. Jadu'n miich ajcxy müj mbaadip oy'ájtün e mnaydüjüyb ajcxy je müjpi Dios y'ung. Com Dios pa'ayoodaayb tüg'óciy yi jäy ajcxy huüdibi ca' ti jäygidägy, etz huüdi jibicjäy. ³⁶ Miich ajcxy pa'ayoo mügügtijc ajcxy, jadu'n nej müDios Teedy tzajpjoty ypa'ayoo huenyümpüinity.

Ca' mümügüg ni ti myaj'ix'ixipy myajpa'ixipy

³⁷ Ca' mmigüg ni ti myaj'ix'ixipy myajpa'ixipy, huin 'it ca' pin xy'ix'ixipy xypa'ixipy. Ca' mmigüg mbocy'ixipy, e huin'it ca' pin xypocy'ixipy. Huinmecx mmigüg, e huin'it nañ jadu'n Dios myajhuinmeecxip. ³⁸ Mo' mmigüg etz huin'it miich ajcxy Dios xymöhuipy quipxy ooy tijtäch etz janch yajxon y'útzity cödünaayb. Com yi quipxi'ñ tibi myajquipxy, nañ yi' mid xyquipx-huimbidipy.

³⁹ Chi Jesús yajnimay je mayjäy tüg jihuimbit ayuc:

—¿Nej jëbi tüg jäy huintzpi ymigüg huintzpi huijzyöyñi? ¿Nej ca' mdiy nimetz yjutcögäxipy? ⁴⁰ Ca' ji ni tüg ixpijcpí huidi nigí ixpícyip ca'ydi yhuindzin, pen ji pin huädz yjadim'ixpícy najtzpadihuipy yhuindzin.

⁴¹ ¿Na'amy co mic'amy mbocy'ixy mmigüg co hueeni ytundigoy, e miich jac mij ooy mdundigoy, e ca' mjihuifñybicy? Tim jadu'n nipaady nej jihuüy ti m'ixy pi'cpüx ma mmigüg yhuin, e ma miich mgí'mhuin jac jüby mij quipy, e ca' m'ixy je quipy ma mgí'mhuin. ⁴² Ca' huaad mnimähuipy mmigüg: “Nayyegí miñich püx n'ocyajpidzim maabi mhuiin”, e miich ca' m'ixy mij quipy ma mgí'mhuin. Jibicjäy miich. Jayijp miich myajhuädzip mjot mhuiinma'ñ, huin'it jëbi mmigüg m'ihuüjip mgapxhuüjip, jadu'n nipaady nej jihuüy ti myajpidzimy je quipy maabi mhuiin, jachuädz m'ixigipy e chi jëbi yi pi'cpüx myajpidzimipy maabi mmigüg yhuin.

Je quipy je ytüm, yi' mid ycixpi yaj'ijxcapy

⁴³ Ca' yi' y'oyjäyity huidi jibic tuumb, nañ jadu'n ca' jibicjäy huidi oy tuum, tim jadu'n nipaady nej tüg quipy. Ca' ji yi' oyguipy huidi jibic tñm'ajt, nañ jadu'n ni ca' yjibicquipyity huidi oy tñm'ajtp. ⁴⁴ Com ni je' quipy yaj'ijxcapy mid ytüm ycixpi. Ca' pin higueri tim tucy ma quipy apymüdpí. Nañ ni pin ca' uvas cha'm piy ma aadz apymüdpí. ⁴⁵ Je jäy oyjäybi ma yjot yhuinma'ñ yajpidzimy oybi. Je jibicjäybi ma yjot yhuinma'ñ yajpidzimy jibicpi. Huidibi yhuinmaayb jotjoty huinma'ñjoty yi' ycapxyp.

Je mejtznajxpi poch y'ijx

⁴⁶ Chi Jesús yjacmínañ:

—¿Nej co nigo mīnaangixy: “Huindzin, Huindzin”, ni ca' ajcxy mdúngixy huidi nyajnimaaigyipy? ⁴⁷ Tüg'óciy jäy huidi xyñimimbich etz xymidoohui ñch n'ayuc etz cuyduñ, ñch nyajni'ixihuipy pin je' ymidügnax. ⁴⁸ Quipxyiyb tüg yëydijc huidibi ytijcojpp ma tzaa nīcxy, chi nidajiy ooy cūcy, chi pidägy poch'ijx tzaa nīgixy, co mijñi ycomy nimiñ je tijc, mid tüg'óciy ymijaa jayajpidiga'ñ je tijc, e ni ca' jadu'ñyi yajyücx, com tzaagixy anajty ypojtzooñity. ⁴⁹ Yi jäy huidi midoob ñch n'ayuc e ca' cuyduñ, midquipxy jadu'n yi' nej tüg yëydijc co ti ytijcojy. Ni ca' poch cūcy ypojtzooñity, jëyi naaxhuingixy nidajiy hueeni. Co je mijñi ymiñ mid ymijaa, chi yajpidigy je tijc, chi oy yhuindigoydäy.

7

Jesús yajtzögy tüg mijtungmüdpí Romano ytumbi

¹ Co Jesús ycapxtaay ymydactaay mid je mayjäy huidi anajty jim amido'ijtp, chi ytigüy jim Capernaum. ² Jim anajty tüg Capitán tüg ytumbi hue' anajty pijcip, janch tim ögaanip anajty, e je soldado huindzin ooy anajty tzocy je ytumbi. ³ Co je capitán ayuc midooy jadu'n nej Jesús ytuñ, chi quejxy judío mijjäydijc, huen nīcxy minuucxtaaccixy Jesús co je' ymīipy ma ytijc yajtzögüyb je' ytumbi. ⁴⁻⁵ Chi je mijjäydijc ajcxy ymiñ ma Jesús, chi ajcxy cohuanüy ooy, pijctzou may'ajt, nimay:

—Jadayaabi capitán ymihuaad co mbubedipy, com yajmij'ajtpy ñch ajcxy ngajp, ti cojy ñch ajt naymujctac.

⁶ Chi Jesús ñicxy miid je' ajcxy. Co ajcxy mihuingooñ je tijc, chi je capitán quejxy ymígüg huen nicxy jipcobadiy Jesús, nimähuipy:

—Huindzin, ca' nej mnayjihuiyii, ca' ñch mihuaadity co mdig'ihuipy ma ñch ndijc. ⁷ E paady ca' ñch njot ti mictuñ co ñch miich ci'm n'ixc n'ixtäy. Jëda'ajty miich nigoo capx, e ti anajty ndumbich chögy. ⁸ Nañ jadu'n ñch nmüdich soldados ajcxy huidi ajcxy xycapxcöbijcpich. Nimäyich tüg: “N'ixc”, e n'ixp; nimäyich jadüg: “Min”, e mimb; nimäyich ndumbi: “Tun jada”, e ytumyb.

⁹ Co Jesús midoy nej je capitán ymínañ, chi jihuiy ooy, chi ni'ijxhuimbijty nimay ajcxy huidi pamiinip:

—Ñch miich yim nimaaygixyp co ca' nbaadyich Israel jäy huidibi xymibijcpich jadu'n nej jadayaab agatz jäy.

¹⁰ Co ajcxy je quexyöybi yhuimbijtcixni ma je tijc, chi oy páatcixni je tumbi ti anajty y'agidägy.

Jesús yajjugypijcy tüg co'ögytöxyjäy y'ung tñbi anajty y'ögy

¹¹ Chi jadu'n yajty huin'it xii co Jesús anajty ñicxy ma tüg cajp huidi anajty yxii Naín. Miid anajty ñicxy jadyii ydiscípulos ajcxy etz mayjäy. ¹² Co yhuingooñ ma anajty ycajp tigihuaani, chi minaybaati jäy ajcxy, ñicxy anajty ajcxy tüg öcpi yajnaaxtigixy, huidi anajty ungdaj tügpajc y'ung'ajtpy. Hue' je' anajty co'ögy je töxyjäy, e miid anajty ñicxy maycajppjäy. ¹³ Co je Huindzin Jesús ijxy, chi pa'ayogoty je töxyjäy, chi nimay:

—Ca' myäxy.

¹⁴ Chi Jesús ymihua'cy, nidoñ je öcpi cajón. Chi ajcxy ytinayxijpy je huidi anajty ajcxy öcpi ciyñicxp. Chi Jesús ymínañ:

—Yëydijc, ñch miich yam nimaayb, pidig.

¹⁵ Chi je yëydijc ññayigy huidi anajty ti y'ögy, e ytigiy miydaacp. Chi Jesús yajcidigiyñi je' ytaj. ¹⁶ Chi ajcxy nidüg'ócay ooy ñay'adzigiyygoti, e Dios jäymejch cömay, ymínaangixy:

—Tüg mijpi Dios tiy'ajtmütpi cham yajpatp ma ñch ajt.

Nañ jadu'n ajcxy ymínaangixy:

—Ti Dios ni'ijxcidägy yi yñaax ycajp.

¹⁷ Ooy Jesús yajcömay ma tüg'ócay Judea naaxjot, etz ma tüg'ócay jac huinduy agonbi naax cajp.

Je Juan je Bautista yquexyöybi

¹⁸⁻¹⁹ Chi je jäy ajcxy huidi anajty Juan je Bautista yaj'ixpijcpy nimydactay jadu'n nej miid ytuni yajti Jesús. Chi Juan huooy metz yi' ydiscípulos ajcxy, e quejxy ma Jesús yajpaady. Chi Juan nimay co huen nicxy amidoogixy Jesús, pen yi' je' je Cristo huidi anajty miinaam, o pen n'ahuíjxpy ajcxy huingbi.

²⁰ Chi je Juan yquejxyöybi miin ma Jesús nimay:

—Yi Juan je Bautista ñch ajcxy ti xyquéxyich ma miich amidohua'ñ pen miich je' je Cristo huidi minaamb, o ¿n'ahuíjxypich ajcxy huingbi?

²¹ Tim huin'itiy Jesús ooy mayba'mjäy yajtzoocy. Yajtzoocy nañ jadu'n huidi anajty ajcxy ooy mij yuu mij pa'm yaj'ayoyii, etz nañ yajtzoocy pinjaty anajty ca'oybi miid ma yjot yhuinma'ñ. ²² Chi Jesús je Juan yquejxyöybi nimaayi:

—N'ixc nimaaygix je Juan jadu'n nej ti m'ijxcixy ti mmidoogixy, co yi huintzpi ti yhuindicxigy, yi tecyma'tpi ti yöyigy, yi nibützpa'mmiidpi ti chögy, je cönatpi ti ymidohuicxixy, je öcpi ajcxy ti yjugypijcy, e ngapxhuäcxyich oybi ayuc ma ayoohtijc. ²³ Jotcujc yi' ajcxy huidi ca' huinma'ñytigooygixy miid ñch ycixpi.

²⁴ Co je Juan yquexyyöybi yhuimbijttay, chi Jesús nimiydaccoty je Juan ma je mayjäy ajcxy, ymíñañ:

—Co ajcxy ti m'oy mijtigíduum, ¿ti ti m'íjxcíxy? ¿Nej ti m'íjxcíxy tüg jäy ametz jotmetz, jadu'n nejhuíy tüg nähuaax huídi pojmiimb pojxiip? ²⁵ Chi jada', ¿ti oy ti m'íjxcíxy? ¿Tüg yéydíj huídi míid oy yhuít yxöxyity? Yi jäy ajcxy oy yxojxypi huídi agujc jotcuic tzínaaygixp hue' ajcxy yajpaady ma yi rey ytíj. ²⁶ ¿Ti ajcxy ti m'íxy jim mijtigíduum? ¿Tüg jäy huídi Dios ytíy'ajt míid? Janch ti m'íjxcíxy tüg Dios ytíy'ajtmíidpi, etz jacnigi ymíjity je' ca'ydi Dios y'ayucnajtzcapxiybi huídi jecy'ajty tzínay. ²⁷ Je' jada je jäy huídi Dios ñigapxyp ma ñecy ma Dios jadu'n ymíñañ:

Cham nguejxyich ñich nguexyöybi jayíip ma miich, je' yaj'oyíhuip je jäy ajcxy yjot yhuinma'ñ míid ñich ycíxp, tím jadu'n nipaady nej jihuíy jäy tü'aa yaj'oyíy co rey ymíñañ yjáda'ñ.

²⁸ ñich miich ajcxy yam nimaayb co huídijaty ajcxy töxyjäydíj yajpi'c'ajtpy, ca' ji ni tüg Dios y'ayucnajtzcapxiybi huídibi jacnigi ymí jity ca'ydi Juan, je Bautista. Chi jada' je jac mutzpi huídi jiiyby tzajpjoty yajpaatp ma Dios y'ane'my, jacmíj je' ca'ydi Juan.

²⁹ Co ajcxy je mayjäy jadu'n midoy nañ jadu'n je yajcogüejtpíidíj ajcxy huídi anajty ñibéjtcíxy ma Juan, chi ajcxy míñañ co Dios ytudägyity. ³⁰ E je fariseos ajcxy etz je escribas ajcxy huídi anajty ca' ñibéjtcíxy ma Juan, ca' ajcxy mijpíidacy huídi anajty Dios ytunamy míid je' ajcxy ycíxpi. ³¹ Chi je Huindzin Jesús ymíñañ:

—¿Ti míid nyajquipxihuíbiich jadayaabi jäy huídi tzínayb ma jadachambi tiempo? ¿Huídi míid nyajtügihuíbiich? ³² Jadu'n nej pi'ctíj huídi ajcxy iyíyib ma jäy yjuygíxy ytoocíxy. Míjhuan mijjihuíygyxy ymígügtíj: “Ti njayajxüxich flauta e ni ca' ti m'éjtcíxy; ti nja'ñhuí ajcxy ñy jotmaymíidpi, e ca' ti myaaxcíxy.” ³³ Chi Juan je Bautista ymíñ, e je' ca' anajty cay, ni ca' vino ügy, chi miich ajcxy mínaangíxy co Juan ymíid ca'oybi. ³⁴ Chi ñich, je jäy huídi tzoón tzajpjoty, nmiñich, chi caaybich uucpích, e miich ajcxy mínaangíxy: “Íjxcíx, cha tüg yéydíj janch cax janch vino uucp, huídi mígüg'ajtpy yajcuéjtpíidíj etz pocyjäydíj.” ³⁵ Je tíy'ajt ji je' ñiguéxígy ma je pínjaty nígapxp nimíydaacp tíy'ajt.

Jesús ma Simón je fariseojäy ytíj

³⁶ Chi tüg fariseojäy may'ajt píjctzoy, co Jesús anajty míid ycaya'ñ. Chi Jesús ytígíy ma je fariseojäy ytíj, chi ññay'ahuíy ma mesa. ³⁷ Chi jim anajty tüg töxyjäy huídibi anajty jibic tzínaayb jibic jugy'ajtp ma je jimbi cajp. Co je' nejhuíy jiiyby Jesús ma fariseojäy ytíj ññay ma mesa, chi mímíñ tüg quiig aceite huídibi ooy oy xuugy, chi midígíy tígoty. ³⁸ Chi ypi guetz'ahuíy ma Jesús ytecy ymíj, e chi yajxooci Jesús ytecy míid huinní e yajpöt míid ycöhuay, chi yajjaaxy je aceite huídi ooy oy xuugy. ³⁹ Co jadu'n íjxy je fariseojäy, je' huídibi anajty ti huoy Jesús, chi jot'ajti ymíñañ:

—Co íxyipy jada Jesús y'ocjéjity Dios ytíy'ajtmíidpi, y'íjxcajpy íxyipy píñ jäy nejpy jäy yi töxyjäy huídibi nídoonip co yi' yjibíctzinäy yjibícjy'aty.

⁴⁰ Chi Jesús ymíñañ:

—Simón, cham ñich tüg ayuc nmíidídyích huídi nyajnimáhuamy.

Chi je' y'adzooy:

—Yajnimaaaygích, Huindzin.

⁴¹ Chi Jesús ymíñañ:

—Tüg comeñyjäy ymíid anajty metz jäy huídi ti ñuucxy. Tüg jäy anuucxy mígoox mígo'px denario meeñ, e je jadügpí anuucxy huíxchígui'px majc.

42 Com je' ajcxy ca' anajty m̄id̄ity ti m̄id̄ cued̄ip, chi je comeeñȳj̄y huinmecxy nimetz. Miich ocn̄imaayḡich, ¿je metzpi jāy hūidi nuucxy, hūidibi je' n̄iḡi chojpy?

43 Chi Simón y'adzooy:

—Hue' n'a'ix̄īyich je t̄ibi huinmecxy jac'anaxy.

Chi Jesús ym̄inañ:

—Ti mdiygapxy.

44 Chi Jesús ni'ijxhuimbijty je töxyj̄y, e nimay Simón:

—¿Nej m'ijxyp jadayaabi töxyj̄y? Co ndiḡīyich ma mdīc, ca' miich n̄ī xymooyich co ndecy nbú̄j̄ibich. Jadayaabi töxyj̄y ñch ndecy ti xypú̄j̄ip m̄id̄ yhuinn̄i, e ti xyméxyich ndecy m̄id̄ ycöhuay. 45 Ca' ñch miich ti xychǖcxy. Jada töxyj̄y jadu'n nej ti yt̄j̄c t̄iḡy, xychǖcxt̄īyb ñch ndecy. 46 ñch miich ca' aceite mb̄id̄ägy ma ñch ngohuajc. Jada töxyj̄y ti xyajjaaxi ndecyich aceite hūidi ooy oy xuugy. 47 Paady ñch miich nyajnim̄y co jada töxyj̄y huinmeecxi y' ymaybocy, co t̄ibi oyhuinma'ñ yajtuñ c̄ixyot huin̄jot. Pinjaty hueeni ypocy yajhuinmecxi, hueeni y' chój̄cin yajniquē̄x̄igy.

48 Chi Jesús je töxyj̄y nimay:

—Ti miich mbocy yajhuinmecxt̄äy.

49 Pinjaty anajty iñ̄aayb ma je mesa ñayñim̄aayiḡixy miñ xȳipy:

—¿Pin jāy jada jada' co nañ yhuinmeecxīpy jāy ypocy?

50 Chi Jesús nimay je töxyj̄y:

—Ti m'alma ñ̄dzögy co ti xym̄ibicyich. Nicx jotcujc.

8

Töxyj̄yd̄j̄c hūidibi anajty Jesús pubejtp

1 Co jadu'n yjajti, chi Jesús ñ̄cxy ma t̄üg'óc̄iy je mij cajp etz mutz cajp, capxhūäcxy je oybi ayuc maabi Dios y'ané'm̄in. Je nimajmetzpi ydiscipulos ajcxy m̄id̄ ñ̄cxy. 2-3 Etz nañ ym̄id̄nicx nij̄j̄ity töxyj̄yd̄j̄c hūidi anajty Jesús ti yajtzögy hūidi ca'oybi anajty ym̄id̄ etz jac tijaty pa'm. Hue' je' ajcxy anajty je María je töxyj̄y hūidi anajty x̄ij̄ip Magdalena, je hūidibi Jesús yajpidzimi huixt̄ujc ca'oybi ma je'; etz Juana, je hūidibi ñ̄äy anajty x̄ij̄ip Chuza, e je Chuza hue' je' je rey Herodes ytungm̄id̄pi; etz Susana, etz jacjadyii ajcxy hūidi anajty ajcxy pubejt Jesús m̄id̄ tijaty anajty ajcxy ym̄id̄.

Je niipi y'ijxpejt

4 Co mayj̄y ooy ñ̄ayyöymujc ma Jesús yhuinduu hūidi tzoön ma t̄üg t̄üg cajp, chi Jesús nimay je mayj̄y ajcxy:

5 —Cha t̄üg ayuc nyajnim̄ahuaanḡixy. Jadu'n jāy t̄üg choñ niipi, ñ̄cxy trigo t̄im̄ hūijpi. Co je trigo t̄im̄ hūijy, chi nij̄j̄ity ypajc oy yc̄äy m̄ij̄t̄ugujc, chi je jāy ajcxy yajhūägpejty, e hūidi ca' yajhūägpejty, chi joon piihūigy. 6 Chi nij̄j̄ity trigo pajc oyc̄äy ma tzaa ñ̄cx. Co ymujxy chi je' yt̄ich, je' co anajty naax ca' yxooḡity. 7 Chi nij̄j̄ity trigo pajc oyc̄äy ma apyot, chi ymujxy quipxy m̄id̄ apy'ung, chi y'ujtz'o'ctay. 8 Chi nij̄j̄ity trigo pajc oyc̄äy ma je naax oybi huinn̄ätz̄ujc, chi ymujxy, chi yeectzooñ, yt̄im̄'ajty oyjaty, t̄üg trigo pajc m̄igo'px oyco'ity.

Co Jesús je m̄iyd̄ägī yajmay chi yjactimcapxcoty, ym̄inañ:

—Pin midohuamb jada ayuc, huen midooy.

Nej yhuimb̄idz̄imy je niipi y'ijxpejt

9 Chi je discipulos ajcxy y'am̄idooy:

—¿Nej jada jadu'm̄bi j̄ihuimbit ayuc yhuimb̄idz̄imy?

10 Chi Jesús ym̄inañ:

—Miich ajcxy jaydëbi mnejhuïhuipy huïdi Dios ñigapxpy ñimiydacpy coyüch'amy ma y'ané'min ycötújcïn. Jacjadyiibi jäy jihuimbit'amy nyajnimayich, jaydëbi pinjaty huïdi ijxp ca' ajcxy y'ixipy, etz pinjaty midoob, ca' ajcxy mido'mbigipy.

Jesús capxticxy je niipi y'ijxpejt

¹¹ Jadu'n je jihuimbit ayuc yhuimbïdzïmy: Je trigo pajc Dios je' y'ayuc.
¹² Je trigo pajc tiibi tügujc ycäy, je' je' jadu'n nej jäy huïdi midoob Dios y'ayuc, chi mic'amy ñiminyii je ca'oybi, e piibïdzïmdäy je Dios y'ayuc ma yjot yhuinma'ñ, ca'ydi mibic etz ca'ydi y'alma yajnïdzögyii. ¹³ Je trigopajc huïdi cähui ma tzaajot, je' y'i' ajcxy huïdi je ayuc midoob, chi cöbicy jotcujc, chi je' ca' ytictztigïy, tzojccïxy y'ocmibicy, co agapxïyb paaty chi ixmajtznï.
¹⁴ Je trigo pajc huïdi ti cähui apy'agujc, je' je' ajcxy huïdibi midoob, chi co ñicxnï jäydigooynï Dios y'ayuc miid jotcujc'ájtïn tzïnaayïn etz jugy'ájtïn etz comeeñ'ájtïn, e chi ca' Dios y'ayuc yhuï'my ma yjot yhuinma'ñ. ¹⁵ Je trigo pajc huïdi cähui ma oyñaax huinnätzcujc, je' ajcxy huïdi oy etz tudägy yjot yhuinma'ñ miidity. Chi je Dios y'ayuc midohuï'my, e oñdägy'amy Dios y'ayuc ymayïy ma yjot yhuinma'ñ.

Je lámpara ñi'ijxpejt

¹⁶ Co jäy ajcxy jïndicxi'ñ nöctzoy, chi ca' ajcxy cöjupy miid tu'tz, nañ ca' huaad pidägy cijx pätcï'py, hue' janchtiy pidaaccïxy ma jïndicxpejt, co pin ytigïy jëbi icy je jïin. ¹⁷ Ca' ni pin ayüch tunipy e nicxy ycayajnejhuïy, ca' ni pin ti tunipy ameech e nicxy ycaniquëxïgy. ¹⁸ Paady miich ajcxy midoogix yajxon co pin tijaty miid, jacyajmöhui'p yï'. Pin ti camïd, yajpigïpy je' huïdi anajty yjamïd.

Jesús ytaj etz je jugymigüg

¹⁹ Chi Jesús ytaj etz y'uch ajcxy ñimiini, ca' ajcxy nimejch Jesús yajxon miid mayjäy ycixpi. ²⁰ Chi Jesús yñimaayi:

—Cheeby mdaj etz m'uch ajcxy tïba'y, miich ajcxy xyjamigapxam.

²¹ Chi Jesús ymïnañ:

—Yï jäy ajcxy huïdibi Dios ayuc midoohuipy etz cuyduunip, yï' ñich ndaj'ájtïpich etz n'uch'ájtïpich.

Jesús yajxemy je poj etz je ñi co anajty chachpidïgy

²² Chi tüg teczy yjajti Jesús ytigïy ma tüg barco miid ydiscípulos ajcxy, chi Jesús ymïnañ:

—Tzoc jim'amy ñïnaxxy nájxim.

Chi ajcxy chooñ. ²³ Chi ñïgujc anajty nïcxcïxy co Jesús ymï'ögy. Chi tüg mic poj miñ ma je mejy. Chi je barco ñï yajtigïyïyï, janch yinjaty jahueenjaty ycaquiñ. ²⁴ Chi ajcxy Jesús nimïjhuägy, tijyücxxy ajcxy nïmaaygïxy:

—¡Huindzin! ¡Huindzin! Cham ajt n'ocquiinim.

Co Jesús oy ymäyhuijy, chi jïjpcogapxïy je poj etz je mejy co anajty chachmïjjëtzpety ma barco. Chi je poj yhuäcxïjptay, y'amoonday. ²⁵ Chi Jesús ymïnañ:

—¿Ma miich ajcxy je mmïbïjcïn?

Chi ajcxy yjanchchïgygoty janch yhuinmay ajcxy ñayñïmáaygïxy miñ xyipy:

—Pin yëdyjc jada jada' co je poj etz ñï jïguexy, etz yajhuäcxïpy, etz ycapxycöbïgyii.

Je Gadarajäy huïdibi anajty ca'oybi miid

²⁶ Chi ajcxy ymejch ma je gadarenos naaxjot, huidi hui'm jim'amy ñinaxy ma je Galilea mijlaguunba'. ²⁷ Co Jesús ñibidzimy, chi jipcobadiy tüg yéydjic huidi anajty ti choñ ma je Gadara cajp. Je' anajty ymiid ca'oybi, ti anajty yjejcni maabi ypadyii. Ca' je' anajty huit yajtuñ, nañ ni ca' anajty chinäy ma ytijc, öcpjut anajty yajtzinähuiyb. ²⁸ Co je' ixpaty Jesús, chi yaaxqueecy, e ycoxtinay'ahuüy ma Jesús yhuinduu, ymínañ janch mic:

—¿Ti ñich miich co xyñimiiñich, Jesús, tügpajc mijpi Dios y'ung? Tun may'ajt ca' nijot xychachchaachytúñich.

²⁹ Jadu'n mínañ com co anajty Jesús ixqueexy je ca'oybi ma je jäy, ti anajty yjejcni ma je ca'oybi anajty tzach'ane'my je jäy. Coxoch anajty ymigügtijc ymiid'adyii miid cadena. Janch ypojtpy cadena, chi ca'oybi anajty yajnicxyii mijtigíduum. ³⁰ Chi Jesús y'amidooy je locijäy:

—¿Ti miich mxii?

Chi je ca'oybi ymínañ:

—Ñich nxii Legión (hue' yhuimbidzimy nimay).

Jadu'n mínañ com nimay anajty ca'oybi ti ytiigüygixy ma je jäy. ³¹ Chi je ca'oybi may'ajt pijctzoy ma Jesús co ca'ydi yquexyii ma ayoodactuuby. ³² Jim anajty tüg quepy idzim chachjicxcixy ma je ujtztot. Chi je ca'oybi may'ajt pijctzoy co huen yajtiyihuipy je' idzim. Chi Jesús ni'adzooy. ³³ Co je ca'oybi ypidzimy ma je jäy, chi ytiigüy ma je may'idzim. Huin'it je may'idzim ñañajtzijibibydaayi ajcxy ma tüg ahuoc, chi oy ajcxy ycädäy nijoty, chi y'ögtay.

³⁴ Chi je idzim cuend'ajtpi ajcxy co ixxy jadu'n nej ti yjadyii miid ajcxy y'idzim, chi ajcxy yqueecy, oy nimiydaaccixy cajpjoty etz majaty tundac. ³⁵ Chi mayjäy ajcxy choñ oy ijxcixy jadu'n nej anajty ti ytunyii ti jadyii, oyja'tcixy ma Jesús. Chi je mayjäy ajcxy paty je yéydjic, tiibi anajty ca'oybi ñibidzimyii ycöbidzimyii, iñäy ma Jesús yhuinduu, huit miid etz huijy quejy, chi ooy je jäy ajcxy chigüy. ³⁶ Chi pinjaty ajcxy ixx miid miydacy jadu'n nej yi' choocy, je jäy huidi anajty ca'oybi miid. ³⁷ Huin'it tüg'óciy je mayjäy ma gadarenos naaxjot etz jadyii cajp huinduy agonbi, chi ajcxy may'ajt pijctzoy ma Jesús co huen jihuägy ma je' ajcxy, co anajty ooy chigüygixy. Chi Jesús ytiigüyñi barcojoty yhuimbijtni. ³⁸ Chi je jäy tiibi anajty ca'oybi ñibidzimyii ycöbidzimyii pijctzoy may'ajt co miid'idan Jesús. Chi Jesús miid capxycijxy, nimay:

³⁹ —Nihuimbit mdijc, etz nimiydäg jada mijpi tung huidibi Dios ti tuñ miid miich ycixpi.

Chi je' ñicxy capxhuäcxy je tiy'ajt cajp cajp jadu'n nej anajty mijhuinma'ñ Jesús ti tuñ miid je' ycixpi.

Je Jairo ñix etz je töxyjäy huidibi Jesús yhuitpa' nïdoni

⁴⁰ Jadu'n yjajti co Jesús yhuimbijty co choñ Galilea, chi je jäy ajcxy cöbijcy Jesús janch agujc jotcuyc, com nidüg'óciy anajty ooy jip'ijxcixy. ⁴¹ Chi tüg yéydjic huidi anajty yxi Jairo huidibi anajty mijtungmiid ma judíojäy ñaymujctac ymiñ ma Jesús, chi minucxtacy Jesús pijctzoy may'ajt co huen nicxy ma je' ytijc. ⁴² Jairo ymiid anajty tügpajc ñix, hue' anajty yjimijt majmetz, janch tim ögaanip anajty. Co Jesús ñicxy miid je', chi janch mayjäy anajty chach'adijyii chach'agodiyii.

⁴³ Chi tüg töxyjäy huidi anajty yxi ybo', ca' anajty y'oc-huäcxijpni, mimajmetz jimijt anajty cujc jadu'n mi'ijtni. Ti anajty ymeeñ yajtundäy ma je tzoydumbi ajcxy, etz ni pin anajty ycayajtzögyii. ⁴⁴ Chi je töxyjäy nimijhuägy je Jesús, chi nïdoni yhuitpä. Janch mic mic je yxi ybo' oy yhuäcxipy.

⁴⁵ Chi Jesús ymínañ:

—¿P'in xyñidoñ ñch nhuit?

Chi ajcxy y'adzooy co ca' p'in. Chi Pedro etz tüg'óciy m'iid je' ym'inañ:

—Huindzin, jäy ti xy'adijy ti xy'abodiy etz miich m'inañ: “¿P'in ti xyñidoñich?”

⁴⁶ Chi Jesús ym'inañ:

—Nidügti ti xyñidoñich. Nnejhu'iybich co m'iid nmic'ájtich ti nyajtzögyich p'injaty.

⁴⁷ Co je töxyjäy jihu'iy co ca' coyüch yhu'i'mañ, chi nimiiñ janch tziyuuyb. Chi yhuindacy ma Jesús yhuinduu, chi capxp'izimy mayjäy'agujc ti ycixpi anajty co ti nidooni Jesús yhuitpa', e co anajty mic'amy ti chögy. ⁴⁸ Chi Jesús nimay je töxyjäy:

—Töxyjäy, ti mdzögy co ti xymibicyich, nicx jotcujc.

⁴⁹ Yam Jesús anajty ycapxy, co ymiiñ tüg jäy hu'idi anajty ti chooñ ma Jairo yt'ijc; je Jairo nihuindzin'ajtp anajty je judiojäy naymujctac, chi nimaay'i:

—Ti y'ögy miich mn'ix, ca' m'jac'amayy nig'i yi Huindzin Jesús.

⁵⁰ Co Jesús jadu'n midooy, chi ym'inañ:

—Ca' mdzig'y, m'ibijc'ich janchtiy, etz tzögip yi mn'ix.

⁵¹ Co Jesús ytig'iy ma je tijc, chi ca' a'ix'iy nicxy ytig'y hueñy'p'inity m'iid je'. Jëyi Pedro, Jacobo, Juan etz je töxy'anäg ytaj yteedy ytig'iy m'iid Jesús. ⁵² Chi tüg'óciy je mayjäy ajcxy janch yaaxp, janch ñé'mgixy m'iid je töxy'anäg ycixpi. Chi Jesús ym'inañ:

—Ca' myaaxcixy, ca' yi' ögity, maab yi'.

⁵³ Chi nig'oob ajcxy nixiicy com ti anajty nejhu'iygixy co ti y'ögni. ⁵⁴ Chi Jesús majch je töxy'anäg ma yci', chi migapxy mic, ym'inañ:

—Töxy'anäg pidig.

⁵⁵ Chi je' yjugyp'icy, e mic'amy ypidigy. Chi Jesús ym'inañ co huen yaj-caaygixy yaj'uuccixy. ⁵⁶ Chi ytaj yteedy ajcxy ooy chig'iy yjihu'iy. Chi Jesús nimay co ca' huaad p'injaty m'iidm'iydägipy jadu'n nej ti ytuñy'ii yjadyii.

9

Jesús quejxy ayuccapxhuäcxp je nimajmetzpi ydiscípulos ajcxy

¹ Co Jesús yajyöymujctay je ni majmetzpi ydiscípulos ajcxy, chi moy je mic'ajt jaydëbi yajtzögipy pa'mjäy, etz moy ajcxy nañ jadu'n cötújc'in co ajcxy ixquexipy je ca'oybi. ² Chi quejxy je' ajcxy ñicxy capxhuäcxixy jadu'n nej Dios y'ane'my, etz yajtzooccixy pa'mjäy. ³ Chi Jesús ym'inañ:

—Ca' ni ti tü'amgixpi mmin'icxixy; ni mgamin'icxip mdajc, ni mmorral, ni mgaagy, ni meeñ, e ni mgamin'icxixipy ajcxy metz mhuit. ⁴ Huen tim hu'idi tijc ma anajty mdig'iygixy, jim ajcxy hu'i'mgixipy, e jim ajcxy nayyöyhuäcx'iyb.

⁵ Hueñy'ma'amyty ma ca' jäy xycöb'ijccixy, co ajcxy mbidz'imgixipy ma je' cajp mhuinnéjpcixipy mhuinjáaxcixipy je naaxjoc ma mdecy. Jada je' tiy'ájt'ip co Dios tzaachytunipy yi jadu'mbi jäy ajcxy.

⁶ Chi ajcxy ñayyöyhuäcx'taayi, ñicxy ajcxy cajp cajp capxhuäcxixy je oybi ayuc, etz yajtzooccixy pa'mjäy hueñy'timma'ámyty.

Co Juan el Bautista y'ögy

⁷ Je rey Herodes co nejhu'iy jadu'n nej Jesús anajty mijhuinmañ tuñ, chi ooy anajty tzachnejhu'ihua'ñ p'in je' anajty. Com nijëjity jäy anajty ym'inaangixy co ti Juan jugyp'icy. ⁸ Chi jacnaagity ym'inaangixy co Elías ti ñayguëx'igyii, e jacnaagity ym'inaangixy co tüg Dios y'ayucnajtzcapx'iybi je' ti yjugyp'icy hu'idi jecy'ajty octzinaybi. ⁹ Chi Herodes ym'inañ:

—Ich yi' ni'ane'mdiy co huen ajcxy Juan ycohuajc yajminajci. ¿Pin jada jada' huidi ich nmidooybich co tzachnimiydaaccixy?

Herodes ooy anajty ja'ixa'ñ Jesús.

Jesús yajcay migoox mil jäy

¹⁰ Co je apóstoles ajcxy yhuimbijty, chi yajm#dmiydactay ajcxy Jesús tüg'óciy tiibi anajty túngixy. Chi ac jëyi ydiscípulos m#d'ajty Jesús mijtig#duum huington ma tüg cajp huidi yx# Betsaida. ¹¹ Co je mayjäy ajcxy nejhu#y, chi ajcxy panixy Jesús. Chi Jesús je mayjäy cöbijctay etz yajm#dmiydacy ajcxy Dios y'ayuc ytiy'ajt nej ané'min cötújc#n m#dity. Jesús nañ yajtzöc#py anajty hu#dijaty yajtzoy#huaam.

¹² Co oy chu'hyñi, chi ym#jhuägy je nimajmetz#pi ydiscípulos ajcxy ma Jesús, chi ajcxy nimay:

—Capxyc#jxn# m#d jadyaabi mayjäy ajcxy, jaydëbi ajcxy ñicx#py ma yi cajp huidi huindyuy agon yajpaat#pi, huen nicx#y ixtaayg#xy jättac etz jim ajcxy paad#py caay#n uuc#n. Com hue' jada it ma ich ajt yam nyajpaat#m mijtig#duum.

¹³ Chi Jesús ym#nañ:

—Mooyg#x miich yi' ajcxy ycaay#n y'uuc#n.

Chi je' ajcxy y'adzooy:

—Jëyi ich ajcxy nm#d#dy#ch migoox tzajcaagy e mejtz acx, nigo co ca' ich ajcxy njuy caay#n uuc#n m#d jadyaab mayjäy.

¹⁴ Hue' anajty oy nimigoox mil je jäy. Chi Jesús nimay je discípulos:

—Yaj'ixtaacc#x ajcxy yi mayjäy.

¹⁵ Chi ajcxy jadu'n cuyduuñ, yaj'ixtactay ajcxy je mayjäy. ¹⁶ Chi Jesús con#gy je migoox#pi tzajcaagy, etz je metz#pi acx, chi ypa't'ijxy tzajpc#xy conuucxy je tzajcaagy etz acx, huin'it tujc-huäcxy moy je' ydiscípulos ajcxy, huen yajhuäc#x#xy ma tüg'óciy mayjäy. ¹⁷ Chi ajcxy yca#y cüxyi, huin'it ajcxy yajmujcy je tzajcaagy yconaxy etz je acx yconaxy majmetz cach.

Pedro capxyp#dz#my co Jesús yi' je' je Cristo

¹⁸ Chi jadu'n yjajt# co Jesús anajty ycapxtägy ahuingujc m#d je' ydiscípulos ajcxy, chi Jesús je' ajcxy y'am#doy:

—¿Pin ich jäy xytijy?

¹⁹ Chi ajcxy y'adzooy:

—Nijëjity jäy xytijy co miich je Juan je Bautista; nijëjity ym#naang#xy co miich je' Dios y'ayucnajtzc#p#y#bi huidi jecy'ajty tz#nay e ti yjugyp#cy.

²⁰ Chi Jesús ym#nañ:

—¿Miich ajcxy, pin ich miich ajcxy xyt#j#x#y?

Chi Pedro y'adzooy:

—Dios yCristo.

Jesús capxyp#dz#my co y'öga'ñ

²¹ Chi Jesús p#dacy ané'min etz cötújc#n co ca' ajcxy ni pin yajnim#ahuip co yi' je' Cristo. ²² Chi Jesús ym#nañ:

—Ooy ycop#cy#ty co ich, je jäy huidi tzoön tzajpjoty, canaag nax ayo'n nbáad#b#ch, ca' xym#j#p#d#äg#b#ch je mijjäyd#jc, je teedy tungm#d#pi, etz je' ajcxy huidi yaj'ixp#cy Dios ñecy, e co n'ög#p njugyp#g#py#ch codug#g x#i.

²³ Chi Jesús nimay ajcxy nidüg'óciy:

—Pen ji pin xypan#x#a'ñ#ch, huen jäyd#goydäy yci'm tzójc#n etz huen xypan#x#y#ch jabom jabom, oy nej ytimyjad#py ytimy'ayoohu#py, tim nipaady nej j#hu#y ti cab#gy mgruudz jabom jabom etz pajamg#ch. ²⁴ Huen pinjäy

huidibi ca' yega'ñ yi yjugy'ájtín ma yi o'cín mïd ñich ycixpi, hue' je' yajtigoyamy yi' yjugy'ájtín. E huen pínjáy huidibi yegamy yjugy'ájtín ma yi o'cín mïd ñich ycixpi hue' je' ypadamy yi jugy'ájtín. ²⁵ ¿Ti tüg jáy ypatpy, pen ti paady tüg'ócíy cohuit'ájtín comeen'ájtín ya naaxhuiñ e nayyajtigoyii, etz ca' y'alma yajnïdzögy? ²⁶ Yi jáy ajcxy pínjaty xymïdzöydúnibich n'ayuc, ñich je' je jáy huïdi tzoon tzajpjoty, nañ nmïdzöydunibich je' ajcxy co anajty nhuimbityich ya naaxhuiñ, mïd ñich n'ané'mín etz nmïc'ajtich etz nDéedyich y'ane'm'ajt, etz ymïc'ajt, etz mïd je ángeles ajcxy ymïc'ajt huïdibi huädz yjot yhuinma'ñ. ²⁷ Janch ñich miich ajcxy nimäy co ji jáy ma miich ajcxy huïdibi ixípy Dios y'ané'mín jayijp ca'ni anajty y'ögy.

Jesús yajtigach je ñinïcx

²⁸ Chi miductujc xiibi maabi anajty jada ayuc jadu'n capxy, Jesús huodzoñ Pedro, Juan etz Jacobo, chi mïd'ajtpy jim ma tüg copjijp Dios mïbijctzoob. ²⁹ Yam anajty Dios ooy mïbijctzoy, co Jesús yhuïñyijp oytigach, e je yhuït yjajty janch poob janch adïcxp. ³⁰ Chi metz jáy ñayguëxíci, mïdgapxy mïdmiydägy Jesús, Moisés je' anajty etz Elías. ³¹ Huïdi ajcxy naygëxíci janch jühuidityi anajty ajcxy je tücxín jájín mïdity, nigapxcíxy nimïydaaccíxy je o'cín huïdi Jesús ypadamy jim Jerusalén. ³² Pedro, Jacobo etz Juan ooy anajty ajcxy chachmähuaní, chi ajcxy mi'ögtigooy. Co oy ymäyhuijçíxy, ijxy ajcxy Jesús y'adïcxín y'ajajín, etz nañ jadu'n ijxy ajcxy je nimetzpi jáy ajcxy huïdi anajty Jesús mïdmiydäcpy. ³³ Jadu'n yjajty co yi jáy ajcxy puyöyduutni Jesús. Chi Pedro Jesús nimay:

—Huïndzín, jotcujc ñich ajt ya. Tzoc tugüg tïc yaj'oyíyím, tüg miich mjëdïby, jadüg Moisés jëdïby, etz jadüg yi Elías jëdïby.

Pedro ca' anajty nejhuïy ti ycapxy. ³⁴ Yam ñigi anajty ycapxy co joc ñaaxcidacy huïdi yajnïdigoy je' ajcxy. Chi ajcxy ooy chigüy co oy joc yajnïdigoydáayigíxy. ³⁵ Chi tüg ayuc yajmïdooy ma je joc ymïnañ:

—Ñich jada n'ung'ajtpy, ooy ndzocyich njihuïyich. Amïdo'ijti miich ajcxy yi' y'ayuc.

³⁶ Co je ayuc y'amoñ, chi ajcxy ijxy Jesús naydüg yhuï'my, chi ajcxy nañ jadu'n amoñ. Huïn'it xï ni ca' ajcxy miydacy mïd ni pín jadu'n nej anajty ti y'ijxcíxy ti ymïdoogíxy.

Jesús yajtzögy tüg yeegy'anäg huïdibi anajty ca'oybi mïd

³⁷ Com jabom co Jesús, Pedro, Jacobo etz Juan ajcxy ymïnajcy ma je copjijp, chi ooy mayjäy choon oyijpcobadïyii. ³⁸ Chi nidügti jáy ycapxy janch mïc, ymïnañ:

—Huïndzín tun may'ajt ix ñich n'ung, yi' ñich tügpajc n'ung'ajtpy. ³⁹ Huen mïnájity ca'oybi ymachyii, chi timetiini yaaxquëgy yajyachyii yajquïdyii, etz yajpidzïmy oy yhuïn'opy y'aa'opy e adzaach y'ixmachyii. ⁴⁰ Ti ñich may'ajt nbijctzooyich ma yi mdiscípulos ajcxy, co huen yajpidzïmy je ca'oybi, per ca' yi' ajcxy ti mïmadägy.

⁴¹ Chi Jesús ymïnañ:

—¡Miich jáy ajcxy huïdibi ca' mïbijcp ca' ajcxy mmïjpidäga'ñ yi tïy'ajt! ¿Naag xï ñich njac'ídipy ma miich ajcxy nmïmecxtújccixípy? Mïmin m'ung ya.

⁴² Co anajty yhuingoñ, chi je ca'oybi yajcidaay je yeeg'anäg, chi ooy yajyatzcooti. Chi Jesús ix'ojy je ca'oybi, e yajtzoocy je yeeg'anäg, chi yteedy yajcïdigíyñi. ⁴³ Chi tüg'ócíy je mayjäy ajcxy ooy chigüy mïd je mïjhuinma'ñ huïdi Dios ytuun.

Jesús capxpïdzïmy jadüg'oc co y'öga'ñ

Jesús ydiscípulos ajcxy ooy jihuuygixy huinmaaygixy co Jesús jadu'n ymínañ:

⁴⁴ —Miich ajcxy yajxon mido'mbíjccix jada ayuc. Ich je' je jäy huídi tzoon tzajpjoty, hue' nyajc'yega'ñich ma pocyjäydijc ajcxy yc'am.

⁴⁵ Je' ydiscípulos ajcxy ni ca' anajty huinjihuuygixy, tzig#yb anajty ajcxy, paady ca' ajcxy jaty nej yaj'amidóogixipy.

¿Pín je' nígí jacmíjip?

⁴⁶ Chi Jesús ydiscípulos ajcxy ytig#y huinmay'ahuídiijt, nejhuhuaangixy pín je' jacmíj'idam. ⁴⁷ Jesús nejhuiy je' ajcxy yjot yhuinma'ñ huídi nayyajmídmíydáacip ajcxy, chi tüg pi'c'anäg huijtzígy, ypidacy ma ymíjic.

⁴⁸ Chi Jesús ymínañ:

—Pínjaty xycöbíjcpích jadu'n nej jada pi'c'anäg xycöbicyich míd ich nxí ycíxpi, ich yí' anajty tí xycöbicyich; je huídibi ich xycöbíjcpích, cöbígíib je huídi tí xyquexyich ya naaxhuiñ. Yí' huídibi jacmútzíp ma miich ajcxy, yí' je' jacmíjpi.

Pín ich ajt ca'p xymíjotma'tím, je' ajt xymíjnicxpejtím

⁴⁹ Chi Juan ymínañ:

—Huíndzin, tí ich ajcxy n'íjxcixy co tüg jäy tí yajpidzimy ca'oybi míd miich mxí miich mmic'ajt. Tí ich ajcxy yí' nyaj'ojyich com ca' yí' ich ajt xypahuídiijtím.

⁵⁰ Chi Jesús ymínañ:

—Ca' myaj'ójcixy yí'; pínjaty ca' xymídzíp'ajtím, ich ajt yí' nmíd.

Jesús jípcogapxíy Jacobo etz Juan

⁵¹ Jadu'n yjajtí co tiempo yhuingoní mína Jesús ñícxíp tzajpjoty, chi yhuinma'ñ pídacý co nícxan'ñ jím Jerusalén. ⁵² Chi Jesús quejxy cogapxy jayíjp jättac píjctzoobi. Chi je cogapxy'ajtpí ñícxý ytigíy ma je samaritano jäy ajcxy ycajp, jättac píjctzoobi. ⁵³ Chi je' samaritano jäy ajcxy ca' yega'ñ jättac, com ñejhuuygixyp co Jesús etz ymígügtíjic ñícxý anajty ajcxy jím Jerusalén. ⁵⁴ Co jadu'n Jesús ymígüg ajcxy nejhuiy co je samaritano jäy ca' jättac yega'ñ, chi Jacobo etz Juan nímay Jesús:

—Huíndzin, ¿nej m'a'ixíyb ich ajcxy n'ocni'ane'mdíyich huen jín cáy huídibi tzomb tzajpjoty, jigíx yí samaritano jäy ajcxy ycíjxtáhuipy jadu'n nej je profeta Elías ytúuñ jecy'ajty?

⁵⁵ Chi Jesús y'íjxhuimbíjty, ogy Jacobo etz Juan, nímay:

—Miich ajcxy ca' mnejhuuygixy tí jot tí huinma'ñ miich ajcxy míd. ⁵⁶ Ich, je jäy huídi tzoon tzajpjoty, ca' tí nmíñich ya naaxhuiñ co jäy yjugy'ajt míñ nyajtígooyich, hue' jánchtíy tí nmiñich co jäy yjugy'ajt nyajtzóogíibich.

Chi ajcxy ñícxni huíngbí cajp jättacp.

Je pínjaty anajty Jesús panícxam

⁵⁷ Jadu'n yjajtí co anajty ñíxcixy ma tüg tü'aa, chi tüg jäy Jesús nímay:

—Huíndzin, ich miich nbanícxamy oy tím ma'amy miich mnicxy.

⁵⁸ Chi Jesús y'adzooy:

—Yí huaax ymíd yí' ajcxy yjut, etz yí joon ajcxy ymíd ajcxy ype'ñ, ich je jäy huídi tzoon tzajpjoty ca' nmídidyich ma nmáhuíibich ma nbócxíibich.

⁵⁹ Chi Jesús nímay jadüg jäy:

—Pajamgích.

Chi je jäy y'adzooy:

—Huíndzin, jayíjp ich ndeedy n'ocyajnaaxtigíhuipy.

⁶⁰ Chi Jesús ymínañ:

—Jëbi yajnaaxtigíhuipy huídibi ca' xypanícxan'ñich. Nícx miich capxhuäcxi Dios y'ayuc y'ané'mín.

⁶¹ Chi jadüg jáy ymínañ:

—Huindzín, nbanícxamy yam. Tun may'ajt ocnajtzmadzíyigich nícx y n'ocmídcapxycíxyich njuugy nmígügích huídí jím ma ích ndíjc.

⁶² Chi Jesús ymínañ:

—Pínjaty yhuinma'ñ tí pídágy co Dios ytung tunaani, ca' huaad íxmach je tung, tím jadu'n nipaady nejihuíy tüg jáy tí ytigíy naaxjídziiztpí míd arado, e ca' huaad y'íjxhuimbity com co huinduum arado nícxíhuipy.

10

Jesús quejxhuäcxy je nidugi'pxmajcpi

¹ Huin'it co jada jadu'n tí ñaxy, chi je Huindzín Jesús huin'íjxy jatugi'pxmajc y'íxpijcpídíjc, chí quejxígy cogapxy metz metz ma tüg tüg cajp majaty ñícxan'ñ.

² Chi Jesús nímáy yí' ajcxy:

—Janch je cosecha ooy tí yhuindíy, yí mídumbí janchtíy hueeni. Chojcxy co nbíjctzóohuim ma nHuindzín Dios co huen quexy ytumbídíjc ma yí cosecha. ³ Nícxícx, ích miich ajcxy nguejpxy jadu'n nej cóbixy y'ung yhuídity pa'uc agujc. ⁴ Ca' mminícxícxíy mbíjty, ní mxäcxuumy, ní mgíg, e ní pín ca' mgapxpócxícxípy tú'am. ⁵ Co ajcxy mdígíhuipy huenyítímtíjcity, jayíjp ajcxy mínángíxípy: “Jí jotcujc'ájtín ma jada tíjc.” ⁶ Pen yung naxy je' ajcxy yajpaady, miich ajcxy je mgapxpócxín jotcujc'ajt myegípy ma je' ajcxy; pen ca' ajcxy yjadú'níty, naadígi'adíp huídí anajty tí mgápícxíy. ⁷ Nañ huí'ngíx ma je tíjc, chí ajcxy mgayípy m'ügípy huídí je jáy anajty ajcxy xymooyb, com je tumbí paatíp je' je ymuju'ñ. Ca' ajcxy mhuídídípy jayjín jaydíjc. ⁸ Huenyítímyhuídí cájpitíy ma anajty mdígíyíxíy, pen je jáy ajcxy xycóbíjcp, caaygíx uuccíx huídí anajty jáy ajcxy xymooyb. ⁹ Yajtzóoccíx yuujáy pa'mjáy huídíjaty jím ma je' ajcxy yajpaady, etz yajnimaaygíx: “Je Dios y'ané'mín huíngóníñ yí' ma miich ajcxy.” ¹⁰⁻¹¹ Huenyítímyhuídí cájpitíy ma anajty mdígíyíxíy, e ca' anajty jáy xycóbígaangíxíy, co ajcxy mdzónaaníp, nímáaygíx: “Yí mgajp naaxjoc huídí tí ypety ma ích ndecy nhuinnébáamyíx, yí' je' íjxpejt co Dios ajcxy xychaachytunípy. Chí nejhuíyíxíy miich ajcxy jada co je Dios y'ané'mín tí ymíhuíngóní.” ¹² Ích miich ajcxy nímáy co huin'it xí co anajty yajhuaad'aty, Dios nígi tzaachytunaangíxíy je jáy huídí ajcxy ca' miich ajcxy xycóbíga'ñ, ca'ydí Sodoma cajpjáy.

Je cajp huídíjaty ca'p ycapxymídoy

¹³ Chi Jesús yjacmínañ:

—¡Miich ayoob ajcxy Corozín jáy! ¡Miich ayoob ajcxy Betsaida jáy! Co jím ma je Tiro cajp etz Sidón cajp caytuní cayjajtí je Dios ymíjhuinma'ñ huídí tí ytunyíí tí yjadyíí ma miich ajcxy, jécyíp íxyípy ajcxy yjothuimbíjtní, etz tí yajniquéxíccíxy íxyípy míd je yhuít íñaaygíxy sací níjen nícuuyjam íxcuyjam (je' je tíy'ajt co ooy ytajcíxy ymaygíxy míd ypocy ycíxpi). ¹⁴ Janch jadu'n yjadípy co anajty Dios yajnigödugíy, nígi o'ctíy miich ajcxy ayo'n mbaadíyb ca'ydí jadu'n nej Tiro jáy etz Sidón jáy. ¹⁵ E miich ajcxy Capernaum jáy ajcxy, ¿nej mmináangíxy mjátcíxípy tzajpjotyí? Hue' m'ídaaccíxyp miich ajcxy ma yí ayoodactuuby.

¹⁶ Je jáy ajcxy huídí miich ajcxy m'ayuc xymídoohuíp, nañ xymídoohuíb yí' ajcxy ích n'ayuc. Je jáy ajcxy huídí miich ajcxy ca' xy'íxa'ñ, nañ ca' je' ajcxy

xy'ixa'ñich; e pinjaty ca' xy'ixa'ñich, nañ ni ca' yi' ixaangixy je Dios je huidi ti xyquexyich ya naaxhuiñ.

Chi ajcxy je nidugi'pxmajcpi yhuimbjtcixni

¹⁷ Chi je nidugi'pxmajcpi huidi Jesús yquejx ayuccapxhuäcxpi yhuimbijttay ajcxy janch jotcujc, ymınaangixy:

—Ixti je ca'oybi ti ñich ajcxy xycapxycöb'jccixy m'iid miich mxii.

¹⁸ Chi Jesús ymınañ:

—Ti n'ixyich nej je ca'oybi yhuindzin ti ycäy, jadu'n nej jihuüy ti ycäy ti ycödigiüy tzajpcíxy, jadu'n nej tüg huizuc. ¹⁹ ñich miich ajcxy mic'ájtín ti nmooygixy, jaydebí ca'oybi ca' xymimadáaccixipy, tim jadu'n nipaady nej jihuüy tza'ñ etz ca'ty myajhuäpéjtcixy e ca' nej mjájtccixy. ²⁰ N'igi miich ajcxy jotcujc'ájtccix co ajcxy mxii y'jtcixy cojay jii by tzajpjoty, ca'ydi co ajcxy ca'oybi xycapxymidoogixy.

Chi ooy Jesús yjotcugiy

²¹ Huin'it Jesús yjotcugiy m'iid je Dios yjihu'iñ ymic'ajt, ymınañ:

—Nyajnajxypich Dioscojuyip ma miich, Dios Teedy, tzajpjoty pi Huindzin etz je naaxhuiñybi Huindzin, co ti myüch jada mijhuinma'ñ ma yi cohuinma'ñ jäydijc, etz ti myajnejhuüy je jäy huidi ca' y'ixpicyity. Dios Teedy, jadu'n miich ti mduñ com jadu'n miich ti mjäygidacy.

²² Ndéedyich ti xyajc'idigiydäyich tüg'óciy tijaty mic'ajt oy'ajt. Ni pin ca' ijxcajp pin je' Dios y'ung'ajtpy, jeyi nDéedyich tüg'pajci pin xy'ijxcajpich. Ni pin ca' ijxcapy pin je' nDéedy'ájt'pich, jeyi je Dios ung tüg'pajci huidi ijxcajp, etz jacjadyii ma je ung yajnguëxiga'ñ.

²³ Chi Jesús ni'ijxhuimbijty yi' ydiscípulos ajcxy, ahuingujc ajcxy nimay:

—Jotcujc ajcxy je jäy ajcxy huidi ijxcixp jadu'n nej miich ajcxy ti m'ijxcixy.

²⁴ ñich miich ajcxy nimayb co ooy may Dios y'ayucnajtzcapxiyb etz rey ajcxy ja'ixa'ñ huidibi miich ajcxy m'ijxpy, e ni ca' ajcxy ix; etz jamidoo'ida'ñ huidi miich ajcxy midooyb, e ni ca' ajcxy midooy.

Ijxpejt ma tüg samaritano ojjäybi

²⁵ Chi tüg jäy huidi yaj'ixpijcp Dios ñecy ytinaay'ahuüy jot'ixy huinma'ñ'ixy Jesús, chi y'amidooy:

—Huindzin, ¿ti huaad ndunipich co ñich jugy'ajtin huinixibi nbáadibich?

²⁶ Chi Jesús y'adzooy:

—¿Ti jaybétyip ma yi Dios ñecy? ¿Nej mhujnhuüy co mnecycapxy?

²⁷ Chi je ley huindzin y'adzooy:

—Mdzogipy mjihuüipy mHuindzin Dios m'iid tüg'óciy m'aa mjot, m'iid tüg'óciy m'alma, m'iid tüg'óciy mmijaa, etz m'iid tüg'óciy mjot mhujnhuüy, e mdzogipy yi mijjin midijc jadu'n nej miich ci'm naychogyii.

²⁸ Chi Jesús y'adzooy:

—Ti ooy yajxon m'adzooy. Tun yi', e mdzinähuip huinixii.

²⁹ E je' nañ jadu'n tim tiy ñejhuühua'ñ, nimay Jesús:

—¿Pin ñich nm'idijc'ajtpy?

³⁰ Chi Jesús y'adzooy:

—Tüg jäy choñ jim Jerusalén ycidägy anajty jim Jericó, chi oy meetzpi minaybadyii. Chi ajcxy tüg'óciy yhuít e tijaty yi' anajty ym'iid pijtaayí. Chi ajcxy ooy huinhuojpy jiphuojpy huingojxy jipcojxy, chi ajcxy ixmach jahueengi ögy, chi ajcxy ñicxni. ³¹ Tüg judío teedy yminagiüy ma je jimbi tü'aa. Co y'ijxy je tzaachijäy, chi jüyöyñajxy. ³² Nañ jadu'n yminagiüy ma je jimbi tü'aa tüg levita jäy huidi tuumb ma Dios ytijc, co jim yjaty mihungon je tzaachijäy,

co oy ixy, nañ chi jüyöyñajxy (ca' pa'ayooy). ³³ Chi tüg samaritano jäy anajty jim naxiy, co mihuingoñ je tzaachijäy, co oy ixy, huin'it ooy pa'ayogooty je tzaachijäy. ³⁴ Chi je' nimijhuaäy, chi puji e xojtzi je chaachi'au, nañ tzoयीi chaachi'au müd aceite etz vino. Chi yaj'iyujcpety, e yajnicxy jim ma yjättac, e jim cuend'ajty. ³⁵ Com jabom co anajty ñicxaani, chi yajpidzimy mejtz denario meeñ, moy je codijc nimay: “Cuend'at jadayaabi tzaachijäy, jadu'n nej anajty mjacmeeñyajuñ, co ñich anajty nhuimbityich huin'it nmigüedipy.” ³⁶ ¿Ma je nidugigpi jäy pin je oybi ti tuñ müd je jäy huidi anajty je meetzpi ti ymeechyii ti yajtzaachiyii?

³⁷ Chi je jäy huidi Dios ñecy yaj'ixpijcp Jesús y'adzooy:

—Je huidi ti yajuñ je pa'ayo'ñ.

Chi Jesús ymínañ:

—Ñicx miich, e tun nañ jadu'n pa'ayo'n.

Jesús yajpaady ma Marta etz María ytijc

³⁸ Chi jadu'n yajty co Jesús anajty ytüyöy, chi ytigüy ma tüg mutz cajp. Jim anajty tüg töxyjäy huidi anajty yxii Marta, yi' yajjättaci ma ytijc. ³⁹ Je Marta ymüid anajty tüg y'uch töxyjäybi huidi anajty yxii María, chi je' y'ixtacy ma Jesús ymijc, amidoo'ijti je' y'ayuc. ⁴⁰ Chi je Marta ooy anajty jim chachjottigoy tuñ anajty tigatii ma ytijc, chi nimijhua'cy je Jesús nimay:

—Huindzin, ¿ca' nej mnayjihuyiiji co ñich naydüg yam tzach nayyajuñyijichich? Níma' yi María co huen xypubétyich.

⁴¹ Chi Jesús ymínañ:

—Marta, Marta, yi maytung miich mdzachmijottigooyb. ⁴² Tügpaic ji, huidibi ooy ycopícyip. Yi María ti yi' huin'ixy je oybi huidi ni pin ca' ypiigiyb.

11

Jesús yaj'ixpijc nej jébi mibijctzohuim Dios

¹ Jadu'n yajti co Jesús anajty Dios mibijctzoy ma tüg it lugar, co yajmay, chi tüg discípulo ñímaayi:

—Huindzin, yajni'ixiygich ajcxy tzajcapxycapxi, jadu'n nej Juan yajni'ixiy yi' ydiscípulos ajcxy.

² Chi Jesús ymínañ:

—Co ajcxy Dios mmibijctzohuipy, jadu'n minángixipy:

Dios Teedy, miich huidi tzajpjoty tzinaayb, huindzigüy miich mxii y'ity. Huen miñ ya miich yi m'ané'min. Huen mdzójcin yajcuyduñ ma je jäy yjot yhuinma'ñ jadu'n nej yajcuyduñ jiiby tzajpjoty.

³ Mooygich ajcxy ngaayin n'uucin jabom jabom.

⁴ Méecxibich ajcxy nbocy ngaydey huidibi ñich ajcxy ndundigooyb, jadu'n nej ñich ajcxy nmeecxyich huidibi ajcxy xymidundigooybich. Ca' m'a'ixiy co ñich ajcxy huinma'ñ tigoyipich. Yajnihuaatzcich ajcxy ma yi jibicpi.

⁵ Chi Jesús yjacmínañ:

—Pinjaty ji ma miich ajcxy huidi tüg ymigüg müd, co ninícxipy mijcoodz e mnimahuipy: “Migüg, tun may'ajt yajpijctzoogich tugüg mdzajcaagy. ⁶ Tüg ñich nmigüg ti xyñimiñich huidi tüyöyp, etz ca' nmídidyich ti nmöhuibich.”

⁷ Chi je jäy y'adzooy jiiby tigoty, ymínañ: “Ca' xy'amayiyich. Ti ñich ndijc n'agüyñi, etz n'ungich yam nmídidich cijx'am; ca' njatyich nej nbidigibich etz nmöhuipy huidi mbijctzooyb.” ⁸ ñich miich nimaayb, oy ca' tzojc nipidiga'ñ ymöhuamy huidi pijctzou co migüg'adyii, hue' ymöhuamy jaydebi ca'ydi yjac'amayiyii, chi yegipy tüg'ócay huidi yajmayajtpy. ⁹ ñich miich ajcxy

nimaayb: Pijctzóogix, e myajmóhuipy ajcxy. Ixtaaygix, e mbaadipy ajcxy; cogapxiiygix, ahuádzip ajcxy mdijc'aguu. ¹⁰ Tüg'óciy je' pín pijctzoob tijaty ma Dios, cidigihuib; pín y'ixtaayb, ypaadipy; pín cogapxiiyb, yaj'ahuatzib ytiyc'aguu.

¹¹ ¿Pín ungededy ji ma miich ajcxy pen y'ung ypijctzoob tzajcaagy, nej mmóhuipy tüg tzaaji? ¿E pín ypijctzooyb acx, nej jébi mmóhuipy tüg tza'ñi? ¹² ¿Pen ypijctzooyb tzeydüty, nej jébi mmóhuipy ca'ty? ¹³ Pen miich jibicjáy ajcxy mnejhuib nej oybi m'ung móoygixipy, ¿nej ca' mdijy yjanchity co mDios Teedy tzajpjtopy xymóoygixipy je Espíritu Santo, pen miich ajcxy mmibijctzohuipy?

Yajñibijccixy Jesús co mñidity mujcu'ymic'ajt

¹⁴ Chi Jesús anajty yajpidzimy tüg ca'oybi ma tüg jáy huidi anajty uumip. Jadu'n yajty co je ca'oybi ypidzimy, chi je uum ycapxigy. Chi je mayjáy ooy jihuiy huinmay. ¹⁵ Nijéjity jáy ymínaangixy:

—Jesús mijhuinma'ñ ytumyb mñid je Beelzebú ymic'ajt, je ca'oybi yhuindzin, paady ca'oybi yajpidzimday.

¹⁶ Jacjaydiibi jáy ajcxy co jot'ixaangixy huinma'ñ'ixaangixy Jesús, pijctzooy ajcxy Dios tüg ymijhuinma'ñ. ¹⁷ Co Jesús nejhuib nej je' ajcxy jot'adyii huinma'ñ'adyii, chi nimay:

—Co tüg gobierno ñaybijc-huäcxyii, chi ñaychiptúnigixy miñ xyipy; ñayyajcixigixy ñayyajtigóoyigixy; co tüg quëx jáy ñaybijc-huäcxyii, nañ jadu'n je' ñayyajcixigixy ñayyajtigóoyigixy. ¹⁸ Pen je mujcu' ajcxy ñaybijc-huäcxip, ¿nej jada je mujcu' y'ané'min yjac'idipy? Miich ajcxy minamb co ñich mñid ndúñich je Beelzebú ymic'ajt co ñich ca'oybi nyajpidzimy. ¹⁹ Pen jadu'n yi', ¿pín je mic'ajt mooyb huidi miich ajcxy xypahuidijtp co yajpidzimy je ca'oybi? Paady yi' ajcxy c'm yajniquëxícip co miich ajcxy mdundigooygixy mgapxtigooygixy. ²⁰ Pen ñich mñid Dios y'ané'min nyajpidzimyich ca'oybi, janch jada co Dios y'ané'min ti yjaty ma miich ajcxy.

²¹ Co tüg micjáybi mñidity maydujt, e ñaycuend'adyii yajxon, ca' je' ytigoyipy tijaty ymñid. ²² Co yjaty jadüg jáy jacmicpi ca'ydi je', chi ymimadägyii, e ypijctáyii tüg'óciy ytujt huidi anajty ooy jot'amij'adyii, e yajhuäcxipy tijaty anajty ymñid.

²³ Pínjaty ca' xymijnicxpétyich, nmidzipich yi'. Pínjaty ca' ytuñ mñid ñich co jáy nyaj'ixpicyich Dios ytiy'ajt, hue' je' ajcxy jáy yajhuinma'ñdyigooyb.

Je ca'oybi co jadüg'oc yhuimbijty

²⁴ Co je ca'oybi ypidzimy ma je jáy, chi je' ñicxy jim títznaax ijxtägy co ypocxa'ñ. Co ca' paty ypocxtac, huin'it ymína'ñ: “Huimbidaambich ma je jáy yjot yhuinma'ñ ma ñich ti n'octzombi.” ²⁵ Co je ca'oybi yja'ty ma anajty ti chinäy, chi paady je jáy yhuinma'ñ janch yhuádzity janch ooy jadu'n nej tüg tijc huidi janch huádz pedigity. ²⁶ Chi je ca'oybi ñicxy, e mñid miñ jahuixtujc ca'oybi jacjibicpi ca'ydi je'; chi ajcxy ytigiiy ma je jáy yjot yhuinma'ñ, e chinay ajcxy jüby; huin'it je jáy jac'o'ctiy oy yajtni ca'ydi jadu'n nej anajty jayijp'aty.

Huidi ajcxy janch jotcújcip

²⁷ Co Jesús jadu'n anajty ymína'ñ, chi tüg töxyjáy mayjáy agujc mic ymína'ñ: —Jotcujc je töxyjáy huidi ti xyajpi'c'aty etz huidi xyajyeegy.

²⁸ Chi Jesús ymína'ñ:

—Je' jacjotcujc pínjaty Dios y'ayuc midoohuip etz cuyduunip.

Jibicjädijc pijctzoogixy tüg tiy'ajt mijhuinma'ñybi

²⁹ Co je mayjáy ajcxy jübigiiy, chi Jesús ymínandacy:

—Jadachambi jäy ooy ajcxy yjibicjäyity, ypjctzooyb ajcxy mijhuinma'ñ ijxpejt. Ni camina Dios ajcxy ycamöhuuyb ijxpejt, jëyi tügpajc Jonás y'ijxpejt yajmöhuyb. ³⁰ Com jadu'n nej je Jonás jecy'ajty ijxpejt yecy ma je Nínive jäy, nañ jadu'n iich, je jäy huidi tsoon tzajpjoty, nyegaamyich ijxpejt jadachambi tiempo mïid jäy ycixpi. ³¹ Je töxyjäy reina huidi tzinay jecy'ajty ma madzäcruudz ypïdzimy, yi' je' xidähuam jadachambi tiempo jäy co anajty Dios tïyduna'ñ mayjäy, etz yajpocycähuyby ajcxy. Ixti ma naaxhuiñybi yocigixiy jim je reina choon co anajty amido'idani je rey Salomón ycapxy y'ayuc. Ji naaxhuiñ jadachambi tüg Dios ytïy'ajtmïdpi jacnigi ymïjity ca'ydi Salomón anajty. ³² Co anajty Dios tïyduna'ñ yi may naaxhuiñyjäy, chi je jäy ajcxy huidibi anajty cogajpïp jim Nínive pidägaangixy etz yajpocycähuaangixy jadachambi naaxhuiñyjäy. Com je Nínive jäy jothuimbijt je' ajcxy co Jonás Dios y'ayucnajtzcapxiiyi. Ji jadachambi tüg Dios y'ayucnajtzcapxiiybï jacnigi ymïjity ca'ydi jadu'n nej anajty je Jonás.

Je tïy'ajt huidibi nipaady nej lámpara ma ajt nninïcx

³³ Ni pïn ca' yüch je jïin huidi ti nögpity, ni ca' pidägy jii by cajón pa'tci'py, jëyi janchtïy pidägy je jïin ma jïindïcxpejt, jaydëbi co pïnjaty ytigïhuyby tigoty, codicxiib je jïin. ³⁴ Je jïin ma miich ajcxy mninïcx je' yi' miich ajcxy mhuiin. Pen oy miich ajcxy mhuiin, nañ jadu'n tüg'ócïy miich ajcxy mninïcx ymïd yi' tïicxin. Pen ca' y'öyity mhuiin, nañ jadu'n ajcxy yi' mninïcx yajpaty agootztuum. ³⁵ Cuend'ájtciix yi tïy'ajt huidi miich ajcxy mïid, ca' mgoyützcixy, com co jadu'n nicxy y'ahuimbity nej cootzpi. ³⁶ Pen miich mdïy'ajt codicxiy y'ity mïid Dios ytïy'ajt, tüg'ócïy quëxigtähua'ñ janch huädz.

Jesús ca'p jäygidaci je fariseos etz je escribas ajcxy yhuinma'ñ

³⁷ Co Jesús ycapxtay, chi tüg fariseojäy may'ajt pïjctzoy huen nicxy mïid cayii. Co Jesús ytïjctigïy, chi y'ixtacy ma je caybejt. ³⁸ Co je fariseojäy ijxy jadu'n nej Jesús ytuñ, chi ooy huinmay nej co Jesús ca' ñayajpocyhuächyïi mïid nïi jayïjpnï ma anajty ca'ni ycaayni. ³⁹ Chi je Huindzin Jesús ymïnañ:

—Miich ajcxy fariseojäy, ooy mnaybidaaccixy tudägyjäy ma jäy ajcxy yhuinduu e ca' yjanchity; chi jada' ma mjot mhuiinma'ñ miich ajcxy ooy m'adzocy, etz mïid ajcxy jibic-huinma'ñ; tim jadu'n nipaady nej myajhuäch ajcxy yi tasi ninïcx, yi texyñinïcx e chi ajcxy yajhu'mgixy jibicpi je tasioty je texyjoty. ⁴⁰ ¡Miich ajcxy ca' Dios y'ayuc huinjïhuuybi! ¿Ca' mnejhuuygixy co yi pïn ti texyñinïcx yajcojy nañ ti yajcojy texyjot? ⁴¹ Tun miich ajcxy oojäy'ájtïn, huin'it janchtïy anajty ajcxy mhüädzity ma mjot mhuiinma'ñ.

⁴² ¡Ay miich ayoobi ajcxy fariseojäy! Com mbidaaccixy abicy tüg picy je majcpi mïid yi Dios ycixpi ixti yi tzajnimang, yi ruda, etz tüg'ócïy aay ujtz. Chi jada' ca' mduñ je oojäy'ájtïn etz tïy'ájtïn jadu'n nej Dios tzocy. Hue' je' oy mduñ co tijaty abicy mbidägy mïid Dios ycixpi, nañ jadu'n copicy oojäy'ájtïn mdunipy etz Dios ytïy'ajt mguydunipy.

⁴³ ¡Ay miich ayoobi fariseojäy ajcxy! Co ooy m'adzójccixy je iñaybejt huidi cöduum ma naymujctac, etz ooy m'adzójccixy co huen jäy ajcxy ycapx-pooocxcixy oy huindzigïy mayjäy agujc.

⁴⁴ ¡Ay miich ayoobi ajcxy huidi yaj'ijxpïjcp Dios yley etz miich fariseojäy ajcxy! Oy mjanaybidáacigixy oojäy e ca' yjanchity, ca' mguydungixy Dios ytïy'ajt, jadu'n nipaady miich ajcxy nej öcpi jut huidi ca' yquëxïgy, chi jäy yöy nïgix, com co ca' ñiguëxïgy.

⁴⁵ Chi tüg jäy huidibi yaj'ixpïjcp Dios y'ayuc ymïnañ:

—Huindzin, co jadu'n miich mīna'ñ, nañ jadu'n ñich ajcxy ooy jibic nayjihuiyigixy.

⁴⁶ Chi Jesús ymīnañ:

—¡Ay ayoob miich ajcxy Dios y'ayuc huindzin! Miich ajcxy mgójcixyp canaag costumbre huidi je jāy ajcxy ca' mīmadāga'ñ, e ca' ajcxy mba'ayoogixy, tim jadu'n nipaady nej jihuiy tūg tziimy ti mmooygixy jemxypī huidi ca' je jāy ajcxy mīmadāga'ñ, e miich ajcxy ni ca' mgihuāx jēda'ajty mgayajpadaangixy je tziimy.

⁴⁷ ¡Ay miich ayoob ajcxy! com myajcojciy je ōgpi jut ma je Dios ayucnajtzcaxiibi naaxtigiy, je huidi m'ap mdeedy ajcxy yaj'o'c. ⁴⁸ Jadu'n yajhuinjihuiy nej jihuiy miich ajcxy ooy mjāygidāgy jadu'n nej ajcxy m'ap mdeedy ytundigoy. Janch yi' ajcxy yaj'ōgy Dios y'ayucnajtzcaxiibi, e miich ajcxy myajcoj je ōcpi jut ma ajcxy je' ñaaxtigiiy.

⁴⁹ Paady yi' Dios jadu'n huinmay, e mīnañ: Nyajniguexipyich miich ajcxy profetas etz y'ayuccapxhuācxpi, e miich ajcxy myaj'ōgip nijējity, etz jacnaagity mbahuidijttāccixipy. ⁵⁰ Dios yajcomidohuipy jadachambi tiempo jāy ajcxy je ypocy huidi y'ap yteedy ajcxy ytuñ, com maabi naaxhuiñ chondāgy, yi' ajcxy yaj'ōgy Dios ytiy'ajtmīdipi. ⁵¹ Janch nīmaaybich miich ajcxy co Dios yajcomidohuipy jadachambi tiempo jāy ajcxy je y'ap yteedy ypocy co ajcxy yaj'o'cy Dios ytiy'ajtmīdipi chondāgy ma Abel, ixti Zacarías huidi jāy yaj'o'c ma Dios ytiyc tība'gujc.

⁵² ¡Ay miich ayoob ajcxy Dios y'ayuc huindzin! Ca' miich ajcxy m'ixpīga'ñ Dios ytiy'ajt, nañ ca' mdzocy co yi' jāy ajcxy ixpīgipy; tim jadu'n nipaady nejjihuiy ti mbicy je tiyc ahuaast e ca' miich ajcxy mdigīhua'ñ, e ni mgatzojccixy co huingbi nicxy ytiyiy.

⁵³ Co Jesús anajty jadyaab ayuc yajnīmaaygixy, chi je Dios y'ayuc huindzin etz yi' fariseojāy ajcxy jotmātcooty chi yaj'amidogoty ajcxy may ayuc. ⁵⁴ Ñayñīmāayigixy miñ xyipy co huen amido'ijt Jesús y'ayuc, jigix jēb páatcixipy huidi jēb mīd xīgixipy.

12

Jesús yaj'ixpicy co ca' huaad pīnjaty naybīdaaci oyjāy pen ca' yjānchity

¹ Chi je mayjāy ooy nimujcy Jesús, janch jadu'n ñay'adijy ñay'agodiiyigixy, chi Jesús nīmaydacy je' ydiscipulos jayijp:

—Nigüendi mīd yi' fariseojāy ajcxy nej ajcxy yjāyay'ixpījccixy. Yajxon yi' ajcxy ycapxy ymīydāgy, chi ca' cuydungixy. ² Ca' ji ti huidi ijtp ayūch nicxy ycajajnejhuiy, nañ ni ca' ji ti huidi ijtp ameech nicxy ycaniguēxīgy. ³ Huen huidi ayuc miich ajcxy ameech mgapxy, yajnejhuihuip yi'. Huen huidibi ayuc huidi ti mnayyajnīmāayigixy ameech jūiby tīgoty, mīc yajcapxhuācxip tiyc nīgīxy.

Pīn jēbi huaad ndzigīyim

⁴ Chi Jesús yjacmīnañ:

—Miich ajcxy nmīgūgtijc, ñich miich ajcxy nīmaayb co ca' mdzigīyigixy yi' jāy ajcxy huidibi nīñcx yaj'o'cp, com ca' jac ni ti ajcxy tunipy. ⁵ Hich miich ajcxy nyajni'ixihuiipy pīn huaad jēbi mdzigīyigixy. Yi' janch mdzigīyigixy yi' Dios huidibi jugy'ajt pījcp, e huin'it mīd je' ymīc'ajt jēbi quexipy m'alma ma je mij jūin. Yi' janch mdzigīyigixy yi'.

⁶ ¿Nej ca' jäy ajcxy ytoogyii migoox joon m'id metz pi'cmeen? Dios ni tüg yi' ajcxy ca' jäy digooyity. ⁷ Ixti mgöhuay ajcxy ac michoy Dios m'idity. Ca' mdzigiygixy, jactzou nigi miich ajcxy ma Dios ca'ydi pi'cjoon ajcxy.

Je pinjaty ca'p midzöyduñyii Jesús mayjäyjoty

⁸ Ich miich ajcxy nimaayb co pinjaty ma miich ajcxy huidi capxp'idzim mayjäyjoty co xymibicyich xymijpidägyich, ich, je jäy huidi tzoon tzajpjoty, ngapxp'idzimipyich co ti ngöbicyich jadu'mbi jäy ma Dios y'angeles ajcxy yhuinduu. ⁹ Pinjaty ca' xycöbicyich mayjäy'agujc, nañ jadu'n ich yi' ca' ngöbigipyich jilby ma Dios y'angeles ajcxy yhuinduu.

¹⁰ Tüg'öciy jäy huidi jadu'n ich, je jäy huidi tzoon tzajpjoty, xyñigapxp xyñi'ojhybich Dios huinmecxib. Chi jada' pinjaty nigapxp ni'ojhyb je' Dios yjihu'iñ (je Espíritu Santo), yi' janchtiy Dios ca' yhuinmecxib.

¹¹ Co mmidzip ajcxy xyajnicxip ma naymujctac, ma codungdijc, etz tungm'idi yhuinduu, ca' mdájp mmáyip nej m'adzógixipy, e ca' mhuinmayipy nej ajcxy m'adzohuipy. ¹² Com je Dios yjihu'iñ huin'itiy ajcxy xya-jni'ixihuip nej huaad m'adzoogixy.

Naygüend'ajtigixy ca'p adzojccixy comeen'adii

¹³ Chi nidügti je mayjäy ymínañ:

—Huindzin, nima' n'ajchich co huen yajhuäcxy m'id ich huidi ndaj ndeedyich ñidungiy.

¹⁴ Chi Jesús ymínañ:

—Yëydijc, ca' ich ni pin ti xypidägyich ane'mbi ma miich ajcxy etz yajhuäcxi.

¹⁵ Chi Jesús nimay je jäy ajcxy:

—Ijxcix naygüend'ajtigix, ca' m'adzojccixy comeen'adii, com je m'alma yjugy'ajtín ca' je' n'adzocin'adyii huidijaty miich ajcxy m'id.

¹⁶ Chi ajcxy yajnimay tüg ayuc, ymínañ:

—Jim anajty tüg comeen'yäy huidibi anajty ooy mij ypidägy yajpidägy.

¹⁷ Je comeen'yäy anajty ooy c'm huinmay ma yjot yhuinma'ñ, ymínañ: “¿Ti n'octunipich com ca' nm'ididyich ma nyajnidägibich yi tübi y'ity?” ¹⁸ Chi ymínañ jotjoty huinma'ñyoty: “Nyajpidicnibich ndzëx, e ngójibich jacmijpi, chi tüg'öciy jilby nbidactahuibich tübi y'ity.” ¹⁹ Co jadu'n ndunipyich, chi jëbi jotcuyc ndzinahuibich, com ooy anajty nm'ididyich pidägy yujcpiy, jëbi canaag jimijt niboocxyich etz jëbi ngay n'ügyich jotcuyc. ²⁰ Chi Dios nimay je comeen'yäy: “Ooy jibic-huinma'ñ miich m'idity. Cham coodz ich miich nibijctzohuiahuanay yi m'alma (m'ögip), e co anajty ti m'ögy yi huidibi ti myujcpiy, ¿pin yi' je'adiib?” ²¹ Jadu'n yajty yi' ajcxy huidibi ymeen'idi'ñ c'm yujcpijcp, ca' yi' ajcxy jilby ycomeen'yity ma Dios yhuinduu.

Dios ycuend'ajtpy y'ung y'anäg

²² Chi Jesús nimay je y'ixpijcidijc:

—Paady ajcxy nimaaygixy co ca' huaad mjottigooygixy ma yi mdzináayin yi mjogy'ajtín, huidi mjicxcixipy mgáaygixipy, huidi m'id mninix mxójxcixipy.

²³ Yi jugy'ajt jacnigi tzou yi', ca'ydi yi caayin uucin, etz je mninix jacnigi choohuity ca'ydi huit. ²⁴ Ijxcix yi joogy ni ca' ñipy, ni ca' chijccixy, ni ca' m'idity ytijc ni chëx, e Dios yi' ajcxy mooyipy huidi yjicxcixyp, ¿nej cayjacnigi miich ajcxy mdzoohuity ca'ydi joon ajcxy? ²⁵ Ca' ji ni pin ma miich ajcxy pin jadipy nej ñayjijptzomihuib jadüg c'nuux. ²⁶ Pen ca' m'ajtcixy nej mdúngixipy huidi hueen huinma'ñ, ¿nej co mdzachmijottigooygixy yi tzinaayin yi comeen'ajtín?

²⁷ Ijxcix yi aaybijy nej xóxyity, ca' ytaaccixy ni ca' yxuuygixy. Hich miich ajcxy nimaayb, co ni je rey Salomón mïid tüg'óciy ymeeñ ca' ñayxoxi jadu'n nej jada aaybijy ujtzpijy. ²⁸ Pen jadu'n Dios xoxy yi aay yi ujtz huídibi cham jajtíp ma yi tungop, e com jabom ti anajty ñiicxni, Dios xypubedipy xypudigihuiipy ñigi miich ajcxy huídi hueen mibijcp. ²⁹ Ca' miich ajcxy mhuinmay'ahuídítciixipy ajcxy ti mgáaygixipy m'úuccixipy. ³⁰ Yi naaxhuiñjáy ajcxy ymijottigoyb anaxy tüg'óciy caayin uucin, huit etz tijaty. Miich ajcxy huídi mijpidacp Dios, Dios Teedy ñejhuíyb co copicy ajcxy mïid'adipy caayin uucin etz huit tucxy. ³¹ Jayijp mijottigooygix Dios y'ayuc ytiy'ajt, chi jada' tüg'óciy huídi ajcxy myajmayjaty mbáatcixipy yi'.

Jugy'ájtïn mijpi jii by tzajpjoty

³² Chi Jesús yjacmínaañ:

—Ca' miich ajcxy mdzigiiygixy, miich ajcxy mnihueeñity, per mDios Teedy yega'ñ ane'mdac tzajpjoty mïid miich ajcxy ycixpi. ³³ Tooccix tijaty miich ajcxy mïid, nimooygix ayoobitijc. Yaj'oyiiygix meeñ'idi'ñ huídi ca' y'amijihuiipy ni camina. Yaj'oyiiygix tüg pidägy, janch mij e janch oy, jii by tzajpjoty huídi ca' ycixipy ytigoyipy, ma ca' meetzpi huaad ytiyiy, ni ucxyting ca' yajhuindigoyipy. ³⁴ Pen miich ajcxy mïid mgomeeñ'ájtïn ya naaxhuiñ, yaayi je mjot mhuinma'ñ ajcxy. Pen mdzojcpy ajcxy je oybi huídibi Dios yegamy, nañ mïid'ájtciy jim jabom jabom mjot mhuinma'ñ ajcxy ma Dios.

Tzoc íjtim ni'ixi'

³⁵ Chi Jesús yjacmínaañ:

—Ni'ixiiygix mjot mhuinma'ñ jadu'n nej jihuiy mhuit myujc'ameetcixy co mdunaangixy, etz jadu'n nej jihuiy lámpara mnögpjccixy co mdzumnaangixy m'ahuixaangixy je huindzin. ³⁶ Ni'ixi'ijtcix jadu'n nej jáy huídi yhuindzin ahuijxp, co anajty yhuimbity co anajty ti y'oy ma jáy ti ypicy, chi co anajty minipy ycogapxiy, mic'amy myaj'ahuädzity ytijc. ³⁷ Jotcuje ajcxy je tumbi co je yhuindzin anajty yjady, e paady chumnajx juugy. Janch nimaaybich miich ajcxy co je tumbi ajcxy yhuindzin anajty yjady, chi yhuít yujc'ameedipy, chi ajcxy yaj'ixtägipy ma caybejt, yajcayipy yaj'ügipy. ³⁸ Oy miinipy je huindzin mijcoodz o moñiyi, e páadip je tumbidijc ajcxy jim chumnáxcixy juugy, jotcuje je' ajcxy je jadu'mbi tumbidijc. ³⁹ Nejhuiiygix jada co je codijc ixipy nejhuíhuipy ti hora ymina'ñ je meetzpi, chi juugy ixipy chuumnaxa'ñ, e ca' ciyegipy ytijc nicxy jáy tigoty ymeech. ⁴⁰ Miich ajcxy nañ jadu'n íjtcixy ni'ixi', mïna anajty ca' ti mhuinmaaygixy, huin'it miina'ñich ñich, je jáy huídi tzoön tzajpjoty.

Je tumbi tudägyipi etz je tumbi ca'pi ytudägyity

⁴¹ Chi Pedro Jesús nimay:

—¿Pïn jada ti myajnimaaayb jada ayuc huídi ti mgapxy, ñich ajcxy, o nidüg'óciy jáy?

⁴² Chi je Huindzin Jesús ymínaañ:

—Huídibi tumbi je' ya huídi tumb mïid yhuindzin janch cixyot huinijot huídi mïid yhuijy'ajt ycuje'ajt huídi je yhuindzin mooyip ané'min ma ytijc, huídi yajnigidägiiyb tumbidijc nej ypaadyii. ⁴³ Jotcuje je tumbi co anajty je' yhuindzin yhuimbity e padiiyb ti cuyduñ jadu'n nej anajty ti ñimäyii. ⁴⁴ Janch ñich miich ajcxy nimäy co je tumbi huindzin yajmihui'mdähuiipy jada ytumbi tüg'óciy pidägy huídi ymïid. ⁴⁵ Pen je tumbi yhuinmaayb jotjoty huinma'ñjoty co je yhuindzin yhuäcxijpni mïna ymiina'ñ, chi midziptzoön jacjadyii tumbidijc ajcxy, huojpni, cojxni, nañ ytiyiyñi caayb uucp anaxy etz

ymügyii. ⁴⁶ Chi je tumbi yhuindzin miinipy ma je xii hora anajty ca' jipp'ixy e ni canehuiy anajty, e huin'it ooy tzaachytunipy yi tumbi e chi pidägyipy ma je huidi ajcxy ca' ytudägyity.

⁴⁷ Je tumbi huidi nejhuiyb nej yhuindzin chójcin, e ca' cuyduñ, ni ca' ycapxymidoy, ni ca' ni'ixi' ity co yhuindzin anajty yhuimbity, je' je' nigí yajtzaachytunip. ⁴⁸ Je tumbi huidi ca' yajxon huinjihuý nejjihuý yhuindzin chójcin, hueeni je' yajtzaachytunipy. Huenpínity huidi may yajmooyb, may yi' yajmibijctzohuiyb; etz huenpínity huidi ti mihui'my ooy, yajmibijctzohuib nigí.

Jesús ycixpi ñaybije-huäcxyii jäy

⁴⁹ Chi Jesús yjacmíañ:

—Hich ti nmiiñich ya naaxhuiñ co jin nbidägbich. ¡Ooy njadzocyich ji ixyipy ñitooyñi! ⁵⁰ Nyajnaxipyich tüg tzaachypi, e ¡ooy ndajy nmayich ixti mabaad yajcuydundäy! ⁵¹ ¿Nej miich ajcxy mdijy co ti nmiiñich ya naaxhuiñ co nyajcixipyich je tzipi? Hich miich ajcxy nimaayb co ca'. Hue' janchtiy nyajnaybije-huäcxáanibich jäy ajcxy. ⁵² Jadachambi etz yjacnixni xii tiempo ji migoox tüg quëxjädijc huidibi ajcxy ñaybije-huäcxib, tugig mid je metzpi, e metzpi mid je tugigpi. ⁵³ Je ungededy tziptunip mid ymang etz je mang mid yteedy. Nañ je ungdaj tziptunip mid yñix etz je nix mid ytaj. Nañ jadu'n je xecy tziptunip mid yxecy.

Je xii tiempo ytiy'ajt

⁵⁴ Chi Jesús nimay je mayjäy ajcxy:

—Co ajcxy m'ixy je joc ypidägy ma xii ycidägy, chi mīnaangixy co tühuaam, e janch jadu'n yjadyii. ⁵⁵ Co ymiiñ je jinboj, chi miich ajcxy mīnaangixy co ambigaamb, chi janch jadu'n yjadyii. ⁵⁶ ¡Miich jibic jäy ajcxy! Ooy mjajtciy nej myajcaxciy yi xii tiempo huidi ajcxy m'ijxpy tzajpcixy etz ya naaxhuiñ: ¿Nej co ca' mjajtciy nej myajcápcixipy xii tiempo ymiiñ ycidägy?

Naymi'oyihu mid midzip

⁵⁷ ¿Nej co miich ajcxy ca' ci'm mnaydiyduunigixy nej ytudägyity je tiy'ajt? ⁵⁸ Co mñicixy ma yi codung mid yi mmidzip jac'oy co mnayyaj'oyihuipy mid yi mmidzip tü'am, ca'ydi mid mjädip ma yi codung, e chi je codung xyciyegipy ma je xueetz, e je xueetz xpidägyip pujxtigoty. ⁵⁹ Hich miich nimaayb co ca' jiiyby mbidzimipy, ixti cooni mgüejtähuiipy tüg'óciy.

13

Ooy ycopicyity nyajtigajzim nhuinmañ

¹ Huin'it jäy midmidyacy Jesús jadu'n nej je gobernador Pilato yaj'ögy nijëjity jäy jim Galilea, chi tem huidijti ajcxy ñi'py mid iyujc ñi'py huidi je' ajcxy mid huindzigi'ñ tuuñ. ² Chi Jesús y'adzooy nimay ajcxy:

—¿Nej mdijy, nigí anajty ypocymidity je galileojäy ajcxy huidi jadu'n ayo'n patp, ca'ydi nidüg'óciy galileojäy? ³ Hich miich ajcxy nimaayb co ca'. Pen miich ajcxy ca' mjothuimbijtcixy ma Dios etz nay'adzigiyyigixy ma Dios, nidüg'óciy miich ajcxy mgijxtähuiip mdigoydähuiip. ⁴ E je' ajcxy je majmocxtugigpi huidi je mjtijc jim Siloé nigidaagootti, yaj'öci ajcxy. ¿Nej mdijy nigí ajcxy ypocymidity, ca'ydi nidüg'óciy je jäy huidi tzinayb jim Jerusalén? ⁵ Hich miich ajcxy nimaayb co ca'. Pen miich ajcxy ca' mjothuimbijtcixy, nañ mgijxtähuiip mdigoydähuiip miich ajcxy nidüg'óciy, jadu'n nej je' ajcxy.

Ijxpejt ma je higeri ca'pi anajty ytäm'aty

⁶ Chi Jesús yajnimay ajcxy jada ayuc:

—Tüg jäy anajty m̄idity higueri cojy ma y'aguemy, chi ñicxy jüby ma y'aguemy higueri t̄im ijxtaybi, ni ca' paty. ⁷ Chi nimay je' ytumbi: “Cham miduḡig jimijt m̄iñich ya higueri t̄im ijxtayb ma jada higueri cop, ni tüg nga-paadyich. Huen yajpujxciday jada higueri cop, nej co nigoobi ñaaxnihua'ñ.”

⁸ Chi je' ytumbi y'adzooy: “Huindzin, oc'ixmatz. Huen jadüg jimijt j̄eyi ocjactinäy, octajyich jayijp ȳi naax j̄uhuidityi, etz oc'abonij̄yich. ⁹ Pen t̄im'ajt ca' nyajpuxipy, pen ca' yt̄im'aty j̄ebi nbújxigipy.”

Jesús yajtzögy pocxx̄duum tüg töxyjäy jigojopyi

¹⁰ Chi Jesús anajty yaj'ixpicy ma tüg naymujctac pocxx̄duum. ¹¹ Jim anajty tüg töxyjäy huidi anajty mimajmocxtuḡig jimijt cujc m̄'ijtni yj̄bojpa'm, agojoty anajty yöy, ni nej anajty yca'oȳy nej ytinaayguḡihuipy. ¹² Co Jesús ijxy, chi yaaxi, e nimay:

—Töxyjäy, ti mdzögy.

¹³ Chi yci' cijxxajy ma je töxyjäy yj̄ix, e chi je' yj̄ix yt̄iy, huin'it yt̄iḡiy Dios ojadajt̄pi. ¹⁴ Huin'it je naymujctac huindzin ooy yjotmäty m̄id co anajty Jesús jäy ti tzoȳy pocxx̄duum. Chi je naymujctac huindzin nimay ajcxy je mayjäy:

—J̄eyi tudujc x̄i jäy huaad ytuñ, huen miñ semaanjoty p̄in yajtzoȳihuam, ca' ypocxx̄duumity.

¹⁵ Chi je huindzin Jesús ym̄inañ:

—¡Miich ajcxy naybidaacip nej tudägyjäy, e ca' yjanchity! ¿Nej ca'miich ajcxy mm̄iguej̄y mhuaajuubi, etz mburro ma yp̄cxtac pocxx̄duum, e myajnicxy ajcxy ni'ucpi? ¹⁶ E jada Abraham y'ap y'oc huidi Satanás ca' y'ixmachii majmocxtuḡig jimijt, ¿nej ca' ypadyii nyajtzöḡibich pocxx̄duum?

¹⁷ Co Jesús jadu'n y'adzoy, chi yajtzöyduuñ ymidzip. Chi tüg'óc̄y cajpjäy oy ajcxy yjotcuḡiyḡixy m̄id je oybi huidi Jesús ytuun.

Ijxpejt ma je mostaza pájc

¹⁸ Chi Jesús ym̄inañ:

—¿Nej m'oc'a'ix̄iyḡixy ȳi Dios y'ané'min? ¿Huidi m̄id n'ocyajquipx̄ihuibich?

¹⁹ Jadu'n Dios y'ané'min nipaady nej mostaza pájc huidibi tüg jäy ñiip ma y'aguemy, chi ymujxy etz yeegy ooy janch m̄ij, chi je joon ajcxy oy ype'ñ p̄idaaccixy ma je mostaza quipy aacxy.

Ijxpejt ma je levadura ca'p óyity

²⁰ Chi Jesús jadüg'oc ym̄inañ:

—¿Huidibi m̄id n'ocyajquipx̄ihuibich ȳi Dios y'ané'min? ²¹ Jadu'n Dios y'ané'min ni paady nej levadura huidi tüg töxyjäy yt̄ijhuidij̄t m̄id tuḡig quipxi'ñ harina ixti cooni yajxunday je harina.

Je tü'aa x̄ützpi

²² Co Jesús anajty ñicxy jim Jerusalén, chi yaj'ixpicy anajty Dios y'ayuc yt̄iy'ajt cajp cajp majaty ñaxy. ²³ Chi tüg jäy Jesús amidoy:

—Huindzin, ¿nej hueeni ȳi jäy ajcxy huidi y'alma n̄dzöḡip?

Chi Jesús y'adzooy:

²⁴ —M̄ijp̄idaaccix Dios yt̄iy'ajt amuumd̄uḡjot, j̄ebi ajcxy m'alma n̄dzöḡipy, jadu'n nipaady nej jäy ajcxy ñaymic'ij̄xiḡixy co yt̄iḡihuaangixy ma je t̄ijc agu x̄ützpi. Jadu'n ñich miich nimaayb co mayjäy ooy ja'a'ix̄iy yt̄iḡihuaangixy ma Dios y'ane'my e ca' ajcxy jadipy nej yt̄iḡiyḡixipy. ²⁵ Co je codijc yp̄id̄iḡipy etz aḡiyñip yt̄ijc, huin'it miich ajcxy p̄injaty t̄ibäy huim, chi jüby t̄ibäy miich ajcxy mm̄inandäḡipy: “Huindzin, yaj'ahuädz”, e chi je t̄ijc huindzin miich ajcxy xy'adzohuipy: “Ca' ñich miich ajcxy nejhūyich ma miich ajcxy

mdzoongixy.” ²⁶ Chi huin'it miich ajcxy minandägiipy: “Miid ich ajcxy miich ti nmüdgaaigy ti nmüduuccixy, e miich ti myaj'ixpiy ma ich ajcxy ngajp.” ²⁷ Chi je Huindzin y'adzohuipy ajcxy: “Ich miich ajcxy nimayb co ca' nnejhuüyich ma miich ajcxy mdzoongixy. Jihuäccix ma ich nhuinduu, miich ajcxy pocy ytumbi.” ²⁸ Chi miich ajcxy jim ooy mdäjcixipy mmäygiipy, myáaxcixipy mdüitzquéetcixipy, co miich ajcxy m'ixipy Abraham, Isaac, Jacob etz tüg'ócüy yi Dios y'ayucnajtzcaxxiyb iiby ma Dios y'ane'my, e miich ajcxy tibäy anajty ti mhuim'igixy. ²⁹ Minip yi jäy ajcxy huudibi tzoomb ma xii ypidzimy, ma xii ycidägy, ma jayhuixtuyc ypidzimy, etz cham ma madzäcruudz ytinaay'ahuüy, chi y'ixtääccixipy ma je caydac iiby ma Dios y'ane'my. ³⁰ Paady ji jäy ajcxy huudi cham axam'ajtp, je' ajcxy jayijp'adip, etz ji jäy ajcxy huudibi cham jayijp'ajtp, etz je' ajcxy axam'adip.

Jesús taj may miid Jerusalén ycixpi

³¹ Chi nijëjity fariseojäy nimay Jesús:

—Quëg ya com yi rey Herodes xyaj'ögaam.

³² Chi Jesús y'adzooy:

—Nícx nimaaygix yjiibi huaax co nyajpidzimybich ca'oybi etz nyajtzoocypich jäy cham etz jabom, codugiig xii ti ndung mayijich. ³³ Ooy ycopicyity co ich njactüöyibich cham, jabom etz huixtic. Com ypaadyii co Dios y'ayuccaxhuäcxpi y'ögip ajcxy jim Jerusalén.

Chi Jesús yjacmínaañ:

³⁴ —¡Jerusalén jáy! ¡Jerusalén jáy! huudibi yaj'o'cp Dios y'ayucnajtzcaxxiyb ajcxy, etz ycögadz ajcxy je jäy huudibi Dios ti xyajniguéjx ajcxy. Janch canaag'oc ich miich ajcxy njahuijtzmugañ jadu'n nej tzeydaj y'ung yajmucy queecpätcipy, chi ni ca' jadu'n ti m'a'ixiiygixy. ³⁵ Chi jada' ijxcix cuenditungix, com jadachambi mgajp yhui'my najtz'ixi'. Ich miich ajcxy nimayb co ca' xy'ixipyich jadügtecy, ixti cooni anajty tiempo paaty mina mmináangixipy: “Capxpaaty je' huudi miimb miid Huindzin'ajtín Dios ycixpi.”

14

Jesús yajtzögy tüg yëydijc quixpa'mmüdpi

¹ Chi jadu'n yajti co tüg pocxxiiduum Jesús ytigiy ycayañ anajty ma tüg fariseojäy ytijc, hue' anajty judío tungmüdpi. Chi yi judío ixpiyitijc ajcxy tzach'ix'ijtcixy Jesús, amidoo'ijtcixy Jesús y'ayuc. ² Huin'it tüg jäy huudibi ymiid anajty quixpa'm miin ma Jesús yhuinduu. ³ Chi Jesús ymigapxi je' ajcxy huudibi yaj'ixpijc Dios ñecy etz yi fariseojäy ajcxy, nimay:

—¿Nej je Dios ytiy'ajt ymínañ? ¿Huaad o ca' huaad chögy jäy pocxxiiduum?

⁴ Chi ajcxy y'amonday. Huin'it Jesús cñixajiiy je pa'm jäy, chi yajtzöocy. ⁵ Chi Jesús nimay je fariseos ajcxy:

—¿Nej miich ajcxy pen niijutcögäp ajcxy mhuaajuubi o mburro pocxxiiduum, nej ca' mic'amy nícxxy yajpidzimigixy oy ypocxxiiduumi?

⁶ Chi ca' ajcxy jajty nej y'adzohuimbijtcixipy.

Je pinjaty huodzoöñyip ma je pijcpi yajnixüduñyi

⁷ Co Jesús ijxy jadu'n nej yi' ajcxy jac'oybi iñaybejt huin'ijxcixy jim ma je caybejt, chi ajcxy tüg ayuc yajnimaaay, je tübi anajty yajhuomiingixy:

⁸ —Co miich myajhuoohuipy ma pijcpi yajnixüduñ, ca' m'ixtägipy ma je iñaybejt cödumbi, ca' jécyity co yajhuoomiñ huudi je' iñaybejt ymihuaad. ⁹ Chi jada' xyñimähuiipy je huudibi anajty ti xyhuoomiñ: “Mo' jada migüg jada iñaybejt cödumbi.” Chi miich tzöydu'n miid mnicxpy ma je' iñaybejt axambi.

¹⁰ Co jäy xyhuoohuipy ma je pijcin yajnixüduñ, jim m'ixtägip ma je axambi

iñaybejt, e co yminiipy je huidibi anajty ti xyhuomiñ, chi xyñimähuiipy: “Migüg, nax ma yi iñaybejt cödumbi.” Huin'it capxpaady m'idipy ma je' ajcxy huidibi anajty iñayb ma caybejthuinduu müd miich. ¹¹ Pinjaty ci'm naygömáyip, tzöydu'nbaadip je'. Pinjaty naybidaacip nicy xeemy je' je' capxpaady y'idip.

¹² Chi Jesús nimay pinjaty huidi anajty ti yhuoomiñyii:

—Co miich mxüduunipy ca' mhuoohuiipy je jäy ajcxy huidibi ooy müd mnaymigüg'ájtigixy, ni mmidügquëx, ni m'ajuugy m'amigüg, ni mmidijc comeeñybi, ca' jécyity co nañ jadu'n xyhuohuiipy, e chi anajty jac mij yejchumbijty. ¹³ Co mxüduunipy, chi huohuiipy ayoobitijc, tzaachijäy ajcxy, tecymätpi ajcxy, etz jäy huiintzpi. ¹⁴ Huin'it miich mjotcuje'adipy co yi' ajcxy ca' jadipy nej yejchumbidipy. Jiini Dios xymigüedipy co anajty yajjugypicy je tudägypi jäy ajcxy.

Je ijsxpejt ma tüg adzoo'ájtin mijpi

¹⁵ Tüg jäy huidi anajty iñayb müd Jesús ma caybejt thuinduu co midooy nej Jesús ymíañ, chi nimay Jesús:

—Jotcuje je jäy ajcxy huidi cayip jiihy ma Dios y'ane'my.

¹⁶ Chi Jesús y'adzooy:

—Tüg jäy may anajty jäy yaj'adzu'ada'ñ, chi jayijpni oy mayjäy nimay co anajty yaj'adzu'ada'ñ. ¹⁷ Co je adzoo'ibi paty, chi quejxy tüg cogapxy huen nicxy huogixy je tiibi anajty ajcxy yajnimäy, nimay ajcxy: “Jámgiç, ti jim yajni'ixiy je caayin uucin.” ¹⁸ Chi ajcxy nidüg'óciy yminandacy: “Tun may'ajt meecxcich, ca' y'oyiy nej nyajnicxibich.” Chi je' jayijp jäy y'adzoy: “Ti njuyich tüg rancho je' copicy jayijp nicxy n'ixyich, paady ca' nicxa'ñich; tun may'ajt meecxcich.” ¹⁹ Chi jadüg jäy ymíañ: “Ti njuyich migoox par huaj yuubi, nicxy n'oc'ixmadza'ñich jayijp, paady ca' y'oyiy nej nicxibyich, tun may'ajt meecxcich.” ²⁰ Chi jadüg jäy ymíañ: “Tim chamni nbicyich, paady ca' oyiy nej nicxibyich.” ²¹ Co je cogapxy yhuimbijty, chi yajnimay je' yhuindzin jadu'n nej je jäy ajcxy y'adzooy huidi anajty oy ti huoy. Huin'it je huindzin ooy yjotmätcoty, chi nimay je ytumbi: “Nicx tzojcyi cajpjoty ma yi jäy ajcxy yögyixy ñajxcixy etz ma yi mij tü, e chi huomiinipy pin mdimypaatyp ayoobitijc, yi tzaachijäy etz huiintzpi.” ²² Chi je' ytumbi ymíañ: “Huindzin, ti nduñich jadu'n nej ti xyñimäyich, etz jac chiini iñaybejt.” ²³ Chi je huindzin nimay je' ytumbi: “Nicx ma yi mij ni mij tü yajmin je jäy ajcxy adzip, huen ich ndijc uch. ²⁴ Chi ich miich nimäy co ni tüg yi jäy ajcxy huidi jayijp yajnimay, ca' ajcxy y'adzuu'adipy müd ich.”

Nej ooy chípiy co Cristo nbanicxim

²⁵ Chi may anajty jäy ñicxy müd Jesús, chi Jesús yhuäc-huimbijty, nimay ajcxy:

²⁶ —Pen ji pin xypamiñich, e ooy nigü tzocy yi' ytaj yteedy, yi' ytöxyijc, yi' y'ung, y'ajch o chi', etz nañ ooy nigü tzocy yi' yjugy'ájtin, ca' ich yi' huaad ndiscípulo'adyiijich. ²⁷ Yi' jäy ajcxy huidi xypamiimbich huidi ich ndiscípulo'adaanip, copicy yajnaxipy ajcxy ayo'n, jadu'n nipaady nejihuüy ycruudz ti cabiccixy e nicxy yajcruudzpeda'ñyii. ²⁸ Co miich ajcxy mmijtijc mgoja'ñ, chi miich ajcxy jayijp m'ixtaaccixy e m'a'ixiygixy jadu'ñyi meeñydunaangixy, nej pen müd ajcxy huidi jëbi müd myajmaagyixy je mmijtijc, o peni ca'. ²⁹ Ca' yjécyity co anajty je tijc ti yajpojtzigy, chi anajty ca' m'ocajtini nej myajmayipy, e pinjaty anajty ti xy'ixy, chi ooy xyñixigipy xyajxigipy. ³⁰ Chi jäy ajcxy ymíañ: “Jadayaabi yëydijc nigoo ti yajtzondägy tijc poch, e ca' ti ocyajmaayni.” ³¹ O huidi rey ji co chona'ñ tziptumbi müd

huingbi rey, ¿ca' jayijp huinmayipy pen jëbi chiptuñ mïd majc mil jäy, pen je ymidzip miimb mïd iipx mil jäy? ³² Ca' yjécyity co je tügpï rey jiguemni anajty miñ, chi quexipy tüg huingapxpï pijctzohuipy may'ajt ca'ydi yi tzip yjadyii. ³³ Hueñypínity ma miich ajcxy pen ca' m'ixmájtzcixy tüg'óciy tijaty miich ajcxy mmïd, ca' ñch yi' huaad ndiscípulo'adyii.

Co je caan ytamtz'ajt ytigooyñi

³⁴ Yi caan ooy yi' y'óyity pen ymïd ytamtz'ájtïn. Co je caan ytigoy ytamtz'ájtïn ca' ji ni ti xücx'ájtïn yegipy. ³⁵ Yi caan huïdi ti ytigoy ytamtz'ájtïn ni ca' y'oybidägnity ma je naax, ni ma je püx huïdi aboon'ajtp. Hue' janchtiy yaj'ixjidejtp tibäy. Pinjaty ñch n'ayuc xymïdohuaanip huen mïdo'mbicy.

15

Ijxpejt ma je cöbixy huïdibi tigooy

¹ Chi ajcxy je yajcujtpidijc etz pocyjäydijc nimijhuägtay ajcxy Jesús tzach'amïdoo'idaani ajcxy je' y'ayuc. ² Chi ajcxy huïdi ooy tzachmijpidägy judíojäy ytiy'ajt etz huïdi ajcxy yaj'ixpijc Dios ñecy ameech nigapxcixy ni'ojïygixy je Jesús, chi ajcxy ymïnañ:

—Yi Jesús pocyjäydijc ajcxy ymïgüg'ajtpy, e yi' mïd ycaaygixy.

³⁻⁴ Chi Jesús jadayaabi ayuc ajcxy yajnimay:

—Huïdi jäy ji ma miich ajcxy pen ymïd mïgo'px cöbixy co ytigoy nidügti, ¿nej ca' yajhuimipy je mada'px majmocx mïdaaxpi jim ma chinaaydac, chi nicxy ixtäy huïdi anajty ti ytigoy ixti cooni paadip? ⁵ Co paadip, chi mic'amy pidägy ma quejycoj janch jotcujc. ⁶ Co yajjädip ma ytijc, chi huomucy ymïgügtijc etz ymïjïn ymïdijc, nimähuipy ajcxy: “Jotcugïygix mïd ñch, ti ñch ngöbixy nbaady huïdi anajty ti ytigooy.” ⁷ ñch miich ajcxy nimaayb co nañ jadu'n tzajpjoty ooy jotcujc'ájtïn nïgi mïd co tüg pocyjäy yjothuimbity, ca'ydi mïd mada'px majmocx madaax tudägypi jäy huïdi ca' ytundigoy.

Ijxpejt ma je meen huïdibi tigooy

⁸ Chi Jesús yjacmïnañ:

—¿Huïdi töxyjäy ji pen ymïd majc ymeen, co ytigooy tüg meen, nej ca' jïn nöctzohuipy, e ytiyhuipy pedïgpï ixtähuipy ymeen oñydägy ixti cooni paadipy?

⁹ Co paady, chi huomucy ymïgügtijc etz ymïjïn ymïdijc, e chi nimähuipy: “Xondaaccix mïd ñch, ti ñch nmeen nbaty huïdibi ñch anajty ti nyajtigoy.”

¹⁰ Jadu'n ñch miich ajcxy nimäy co nañ jadu'n Dios y'ángeles ajcxy ooy yjotcújcity co yjothuimbity tüg pocyjäy.

Ijxpejt ma je ungu huïdibi ymeen yajticxtay

¹¹ Nañ jadu'n Jesús yjacmïnañ:

—Tüg yëydijc ymïd anajty metz ymang. ¹² Chi je jacmutzpi nimay yteedy: “Tat, mooygich yi' pidägy huïdi xypaatpich.” Chi je' yteedy je pidägy yajhuäcxy.

¹³ Hueeni anajty xii tzuu cujc ñicxy, co je' ymang mutzpi yajmujctay tüg'óciy huïdi yi' yjé'ajtpy, chi choon ñicxy huingnaax huinggajp. Chi jim mic'amy yajtunday yajtigoyday tüg'óciy huïdi anajty ymïd. ¹⁴ Co anajty ymeen tüg'óciy yajtunday, chi miñ tüg mij yuu ma je cajp. Chi ooy je mang mutzpi caayin uucin huit meen jayajmayajtni.

¹⁵ Chi je' ninicxy tüg jäy ma je jimbi naaxjot ymidunañ anajty. Chi yquejxi ma yrancho idzim cuend'ajtpi. ¹⁶ Ooy anajty janijot'aty ycüxa'ñyii mïd je pëtztiim huïdi anajty idzim y'ojcipy. Chi ni pin anajty ni ti ycamöyii. ¹⁷ Co yhuinmañ yajmejch, chi ymïnañ ma yjot yhuinmañ: “Jim janch maytumbi ma ñch ndeedy ytijc, ymïd ajcxy jicxy picy janch may'amy. ñch ya tzach'ayoob mïd yuu xii. ¹⁸ Tzonaambich

ya, ñicxa'ñich ma ñich ndeedy, ñimähuibich: Tat, ti ndundigóyich mïd Dios tzajpjotyti etz mïd miich. ¹⁹ Cham ca' ypadyii miich ñina'nip co miich xy'ung'adyiijich. Yajtungich jadu'n nej mdumbidijc." ²⁰ Chi je' choñ, ñicxy ma yteedy. Jegügyñi anajty ymiñ co yteedy y'ijxpaati. Chi yteedy ypa'ayogoti, e ñicxy poyigy oy jipcobadiy. Chi yögmennajxy etz tzücxxy. ²¹ Chi je ung ymiñ: "Tat, ti ndundigooyich mïd Dios tzajpjotyti etz mïd miich. Cham ca' ypadyii ñicxy miich ñina'ñ co ñich miich xy'ung'adyii." ²² Chi je ungedeedy ñimay je' ytumbi: "Yajpidzim je huit oybi, mic'amy yajñijenñygyix jada n'ungich, chi moogyix yi çijitiz etz ycig. ²³ Ñicx yajtzoongix yi huaj mang ñicxpi, yaj'öccix, chi ngaayim n'uucim e nxïduunim. ²⁴ Jada n'ungich jadu'n nipaady nejñihuñy anajty ti y'ögy, e chi ti yjugypicy. Tigooy yi' anajty e ti yjady." Chi ajcxy ooy yjotcugñy.

²⁵ Chi je ymang mijpi camjoty je' anajty. Co yja'ty mihuingon je ytijc, chi midoy co jäy ooy yxüxy etz y'ech. ²⁶ Chi yaaxi tüg ytumbi y'amidooy: "¿Ti yi' tünip jajtíp?" ²⁷ Chi je tumbi y'adzooy: "Ti yjady m'uch, ti mdeedy yaj'ögy tüg huaj ñicxpi, co ymang ti huimbity juugy." ²⁸ Chi je ungoob ooy yjotmät, ca' anajty ytigihua'ñ tigoty. Huin'it je yteedy ñibidzimi, ycohuanñy co huen tigiy tigoty. ²⁹ Chi je' y'adzooy, ñimay yteedy: "Janch micanaag jimijt ñich miich mïd nduñ, ni ca' ngapxhuimbityich. Ca' chambaad miich ni xycamooyich tüg pi'ccöbixy jaydeb njotcujc'adipyich nxïdunipyich mïd nmigügtijcich. ³⁰ Per co yi mmang ti yjady huidi oy ti yajtundäy yi ymeeñ mïd jibic-huinma'ñ mïd jibic töxyjäydijc ajcxy, chi ti myaj'ögy huaj mang ñicxpi mïd yi' ycixpi." ³¹ Chi je ungedeedy ñimay je' ymang: "Miich ung huinixi ya mïd n'ity. Tüg'öciy huidi nmïdich miich yi' mje'. ³² Ooy ycopicyity co nxïduunim etz njotcugñyim, co yi m'uch jadu'n anajty nej ti y'ögni, e jadachambi ti yjugypicy, ti anajty ytigoy, e cham ti yajpaady."

16

Je ijxpejt ma je mayordomo huidibi ca' yhuindzin miduñ tudägy

¹ Nañ jadu'n Jesús ñimay yi' ydiscipulos:

—Jim anajty tügjäy comeñybi, ymïd tüg ytumbi huidi yi' ypidägy cuend'ajtíp. Chi oy ñimäyii co tüg je ytumbi nigoo anajty tzachyajtuñ je meeñ ma ycapaadyii. ² Chi je huindzin oy yajhuoyii je' ytumbi, chi ñimay: "¿Nej jada co ñich jadu'n ñimäyijich mïd miich ycixpi? Ya yi' cuenti çimoydaaygich nej ti mduñ, etz ca' ñich miich n'ocjactumbi'adaanin." ³ Chi je pidägy cuend'ajtpi jot'ajti: "¿Ti ndunipich? co yi' nhuindzin xyajpidzima'ñich ma yi' ytung. Juttajii ca' njatyich, co limosna nbijctzohuipyich tzöydumbich. ⁴ Nejhuñyibich ti ndunipich jaydeb jäy ajcxy xycöbigipyich ma ajcxy ytijc." ⁵ Chi tüg tüg huoy pin anajty minuucx'ajtp je' yhuindzin; chi y'amidooy je jayijpi: "¿Jadu'ñyi miich minuucxy'adyii ñich nhuindzin?" ⁶ Chi je' y'adzooy: "Migo'px garafón aceite." Chi ñimay: "Matz mnecy, iña' mic'amy, e cojayi' huixchiguipxmajc." ⁷ Chi jadüg ñimay: "¿Miich jadu'ñi mminuucxy'adyii?" Chi je' y'adzooy: "Migo'px quipxi'ñ trigo." Chi ñimay: "Matz mnecy, cojayi' mida'px." ⁸ Chi je pidägy huindzin capxpaaty je jibicjäybi huidi cuend'ajtp yi' ypidägy co oy yhuinma'ñybaady mij; co jadachambi naaxhuiñyäj huidi ca' mibicy Dios, ñigi ajcxy ypëgyity mïd yhuinma'ñ, ca'ydi yi' jäy ajcxy huidi huinñihuñyb Dios ytiy'ajt.

⁹ ñich miich ajcxy yam ñimaayb migüg'ajtigixy yi' jäy ajcxy mïd yi' meeñ huidibi ca' ytimytiijyity, jigix co je meeñ anajty myajmayjajtcixy ji pin miich ajcxy xycöbigip ma jugy'ajttac huinixibi.

10 Je' jäy ajcxy huidibi yajxon cuydunam je ané'min huidi hueeni, nañ ycuydunamy je ané'min huidibi mijp. Je jäy ajcxy huidibi ca' cuydunaangixy je ané'min huidi hueeni, nañ ca' cuydunaangixy je mijpi ané'min. 11 Pen ca' mjaajtcixy nej mgüend'ájtciixipy yi jugy'ájtin huidibi ya naaxhuiñ yajpatp, ¿pin miich ajcxy m'ocyajmihui'mamy je jugy'ájtin je riqueza oybi janchypi? 12 Pen ca' mjaajtcixy nej mgüend'ájtciixipy tibi mihui'mgixy huidi huingjäy yje'ajtpy, ¿pin miich ajcxy xymöhuiip huidibi ajcxy yje'ajtpy?

13 Ni tüg tumbi ca' jëbi ytuñ mïd metz yhuindzin; com tüg je' ixtijipy etz jadüg mijnicxpedipy; o tüg huidi ycapxycöbigipy, etz jadüg ca'. Miich ajcxy ca' huaad mijpidägipy Dios etz nañ jadu'n mijpidägipy yi comeeñ'ájtin.

14 Nañ jadu'n midooy jada ayuc yi fariseojäy ajcxy, com ooy anajty ajcxy meeñ adzójccixy. Chi ajcxy ooy nixiici yajxiici Jesús y'ayuc. 15 Chi Jesús yminañ:

—Miich ajcxy fariseojäy jadu'n mnaybidáacigixy ma jäy ajcxy yhuinduu nejjihiüy ajcxy ooy m'oyjäyity. Dios ñejhuuydaayb co miich ajcxy mïd jibicpi ma mjot mhuinma'ñ. Tijaty huinma'ñ huidi jäy ya naaxhuiñ y'oy'ixyp, Dios ca' yi' oy'ixy.

Je Dios ycötújcín etz je Dios y'ane'mdac

16 Chi Jesús yjacminañ:

—Je taabi je Juan anajty yjijity, jii'ajtp anajty Moisés ycötújcín etz je y'ayucnajtzcaxiübi ajcxy y'ixpíjcín. Huin'it tiempo etz ixti jadachambi jadu'n yajnajtzcaxiy je Dios y'ané'min, e mayjäy ooy ñaybidáacigixy co ytigihuaangixy ma Dios y'ane'my.

17 Ca'chipy co je tzajp etz naaxhuiñybi ñajxtähuiipy, pero je Dios ycuydundáhuamy tüg'óciy jadu'n nej ñecy yminañ. Ni tügi letra oy mabaad ymúdzity nicxy ycayajcuyduñ.

Jesús capxticxy nej ypöcyity co jäy ytöxyijc ixmach

18 Chi Jesús yjacminañ:

—Huenpinjäyity co ytöxyijc ixmach etz ypicy mïd huingbi töxyjäy, ooy anajty mij pocy tuñ. Nañ huenpinjäyity huidibi pijcp mïd je töxyjäy huidi ñäy ti y'ixmachyii, nañ mij anajty ypocytuñ.

Je comeeñjyäy etz je Lázaro

19 Chi Jesús yjacminañ:

—Ji anajty tüg jäy comeeñybi ñayxoxyii anajty janch ooy mïd oyjatypi huit, etz janch oy yca y'ügy jabom jabom. 20 Nañ ji anajty tüg ayoobi jäy huidi limosna pijctzoob, hue' anajty yxií Lázaro. Lázaro jabom jabom anajty ycögnäy ma je comeeñjyäy ytijc'aguu, janch nibuutzp anajty ooy. 21 Lázaro ooy anajty jani'ixy caya'ñ je cayduc tzütztuc huidibi cáb ma je comeeñjyäy yca ybejt. Oy uc anajty ymiiñ yhueyii je ñibüdz. 22 Chi jadu'n yajti co oy y'o'cni je jäy huidi limosna pijctzoob, chi je ángeles ajcxy yajnicxy Lázaro ma je Abraham yajpaady. Chi je comeeñybi nañ jadu'n y'o'cni, e oy yajnaaxtigiyii. 23 Chi je comeeñybi jilby ca'oydactuuby tzaachypi anajty jihuiy, chi mij'ijxy jigüey je Abraham etz je Lázaro. 24 Chi je comeeñybi ycapxy janch mic, yminañ: “Apteedy Abraham, ñch pa'ayoog. Tun may'ajt quex Lázaro, huen yi' ycihuax yajxoogy mïd ni etz xyajtíztibich ndootz, co ñch ooy ayo'n nbaadyich ma jada mij jin.” 25 Chi Abraham y'adzooy: “Oc'ungich, ajihuihuü co ti mdzinäy ti mjogy'aty mïd mhuit mmeeñ aguyc jotcuyc, e yi Lázaro ooy ayo'n paty. Jadachambi Lázaro yjotcuyc'aty, etz miich jilby mbatpy tzaachypi. 26 E jadügnax, ji tüg mij huoc ma ñch ajcxy etz miich ajcxy. Pen

hich jim'amy janaxam ma miich, ca' njadipyich, nañ jadu'n miich ajcxy ni pin ca' jadipy nej ñaxipy ma hich nyajpaadyich.” ²⁷ Chi je comeeñybi jacnimay Abraham: “Apteedy Abraham, tun may'ajt quex yi Lázaro ma hich ndeedy ytijc. ²⁸ Jim ma hich ndeedy ytijc jim migoox miguëx nmíididyich, huen nicxy yajmíidmiydaaccixy, ca'ydi je' ajcxy nañ jadu'n ya minipy ma jada ayoodac.” ²⁹ Chi Abraham y'adzooy: “Yi' ajcxy ymíid necy huídibi Moisés etz Dios y'ayucnajtzcaxíybi ycojaay, huen cuydungixy.” ³⁰ Chi je comeeñybi ymíinañ: “Janch jadu'n apteedy Abraham. Pen nidüg yi ögpí ñicxy ma je' ajcxy, jothuimbíip yi ajcxy.” ³¹ Chi Abraham ymíinañ: “Pen ca' je' ajcxy mijpidägy Moisés y'ayuc je jécyíip etz huídí ajcxy jecy'ajt Dios y'ayucnajtzcaxíy, nañ ni ca' mibíjccixípy pen nidüg ögpí yjugypícy.”

17

Huídibi ooy ycodzígíjity co n'agánájxim ma pocy

¹ Chi Jesús nimay yi' ydiscípulos:

—Janch tíy'ajt jadu'n co yminíip jáy ajcxy huídí yajhuinma'ñyídigoyíip yi mayjáy ajcxy míid aaní. ¡Ay yi' ayooob ajcxy! pinjaty jáy ajcxy yajhuinma'ñyídigoyaangixy. ² Nígí y'óyíty co ixípy yajyo'cxodzíyíi tüg tzaa janch mijpí, e chí yajcöjibíjpnaxípy mejyjoty, ca'ydi co yajhuinma'ñyídigoyípy jada jáy ajcxy huídibi íxpíjcin hueeni míid ma Dios ytíy'ajt. ³ Naygüend'ájtígix miich ajcxy co ca' mgapxtígóoygíxípy.

Co m'uch xymíidundígooyípy, e chí mgapxhuíjip, e pen jothuimbíjt, chí mbocymeecxípy. ⁴ Pen m'uch huixtujc'oc xymíidundígooy tüg xiíbi, nañ huixtujc'oc xyñímíiñ tüg xiíbi, e ymíina'nípy: “Tí njothuimbítyíich”, huinmeecxípy miich yi', chí jada' miich huixtujc'oc mbocymeecxíip.

Je mibíjcin ymic'ajt

⁵ Chi je apóstoles ajcxy nimay je Huindzín Jesús:

—Yajyeeg hich ajcxy nmibíjcin.

⁶ Chi je Huindzín Jesús y'adzooy:

—Co íxyípy miich ajcxy mmíbicy Dios jadu'n nej tüg pí'c mostaza pajc, e mníma' íxyípy jada paadzím quípy: “Nayyajpídígíi, nícx tína' mejyjoty, e ycapxymíidohuíp yi'.”

Tí huaad tuñ je pín yajcaayb yaj'uuc

⁷ Pen jí miich ajcxy nidüg pín ymíid tüg ytumbí huídí tumbí ñaaxjídztízíi o yhuaj cuend'aty, co yja'ty ma mdíj, ¿nej jébi nimay: “Tígí', íxtäg ma mesa etz adzu'at?” ⁸ Hue' janchtíy mnímáhuípy: “Yaj'oyíyígíich n'adzuu'íbi, co'amedí' mhuit, e xymooygích ngaayín n'uucín. E huín'it miich mgayípy m'ügípy.” ⁹ ¿Nej yajnaxípy je' Dioscojuyí míid co je' anajty tí tuñ huídibi yaj'ane'my? Hich mínamb co ca'. ¹⁰ Nañ jadu'n miich ajcxy co tí mguydungíxy tüg'ócy tíibi Dios xyaj'ane'mgíxy, chí mmínáangíxípy: “Je' hich ajcxy je tumbí huídibi ca'p ycapxpaadyíty, jéyi tí ndúngíxích huídibi hich ajcxy huaad ndungíxy.”

Jesús yajtzögy majc jáy jibíic pützpa'mmíidpí

¹¹ Nícxp jí Jerusalem anajty Jesús, chí ñaxíy ma Samaria etz Galilea ñaymídzíba'n'ájtígíxy. ¹² Co anajty mihuingoñ tüg cajp, chí jíjpcoyöyíy majc jáy pützpa'mmíidpí. Chí ajcxy yhuäcxíjpy jíguëgyñí. ¹³ Chí ajcxy míc ycapx-coody ymíinaangíxy:

—Huindzín Jesús, pa'ayoog hich ajcxy.

¹⁴ Co Jesús je' ajcxy íjxy, chí nimay ajcxy:

—Nícx nayguëxícígíx ma yi teedy ajcxy.

Chi jadu'n yjajti, co ajcxy ñicxy, chi tüyöyjoty oy chooccixy. ¹⁵ Nidügti je' ajcxy co ñay'ixi co ti anajty chögy, chi nihuimbijty Jesús, ooy Dios jäymeche cömay janch cixyot huinijot. ¹⁶ Chi je' ycojxtinay'ahuñy ma Jesús ytecymijc, chi pidacpy yhuñyijp naaxcixy yajnaxy Dioscojuipy. Samaritanojäy je' anajty. ¹⁷ Chi Jesús ymínañ:

—¿Nej ca' nimajc miich ajcxy huidi ti mdzooccixy? ¿Ma ajcxy je' janidaxtu-jcpi? ¹⁸ ¿Nej ca' pin jac yhuimbijty miñ jäy medza'ñ cömaya'ñ Dios, jeyi tügpajc ti yhuimbity jada samaritanojäy?

¹⁹ Chi Jesús nimay je jäy:

—Pidig, nicxni. Yi mmibíjcin ti xyajtzögy.

Nej je' yminípy Dios y'ané'min

²⁰ Chi je fariseojäy ajcxy y'amidooy Jesús mina anajty yi Dios ya miñ ya naaxhuiñ y'ane'mañ. Chi Jesús y'adzooy:

—Je Dios y'ané'min ca' je' yminípy jadu'n nej ti yaj'ixy o yajmidooy. ²¹ Ni mgaminángixipy co cha je' o jim'amy je'. Dios y'ané'min ya je' cham ma miich ajcxy.

²² Chi Jesús nimay yi' ydiscípulos ajcxy:

—Miim je xii je tiempo ma miich ajcxy anajty ooy xyjamid'idángixich tüg xii, e ca' iich miich ajcxy xy'ixipy, iich je jäy huidi tsoon tzajpjoty.

²³ Chi jäy ajcxy yminá'nip: “Chaa'amy je', je Cristo”, o “Chim'amy je'.” Ca' miich ajcxy yi' mniníxcixipy, e ni mgabaníxcixipy. ²⁴ Co anajty nmiñich jadügtecy ya naaxhuiñ, iich, je jäy huidi tsoon tzajpjoty, co iich anajty nmimíñ n'ané'min, jadu'n je' yjadípy nej huizuc co y'aa'an ma tüg tzajp'ix e nañ jadu'n y'aa'an jadüg tzajp'ix. ²⁵ Nañ ooy ycopícyty co jayijp ocpáadibich ayo'n, e chi jada xyca'ixa'nibich xycatzoga'nibich yi jäy ajcxy huidi tzinaayb jugy'ajtp jadachambi tiempo. ²⁶ Com jadu'n nej yjajti jecy'ajty, co je Noé chinaay, nañ jadu'n yjadípy co anajty iich, je jäy huidi tsoon tzajpjoty, co anajty nxii ndiempo paty mina anajty nmiñich ane'mbi. ²⁷ Janch caayb janch uucp anajty je jäy ajcxy agujc jotcujc co je Noé ytigüy ma ymijcajoon. Chi je ayo'nduu ymiñ huidi cijx yaj'ögtigoydäy je mayjäy. ²⁸ Nañ jadu'n yjajti jecy'ajty co Lot chinaay. Je jäy ajcxy jim Sodoma etz Gomorra ycaaygixy y'uuccixy yjuuygixy ytooccixy, etz ytiçcojçixy. ²⁹ Huin'it xii co Lot chooni jim Sodoma, chi ycäy tzajpjoty jin etz huidi jindzaa mid conhuicity ytoy, chi cajp ytigoyday. ³⁰ Jadu'n nej ayo'n yjajti taabi chinaay Noé etz Lot ya naaxhuiñ, nañ jadu'n yjadípy ayo'n co anajty nmiñich jadüg'oc ya naaxhuiñ, iich je jäy huidi tsoon tzajpjoty.

³¹ Je huin'it xii huin'it tiempo pin anajty iñaayb ma ytiçcop, e ymiid anajty ypidägy jii by tigoty, ca' nimiragipy nicxy ti yajpidzimy, e huidi jäy anajty jim camjoty nañ ni ca' yhuimbidity ma ytiç. ³² Ajihuñyigix jadu'n nej Lot ytöxyijc ayo'n paty. ³³ Tüg'óciy jäy ajcxy pinjaty yjugy'ajt tzögam, tigoyipy yjugy'ajt. Tüg'óciy jäy ajcxy pinjaty yjugy'ajt tigooyb (mid iich ycixpi), hue' je' yjugy'ajt ypaadípy chögipy.

³⁴ Iich miich ajcxy nimaayb co je huin'it coodz nimetz jäy anajty ajcxy ma cijx, tüg yajnicxiyb etz jadüg yajhu'míyb. ³⁵ Nimetz töxyjäy anajty yjitzcixy, tüg yajnicxiyb, etz jadüg yajhu'míyb. ³⁶ Nimetz yëdyjc anajty ytungixy camjoty, tüg yajnicxiyb etz jadüg yajhu'míyb.

³⁷ Chi je jäy ajcxy huidi xpijcp Jesús y'ayuc ymínañ ajcxy:

—¿Ma jadu'n yjadípy nej miich ti mina'ñ, Huindzin?

Chi Jesús ymínañ:

—Ma anajty je ögpi yajpaady, jim yi luud ajcxy ñimuga'ñ.

18

Je ijxpejt ma je ayoobitöxyjäy etz je juez

¹ Chi Jesús yajnimay ajcxy tüg ayuc huídijaty ixpijcp ma yí co ooy ycopícyity Dios nmibijctzoohuim jabom jabom, ni ca' nmídzijpim. ² Chi Jesús ymínañ:

—Ji anajty tüg juez ma tüg cajp, ni Dios anajty ca' tzigíy, etz ni jäy ajcxy anajty ca' huindzigíy. ³ Nañ ma je cajp jim anajty tüg co'ögy ytöxyjäy. Je' anajty yminög janam jadozjc ma je juez, nimäy anajty: “Nihuaangich ma je nmídzipich.” ⁴⁻⁵ Chi je codung ca' co'adzoy ca' a'ixiy tzojc. Chi je juez jot'ajti, ymínañ jotjoty huinma'ñyoty: “Oy Dios ca' ndzigíyich, ni jäy ca' nhuindzigíyich, per com jada co'ögytöxyjäy nigí xychach'amayíyich, miñ n'ocnihua'ñich, ca'ydi jadüg'oc ymiñ e xyajcixich anajty nmecxtújcín.”

⁶ Chi je Huindzin Jesús ymínañ:

—Mído'mbic miich ajcxy nej je juez jibicjäybi ti nihuañ je töxyjäy co anajty ti yajtzibyí. ⁷ ¿Nej ca' Dios ñihuaanip yí huídibi ti huin'ixy, huídibi mibijctzooob xim tzuum? ¿Huäcxibip, nicx ca' tzojc adzooyi? ⁸ Hich miich ajcxy nimaayb co Dios ñihuänamy mic'amy yí yjäy. Co anajty nhuimbity ya naaxhuiñ, hich, je jäy huídi tzoon tzajpjoty, ¿nej nbáadibich mibijcín ya naaxhuiñ?

Je ijxpejt ma je fariseo etz ma je yajcogüejtpi

⁹ Jesús ñimíydac je jäy ajcxy huídi cí'm ooy ñaygömayyí co ooy y'oyjäyity, etz pejxy yí jacjadyíbi jäy ajcxy, chi yajnimay ajcxy tüg jihuimbit ayuc:

¹⁰ —Mejtz jäy ajcxy ytigíy ma Dios ytíjc capxtacpi. Tüg hue' je' fariseojäy, e jadüg yajcogüejtpi. ¹¹ Chi je fariseojäy ytinay'ahuíy ycapxtägy, chachmína'ñ jadu'n: “Dios Teedy, Dioscojuyip yajnajxpích com co ca' hich nbocytuñich jadu'n nej jacjadyíbi jäy ypocytúnngixy, ca' nmeechich, ca' njibicjäyidyích, ca' nmigapxích huingjäy ytöxyíjc, ca' nbocytuñich jadu'n nej jada yajcogüejtpi. ¹² Mejtz xí n'ityích jaygay tügpí seaman. Chi huen ytim ti nmídic ngüejtpyích ma Dios majcjaty.” ¹³ Per je yajcogüejtpi jiguem ytinay'ahuíy, ni ycapát'ixy tzajpcix, jéy ycaachtzachcoxy ymína'ñ: “Dios Teedy, pa'ayoogích, hich pocyjäyich.” ¹⁴ Hich miich ajcxy nimaayb co jada yajcogüejtpi y'idacy ma ytíjc ti anajty yajhuinmecxy ypocy, e je fariseojäy ca' yajpocyhuinmecxy. Huenpínity huídi cí'm naygömayípy, Dios yajtzöyduníib; e pinjaty ca' ñaygömayyí cí'm, Dios ycömayíib.

Jesús conucxy je pí'ctíjc ajcxy

¹⁵ Chi jäy ajcxy mídmiñ pí'c'anäg ma Jesús huen nidoñyí. Co je' ydiscípulos ajcxy íjxy, chí ajcxy ogy undaj. ¹⁶ Chi Jesús yaaxi ymígügtíjc nimay ajcxy:

—Ixmatz, huen yí pí'ctíjc xyñimiñich, ca' ajcxy mjípcogapxiygixy, com yí jäy ajcxy huídibi yajpatp ma Dios y'ané'mín, jadu'n ajcxy nipaady nej pí'ctíjc. ¹⁷ Janch hich miich ajcxy nimäy co hueñpínity huídi ca' cöbijci yí Dios y'ayuc ytiy'ajt jadu'n nej yí pí'ctíjc ajcxy cöbijcy Dios y'ayuc ytiy'ajt, ca' yí ajcxy ytiy'ajti ma Dios y'ané'mín.

Tüg comeñ'anäg ymiydägy míd Jesús

¹⁸ Chi tüg micjäy y'amidooy Jesús, nimay:

—Miich oyjäybi Huindzin, ¿ti huaad nduñich co hich n'alma nídzoocín paadípy?

¹⁹ Chi Jesús y'adzooy:

—¿Nej co xytíjich oyjäy? Ni pín ya yca'oyjäyity, je'yí Dios tügpajc y'oyjäyity. ²⁰ Miich mnejhuíyb yí Dios ycötújcín. Ca' mmigapxtigoyípy huingbi töxyjäy, ca' jäy'aj'ögípy, ca' mmeedzip, ca' mmígüg nihuambedípy, yajmíj'at mdaj mdeedy.

21 Chi je' y'adzooy:

—Ti tüg'óciy nguydundäyich jada cötújcin maabi nyeecpidzimyich.

22 Co Jesús jadu'n midooy, chi nimay:

—Tigoy'ijtni ja tüg huidi ca' mduñi. Toocta' tüg'óciy tijaty miich mñid, e mo' je meeñ ayoobtijc, huin'it mgomeeñ'adipy jibby tzajpjoty; miin, e pajamgich.

23 Co je comeeñybi jadu'n ayuc midoy, chi ooy yjottigoygoty com ooy anajty ycomeeñity. 24 Co Jesús ijxy co je comeeñybi anajty ti yjotmaybicy, chi mñinañ: —Ooy chachchípiy ytigíhuipy tüg comeeñyjäy ma Dios y'ané'min. 25 Jac ca' chípiy co ñaxipy tüg camello ma yi xu'ñ yxútiy, ca'ydi co tüg comeeñyjäy ytigíhuipy ma Dios y'ané'min.

26 Chi je jäy ajcxy anajty tiibi ajcxy midoogixy Jesús y'ayuc, ymñinaangixy:

—¿Pñin jada' jëbi y'alma paadipy nñdzoocin?

27 Chi Jesús y'adzooy:

—Huñdibi naaxhuiñyjäy ajcxy ca' jaty nej yaj'oyíhuipy, Dios jëbi yaj'oyíy.

28 Chi Pedro ymñinañ:

—Hich ajcxy ti nñidägy n'ixmajtztaaygixy, co nbanicxaangixy.

29-30 Chi Jesús y'adzooy:

—Janch hich miich ajcxy nñimaaygixy co yi jäy ajcxy huidi ytijc ixmajtz etz ytaj yteedy, ymiguëx, etz y'ung y'anäg mñid Dios y'ané'min ycixpi, ypaadipy ajcxy ya naaxhuiñ nigí oy'ájtñ, etz ypaadipy ajcxy tzajpjoty tzinaayñ huñdi ca' ycixipy ytigoyipy nimina.

Jesús capxypidzimy jadüg'oc co y'ögañ

31 Chi Jesús huodzon je nñimajmetzpi, nimay ajcxy:

—Jadachambi tzoc jámim jim Jerusalén. Nguydunaamyich tüg'óciy jadu'n nej yi Dios y'ayucnajtzcaxiybi ajcxy jaybejty jecy'ajty mñid hich ycixpi, hich, je jäy huñdi tzoön tzajpjoty. 32 Chi nyajciyega'ñich ma je romano gobernador, xycamij'ixipy xycamijpidägibich ajcxy. Xy'ójibich xyhuindzújibich xyjijptzújibich ajcxy. 33 Xychaachtunipyich ajcxy, xyaj'ögibich ajcxy, e codugig xñ njugypigipyich jadüg'oc.

34 Chi yi majmetzpi ajcxy ni jadu'ñyi ca' huñjihuñy ajcxy nej yhuimbidzimy Jesús y'ayuc. Yüch anajty jada ayuc mñid yi' ajcxy ycixpi, paady ca' huñjihuñy nej anajty yajñimaaygixy.

Jesús yajhuindicxigy tüg huñtzpi jim Jericó

35 Chi jadu'n yjajti co Jesús mñihuingoñ je cajp huñdi yxñ Jericó, chi tüg huñtzpi anajty iñäy tüba'áy pijctzoy anajty limosna. 36 Co midooy mayjäy ñaxy, chi je' yajtiy:

—¿Pñin yi' ñajxp?

37 Chi ajcxy nimay co Jesús nazareno najxp. 38 Huñ'it je huñtzpi mic ymñinañ:

—Jesús, David y'ap y'oc, hich pa'ayoog.

39 Je jäy ajcxy huñdi anajty jayijp nñcxp ooy ooy je huñtzpi, nimay co huen amoñ. E je' nigí mic ymñinan'idich:

—David y'ap y'oc, hich pa'ayoog.

40 Chi Jesús ytinayxipy oy yajhuoyii. Co je' jim ymejch, chi amidooy, nimay:

41 —¿Ti mdzoycpi ndunipyich mñid miich?

Chi je' y'adzooy:

—Huñdzñ, yajhuindicxíccich.

42 Chi Jesús mñinañ:

—Huñdicxig, yi mmibíjcin ti xyajtzögy.

⁴³ Chi je huintzpi mic'amy yhuin y'ixigü, chi panicxy Jesús, chi ooy jäymejch cömay yi Dios. Cham tüg'óciy je cajp jäy co ajcxy jadu'n ijxy, nañ ycömay yjäymejtz yi ajcxy Dios.

19

Jesús müd Zaqueo

¹ Co Jesús ytiigüy jim Jericó, ñajxy cajpcujc anajty. ² Chi jadu'n yjajty jim anajty tüg jäy hue' anajty yxii Zaqueo. Hue' je' anajty yajcogüejtpi huindzin, e comeeñ anajty. ³ Ooy yi' anajty tzach'ixa'ñ Jesús, nejhuñhua'ñ pin jäy je', chi ca' jajty nej ixipy, je' co anajty ñaxity, etz co anajty ooy mayjäy jim. ⁴ Chi je' ñicxy poyigy jayijp, chi ypejty ma tüg sicómoro quipy, yco'ijxnaxa'ñ co anajty Jesús jim ñaxy. ⁵ Co Jesús jim ymejch, chi pä't'ijxy je Zaqueo, e nimay:

—Zaqueo, tzojc minac, com copicy co nicxy njättäga'ñich ma mdijc.

⁶ Chi je' yminajty janch jottigoy, e jotcujc cöbijcy Jesús. ⁷ Co jadu'n ijxy, chi je mayjäy ajcxy nigapxy ni'ojigixy Jesús, yminaangixy:

—Ti ñicxy jättacpi ma tüg pocyjäy ytijc.

⁸ Chi Zaqueo ytinayigy, nimay Jesús:

—Huindzin Jesús, cha je' je njugy'ajtich huidi cup nbijc-huäcxaamyich nmöhua'ñich ayoobitijc. Pen ti ñich nyajcujc tnaaxy, nyajhuimbidityich midaax jadu'ñyi.

⁹ Chi Jesús yminañ:

—Jadachambi jada jäy ma jadyaabi tijc ti y'alma ñndzögy, com co yi' nañ jadu'n Abraham y'ap'adyii y'oc'adyii. ¹⁰ Hich, je jäy huidi tzoon tzajpjoty, ti nmiiñich ya naaxhuiñ co n'ixtähuibich etz nyajndzögibich tiibi anajty ytigooy.

Je ijxpejt ma je majci meeñ

¹¹ Co je jäy ajcxy midooy jadu'n, chi Jesús jacyajnimay ajcxy tüg ayuc, com ytimymihuingónip anajty Jerusalén, etz je jäy ajcxy tzachhuinmaaygixy co Jesús mic'amy anajty pidäga'ñ y'ané'min. ¹² Chi Jesús yminañ:

—Tüg micjäy, comeeñjäy anajty, ñicxy ma tüg naaxjot jigumbi, nicxy anajty ytungbicy co yrey'ada'ñ, e chi anajty yhuimbidaani. ¹³ Chi je micjäy mijhuooy nimajc ytumbi, chi moy ajcxy majc meeñ nidüg nidüg, chi ajcxy nimay: “Meeñ yaj'ung'ajtcix ji ixti cooni ñich anajty nhuimbityich.” ¹⁴ Chi je ymigogajp ajcxy ca' anajty ixa'ñyii ajcxy je comeeñybi, chi ajcxy yajpaguejxy huingapxpi ma anajty je comeeñybi ñicxy, chi je huingapxpi yminañ: “Ca' ñich ajcxy ndzocy co jada comeeñjäy rey'adipy ma ñich ajcxy.” ¹⁵ Chi jadu'n yjajty co je comeeñjäy yhuimbijty ti anajty yreytigüy. Chi oy yajhuoyii je ytumbi ajcxy, je huidi anajty je meeñ ti yajmihui'mgixy, nejhuñhua'ñ anajty jadu'ñi ti yaj'ung'ajtcixy je meeñ nidüg nidüg. ¹⁶ Chi tüg jayijp ymiñ yminañ: “Huindzin, yi meeñ majcjadu'ñi ti nyaj'ung'atyich.” ¹⁷ Chi je rey y'adzooy: “Ooy miich oy mduñ. Jadu'n nej ti mgapxycöbicy müd huidi hueeni, cham m'ané'mipy majc ciudad.” ¹⁸ Chi je mimetzpi ymiñ, yminañ: “Huindzin, yi mmeeñ migoox jadu'ñyi ti nyaj'ung'atyich.” ¹⁹ Chi je rey nimay je mimetzpi: “Cham m'ane'mipy migoox ciudad.” ²⁰⁻²¹ Chi je midugügpü ymiñ, yminañ: “Huindzin, cha je mmeeñ huidi ti nmi'ityich, ti nyujcpiyich ma tüg paayi. Ndzigüybich miich co miich mjäy'aty ahua'ñ, myajpidigtäy huidi ca' mjé'adyii, nañ mdzijcpy huidi ca' ti mnäpy.” ²² Chi je rey yminañ: “Miich jibic ti mduñ, cham ndiyduna'ñ müd mgi'm'ayuc ycxipi. Miich mnejhuiyb co nyajpidigyich huidi ca' njé'adyiijich, e ndzicyich huidi ca' ti nnäbyich. ²³ ¿Nej co ca' ti mbidägy ñich nmeeñ ma je banco, jigix co ixipy nhuimbityich, may meeñ ixipy xycidigüyich müd meeñ'ung?” ²⁴ Chi je rey nimay huidi anajty ajcxy jimip:

“Pijci ajcxy yi' ymeeñ, etz mooygixy yi' tibi meñ yaj'ung'aty majc jadu'ñyi.”
²⁵ Chi je jäy ajcxy y'adzooy: “Huindzin, ymüd yi' cham majc jadu'ñyi meñ.”
²⁶ Chi je rey y'adzooy: “Ich minam co tüg'óciy pinjaty müd, jacyajmöhüip; e huidi ca' ti müdity, oy jamüdity yajpictähüip huidi ymüd. ²⁷ Nañ jadu'n ajcxy je nmidzipich huidi ca' anajty tzojccixy co ich nrey'adipyich ma yi' ajcxy, yajmiingix ya, yo'cpujxtutaaygix ma ich nhuinduu.”

Jesús ytigüy Jerusalén

²⁸ Co Jesús jadu'n yminanday, chi choñ jim, ñicxy Jerusalén. Jesús jayjip anajty ytüyöy ma je mayjäy. ²⁹⁻³⁰ Jadu'n yajty co jim yja'ty mihuingon Betfagé etz Betania ma je cop huidi yxi Olivos, chi Jesús quejxy metz ydiscípulos, nimay ajcxy:

—Níxcix ma yjiibi cajp huidi ji huingon. Co ajcxy mgajptugihüip mbáatcixipy tüg burro mang ycoxochity, huidi ca' ni pin yaj'ñaayñi. Mgoguejtútcixipy, etz mmimíingixipy. ³¹ Pen jim pin xy'amidoogixy, ¿nej co yi burro mgoguejtüdy? Chi ajcxy jadu'n m'adzohüipy: “Je nhuindzinich jim tzojcp.”

³² Chi je' ajcxy ñicxy huidi Jesús yquejx. Chi ajcxy paty je burro jadu'n nej Jesús anajty ajcxy ti ñimäy. ³³ Jim anajty ajcxy je burro mang coguejtuutcixy, co ñihuindzin ñimaay ajcxy:

—¿Nej co yi burro mang mgoguejtuutcixy?

³⁴ Chi je' ajcxy y'adzooy:

—Je nhuindzinich jim tzojcp.

³⁵ Chi ajcxy huijtz miñ je burro ma Jesús. Chi ajcxy jibe'ñ müd yhuit, chi ajcxy Jesús yajburripejty. ³⁶ Co Jesús anajty ytüyöy, chi je mayjäy ajcxy yhuit yé'pcixy tügüj. ³⁷ Co ajcxy mihuingoñ je minac ma je cop huidi yxi Olivos, chi tüg'óciy je mayjäy yjotcugiyday, e ytigüy ajcxy ooy alabanza ibi Dios ojadajtpi müd je mij huinma ñ ycixpi co anajty ti íjxcixy huidi anajty Jesús ti tuñ. ³⁸ Chachminaangixy:

—¡Capxpaady je rey huidi miimb müd Huindzin Dios yxi ycixpi! ¡Jotcujc'ajt jiiyby tzajpjoty etz cömáyin ma Dios!

³⁹ Huin'it nijëjty fariseojäy huidi anajty ajcxy jiiyby jäy agujc nimay ajcxy je Jesús:

—Oj yi mjäy ajcxy.

⁴⁰ Chi Jesús y'adzooy:

—Ich miich ajcxy nimaayb pen yi' ajcxy amomb, yi tzaa tigihüip mic capxp.

⁴¹ Co Jesús yja'ty jim mihuingon Jerusalén cajp, e co ijxy, chi yaaxy müd je cajpjäy ycixpi. ⁴² Chi Jesús yminañ:

—¡Pen mhuinjihuüyb ixipy miich ajcxy nej mbáatcixipy mjotcujc'ájtín jadachambi xi tiempo! Yüch jada tiy'ajt cham ity ma miich ajcxy, ca' huaad m'íjxcixy. ⁴³ Minip je xi je tiempo ma miich ajcxy je mmidzip ajcxy xyajjüdugipy mgajp müd tzaamacxy, e tziptunipy ajcxy müd miich, yajxon xyajco'adugipy ajcxy juhuidity ma je mgajp. ⁴⁴ Xyñigidaagoodip mdzaaboch ni'ung ni'anäg, ni ca' yhuí'mip tzaagop tzaamacxy, jadu'n yjadipy com miich ajcxy ca' mnejhuüy je tiempo mina je Dios xyñigidägy.

Jesús yajpidzimy je jibicjäydijc ma Dios ytijc

⁴⁵ Chi Jesús ytigüy ma Dios ytijc yajpidzimday tüg'óciy jäy huidi anajty jiiyby ajuuyb adoocp. ⁴⁶ Chi Jesús nimay je jäy ajcxy:

—Jadu'n mina'ñ ma jaybétyty: “Ich ndijci tzajpcapxycapxtägi'ñ yi'.” E miich ajcxy hue' mhuaangixy jadu'n nej meetzpi y'ang.

⁴⁷ Jesús anajty yaj'ixpijc jabom jabom ma Dios ytijc, chi je teedy tungmüdpí, etz huídí ajcxy yaj'ixpijcp anajty Dios ñecy, etz mijjáydiyc ajcxy nihuinmayiygixy co yaj'ögaangixy Jesús. ⁴⁸ Chi ajcxy ca' ni nej mihuinma'ñybaty nej yaj'öccixy, com tüg'öciy jáy anajty ooy tzach'amídooy'ijt Jesús y'ayuc.

20

Jesús ycötújcín

¹ Chi jadu'n yajty tüg xii anajty Jesús yaj'ixpijcy je cajpjáy ma Dios ytijc, capxhuáccy anajty oybi ayuc. Chi ñimiini je teedy tungmüdpí ajcxy etz huídí ajcxy yaj'ixpijc Dios ñecy etz mijjáydiyc ajcxy. ² Chi ajcxy migapxy Jesús nimay:

—Yajnimaaaygich, ¿ma cötújcín tí mbaady co jáy myaj'ixpijcy ya ma Dios ytijc? ¿Pín je' tiiibi xycötujc möy?

³ Chi Jesús y'adzooy:

—Hich nañ jadu'n nyaj'amídohuamy ich miich ajcxy tüg ayuc, e m'adzógixip. ⁴ Co Juan (je Bautista) jáy yajniibejty, ¿pín je' cötújcín moy, je Dios tzajpjotyipi o jáy ajcxy?

⁵ Chi ajcxy ytigiiy huinmay'ahuídijtpi ñayñimáayigixy miñ xyipy:

—Pen minaanim co tzajpjoty choñ je Juan ycötújcín, Jesús xyñimaaayimip ya: “¿Nej co ca' miich ajcxy mijpidacy yí' y'ayuc?” ⁶ Pen minaanim ajt co jáy cötújcín moy je Juan, chi tüg'öciy cajpjáy tzojc xycögádzim, com ymibijcipy ajcxy co yí Juan, Dios yí' y'ayucnajtzcaxiiybi.

⁷ Chi ajcxy y'adzooy co ca' ajcxy nejhuuyigixy pín Juan tí quexyii. ⁸ Chi Jesús nimay je' ajcxy:

—Hich nañ jadu'n ca' nigapxa'ñich pín tí xycötujcmöyich.

Je ijxpejt ma je tumbidijc ajcxy jibicjáybi

⁹ Chi Jesús yminandacy yajnimay tüg'öciy je jáy ajcxy tüg ayuc, ymíñañ:

—Tüg jáy pidacy tüg camuuxy ycam, chi yajpijctzoy ytumbidijc, co anajty chona'ñ ñicxa'ñ jiguem jecy jecy. ¹⁰ Co cosecha paty, chi quejxy tüg ytumbi ma je ytumbidijc, huen címöyii huídibi je' anajty paatip. Chi je ytumbidijc huinhuojpy jiphuojpy je quejxyöybi yajhuimbijty ca' ni tí mooy. ¹¹ Chi huingbi ytumbi quejxy, nañ jadu'n ajcxy je' tuñ, huin'ojoy jip'ojoy ajcxy, yajhuimbijty ajcxy, ca' ajcxy ni tí mooy. ¹² Chi midugügpí ytumbi quejxy, nañ jadu'n ajcxy je' yajtzaachiiy etz yajhuimbijty ajcxy.

¹³ Huin'it je camuuxycam huindzin ymíñañ: “¿Tí ndunipyich? Ocquejxyich nmang huídibi ooy ndzocyich. Ca' jécyity co ajcxy ixipy nmangich, yajmij'adipy ajcxy.” ¹⁴ Chi je ytumbidijc co ajcxy ijxy je' yhuindzin ymang, chi ajcxy huinmaygoty nayñimáayigixy miñ xyipy: “Tí ymiñ je cogam ymang, yí' je' jada cam jédaanip. Tzoc yaj'o'cim jigix ich ajt jada cam njé'ajtim.” ¹⁵ Chi ajcxy je cogam ymang yajpidzimi camjoty, chi ajcxy yaj'o'cy.

Chi Jesús y'amídooy:

—¿Tí jada' ytunipy je cam huindzin? ¹⁶ Minip je', miñ yajtigoydáy je ytumbidijc ajcxy, e chi je' je ycam yegipy müd huingbi tumbi.

Co je jáy ajcxy jadu'n midoy, chi ajcxy ymíñañ:

—Ni catzogipy Dios, nicxy jadu'n njajtim.

¹⁷ Chi Jesús huindixpejty je mayjáy nimay ajcxy:

—¿Tí tijamy huídí yjaybétyip ma Dios ñecy?

Jadu'n:

Je yéydijc huídí je jáy ajcxy ca' anajty tzocy, tí Dios pidacy mij'ane'mbi. Tim jadu'n nipaady nejihuüy je tzaa oyjatypí huídibi je pojtzpidijc ajcxy ca' yajtuna'ñ, je' oy tí yhuimni ma anajty yjaccopícyity.

18 Pinjaty ca' cöbigañ jada mij'ane'mbi, ayo'n ypadamy, tim jadu'n nipaady nej jihuüy jim ycixciday ma je tzaa nicx e tijhuütz yjajtähüpy; e pen je tzaa nigidagoty, je' ajcxy janch jaam püx nicxy yjajtcixy.

Yajnidüygixy pen jëbi cogüéjtín yajyecy o pen ca'

19 Je teedy tungmüdpí etz huídi ajcxy yaj'ixpijc Dios ñecy ooy anajty ni-huinmayüygixy madzaangixy je Jesús mic'amy, co ajcxy huinjihuüy co Jesús nimüydáacigixy müid je jihuimbit ayuc, e chigiüyb anajty ajcxy je cajp jäy.

20 Chi ajcxy chachhuinmañ'ixtaaygixy nej huaad xigixy Jesús, chi quejxy ajcxy iix'ijtpí ma Jesús yajpaady huídi naybidaacip janch ypaat tudägyjäy; chi amidoo'ijtcixy Jesús y'ayuc huídi müid xihuaangixy, chi cüyegaangixy ma je gobernador. 21 Chi je iix'ijtpí ajcxy y'amidooy Jesús nimay ajcxy:

—Huindzin, nejhüüyb ich ajcxy co müich m'ayuc ooy y'óyity, etz myaj'ixpicy yajxon, ca' huin'ixpety jäy myaj'ixpicy, etz myaj'ixpicy Dios ytiy'ajt nej jäy jëbi huaad chinaaygixy. 22 ¿Nej copicy ich ajcxy migüedipy je César je romanojäy mij'ane'mbi, o ca'iji?

23 Chi Jesús huinjihuüy yí' ajcxy yjibic-huinmañ, paady ajcxy nimay:

—¿Ti co müich ajcxy xyjot'ixy xyhuinmañ'ixyich? 24 Yaj'ixcich tüg meeñ. ¿Pin y'ahuinax etz pin yxí mimb ma jada meeñ?

Chi ajcxy y'adzooy:

—Yí César.

25 Chi Jesús nimay ajcxy:

—Cuet ma César huídi César paatip, e ma Dios huídi Dios paatip.

26 Ca' mimadacy ajcxy nej tzu'ixcixy ma mayjäy yhuinduu. Chi ajcxy ooy huinmaay jadu'n nej anajty Jesús ti y'adzóohuigixy, chi ajcxy amoñyi.

Yajnidüygixy je jugy'ájtín ycixpi

27 Chi ñija'tti Jesús tüg saduceojäy, e yí saduceojäy ajcxy ymíañ co jäy ögy ca' y'ocjuyujcni. Chi je' yajtiy:

28 —Huindzin, Moisés jaybety ma yí ñecy, je jécyip, co tüg yëydijc ytöxyijc yajhuímy ix'ögp, e ca' ymang ti paatcixy. Jëbi je yëydijc y'uch müidtzinäy je töxyjäy jaydëbi yaj'ung'ixip müid y'ajch ycixpi. 29 Jadu'n anajty tügpijcy jäy, nihuixtujc ajcxy ytügquëx'ájtixy, ac yëydijc ajcxy. Je mijpi müidtzinay töxyjäy, chi ix'o'cy, e ca' ymang paty. 30 Chi je mimetzpi ypijcy müid je töxyjäy, e ni ca' ajcxy ung paty. 31 Chi je midugügpí ypijcy müid je töxyjäy, e jadu'n je nihuixtujcpi müidtzinay ajcxy je töxyjäy, ix'o'cy ajcxy, ni ca' ajcxy ung paty. 32 Chi nañ jadu'n je töxyjäy y'ögni. 33 Co anajty je nihuixtujcpi jugypijccixy, ¿huídi jada' octöxijc'adüyb je töxyjäy? Com nihuixtujc ajcxy ti töxyijc'ájtigixy.

34 Chi Jesús y'adzooy:

—Jadachambi jäy pijccixp, ñaymooyigixy y'ung huen pijccixy. 35 Je jäy ajcxy huídibi paatip anajty chinähüip ma je tiempo huídi mimb co ögpí yjugypijccixipy, ni ca' ajcxy ypijipy, ni ca' ajcxy ñaymóoyigixipy y'ung huen pijccixy. 36 Co jäy ajcxy yjugypicy, chi ca' huaad y'ögcixy jadüg'oc, quipxyjaty ajcxy müid je ángeles ajcxy, e Dios yí' ajcxy ung'adüib co yjugypijipy müid jemybi jugy'ájtín. 37 Janch co yí ögpí yjugypijipy, jëbi mbaadip je tiy'ajt ma Moisés ñecy ma jadu'n yjaybéyity, je taab anajty aay'ujtz ytoy, co je Huindzin Dios migapxy Moisés, nimay: “Ich Abraham yDios, Isaac yDios, Jacob yDios.” 38 Je ögpí ca' müidity Dios. Je jäy ajcxy huídi juugyip janchtiy ajcxy ymüid Dios, com co müid Dios ycixpi tüg'ócy jäy ajcxy ymüid yjugy'ajt.

39 Chi jäy ajcxy huídi yaj'ixpijcp Dios ñecy nimay Jesús:

—Oy ti m'adzoy, Huindzin.

40 Ca' ajcxy ocjajtni nej jac nimáaygixipy.

Pin je' y'ung je Cristo

⁴¹ Chi Jesús je' ajcxy nimay:

—¿Nej co miich ajcxy mīna'ñ co Cristo David y'ap y'oc? ⁴² David ci'm mīna'ñ ma je Salmo necy:

Yi Huindzin Dios nimay iich nHuindzin: “Iña' ya a'oy'amy ma iich.

⁴³ Ixti cooni anajty miich mmidzip ti nmimadactäyich, jadu'n nej jihuïy ti nbidägyich yi mmidzip ma miich mdecypocxpejt.”

⁴⁴ Co David yximoy Cristo iich nHuindzin, ¿nejtz yi' co y'ap'adyii y'oc'adyii?

Jesús xïy je escribas ajcxy

⁴⁵ Chi tüg'óciy cajpjäy jim anajty y'amido'ijtcixy co Jesús nimay je' ydiscípulos ajcxy:

⁴⁶ —Naygüend'ájtigix mīd yi' escribas ajcxy ydiscípulos, co ajcxy ooy tzojccixy yhuiddaangixy mīd yhuitt oyjatpyi, ooy ajcxy tzojccixy co huen capx-pocxyii ma jäy y'amugïy, e ooy ajcxy tzojccixy yi cödumbi iñaybejt ma naymu-jctac, etz ooy ajcxy tzojccixy cödumbi iñaybejt ma jäy ajcxy yxidungixy. ⁴⁷ Chi ajcxy yajcixtayi yi co'ögytöxyjäy ypidägy, e tungixy ooy jecy tzajpcapxycapxi ma jäy yhuinduu. Yi jadu'mbi jäy ajcxy nigi ajcxy Dios chaachytunïyb mīd ypocy ycixpi ca'ydi jacnipin.

21*Je ayoobitöxyjäy co'ögypi y'ofrenda*

¹ Jiiby anajty Jesús ma Dios ytijc co ijxy comeeñyjäy may'amy ofrenda pidaaccixy ma meeñygaax. ² E nañ ijxy co tüg co'ögytöxyjäy pidägy anajty metz pi'cmeeñ. ³ Chi Jesús ymīnañ:

—Janch iich miich ajcxy nimäy co jadayaabi co'ögytöxyjäy ayoob jac anaxy jada, ti pidägy ofrenda ca'ydi jacnipin. ⁴ Tüg'óciy comeeñydijc ajcxy ypidacyp ma ofrenda je meeñ huidi conajxp. Jadayaabi co'ögytöxyjäy ti pidägy huidi anajty ñigayamy.

Jesús ymīnañ co je Dios ytijc yhuindigoyañ

⁵ Nijëjty jäy co ytigïy ma Dios ytijc nimīydacy ajcxy co Dios ytijc ooy chach'oy'oyduñity mīd tzaa oyjatpyi, e mīd tibi jiiby yojxcixy. Chi Jesús ymīnañ:

⁶ —Tüg'óciy jada huidi ajcxy m'ijxpy ma Dios ytijc, minip xii tiempo mīna jada nicxy yhui'my taj xit jada tzaa, ca' ma pochycop.

Je tïy'ajt ma ca'ni naaxhuiñybi ycixa'ñi ytigoya'ñi

⁷ Chi ajcxy y'amidooy Jesús:

—Huindzin, ¿mīna jada jadu'n ytunïyb yjadïyb nej miich ti mmīnañ? ¿Ti tïy'ajt ji yaj'ixip co jada anajty jadu'n ytuna'ñyii yjada'ñyii?

⁸ Chi Jesús y'adzooy:

—Ix mgayajhuin'ingix. Ooy mayjäy ymīna'ñ ñaybidägáanigixy co je' ajcxy je Cristo, ymīna'ñ ajcxy: “Iich je' je Cristo; huingóniñ anajty je xii je tiempo mīna je naaxhuiñybi ycixa'ñ ytigoya'ñ.” Ca' ajcxy axam mbanicxipy. ⁹ Co miich ajcxy ayuc midohuipy co jäy chachiptungixy, e ñayñibidicigixy, ca' mdzigïygyxipy, com ooy ycopicyty co jada jadu'n jayjip ytunïyb yjadïyb, ca'nan hue' je' anajty tim cijxp tim tigooyb (je naaxhuiñybi).

¹⁰ Chi Jesús yjacmīnañ:

—Nayñibidägiib naax cajp mīd huingbi naax huingbi cajp. ¹¹ E minip mic'ujx, etz mij yuu mij pa'm xii yaa. E jadüb mij'adzigi'ñ, etz ooy ijxpejt huidi quëxigip tzajpcixy.

12 Ma ca'ni anajty jadu'n jadyii, xypahuidijtcótcixipy jäy, xymájtzcixipy, xyciyéjcxipy ma judíojäy ñaymujctac. Chi jäy ajcxy xypidägipy pujxtigoty, xyajnicxcixipy mach ma rey etz ma gobernador ajcxy yhuinduu. Jadu'n jäy ajcxy jibic xytunipy müd miich ajcxy com co anajty ti xymijpidaaccixyich. 13 Miich ajcxy tiy'ajt myegipy müd ich nxii ycixpi. 14 Co jäy ajcxy yxihuipy ma codungdijc, ca' ni nej ajcxy mjot'adiyb, ni ca' ajcxy mhuintmayipy nej m'adzógixipy. 15 Nyegipyich ayuc etz tiy'ajt nej huaad mmidzip m'adzoogixy. Ca' mmidzip ajcxy jadipy nej xy'adzógixipy, e nej xyjacxigixipy. 16 Miich ajcxy mgi'mdeedy, mgi'm'uch, mgi'm'ajch, etz mgi'm'ajuugy amigüg xyciyéjcxipy ma cötujctac. Nijëjity miich ajcxy m'ögipy müd co anajty ti mmijpidaaccixy ich n'ayuc. 17 Mayjäy ajcxy ca' xy'ixaanipy xychogaanipy müd co anajty ti mmijpidaaccixy ich nxii. 18 Ni tüg miich ajcxy mgöhuay ca' ytigoyipy. 19 Pen ooy ajcxy mmecxtucy, chi m'alma ñidzögipy huinixii.

20 Co ajcxy m'ixipy Jerusalén anajty ti ñaducy müd ymidzip, huin'it ajcxy mnejhuihuipy co huingon je'anajty ma yhuindigoyaani. 21 Huin'it tiempo je jäy ajcxy huidi jim Judea naaxjot yquéeccixipy ñicxcixipy ajcxy yuugjoty, etz je jäy ajcxy huidi jim Jerusalén queegipy ajcxy, etz je jäy ajcxy huidi camjoty ca' huaad y'ocajptigiiyñi ma je Jerusalén cajp. 22 Je tiempo mina yjadiyb ayo'n müd co anajty judío jäy ti ytundigooygixy, je' jada yajcuydundaayb jadu'n nej yjaaybétyity ma Dios ñecy. 23 ¡Ayoob yi töxyjäy ajcxy huidi anajty ung tzim'ijtp huin'it xii, etz huidi anajty müd y'ungma'xung! Ooy jadiib mij ayo'n ya naaxhuin etz tzip éjcin ma jada cajp. 24 Nijëjity ajcxy y'ögipy tzipjoty, e nijëjity yajnicxip tzumy mach ma huingbi cajp huingbi naax. E Jerusalén naxmihuägidydähuib yi jäy huidi ca' yjudiojäyity, minipy je tiempo mina anajty Dios yajcixaani yajtigoyaani yi' ajcxy y'ané'min.

Nejjada'yminipy je Dios y'ung

25 Huin'it xii huin'it tiempo quëxigip ijxpejt ma xii po' etz ma yi madza', ya naaxhuiñ ooy jäy ajcxy jotmay mü'idipy. Je jäy ajcxy ooy chigihuipy yjihuhuipy yhuinmay'ahuididipy ajcxy ooy, müd je mejy ycixpi co anajty chachpidigy chachnögy chachmina'ñ. 26 Yi jäy ajcxy anucxi'ñ yajcidahuib co anajty ajcxy ixey nej yjadyii huindu'mybi naaxhuiñ; e huidijaty mic'ajt yajpatp jiiby tzajpjoty yüxtähuipy yi'. 27 Huin'it miich ajcxy xy'ixipyich, ich je jäy huidi tzoön tzajpjoty, nmiiñich jocjoty müd je nmic'ajtich, nmiiñich müd ich ngötújcin etz ich n'oy'ájtin mijpi. 28 Co je ayo'n tiempo jadu'n yjatzondägipy, chi mba't'ijxcixipy com huingoniñ anajty mina Dios xyñihuáangixipy xycohuáangixipy.

29 Chi Jesús yajnimay ajcxy tüg ayuc, yminañ:

—Ijxcix yi higueri etz tüg'óciy quipy, 30 co yhuamigy huin'it miich ajcxy nejhuüy co ti yhuingoni mina ypottigiiyñi. 31 Tim jadu'n nej miich ajcxy ijxpejt mbicy ma higueri quipy co pottiempo ytigiiyñi, nañ jadu'n co miich ajcxy m'ixipy je ijxpejt tzajpcixy jadu'n nej yam nyajnimaaaygixy, mnejhuihuipy ajcxy co huingónip je tiempo mina Dios y'ane'mañ ya naaxhuiñ.

32 Janch nimaaybich miich ajcxy co jadu'n yjadiyb ytuniyb jayijp, ca' anajty o'ctäy je jäy ajcxy huidibi tzinaayb jugy'ájtixyp jadachambi xii tiempo. 33 Yi tzajp etz naaxhuiñybi naxip tigoyip yi'. Ich n'ayuc ca' ñaxipy ytigoyipy ni camina.

34 Naygüend'ájtigix miich ajcxy ca' mnijot'ájtixy yi jocni yi mügii, etz yi tzinaayin jugy'ájtin, jigix ca' ajcxy xyniminipy jotcömoñyi je ayo'n xii je ayo'n tiempo. 35 Timetiini minipy je ayo'n tiempo müd jäy ajcxy ycixpi huidi ya tzinaayb ma tüg'óciy naaxhuiñybi. Tim jadu'n nej tüg iyujc ayo'nbaady co

timetriini yajtūxuuch. ³⁶ Ni'ixi' ijtcix, mibijctzoogix Dios, ca'ydi ayo'n ajcxy mbaatcixy huidi jadaanip, jigix jiiiby myajpáatcixipy tzajpjoty ma ich nhuindu, ich, je jäy huidi tzoon tzajpjoty.

³⁷ Xim anajty Jesús yaj'ixpicy ma Dios ytijc, e coodz anajty chooñ ñicxy jim ma cögop huidi yxii Olivos. ³⁸ Jabom jabom jopy jopy ñiminyii tüg'ócicy cajpjäy jiiiby ma Dios ytijc tibäy co y'amidoo'idaani ajcxy Jesús y'ayuc.

22

Xiicyöyigixy capxyöyigixy nej huaad Jesús májtzcixy

¹ Huington anajty je xii mina jäy tzajcaagy caaygixy huidi ca' ylevadura miiidity, huidi jäy ytijpy pascua xii. ² Chi je teedy mijtungmiiidpi etz je escribas yhuinma'ñ'ixtaaygixy nej ajcxy ocyaj'ögipy Jesús. Chigiiyb anajty ajcxy je cajpjäy.

³ Chi je mujcu' ytiigiiy ma Judas yjot yhuinma'ñ. Je Judas hue' anajty ymimetz xii Iscariote, je' nidügti je majmetzpi discípulos. ⁴ Chi Judas ñicxy oy migapxy je teedy mijtungmiiidpi etz tzajptijc soldado huindzin, e ycapxytuñ miiid je' ajcxy nej jëbi ciiyey Jesús. ⁵ Huin'it je Jesús ymidzip ooy ajcxy yxoondaccottay. Chi ajcxy ñaygapxi co meen möhuangixy je Judas. ⁶ Chi Judas cöbijcy je meen, chi yhuinma'ñ'ixtay nej jëbi ciiyegipy Jesús ma ca'p mayjäy y'ixyii yhuindicxyii.

Je huindzin Dios y'adzu'ájtín

⁷ Chi paty je xii mina jäy cay je tzajcaagy huidi ca' ylevadura miiidity com huin'it anajty ajcxy yaj'ögy cöbixy ymang pascua xiiigixp. ⁸ Chi Jesús quejxy Pedro etz Juan, nimay:

—Nixc miich ajcxy yaj'oyi' je pascua adzu'ibi, jaydëbi ajt ngaayim.

⁹ Chi ajcxy y'amidooy:

—¿Ma mdzocy co nyaj'oyihuibich ajcxy?

¹⁰ Chi Jesús yminañ:

—Co mdigihuipy ajcxy cajpjoty, mbaadipy tüg yëydijc huidi yajnicxp tüg majt nii. Mbanicxyp ajcxy je yëydijc cooni yjadipy ma ytijc. ¹¹ Co miich ajcxy mjädipy ma je jäy ytijc, chi ajcxy mnimähuiipy je codijc: “Nhuindzinich jadu'n minaam: ¿Ma yaj'ahuädz yajpaady ma ngayipyich je pascua adzu'ibi miiid ich ndiscípulotijci?” ¹² Je codijc miich ajcxy xyajni'ixihuip tüg cuarto ma mimejtzpi piso. Ni'ixi' jim je adzu'ibi. ¹³ Chi Pedro etz Juan ñicxy, chi paty jadu'n nej anajty ti ñimäyii, e jim ajcxy ni'ixiiy je pascua caayin uucin.

¹⁴ Co je hora paty, chi Jesús y'ixtacy ma je mesa miiid je' ydiscípulos ajcxy.

¹⁵ Chi Jesús yminañ:

—Ti ooy nijot'atyich co nmiiidgayaangixy jada pascua adzu'ibi ma ca'ni n'ögyñich. ¹⁶ Ich miich ajcxy jadu'n nimaayb co ich ni mina ca' njaccayipyich jadüg'oc je pascua adzu'ibi, ixti cooni yajcuydundähuiipy je pascua xii ytiy'ajt ma Dios y'ané'min.

¹⁷ Chi Jesús conigy je ügy co Dioscojúyip yajnaxy, huin'it yminañ:

—Uccix jada ügy, naymóoyigixy miich ajcxy. ¹⁸ Cham ich miich ajcxy nimäy co jadu'n nej yjacnicxa'ñ xii tiempo ca' vino nii üga'ñich ixti cooni Dios y'ané'min yminipy ya naaxhuiñ.

¹⁹ Nañ yconigy Jesús tüg tzajcaagy co mibijctzooy Dios, huin'it tujc-huäcxy moy discípulos ajcxy, e chi ajcxy nimay:

—Jada tzajcaagy ich nninix'ajtpyich huidi ngiiyeycipyich ma yi o'cin miiid miich ajcxy mbocy ycixpi. Jada ijxpejt miich ajcxy miiidipy oy jäyimech miiid ich ycixpi.

20 Co anajty ti ycaйдаaygixy, chi Jesús conigy je ügy jadüg'oc, chi ymínañ:
—Jada vino je' jada Dios y'ayuc ytíy'ajt jemybi jadu'n yi' nej ñich nni'py huídi temam yogam miid miich ajcxy ycixpi.

21 Jadachambi yi jáy huídi xycíyegaambich ma nmídzípich, ya je' cham miid'íñäyich ma jada mesa. 22 Janch jadu'n njada'ñ n'ayoohua'ñich jadu'n nej ti nyajnígodugíyíijich. ¡Ayo'n padamy je jáy ayoob huídi xycíyegaamyich ma nmídzípich!

23 Chi je nimajmetzpi ajcxy ñayñímaayi miñ xyípy:
—¿Pín jada' yi' ma ñich ajt huídi jadu'n tundígoyam?

Yajcapxcójcixy pín jada' jacnígi ymíjity

24 Chi je nimajmetzpi huídi Jesús anajty ti huin'ixy ca' ajcxy ñay'ayuc-huinjihuíyi pín jada' jac mípí oc'idípy. 25 Chi Jesús nimay ajcxy:

—Yi reyes ajcxy y'ane'myb ajcxy naax cajp jadu'n nej tüg huindzín, yi' ajcxy huídibi ane'mb yajtíjycixy co ooy oytuungixy. 26 Miid miich ajcxy ca'ydi yjadú'nity. Hue' janchtiy je mípí ma miich ajcxy huen ñaybídagyi nej jihuíy ymútzity. E je huídi nigohuajc'ajtp huen ñaybídagyi nej jihuíy je' je' je tumbi.

27 ¿Pín je' jacmíjip? ¿Huídi íñaybi ma mesa, o huídi ni'ixíyb a'ixíyb caayín uucin? Yi' je' jacmíjip huídi íñayb ma mesa. Per ñich ijtpich miid miich ajcxy jadu'n nej huídi ni'ixíyb aa'ixíyb caayín uucin.

28 Miich ajcxy ti m'íjtcixy miid ñich ma anajty ayo'n ti nyajnaxyich. 29 Paady ñich miich ajcxy tüg ané'mín nmooyb, jadu'n nej ñich ndeedy ti xymöyich.

30 Jaydēbi miich ajcxy mgáaygixípy m'uuccixípy ma ñich nmesa jiby ma ñich n'ané'mín e m'íñāhuípy ajcxy ma je ane'mdac, e mdiydúngixípy m'ané'mgixípy je nimajmetz pícy Israel ñaax ycajp.

Jesús capxpídzimy co Pedro ymína'na'ñ co ca'p Jesús ix'yadyi

31 Nañ jadu'n je huindzín Jesús ymínañ:

—Simón, Simón, jadachambi je mujcu' xyjot'ixaangixy xy-huinma'ñ'ixaangixy jadu'n nej jáy trigo huimbojy co yajhuátzaangixy. 32 Per ñich Dios nmíbíjctzooyich miid miich ycixpi, jigix miich ca'ydi mmíbíjcin ytígoy'ity. Mina anajty miich ti mjothuimbity, jotmic migápxípy yi mmígügtíjc ajcxy.

33 Chi Pedro ymínañ:

—Huindzín, jotcuje ñich nñicxa'ñich miid miich oy pujxtígótyity, etz oy ndímy'ögíibich miid miich.

34 Huin'it Jesús nimay Pedro:

—Ñich miich nimaayb co ca'ni anajty tzey yaxígy jabom jopy co miich miná'níp tugíig'oc co miich ca' xy'ix'adyíijich.

Huingomb hori ma Jesús y'ocyaj'íjmadza'ñ

35 Chi Jesús nimay ydiscípulos ajcxy:

—Co ñich miich ajcxy jayhuin nguejxy, ni mmoral, ni ca' mmeeñydíjc, ni mgíg ti mmí'oygixy, ¿nej myajtígoy'íjt ajcxy ti jatyi?

Chi ajcxy y'adzooy:

—Ni ti.

36 Chi Jesús ymínañ:

—Jadachambi pín ymeeñydíjc etz ymorrall miid, huen minícx; nañ pín ca' miidity y'espada, huen toogy yjocx huit, chi juyípy y'espada. 37 Ñich miich ajcxy nimaayb co copícy jada yajcuydunípy huídibi mimb jaybety miid ñich ycixpi ma Dios ñecy ma jadu'n ymínañ: “Yaj'amíchomujc (je Cristo) miid yi'

ajcxy huidi jibicjäyip.” Tüg'óciy mimb jaybéty ma Dios ñecy miid ñich ycixpi, yajcuydunipy yi'.

³⁸ Chi Jesús ydiscípulos ajcxy ymíñañ:

—Huindzin, cha metz espada.

Chi Jesús y'adzooy:

—Huen miid yi'yi.

Jesús Dios mibijctzoy jim Getsemani

³⁹ Chi Jesús jim choñ ñicxy ma je cop huidi yxii Olivos, com jim anajty nicxy coodz coodz, chi je' ydiscípulos ajcxy ypanicxi. ⁴⁰ Co ajcxy yja'ty ma je cop, chi Jesús ymíñañ:

—Mibijctzoogix Dios huen xypubedipy xypudigihuipy ajcxy ca'ydi mdigiygixy jibic tuum.

⁴¹ Chi Jesús huinhuäctuty je discípulos ajcxy tüg tzaagäch yjiguëgyity, chi ycoxtinay'ahuüy ytigüy Dios mibijctzoob. ⁴² Chi Jesús ymíñañ:

—Dios Teedy, pen miich m'a'ixiyyb pijcigich jada tzaachypi, ca' ñich huaad nyajnaxyich, per ca' ñich huaad ngi'mdzójcin nguyduñich, miich mdzójcin huen myajcuyduñ.

⁴³ Chi ñayguëxici tüg ángel tzajpjoty choñ, jotmic migapxy je Jesús. ⁴⁴ Yam anajty Jesús ooy ytaj ymay, chi Dios mibijctzooyb jacmictägy. E je yxibitniñ ypidzimy janch jadu'n yi' anajty nej ni'py janch mijjaty y'ocnajtza'cxiiyñi.

⁴⁵ Co ypidigüy ma anajty Dios mibijctzoy, chi nihuimbijty je' ydiscípulos ajcxy, chi oy paatcixy maab anajty ajcxy miid jotmay. ⁴⁶ Chi Jesús nimay ymigügtjic ajcxy:

—¿Ti co mdzachmaagixy? Pidiccix mibijctzoogix Dios, ca'ydi jibic tuum mdigiygixy.

Yajnicxcixy mach je Jesús

⁴⁷ Jim Jesús anajty ymigügtjic ajcxy miidcapxy miidmiydägy, co je mayjäy oy yjäty. Jayijp anajty ymiñ je huidi anajty xijip Judas, yi' je' anajty nidügti ma je nimajmetzpi Jesús ydiscípulos ajcxy. Chi Judas mihuingoñ Jesús co anajty tzücxan. ⁴⁸ Chi Jesús ymíñañ:

—Judas, ¿nej miid tüg tzücxin mgüyecy ma ymidzip, je jäy huidi tzoon tzajpjotyí?

⁴⁹ E je' ajcxy huidi anajty Jesús ymiid, co ajcxy ijxy jadu'n nej ytuñyii yjadyii, chi ajcxy ymíñañ:

—Huindzin, ¿tzoc ajt mihuimbijtim?

⁵⁰ Chi nidüg je' ajcxy yajtzaachüyi je teedy mijtungmiidpi tüg ytumbi, quejtzpujxi tüg ytätz'ac a'oy'amybi. ⁵¹ Huin'it Jesús ymíñañ:

—Ixmajtzcix, huen jadu'ñyi.

Chi nidoni je jäy ytätz'ac, e jadu'n yajtzoocy. ⁵² Chi Jesús nimay ajcxy huidi nimiini, yi teedy tungmiidpi ajcxy, yi Dios ytijc policia huindzin etz mijjäydjic:

—¿Nej co xyñimíngixyich miid pujx etz mguipyjijpxu'ñ jadu'n nej jihuiy ñich tüg meetzpi? ⁵³ Jiiby ñich anajty jabom jabom ma Dios ytijc, e ca' miich ajcxy ti ti mduñ miid ñich. Per cham jedu'n je tiempo mina miich ajcxy xy'ane'myich etz je jibicpi xymimadägyich.

Pedro ymíñañ co ca' ix'yadyii Jesús

⁵⁴ Chi ajcxy majch je Jesús, yajnicxy ajcxy, e pidacy ma teedy mijtungmiidpi ytijc. Je Pedro jigügyihui' anajty ypanicxyii. ⁵⁵ Jim ajcxy jin yajmijty tibägujc chi ajcxy y'ixtactay nidüg'óciy. Pedro y'ixtacy nañ jadu'n ma je jäy ajcxy.

⁵⁶ Huin'it tüg pödumbi ijxy Pedro ñäy ma jimba', chi huindixpejty nimay:

—Jada yëydijc nañ ymïd anajty Jesús.

⁵⁷ Chi Pedro ca' cöbijcy, ymïnañ:

—Töxyjäy, ca' ïch yí n'ixy'adyii.

⁵⁸ Nañ jahueengi huin'it jadüg jäy Pedro yhuindicxpejti, ñimaayi:

—Miich, yí Jesús ajcxy anajty mïd m'ity.

Chi Pedro ymïnañ:

—Ca' n'ïchity.

⁵⁹ Ti anajty tüg hori ñinaxni co oy huingbi ymïnandägy:

—Janch co jada yëydijc yí anajty mïd y'ity Jesús. Com nañ galileojäy yí.

⁶⁰ Chi Pedro ymïnañ:

—Ca' ïch nhuinjihuïy nej miich mmïna'ñ.

Capxni anajty je Pedro co tzey oy yaaxïgy. ⁶¹ Chi je Huindzin Jesús ni'ijxhuimbijty je Pedro. Huin'it Pedro jäy metzcootti je' ayuc nej anajty yHuindzin Jesús ti ñimäyii: “Ni ca'ni anajty tzey yaaxïgy cham coodz co miich tugïg'oc xycoyüdzybyich.” ⁶² Chi Pedro ypidzimy tibäy, oy jilby yäxy mïd tájin máyin.

Nixiiccixy yajxiiccixy yí Jesús

⁶³ Je jäy ajcxy huïdi anajty Jesús cuend'ajtp, ooy ajcxy nixiicy niyaaxy, etz nañ ooy ajcxy huingojxy jïpcojxy. ⁶⁴ Chi ajcxy huingoxodzy, e cojxy ajcxy ma yhuïñyijp, nïmaaygïxy:

—Octiygapx, ¿pin ti xycoxy?

⁶⁵ E ooy anajty mïd yjibic ayuc cixy cuety nïmaaygïxy.

Jesús mijjuntajoty yajpaady

⁶⁶ Co yxïmïy, chi yöymujcy yí teedy mijtungmïdipi ajcxy, yí mijjäydijc ajcxy, etz yí escribas ajcxy, chi ajcxy y'amïdooy:

⁶⁷ —Nïmaaygïch ajcxy ¿nej miich je' je Cristo?

Chi Jesús y'adzooy:

—Co ixypy nnigapxich, ca' miich ajcxy mïbigipy. ⁶⁸ E pen ïch miich ajcxy n'amïdooyb, ca' miich ajcxy xy'adzohuipyich, etz canan huin'it xyñajtmadzïhuibich miich ajcxy. ⁶⁹ Jadachambi e ñicxa'ñi ïch, je jäy huïdi tzoon tzajpjoty, n'ixtäga'ñich a'oy'amy ma Dios mïc'ajtmïdipi.

⁷⁰ Chi nidüg'ócïy je' ajcxy y'amïdooy:

—¿Nej janch co miich Dios xy'ung'adyii?

Chi Jesús y'adzooy:

—Miich jadu'n mïnamb co ïch njëjity.

⁷¹ Chi ajcxy ymïnañ:

—¿Ti ajt njac-huáanim testigo? Ti ajt yam ci'm nmïdoohuim nej mïna'ñ.

23

Jesús ma Pilato yhuinduu

¹ Chi tüg'ócïy je mayjäy ajcxy ypidïgy, chi yajnicxy ajcxy Jesús ma je gobernador Pilato. ² Chi ajcxy ytigïy xibi ymïnaangïxy:

—Jada jäy naax cajp yaj'ixpijcp huïdi ca' ytiy'ájtity. Yí adujctähuam co ca' huaad nmïgüéjtïm César, e ymïna'ñ ci'm co yí je' je Cristo huïdi rey'ajtpi.

³ Chi Pilato y'amïdooy Jesús:

—¿Nej miich je' judío jäy xyrey'ajtp?

Chi Jesús y'adzooy:

—Miich jadu'n mïnamb.

⁴ Chi Pilato nïmay je teedy tungmïdipi ajcxy etz je mayjäy:

—Ca' ïch ti pocy nbaadyich ma jada yaabi yëydijc.

⁵ Chi Jesús ymidzip nigí anajty ajcxy ymínan'adítzcixy:
—Jada Jesús naax cajp tzachyajqueec-huäcxtaayb je judíojäy miid yi' y'ayuc. Yajtzondacy Galilea, e jadachambi ya Judea jadu'n idích.

Jesús ma Herodes yhuinduu

⁶ Co Pilato midoy Jesús ymidzip ajcxy nigapxy Galilea, chi y'amidooy pen galileojäy je Jesús anajty. ⁷ Chi mic'amy huinjihuiy co yi' jim anajty yajpaady ma Herodes y'ane'my, chi jim quejxy ma Herodes huídi nañ jadu'n anajty yajpatp jim Jerusalén huin'it xii. ⁸ Co Herodes ijxy Jesús, chi oy jotcugüy com tüyip anajty ooy ja'ixa'ñ, ti anajty may ayuc midoohui, e ahuixy anajty co mijhuinma'ñ tunípy. ⁹ Janch may ayuc ooy jayaj'amidooy, e Jesús ni tüg'aa ca' y'adzooy. ¹⁰ Jim anajty teedy mijtungmüdpí etz je escribas ajcxy, tzachnigibéjtcixy mictägy. ¹¹ Chi Herodes miid yjäy ooy nixiicy yajxiicy Jesús, ca' mij'ijxy mijpidacy. Chi xojxy miid oyhuit etz quejxhuimbijty jim ma Pilato. ¹² Huin'it xii Herodes etz Pilato ajcxy ñaymigügpíjci, com naymijotma'típ anajty ajcxy huin'it tiempo.

Jesús yajmoy ysentencia co y'ögípy

¹³ Chi Pilato huomujcy yi' teedy mijtungmüdpí, yi' cajptungmüdpí, etz yi' naax cajp. ¹⁴ Chi ajcxy nimay:

—Ti miich ajcxy xyajnimíngixyich jadayaabi yéydíj, jadu'n miich ajcxy mánamb co ooy jäy yajqueec-huäcxtay. Ti íich yi' jatíyduñich ma miich ajcxy mhuindu, ca' íich yi' ni ma ypocy ti nbaati, jadu'n nej miich ajcxy mxígixy. ¹⁵ Nañ ni ca' Herodes ti pocy ti paady ma jada jäy, com ti njaya-jniquexyich, ni ti pocy jada Jesús ca' ti tuñ huídi huaad nyajco'ögíyich. ¹⁶ Miñ n'octzaachytuñich, jaydēbi nnajtzmadzihuibich.

¹⁷ Jadu'n je gobernador anajty costumbre miidíty co najtzmadzíy tüg machyjäy mijxíjoty. ¹⁸ Chi je mayjäy tügmucy ajcxy ymínaandacy:

—¡Yaj'ög jadayaab Jesús! ¡Najtzmadzi' yi' Barrabás!

¹⁹ Je Barrabás anajty pujxtígoty ti ypidägyii co anajty ti nibidígy je go-bierno, nañ ti anajty yjäyyaj'ögy. ²⁰ Chi Pilato nimay ajcxy jadüg'oc co najtzmadzihua'ñ Jesús. ²¹ Chi je mayjäy janch mic ymínañ:

—¡Yajcruudzpet miich yi'! ¡Yajcruudzpet miich yi'!

²² Chi Pilato ymínañ je midugüg'ocpi:

—¿Ti Jesús ti tundigoy? Ca' yi' ma ypocy nbaatich. Miñ n'octzaachytuñich, e najtzmadzihuibich.

²³ Je jäy ajcxy nigí anajty ymínaan'adítzcixy janch mic, co huen yajcru-udzpejty. Chi ajcxy jadu'n mimadacy Jesús co chachne'mgixy je teedy tungmüdpí, etz je cajpjäy ajcxy. ²⁴ Chi jada' Pilato cuyduñ jadu'n nej je jäy ajcxy anajty píjctzoy. ²⁵ Chi Pilato najtzmadzíy je Barrabás huídi anajty pujxtígótyip, co anajty chach jäy yajqueec-huäcxy, etz yjäyyaj'ögy, je' huídi yi' jäy ajcxy ypijctzou. Chi Pilato cíyejcy Jesús ma yi' ajcxy huen tungixy nej tzojccixy.

Jesús yajcruudzpejti

²⁶ Chi je judíojäy ajcxy yajnicxy Jesús. Jim tü'am ajcxy mánaybaati tüg jäy huídi anajty ti chooñ camjoty, huídi anajty yxii Simón, e ycojárpity anajty Cirene. Chi adzip ajcxy Simón yajquejycabi y Jesús ycruudz, e yajpanicxy ajcxy Jesús.

²⁷ Jac'axam anajty naax cajp paníxcixy, etz nañ may töxyjäydíj ajcxy chachyaaxcixy miid jotmay miid yi' ycixpi. ²⁸ Chi Jesús ni'ijxhuimbijty je töxyjäydíj ajcxy, chi nimay ajcxy:

—Miich Jerusalén töxyjäydijc ajcxy, ca' xyñiyáaxcixich. Nayñiyaaxigix miich ajcxy ci'm etz m'ung ajcxy ycixpi. ²⁹ Chi ypaadipy tiempo co jäy ajcxy ymına'nipy: “Jotcuje je töxyjäy ajcxy huidi ca' y'ung ixy, huidi ca' ti y'ungtzimigy, etz huidi ca' ti y'ung yajtzitzcixy.” ³⁰ Chi je jäy ajcxy nimaydägipy mijtun mijcop: “Nigidagótcich ajcxy”; etz je mutztun mutzcop: “Yajtigooygich ajcxy.” ³¹ Pen jäy ajcxy tzaachypi ayo'n mooyb Dios y'ung, nigí ajcxy jacjiini ytundigoyañ mïid Dios yjäy, tim jadu'n nipaady nej pin puxam tzuxy quipy nañ puxamy quipy titzpi.

³² Nañ jim anajty yajnicxcixy mïid Jesús jametz pocyjäy. Tú'ciy mïid Jesús anajty yaj'ogaangixy. ³³ Co ajcxy oyjäty jim ma tüg it huidi jäy ytiippy ögpi cohujc, chi ajcxy jim Jesús yajcruudzpejty mïid metz pocyjäy: tüg pocyjäy a'oy'amy, jadüg anajty'amy. ³⁴ Chi Jesús ymınañ:

—Dios Teedy, mecxí ajcxy ypocy, com ca' nejhuñygyixy ti ytungixyp.

Co je soldados anajty ajcxy yajhuäcxaani ac je'y Jesús yhuít, chi ajcxy ijxy suerte pin ocjēdñb. ³⁵ Jim je cajpjäy anajty yhuindñcxcixy, yam je tungmñdipi nixigy yajxigy Jesús, ymınañ ajcxy:

—Jada Jesús huingjäy ti yajtzögy, huen cham ci'm nayyajtzögyii, pen yi' je' je Cristo, je huidi Dios ti huin'ixyi.

³⁶ Nañ jadu'n je soldados ajcxy nixiiccixy yajxiiccixy Jesús, nimijhuägy ajcxy möhuaangixy anajty vino ta'mbi. ³⁷ Chi je soldados ajcxy ymınañ:

—Pen miich Rey'ajt ma yi judíojäy ajcxy, nayñihuänñ ci'm.

³⁸ Ma Jesús ycödu jim anajty yjaayity griego'amy, latin'amy, etz hebreo'amy: JADA JE' YĪ JUDIOJÄY AJCXY YREY.

³⁹ Chi tüg pocyjäy huidi anajty cruudzcixy ooy nixiicy yajxiicy Jesús ymınañ:

—Pen miich je' je Cristo, naygohuänñ ci'm, e cohuaangich ñch ajcxy nañ jadu'n.

⁴⁰ Chi je jadügpi pocyjäy oy y'adzooy, ogy ymigüg, nimay:

—¿Nej ca' miich Dios mdzigiy. Ca' m'ixy co tú'ciy ti nbócycahuim? ⁴¹ ñch ajt janch paatip jadu'n, co jadu'n jada ngöbñjim tzaachypi je tñibi ndundigooyim. Jadayaabi Jesús janch ni ti jibicpi jada ti catuñ.

⁴² Chi je pocyjäy nimay Jesús:

—Tun may'ajt xyjäymedzipich co anajty mjäty jiiby ma m'ane'mdac.

⁴³ Chi Jesús oy y'adzooy:

—Janch ñch miich yam nimäy co cham ñch miich mñd'íjtnipy ma je oybi it.

Jesús y'o'cni

⁴⁴ Co cujcxñibi paty, chi oy ycoodzäy tüg'óciy naaxhuiñ ixti minacyxñini.

⁴⁵ Chi xi ca' y'oc'ani. Chi je huit oy yciñtzhuäcxy huidi anajty adñydujcp je Dios y'it jiiby ma Dios ytijc. ⁴⁶ Huin'it Jesús mic ypätcapxy ymınañ:

—Dios Teedy, cham nyajcñdigiy ñch n'alma.

Co Jesús jadu'n ymınañ chi y'ögy.

⁴⁷ Co je soldado huindzñ ijxy jadu'n nej anajty ti ytunyii ti yjadyii, chi ooy jäymejch yi Dios ymınañ:

—Janch co jadayaabi yēydijc anajty tudägy yjäyity.

⁴⁸ Chi je mayjäy tñibi anajty jim yöymñjccixy yhuindñcxcixy, co ajcxy ijxy jadu'n nej ytuuni yjaiti, chi ajcxy huimbijttaayñi cajpjoty yam ycaach tzachcójxcixy mñd jotmay ycixpi. ⁴⁹ Cham tüg'óciy Jesús ymigügtijc ajcxy huidi anajty mñd ñay'ixy'adyii, etz töxyjäydijc ajcxy huidi anajty Jesús ti ypadzonyii jim Galilea, jiguēgy je' anajty ajcxy yhuindñcxcixy.

Yajnaaxtigüy ajcxy Jesús

⁵⁰ Jim anajty tüg yëydijc huidi anajty yxii José, hue' anajty ycogájpity Arimatea ma Judea naaxjot. Je' anajty judío mǎjtungmǎidpi, e je' ooy anajty chach'oyjáyity etz ytudágyjáyity. ⁵¹ Je' nañ yjijp'ijxy anajty co yminípy je Dios y'ané'min, e ca' je' anajty jijptigüy mǎid jacnaagity mǎjtungmǎidpi co ajcxy yaj'ögy Jesús. ⁵² Chi José ñicxy ma Pilato oy pijtzoohui Jesús ñinícx. ⁵³ Chi yajminajcy ma cruudz, e mo'ñ mǎid tüg sávana, chi pidacy ma ögpi jut, ma tüg tzaahuinguetz mǎid ma ca'ni anajty ni tüg ögpi jii by yajpidägyp. ⁵⁴ Je' anajty ajcxy ni'ixiiyb a'ixiiyb je pascua xii e je' anajty tim tzoneðgan je pócxin xii.

⁵⁵ Chi je töxyjäydijc huidi anajty ti ypadzoñyii Jesús jim Galilea, panícx ajcxy je José axam. Chi ajcxy nañ jadu'n ijxy je ögpi jut, etz je ninícx jadu'n nej jii by yajpidacy. ⁵⁶ Chi ajcxy yhuimbijttay cajpjoty. Chi ajcxy yaj'oyiiy ujtz xuucpi, tzooy, etz unguento, chi amay'ajty je pocxinxi, jadu'n nej anajty cötújcín y'ane'my.

24

Co Jesús y'ögy chi yjugypijcy

¹ Co je seaman y'ixtigüy janch tim ticxícp je töxyjäydijc ajcxy ymiiñ ma je o'cpi jut, chi mǎimiiñ ajcxy ujtz xuucpi, etz tzooy huídibi anajty ti yaj'oyiiygixy. Nañ jadu'n mǎidjadyii töxyjäydijc miiñ. ² Chi ajcxy paty je tzaa ti anajty yjidiguegyii ma je o'cpi jut'aguu. ³ Co ajcxy ytigüy jutjoty, chi ca' ajcxy paty je Huindzin Jesús ñinícx. ⁴ Chi jadu'n yjajty, jii by anajty ajcxy jutjoty huinmaaygixy, co ñayguëxigi ma ajcxy ymijc metz yëydijc janch adícxp anajty yhuit. ⁵ Chi ajcxy ooy chigüy, chi ajcxy yhuindactay, chi je metzpi yëydijc yminañ:

—¿Na'amy co m'ixtaaygixy yi jugypi ma yi tiibi y'ögy? ⁶⁻⁷ Ca' je' ya, ti je' yjugypicy. Jäyméjtzcix jadu'n nej mina'ñ jim Galilea, co yminañ:

—Ooy ycopícyity co ñich, je jäy huidi tzooy tzajpjoty, nyajcüyegipy pocyjäy c'íam. Yi' ajcxy xyajcruudzpedípyich, chi njugypigípyich codugüig xii.

⁸ Chi ajcxy oy jäymejtzcooty nej anajty Jesús ti ymina'ñ. ⁹ Chi je töxyjäydijc ajcxy yhuimbijttay ma o'cpi jut. Chi ajcxy yajmǎidmíydactay jadu'n nej anajty ti íjxcixy ti mǎidoogixy mǎid Jesús ydiscípulos ajcxy je nimajmetzpi etz jacjadyii jäy huidi yajpaatp ma je' ajcxy. ¹⁰ Je töxyjäy ajcxy huidi ooy ma Jesús ñaaxtigüy, je' je' anajty ajcxy: María Magdalena, Juana, etz María Jacobo ytaj, e cham jacnaagity ymidöxyjäydijc. ¹¹ Chi Jesús ydiscípulos ca' ajcxy tim mǎidpidacy je töxyjäydijc ajcxy ayuc, hue' ajcxy tijy nigo y'occapxcixy y'ocmíydaaccix, paady ca' ajcxy mǎibijcy.

¹² Chi Pedro ypidígy ñicxy poyígyi ma anajty Jesús ti ñaaxtigüy. Chi Pedro yco'ixiiy ma je o'cpi jut, chi ijxy co ca' jii by ni ti, jëyi Jesús yhuit abícy y'ooxnäy. Chi Pedro yhuimbijty ma ytijc jihuüy ooy jadu'n nej ti ytuñyii yjadyii.

Ma Emaús tü'aa

¹³ Huin'it xii metz Jesús ydiscípulos ajcxy ñicxy ma tüg cajp mutzpi hue' anajty yxii je cajp Emaús, hue' yjiguemyity mǎid Jerusalén tugí'px estadios (majmetz kilómetro). ¹⁴ Chi amíydaacíp anajty ajcxy ñicxy. Nigapxcixy nimíydaaccixy nej Jesús ti yjaty ti y'ayoy. ¹⁵ E jadu'n yjaty ma anajty ycapxcixy ymíydaaccixy je nimetzpi, chi Jesús c'i'm nimíjhua'cy je metzpi, chi mǎid ñicxy ajcxy yquipxyi. ¹⁶ Oy anajty ja'íjxcixy, ca' ajcxy tuñcuend pín je' anajty. ¹⁷ Chi Jesús y'amídooy je' ajcxy:

—¿Ti miich ajcxy mǎidacy ma yam mdüyögyixy? ¿Nej co mdájcxixy mmáygixy?

18 Chi tög huidi anajty yxii Cleofas y'adzooy:

—Janch tög'óciy mayjäy nejhuïydäy je ayo'n ti ytunyii ti yjadyii. ¿E miich naydüg jim jättac Jerusalén, e jadu'n tijy ca' mnejhuïy?

19 Chi Jesús je' ajcxy nimay:

—¿Ti ti ytuñyii ti yjadyii?

Chi je' ajcxy ymínañ:

—Jesús Nazaretpi, huidi Dios y'ayucnajtzcaxiyp, yi' anajty mij jánchíp ma yi' ayuc etz huinma'ñ ma Dios yhuinduu, etz cham ma tög'óciy naax cajp. 20 Chi yi' ajcxy je teedy mïjtungmïdipi etz iich ajt ndungmïdipi Jesús yajcïdigii je gobernador co huen yaj'ögyii. Chi ajcxy yajcruudzpejty. 21 Hue' iich ajcxy anajty ndzach'ahuijxyp co yi' je' huidi Israeljäy ajcxy cohuánaam ma ymidzip. Jadachambi jada' ymidugigxi ma jadu'n ti ytunyii ti yjadyii.

22 Cham iich ajcxy ndöxyjäydijc ajcxy ooy xy'adzigiigyixyich. Ti y'oygixy janch tïcxïcp ma o'cpi jut. 23 E com ca' ajcxy paaty je ñaaxnïcx, chi ajcxy yhuimbijtni ymínaangixy co ti lïxcixy yi' ángeles ajcxy, hue' je ángeles ajcxy ymínañ co Jesús yjuugyity. 24 Huin'it nijëjity nmigügtijcich ooy ma o'cpi jut, paty ajcxy janch jadu'n nej töxyjäydijc anajty ymínaangixy. Ca' je' ajcxy ijxy Jesús.

25 Chi Jesús ymínañ:

—iMiich jäy ajcxy ooy ajcxy m'aaajuuñity mjetjuuñity, ca' ajcxy ti md-zojcmïbijccixy co ajcxy mjamïbigá'nip huïdibi y'ayuc najtzcaxiypbi ajcxy ycapxy! 26 ¿Nej ca' anajty ycopicyity co je Cristo ayo'n paadip, e huin'it ytigïhuip tzajpjoty ma yi' y'it oybi?

27 Chi Jesús yajnímaay ajcxy Dios yti'yajt, chondägy ma Moisés ñecy, etz tög'óciy jacjadyii necy huidi Dios y'ayucnajtzcaxiypbi yjaay, yajxon ajcxy yajni'ixyday jadu'n nej yjaybétyity mïd je Cristo ycipi.

28 Chi ajcxy mihuingoñ je mutz cajp ma anajty ñïxcixy, je Jesús jadu'n ñaybidaaci jadu'n nej jihuiy jacjiguem ñïcxy. 29 Huin'it ajcxy nimay adzip:

—Hui'm miich mïd iich ajcxy, nigï jada chuu'iy'adïch.

Chi Jesús ytigïy cajpjoty yhuï'my mïd je' ajcxy. 30 Chi jadu'n yjajty co anajty ti y'ixtaaccixy caaybi, chi Jesús tög tzajcaagy conïgy, e yajnajxy Dios cojuyip, huin'it tujc-huäcxy moy ajcxy. 31 Huin'it ajcxy ijxcajpy Jesús. Chi Jesús mïc mïciy yaj'ijxtigoy. 32 Chi ajcxy ñayñímaayi:

—¿Nej ca' yjáncity co iich ajt ooy njihuïyim jotjoty huinma'ñjoty co anajty ajt jim xymïdmïydacim tü'am, etz co ajt xyñajtzcaxiypim je huidi jaybety ma Dios ñecy?

33 E tim huin'ity ajcxy túbijccixy, chi ajcxy níxcixni jim Jerusalén. Ni'amugi' ajcxy paty je majtügpi Jesús ydiscípulos ajcxy e jacjadyii jäy ajcxy.

34 Chi ajcxy mínaangixy:

—Janch yi' co ti yjugypicy je Huindzin Jesús, com ti oy ñayguëxigyii ma Simón.

35 Chi Cleofas nimïydacy jadu'n nej tü'ay anajty ajcxy ti ñaybaatigixy mïd Jesús, etz jadu'n nej ajcxy Jesús ijxcajpy co tzajcaagy ti tujc-huäcxy.

Jesús ñayguëxïci ma je' ydiscípulos ajcxy

36 Jiiby anajty ajcxy tzachnimïydaaccixy co Jesús oy ñayguëxigyii ma je' ajcxy. Chi ytinay'ahuiy cujc'amy ma je' ajcxy, chi ymínañ:

—Jotcugi' miich ajcxy.

37 Chi je' ajcxy ooy ñay'adzigiyi ooy huinmaaygixy, hue' ajcxy tijy ijxmañiyb.

38 Chi Jesús nimay je' ajcxy:

—¿Na'amy co mjet mhuinma'ñ ti ytigoydaaygixy? ¿Nej co m'aa'ájtigixy mjet'ájtigixy pin iich? 39 Ijxcix miich ajcxy iich ngi' iich ndecy, iich jëni iich.

Nĩdongich etz íjxcich ajcxy. Tüg espíritu ca' mĩdĩty chũch ni ypajc, jadu'n nej m'íjxcĩxy ìch nmĩdĩty.

⁴⁰ Co Jesús jadu'n ymĩnañ, chi ajcxy yaj'íjxy yci' ytecy. ⁴¹ Per ca'ni ajcxy mĩbijcy mĩd co anajty ajcxy chachjotcũjcity, chi Jesús ajcxy nĩmaayi:

—¿Mĩd ajcxy ti ii mgayĩpy?

⁴² Chi ajcxy moy Jesús acxtzäy, etz tüg jĩdy serpäg. ⁴³ Chi cõbijcy, chi ycaay y'uucy jĩm ma je' ajcxy yhuĩduu. ⁴⁴ Huĩn'it Jesús ymĩnañ:

—Huĩdi m'íjxyp cham je' je' huĩdi nyajnimay jayhuĩn, co ìch mĩich ajcxy anajty mĩd'íjtcĩxy, co copĩcy nguydundähuĩbich jadu'n nej yjaybétyĩty ma je Moĩsés ñecy je jěcyĩp, etz jacjadyii Dios y'ayucnajtzcaxĩybi ñecy, etz yĩ salmo necy.

⁴⁵ Huĩn'it je' ajcxy yjot yhuĩnma'ñ ymĩñ ymejch, jaydēbi huĩnjihuĩyĩgĩxĩpy huĩdi jaybétyĩp. ⁴⁶ Chi Jesús yjacmĩnañ:

—Jadu'n jaybety y'ity ma Dios ñecy co copĩcy co je Cristo paadĩp ayo'n e yjugypĩgĩpy codugĩg xĩ, maabi anajty y'õgy. ⁴⁷ Huen ajcxy yajcax-huäcxy Dios ytiy'ajt huĩdu'my naaxhuĩñ, chondägĩp Jerusalén, co ooy ycopĩcyĩty huen jäy ajcxy jothuĩmbijtcĩx jaydēbi ajcxy paadĩp pocyhuĩn-meecxin. ⁴⁸ Mĩich ajcxy nidĩy'ajt'adĩpy tüg'óciy jadu'n nej cham ti m'íjxcĩxy ti mnejhuĩyĩgĩxy. ⁴⁹ Jadachambi nguexĩpyĩch ma mĩich ajcxy je huĩdi nDeedyĩch ti xyaj'ahuaniĩyĩgĩxy. Huĩ'mgĩx ya Jerusalén ixti cooni ajcxy xyñĩdigĩhuĩp xycõdigĩhuĩp je Dios yjihuĩ'ñ ymic'ajt huĩdi tzonam tzajpjoty.

Jesús ypa'ttigĩyñ tzajpjoty

⁵⁰ Huĩn'it xĩ Jesús mĩd tzoñ je' ydiscĩpulos ajcxy, chi ajcxy ycajppĩdzĩmy, ñĩcxy ajcxy mĩhuĩgon je Betania. Chi Jesús xajhuäcxy yci' mĩbijctzoy Dios mĩd je ymĩgũgtĩc ajcxy ycĩxpi. ⁵¹ Chi jadu'n yjajty ma anajty Dios mĩbijctzoy mĩd yĩ' ajcxy ycĩxpi, chi abĩcy yajhuĩ'mni je' ajcxy e je' ypätĩgĩyñi jĩby tzajpjoty. ⁵² Chi yĩ' ajcxy jĩm yjac-huäcxĩjpy Dios ojadajtcĩxy. Chi ajcxy yhuĩmbijttaayñi jĩm Jerusalén janch jotcujc. ⁵³ Chi ajcxy jabom jabom anajty ñĩcxcĩxy ma Dios ytiyc chajpcaxycapxcĩxy, ojadajtcĩxy jäymejtzcĩxy yĩ Dios, Janch jadu'n jada. Amén.

SAN JUAN

Jaayhui'my Jadu'n Nej Jesucristo Ytun Yjajti

Dios y'ung huudibi y'oy ya naaxhuiñ yejci Dios y'ayuc tìy'ajt

¹ Co naaxhuiñybi oga'n chondacy jiiyim anajty Dios y'ung, e yì' yajnejhuiy jây ajcxy Dios y'ayuc ytìy'ajt. Dios y'ung tú'ciy anajty yajpaady ma Dios. ² Je' tím oga'n'aty anajty yajpatp ma Dios. ³ Tüg'óciy huudijaty yaj'ijxp yajpatp ya naaxhuiñ, yì' yaj'oyiday yajcojtay. Tüg'óciy huudijaty Dios yajcojy, tú'ciy ytuñ miiid y'ung. ⁴ Dios y'ung yì' jugy'ajtyejctaayb ma tüg'óciy naaxhuiñjây. Miiid co jugy'ajtyejctây ma tüg'óciy naaxhuiñjây, je' je' tìy'ajt co Dios y'ung ymiiid Dios ymic'ajt. Jadu'n nipaady nej tüg jiiin huudibi jây codiicxp. ⁵ Ya naaxhuiñ yajpaady anii. Yi anii jadu'n yì' nej coodzpì. Yi Dios y'ung ti mimiñ ya naaxhuiñ Dios y'ayuc ytìy'ajt. Jadu'n Dios y'ayuc ytìy'ajt ma jây yjot yhuinma'ñ nej tüg jiiin ytiicxy agoodztuuyb. Yi anii ca' ñaygodigiyii miiid Dios ytìy'ajt.

⁶ Ma'xung'ajt tüg yëydijc huudibi Dios anajty ti yajnibicy. Hue' anajty yxii Juan. ⁷ Yi' oga'n tìy'ajt yejci co Dios ymic'ajt etz ytìy'ajt yajpaady ma Dios y'ung, jigix tüg'óciy je jây ajcxy camibijctâhuipy je Dios y'ung. Dios y'ung jadu'n nipaady nej tüg jiiin huudibi codiicxp ma jây ytüyöy. ⁸ Je Juan ca' je' anajty yjējity je Cristo, je huudibi capxhuäc xp Dios y'ayuc ytìy'ajt. Hue' janchtiy je Juan ñidiy'ajt'ajt je Cristo. ⁹ Je Dios y'ung hue' je' ma'xung'ajty ya naaxhuiñ. Je' je' anajty je Dios ymic'ajt etz ytìy'ajt ymiiid, je janchypì, ma jëb tüg'óciy jây ya naaxhuiñ patcixy Dios ytìy'ajt.

¹⁰ Je Dios y'ung ya anajty yhuudity naaxhuiñgixy. E jada naaxhuiñ yì' yaj'oyiday. E may je naaxhuiñjây ca' ajcxy ijxcajpy. ¹¹ Je ymīgügtijc, je judiojây, je' ajcxy nimiini, e may ajcxy je ymīgügtijc ca' ajcxy ycöbiji. ¹² Tüg'óciy je jây ajcxy pinjaty mijpidac yì' yxii yì' ymic'ajt, yì' ajcxy yajmoy Dios ymic'ajt, e jadu'n nipaty nejjihuüy ajcxy Dios y'ung'adyii. ¹³ Canan hue' je' co naydijuyb Dios y'ung co ti yma'xung'aty jadu'n nej jây ajcxy y'ocma'xung'aty. Nañ ni ca' yjadu'nity nej jây tijy, nej jây jijp'ixy, ni canan jây jadu'n ti huinmay. Hue' janchtiy Dios jadu'n ti huinmay.

¹⁴ Je Dios y'ung ya naaxhuiñ je' yma'xung'ajty miiid ñinix etz chinay miiid naaxhuiñjây. E iich ajcxy n'ijxich yì' y'oy'ajt etz ymic'ajt, jadu'n nej Dios Teedy y'ung tüg'ajc oy'ajt etz mic'ajt miiidity. ¹⁵ Juan ñidiy'ajt'ajt je Dios y'ung, e chi capxypidzimy, e jadu'n yminañ:

—Jada je' je jây huudibi iich jadu'n nimiidaacich ma miich ajcxy. Je huudibi miimb jac'axam ma iich, jac mic'ajt miiid yì' ca'ydi iich, com jacjayijp yì' jugy'ajt paty ca'ydi iich.

¹⁶ Je Dios y'ung oy xychojcm xyjihuiyim mijcajee, paady je' tuuñ may'ajt oy'ajt mijcajee miiid iich ajt ycixpi. ¹⁷ Com Dios y'ané'min ycötujcin micpi hue' Dios yajniguejx je Moisés. Co Dios quejxy Jesucristo ya naaxhuiñ, chi may'ajt oy'ajt tuñ miiid je jây ajcxy ycixpi, e nañ je' ytìy'ajt yajniguejx je Jesucristo. ¹⁸ Je Dios ni caminaabi pin ca'ixyñi, je y'ung tüg'ajc yajpatp ma Dios Teedy ity. Je Dios y'ung ti xyajnejhuiyim nej Dios yajpaady.

Juan el Bautista je' tìy'ajt yejci co Jesús je' anajty Dios y'ung

¹⁹ Jadaabi je' je tìy'ajt huudibi Juan yejci, co judío jây ajcxy quejxy nijējity teedytjic etz tzajptjic tungmiiidpi. Jim ajcxy chooñ Jerusalén nicxy ma anajty Juan yajpaady, chi ajcxy y'amidooy:

—¿Mbin miich? ¿Nej miich je' je Cristo huídibi Dios yquexamy?

²⁰ Je' ñigapx je t'iy'ajt, ca' ñaygoyützi, chi ymínañ:

—Ca' ñich njëjity je Cristo.

²¹ Chi ajcxy jac'amídooy:

—¿E pin miich mnaydiyii? Pen ca' mjëjity je Cristo. ¿Nej miich je' je Elías?

Chi Juan y'adzooy:

—Ca' je' n'ñichity.

Chi ajcxy jac'amídooy:

—¿Nej miich je' je Dios y'ayuccapxhuäcxpi, je huídibi ñigapxy ma Dios ñecy co ymiinañ ya naaxhuiñ?

Chi Juan y'adzooy:

—Ca'.

²² Chi y'amídooy ajcxy jadüg'oc:

—¿Mbin miich? Jigix ñich ajcxy t'iy'ajt nyajñicxibich ma yi t'ibi ñich ajcxy xyquexyich. ¿Ti miich nayxñigoyäxyii?

²³ Chi Juan ymínañ:

—Ñich je' je jäy huídibi Dios y'ayuccapxhuäcxip ma tüg mjtig'íduum, tim jadu'n nej jiiby jaybety ymiñ ma Isaías ñecy, nañ tim jadu'n ñich nmína'ñich co copicy nayñi'ixíyigix ma yi mjot yi mhuinma'ñ, jëbi naybáatigixy müd mHuindzin Dios. Jadu'n nej jäy ixypy tü'aa yaj'oyiy co tüg huindzin ymiina'ñ.

²⁴ Je teedytjic etz tzajptjic tungmüdpí huídibi oy migapxy Juan, hue' anajty ajcxy fariseojäy ti yquexyii. ²⁵ Chi ajcxy jactim'amídooy Juan:

—¿Ti miich co mjäyayñibety? Peni ca' miich mjëjity je Cristo, ni mgajëjity je Elías, ni mgajëjity huídibi Dios y'ayuc najtzcapxíyip.

²⁶⁻²⁷ Chi Juan y'adzooy:

—Ñich hue' jäy nyajñibetyich müd ñi. Ya naaxhuiñ ji tüg jäy huídibi miich ajcxy ca' m'ixy'adyii. Je' huídibi jac'axam mimb ma ñich, je huídibi ca' mihuaadity nicxy yi' xytumbi'adyiijich, nicxyich ycíghuin nguejich.

²⁸ Jadu'n ytuni yjajti jim Betábara, jim'amy ahuin ma Jordán mij ñi, jim anajty Juan jäy yajñibety. Juan t'iy'ajt yejc co Jesús je' anajty yjugy'ajt yegam müd ñich ajt nbocy ycixpi.

Jesús naysajhuindzigíhuaanip ma Dios müd jäy ajcxy ypocy ycixpi

²⁹ Chi je com jabom co ijxy Jesús anajty ñimiñyii, chi Juan ñimay je jäy ajcxy:

—Cha je' ymiñ je Dios yjäy huídibi Dios naysajhuindzigíhuaanip müd naaxhuiñyjäy ajcxy ypocy ycixpi. Tim jadu'n nej judíojäy ajcxy Dios huindzigíy müd ypocy ycixpi. ³⁰ Jada je' huídibi ñich nnigapxypich co jac'axam ymiina'ñ ma ñich tüg yëdjic huídibi ñigí Dios ymic'ajt y'oy'ajt müdity ca'ydi ñich. Com jiiyim anajty yi' yjugy'aty co oga'n naaxhuiñybi chondacy. ³¹ Oy ñich anajty ca' yi' n'ixy'adyiijich huingíxy jipcíxy, nyajñibejtich jäy, jigix yi judíojäy nejhuñhuip ajcxy co ji yajpaady je Cristo je huídibi Dios ymic'ajt müd.

³² Chi Juan nigodiy'ajt'ajty je Cristo co ymínañ:

—Ñich ti n'ixyich yi Espíritu Santo jiiby choñ tzajpjoty, jadu'n yquëxigy nej tüg muuxy, e chi y'ixtacy ma Jesucristo. ³³ Tiydudägy ca' ñich anajty n'ixy'adyiijich. Je Dios huídibi xyquejxich jäy yajñibejtpi, je' ñich anajty jadu'n ti xyñimäyich co je jäy ma anajty n'ixyich je Espíritu Santo ñigidägyii anajty etz yhui'my ma je'. Je' je' jadu'n anajty huídibi y'adigíhuipy yjottigíhuipy Dios yjihuí'ñ ymic'ajt ma je jäy ajcxy. ³⁴ Cham nnigapxpetyich co ñich ti n'ixyich je jäy, e nyejcpyich t'iy'ajt co je' je' je Dios y'ung.

Jesús yhuin'ijx nijëjity jäy huídibi anajty ydiscípulo'andaanipy

³⁵ Chi je com jabom jopy jim anajty Juan yajpaady miid metz jäy huidibi ixpjcp ma yi'. ³⁶ Chi anajty ajcxy tzachhuindixy Jesús co anajty jim ñaxy, chi Juan nimay je metzpi jäy:

—Oc'ijxcix ocnejhuigyix, cha je jäy huidibi Dios nayyajhuindzigihuaanip miid naaxhuiñyjäy ypocy ycxpi.

³⁷ E je metzpi jäy huidibi anajty ajcxy ixpjcp ma Juan, co jadu'n ajcxy midoy nej Juan yminañ, chi ajcxy Jesús padzooñ. ³⁸ Chi Jesús y'ijxhuimbijty, chi ijxy co anajty ajcxy ypanixyii, chi jada' nimay ajcxy:

—¿Ti ajcxy m'ixtaayb?

Chi ajcxy y'adzooy:

—Huindzin, ¿ma tiiyi ti mja'ttägy?

³⁹ Chi Jesús y'adzooy:

—Miingix, jigix ajcxy m'ixipy ma ti nja'ttägyich.

Chi jada' ajcxy panixy, e chi ajcxy ijxy ma anajty ti yja'ttägy. Je huin'it xhmbi chi jim je' miid yhui'miy, com mijminacyxii anajty co ajcxy jim ymejch.

⁴⁰ Andrés, je Simón Pedro ymiguëx, je' anajty tüg tzoonip huidibi nimetz ajcxy midou jadu'n nej Juan yminañ, etz je' anajty ajcxy ti padzooñ Jesús.

⁴¹ Chi jada' Andrés oy ixtäy y'uch Simón tim jayijp, chi nimay:

—Ti ich ajcxy nbaady je Mesías —jadu'n je ayuc Mesías yhuimbizimañ Cristo.

⁴² Chi Andrés miidnixy Simón ma Jesús, e chi Jesús huindixpejty, nimay:

—Miich je' Simón, Jonás miich xy'ung'ajtp. Miich je' mxii'adiyb Cefas —huidibi ayuc'amy huimbizimb tzaa.

Jesús je' yhuin'ijx Felipe etz Natanael

⁴³ Chi com jabom Jesús choñ ñixy jim Galilea, chi minaybaati Felipe, chi jadu'n nimay:

—Pajamgich.

⁴⁴ Felipe jim anajty ycogajpity Betsaida, nañ je' je' je' cajp ma anajty ajcxy ycogajpity Andrés etz Pedro. ⁴⁵ Chi Felipe minaybaati je jäy huidibiyxii Natanael, chi jadu'n nimay:

—Ti ich ajcxy je' nbaadyich je jäy huidibi yajnigapxp yajnimiydacp ma Moisés ñecy, etz yi Dios y'ayucnajtzcaxiybi ñecy. Yi' je' je' Jesús, José y'ung huidibi cogajpip jim Nazaret.

⁴⁶ Chi Natanael y'adzohuimbijty:

—¿Nej jim Nazaret ti choñ tüg oyjäyi? Com ac jadu'n jäy yminañ co ac jibicjäydijc jim tzinaayb.

Chi Felipe yminañ:

—Jam ci'm octim'ix.

⁴⁷ Co Jesús ijxy co Natanael ñimiñyii, chi jadu'n yminañ:

—Cha tüg judíojäy huidibi ca' pin huin'iniipy.

⁴⁸ Chi Natanael yminañ:

—¿Nej miich ti xy'ijxcapyich pin jäy ich?

Chi Jesús nimay Natanael:

—Ca'ni anajty Felipe xyñimaayñi: “Jam íxim je Jesús” co anajty miich jiiyby'emy ma je higeri quipypa't, huin'it ich miich ti n'ijxcapy.

⁴⁹ Chi Natanael y'adzooy:

—Huindzin, miich je' Dios y'ung. Miich je' Rey'adam ma je judíojäy ajcxy.

⁵⁰ Chi Jesús y'adzooy:

—Miid co ti nnimäy co jiiyby'emy anajty miich ma je higeri quipypa't co ich miich ti n'ijxcapy. ¿E ti mdimjanimbicy? Jactimmijhuinmañ etz jactimmij'oy'ajt m'ixamyb mbadamyb.

⁵¹ Chi Jesús jadu'n ymínañ:

—Janch tím tıy ñich miich ajcxy yam jadu'n nimäy co m'ixıpy ajcxy yí tzajp y'ahuäch etz Dios y'ángeles ajcxy chooñ tzajpjoty xyñigidägyich, e ypa'ttigıygıxy jadüg'oc tzajpjoty. Choongıxy yja'tcıxy ma ñich je jäy huıdibi tzoon tzajpjoty.

2

Jesús y'oy ma anajty jäy nixıduñ tüg pijcın jım Caná

¹ Midugıgıxııbi anajty maabi ajcxy Jesús mınaymıgápıgıxy, ma je cajp huıdibi yxıı Caná ma je Galilea naaxjot jım anajty huınxıdungıxy tüg jäy huıdibi anajty tı ypıcy. E jım anajty nañ jadu'n Jesús ytaj. ² Chi Jesús mııd je' ydiscıpus ajcxy yajhuooy jım ma je xıı anajty ytuñyıı yjadyıı. ³ Tı anajty vino ycıjxtaayñı, huın'ıt Jesús ytaj ñımayñı:

—Ca'p ajcxy mııdıñ vino.

⁴ Chi Jesús y'adzooy ytaj nımay:

—Ca' tı jotmay nmııdıdyıch mııd miich töxyäy. ñich nhorı ca'ni paady mına jäy ajcxy nyajnejhuıhuıbıch pın ñich.

⁵ Chi je ytaj nımay je tumbıdıjc ajcxy:

—Mdúngıxıpy nej anajty ajcxy Jesús xyñımaaygıxy.

⁶ Jım anajty tudujc tzaadu'tz ma anajty nıı y'ıty. Je nıı anajty ajcxy yajtumyb co anajty ajcxy ycıbujcıxy jadu'n nej ypocy ixpujcıxy, jadu'n anajty ajcxy judıojäy costumbre mııdıty. Tügpi tzaadu'tz ymııd anajty yjot metz majt tugııg majt nıı. ⁷ Chi Jesús nımay je tumbıdıjc ajcxy:

—Yaj'ujtzcıx yı tzaadu'tz mııd nıı.

E chi ajcxy yaj'ujtztay mabaat y'a'ujtznaxy je tzaadu'tz. ⁸ Chi Jesús ymınañ:

—Yajpidzımgıx cham yı nıı, e yajnicxcıx jııby ma huıdibi ane'mb ma yı caydac uuctac.

Chi ajcxy yajnicxy je nıı. ⁹ Co jada' je ane'mbı jıhuıymajch je nıı tı anajty yvinocojy, chi mıjhuoy je yeydıjc huıdibi anajty tı ypıcy. Je ane'mbı ca' anajty nejhuıy ma anajty je vino tı choñ. Jeyı anajty je ytumbıdıjc ñejhuııyb co nıı anajty ajcxy yajpidzımgıxy ma je tzaadu'tz. ¹⁰ Chi je ane'mbı nımay je huıdibi anajty tı ypıcy:

—Tüg'ócy jäy ajcxy huıdibi xııdumb, hue' ajcxy yajtumyb jayıjp je vino oybı. E co jäy ajcxy ooy yxondaacni, chi oyñıhuıdibi vino nıı jacyajtungıxy. Miich janchtıy, tı m'amay'aty yı vinonıı oybı ıxtı chamni myajtuñ.

¹¹ Je' je' je oga'ııbı mıjhuınma'ñ huıdibi Jesús ytuun jım Caná ma Galilea ñaaxjot. Chi yajnıgüxıgy je ymıc'ajt etz y'oyjäy'ajt. E je huıdibi anajty ajcxy yaj'ıxpıjcpy, chi ajcxy ooy mıbıjcy mıjpidacy je Jesús.

¹² Co jadu'n tüg'ócy ytuni yajtı, chi Jesús y'ıdacy jım ma je cajp huıdı yxıı Capernaum mııd ytaj etz y'uch ajcxy, etz huıdibi anajty yaj'ıxpıjcpy. Jım ajcxy yhuäcxıjpy tüg xıı mejtz xıı.

Jesús yajpidzım ajuuybı adoocpi ma Dios ytıjc

¹³ Tım huıngon anajty je pascua xıı huıdibi judıo ajcxy ytumy jım Jerusalén, paady Jesús ñıcxı jım. ¹⁴ Jım ma Dios ytıjc Jesús paty je' huıdibi anajty ajcxy ajuuybı adoocpi, jadu'n nej ma ymııñ huaj, borregı, etz muuxy (huıdibi jäy ajcxy Dios yajhuındzıgııyb). Nañ jım meeñyhuıngogombıdıjc anajty ajcxy y'ıñaaygıxy ma ymesa. ¹⁵ Chi Jesús yaj'oyııy tüg cochac huojp. E chi ixhuojpidzımday je ajuuybı adoocpi ajcxy ma Dios ytıjc ñıhuaj etz ñıborrego. Chi yı meeñyhuıngogombıdıjc ymeeñ cöxıjtnajtayı, e chi ymesa tıjhuımbıjttaayı.

¹⁶ Chi nımay je muuxytoocpidıjc ajcxy:

—Yajpidzimgix jada muuxy ya. Ca' ñich nDeedy ytijc yhuaani ajcxy ajuydac adoctac.

¹⁷ Je' ajcxy huidibi anajty Jesús yaj'ixpijcpy chi ajihuiygooti ajcxy je ayuc, jadu'n nej jaybety ymiñ ma Dios ñecy: “Ooy ndzocy njihuiyich Dios ytijc, paady ooy nnijottigoyich Dios ytijc.”

¹⁸ Chi je judío ixpijtyjtc ajcxy y'amidooy Jesús:

—¿Ti mijhuinma'ñ miich xy'ocyaj'ixambich ajcxy nej tüg iixpejt, pen janch miiidity cõtujcin co m'ixhuojppidzimdäy yi ajuuybi adoocpi ajcxy?

¹⁹ Chi Jesús y'adzooy:

—Yajhuindigooygix jada Dios ytijc, e codugüg xii ñich yi' jadüg'oc nyajpidigipy.

²⁰ Chi jada' je judío ixpijtyjtc ajcxy y'adzooy:

—Huixchiguipx tudujc jimijt yhuäcxijpy co jäy cojy jada Dios ytijc. ¿E miich tijy myajpidigamy codugügxiij?

²¹ Per ca' je' anajty nigapxy je Dios ytijc. Hue' je' anajty ci'm ñayñigapxyii co anajty y'öga'ñ, etz co yjugypigipy jadüg'oc codugüg xii. ²² Chi jada' co Jesús yjugypijcy codugüg xii maabi anajty y'ögy, je huidibi anajty ajcxy ti yaj'ixpijcy, ajihuiygooti ajcxy huidibi Jesús anajty ti yajnimäyigixy. Chi jada' ajcxy miijicy ooy jadu'n nej anajty ycojaayity ma Dios ylibro, etz com nañ jadu'n anajty Jesús ti ymina'ñ.

Jesús ñejhuüy nej jäy ajcxy yjot yhuinma'ñ miiidity

²³ Co anajty Jesús yjimity Jerusalén pascua xijoty, mayjäy ooy ymiijci co ajcxy ijxy je mijhuinma'ñ huidibi anajty ytumyb. ²⁴ Jesús ca' anajty yjaty ñaygyegyii ma je mayjäy ajcxy (hue' anajty ajcxy chachyajrey'adamy). ²⁵ Com Jesús ñejhuiydaayb anajty nej jäy ajcxy nidüg nidüg yjot yhuinma'ñ miiidity ca' tzocy pin yajnimähuüyb ti anajty ajcxy ytunamy, com ñejhuiydaayb nej jäy ajcxy yjot yhuinma'ñ miiidity.

3

Nicodemo oy ytij'ajtpicy ma Jesús

¹ Jim anajty tüg yeydijc, fariseojäy y'ixpijcin anajty yajtuunipy. Hue' anajty yxii Nicodemo. Je' anajty ñigohuajc'ajtp ma je judíojäy ajcxy ymiñ. ² Chi jada' Nicodemo ymiñ coodz ma Jesús anajty y'ity, chi nimay:

—Huindzin, nejhuüyb ñich ajcxy co miich tüg huindzin huidibi tzomb ma Dios. Com ca' ni pin jaty nej tunipy je mijhuinma'ñ huidibi miich mdumyb, pen ca' Dios ymic'ajt miiidity.

³ Chi Jesús y'adzooy:

—Janch janch ñich miich yam jadu'n nimäy, co ca' ni pin ixipy Dios y'it, pen ca' jadüg'oc yma'xung'ajttigach.

⁴ Chi Nicodemo yajtiy:

—Per, ¿nej tüg jäy tiibi ymij'anäcciyñi y'ocnima'xung'ajttigajtpity jadüg'oc? ¿Nej jëbi jadüg'oc ytigiy ma ytaj y'aa yjot, e chi yma'xung'adity jadüg'oc?

⁵ Chi Jesús y'adzooy:

—Janch janch ñich miich yam jadu'n nimäy pen ca' jäy yjothuimbity etz ñibety, pen ca' Dios yjihui'ñ ymic'ajt y'adigiyii yjottigiyii, ca' jëbi ytigiy ma Dios chinäy. ⁶ Je jäy huidibi ajcxy ma'xung'ajtp ma töxyjäy, ymiid ajcxy ñinix yjugy'ajtin. Je jäy ajcxy huidibi Dios yjihui'ñ ymic'ajt adigiyipy jottigiyipy ymiid ajcxy Dios yjugy'ajtin. ⁷ Ca' nej mnayjihuihuüyb co ti nnimäy co copicy mma'xung'adipy huinjemy, co Dios yjihui'ñ ymic'ajt xy'adigihuipy xyjottigihuipy. ⁸ Com je poj miiniyb hueñytimyma'amyity, e nmidoohuim

co y'a'ich, e ca' nnejhuuyim ma choñ e ma ñicxy. Jadu'n nej je poj ypojoy e nganejhuuyim ma choñ, nañ tim jadu'n yjaty mïid je Espiritu Santo, ca' nejhuuyim nej yjaty co adigiy jottigiy jay.

⁹ Chi Nicodemo yajtihuimbijty:

—¿Nej tijy co yjadu'nity? Ca' nhuinjihuuyich.

¹⁰ Chi Jesús y'adzooy:

—Miich huindzin'ajtp ma yi judiojy, ¿ti co ca' mhuinjihuuyi jadaayaabi tiy'ajt? ¹¹ Janch janch ich miich yam jadu'n nnimäy co ich etz nDeedich ngapxyp yi huudibi nejhuuyigixypich, e nyejcpyich ajcxy tiy'ajt yi huudijaty ich ti n'ixcixyich. Miich ajcxy judio xpicytijc ca' ajcxy mgöbijccixy ich ajcxy ndiy'ajt. ¹² Pen ca' miich ajcxy mibijccixy jada tiy'ajt huudibi njanimiydacypich huudibi yajpatp ya naaxhuiñ, ca' ajcxy mmibigipy co njanimiydagibich yi tiy'ajt huudibi tzajpjoty yajpatp.

¹³ Ca' ni pin ti y'oy tzajpjoty, ich je jay tügpajc huudibi ti ndzoñich tzajpjoty, ti ngidägyich ya naaxhuiñ. ¹⁴ Jadu'n nej Moisés yaj'oyiy je pujx tza'ñ, e chi yajcruudzpety jim mijtigiduum jigix chögipy je jay ajcxy ma je ahua'n iyujc chüchyii. Nañ tim jadu'n jay ajcxy xyajcruudzpeda'ñich. ¹⁵ E tüg'óciy jay ajcxy pinjaty xymijpidaacpich, ca' yi' jugy'ajtin ycixy ytigooy ni mina.

Dios ooy mijcajee tzocy jihuuyi ya naaxhuiñjyay

¹⁶ Ooy mijcajee Dios tzocy jihuuyi ya naaxhuiñjyay co yecy y'ung tügpajcpi mïid jay ajcxy ypocy ycixpi. Paady pinjaty mibijcp mijpidacp yi' y'ung, ca' yjugy'ajtin ycixipy ytigoyipy tücci'yi. Hue' janchtiy y'alma ypaadipy tüg jugy'ajtin huudibi ca' ni mina ycixipy ytigoyipy. ¹⁷ Dios ca' quejxy y'ung ya naaxhuiñ co tzaachytunipy yi naaxhuiñjyay ajcxy mïid ypocy ycixpi. Paady y'ung quejxy co yajpocyñihuáatzcixipy.

¹⁸ Je jay ajcxy pinjaty mibijcp mijpidacp Dios y'ung, ca' ajcxy Dios chaachytunipy mïid ypocy ycixpi. Je jay ajcxy pinjaty ca' mibicy ca' mijpidagy Dios y'ung, pocycähuipy ajcxy ma Dios, co ca' mijpidaci ajcxy Dios y'ung tügpajcpi. ¹⁹ Paady ycixpi Dios tzaachytuna'ñ mayjy mïid ypocy ycixpi, com co Dios quejxy y'ung mïid ytiy'ajt ya naaxhuiñ, e ca' ajcxy mibijcy Dios y'ung, jadu'n je' anajty nej tüg jin huudi codicxip jay ajcxy ma chinaayin yjugy'ajtin. Per ca'p ajcxy je naaxhuiñjyay mijpidacy je jin, jadu'n nej jihuuyi ajcxy anajty yjacjotcujcity co chinaayigixy agoodztuuyb, com je' co nigü tzachnijot'ajtcixy jibic-huinma'ñ. ²⁰ Com je jay ajcxy huudibi jibic-huinma'ñ tzach nijot'ajtcixp, ca' ajcxy tzojci Dios ytiy'ajt, jadu'n nej jihuuyi ca' chinahuaangixy ma jin ytiicxin. Ca' ajcxy y'amidoo'idani Dios y'ayuc, ca'ydi ñiguëxigy je jibicpi huudibi ajcxy ytumy. ²¹ Je jay ajcxy huudibi cuydumb Dios ytiy'ajt, je' ajcxy ñiminipy Dios y'ung ytiy'ajt, jadu'n nej jihuuyi jin nimiingixy ma ytiicxy, huen jatyimy niguëxigy co oy ytungixy etz co Dios ytiy'ajt ajcxy mïidity ma yjot yhuinma'ñ.

Juan (el Bautista) tiy'ajt yejc ma jay ajcxy mïid Jesús ycixpi

²² Co jadu'n ytuni yjajti, chi Jesús ñicxy jim Judea naaxjot mïid ydiscípulos ajcxy. Chi ajcxy jim yhuäcxijpy. Jim ajcxy jay yajnibejty. ²³ Nañ jadu'n Juan anajty yjyyajñibety jim Enón, com jim anajty ooy comñi, e jim anajty jay ymingixy etz ñibejtcixy. ²⁴ Hue' jada jadu'n ytuni yjajti ca'ni anajty je Juan pidaaccixy pujxtigoty.

²⁵ Ca' ajcxy ñay'ayuc-huinjihuuyi nijëjty huudibi anajty Juan yaj'ixpicyp etz tüg jay nej jëbi huaad ypocy ñayajñihuädziyb ajcxy. ²⁶ Chi jada' ajcxy Juan nidzooñ, oy ajcxy paty, e chi ajcxy nimay:

—Huindzin, je jäy huídibi anajty miich jim mïd jim'amy Jordán mijñnaxy, je huídibi miich anajty mnidiy'ajt'ajtpy co je' je' je Cristo, nañ ooy chachjäyjnibety. E janch mayjäy y'ocnimujcin.

²⁷ Chi Juan y'adzooy:

—Ca' ni pin ni ti mic'ajt mïdity, pen ca' Dios ni ti mic'ajt ymöyii. ²⁸ Miich ajcxy mnejhuñyb co nmīnaañich co ñch ca' njëjty je Cristo. Hue' janchtiy Dios xyquejxich jayijp co nnidiy'ajt'adipyich je Cristo. ²⁹ Co jäy ypicý je yëdyjc je' je' mïd'idam je ytöxyjc. E je töxycapxpí huídibi ti yaj'oyiy je pijcin, ca' je' mïd'idañ je töxyjäy, jëyi co yjotcugiy co yöcmidoohui je töxyjäy ñäy co yjädy ma je' ytijc co ypigaani. Cristo jadu'n je' nipaady nej tüg töxyjäy ñäy, e je töxyjäy jadu'n je' nipaady nej Dios yjäy. Je Cristo ymïd'idaanipy Dios yjäy. Jadu'n ñch nipaady nej tüg töxycapxpí, ti Dios yjäy nyajni'ixñiyich jigix mijpidáaccixipy je Cristo. Jotcujcich cham co je Cristo ti ymiñ, e ñicxy yí jäy ajcxy ma yí. ³⁰ Ooy ytimycopicyity co Jesús ymij'ajt paatnipy, e ñch ndung ycixnipy ymayñipy.

Dios y'ung tzoon jii by ma Dios

³¹ Chi Juan yjacmīnañ:

—Je Cristo huídibi jii by tzoon ma Dios jacmij ixpijcin mïdity ca'ydi naaxhuiñyjäy ajcxy. Je jäy ajcxy huídibi ya naaxhuiñ ijtp, ymīnaaxhuiñyjäy ti yaj'ixpijcgixy, e je' ajcxy ñidiy'ajt'ajtpy je naaxhuiñyjäy y'ixpijcin. Je Cristo tzoon jii by tzajpjoty, jacmijcayee yí' ma y'ayuc ytiy'ajt ca'dyí pin. ³² Je Cristo ñigapxyp huídibi ti ixý e ti mīdooy, e yí'y'ayuc ytiy'ajt ca' jäy ajcxy cöbīgaangixy. ³³ Je jäy ajcxy huídibi cöbījcp Dios y'ung y'ayuc ytiy'ajt, je' ajcxy ñigapxpejtpy co Dios ytiy'ajt janch yí. ³⁴ Je Jesús huídibi Dios yquejx, ca'pxy Dios ytiy'ajt ñigapxpejti, com Dios ti möy yí' y'ung yí' yjihuiñ ymicc'ajt mijcayee. ³⁵ Dios Teedy chojcyp yjihuiñyb y'ung, e tüg'óciy ymic'ajt ytiy'ajt yí'ti yajmigo'ixñiydäy. ³⁶ Je jäy ajcxy pinjaty mibijcp Dios y'ung, ymïd'ajtpy ajcxy y'alma je jugy'ajtin huídibi ca' ycixy yti gooy. Je jäy ajcxy pinjaty ca' capxymidooy Dios y'ung, ca' ajcxy y'alma mïd'adipy je jugy'ajtin huídibi ca' ycixy yti gooy. Je yí ypaadipy ajcxy Dios chip y'ejcin.

4

Jesús ñaybaati mïd tüg töxyjäy jim Samaria

¹ Chi je Huindzin Jesús ayuc mīdooy jadu'n nej anajty je fariseojäy ajcxy ycapxcixy ymīydaaccixy co je Jesús jacmayjäy anajty yaj'ixpicý etz yajñibety ca'ydi Juan. ² Oy Jesús ca' anajty jäy yajñibety cī'm. Hue' janchtiy je' ydiscípulos anajty ajcxy jäy yajñibejtp. ³ E co Jesús jada nejhuñy, chi jim Judea choni, yhuimbijtni jim Galilea.

⁴ Co yhuimbijty, hue' anajty yjatytimyñaxñhuañ jim Samaria. ⁵ Chi jada' yja'ty huington ma je mij cajp huídí xñijp Samaria, jim ma anajty tüg pi'ccajp huídí xñijp Sicar, mihuington je naax huídibi Jacob anajty ti möy y'ung José. ⁶ Jim anajty Jesús yajpaady ma je Jacob ññigondac. Com ti anajty Jesús y'anucxñyñi mïd je tūyöyii, chi y'ijxtacy jim ma je ññigondac anajty. Hue' anajty xñi jim cugñhuaanip. ⁷ Chi jim yja'ty ññigombi tüg töxyjäy. Chi Jesús ymīnañ:

—Ñch yajñi'uucc. ⁸ Com je' ydiscípulos ajcxy huídibi anajty Jesús yjaymïd'ajtp, ti anajty ñicxcixy cajpjoty juuyb pijcp.

⁹ Chi je töxyjäy y'adzooy huídibi anajty cogajpip Samaria:

—¿Na'amy co ñch ññi xpijctzoohuich? com miich hue' miich judíojäy, e samariajäy ñch.

(Co yí judíojäy etz samariajäy ca' ajcxy ñaygodigiyigixy.)

¹⁰ Huin'it Jesús y'adzooy:

—Co ixypy m'ocnejhuïy je oybi huïdibi Dios yejcyp mïd miich ycïxpi, e m'ocnejhuïy ixypy nañ jadu'n pin xypïctzoohuïpy yi nï, janch co miich ixypy xyñimäyich: “Ëich yajni'uucc”. E ïch miich ixypy nmooyb nï huïdibi jugy'ajt yegïpy huinixï.

¹¹ Chi je töxyjäy y'adzooy nimay Jesús:

—Huindzin, miich ca' mmïdity ti mïd myajpidzimïpy yi nï, e yi nijut cïcy yi' ooy. ¿Ma tijy m'ocpada'ñ yi nï huïdibi yajjugy'ajtp? ¹² ¿Nej jacnigi tijy miich mij mnayyajnaxyii, ca'ydi ïch ajt n'ap ndeedy Jacob? Je'je' huïdibi jada nïgop yaj'oyïy. Jacob etz y'ung y'anäg nï'uuc ma jada nïgop, e nañ jadu'n yajni'uucy yhuaj y'iyujc ajcxy ya.

¹³ Chi Jesús y'adzooy nimay je töxyjäy:

—Tüg'óciy pinjaty nï'uucp ma jada nïgop tidzi huïb ajcxy jadüg'oc. ¹⁴ Yi jäy ajcxy pinjaty nï'uucp huïdibi nmooybich, ca' ni mina ytidzihuïyb, com hue' yi nï huïdibi nyejcypich, ahuimbidïpy ma je jäy jadu'n nej tüg nïgop huïdibi yegam jugy'ajtin huïdibi ni ca' ycïxy ytïgoy.

¹⁵ Chi je töxyjäy y'adzooy:

—Huindzin, ïch mooyg yi nï, ca'ydi jabom jabom ndïdzïyïijich, e ca'ydi n'ocjacmïnïbich ma jada nïgop nï yajpidzimbi.

¹⁶ Chi Jesús y'adzooy:

—Nïcx yajtzon mñäy, e mïd miin.

¹⁷ Chi je töxyjäy y'adzooy:

—Ca' nmïdïdyich nñäyich.

Chi Jesús y'adzooy:

—Janch tiy'ajt jadu'n nej miich mina'ñ, co ca' mmïdity mñäy. ¹⁸ Com ti mïddzinäy migoox yëdyjc, e huïdibi cham mmïd, ca' mñäy'adyii. Janch tiy'ajt jadu'n nej ti m'adzooy.

¹⁹ Chi je töxyjäy y'minañ:

—Huindzin, cham nhuinjihuïyich co miich je' tüg huïdibi Dios yhuïj'ajt yucujc'ajt mïd. ²⁰ Ëich ajcxy n'ap ndeedyich hue' je' y'minañ co jëbi ya huaad ïch ajcxy nDios'ojadajtcïxyich ma jada yaabi huingombi copjïp. E miich ajcxy judïojäy y'minaangïxy co jim Jerusalén je' ma huaad jëbi nDios'ojadajtim, ca' jac ma.

²¹ Chi Jesús y'adzooy nimay je töxyjäy:

—Töxyjäy mijpidäg ïch n'ayuc. Co ypadamy je xï je tiempo co ni ya ma miich ajcxy mDios'ojadajttac, e ni jim Jerusalén jäy ca' ojadadïpy ajcxy yi Dios Teedy. ²² Miich ajcxy ca' tiy'ajt mnejhuïyigïxy nej jëbi huaad mDios'ojadajtcïxy. Ëich ajcxy judïojäy nejhuïybich ajcxy je tiy'ajt nej jëbi huaad nDios'ojadajtim. Com tüg judïojäy je huïdibi yajnidzooctahuam je jäy ajcxy y'alma ma Dios. ²³ Ypadamy je xï je tiempo, e jada jëdu'n je tiempo co je huïdibi ajcxy tiydudägy Dios ojadajtp, y'ojadadïpy ajcxy Dios mïd oyjot oyhuinma'ñ etz mïd Dios ytiy'ajt. Com yi Dios Teedy y'ixtaayb yi jadu'mbi jäy huïdibi ojadadïb mïd oyjot oyhuinma'ñ. ²⁴ Dios ca' ñinïcx mïdity, jadu'n je' nej poj ca' yaj'ixy. Je jäy ajcxy pinjaty ojadajtp Dios, copïcy co huen ojadajtcïxy mïd tudägyjot tudägyhuinma'ñ, etz mïd Dios ytiy'ajt.

²⁵ Chi je töxyjäy y'minañ:

—Ëich nejhuïyb co je Mesías y'mina'ñ huïdibi naydijaanïp Cristo, co je' ymïnïpy, huin'it xyajni'ixihuaanim tüg'óciy tiy'ajt.

²⁶ Chi Jesús y'adzooy:

—Ëich jëdu'n je Cristo huïdibi miich mïdmïydacyp.

²⁷ Chi jada' yja'ty ajcxy Jesús ydiscípulos ajcxy. Chi ajcxy ooy jihuiy ti anajty co Jesús je töxyjäy müdmüydägy, e ni pin ca' yaj'amidooy ti anajty chojcyp ti anajty yñimüydacyp müd yi töxyjäy. ²⁸ Chi je töxyjäy jim ymajt ixmajch, chi ñicxy cajpjoty oy mayjäy nimay:

²⁹ —Mingix, jam tüg yëdyjc ijxim. Ti ñich yi' xyajnimaydäyich tüg'óciy tijaty ti nduñich. ¿Nej ca' jada' yi' jëjity je Cristo?

³⁰ Chi choñ ooy mayjäy cajpjoty, ninicxy ajcxy Jesús. ³¹ Yam anajty ajcxy Jesús ydiscípulos chachnimäyüi adzip:

—Huindzin, occaay.

³² Chi Jesús y'adzooy:

—Ñich nmüdich tüg caayin uucin huidibi miich ajcxy ca' mnejhuüygixy.

³³ Paady je' ydiscípulos ajcxy tzachhuinmay, ac jëyi ajcxy, nayñimayigixy miñ xipy:

—¿Nej ti pinjaty yajcayyüi yaj'ügyüi?

³⁴ Chi Jesús yminañ:

—Jotcujc nayjihuiyijich co ti nguydunich Dios chojcin. Com yi' ti xyquexyich ya naaxhuiñ, e nguydüunibich yi' y'ané'min. ³⁵ Miich ajcxy minaangixp co jactigoy'ijtni jamidaax po' mina cosecha nyajpidicim. Oc-huinmay miich ajcxy, ñich nmüna'ñich, jëbi nyajpidicim yi' cosecha cham cham. Huindüxcix yi' mayjäy huidibi xyñigidaacim choñ cajpjoty. Ni'ixi yi' ajcxy y'ity co amido'idaangixy Dios y'ayuc. Jadu'n ajcxy nipaty nej tügi cosecha huidibi ti ymijaani, jëbi nyajpidicim. ³⁶ E pinjaty cosecha yajpidicp ypaatyp ajcxy ymuju'ñ. Nañ tim jadu'n miich ajcxy huidibi myajmibijcy yi' jäy ajcxy co ñich je' je Cristo, mbaadipy ajcxy jotcujc'ajtin, etz huidibi ajcxy xymibijcpich xymijpidacpich ypadamy ajcxy y'alma jugy'ajtin huidibi ca' ycixy ytiigooy. Tim jadu'n nej je jäy ajcxy huidibi niip etz huidibi cosecha yajpidicp yjotcugüygixy müd co je cosecha ti y'ity, nañ tim jadu'n je jäy ajcxy huidi cojaay jecy'ajty jada Dios y'ayuc etz miich ajcxy jotcugüygixy aguipxy co yi' jäy ajcxy xymijpidägyich. ³⁷ Paady tiy'ajt je ayuc huidibi minam: “Tüg jäy niip etz jadüg jäy cosecha yajpidicp.” ³⁸ Ñich ti nguexyich miich ajcxy myajmibigipy jäy huidibi ti paady Cristo ytiy'ajt ma Dios ñecy. Yi' Dios y'ayuc ycojaaybi ti möy je jäy Dios ytiy'ajt, e miich ajcxy je' mbubedipy co myajmibigipy co ñich je' je Cristo.

³⁹ Mayjäy huidibi cogajpip jim Samaria ymijpidac ajcxy je Jesús co je' je' je Cristo, müd co je töxyjäy anajty ti yminañ: “Ti yi' xyajnimaydäyich tijaty ñich ti nduñich.” ⁴⁰ Co je samariajäy ajcxy yjädy ma Jesús yhuinduu, chi ajcxy cohuanüy huen hui'my. Chi Jesús jim yhui'müy mejtz xii. ⁴¹ Janch mayjäy ooy nigi mibijcy mijpidacy Jesús, co je' je' je Cristo co ajcxy ci'm müdomüydacy je Jesús. ⁴² Chi ajcxy nimay je töxyjäy:

—Canan jëyi co miich ti xyajnimäy ñich ajcxy, paady ycixpi ñich ajcxy yam nmübicych. Nañ ti ñich ajcxy yam ci'm n'amido'ityich, paady ñich ajcxy nejhuüy co janch jada yjëjity je Cristo huidibi yajnüdözogam yi' naaxhuiñyjäy ajcxy y'alma ma Dios.

Jesús yajtzooc tüg gobierno müjtungmüdpü ymang

⁴³ Mümejtz xüibi anajty co Jesús choñ jim, nicxy jim Galilea. ⁴⁴ Jesús ci'm anajty ti yminañ:

—Co jäy ajcxy huidibi müd Dios yhuij'ajt ycujc'ajt yajpaady ma yci'mgajp, ca' pin yajmij'adyüi. ⁴⁵ Co Jesús yja'ty jim Galilea naaxjot, huidi anajty ajcxy jimip agujc jotcujc ajcxy cöbijcy Jesús, com ti anajty ajcxy ijxcixy tijaty

mijhuinma'ñ anajty ti tuñ jim Jerusalén xijoty, com nañ ti je' anajty ajcxy jim y'oygixy xijajtpi.

⁴⁶ Chi yhuimbijty Jesús jadüg'oc jim Caná ma Galilea ñaaxjot, ma je ñi yajvinocojy. Jim Capernaum anajty tüg rey mijtungmüdpí huidibi anajty y'ung pijcip. ⁴⁷ Co je' nejhuiy co Jesús anajty ti yhuimbity Galilea co anajty ti y'oy Judea, chi ninicxy, e chi cohuaniiy co Jesús huen nicxy y'ung tzoyiyüi hidibi anajty ögaanip. ⁴⁸ Huin'it Jesús ymínañ:

—Pen ca' ixypiy ti m'ixy mijhuinma'ñ etz tijaty ijxpejt, ca' ixypiy mmibicy.

⁴⁹ Chi y'adzoy je rey ymijtungmüdpí:

—Huindzin, tun may'ajt ninicx ich n'ung ma ca'ni y'o'cyñi.

⁵⁰ Chi Jesús ymínañ:

—Huimbit ma mdijc, je m'ung jugy'ajtni je'.

Chi je yëdyjc mibijcy Jesús nej anajty ti ñimäyüi, chi ñicxy jadüg'oc ma ytijc.

⁵¹ Nicxnip anajty co ytumbi ajcxy oy yjipcobadiyüi, e chi ñimaayí co je' y'ung ti anajty y'agidägy.

⁵² Chi yaj'amidooy ajcxy ti hora anajty ti yhuaadjihuüy, chi ajcxy y'adzooy:

—Ixiiy cujc yxii naxy je toyii y'ixmajtzní.

⁵³ Paady je ungededy jihui'nybijcy co huin'it je' jada' je tiempo co anajty Jesús ti ñimäyüi: “Je m'ung jugy'ajtni je'.” Chi jada' mibijcy mijpidacy Jesús müd tüg'óciy jäy huidijaty anajty yajpat ma yjün ytijc.

⁵⁴ Je' je' je mimetzpi mijhuinma'ñ mij'oy'ajt hidibi Jesús ytun co choon jim Judea ñicxy jim Galilea ñaaxjot.

5

Jesús yajtzooc tüg jäy hidibi anajty yci' ytecy xuuxy

¹ Co jadu'n ytuni yjati jim Jerusalén anajty ajcxy judíojäy tungixy tüg mijxii. Huin'it Jesús jim ñicxy jim Jerusalén. ² E jim Jerusalén jim anajty ñi abojtzig y'ity, mihuingon je poch aguu huidi xijip puerta de las ovejas. Je it hue' anajty yajtijy hebreo'amy Betesda, e ymüid anajty migoox it yhuinguembetpa't. ³ Ma je huinguembetpa't mayba'mjäy anajty jim chachcöгнаaygixy; je huintzpi, ciducp tecytucpi, cixuxy tecyxuxypi, hidibi anajty ajcxy jim tzach'ahuijxp mina je ñi y'ocpu'xhuimbity. ⁴ Com tüg ángel anajty yhuimbety y'adijy ma je ñi abojtzig y'ity, chi je ñi yajyücxy. E je jäy pinjaty anajty jayijp jiiyby ñijoty tigüyb co je ñi yücxy, huin'it anajty ajcxy choocixy, oy ixypiy ti pa'm ajcxy tim müidity. ⁵ Jim anajty tüg yëdyjc hue' anajty ti ypa'mgögnäy iipx majmocx tugüig jimijt. ⁶ Co Jesús ijxy jim ycögnäy, ijxajpy co anajty je' jecyip chachmijtacni, chi ñimay:

—¿Nej mdzögambi?

⁷ Chi je pa'mjäy y'adzooy:

—Huindzin, ca' nmüdidyich tüg yëdyjc pin ich xypidägipy jiiyby ñijoty co anajty ñi y'ahuidijtcoty. E paady ycixpi co oy ich jim njamechich ma yi ñi, ti huingbi ñitigiiyñi.

⁸ Chi Jesús ymínañ:

—Pidig, yajpidig yi mmaabejt, etz tüyöychon.

⁹ Chi mic'amy choocy, chi je' ymaabejt yajpidigy ytigüy yöybi najxpi janch mic oy. Hue' anajty tüg sábado xii co choocy. ¹⁰ Paady je judíojäy ixpicytjg ajcxy ñimay je hidibi anajty ti chögy:

—Hue' yam sábado xii, paady ca' jadu'n ñigo'aducyity jadu'n nej m'idich co mmaabejt mdzimhuidity.

¹¹ Chi y'adzooy je':

—Je jäy tiibi ñich xyajtzögy, yi' ñich jadu'n ti xyñimäy: “Yajpidig yi mmaabejt etz tüyöychoon.”

¹² Chi ajcxy y'amidooy:

—¿Pin miich jadu'n ti xyñimäy: “Yajpidi yi mmaabejt etz tüyöychoon?”

¹³ Per je tiibi anajty chögy, ca' anajty je' nejhuiy pin je' anajty. Com ti anajty Jesús niyöydiogooyñi ma je mayjäy huidibi anajty ajcxy jim tzachjajtip ma je it.

¹⁴ Chi jada' jacomjegy minaybaatti Jesús jim ma Dios ytijc, e chi Jesús yminañ: —Cuentipic nej ti mdzögy, ca' ni ti bocy mjactunipy. Co pocy mjactunipy ca' yjegyity co tim nigí jibic nicxy mjaty.

¹⁵ Chi je yëydijc ñicxy oy je' yajnimäy je judío ixpicytijc co hue' je' anajty Jesús, je huidibi anajty ti yajtzögyii. ¹⁶ Paady ycixpi je judío ixpicytijc anajty tzach'ixhuidijtcixy tzachpahuidijtcixy je Jesús, e yaj'ögaangixy müd co anajty jäy ti yajtzögy sábado xii. ¹⁷ Chi Jesús yminañ:

—Ñich nDeedy tumb je' cham, ca' ypoocxy, paady ycixp ñich nañ jadu'n nduñich cham ma miich ajcxy sábado xii.

¹⁸ Co Jesús jadu'n yminañ, paady ycixpi je judío y'ixpicytijc ajcxy nigí yjacjtotma'tcoty, ytimy yaj'ögamy anajty aj y Jesús. Ca' ajcxy jadu'n yjotcuycity co anajty Jesús ca' cuyduñ judíojäy ajcxy ytij'ajt nej ajcxy sábado xii yajmij'ajtcixy, etz co jadu'n yminañ: “Dios yi' nDeedy'ajtypich.” Paady ycixpi ajcxy judío y'ixpicytijc yminañ co Jesús ci'm anajty ytüghuañ müd Dios.

Dios ymooy je y'ung ymic'ajt

¹⁹ Chi Jesús yminañ:

—Janch janch ñich miich ajcxy yam jadu'n nimaaygixy co ñich Dios nDeedy'ajtypich. Ca' huaad ti nduñich müd ngi'mjot ngi'mhuinma'ñich. Jëbi janchtiy nduñich huidibi n'ixpxyich Dios Teedy ytumy. Huidibi Dios Teedy ytumyb, ndumybich com Dios yi' nDeedy'ajtypich. ²⁰ Com yi' Dios Teedy ooy yi' tzocy jihuñ yci'm'ung, paady xyajni'ixiydaaybich tüg'óciy yi' huidibi ytumyb. E nañ xyajni'ixihuaambich jacmijjatypí mijhuinma'ñ, ca'ydi jadayaabi mijhuinma'ñ nej ajcxy ti m'ijxycixy nej jada pa'mjäy ti chögy, paady ycixpi nigí mhuinmayipy ajcxy. ²¹ Jadu'n nej Dios Teedy yajjugypicy yi' o'cpi, e chi yajtzinäy jadüg'oc. Nañ jadu'n ñich anajty ndimymöhuamayb. ²² Com je Dios Teedy ca' je' ci'm ocyajcüyöyaani ocyajtecyöyaani jäy ajcxy ypocy. Hue' tüg'óciy je ymic'ajt xyajcidiydaayich co ñich ndiydunipyich tüg'óciy naaxhuiñjäy, com Dios nDeedy'ajtypich. ²³ Hue' tüg'óciy je ymic'ajt xyajcidiydaayich, jigix tüg'óciy jäy xyajmij'adipyich. Je jäy ajcxy huidibi ca' xyajmij'ada'ñich, nañ ca' ajcxy yajmij'ada'ñ Dios Teedy huidibi xyquejxich ya naaxhuiñ.

²⁴ Janch janch ñich miich ajcxy yam jadu'n nimaaygixy: Co hueñypinjäyity, pinjaty xy'amido'íjtibich n'ayuc, e ymibijcyp ymijpidacyp je tiibi xyquejxyich ya naaxhuiñ, müd je'je y'alma jugy'ajtin huidibi ca'ycixipy ytigoyipy, e ca' Dios Teedy chaachytuna'ñyii müd ypocy ycixpi. Hue' janchtiy co y'ögipy, chi janchtiy jadügtecy yjugypigipy. ²⁵ Janch janch ñich miich ajcxy jadu'n nimaaygixy co yi' xii tiempo paatnipy, e cham jëdu'n ti paady, co yi' jäy ajcxy tiibi y'o'ccixy ymidohuipy yi' n'ayucich, co anajty ngapxyich, com Dios yi' nDeedy'ajtpyich. Pin jäy anajty midoob n'ayucich jugypigip jadüg'oc ajcxy. ²⁶ Com yi' Dios Teedy mic'ajt müd jëbi yajjugypicy jäy tiibi y'o'ccixy. Nañ Dios ti xymöyich ymic'ajt jëbi huaad nyajjugypicyich jäy tiibi y'o'ccixy, com Dios ñich nDeedy'ajtypich. ²⁷ Ti Dios xymöyich ymic'ajt jëbi ndiyduñich je jäy ajcxy müd ypocy ycixpi, com ñich je' je jäy huidibi tzoon tzajpjoty. ²⁸ Ca' ooy jada ayuc tiy'ajt mhuinmaaygixy. Com ypaadipy je xii je tiempo co je huidijaty

ajcxy yajpatp ma naaxtigiydac, ymidohuipy ajcxy n'ayucich co ñch anajty nmigapxyich ajcxy. ²⁹ Chi ypidzimipy ajcxy ma ñaaxtigiy. Je' ajcxy huidibi anajty oybi ti tungixy, jugy'adip ajcxy y'alma jadüg'oc. Je' ajcxy huidibi anajty jibicpi ti tungixy ypaadipy ajcxy tzaachypi müd ypocy ycixpi.

Dios tiy'ajt yejc co Jesús ymüd anajty mic'ajt

³⁰ Ca' ni ti huaad nduñich müd ngi'mmic'ajtich ngi'm'ayucich. Je ayuc tiy'ajt huidibi nmidooybich ma Dios Teedy, jada ayuc tiy'ajt müd nyajciyöya'ñich nyajtecyyöya'ñich jäy ajcxy ypocy. Jadu'n tiydudägy nduna'ñich, com ca' ñch nduñich ngi'mdzójcinich. Yi' ñch ndumyb nej Dios Teedy tzocy, yi' huidibi xyquejxich ya naaxhuiñ. ³¹ Co ixypy ñch ci'm nayñigodiy'ajt'adyiijich, ca' ixypy miich ajcxy mmijpidägy n'ayuc ndiy'ajtich. ³² Com huingbi yi' huidi xyñigodiy'ajt'ajtpich co ñch Dios ymic'ajt nmüdidyich, e nejhuuybich co janch yi' huidibi xyñigodiy'ajt'ajtpich. ³³ Miich ajcxy ti mguexy je migügtijc ajcxy tiy'ajtpicpi ma Juan. E je' yejc tiydudägy ayuc tiy'ajt janchypi pin ñch. ³⁴ Co jadu'n nmına'ñich co Juan xyajnidiy'ajt'atyich co ñch je' je Cristo, ca' jadu'n nmına'ñich co ooy ycopicyity co tüg jäy xyñidiy'ajt'adipyich. Com Dios ci'm xyñidiy'ajt'ajtpich. Jadu'n ajcxy nyajnimäy jada tiy'ajt, jigix ajcxy m'alma nidzoocin paadipy ma Dios. ³⁵ Je Juan mictägy ooy Dios y'ayuc najtzcapxiyi, jadu'n je' anajty nej tüg jin huidibi tucxp jajp, e miich ajcxy tüg jaxigy ti mxondaaccixy müd yi' y'ayuc ytiy'ajt. ³⁶ Nigi ñch Dios y'ayuc ytiy'ajt nmüdidyich ca'ydí Juan. Yi' mijhuinma'ñ huidibi ndumybich müd Dios Teedy ymic'ajt. yi' xyajniqüexigibich co ñch ya naaxhuiñ Dios Teedy xyquejxich. ³⁷ Yi' Dios Teedy tibi xyquexyich, yi' ci'm yejc tiy'ajt co ñch je' je Cristo. E ni caminaabi miich ajcxy yi' mgamidoohu ycapxin, nañ ni caminaabi miich ajcxy Dios Teedy yhuiñyijp maga'ixi. ³⁸ Ni ca' miich ajcxy mmüdidy yi' y'ayuc ma mjot mhuinma'ñ, müd co miich ajcxy ca' xymijpidägyich co ñch je' je jäy huidibi Dios ti quexy ya naaxhuiñ. ³⁹ Ijxtaaygixy jada tiy'ajt ma Dios ylibro, com jiiy mdijy miich ajcxy mbaadipy tiy'ajt nej jëbi ajcxy mjogy'adipy co anajty ti m'o'ccixy, e yi' Dios ylibro nañ ñch yi' xyñigapxp. ⁴⁰ E ca' miich ajcxy mgöbigaangixy ñch n'ayuc ñch ndiy'ajt, jigix ajcxy jugy'ajti mbaadipy huidibi ca' ycixy ytigooy.

⁴¹ Dios xycömayipyich, ca' ngöbigipyich co naaxhuiñjäy ajcxy xycömayipyich. ⁴² Nnejhuuybich, nej miich ajcxy mjot mhuinma'ñ mmüdidy, co ca' ajcxy Dios ytiy'ajt mguyduuni. Ca' ajcxy migüg mdzojccixy mjhuuygixy jadu'n nej Dios tzocy jihuüy jäy ajcxy. ⁴³ ñch ti nmüñich müd nDeedyich ymic'ajt. Miich ajcxy ni ca' xycöbicyich. Pen ji huingbi jäy ymüñ müd yci'mmic'ajt, ca' müdidy Dios ymic'ajt, je' janchtiy miich ajcxy ooy mijpidägaangixy. ⁴⁴ Ca' mjájtciixy nej ñch miich ajcxy xymijpidägibich, müd co ajcxy ci'm mdzachnaygömayáangixy ac miich ajcxy jëyi. E co ixypy miich ajcxy xycöbiga'ñich, huin'it ajcxy Dios xycömayipy. ⁴⁵ Ca' ajcxy nmına'nipy co ñch miich ajcxy nxihuaamy ma Dios Teedy yhuinduu. Je Moisés miich ajcxy yxihuaam ma Dios, je huidi miich ajcxy mdzachmijpidaacip ytiy'ajt. ⁴⁶ Pen mmijpidaacyp ixypy ajcxy je Moisés y'ayuc ytiy'ajt, nañ jadu'n ixypy ñch miich ajcxy xymijpidägyich. Com Moisés ñch yi' xychachñimiydaacich ma yi' ñecy. ⁴⁷ Pen ca' mmijpidaaccixy Moisés ñecy, ca' mjájtciixy nej ajcxy mijpidaaccixy ñch n'ayuc.

6

Jesús ymoy jäy jicxy picy migoox mil

¹ Co jadu'n ytuni yjajti, chi Jesús ñicxy jim Galilea mejy nınaxy, huıdibi nañ jadu'n xııjip Tiberias mejy. ² Janch mayjäy anajty Jesús ypanıcxıyii axam co anajty ajcxy ıxy je mıjhuınma'ñ tijaty anajty Jesús ytumyb ma mayba'mjäy. ³ Chi Jesús ypejty ma tög cögop, chi jim y'ıxtacy mıd je' ydiscıpusos ajcxy. ⁴ Tim huıgonıp anajty je pascuaxıı huıdibi anajty judıojäy ajcxy ytumyb. ⁵ Chi Jesús ıjxy co janch mayjäy ti ypamiınyii, chi nımay Felipe:

—¿Ma jada' caayın uucın n'ocjuyım, ti nyajcaayım jada mayjäy huıdibi ti xypamiınım?

⁶ Hue' anajty y'oc'ıxmadzamy nej Felipe y'oc'adzooy. Jesús anajty ñejhuııyb yajxon ti anajty ytunamy. ⁷ Chi Felipe y'adzooy:

—Ni ycahuaadıhuıp mejtz mil peso meeñ, co ıxyıpy ajt n'ocjuyaanim caayın uucın, e nmöhuaanim cıjp tög'aa cıjp mejtz'aa jeyi.

⁸ Tög Jesús ydiscıpuso, hue' anajty yxıı Andrés, Simón Pedro y'uch, je' jadu'n nımay Jesús:

⁹ —Cha tög pi'c'anäg huıdibi mıd mıgoox cebada tzajcaagy, e mejtz acx ung. E ni ycatııjıty yı' yı mıgooxpi tzajcaagy, etz mejtz acx ung mıd jada mayjäy.

¹⁰ Chi Jesús nımay je' ydiscıpusos ajcxy:

—Yaj'ıxtacta' yı mayjäy.

Mııyjot anajty ooy ma je it.

Chi ajcxy y'ıxtactay. Hue' jada' anajty ajcxy ñaybadyii mıgoox mil ac yeydıjctıjc, abıcy yı töxyjäydıjc etz y'ung y'anäg ajcxy. ¹¹ Chi Jesús je tzajcaagy conıgy, chi yajnajxy Dioscojuyıp, chi yajnıgidagıyday je jäy ajcxy huıdıjaty anajty jim ıñaayb, mooy jadu'n nej pın tim tzocy je tzajcaagy etz je acx. ¹² Co je mayjäy cayday, chi Jesús nımay je' ydiscıpusos ajcxy:

—Yajmujcta' ajcxy yı cayduc, ca'ydı huaad ni ti y'ıyoy.

¹³ Chi ajcxy yajmujctay je cayduc, e yaj'ujch ajcxy majmetz mıjıjaty cach mıd je tııbi anajty yconaxy je mıgooxpi tzajcaagy. Je' anajty jadu'n ti yjacconaxy. ¹⁴ Co ajcxy y'ıjxy je mıjhuınma'ñ huıdibi anajty Jesús ti tuñ, chi je jäy ajcxy ymınañ:

—Janch jėdıı jada je yeydıjc huıdibi Dios y'oy'ajtı ymıc'ajtı mıd, je huıdibi anajty mıınam ya naaxhuıñ.

¹⁵ Co Jesús nejhuıy co ajcxy anajty yajrey'ada'ñyii, chi jada' jadög'oc huınhuıctuttay je mayjäy. Chi ñicxy naydüg ma tög yuugjot.

Jesús yöy nıhuıngıxy

¹⁶ Co oy chu'ııyñi, chi Jesús ydiscıpusos ajcxy y'ıdaacni ma mejypa'. ¹⁷ Chi ajcxy ybarcotıgııy, ñicxy ajcxy jim Capernaum jadögpi mejypa'. E ti anajty ycoodııyñi, e ca'ni anajty Jesús ajcxy ñıhuımbıdyııni. ¹⁸ Chi tög mıjpoj ymıñ, chi je mejy ytıgııy oy yücxpi. ¹⁹ Ti anajty ajcxy ytüyöy oy mıgoox tudıjc kilómetro co ajcxy ıjxy Jesús yhuıngoñ ma je barco, hue' anajty ytüyöy mejyhuıngıxy. Chi ajcxy ooy ñay'adzigııyı. ²⁰ Chi Jesús ymınañ:

—Hıch yı', ca' mdzigııygıxy.

²¹ Chi ajcxy jotcujc Jesús yajbarcotıgııy. Chi tim mıc'amy ajcxy ymejch jim ma mejypa' ma anajty ajcxy ñıcxıxy.

Mayjäy ıxtaay Jesús

²² Je mayjäy huıdibi anajty ajcxy ti yhuı'mıy jim'amy y'ahuin, y'ıjx ajcxy co ac jeyi Jesús ydiscıpusos ajcxy ytıgııy ma tög barco, e Jesús ca' anajty ti ytıgıy barcojoty mıd je' ajcxy. Ac jeyi anajty ajcxy ti choongıxy barcojoty. ²³ Je com jabom nıjeyıty barco huıdibi anajty jim tzomb Tiberias, ti anajty yjädy mıhuıgon ma je it, ma anajty Jesús ti yajcaaygıxy je mayjäy mıd je Huındzın Dios ymıc'ajtı, huın'ıt co Dios mıbıjctzoy. ²⁴ Chi je mayjäy ajcxy

ijxy co ca' anajty jim Jesús, ni ca' anajty jim je' ydiscípulos ajcxy. Chi ajcxy ybarcotigiyday, chi ajcxy oy ixtaaygixy Jesús jim Capernaum.

Jesús ymōhuamy jāy ajcxy jugy'ajtin huidibi ca' ycixipy ytigoyipy

²⁵ Co ajcxy minaybaati Jesús mejy ñinaxy, chi ajcxy nimay:

—Huindzin, ¿mina miich ya ti mmiñ?

²⁶ Chi Jesús y'adzooy nimay je mayjāy ajcxy:

—Janch janch co ñich miich ajcxy yam jadu'n nimaaygixy co miich ajcxy xy'ixtaaybich, canan yí' ycixpi co ajcxy ti m'oc'ixy yí' mijhuinma'ñ huidibi ti nduñich, paady ycixpi miich ajcxy xy'ixtāyich co ajcxy nyajcay cūxyi mñid tzajcaagy.

²⁷ Chi Jesús yjacminañ:

—Ca' myajjotmaygojcixy yí' jñcxy picy huidibi cijxp tigooyb. Yí' janchtiy mijottigooygixy yí' jñcxy picy huidibi xymōhuipy yí' jugy'ajtin huidibi ca' ycixipy ytigoyipy túcciyí. Hich miich ajcxy je jugy'ajtin nmōhuibich huidibi ca' ycixipy ytigoyipy túcciyí, com ñich je' je jāy huidibi tsoon tzajpjoty, e Dios Teedy xymic'ajtmooyich, jēbi ñich miich ajcxy nmōy jugy'ajtin huidibi ca' ycixipy ytigoyipy túcciyí.

²⁸ Chi ajcxy nimay Jesús:

—¿Ti ñich ajcxy jēbi huaad nduñ, nej jēbi ñich ajcxy Dios xymijotcuje'aty?

²⁹ Chi Jesús y'adzooy:

—Dios chojcpy co miich ajcxy xymibicyich, com Dios xyquejxich ya naaxhuiñ.

³⁰ Chi ajcxy nimay Jesús:

—¿Ti ijxpejt mdunamy mñid ñich ajcxy, jēbi ñich ajcxy n'ixipy Dios ymic'ajt etz ñich ajcxy nmibigipy co miich je' je Cristo? ¿Ti mijhuinma'ñ mdunamy?

³¹ Hich ajt nmij'ap nmijteedy ajcxy jecy'ajty yjñcxy pijc ajcxy je maná jim ma títznaax'it. Jadu'n ymiñ jaybety ma jadu'n ymina'ñ: “Dios yejcpy jñcxy picy huidibi tsoon tzajpjoty.”

³² Chi Jesús y'adzooy:

—Janch janch ñich miich ajcxy yam jadu'n nimaaygixy co canan je' je' je Moisés huidibi miich ajcxy xymooyb je jñcxy picy janchypi huidibi tzomb tzajpjoty. ³³ Je jñcxy picy huidibi Dios yejcpy huidibi tzomb tzajpjoty, je' je' huidibi jugy'ajtin moy je naaxhuiñy-jāy huidibi ca' ycixipy ytigoyipy túcciyí.

³⁴ Chi ajcxy nimay Jesús:

—Huindzin, ñich ajcxy mooyg je jñcxy picy janchypi jabom jabom huinixñ.

³⁵ Chi Jesús yminañ:

—Hich jēdu'n je jñcxy picy huidibi miich ajcxy xymōhuip jugy'ajtin huidibi ca' ycixipy ytigoyipy túcciyí. Co jāy ajcxy xyñimiinich, e xymijpidāgyich, huin'it ca' yí' ajcxy yuböccoda'ñyii niminaxñ, e co jāy ajcxy xymibicyich, ca' yí' ajcxy ytidzihua'ñyii niminaxñ. ³⁶ Com ti ñich miich ajcxy nimāy, oy ñich miich ajcxy ti xyja'ijxycixy, per ca' mibijccixy. ³⁷ Tüg'óciy pinjaty ñich nDeedy yquexyp ma ñich, xyñimimbich yí' ajcxy. E pinjaty xyñimimbich etz xymijpidaacpich, ca' ñich yí' ajcxy n'ixtijy. ³⁸ Canan paady ycixpi ñich ti ndzooñ tzajpjoty ngidāgich ya naaxhuiñ co nduna'ñich ngi'mhuinma'ñ. Hue' janchtiy yí' ndunaamyich nDeedyich y'ayuc ytiy'ajt, com yí' xyquejxich ya naaxhuiñ. ³⁹ Yí' jadu'n tzojcp ñich nDeedy huidibi xyquejxich ya, co ñich ca' ni pin nyajtigoyipyich, yí' huidijaty xymooybich. Hue' janchtiy yí' ajcxy nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁰ Dios Teedy ti xyquexyich ya naaxhuiñ e yí' jadu'n tzojcp co pin jāy ñich anajty xy'ijxpich, e xymijpidaacpich, ymñid'adipy je' ajcxy jugy'ajtin

huidibi ca' tücci'y ycixipy ytigoyipy. Hue' janchtiy nyajjugypigipyich ajcxy jadüg'oc co anajty je naaxhuiñbyi ti yhuaad'ajtni mina anajty ytigadza'ñ.

⁴¹ Chi je judíoJay ajcxy ooy yajtzibiiy yajcapxiy co anajty Jesús jadu'n ti ymina'ñ: "Fich je' je jicxy picy huidibi tsoon tzajpjoty." ⁴² Jadu'n anajty ajcxy chachmina'ñ:

—¿Nej ca' je' yjadaajity je Jesús, je José y'ung, je huidibi ajt ytaj yteedy n'ixy'ajtm? ¿Nej co jadu'n ymina'ñ: "Fich ti ndzooñich tzajpjoty"?

⁴³ Chi Jesús y'adzooy:

—Ca' myajtzibiiygixy myajcapxiygixy ac miichiy ajcxy. ⁴⁴ Ni pin jäy xyca-niminipyich, pen ca' jayip Dios Teedy huinma'ñ ymöyii co xymijpidägibich. E co xymijpidägibich, chi nyajjugypigipyich jadüg'oc co anajty naaxhuiñbyi ti yhuaad'ajtni mina ytigadzipy. ⁴⁵ Com jadu'n ymiñ jaybety ma Dios ñecy huidibi je jäy ajcxy anajty Dios ytiy'ajt miid huidibi jecy'ajty yjaay co Dios yaj'ixpigamy je jäy ajcxy tüg'óciy. Paady ycixpi tüg'óciy jäy huidibi midoob Dios y'ayuc etz y'ixpijyyp Dios ytiy'ajt xymijpidägibich ajcxy.

⁴⁶ Ca' ni tüg jäy ti ixu yi Dios Teedy. Jeyi je jäy tügpajc huidibi ti choñ ma Dios, yi' je' ti ixu yi Dios. ⁴⁷ Janch janch ich miich ajcxy yam jadu'n nimaaygixy co pinjaty xymibijpich xymijpidaacpich, ymiid yi' ajcxy yjugy'ajtm huidibi ca' ycixipy ytigoyipy tücci'yi. ⁴⁸ Fich jedu'n je jicxy picy huidibi jugy'ajt mooyb je jäy huidibi ca' ycixipy ytigoyipy tücci'yi. ⁴⁹ Miich ajcxy mmij'ap mmijteedy yjicxy'ajti ycaagy'ajti ajcxy je maná jim titznaaxtuum'it jecy'ajty. E chi ajcxy y'o'ctay. E ni ca' ajcxy jugy'ajtm paty huinixibi. ⁵⁰ Je jicxy picy huidibi nnigapxypich huidibi tsoon tzajpjoty, co jäy ajcxy jicxipy, ymiid'adipy ajcxy je jugy'ajtm huidibi ca' ycixipy ytigoyipy tücci'yi. ⁵¹ Fich jedu'n je jicxy picy huidibi ti choñ tzajpjoty, etz ti ycidägy ya naaxhuiñ huidibi jugy'ajtm yejcp. Co jäy ajcxy jicxyp je jicxy picy, ymiid'adipy ajcxy je jugy'ajtm huidibi ca' ycixipy ytigoyipy tücci'yi. Je jicxy picy huidibi nyegaamyich miid naaxhuiñjäy ajcxy ycixpi, je' je' je nninixich.

⁵² Chi je judío y'ixpijyyp ajcxy ooy yaj'ayucyooñ yajcapxyooñ, ac je'yi ajcxy ñayñimáayigixy:

—¿Nej jada yeydiyc tijy yi' ñinix njicxy'ajtm?

⁵³ Chi Jesús ymina'ñ:

—Janch janch co ich miich ajcxy yam jadu'n nimaaygixy, pen ca' miich ajcxy mdzüdcixy ich nninix, e pen ca' m'uuccixy ich nni'py, ich je jäy tügpajc huidibi tsoon tzajpjoty, ca' miich ajcxy miid'adipy yi Dios yjugy'ajtm. ⁵⁴ Com pinjaty ich nninix xychu'tzip etz ich nni'py xy'uucibich, ca' je ajcxy yjugy'ajtm ycixipy ytigoyipy tücci'yi, oy ajcxy yja'o'ccixy. Nyajjugypigipyich je' ajcxy jadüg'oc co anajty naaxhuiñbyi ti yhuaad'ajtni mina ytigadzipy. ⁵⁵ Fich nninix janchypi jicxy picy yi', etz ich nni'py janchypi ügy yi'. ⁵⁶ Co yi jäy ajcxy xymibicyich xymijpidägyich jadu'n ni paady nej jihuüy ich nninix xychüdzi, etz ich nni'py xy'uuci. Chi y'idipy ajcxy huinixi ma ich, etz ich n'idipyich huinixi ma je' ajcxy. ⁵⁷ Dios Teedy huidibi xyquejxich ya naaxhuiñ ymiid jugy'ajtm huidibi ca' ycixy ytigooy. Fich ti nbaadyich ma Dios Teedy je jugy'ajt huidibi ca' ycixy ytigooy. Nañ mbadamy miich ajcxy jugy'ajtm huidibi ca' ycixy ytigooy ma ich. Co miich ajcxy xymijpidägibyich, jadu'n anajty nipaady nej jihuüy mjicxy'ajtigixy ich nninix. ⁵⁸ Je jicxy huidibi tsoon tzajpjoty, e ycidacy ya naaxhuiñ co jäy ajcxy jicxy'adyii, yajtzinähuiñb je ajcxy, ca' ajcxy yjugy'ajtm ycixipy ytigoyipy tücci'yi. Yi mmij'ap mmijteedy huidibi jicx'ajtigixy je maná jecy'ajty, o'ctay ajcxy, ca' ajcxy paty je jugy'ajtm huinixibi.

⁵⁹ Jadu'n Jesús ymiydacy jim ma je judíojaý ajcxy ñaymujctac jim Capernaum co anajty jim yaj'ixpicy.

Mayjäy ca' mijotcuic'ajty Jesús y'ayuc

⁶⁰ Co ajcxy Jesús y'ayuc midodaayi, nigujc-huäcxy je huídibi anajty ixpijcp ma Jesús. Chi ajcxy capxpídzimy, e jadu'n ajcxy ymíñañ:

—Ooy chachchipty je Jesús y'ayuc. Ca' huaad ji pin huinjihuiday.

⁶¹ Com Jesús ñejhuíyb nej ajcxy anajty yajtzibiy yajcapxiy, chi ymíñañ:

—¿Nej ca' miich ajcxy mijotcuic'aty je tzip ayuc jadu'n nej cham ajcxy ti nyajnimäy? ⁶² ¿Nej xymijpidägibich ajcxy, pen m'ijxpy ixipy ajcxy co anajty nba'ttigiyich jadüg'oc jiiby tzajpjoty ma ndzooñich? Com ich je' je jäy huídibi tsoon tzajpjoty. ⁶³ Je jäy ajcxy yjihu'ñ, yi' je' ñinícx yajjugy'ajtíp, e je jäy ajcxy ninícx ca' yi' ni ma chobaady, pen ca' m'idity yjihu'ñ. Co miich ajcxy mgöbigipy yi ayuc tiibi ngapxyich, huin'it ajcxy mbaadipy Dios yjihu'ñ (je Espíritu Santo), etz mbaadipy ajcxy jugy'ajtín huídibi ca' tücc'iyi ycixy ytigooy, oy mja'o'ccixy. ⁶⁴ Per nigujc-huäcxy ma miich ajcxy pinjaty ca' mibicy ich n'ayuc.

Com Jesús ñejhuíyb anajty jayijpni pinjaty ca' ymibigyii y'ayuc, etz pinjaty anajty ceyegaanip ma ymidzip. ⁶⁵ Chi Jesús yjacmíñañ:

—Paady ycixpi jayijp ti nmíñañich, co ca' ni pin jébi ich xymijpidägy, pen ca' Dios Teedy jayijp yhuinma'ñ ymöyii co cöbiga'ñ ymöyii co cöbiga'ñ ich n'ayuc.

⁶⁶ Huin'it mayjäy ajcxy, je huídibi anajty ixpijcp ma Jesús, chi ajcxy huinhuäctut ixmajtzní ajcxy Jesús. Ca' ajcxy y'ocjacpanícxni. ⁶⁷ Chi jada' Jesús nimay je nimajmetz discípulos ajcxy:

—¿Nej nañ xy'ixmadzaambich miich ajcxyi?

⁶⁸ Chi y'adzooy Simón Pedro:

—Huindzin, ca' jac ni pin ich ajcxy jébi huaad nmijpidägyich, com miich tügpajc mid je ayuc huídibi xyajni'ixiyich ajcxy nej jébi huaad ich ajcxy nbaadipy jugy'ajtín huídibi ca' ycixipy ytigoyipy tücc'iyi. ⁶⁹ Ich ajcxy nmibijcypich e nnejhuíybich co miich je' je jäy huídibi tsoon ma Dios huídibi huädz yhuinma'ñ ymid.

⁷⁰ Chi Jesús ymíñañ:

—Miich ajcxy je' ti nhuin'ixyich nimajmetzpi, e nidügti miich ajcxy mujcu' huinma'ñ mm'idity.

⁷¹ Je Judas Iscariote, Simón ymang, anajty ytijpy. Com je' je' anajty ceyegam Jesús ma ymidzip, oy je' anajty yjajéjity nidüg ma je nimajmetzpi.

7

Jesús y'uch ajcxy nañ ca' anajty jaty mijpidaaci Jesús y'ayuc

¹ Co jadu'n ytundaayi yajtaayi, jim anajty Jesús yhuídity Galilea naaxjot, ca' anajty ñícxan'ñ jim Judea naaxjot, co anajty yi judíojaý ajcxy huídibi midzip'ajtíp yaj'öga'ñyii. ² Tim huigon anajty je judíojaý yxii, hue' anajty ajcxy yxigoyäxy Tabernáculo xii. ³ Chi Jesús ñímaayi y'amigüg y'uch yeydijcpi:

—Tzon miich ya, nícx jim Judea naaxjot nayguëxigii mayjäyjoty. ⁴ Com huenpinity huídibi nayguëxigaanip mayjäyjoty, ca' ajcxy naygoyüchyii. Mdunipy miich mijhuinma'ñ xijoty, jigix je mayjäy xycömayipy.

⁵ Ni Jesús y'amigüg ajcxy ca' anajty yjaty ymijpidägyii y'ayuc. ⁶ Paady Jesús y'adzooy:

—Ich nxii ndiempo ca'ni paty mína ndigíhua'ñich jim Jerusalén jadu'n nej je Mesías. Janch miich ajcxy oytymínaajty jébi mnyguëxícigixy ma je mayjäy ajcxy. ⁷ Ca' huaad jébi miich ajcxy, naaxhuínyjäy ajcxy,

xymidziptzoñ. Janch ñich xymidzip'ajtpich ajcxy yí', je' co ngapxpídzimych yí' yjibic-huinma'ñ huídibi ajcxy ytumyb. ⁸ Nicx miich ajcxy jim ma xii yjadyii. Hich ca' nnicxa'ñich cham, com ca'ni ñich ndiempo yhuaad'aty mina ndigihuibyich jim Jerusalén jadu'n nej je Mesías.

⁹ Jadu'ñydi jeda'ajty yminañ, chi yhuí'miiy jim Galilea.

Jesús ñicxy jim Jerusalén xiijoty

¹⁰ Co Jesús y'amigügtijc ajcxy jayijp ñicxtay xii'ajtpi jim Jerusalén, chi Jesús nicxy nañ jadu'n ayüch ameech ma anajty xii yjadyii. ¹¹ Xiijoty je judíoJay ooy ajcxy ja'ixtay Jesús, e chi ajcxy yminañ:

—¿Ma jada' je Jesús?

¹² Ma je mayjäy ajcxy may anajty ajcxy tzachnigapxcixy tzachnimiydaaccixy Jesús. Nijëjity anajty yminaangixy: “Tüg yëydijc oyjäybi yí'”; e nañ nijëjity yminaangixy: “Ca'p yí' y'oyjäyity, nigo jäy tzachhuin'ññ.”

¹³ E ni pin anajty ca' capxpídzimych mayjäyjoty co y'oyjäyity anajty Jesús, miid co anajty ajcxy je judío íxpicytjic ajcxy tzachtzigiiygixy.

¹⁴ E mijxiijoty Jesús ñicxy jim ma Dios ytijc, chi jim ytigiiy yaj'ixpijcpí. ¹⁵ Je judío y'ixpiytjic tzachmaañyhuindicxcixy anajty je Jesús, chachminaangixy anajty:

—¿Nej jada' tijy jada chach'ixpiyity? e ca' ni ma ti y'escuel'aty.

¹⁶ Chi Jesús y'adzooy:

—Jada íxpíjcin ca' ñich jada një'adyii. Yi' jada yje' je huídibi xyquejxich ya naaxhuiñ. ¹⁷ E pen ji pinjaty cuydunaaní yí' ytiy'ajt je huídibi xyquejxich, huinjihuíhuipy yí' jada íxpíjcin, pen janch Dios yí' ytiy'ajt, o pen ñich yí' ngi'm ayuc huídibi ngapxypich. ¹⁸ Je jäy huídibi yci'm'ayuc yci'mdiy'ajt miid yaj'ixpicy, ci'm je' ñaygömaya'ñyí. Janch pinjaty tzojcp co ycömayiiyb je' yhuindzin huídibi ti yquexyí, tiydudägy je', ca' je' y'anijity.

¹⁹ Janch co Moisés miich ajcxy xymoy Dios ytiy'ajt. E ni tüg miich ajcxy mgacuydungixy je tiy'ajt. ¿Ti ycixpí co miich ajcxy xyaj'öga'nich?

²⁰ Chi je jäy ajcxy y'adzooy:

—Mujcu' miich miid ma mjot mhuinma'ñ. ¿Pin miich yam xyaj'ögam?

²¹ Chi je' ajcxy nimay:

—Miid tügpajc mijhuinma'ñ tübi nduñich sábado xii, yí' miich ajcxy mij mdzachjihuüyb mdzachhuinmaayb. ²² Moisés miich ajcxy xyajnajtz'ane'miiy je cötujcin co ajcxy m'ung mdiy'ajttiiygixy (oy je' ca' yajtzondac, miich janchtiy ajcxy mmij'ap mmijteedy Abraham yajtzondac), e paady ycixpí miich ajcxy m'ung mdiy'ajttiiygixy oy yjapocxxiidumity. ²³ E chi jada' ca'ydi miich ajcxy Moisés ytiy'ajt mnixiici myajxiici, paady ajcxy m'ung mdiy'ajttiiygixy oy sábado xiijoty. ¿Ti miich ajcxy co xymijotma'tcixich co tüg jäy ti nyajtzögyich sábado xiijoty? ²⁴ Ca' m'ix'ijxcixy mba'ijxcixy mmigüg miid anii. Yajciyöyí yajtecyöyí miich ajcxy jäy ypocy miid tiy'ajt.

Ooy ajcxy tzachhuinmay je jäy, peni Jesús je' je' anajty je Cristo

²⁵ Chi ajcxy nijëjity JerusalénJay yminañ:

—¿Nej ca' jada jada' yjëjity je huídibi ajcxy yjayaj'ögamyí? ²⁶ Oc'ix ajcxy, ta ycapxy ymiydägy íjxna' que'xna', e ca' ajcxy huam nimäy. ¿Nej ti jada ajcxy íjxcajpcixy yajxon tungmiidpi ajcxy co jada yjëjity je Mesías? ²⁷ Hich ajt nnejhuíhuim ma jada yëydijc choñ. Per je Cristo co anajty je' ymiñ, ni pin je' canejhuíhuipy ma je' anajty choñ ma ycocajpity.

²⁸ Co Jesús jadu'n midooy, co anajty yaj'ixpicy ma Dios ytijc, huin'it Jesús mic yminañ:

—Mnejhu#y#b miich ajcxy p#n #ch, e ma ndzooñich. Per ca'p #ch ti nmiñich ya naaxhuiñ m#d #ch ngi'mdzojcin. Yi hui#dibi #ch ti xyquexyich, t#ydud#gy yi' ytuñ, e ca' miich ajcxy yi' m'ixy'ajt#igixy. ²⁹ #ch janchtiy n'ixy'ajtypich je'. Je' co jim ndzooñich ma je', e je' #ch xyquejxich.

³⁰ Huin'it ajcxy jamadzaañ, per ca' ni p#n c#n#xajiy, com ca'ni anajty paady je x# je tiempo mina ñayg#yeg#y#b ma ym#dzip ajcxy. ³¹ Per mayj#y ooy m#b#jcy je Jesús y'ayuc, e ym#nañ ajcxy:

—Co anajty je Cristo ymiñ, ca' jada' n#gi mijhuinma'ñ tuna'ñ ca'ydi j#dayaabi y#y#dj#.

Je teedy m#jtungm#d#p#i yquejx ajcxy soldadot#j# huen majtzc#xy Jesús

³² Co je fariseoj#y ajcxy ayuc m#dooy co j#y chachm#naang#xy jadu'n co je Jesús je' je' je Cristo, chi ajcxy quejxy tungm#d#p#i huen Jesús yajmach. ³³ Paady Jesús ym#nañ:

—#ch jac-hu#cx#j#p#ich hueeni ma miich ajcxy, chi nnicxa'ñich jad#g'oc j#iby tzajpjoty ma hui#dibi xyquejxich. ³⁴ Xy'ixt#hu#bich miich ajcxy, e ca' #ch miich ajcxy xypaadipy. Ma anajty #ch nnicxyich, miich ajcxy ca' jayd#bi j#iby mnicxc#xy.

³⁵ Huin'it je jud#oj#y ixp#cyt#j# acj#y#i ajcxy ñay'am#doohui:

—¿Ma jada jada' y'ocnicxa'ñ, e nicxy #ch ajt ngapaatim? ¿Nej nicx#b jada' ma je jud#oj#y ajcxy hui#dibi yajpaatc#xy yx#i yaa ma yi griegoj#y ajcxy, e yaj'ixp#gaang#xy yi griegos ajcxy? ³⁶ ¿Nej jada' yajhuimb#dz#my? co ym#na'ñ: “Xy'ixt#hu#bich miich ajcxy, e ca' xyp#ad#bich, e ma anajty #ch nyajpaady, ca' miich ajcxy jayd#bi j#iby mnicxc#xy.”

Je n#i hui#dibi jugy'ajt yejcp hui#dibi ca' yc#xy ytigoy

³⁷ Co je m#jx#i ycod#cxni, chi Jesús yt#nay'ahu#y, chi mic ym#nañ:

—Pen ji p#njaty t#y'ajt nejhu#hua'ñ jadu'n nej ixyp#y j#y yt#dz#y#i tzocy yi n#i, huen xyñimiñich, etz nm#hu#bich t#y'ajt. ³⁸ Je j#y ajcxy p#njaty xym#b#j#p#ich xym#j#p#idaacp#ich, ytun#py ajcxy jadu'n nej Dios ñecy ym#na'ñ ma jadu'n yjaybety#y: “Ycapxyp#dz#m#py je' ajcxy Dios yt#y'ajt, etz mayj#y jotcu#j'ajt#n etz jugy'ajt#n pada'ñ huin#x#i, yt#myñ#paatyp jadu'n nej n#i yp#dz#my janch com ma t#g n#igop.”

³⁹ Je' anajty jadu'n Jesús yt#j#yp p#njaty je' anajty m#b#j#cp, je' anajty ajcxy ad#g#huaan#p jott#g#huaan#p je Esp#ritu Santo. Ca' ni anajty je Esp#ritu ymini ma je disc#pulos ajcxy com ca'ni anajty Jesús yhuimbityñi tzajpjoty.

J#y ajcxy ca' ñay'ayuc-huinj#hu#y#i m#d Jesús yc#xp#i

⁴⁰ Je mayj#y ajcxy hui#dibi anajty ti m#dooy nej Jesús anajty ti ym#na'ñ, nid#g nimetz ym#nañ:

—Jadaabi je' je t#ydud#gy#pi j#y hui#dibi Dios y'ayuc najtzc#p#x#y#p.

⁴¹ Jacjady#i ym#nañ ajcxy:

—Je' yi' je Mes#as.

Per nij#j#ty ajcxy hui#dibi ca' ym#b#j#cc#xy chachm#naang#xy:

—Ca' jim Galilea naaxjot chona'ñ je Mes#as. ⁴² Com jadu'n yjaybety#y ma Dios ñecy co je Mes#as jim chona'ñ ma David y'ap y'oc, jim ma je cajp hui#d# x#j#p Bel#n ma David ycogajp#y.

⁴³ Je mayj#y ca' anajty ajcxy ñay'ayuc-huinj#hu#y#y#y#y m#d Jesús yc#xp#i.

⁴⁴ Nij#j#ty anajty ajcxy yt#m#y#m#dz#my Jesús, per ca' ni p#n ymajtzi.

Jud#o ixp#cyt#j# ca' ajcxy mijp#dacy Jesús

⁴⁵ Chi ajcxy polic#as hui#dibi tumb ma tzajpt#j# nihuimb#j#ty ajcxy je teedy m#jtungm#d#p#i etz je fariseoj#y ajcxy, chi ajcxy ñ#ma#y#i:

—¿Nej ajcxy co ca' ti mmajtzcixy je Jesús?

⁴⁶ Chi ajcxy je' y'adzooy:

—Nicaminaaxii tüg yëydijc jadu'n ti ymiydägy jadu'n nej yijibi yëydijc.

⁴⁷ Chi je fariseojäy ajcxy ymínañ:

—¿Nej nañ ti miich ajcxy myajhuin'íinigixyi? ⁴⁸ Ca' nmínaaním ti ajcxy teedy mijtungmíidpi o fariseojäy ajcxy mibijccixy Jesús. ⁴⁹ Je mayjäy huídibi mijpídaaci Jesús y'ayuc, ca' ajcxy y'ixpiçyity ma Dios ycötujcín. Dios yi' ajcxy tzaachytuníib.

⁵⁰ Nidügti ajcxy je' anajty je Nicodemo huídibi oga'n'aty ni'oy Jesús coodz, je' ymígügtijc jadu'n nímáy:

⁵¹ —Jadu'n ích ajt ngötujcín xy'ane'mím co ca' huaad ndzaachytuuním pinjäy, pen ca'p jayíjp n'ixyöyím nbayöyím ti anajty ti tuñ.

⁵² Chi ajcxy ymígügtijc y'adzohuimbijty oyñinej:

—¿Nej miich nañ jadu'n galileojäyi? Ixta' yajxon ma Dios ñecy, com jüby mnejhuíhuipy co jim Galilea ca' jim chona'ñ pinjäy huídibi Dios y'ayucnajtzcaxíyip.

⁵³ Chi ajcxy ñicxtay nidüg nidüg ma yjin ydijc.

8

¹ Chi Jesús ypa'ttigíy ma je cögop huídibi xíjip Olivos. ² Com jabom jopyñi Jesús yquidacy jadüg'oc ma Dios ytijc. Chi mayjäy ñimiini. Chi y'ixtacy, e chi ytigíy yaj'ixpiçpi. ³ Je jäy ajcxy huídibi Dios ycötujcín yaj'ixpiçp etz je fariseojäy ajcxy mímíniñ tüg töxyjäy ma Jesús huídibi anajty ti ytundigoooy míd huingbi yëydijc. Chi ajcxy pídacu cujc'amy ma je mayjäy. ⁴ Chi ajcxy nímáy Jesús:

—Huindzín, jadayaabi töxyjäy huingbi yëydijc míd ti ytundigoy. ⁵ Moisés ytiy'ajt ích ajcxy xyñajtz'ane'miy jecy'ajty co yajtzaagögädzípy jada jadu'mbi töxyjäy. ¿Nej miich m'ocmínambi?

⁶ Jadu'n ajcxy nímáy co anajty ajcxy oc-huinma'ñ'ixa'ñ. Hue' anajty ajcxy ixtaayb nej jébi huaad yajpocycäy Jesús. Chi Jesús yhuindacy, chi jada' ytigíy jaaybi míd ycíhuax naaxcíxy. ⁷ Com je' anajty ajcxy chachyaj'amídooyb, chi Jesús ytinayígy. Chi ajcxy nímáy:

—Pín jäy ji ma miich ajcxy ca' ti pocy mídity, huen yi' jayíjp tzaagäch jada töxyjäy.

⁸ Chi Jesús yhuindacy jadüg'oc. Chi ytigíy jaaybi jadüg'oc naaxcíxy. ⁹ Co ajcxy jadu'n ayuc yajhuinjihuídaayí, chi ajcxy ooy chöyduñ, com yjihuíy ajcxy ypocy. Chi ajcxy yjihuäctay. Chi je mijjäydijc ajcxy ñaybattzundayí. Jesús yhui'míy nimetz míd je töxyjäy huídibi jim anajty tinaayb huingon. ¹⁰ Chi Jesús yhuäccugíy jadüg'oc nímáy je töxyjäy jada':

—¿Ma ajcxy je jäy? ¿Ca' ni pín ti xychaachytuñ míd mbocy ycixpi?

¹¹ Chi je töxyjäy y'adzooy:

—Huindzín, ca' ni pín.

Chi Jesús ymínañ:

—Ni ích miich ngatzaachytunípy míd mbocy ycixpi. Nicx, e ca' m'ocjacpocytuuníp.

Jesús jadu'n nipaady nej tüg jin huídibi tícxpi

¹² Chi jadüg'oc Jesús yjactigíy miydacp ymínañ:

—Ích je tíy'ajt nmíd ya ma naaxhuíñyjäy, jadu'n ích nipaady nej tüg jin huídibi tícxp ma jäy ajcxy. Pínjäy xymijpídaacpích ymíd tíy'ajt nej jébi huaad tudägy chináhuipy, jadu'n nipaady nej jihuíy ytüyöy ma jin ytícxín.

13 Chi je fariseojäy ajcxy nimay Jesús:

—Miich ci'm nayñidiy'ajtip co miich je' je Cristo, e ca' ndiy'ajt chobaady.

14 Chi Jesús y'adzooy:

—Janch co ñich ci'm nayñidiy'ajt'adyiijich co ñich je' je Cristo. E ñich ndiy'ajt janch yi'. Com nnejhuñyibich ma ti ndzooñich, e ma nñicxa'ñich. E miich ajcxy ca' mnejhuñyigixy ma ndzooñich, e ma nñicxa'ñich. 15 Miich ajcxy mmigüg mbocy'ixyp miid mgi'mhuinma'ñ. Ca' ni pin nbocy'ixyich miid ngi'mhuinma'ñich. 16 Pen ñich anajty nyajcñyöybich nyajtecyöybich jäy ypocy, tiydudägy anajty jadu'n nduñich. Com ñich ca' nyajpaadyich naydüg. Je' xymiid'ijtpich je Dios Teedy huidibi ti xyquexyich. 17 Com cojaay jadu'n y'ity ma miich ajcxy mgötujcin ñecy: “Pen nimetz jäy nigodiy'ajt'aty huentiijity, tzoobatp ajcxy y'ayuc.” 18 Hich ci'm ñayñidiy'ajt'adyiijich co ndzooñich tzajpjoty, etz nDeedyich nañ jadu'n xyñidiy'ajt'ajtpich, co je' ya ti xyquexyich.

19 Chi ajcxy y'amidooy:

—¿Ma miich mdeedy yajpaady?

Chi Jesús y'adzooy:

—Com co ca' ñich miich ajcxy xy'ixcapy co ñich je' je Cristo, nañ ca' ajcxy m'ixy'adyii ñich nDeedy. Co ixypy ajcxy xy'ixcapyich, nañ jaydëbi ixypy ajcxy nejhuiy pin ñich nDeedy'ajtyp.

20 Jim jadu'n Jesús ycapxy ymiydacy ma je meeñ'ijttac, co anajty yjäy yaj'ixpicy ma Dios ytijc. E ca' ni pin ymajtzi. Com ca'ni anajty yxñi yhora anajty paadyñi mina ñaygñyegñyb ma ymidzip.

Jesús ñimay ymigiügtijc co ca' huaad ñicxy ma je' anajty ñicxy

21 Chi Jesús yjacnimaayi ajcxy:

—Hich nñicxaanip ñich, miich ajcxy xy'ixtähuibich. Miid ajcxy mbocy ycixpi m'ögaangixy, com ma nñicxa'ñich ca' huaad miich ajcxy jëbi mñicxcixy miid mbocy ycixpi.

22 Huin'it je judíojäy ajcxy ac jëyi ñayñimaayi:

—¿Nej nicxy jada' ci'm ñayyaj'öga'ñyijji? Com jadu'n ymina'ñ co ma yi' ñicxy, ca' huaad ñich ajt jëbi nñicxim.

23 E Jesús ñigi nimay'idich anajty:

—Miich ajcxy ya naaxhuiñ mmidity ndiy'ajtcop. Hich tzajpjoty nmididyich ndiy'ajtcopich. Miich ajcxy naaxhuiñyjäy ajcxy yt'y'ajt mmijpidaacipy. Hich ca' nmijpidaägyich naaxhuiñyjäy yt'y'ajt. 24 Hich miich ajcxy jadu'n nñimaayb co m'ögam miich ajcxy, e ca' ajcxy Dios mbocy xyhuinmeecxip. Copicy ajcxy m'ögipy, e ca' Dios mbocy ajcxy xyhuinmeecxip, pen ca' xymibigáangixyich co ñich je' je huidibi jëbi mbocy ajcxy xyhuinmeecxip.

25 Chi ajcxy nimay Jesús:

—¿E miich, pin miich?

Chi Jesús y'adzooy:

—Ti ajcxy nyajñimaaygixy pin ñich, co oga'n ndigñyich jäy yaj'ixpijipi. Cham jadüg'oc nyajñimaaygixy. 26 May ooy tijaty ayuc nyajñimähuaangixy nej ti mdundigooygixy ma Dios yt'y'ajt. Cham ca' ajcxy nyajñimaydähuiipy. Je huidibi ti xyquexyich ya naaxhuiñ je' tüg'óciy tiy'ajt miid. E ngapxpizimych je ayuc je tiy'ajt jëyi huidibi ti nmidooyich ma je'.

27 Je jäy ca' ajcxy huinjihuüy co Dios Teedy anajty Jesús ñigapxyp. 28 Paady Jesús nimay ajcxy:

—Co anajty miich ajcxy ti xyajcruudzpetyich, ñich je jäy huidibi tzoon tzajpjoty, huin'it miich ajcxy mnejhuñhuip co ñich je' je Cristo. E co ñich ca' ngi'mhuinma'ñ nduñich. Yi' ñich ya nmiydacypich huidibi Dios Teedy ti

xyaj'ane'myich. ²⁹ Je Dios Teedy huídibi ti xyquexyich, yi' ñch miid n'ityich. Ca' ñch yi' xy'ixmachich. Com co ñch njatytimyumbich jabom jabom huídibi yi' chojcy.

³⁰ Co Jesús jadu'n ymíañ, chi mayjäy ooy ymíbijcy.

Jäy huídibi mibijcp Jesús ycuychinaayipy yi' ytiy'ajt

³¹ Chi Jesús nimay je judíojäy ajcxy huídijaty anajty ti ymíbicy:

—Pen mmíbijc ajcxy cixyjot huínjot tüg'óciy ñch n'ayuc, e ca' m'ijxmadzipy ajcxy ñch n'ayuc, huín'it ñch miich ajcxy jëbi njäy'adyii. ³² Huín'it jëbi ajcxy mnejhuíhuipy Dios ytiy'ajt. E. Dios ytiy'ajt xyñihuángixip ma je mjíbic-huínma'ñ ooy xy'ane'mgixy.

³³ Chi ajcxy y'adzooy:

—Abraham ñch ajcxy nmij'ap nmijteedy'ajtpy. Ca' ñch ajcxy huaad ni pinjäy xyjac'ane'my. ¿Nej co miich jadu'n míañ: “Dios ajcxy xyñihua'nip ma yi' mjíbic-huínma'ñ xy'ane'mgixy”?

³⁴ Chi Jesús y'adzooy:

—Janch janch ñch miich ajcxy jadu'n nimaaygixy co tüg'óciy pinjaty pocy ytundib, jibicp yi' ane'mip. Tim jadu'n nipaady nej tüg tumbi huídi codoogí y ijtp, yi' yhuíndzin jatytimy'ane'mip. ³⁵ Yi' tumbi huídibi codoogiy ijtp, ca' yhuíma'ñ ma je jäy ytijc huínixii. Yi' jäy y'ung janchtiy huí'mam huínixii ma yteedy ytijc. ³⁶ Pen Dios y'ung miich ajcxy xyajpidzimgixp ma je jibicpi xy'ane'mgixy, janch huínixii m'idaangixy, ca' ma ti jibicpi xy'oc'ane'mgixnipy. Tim jadu'n nej Dios y'ung y'ity, ca' ti jibicpi y'ane'myii. ³⁷ Nejhuíybich co miich ajcxy Abraham mmij'ap'adyii mmijteedy'adyii. Per miich ajcxy chachyaj'ögaambich. Je' co ca' mijpidaaccixy ñch n'ayuc huídibi njayajnimaygixyp. ³⁸ ñch miich ajcxy nyajmídmíydaacyp tiibi n'ixyich huídibi ndeedyich ytumyb. E miich ajcxy yi' mdumyb nej m'ap mdeedy ti xyajnimaygixy.

³⁹ Chi ajcxy y'adzooy:

—Hue' ñch ajcxy nmij'ap'ajtyp nmijteedy'ajtyp je Abraham.

Chi Jesús y'adzooy:

—Pen janch ajcxy Abraham mmij'ap'adyii mmijteedy'adyii, yi' ixypy ajcxy mdungixyp jadu'n nej Abraham tuñ. ⁴⁰ Janch ñch miich ajcxy xy-chachyaj'ögaangixyich, e ti ajcxy njayajnimäy je huídibi ñch ti nmídooyich ma Dios. Ca' Abraham yaj'ögy je jäy ajcxy huídijaty anajty Dios ytiy'ajt miid, jadu'n nej miich ajcxy m'iditzaangixy. ⁴¹ Miich ajcxy jibic-huínma'ñ mdungixyp, tim jadu'n nej m'ap mdeedy jibic huínma'ñ ajcxy tuñ jecy'ajty.

Chi ajcxy Jesús adzooy:

—Ca'ñch ajcxy ndigoy'ungity. Je' tügpaic ñch ajcxy ndeedy'ajtyp Dios Teedy.

⁴² Chi Jesús ymíañ:

—Peni Dios ixypy ajcxy mdeedy'ajtyp, xychojcpich xymijpidaacpich ixypy ajcxy. Com Dios ti xyquexyich ya naaxhuiñ, e jii by ndzooñich ma Dios. Ca'ñch ngímdzojcin ycixpi nmíñich ya naaxhuiñ. Yi' je' jadu'n tzojcp pin ti xyquexyich. ⁴³ ¿Ti co ca' miich ajcxy mhuínjihuíy ñch n'ayuc? Je' co ca' ajcxy midohuaangixy ñch n'ayuc. ⁴⁴ Je' miich ajcxy mdeedy'ajtyp je mujcu'. Miid mgímdzojcin mguydungixy je mujcu' chójcin. Je mujcu'yaj'öctiyyb yi' jäy maabi naaxhuiñybi chondägy. Je mujcu' ca' je' ixaani Dios ytiy'ajt. Ca' ni ti tiy'ajt yajpaady ma je', com je mujcu' indaacp je', chi c'm ooy nijot y'idích. Je' ooy indacy, e je' oga'n anii yajtzondac. ⁴⁵ Com miich ajcxy mujcu' yhuínma'ñ miid, paady miich ajcxy ca' xymíbici xymijpidaaci n'ayucich co ñch tiy'ajt njamíydägy. ⁴⁶ Ni pin miich ajcxy xycayajpocycáhuipy. Peni tiy'ajt ñch miich ajcxy nyajnimayyb, ¿ti co ca' mmijpidaaccixy ñch n'ayuc? ⁴⁷ Je jäy

ajcxy huídibi yajpatp ma Dios, y'amído'ijtyp ajcxy Dios y'ayuc. Paady miich ajcxy ca' m'amído'ijtcixy Dios y'ayuc, com ca' ajcxy Dios mDeedy'ájtigixy.

Jesús jiiyim anajty yjugy'aty ca'ydí Abraham

⁴⁸ Chi je judío ixpícytjic ajcxy y'adzooy:

—Tí ñich ajcxy yajxon nmína'ñ co miich mgogajpity jim Samaria, e mujcu' miich mñid ma mjot mhuinma'ñ.

⁴⁹ Chi Jesús y'adzooy:

—Ca' ñich mujcu' nmñidty ma njot nhuinma'ñ, com nyajmij'ajtypich nDeedy, e miich ajcxy xy'ixtjipich. ⁵⁰ ñich ca' cí'm naygömayiijich. Dios Teedy ñich xycömaayb, com yí' je' huídibi ixýöyp payöyp jäy ajcxy ypocy. ⁵¹ Janch janch ñich miich ajcxy nimaaygixy co ji nijëjity jäy huídibi ñich n'ayuc cuydumb, e ca' yí' ajcxy yjugy'ajtin ycixipy ytigoyipy tüccí'yí co y'ó'ccixipy.

⁵² Chi je judío ixpícytjic ajcxy y'adzooy:

—Cham ñich ajcxy janchtiy tí nnejhuíyich tíydudägy co miich mujcu' mñidty ma mjot mhuinma'ñ. Abraham o'c je', nañ jadu'n o'c ajcxy je huídibi anajty Dios ytiy'ajt capxhuäcxip, e miich mmína'ñ co pen ji pinjaty miich m'ayuc xymibijcip xymijpidaacip, ca' je' y'ögipy. ⁵³ ¿Nej mjacmñid miich mic'ajt, ca'ydí Abraham, ñich ajt nmij'ap nmijteedy huídibi o'ci? ¿Nej mjacmñid miich mic'ajt, ca'ydí ajcxy huídibi Dios y'ayucnajtzcaxiy, huídibi ajcxy o'ci? ¿Pín miich mdimnaydijyí?

⁵⁴ Chi Jesús y'adzooy:

—Pen ñich nnaygömayibich cí'm, ca' n'ayucich chobaadipy. ñich nDeedy yí' xycömayipich, je huídibi miich ajcxy mdijpy co ajcxy mDios'adyí. ⁵⁵ Per miich ajcxy ca' Dios m'ixy'adyí. ñich janchtiy n'ixy'ajtypich Dios. E co ixipy nmína'ñich co ca' ñich Dios n'ixy'adyí, indaacpich ixipy, jadu'n nej miich ajcxy m'indaaccixy. Janch ñich n'ixyich Dios, e nguydumyibich yí' y'ayuc. ⁵⁶ Je Abraham, miich ajcxy mmij'ap mmijteedy, jotcuyc ooy ñayjihuíyí co anajty ixa'ñ ñich nxí ndiempo ya naaxhuiñ. E co ijxy co ñich nmíñich, chi ooy yjotcugiy.

⁵⁷ Chi je judío ixpícytjic ajcxy nimay Jesús:

—Ni mgamñidty huixchigui'px majc jimíjt, e ¿mmína'ñ co m'ijxy Abraham? (Ca' m'ixy'ajti je Abraham, naxy tüg mil jimíjt maabi je' y'o'cni.)

⁵⁸ Chi Jesús y'adzooy:

—Janch janch ñich miich ajcxy jadu'n nimäy co ji anajty ñich co ca'ni anajty Abraham yma'xung'aty.

⁵⁹ Chi ajcxy tzaa conigy tzaagädza'ñ anajty ajcxy. Chi Jesús yhuingoyüch, e ypidzimy ma Dios ytiyc.

9

Jesús yajtzooc tüg huintzpi

¹ Hue' anajty Jesús huídijtp co ijxy tüg huintz, jadu'n anajty huintz tí yma'xung'aty. ² Chi ydiscípulos ajcxy y'amídoohuí:

—Huindzin, ¿pín pocy ytuun, jada huintzpi o ytaj yteedy, co huintz yma'xung'atyí?

³ Chi Jesús y'adzooy:

—Ca' yí' ypocytuuñ, ni ytaj yteedy, hue' janchtiy paady ycixp jadu'n yjajty, jigix Dios ymic'ajt ñiguëxigity ma yí'. ⁴ Copicy njactúunibich yí' ytung huídibi tí xyquexyich ya naaxhuiñ. Miinip je xí tiempo ma ca' pín Dios y'ayuc tunaani. Jadu'n nej jihuíy ixipy je xímbi tí ñaxy etz je coodzpi tí ymíñ. ⁵ Jadu'n nej

n'ityich ya naaxhuiñ nm̄idich Dios ytiy'ajt, jadu'n ñich nipaady nej tũg j̄in hūidibi cod̄icxp̄ ȳi naaxhuiñȳj̄ȳ.

⁶ Co Jesús jadu'n ym̄inanday, chi nidzuj̄ȳ naax, chi mo'ntz yaj'oȳȳ m̄id chuj̄ñ̄i, chi jada' yajjaaxi je j̄ȳ yhuin m̄id je mo'ntz. ⁷ Chi ñimay jada':

—Ñicx quejtzpuj ȳi mo'ntz jim ma ȳi Siloé ñ̄i y'abojtz̄iḡity —je ayuc Siloé jadu'n yhuimb̄idz̄imy: quexȳȳbi.

Chi je j̄ȳ huintzpi ñ̄icxy j̄im, chi oy quejtz puju je mo'ntz, chi oy huimbity ti anajty yhuind̄icx̄igy. ⁸ Je ym̄ij̄in ymid̄ijc ajcxy etz tũg'óc̄iy hūidijaty anajty ajcxy ti ixy je huintzpi co jabom jabom ñ̄äy limosna yajmucy, chi ajcxy ñ̄ay'am̄idoohui miñ xȳipy:

—¿Nej ca' jada yj̄j̄ity je huintzpi hūidibi anajty jabom jabom limosna yajmujcpi?

⁹ Nij̄j̄ity ajcxy ym̄inañ:

—Je' ȳi'.

E jacjadyii ajcxy ym̄inañ:

—Huingbi ȳi', ñigoob jadu'n yqūex̄igy nej je'.

E je' ym̄inañ ci'm:

—Ñich j̄edu'n hūidibi anajty huintz.

¹⁰ Jadu'n anajty ajcxy tzach'am̄idooy:

—¿Nej ȳi mhuiin ti ñ̄ay'ahūäcxyii?

¹¹ E je' anajty y'adzooy:

—Ȳi ȳȳd̄ijc hūidibi ajcxy ytiypp Jesús, ȳi' mo'ntz yaj'oȳȳ xyajjaax̄ich nhuiin, e chi xyñ̄imaaȳich: “Ñicx quejtzpuj ma ȳi Siloé ñ̄i.” Chi ñ̄icxȳich, e oy nguejtzpujȳich, e chi nhuind̄icxi'cȳich.

¹² Chi ajcxy je' ñimay:

—¿Ma je' je ȳȳd̄ijc?

Chi je huintzpi y'adzooy:

—Ca' nnejhūȳich.

Fariseoj̄ȳ t̄y'ajt p̄ijcy nej je huintzpi anajty ti ch̄ogy

¹³ Chi ajcxy yajñ̄icxy ma fariseoj̄ȳ ajcxy yhuinduu, je hūidibi anajty huintz yajpatp. ¹⁴ Hue' anajty tũg s̄abado x̄īi (jud̄íōj̄ȳ ajcxy amayx̄īi) co Jesús mo'ntz yaj'oȳȳ, e yajhuind̄icx̄igy je huintzpi. ¹⁵ Chi je fariseoj̄ȳ ajcxy jadũg'oc yaj̄ty nej anajty je j̄ȳ ti yhuind̄icx̄igy. Chi je j̄ȳ y'adzooy:

—Mo'ntz ti pid̄agy ma ñ̄ich nhuiin, chi ñ̄ich ti nguejtzpujy, e cham n'ijxn̄ibich.

¹⁶ Nij̄j̄ity fariseoj̄ȳ ajcxy ym̄inañ:

—Ȳi ȳȳd̄ijc hūidibi jada jadu'n ti tuñ, ca' ȳi' Dios ytiy'ajt m̄idity, com ca' ȳi' amay'aty s̄abado x̄īi.

Chi ajcxy jacjadyii y'adzooy:

—¿Nej tijy jada m̄ijhuinma'ñ̄ octuñ, pen hue' ȳi' pocyj̄ȳ?

Ca' ajcxy nay'ayuc-huinj̄ihūȳȳiḡixy. ¹⁷ Chi ajcxy jadũg'oc ñimay je j̄ȳ hūidibi anajty ti y'ijx̄igy:

—E miich, ¿nej m'ocm̄inambi? ¿P̄in j̄ȳ ȳi t̄ibi xyajhuind̄icx̄igy?

Chi je j̄ȳ y'adzooy:

—Tũg j̄ȳ hūidibi Dios y'ayuc etz ym̄ic'ajt m̄id.

¹⁸ Chi je jud̄íō ixp̄icyt̄ijc ajcxy ca' anajty tim̄ m̄ibigaanḡixy co je ȳȳd̄ijc anajty huintz yajpaady, e co anajty ti yhuind̄icx̄igy, ixti cooni ajcxy ytaj yteedy m̄ijhuoohui. ¹⁹ Chi ajcxy am̄idoohui ytaj yteedy:

—¿Nej je' jada miich ajcxy m'ung hūidibi huintz ma'xung'ajti? ¿Nej jada ti yhuind̄icx̄igy?

²⁰ Chi je' ytaj yteedy ajcxy y'adzooy:

—Ich ajcxy nnejhuuyb co ich ajcxy yi' n'ung, e co yma'xung'ajty huiintz.
 21 Per jadu'n nej cham ti yhuindicxigy, e pin yi' yhuin ti yajhuacxyii, ca' ich ajcxy yi' nnejhuuygixy. Amidoo miich ajcxy yi' ci'm. Mij'anacñ yi', ñigapxipy yi' ci'm.

22 Jadu'n ajcxy ytaj yteedy y'adzooy, mid co ajcxy tzachtzigiygixy je judío xpiicytije ajcxy. Com je judío xpiicytije ajcxy ti anajty ñaygápxigixy co anajty yajpidzimaangixy ma ajcxy ñaymujctac je jäy ajcxy pinjaty anajty mibijcp co Jesús anajty yjety je Cristo. 23 Paady ajcxy ytaj yteedy yminañ:

—Mij'anacñ yi', amidoogix miich ajcxy yi' ci'm.

24 Chi ajcxy y'amidooy mimejtz'oc je yeydijc huidibi anajty ti y'ixigy, e chi ajcxy nimay:

—Cömay capxpat yi' Dios co ti mdzögy. Ca' mgömay mgapxpaady je Jesús. Com ich ajcxy nejhuuyb co yi' Jesús, tüg yi' pocytumbi. Ca' yi' Dios y'ayuc ytiy'ajt müdity.

25 Chi je jäy y'adzooy:

—Pen tüg pocytumbi yi' Jesús, ca' nejhuuyich. Huidibi janchtiy nnejhuuybich, co anajty ich nhuintzity etz co cham huindicxnibich.

26 Chi ajcxy y'amidooy jadüg'oc:

—¿Nej ti xytuñ? ¿Ti ti tuñ co ti xyaj'ixxi yi' mhuiin?

27 Chi je' y'adzooy:

—Ti ajcxy nyajnimaaaygixy, e ca' ajcxy ti m'amido'idaangixy. ¿Nej nañ xpiigaangixy miich ajcxy ma yi'ji?

28 Chi ajcxy je' ogy, nimay ajcxy jadu'n:

—Miich xpijc ma yi', ich ajcxy n'ixpijcpich ma Moisés ytiy'ajt. 29 Ich ajcxy nejhuuyb co Dios Moisés migapxy. Janch yi' Jesús ca' ich ajcxy nnejhuuygixy ma yi' choñ (ma mic'ajt ti paady).

30 Chi je jäy y'adzooy:

—Ooy yi' y'oychigyñity y'oyhuinmañity co miich ajcxy ca' mnejhuuygixy ma yi' choñ (ma mic'ajt ti paady), e ti ich yi' xyajhuindicxigyich. 31 Yajxon yajnejhuuy co Dios ca' yi' midoohi pocyjäydijc y'ayuc. Pen oy jäy ich ajt, e nguyduunim Dios ytiy'ajt, huin'it ajt Dios n'ayuc xymidoohuim. 32 Ni caminaaxi ycaaymidoy, co pinjäy tüg huintzpi ti yaj'ixigy huidibi jadu'n ti yma'xung'aty huintz. 33 Co ixypy je Jesús ca' jiiy choñ ma Dios, ca' ixypy jaty nej ti tunipy.

34 Huin'it ajcxy y'adzooy:

—Miich jadu'n ti mma'xung'aty pocymid. Ca' miich huaad ti xyaj'ixpijccixyich.

E chi ajcxy yajpidzimy tibäy'tücci'yi (ma ajcxy ñaymujctac etz ma Dios ytiyc).

Je jäy ajcxy huidibi ca' cöbijccixy Dios ytiy'ajt jadu'n nipaady ajcxy nej jihuuy huintzity

35 Chi Jesús nejhuuy jadu'n co anajty ti yajpidzimy tiba'y tücci'yi ma Dios ytiyc. Co minaaybaati chi nimay:

—¿Nej mmibijcyp mijpidaacyp miich je jäy huidibi tsoon tzajpjoty?

36 Chi je' y'adzooy:

—Huindzin, nimaaygich pin je', jigix nmibicyich.

37 Chi Jesús je' y'adzooy:

—M'ixyp yi'du'n yam. Yi' je' je huidibi xymidmiydacp.

38 Chi jada' huingoxtinay'ahuuy ma Jesús yhuinduu, je huintzpi huidibi Jesús ti yajtzögy nimay:

—Nmibijcypich, huindzin.

³⁹ Chi jada' Jesús ymínañ:

—Ích ti nmiñ ya naaxhuiñ co n'ixyöyaanich nbayöyaanich jäy ypocy, jigix nyajpocycähuibich pin ca' ypocymíidity, etz nyajpocyñihuädzibich pin ypocy míid. Jadu'n nej jihuïy nyajhuindziyich je jäy huídibi ijxp, etz jadu'n nej jihuïy nyajhuindicxígyich yi huintzpi.

⁴⁰ Chi nijëjity fariseojäy huídibi anajty jim ma Jesús ymíjc jadu'n midoy nej Jesús ymínañ, chi ajcxy nimay Jesús:

—¿Nej nañ jadu'n miich mdiy ích ajcxy ca' Dios ytiy'ajt nejhuïyich, jadu'n nej jihuïy ích ajcxy nhuintzity?

⁴¹ Chi Jesús y'adzooy:

—Co ixipy miich ajcxy janch janch ca' mnejhuïygyxy Dios ytiy'ajt, ca' ixipy ti pocy ajcxy mmíidity. Per miich ajcxy minam co Dios ytiy'ajt mguyduuniy, e ca' yjanchity. Paady ajcxy mbocymíidity. Nipaatyp jadu'n nej jihuïy miich ajcxy mhuintzity, e mmíinaangixy co m'ijxcixy.

10

Jesús yaj'ixpijc jihuimbit ayuc

¹ Chi Jesús jacnimay je judío y'ixpijcytjic, je fariseojäy ajcxy:

—Janch janch ích miich ajcxy yam jadu'n nimaaygyxy co je jäy ajcxy huídibi ca' ytiñhuaangixy ma borregi agaj aguu (ma je cuend'ajtpi ycuend'aty), huídibi huingduum ameech tzach tiñhuaam ma yborregi agaj, je' je' je meetzpi huídibi meedzam je borregi ajcxy ameech. ² Je jäy huídibi tiñhuam ma yborregi agaj aguu, je' je' je borregi cuend'ajtpi. ³ Co je borregi cuend'ajtpi ymiñ ma agaj aguu, chi je agaj aguu cuend'ajtpi yaj'ahuäch je agaj aguu. Chi yborregi ajcxy yöcmidoyii, chi je' migapxy xibety xibety, chi yajpidzimy ajcxy. ⁴ Co ajcxy yajpidzimdäy, ac je' yje', chi jayijp ñicxy, e axam ajcxy ypanicxyii, com je' co yöcmidoyii. ⁵ Ca' je borregi ajcxy jëbi panicxy tüg huingjäy. Nigi ajcxy cöguëgy, com yöcmidooyb ajcxy co yhuingjäyity.

⁶ Jadu'n Jesús mayjäy yaj'ixpijcy jihuimbit'amy, jaygue' ajcxy ca' huaad huinjihuïy nej anajty Jesús yjamínaña'ñ.

Jesús je oybi cuend'ajtpi

⁷ Chi ajcxy Jesús jadüg'oc ñimaayi:

—Janch janch ích miich ajcxy yam jadu'n nimaaygyxy, co je Dios nDeedy'ajtypich. Jëbi jäy ajcxy paady Dios ytiy'ajt ma ích, e huin'it ytiñgyixipy ma Dios y'it. Jadu'n nipaady nej jihuïy ích je agaj aguu ma borregi ajcxy ytiñgyixy. ⁸ Tüg'óciy je huindzindijc huídibi ajcxy miin jayijp ca'ni ích anajty nmiñich, e ymínaangixy anajty co ajcxy míid'ajti Dios ytiy'ajt, jadu'n je' anajty ajcxy nej meetzpi huídibi meedzaanip Dios yjäy. Per je Dios yjäy ca'p je' ajcxy tuuñ cuendi, jadu'n nej je borregi ca' yöcmidoogixy je meetzpi. ⁹ Jadu'n nej je borregi ajcxy ytiñgyixy ma agaj aguu, nañ tim jadu'n jäy ajcxy paady Dios ytiy'ajt ma ích. Je jäy ajcxy huídibi ypaatyp Dios ytiy'ajt ma ích, nañ ypadaamy jugy'ajtin huídibi ca' ycixipy ytiñgyipy tücci'yi. E huídibi je' ajcxy yajmayajtyp ma yi chinaayin, nmöhuibyich. Tim jadu'n nej borregi ajcxy jabom jabom ypidzimgixy ma agaj aguu nicxcixy miy'ojcpi, etz yhuimbijtcixy tzuu tzuu.

¹⁰ Yi meetzpi ajcxy mimb co ymeedzaangixy yaj'ögaangixy yajhuindigoyaangixy. Ích ti nmiñich, jigix miich ajcxy mbáatcixipy jugy'ajtin mijcajee huídibi ca' tücci'yi ycixipy ytiñgyipy.

¹¹ Chi Jesús yjacmínañ:

—Hich jadu'n nipaady nej tög borregi cuend'ajtpi oybi. Je oybi borregi cuend'ajtpi yciyejcy y' yjugy'ajt ma yi o'cin miid yborregi ycixpi. ¹² Je borregi cuend'ajtpi huudibi mujuy tumb, huudibi ca' yci'mborregi cuend'aty, ni ycajeyty je borregi yhuindzin, co ixu caa ymiñ, chi cöguëgy je borregi, e yajqueec-huäcxtäy. ¹³ Com je' co mujuy ytuñ, paady cöguëgy je borregi ajcxy, ca' tzocy jihuiy borregi.

¹⁴ Tim jadu'n nej je oybi borregi cuend'ajtpi ijxcajptäy je' yborregi, nañ tim jadu'n hich n'ijxcajptäy je njäyich (huudibi xymijpidaacpich), etz je' ajcxy xy'ixy'ajtpich. ¹⁵ Tim jadu'n nej Dios Teedy xy'ixy'adyiijich, nañ tim jadu'n n'ixy'adyiijich Dios Teedy. Tim jadu'n je' nej je oybi borregi cuend'ajtpi yciyegamy yjugy'ajtin miid yborregi ycixpi. Nañ tim jadu'n hich ngi'yegamyich njugy'ajtin miid hich njäy ajcxy ycixpi. ¹⁶ Nmüidich jadügpicy jäy, ca' ajcxy yjudiojäyity, je' ajcxy nañ jadu'n nmüid'idaamyich tügmucy (miid je judío jäy ajcxy huudibi xymijpidaacpich). Tim jadu'n nej je cuend'ajtpi ymiid'ajtyp je' yborregi ajcxy tügmucy. E je' ajcxy y'amidoo'idaamy hich n'ayuc, tim jadu'n nej borregi ajcxy yöcmidoogixy yhuindzin. Ji y'idipy tügmucy jäy (huudibi xymijpidägibich), etz tög cuend'ajtpi (hich jedu'n).

¹⁷ Chi Jesús yjacmínañ:

—Paady ycixp Dios Teedy ooy xychocyich xyjihuiyich, co ngi'yegaamyich njugy'ajtin ma yi ó'cin (miid jäy ajcxy ypocy ycixpi), etz njugypigipyich jadüg'oc. ¹⁸ Ca' ni pin xypijcibich yi njugy'ajtin, hich yi' ci'm ngi'yegamy. Nmüidich mic'ajt nej ngi'yegipyich njugy'ajtin, etz nañ nmüidich mic'ajt nej njugypigipyich jadüg'oc. Jadu'n nDeedyich ti xy'ane'myich co jadu'n ndunipyich, n'ögibich, njugypigipyich jadüg'oc.

¹⁹ Chi jadüg'oc ajcxy ca' nay'ayuc-huinjihuiyí je judíojäy ajcxy miid Jesús y'ayuc ycixpi. ²⁰ Mayjäy ymínañ:

—Ca'oybi yi' ymiid, locjiiyb yi', ¿nej co ajt n'amido'ijtim y'ayuc?

²¹ E jacjadyii ajcxy ymínaangixy:

—Jadayaabi tiy'ajt etz mic'ajt ca' yajpaady ma tög jäy huudibi mujcu' ymiid. Ca' jébi tög mujcu' jäy huintzpi yaj'ixígy.

May judíojäy ajcxy ca' cöbijcy Jesús

²² Jim Jerusalén anajty xii yjadyii, je' anajty ajcxy ñixüdumyib jimijt Dios ytijc. ²³ E hue' anajty tiich tiempo. Chi jim anajty Jesús yhuidity ma Dios ytijc, ma je Salomón ytijc-huinduu. ²⁴ Chi ajcxy je judío y'ixpiyitijc nimujcy ooy Jesús, nimay ajcxy:

—¿Ixti mínaani miich hich ajcxy tiydudägy xyajhuinjihuühuáangixyich pen miich je' je Cristo? Yajhuinjihuüyigich ajcxy tiydudägy.

²⁵ Chi Jesús y'adzooy:

—Ti ajcxy nyajnimaaaygixy, e ca' miich ajcxy ti nmüidijccixy. Je mijhuinmañ huudibi ndumyibich nmüidich nDeedy ymic'ajt, yi' je' nidiy'ajt'ajtp co hich je' je Cristo. ²⁶ Paady ycixp miich ajcxy ca' nmüidijccixy, com ca' miich ajcxy njäy'adyiijich. ²⁷ Hich njäy ajcxy ymijpidaacyp hich n'ayuc, e n'ijxcajpich ajcxy je', e je' ajcxy xypanixpich. Tim jadu'n nej je borregi ajcxy yöcmidooy je yhuindzin, jadu'n nej je huindzin ijxcapy je' yborregi, e jadu'n nej yi' yborregi ypanixyii. ²⁸ Hich njäy ajcxy nmooybich yi' jugy'ajtin huudibi ca' tücc'i'yi ycixañ ytigoyañ. Ca' je' ajcxy yjugy'ajtin ytigoyipy ni camina, e ni pin ca' huaad je' ajcxy xypijcich. Je' ajcxy ci'am nmüididyich. ²⁹ Yi' Dios Teedy huudibi hich njäy ti xymöy, tügpajc yi' ymijity, e ni pin huaad ni ti capijcay huudibi Dios Teedy ymiid ci'am. ³⁰ Dios Teedy etz hich tú'ciy hich ajcxy.

³¹ Chi je judíoꝝäy ajcxy jadüg'oc tzaa conig cädzaangixy anajty ajcxy. ³² Chi Jesús je' ajcxy nimay:

—Ti ñich ooy mij oybi nduñich ma miich mhuinduu miid je nDeedyich ymic'ajt ycixpi. ¿Huidi ycixpi miich ajcxy xychaagädzäängixyich?

³³ Chi je judío ixpicytije ajcxy y'adzooy:

—Ca' nmínaaním paady ñich ajcxy miich ndzaagädzaangixy miid je oybi tiibi mduñ, hue' janchtiy ycixpi ndzaagädzaangixy miid co ooy Dios myajjotmädy. Com miich nañ jäy, e mnayyajnaxyii Dios.

³⁴ Huin'it Jesús je' ajcxy nimay:

—Jadu'n ycojaayity ma yi judíoꝝäy ajcxy ytiy'ajtnecy, ma Dios jadu'n ymínañ: “Jadu'n nej dios miich ajcxy.” ³⁵ Paady ca' ngapxtigooyich, com Dios ci'm jadu'n mínamb ma ñecy, co jadu'n nej Dios je' ajcxy huidibi Dios y'ayuc cöbicip (e ca' huaad pinjäy ymínañ co Dios ñecy ca' yjanchity). ³⁶ Dios ti xyajñibicyich jada tung, e xyquejxyich ya naaxhuiñ. ¿Nej co mmínaangixy co ñich ngapxtigooyich co nmínañich co Dios xy'ung'adyiijich? ³⁷ Pen ca' nduñich nDeedyich ytung, ca' ñich ajcxy huaad n'ayuc xymibicich. ³⁸ E pen ndumybich nDeedyich ytung, oy ixypy miich ajcxy ca' xymijpidaacich n'ayuc, jébi ixypy mijpidägy ajcxy je mijhuinma'ñ huidibi ndumybich. E chi mnejhuñhuipy miich ajcxy, etz mmijpidägipy miich ajcxy co je Dios Teedy yajpaady ma ñich, e ñich nyajpaadyich ma Dios Teedy.

³⁹ Ooy ajcxy jamadzaañ Jesús, e chi Jesús oy choni, ca' ajcxy majch.

⁴⁰ Chi Jesús ñicxy jadüg'oc jim Jordán mij niñ nínaxy ma Juan yjäy yajñibejty oga'n'aty, chi jim yhui'mñy. ⁴¹ Mayjäy Jesús ooy ñimujci, e ymínañ ajcxy:

—Je Juan el Bautista ca' jadu'n ooy mijhuinma'ñ tuuñ, per tüg'ócicy yi tiy'ajt jadu'n nej nimydactay jada Jesús, janch tiy'ajt je'.

⁴² E janch mayjäy ooy mibicy Jesús jim ma je jimbi it.

11

Co Lázaro y'o'cy

¹ Jim Betania anajty tüg pa'mjäy, hue' anajty yxii Lázaro. Hue' je' anajty chinäy ma María etz Marta ycojapity. ² María je' anajty huidibi je Huindzin Jesús anajty ti yajjaxy je ujtzipjyñii huidibi ooy oy yxuogy, etz po'ti Jesús ytecy miid ycöhuay. Hue' je' anajty María etz Marta ymidügquëx Lázaro huidibi anajty pijcip. ³ Chi Lázaro ymidügquëx ajcxy ycapxyquejxy ma je Huindzin Jesús anajty yajpaady, e chi oy yajnimäyii:

—Je mmigüg huidibi ooy mdzocy, pijcip je'.

⁴ Co Jesús jadu'n midooy, chi ymínañ:

—Je' ypa'm ca' yaj'öga'ñyii tücci'yi. Je' ypa'm hue' yajñiguëxigamy Dios ymic'ajt, jaydeb Dios ycömaybidzimipy, e nañ ñich nyajcömayipyich, ñich je jäy huidibi tzoon tzajpjoty.

⁵ Jesús ooy anajty tzocy jihuñy je Marta, María etz je Lázaro. ⁶ Oy jadu'n Jesús nejhuñy co anajty Lázaro ypigyii, jamejtz xii jim yjacxinajxy ma anajty yajpaady. ⁷ Huin'it Jesús nimay ydiscipulos ajcxy:

—Tzoc jamim jim Judea naaxjot.

⁸ Chi je' ydiscipulos ajcxy y'adzooy:

—Huindzin, namni jäy ajcxy jim Judea ti xy'ocjaccögädzambi, e ¿mnicxaanip jim jadüg'oci?

⁹ Chi Jesús y'adzooy:

—Majmetz hora tüg xiimbi miidity. Pinjäy miid Dios ytiy'ajt, ca' ayo'n padañ, tim jadu'n nej jihuñy yhuidity xim, e ca' ycönepy, com co xii codicxy jada naaxhuiñybi. ¹⁰ Pinjäy ca' miidity Dios ytiy'ajt, ca' je' nejhuñy ti anajty

jadaanip, chi ayo'n pada'ñ, tim jadu'n nej jäy ycoodzhuidity, e chi ycönepy müid co ca' anajty ixy ma ñicxy.

¹¹ Huin'it Jesús je' ajcxy nimay:

—Hich ajt nmigüg Lázaro maab je', nicxy nyajpidíga'ñich.

¹² Chi je' ydiscípulos ajcxy y'adzooy:

—Huindzin, pen maab, huaadjihuijihuip yi', ci'm yi' ymäyhuijipy.

¹³ Je' Jesús anajty ñimiydaacyp je o'cin, e je' ajcxy tijy Jesús ñimiydaacyp je máhuñ. ¹⁴ Chi Jesús yajmüidmiydacy ajcxy tiydudägy, ymíñañ:

—Lázaro ti je' y'o'cy. ¹⁵ E ooy njotcújcidyich müid miich ajcxy ycixpi co anajty ñich ca' njimity, jigix ajcxy mmibigipy co Dios ymic'ajt nmüididyich. Tzoc ajt jamim jim Betania.

¹⁶ Tomás huídibi anajty ajcxy yxigoyaaaxyp Dídimó, huídi ayuc-huimbídzim: cuate, nimay jacjadyi Jesús ydiscípulos ajcxy:

—Tzoc ajt nañ jadu'n jamim, huen jäy jim xyaj'o'cim quipxy müid Jesús.

Jesús yajjugypigipy je jäy ajcxy etz möhuipy ajcxy jugy'ajtin

¹⁷ Co ajcxy jim yja'ty, chi ajcxy paty tiy'ajt co mimídaaxxiibi anajty maabi Lázaro ñaaxtigíy. ¹⁸ Betania ca' anajty ooy yjiguëgyity müid Jerusalén, jëyi jada' anajty müidity tugüg kilómetro. ¹⁹ May judíojäy ajcxy anajty ti ymiñgixy ma Marta etz María, yajjotcugíhua'ñ ajcxy müid je' ymiguëx ycixpi co anajty ti y'ögy. ²⁰ Co nejhuiy Marta co Jesús anajty jim ymiñ, chi nidzooñ oy jipcobadiy. E María jim yhuí'müiy ma ytijc, tigoty anajty iñäy. ²¹ Chi Marta Jesús nimay:

—Huindzin, co ixypy miich ya anajty myajpaady, ca' ixypy ti y'ögy nmiguëxich. ²² Per nnejhuüybich co miich cham jëbi Dios mmibijctzoy, e xymöhuip ti mdimdzojcy.

²³ Chi Jesús y'adzooy:

—Je mmiguëx jugypigip jadüg'oc.

²⁴ Chi Marta y'adzooy:

—Nnejhuüybich co yjugypigipy jadüg'oc co anajty naaxhuiñybi ti yhuaad'ajtni co Dios anajty yajtigadza'ñ.

²⁵ Per huin'it Jesús y'adzooy:

—Hich je' nyajjugypigipyich je jäy ajcxy, e nmöhuibyich ajcxy jugy'ajtin. Píñjäy ajcxy xymibijcpich xymijpídaacpich, oy anajty yja'ögy ajcxy, jugy'ajtcixip ajcxy jadüg'oc. ²⁶ E tüg'óciy píñjaty ajcxy xymibijcp xymijpídaacpich juugyñi, ca' y'ögipy ajcxy tüccíyi. ¿Nej mibijcyp miich jadaaji?

²⁷ Chi Marta y'adzooy:

—Nmibijcypich, Huindzin. Nmibijcypich co miich je' je Cristo, Dios y'ung, huídibi anajty miinam ya naaxhuiñ.

Jesús taj may ooy müid Lázaro ycixpi

²⁸ Co Marta jadu'n ymíñañ, chi jada' oy huoy y'uch María, e yajnimay ameech:

—Je Huindzin chiiby je', e miich jüiby xymüidmiydägamb.

²⁹ Co María jadu'n midooy, chi ypidígy mic'amy, e chi ñicxy ma Jesús.

³⁰ Ca'ni anajty Jesús yja'ty cajpjoty. Jimni anajty yhuäcxijp ma anajty Marta ti yjipcobadiy. ³¹ Co ajcxy ijxy co María ypidígy, e ypidzímmy janch mic'amy, je judíojäy huídibi anajty ajcxy jim ma je tijc müid je', hue' ajcxy tijy María ñicxy yaaxpi ma anajty ti ñaaxtigíy je Lázaro. Chi ajcxy panicxy.

³² Co yjädy María ma je it ma anajty Jesús, co ijxpaty, chi ycojxtinaay'ahuüy ma Jesús yhuinduu, chi nimay:

—Huindzin, co ixypy miich anajty m'ocyaajity, ñich n'ay ca' je' ixypy y'ögy.

33 Co Jesús ijxy yäxy je María etz je judíojäy ajcxy huídibi anajty yjaymíid'ajtip, chi ooy jihuüy etz ytaj ymaay. 34 Chi jada' Jesús yajtiy:

—¿Ma ajcxy Lázaro ti myajnaaxtigí?

Chi ajcxy nimay:

—Huindzin, jam ijxim.

35 Chi Jesús yaaxy. 36 Chi judíojäy ajcxy ñayñimaayi miñ xyipy:

—Ooydim anajty tzocy je Lázaro.

37 Per nijëjity ajcxy ymíñañ:

—Jadayaabi jäy huídibi huintzjäy yajhuindicxígy, ¿nej ca' jada' ixypy mic'ajt mídity jëbi ixypy ti yajtzögy je Lázaro, e ca'ydi ixypy ti y'ögy?

Jesús yajjugypíj Lázaro

38 Chi Jesús jadüg'oc yjotmaybaty, chi ymíjhuägy ma je o'cpi jut. Hue' je' anajty tüg ang míd tüg mij tzaa y'agiyducyity je jut aguu. 39 Chi Jesús ymíñañ:

—Jiigi' ajcxy jada tzaa.

E chi Marta je o'cpi y'uch y'adzooy:

—Huindzin, xuucnip yi', com cham yi' mimidaaxxiibiñ maabi ñaaxtigíy.

40 Chi Jesús ymíñañ:

—¿Nej cay ti jadu'n nnimäyi? Pen xymibíjicibich yi' n'ayuc, m'ixipy Dios ymic'ajt y'oy'ajt.

41 Chi ajcxy je tzaa jügiy, chi Jesús cix ypa't'ijxy, ymíñañ:

—Dios Teedy, jäygidaacin nyajnajxypich ma miich, co miich xymidoohui n'ayucich 42 Yajxon nnejhuüyich co miich xy'amido'ijtpich jabom jabom, paady ycixp miich jadu'n ti nnimäy míd jadayaabi jäy ajcxy ycixpi ma ñch nhuinduu, huen ajcxy mibicy co miich xyquejxich ya naaxhuiñ.

43 Co Jesús jadu'n ymíñañ, chi jada' mic ycapxy:

—Lázaro, pidzim tibäy.

44 Hue' je o'cpi mic'amy ypidzimy ymo'nity yajxon tüg'óciy ñinícx etz huin-goyebíyity míd huit, chi Jesús ymíñañ:

—Huimbidiittuutcixy, e najtzmadzíyigix, huen yöychooñ.

Judío ixpícytíj ymadzamy anajty Jesús

45 May je judíojäy ajcxy ymibíjcy huídibi anajty María yjaymíid'ajtyp, co ajcxy ijxy je huídibi anajty Jesús ti tuñ. 46 Per jadyii judíojäy ajcxy oy ixtäy je fariseojäy ajcxy, chi ajcxy yajmíidmíydacy huídibi anajty Jesús ti tuñ. 47 Je teedy tungmíidpi ajcxy, etz je fariseojäy ajcxy, chi ajcxy ñayhuoomujctayi je tungmíidpi ajcxy nidüg'óciy, chi ajcxy ymíñañ:

—¿Nej ajt Jesús n'octuunim? Yijüibi yëydíjcy ooy yi' mijhuinmañ tzachtuuni.

48 Pen najtz'ixíyim jadu'ñyi, tüg'óciy jäy mibíjctähua'ñ yi'. Chi ajcxy ymiinipy je Romano tungmíidpi huídibi ajt xy'ané'mim, e chi yajhuindigoyipy ñch ajt nDios y'it, e nañ yajhuindigoyipy ñch ajt ndzinaayin njugy'ajtin.

49 Nidügti ajcxy je jäy, hue' anajty yxií Caifás, hue' anajty míjtungmíid, je' anajty teedy huindzin, je' jadu'n jäy nimayday:

—Miich ajcxy ca' ti mhujnjihuüyigixy. 50 Ca' ajcxy mnejhuüy co jac'oy nyaj'o'cim je Jesús tügpajc, huen yi' codinaydáhuip naax cajp, jigix ca'ydi ñch ajt nnaax ngajp yhuindiooyim.

51 Canan yci'mhujnmañ jadu'n ycixpi ymíñañ je'. Hue' janchtiy com je' anajty ymíjtungmíidity je huin'it jimíjt ma teedy ajcxy ymiñ, paady Dios huinmañ jadu'n yejcy, co jadu'n najtzcaxix co Jesús anajty y'öga'ñ míd tüg'óciy ajcxy naax cajp ycixpi. 52 E ca' nmínaaním míd jëda'ajty míd je judío ajcxy ñaax ycajp ycixpi, nañ jëgíx co huoomujctähua'ñ tüg'óciy Dios y'ung

huidijaty anajty ajcxy yajpatp xii ya. ⁵³ Huin'it oga'n ajcxy je tungmüdpí yajnigodugiiy co yaj'ögaangixy Jesús.

⁵⁴ Jesús ca' anajty ma y'ocyaj'ijxni mayjäyjoty ma je judíojäy ajcxy. Chi jada' ñicxy jiguem mihuigon ma je títznaax'it, ma anajty tüg cajp xiiñity Efraín. Chi jim yhuí'miy müd ydiscípulos ajcxy.

⁵⁵ Huingoonip anajty je pascua xii huidibi anajty judíojäy ytumyb. Ti anajty may judíojäy ajcxy ñinicxni jim Jerusalén xii'ajtp huidibi anajty jiguégjaty tzomb. Jayijpni ajcxy ñicxy ca' anajty xii paady, co anajty ajcxy ñayyajpocyñihuädza'ñyii. ⁵⁶ Ooy anajty jäy ajcxy ijxtäy Jesús huin'it. Paady anajty chachnayñimáayigixy nidüg nidüg miñ xyipy, co ajcxy ytinay'ahuüy ma Dios ytijc, jadu'n ajcxy ymínañ:

—¿Nej m'ocmínaangixy? ¿Minipy jada' Jesús xii'ijxpi, o ca'ji?

⁵⁷ Je teedy ajcxy je' yhuindzin etz fariseojäy ajcxy ti anajty yejccixy cötujcin co huentimpínity huidibi anajty nejhuüy ma je Jesús, huen nigapxy jigix ajcxy madzipy.

12

María yajjaax aceite Jesús ytecy

¹ Jatudujcxini anajty pascuaxii ca' paady, co Jesús ñicxy jim Betania, jim ma anajty Lázaro yajpaady, je hudi anajty ti yajjugypicy jadüg'oc. ² Chi ajcxy jim yaj'oyiiy tüg adzu'ibi. Marta anajty jim yajcaayb yaj'uucp je jäy ajcxy. Lázaro anajty müd Jesús iñäy ma je mesi. ³ Chi María conigy tüg libra ujtzipiyñii huidibi anajty ooy oy yxuugy. Tzou je' anajty ooy, je' müd Jesús ytecy yajjaaxtaayi. Chi jada' müd ycöhuay po'ttich. Chi ac ujtzipiyñii yxuugitay tigoty. ⁴ Huin'it je Judas Iscariote je Simón ymang huidibi anajty yhuindzin ciyegam ma ymidzip, je' jadu'n ymínañ:

⁵ —Jac'oy co ixipy ti ndoocim jada ujtzipiyñii oy migo'pxpeexyti jadiib ixipy ajt ayoobitjc nbubejtím.

⁶ Canan paady Judas jadu'n ymínañ co ayoobitjc tzachpa'ayoy. Paady jadu'n ymínañ co ajcxy chachmeedza'ñ. Com je' anajty meeñybijty cuend'ajtp, e chachpuugomyb huidijaty anajty jilby ajcxy yjapidaacyp. ⁷ Chi Jesús nimay je Judas:

—Ixmatz miich yi', hue' yi' yi María ti yujcpicy jada ujtzipiyñii co yajtunañ co anajty naaxtigiyich. ⁸ Com yi' ayoobitjc ajcxy huinixii yi' miich ajcxy müd'idipy. Janch ich ca' ich miich ajcxy müd n'idipy huinixii (ya naaxhuiñ).

Judío ixpicytjic yaj'ögamy anajty Lázaro

⁹ Co ajcxy nejhuüy may judíojäy ajcxy co anajty Jesús yjimíty Betania, chi ajcxy nimiñ. E canan müd Jesús ycixpi jeda'ajty, je' anajty ajcxy nañ jadu'n chach'ixaamy je Lázaro huidibi anajty ti jugypicy jadüg'oc. ¹⁰ Chi je teedy ajcxy yhuindzindijc ñaygapxi, co yaj'ögaangixy Jesús etz nañ jadu'n je Lázaro, ¹¹ com may judíojäy ajcxy anajty ñayjibijcin, etz tzachmibijccixni Jesús.

Jesús tigiy Jerusalén jadu'n nej tüg rey

¹² Je com jabom je mayjäy huidibi anajty ajcxy ti ymiingixy xii'ajtpi ñejhuüy ajcxy co Jesús anajty ymínañ jim Jerusalén. ¹³ Chi ajcxy cabigy may ytiixy y'aacx, chi ajcxy nidzooñ Jesús, chachmínaangixy:

—¡Dios ajt xyñihuaanim xyajtzoocim! Mimb tüg jäy huidibi Dios ti yconucxyii. Ymüd yi' Dios ymic'ajt, je' je' je judíojäy yrey.

¹⁴ Co Jesús paty tüg burro mang huidibi ca' ni pin yaj'iñaañi, chi yajpejty, chi cuyduuñ jadu'n nej anajty jaybety y'ity ma Dios ñecy co jadu'n ymínañ:

15 —Ca' mdzigi'y miich ajcxy huídibi tziinaayb ma Sión cajp (Jerusalén). Cha je mrey ymiñ y'iñäy ma tüg burro mang.

16 Je huídibi anajty ajcxy Jesús discípulo'ajtyp, ca' anajty ajcxy huinjihuigixy ixti cooni Jesús paty jadüg'oc yí' y'oy'ajtin ymij'ajtin jüby tzajpjoty. Huin'it ajcxy ajihuigooti co jadu'n anajty ycojaayity miid Jesús ycixpi, e nañ co je' anajty Jesús ti yajtunyii ti yajjadyii jadu'n nej jaybety ymiñ.

17 Je jäy ajcxy huídibi anajty ajcxy ymiid Jesús, huin'it co Lázaro ypidzimy ma yajnaaxtigüiyi, e yajjugypijci jadüg'oc, chachyejcy anajty ajcxy tiy'ajt nañ jadu'n huídibi anajty ajcxy ti ijxcixy. 18 Nañ paady ycixpi je mayjäy oy nañ jadu'n yjipcobadíyii, co ajcxy nejhuüy je mijhuinma'ñ huídibi anajty Jesús ytumyb. 19 Paady je fariseojäy ajcxy ñayñimaayi miñ xyipy:

—Ix ajcxy, ca' jada' ninej nmimadaacim Jesús, com tüg'ócay yí mayjäy axam ajcxy je' panicxixy.

Nijëjity anajty griegojäy miidmüydägaangixy Jesús

20 Nijëjity griegojäy nañ ti anajty ñicxixy jim Jerusalén Dios ojadajtpi xijoty. 21 Chi jada' je griegojäy ajcxy nimijhuägy Felipe, huídibi anajty Betsaida cogajp jim Galilea naaxjot, e chi ajcxy minucxtaacy nimay:

—Migüg, tun may'ajt pubejtcich, Jesús ñich ajcxy nja'ixamy.

22 Chi Felipe oy yajnimay Andrés, chi ajcxy Felipe etz Andrés oy Jesús yajnimay. 23 Chi Jesús ymiñañ:

—Ti je tiempo paady co ñich je jäy huídibi tsoon tzajpjoty nyajcömayipyich.

24 Janch janch ñich miich ajcxy jadu'n nimaaygixy co jäy nıby tüg mocpajc, e co je mocpajc ymuxy, huin'it yhuindigoy, e chi ytiim'ajtni may'amy. Pen ca' ni pin nıby jada mocpajc, ca' ytiim'ada'ñ. Jadu'n ñich nipaady nej je mocpajc. Copıcy n'ögıbyıch, huin'it mayjäy jugy'ajtin paadaangixy huídibi ca' ycixipy ytigoyıpy ni mina. 25 Je jäy huídibi ooy nıgi nixondägy yí chinaayın ya naaxhuiñ, yajtigoyamy je' yjugy'ajtin tücci'yı. Per je pin ca'p ooy nijot'aty je chinaayın ya naaxhuiñ, e nixondaaci ooy nıgi Dios y'ayuc, je' y'alma nıdzoocın paadıp ma Dios. 26 Pen ji jäy huídibi naybıdaacıp ma ñich, copıcy ajcxy xypanıcxıbyıch. Ma ñich nyajpaady, nañ jim yí yajpaadıpy nañ jadu'n. Yı jäy pinjaty naybıdaacıp ma ñich, Dios Teedy yí cömayııb.

Jesús capxpıdzımy co y'öga'ñ

27 Chi Jesús yjacmiñañ:

—Tájniıbyıch mayñıbyıch cham jotjoty huinma'ñyoty. ¿Nej nnımähuıbyıch nDeedyıch? ¿Nıhuaangıch ma jada ayo'n tzaachypı huídibi ti yhuaad'ajtnı? Ca' yjadu'nıty. Com paady ycıxp ti nmııñıch ma jada xıı tiempo, jėbi ayo'n nyajnajxıch miid jäy ajcxy ypocy ycıxpı. 28 Dios Teedy tun huídibi copıcy, jėbi jäy ajcxy ijxcixy miıch mmıc'ajt etz miıch m'oy'ajt.

Huin'it je jäy ajcxy huıdi anajty jim ma Jesús yajpaady mıdooy tüg ayuc choñ tzajpjoty ymiñañ:

—Ti nduñıch mijhuinma'ñ, e ti jäy ıxy ñich nmıc'ajt n'oy'ajt. E nañ jadüg'oc ndunıpyıch mijhuinma'ñ, jigıx jäy ajcxy ijxcıxıpy jadüg'oc ñich nmıc'ajt ñich n'oy'ajt (jadu'n Dios y'adzooy y'ung Jesús).

29 Je mayjäy huídibi anajty ajcxy jim, je tııbi anajty ajcxy mıdoogıxy je ayuc huídibi tsoon tzajpjoty, ymiñañ ajcxy:

—Enee yı' ti yjıdıty.

Jacjadyıı ajcxy ymiñañ:

—Tüg ángel ti ymıgapxyıı.

30 Chi Jesús nimay je mayjäy ajcxy:

—Ca' nmīnaanim mīd ñch ycīxpī jadu'n ti yajmīdoy jadayaabi ayuc huīdibi ti chooñ tzajpjoty. ³¹ Jadachambi jada' Dios yajpocycāhua'ñ naaxhuiñyāy, e nañ ypīgaanīpy je mujcu' ymic'ajt huīdibi ane'mb naaxhuiñyāy ajcxy. ³² Co ñch anajty jāy ti xyajcruudzpetyīch, e co ñch anajty ti njugypīcyīch jadūgtecy, e co ñch anajty ti nhuimbityīch tzajpjoty, huīn'it tūg'óciy jāy ajcxy huīdibi xymībijcpīch, nyajpa'ttigīhuībīch jīiby tzajpjoty ma nyajpaadyīch.

³³ Paady jadu'n Jesús ymīnañ, jēbi huaad tūg'óciy jāy ajcxy huīnjīhuīhuīp ti o'cin anajty ypadamy. ³⁴ Chi je mayjāy ajcxy ymīnañ:

—Ma Dios ñecy jīiby jadu'n ymīñ jaybety co je Cristo huīnīxī je' y'ida'ñ. E ¿nej mīich co cham jadu'n mīna'ñ co copīcy co yī jāy huīdibi tzoon tzajpjoty, huīmbidam jadūgtecy tzajpjoty? ¿Pīn jēdu'n mdījyp huīdibi tzomb tzajpjoty?

³⁵ Chi Jesús nīmay je jāy ajcxy:

—Jahueeni xī tiempo njac'īda'ñīch mīd mīich ajcxy. Jadu'n ñch ndīy'ajt nej tūg jīn huīdibi codīcxp jāy co ytūyōy. Cuychīnāy ñch ndīy'ajt, co tzojc nhuimbīda'ñīch tzajpjoty, e mīich ajcxy mhūī'ma'ñ jadu'n nej jāy huīdibi ca' jīn mīdīty. Je jāy ajcxy huīdibi ca' cuychīnaaygīxy ñch ndīy'ajt, ca' ajcxy nejhuīygyxy ma ñīcxīxy. Jadu'n ajcxy nej jīhuīy yōygyxy coodz, e ca' ijxcīxy ma ñīcxīxy. ³⁶ Com occhaani ñch ma mīich ajcxy, nyaj'īxpījcyyp ñch mīich ajcxy Dios ytīy'ajt. Pen xymībijccīxpīch, m'ījtcīxpī xpīcy ma Dios ytīy'ajtīn.

Co Jesús jadu'n je jāy ajcxy nīmayday, huīn'it Jesús je' ajcxy puhua'ctuutni, chi ñīcxni, e ca' ma y'ocjac'ījxin.

Je judío jāy ca' mībīga'ñ Jesús

³⁷ Ooy anajty canaag mījhuīnma'ñ Jesús ti jatuuñ ma jāy ajcxy yhuīnduu, e ca' anajty ajcxy ni ti tīm mībijccīxy. ³⁸ Huīdibi Jesús ytun ycapx, jīiby anajty jadu'n ycojayīty ma je Dios y'ayuc necy, je Isaías ñecy, co Isaías jadu'n ymīnañ: Huīndzīn, ca' ni pīn ajt n'ayuc ndīy'ajt ti xymībijcim. Ca' ni pīn huīdibi huīnjīhuīyīb je Huīndzīn Dios ymic'ajt.

³⁹ Ca' anajty ajcxy huaad ymībijccīxy, com nañ ti anajty jadu'n Isaías jay ma jadu'n ymīnañ:

⁴⁰ Jadu'n yī' ajcxy nej jīhuīy Dios ti yajhuīndzīygyxy, e ti yajjotjunīygyxy, jīgīx ca' y'ījxcīxīpy mīd yhuīn, e mīd yjot yhuīnma'ñ ca' huīnjīhuīyīgyxyīpy, ni ycajothuīmbījtcīxīpy nej jēbi Cristo yajtzóocīgyxy.

⁴¹ Paady jadu'n Isaías ymīnañ je' co anajty ti ijxi Cristo y'oy'ajt, e chi cojay nej anajty ti īxy.

⁴² Ca' nidūg'óciy judío xpīcytījc mījotmādy anajty Jesús. Jīm anajty nījējīty huīndzīndījc huīdibi mībijcp Jesús. Per mīd je fariseojāy ycīxpī co chachjotma'tcīxy, paady anajty ajcxy ca' capxpīdzīmgyxy co mījpīdaaccīxy Jesús. Je' co chīgīygyxy co jīm yajpīdzīmīyb ajcxy tūcci'yī ma Dios ytījc, etz ma yī judío ñaymujctac. ⁴³ Jacnīgī anajty tzojccīxy co huen jāy cōmāayīgyxy, ca'ydi co ajcxy Dios ycōmayīyb.

Dios yajpocycāhuīp je mayjāy mīd Jesús y'ayuc

⁴⁴ Chi jada' Jesús ymīnañ mīc:

—Je jāy ajcxy huīdibi xymībijcpīch xymījpīdaacpīch, camīnaanim ñch naydūg xymībijcpīch xymījpīdaacpīch, nañ ymībijcyp ymījpīdacyp ajcxy je tīibi ñch ya naaxhuīñ xyquexyīch. ⁴⁵ E je jāy huīdibi xy'ījxpīch, tīm jadu'n nīpaady nej jīhuīy ti īxy je huīdibi ti xyquexyīch. ⁴⁶ ñch ti nmīmīīñīch ya naaxhuīñ Dios ytīy'ajt, jadu'n ñch nīpaady nej jīhuīy tūg jīn huīdibi codīcx je jāy ajcxy. Je jāy ajcxy huīdibi xymībijcpīch ca' ajcxy yhuī'mīpy jībīctuuby, jadu'n nej jīhuīy ca' ajcxy chīnaaygyxy agootztuuby. ⁴⁷ Je jāy ajcxy huīdibi mīdoob ñch n'ayuc, e ca' cuydungīxy, ca'p je' ñch je' ypocy

ajcxy n'ixyöyaani nbayöyaani cham. Ca'p ñich ti nmiiñich ya naaxhuiñ mïd co jäy ajcxy ndzaachytunipyich mïd ypcocy ycixpi. Paady ñich ti nmiiñich ya naaxhuiñ co nyajpcocyñihuädza'ñich yi jäy ajcxy. ⁴⁸ Je jäy ajcxy huïdibi xycapxhuimbijtibich n'ayuc, e ca' xycöbiga'ñich, ymïd ajcxy huïdibi yajpcycähuïb. Yi ayuc huïdibi ti ngapxyich, yi' yajpcycähuïb ajcxy co anajty naaxhuiñybi ti yhuaad'ajtni co Dios anajty yajtigatzaani. ⁴⁹ Com ñich ca' ngi'm'ayuc ngapxhuäcxyich. Je' je' Dios Teedy y'ayuc, je huïdibi ti xyquexyich, yi' ngapxhuäcxibich y'ayuc. Je huïdibi ti xyquexyich ya naaxhuiñ ti xyñajtzcapxhyich yi' y'ayuc, jada ayuc ngapxhuäcxypich nyajnimaaaygixyp. ⁵⁰ E nejhuïybych co Dios y'ayuc ytiy'ajt ymimimyb yi' tzinaayin jugy'ajtin huïdibi ca' tücc'yi ycixy ytigoy. Paady ycix je ayuc huïdibi ajcxy nyajmïdmïydacyp, jadu'n nyajmïdmïydaaccixy nej Dios Teedy ti xyajnajtz'ane'mïyich.

13

Jesús ypuji ydiscípulos ajcxy ytecy

¹ Ca'ni anajty xii paady, pascuaxii anajty ajcxy tijy. Chi Jesús ñejhuïyb co anajty yxii ytiempo yhuaad'ajtni mina chonaani ya naaxhuiñ yhuimbidaani ma Dios Teedy. E Jesús ooy anajty tzocy jihuïy ymigügtijc ajcxy huïdibi ya naaxhuiñ anajty ajcxy huï'mañ. Jadu'n tzocy jihuïy huinixii.

² Chi jada' Jesús etz ymigügtijc ytigüy ajcxy adzoo'ajtp (je pascuaxii adzu'ajtin). Ti anajty je mujcu' huinma'ñymöy Judas Iscariote, Simón ymang, co anajty Jesús cïyega'ñ ma ymidzip ajcxy. ³ Ñejhuïyb anajty Jesús co je Dios Teedy ti yajcïdigïyii tüg'ócïy ymic'ajt, e Jesús nañ ñejhuïyb anajty co je' ti choon ma Dios y'it, e nañ jiiby anajty jadüg'oc yhuimbida'ñ. ⁴ Chi ypidïgy ma mesi, chi je yoñybi yhuit ñayyajnjenduutti. Chi huijtzïgy tüg huit huïdibi mïd ñaymextitzi nayböttitzi, ñayyajmïjxojtzpejti yhuindïy. ⁵ Co jadu'n ñayñi'ixïyi, chi pidacy nii ma tüg cibujï'ñyboc. Chi nihuägïyi ydiscípulos ajcxy ytecy. Chi yajtzondacy tecypujï tüg tüg, e mextïch pöttïch mïd je huit huïdibi anajty ti ñayyajhuindïyïyii.

⁶ Co nihuägïyi Simón Pedro ytecy, chi Pedro yminañ:

—Huindzin, ca' huaad miich ndecy xypujich.

⁷ Chi Jesús y'adzooy:

—Huïdibi ñich ndumyb ca' yi' miich ajcxy mhuinjihuïygyixy jadachambi, jaccomjey miich ajcxy mhuinjihuïhuipy.

⁸ Chi Pedro y'adzooy:

—Miich ca' huaad ñich ndecy xypujich ni caminaabi.

Chi Jesús y'adzohuimbijty:

—Pen ca' mdecy nbuji, ca' ñich miich jëbi njäy'adyii.

⁹ E huin'it Pedro nimay Jesús:

—Huindzin, ca' ñich jëda'ajty ndecy xypújibich, hue' janchtiy tüg'ócïy ngjïch etz ngohuajcich.

¹⁰ Chi Jesús nimay Pedro:

—Com tiibi mjot mhuinma'ñ yajhuäch, ca' yi' ocjactzojcnï yajhuädziipy mjot mhuinma'ñ jadügtecy. Tim jadu'n nej jihuïy naamni chïy, e cham ca' tzojcnï yajtzlhuïbyich jadügtecy. Jëda'ajty mdecy nbujich cham. Miich ajcxy huädz mjot mhuinma'ñ ajcxy mmïdiñ, oy ca' miich ajcxy nidüg'ócïy.

¹¹ Com Jesús ñejhuïyb anajty pinjäy cïyegaanip ma ymidzip, e paady jadu'n yminañ:

—Ca' ni tüg'ócïy miich ajcxy mjot mhuinma'ñ yhuädziy.

12 Chi jada' co yajtecypujtay, chi jada' yoñyhuit yajtigüy jadüg'oc. Y'ixtacy ma mesi, e chi jada' nımay ajcxy:

—¿Nej mhujnjihuıyb ajcxy ti ıch ti nduñich mıd miich ajcxy? 13 Miich ajcxy jadu'n minamb co ıch miich ajcxy myaj'ixpijcy, etz ıch miich xyhuindzin'ajtpich. E tıydudägy miich ajcxy mina'n com ıch jëdu'n miich ajcxy mHuindzin. 14 Pen ıch miich ajcxy nyaj'ixpijcy etz xyhuindzin'ajtpich, e ti ıch miich ajcxy nyajtecypujy, nañ jadu'n miich ajcxy myajtecypujıyb miñ xyıpy. 15 ıch miich ajcxy ti nmöy tüg ijxpejt, jigix ajcxy jadu'n mdunıpy jadu'n nej ti nduñich, e huin'it ca' amıj agıx nayjihuihuıyb ajcxy. 16 Janch janch ıch miich ajcxy yam jadu'n nımäy co je huindzin jac mıj je' ca'ydı yı' ytumbı. E nañ je' huidibi yajquejxyöyb jac mıj je' ca'ydı huidibi quejxyöyb. 17 Co ajcxy tıy'ajt mnejhuıhuıpy, chi jotcuyc ajcxy m'idıpy, pen mbadumyb ajcxy jadu'n nej nduñich.

18 Ca' nmina'nıch co nidüg'ócıy miich ajcxy mbocymıdıty. Ti ıch yı' nnejhuıy pın ti nhuin'ixyich. Ti nhuin'ixyich tüg huidibi pocymıd, jigix cuyduunıp nej anajty yjaybetyıty ma Dios ñecy ma je Cristo jadu'n ymina'n: “Yı' huidibi caymujcp mıd ıch, ti ıch yı' xymıbidıgy.” 19 Ti ıch yam miich ajcxy jayıp nyajnımaaygıxy, jigix co anajty jadu'n ytunyii yjadyıı, mmıbigıpy ajcxy co ıch jëdu'n je Cristo. 20 Janch janch yam ajcxy jadu'n nımaaygıxy co je jäy ajcxy huidibi cöbijcp je huidibi anajty nguejxypıch, tim jadu'n nıpaady jadu'n nej ıch anajty xycöbijcyıch. E je jäy ajcxy huidibi xycöbijcpıch, je' ajcxy anajty ycöbijcyp je' huidibi xyquejxıch ya naaxhuiñ.

Jesús ñımay ymıgügtıjc co je Judas anajty cıyegaanıp ma ymıdzıp

21 Co jadu'n Jesús ymina'n, chi tajnıp mayñıp anajty ooy jotjoty huinma'ñyoty, chi capxypıdzımy:

—Janch janch ıch miich ajcxy yam jadu'n nımäy co nidügtı miich ajcxy xcyıyega'nıch ma nmıdzıpıch.

22 Chi Jesús ydiscıpusos ajcxy ñayhuındıcxpejttaayı nidüg nidüg. Ca' anajty ajcxy nejhuıy pın anajty jëdu'n Jesús ytıjyp. 23 Nıdügtı je' ajcxy huidibi anajty Jesús ooy mıd ñaychogyıı ıñäy anajty ma mesi tim huıngon ma Jesús yhuınduu. 24 Chi Simón Pedro yci' yaj'ıjxy yajhuınjıhuıy co huen yaj'amıdooy Jesús pın anajty jadu'n ytıjyp. 25 Chi je discıpusos ajcxy huidibi anajty ıñäy ma Jesús yhuınduu nımay yhuındzin:

—¿Pın jadu'n mdıjyp?

26 Chi Jesús y'adzooy:

—Yı' je' pın anajty ıch nmooybıch yı' tzajcaagy huidibi anajty nyajxoocpyıch ma je ügy.

Chi yajxoogy tüg pedası tzajcaagy, chi moy je Judas, je Simón Iscariote ymang. 27 Tim huın'ıtıy co Judas je tzajcaagy cöbijcy, chi je mujcu' ytigıy ma je' y'ay yjot. Chi Jesús nımay Judas:

—Yı' huidibi mdunamyb, tungo jadu'n mıc'amy.

28 Huidıjaty anajty ajcxy jim caayb, ni pın cahujnjıhuıy je ayuc huidibi Jesús yajnımay Judas, nej je ayuc yhuımbıdzımy. 29 Com je Judas anajty mıd je meeñybıjty, paady ajcxy njëjıty huınjıhuıy co anajty tıjy ñımäyıı:

—Nıcx juy yı' huidibi ajt nyajmayjajtim yı' xıgıxpi.

Jacjadyıı ajcxy anajty tıjy ñımäyıı:

—Mo' tigatıı ayoobıjıj. 30 Tim huın'ıtıy co je tzajcaagy cayday, chi ypidzımy Judas tıba'y, e ti anajty ycoodzyıñı.

Jesús ñajtz'ane'mıy jemybi cötujcın

31 Co Judas ypidzımy, chi Jesús ymina'n:

—Cham je jäy ajcxy ixa'ñ ñich nmic'ajt ñich n'oy'ajt, ñich je jäy huidibi tzoon tzajpjoty. Etz nañ ma ñich je jäy ajcxy ixa'ñ Dios ymic'ajt Dios y'oy'ajt. ³² Jadu'n nej je jäy ajcxy ti ijxcixy Dios ymic'ajt ma ñich, nañ tim jadu'n Dios yajniguëxigipy yi nmic'ajtich n'oy'ajtich tim mic'amy. ³³ Migügtijc huidibi ooy ndzocy njihuüyich, ca' n'ochuäcxibaanich jecy mïd miich ajcxy. Xy'ixtähuibich miich ajcxy. Jadu'n nej ti nnimáaygixyich yi jacjadyii judíojäy ajcxy, nañ jadu'n ñich miich ajcxy yam njacnimaaygixy co ma nñicxa'ñich, ca' huaad miich ajcxy jüby mñicxcixy. ³⁴ Cham ajcxy nmöhua'ñ tüg ané'min huinjemybi. Cham miich ajcxy nyajnajtz'ane'mihuaangixy jadüg'oc jadayaabi t'y'ajt: Naychójcigix nayjihuíyigix ajcxy nidüg nidüg, tim jadu'n nej ñich miich ajcxy ti ndzocy ti njihuüy. Naychójcigix nayjihuíyigix aguipxyi. ³⁵ Mïd jada ycipxi ñejhuíhuipy tüg'ócüy jäy co ñich miich ajcxy ti nyaj'ixpijccixy co ajcxy nidüg nidüg mnaychogüyb mnayjihuíhuüyb.

Jesús ñimay ymigügtijc co je Pedro anajty coyüdzaanip

³⁶ Chi Pedro ñimay:

—Huindzin, ¿ma miich mñicxa'ñ?

Huin'it Jesús y'adzooy:

—Ma ñich nñicxa'ñich miich ca' huaad xypanicxyich. Jac'axam xypanicxyibych.

³⁷ Chi Pedro ymïnañ:

—E ¿nej co ca' huaad jëbi ñich miich nbanicxy? com ñich ngïyegamyich njugy'ajtin ma yi o'cin mïd miich ycipxi.

³⁸ Chi jada' Jesús y'adzooy:

—¿Nej janch co mgïyega'ñ yi mjugy'ajtin ma yi o'cin mïd ñich ycipxi? Janch janch ñich miich ajcxy yam jadu'n ñimäy, co ni ca'ni anajty jabom tugüg'oc tzey yaaxigy, co ñich miich anajty tugüg'oc ti xycoyüchich.

14

Pinjaty mibijcp Jesús nïcxiip ma Dios Teedy yajpaady

¹ Chi Jesús yjacmïnañ:

—Ca' ajcxy jotmay mjihuüy ma m'aa mjot mïd jada ayuc. Mibic ajcxy Dios etz ñich nañ jadu'n mibijccich. ² Jüby ma ñich nDeedy chinäy, jüby mïjtigiydac. Co ixipy ca' yjadu'nity, ca' ixipy ti nnimaaygixy co nñicxyich ma nDeedyich n'ocni'ixiy tzinaaydac mïd miich ajcxy ycipxi. ³ E co ñich anajty ti nba'ttigiyich, e ti ni'ixiyich tzinaaydac jayijp mïd miich ajcxy ycipxi, huin'it ajcxy nihuimbidity, jëbi ñich ajt naydügmujcim, jigix ma anajty n'ityich, nañ jüby miich ajcxy m'idipy. ⁴ Miich ajcxy mnejhuüyb nej jëbi ajcxy mjädip ma nñicxyich oyduuby.

⁵ Chi Tomás ymïnañ:

—Huindzin, ca' ñich ajcxy nejhuüyigixy ma miich mñicxa'ñ, e ca' ñich ajcxy nnejhuüyigixy nej jëbi njá'tcixibych jüby.

⁶ Chi Jesús y'adzooy:

—Jadu'n nej ti ndzinäyich jada je' je ijxpejt nej Dios tzocy co miich ajcxy mdzinähuipy. Nyejcpyich je t'y'ajt huidibi jëbi huaad mguychinaaygixy. Co jadu'n mguydundáyigixipy ñich ndiy'ajt, chi mjá'tcixipy ma Dios. Nyejcpyich je jugy'ajtin huidibi ca' tücci'yi ycixy ytigoy. Ca' ni pinjäy yjädiipy ma Dios Teedy, peni ca' cuydundäy ñich ndiy'ajt. ⁷ Jadachambi etz nej xii tiempo yjacnïcxa'ñ miich ajcxy m'ixy'ajty Dios Teedy. Pen xy'ixy'ajtpich miich ajcxy, nañ m'ixy'ajtyp miich ajcxy Dios Teedy.

⁸ Chi Felipe y'adzoy:

—Huindzin, ich ajcxy yi Dios Teedy yaj'ijxcich cham cham, e mid tim yi'yi jotcujc'adipyich ajcxy.

⁹ Paady Jesús nimay je Felipe:

—Cham xii jimijt ñicxni maabi ich nja'ityich mid miich ajcxy, e ¿ca'ni miich xytimy'ijxhui'myich Felipe? Yi jäy ajcxy tibi xy'ijxcixyich, nañ y'ijxyp ajcxy yi' Dios Teedy. E chi jada', ¿nej miich co jadu'n xyñimäyich: “Yaj'ijxcich je Dios Teedy?” ¹⁰ ¿Nej ca' mmibicy co ich n'ity ma Dios Teedy, e Dios Teedy ijtp ma ich? Yi ayuc huidibi ngapxhuäcxypich, ca' yi' ngi'm'ayuc'adyiich ngi'mdiy'ajt'adyiich. Yi mijhuinma'ñ huidibi ajcxy m'ijxyp ndumyibich, yi Dios Teedy huidibi ijt ma ich, yi' jadu'n tumb. ¹¹ Mibijccich ajcxy co ich n'ityich ma Dios Teedy, e Dios Teedy ijtp ma ich. Peni ca' mdimmibigaangixy, mibic ajcxy mid je mijhuinma'ñ ycixpi huidibi ti nduñich. ¹² Janch janch ich miich ajcxy jadu'n nimaaygixy co je jäy ajcxy huidibi xymibijcpich, nañ ytunipy ajcxy nañ jadu'n yi mijhuinma'ñ huidibi ti nduñich. Jac tim nigi tunipy mijhuinma'ñ, com ich nnicxaambich ma Dios Teedy y'ity. ¹³ E tüg'óciy ti miich ajcxy mibijctzooyb ma Dios Teedy mid ich nxii, ndunipyich yi'. Dios Teedy huidibi nDeedy'ajtypich, je' cömay y'idip mid huidibi miich anajty ajcxy mdumyb mid ich nmic'ajt. ¹⁴ Co myajmibijctzohuipy tijaty, xycapxpáatibich nxii, huin'it nguydunipyich huidibi anajty ti mbijctzoogixy.

Jesús yquexamy Dios yjihui'ñ ymic'ajt

¹⁵ Peni xychojcpich miich ajcxy, cuydúnicich ajcxy tüg'óciy n'ayuc ndiy'ajt, jadu'n nej anajty ti najtz'ane'miyich. ¹⁶ E co ndzóonibyich, chi nbijctzóohuibyich yi Dios Teedy jadüg yjaymid huidibi ajcxy xyjaymid'adib. Dios ajcxy xymöhuipy jadüg jaymid huidibi ajcxy xycapxhuijip, je huidibi ajcxy mjot'amij'adiyb, e je' xymid'idipy ajcxy huinixii. ¹⁷ Je huidibi xycapxhuijip, je' jada'ajty Dios yjihui'ñ ymic'ajt, je Espiritu Santo. Je' Dios ytiy'ajt ymid. Dios yjihui'ñ ymic'ajt ca' adigihua'ñ yi naaxhuiñjyay huidibi ca' xymibicyich. Com ca' ajcxy ixy, e nañ ca' ajcxy ixy'adyi je Espiritu Santo. Miich ajcxy m'ixy'ajtyp je Espiritu Santo, com je' tzinaayb ma miich ajcxy, e nañ xy'adigihuipy xyjottigihuipy ajcxy. ¹⁸ Ca' miich ajcxy nyajhui'maangixy naydüg jadu'n nej co'ögy'ung. Nnihuimbipyich miich ajcxy jadügtecy. ¹⁹ Tim huingónip yi xii tiempo mina yi jacjadyi naaxhuiñjyay ajcxy ca' xy'ocjac'ijxnibich. Com jadu'n nej ich njactzinähua'ñ, ca' ich njugy'ajtin ycixipy ytigoyipy tücci'yi. Nañ jadu'n miich ajcxy mjactzinähua'ñ, ca' mjugy'ajtin ajcxy ycixipy ytigoyipy tücci'yi. ²⁰ Co anajty Dios yjihui'ñ ymic'ajt ajcxy xy'adigiy xyjottigiy, huin'it ajcxy mnejhuihuipy co nyajpaadyich ma nDeedyich, yi Dios Teedy, e miich ajcxy myajpaady ma ich, e ich nañ jadu'n yajpatpich ma miich ajcxy. ²¹ Je jäy ajcxy huidibi ich n'ayuc ndiy'ajtich xycöbijcip, e cuydungixy, je' je' jadu'n xychojcpich, e tzogib je' ich nDeedy. E ich nañ jadu'n ndzogipy njihuihuibyich je' ajcxy, e nnayyajniguëxigiybich ma je' ajcxy.

²² Je jadügpí Judas, ca' mninaanim Judas Iscariote, nimay Jesús:

—Huindzin, ¿nej co mnayyajniguëxiga'ñyii ma ich ajcxy, e ca' mnayyajniguëxiga'ñyii ma je jäy ajcxy huidibi ca' xymijpidägy?

²³ Chi Jesús je' y'adzooy:

—Yi jäy ajcxy huidibi xychojcpich xyajmij'ajtpich, xycuyduunibich yi' ajcxy ich n'ayuc ndiy'ajt. E huin'it yi' ajcxy chogiyb ich nDeedy. Je nDeedyich etz ich miinip ich ajcxy ma je jäy ajcxy huidibi xycuyduunip ich ndiy'ajt, e tzinaydacpigipyich ma yi' ajcxy yjot yhuinma'ñ. ²⁴ Je jäy ajcxy pinjaty ca' xychocyich, nañ ca' ajcxy ich n'ayuc xycuyduunich. Paady ca'

nnayyajniguëxiga'ñyijich ma je' ajcxy. Com yi ayuc huídibich miich ajcxy nyaj'amido'ijtyp, ca' yi' ñich ngi'm'ayuc'adyii. Yi' je' Dios Teedy y'ayuc ytiy'ajt, com yi' ñich ya naaxhuiñ xyquejxich.

²⁵ Jadayaabi ayuc ajcxy cham jadu'n njacyajnimaaayb, jadu'n nej njacyaanigyich ya naaxhuiñ miid miich ajcxy, ma ca'ni ndzooñich. ²⁶ Per je Espíritu Santo huídi miinam, je' ajcxy xycapxhuijp. Dios Teedy yquexamy je Espíritu Santo miid ñich nxi. Je Espíritu Santo xyajnejhuiydáhuipy miich ajcxy tüg'óciy tiy'ajt, e nañ xyaj'ajihuihuib tüg'óciy jadu'n nej ñich miich ajcxy nnimaaygixy.

²⁷ ñich miich ajcxy nyajmihui'my jotcuyc'ajtin. Jadu'n nej ñich njotcuyc'atyich, nañ nyajjotcuyc'adipyich miich ajcxy. Yi jotcuyc'ajtin huídibi nyajmihuímaamyich miich ajcxy, ca' yi' yjadu'nity nej je jotcuyc'ajtin huídibi yajpaatp ya naaxhuiñ. Ca' mdajcixy maygixy, nañ ca' mdzigíygyxy. ²⁸ Ti ñich miich ajcxy nnimaaygixy jayijp'aty co ndzona'ñich ma miich ajcxy, e nhuimbida'ñich jadüg'oc ma miich ajcxy. Peni xychojcpich miich ajcxy, mxondägipy ajcxy co nñicxa'ñich ma Dios Teedy, com yi' Dios Teedy jac mij yi' ca'ydi ñich. ²⁹ Ti ñich jada tiy'ajt jayijp nimiydägyich ma ca'ni ndzooñich, jigix co anajty je tiempo paady mina jadayaabi ytuníyb yjadíyb, huin'it ajcxy mmibigipy ñich n'ayuc.

³⁰ E ca' ñich miich ajcxy mijcajee ooy njacmídmíydägaangixy yam. Com tím huingónip mina je mujcu' huídibi ane'mb ya naaxhuiñ xyñimina'ñich. Ca' ñich yi' huaad jébi xymímadägyich. ³¹ Per copicy yi' nguydunipyich Dios Teedy y'ayuc nej xyajnajtz'ane'míyich, jigix je naaxhuiñyáy nejhuíhuipy co nyajmij'atyich yi' Dios Teedy. Pidíccix, tzoc'ajt huingduum jamim.

15

Je camuuxy'aadz etz y'aacx

¹ Chi Jesús jacnimay ydiscípulos ajcxy:

—Jadu'n ñich nipaady nej camuux'aadz ma tüg muuxy'aadz cam. ñich nDeedy, yi' Dios Teedy, jadu'n yi' nipaady nej je muuxy'aadz cam cuend'ajtpi.

² Tüg'óciy jáy jadu'n ajcxy nipaady nej muuxy'aadz y'aacx. Je jáy ajcxy huídibi ca' cuychinäy ñich ndiy'ajt, yi' Dios Teedy yajcödígoyíib, jadu'n nej je muuxy'aadz cam cuend'ajtpi quejtzpuxy je muuxy'aadz y'aacx huídibi ca' ytím'aty. Je jáy ajcxy huídibi cuydundaayb ñich ndiy'ajt, Dios yaj'oyíib je' ajcxy yjot yhuinma'ñ, jébi oybi tuñ, jadu'n nej je muuxy'aadz cam cuend'ajtpi huijtz'oyíy je muuxy'aadz y'aacx, jigix jébi nígi ytím'aty. ³ Yi ayuc huídibi ti nyajnimaaaygixy, yi' ti yajhuäch yi' jibicpi ma miich ajcxy mjot mhuinma'ñ. ⁴ Mibijccich ajcxy, panícxigich ajcxy ndiy'ajt huinixí. Co ajcxy jadu'n mdunipy, ñich miich ajcxy miid'idipy huinixí. Jadu'n nej ixipy camuuxy'aadz y'aacx co ca' ytím'aty co ahuinggujc y'ity, e ca' mic'ajt paady ma ycop. Nañ tím jadu'n miich ajcxy pen ca' mmic'ajt mbaadipy ma ñich, ca' mmímadáaccixipy mguychináaygixipy ñich ndiy'ajt.

⁵ Jadu'n ñich nipaady nej camuuxy'aadz cop, e miich ajcxy jadu'n nipaady nej camuuxy'aadz y'aacx. Je jáy ajcxy huídibi yajpatp ma ñich, e ñich nyajpaady ma je' ajcxy, je' ajcxy oyhuinma'ñ tunam mij cajee, tím jadu'n nej camuuxy'aadz huídibi tím'ajtp may'amy. Co ixipy ñich ca' nyajpaady ma miich ajcxy, ca' miich ajcxy huaad ti mdungixy. ⁶ Co jáy ajcxy ndiy'ajt xy'ixmájtzbich, Dios ajcxy yajcödígoyíib, tím jadu'n nej jáy yajcödígoy miid jín yi' muuxy'aadz y'aacx huídibi ymíbuxíyb co ca' ytím'ajtni. Co je y'aacx ytidzity, chi ajcxy yajmucy, e pidaaccixy jínjoty, e jadu'n jiiiby ñidoyíy jínjoty.

⁷ Co miich ajcxy m'ijtcixy ma ñich, e co ñich n'ayuc nañ jadu'n ijtp ma miich ajcxy mjot mhuinma'ñ, jëbi mbijctzoogixy ti ajcxy mdzojcp ma Dios, e nguydunipyich mïd miich ajcxy ycixpi. ⁸ Chi je jäy ajcxy cömayipy Dios co miich ajcxy mguydunipy ñich ndiy'ajt tiydudägy, tim jadu'n nej camuuxy'aadz y'aacx ytim'aty may'amy. Co je jäy ajcxy ixipy nej tudägy mguydungixy ñich ndiy'ajt, chi je jäy ajcxy tiydudägy nejhuñhuipy co ti nyaj'ixpicyich miich ajcxy. ⁹ Jadu'n nej Dios Teedy xychocyich xyjihuiyich, nañ tim jadu'n ñich miich ajcxy ti ndzocy ti njihuïyich. Ndzogipy njihuïhuïbyich miich ajcxy huinixii co ca' ajcxy xy'ixmájtzybyich ndiy'ajtich. ¹⁰ Co mguydundähuipy ajcxy jadu'n nej nyajnajtz'ane'müygixy, ndzogipyich njihuïhuïbyich miich ajcxy huinixii. Tim jadu'n nej nguyduñich yi huïdibi Dios Teedy xyajnajtz'ane'müybich, e yi' xchojcpich xyjihuiybich huinixii.

¹¹ Cham jadayaabi ayuc nyajnajtz'ane'müygixy, jigix jotcuje m'ijtcixipy. Jadu'n nej jotcuje ti n'ityich, e nañ jadu'n miich ajcxy mjotcuje'adipy anaxy. ¹² Jadaabi ayuc ñich miich ajcxy nyajnajtz'ane'müybich co naychójcigix nayjihuiyigix nidüg nidüg, tim jadu'n nej ñich miich ajcxy ndzocy njihuïy. ¹³ Je tiy'ajt jac'oybi co migügtijc ajcxy naychogüyb nayjihuihuïyb, co tüg jäy cïyegipy yjugy'ajtin mïd ymigügtijc ycixpi. ¹⁴ ñich miich ajcxy migüg'ajtyp, pen mguydumyb nej ajcxy nyajnajtz'ane'müygixy. ¹⁵ Jadu'n nej xii tiempo yjacnicxa'ñ, ca' miich ajcxy n'ocnaydijnip ñich ndumbi. Com je tumbi ca' huinjihuïy huïdibi yhuindzin ytumyb. Hue' miich ajcxy nyajnaxyich nmigügtijcich, com tüg'óciy tiy'ajt tiibi nmidooyich ma ñich nDeedy, yi Dios Teedy, ti ñich miich ajcxy nnimaaygixy. ¹⁶ Ca' nmïnaanim ñich miich ajcxy ti xyhuin'ixy. ñich miich janchtiy ajcxy ti nhuin'ixy. E ti ñich miich ajcxy nyajnbicy co nicxy mgapxhuäcxixy ñich n'ayuc. E nañ mayjäy mijpidägipy je ayuc huïdibi miich ajcxy mgapxhuäcxipy. E nañ ñich n'ayuc, huïdibi miich ajcxy mgapxhuäcxipy, y'idipy ma je jäy ajcxy yjot yhuinma'ñ huinixii. Paady ycix tüg'óciy tijaty miich ajcxy mbijctzooyb ma Dios Teedy mïd ñich nxi, yi' ajcxy xymöhuipy. ¹⁷ Jada ayuc ajcxy yam nyajnajtz'ane'müyb co ajcxy mnaychogüyb mnayjihuihuïyb miñ xyipy.

Je maybi naaxhuiñjyäy ca' ajcxy ixaangixy Jesús etz cham je' yjäy

¹⁸ Co je may naaxhuiñjyäy ca' xy'ixaangixy miich ajcxy, ca' ajcxy ooy mhuinmayipy, com mnejhuïyb ajcxy co ñich nañ jadu'n jac jayijp ca' yi' ajcxy ti xy'ixáangixyich. ¹⁹ Co ixipy ytügiy miich ajcxy m'ayuc mdiy'ajt mïd je jacjadyii naaxhuiñjyäy y'ayuc ytiy'ajt, huin'it ixipy ajcxy xchojccixy xyjihuiyigixy, com tú'ciy miich ajcxy mhuinma'ñ ixipy mïd yi' ajcxy yhuinma'ñ. Janch com co ca' ytügiy miich ajcxy m'ayuc mdiy'ajt mïd je jacjadyii naaxhuiñjyäy y'ayuc ytiy'ajt, paady je jacjadyii naaxhuiñjyäy ca' ajcxy xy'ixa'nip. Com ñich miich ajcxy ti nyajjijphuijztüdy, jadu'n nej yi' jacjadyii naaxhuiñjyäy ajcxy chinaaygixy yjugy'ajtcixy. ²⁰ M'ajihuïhuïb ajcxy jadu'n nej ti nnimaaygixy co ñich miich ajcxy xyhuindzin'ajtpich, paady jac mij ñich ca'ydi miich ajcxy. Jadu'n nej naaxhuiñjyäy ajcxy ti xy'ixhuïdityich ti xypahuïdityich, nañ jadu'n miich ajcxy yi' xy'ixhuïdida'ñ xypahuïdida'ñ. Nañ may je jäy huïdibi ca' ti xycapxymidooyich, nañ jadu'n may je jäy huïdibi miich ajcxy ca' xycapxymidohuaangixy. ²¹ Nijot ajcxy y'iditzaangixy mïd miich ajcxy ycixpi, com ca' ajcxy ix'yadyii Dios Teedy huïdibi xyquejxyich ya naaxhuiñ.

²² Co ixipy ca' ti nmiiñich ya naaxhuiñ nyajnimäyich je jäy ajcxy Dios ytiy'ajt, ca' ixipy ajcxy pocy mïdity. Per com ti nmiiñich ya naaxhuiñ, paady cham ypocy ajcxy mïdity co ca' ajcxy xy'ixa'ñich. ²³ Je jäy ajcxy huïdibi

ca' xy'ixa'ñich, jadu'n nipaady nej ñich nDeedy ca' ajcxy ixaangixy. ²⁴ Co ixyipy ñich ca' ti nduñich ma yi ajcxy yhuinduu mijhuinma'ñ, huídibi ca' ni pin jäy tuñi, ca' ixyipy ajcxy pocy mñidity. E janch ti ajcxy ooy ja'ijxcixy je mijhuinma'ñ, e ca' ñich yi' ajcxy xy'ixa'ñ, e nañ ca' ixaangixy ñich nDeedy. ²⁵ Paady jada jadu'n ytuñyii yjadyii, jigix yajcuydunipy jadu'n nej ycojaayity ma yi judíojäy ajcxy ley ñecy, ma jadu'n ymína'ñ: “Ni ti tiy'ajt ycaca'ty, co ñich yi ajcxy ca' xy'ixa'ñich.”

²⁶ E co anajty xyñigidaaccixy yi Espíritu Santo, yi huídibi xycapxhuijip ajcxy, je huídibi miich ajcxy nyajniguexam, chon ma Dios Teedy, je huídibi Dios ytiy'ajt mñid. Yi' xyñidiy'ajt'adaambich co Dios ytiy'ajt nmñididyich. ²⁷ E miich ajcxy nañ jadu'n xyñidiy'ajt'adipich co Dios ytiy'ajt nmñididyich. Com ñich miich ajcxy jayijp nyaj'ixpijctzondac Dios y'ayuc ytiy'ajt.

16

¹ Ti ajcxy yam tiy'ajt njacyajnimaaaygixy, jigix ca' ajcxy m'ixtigihuägipy. ² Com judíojäy ajcxy xy'ixhuidzipy ajcxy ma ajcxy yi' ñaymujctac. Ypadaamy yi xii tiempo co miich ajcxy jäy xyaj'ögipy, hue' ajcxy tijipy co Dios anajty ooy jadu'n jäygidägy tñibi anajty ajcxy tuñ. ³ Paady ajcxy jadu'n xytunipy jibic, je' co ajcxy ca' ixy'adyii yi Dios Teedy, etz nañ jadu'n ca' xy'ixy'adyiijich. ⁴ Paady ñich miich ajcxy jadachambi jadu'n nnimaaygixy, jigix co anajty je xii tiempo paady, chi m'ajihuñhuñyb ajcxy co ti anajty jayijp nnimaaygixy co ayo'n tzaachypí mminaxa'ñ myajnaxa'ñ ajcxy.

Dios yjihu'i'ñ ymic'ajt tunam ma jäy yjot yhuinma'ñ

Ca' anajty ajcxy jada ti nyajnimäy mñid jégix nmñid'ity ajcxy. ⁵ E cham janchtiy nnicxáanibich ma yi huídibi ti xyquexyich ya naaxhuiñ. E ni tüg miich ajcxy xyca'amidooyich: “¿Ma mnicxa'ñ?” ⁶ Paady miich ajcxy mdajy mmay ma m'aa mjot, co ajcxy cham jadu'n jada ayuc ti nyajhuinjihuñyigixy. ⁷ Oy ixyipy miich ajcxy cham mjatajy mjamay, tiy'ajt nej nmína'ñich co jac'oy mñid miich ajcxy ycixpi co nhuimbidipyich ma Dios Teedy. Co ixyipy ca' jiiby nnicxa'ñich tzajpjoty, ca' ixyipy xyñiminaangixy Dios yjihu'i'ñ ymic'ajt, je Espíritu Santo, je huídibi ajcxy xycapxhuijip. Per co ñich anajty tzajpjoty ti nhuimbity, huin'it ñich yi' miich ajcxy nyajniguexipy. ⁸ E co anajty je Espíritu Santo miñ ya naaxhuiñ, huin'it yi' yajjihui'ñybigipy jäy ajcxy ypocy. E nañ yajni'ixihuipy je jäy ajcxy co Dios tiydunib mñid ypocy ycixpi. ⁹ Yi Espíritu Santo yajjihui'ñybigipy jäy ajcxy ypocy, co ñich ca' ajcxy ti xymibicy ca' ajcxy ti xymijpidägyich. ¹⁰ Je Espíritu Santo yajnejhuñhuipy jäy ajcxy nej huaad cuychinaaygixy Dios y'ayuc ytiy'ajt. Com co ñich nba'ttigihua'ñich ma Dios Teedy, e miich ajcxy ca' xy'ocjac'íxnibich. ¹¹ Je Espíritu Santo yajhuinjihuñhuip je jäy ajcxy co Dios tiydunib ajcxy mñid ypocy ycixpi huídibi ajcxy ca' tiydudägy chinaaygixy. Com yi Dios ti yi' mujcu' tiyduñ mñid ypocy ycixpi.

¹² Ooy may ayuc ñich nmñidity huídibi njayajnimähuaamyich ajcxy per ca' miich ajcxy mhujnjihuñhuipy cham. ¹³ Jacjiini mhujnjihuñhuipy ajcxy je ayuc huídibi njayajnimähuaamy ajcxy, co Dios quexipy je Espíritu Santo ya naaxhuiñ huídibi tiy'ajt mñid. Yi' je' miich ajcxy xyajhuinjihuñhuipy tüg'óciy Dios ytiy'ajt. Com yi' ca' yci'mhuinma'ñ tunipy. Yi' janchtiy ñigapxtahuipy tüg'óciy ayuc tiy'ajt huídijaty anajty ymidooyb ma Dios Teedy, e nañ yajniguëxictahuipy tüg'óciy tiy'ajt huídibi mimb cidaacp. ¹⁴ Je Espíritu Santo ñich yi' capxpaady xyaj'idipyich, com yi' ñich ndiy'ajt miich ajcxy xyajhuinjihuñhuaam. ¹⁵ Tüg'óciy huídibi Dios Teedy ymñid, nañ njé'ajtypich

yí', paady jadu'n ti nmína'ñich co je Espíritu Santo xyajhuinjihuíydáaygixipy ajcxy ñich yí n'ayuc yí ndíy'ajtich.

Jesús ñimay ymígügtijc co ajcxy yjotmay ahuimbidipy jotcuyc'ajtin

¹⁶ Tim huaad'ajtp xii tiempo, co ñich miich ajcxy ca' xy'ocjac'ijxip. Chi co xii tiempo yjacnajtzníicxihuip, huin'it ñich miich ajcxy xyjac'ixipy jadüg'oc.

¹⁷ E huin'it ajcxy nijëjty Jesús ydiscípulos ajcxy ñayñimaayi miñ xyipy ac jëyi:

—¿Ti jadu'n ytiyyp? Co jadu'n ymína'ñ, co tim huaad'ajtnip xii tiempo mína ñich miich ajcxy ca' xy'ocjac'ijxnibyich, e co yjacnajtzníicxihuip xii tiempo, huin'it miich ajcxy xyjac'ixipyich jadüg'oc, com nníicxaamich ma Dios Teedy.

¹⁸ Chi ajcxy jadu'n ñayñimaayi miñ xyipy:

—¿Ti jadu'n ytijamy? Co jadu'n ymína'ñ co tim huaad'ajtnip xii tiempo. Ca' ñich ajt nhuinjihuíyim ti jadu'n ytijamy.

¹⁹ Com Jesús ñejhuíyb anajty nej ajcxy yja'amidoohua'ñyí, chi ñimay ajcxy:

—Yí' miich ajcxy ooy mjayajtihua'ñ. ¿Nej co jadu'n ti nmína'ñich? Tim huaad'ajtnip xii tiempo co ñich miich ajcxy ca' xy'ocjac'ijxnipy. E chi yjacnajtzníicxihuip xii tiempo, e chi miich ajcxy xyjac'ixipyich jadüg'oc. ²⁰ Janch janch ñich miich yam nníimaaygixy co mjotmaybaadip ajcxy, e nañ myáxip ajcxy mñid jotmay. Chi je naaxhuiñyáy ajcxy huídibi ca' xymíjpidägyich, xondägam ajcxy, e miich ajcxy nañ mjotmaybaadip. Per yí mjotmay ajcxy ahuimbidipy tüg xondaacin. ²¹ Jadu'n ajcxy mjada'ñ jadu'n nej tüg töxyjäy tzaachypi jihuíy co y'ung yma'xung'ada'ñ. E co ti yma'xung'aty ypi'c'ung, chi jäydigoy yí tzaachypi mñid xondaacin co tüg jäy ti ymíiñ ya naaxhuiñ.

²² Tim jadu'n nej yjaty mñid je töxyjäy, nañ jadu'n yjada'ñ mñid miich ajcxy. Cham ajcxy jotmay mjihuíy ma m'aa mjot, e chi co xy'ixipyich jadüg'oc miich ajcxy, huin'it ajcxy m'aa mjot yxondäga'ñ. E ni pin huaad mxondaacin ajcxy xycapíjipy.

²³ Je huin'it ximbi (co anajty je Espíritu Santo ti ymíiñ ya naaxhuiñ) ca' ñich miich ajcxy ni ti xyjacyajmbíjctzohuipyich, com janch ñich miich ajcxy yam jadu'n ñímaaygixy co tüg'óciy huídijaty myajmayajtcixyp, chi ajcxy mbíjctzohuipy ma Dios Teedy mñid ñich nxii, e xymóhuipy ajcxy yí.

²⁴ Chambaadni ca'ni ni ti ajcxy mbíjctzoy ma Dios mñid ñich nxii. Píjctzoogix, e xymóhuipy ajcxy yí, jigix mjotcugíhuip ajcxy anaxy.

Jesucristo ymímadac je jíbic-huinma'ñ ya naaxhuiñ

²⁵ Tüg'óciy jada ayuc tíy'ajt ac jihuimbit miich ajcxy ti nyajnimäy. Huin-gomb xii tiempo mína tíydudägy ajcxy nyajmñidmíydactähuipy yí Dios Teedy y'ayuc ytiy'ajt yajxon, e ca' y'ocjihuimbitiñ. ²⁶ Je huin'it xii co anajty ñich ti nhuimbityich ma Dios Teedy, jëbi miich ajcxy mbíjctzoogixy ma Dios Teedy tijaty ajcxy myajmayajtyp. Co ti mbíjctzóogixipy mñid ñich nxii, xymóoygixipy yí Dios Teedy. Ca' ycopicyity co ñich yí nmímbíjctzohuipy mñid miich ajcxy ycixpi. ²⁷ Com yí Dios Teedy nañ xychojcp xyjihuíyb yí miich ajcxy. Com miich ajcxy jayíjp ti xychocyich ti xyjihuíyich, e ti mmíbicy ajcxy co ti ndzooñich ma Dios Teedy, paady Dios miich ajcxy xymóhuipy tijaty anajty myajmbíjctzooyb. ²⁸ Jiiby ñich ndzooñ ma Dios Teedy yajpaady, co nmíiñich ya naaxhuiñ, per jadachambi n'ixmájtznibyich jada naaxhuiñyí, e nhuimbijtnich ma Dios Teedy.

²⁹ Huin'it je' ydiscípulos ajcxy ymína'ñ:

—Cham janchtíy tudägy míydägy, ca' m'ocyaajtuuni jihuimbit ayuc.

³⁰ Cham ñich ajcxy nnejhuíy co miich mnejhuíyday tüg'óciy tíy'ajt. E ti

xyajnimaydäyich co anajty ca' ti t'iy'ajt ñich ajcxy nmibicy co miich mdzooñ ma Dios.

³¹ Chi Jesús y'adzooy:

—¿Nej mmibijcyp cham jada ayuc jadu'n nej ti nnimáaygixyí?
³² Jihui'ñybijccix co huingtonip je xii tiempo, e ti tim paady mina miich ajcxy mgueec-huäcxtáaygixipy nidüg nidüg ma pin timdzocy, e xyajhuí'mgixich naydüg. Per ca'p ñich nneydügity, com yi Dios Teedy yi' ijtp müd ñich. ³³ Miich ajcxy yam jada ayuc nyajnamaayb, jigix ajcxy jotcujc'ajtin mbaadip ma ñich. Ya naaxhuiñ mbadamy ajcxy ayo'n etz tzaachypi. Jotcugiiygix, ca' mdajcixy maygixy, com ti nmimadägyich yi jibicpi ya naaxhuiñ.

17

Jesús ymibijctzou Dios müd ydiscípulos ajcxy ycixpi

¹ Co Jesús jadu'n ymíañ jayijp, chi ypa't'ijxy tzajpcixy, chi Dios Teedy pa'tcapxy nimay:

—Dios Teedy, ti hora paady mina ayo'n nyajnaxa'ñich jadu'n nej miich jayijp'aty myajnihuinmayiiy. Yajniguëxig ñich nmic'ajt ñich n'oy'ajt, com ñich miich nDeedy'ajtypich, jigix ñich nañ jadu'n nyajniguëxigibych miich nmic'ajt miich m'oy'ajt ma yi jäy ajcxy. ² Com miich ti xymöyich mic'ajt ma tüg'óciy jäy, jëbi nmöyich ajcxy jugy'ajtin huidibi ca' ycixipy ytigoyipy. Nmöhuibyich jada jugy'ajtin tüg'óciy jäy ajcxy huidibi miich ti xymöyich. ³ Je jäy ajcxy huidibi ix'y'ajtp je Dios janchypi, je Dios tüg'ajcpi etz y'ixy'ajtp nañ jadu'n Jesucristo huidibi ti mguexy ya naaxhuiñ, ymüd ajcxy jugy'ajtin huidibi ca'ycixipy ytigoyipy nimíanaa.

⁴ Ti ñich nyajniguëxigiyich miich ajcxy yi nmic'ajt ya naaxhuiñ, co ñich ti nduñ yi mdung huidibi miich xyajniñicich. ⁵ Jadachambi Dios Teedy yajmijtigiiygich miich, müd je mic'ajtin huidibi anajty nmüdich ma miich mhuiñduu co anajty ca'ni naaxhuiñyibi chondacyñi.

⁶ Ti ñich miich ya naaxhuiñ nyajniguëxici yi nmic'ajt ma yi jäy ajcxy huidibi miich xymooyich, huidibi miich mhuiñ'ijx ma naaxhuiñyjäy ajcxy. Miich yi' ajcxy mjäy, e miich ti xymöyich, e ti ajcxy miich m'ayuc cuydungixy. ⁷ Jadachambi ñejhuñyñip yi' ajcxy, co tüg'óciy tijaty t'iy'ajt ñich miich yi' xymooyb, jiiby yi' chooñ tzajpjoty ma miich. ⁸ Com yi ayuc huidibi miich ti xymöyich, ti ñich yi' ajcxy nyajnimaydäy, e ti yi' ajcxy cöbijccixy. E nañ ti ajcxy huiñihuñyigixy t'ydudägy co ñich jiiby ndzooñich ma miich, e nañ ti ajcxy mibijccixy co miich ya naaxhuiñ xyquejxyich.

⁹ Müd yi' ycixpi ajcxy miich Dios Teedy nmibijctzooy, ca' nmíanaanim müd jacjadyii naaxhuiñyjäy ajcxy ycixpi nmibijctzoy. Müd yída'ajty ycixpi ajcxy huidibi miich ti xymöyich, com nañ mjé'ajtyp miich yi' ajcxy. ¹⁰ Tüg'óciy tijaty ñich njé'ajtyp, nañ mjé'ajtyp miich yi', e tijaty miich mjé'ajtyp nañ njé'ajtyp ñich yi'; e ñich nmic'ajt niguëxi'cp yi' ma yi' ajcxy chinaayin yjugy'ajtin.

¹¹ E ca' n'ocjacyajpadaanich ya naaxhuiñ. ñich njäy ajcxy jacyajpadam ya naaxhuiñ. Nñicxñibich jiiby tzajpjoty ma miich. Dios Teedy, cuend'at ñich ndiscípulos ajcxy müd miich nmic'ajt huidibi miich ti xymöyich, jigix yi' ajcxy tú'ciy yjot yhuinma'ñ yajpaadipy ma miich, tim jadu'n nej ñich ajt tú'ciy njot yhuinma'ñ nyajpaatim. ¹² Co anajty ñich njac'yaajty naaxhuiñ müd ñich njäy ajcxy, ti ngüend'atyich anajty ajcxy müd je mic'ajt huidibi miich xymooyich. E ni tüg'ajcxy ca' yhuinma'ñyidigooy. Abicy ñich n'octimpidägy je huidibi nayyajhuinma'ñyidigooyi (je Judas Iscariote), co yi' anajty jadu'n yajcuydunam jadu'n nej jaybety ymíñ müd yi' ycixpi etz müd ñich ycixpi.

13 Cham ñich miich niba'ttigihuaani jada'. Miich m'ayuc mdiy'ajt nyajnimaybich jada naaxhuiñjáy ajcxy huidibi nyaj'ixpijcyich, jigix agujc jotcuje yhui'mip ajcxy. 14 Ti ñich ajcxy yi' nyajnimaydáyich miich m'ayuc mdiy'ajt. E ca' ajcxy y'ixa'ñyii yi' naaxhuiñjáy ajcxy huidibi ca' xymijpidágyich. Com je' co ajcxy yjot yhuinma'ñ ti yajtigach, ca' ytügyi mïd yi' jacjadyii naaxhuiñjáy yjot yhuinma'ñ. Jadu'n nej ñich ca' ytügyi njot nhuinma'ñ mïd naaxhuiñjáy ajcxy yjot yhuinma'ñ. 15 Ca' ñich cham miich nmibijctzoy co myajpidzimipy ñich ndiscípulos ajcxy ma jada naaxhuiñybi. Hue' janchtiy tun may'ajt cuend'at ajcxy ma yi' ca'oybi ymiiñ. 16 Yi' ajcxy yjot yhuinma'ñ ca' ytügyi mïd yi' jacjadyii naaxhuiñjáy ajcxy yjot yhuinma'ñ. Tim jadu'n nej ñich ca' ytügyi njot nhuinma'ñ mïd yi' jacjadyii naaxhuiñjáy ajcxy yjot yhuinma'ñ. 17 Yajhuaatzi ajcxy yjot yhuinma'ñ mïd miich m'ayuc, com yi' m'ayuc yi' je' tiy'ajt mïd. 18 Jadu'n nej miich xyquejxyich ya naaxhuiñ, nañ jadu'n ñich yi' ajcxy nguejxhuäcxyich ya naaxhuiñ. 19 Mïd yi' ajcxy ycixpi ti nnyagyegyijich amuumdügnot ma miich, jigix yi' ajcxy nañ jadu'n ñagyegyiyb amuumdügnot ma miich, co ajcxy cuydunipy miich m'ayuc mdiy'ajt.

20 E ca' ñich jada'ajty ajcxy nibijctzohuïyich. Hue' ñich janchtiy nibijctzohuïydaaybich tüg'óciy jáy ajcxy huidibi xymibijcibich xymijpidágibich mïd yi' ayuc huidibi ñich ndiscípulos ajcxy ycapxhuäcxy. 21 Huen ajcxy nidüg'óciy yjot yhuinma'ñ yajtügüy, jadu'n nej miich Dios Teedy mjot nhuinma'ñ yajpaady ma ñich, e ñich njot nhuinma'ñ yajpaady ma miich. Co yi' ajcxy yjot yhuinma'ñ yajtügühuipy mïd ñich ajt njot nhuinma'ñ, huin'it jacjadyii naaxhuiñjáy ajcxy mibigipy co miich xyquejxyich ya naaxhuiñ. 22 Ti ñich ajcxy nmöyich je' tiy'ajt etz je' oy'ajt huidibi ñich miich ti xymöy, jigix ajcxy yjot yhuinma'ñ jatymy yajtügühuipy ajcxy, jadu'n nej ñich ajt njot nhuinma'ñ yajpaatim tú'ciy. 23 ñich yajpatpich ma ñich njáy, e miich nañ myajpatp ma ñich, jigix tiydudágy ajcxy tügmucy y'idipy, e nañ jigix naaxhuiñjáy ajcxy jatymy nejhuïhuipy co miich xyquejxyich ya naaxhuiñ, e nañ co yi' ajcxy ti mdzocy ti mjihuïy jadu'n nej ñich miich xychocy xyjihuïyich.

24 Dios Teedy ndzojcpyich co yi' jáy ajcxy huidibi miich ti xymöyich y'idipy ajcxy nañ jadu'n ma anajty n'ityich jiiyby tzajpjoty, jaydëbi ajcxy ixipy ñich nmic'ajt ñich n'oy'ajt huidibi miich ti xymöyich. Com miich ti xychocy ti xyjihuïyich jacjayijp ca'ni anajty naaxhuiñybi myajcojyñi. 25 Dios Teedy, miich ooy mmijity mjanchity, e yi' jacjadyii naaxhuiñjáy ca' ajcxy yi' xy'ixy'ajtyp. ñich miich n'ixy'ajtyp. ñich njáy ajcxy ti mibicy ti mijpidágy co miich xyquejxyich ya naaxhuiñ. 26 Ti nyajnimayyich yi' ajcxy pin miich, co miich je' Diosip. E njacyajnimähuaamyich yi' ajcxy tiydudágy, jigix yi' ajcxy nañ jadu'n ñaychogiyb ñayjihuïhuïyb nidüg nidüg, jadu'n nej miich xychocyich xyjihuïyich, e nañ jadu'n jigix ñich ndiy'ajt yajpaadipy ma yi' ajcxy yjot yhuinma'ñ.

18

Ymajtz ajcxy Jesús

1 Co jadu'n Jesús ycapxymiydacy jayijp, chi jada' ñicxy mïd je' jáy ajcxy huidibi anajty ajcxy yaj'ixpijcy. Ñicxy ajcxy jim'amy huoc nñaxy, je huoc hue' anajty xijity Cedrón. Ñicxy ajcxy jim ma anajty tüg aguemy. Chi Jesús ytigüy ma je aguemy mïd ydiscípulos ajcxy. 2 Judas huidibi anajty cýegam Jesús, ñejhuïyb anajty ma je it ma anajty mïd'oy canaag'oc je' ydiscípulos ajcxy. 3 Chi jada' Judas mïddzooñ soldados ajcxy etz jacjadyii tungmïdipi

huidibi je teedy yhuindzin ajcxy etz fariseojäy ajcxy yquejx. Chi ajcxy yja'ty ma je it ma anajty Jesús yajpaady, ymüid ajcxy linterna, ymüid ajcxy chinjin etz canaagnax tijaty huidibi anajty ajcxy müid chiptuñ. ⁴ E Jesús com ñejhuydaayb anajty tüg'óciy nej anajty yjada'ñ y'ayohua'ñ, chi jipcohuägiy je ymaymidzip ajcxy, e ñimay:

—¿Pün ajcxy m'ijxtaayb?

⁵ Chi je' ymidzip ajcxy y'adzooy:

—Yi' ñich ajcxy n'ixtaayb je Jesús, je Nazaret jäy.

Chi Jesús ymüinañ:

—Ñich jëdu'n.

Je Judas huidibi anajty cïyejcp Jesús, jim anajty ytinäy müid Jesús ymidzip. ⁶ Co Jesús jadu'n ymüinañ: “Ñich jëdu'n.” Chi ajcxy yëphuibijtay jadu'ñyi. ⁷ Chi Jesús jadüg'oc y'amidooy ajcxy:

—¿Pün ajcxy m'ijxtaayb?

Chi ajcxy jadüg'oc y'adzooy:

—Yi Jesús, je Nazaret jäy. ⁸ Chi Jesús ymüinañ:

—Ti ajcxy njanimäy co ñich jëdu'n. Pen janch ñich müich ajcxy xy'ijxtaayb, najtzmaziydäy jadaaab ñich nmigügtijc ajcxy, huen nicxcixy.

⁹ E jadu'n yajcuyduñ je ayuc co anajty Jesús ci'm ti ymüinañ: “Tüg'óciy jäy huidibi nDeedy ti xymöyich, ca' ni tüg jëbi huaad ytigooy.” ¹⁰ Chi jada' je Simón Pedro huidibi anajty müid tüg espada, juudy je y'espada ma ñidijc, e chi yajtzaachiyi je Teedy mijtungmüidpi ytumbi, tüg yta'tz'ac aa'oy'amybi yajminájiy. Je tumbi hue' anajty xiijity Malco. ¹¹ Chi Jesús ñimay Pedro:

—Pidäg m'espada ma ñidijc. Ca' mnejhuüy co copicy nyajnaixipyich je tzaachypi je ayo'n huidibi Dios Teedy ti xyajnigo'adugiyich. Min n'ocminaxy n'ocyajnaixyich jada tzaachypi jadu'n nej ixypy tüg tasi ta'm'ujtznü ngo'uucnaxyich.

Jesús ma je Teedy mijtungmüidpi yhuinduu

¹² Chi je soldados ajcxy, je soldado yhuindzin etz judíojäy ajcxy ytungmüidpi huingohuägiy ajcxy Jesús. Chi ajcxy majch, e chi ajcxy cíxojch. ¹³ Chi ajcxy jayijp yajnicxy Jesús ma Anás yajpaady, je' anajty Caifás ymüid'ajtyp, je huidibi anajty mijtungmüid ma teedytjic ajcxy ymiñ je huin'it jimijt. ¹⁴ Je Caifás je' anajty ti yecy je capxhuijin ma yi judíojäy ajcxy co tügtecy ymüinañ: jac'oy co tüg jäy y'ögipy müid tüg'óciy naax cajp ycixpi.

Pedro ymüinañ co ca' ix'y'adyii Jesús

¹⁵ Simón Pedro müid jadügpü ydiscípulo ypanicx ajcxy Jesús (co je ymidzip yajnicxi mach). E je jadügpü ydiscípulo ix'y'ajtip anajty yajxon je teedy mijtungmüidpi, paady ytigüy axam huin'it co Jesús ymidzip yajtigüy ma je teedy mijtungmüidpi ytijc. ¹⁶ E je Pedro jiiby je' yhui'miy ma tijc aguu. E je jadügpü ydiscípulo co anajty ajcxy ñay'ix'y'adyii müid je teedy mijtungmüidpi, chi ypidzimy migapxy je tijc aguu adinaayb, chi Pedro ajcxy yajtigüy jiiby tigoty. ¹⁷ Chi jada' je töxy'anäg huidibi anajty tijc'aguu adinaayb, ñimay je Pedro:

—¿Nej ca' müich nañ jadu'n Jesús xydiscípulo'adyii?

Chi Pedro y'adzooy:

—Ca'.

¹⁸ Je tumbidijc ajcxy etz je soldadtijc ajcxy ti anajty ajcxy oy jin yajmijiygixy co anajty chachtichity, e Pedro nañ jim anajty nañ jadu'n müid xamy ajcxy.

Je teedy mijtungmüidpi yajcomidou Jesús ypocy

19 Chi je teedy mijtungm̄idpi y'amidooy Jesús pinjaty anajty ti yaj'ixpicy etz tijaty anajty ti yaj'ixpicy. 20 Chi Jesús y'adzooy:

—Ti ñch oy njacapxy njam̄ydägy mayjäyjoty. E ti ñch njatyim̄y nyaj'ixpicyich ma miich ajcxy mnaymujctac̄in etz ma Dios ytijc, ma yi judiojāy ajcxy nidüg'óc̄iy ñaymugyii. Ca' ni ti ameech ti nnigapxyich. 21 ¿Na'amy co xyjactim'amidooyich ti anajty ti nyaj'ixpicyich? Yi' ajcxy amidou pinjaty ti xy'amido'ijtich n'ayucich, yi' ajcxy nejhuiyb ti ñch jadu'n ti nyaj'ixpicyich. Yi' ajcxy tüg'óc̄iy ñejhūydaayb nejjaty ñch ti nm̄ina'ñich.

22 Co jadu'n y'adzooy Jesús, huin'it tüg judío tungm̄idpi hūidibi anajty jim huingon t̄inaayb ma Jesús, chi tüg ci' acojx̄igy Jesús, chi m̄inañ:

—¿Nej co jadu'n j̄ibic m'adzooy yi teedy mijtungm̄idpi?

23 Chi Jesús y'adzooy:

—Pen j̄ibic ñch ti n'adzooy yec t̄iy'ajt nej co yj̄ibicity. Pen oy ñch ti n'adzooy, ¿nej co xycoxyich?

24 Chi Anás nimay soldadtijc co huen Jesús yajnicxy c̄ixoch jim ma yi Caifás ytijc, je teedy mijtungm̄idpi.

Chi Pedro jadüg'oc ym̄inañ co ca' ix̄y'adyi Jesús

25 Simón Pedro jimni anajty yt̄inäy ma j̄imba' yxamy anajty, chi ajcxy amidoy jadüg'oc:

—¿Nej cay yi' miich xyaj'ixpijcp nañ jadu'n?

Chi Pedro jadüg'oc coyüch Jesús ym̄inañ:

—Ca' je' n'ñchity.

26 Nidügti ajcxy je teedy mijtungm̄idpi ytumbi, je' anajty y'amigüg yi Malco, hūidibi Pedro yta'tz'ac quejtzpujxi, chi jadu'n ym̄inañ:

—¿Nej ca' mdijy n'ijxyi jim ma je aguemy m̄id Jesús?

27 Chi Pedro miduḡig'oc oy coyüch yhuindzin, e tim huin'it̄iy tzey oy yaax̄igy.

Jesús ma je gobernador yhuinduu

28 Chi ajcxy jim yajtzooñ Jesús ma Caifás ytijc yajnicxy ajcxy ma agujctijc, tim jopyñi anajty. Chi je judiojāy ca' ajcxy ytiḡiy ma agujctijc, com ca' anajty ytundigoyaanḡixy m̄id judiojāy ycostumbre. Ca' ajcxy ytiḡihua'ñ anajty ma je romanojāy gobernador ytijc amayx̄ijoty, e ca' anajty ajcxy ñayyaj̄ibicc̄ihua'ñyii. Com co jadu'n ycanayyaj̄ibicc̄iyi ajcxy, e huin'it ca' ajcxy ycacaay ma je pascua xi adzoo'ajtin. 29 Co ca' ajcxy ytiḡihua'ñ anajty ma je agujctijc, chi je gobernador Pilato nib̄idz̄im̄y ajcxy t̄iba'y ma anajty ajcxy m̄id̄ity Jesús cuend'aty. Chi Pilato ym̄inañ:

—¿Ti x̄ihūin ajcxy mm̄id, m̄id jadayaabi yēydijc?

30 Chi ajcxy y'adzooy:

—Co ix̄yipy ca' ti j̄ibicpi tuñ, ca' ix̄yipy ñch ajcxy ya yi' nyajmiñ ma miich.

31 Chi Pilato ym̄inañ:

—Yajnicxcix miich ajcxy. Nicx t̄iydunḡix jadu'n nej miich ajcxy mley y'ané'my.

Chi je judiojāy ajcxy y'adzooy:

—Ñch ajcxy ca' ni ti mic'ajt nm̄id̄ity nicxy ñch ajcxy njäyyaj'ögy.

32 Co jadu'n ajcxy ym̄inañ, chi jadu'n ajcxy cuyduñ je Jesús yci'm'ayuc jadu'n nej anajty ti ym̄ina'ñ ti o'cin anajty ypadamy. 33 Chi Pilato jadüg'oc ytiḡiy j̄iiby agujctigoty, chi coyaax̄iy Jesús, chi nimay:

—¿Nej miich je' rey'ajtp ma yi judiojāy ajcxy?

34 Chi Jesús y'adzooy:

—¿Nej mgi'mhuinma'ñ mïd xy'amidooyich pen ïch nrey'ajtpich, o huingjäy ti xyajnimäy co nrey'atyich?

³⁵ Chi jada' Pilato y'adzooy:

—¿Nej nañ judiojäy jada' ïchi? Mgi'mnaax mgi'mgajp etz je teedy mijtungmïdpi ti xyciyecy ma ïch. ¿Ti ti mdundigooy?

³⁶ Chi Jesús y'adzooy:

—Ïch ca' n'ane'myich ya naaxhuiñ. Huingduum ïch n'ané'min nmïdidyich. Co ixypy ya naaxhuiñ n'oc'ane'myich, tüg'óciy ïch nmigügtjic ajcxy ti ixypy ajcxy tziptungixy, ti ixypy ajcxy xyñihua'ñich. E ca' ixypy ti naygïyegyiijich ma yi judiojäy tungmïdpi ajcxy. Per janch ïch ca' ïch ya naaxhuiñ n'ane'myich.

³⁷ Chi Pilato y'adzooy:

—¿Nej mrey miichi?

Chi Jesús ymïnañ:

—Miich jadu'n xytijypich co nrey'atyich. Paady ti nmiñich ya naaxhuiñ, e ti nma'xung'atyich, jigix nyecyich tiy'ajt tiydudägy. Tüg'óciy yi jäy pinjaty tiy'ajt cuydumb xy'amido'ïjtibich yi' n'ayucich.

Pilato y'ane'my huen Jesús yaj'ögyii

³⁸ Chi Pilato y'adzooy:

—¿Ti jadu'n mdiy tiy'ajt tiydudägypi?

Jadu'ñyi je' jada'ajty yjacmïnañ, chi pidzïmy jadüg'oc tïba'y ma anajty je judiojäy ajcxy. Chi ajcxy nimay:

—Ca' ïch ni ti bocy nbaadyich ma jada jäy ma yi romanojäy yley. ³⁹ E com miich ajcxy mïd tüg costumbre co tüg nnaajtmadzïyïm machyjäy mïd jada pascua xï ycipi, ¿nej mdzojcy ajcxy co nnaajtmadzïhuibyich jada judiojäy rey?

⁴⁰ Chi ajcxy nidüg'óciy minanday:

—Jadayaabi jäy ca' mnaajtmadzïhuipy, yi' janchtiy mnaajtmadzi' yi Barrabás.

Barrabás hue' je' anajty tüg meetzpi.

19

¹ Chi jada' Pilato ané'min pidacy co huen ajcxy Jesús huinhuopy jïphuopy.

² Chi jada' je soldados ajcxy yaj'oyïy tüg corona mij'apy pa'apy, chi ajcxy yajcojenïy Jesús. Chi ajcxy yajñjenïy tüg rey yhuit ucypï ycolor. ³ Chi soldados ajcxy huingohuägïy jadüg'oc capxpooxcixy yajxïgy'amy, nïmaaygixy:

—¡Viva miich judiojäy rey!

Chi ajcxy ooy huingojxy jïpcojxy.

⁴ Chi Pilato jadüg'oc ypidzïmy tïba'y. Chi nimay je mayjäy:

—Cham ajcxy nyajpidzïmy tïba'y jada Jesús, jigix ajcxy mnejhuïhuip co ca' ni ti pocy ti nbaadyich ma yi'.

⁵ Co Jesús ypidzïmy tïba'y mïd je apy corona ma ycohuajc etz je rey yhuit ucypï ycolor. Huin'it Pilato ymïnañ:

—Ijxcix, cha je yëydijc.

⁶ Co je teedy tungmïdpi etz je judiojäy ajcxy ijxy, chi ajcxy yminanday nidüg'óciy aguipxyjaty:

—Yajcruudzpet, yajcruudzpet.

Chi Pilato ymïnañ:

—Yajcruudzpejtïx miich ajcxy, janch ïch ca' ni ti tiy'ajt nbaadyich nej ïch yi' nyajcruudzpedïpy.

⁷ Chi je judiojäy ajcxy y'adzooy:

—Hich ajcxy miid tüg cötujcin, jëbi y'ögy miid hich ajcxy ngötujcin ycixpi, com ti ycapxtigooy co ymina'ñ co yi Dios yteedy'ajtyp.

⁸ Co jada ayuc midooy Pilato, chi nigü chigiygoty. ⁹ Chi ytigüy jadüg'oc ma je cötujctac miid Jesús, chi nimay:

—¿Ma miich tüyü mgogajpity?

E Jesús ca' y'adzooy.

¹⁰ Paady Pilato ymina'ñ:

—¿Hich miich ca' xy'adzohua'ñ? ¿Ca' mnejhuüy co nmüidyich mic'ajt jëbi nnajtmadzüy etz nañ jëbi nyajcruudzpety?

¹¹ Chi Jesús y'adzooy:

—Ni ti mic'ajt ixypü mgamüdy ma hich, pen ca' ixypü mic'ajt ti xymöyich y' hüdibi ane'mb jüby tzajpoty. E paady ycixpi y' tübi hich xycüyeyich nigü y' pocy müdy ca'ydi miich.

¹² E huin'it Pilato ooy yjahuinma'ñ ixtay nej huaad ca' jëbi ocnajtmadzüy Jesús. E je judíojäy, je Jesús ymidzip, nigü anajty ajcxy chachxi'dich:

—Pen miich mnajtmadzüyb jada Jesús, huin'it ca' m'ocjacnaymüg'ájtinipy miid y' mhuindzin je César hüdibi ane'min ti xymöy. Com tüg'öcy pinjaty naydijip rey, ca' y' miid nay'ixa'ñyü je César.

¹³ Co Pilato jadu'n ayuc midooy, chi yajpidzimy Jesús tiba'y. Chi Pilato y'ixtacy jim ma je y'ane'mdac ycötujctac, jim ma je it hüdibi anajty xijip Empedrado, hebreo'amy xijity Gabata. ¹⁴ Hue' tim cujcxü anajty, e chi com jabom anajty je pascuaxü ycodücxni, co Pilato jadu'n nimay judíojäy ajcxy:

—Cha ajcxy jada mrey.

¹⁵ E je' ajcxy y'adzooy:

—Huen ögy, huen ögy. Yajcruudzpet.

Chi Pilato ymina'ñ:

—Miich ajcxy mrey, ¿miñ n'ocyajcruudzpetyichi?

Chi je teedy tungmüdpü ajcxy y'adzooy:

—Hich ajcxy ca' hich ajcxy huingbi rey nmüdy, jëyü César hich ajt nrey'ajtim.

¹⁶ Chi Pilato cüeycy Jesús ma je judíojäy ajcxy, huen ajcxy ci'm yajcruudzpety. Huin'it ajcxy Jesús nihuägüy. Chi ajcxy yajtzoñ.

Yajcruudzpejty ajcxy Jesús

¹⁷ Chi ajcxy je cruudz Jesús ci'm yajquejycabiüy. Miid nicx ajcxy ma je it xijity o'cpi cohujc, hebreo'amy xijity Gólgota. ¹⁸ Jim ajcxy yajcruudzpejty quipxy miid jametz jäy, tüg anajty'amy, jadüg a'oy'amy etz Jesús cuj'amy.

¹⁹ Chi Pilato ane'my huen cüxjay ayuc ma je cruudz, e jadu'n je ayuc ajcxy jay: “Jesús, Nazaret jäy, je judíojäy ajcxy yrey.” ²⁰ May ajcxy ooy je judíojäy capxy je ayuc hüdibi anajty cüxjay ma je cruudz. Com je it ma anajty ajcxy Jesús ti yajcruudzpejtcüy mühuigon anajty Jerusalén. Hue' anajty yjayty: hebreo'amy, latin'amy etz griego'amy. ²¹ Chi je teedy mütungmüdpü ajcxy nimay je Pilato:

—Ca' ixypü jadu'n ti mjay: “Judíojäy yrey”. Hue' ixypü ti mjay: “Yi' jadu'n naydijip hich judíojäy xyrey'ajtpich.”

²² Chi Pilato y'adzooy:

—Yi tübi njaayich, ti hich y' njaay, ca' nyajtigadza'ñich.

²³ Co soldados ajcxy yajcruudzpejtay je Jesús, huin'it je y' huit ajcxy huitzi'ci. Chi ajcxy je huit yajhuäcxy midaxpicy. Chi soldados ajcxy cüptüg cüchypicy. Yi' yjocxhuit jadu'n nej anajty ytügjipxuyüty. ²⁴ Chi ajcxy ñayñimayü ac jëyü soldadtijc:

—Ca' huaad ajt n'agüdzüym jada jocxhuit. Tzoc ajt suerte n'oc'ijxim, jigix ajt nnejhuüym pin anajty suerte'ajtip.

E jadu'n ajcxy cuyduñ nej anajty ycojaayity ma Dios ñecy, ma Cristo jadu'n ymïnañ: “Yajhuäcx ajcxy ñch nhuit, e ma ñch njocxnïjen jim ajcxy suerte ijxy.” Je' je' huïdibi soldadtijc ajcxy ycuyduun.

²⁵ Jim ma Jesús ycruudzmijc, jim anajty ajcxy ytinäy: Jesús ytaj, je ytaj chi', je María (Cleofas ytöxyijc), etz María Magdalena. ²⁶ Co Jesús ijxpaty ytaj etz je ydiscípulo huïdibi anajty ooy nigï tzocy ma ytaj ymijc, chi nimay ytaj:

—Nan, ñch nmigüg huïdibi tinaayb ma miich mmijc, yï' xycuend'adip jadu'n nej jihüy miich yï' xytaj'adyii.

²⁷ Chi Jesús nimay je' ydiscípulo:

—Ñich ndaj miich mgüend'adipy, jadu'n nej ixypy mgï'mdaj'adyii.

Jadu'n nej xii tiempo jac nicxni Jesús ytaj tzinaydacpicy ma jada discípulo ytijc.

O'c Jesús

²⁸ Co jadu'n ytundaayi yajtaayi, chi Jesús nejhuüy co ti anajty tüg'óciy ytundäyï yajtäyï jadu'n nej Dios tzocy. Huin'it jadu'n ymïnañ:

—Tidziyinibich.

Co jadu'n ymïnañ, je' anajty ycuydundaayb nej anajty ycojayity ma Dios ñecy müd yï' ycixpi.

²⁹ Jim anajty tüg pi'c uugi'ñ ymüd anajty vinoxunni. Chi ajcxy je' yajxoogy tüg esponja (jadu'n yï' nej po't) müd vinoxunni, e chi yajjijp'eedziy tüg paxyijp, je' müd yajjädy je vinoxunni ma Jesús y'ahuac. ³⁰ Co jada' Jesús co'uucnajxy je vinoxunni, huin'it jadu'n ymïnañ:

—Ti tüg'óciy nguydundäyich.

Chi ñaax'ijxy, e chi y'o'cni.

Tüg soldado cumy Jesús ma ycaachyjijp

³¹ Com jabom anajty je pascua mijxi (amayxi ooy), e nañ sábado xii anajty. Paady copicy anajty co ajcxy yajminajcipy ajcxy je jäy ninïcx je tibi anajty yajcruudzpejtcixy. Müd je' ycixpi je judiojäy ajcxy ñicxy ma Pilato pijctzoy may'ajt co huen ane'my yï' soldados ajcxy, co huen nicxy yajtijy je jäy ytecy ajcxy huïdibi ti yajcruudzpety. ³² E chi ajcxy je soldados yja'ty ma je it ma ajcxy yajcruudzpejty Jesús. E je metzpi jäy ajcxy ytecy tiji huïdibi ajcxy yajcruudzpejt tú'ciy müd Jesús. ³³ Co je soldados ajcxy ymijhuägy ma Jesús, huin'it ajcxy ijxy co ti anajty y'o'cni, paady ca' ajcxy tiji ytecy.

³⁴ Chi tüg soldado cumy Jesús ma ycaachyjijp müd quipy jipxu'ñybi. E huin'it tim mic'amy ni'py etz nii ypidzimy. ³⁵ Tüg jäy jim anajty ixey nej ytuni yjajti, e nañ yejc tiy'ajt. E je' ytij'ajt janch je', e je' nejhuüyb co yjanchity. Müd je tiy'ajt ycixpi jëbi miich ajcxy nañ jadu'n mmibijctähuip. ³⁶ Paady je' jadu'n ytuni yjajti, co jadu'n anajty yajcuyduna'ñ jadu'n nej yjaybetyity ma Dios ñecy, co jadu'n ymïnañ: “Ca' huaad ni tüg ypajc yajtijy.” ³⁷ E jadüg'it anajty ycojaayity ma Dios ñecy, ma jadu'n ymïnañ: “Y'ixipy ajcxy je jäy huïdibi ajcxy ycuum.”

Yajnaaxtigiy Jesús

³⁸ Jim anajty José huïdibi anajty cogájpip Arimatea. Yi' je' huïdibi anajty mijpidacp Jesús, oy anajty ca' capxidzimy, müd co anajty chigiy müd je judiojäy ajcxy huïdibi anajty midzip'ajtp Jesús. Co Jesús y'o'cy huin'it José oy pijctzoy may'ajt ma Pilato, co jëbi nicxy yajtzooni Jesús ñaaxnicx ma anajty ti yajcruudzpedyï. Co Pilato a'ixiy, chi José ñicxy jim oy yajminajci je Jesús ñaaxnicx, e chi yajnicxy. ³⁹ Nañ müd ñicxy José je Nicodemo, je huïdibi anajty

jayijp ti ni'oy Jesús coodz. Nicodemo ymínicx oy nimigo'px libra mirra etz áloes tzooy huidibi ooy oy yxuugy. ⁴⁰ Chi ajcxy yajpidíci Jesús ñaaxnícx, chi ajcxy mo'ñ miid poob huit, chi tzooy ajcxy miid mirra etz áloes tzooy, jadu'n nej je judíojäy ajcxy ycostumbre miidity co o'cpi yajnaaxtigíygyxy. ⁴¹ Huington ma je it ma ajcxy yajcruudzpejty Jesús, jim anajty tüg aguemy, e jim ma je aguemy jim anajty tüg o'cpi jut jemybi ma anajty ca'ni pin ñaaxtigíy. ⁴² Jim ajcxy Jesús ñaaxnícx yajnaaxtigíy, co anajty jim yjac-huingtonity, e janch jottigooy ajcxy yajnaaxtigíy, miid co anajty ti chu'íyñi, e je judíojäy ajcxy tzachni'ixíyñi tzach'a'ixíyñi co je amayxí anajty chondágaani com jabom.

20

Jesús jugypíjc jadüg'oc co anajty ti y'oc'o'cni

¹ Tim seman ixtigi', moñyi anajty, ca' anajty oy ximíyñi. Huin'it María Magdalena ñicxy ma Jesús anajty ti ñaaxtigíy. E chi jim ijxy co je tzaa ti anajty jim yajjidigüecy ma je jut aguu. ² Co ajcxy ijxy je jut ahuadz, chi jada' mic'amy poyígyi ninicxy Simón Pedro, etz je jadügpí ydiscípulo huidibi anajty Jesús miid ooy naychogyi, chi nimay:

—Ti yajtzoongíxy ích ajt nHuindzin ñaaxnícx ma ajcxy yajnaaxtigíy, e ca' nejhuíyim ma ajcxy ti pidaaccíxy.

³ Huin'it ajcxy nimetz choon poyígyi Pedro etz je jadügpí discípulo, ñicxy ajcxy ma je o'cpi anajty ñaaxtigíy. ⁴ Poyígyi ajcxy ñicxy nimetz, per je jadügpí discípulo jayijp ñajxy, e jayijp jim oyja'ty ma je naaxtigíydac. ⁵ Chi yco'ixíy jutjoty, huin'it jim oy ixy je mo'nhuít jüby jutjoty y'ooxnäy, per ca' yi' jüby ytigíy jutjoty. ⁶ Simón Pedro co ymiñ jac'axam, tim janitigíy jutjoty, chi ijxy je mo'nhuít y'ooxnäy jüby jutjoty. ⁷ E chi ijxy je cöxotz, je huidibi anajty miid ycohuajc yxochity, abicy je' anajty, ca' anajty tú'cay y'ooxnäy miid ymo'nhuít. Y'ijx ajcxy je cöxotz yajxon y'anegyity abicy. ⁸ Huin'it ytigíy jutjoty je jadügpí discípulo huidibi jacjayijp ja't. Chi ijxy, e huin'it mibíjcy co Jesús ñaaxnícx ca' anajty jüby. ⁹ Ca'ni anajty ajcxy yajxon huinjihuíy co anajty jadu'n ycojaayity ma Dios ñecy, co anajty je Cristo yjugypíga'ñ. ¹⁰ Chi je metzpi ajcxy ydiscípulos yhuimbijty ma ytíj.

Jesús nayguéxíci ma María Magdalena

¹¹ E je María jim yhui'míy ma je o'cpi jut ayaaxíp. Chi ayaaxíp yco'ixíy ma je jut. ¹² E chi ijxy metz ángel, poob huit ajcxy ymiid, y'íñaaygíxy jüby ma je Jesús ñaaxnícx anajty yhuijznäy, y'íñaaygíxy tüg cöduy, jadüg tecy íxaay. ¹³ Chi je ángel ajcxy nimay je María:

—¿Miich töxyjäy na'amy co myäxy?

Chi je María y'adzooy:

—Ti ajcxy nHuindzin ñaaxnícx yajnicxi, e ca' nnejhuíyich ma ajcxy ti pidägy.

¹⁴ Jadu'n anajty ymína'ñ, co ñayji'ixi, chi ijxy Jesús ytinäy ma yjix, e ca' íjxcajpy pen Jesús je' anajty. ¹⁵ Chi Jesús ymínañ:

—Töxyjäy, ¿ti co myäxy? ¿Pin m'ixtaayb?

María hue' anajty tíjy je aguemy cuend'ajtpí migapxíp, paady jadu'n ymínañ:

—Huindzin, pen ti myajnicxy Jesús ñaaxnícx, nigapx ma ti mbidägy, e ích nicxy nyajtzooních.

¹⁶ Chi Jesús ymínañ:

—María.

Chi jada' María yhuäg-huimbijty, chi yajxon huindícxpejty, chi nimay:

—¡Raboni! —jada hebreo ayuc yhuimbízimíy Huindzin.

17 Chi Jesús nimay María Magdalena:

—Ca' xyñidooñich, com ca'ni ñich nba'ttigüy ma Dios Teedy yajpaady. Nícx miich ixta' nmigügtijcich, e nima' co nnicxaamich ma Dios Teedy, ñich nDeedy etz miich ajcxy mDeedy, ñich nDios, etz miich ajcxy mDios nañ jadu'n.

18 Chi María Magdalena oy yajnimäy je discípulos ajcxy, chi jadu'n nimay:

—Ti n'ixyich je Huindzin Jesús, e jadu'n yí' ti xycapxymöyich co nyajnimähuibyich miich ajcxy.

Jesús nayguëxici ma ydiscípulos ajcxy

19 Co je huin'it xñmbi chuu'ñy seman ixtigi', aducy anajty tijc'aguu y'ity ma anajty je discípulos ajcxy yajpatcixy, mñid co anajty ajcxy tzigüy je judíojäy ajcxy huídibi anajty midzip'ajtp Jesús. Chi Jesús ytigüy cujc'amy ma je' ajcxy, e chi jada' capxpocxy ajcxy, nimay:

—Jotcugi' miich ajcxy.

20 Yam jadu'n anajty ymina'ñ, chi ajcxy yaj'ijxy je' yci' ma je clavo ytigüy, etz ycaachyjijp ma anajty jäy ti ycumyíi. Chi yjotcugüy ajcxy co ajcxy ijxy je yHuindzin. 21 Chi jada' Jesús jadüg'oc capxpocx, nimay ajcxy:

—Jotcugi' miich ajcxy. Jadu'n nej ñich nDeedy xyquejxyich ya naaxhuiñ, nañ jadu'n ñich miich ajcxy yam nguejxhuäcxy mñid ñich n'ayuc.

22 Co Jesús jadu'n ymina'ñ, chi jada' ajcxy nñbuxujy cöbuxujy nimay:

—Huen Dios yjihu'ñ ymic'ajt xy'adigüy xyjottigüy ajcxy. 23 Huenpinjäyity huídibi miich ajcxy mbocyhuinmeecxyp, nañ ypocyhuinmeecxipy Dios Teedy. Huenpinjäyity huídibi miich ajcxy ca' ypocy mhuinmeecxaani, nañ jadu'n Dios Teedy ca' yí' ypocyhuinmeecxa'ñyíi.

Tomás ymibijc co yHuindzin yjugypijcy

24 Tomás je' huídibi anajty mñid majmetz yca'pxy Jesús ydiscípulos ajcxy, je huídibi anajty yajtijp Dídimó, ca' je' anajty jim choonity co Jesús ymiñ oga'n.

25 Chi je jacjadyíi ajcxy ymigüg ñimaayí:

—Ti ñich ajcxy n'ixy je Huindzin Jesús.

E chi je' y'adzooy:

—Pen ca' n'ixyich ma yí' yci' je clavo'au, e pen ca' ngñhuäxich ngodijyíich ma clavo'au, e ngí' nbídägyich ma ycaachyjijp ma anajty ycumyíty, ca' nmibigipyich co yjanchity.

26 Chi jacoductujc xñ ajcxy jadüg'oc anajty yajpaady tigoty nidüg'óciy je discípulos ajcxy. Tzooñ anajty Tomás nañ jadu'n. Chi Jesús ymiñ. Agüy anajty tijc co Jesús ytinay'ahuñy cujc'amy ma je' ajcxy. Huin'it ycapxpocxy, chi nimay:

—Jotcugi' miich ajcxy.

27 Chi jada' nimay je Tomás:

—Pidäg ya mgñhuäx ma clavo'au ma ngñijich. Najtzxaji' mgi' etz pidäg ma ñich ngaach ma jäy xycumyíich, e mibic yajxon tñydudägy.

28 Chi Tomás y'adzooy:

—Ñich miich nHuindzin'ajtyp etz ñich miich nDios'ajtyp.

29 Chi Jesús Tomás nimay:

—Mñid co miich ti xy'ixyich, paady miich ti mmibicy. Jotcujc yí' ajcxy huídibi ca' xy'ixyich, e ti ymibicy co ti njugypicyich co n'o'gyich.

Jada ayuc ngojaaybich ma jada necy, jigix miich ajcxy mmibigipy co Jesús je' yí' je Cristo, je Dios y'ung

30 Ti anajty Jesús ooy tuñ mijhuinma'ñ ma ydiscípulos ajcxy yhuinduu huídibi ca' ycojaayity ma jadaayaabi necy. 31 Paady ycix jada ngojaayich jigix ajcxy mmibigipy co Jesús je' yí' je Cristo je Dios y'ung. E co miich ajcxy

mmibigipy, huin'it mbaadip jugy'ajtin huidibi ca' tücci'yi ycixipy ytigoyipy müid Jesucristo yxii ycixpi.

21

Jesús ñayguëxigyii ma ydiscípulos ajcxy nihuixtujcpi

¹ Co jadu'n jayijp ytuni yjajti, huin'it jadüg'oc Jesús ñayguëxici ma je' ydiscípulos ajcxy jim ma mejypa', je huidibi anajty xiiip Tiberias mejy. E jadu'n ñayguëxici: ² Jim anajty ajcxy Simón Pedro müid Tomás huidibi jäy ytijyp Dídimó. Nañ jim Natanael huidibi anajty cogajp jim Caná Galilea naaxjot. E nañ jim anajty je Zebedeo ymang ajcxy etz jametz discípulos ajcxy.

³ Chi Simón Pedro ymíñañ:

—Níxcy n'oc'acxmachich.

Chi ymigügtijc ajcxy ymíñañ:

—Tzoc ajt jámim.

Chi ajcxy ytiñiy ma tüg barco. E je huin'it tzuu ca' ni ti ajcxy majch. ⁴ Co yjobiñy jim Jesús anajty ytinäy ma mejypa'. Je' ydiscípulos ajcxy ca' anajty ajcxy nejhuñy co Jesús je' anajty.

⁵ Chi Jesús ymíñañ:

—Migügtijc, ¿nej ca' ajcxy mbaadyñi acxi?

Chi ajcxy y'adzooy:

—Ca' ni ti.

⁶ Chi Jesús ymíñañ:

—Pídaaccix ajcxy je huidibi müid m'acxmajtzcixy aa'oy'amy ma yi barco, e huin'it ajcxy mbaadipy acx.

Chi ajcxy pídacý je acxmadzi'ñ aa'oy'amy, e huin'it janch adzaach ajcxy yajpidzimy, co janch may acx anajty ti ytiñiy. ⁷ Je ymigüg huidibi müid Jesús ooy anajty ñaychogyii, chi nimay Pedro:

—Je' yi', iich ajt nHuindzin.

Co jadu'n midooy Simón Pedro co anajty yjējity je Huindzin Jesús, huin'it yhuít yajtiñiy. Com ti anajty yhuít jeñ, com jadu'n anajty jac'oy ytuñ. Chi ytiñiy mejyjoty huitmüid. ⁸ Jacjadyii ajcxy ymigügtijc yjady ma mejypa' müid je barco, pahuich pajugucy ajcxy je y'acxmadzi'ñ janch ujtz müid acx. Hue' anajty ca' ooy yjiguemyity ma mejypa', jēyi anajty migo'px metro yjiguemyity.

⁹ E co ajcxy ymejch ma mejypa', chi ajcxy ijxy co jim anajty jimbajc y'ity ni'ixi', e jim anajty acx jimbajc nigix huidibi yajtzaayb, e nañ jim anajty tzajcaagy. ¹⁰ Chi Jesús nimay je' ydiscípulos ajcxy:

—Yajmiingix yi acx tñibi ajcxy mmajtzcixy.

¹¹ Chi Simón Pedro ypejty barcojoty, chi yajpidzimy huinditztuum y'acxmadzi'ñ ujtz müid may'acx. Chi ajcxy michoy migo'px jahuixchigi'px majctugüig acx mijatypi, e jadu'n ca' je acxmadzi'ñ yciich müid tzachmay'acx.

¹² Chi Jesús nimay ajcxy:

—Min ajop'ajtcix.

E ni tüg ydiscípulos ajcxy ca' y'amidoohui:

—¿Pín miich?

Com ñejhuñyb anajty ajcxy co je' anajty Huindzin Jesús. ¹³ Chi Jesús ymijhuägy ma je acx ci' etz tzajcaagy anajty y'ity, e chi yajhuäcxy, chi moyday ymigügtijc ajcxy.

¹⁴ E je' je' anajty je midugü'g'ocpi co Jesús ñayguëxici ma je' ydiscípulos ajcxy, huin'it co yjugypijcy co y'o'cy.

Jesús yajni'ixiñy Simón Pedro ti ytuniñy

¹⁵ Co ajcxy y'ajop'ajttay, chi Jesús nimay je Simón Pedro:

—Simón, Jonás y'ung, ¿nej xyjactzojcpich miich, ca'ydi jada jacjadyii ndiscípulo'ichi?

Chi y'adzooy Pedro:

—Huindzin mnejhuuyb miich co ndzojcpich njihuuybich miich.

Chi Jesús nimay:

—Cuend'at ich njäy, jadu'n nej jihuuy borregi cuend'ajtpi yaj'ocy yi' yborregi.

¹⁶ Chi Jesús mimejtz'oc yminañ:

—Simón, Jonás y'ung, ¿nej xychojcpich xyjihuuybich miich?

Chi Simón y'adzooy:

—Huindzin, mnejhuuyb miich co ndzojcpich njihuuybich miich.

Chi Jesús nimay:

—Cuend'ajtigich njäy, jadu'n nej yi borregi cuend'ajtpi cuend'aty yborregi.

¹⁷ Co midugig'ocpi oy y'amidooy:

—Simón, Jonás y'ung, ¿nej xychojcpich xyjihuuybich?

Chi Pedro yjotmaybjcni co midugig'ocpi y'amidoohui: “¿Nej xychojcpich xyjihuuybich?”

Chi Simón yjac'adzooy:

—Huindzin, miich mnejhuuydaayb tüg'óciy, e nañ mnejhuuyb co ich ndzojcp njihuuybich miich.

Chi Jesús jacnimay:

—Cuend'ajtigich njäy, jadu'n nej borregi cuend'ajtpi cuend'aty yborregi.

¹⁸ Janch janch ich miich yam jadu'n nimay: “Co anajty miich mjac'anagnity, ci'm anajty mhuit nayyajñieniyii, e mnicxp anajty ma mdimdzocy. E co mjacmijjähuiipy, huiñ'it mgi' mnajtzxähuiipy, e huingbi mhuit xyajñienihuiipy, e xyajnicxyipy ma anajty ca' mdzocy.”

¹⁹ Co Jesús jadu'n yminañ, chi Pedro yajhuinjihuuy jadu'n nej anajty jäy ajcxy yaj'öga'ñyii mid Jesús y'ayuc ytiy'ajt ycixpi, e nañ ma yi y'o'cin tiy'ajt yegipy co mid Dios ytiy'ajt.

Je discípulo huidibi anajty Jesús ooy tzocy jihuuy

²⁰ Chi Pedro ñayji'ijxi, chi ijxy co anajty tú'ciy anajty ymiingixy je' ydiscípulo huidibi anajty Jesús ooy tzocy jihuuy je huidibi anajty iñaayb huigon ma Jesús ma je mesa co anajty y'adzuu'ajtcixy. Je huidibi nimay je' yHuindzin:

—Huindzin, ¿pin miich yi' xyciyegam ma yi mmidzip? ²¹ Co Pedro ijxy je jadügp discípulo axam Jesús ypanicxyii, chi yminañ:

—Huindzin, e jadaaab miigüg, ¿ti yi' jadaanip?

²² Chi Jesús y'adzooy:

—Co ixypy ndzocyich co yi' huen jugy'aty ixti mabaad nhuimbityich, ca' miich xypaady mnejhuuhuiipy ti yi' jadam. Panicxcich miich.

²³ Paady ycixp huinjihuuy je ymigügtijc ajcxy co je ymigüg huidibi Jesús ooy tzocy jihuuy ca' anajty y'öga'ñ. Per Jesús canan je' anajty jadu'n ytiyyp co ca' y'öga'ñ. Hue' anajty ti ymina'ñ janchtiy:

—Pen ndzojcpich ixypy co jada miigüg yhui'mipy ixti mabaad nhuimbityich, ca' miich xypaady mnejhuuhuiipy ti yi' ytunamy.

²⁴ Je' je' je Jesús ydiscípulo huidibi tiy'ajt yejcp jadu'n nej Jesús ytuñ y'ayoy etz yjajty y'ayoy, e nañ yi' je' huidibi cojay nej Jesús ytuñ y'ayoy, yjajty y'ayoy. E ich ajt nejhuuyim co janch yi' je' tiy'ajt huidibi ti yecy.

²⁵ May ooy tijaty mij huinma'ñ Jesús jactuñ. Co ixypy yajcojaydäy tüg'óciy, ca' yi' naaxhuiñybi ixypy yhuaadüy mid maylibro tzachpidägipy. Jadu'n n'aa'ixiyich.

LOS HECHOS

Jadu'n Nej Jesús Y'ayuccapxhuäcxpi Ytuun Yjajti

¹⁻² Ma je jayjip'atypi necy, migüg Teófilo, ti nyajnijayiy tüg'óciy jadu'n nej Jesús ytuun etz jadu'n nej yaj'ixpijctzondacy oga'n'aty, ixti cooni ypättigiy tzajpjoty. Ca'ni Jesús anajty ypättigiy tzajpjoty co huin'ijxy je' yjáy huídibi yi' y'ayuc ytiy'ajt capxhuäcxib, e chi mïid je Espíritu Santo najztzunïy najtz'ane'mïiy nej huaad ajcxy ytunipy. ³ Co anajty Jesús y'ögy, chi ñayguëxici canaag'oc ma je' ydiscípulos ajcxy, e huixchiguïpx xii ñayquëxigo'ci ma je' ajcxy, yajniquëxigy huädz co anajty yjuugyity, etz nañ yajmïdmïydacy je' yjáy je Dios y'ayuc etz Dios y'ané'min.

⁴ Co anajty jim ijtcixy tügmucy mïid Jesús, chi Jesús je' ydiscípulos ajcxy ane'my co ca' huaad jim choongixy jim Jerusalén. Chi ajcxy nimay:

—Ahuijxcix tiibi Dios nDeedy ahuanïy ma miich ajcxy, je huídibi miich ajcxy nyajmïdmïydägy. ⁵ Janch Juan je Bautista jäy yajniibejt mïid nii, tzojc miich ajcxy xy'adigihuipy xyjottigihuipy yi Espíritu Santo.

Jesús ypättigiyñi tzajpjoty

⁶ Ni'amugï anajty ajcxy jim mïid Jesús, chi ajcxy yajtiy:

—¿Huindzin, nej myajcödïgoyamy je Israeljäy ymidzip jadachambi?

⁷ Chi Jesús y'adzooy:

—Ca' xypaatcixy mnejhuïygyxy je xii je tiempo mina anajty ti yhuaad'ajtni, mina Dios Teedy tuna'ñ tijaty, je' tügpajc mïid cötújcïn tijaty ytunamy. ⁸ Co anajty je Espíritu Santo chinaydacpiy ma ajcxy mjot mhuinma'ñ mbaatcixp mic'ajt. E chi mdzoongixp ayuc capxhuäcxpi mïid ïch ycixpi ya Jerusalén, etz tüg'óciy Judea ñaaxjot, etz jim Samaria, etz huindu'my ñaaxhuiñybi.

⁹ Ti jada ajcxy jadu'n yajnimäy, jim anajty ajcxy yhuindïcxcixy, chi Jesús chajppejtni. Chi miñ joc yeeg huídi Jesús yajnidïgoyday, chi ajcxy ca' oc-jac'ijxni. ¹⁰ Jadu'n anajty ajcxy chachpät'ijxcixy tzajpcixy, co Jesús ypättigiy. Huin'it mejtz yëydijc ñayguëxici ma je' ajcxy ymïjc, poob huit mïid, ¹¹ chi ajcxy ñimaayi:

—Galilea jäy ajcxy, ¿nej co mdzachpät'ijxcixy tzajpcixy? Yi Jesús huídibi ti chajppety, ti choon ma miich ajcxy, minaamb jadüg'oc jadu'n nej ti m'ijxcixy co ti ypättigiy.

Matías yajhuin'ijxy co Judas ytung jïjptunïyipy

¹² Huin'it Jesús ydiscípulos ajcxy chooni ma je cögop huídi xiiïp Olivos, yhuimbïjtcixni jim Jerusalén, ca' ooy yjiguëgyity, jëbi yajyöy sábado xii, jadu'n nej Moisés ycötújcïn y'ane'my. ¹³ Co ajcxy yja'ty ma je cajp, chi ajcxy ypejty ma je cuarto mimetz nihuijtzpetypi ma ajcxy anajty mïidity yjättac. Jim yi' anajty ajcxy: Pedro, Jacobo, Juan, Andrés, Felipe, Tomás, Bartolomé, Mateo, Alfeo ymang Jacobo, Simón je Zelote etz Judas Jacobo ymïguëx. ¹⁴ Tüg'óciy anajty ajcxy y'ijtcixy tügmucy Dios mïbijctzoogixy chajpcapxycapxcixy. Ymïid ajcxy anajty Jesús y'uch etz María Jesús ytaj, etz jacjadyii töxyjäydijc.

¹⁵ Huin'it xii Pedro ytïnayigy agujc'amy ma je ymïgügtijc ajcxy huídibi yajmïj'ajtp Jesús, huídi anajty ajcxy naybaatip mïgo'px ja'ïipxti jäy, chi nimay ajcxy:

¹⁶ —Mïgügtijc, copicy co jada yajcuydünipy nej Dios yminañ ma ñecy huídi jaybety ijtp, ma David jaay Dios y'ayuc, ma Dios nigapxy Judas. Je'huídi coduu'ajt taabi je judíojäy ajcxy majch Jesús. ¹⁷ Je Judas yaj'amichomujcp

je' anajty m̄id ñich ajt, paatip anajty Dios ytung tú'ciy m̄id ñich ajt. ¹⁸ Chi Judas ñicxy juy t̄ug naax m̄id je muju'ñ huidibi anajty ti paady m̄id yjibic-huinma'ñ. Chi jim mic'amy ycäy tzuxcödeefñ, chi ytopxy ymooxac, e chi ytiinch ypidzimday. ¹⁹ Je jäy ajcxy huidibi anajty tzinaayb jim Jerusalén, co nejhuiy, chi ajcxy yximoy je naax Acéldama, hue' je' yhuimbizimy ma je' ajcxy ayuc, ni'py ñaaxjot. ²⁰ Jada je' je ayuc huidibi David yjaay ma je Salmo necy:

Hui'mip najtz'ixiy yi' chinaaydac. E ca' pin yajtunipy.

Nañ jadu'n ym̄ina'ñ:

Huingbi huen yajnicxyii je' ytung.

²¹⁻²² Copicy co t̄ug yēydijc huidibi m̄id ti yhuidity nHuindzin Jesús quipxyi m̄id ñich ajt, huen tunipy je tung huidibi Judas anajty ytumyb, maab Juan yajniibety ixti taabi xypuyöduutim co pättigiy tzajpjot, t̄ug jēbi testig'aty m̄id ñich ajt co Jesús yjugypijcy.

²³ Chi Jesús ydiscípulos ajcxy huin'ijxy mejtz jäy: t̄ug jäy huidi anajty yxi José, huidi yxi anajty yajtijy Barsabás etz nañ jadu'n anajty yajtijy Justo. E huin'ijxy ajcxy nañ jadu'n Matías. ²⁴⁻²⁵ Chi Jesús ydiscípulos ajcxy Dios mibijctzoy, ym̄inañ ajcxy:

—Huindzin Dios, m'ijxyp mnejhuñyb t̄ug'óciy jäy yjot yhuinma'ñ, yajni'ixiygich jada metzpi jäy huidibi miich nidügti ti nhuin'ixy, je huidibi jēbi jijptigiyi miich mdung tú'ciy m̄id ñich ajcxy, etz huidibi apóstol'adip. Huen jada jäy jijptigiyi je tung huidibi Judas ti yajtigooy, co ytundigooy e ñicxy ma ypaadyii.

²⁶ Chi ajcxy suerte ijxy, e je suerte ñibizimni je Matías. E huin'ítiy je Matías oy ym̄icho'ndigiy ma je nimajtügpi ajcxy huidi ycapxhuäcxy Jesús y'ayuc.

2

Co je Espíritu Santo ycidacy choñ tzajpjoty

¹ Co oy je Pentecostés xi paady, jim anajty Jesús ydiscípulos ajcxy ni'amugi' tú'ciy ijtcixy. ² Huin'it janch timitiini yajmidoy t̄ug ne'min, choñ tzajpjoty, jadu'n nej poj micpi. Chi yaj'ujtzaay je tigot ma anajty iñaaygixy. ³ Chi nigidaaci nidüg nidügti toodz jadu'n nej jinye'n. ⁴ Chi je Espíritu Santo nidüg nidügti ajcxy y'adigiyi yjottigiyi. Chi ytigiyixni capxy miydaacp nije' nije' ayuc jadu'n nej je Espíritu ajcxy yajcapxyii.

⁵ Jim Jerusalén anajty je huin'it xi may judíojäy ajcxy huidibi tzoomb canaag agajp. Hue' ajcxy chachcuydumb judíojäy ycostumbre. ⁶ Co je cajpjäy ajcxy midooy je ne'min, chi ajcxy ooy yöymujcy. Chi je mayjäy ooy yhuinmay'ahuidijty, co ajcxy midooy chachcapxcixy chachmiydaaccixy ma yci'm'ayuc. ⁷ Je mayjäy ajcxy ooy chigiyi jihuñy, chi ajcxy ñayñimaayi miñ xyipy:

—Ix ¿nej cay Galilea jäy jada ajcxy nidüg'óciy huidibi jadu'n tzachcapxcixy tzachmiydaaccixy ñich ajt ngi'm'ayuc? ⁸ ¿Nej ñich ajt co nmido'mbójcim co tzachmiydaaccixy ñich ajt n'ayuc huidibi ti nmibi'c'ájtım? ⁹ Ya anajty ajcxy Partia jäy, Media jäy, Elam jäy, Mesopotamia jäy, Judea jäy, Capadocia jäy, Ponto jäy, etz cham huidi tzinaayb ajcxy jim Asia ñaaxjot, ¹⁰ etz huidibi ajcxy tzoomb jim Frigia, etz Panfilia, huidibi tzoomb jim Egipto, etz huidibi tzoomb jim ma yi Africa ñaaxjot Cirene ninaxy. Nañ jadu'n jim romanojäy huidibi ya adzinaayb. May ajcxy jim huidibi judíojäy etz nijējity huidibi ca' yjudíojäyity huidibi judíojäy ycostumbre ajcxy ti yjijptigiyi. ¹¹ Ya nañ jadu'n Creta jäy etz Arabia jäy; e ñich ajt t̄ug'óciy nmidoohuim jada jäy ajcxy nigapxcixy nimiydaaccixy huidi Dios ti tuñ mijcajee ma ñich ajt ngi'm'ayuc.

12 Nidüg'óciy ajcxy ooy jihuïy, e chi ajcxy ooy yhuinmay'ahuidijty, miñ xyipy ñay'amidóohuigixy:

—¿Nej jada yhuimbidzima'ñ?

13 E nijéjity jáy jëyi nixigy yajxigy, ymínaangixy:

—Muucip jada yi' ajcxy.

Pedro yaj'ixpijcy je mayjäy

14 Huin'it Pedro ytinayigy müd je nimajctügpí apóstoles, e ytiigi capxpi mic ymínañ:

—Yëydijctijc ajcxy huídibi tzínaayb Judea etz tüg'óciy huídibi tzínaayb ya Jerusalén, nejhuíhuipy miich ajcxy jada e midou ajcxy yajxon huídibi ajcxy nyajnimáhuamyb. 15 Jada jáy ajcxy ca' ajcxy ymügyii jadu'n nej miich ajcxy mínaangixy. Tim petyxiini jada cham. 16 Jada je' huídibi ñigapxy je Joel, Dios y'ayuc najtzcaxhiybi, co jadu'n mínañ:

17 Je huin'it xii mína anajty je naaxhuiñybi cixa'ñ, jadu'n Dios mínañ, nya-jhuäcxtáhuibich je nEspíritu ma tüg'óciy naaxhuiñyjáy. Miich mnix etz mmang ajcxy capxhuäcxip ich n'ayuc ndiy'ajt, e je yujcyeecpidijc ajcxy yhuin'ixipy ooy mijhuinma'ñ, e je mijjäydijc cumáhuipy ajcxy.

18 Nyajhuäcxtáhuip ich je nEspíritu huin'it xii ma ich ndumbi yëydijcpi töxyjäybi, e yi' ajcxy capxhuäcxip ich n'ayuc ndiy'ajt.

19 Nyajquëxigibich tzajpcíxy huídijaty oy chigüyñi, e ya naaxhuiñ nyegipyich tiy'ajt: ni'py, jin etz jinjoc.

20 Yi xii ahuimbidipy coodz, etz je po' ahuimbidipy nej ni'py, ma anajty ca' miñ je xii je tiempo mína anajty mínañ je Huindzin Dios. Mij ayo'n ji tunaanip jadaanip iixna' quëxna'.

21 E tüg'óciy jáy huídi míyaaxp ojadajtp je Huindzin Dios, Dios ajcxy yajnidzögüib y'alma.

22 Chi Pedro yjacmínañ:

—Amido'ijtcix, miich judíojäy ajcxy, jadu'n nej cham nmína'na'ñich. Je Jesús huídibi tsoon jim Nazaret ti xyaj'ijxcixy Dios ymic'ajt, mijhuinma'ñ, etz ijxpejt, jadu'n nej miich ajcxy ti m'ijxcixy ti mnejhuüygixy. 23 Jada yajcyejic ma miich ajcxy, jadu'n nej anajty Dios ti yajnigödugiy, e ti huinmay. Ajcxy mmajch je Jesús e myaj'ögy ajcxy, chi ajcxy myajcruudzpejty müd jibic jäydijc y'ané'min. 24 Chi Dios yajjugypijcy yajnihuädzictuty ma yi ó'cin, ca' huaad yhui'my ögy huinixii. 25 Je David ñimiydac Jesús chi ymínañ:

Nejhuüybich co je nHuindzin Dios y'ity ma ich nhuinduu. Yi' ijt ma ich n'a'oy, jigix ca'ydi pin xy'adzigi'yich xyajhuinma'ñyidigooyich.

26 Paady ti njotcugiyich, e ti ngapxypidzimyich co ooy njotcujcich. Paady co oy n'ögibich etz ninicx ñaaxtigihuipy, ca' ndajy mayich.

27 Co miich Dios ca' myajhui'ma'ñ ich n'alma ma ñaaxtigiydac. Ni mga'aa'ixihuipy, co miich mdumbi huídibi ooy mdzocy, co nicxy ñinicx ñaaxhuindigoydäy.

28 Miich Dios, ti xyajni'ixiyich yi tzínaayin huídibi ymüd jugy'ájtin huinixibi. Xyajjotcugihuibich müd co xymüd'idipyich.

29 Chi Pedro yjacmínañ:

—Migügtijc ajcxy, huädz miich mnejhuüygixy co ich ajt nmij'ap David y'o'cy etz yajnaaxtigüiyi. E ma ñaaxtigüiy nmüdni jë'ajt chambaad. 30 Je David hue' je' anajty Dios y'ayuc ñajtzcaxhiybi, e ñejhuüyb anajty co ti Dios yajnimäyii huídibi ca' y'anijity. David ñejhuüyb anajty co ma y'ap y'oc ma'xung'adipy Cristo, jaydëbi ané'mipy ma David y'ane'mdac. 31 Jadu'n co David jecy'ajty huinjihuüy e nejhuüy etz nigapxy jadu'n nej yjugypiga'ñ je

Cristo co anajty ti y'ögy. E ymínañ co ca' yí' y'alma yhuí'mípy jutjoty etz ñinícx ca' ypüdzípy. ³² Dios yajjugypíjcy je Jesús co y'o'cy. Jada tıy'ajt ích ajcxy nidüg'óciy nidıy'ajt'ajtpy. ³³ Jadu'n Dios Jesús mooy mıj'ajt jıby tzajpjoty, chí yajcıdıgııy je Espıritu Santo huıdıbı Dios Teedy y'ahuanııy e tüg'óciy huıdıbı mııch ajcxy tí m'ıjxcıxy tí mmıdoogıxy jıby yı' chooñ ma yı'. ³⁴ Com David ca' je' chajppejty, je David cí'm ymınañ:

Je Huındzın Dios nımay ích nHuındzın: “Íña' ma ích a'oy'amy,

³⁵ ıxtı coonı nmımadactáhuıbıch yı mmıdzip, jadu'n anajty nıpaady nej jıhuıy mdecypocxpejt'adyıı.”

³⁶ Chi Pedro yjacmınañ:

—Ñejhuıhuıpy nidüg'óciy yı Israel jäy ajcxy co janch janch co je Jesús huıdıbı mııch ajcxy myajcruudzpejt, Dios yajnıbıjc co yhuındzın'adıpy ma mııch ajcxy, etz Cristo huıdıbı xyñıhua'nıpy xyajtzögıpy ajcxy.

³⁷ Co je mayjäy ajcxy jadu'n mıdoy, chí ajcxy yjotyungıy, e amıdoy ajcxy je Pedro etz jacjadyıı jäy huıdı Jesús y'ayuc capxhuäcxı anajty, chí ajcxy ymınañ:

—Mıgügtıjc, ¿tı ích ajcxy jėbı huaad nduñ?

³⁸ Huın'ıt Pedro y'adzooy:

—Jothuımbıjtcıx e nıbejtcıx nidüg nidüg mıd Jesucristo yxıı, jıgıx Dios mııch ajcxy mbocy xyhuınmeecxıpy. E jadu'n Dios xymöhııpy je Espıritu Santo. ³⁹ Huıdıbı Dios y'ahuanııy mııch yı' ajcxy mje' etz m'ung ajcxy, etz m'ap m'oc ajcxy, etz nañ jadu'n je jäy ajcxy huıdı jıguémıp, etz jacjadyıı jäy ajcxy huıdı Dios huın'ıxamy.

⁴⁰ Mıd jadyaab ayuc etz jacjadyıı ayuc Pedro yajnımay capxhuııy je mayjäy ymınañ:

—Ca' mmıjıpıdaaccıx je jäy ajcxy y'ayuc huıdıbı ca' capxymıdoy Dios.

⁴¹ Jadu'n yjajtı, je jäy ajcxy huıdıjaty mıbıjc Pedro y'ayuc, chí ajcxy ñıbejtıay huın'ıt xıı. Ñımayıy ajcxy huıdıbı mıjıpıdac Jesús y'ayuc oy nidugıg mildı jäy. ⁴² Tüg'óciy ajcxy anajty panıxcıxy yı ıxpıjcn jadu'n nej yı Jesús y'apóstoles ajcxy yaj'ıxpıjcy. Chınaaygıxy yquipxyjot yquipxyhuınma'ñ. Etz Dios mıbıjctzoogıxy e ñayyöymıjcgıxy co anajty ajcxy chajcaagy tıjc-huäcxaangıxy.

Jadu'n nej je mıbıjıpıdıjc chınaaygıxy jugy'ajtcıxy

⁴³ Nıdüg'óciy ajcxy anajty ooy mıjcajee jıhuıy. E Jesús y'apóstoles ajcxy ıjxpejt etz mıjhuınma'ñ ooy anajty tungıxy. ⁴⁴ Nıdüg'óciy je jäy ajcxy huıdıbı anajty tí ymıbıjccıxy ıjtp anajty ajcxy tüg mucy, e yajhuäcxcıxy tıjaty ajcxy anajty ymıd, mooygıxy ymıgügtıjc. ⁴⁵ Ytoocpy anajty ajcxy yı' ypidägy huıdıbı anajty ymıd, e chí anajty yajhuäcxcıxy yı meen nıje' nıje' nej pın tí yajmayjaty. ⁴⁶ Jabom jabom anajty ajcxy ñayyöymugyıı ma Dios ytıjc, etz nañ ñayyöymugyıı ajcxy ma ytıjc tzajcaagy tıjc-huäcxcıxy etz ycaaygıxy y'uuccıxy nı'amugı' jotcujc mıd ajcxy y'oyjot y'oyhuınma'ñ. ⁴⁷ Ñı'ıgıxy nıyaaxcıxy yı Dios, e tüg'óciy jäy nayyajmıj'ájtıp anajty ajcxy. Chí je Huındzın Dios yajmayıy jabom jabom yı mıbıjıpıdıjc, yı' huıdıbı anajty patp nıdzoocın.

3

Tüg tecyma'tpı chögy

¹ Tüg xıı Pedro etz Juan ypättıgıy ajcxy tú'cıy ma Dios ytıjc, mıjminacy xıı anajty, je' je' anajty je horı mına ajcxy Dios mıbıjctzoogıxy. ² Jabom jabom anajty jäy yajnıxcıxy ma je Dios ytıjc'aguu tüg tecyma'tpı, jadu'n je' anajty tí yma'xung'aty. Chí ajcxy pıdägy je tecyma'tpı ma je Dios ytıjc'aguu huıdı anajty yxıı la Hermosa, jıgıx jım pıjctzohııpy meen ma je jäy ajcxy huıdıbı tıgıyb ma

Dios ytijc. ³ Co je jäy tecyma'tpi ijxy Pedro etz Juan ytiġhũaangixy anajty ma Dios ytijc, chi pijctzoy meeñ. ⁴ Co Pedro etz Juan ijxy je tecyma'tpi, chi Pedro ymĩnañ:

—Huindicxpejtcich.

⁵ Chi je jäy huindicxpejty, yijp'ijxpy anajty ti möhuaanip. ⁶ Chi Pedro je tecyma'tpi nimay:

—Ca' nmĩdidyich plata, oori, huidibi janchtiy nmĩdich je' nmöhuip. Mĩd Jesucristo je Nazaretpi ymic'ajt iich miich nimaayb: Tinaayġ etz yöy.

⁷ Huin'it Pedro majch je tecyma'tpi ma a'oygi', e yajtinaygugiiy. Huin'itiy y'oyiiy ymicpijcy je ytecy etz ytecyöy. ⁸ Chi je tecyma'tpi ytinaygugiiy etz chi ñajztibiiy. Chi jada' yöychoñ e ytiġiiy ma Dios ytijc mĩd Pedro etz Juan yöyñip ñidijcni yujtjicni, yam Dios ooy jäymech. ⁹ Tüg'óciy je mayjäy ijxy co anajty yöyñip etz jäymech yi Dios. ¹⁰ Je jäy ajcxy y'ijxy'ajtpy anajty ajcxy je tecyma'tpi e ñejhuuygixyp co je' anajty je' huidibi pijtzohuo'cp pi'c meeñ ma Dios ytijc'aguu huidi anajty yxi la Hermosa. Paady je jäy ajcxy ooy chigiiy jihuuy, co ajcxy ijxy nej anajty yam ti ytunyii ti yjadyii.

Pedro nimiydacy nej anajty je tecyma't ti chögy

¹¹ Je tecyma'tpi huidibi anajty ti chögy ca' anajty ixmach Pedro etz Juan, e tüg'óciy yi jäy anajty ooy jihuuygixy huinmaaygixy. Chi mic'amy mayjäy nimujcy Pedro etz Juan jim ma yi Dios ytijc huinduu huidibi jäy ytijpy Salomón. ¹² Pedro co jadu'n ijxy je mayjay, chi ymĩnañ:

—Judío yeydijctijc, ¿nej co mdzachhuinmaaygixy mijcajee? ¿Nej co iich miich ajcxy xychachhuindicxciy jadu'n nej jihuuy iich ajcxy jada jäy ti nyajtzögyich ti nyajyöychoñich mĩd ngĩmmic'ajtich, o mĩd co iich ajcxy ooy nDios'ojadaty? ¹³ Ich'ajt nDios, je Dios huidi nmij'ap nmijteedy, je Abraham, je Isaac, etz je Jacob y'ojadajt, yi' ti yajtzögy jada tecyma'tpi, jigix yajcömayipy yi' y'ung Jesús huidibi miich ajcxy mgĩyejc ma je tungmĩdipi. E co je gobernador Pilato je' najtzmazdihua'ñ, miich ajcxy ca' m'aa'axiiy. ¹⁴ Ma yjapadyii ajcxy mgapijctzoy co huen yajnajtzmazdiiy, je huidi anajty yajpaatp huadz etz tudägy, chi miich ajcxy mbijctzoy co huen yajnajtzmazdiiy tüg jäy huidibi anajty ti yjäyyaj'o'cy. ¹⁵ Jadu'n je jäy ajcxy yaj'o'cy je' huidibi anajty jugy'ajt yejcp. Je huidibi Dios yajjugypijcy ma anajty ti y'ögy e jada tiy'ajt iich ajcxy nidiy'ajt'ajtpyich. ¹⁶ Mĩd co ti mibicy Jesús yxi, je mijhuinma'ñ huidibi Jesús ymic'ajt ti tuñ mĩd jada pa'mjäy huidibi miich ajcxy m'ijxyp mnejhuuyb. Com ti mibicy Jesús paady ti chögy janch yajxondicni, jadu'n nej miich ajcxy nidüg'óciy ti m'ijxcixy.

¹⁷ Chi Pedro yjacmĩnañ:

—Nmĩgügtjicich, nejhuuybich co miich ajcxy etz mhuidzindijc yaj'o'cy Jesús, mĩd co anajty mganejhuuygixy ti anajty ajcxy mduungixy. ¹⁸ Jadu'n cham Dios ti cuyduñ jadu'n nej Dios y'ayucnajtzcaxiiybi ymĩnañ co copicy co yi Cristo yajnaxipy ayo'n. ¹⁹ Paady játyim jothuimbijtcix miich ajcxy ma Dios, jigix ajcxy mbocy yajjötztähuipy. Huin'it je Huindzin Dios xyajniguexipy ajcxy jotcuyc'ajtĩn huinixii, ²⁰ e yi' quexamb je Jesús, je Cristo, je huidibi Dios jayijp'aty yhuin'ijx co quexañ ma miich ajcxy. ²¹ Oy jadachambi Jesucristo y'oc-huí'mipy jiiyby tzajpjoty ixti cooni Dios anajty yaj'oyiydäy tijaty, co jadu'n yjaay yi' y'ayucnajtzcaxiiybi huidibi mĩd huadz yjot yhuinma'ñ huidibi ajcxy jecy'ajty tzĩnay. ²² Jadu'n Moisés nimay iich ajt nmij'ap nmijteedy jecy'ajty: “Je Huindzin Dios xyajniguexaan miich ajcxy tüg yi' y'ayucnajtzcaxiiybi, huidibi pidzimamyb ma miich ajcxy mjuugy mmĩgüg jadu'n nej iich yi' xyguejxy. M'amido'idipy miich ajcxy yi' y'ayuc.

²³ Jadu'n yjadipy co tög'óciy jäy huidibi anajty ca' capxymidooy je Dios y'ayucnajtzcapxiybi, huádz ajcxy ytigoydähuiipy, e tög jibicy ajcxy idipy ma judíojäy ajcxy yajpaady."

²⁴ Chi Pedro yjacmíñ:

—Jadu'n jada tög'óciy Dios y'ayucnajtzcapxiybi, chondacy ma Samuel ixti ma jacjadyiini ajcxy, ñigapxtay ajcxy jadu'n nej cham ytuñyii yjadyii. ²⁵ Yi Dios y'ayucnajtzcapxiybi ajcxy, miich je' anajty ajcxy mmij'ap mmijteedy. E je ayuc huidibi Dios yajnimay Abraham ycuydunaamyb mñid miich ajcxy co jadu'n ymíñ: "Ngonúucxibich tög'óciy naaxhuiñjyay mñid tög miich m'ap m'oc." ²⁶ Co Dios y'ung y'o'cy, chi Dios yajjugypicy jadüg'oc, e quejxy jayijp ma miich ajcxy, jigix xyconúucxixipy, etz jigix nidüg'óciy miich ajcxy m'ixmadzipy yi mjibichuinma'ñ.

4

Pedro etz Juan ma tungmñdipi yhuinduu

¹ Pedro etz Juan jimni anajty tzachmñdmíydaaccixy je mayjäy ajcxy, co oy miingixy je judío teedy ajcxy, mñid je soldado huindzin, je tzajptijc cuend'ajtpi etz mñid saduceojäy. ² Ooy ajcxy anajty yjotmätcixy co Pedro etz Juan yaj'ixpijccixy anajty je mayjäy etz nimaaygixy co yi öcpi jugypigipy yi' ajcxy, com co Jesús yjugypicy co y'o'cy. ³ Chi je tungmñdipi ajcxy majch Pedro etz Juan, e chi ajcxy pidacy pujxtigoty ixti com jabomni, com ti anajty chu'ññ. ⁴ Mayjäy ajcxy huidibi anajty ti amido'ijtcixy je Pedro y'ayuc ymibijc ajcxy. E hue' je mibijcpidijc, ac yëydijctijcpi, yajmichomujcy jahueen ycamigoox míity.

⁵ Je com jabom ajcxy ñaymújcci jim Jerusalén judíojäy tungmñdipi, je mijjäydijc etz yi escribas. ⁶ Nañ jadu'n jim anajty Anás huidibi anajty ane'mb je teedy ajcxy, etz je Caifás, je Juan, je Alejandro, etz tög'óciy teedy mijtungmñdipi yjugymigüg. ⁷ Chi ajcxy pidacy Pedro etz Juan cujc'amy ma anajty ajcxy ñaymugyii, chi ajcxy y'amidooy:

—¿Pín miich ajcxy ti xymöy cötujcín co jada jadu'n ti mdungixy?

⁸ Huin'it Pedro ymñid anajty Espíritu Santo ma yjot yhuinma'ñ, chi ymíñ:

—Miich ajcxy tungmñdipi etz judíojäy mijjäydijc, ⁹ yi' ñich miich ajcxy cham xyaj'amidoob yi oybi tiibi yajtuñ ma tög pa'mjäy e nejhuñhuaangixy nej ti chögy. ¹⁰ Cham nimíydactäyich ma miich ajcxy mhuinduu, jaydëbi ajcxy nejhuñdähuiipy tög'óciy judíojäy, co jadayaabi jäy huidibi anajty tecyma'tpi, cham yajpaady ya ma miich ajcxy mhuinduu mic oy, mñid je mic'ajt huidibi Jesucristo je Nazaretpi yejcpy, je jäy huidibi miich ajcxy myajcruudzpejt, huidibi Dios yajjugypijc co y'o'cy. ¹¹ Yi Jesús jadu'n nipaady nej tög tzaa oybi, huidibi ajcxy potzpidijc, ca' yajtúngixy co ytijcojcxixy. Jesús cham ti paady mijtung ma Dios, jadu'n yi' ni paady nej tög mij tzaa huidibi ytungbaatp ma poch ytaatz. ¹² Ca' jac ni pín huidibi jëbi xyajñidzoocím ajt n'alma. Jesucristo yi' je' tögpaic huidibi Dios yejc ma jäy ya naaxhuiñ huidibi jëbi xyajñidzoocím ajt n'alma.

¹³ Co je mijtungmñdipi ajcxy ijxy midoy jadu'n nej Pedro etz Juan ajcxy huinmic jotmic ycapxcixy, etz nejhuñy co ca' ajcxy y'ixpijcyjäyity, chi ajcxy ooy jihuiy huinmay. Nañ yi' ijxajp ajcxy co je' anajty huidibi ajcxy ti mñid huidity Jesús. ¹⁴ Cha co yjactimjimíty anajty je jäy huidibi anajty ti chögy ytinäy mñid Pedro etz Juan, paady ajcxy ca'ajty nej midziptzoonipy. ¹⁵ Chi je tungmñdipi ni'ane'mdiy huen yajpidzimyii Pedro etz Juan ma je mayjäy anajty ñaymugyii, jigix ac jëyi tungmñdipidijc ñiyöyaangixy capxyöyaangixy Pedro etz Juan ypocy.

¹⁶ Chi ajcxy ymíñ:

—¿Ti cham nduunim miid yjiibi jäy ajcxy? Com tüg'óciy jäy huídibi tzinaayb ya Jerusalén ñejhuiyb ajcxy co ti túngixy mijhuinma'ñ, e ca' huaad ñich ajt nmínaaním co ca' yjanchity. ¹⁷ Tzoc capx'adujcim co ca' huaad ajcxy jacnimíydägiipy Jesús jadachambi etz jancixpi xi tiempo.

¹⁸ Chi ajcxy mijhuoy Pedro etz Juan, chi ajcxy nimay co ca' huaad ajcxy ni nej ocnimíydaacnip, ni ca' jacyaj'ixpiğiipy miid Jesús yxii. ¹⁹ Huin'it Pedro etz Juan y'adzooy:

—Huinmaaygiix miich ajcxy ci'm pen tiy'ajt jada ma Dios co ñich miich ajcxy ngapxycöbigiipy jayijp, ca'ydi yi Dios. ²⁰ Com ñich ajcxy ca' nni'amonaangixy jadu'n nej ñich ajcxy ti n'ixy ti nmídooy.

²¹ Huin'it je tungmiidpi ajcxy adzigi'ñ miigapxy Pedro etz Juan, e najtzmazhiy ajcxy. Ca' ajcxy mihuinma'ñybaty nej tzaachytunipy Pedro etz Juan. Com tüg'óciy jäy yjäymejchpy ycömaayb anajty yi Dios jadu'n nej anajty ti ytuñyii ti yjadyii. ²² Je jäy tecyma'tpi huídibi tzooc co Dios mijhuinma'ñ ytuñ, ymiid anajty yjimijt huixchiğiipx naxy.

Je mibijcpidijc ajcxy pijctzoogixy ma Dios jotmic'ajt

²³ Chi Pedro etz Juan co yajnajtzmazhiy, chi ajcxy ñicxy ma ymiigügtijc anajty, yajmiidmiydactay tüg'óciy jadu'n nej teedy huindzin etz mijjäydijc anajty ti ñimáayigixy. ²⁴ Co jada ayuc ajcxy midoy nidüg'óciy ajcxy tú'ciy yjot yhuinma'ñ pidacy, chi ajcxy Dios mibijctzoy yminañ ajcxy:

—Huindzin Dios, miich je' ti m'oyduñ je tzajp, je naaxhuiñybi, je mejy etz tüg'óciy tijaty. ²⁵ Miich miid mEspíritu je David myajcapxy, e yi' jadu'n yminañ:

¿Nej co jada naaxhuiñybi jäy chachhuaangixy chachjihuiyigixy, e yi jäy ajcxy huinmaaygiixy huídibi ca' ytimytiijity?

²⁶ Yi reydiyc ya naaxhuiñybi midziptzoñ ajcxy yi Dios. Etz je tungmiidpi cajp cajp ñaymujci ajcxy, midziptzoñ ajcxy Huindzin Dios, etz midziptzoñ ajcxy Cristo.

²⁷ Com janch co je rey Herodes etz yi gobernador Poncio Pilato ñaymujci ya ma jada cajp miid huídibi ca' yjudíojäyity ajcxy etz miid judíojäy ajcxy, midziptzoñ ajcxy yi m'ung Jesús huídi anajty ti mhuin'ixy. ²⁸ Yi' ajcxy ti cuydungixy tüg'óciy jadu'n nej miich, Huindzin Dios, ti myajnigödugiy jadu'n nej ytuníyb yjadíyb. ²⁹ Jadachambi Huindzin Dios, ix jadu'n nej yi tungmiitpi xychachmijotmá'tcixyich. Mo' yi mdumbi ajcxy jotmic'ájtín, jigix m'ayuc ajcxy capxhuäcxipy amic jotmic, ³⁰ e miid miich mmic'ájtín chögipy pa'mjäydijc, tunipy ajcxy tijaty ijxpejt etz mijhuinma'ñ miid yi m'ung Jesús yxii, huídibi miid huädz yjot yhuinma'ñ.

³¹ Co ajcxy mibijctzoday, chi je naax chuyuuy ma anajty ajcxy tügmucy yajpaatcixy, etz nidüg'óciy yi' ajcxy ymic'ajt mooyi je Espíritu Santo, e yi Dios y'ayuc capxhuäcxixy anajty amic jotmic.

Je mibijcpidijc tú'ciy anajty ajcxy yjot yhuinma'ñ

³² Je mayjäy huídibi anajty ti mibicy, tú'ciy ajcxy yjot yhuinma'ñ. Ni pin anajty ycaminañ co naydüg jé'adyii. Hue' anajty yminaangixy co tú'ciy jé'ájtigixy. ³³ Je majmetzpi Jesús y'ayuccapxhuäcxipi amic jotmic capxhuäcxy je tiy'ajt jadu'n nej je Huindzin Jesús yjugypijcy co y'o'cy. E mij ajcxy Dios ypubejti. ³⁴ Ma je' ajcxy ca' ni ti yajmayajtcixy, com tüg'óciy tijaty anajty ajcxy ymiid ñaax o ytiyc ytoocpy anajty ajcxy, e yejccixy anajty meeñ. ³⁵ Chi je meeñ yajcidigiyigixy je apóstoles ajcxy e yi' ajcxy moy nidüg nidüg pinjaty yajmayajtp. ³⁶ Jim anajty miid je' ajcxy tüg levita jäy huídi anajty yxii José, huídibi ma'xung'ajt ma yi ñaaxjot mejy agujc huídibi yxii Chipre, je huídibi je

majmetzpi Jesús y'ayuccapxhuäcxpi, yxii moy Bernabé, huídibi huimbídzim je yajjotcujc'ajtpi. ³⁷ Je Bernabé tocy ytundac huídibi anajty ymíid, e chi míimíiñ je meeñ, e yajcídigi'y je apóstoles ajcxy.

5

Je Ananías etz Safira ajcxy Dios midundigoy

¹ Chi jadüg yëydijc, huídi anajty yxii Ananías, míid ytöxyijc, Safira, toogy ajcxy tüg it ytundac. ² Ananías ñayyajnihui'mi jac'anaxy je meeñ, e yajninicxy Jesús y'apóstoles ajcxy je jac-hueenip, jadu'n nej jihuüy yejctay tüg'óciy, etz yí' ytöxyijc ñejhuüyab anajty. ³ Chi Pedro ñimay Ananías:

—Ananías, ¿nej co myajtuñ je mujcu' yhuinma'ñ, e mhuin'ina'ñ je Espíritu Santo, e ti mbugoñ jac'anaxypí meeñ nej ti tzoo'adyii yí pidägy tiibi mdoogy? ⁴ ¿Nej ca' anajty yí' miich mdundac'adyii? E co ti mdoogy, ¿nej ca' anajty je' miich mmeñ'adyii? ¿Nej co jadu'n ti mdundigooy? Dios ti mhuin'ina'ñ, canan jäy.

⁵ Co jadu'n midoy, jíimiyi Ananías yciday, e chi y'o'cy. E tüg'óciy jäy ajcxy huídijaty nejhuiy, ooy ajcxy chigiiy. ⁶ Huin'it ymíiñ jadyii yujcyeecpidijc, chi ajcxy mo'ñ Ananías ñinícx, e oy ajcxy yajnaaxtigíy.

⁷ Codugíig hori naxy, oy ytigíy je Ananías ytöxyijc, e ni ca' nejhuiy anajty ti ti ytuñyíi ti yjadyii je ñäy. ⁸ Pedro y'amídoohui:

—Yajnímaaygíich, ¿nej janch jadu'n ti mdoocixy yí mdundac jadu'n nej ti mgapxcixy?

Chi je töxyjäy y'adzooy:

—Janch jadu'n ti ndoogyíich.

⁹ Chi Pedro ymíinañ:

—¿Nej co ti mnaygápzigixy mhuin'ina'ñ yí Espíritu Santo? Cha ma tijc'aguu je jäy ajcxy ytinäy huídi oy ti yajnaaxtigíy mñäy, e jadachambi miich ajcxy xyajnicxaam nañ jadu'n.

¹⁰ Tim huin'itíy Ananías ytöxijc yciday, e chi y'o'cy. E chi oy ycidägy ma Pedro ytecymijc. Co je yujcyeecpidijc ytigíy, chi ajcxy je' paaty ögy. Chi ajcxy yajpidzimy etz oy yajnaaxtigíy ma ñäy ymijc. ¹¹ Chi tüg'óciy je jäy ajcxy huídibi Jesús míbijcp etz tüg'óciy huídibi midou jada nej ti yjadyii ti ytunyíi, chi ajcxy ooy chigíy.

Canaag mij'ijxpejt etz tíy'ajt

¹² Je majmetzpi Jesús y'ayuccapxhuäcxpi ooy anajty ajcxy Dios ymic'ajt yajníguëxíci etz ijxpejt yejccixy ma yí jäy ajcxy. E tüg'óciy jäy ajcxy huídibi Jesús míbijc jabom jabom anajty ñayyöymújcgixy ma Dios ytijc huínduu huídibi yxii Salomón. ¹³ Ca' jac ni pín anajty míjnicxpeda'ñ míjyöypeda'ñ je' ajcxy. E je jäy ajcxy yjacyajmij'ajtpy huídi Jesús anajty ooy míbijccixyp. ¹⁴ Mayjäy oy míbijcni Jesús y'ayuc, yëydijctijc etz töxyjäydijc. ¹⁵ Etz ixti pa'mjäydijc anajty ajcxy yajnicxy míjtügujc cijx'aam pidaaccixy, jigix co Pedro ñaxípy jim ycadímjegyity co nicxy y'aa'ap yjäty ma je pa'mjäy. ¹⁶ Nañ jadu'n mayjäy chooñ anajty huídijaty huíngon ycajp, ymíingixy Jerusalén, míidmiingixy pa'mjäy, etz huídibi ca'oybi míid ma yjot yhuinma'ñ, e tüg'óciy yajtzoocaa'yb anajty ajcxy.

Pedro etz Juan yaj'ixhuídijtcixy yajpahuídijtcixy

¹⁷ Huin'it je teedy míjtungmíidpí etz huídibi saduceo íjxpíjcin ymíjpidacp ooy ajcxy yajca'oy'íjxy, ¹⁸ e co ajcxy majch je apóstoles ajcxy, chi ajcxy pidacy

ma je mijpujxtijc. ¹⁹ Chi Huindzin Dios tüg y'áigel je huin'it coodz yaj'ahuaach je pujxtijc aguu, yajpidzimy ajcxy, chi ajcxy nimay:

²⁰ —Níxcix, tinay'ahuiygix tzajtigoty, yajmídmíydaaccix yi mayjáy ajcxy Jesucristo ytiy'ajt nej jébi jáy ajcxy paadipy jugy'ájtín jemybi.

²¹ Co jadu'n midoy, chi com jabom ytiigy ajcxy jopyñi tzajtigoty. Jiiby je' ajcxy anajty ñiyaj'ixpijcco'ni.

Chi je teedy mijtungmídpi etz jacpinjaty míd, chi ajcxy capxyñiguejxy yi judío jáy ymijjáydijc etz ixpijcytíjc co huen junta jadyii. Chi ajcxy capxyñiguejxy huen nícxxy yajpidzimyii jiiby pujxtigoty yi apóstoles ajcxy. ²² Co je policías ajcxy ymejch ma je pujxtijc, ca' ajcxy paady je apóstoles ajcxy. Chi ajcxy huimbijtni míd tiy'ajt, ²³ chi ajcxy nimay:

—Hue' ích ajcxy ti nbaadcixy yi pujxtijc aducy, etz je soldadtijc jim tijc aguuy yjaccuend'ajtcixy. Chi co ích ajcxy nyaj'ahuäch je pujxtijc, ca' ích ajcxy ni pin ti nbaatyich jiiby pujxtigoty.

²⁴ Co jadu'n ajcxy midoy, je teedy mijtungmídpi etz je soldado huindzin, etz jacjadyii teedy huindzin ajcxy, chi ajcxy ooy huinmay nej jada y'occogixihuip. ²⁵ Huin'it tüg jáy miñ huídibi nimaayi ajcxy:

—Je jáy huídibi miich ajcxy mbídac pujxtigoty, chim je' ajcxy tzajtigoty yaj'ixpijccixy yi mayjáy.

²⁶ Chi je soldado huindzin míd soldadtijc ñícxxy ma yi apóstoles ajcxy jáy yaj'ixpijccixy, chi ajcxy yajnícxxy oy'amy, com tzigíyb anajty ajcxy co je mayjáy chaagadzíyb. ²⁷ Co ajcxy yajmiñ, chi ajcxy pidacy ma je maytungmídpi yhuinduu. Chi je teedy mijtungmídpi je apóstoles ajcxy nimay:

²⁸ —Ích ajcxy ti ngapx'aducy co ca' huaad m'ocjacyaj'ixpijccixni ma Jesús yxí. E ¿ti ti mdungixy? Ti myajhuächtaaygixy yi m'ixpijcin ma Jerusaléngajp, e ích ajcxy miich pocy xyjátyim yajmihu'i'mam co Jesús y'o'cy.

²⁹ Chi Pedro etz jacjadyii apóstoles ajcxy y'adzooy:

—Copícy ích ajcxy ngapxycöbigípyich yi Dios jayíjp ca'ydi jáy. ³⁰ Je Dios huídibi ích ajt nmij'ap nmijteedy y'ojadajt, yi' yajjugypíjc je Jesús huídibi miich ajcxy myaj'óc cruudzcíxy. ³¹ Je Dios Teedy jadachambi hue' Jesús mídity aa'oy'amy jiiby tzajpjoty, e ti pídagy ane'mbi etz yajnídzoocpi jigix yi judío jáy ajcxy yjothuimbídy e yajhuinmeecxípy ajcxy ypocy. ³² Ích ajcxy tiy'ajt nyejcpy míd jada ycípxi, etz nañ jadu'n je Espíritu Santo huídibi Dios ymooyb pinjaty capxymídoohuip.

³³ Co je jáy ajcxy jadu'n midoy, chi ajcxy ooy yjotmátcoty, chi ajcxy jayaj'öga'ñ. ³⁴ Huin'it ytinayígy ma je naymujctac tüg fariseojáy, hue' anajty yxí Gamaliel, hue' je' anajty Moisés yley ñihuindzin'ájtíp. E jáy ajcxy ooy anajty yajmij'ajtcixy je Gamaliel. Chi je' ni'ane'mdíy co huen yajpidzimyii tzojcyi jiiby tíba'y je apóstoles ajcxy. ³⁵ Chi Gamaliel nimay yi tungmídpi ajcxy:

—Judío yéydíctijc ajcxy, ícim ti mdungixy míd jada jáy ajcxy. ³⁶ Jáymetz miich ajcxy co jecy'ajty je Teudas ypidígy ymínañ co je' ymijty yjanchity, e chi ypanícxí oy nimídaax migo'pxti yéydíjc. Chi ajcxy yaj'o'ci, chi tüg'ócíy huídibi anajty ti ypanícxyii yöyhuáčxtay, e jadu'ñyi je' ajcxy ñitígoyday. ³⁷ Jacnamni je huin'it xí mína cajpjáy anajty ñecypejtcixy, ypidígy Judas huídibi tzon Galilea. Mayjáy ypanícxí; nañ jadu'n ajcxy yaj'o'cy, e tüg'ócíy jáy huídibi panícxxy jadu'ñyi ajcxy yöyhuáčxtay. ³⁸ Paady ích miich ajcxy jadu'n nimaaygixy, ixmajtzcix yi apóstoles ajcxy, e ca' mmijyöybejtcixy. Peni jáy yi y'ayuc ytiy'ajt huídibi ajcxy ymíd, cixip tígoyip yi'. ³⁹ Pen Dios y'ayuc ytiy'ajt yi' ajcxy ymíd,

ca' ajcxy mjadipy nej myajcödigóoygixyipy. Jaty nayguend'ájtigixy, ca' jecyity co Dios anajty mïd mdziptungixy.

⁴⁰ Nidüg'óciy ajcxy jäygidacy Gamaliel ycapxhuíjn. Huin'it ajcxy mijhuoy yi apóstoles ajcxy. Chi ajcxy tzaachytuñ, chi ajcxy cí'ajty, etz capx'adujcy co ca' huaad Jesús y'ayuc jaccapxhuäcxip. Huin'it ajcxy najtzmadzïy. ⁴¹ Je apóstoles ajcxy ypidzimy ajcxy ma tungmïdipi ajcxy yhuinduu ooy yjotcujcity co Dios jadu'n ti aa'ixiy co huen tzaachytuñyï mïd Jesús yxi ycxipi. ⁴² E ooy ajcxy yaj'ixpijccixy etz nimiydaaccixy Jesucristo jabom jabom jadu'n tzajtigoty nañ jadu'n majaty tijc.

6

Chi ajcxy yajnißejty huixtujc mutztungmïdipi

¹ Je huin'it xii ajcxy huïdibi xpijcp Jesús y'ayuc nigï anajty ñimayiy'adütcixy. E huïdibi anajty capxp griego ayuc ytigïy nayñigápxip mïd huïdibi judío y'ayuc capxp. Ymïnaangixy co yi griegojây co'ögy töxyjädiç, ca' anajty ajcxy paady quipxyjaty mïd je judíojây co'ögy töxyjädiç caayin uucin jabom jabom. ² Huin'it yi majmetzpi apóstoles ajcxy yajnaymujctaayi je jäy huïdibi Jesús mïbijcp, chi ajcxy ymïnañ:

—Ca' huaad ïch ajcxy Dios y'ayuccapxhuäcxin n'ijxmajch, e nicxyich caayin uucin yajhuäcxixy. ³ Paady miich ajcxy migügtijc nayhuin'ijxigix huixtujc yëdyjctijc huïdibi oy yajmij'ajtni Dios, huïdibi huadz oy yhuinma'ñ ymïd, huïdibi je Dios yjihui'ñ ymic'ajt mïd, e huen ajcxy tung'adïb jada tung. ⁴ ïch ajcxy njacmïbijctzohuamy Dios, etz ïch ajcxy njacyaj'ixpigamy Dios y'ayuc.

⁵ Tüg'óciy ajcxy jäygidacy je' ayuc. Chi je mayjây huin'ijxy Esteban huïdibi ymïd ooy ymïbijcin, etz ymïd Espíritu Santo. Nañ huin'ijxy ajcxy Felipe, Prócoro, Nicanor, Timón, Parmenas, etz Nicolás. Nicolás ca' je' anajty yjudíojäyity. Hue' je' anajty choon jim Antioquía, jécyip anajty jiptigiyïyñi judíojäy ytiy'ajt. ⁶ Chi ajcxy yajnicxy je jäy ma je apóstoles ajcxy. Chi ajcxy je apóstoles Dios mïbijctzoy e cïnixajy ajcxy.

⁷ Je Huindzin Jesús y'ayuc nigï anajty jäy tzachnejhuïyñi. E je mïbijcpidijc nigï anajty ajcxy chachnimayïyñi jim Jerusalén, ixti may judío teedy ajcxy ymïbijcy.

Majch ajcxy Esteban

⁸ Je Esteban ymïd anajty Dios ymic'ajt etz y'oy'ajt e oy mijhuinma'ñ tuuñ, etz yejcy ijxpejt ma jäy ajcxy. ⁹ Huin'it xii nijëjity ixpiçytijc ooy ñay'ijxquípxigixy y'ixpijcin mïd Esteban jim ma judíojäy ajcxy ñaymujctac huïdi anajty yxi Libertados. E jim anajty Cirene jäy, Alejandría jäy, Cilicia jäy, etz huïdibi tzomb jim Asia ñaaxjot. ¹⁰ Ca' ajcxy mïmadacy Esteban com hue' je' anajty ycapxy mïd yhuijy'ajt ycuç'ajt huïdibi je Espíritu Santo anajty mooyip. ¹¹ Chi Esteban ymïdzip ajcxy mujuy jäy huïdibi jëbi nihuambety Esteban, co ti anajty ooy ycapxtigooy etz ni'oïy Moisés etz Dios. ¹² Jadu'n ajcxy yajyuumïgy yaj'oxïgy yi jäy mijjäydiç, etz huïdibi ajcxy yaj'ixpijcp Moisés yley. Chi ajcxy mïmadacy majch ajcxy Esteban, yajnicxy ajcxy ma je judíojäy ymïjtungmïdipi etz ixpiçytijc ñaymüçigixy. ¹³ Chi ajcxy ixtaayi jäy huïdibi nihuambediç, chi ajcxy ymïnañ:

—Jada Esteban jibic nigapxy yi Dios ytijc etz Moisés ytiy'ajt. ¹⁴ Ti ïch ajcxy mïdoy co ymïna'ñ co Jesús je Nazaretpi yjidamy je Dios ytijc, e yajtigadza'ñ Dios ytiy'ajt jadu'n nej Moisés ajt xymooyim.

¹⁵ Huin'it je judíojäy tungmüdpí e tüg'óciy jäy nej anajty ajcxy jim ñaaygixy huindixpejty ajcxy Esteban. E chi ajcxy ijxi yhuiñyjipp jadu'n anajty quëxigý nej y'ángel yhuiñyjipp.

7

Esteban ñaygohuaani ma tungmüdpí yhuinduu

¹ Huin'it je teedy mütungmüdpí yaj'amidooy Esteban:

—¿Nej janch jadaji?

² Chi Esteban y'adzooy:

—Migügtijc ajcxy etz mijjäydijc ocmidoogix. Ich ajt nDios mijpi janchypi nayquëxici ma ich ajt nmij'ap nmijteedy Abraham jecy'ajty co anajty jim ity Mesopotamia ñaaxjot, ca'ni anajty chinaydacpiy jim Harán. ³ Chi Abraham Dios ñimaayi: “Ixmatz mnaax mgajp etz tüg'óciy m'amigügtijc, e nicx ma yi naaxjot huidibi myajnixihuamyb.” ⁴ Chi Abraham choñ ma yi Caldea ñaaxjot, e nicxy tzinaydacpijcpí jim Harán. Co yteedy oy y'o'cni, chi Dios Abraham yajmiiñ ma jada naaxjot ma miich ajcxy cham mdzinäy. ⁵ E ca' Dios moy Abraham jada naaxjot ya, ni ca' ma yhuäcxtägiy. Hue' je' janchtiy yaj'ahuaniiy co möhuaaniiy y'ap y'oc, e co anajty je' ajcxy jediib. Oyñi anajty Abraham ca' y'ung müdity co Dios ymigapxi. ⁶ Ñimaayi Dios co y'ap y'oc y'adzinhuiy ajcxy ma huingjäy ñaaxjot, etz chi ajcxy ytumbi'adiyb etz chaachytuniiyb midaax migo'px jimijt. ⁷ Nañ jadu'n Dios ñimay Abraham: “Ndzaachytuniiyich je naax cajp ma yi m'ap m'oc anajty ytumbi'adyii. Chi choonip ajcxy jim, e chi xymiduniiyich ma jadayaabi it.” ⁸ Dios ytuun tüg capxytuunin müd Abraham, co huen ajcxy yajtiy'ajttihuiy. Paady co Abraham y'ung Isaac yma'xung'ajty conductujc xi ajcxy oy tiy'ajttiy. Nañ jadu'n Isaac ymang Jacob, e Jacob yi ymang nimajmetzpi ajcxy, huidibi ajcxy ñi'ap'ajty yi nimajmetzpicypí Israel ycajp.

⁹ Chi Esteban yjacmíñañ:

—Je' ajcxy Jacob ymang, ich ajt nmij'ap nmijteedy, ymi'ijxtinaayb anajty ajcxy y'uch José. Chi ajcxy José toocy, chi je' yajnicxi jim Egipto, per Dios müd anajty y'ity José, ¹⁰ etz nihuaañ yajtzoocy ma ayo'n jotmay. Chi Dios moy ixpijcin jigix cömay ypidzimipy ma Faraón, je Egipto jäy yrey. Chi je rey José tung moy huen ane'my je Egipto naaxjot etz ane'mipy je rey ytijc.

¹¹ Huin'it xi ymiiñ mijyuu mij'ayo'n jim Egipto etz jim Canaán ñaaxjot. Je huin'it xi ich ajt nmij'ap nmijteedy ca' anajty ajcxy paady ti ycaipy. ¹² Co Jacob oy nejhuüy co jim Egipto yajpaady jim trigo, chi jim quejxy ymang ajcxy trigo juuybi. Je' ajcxy huidibi ich ajt nmij'ap'ajtim nmijteedy'ajtim. Chi ajcxy y'oy tügtecy trigo juuyb. ¹³ Je mimejtz'ocpi co ajcxy oy trigo juy, huin'it José ñayñigapxi ma y'ajch ajcxy. E chi je rey nejhuüy pinjäy je' anajty je José. ¹⁴ Chi José capxyñiguejxy huen cidaaccixy jim Egipto yi' yteedy Jacob müd tüg'óciy yjuugy ymigüg. Hue' anajty ajcxy ñaybaattáayigixy nidugi'px majmocx jäy. ¹⁵ E jadu'n yajty co Jacobo oy chinaydacpiy jim Egipto. Jim oy comjecy y'o'cni. Nañ jadu'n jim ajcxy y'o'cy may ich ajt nmij'ap nmijteedy. ¹⁶ E chi Jacob yjuugy ymigüg com jecy yajpidzimy Jacob ypajc ma ñaaxtigiy, e chi ajcxy yajnicxy jim Siquem, oy pidaaccixy ma je o'cpi jut huidibi Abraham anajty ti juy meeñyigixy ma Hamor ymang jim Siquem.

¹⁷ Chi Esteban yjacmíñañ:

—Ytimypadaanipy anajty tiempo nej anajty Dios ti yaj'ahuaniiy Abraham. Ti anajty yi judíojäy ooy ymayiiñi jim Egipto. ¹⁸ Chi oy jadüg rey ytigiiy ane'mbi huidibi ca' ix'y'adyii José. ¹⁹ Je rey yhuin'iiñ ich ajt nmij'ap nmijteedy,

e oy ajcxy chaachytuun. E chi ane'my co huen y'ung ajcxy ñigüecytaaгыxy huídibi anajty ajcxy ma'xung'ajtp, jigix y'ó'ccixipy. ²⁰ Huin'it tiempo oy yma'xung'ajty Moisés, je huídibi ooy Dios jäygidacy. Chi Moisés ytaj yteedy tugig po' yajyeeci ma ytijc. ²¹ Co ajcxy yajñigüeeeci, chi je rey ñix je' agondigüiy, e yajyeegy jadu'n nej yci'm'ung. ²² Paady Moisés ixpijcy tüg'óciy jadu'n nej Egipto jäy anajty ajcxy y'ixpijcy, e ooy ymadacy müd y'ayuc etz müd ytung.

²³ Co Moisés anajty müdity huixchiguipx jimijt, chi pidacy yhuinma'ñ co nicxy ixa'ñ je' y'amigügtijc je Israel y'ap y'oc. ²⁴ Chi Moisés ijxy co tüg egipciojäy chaachytuñii tüg je' y'amigüg. Chi Moisés yaj'o'cy je egipciojäy, yaj'ahuimbijty nej anajty y'amigüg yajtzaachytuñ. ²⁵ Hue' Moisés tijy co je' y'amigügtijc ajcxy huen nejhuüy huinjihuüy co Dios nihua'naanip ma ymidzip müd Moisés yciipi. Chi ajcxy ca' huinjihuüy co Moisés nihua'naanip. ²⁶ Com jabom Moisés paty mejtz Israel jäy chachtziptungixy. Chi Moisés jayajxemañ je tzip, chi nimay: “Miich ajcxy nay'amigüg'ajtip, ¿nej co mdziptungixy miich ajcxy miñ xyipy?” ²⁷ Je huídibi anajty ymügüg tzaachytuumb huin'it najtztijüiy Moisés, nimay: “¿Pin ti xypidägy huindzin etz tydumbi ma ich ajcxy? ²⁸ ¿Nej xyaj'ogaamich jadu'n nej axiy myaj'o'cy yi egipciojäy?” ²⁹ Co Moisés jadu'n midoy, chi yqueegy, ñicxy jim ma Madián naaxjot. Moisés jecy y'adzinaay jim Madián naaxjot, e jim oy ypijcy. Chi ytöxyijc paty metz ymang.

³⁰ Huixchiguipx jimijt naxy, huin'it jim adügtuum ma je cop huídibi yxi Sinaí, ñayguëxi tüg ángel jinjoty ma tüg quipymang huídibi anajty tzachtuoyb. ³¹ Chi Moisés ooy jihuüy huinmaay müd je' yciipi huídibi anajty y'ijxyp. Co oy mihungoñ, chi midoy co je Huindzin Dios ñimäyüi: ³² “Ich Dios huídibi mmij'ap mmijteedy ajcxy Abraham, Isaac etz Jacobo Dios'ajtpy.” Chi Moisés chiyuygoty, ca' anajty ocjac-huindixpedaani. ³³ E je Huindzin Dios nimaayüi: “Jen mgig, com je it ma miich mdinäy, Dios yi' y'it. ³⁴ Ich ti n'ixyich njäyich nej tzaachypi paatcixy jim Egipto. Ti nmidooyich co y'ajcxy yäxy ytinäy müd je tzaachypi yciipi. Ti ngidägyich co ajcxy ngohuaanip. Ich miich nguexamyb jim Egipto ma yi Israel jäy ajcxy.”

³⁵ Chi Esteban yjacmínañ:

—Co Moisés oga'n ñicxy ma ich ajt nmij'ap nmijteedy ca' ajcxy cöbijcy huen y'ane'müyb, chi ajcxy ymínañ: “¿Pin ti xyñimäy co ich miich ajcxy nhuindzin'adiyb?” Co mímetz'ocpi Moisés ñicxy ma yi Israel jäy, je taabi anajty je ángel ti ymígapxyii jinye'ñ agujc, chi ajcxy cöbijcy. ³⁶ Je Moisés je' yajpidzim ich ajt nmij'ap nmijteedy jecy'ajty jim Egipto. Moisés ytuun oy mihuinma'ñ etz ijxpejt huixchiguipx jimijt jim Egipto, jim ma tzaptz mejy, etz jim ma mijtigíduum. ³⁷ Je Moisés huídibi jecy'ajty nimay je Israel jäy: “Dios y'ijxtihuipy tüg jäy ma miich ajcxy m'ap m'oc huídibi najtzcaxihuipy yi' y'ayuc, jadu'n nej ti xy'ijxtiyich ma miich ajcxy. M'amido'ijtip ajcxy yi' y'ayuc.” ³⁸ Je Moisés jim je' anajty mijtigíduum müd je mayjäy. Chi jim je Dios y'ángel müd mýdacy ma je cop huídibi yxi Sinaí, etz Moisés yajnax Dios y'ayuc ma ich ajt nmij'ap nmijteedy. Moisés ycöbijc Dios y'ayuc huídibi jugy'ajtin huinixibi müd, etz jayhui'my müd ich ajt yciipi.

³⁹ Chi ich ajt nmij'ap nmijteedy ajcxy jecy'ajtpy ca' anajty ajcxy capxcöbigaangixy Moisés, ca' anajty cöbijccixy je' y'ané'min, chachuimbidaangixy jim Egipto. ⁴⁰ Chi ajcxy Aarón nimay: “Ndzojcypich ajcxy co miich oydun tüg Dios huídibi ich ajcxy xyhuinhuoohuip, com ca' nnejhuüyim ti jada' ti yjadyii je Moisés huídibi ajt xyajtzoonim Egipto ñaaxjot.” ⁴¹ Chi oyduñ ajcxy tüg huajmang. Chi huindzigüiy ajcxy je huajmang huídibi anajty ti yajcojciy, e ooy ajcxy mijotcujc'ajty huídibi ci'm anajty ti yajcojy.

⁴² Huin'it xii ajcxy Dios y'ixmajtzi, huen ajcxy ojadaty yi xii, yi po' etz madza'. Com jadu'n Dios y'ayuc cojaaybi cojaay co Dios jadu'n ymīnañ:

Israel jāy ajcxy canan iich je' huīdibi ti mhuīndzigīygixy jim mījtigīduum huixchigūipx jimijt.

⁴³ Ti mgiynícxcixy Moloc ytijc etz yi Renfán ymadza', tzadzech, quipychech etz oori oyduñ huīdibi miich ajcxy ci'm myajcoj huīdibi anajty ajcxy m'ojadadamy. Paady iich miich ajcxy nyajpidzimaangixy ma yi mnaaxjot, e nguexaangixy jiguem jim Babilonia nīnaxy.

⁴⁴ Chi Esteban yjacmīnañ:

—Jim mījtigīduum iich ajt nmij'ap nmijteedy ymīid anajty cochactijc ma anajty ajcxy Dios huīndzigīy. Jiiby anajty ajcxy yujccīy je tzaa ma Dios ytīy'ajt ycojaayity. Je cochactijc ajcxy ycoj jadu'n nej anajty ti yaj'ane'myīi Moisés, e nej anajty yajni'ixīyīi nej tunipy. ⁴⁵ Iich ajt nmij'ap nmijteedy mīhui'm je cochactijc, e iich ajt nmij'ap nmijteedy huīdibi mīiñ ma jada naaxjot mīid Josué, chi mīmīiñ ajcxy je cochactijc je taab ajcxy mīmadacy je ymīdzip canaag'agajp. Dios yajpidzim je' ajcxy ymīdzip ma je naaxjot, jigix yajcīdigīhuip iich ajt nmij'ap nmijteedy. Yajtuuñ ajcxy je cochactijc, ixti cooni David ytīgīy ane'mbi. ⁴⁶ Dios yjāygi daac je rey David, e David yjacoja'ñ anajty tūg tijc oyduñ ma jēbi yaj'ojadaty yajhuīndzigīy Dios, je Dios huīdi Jacob mījpidac jecy'ajty. ⁴⁷ Per Salomón je' oy cojy Dios ytijc. ⁴⁸ Oy yi Dios tzajpjoty pi ca' chināy ma yi tijc tīibi jāy cojy. Jadu'n nej je Dios y'ayucnajtzcaxīybi jecy'ajty jaybety co Dios jadu'n ymīnañ:

⁴⁹ Je tzajp hue' je' iich n'ane'mdac, jada naaxhuīñybi iich ndecypocxtac. ¿Ti tijc iich miich ajcxy xycojaanip? ¿Ma je it huīdibi it ma iich jēbi nbocxy?

⁵⁰ ¿Nej cay iich ti n'oyduñy tūg'ócīy?

⁵¹ Miich ajcxy ooy mjetjuuñity, ca' mgapxymīdoy Dios. Jadu'n Esteban yjacmīnañ:

—Jadu'n miich ajcxy mjet mhuīnma'ñ mīdity jadu'n nej jāy ajcxy huīdibi ca' Dios ytīy'ajt nejhuīyī. Miich ajcxy jātyim mīdzip'ajtpy je Espīritu Santo. Mdūgīyb ajcxy mīd mīj'ap mījteedy. ⁵² Miich ajcxy mīj'ap mījteedy chaachytuun tūg'ócīy Dios y'ayucnajtzcaxīybi. Yi' ajcxy yaj'o'c Dios y'ayucnajtzcaxīybi huīdibi jayījp'aty najtzcaxīy co ymīnañ tūg jāy huīdibi tudāgyip. E co je tudāgy jāy ymīiñ, chi miich ajcxy agojix myaj'o'cy.

⁵³ Je Dios y'āngel miich ajcxy xymooy je Dios ytīy'ajt, e ca' ajcxy mgōbijcy.

Yajtzaagōgātzcixy Esteban

⁵⁴ Co je mayjāy mīdoy jadu'n nej Esteban ymīnañ, chi ajcxy mījotmātcoty Esteban, chi ytīgīy ajcxy tīitzmucxpi tīitzqueetpi. ⁵⁵ E chi je Esteban jīhuīy je Espīritu Santo ma yjot yhuīnma'ñ, chi chajp'ijxy, e ijxy yi Dios y'oy'ājtīn etz ijxy Jesús ytīnāy a'oy'amy ma Dios Teedy. ⁵⁶ Chi Esteban nīmay je mayjāy:

—Ijxcix! N'ijxypīch yi tzajp ahuādz, e n'ijxypīch je jāy huīdibi tzoon tzajpjoty ytīnāy a'oy'amy ma Dios Teedy.

⁵⁷ E chi je mayjāy ajcxy ytāt'ac amo'cxy, chi ajcxy ytīgīy huambi jīhuīybi, e chi ajcxy nīmujcy yajmujcy Esteban. ⁵⁸ Chi ajcxy yajpidzīmy Esteban cajppa', je' oy cōgātzcixy. Je tīy'ajt yejcpī huīdibi jadu'n īdīitz, chi yjocxhuīt ajcxy yajmīhuīmy tūg yeeg'anāg huīdibi anajty yxī Saulo. ⁵⁹ Jim anajty ajcxy Esteban tzachcātzcixy. Chi Esteban Dios mībijctzoy, ymīnañ:

—Huīndzīn Jesús, cōbījcgīch n'alma.

⁶⁰ Huin'it ycoxtīnay'ahuīy, e chi yaaxqueegy mīc ymīnañ:

—Huīndzīn, ca' mbocxy ixipy nej ajcxy xytuñīch.

Co jadu'n Esteban ymīnanday, chi oy y'ōgy.

8

Saulo pahuidijttägy ooy mibijcpidijc

¹ Saulo ytuun quipxycapxy müid huudibi ajcxy yaj'o'c Esteban.

Huin'it xii yaj'ixhuudijjt yajpahuudijjt pinjaty anajty Jesús mibijcp jim Jerusalén. Tüg'óciy je jäy ajcxy huudibi Jesús mibijcp anajty yqueec-huäcxtay, ñicxy ajcxy jim Judea ñaaxjot etz Samaria ñaaxjot. Jëyi je majmetzpi apóstoles ajcxy jac-hui'miyy. ² Nijëjity yëydijc huudibi Dios huindzigiiyb oy yajnaxtigiiy Esteban. E ooy ajcxy jotmay jihuiy, yaaxy ajcxy müid je' ycixpi. ³ Chi Saulo ooy ixhuudijtcoty pahuudijtcoty huudijaty Jesús mibijcp etz tijc tijc anajty yajpidzimy pahuich pajuguty yëydijctijc etz töxyjäydijc, e pidaaccixy anajty pujxtigoty.

Jim Samaria ajcxy capxhuäcxy Dios y'ayuc

⁴ Je huudi ajcxy queec-huäcxtay ycapxhuäcxyp anajty ajcxy Jesús y'ayuc huen tim ma'amy huudijtcixy. ⁵ Nidügti huudibi anajty yxii Felipe ñicxy jim Samaria, ytigiiy y'ayuccapxhuäcxpi, yajnimay ajcxy Cristo ytiy'ajt. ⁶ E je jäy ajcxy ñayyöymujci nidüg'óciy ajcxy y'amido'ijtcixy janch amoñyi jadu'n nej Felipe anajty ymiydägy e ijxyp anajty ajcxy je mijhuinma'ñ huudibi Felipe anajty ytumyb. ⁷ Com may anajty jäy jim huudibi müid ca'oybi ma yjot yhuinma'ñ, e tzoocp anajty ajcxy. E co je ca'oybi anajty ypidzimy ma je jäy, chi je jäy ooy yjacyaaxqueecy. Etz nañ mayjäy anajty chögy huudibi ca' yci' ytecy yücxycy etz tecyma'tpi. ⁸ E jadu'n je mayjäy ajcxy anajty jim ooy yjotcuycity.

⁹ Jim anajty tüg yëydijc huudibi anajty yxii Simón huudibi anajty ti ni'ixpigiiy huijyjäy huinma'ñ, e ooy anajty may Samaria jäy huin'ñi, ymina'ñ co je' anajty ymijity yjanchity. ¹⁰ Tüg'óciy jäy anajty oy amido'ijtcixy Simón y'ayuc, pi'ctijc etz mij'anäctijc, e yminaangixy:

—Jadayaabi yëydijc ymiid jada Dios ymic'ajt.

¹¹ Ooy anajty je jäy ajcxy Simón mijnicxpejtcixy, com müid je mañ'ajt anajty jecy ti chachhuin'ñigixy. ¹² Co je Samaria jäy mibijcy je ayuc jadu'n nej Felipe ñimiydacy Dios y'ané'min etz Jesucristo, chi ajcxy ñiibejty yëydijctijc etz töxyjäydijc. ¹³ Etz je Simón, je huijyjäy, nañ jadu'n mibijcy e ñiibejty. Chi Simón puyöyiy Felipe, ooy jihuiy huinmaay jadu'n nej je mijhuinma'ñ huudibi anajty Felipe ytumyb etz jadu'n nej anajty Dios ymic'ajt ijxi.

¹⁴ Co ajcxy je majmetzpi apóstoles ajcxy, huudi anajty jim Jerusalén, nejhuuiy co je Samaria jäy anajty ti cöbijccixy Dios y'ayuc, chi ajcxy quejxy jim je Pedro etz Juan. ¹⁵ Co Pedro etz Juan yja'ty jim Samaria, chi ajcxy Dios mibijctzoy müid je mibijcpidijc ycixpi, jigix ajcxy ymöhuiiyb je Espíritu Santo. ¹⁶ Com ca'ni anajty je' ajcxy ñicidägyii, jëyi anajty ti ñiibejtcixy ma Huindzin Jesús yxii. ¹⁷ Huin'it Pedro etz Juan cñixajy ajcxy, e chi je Espíritu Santo y'adigiiy yjottigiiy ajcxy.

¹⁸⁻¹⁹ Co Simón ijxy co je Espíritu Santo y'adigiiy yjottigiiy co yi apóstoles ajcxy ycñixajy, chi Simón yaj'ahuaniiy je' ajcxy meeñ, yminañ:

—Mooygich nañ jadu'n yi mic'ajt jigix co ngñixájibich hueñypinity nañ jadu'n jëbi ajcxy je Espíritu Santo y'adigiiy yjottigiiy.

²⁰ Chi Pedro nimay Simón:

—Mi'ögihuiipy miich mmeñ, müid co mhuinma'ñ ti mbidägy co meeñygiix mbada'ñ je huudibi Dios ñiyejcp. ²¹ Com miich ca' xypaady jadayaabi tung, com miich mjot mhuinma'ñ ca' ytudägyty ma Dios. ²² Jothuimbit e ixmatz yi mjibic-huinma'ñ, e mibijctzou Dios, ca' jëcyty xyhuinmeecxipy jadu'n nej

jibic mjot mhuinma'ñ mmiidity. ²³ Com janch ta'm miich mjot mhuinma'ñ, e yi jibicpi hue' xymiidity mach.

²⁴ Chi Simón y'adzooy:

—Mibijctzou je Huindzin Dios müd ich ycixpi, jigix ca' ti xyjadipyich jadu'n nej miich ti xyñimäyich.

²⁵ Co Pedro etz Juan tiy'ajt yejcy etz capxhuäcxy Dios y'ayuc jim Samaria, chi ajcxy yhuimbijty jim Jerusalén. Chi ajcxy canaag agajp ñaxiy jim Samaria ñaaxjot, e capxhuäcxy Dios y'ayuc nej ajcxy y'alma nidzoocin paadipy.

Felipe müd je Etiopía jäy

²⁶ Huin'it xii Huindzin Dios y'ángel migapxy je Felipe, nimay:

—Tzoon ya, nicx ma madzäcruudz ypidzimy, ma je tü'aa huidi tzomb jim Jerusalén huidibi nicxp jim Gaza.

Je' je' je tü'aa huidibi adügtuum najxp. ²⁷ Felipe tim janitzon e ñicxy, e tü'am naybaatti müd tüg Etiopía jäy. Hue' je' anajty eunuco, mijtungmüd jim Etiopía. Yi' je' tesorero'ajt anajty ma je töxyjäy huidibi anajty yxi Candace huidibi anajty ane'mb jim. Je eunuco jim anajty ti y'oy Jerusalén Dios ojadaajtp. ²⁸ E chi yhuimbijtni anajty ma ycajp, iñaayb anajty carretijoty yam chachnecycapxy. Hue' anajty chachcapxyp je Dios y'ayuc huidibi Isaías ycojaay. ²⁹ Chi je Espíritu ñimay Felipe co huen nicxy najtzpadiy je carreti ma je eunuco anajty y'ñäy.

³⁰ Co Felipe mihuingoñ je carreti, chi midoy co je jäy anajty capxy je necy huidi Isaías yjaay, chi y'amidooy:

—¿Nej mhuinjihuñyb huidibi mgapxyp?

³¹ Chi je jäy y'adzooy:

—¿Nej ich nhuinjihuñipy pen ca' pin xyajnimäyich?

Chi je eunuco nimay je Felipe co huen müd iñäyii carretijoty.

³² Je huidibi anajty je eunuco chachcapxyp jadu'n je' anajty yminañ: Jadu'n ajcxy nicxy yaj'ögy nej jäy borregi nicxy yaj'ögy. Je' amoñ'ijty jadu'n nej borregi amoñ'ity co jäy nime'pxy. Ni tüg'aa huam ycaminañ.

³³ Ti jäy yajtzöyduñy, ca' ajcxy a'ixiy co yjanayñigapxtüdaani. Ni y'ap y'oc ycaca'ty pin ocnigapxtüdüb. Co yaj'öci, chi chooni ya naaxhuiñ.

³⁴ Chi je eunuco y'amidooy Felipe:

—Tunmay'ajt yajnimaygich pin jada ayucnajtzcaxiybi ñimiydacpy, ¿ci'm ñayñimidyägyii o ji jada huingbi pin nimiydacpy?

³⁵ Chi Felipe yajtzondacy je ayuc capxticxin ma jada yaabi Dios y'ayuccojaaybi ñecy. Chi yajmüdmidaaci nej Jesús yajty y'ayoy. ³⁶ Co ajcxy ñajx ma tüg nii, chi je eunuco yminañ:

—Cha nii, ¿nej ca' ich jëbi huaad nnibetyi?

³⁷ Chi Felipe y'adzooy:

—Pen mmibijcpy Jesús müd tüg'óciy yi mjot mhuinma'ñ jëbi mnibety.

Chi je jäy y'adzooy:

—Nmibijcpyich co Jesucristo Dios yi' y'ung.

³⁸ Chi je eunuco nimay je carreti huindzin co huen yajtinayxipy je' carreti. Chi nimetz ajcxy ñicxy ma nii, e chi Felipe yajñibejty je eunuco. ³⁹ Co ajcxy ñibidzimy, chi je eunuco ixtigoy je Felipe. Jadu'ñyi je Huindzin Dios y'Espíritu yajnicxi. E chi je eunuco ytü yajyöyñi jotcuyc. ⁴⁰ Felipe yajpaty jim Azoto, chi ñajxy cajp cajp capxhuäcxi Jesucristo y'ayuc ixti yja'ty jim Cesarea.

1 Ooy Saulo tzach'ixhuüdiijty pahüdiijty Jesús yjäy, y'ahuändacy ooy, e yaj'öga'ñ anajty ajcxy. Paady oy ixty je teedy mïjtungmïidpi, ² pijctzoy cötújcïn, co anajty ñicxa'ñ jim Damasco ma yi judíojäy ajcxy ñaymujctac, madza'ñ pinjaty Jesús y'ayuc mibíjicp. Saulo yajmiina'ñ anajty ajcxy mach jim Jerusalén huen yëydijctijcity huen töxyjäydijcity. ³ Jim anajty Saulo ñicxy mihuingoñ je Damasco cajp. Huin'it jotcömoñyi je tücxin huüdi tzomb tza-jpoty, ñigidaaci jühuüdiity je Saulo. ⁴ Huin'it Saulo yciday, e midoy co ñimäyii:
—Saulo, Saulo, ¿na'amy co xychachpahüdiijttägyich?

⁵ Chi Saulo yajtiy:

—¿Mbin miich, Huindzin?

Chi midoy co y'adzoyii:

—Ich je' Jesús, je huüdibi miich mdzachpahüdiijttacpy, ci'm nayyajtzaachytunyii jadu'n nej huajyuub co jipconebe'i y huüdi mïid ñuumygyyii.

⁶ Chi Saulo chiyuygoty chachchigiiy, e yminañ:

—Huindzin, ¿ti mdzojcpy ndunipyich?

Chi je Huindzin Jesús ñimaayi:

—Pidig etz nicx cajpoty, e jim nyajnimähuipy ti jëbi mduñ.

⁷ Je yëydijctijc huüdibi anajty Saulo ymïd ooy ajcxy ñay'adzigiiyi, co midoy je' ajcxy ayuc e ca' ajcxy ni pin ma y'ijxy. ⁸ Chi Saulo ypidigy, e co huindicxñicni ca' pin ma oc'ijxni. Chi ajcxy majch Saulo ma yci', e chi ajcxy huijtznicxy jim Damasco. ⁹ Tugüg xii Pablo jim y'ijty huiintz, ca' ycaay y'uucy.

¹⁰ Jim Damasco anajty tüg yëydijc chinäy huüdibi Jesús y'ayuc mibíjicp, huüdi anajty yxii Ananías, cumäyjoty Dios ñimaayi:

—¡Ananías!

E chi je' y'adzooy:

—Cha ich, Huindzin Dios.

¹¹⁻¹² Chi je Huindzin Dios ñimaayi:

—Pidig, nicx ma je tü huüdibi yxii Derecha, e jim ma Judas ytijc yajtiü tüg Tarso jäy, huüdi yxii Saulo. Dios mibijctzoob je' jim cham, cumäyjoty ti huin'ijxy tüg yëydijc huüdi yxii Ananías, co oy ñimiñyii, e ycinixajiiy jigix y'ijxigip jadüg'oc.

¹³ Chi Ananías y'adzooy:

—Huindzin Jesús, mayjäy ti xyajmïdmïydägyich ajcxy jadu'n nej yi Saulo jibic y'idich jim Jerusalén mïid miich mjäy ajcxy. ¹⁴ Jadachambi ti mimiñ ya je necy, ma teedy mïjtungmïidpi ti ycötujcmöyii, co huen majtztäy je jäy, e yajnicxtähuipy jim Jerusalén, tüg'óciy pinjaty ojadajtp miich mxii.

¹⁵ Chi je Huindzin Jesús nimay Ananías:

—Nicx, com ti ich nhuin'ixy yijiibi yëydijc, jigix ich nxii etz n'ayucich capxhuäcxipy ma tüg'óciy naax cajp huüdi ca' yjudíojäyity, etz ma yi reydiy, etz nañ jadu'n ma yi judíojäy ajcxy. ¹⁶ Ich yi' nyajnimähuipy tüg'óciy, nej ayo'n yajnaxipy mïid ich nxii ycxpi.

¹⁷ Chi Ananías ñicxy ma Saulo anajty ti yjättägy, co ytigiiy tigoty, chi cñixajy Saulo, e chi nimay:

—Migüg Saulo, je Huindzin Jesús huüdibi nayguëxici jim tü'am ma miich anajty miiñ, yi' ti xyquexyich jigix m'ijxigipy jadüg'oc, etz je Espíritu Santo xyñidigihuip xycödighuip.

¹⁸ Mic'amy ycäy ma Saulo yhuiin jadu'n nej acx ñimeeñ, chi y'ijxigy. Huin'it Saulo ypidigy e chi yajniibejti. ¹⁹ Chi Saulo ycaay y'uucy, e chi ymic'pijcy jadüg'oc. Chi jim mïd'ijty jecy huüdibi ajcxy ixpijicp Jesús y'ayuc jim Damasco.

Saulo capxhuäcxy Dios y'ayuc jim Damasco

²⁰ Chi janch mic'amy Saulo ytigüy Dios y'ayuccapxhuäcxp ma je judíojäy ajcxy ñaymujctac jim Damasco, yminañ co je Jesús hue' je' Dios y'ung. ²¹ Tüg'óciy pinjaty anajty midoohuip Saulo y'ayuc, ooy ajcxy jihuüy huinmaay, etz ñayñimáayigixy:

—¿Nej ca' jada' yjējity je huídibi tzachyajcōdigoyam yi jāy ajcxy huídibi Jesús yxii miyaax ojadájtíp jim Jerusalén? ¿Nej ca' jada' yjējity huídibi anajty ti ymiiñ ya jāy ymajtzpi, e nicxy cīyega'ñ ma teedy mījtungmīdipi?

²² Je Saulo capxhuacxip anajty Jesús y'ayuc huinmic jotmic, e nigapxtāy co Jesús hue' je' je Cristo, chi yi judíojäy ajcxy huídibi anajty jim tzinaayb Damasco cijx ajcxy yhuinma'ñ tigojdāy.

Saulo yqueecy ma judíojäy ajcxy

²³ Ti anajty hueeni xii tiempo ñajtzninicxiyñi, chi je judíojäy ajcxy ñaygapxi co yaj'ōgaangixy je Saulo. ²⁴ Saulo ñejhuüy co anajty yaj'ōga'ñyii. Chi jim anajty ajcxy y'ahuixyii xim tzuum ma je poch aguu cajppābi, jim anajty yaj'ōga'ñyii. ²⁵ E je jāy ajcxy huídibi anajty ymījpidacpy Jesús, chi je' ajcxy codiñajxy je Saulo mījcatchoty ma je pochycop huídibi je cajp mīd jūbojtz'ahuídityity, e jadu'n je' choocy.

Saulo yajpaady jim Jerusalén

²⁶ Co Saulo yja'ty jim Jerusalén, oy japuyöyihuaañ je mībijcpīdijc ajcxy. Nidüg'óciy anajty ajcxy ooy tzigūyigixy anajty com ca' anajty mībijccixy co je Saulo ti anajty yjothuimbity. ²⁷ Chi Bernabé yajnicxy Saulo ma je nimajmetzp apóstoles ajcxy yajpaady, e chi yajmīdmīydactay nej Saulo anajty ti ixxy je Huindzin Jesús tü'am, e nej anajty Saulo Jesús y'ayuc ti capxhuäcxī huinmic jotmic jim Damasco. ²⁸ Huin'it Saulo yhui'my jim Jerusalén, e mīd huídity anajty ajcxy. ²⁹ Aamic jotmic capxhuäcxxy je Huindzin Jesús y'ayuc, etz mīd mīydaaccixy e ñaymicmīgápxigixy mīd je judíojäy huídibi griego ayuc caxp. E je' ajcxy nihuinmayiib co yaj'ōgaangixy. ³⁰ Co je mībijcpīdijc nejhuüy, chi ajcxy yajnicxy je Saulo jim Cesarea, e chi ajcxy quejxnajxy huen nicxy jim Tarso.

³¹ Huin'it tiempo je' ajcxy huídijaty mījpidacp Jesús, jotcuic anajty chinaaygixy, e nīgi anajty ixpījc'idīch Dios y'ayuc ytiy'ajt, jadu'n nej yi huídibi ajcxy tzinaayb ma yi Judea ñaaxjot, Galilea ñaaxjot, etz Samaria ñaaxjot. Chi ajcxy ooy yajmīj'ajtcixy je Huindzin Jesús, e mīd je Espíritu Santo ypubéjtin, nīgi anajty yjacmayiigixy.

Pedro yajtzoocy Eneas

³² Co anajty Pedro yhuídijty cogapxīy cajp cajp je mībijcpīdijc ajcxy, y'oy nañ jadu'n ma je mībijcpīdijc ajcxy huídibi tzinaayb jim Lida. ³³ Jim minaybaatti tüg yēydijc huídibi anajty yxii Eneas, huídibi anajty ti ypa'm'ijtni tuctujc jimijt, hue' je' anajty ycixuxy ytecyxuxy. ³⁴ Chi Pedro nimay:

—Eneas, Jesucristo xyajtzoocp, pīdīg, etz yajpīdīg yi mmaabejt.

Chi Eneas mic'amy ypidīg. ³⁵ Chi ijxy tüg'óciy jāy huídibi tzinaayb jim Lida etz Sarón. Chi ajcxy yjothuimbijttay nidüg'óciy, ixmajtztay tüg'óciy yi ñi'ap huinma'ñ e jījptīgīy yi Huindzin Jesús y'ixpīcīn.

Co Dorcas y'o'cy, chi yjugypījcy jadüg'oc

³⁶ Je huin'it tiempo jim Jope, jim anajty tüg töxyjäy chināy huídibi mībijcp Jesús, hue' anajty yxii Tabita, je' huídibi griegojäy ytijyp Dorcas. E je Dorcas oy xii tiempo anajty yajnaxy m'oyjäy'aty yi jāy ajcxy. ³⁷ Jadu'n yajti huin'it tiempo Dorcas ypa'mbejty, e chi ytimy'o'cy. Co ajcxy yajtziiday, chi ajcxy je öcpi yajnicxy ma je tījc mīmejtznihuijtzpetypī. ³⁸ Je Jope cajp

naymihuingon'ájtíp anajty m̄id Lida cajp ma anajty Pedro yajpaady, co m̄ibijcp̄idijc ajcxy anajty nejhuíy co je' anajty yj̄im̄ity, chi ajcxy mejtz yēydijc quejxy co huen n̄im̄ayii:

—Min tzojc ya Jope.

³⁹ Huin'it Pedro ñicxy m̄id je' ajcxy. Co jim yja'ty, chi ajcxy yajnicxy ma je t̄ijc m̄imejtzñihuijtzpetȳpi, e jim anajty ajcxy je co'ögy töxyjäydijc ajcxy ytinayjühuiditȳi ma je öcpi, chachyaaxcixy. Chi ajcxy Pedro yaj'ijxy je huit n̄ijen huídibi Dorcas anajty ti yaj'oȳiy co anajty yjugy'atyñi. ⁴⁰ M̄ic'amy je Pedro quejxp̄idzimday je jäy ajcxy. Chi ycoxtinay'ahuíy, e Dios m̄ibijctzoy. Chi huind̄icxpejty je öcpi, n̄imay:

—Tabita, p̄id̄ig.

Huin'it Tabita yhuind̄icx̄igy, e ijxy je Pedro, chi ññayguḡiy. ⁴¹ Chi Pedro majtz̄i yci', e chi huijtz̄igy. Chi yaaxi ym̄igügt̄ijc etz co'ögytöxyjäydijc ajcxy, chi ajcxy yajc̄id̄iḡiy juugy. ⁴² Tüg'óc̄iy jäy ajcxy jim Jope nejhuíyday co Pedro yajjugyp̄ijcy je Dorcas. E mayjäy m̄ibijcy je Huindz̄in Jesús. ⁴³ Jadu'n yajty co Pedro y'ijty jim Jope canaag x̄i ma je coodzpi yt̄ijc huídi anajty yx̄i Simón.

10

Pedro etz Cornelio

¹ Jim Cesarea anajty t̄üg tungm̄idpi huídi anajty yx̄i Cornelio, hue' je' anajty capitán'ajtp ma t̄üg batallón soldado ajcxy yx̄ijip, la Italiana. ² Je Cornelio ooy anajty ytudägyity, etz je' m̄id t̄üg'óc̄iy y'ung ytöxyijc ooy anajty yajm̄ij'ajtcixy Dios. Je Cornelio nañ jadu'n ypubety m̄id meeñ je judíojäy ayoobt̄ijc, e je' Dios ojadajt anajty jabom jabom. ³ Tüg x̄i, m̄inacyx̄i anajty, Cornelio huin'ijxy janch huädz Dios t̄üg y'ángel ñigidaaci, e ñimaayi:

—¡Cornelio!

⁴ Chi Cornelio huind̄icxpejty je ángel janch tziḡiyb anajty, e chi yajt̄iy:

—¿Ti Huindz̄in?

Huin'it je ángel y'adzooy:

—Jadu'n nej m̄Dios'ojadaty etz jadu'n nej mbubety ayoobt̄ijc ti Dios jäyḡidägy. ⁵ Quex mjäy jim Jope, huen nicxy yajtzoñ Simón, huídibi nañ jadu'n yajt̄ijp Pedro. ⁶ Jim je' yja'ttacy ma jadüḡpi Simón, je cootzpi huídi yt̄ijc m̄ihuingon mejypa'. Je Pedro xyajnim̄ahuípy ti mdunipy.

⁷ Co je ángel ñicxni huídi anajty ti ym̄igapxyii, chi Cornelio yaaxi mejtz ytumbi, etz t̄üg soldado huídi Dios capxym̄idoob, etz huídibi je Cornelio ooy ym̄ijn̄icxpedyii. ⁸ Chi yajm̄idm̄ydactay nej je ángel ñimaayi, chi ajcxy quejxy jim Jope.

⁹ Com jabom jim anajty je quejxyöybi ajcxy ñicxy m̄ihuingon Jope, cujc yx̄i anajty, e chi Pedro ypejty ma t̄ijcñicx Dios ojadajtp. ¹⁰⁻¹¹ Ooy Pedro anajty yuubögyii, e ooy jacaya'ñ, jimni anajty yj̄icxy yaj'oȳiyii. Chi Pedro huin'ixy je tzajp ahuädz, e huin'it ijxy quidägy jadu'n nej poob huit m̄ijpi yx̄óchity majaty ytaatz. ¹² Jiiby ma je poob huit, jiiby anajty canaagnax iyujc huídijaty m̄idaax yci' ytecy etz tza'ñ etz joon. ¹³ Huin'it Pedro m̄idoy co anajty ñim̄ayii:

—Pedro, p̄id̄ig nicxy yaj'öḡ ȳi iyujc etz tzüdz.

¹⁴ Chi Pedro y'adzooy:

—Ca', Huindz̄in, caminaabi ñich ti njicxy huídibi jib̄icip etz huídibi ca' ñigödúcyity nicxy judíojäy j̄icxcixy.

¹⁵ Huin'it jadüg'oc ayuc m̄idoy ñim̄ayii:

—Huídibi Dios yajhuäch ca' huaad mdijy co ȳi' yjib̄icity.

¹⁶ Tugüig'oc jadu'n yjajti, chi je poob huit ypättigüyñi tzajpjoty. ¹⁷ Jim anajty Pedro tzachhuinmay nej anajty yhuimbídzimy je tibi ixy co yja'ty ma tijc aguu je Cornelio yquexyöybi huidi ajcxy anajty nidihuip yajtihuip je Simón ytijc. ¹⁸ Chi ajcxy mic ycogapxiy yajtiy pen jim anajty yjättägy Simón huidibi anajty nañ jadu'n yajtijp Pedro. ¹⁹ E je Pedro je' anajty chachhuinmaayb tibi ixy, chi je Espíritu Santo Pedro ñimaayi:

—Tugüig yëydijc ji xy'ixtäy. ²⁰ Pidíg e minac, nicx müd je' ajcxy, e ca' ti mhuinmay, com ich jadu'n ti nímäy co huen xy'ixtäy.

²¹ Huin'it Pedro ymínajcy ma je' ajcxy, je Cornelio quexyöybi, nímäy ajcxy: —Ich je' huidibi miich ajcxy m'ixtaayb, ¿ti ycipi co ti mmiingixy?

²² Chi ajcxy y'adzooy:

—Yi' ich ajcxy ti xyquexyich yi Cornelio huidibi capitán'ajtpi, je' tudägy jäy huidibi Dios yajmij'ajtp, je huidibi tüg'óciy judíojäy ooy tzójccixy, etz cömaaygixy. Huindzin Dios tüg y'ángel ñimay Cornelio co miich miñ nya-jhuoy, jigix mnícxip ma yi' ytijc, e y'amido'ida'ñ ajcxy nej miich myaj'ixpiga'ñ.

²³ Chi Pedro yajtijctigüy je' ajcxy. Chi ajcxy jim ymaahu'my. Com jabom Pedro ñicxy müd je' ajcxy, e chi nijëjity ypanicxi huidibi mijpidacp Jesús huidi anajty ajcxy tzinaayb jim Jope.

²⁴ Com jabom ajcxy yja'ty jim Cesarea ma Cornelio anajty y'ahuixy tügmucy müd yjugymigüg, etz nijëjity pin ooy müd ñaymigüg'adyi, huidijaty anajty ajcxy jayijp ti nímäy. ²⁵ Co Pedro oyjäty ma je tijc, chi Cornelio ytijcpídzimy oy yijpcobadiy je Pedro, e chi ycoxtinay'ahuixy yajmij'ada'ñ anajty je Pedro.

²⁶ Chi Pedro huijztinayigy je Cornelio, e nímäy:

—Tinayíg, ca' xyajmij'ida'ñich, nañ jadu'n ich njäyity nej miich.

²⁷ Müd anajty ycapxy ymiydägy co ytijctigiy, jüby anajty mayjäy ni'amugí'ahuijxcixy. ²⁸ Chi Pedro nímäy ajcxy:

—Miich ajcxy mnejhuixy co yi judíojäy ycostumbre capx'aducy ca' huaad judíojäy yöymucy müd huidibi ca' yjudíojäyity, ca' huaad ytigüygixy ma ajcxy ytijc. Per Dios ti xyajni'ixiyich co ca' huaad nmína'ñich ca' oyjäyity huádzjäyity pinjaty. ²⁹ Paady co oy ti xyajhuoyiijich ti nmiiñich, ni ca' huam ti nmína'ñich. Nnejhuíhuaamyich na'amy co oy ti xyajhuoyiijich.

³⁰ Chi Cornelio y'adzooy:

—Cham ymímidaaxxiijy, jadu'n nej jadachambi hora, ya ich anajty ma ndijcich, jaygay jay'ügy nDios'ojadatyich. Com hue' anajty mijminacy xi mina judíojäy ajcxy ycapxtaaccixy, co tüg ñayguëxíci jadu'n nej jäy müd ypoob huit janch adicxp. ³¹ E je ángel xyñimaayich: “Cornelio, Dios ti xymidoohui m'oración e ti jadu'n jäygidägy jadu'n nej mbubety yi ayoobtijc ajcxy. ³² Quex mdumbi jim Jope, huen nicxy yajtzoñ Simón huidi nañ jadu'n yajtijp Pedro. Jim Pedro yja'ttägy ma je cotzpi ytijc huidibi yxi Simón, huidibi tzinaayb mihuingon mejypa'. Co je' ymiinipy, chi xymídmíydägy.” ³³ Paady nguejxyich janch mic'amy huen nicxy xy'ijxtäy. E ti may'ajt mduñ co ti mmiñ. Jadachambi cha ich ajcxy nidüg'óciy ma Dios yhuindu. E n'amido'idángixyich tüg'óciy je y'ayuc huidibi je Huindzin Dios ti xyaj'ane'my jëbi xyajnimaygixy.

Pedro Dios ytiy'ajt nigapxy nímíydacy ma Cornelio ytijc

³⁴ Huin'it Pedro ytigüy y'ayuccapxhuäcxi, nímäy ajcxy:

—Jadachambi huinjihuixyich, co yi Dios ca' ni tüg ixy'ixy jäy, y'actzojctaayb hueñypínity. ³⁵ Dios ycöbijcipy hueñypinjäyity huidibi tzinaayb huen huidibi naax huen huidibi cajpity, pen chigüyb ajcxy Dios, pen tumyb oybi. ³⁶ Dios ti quexy yi' ytiy'ajt ma yi Israel jäy ajcxy, yajnimay co ji cham jotcuyc'ájtin müd

Jesucristo ñich ajt nHuindzin. ³⁷ Miich ajcxy mnejhuñyb yajxon nej ti ytunyii ti yjadyii ma judíoñäy ajcxy ñaax ycajp chondacy jim Galilea, Juan el Bautista ti anajty capxhuäcxi Dios y'ayuc ytiy'ajt etz yjääyajnñibety. ³⁸ E mnejhuñyb miich ajcxy co Dios yejc je Jesús je Nazaretpi je Espíritu Santo, e nej Jesús yhuidiyty e tuuñ oy'ájtín, etz mijhuinma'ñ, jadu'n nej yajtzocy je jäy ajcxy huidi anajty ane'm'ijtp ma yi mujcu'. Com Dios anajty mñid y'ity je Jesús. ³⁹ ñich ajcxy je tiy'ajt nmñidich tüg'óciy jadu'n nej Jesús yjajty y'ayoy jim Judea naaxjot etz jim Jerusalén. Huin'it ajcxy Jesús yaj'o'cy cruudzcíxy. ⁴⁰ E Dios yajjugypijcy codugñg xñi, e chi yajnayguëxñi ma ñich ajcxy. ⁴¹ Ca' ti yajnayguëxñiyii ma tüg'óciy jäy, jeyi ma ñich ajcxy huidi jayijp Dios yhuin'ijx jigix tiy'ajt nyegipyich. ñich ajcxy caaymujc uucmujc huin'it co yjugypijcy ma y'o'cy. ⁴² Ti xyquexy ñich ajcxy ayuc ngapxhuäcxpi ma mayjäy ajcxy etz nidiy'ajt'adipyich ajcxy co Dios Jesús ti pidägy mij'ane'mbi ma yi juugypí etz ma yi ögypi. ⁴³ Nañ jadu'n jecy'ajty tüg'óciy Dios y'ayucnajtzcaxñiybi ñimiydac ajcxy Jesús, e ymñañ ajcxy co tüg'óciy je jäy ajcxy pinjaty mibijc je Cristo, Dios huinmecñib ajcxy ypocy.

Je Espíritu Santo ycidacy ma je ca'pi ajcxy yjudíoñäyity

⁴⁴ Yam anajty Pedro ycapxyñi co je Espíritu Santo ñidigñiyi ycodigñiyi ajcxy nidüg'óciy huidiyaty y'amido'ijt Pedro y'ayuc. ⁴⁵ E je judío mibijcpidijc ajcxy tñibi anajty mññ mñid Pedro, ooy ajcxy jihuiy huinmay co Dios quejx Espíritu Santo ma je jäy ajcxy huidibi ca' yjudíoñäyity, ⁴⁶ co midoy ycapxcixy mñid huingbi ayuc, etz cömaygixy jäymejtzcixy Dios. ⁴⁷ Chi Pedro ymñañ:

—¿Nej ca' jada' y'óyity co ññibedipy ajcxy huidibi Dios ti ymóoyigixy je yEspíritu Santo jadu'n nej ñich ajt xymooyim?

⁴⁸ Chi Pedro ni'ane'mdñiy huen ññibejtccixy ma Huindzin Jesucristo yxñi. Huin'it ajcxy Pedro cohuanñiy huen hui'my tüg xñi mejtz xñi mñid je' ajcxy.

11

Pedro yajmñdmíydacy jim Jerusalén nej anajty ti ytuñyii ti yjadyii

¹ Je apóstoles ajcxy etz je mibijcpidijc ajcxy huidi anajty ajcxy jim Judea, midoy ajcxy ayuc co nijëjity jäy huidi ca' yjudíoñäyity ti anajty ajcxy cöbñijcy Dios y'ayuc. ² E co Pedro yhuimbijty Jerusalén, chi nijëjity judíoñäy ajcxy ooy Pedro, je' ajcxy huidibi tzachmijpidaaccixp judíoñäy ycostumbre jadu'n nej ajcxy tiy'ajttiygixy ymang. ³ Je' ajcxy nimay Pedro:

—¿Na'amy co oy ti mgo'ixñiy jäy ajcxy huidi ca' yjudíoñäyity, etz ti mgay m'ügy mñid je' ajcxy?

⁴ Chi Pedro nimíydactay tüg'óciy jadu'n nej anajty ti yjaty, chi ymñañ:

⁵ —Jim ñich anajty Jope nDios'ojadatyich. Chi nhuin'ijxyich jadu'n nej tüg mij poob huit chooñ tzajpjoty, cidägy ma ñich nhuinduu, xóchity anajty ma mñidaax ytaatz. ⁶ Co nnimijhuägyich n'ixa'ñich ti jiiby, chi n'ijxyich may iyujc, jiiby iyujc mñidaaxpi yci' ytecy, jiiby ahua'nbi iyujc, jiiby tza'ñ, etz joon.

⁷ Chi nmidooyich tüg ayuc huidibi xyñimaaybich: “Pedro, pidig, yaj'ög yi iyujc etz tzüdz.” ⁸ Chi n'adzooyich: “Ca' Huindzin, com caminaabi ndzüchich iyujc huidibi ca' ñigo'adúcyity judíoñäy ajcxy tzüdzipy.” ⁹ Chi mñmetz'ocpi tüg ayuc tzajpcixy xyñimäyich: “Huidi Dios ti yajhuäch, ca' huaad mdijy co ca' y'oychú'tznity.”

¹⁰ Tugñg'oc jadu'n yjajti, chi je poob huit ypättigñiyñi tzajpjoty. ¹¹ Huin'it xyñimññich je quexyöybi nidugñg, chooñ ajcxy jim Cesarea. ¹² Chi je Espíritu xyñimaayich, co min n'ocñicxich mñid je' ajcxy, ca' ma ni ti nhuinmayipyich. Mñid ñicxyich nidugñg nmigügtijcich. Chi ñich ajcxy ndigñiy ma je jäy ytiyc. ¹³ Je codijc xyajmñdmíydaacich co je' anajty ti

huin'ixy tüg ángel ma ytiyc, ñimäyii: “Quex mdumbi ajcxy jim Jope huen nicxy yajtzoongixy Simón huídibi jäy ytiy Pedro, ¹⁴ e je' xyajnimähuiip nej jëbi Dios m'alma xyajnidzoocip, miich etz tüg'óciy mjiin mdiyc mjuugy-migüg.” ¹⁵ Co Jesús y'ayuc ngapxhuäcxtzondaacich, chi je Espíritu Santo ñidigiyyi ycödigiyyi je' ajcxy. Tim jadu'n nej xyñidigiyyim xycödigiyyim je jayijp'atypi. ¹⁶ Huin'it njäymejtzcoodyich nej je Huindzin Jesús ymíñañ: “Janch Juan, je Bautista, jäy yajniibejt miid ñi, e Dios jäy ajcxy y'adigihuiyb yjottigihuiyb je Espíritu Santo.” ¹⁷ Pen Dios ti ymöyii je jäy ajcxy huídibi ca' yjudíojäyity tú'ciy miid huídibi ich ajt ti xymooyim co nmibijcim Jesucristo. ¿Ocjactim pin ich co Dios nmidzip'adiybich?

¹⁸ Je mibijcpidijc ajcxy jim Jerusalén, co ajcxy midoy Pedro y'ayuc, chi ajcxy y'amonday. Chi ajcxy Dios jäymejch cömay, chi ajcxy ymínaangixy: “Dios jadu'n ti ymíñañ co je' ajcxy huídibi ca' yjudíojäyity jëbi yjothuimbijtcixy, jigix Dios ymöhuiyb jugy'ájtin huinixibi.”

Antioquía jäy ymidoo ajcxy Dios y'ayuc

¹⁹ Taabi jäy yaj'o'cy Esteban, chi jäy ajcxy ooy ixhuídiycoty pahuídiycoty Jesús yjäy jim Jerusalén. Chi nijëjity ajcxy yqueecy, nicxy ajcxy jim Fenicia ñaaxjot, etz jim Chipre, etz jim Antioquía. E capxhuäcxy ajcxy je oybi ayuc ma jadyii judíojäy, ca' ajcxy jac ni pin yajnimay. ²⁰ E nijëjity mibijcpidijc huídibi jim anajty ajcxy yconaaxip ycogájpip Chipre etz Cirene, chi ajcxy ñicxy jim Antioquía. Chi yajmídmíydacy ajcxy je Huindzin Jesús y'ayuc miid griegojäy ajcxy. ²¹ E je Huindzin Dios ooy ypubejti je' ajcxy, e ooy mayjäy ixmajch je jibic-huinma'ñ etz mijpidaaccixy yi Huindzin Jesús ytiy'ajt.

²² Co je mibijcpidijc ajcxy jim Jerusalén midoogixy jada ayuc, chi ajcxy quejxy Bernabé jim Antioquía. ²³ Co Bernabé jim yja'ty, chi ijxy jadu'n nej Dios anajty oy'ájtin ti tuñ, chi oy yjotcugüy je Bernabé. Chi capxhuijy tüg'óciy co huen ajcxy janch cixyjot huinijot cuyduuni yi Huindzin Jesús y'ayuc ytiy'ajt. ²⁴ Com Bernabé oyjäy je' anajty, e ooy mijpidägy Dios y'ayuc etz ooy miidity je Espíritu Santo jotjoty huinma'ñjoty. Ymiid je' ycapxhuíjin ooy mayjäy mijpidacy Jesús y'ayuc ytiy'ajt.

²⁵ Co jadu'n yjajti, chi Bernabé oy ixtay Saulo jim Tarso, e co paty, chi miidmiñ Antioquía. ²⁶ Jadu'n yjajty jim ajcxy y'ijty tüg jimíjt, yaj'ixpijccixy je mayjäy huídibi ajcxy jijptigiyiy je Jesús y'ixpijcin. Jim Antioquía oga'n yximoy cristiano, je jäy ajcxy huídibi mijpidacp Jesús.

²⁷ Huin'it tiempo nijëjity tiy'ajtnajtzcapxhiybi chooñ Jerusalén ñicxy ajcxy jim Antioquía. ²⁸ Tüg huídi anajty yxi Agabo ytinay'ahuüy mayjäyoty, e chi je Espíritu Santo yajcapxi, e ymíñañ co mijyuu anajty ñaxcidäga'ñ huindu'ñybi naaxhuiñ. E janch jadu'n yjajti taab anajty Claudio y'ane'my. ²⁹ Huin'it je mibijcpidijc ajcxy jim Antioquía pidacy ajcxy yhuinma'ñ co quexaangixy pubéjtin ma ymigügtijc ajcxy huídi tzinaayb jim Judea, jadu'n nej pubéjtin pin tim yega'ñ. ³⁰ E jadu'n ajcxy tuuñ. E je meeñ tibi anajty ymucy yajmigüejxy ajcxy je Bernabé etz Saulo ma je mibijcpidijc tungmídpi jim Judea.

12

Co Jacobo y'o'cy etz co Pedro yajpujxtijctigiyi

¹ Huin'it tiempo je rey Herodes yajmajtzi nijëjity Jesús yjäy, e chi yajtzaachy-tuuni. ² Chi ni'ane'mdiy huen yaj'ögyii miid espada je Jacobo, je Juan y'uch. ³ Co je rey nejhuiy co je judíojäy ajcxy jadu'n ooy jäygidaccixy, chi ymajtzi Pedro nañ jadu'n. Hue' jadu'n yjajti xijoty, je xii mína tzajcaagy caaygixy huídi ca'pi ylevadura miidity. ⁴ Co Pedro yajmajch, chi yajpidacy pujxtigoty. E

chi je rey ane'my co huen mīdaaxpicy soldado ajcxy cuend'adyii, tūgpicyjaty mīdaax soldado ajcxy. Hue' anajty je rey ti huinmay xīnaxy anajty tīyduna'ñ Pedro mayjäy agujc. ⁵ Pedro jīby anajty pujxtīgoty janch oy cuend'aty. E je mībijcpīdījc janch Dios mībijctzodīib anajty ajcxy mīid Pedro ycīxpī.

Dios y'ángel yajpīdzīmy Pedro pujxtīgoty

⁶ Huin'it coodz ma ca'ni anajty yxīmīy, ma je Herodes anajty tīyduna'ñ Pedro mayjäyjoty com jabom, Pedro maab anajty, e soldado agujc ajcxy cīxoch tecyoch anajty mīid cadena, e jadūgpicy soldado ajcxy pujxtījc'aguy anajty ajcxy ycuend'aty. ⁷ Chi janch tīmetiini yHuindzīn Dios tūg y'ángel ñayguēxīci ytīnāy ma Pedro yhuinduu, e je pujxtījc yaj'anīyday. E chi je ángel tījyūcxy Pedro ma ycaach, chi yajmāyhuijy, e nīmay:

—Pīdīg mīc'amy.

Chi je cadena ycāday ma Pedro yci'. ⁸ Chi je ángel nīmay Pedro:

—Ñayhuīni, yajtīgī' mgīg.

Co Pedro yajtīgīyday ycīg, chi je ángel ñīmaayi:

—Yajtīgī' mījocxhuit, e pajamgīch.

⁹ Chi Pedro pujxtījc pīdzīmy axam ma je ángel, ni ca' nejhūīy pen janch anajty huīdībī je ángel tūmyb, hue' jīhuīy jadu'n nej ycumāy. ¹⁰ Chi ñajxy ajcxy ma tūgpicy cuend'ajtpī, mīc'amy ajcxy mīmetzpi nīnajxy. Co ajcxy yjāty ma mījpujxtījc aguu, ma mījtūba', chi je' cī'm'ahuaach. Chi ajcxy ypīdzīmy. Tī anajty mījyōygixnī co je ángel ixmajtznī Pedro. ¹¹ Huin'it Pedro yhuinma'ñ ymejch, chi ymīnañ:

—Jadachambi nījhuīybīch co janch jada' co je Huindzīn Dios tī quexy y'ángel, e yī' tī xyñīhua'ñīch ma Herodes, etz jadu'n nej tūg'óciy judío jāy ajcxy anajty xytuna'ñīch.

¹² Co Pedro yjot yhuinma'ñ ymejch, chi ñīcxy ma María ytījc, je Juan ytaj, je Juan huīdi jāy ytījpy Marcos, ma anajty ajcxy jīm mayjäy tūgmucy y'ljtcīxy Dios mībijctzoogīxy. ¹³ Co Pedro tījc'aguu cojxnojcy, je tība'y'amybī, chi tūg tōxy'anāg ypīdzīmy huīdi anajty yxī Rode, ixa'ñ pīn je' tījc'aguu cojxnojcy. ¹⁴ Co oy yōgmīdoy co Pedro je' anajty, chi ca' ytījc'aguu yaj'ahuaach. Jēyī co poyīgī ñīcxy tīgoty co anajty tzachjotcūjcity, nīgapxy co Pedro je' anajty ma tījc'aguu.

¹⁵ Chi je jāy ajcxy nīmay Roda:

—Mloocjīyb jada' mīich.

Chi je tōxy'anāg y'adzooy co janch je' anajty. E je jāy ajcxy ymīnaangīxy co ca' yī' yjējty, hue' jada' Pedro y'ángel.

¹⁶ Yam Pedro anajty tījc'aguu tzachcojxnocy co ajcxy yaj'ahuaach, chi ajcxy ijxy, chi ajcxy ooy chīgīy yjīhuīy. ¹⁷ Pedro cīmīid ytīy'ajtyejcy co huen amōñ ajcxy. Chi yajmīdmīydacy nej je Huindzīn Dios anajty tī yajpīdzīmyīi pujxtīgoty. E nīmay ajcxy co huen nīcxy yajmīdmīydāgy jada je Jacobo etz jacjadyīi mībijcpīdījc.

Chi Pedro ñīcxy huingbī cajp.

¹⁸ Co yxīmīy, huin'it soldadtījc ajcxy ooy ytīgīy huambi jīhuīybī huīnmay'ahuīdījty, com ca' nejhūīygixy nej je' anajty tī ytunyīi tī yjadyīi mīid Pedro ycīxpī. ¹⁹ Chi Herodes nī'ane'mdīy huen nīcxy yaj'ixtāy Pedro. E co ca' yajpaty, chi pījctzoy tīy'ajt ma soldado ajcxy huīdi anajty Pedro tī ycuend'adyīi. Chi nī'ane'mdīy huen ajcxy nīcxy yaj'ōgyīi. Chi Herodes choōñ jīm Judea, chi oy chīnāydacpīcy jīm Cesarea.

Herodes y'ōgy

²⁰ Herodes janch ymijotmätpy anajty je jäy huidibi tzinaayb jim Tiro etz Sidón. Chi je Tiro etz Sidón jäy ajcxy ñaygapxi nej jëbi huingohuägihuaangixy je rey. E ymimadac ajcxy co migapxy je Blasto je miltungmüdpí maabi rey Herodes ytijc. E chi ajcxy pijctzoy co huen tzip cixy naxy, com co ajcxy xijc mooc jim anajty yajtzoongixy ma rey ñaaxjot. ²¹ Chi Herodes agapxtujcy tüg xii, chi je reyhuit yajtigiiy, chi ñaydac paty ma ycötujctac, chi migapxy ajcxy je jäy. ²² Chi je mayjäy ajcxy ytigiiy mic capxp miydaacp, chi ajcxy yminaangixy:

—¡Jada jäy huidibi capxp, ca' jada yjäyity, jadu'n yi' nej tüg dios!

²³ E huin'itiiy Huindzin Dios y'ángel yajpa'mbejty Herodes, com ca' anajty huindzigiiy cömay je Dios. Chi y'o'cy, ting je' tzützaayi.

²⁴ Je Huindzin Dios y'ayuc mibijc'idichpy anajty jäy, e yajcapxhuäcxp anajty hueñytimma'amyity.

²⁵ Co Bernabé etz Saulo ajcxy ytungmay jim Jerusalén, huin'it chooni ajcxy jim ymüdnicy huidibi anajty yxii Marcos.

13

Bernabé etz Saulo yajtzondaaccixy ytung huidibi ajcxy pátip

¹ Ma je' ajcxy huidi mijpidacp Jesús jim Antioquía, jim anajty jadyii huidi Dios y'ayuc yaj'ixpijcp anajty, etz nañ huidibi tiy'ajt najtzcaxxiyb. Jim anajty Bernabé etz Simón, huidi anajty ajcxy ytijpy el Negro, etz Lucio huidi tzoon Cirene ñaaxjot, etz Manaén huidi tüg yeectac müd Herodes, huidibi ane'm jim Galilea, etz Saulo. ² Tüg xii ajcxy ñayyöymújciigixy jaygay jay'ügy Dios ojadajtcixy. E chi je Espíritu Santo ñimaayi:

—Huen pidáacigich ajcxy Bernabé etz Saulo ahuing jigix ajcxy ytunipy ma je tung tiibi nyajnihuohuüich.

³ Chi ajcxy yjacDios'ojadajtty etz yjac'ayuu'ajty, e chi je jäy ajcxy cínixajy Bernabé etz Saulo, e chi ycapxycijxy müd je' ajcxy.

Je apóstoles ajcxy capxhuäcxixy Dios y'ayuc jim Chipre

⁴ Chi jada' je Espíritu Santo yquejxi Bernabé etz Saulo huen nicxy Seleucia, e jim ajcxy ybarcotigiiy nicxy ajcxy jim Chipre mejy agujcpi. ⁵ Co jim ajcxy yja'ty ma barco yjättac huidi yxii Salamina, chi ytigiiy Jesús y'ayuccapxhuäcxp ma je judíojäy ajcxy naymujctac. Tzooñ je Juan anajty nañ jadu'n je' anajty Bernabé etz Saulo pubéjtíp. ⁶ Huidijttay ajcxy ma je naax mejy'agujcpi, e yja'ty ajcxy ma je cajp huidi yxii Pafos. Jim ajcxy paty tüg judíojäy huidi anajty yxii Barjesús, hue' je' anajty huijyjäy, e ñaydiyii anajty co Dios ytii'ajt najtzcaxxiyi, e ca' anajty yjanchity. ⁷ Je huijyjäy ooy müd ñaymigüg'adyii anajty je huidibi ane'm jim, hue' anajty yxii Sergio Paulo. Je Sergio Paulo ooy anajty ycohuinma'ñity, ooy y'ixpicyity. Chi ni'ane'mdiy co huen nicxy yajtzonyii Bernabé etz Saulo. Com je Sergio Paulo anajty midoohuaani je Dios y'ayuc. ⁸ Je huijyjäy, huidi nañ jadu'n yajtijp Elimas, midziptzoñ Pablo etz Bernabé, e tücciy capxadugañ ca'ydí je gobernador ymibicy. ⁹⁻¹⁰ Chi Saulo, huidibi nañ jadu'n yajtijpy Pablo, müd je Espíritu Santo huindicxpejty je huijy jäy, e nimay:

—¡Ooy mjibicjäyity miich, ooy m'anijity, mujcu' miich xy'ung'ajtp, ooy mmidzip'aty pinjaty oyjot oyhuinma'ñ müd! ¿Mina m'ixmadzañ nej mdzachyajtigoyañ je Huindzin Dios ytii'ajt? ¹¹ Jadachambi je Huindzin Jesús ychachytunaamb, e mhui'mip huiintz, etz ni ca' je ximbi tzojc m'ixipy.

Chi je huijyjäy mic'amy yhui'my huiintz coodz, chi ixtay pin oc-huijtznicxiib com ca' anajty y'oc'ijxni. ¹² Co je gobernador jadu'n ijxy, chi mijpidacy Jesús

y'ayuc, e chi ooy jihuüy huinmaay nej Pablo nimíydägy je Huindzin Jesús y'ayuc ytiy'ajt.

Pablo etz Bernabé yajpátciy jim Antioquía etz Pisidia

¹³ Chi Pablo etz ymigügtijc ajcxy mïid ybarcotigüy, chi ajcxy ñicxy Perge ma Panfilia ñaaxjot. Chi Juan puyöyduutni Pablo etz Bernabé, e chi ñicxni Jerusalén. ¹⁴ Pablo etz Bernabé ñajxy jim Perge oyja'tciy jim Antioquía ma Pisidia naaxjot. Sábado xii ajcxy ytigüy ma je judíojäy ajcxy ñaymujctac, chi ajcxy ixtactay. ¹⁵ Co ñecycapxtay ma Moisés ñecy etz Dios y'ayucnajtzcaxüybi ñecy, chi je naymujctac huindzin quejxy ayuc ma Pablo ajcxy, ñimaayi:

—Migügtijc, pen mmïid ayuc tiy'ajt mïid jäy ycixpi jëbi cham myajnimäy ajcxy.

¹⁶ Chi Pablo ytinayigy, yci' mïid ytiy'ajt yecy co huen amoongixy, e nimay ajcxy:

—Midoogix, miich Israel jäy ajcxy, etz huídibi Dios yajmij'ajtp. ¹⁷ Je Israel jäy Dios huin'ijxy ñich'ajt nmij'ap nmijteedy jecy'ajty etz yajyujcpejt ajcxy mïcho'n co anajty ajcxy jim yjactzinäy Egipto ñaaxjot. Chi ajcxy yajpidziimni mïid Dios ymic'ajt. ¹⁸ Dios je' ajcxy mihuindinay huixchigüpx jimijt jim mijtigüduum. ¹⁹ Je Dios huixtuyc it naax cajp yajtigoy huídi anajty jim tzinaayb Canaán ñaaxjot, etz yajmoy je naax ñich'ajt nmij'ap nmijteedy jecy'ajty jigix ajcxy jim chinähuipy. ²⁰ Midaax migo'px jahuixchigüpx majc jimijt Dios mic'ajt mooy juez ajcxy huen ane'myii Israel jäy ixti mabaad Samuel je Dios y'ayucnajtzcaxüybi ytungbijcy. ²¹ Huin'it ajcxy tüg rey pijctzoy huídi ane'müib ajcxy. Chi Dios yajreytigüy Saul huídi tuun huixchigüpx jimijt. Je Saul yteedy hue' je' anajty yxii Cis, hue' je' anajty Benjamín y'ap y'oc. ²² Chi Dios tungbijcy Saul e yajreytigüy David, chi Dios ymínañ: “Ti nbaadyich David, Isaí ymang, tüg yëdyjc huídibi cuyduñahuipy nej ndimdzocyich.” ²³ Ma David y'ap y'oc Dios yajnibijcy Jesús, jigix nihuñahuipy yajniðzögipy je Israel jäy ajcxy, jadu'n nej anajty jécyip Dios yaj'ahuanüy ajcxy. ²⁴ Ca'ni anajty Jesús miñ co Juan, je Bautista, capxhuäcxy Dios y'ayuc ma je Israel jäy ajcxy, nimaaigy co copicy huen jothuimbijtcixy ma Dios, e huin'it jëbi ñibéjtcixipy. ²⁵ Co anajty Juan y'o'cin huigon, chi ymínañ: “Ca' ñich' njéjty je Cristo, jadu'n nej mmínaangixy. Jayijp ti nmíñich, jac'axam miina'ñ je Cristo; jacmic'ajt mïid je' ca'ydi ñich. Ca' xypaadyich ñicxy yi' ycighuin nguejich.”

²⁶ Chi Pablo yjacmínañ:

—Migügtijc, Abraham y'ijx y'oc etz pinjaty yajmij'ajtp Dios, Dios ti xya-jniguexy jada ayuc nej ajcxy jëbi m'alma nïdzoocin paady. ²⁷ Je jäy ajcxy huídi anajty ajcxy tzinaayb jim Jerusalén etz tungmüdpi ajcxy, ca' ajcxy nejhuüy pin je' anajty je Jesús, ni ca' anajty huinjihuüygixy y'ayucnajtzcaxüybi ajcxy y'ayuc huídibi anajty yajcapxp ma ajcxy ñaymujctac huindüg sábado. E je' ajcxy ci'm yajpocycäy Jesús, e cuyduñ nej anajty ajcxy yjaybétyty ma Dios ñecy. ²⁸ Oy ajcxy ca' paty pocy nej yaj'öccixipy Jesús, chi ajcxy nibijctzohüy ma Pilato co huen ñicxy yaj'ögyii. ²⁹ Co je jäy ajcxy cuyduñday jadu'n nej anajty yjaybétyty ma Dios y'ayuc mïid je' ycixpi, chi ajcxy yajminajcy cruudzcixy, etz oy yajnaaxtigüygixy. ³⁰ E Dios je Jesús yajjugypijc co anajty ti y'ögy. ³¹ Chi canaag'oc ñayguëxigo'ci ma ymigügtijc huídi anajty ti ymídhuididyii co chooñ Galilea ñicxy Jerusalén. Jadachambi yi' je' ajcxy huídi tiy'ajt yejcpy ma je jäy ajcxy.

³² Je oybi ayuc ñich miich ajcxy nyajmüdmíydacpy cham, huídi Dios yajnimay ñich'ajt nmij'ap nmijteedy jecy'ajty. ³³ Je oybi ayuc ti Dios cuyduñ cham ma ñich'ajt co yajjugypijcy Jesús co y'o'cy. Jadu'n yi' Dios y'ayucjoaybi

jaay jecy'ajty ma je Salmo necy m̄metzpi ma Dios jadu'n ym̄inañ: “N'ungich cham ti nyajjuugypicyich.” ³⁴ M̄id jadayaabi ycixpi co Dios ti yajjugypicy Jesús co y'o'cy, jigix ñin̄icx ca yhuindigoopy jadu'n anajty jaybétyity ma Dios ñecy ma Dios jadu'n ym̄inañ: “Nm̄ohuaamyich miich ajcxy je conúcxin huidibi nyajnim̄aayich je David.” ³⁵ Paady nañ jadu'n Dios y'ayucjoaaybi jaay jadüg'it, ma ym̄inañ: “Ca' Dios a'ixiy nicxy y'ung ñin̄icx yhuindigooy, je y'ung huidibi m̄id huädz jot huinmañ.” ³⁶ Com janch co je David Dios huin'ijxy, jigix ane'm̄ipy yi' yjuugy ym̄igüg ajcxy. E co ytung yajmay, chi y'o'cy, e je' y'alma ñaybaatti m̄id je y'ap yteedy y'alma, e je' ñin̄icx huindigooy je'. ³⁷ Je Jesús huidibi Dios yajjugypicy ca' je' ñin̄icx yhuindigooy. ³⁸ Migügtijc, jēbi mnejhuuygixy, co je pocyhuinmeecxin yaj'ihuäcxy yajcapxhuäcxy m̄id Jesús ycixpi. ³⁹ M̄id je' ycixpi pinjaty m̄ibijcp ti ypocyajhuinmeexcixy huidibi Moisés yley anajty ca'p pocyhuinmeecxin yecy. ⁴⁰ Nayguend'ajtigix, ix xyajcidacpejtcix je mij ayo'n jadu'n nej Dios y'ayucjoaaybi jaay jecy'ajty co Dios jadu'n ym̄inañ:

⁴¹ M̄idoogix ich n'ayuc, miich ajcxy n̄ixiicpi yajxiicpi, nay'adzigiyyigixy, ix m'alma myajtigooygixy. Com ich Dios ndumybich tüg mijhuinmañ ma miich ajcxy mx̄i mdiempo. May miich ajcxy ca' mm̄ibigipy, oy pin xyjayajm̄idm̄iydáaccixipy.

⁴² Co Pablo ajcxy ypidzimy ma yi judíojäy ñaymujctac, chi je jäy huidibi ca' yjudíojäyity nimay je Pablo co huen nañ jadu'n yajm̄idm̄iydäḡiyb ma je jadügpi sábado. ⁴³ Co ajcxy yöyhuäcxni ma nayoymujctac may judíojäy etz mayjäy huidi ca' yjudíojäyity huidibi jipjtigiyiy je judíojäy y'ixp̄jcin, panicxy ajcxy je Pablo etz Bernabé. Pablo etz Bernabé capxhuijy ajcxy co huen panicxcixy je tiy'ajt jadu'n nej Dios tiibi tuñ may'ajt m̄id jäy ycixpi, e ca' ajcxy ixmadzipy.

⁴⁴ Co sábado yx̄i paty, chi jäy ñayoymujci jahuenjaty cajp jäy ycanicxtay co anajty tzachm̄idoohuaangixy Dios y'ayuc. ⁴⁵ Ca' anajty ajcxy yjotcujcity co je judíojäy ajcxy ijxy je mayjäy. Chi ajcxy ooy yjot'ambijccoty ni'oj̄iygixy etz n̄imaaygixy oy ni nej Pablo. ⁴⁶ Chi Pablo etz Bernabé ytiigiy miccapxpi ym̄inañ ajcxy:

—Copicy anajty co ich miich nyajnim̄ahuipy Dios y'ayuc jayijp. Com ca' mgöb̄igaangixy Dios y'ayuc, e co ca' m̄naybidáacigixy tudägy ma jugy'ajt̄in m̄id huinix̄ibi, nicxyich n'ocyajnim̄äy ajcxy Dios y'ayuc huidibi ca' yjudíojäyity. ⁴⁷ Com jadu'n xy'ane'myich ajcxy yi Huindzin Jesús, e xyñimaayich ajcxy:

Ti ich miich nb̄idägy jadu'n nej tüg t̄icxin jajin ma tüg'óc̄iy naaxhuiñybi jäy jigix myajnejhuñhuipy ajcxy je n̄idzoocin jigumbaad huindu'my naaxhuiñ.

⁴⁸ Co ajcxy jadu'n m̄idooy huidibi ca' yjudíojäyity, chi ajcxy ooy niḡi yjotcuḡiy, e chi ajcxy ym̄inandacy co je Huindzin Jesús y'ayuc ooy anajty y'óyity. E may ajcxy m̄ibijcy huidibi anajty Dios ti yajnigödunḡiy co paatip jugy'ajt̄in huinix̄ibi. ⁴⁹ E jadu'n jim yajcapxhuäcxy Jesús y'ayuc ma je jimbi naax cajp. ⁵⁰ E je judíojäy ajcxy minaygapxi nijējity töxyjäydijc ajcxy tudägyp̄i huidibi Dios yajm̄ij'ajtp, etz je mijjäydijc, e je' ajcxy m̄id m̄ibid̄igy Pablo etz Bernabé co pahuojpquēgaangixy ma jejimbi naaxjot. ⁵¹ Chi Pablo etz Bernabé yc̄ig huinhuojpy, je' je' tiy'ajt̄ip co ca' jäygidacy ajcxy nej jäy anajty ytungixy. Chi ajcxy ñicxni jim Iconio. ⁵² E je' ajcxy huidibi mijpidaacp Jesús ooy anajty ajcxy yjotcujcity. E ym̄id anajty ajcxy je Esp̄iritu Santo ma yjot yhuinmañ.

14

Pablo miid Bernabé jim Iconio

¹ Jim Iconio Pablo etz Bernabé ytigiiy ajcxy yquipxyi ma je judíojäy ñaymujctac, e oy yajxon ajcxy capxhuäcxy Jesús y'ayuc. E may judío etz griegojäy ajcxy ymibijcy. ² Je judíojäy ajcxy huídibi anajty ca' ymibijccixy nigapxcoty ni'ojiygoty ajcxy huídibi ca' yjudíojäyity huen je cajp jäy ajcxy mijotmädiipy je mibijcpidiyc. ³ Miid jada ycixpi Pablo etz Bernabé yhui'my je' ajcxy jecy etz capxhuäcxcixy ajcxy Dios y'ayuc huinmic jotmic etz je Huindzin mijotcuyc'ajtcixy ooy, e mooyi ajcxy je mic'ajt jébi ajcxy pa'mjäy yajtzögipy etz mijhuinma'ñ tungixy huídibi ijxpejt'ajtp ma Dios ymic'ajt. ⁴ E je cajpjäy mejtzpicy je' anajty ajcxy, nijjëjity ymijpidacpy ajcxy yi judíojäy, etz nijjëjity ymijpidacpy ajcxy je Dios y'ayuccapxhuäcxi. ⁵ Chi nijjëjity judíojäy etz huídibi ca' yjudíojäyity ñaygapxi miid tungmiidpi co mijotmätcodaangixy etz tim tzaagögädzangixy Pablo etz Bernabé. ⁶ Co Pablo etz Bernabé nejhuiy, chi ajcxy yqueecy ñicxy ajcxy jim Listra etz Derbe jim Licaonia, e majaty naax cajp huídi huinduy'agonbi. ⁷ Jim ajcxy capxhuäcxy Jesucristo ytiy'ajt nej jébi ajcxy huaad y'alma nidzoocin paatcixy majaty cajp huingonbi.

Tzaagätzcixy Pablo jim Listra

⁸ Jim Listra anajty tüg yëydijc iñäy tecyma'tpi, caminaabi anajty yöy, com jadu'n anajty yma'xung'aty. ⁹ Je tecyma'tpi amido'ijtpy anajty Pablo y'ayuc, e Pablo ijxpy anajty co ymiid mibijcin nej jébi chögy. ¹⁰ Chi Pablo mic nimay:

—Tinaayig.

Chi je tecyma'tpi tüg tipy ytinaygugiiy, e chi ytigiiy yöyb. ¹¹ Co je mayjäy ajcxy ijxy nej Pablo anajty pa'mjäy ti yajtzögy, huin'it ajcxy ytigiiy huambi jihuuyibi miid Licaonia ayuc chachminaangixy:

—iDios ajcxy jadu'n nej jäy ti ycidaaccixy ma ich ajt!

¹² Yminaangixy co Bernabé je' anajty Júpiter, e je Pablo je' anajty Mercurio, com je' anajty capxp. ¹³ E je Júpiter teedy huídibi anajty tumb jim ma je Júpiter chajptijc cajppäbi, mimiin toro ajcxy etz pijy. E je teedy miid je jäy ajcxy yhuindzigihuaangixy etz ojadadaangixy anajty Pablo etz Bernabé, yaj'ögaangixy je toro ajcxy. ¹⁴ Co Pablo etz Bernabé nejhuiy, ca' ajcxy jäygidacy nej jäy anajty ajcxy y'ididzaangixy, chi ajcxy ci'm yhuit agiidziy, e ytigiiy ajcxy mayjäy'agujc yam chachminaangixy:

¹⁵ —iYëydijctijc ajcxy! ¿Nej co jada jadu'n m'iditczixy? Nañ jadu'n ich ajcxy jäyity, jadu'n nej miich ajcxy. Paady ich ajcxy ti nmingixy ma miich ajcxy mgajp jigix ajcxy m'ixmadziipy jada jadu'mbi huinma'ñ huídibi ca' choobaady ma Dios. E mijpidaaccixp je Dios juugypí huídi oyduñ tzajp etz naaxhuiñybi, je mejy etz tüg'óciy tijaty ya n'íxim. ¹⁶ Jecy'ajty Dios ixmajch je jäy ajcxy huen tungixy nej tzojccixy. ¹⁷ Oy Dios anajty jayecy tiy'ajt co je' Diosity, jatuñ jadu'n yi oybi miid miich ajcxy ycixpi. Dios yi' yajtuub etz yecy oybi cosecha e xymooyim mijcajee huídi ngaayim n'uucim e xyajjotcugiiyim.

¹⁸ Oy anajty Pablo jadu'n jadim tzachnimaangixy, ca'p ajcxy mimadacy co yi jäy ajcxy ca'p yaj'ó'ccixipy je toro co anajty yhuindzigihuaangixy.

¹⁹ Huin'it xi nijjëjity judíojäy yja'ty, choon jim Antioquia etz Iconio. Chi ajcxy yajnimay je mayjäy co huen midziptzoongixy Pablo etz Bernabé. Chi mic'amy je mayjäy midziptzoon Pablo etz cögach ajcxy. Hue' ajcxy tijy ti anajty yaj'öccixy. Chi ajcxy oy ixjugucy cajppa'. ²⁰ Chi je apóstoles ajcxy jübigiiy je Pablo, chi je' ypidigy, e ñicxy jadüg'oc cajpjoty. Com jabom Pablo etz Bernabé choon, ñicxy ajcxy jim Derbe.

21 Co Pablo etz Bernabé jadu'n capxhuäcxy je Jesucristo y'ayuc oybi jim Derbe, chi mayjäy ajcxy mijpidacy Jesús. Chi Pablo etz Bernabé ajcxy yhuimbijty Listra, Iconio, etz Antioquía. 22 Jim ajcxy jotmicmigapxy je mibijcpidijc ajcxy, e capxhuijy huen tügjijp mibijccixy Dios y'ayuc, nimaaygixy:

—Co ndigihuaanim ma Dios y'ane'my copicy co nyajnáxim may ayo'n. 23 Cajp cajp majaty mibijcpidijc yajpaady jim Pablo etz Bernabé yajñibijcy nijējity yēdijctijc huen nigohuajc'ajtcixy je jäy ajcxy huídibi mijpidacp Jesús. Co anajty ti yajñibicy je' ajcxy huídibi nigohuajc'adipy, chi jaygay ajcxy y'ijty etz Dios mibijctzoy müd je' ajcxy ycixpi.

Pablo müd Bernabé yhuimbijtcixy Antioquía jim Siria naaxjot

24 Pablo etz Bernabé ñajxy ajcxy Pisidia oy ajcxy yja'ty jim Panfilia. 25 Chi Pablo etz Bernabé Jesús y'ayuc capxhuäcxi jim Perge, chi ajcxy ñicxy jim Atalia. 26 Chi ajcxy jim ybarcotigihy ñicxcixy jadügtecy jim Antioquía ma anajty ajcxy ti yajñibigyii Dios chójcin müd je tung huídibi anajty ti yajcixcixy. 27 Co ajcxy yja'ty jim Antioquía, chi ajcxy huoomujcy je jäy ajcxy huídibi anajty mijpidaacp Jesús, e yajmüdmíydactay tüg'óciy nej anajty Dios ti ytuñ müd je' ajcxy ycixpi, nej anajty Dios ti yaj'ahuäch je tü'aa nej huaad mibicy ajcxy je huídibi ca' yjudíojäyity. 28 Pablo etz Bernabé ijt ajcxy ooy jim jecy müd je mibijcpidijc ajcxy.

15

Mibijcpidijc ñayyöymujci ajcxy jim Jerusalén

1 Je huin'it tiempo nijējity jäy huídi tzoón Judea yja'ty ajcxy jim Antioquía, e ytigihy yaj'ixpijcp ma ajcxy je huídibi mijpidaacp Jesús, ymínaangixy: “Pen myajñdzögamy ajcxy yi m'alma, copicy co ajcxy myajtiy'ajttihuijy jadu'n nej Moisés y'ane'my.” 2 Chi Pablo etz Bernabé ñaymídziptzongooti ajcxy müd huídi anajty ajcxy tzomb jim Judea, e ca' ajcxy ñay'ayuc-huinjihuiyi. Chi jada' yajñibejti Pablo etz Bernabé etz jacjadyii mibijcpidijc huen nicxy ajcxy Jerusalén yajtiydigihy ma je apóstoles ajcxy etz huídibi ajcxy nigohuajc'ajt je mibijcpidijc jim Jerusalén.

3 Je mibijcpidijc huídibi anajty ajcxy jim Antioquía oy ajcxy tüjijphuohuñy Pablo etz je' ajcxy huídi nicx müd Pablo. Chi Pablo etz müd yjaymüdtijc ajcxy ñicxy, e ñajxy ajcxy Fenicia ñaaxjot etz Samaria ñaaxjot. Yajmüdmíydaaccixy je mibijcpidijc cajp cajp jadu'n nej jäy ajcxy huídibi ca' yjudíojäyity ti yjothuimbijtcixy etz yajmij'adaangixy Dios. E tüg'óciy mibijcpidijc ooy ajcxy jäygidacy je Pablo y'ayuc.

4 Co Pablo etz Bernabé ajcxy yja'ty jim Jerusalén, chi je mibijcpidijc ajcxy cöbijci je apóstoles ajcxy, etz je' ajcxy huídi nigohuajc'ajtp anajty je mibijcpidijc. Chi Pablo yajmüdmíydactay nej anajty Dios ti ytuñ müd je' ajcxy. 5 Chi nijējity fariseojäy, tñibi anajty mibijccixy Jesús, ytinayigy ajcxy juntijoty, e ymínañ ajcxy:

—Copicy co huen yajtiy'ajttiy je jäy huídibi mibijcp Jesús huídi ca' yjudíojäyity, e copicy nyaj'ané'mim co huen ajcxy Moisés ycötújcin cuyduuni.

6 Chi ñayyöymujci je apóstoles ajcxy etz huídi ajcxy nigohuajc'ajtp je mibijcpidijc, co capxyöyaangixy je fariseojäy y'ayuc nej yhuí'mip. 7 Ca' ajcxy tzojc ñay'ayuc-huinjihuiyi, chi Pedro ytinayigy ymínañ:

—Migügtijc, mnejhuñyb ajcxy co jayhuin Dios ti xyhuin'ixyich ma miich ajcxy, jigix nyajnimähuibich jäy ajcxy huídibi ca' yjudíojäyity je Jesús ytiy'ajt oybi nej ajcxy y'alma nízoozin paadipy. 8 E Dios huídi nejhuñyb jäy yjot yhuinma'ñ xyaj'ixich je tiy'ajt co yejcy Espíritu Santo ma yi' ajcxy nañ tim

jadu'n nej ytuuñ ma ñich ajt. ⁹ Dios tú'ciy ytuuñ mñid ñich ajt etz mñid yí' ajcxy, mñid co yí' ajcxy mibicy Jesús paady Dios yajhuaatzi ajcxy yjot yhuinma'ñ.

¹⁰ Jadachambi, ¿nej co ca' mhuinjihuñhuaangixy mibigaangixy nej Dios ytuuñ mñid huídibi ca' yjudíoáyity? ¿Nej co adzip myajñihuidzaangixy je costumbre huídidi ni ñich ajt ni n'ap ndeedy ca' ti mímadaägy nicxy cuydundaaygixy?

¹¹ Janch ñich ajt nmibijcim co mñid je may'ajt huídidi Jesús ti tuñ mñid ñich ajt ycixpi ti nbaatim n'alma ññdzoocin. Nañ tim jadu'n je' ajcxy huídidi mibijc Jesús huídidi ca' yjudíoáyity ypaat y'alma ññdzoocin mñid je may'ajt huídidi Jesús ti tuñ.

¹² Huin'it je jäy ajcxy y'amunday, y'amido'ijtcixy nej Bernabé etz Pablo nimiydaaccixy nej anajty Dios ti tuñ mñid yí' ajcxy, jadu'n nej ajcxy ti yajtzögy pa'mjäy mñid Dios ymic'ajt, etz jac tijaty mijhuinma'ñ huídidi ti tuñ ma yí' jäy ajcxy huídidi ca' yjudíoáyity. ¹³ Co Pablo etz Bernabé ajcxy miydactay, chi Jacobo ymíñañ:

—Migügtijc mido'mbójicigich ajcxy ñich n'ayuc. ¹⁴ Simón Pedro ti xyajmñidmiydaacim nej Dios may'ajt ti tuñ oga'n ma huídibi ca' yjudíoáyity, co huin'ijxy huídidi yí' yjäy'adaañip ma yí' ajcxy. ¹⁵ Quipxy jada ñaybadyii mñid huídidi je Dios y'ayucnajtzcaxñiybi jecy'ajty ycojay, ¹⁶ co jadu'n ymíñañ:

Co anajty jadu'n ti y'ocjadyii, chi nhuimbidiipyich ya naaxhuññ.

Nyaj'oyñihuñbich jadüg'oc je naax cajp huídidi David anajty y'ane'myb huídidi anajty ti y'octigooybi jadu'n nej tüg tijc huídidi ti yciday. Ma David y'ap y'oc nyaj'a'oyñihuñbich jadüg naax cajp, jadu'n nej jäy ytijc cojy huinjemybi.

¹⁷ Jigix jacjadyii jäy y'ojadadiipy ajcxy yí' Dios. Nañ jadu'n je' ajcxy huídidi ca' yjudíoáyity, huídidi ñich njäy'adaañip.

¹⁸ Jadu'n je Huindzin Dios jécyip jada tiy'ajt jadu'n yejcy.

¹⁹ Chi Jacobo yjacmíñañ:

—Paady ñich jadu'n nmíñaññich co ca' huaad n'amayñiyim ajcxy huídidi ca' yjudíoáyity huídidi ajcxy ti mijpidägy Dios. ²⁰ Hue' janchtiy tzoc nijayñiyim co ajcxy ca' tzüdzipy huídidi jäy yajhuindzigñiyb ídolos, etz ni ca' huaad migapxcixy huingbi töxyjäy, etz ni ca' huaad tzützcixy iyujc huídijaty jäy yöc-huñidyipi, etz ni ca' huaad jicxcixy tijaty iyujc ni'py. ²¹ Jecy'ajty ixti chamni tüg tüg cajp, ji pin ññhua'cxp capxhua'cxp Moisés yley majaty nayoymujctac naag naag pocxinxi.

²² Chi je apóstoles ajcxy etz je huídidi nigohuajc'ajt yí' mibijcpidijc, mñid tüg'ócicy Jesús yjäy pidacy ajcxy yhuinma'ñ co huin'ixaangixy nijējity jäy ma je' ajcxy etz quexaangixy jim Antioquía quipxyi mñid Pablo etz Bernabé. Chi ajcxy yajñibejty Judas, huídidi nañ jadu'n yajtijpy Barsabás, etz mñid Silas, yēdyictijc huídidi ajcxy capxpaadip. ²³ E je' ajcxy yajmiguejxy necy nej anajty ti jaay: “Ñich ajcxy apóstoldijc, etz huídidi nigohuajc'ajt yí' mibijcpidijc, etz nidüg'ócicy mibijcpidijc, cham ñich ajcxy nguexy capxpocxin ma ajcxy mibijcpidijc huídidi ca' yjudíoáyity huídidi ajcxy tzinaayb jim Antioquía, etz huídidi ajcxy tzinaayb Siria etz Cilicia ñnaaxjot. ²⁴ Ti ñich ajcxy nejhuñiyich co nijējity jäy ti xyñinixcixy, choñ ma ñich ajcxy, ca' ñich ajcxy ngötujcin mooy, e xy'amayñiygixy jim mñid y'ayuc, e xyajhuinma'ñytigoya'ñ ajcxy, co ajcxy xyñimaaygixy co copicy co myajtiy'ajttihuip ajcxy m'ung, etz mbayöyipy ajcxy je Moisés ycötújcín. ²⁵ Paady ñich ajcxy ti nnaygápxigixy nidüg'ócicy co nyajñibedipyich nijējity jäy huídidi yajpaatp ma ñich ajcxy co huen nicxy xy'ijxcixy niguipxyi mñid nmigügtijcich huídidi ooy ndzocyich, je Bernabé etz je Pablo. ²⁶ Je huídidi ajcxy yjugy'ajt ti yoxy ti toogy mñid ajt nHuindzin Jesucristo ycixpi. ²⁷ E jadu'n yam nguexyich ajcxy Judas etz Silas, e yí' ajcxy c'm xyajmñidmiydägyipy tüg'ócicy ñich ajcxy n'ayuc. ²⁸ Ti je Espíritu Santo huinma'ñ

pidägy ma ñich ajcxy nhuinma'ñ etz ñich ajcxy ti nhuinma'ñ nbidägyich, co ca' nyajñibigipy ajcxy tijaty ayuc tzaachypi, jëyi janchtiy je huidi copícyip. ²⁹ Copícy co ca' ajcxy mdzüdzipy huidi jäy yajhuindzigiiyb ídolos, ca' ajcxy ni'py mjíxcixipy, ni ca' ajcxy mdzüdzipy iyujc huidi yöc-huiity ti y'ögy, e ca' ajcxy mmigapxtigooygixipy huingbi töxyjäy. Pen mguydundaayb ajcxy jada ané'min, oy anajty mdungixy. E Dios ajcxy xypubedipy xypudigihuipy.”

³⁰ Jadu'n je' ajcxy huidi ti yajquexy nicxy ajcxy jim Antioquia. Jim ajcxy huomujcy je mibijcpidijc, e yajcidigiiy ajcxy je necy. ³¹ Co je mibijcpidijc je necy capxy, chi ajcxy ooy yjotcugiiy müid je oybi ayuc tiibi anajty ajcxy yajñiguexy. ³² Com Judas etz Silas hue' je' anajty Dios y'ayucnajtcapxiybi, paady ajcxy yajjotcugiiy jot'amij moy je mibijcpidijc müid je ayuc. ³³ Jecy ajcxy jim yhuäcxipy, chi je mibijcpidijc müid ajcxy ycapxycixy, yajmihuaniiy ajcxy Dios, chi ajcxy yhuimbijtni ma anajty ti choongixy. ³⁴ Chi Silas yhuinma'ñpidacy co anajty yhui'ma'ñ. ³⁵ Nañ jadu'n Pablo etz Bernabé ijt ajcxy jim Antioquia, etz müid jac nijëjity ymüggtijc yaj'ixpijciditcixy etz capxhuäcx'iditcixy je Huindzin Jesús y'ayuc ytiy'ajt.

Pablo mimetz viaje

³⁶ Ti xii tiempo anajty ñajtninicxiyñi co Pablo nimay Bernabé:

—Jam'ajt nmüggtijc co'ixiiyim cajp cajp majaty ti ngapxhuäcxim Huindzin Jesús y'ayuc. Ooy njanejhuñhua'ñich nej ajcxy yajpaady. ³⁷ Bernabé ymüid nicxaamy anajty je Juan huidi yajtijp Marcos. ³⁸ E je Pablo ca' a'ixiy co müid nicxip Juan, com ti anajty y'ocupuyödüutibi jim Panflia, e ca' anajty ti yjacmüidyajtüyöyii je tung. ³⁹ E ca' ajcxy ñay'ayuc-huinjihuñyi miñ xyipy. Chi Bernabé müidnicxy Marcos e ybarcotigiiy ajcxy, chi ajcxy ñicxy jim Chipre. ⁴⁰ E je Pablo abicy huin'ijxy Silas huidi anajty müid ñicxa'ñ. Chi je mibijcpidijc müid ycapxycixy, chi chooni ti anajty je mibijcpidijc yajmihuaniiy Dios, ⁴¹ chi ñajxy jim Siria ñaaxjot etz Cilicia ñaaxjot jot'amijmooy je mibijcpidijc.

16

Timoteo mijhuäcpejty je Pablo etz Silas

¹ Chi Pablo etz Silas yja'ty ajcxy jim Derbe etz Listra. Jim ajcxy paty tüg jäy huidi anajty yxii Timoteo huidi anajty mijpidaacp Jesús. Judíojäy anajty ytaj'ajtpy, e griegojäy anajty yteedy'ajtpy. Je' ytaj nañ ymibijcpy anajty Jesús. ² Je jäy ajcxy huidi yajmij'ajtp Jesús jim Listra etz jim Iconio ooy anajty oy nimiydaaccixy Timoteo. ³ Pablo ooy jatzojcy co Timoteo ycajäymüid'ajti. Chi Pablo yajtiy'ajttiiy Timoteo, jigix ca' ymijotmädiyb je judíojäy huidi anajty ajcxy jim tzinaayb, com tüg'óciy ajcxy nejhuñy co griegojäy teedy'adyii. ⁴ Cajp cajp ma anajty ajcxy ñaxy yajmüidmiydaaccixy ajcxy je mibijcpidijc je cötujcin huidi je apóstoles ajcxy, etz huidi nigohuajc'ajt je mibijcpidijc jim Jerusalén. ⁵ Je' ajcxy huidi yajmij'ajtp Jesús cajp cajp ñigi anajty yjotmicpijccixy, etz mijpidaaccixy Dios y'ayuc, etz ñimayiy'iditcixy jabom jabom.

Pablo yhuin'ijx tüg Macedonia jäy

⁶ Je Espíritu Santo ca' a'ixiy nicx capxhuäcxixy Dios y'ayuc jim Asia ñaaxjot. Paady ajcxy huingduum ñicxy yajyöñajxy ajcxy Frigia ñaaxjot etz Galacia ñaaxjot. ⁷ Chi ajcxy jim yja'ty ma Misia ñaaxtzi'ba'n. Chi huinmay co ñicxa'ñ ajcxy Bitinia ñaaxjot. E je Espíritu yajnejhuñy ajcxy co ca' yi' tzocy co jim níxcixipy. ⁸ Chi ajcxy jüyöñajxy Misia ñaaxjot, chi ajcxy y'idacy jim Troas. ⁹ Chi Pablo cumäyjoy huin'ijxy tüg yëydijc, huidibi yconaaxity anajty Macedonia, ytinay'ahuñy ma Pablo yhuinduu, e ycohuaniiy, ñimäyii: “Tun

may'ajt nicx jim Macedonia, e jim xypubedipy ich ajcxy.” ¹⁰ Co Pablo jadu'n huin'ijxy cumäyjoty, chi ich ajcxy n'ixtay barco huidi nicxamb jim Macedonia. Nhuinjihuüy ich ajcxy co jim Dios xyquéjxcixyich jigix jim ngapx-huäcxibich Jesucristo ytiy'ajt je oybi nej jëbi ajcxy alma nidzoocin paadipy.

Pablo etz Silas jim Filipos

¹¹ Chi ich ajcxy nbarcotigüy jim Troas nicxy ich ajcxy tüy ma naax mejy'agujcpi huidibi anajty yxii Samotracia. Chi com jabom ajcxy nja'tyich jim Neápolis. ¹² Co ich ajcxy jim ndzooñ, chi ich ajcxy nicxy jim Filipos. Filipos hue' je' romanojäy ycajp. Je' je cajp jac mijpi ma je Macedonia ñaaxpa'. Jim ich ajcxy nhuäcxijpy jecy. ¹³ Tüg sábado nicxy ich ajcxy cajppa', mihuingon tüg mijni, ma anajty judíojäy ajcxy müdity Dios ojadajttac. Chi ich ajcxy n'ixtacy jim, e ngapxhuäcxich ajcxy Jesús y'ayuc ma je töxyjäydijc ajcxy huidi jim anajty ajcxy ti yöymujccixy. ¹⁴ Je Lidia anajty y'amido'ijtp. Hue' je' anajty Lidia ycogajpity jim Tiatira, e ytocpy anajty ucy huit oy jatypi. Lidia yajmij'ajtpy anajty Dios, e je Huindzin Dios yajyungüy yjot yhuinma'ñ, jigix amido'idipy nej Pablo Dios y'ayuc capxhuäcxi. ¹⁵ Je Lidia niibejt müd tüg'óciy yjuugy ymüg, chi ich ajcxy xycohuanüy, e xyñimáaygixich:

—Pen minamb ajcxy co nmibicyich je Huindzin Jesús, miin jättaaccix ma ich ndijc.

Chi ooy xycohuanüy ich ajcxy, ixti cooni jim xyajhuim'yich ajcxy.

¹⁶ Jadu'n yjajti tüg tecy co ich ajcxy anajty ñicxy ma Dios ojadajttac, chi ich ajcxy nbaty tüg tumbi töxy'anäg mañ'ajt müdipi huidi ooy ytiygapxy. Ymüd anajty yhuindzin ma ytuñ, e je' yhuindzin ooy anajty ymeeñybaaty co je töxy'anäg ytiygapxy. ¹⁷ Je töxy'anäg ypanicxy chach yam Pablo etz ich ajcxy yminañ:

—Jada yëydijc Dios tzajpjtopy ajcxy ymidumyb. Capxhuäcxi ajcxy Dios y'ayuc jadu'n nej jëbi ich ajt n'alma nidzoocin paady.

¹⁸ Canaag xii jadu'n ich ajcxy xychach'amayüy. Co Pablo chijpin, chi yhuäc-huimbijty nimay je mañ'ajtmüdipi:

—Müd Jesucristo yxii n'ane'myich, pidzim ma jada töxy'anäg.

Tim huin'ityi je ca'oybi yajyöyduuty je töxy'anäg.

¹⁹ Co je töxy'anäg yhuindzin jadu'n ijxy co ca' y'ocmeeñybadaani, chi müd je' ycixpi ajcxy majch Pablo etz Silas, e yajnicxy ajcxy ma je tungmüdipi ma je' ajcxy y'agujctijc. ²⁰ Co ajcxy jii by müdja'ty ma je tungmüdipi, chi yminañ:

—Jada yëydijc ajcxy judíojäy jada, nigoo ajcxy ñaax yajmäty ycajp yajmäty, ²¹ etz yaj'ixpicy ajcxy costumbre huidi ca' huaad ich ajt ngöbajcim, e nihuaad ngatuunim, com hue' ich ajt romanojäy.

²² Chi je mayjäy ajcxy müddziptzoon Pablo etz Silas, e je tungmüdipi ni'ane'mdiy co huen ajcxy yajniñeñ yaj'ixjeñ huen yajhuojpcixy müd matz.

²³ Co ajcxy huojptay, chi pidacy ajcxy pujxtigoty, e ane'my ajcxy pujxtijc huindzin co huen cuend'ajtcixy yajxon. ²⁴ Co je pujxtijc huindzin ypaati je cötujcin, chi pidacy Pablo etz Silas jac jii by öc'am, e chi ajcxy ixmajch co'adzity ytecy ma je quipy huidi yxii cepo.

²⁵ Chi jadu'n yjajty mijcuctz anajty, co Pablo etz Silas chach Dios ojadajtcixy chach huin'ügixy yi Dios, e jacjadyii machyjäy chach amidoo'ijtcixy. ²⁶ Chi timitiini uyx huinxijty pujxtijc poch. Chi y'ahuaatztay je pujxtijc agi', e y'adzittuttay je cadena ma tüg'óciy machyjäy. ²⁷ Chi oy ymähuiy je pujxtijc huindzin. Co jadu'n ijxy ac'ahuadz pujxtijc aguu, chi yajpidzimy y'espada ñayyaj'öga'nyii anajty. Com hue' anajty tijy ti je machyjäy yqueectäy. ²⁸ Huin'it Pablo mic'amy migapxy je pujxtijc huindzin nimay:

—Ix nej mnayduuni, cheeby ajcxy nidüg'óciy.

29 Chi je pujxtijc huindzin pijctzoy jin, e ytigiiy poyigy pujxtigoty, janch tziyuuyb miid tzig'iñ. Chi ycoxtinay'ahuuiy ma Pablo etz Silas ajcxy yhuinduu.

30 Chi yajpidzimy Pablo etz Silas, e yaj'amidooy:

—Huindzin, ¿ti ich jëbi nduñ jigix nïdzoocin nbáadibich?

31 Chi je' ajcxy minañ:

—Mibic Huindzin Jesús etz mbaadipy nïdzoocin, miich etz m'ungdöxyijc.

32 Chi ajcxy yajnimay je Huindzin Jesús y'ayuc tüg'óciy pinjaty anajty jim ma je pujxtijc huindzin ytijc. 33 Mijcuctz je pujxtijc huindzin puji je Pablo ajcxy chaachi'au, e chi je pujxtijc huindzin ñibejtay ajcxy miid y'ung ytöxyijc.

34 Chi je pujxtijc huindzin yajnicxy Pablo etz Silas ma ytijc, yajcaay yaj'uucy ajcxy. Ooy anajty ajcxy yjotcujcity nidüg'óciy, com ti anajty mibijccixy Dios.

35 Com jabom je mijtungmïdipi quejxy mutztungmïdipi jim ma pujxtijc huindzin miid cötujcin huen najtzmazdizyigixy Pablo etz Silas. 36 Chi je pujxtijc huindzin nimay Pablo:

—Ti je tungmïdipi quexy cötujcin co jëbi nnajtzmazdiziyich miich ajcxy. Nicxcix jotcujc.

37 Chi Pablo migapxy je mutztungmïdipi, e chi nimay:

—Romanojäy ich ajcxy. Yi cajptungmïdipi ti xyhuopyich miid matz mayjäy agujc, ni ca' jayijp ti xytidyduñich, e ti xypidägyich pujxtigoty. ¿Nej co jadachambi xyñajtzmazdizihua'ñich ameechi? Ca' jadu'n y'óyity. Huen mijtungmïdipi ci'm miñ xyajpidzimgixich ich ajcxy.

38 Chi je mutztungmïdipi cijx nimydactäy ma mijtungmïdipi tüg'óciy Pablo y'ayuc. Chi ajcxy ñay'adzigiyyi co nejhuuy co Pablo etz Silas hue' je' anajty ajcxy romanojäy. 39 Chi je mijtungmïdipi ñicxy ci'm oy capxjotcidägy je Pablo etz Silas. Chi yajpidzimy pujxtigoty, e pijctzoy may'ajt huen huingduum nicxcixni. 40 Co Pablo etz Silas ypujxtijcpidzimy, chi ajcxy ñicxy ma Lidia ytijc. Jim ajcxy jadu'n ijxy mibijcpidijc, e jot'amijmoy ajcxy. Chi ñicxcixni.

17

Jim Tesalónica yajti ooy capxy ayuc, ca' nay'ayuc-huinjihuñ

1 Pablo etz Silas ajcxy ñajxy Anfípolis, etz Apolonia, chi ajcxy yja'ty Tesalónica. Jim anajty judíojäy ajcxy tüg' ñaymujctac. 2 Com jadu'n anajty costumbre miidity, Pablo nicxp anajty ma judíojäy ajcxy ñaymujctac sábado xii. E tugig sábado xii jim capxy miydacy miid je' jim Tesalónica. 3 Hue' anajty miid miydaaccixy jadu'n nej jaybecyity ma Dios ñecy co Cristo copicy ayo'n yajnaxtähup, e chi y'ögipy, huin'it yjugypigipy. Chi Pablo yminañ:

—Je Jesús huidibi y'ayuc ngapxhuäcxibich, je' je' je Cristo.

4 Nijëjity judíojäy ymibijc ajcxy e mijyöybejty ajcxy Pablo etz Silas. Nañ jadu'n may griegojäy huidi anajty Dios yajmij'ajtp, etz maytöxyjäydijc huidijaty oy ymijpidacni ymijnicxpejt etz mibijc ajcxy Pablo etz Silas y'ayuc.

5 Je judíojäy huidi anajty ca' ymibicy, yjotmätcoty ajcxy. Huomujcy ajcxy amügy jäydijc etz jibic jäydijc, etz naax cajp yajmättay, anejptuuti agojxtuuti ajcxy Jasón ytijc'aguu tzach'ixtaaygixy Pablo etz Silas. 6 E co ca' ajcxy paty Pablo etz Silas, chi ajcxy majch Jasón etz jacjadyii mibijcpidijc. Adzip ajcxy yajnicxy pahuijch pajugujcy ajcxy jim ma cajp tungmïdipi. Yam chachminaangixy mic:

—Jada jäy ajcxy je' huidi tzachyajhuinma'ñydigooyb tüg'óciy naax cajp, nañ iyabaad ajcxy ti ymiingixy. 7 Jada Jasón ti Pablo etz Silas jim yajjättägy ma ytijc, tüg'óciy ajcxy mïddzip'adyii je César huidi ane'mb, yminaangixy co ji jadüg rey, je' je' je Jesús.

8 Co jadu'n midoy, chi ajcxy ooy yajyumigy yaj'oxigy cajpjäy etz je tungmüdpí ajcxy. 9 Chi Jason etz ymígügtjic yajmeeñyejcy, chi najtzmadzñy ajcxy.

Pablo etz Silas jim Berea

10 Co oy ycodzñy mic'amy yi mibijcpidijc yajpidzimy ajcxy cajpjoty Pablo etz Silas, e quejxy ajcxy jim Berea. Co ajcxy jim yja'ty, chi ajcxy ñicxy ma judíojäy ñaymujctac. 11 Jim Berea judíojäy ajcxy yjacmüd oyjot oyhuinma'ñ, ca'ydi judíojäy ajcxy jim Tesalónica. Je Berea jäy ajcxy ycóbijc ajcxy Jesús y'ayuc ymüid oyjot oyhuinma'ñ. Jabom jabom ixtaaygixy ma yjaybetyity ma Dios y'ayuc pen janch jadu'n ymina'ñ nej Pablo yaj'ixpicy. 12 May judíojäy ymibijcy etz may griegojäy huídibi ooy ymijpidaacni nañ jadu'n ymibijcy, töxyjäydijc etz yëydijctjic. 13 Co yi judíojäy jim Tesalónica nejhuñy co Pablo nañ jadu'n Dios y'ayuc capxhuäcxi jim Berea, chi ajcxy jim ñicxy, etz yajyumigy yaj'oxigy je cajp jäy ajcxy. 14 Mic'amy ajcxy, je mijpidaacpi Jesús, yquejx Pablo mic'amy, huen ñicxy jim ma mejypa'. Chi Timoteo etz Silas yjac-hui'my ajcxy jim Berea. 15 Je huídibi ajcxy Pablo jaymüid'ajt ymüidnicxy, müid ñicxy ajcxy ixti cooni yja'ty jim Atenas. Huin'it ajcxy yhuimbijty müid tüg ayuc co huen Timoteo etz Silas ñicxy minaybadyii Pablo jim Atenas janch mic'amy.

Pablo jim Atenas ahuijxy Silas etz Timoteo

16 Co anajty Pablo ahuijxy je Silas etz Timoteo jim Atenas, ooy anajty ytajy ymay co ijxy nejhuñy co je cajp müid ooy may quipychech, tzaadzech, etz oori oyduñ huídi ajcxy dios'ajtpy. 17 Paady Pablo nimiydacy Jesús ma yi judíojäy ñaymujctac müid je judíojäy etz jacjadyii jäy huídi Dios miyaaxp ojadajtp. E jabom jabom müid miydaaccixy pinjaty y'oymujcp cajp cujc. 18 Nijëjity ixpicytjic ñay'ixquápxigixy y'ixpijcin müid Pablo. Jim huídibi ni'ixpigñyb epicúreo ixpijcin, etz cham huídi ni'ixpigñyb estoico ixpijcin. Chi ajcxy nijëjity yminaangixy:

—¿Ti jada jada' ajt xyajñimaayim jada yëydijc capxymaaybi?

Chi jadyii yminaangixy:

—Hue' jada ycapxhuäcxyp huingbi dios y'ayuc.

Jadu'n ajcxy yminañ co Pablo nimiydacy Jesús etz jadu'n nej jäy yjugypicy huídijaty ti y'öccixyp. 19 Chi ajcxy müidnicxy Pablo ma je it ma je ixpicytjic ñaymugyii huídi anajty yxiñ Areópago, chi ajcxy Pablo ñimay:

—¿Nej jëbi njájtciñich jada jemybi ixpijcin huídi müich mmimimb? 20 Com ti ñich müich xyajñimaaygich ayuc ca'pi yhuinjihuñyñity, e nejhuñhuaamyich ajcxy nej yhuimbizimy tüg'óciy jada ayuc.

21 Tüg'óciy Atenas jäy etz nañ jadu'n huídi ajcxy jim adzinaayb, ca' anajty ni ti tungixy, jëyi ñigoobi amido'ijtcixy etz miydaaccixy jemybi ayuc tiy'ajt.

22 Huin'it Pablo ytñayigy mayjäy agujc jim Areópago, e yminañ:

—Atenas jäy, n'ixypich co müich ajcxy ooy myajmij'ajtcixy canaagnax huídibi müich ajcxy mdios'ajtpy. 23 Com ti xiñ ya n'ixyich canaagnax huídi ajcxy m'ojadajtpy, chi ti nbaatyich tüg altar ma jadu'n yjaayity: “Je Dios huídi ca' pin ix'yadyii.” Je Dios huídi müich ajcxy m'ojadajtyp, e ca' ajcxy m'ixy'adyii, jada je' huídi nyajñimaayb ajcxy.

24 Je Dios huídi oyduñ naaxhuiñybi etz tzajp etz jac tijaty, yi' je' ni-huindzin'ajttayb tüg'óciy. Je Dios ca' chinäy ma tzajptjic huídi jäy ajcxy cojpy. 25 Dios ca' ni ti yajtigoy'ity huídi naaxhuiñyjäy jamöhuaanip. Dios yi' yejcp jugy'ajtin etz huídibi nxejim, etz tüg'óciy tijaty.

26 E tügpi ni'py tügpi jot ti yaj'oyñy tüg'óciy yi jäy, jigix huen tzinaaygixy huindu'my naaxhuiñ. Dios tiy'ajt yejcp nej xiñ tiempo yöyipy, e ma jäy jëbi

huaad chinaaygixy, ²⁷ jigixixtáaygixipy Dios, jadu'n nej jihuüyixtaaygixy tondäy xajtäy, com ca' je' jiguemity ma ich ajt nidüg nidüg. ²⁸ Dios ycipxi ich ajt ndzinaayim nyücxim etz nji'ajtim, com jadu'n minañ miich ajcxy mboeta, huidibi iy yajcojp: "Dios ich ajt xy'ung'ajtim xy'anäg'ajtim." ²⁹ Pen Dios ich ajt xy'ap'ajt xy'oc'ajtim ca' huaad nhuinma'n nbidaacim co Dios yjadu'ñity nej oori oyduñ, plata oyduñ, etz tzaadzech quipychech huidi jäy ti yaj'oyiy miiid yci'mhuinma'n. ³⁰ Dios ca' miiidity jotcöduuyb je jäy chuuhuinma'n tiibi ñajxni. Jadachambi ane'mb Dios hueñytimma'amyity huen jäy ajcxy jothuimbijtcixy. ³¹ Com ti Dios yajnihuinmayiy tüg xii mina tiyduna'n yi naaxhuiñybi jäy miiid je yëydjc huidibi ti huin'ixy, jada tiy'ajt Dios ti yaj'ixy yajnejhuüy tüg'óciy jäy co ti yajjugypicy Jesús co y'o'cy.

³² Co ajcxy jadu'n midoy co yi öcpi yjugypigipy, chi nijëjity ytigiy nixiicpi yajxiicpi. Chi jacjadyii yminaangixy:

—Huaad ich ajcxy n'amido'idipyich miich m'ayuc mina anajty jadüg'oc.

³³ Chi Pablo jim chooni ma je' anajty ajcxy. ³⁴ Chi nijëjity jäy ypadzooni huidi anajty ti mibicy Pablo y'ayuc. Ma je' ajcxy jim anajty tüg jäy huidi anajty yxii Dionisio, yi' je' anajty tungmiiid jim Areópago. Nañ jadu'n tüg töxyjäy huidi anajty yxii Dámaris ypadzooni, etz jacjadyii jäy.

18

Chi Pablo ñicxy jim Corinto

¹ Co jada jadu'n ytuni yjajti, chi Pablo chooni jim Atenas, ñicxi jim Corinto. ² Jim minaybaati tüg judíojäy huidi anajty yxii Aquila, Ponto anajty ycocajpity, namja'tni anajty miiid ytöxyjc Priscila. Jim anajty ti chongixy Italia ñaaxjot, jëgixpi co je mij'ane'mbi, Claudio, pidacy cötujcin co huen tüg'óciy judíojäy pidzimdaaygixy jim Roma. Chi Pablo oy cogapxiy Aquila. ³ Aquila etz Priscila ytung'ajtpy anajty cochactijcxuyii, com nañ cochactijcxuuyb anajty Pablo, paady Pablo jim yhui'my miiid je' ajcxy. Chi ajcxy tú'ciy ytuuñ. ⁴ Tüg tüg sábado xii Pablo ñicxy ma je judíojäy ajcxy ñaymujctac yajmiiidmiydaaccixy Jesús y'ayuc ytiy'ajt etz capxjotcidaaccixy judíojäy etz nañ huidi ca' yjudíojäyity.

⁵ Co ajcxy Silas etz Timoteo yja'ty jim Corinto, choñ ajcxy Macedonia, chi Pablo adügijp ytigiy ayuccapxhuäcxpi ma judíojäy ajcxy co Jesús je' je' je Cristo huidi je' ajcxy chach'ahuijxyp. ⁶ E je judíojäy ajcxy ytigiy jotma'tpi, tzipcapxi ahua'ngapxi. Chi Pablo yhuit huinxijty, je' je' je tiy'ajt co puyöydüdaani ajcxy, e chi Pablo yminañ:

—Miich ajcxy miiid mgi'mbocy ajcxy myajtigoya'n yi m'alma. Ich ca' ti pocy nmiiidityich ma miich ajcxy. Cham nicxy Dios y'ayuc ngapxhuäcxich ma huidi ca' yjudíojäyity ajcxy.

⁷ Chi Pablo yöybojtni ma judíojäy naymujctac, chi ñicxy ma Justo ytijc. Justo ooy anajty Dios miyäxy ojadaty, e ymiiid anajty ytijc mihuingon je judíojäy ñaymujctac. ⁸ E Crispo, je judíojäy ñaymujctac huindzin, ymibijc je' je Huindzin Jesús y'ayuc ytiy'ajt, miiid tüg'óciy y'ung y'anäg, yjuugy ymügüg. Nañ jadu'n nijëjity Corinto jäy co midoy Jesús y'ayuc, chi mibijcy e ñibejty ajcxy. ⁹ Chi je Huindzin Dios nimay Pablo cumäyjoty:

—Ca' mdzigí, capxhuäcx'aditz n'ayucich, e ca' mni'amoñ. ¹⁰ Com ich miich nbubedipy, ca' pin jot miiid'adipy nicxy nejaty xytuñy. Ich may ich ya nmiiidity jäy ma jada cajp.

¹¹ Chi Pablo yhui'my jim Corinto tüg jimijt jacup, yaj'ixpijcy jäy je Huindzin Dios y'ayuc ytiy'ajt.

¹² Huin'it tiempo co Galión ygobernador'ajty jim Acaya ñaaxjot, chi judíojäy ajcxy midziptzoñ je Pablo, yajnicxy ajcxy ma cõtujctac. ¹³ Chi ajcxy nimay je gobernador:

—Jada yëdyjc tzach jäy yaj'ixpijcp co ca' ycopicyity yajcuydunipy Moisés ycõtujcin huidi jaybety ijtp.

¹⁴ Pablo capxamb anajty co oy yi Galión nimäy ajcxy je judíojäy:

—Pen yi Pablo ti ytundigooy o mijpocy ti tuñ, huin'it nmijpidägibich miich ajcxy m'ayuc, miich ajcxy judíojäy. ¹⁵ Pen je Cristo y'ayuc etz miich ajcxy mgötujcin myajtzibiyb myajcapxyiyb, ca' ñich huaad nyajtigiyiyich yijiibi huinmañ.

¹⁶ Chi je gobernador y'ané'min pidacy co huen judíojäy ajcxy yajpidzimdäyii ma je cõtujctac. ¹⁷ Huin'it tüg'óciy griegojäy ma je cõtujctac huijtzpidzimyb je Sóstenes, yi judíojäy naymujctac huindzin, e chi ajcxy cujy jibijpy huingojxy jijpcojxy ma gobernador yhuinduu, e Galión ca' tuñycuenti.

Pablo yhuimbijtni Antioquía, e yajtzondacy midugigpi viaje

¹⁸ Jac-huäcxijp Pablo jecy jim Corinto. Chi yhuinmañypidacy co chonaani. Chi ycapxycijxni müid je mibijcpidijc, e chi ybarcotigiyñi ñicxni jim Siria ñaaxjot. Ñicxni quipxyi müid Priscila etz Aquila. Jim Cencrea, ca'ni anajty ybarcotigiyi, Pablo yajcöme'px cödza'm co anajty cuyduñ yhuandaacin. ¹⁹ Co ajcxy yja'ty jim Efeso, chi Pablo ñay'ixmajtz ajcxy müid Priscila etz Aquila, e ñicxy ma je judíojäy ajcxy ñaymujctac. Chi müidmiydacy je judíojäy ajcxy huidi jim anajty ti ñayyöymújcigixy. ²⁰ Chi je judíojäy ajcxy jim Efeso cohuanüy co huen jac-huim'y, e Pablo ca' a'ixiy co yhuim'ipy. ²¹ Chi Pablo ycapxycijxni müid je Efeso jäy, chi yminañ:

—Copicy co jim xii nyajnaxa'ñyich Jerusalén, e nhuimbidityich jadüg'oc ma miich ajcxy, pen Dios jadu'n tzojcp.

Chi Pablo ybarcotigiy chooni jim Efeso. ²² Co anajty ti ypättigiy jim Cesarea, Pablo nicxy Jerusalén co anajty capxpoxaangixy je mibijcpidijc, chi mic'amy idaacni jim Antioquía. ²³ Jim hueeni yhuäcxijpy, chi choñ jadüg'oc ñicxy cajn cajn ma Galacia ñaaxjot etz Frigia ñaaxjot jotmicmigapxcixy tüg'óciy yi mibijcpidijc.

Apolos Dios y'ayuc capxhuäcxí jim Efeso

²⁴ Huin'it tiempo yja'ty jim Efeso tüg jäy huidi anajty yxñ Apolos, hue' anajty ycogájpity Alejandría. Ooy anajty oy ayuc capxhuäcxxy. E yajxon nejhuidyäy Dios y'ayuc huidi jaybety ijtp. ²⁵ Apolos ooy anajty ixpicyity ma Huindzin Jesús y'ayuc e ooy yjotmiccapxy, oy anajty yaj'ixpicy nej je Huindzin Jesús yajty y'ayoy. Oy jëda'ajty anajty janejhuüy nej Juan, je Bautista, jäy ajcxy yajñibejty. ²⁶ Chi Apolos ytigiy capxpi miydaacpi ma je judíojäy ajcxy ñaymujctac janch ni ca' chigiy chöyduñ. Chi co Priscila etz Aquila ajcxy midooy Apolos y'ayuc, chi ajcxy yajnicxy ahuingujc, chi ajcxy oy yajmüidmiydägy jac-huädz Dios y'ayuc ytiy'ajt. ²⁷ Chi co Apolos anajty ñicxa'ñ jim Acaya ñaaxjot, chi je mibijcpidijc jotmicmigapxy, e pubejty ajcxy. Chi ajcxy nijayiy je mibijcpidijc huidi ajcxy jim Acaya, huen ajcxy cöbigipy yajxon je Apolos. Co Apolos yja'ty jim Acaya ñaaxjot, chi ypubejti ooy pin anajty mibijcp Jesús y'ayuc, com Dios anajty may'ajt ti tuñ ma je' ajcxy. ²⁸ Chi je Apolos oy capxpidzimy mayjäy agujc co ca' yjanchity nej anajty ajcxy judíojäy yhuinmañ müidity, co Jesús ca' je' yjéjity je Cristo. Je Apolos jim je' mic'ajt tzachpaady ma Dios y'ayuc ycojaayity co Jesús je' je' anajty je Cristo huidi anajty ajcxy y'ahuijxyp.

19

Pablo may mibijcpidijc minaybaati jim Efeso

¹ Jim Corinto anajty Apolos, co Pablo tegyi'm yajyöyñajxy mijyuugjot, chi oy yja'ty jim Efeso. Chi jim paty may mibijcpidijc. ² Chi Pablo y'amidooy je mibijcpidijc:

—¿Nej ti xy'adigiñy xyjottigiñy je Espíritu Santo taab ajcxy mmibijcy Jesús?

Chi ajcxy y'adzohuimbijty:

—Ni ngamidooyñi ñich ajcxy pen ji Espíritu Santo.

³ Chi Pablo y'amidooy ajcxy:

—¿Ti ñibejtin miich ajcxy mbaad?

Chi je' ajcxy y'adzooy:

—Je Juan, je Bautista, ñibejtin.

⁴ Chi Pablo ymíñañ:

—Juan jäy yajnibejt je', je' je' je tiy'ajt co huen jothuimbijtcixy. E nimaaygixy anajty co huen ajcxy mibigipy je Cristo huidi jacmiinamni. Je' je' je Jesús, je Cristo.

⁵ Co jada ajcxy jadu'n midoy, chi ajcxy oy ñibety miid je Huindzin Jesús yxií.

⁶ E co Pablo cñixajy ajcxy, huin'it je Espíritu Santo y'adigiñy yjottigiñy ajcxy. Chi ajcxy ytigñy capxpi miydaacpi tigachyjaty ayuc, e capxhuäcxy anajty ajcxy Dios y'ayuc. ⁷ Jeyi anajty nimajmetz yëydijctijc huidibi ajcxy ñibejt.

⁸ Tugñig po' Pablo jim yhuäcxijpy, e yöydiñb anajty ma judíoñäy ajcxy ñaymujctac capxhuäcxy Dios ytiy'ajt janch huinmic jotmic. Chi capxjotcidägy mayjäy miid Dios ytiy'ajt. ⁹ Nijëjity jotjuuñydijc ca' ajcxy ymibijcy, jeyi ajcxy jibic tzachnigapxy Jesús ytiy'ajt ma jäy ajcxy yhuinduu. Chi Pablo puyöydúutcxni. Chi abicy yajnicxy je mibijcpidijc ma tüg escueltijc. Hue' je' je escuela huindzin anajty yxií Tirano, e jim Pablo Dios y'ayuc anajty capxhuäcxi jabom jabom. ¹⁰ Mejtz jimijt jadu'n jim chachyaj'ixpijcy, e tüg'óciy jäy ma je Asia ñaaxjot ymidoday ajcxy je Huindzin Jesús y'ayuc, je judíoñäy etz huidi ca' yjudíoñäyity. ¹¹ E Pablo mayba'mjäy yajtzoocy miid Dios ymic'ajt etz ooy mijhuinmañ ytuñ. ¹² Ixti yajnicxy anajty ajcxy yhuit etz ypaayi huidi Pablo ñinix anajty ti ypadyi, e yajpaatcixy anajty pa'mjäy, e je' anajty miid choocxixy, e nañ je' anajty miid ca'oybi ypidzimy ma jäy ajcxy y'ay yjot.

¹³ Chi nijëjity judíoñäy huidi anajty huidijtp tzoymdumbi, huidibi anajty yajpidzimgixyp ajcxy ca'oybi, jayajtzögaañ tüg pa'mjäy miid je Huindzin Jesús yxií co huen yajyöydüdyi je ca'oybi. Chi ajcxy nimaaygixy je ca'oybi:

—Ñich miich yam nimaayb miid Jesús yxií, je huidi Pablo ycapxhuäcxp, yajyöydüt jada jäy.

¹⁴ Jadu'n anajty y'idñitcixy je Esceva ymang ajcxy, je nihuixtujcpi ajcxy. Je Esceva hue' je' anajty judíoñäy etz nihuindzin'aty teedy'adií. ¹⁵ Co je Esceva ymang ajcxy migapx je ca'oybi, chi je ca'oybi y'adzooy:

—N'ix'atypich je Jesús, e nnejhuñybich pin je' Pablo, e miich ajcxy, ¿mbin miich ajcxy?

¹⁶ Chi je yëydijc huidi ca'oybi anajty miid, ytiycpiñy tüg ma je' ajcxy, ymimadactay je nihuixtujcpi, e yqueectay ajcxy ma je tijc nihuädz ixhuädz etz tzaachi. ¹⁷ Tüg'óciy jäy ajcxy huidi anajty tzinaayb jim Efeso, judíoñäy etz huidi ca' yjudíoñäyity nejhuiyday ajcxy, chi ooy ajcxy chigiy e nimaaydaaccixy e cömaaygixy je Huindzin Jesús yxií.

¹⁸ E mayjäy huidi mibijc Jesús y'ayuc ooy ajcxy ypocy nigapxtay, jadu'n nej anajty yi jibic mañ'ajt ajcxy ti mi'ijtcixy. ¹⁹ E mayjäy tiñbi anajty capxy je mañ'ajt necy yajminday tüg'óciy e no'ctay je necy ma jäy ajcxy yhuinduu. E co ajcxy maymujcy je libro tzou, chi naybaati jada' huixchiguipx majc mil

plata meeñ (moneda mexicana naybaati jacnaxy jahueenjaty ycatüg migo'px jamajcmocx tüg mil). ²⁰ E je Huindz'in Jesús y'ayuc nigi anajty yhuäcx'idich, nigi ymijtiy'idich.

²¹ Co anajty jadu'n ti ytuñyii ti yjadyii, chi Pablo yhuinma'ñypidacy co nicxy cogapxihua'ñ je mibijcpidijc jim Macedonia etz Acaya. Chi anajty yjacnicxa'ñ Jerusalén e jadu'n yminañ co jim chondäga'ñ jadügtecy e ñicxa'ñ jim Roma. ²² Chi quejxy jim Macedonia mejtz je ypubejtpi, Timoteo etz Erasto. Chi Pablo je' yjac-hui'my jecy jim Asia.

Canay'ayuc-huinjihuñhuñ jim Efeso mñid Dios y'ayuc ycixpi

²³ Huin'it tiempo tzip oy pidicni jäy y'ocyumigni y'oc'oxigni mñid Huindz'in Jesús y'ayuc ycixpi. ²⁴ Co je', je plateri huñdi anajty yxñ Demetrio, yaj'oyiy anajty ac plata Diana chajptijc'ung, e jadu'n anajty Demetrio etz jacjadyii jäy oy ymeeñybaatcixy mñid je ytung. ²⁵ Chi Demetrio huomujcy ymügügtijc je huñdi jadu'mbi tung tumb, nimay ajcxy:

—Mügügtijc, mnejhuñyb ajcxy co mñid jadyaabi tung huñdi ñch ajt nduunim, jada mñid jotcuyc ndzinaayim njugy'ajtim. ²⁶ E miich ajcxy m'ijxpy mnejhuñyb co je Pablo chach yaj'ixpijcy co ca' yi' diosity huñdi jäy ajcxy yajcojpy. E Pablo ti ooy mayjäy capxjotcidägy, canan yaayi Efeso, nañ jadu'n ma tüg'óciy Asia naaxjot. ²⁷ Mij jada xyajtigoyaanim ma ñch ajt n'adogñ e nañ jadu'n je mijpi dios, je Diana, ytigoyipy, ca' ni pin occapxpaatniy, je huñdi cham mayjäy y'ojadajtpy tüg'óciy ya Asia ñaaxjot etz huñdu'my naaxhuiñybi.

²⁸ Co jadu'n ajcxy midoy, chi ajcxy ooy yjotmätcooty, chi ytigñy ajcxy huambi jihuiñyb, chachmñangixy:

—¡Cömay jada Diana, yi efesiojäy ydiosa!

²⁹ Chi ajcxy yajhuinmñydygoyday je cajp jäy e majch ajcxy je Gayo etz Aristarco, huñdi tzoon Macedonia, metz yëydijc, huñdi Pablo anajty ajcxy ymñd huñdijtpy. Chi je cajpjäy ooy pahuijch pajugujcy ajcxy je Gayo etz Aristarco, yajnicxy ajcxy ma agujctijc huñduu ma jäy ñaymugyii. ³⁰ Chi Pablo yjatigñhuañ jäy agujc, mñidcapxa'ñ mñidmñydäga'ñ anajty je mayjäy. E je mibijcpidijc ca' ajcxy a'ixñy nicxy jiiy ytigiy. ³¹ Nañ jadu'n nijëjity Asia mñitungmñdipi huñdi anajty Pablo mñid ñaymüg'adyii, yajnigujxy ayuc, co ca' huaad ñicxy ma jäy ñaymújcixy. ³² Je mayjäy tügmucy anajty ijtcixy, ooy anajty yhuaangixy yjihuiñyixy, ca' anajty ajcxy ñay'ayuc-huinjihuiñyixy. E je jacmaaybi ni ca' anajty nejhuñyixy ti co chachnaymújcixy. ³³ Nijëjity jäy huñdibi anajty ajcxy mayjäy agujc, je ajcxy yajmñdmñydactay je Alejandro ti anajty tuunip jajtip. Chi je judío jäy ajcxy tijpidzimy je Alejandro ma mayjäy agujc. Chi Alejandro cñmñd tiy'ajt yecy co huen amongixy. Je' anajty ññgapxtüdamy judíojäy ajcxy. ³⁴ Co je mayjäy nejhuñy co je' je' yjudíojäyity, chi ajcxy ytigñy huaambi jihuiñybi jahueenjaty ycamejtzhority, ymñangixy:

—¡Cömay ooy yi Diana, yi Efeso jäy ydiosa!

³⁵ Chi je cajp jaaybi co anajty je jäy ti yaj'amoongixy hueeni, chi ajcxy nimay:

—Efeso jäy, tüg'óciy yi naaxhuiñyjäy nejhuñy co jada Efeso cajp yi' cuend'ajtp yi Diana chajptijc, je' Diana huñdi ooy ti yajcömay, etz yi Diana ññicx huñdi cä'u tzajpcixy. ³⁶ Ca' huaad ni pin ymina'ñ co ca' yjanchity. Amongix, ca' ti mdúngixipy pen ca' jayijp yajxon mhuinmaaygixy. ³⁷ Com jada yëydijc ajcxy tiñbi myajmiingixy, ca' ma ytundigooygixy, ca' yi' ma ajcxy jibic capxcixy ma miich ajcxy mdiosa Diana. ³⁸ Pen Demetrio etz huñdijaty mñd ytuñ pen ymñd xñhuñ mñd pinjaty, paady tungmñdipi etz tiydundac jiijity. Jëbi nigapxy ma tungmñdipi, jëbi miñ xyipy ñayññgapxtúutigixy. ³⁹ E pen huingbi

ayuc huïdi miich ajcxy mbijctzooyb, copity jada y'oyïhuipy ma jäy naymugyïi. ⁴⁰ Ymïd jada ayo'n co nicxy nayyajxïhuim co jäy cham ñaymïhuïdidyïi mïd jada ycixpi nej yam ytunyïi yjadyïi e ni ti tïy'ajt ïch ajt nganejhuïyïm nej nmïnaanïm pen ji anajty xyaj'amïdoohuim mïd co jäy cham chachhuaangixy chachjïhuïygyxy.

⁴¹ Co jadu'n miydactay, chi ycapxycijxy mïd je naymujcpïdijc.

20

Pablo ñicxy jim Macedonia etz Grecia

¹ Co je cajp jäy ycapxy'ayuc xeemy, chi Pablo huoomujcy je mïbijcpïdijc, e jaccapxhuijy ajcxy chi ycapxycijxni, chi chooni Efeso ñicxy jim Macedonia ñaaxjot. ² Cajp cajp Pablo oy co'ixiy je mïbijcpïdijc jaccapxhuijy ajcxy. Chi Pablo yja'ty jim Grecia ñaaxjot. ³ Chi Pablo yhuäcxijpy jim tugig po'. Jim Grecia Pablo anajty ybarcotigïhua'ñ ñicxa'ñ Siria. Co Pablo oy nejhuïy co judïojäy ajcxy ti yajnihuinmayïyïi yaj'oga'ñyïi barcojoty, chi yhuinma'ñybaty co huimbida'ñ tegyï'm, ñaxa'ñ jadüg'oc Macedonia. ⁴ Pablo mayjäy mïd ñicxy, mïdnicxy je Sópater huïdi anajty cogajp Berea, etz Aristarco, etz Segundo huïdi anajty cogajp Tesalónica, etz Gayo huïdi anajty cogajp Derbe, etz Timoteo, etz nañ jadu'n Tíquico, etz Trófimo huïdi tzoon jim Asia ñaaxjot. ⁵ Co jada mïbijcpïdijc ajcxy ñicxy jayijp, chi ajcxy xy'ahuijxyïch jim ma je cajp huïdi xïi Troas. ⁶ Co xïi ñajxtay mina yajcaay je tzajcaagy je huïdi ca' mïdity levadura, chi ïch ajcxy ndzooni jim Filipos barcojoty. Co migoox xïini, oy ïch ajcxy naybáatigixy jim Troas. Jim ïch ajcxy yhuäcxijpy huixtujc xïi.

Pablo co'ixiy je mïbijcpïdijc jim Troas

⁷ Domingo xïi ajcxy ñayyöymujci je mïbijcpïdijc chajcaagy ytujc-huäcxaangixy, e Pablo anajty ymïgügtijc yjacyaj'ixpijcpy. Je' co anajty com jabom chonaani, paady oy ayuc jacyajyoñ ixti ycujc-hua'cxchumïy. ⁸ Jiiby anajty canaag lámpara ytïcxy ma ajcxy anajty ti yöymujccixy ma tüg cuarto huïdi anajty oy ycixity. ⁹ E tüg yeeg'anäg huïdi anajty yxïi Eutico, ma ventana aguu anajty y'ïñäy. Com Pablo jecy oy yaj'ixpijcy, chi je yeeg'anäg ymäymajtzi, e tugig nihuijtzpety anajty ycixity je tijc ma ycäy. Chi ajcxy yajpïdïgy ögy. ¹⁰ Co Pablo yminajcy, chi ñaygïxnajaji amïneenmujcy je yeeg'anäg huïdi anajty ti ycäy. Chi Pablo nimay ymïgügtijc:

—Ca' mdzigïygyxy, juugy jada.

¹¹ Chi Pablo jadüg'oc ypejty ma je cuarto cixpi, chi chajcaagy tujc-huäcxy e yajcaay ajcxy, e jadu'n Pablo yjacmiydacy co oy xïimïyñ. Chi ycapxycijxni mïd je' ajcxy, chi ñicxni. ¹² E je yeeg'anäg huïdi anajty ti ycäy, chi ajcxy yajnicxy juugy, e ooy ajcxy yjotcugiy nidüg'óciy.

Choñ ajcxy Troas ñicxcixy Mileto

¹³ Chi ïch ajcxy jayijp nicxïgy barcojoty jim Asón co anajty jim nyajt-zonángixich Pablo, com ti anajty jadu'n mïdnayñimáayigixich co je' tegyï'm anajty ñicxa'ñ. ¹⁴ Co ïch ajcxy naybaatti jim Asón, chi Pablo ybarcotigïy mïd ïch ajcxy. Chi ïch ajcxy ñicxy jim Mitilene. ¹⁵ Chi ïch ajcxy jim ndzoñ, chi com jabom ïch ajcxy najxy mïhuingon Quío, comaax ïch ajcxy nja'ty jim ma barco jättac huïdi anajty yxïi Samos. Jim Trogilio ïch ajcxy nbocxy, com jabom ïch ajcxy nja'ty jim Mileto. ¹⁶ Chi Pablo ca' ñicxa'ñ jim Efeso co ca' yhuäcxi'ba'ñ jim Asia ñaaxjot, com tzojc anajty yjãda'ñ Jerusalén, com jim anajty yajnaxa'ñ Pentecostés xïi.

Pablo yajmïdmïydacy je huïdibi ajcxy ane'mb je mïbijcpïdijc

¹⁷ Jim Mileto anajty Pablo, chi capxyñiguejxy huïdi ajcxy nigohuajc'ajtp je mibijcpidijc huïdi ajcxy jim Efeso. ¹⁸ E co ajcxy miiñ, chi Pablo yminañ:

—Miich ajcxy mnejhuïyb jadu'n nej ñich ti njäy'atyich ma miich ajcxy tüg'óciy je xii je tiempo nej oga'n nja'tyich ya Asia. ¹⁹ Jecy ñich ooy ti n'ityich müd miich ajcxy, nduñich ma nHuindzin Jesús ytung müd yung naxy njot nhuinma'ñich, etz müd huinnii jotmay, etz ti may ayo'n nyajnaxyich ma yi judíojäy ajcxy. ²⁰ Ca' ti n'ixmachich je ngapx'ayuc huïdi oyip müd miich ajcxy ycixpi. Ti nyaj'ixpicyich mayjäy'agujc etz tijc tijc. ²¹ Ti ndiy'ajt yecyich ma judíojäy etz cham ma huïdi ca' yjudíojäyity. Nnimaydaayich co huen jothuimbijtcixy ma Dios, etz huen mibijccixy ñich ajt nHuindzin Jesucristo. ²² Jadachambi nicxpich jim Jerusalén; adzip je Espíritu Santo xyquexyich e ni nganejhuïyich ti ñich jim xyjadamy. ²³ Co ñich cajp cajp ma nnicxyich, je Espíritu Santo xyajnejhuïybich co jim Jerusalén jäy ajcxy xypidäga'ñich pujtigoty etz jim ajcxy xychaachytuna'ñich. ²⁴ Yi jadu'mbi ayuc ca' ñich nduñich cuendi, jada njugy'ajtich ca' ti tzoohuity. Jëyi janchtiy co nyajcixipyich jada tung jotcuyc, e nguydunipyich je Huindzin Jesús y'ayuc, je tiibi xyajniibicyich jada tung. Ngapxhuäcxibich yi oybi Jesucristo y'ayuc ytiy'ajt jadu'n nej Dios may'ajt ti tuñ müd jäy ajcxy ycixpi.

²⁵ E jadachambi nnejhuïybich co miich ajcxy ma ti ngapxhuäcxych Dios y'ayuc, ca' miich ajcxy xy'ocjac'ijxcixni jadügtecy. ²⁶ Paady cham nnimäyich miich ajcxy, ca' ni ti ngo'adzohuipyich müd miich ajcxy ycixpi. ²⁷ Com ti ngapxhuäcxych ma miich ajcxy tüg'óciy je Dios y'ayuc je Dios yhuinma'ñ. Ni ti ayuc ni ti ytiy'ajt ti ngacoyüchich ma miich ajcxy. ²⁸ Naycuend'ájtigixy ci'm etz cuend'ajtcixy tüg'óciy jäy ajcxy huïdi yajmij'ajtp je Huindzin Jesús, jadu'n ajcxy nipaady nej tügpicy cöbixy, etz miich ajcxy huïdi nigohuajc'ajtp je mibijcpidijc jadu'n miich ajcxy nipaady nej cöbixy cuend'ajtpi. Je Espíritu Santo ti xyajniibijccixy co mgüend'adipy ajcxy yi Jesús yjäy, huïdi ti cojuuy ajcxy ypocy müd yci'mni'py co y'o'cy.

²⁹ Chi Pablo yjacminañ:

—Nehhuïybich co ya ndzóonibich miinip huingbi jäy huïdi yajhuinma'ñydigoyam mibijcpidijc, jadu'n nej ahua'n iyujc huïdi cöbixy tzüdzip. ³⁰ Ji ma miich ajcxy ji jäy yaj'ixpigam anii ma yjapadyii yaj'ixpigipy tiy'ajt oybi jigix yi mibijcpidijc ypanicxiyb. ³¹ Naygüend'ájtigix, mjäymedziyb ajcxy jadu'n nej ñich tugüig jimijt ti nyaj'ixpicyich xim tzuum jabom jabom, müd huinnii jotmay ti nyaj'ixpijccixy miich ajcxy nidüg nidüg.

³² Jadachambi ñich, nmigügtijcich ajcxy, Dios miich ajcxy nyajpuhuanïyb, nyajmihui'maamyich miich ajcxy Dios y'ayuc jadu'n nej Dios ajt xychojcin xyjihuiyim. Ma Dios y'ayuc miich ajcxy mbaadipy mic'ajtp ma yi mibijcin, e mbaadipy ajcxy it lugar ma Dios quipxyi müd ajcxy nidüg'óciy tiibi yajhuäch yjot yhuinma'ñ. ³³ Ni ti ñich ti nga'adzocy, ni pin yhuit ymeeñ huïdibi n'ocjedïybich. ³⁴ Miich ajcxy mnejhuïyb co ti nduñich, müd ngi'mgijich ci'm ti nnaymöyijich huïdi nyajmayjajtpyich etz nañ jadu'n ti nbubetyich nmigügtijcich huïdi ñich anajty nmüid. ³⁵ ñich miich ajcxy ti nyajni'ixiygixy nej jëbi mdungixy, nej jëbi mbubéjtcixy migügtijc huïdi pa'm'ijtp, etz huïdi tijaty yajmayjajtp. Jäymedzi ajcxy je Huindzin Dios y'ayuc co yminañ: “Jacjotcuyc je' huïdi yejcp, ca'ydi huïdibi yajmooyb.”

³⁶ Co jadu'n ycapxtay, chi Pablo ycoxtinay'ahuïy müd je' ajcxy, e mibijctzoy ajcxy Dios. ³⁷ Ytigüy ajcxy yaaxpi nidüg'óciy, e mineeñ ajcxy Pablo etz tzüxcy. ³⁸ Ooy ajcxy jihuiy nej anajty ti ñimäyigixy ajcxy co ca' yjac'ixiyb ajcxy jadügtecy. Chi ajcxy oy najtzhuohuiy jim ma barco.

21

Pablo ñicxy jim Jerusalén

¹ Co ñich ajcxy ngapxycíjxy mïid je mibijcpidijc, chi ñich ajcxy nbarcotigíy, tiiyi nicxy ñich ajcxy jim Cos. Com jabom ndzooñich Cos nicxy ñich ajcxy jim Rodas. Chi ñich ajcxy ndzooñ Rodas nicx ñich ajcxy jim Pátara. ² Jim Pátara ñich ajcxy nbaaty tüg barco huïdi anajty najxp Fenicia ñaaxjot. Jim ñich ajcxy nbarcotigíy jadüg'oc, chi ñich ajcxy nnicxni. ³ Chi ñich ajcxy mmij'ijxy Chipre je naax mejy'agujcpi, anajty'amy je' yhui'my. Jacnicxy ñich ajcxy Siria ñaaxjot, chi je barco ytigíy ma yjättac jim Tiro co jim anajty chimydajc yajhuïma'ñ. ⁴ Jim ñich ajcxy nbaty jäy huïdi anajty yajmij'ajtp Jesús, chi nmïidhuäcxijpich ajcxy huixtujc xii. Je' ajcxy je Espíritu Santo yajnejhuïy co Pablo ayo'n pada'ñ Jerusalén, paady ajcxy nimay Pablo co ca' huaad jim ñicxy. ⁵ Co huixtujc xii bi yca'pxy, chi ñich ajcxy ndzooni. E tüg'ócíy mibijcpidijc mïid y'ung ytöxyijc oy xytüjijphuohuïyigixyich cajppa'. Jim ma mejypa' ngoxtinay'ahuïy ñich ajcxy, chi ñich ajcxy nmibijctzoy Dios. ⁶ Huin'it ñich ajcxy ngapxycijxni, chi nbarcotigíyñi ñich ajcxy e je mibijcpidijc yhuimbijtni ajcxy ma ytijc.

⁷ Co ñich ajcxy ndzooñ Tiro, chi nicxy ñich ajcxy Tolemaida. Jim ñich ajcxy ngapxpcxich je huïdi anajty ajcxy mijpidaacp Jesús, e nmïidhui'my ñich ajcxy jim tüg xii. ⁸ Com jabom ñich ajcxy ndzooñ Tolemaida mïid Pablo etz pinjaty ñich ajcxy anajty nmïid. Chi ñich ajcxy nja'ty jim Cesarea. E chi ñich ajcxy nicx ma Felipe ytijc, je huïdibi anajty capxhuäcxy Jesucristo ytíy'ajt je oybi. Je' je' huïdi tuun je nihuixtujcpi taabi ajcxy caayin uucin yajhuäcxy jim Jerusalén oga'n. Chi ñich ajcxy nhui'my mïid je'. ⁹ Felipe mïdaax anajty ñix mïidity, ca'ni anajty ajcxy ypijccixy. E je' ñix ajcxy anajty Dios y'ayucnajtzcaxíyipy. ¹⁰ Ti anajty ñich ajcxy jim nhuäcxipy canaag xii co oy yjäty tüg ayucnajtzcaxíyibi huïdi anajty yxii Agabo, jim anajty ti chooñ Judea. ¹¹ Chi Agabo y'oy xycogapxíyigixy ma ñich ajcxy njättac. Chi Agabo Pablo yhuïn huijtzäcxi, e je' mïid ñaygíxojtz ñaydecyxojtzi, chi ymïnañ:

—Je Espíritu Santo jadu'n mïnamb co jim Jerusalén jadu'n judíojäy ajcxy cïxodza'ñ tecyodza'ñ jada huïn yhuindzin, e nañ cïyega'ñ ajcxy ma huïdi ca' yjudíojäyity.

¹² Co jadu'n yajmïdoy, ñich ajcxy etz je Cesarea jäy ngohuaníy ñich ajcxy Pablo co ca' huaad ñicxy jim Jerusalén. ¹³ Huin'it Pablo y'adzooy:

—¿Nej co myaaxcixy mïid ñich ycixpi? ¿Nej ñich miich ajcxy co njot nhuinma'ñ xyaj'amutzcïyi? ñich nayyéjibich mïid naygíxodzii naydecyxojdii, nañ jëbi n'ögibich jim Jerusalén mïid je Huindzin Jesús ycixpi.

¹⁴ Co ca' ñich ajcxy mïmadacy nicxy nyajhuí'ngixyich Pablo, chi ñich ajcxy n'amooni, chi ñich ajcxy ñayñimaayi:

—Huen cuyduñ je Huindzin Jesús chojcïn.

¹⁵ Co jadu'n yjajti, chi ñich ajcxy ndzonii ni'ixíy e chi ñich ajcxy nicxy jim Jerusalén. ¹⁶ Mïid nicxy ñich ajcxy nijëjity mibijcpidijc huïdi tzoon Cesarea, e nañ tzooñ anajty tüg Chipre jäy huïdi anajty yxii Mnasón, jecyip anajty jijptigíyñi jada mibijcïn e je' ñich ajcxy nicxy xyajjättägaangixy.

Pablo oy cogapxíy Jacobo

¹⁷ Co ñich ajcxy nja'ty jim Jerusalén, chi je mibijcpidijc ñich ajcxy xycöbijc janch jotcujc. ¹⁸ Com jabom ñich ajcxy nicxy mïid Pablo, y'oy ñich ajcxy ngogapxíy Jacobo, e jim anajty tüg'ócíy huïdi nigohuajc'ajtp je mibijcpidijc. ¹⁹ Chi Pablo ymïgügtijc capxpcoxy, e yajmïdmïydacy ti anajty Dios ti tuñ mïid yí' ma yí jäy ajcxy huïdi ca' yjudíojäyity. ²⁰ Co ajcxy jadu'n mïdooy, chi ajcxy huin'íy jäymejch yí Dios, chi ajcxy Pablo nimay:

—Migüg Pablo, miich mnejhuuyb co ya canaag mil jäy ti mibicy Jesús, e yjactimmina'n ajcxy co copicy nguyduunim Moisés ycötujcin je jecyip. ²¹ Ti ajcxy yajmüdmüydägyii co miich mdzachjäyyaj'ixpicy ma tüg'óciy judíojäy huidi ajcxy jiguégy adzinaayb co ca' huaad tuñycuenti Moisés ycötújcin je jecyip, etz ca' ycopicyity co tiy'ajttüygixipy y'ung, etz ni ca' ycopicyity payöyipy ich ajt ngostumbre. ²² ¿Ti huaad nduunim? Jotmädam ajcxy co nejhuihuipy co ya miich ti mjäty. ²³ Hue' janchtiy jadu'n miich mdunipy: cha midaax yëydijc huidi cuydunamy tüg huandaacin. ²⁴ Müdnicy je' ajcxy, nicx nayya-jpocyñihuaatzi müd yi' ajcxy, e miich mgojuydayipy nej anajty ajcxy ypadyii je meeñyduni. E chi ajcxy myajcöme'pxipy cödza'm, e jadu'n je jäy ajcxy huinjihuüydähuipy co ca' yjanchtiy jadu'n nej xyñimiydaaccixy, jëyi co miich nañ jadu'n mguydun je Moisés ycötujcin je jecyip. ²⁵ Huidibi janchtiy jadu'n nej yi' huidibi ajcxy ca' yjudíojäyity, e ti müpidaaccixy Jesús, ti ich yi' ajcxy nijayiygixich co ca' túngixipy cuenti jada jadu'mbi judíojäy ycostumbre. Je' janchtiy co ca' huaad tzützcixipy je tübi jäy yajhuindzigiy ídolos, ni ca' huaad jicxcixipy ni'py, etz ni ca' ajcxy tzüdzipy huidi yo'c-huüdy ti y'ögy, etz ca' ajcxy huingbi töxyjäy migapxtigóoygixipy.

Chi ajcxy majch je Pablo ma Dios ytijc

²⁶ Chi Pablo müd nicxy je nimidaaxpi yëydijc, com jabom ajcxy nayya-jpocyñihuaatzi ajcxy, chi ajcxy ytigiy ma Dios ytijc, e chi ajcxy ytiy'ajt yejcy ma judío teedy ti xü ycixa'n je nayyajpocyñihuaadzi, etz ti xü huindzig'iñ iyujc cïyegaangixy nidüg nidüg.

²⁷ Ma anajty yca'pxaani je mühuixtujcxübi nijëjity judíojäy, choon jim Asia, chi ajcxy ijxy Pablo ma Dios ytijc. Huin'it ajcxy je mayjäy majch Pablo, yajhuangoty yajjihuygoty, ²⁸ chi ajcxy yam chachminaangixy:

—¡Israel jäy ajcxy, pubejtich ich ajcxy! Jada je' je yëydijc huidi xi ya tzach nigapxp ni'ojüyb judíojäy ycostumbre, Moisés ycötújcin, etz nDios ytijc. E jadüg nax ti yajtiygixy griegojäy ma Dios ytijc, yajjibicüygixy jada it lugar huätzpi. (Com ca' ñigödúcyity nicxy griegojäy ytigiy ma Dios ytijc.)

²⁹ Paady anajty jadu'n yminaangixy je huidi ajcxy majtz je Pablo, com co ijxy ajcxy Pablo müdhuidity cajpjoty je Tróximo, huidi anajty cogajp Efeso. Hue' anajty tijcixy co Pablo ti müdtigiy Tróximo tzajtigoty.

³⁰ Tüg'óciy je cajpjäy yjotmätcottay, müñ ajcxy poyigy majch ajcxy je Pablo yajpidzimy tzajtigoty pahuijch pajugujcy. Chi ajcxy müc'amy agüy Dios ytijc.

³¹ Yaj'ögamyb anajty ajcxy Pablo. Chi je soldado huindzin ayuc midoy co tüg'óciy je cajp jäy ajcxy ti chachhuaangixy chachjihuygixy. ³² Je soldado huindzin huodzonday ysoldado ajcxy, e chi ajcxy ñicxy poyigy ma je mayjäy yhuaangixy yjihuygixy. Co je mayjäy ajcxy ijxy müñ soldado ajcxy müd yhuindzin, chi ajcxy ixmajch Pablo ca' ocjaccójxcixni. ³³ Co je soldado huindzin jim ja'ty, chi yajmajtzi je Pablo, ni'anëmdiy co huen cïxochyii müd mejtz cadena. Chi yajtiy pin je' anajty, e ti ti tuñ. ³⁴ Chi je mayjäy ajcxy ytigiy huaambi jihuüybi, e jadu'n je soldado huindzin ca' ni nej huinjihuüy müd je ne'mbi. Chi ni'ane'mdiy co huen Pablo yajnicxyii ma cuartel. ³⁵ Co jim yja'ty ma cuartel pediydac, chi je soldado ajcxy cïyigy Pablo, co anajty je mayjäy chachjottigoyñájxcixy tzachyaj'ögaangixy anajty Pablo. ³⁶ Tüg'óciy je mayjäy pamiingixy axam je soldado ajcxy, yam chachminaangixy:

—¡Huen ögy!

Pablo ñaygohuaani ma je mayjäy

³⁷ Co anajty yajtigihuañyii cuartel tigoty, chi Pablo migapxy je soldado huindzin miid griego ayuc, yminañ:

—¿Nej jëbi ii nmiidmiydägy tüg'aa metz'aaji?

Chi je soldado huindzin y'adzooy:

—¿Nej mjaipy miich griego y'ayuc? ³⁸ ¿Nej ca' jada' miich jëjity je egipcio jäy huidi namni tzip yajpidicp, e huobidzimy midaax mil jäy yaj'öcpi, miid nicxy ajcxy jim migtigiduum?

³⁹ Chi Pablo nimay je soldado huindzin:

—Ich judíojäy ich, jim ngogápidyich Tarso, tüg mijcajp huidi yajpatpi jim Cilicia ñaaxjot. Tun may'ajt miñ mayjäy n'ocmigapxich.

⁴⁰ Co je soldado huindzin a'ixiyy, chi Pablo ytinay'ahuuy ma je cuartel pedydac, e cimiid ytiy'ajt yejcy co huen amoongixy. Co je mayjäy ajcxy y'amonday, chi migapxcoty miid hebreo ayuc yminañ:

22

¹ —Migügtijc etz mij'anäctijc, midoogixy jadu'n nej ich yam nnayñigapxtüdyii.

² Co je mayjäy ajcxy midoy co ymigápxigixy miid hebreo y'ayuc, chi ajcxy y'amonday, chi Pablo yminañ:

³ —Judíojäy ich. Jim Tarso nma'xung'ajtyich, Cilicia ñaaxjot. E ya Jerusalén ti nyeegyich. Ixpjicich ya ma Gamaliel, etz yajxon Gamaliel ti xyaj'ixpicyich ajt nmij'ap nmijteedy ytiy'ajt etz ycötújcín. Njatyim nyajmij'ajtpyich Dios jadu'n nej miich ajcxy Dios myajmij'ajtcixy cham. ⁴ Jecy ti n'ixhuidity ti nbahuidityich je jäy ajcxy huidi anajty mijpidaacp Jesús y'ayuc, nyaj'öctähuaamyich anajty, e nyajnicxpyich anajty mach yëydijctijc etz töxyjäydijc, nbidägyich anajty ajcxy pujxtigoty. ⁵ Je teedy migtungmüdpí etz tüg'óciy mij'anäctijc ymiid tiy'ajt, co ich ajcxy xymooyich cötujcín, e nnicxyich anajty jim Damasco ma nmigügtijcich yi judío jäy ajcxy. N'ixtäyich anajty je jäy ajcxy huidi Jesús y'ayuc mijpidaacp, madza'ñich anajty ajcxy, e nyajmiinañich anajty ajcxy ya Jerusalén huen yajtzaachytunggixy.

Pablo nimydacy nej yjothuimbijty

⁶ Co ich anajty ndüyöyich mihuingon Damasco, cujc yxii anajty, chi janch timitiini yticxigy jühuidity jadu'n nej jin ma ich, hue' anajty choon tzajpjoty.

⁷ Chi jim ngidaayich, huin'it nmidooyich tüg ayuc xyñimäyich: “Saulo, Saulo, ¿ti co xypahuidijttägyich?” ⁸ Huin'it n'amidooyich: “¿Mbin miich, Huindzin?”

Chi xy'adzooyich: “Ich je' je Jesús je huidi cogajp jim Nazaret, je huidi miich mdzachpahuidijttacpy.” ⁹ Pinjaty ich anajty nmüid y'ijx je' ajcxy je ticxin, chi ajcxy ooy chigiiy, e ca' ajcxy huinjihuuy je ayuc huidi anajty nmigapxyijich.

¹⁰ Huin'it nnimaayich: “¿Ti jëbi nduñich, Huindzin?” Chi je Huindzin Jesús xy'adzooyich: “Pidig e yajyöy mdu', nicxy jim Damasco, jim myajnimähuuyb tüg'óciy ti jëbi mduñ.” ¹¹ Je ticxin hue' je' xy'ixmajchich huiintz. E chi je nmigügtijcich xyhuijzoonich ajcxy cigixy, xyajja'tyich ajcxy jim Damasco.

¹² Jim Damasco anajty chinäy tüg yëydijc huidi anajty yxii Ananías, je huidi anajty ooy cuyduñ Moisés ycötújcín je jécyip. E judíojäy ajcxy huidi jim tzinaayb ooy cömaaygixy co ooy y'oyjäyity. ¹³ Chi Ananías ymiñ ma njättaacich, e ytinay'ihuuy ma ich nmijc, chi xyñimaayich: “Migüg Saulo, ijxigich jadüg'oc huinjemy.” Tim huin'ity n'ijxigych. ¹⁴ Chi Ananías xyñimaayich: “Je Dios huidi ajt nmij'ap nmijteedy ojadajt, je' ti xyhuin'ixy jigix mnejhuuipy Dios yhuinma'ñ, etz m'ixipy je tudäcypí jäy, e mmidohuipy yci'm ayuc huidi ycapxy. ¹⁵ Dios ti xyhuin'ixy jigix nicxy mdiy'ajt

yecy ma tüg'óciy naaxhuiñyjäy, etz mnimiydägipy nej ti m'ixy ti mmidooy.
¹⁶ Jadachambi, ¿nej co mhuäcxipy? Pidig etz nñbet. Mibijctzou Dios jigix mbocy ñihuädzipy.”

Pablo nimiydacy nej oy yajquexy ma je huídibi anajty ajcxy ca'p yjudíojäyity

¹⁷ Co nicxnich jadüg'oc Jerusalén, chi nnicxich ma Dios ytijc, oy Dios nmibijctzooyich. Chi ñich jüby tzajtigoty n'ixmañyñyich. ¹⁸ N'ijxyich je Huindzin Jesús e xyñimaayich: “Pidzim ya Jerusalén mic'amy, ca' je Jerusalén jäy ajcxy cöbigipy miich m'ayuc jadu'n nej xyñigapxa'ñich.” ¹⁹ Huin'it n'adzooyich: “Huindzin Jesús, yi jäy ajcxy ñejhuiyb co ñich anajty nnicxich huen huídi judíojäy naymujctac n'ixtäyich yi jäy ajcxy huídi miich m'ayuc xymibijcip, ti nbidägyich anajty ajcxy pujxtigoty, ooy ñich ajcxy yi' ti ndzaachytuñ ti nga'oyduuñich. ²⁰ Co ajcxy yaj'ögy je Esteban, miich mdumbi, huídi miich m'ayuc xycapxhuäcxip, jim ñich anajty nañ jadu'n yajpaady. E ooy njäygidacyich co ajcxy yaj'o'cy, ixti ngüend'ajtich je' ajcxy yjocxhuit huídi Esteban yaj'o'c.” ²¹ Chi ñich nHuindzin Jesús xyñimay: “Cham ñich miich nguexy jigüegy it ma yi jäy ajcxy huídi ca' yjudíojäyity.”

Pablo, ma je comandante yci'am

²² E yabaad je mayjäy y'amido'ijty Pablo y'ayuc, chi ytigñy ajcxy huambi jihuiybi chachmínaangixy:

—¡Huen óc yjiibi yëydijc! ¡Ca' huaad yjactzinäy!

²³ Yam yhuaangixy yjihuygyixy, yam yjocxhuit tzachjengixy, etz naaxhuaay tzachyujc-huicixy. ²⁴ Chi je soldado huindzin ni'ane'mdñy co huen Pablo yajnicxyii cuartel tigoty, e ni'ane'mdñy co huen ci'adyii jigix nigapxip ti ti tuñ co je jäy ti ymibidigyii. ²⁵ Ti anajty ajcxy cíxojtcixy, e chi anajty ajcxy tzaachytunaangixy co Pablo ñimay je capitán huídi anajty huindy:

—¿Ti cötújcín miich ajcxy mñid co mdzaachytuna'ñ tüg romanojäy, ni ca' ajcxy jayijp mdiyduñ?

²⁶ Co jadu'n midooy je capitán, chi ñicxy oy yajnimäy je comandante:

—Ixcim nej mduñ yi jäy, com hue' yi' romanojäy.

²⁷ Huin'it je comandante ymijhuägy ma je Pablo, chi y'amidooy:

—¿Nej janch co miich mromanojäyity?

Chi Pablo y'adzooy:

—Janch.

²⁸ Huin'it je comandante ñimay Pablo:

—Meeñgyixy ñich jada nbaaty co naydijyijich romanojäy.

E chi Pablo y'adzooy:

—Ñich ti nmñibi'c'ajtich yi'.

²⁹ Mñid jëyi, je huídibi anajty ajcxy cí'adam je Pablo, chi puyöydúutcixni. Nañ jadu'n je comandante ooy ñay'adzigñy, mñid co cíxojch Pablo mñid cadena.

Pablo ma je judíojäy ajcxy yjuntitungixy

³⁰ Com jabom je comandante co anajty nejhuihua'ñ ti ycixpi co ti yxiyii je Pablo yi judíojäy, huen yajminagyii cadena ma Pablo yci'. Chi ane'my co yajhuomujci je teedy tungmñidpi etz je judío mij'anäctijc. Huin'it je comandante yajnicxy Pablo ma je huindzindijc etz ixpicytijc anajty ti ñaymújcigixy.

23

¹ Huin'it Pablo yaj'ijxpejty je mayjäy huídi anajty ti nayyöymújcigixy, e chi ajcxy ñimay:

—Migügtijc, Dios y'ijxpy ñejhuiyb nej ñich ti nduñ maabi nyeecpidzimyich, tudägy n'ityich ixti chambaadni.

2 Huin'it je Ananías, je teedy mǎitungmǎidpǎi, ni'ane'mdǎiy Pablo co huen yaj'accoxǎigy. 3 Chi Pablo ymǎinañ:

—¡Dios xychaachytunǎipy miich huǎidibi mnaybidaacǎip nej jǎhuiy ooy mdudǎgyjǎyǎity, e ca' yjanchǎity! Paady miich m'ǎñǎy ma cǎtujctac jǎgix nyajtydunǎipyǎich nej je ley y'ane'my. Chi mmǎidundǎigooy je ley co ti xyajco-jxyǎijǎich.

4 Je jǎy ajcxy huǎidi anajty jǎim mǎinañ:

—¿Jadu'n miich mmǎigapxtǎigoy yǎi Dios ymǎitungmǎidpǎi?

5 Chi Pablo ymǎinañ:

—Mǎigǔgtǎijc, ǎich ca' anajty nejhuǎiyǎich, pen yǎi je' Dios ymǎitungmǎidpǎi. Com jaybety jadu'n ma Dios ñecy: “Ca' huaad jǎibic mnigapxǎipy huǎidi tungmǎid ijtp ma miich mǎjǎy.”

6 Huin'it Pablo ijxy nejhuǎiy co jǎim juntǎi'joty mejtzpǎicy ixpǎicytǎijc anajty jǎim, jǎim huǎidi saduceo y'ixpǎijcǎin ymǎijpǎidacp etz nañ jadu'n jǎim huǎidi fariseo y'ixpǎijcǎin ymǎijpǎidacp, chi Pablo ymǎinañ mǎic:

—Mǎigǔgtǎijcǎich, fariseojǎy ǎich, nañ jadu'n ndeedyǎich fariseojǎy je'. Cham nyajtyduñǎich mǎid jǎegixpǎi co nmǎibicyǎich co Dios yajjugypǎigǎipy jǎy tǎibi y'ǎccǎixy.

7 Co Pablo jadu'n ymǎinanday, chi fariseojǎy etz saduceojǎy mǎiñ xyǎipy ajcxy ca' ñay'ayuc-huinjǎihuiyǎi. Chi je naymujcpǎidǎijc ajcxy ñaybǎijc-huǎcxi. 8 Je' co je saduceojǎy ymǎinaangǎixy co o'cǎip ca' yjugypǎigǎipy, ni ca' jǎi ángel ajcxy, nañ ca' jǎy y'alma, nañ ca' jǎi je Espǎiritu Santo, etz ni ca' jǎi mujcu' ajcxy. Je fariseojǎy ymǎibǎijcǎipy je' ajcxy co yjǎijǎity ángel ajcxy, co ǎocǎip jugypǎigaangǎixy, co je Espǎiritu Santo yjǎijǎity, co jǎy ajcxy mǎidǎity y'alma, etz co mujcu' ajcxy yjǎijǎity. 9 Tǎüg'ǎccǎiy jǎy ajcxy ma je naymujctac ytǎigǎiy huambi jǎihuiyǎibi. Chi nijǎjǎity fariseojǎy huǎidi nihuǎindzǎin'ajtpy je Moisés ycǎtǎijcǎin nǎigapxtuty Pablo ymǎinañ:

—Jadayaabi jǎy ca' ti pocy ti tuñ. Ca' yjecyǎity ti jada' ymǎigapxyǎi tǎüg espǎiritu o tǎüg ángel.

10 Chi je mayjǎy anajty ooy mǎic ti ñayyajot'ambǎijcǎigǎixy. Je soldado huǎindzǎin tzigǎiyb anajty co Pablo y'ahuoonnǎihuiyǎyb y'agidzǎihuiyǎyb, paady ni'ane'mdǎiy huen yǎi soldado ajcxy yajpǎidzǎimgǎixy juntǎijoty e yajnǎicxǎicǎipy yǎi Pablo jadǎüg'oc ma cuartel.

11 Huin'it coodz ñayguǎexǎici je Huǎindzǎin Jesús ma Pablo ymǎijc, nǎimaayǎi:

—Jotmǎicǎip Pablo, com jadu'n nej ya Jerusalén ti xyñǎigodǎiy'ajt'átyǎich, nañ jadu'n xyñǎigodǎiy'ajt'adǎipyǎich jǎim Roma.

Ixtaagyǎixy huinmañ nej huaad Pablo yaj'ǎccǎixy

12 Com jabom nijǎjǎity judǎiojǎy ñaygapxǎi co yaj'ǎgaangǎixy Pablo. E chi ajcxy capxycǎdujcy ñay'ǎibojcǎi ñaygapxǎipojcǎi co ca' ycayaangǎixy y'ǎgaangǎixy ixtǎi cooni ajcxy yaj'ǎccǎixipy Pablo. 13 Nihuixchiguǎipx naxy anajty yǎeydǎijctǎijc huǎidi ajcxy jadu'n naygapxǎi. 14 Chi ajcxy ninǎicxy je teedy ajcxy huǎidibi mǎitungmǎid etz judǎio mǎij'anǎctǎijc, nǎimay ajcxy:

—ǎich ajcxy ti ngapxycǎdujccǎixy co ca' ngayǎangǎixyǎich n'ǎgǎangǎixyǎich ixtǎi cooni ǎich ajcxy nyaj'ǎccǎip Pablo. 15 Jadachambi miich ajcxy, etz jacjadyǎi ixpǎicytǎijc mǎij'anǎctǎijc nidungǎiygǎixy ma je soldado huǎindzǎin, co huen jabom yajminyǎi Pablo jadǎügtecy ma miich ajcxy. E aanǎidaaccǎixy co jacyajxon yajtydunañ, e ni'ixǎi ǎich ajcxy anajty n'ijtcǎixy co Pablo nyaj'ǎgǎibich ca'ni anajty yjǎty ma naymujctac.

16 Pablo chi' ymang nejhuǎiy nej je' anajty ti ñaygǎpxǎigǎixy, chi ñǎicxy ma cuartel oy Pablo yajnimǎy. 17 Huin'it Pablo yaaxǎi tǎüg soldado huǎindzǎin, e chi nǎimay:

—Yajnicx jada yeeg'anäg ma je comandante, ymïd yi' ayuc ti nigapxaamy.

¹⁸ Chi je soldado huindzin yajnicxy je yeeg'anäg ma je comandante, e chi nimay:

—Pablo, je machyjäy, ti xyaaxyich, ti xyñimäyich co nmïdminipyich jada yeeg'anäg, ymïd yi' ayuc huïdi ñigapxaamy ma miich.

¹⁹ Chi je comandante majch je yeeg'anäg ma yci', e yajnicxy abicy, chi yaj'amidooy:

—¿Ti xyajnimähuaamyich?

²⁰ Chi je yeeg'anäg yminañ:

—Yi judíojäy ajcxy ti ñaygápxigixy co xyñimähuaangixy co jabom Pablo myajnicxipy jim ma ñayyöymugáanigixy, y'aanïdägaangixy co jacyajxon tïydunaangixy. ²¹ Ca' miich yi' mmibigipy; com nihuixchiguïpx naxy yëdijctijc jim yi' ajcxy ahuixy yüch. Ti capxycödujccixy co ca' ajcxy ycayañ y'ügañ ixti cooni ajcxy yaj'ögipy je Pablo. Jadachambi ni'ixi jim y'ijtcixy, jëyi miich m'ayuc ajcxy xyjamidohuaani, pen mni'adzooyb.

²² Chi je comandante ycapxycixy mïd je yeeg'anäg. Chi nimay co ca' huaad ymïydägy mïd jacpinjaty jadu'n nej anajty ti ymïydaaccixy.

Yajnicxy ajcxy Pablo ma je gobernador Félix

²³ Chi je comandante yaaxi metz capitán moy cötújcïn huen nayñi'ixiïyigixy nimejtzmigo'px soldado huïdi nicxip tegyi'm, etz tugi'pxmajc huïdi nicxip cohuaaygixy, etz mejtz migo'px quipyjijpxu'ñmïdpi, huen nicxcixy jim Cesarea mijcoodz. ²⁴ Nañ ni'ane'mdïy co huen cohuaay ni'ixi pidägyii huïdi Pablo yaj'ïñahuipy, e moy cötújcïn co huen oy yajxon ajcxy Pablo yajjadipy ma je gobernador Félix. ²⁵ Chi yajmiguejxy tüg necy yjaayity jadu'n:

²⁶ “Ïich comandante, Claudio Lisias, cham nguejxyich jada necy ma miich, mijpi gobernador Félix, e nguejxpyich capxpoocxin. ²⁷ Je judíojäy ajcxy ti anajty majtcixy jadayaabi yëdijc, yaj'ögamy anajty ajcxy co ïich oy nejhuïy co je' yromanojäyity, chi nninicxich mïd soldadtijc etz nnihuaañich. ²⁸ Co ïich ooy anajty nejhuïhuañich ti anajty co ti xigixy, chi nyajnicxich ma anajty ajcxy tungmïdpi etz mij'anäctijc ti ñayyöymüjicigixy. ²⁹ Hue' anajty yi' ycixpi ti yajxïy co anajty ti ytundigooy ma yi' ajcxy ycötújcïn. Ca' anajty ytiy'ájtity co yaj'öccixipy, e ni ca' huaad ymach'ïñäy. ³⁰ Co ïich oy nejhuïy co yi' judíojäy anajty ti nihuinmayïygixy co yaj'ögaangixy, cham ïich miich yi' nyajnigüexy. E ti ïich nañ jadu'n nimay huïdi ti yxïyii huen nicxcixy ma miich, e jëbi ajcxy jim nigapxy ti ycixpi co midzip'ajtcixy. Ji naybaatim.”

³¹ Je soldadtijc nej anajty ti ycötújcïn möyii tim huin'ítity mïd tzooñ je Pablo mijcoodz ixti yajja'ty ajcxy Antípatris. ³² Je soldadtijc huïdi ajcxy tegyi'm nicxp, com jabom huimbíjtcixni, chi yjá'tcixni ma cuartel. E je soldadtijc cohuaaygixpi jacnicxy je' ajcxy mïd Pablo. ³³ Co je' ajcxy yja'ty jim Cesarea, chi ajcxy je gobernador necy yajcïdigïy, chi ajcxy nañ jadu'n yajquëxïgy je Pablo ma je' yhuinduu. ³⁴ Co ñecy capxtay, chi je gobernador y'amidooy Pablo ma anajty yconaaxity. Co nejhuïy co yCiliciajäyity, ³⁵ chi nimay:

—Jiini nejhuïhuïbich je tïy'ajt co anajty miingixy huïdi ti xyxigixy.

Huin'it ni'ane'mdïy co huen cuend'adyii ma je Herodes ymïjtijc.

24

Pablo ñaygohua'ñyii ma je gobernador Félix yhuinduu

¹ Co migoox xii Ananías je teedy ajcxy ymïjtungmïdpi yja'ty jim Cesarea mïd judío mij'anäctijc ajcxy etz mïd tüg huingapxpi huïdi anajty yxii Tértulo,

chi ajcxy ñayguëxíci ma gobernador co xihuaangixy Pablo. ² Co ajcxy Pablo yajmiñ, chi Tértulo ytigüy xibi, nimay Félix:

—Miid miich ycixpi jotcuje je naaxcayp y'ijty, ca' ma tzip, je' co yaxon m'ane'mdäy miid oyhuinma'ñ. ³ Tüg'óciy ñch ajcxy njäygidacpyich hueñyma'ámyity, miich migtungmüdpí Félix. ⁴ Ca'ydi mdiempo nyajtigooyi mij, tun may'ajt amido'íjtigich n'ayuc tüg jaxígyi. ⁵ Com ti nnejhuüygixich co jada Pablo, ooy ayo'n yecy hueñytimma'ámyity. Xi ya judíojäy tzach pijc-huäcxy miid y'ayuc huidi ymiid. Yi' je' nigohuajc'ajtp tüg pícy jäy huidi jäy ytipty Nazaret jäy. ⁶ Com tundigoy ma ñch ajcxy nDios ytijc nej ca' ypadyii, chi ñch ajcxy nmajch, e chi ñch ajcxy njatydunaañich jadu'n nej ñch ajcxy ngötújcin y'ane'my. ⁷ Per je comandante Lisias je' yajtigüy mictägy, chi ñch ajcxy xypijci jada Pablo. ⁸ E Lisias ymínañ co pinjaty anajty ti yxíyii huen miñ ma miich. Miich ci'm jëbi myajtiy, e mnejhuühuip tüg'óciy je tiy'ajt jadu'n nej ñch ajcxy yi' ti nxíy.

⁹ E je judíojäy ajcxy huidi anajty jim gobernador yhuinduu, ac jadu'n ajcxy ymínaangixy co yjanchity jadu'n nej Tértulo ymína'ñ. ¹⁰ Huin'it je gobernador tiy'ajt moy Pablo cimiid co huen capxy, chi Pablo ymínañ:

—Janch jotcuje jëbi nayñigapxtüdyiijich ma miich Félix, com nejhuüybich co miich migtungmüdpí ma jada naaxcayp cham xii jimijt ñicxni. ¹¹ Miich ci'm jëb mnejhuüy je tiy'ajt, jëyi anajty ñimajcmetzxiiy maabi anajty nbättigüyich jim Jerusalén Dios ojadajtpi. ¹² Ca' ñch yi' ajcxy xypaty ndzipcapxy n'ahua'ngapxyich miid pinjaty. E ni ñch ngajäy'axiigüy ngajäy'agapxiy ma Dios ytijc, etz ni ma naymujectac etz ni ma Jerusalén cayp. ¹³ Jada jäy ajcxy ca' ajcxy müdity pinjaty tiy'ajt yegipy nej ñch yi' ajcxy yxíy. ¹⁴ Huidi janch ngapxypidzi-mybich ma miich jadu'n nej je tzinaayin, je jemybi ixpijcin huidibi yi' ajcxy ytipty ca' y'óyity, je' je' je' ixpijcin huidi ñch miid n'ojadajtpich Dios, je Dios huidi ñch ajcxy nmij'ap nmijteedy y'ojadajt. Nmibijcpiyich tüg'óciy jadu'n nej yjaybetyity ma Moisés ñecy, etz je Dios y'ayucnajtzcaxiiybi ñecy. ¹⁵ Nañ nmibijcpich co Dios yajjugypigipy pinjaty ti y'ögy, tiibi oybi tuñ etz tiibi jibicpi tuñ. ¹⁶ Paady ycixpi naymijottigoyiijich co njothuinma'ñich huädz ooy nmüd'idipyich ma Dios etz ma jäy.

¹⁷ Canaag jimijt ñch anajty ti nhuidityich huingduum, chi nhuimbijtyich ma ñch ngajp limosna cuejtp etz nhuindzigihua'ñich anajty Dios. ¹⁸ Jadu'n ñch anajty nduñ co nijëjty judíojäy xypatyich ma Dios ytijc huidi anajty tzoomb Asia ñaaxjot. Ti anajty naybocyñihuächyijich, ti anajty nguyduñich costum-bre, ca' anajty mayjäy pin yhua'ñ yjihuüy. ¹⁹ Je jäy ajcxy huidi xy'ixxyich ma Dios ytijc, je' ajcxy ixypy ti ymiingixy ya tiy'ajt yejcp. ²⁰ Co ca' ajcxy ti miñ, huen jada jäy ajcxy huidi ya nigapxcixy pen ypaat ajcxy nbocyich je taabi ajcxy xtyiduñich ma judío jäy tungmüdpí etz huinmij'anäctijc ajcxy ñaymujci. ²¹ Jëyi co ñch mic ngapxyich juntijoty, chi nmínaañich: “Xtyidumbich miich ajcxy cham miid co nmibicyich co Dios yajjugypigipy pinjaty ti y'o'cy.”

²² Co Félix jadu'n midodaay, com ñejhuüydaayb anajty nej tüyöy je mibijcpidijc y'ayuc yhuinma'ñ, chi capxhu'my je ayuc, nimay ajcxy:

—Co anajty miñ je comandante Lisias, huin'it njacnejhuüydähuibich nyajtydigihuibich miich ajcxy m'ayuc.

²³ Huin'it Félix ane'mdüy je capitán co huen yajcuend'aty yi Pablo, e huen a'ixihuip co pidzim tibiñ tibäy e pen ji ymigügtijc miñ co'ixihuñyii, huen möyii huidi yajmayajtpy.

²⁴ Ti anajty xii ñajtninixiiyñi co Félix jadüg'oc miñ miid ytöxyijc Drusila. Je Drusila judíojäy je' anajty. Chi Félix capxyñiguejxy Pablo huen miñ

müdmüydägyii nej jäy mibicy Jesucristo. ²⁵ E co Pablo yajnimay je tiy'ajt nej Dios tzocy co huen jäy tudägy tzinäy, etz yajnimay jadu'n nej Dios jiini jäy tiyduna'ñ tüg'óciy, chi Félix ñay'adzigiyyi, yminañ:

—Nícx miich jadachambi, co ñich anajty xyñibadíyigixy huin'it nícxny nya-jhuooyii.

²⁶ Nañ jadu'n Félix y'ahuijxpy anajty mina Pablo y'ocmeeñmöyüii, e huin'it anajty najtzmazihua'ñ. Paady anajty janam jadojcx nícxny yajhuooyii, e müd müydägy anajty. ²⁷ Mejtz jimijt jadu'n yajty, huin'it Félix ygobernadorbidzimy. Chi Porcio Festo ygobernadortigüy ma Félix anajty ytuñ. Co Félix anajty nayyajhui'mañyüii ooy müd je judíojäy ajcxy, paady ixmajch Pablo mach.

25

Pablo ma Festo yhuinduu

¹ Jadu'n yajty co Festo anajty ti ygobernador tigüy, chi codugüig xii choñ Cesarea, ypättigüy Jerusalén. ² E jim Jerusalén je teedy müjtungmüdpü etz nijëjity huinmij'anäctijc jactimxüy Pablo ma Festo. ³ Chi ajcxy may'ajt pijctzoy ma je gobernador Festo co huen quexy Pablo jim Jerusalén. Hue' anajty ti huinmaaygixy co yaj'ögaangixy tü'am. ⁴ Chi Festo y'adzooy co Pablo cuend'aty anajty y'ity Cesarea, e je' anajty nícxan'ñ janch tim tzojcx jim. ⁵ Chi ajcxy nimay:

—Jëbi nijëjity miich ajcxy mdungmüdpüdjc etz huinmij'anäctijc quipxy nícxibich müd ñich. Pen ti je Pablo ytundügooy jëbi miich ajcxy mxüy jim Cesarea.

⁶ Festo jëyi jim y'ijty tuctujc xii taxtujc xii Jerusalén, chi yhuimbijtni Cesarea. Com jabom nícxny ma tiydundac, huin'it capxyñiguejxy Pablo co huen yajminyüii. ⁷ Co Pablo ytigüy ma tiydundac, chi mic'amy je judíojäy ajcxy yjübigüydäy huüdi anajty ti choongixy jim Jerusalén. Chi ajcxy oyxüy Pablo co mij anajty ti ytundügooy. E ca' ni ti tiy'ajt ajcxy müguëxügy. ⁸ Chi Pablo ñaygogapxi yminañ:

—Ñich ca' ni ti ndundügooyich, ni ngamidundügooyich yü judío jäy ycötüjcin, etz ni ngamidundügooyich Dios ytijc, etz ni ngamidundügooyich je mij'ane'mbi jim Roma.

⁹ Co Festo anajty jatytimayajcömaya'ñ ma judíojäy ajcxy, chi y'amüdooy Pablo:

—¿Nej mnícxam jim Jerusalén, jigix jim ndüydunüpiy?

¹⁰ Chi Pablo y'adzooy:

—Cha ñich cham ma je cötujctac huüdi je romano codung y'ane'myb e ma jëbi yajtiyduñich. Yajxon miich mnejhuüy co ca' ti ti ndundügooyich ma yü judíojäy ajcxy. ¹¹ Pen ti ndundügooyich huüdi jëbi co'ögüyich, ca' nminá'nibich co ñich ca' n'öga'ñ. Pen ca' ji ni ti tiy'ajt jadu'n nej yü' ajcxy ti xyxüyich, ni pin cötüjcin camüdity nícxny xycüyeyich ma yü' ajcxy. Ñich nbijctzoy co nyajtiyduñich ma César, je emperador, jim Roma.

¹² Co Festo capxyöyday müd ymidungmüdpü, chi nimay Pablo:

—Pen miich jadu'n minamb co jim nícxny myajtiyduna'ñ ma je César ycötujctac, nguexüpyich miich jim. Miich ti mbijctzoy co je emperador xytiyduna'ñ. Pis jim mnícxüpy miich.

Pablo ma je rey Agripa yhuinduu

¹³ Chi yü xii tiempo ñajtnünicxüyñi co je rey Agripa etz Berenice ycidacy Cesarea, cogapxihua'ñ anajty Festo. ¹⁴ Co ajcxy jim yhuäcxijpy canaag xii, chi Festo yajmüdmüydacy je rey Agripa je Pablo ayo'n, e nimay:

—Ji tüg yëydijc huidi Félix y'ixmajtz mach. ¹⁵ Co n'oyich jim Jerusalén, chi je teedy mijtungmüdpí etz judío mij'anäctijc xymixiyich, nibijctzohuüy co Pablo nyaj'ögibich. ¹⁶ Chi n'adzooyich co romanojáy ca' cötújcín jadu'n müdity nicxy yaj'ögy yi machyjáy ma ca'ni ñayhuindináayigixy müd je huidi müd ñayxíyíi, jigix ñaygogapxiyb nej anajty ti yxíyíi. ¹⁷ Paady co je judíoáy ajcxy y'oy ya ca' nígoob tiempo nyajtigooyich com jabom nnicxich ma ngötujctaacich, e nni'ane'mdüyich co huen yajmiñyíi je Pablo. ¹⁸ Co ajcxy ñayguëxi'ci, je huidi anajty ti xíy, ca' jac ni ti ayuc anajty ajcxy müdity jadu'n nej ich anajty ti ndijyich. ¹⁹ Jëyi janchtiy co jadu'n anajty ymínaangixy co Pablo ti ytundigooy ma yi' ajcxy ycostumbre huinma'ñ, etz Pablo capxhuäcxy co je Jesús huidi o'c, juugyñi je'. ²⁰ Com ich ca' nnejhuüy nej ndunipich müd jada jadu'mbi huinma'ñ, chi n'amidooyich Pablo, pen nicxam anajty Jerusalén, jigix jim ngatidyduñich müd jadayaabi ycixpi. ²¹ Pablo ci'm mínañ co nígi oy yajtydunipy jim ma je emperador huidi ane'm jim Roma. Chi nni'ane'mdüyich co huen jacmach'iñäy, ixti cooni nguexipyich jim Roma ma César.

²² Chi je rey Agripa ymínañ:

—Nañ ooy ich nja'amido'idaani Pablo y'ayuc.

Chi Festo y'adzooy:

—Jabom jëbi ayuc midohuipy.

²³ Com jabom míñ Agripa etz Berenice müd mayjáy etz xuuxpidijc, chi ytigíy ajcxy ma tydundac müd je soldado huindzin ajcxy, etz huinmij'anäctijc. Chi Festo capxyñigüejxy co huen Pablo nicxy yajtzonyíi.

²⁴ Chi Festo ymínañ:

—Rey Agripa, etz tüg'óciy mij'anäctijc huindzindijc huidi ya ti mnayyöymújcigixy müd ich ajcxy, cha je' je yëydijc huidi oy yi judíoáy ti yxíyíi ma ich. Xymixiyich jim Jerusalén, e nañ ya Cesarea, e jatyimymínaangixy co jëbi y'ögy. ²⁵ Ca' ti ti tundigooy, paady ca' huaad nyaj'ögyich. Com ti ci'm ñayñibijctzohuüyíi co jim yajtyduna'ñ ma je emperador jim Roma, paady ti n'a'ixiyich co nguexañich. ²⁶ E com ca' ni ti ty'ajt nej nijayihuibich nhuindzinich, je emperador César, müd yi' ycixpi, paady nyajmíñich ma miich ajcxy, etz tím jayijp ma miich mhuinduu, rey Agripa, jigix jëbi m'amidohuipy e nmüd'idipyich ti ii njáayibich. ²⁷ Ca' jadu'n y'óyity nicxy nguexyich tüg machyjáy jim ma je mij'ane'mbi e ca' ni ti ty'ajt müdity nej ti yxíyíi.

26

Pablo nimíydägy nej anajty yjatyin ma je rey Agripa

¹ Chi je rey Agripa nimay Pablo:

—Jëbi ci'm mnayñimíydägyíi.

Chi Pablo yujcxajy yci' e ytigíy nayñigapxtuutíp, ymínañ:

² —Jotcuyc nayjihuíyíijich, co jëbi nmíydägyich ma miich, rey Agripa, jigix nayñigapxtüdüybich tüg'óciy jadu'n nej judío jáy ti yxíyíich. ³ Com miich mnejhuüy yajxon nej judíoáy ajcxy yhuinma'ñ müdity, etz tijaty tzip yi' ajcxy ymüd, etz jadu'n nej yi' ajcxy y'ixpijcín oy ñay'ijxquúlxigixy.

Pablo nigapxy nej anajty chinäy ma anajty ca'ni yjothuimbity

⁴ Tüg'óciy judíoáy ñejhuüy nej ti ndzinäyich ma yi' ajcxy jim ma nnaaxjotich etz jim Jerusalén maabi nyeecpidzimyich. ⁵ E yi' ajcxy ñejhuüy

nañ jadu'n, e jëbi nigapxcixy jadu'n nej ti nyujcyeecpi'atyich. Hue' naydi-jyijich anajty fariseojäy, je tügpicyi jäy huidi mictägy je judío jäy ycostumbre etz ycötújcín payöyip. ⁶ E jadachambi xtyiyduñich mïd co njjip'ixyich co Dios yajjugypiga'ñ yi jäy ajcxy tiibi y'o'ccixy, jadu'n nej Dios yajnimay nmij'ap nmijteedy jecy'ajty. ⁷ Je majmetzpicypí Israel ymang y'ap y'oc y'ahuijxpy mïna Dios cuyduna'ñ nej anajty ti yajnimäyii je' ajcxy ymij'ap ymijteedy. Paady ajcxy Dios ojadaty huindzigiy xim tzuum. Miich, rey Agripa, nmibicyich co Dios yajjugypigipy je jäy tiibi y'öccixy, paady ycixpi yi judíojäy yxiyich. ⁸ ¿Na'amy co ca' miich ajcxy mibiga'ñ co jëbi Dios yajjugypicy je tiibi ajcxy y'ögy?

Nej anajty Pablo jayjip'aty mibijcpidijc ixhuidity pahuidity

⁹ Jecyip ñich hue' ndijyich oy nduñich co anajty ndzachmidzip'adyiijich je Jesús je Nazaretpi. ¹⁰ E jadu'n nduñich jim Jerusalén. Mïd je teedy mïtungmïdipi ycötújcín nbidaacich Jesús yjäy may pujxtigoty. E co ajcxy yaj'o'cy, nañ nigapxpejt ñich co huen yaj'öccixy. ¹¹ E nnicxyich anajty majaty judío ñaymujctac jim ndzaachytuñich huidi ajcxy mïpidacp anajty Jesús, jigix ajcxy y'ixmadzipy je' ymibijcín co Jesús je' je' je Cristo. Nigi anajty nmijotmätcootyich ixti nbahuidijttacyich huingnaax huinggajp.

Pablo nimiydägy jadüg'oc nej yjothuimbijty

¹² Mïd yi jadu'mbi huinma'ñ nnicxyich anajty jim Damasco. Je teedy mïtungmïdipi anajty xyquejxpiich, e xymöyich anajty cötújcín. ¹³ E tü'am, señor rey, ñich anajty nicxy, cujc xii anajty co n'ijxyich tügi tiicxin jacmic ca'ydi xii yticxin choon tzajpjoty, xyñigidacyich etz nañ jadu'n huidi anajty ajcxy xymïdnicxich. ¹⁴ Huin'it nidüg'óciy ñich ajcxy ngidaday, e nmidooyich tüg ayuc xymigapxich mïd hebreo y'ayuc, xyñimäyich: “Saulo, Saulo, ¿nej co chach xypahuidijttägyich? Ci'm naysajtzaachiyii jadu'n nej huaj yuub co jipconeby huidi mïd ñumygyumyii.” ¹⁵ Huin'it n'adzooyich, nnimaayich: “¿Mbin miich Huindzin?” E je Huindzin xyñimaayich: “Ñich je' Jesús je huidi miich mdzachpahuidijttacpy. ¹⁶ Pidig e tinaaygugi', com ti nnayguëxigiyiijich ma miich jigix xymidunipyich etz mgodiy'ajt'adipy jadu'n nej cham ti nyajnimäy ti nyajnejhuïy, etz jadu'n nej jüni njacyaj'ixa'ñ njacyajnejhuïhua'ñ. ¹⁷ Ñich miich nnihuänip nyajtzögip ma yi judíojäy, etz nañ ma huidi ca' yjudíojäyity. Ñich miich jim nguejxpy ma huidi ca' yjudíojäyity. ¹⁸ Nicx jim myajhuinjhuïyigixy ñich ndiy'ajt, huen ixmach ajcxy yi jibic-huinma'ñ e jadu'n ypidzimipy ajcxy ma je mujcu' y'ané'migixy, etz mïjnicxpedipy ajcxy Dios ytiy'ajt. Co ajcxy mibigipy mïpidägipy ñich ndiy'ajt huin'it nmöhuibich tigydac tzajpjoty ma yi ojjäydijc ity tiibi Dios yajpocyñihuächyii.”

Pablo cuyduñ nej anajty ti y'ijxmañiyin

¹⁹ Rey Agripa, jadu'n ti ngapxymidooyich huidi n'ijxich nmidoohuich tzoon tzajpjoty. ²⁰ Jayjip ngapxhuäcxich Dios y'ayuc jim Damasco, chi ngapxhuäcxich jim Jerusalén etz tüg'óciy Judea ñaaxjot, etz cham ngapxhuäcxich Dios y'ayuc ma huidi ca' yjudíojäyity. Nyajnimäyigixyich huen jothuimbijtcixy, huen mibijccixy Dios y'ayuc ytiy'ajt, etz huen yajtungixy ojot oyhuinma'ñ jigix ñiguëxigipy co ti yjothuimbijtcixy. ²¹ Mïd jada ycixpi xymajchich ajcxy je judíojäy ajcxy ma Dios ytiyc, e xyaj'ögängixyich anajty. ²² Mïd co Dios ti xypubety ti xypudigiyich cha nyajpaadyich juugy. Ngapxhuäcxich Dios y'ayuc ytiy'ajt ma tüg'óciy ayoobtjic etz ixpicytjic. Tüg'óciy huidi ngapxpyich je Dios y'ayucnajtzcapxiiybi jaay jecy'ajty, etz je Moisés nañ jadu'n jaay jecy'ajty co jadu'n ytuna'nyii yjada'nyii. ²³ Hue' yajmïna'ñ co je

Cristo copicy ayo'n tzaachypi yajnaxipy, e y'ögipy e huin'it jugypigipy, e je' je' je jayijp jäy huidi jugypigip co anajty ti y'ögy. E yajcapxhuäcxip je ayuc ytiy'ajt ma ñch ajcxy judíojäy, etz ma huidi ca' yjudíojäyity.

Pablo jahueeni cayajothuimbijty Agripa

²⁴ Co Pablo jadu'n ymínañ ma anajty ñayñügapxtüdyii, chi Festo mic mínañ:

—¡Mlocjiiyb miich Pablo! Míid je ixpijcin nigi m'ahuimbity loci.

²⁵ Chi Pablo y'adzooy:

—Ca' ñch nlocijiy, miich migtungmíidpi Festo. Yi huidi ñch ngapxpyich je' je' tiy'ajtíp etz janchip. ²⁶ Yi rey Agripa ñejhuídaayb yi' tüg'óciy jada, paady nmíydägich aamic jotmic ma yi' yhuinduu; com nnejhuíybich co yi' ñejhuídaayb jada tüg'óciy, com canan hue' jada yajtuuñ yajmíydacy ayüchytuum. ²⁷ ¿Nej mmíbicipy, miich rey Agripa, jadu'n nej ajcxy ymínañ yi Dios y'ayuccojaaybi? Nnejhuíybich co miich mmíbicy.

²⁸ Chi je rey Agripa y'adzooy, ymínañ:

—Janch tim jayinjaty jahuenjaty miich xycayajmíbicyich Jesucristo.

²⁹ Chi Pablo ymínañ:

—Oy yjayinjaty yjahuenjatyity ooy mijcajee mgamíbicy, chojcpy Dios co miich mmíbicipy Jesucristo etz nañ jadu'n tüg'óciy jäy huidi cham xy'amído'o'íjtíp ñch n'ayuc. Dios chojcpy co mmíbicipy Jesucristo jadu'n nej ñch nmíbicyich, jeyi janchtiy co ca' mmach'idípy jadu'n nej ñch nmach'ityich.

³⁰ Co je Pablo ymíydactay, chi je rey etz gobernador ytinayigy quipxyi míid Berenice etz jacjadyii huidi anajty ajcxy jim. ³¹ Chi ajcxy ahuingujc oy capxyögyixy Pablo ypocy, ñayñímáayigixy miñ xyipy:

—Jada yéydijc ca' jada ti tundigoy, ca' ypadyii nicxy y'ögy, ni ca' ypadyii nicxy ymach'íñäy pujxtigoty.

³² Chi Agripa nimay Festo:

—Jébi ixypy nnajtzmadziiyim Pablo co ca' ci'm ycanayñibijctzohuiiyi co huen tiydunyii je emperador César jim Roma.

27

Pablo yajnicxi jim Roma

¹ Co ajcxy yajnihuinmayiiy co xyquexáangixyich jim Italia, chi Pablo yajciyejc míid jacjadyii machyjäy ma tüg capitán huidi anajty yxi Julio, je' huidi nihuindzin'ajtp tügpicy soldadtijc huidi anajty yxi batallón Augusto.

² Chi ñch ajcxy ndigiy ma tüg barco huidi yhuindzin cogajpip jim Adramitio. Je barco hue' anajty ñicxañ ma nijejity barco jättac jim Asia ñaaxjot. Chi ñch ajcxy ndzooni. Míid ñch anajty ajcxy Aristarco huidi anajty cogajpip Tesalónica jim Macedonia. ³ Com jabom ñch ajcxy nja'ty ma barco jättac jim Sidón. Jim je Julio pa'ayoy Pablo, e ahuaatzí ytu' co huen nicxy co'ixiy ymígügtijc, etz huen je' ajcxy yajcayyii yaj'ügyii. ⁴ Co ñch ajcxy ndzooñ jim Sidón, chi je naax mejy'agujcpi yhuimni anajty'amy huidi yxi Chipre, míid co je poj anajty jipcobojiy je barco. ⁵ Chi je barco huinyöyñajxy je Cilicia ñaaxjot etz Panfilia ñaaxjot, oy njädyich ajcxy jim Mira, tüg cajp jim Licia ñaaxjot.

⁶ Jim je capitán paty tüg Alejandría ybarco hue' anajty ñicxy jim Italia. Chi je capitán ñch ajcxy xyajbarcotigiiy. ⁷ Canaag xi ñch nyöy janch oñdägy, adzaach ñch ajcxy nja'ty mihuingon je Gnido co anajty je poj tzach jipcobojiy je barco. Najx ñch ajcxy mihuingon Salmón, etz njüyöy'ahuídijtyich ajcxy Creta je mejy'agujcpi naax. ⁸ Adzaach ñch ajcxy nja'ty ma barco jättac huidi anajty yxi Buenos Puertos, mihuingon Lasea.

⁹ Ti ñich ajcxy ooy anajty nxñdigoy, e ooy anajty ycodzigñity je barco yajyöyñ. Ti anajty je ayuuxñ ñajxñi, e ti mihuingon anajty je poj tuu tiempo huñdi jäy ytijpy invierno. Paady Pablo je soldado huñdzin jaccapxhuijy, ¹⁰ chi Pablo ymñañ:

—Huñdzindijc, jadu'n nej yam codzigñi jada ooy co njacnicxim barcojoty, ca' yjeyity co nicxy ndigooyim mñid barco etz mñid ñidzimy etz n'o'ctaayim.

¹¹ E je soldado huñdzin yjacmñpidac oy je barco yajyöybi y'ayuc etz je barco capitán y'ayuc, ca'ydi Pablo y'ayuc. ¹² Com je' co je barco yjättac ca' anajty y'öyity, nicxy jim yajnajxcixy je poj tuu tiempo, chi je jacmaybi ajcxy yhuinma'ñypidacy, co jëbi barco yjacyöy, oc'ixaangixy pen yjätcixy jim Fenice ma Creta ñaaxjot. Jim ma tüg barco yjättac huñdi y'aguu najtz'ixñyb ma xñ pidzimy, e jim anajty je poj tuu tiempo yajnaxaangixy.

Je mñjpoj mñtigoy ma je mejy

¹³ Jadu'n yajty co je jinboj hueeni ypidzñmy, huñ'it huñmay ajcxy co jëbi yjactüyöy je barco. Chi ajcxy yajpidigy je mñ pujx huñdi barco yajtinayxñj, e yajyöychooñ je barco. Chi ñicxy je barco mejypa' mejypa' ma Creta ñaaxjot.

¹⁴ Huñ'it hueeni tiempo ñajx, chi je micpoj mññ ma tñchpoj pidzimy, huñdi jäy ytijpy Euroclidón, jadu'n yhuimbñdzim, Noreste. ¹⁵ Chi je mic poj yajtütigajch je barco, e com ca' anajty ndimdüyögixñi mñid je poj ycixpi, chi je mic poj ñich ajcxy xyajnicxy adzip ma anajty tzocy. ¹⁶ Najx ñich ajcxy mihuingon tüg naax mutzpi mejy agujcpi huñdi yxñ Claudia, e adzaach ñich ajcxy nyujcjugujcy je mutz barco huñdi anajty miimb ixhodzñy ma je mñjpi. ¹⁷ Co ajcxy jugujcpi dzimy je mutz barco, chi ajcxy yajtuuñ maychaay e xojtzmuicy je barco aguu. Chi ajcxy yajminajcy je huit huñdi anajty poj mic tzach ymajchyp. Je' co chigñygyixy co chimnicñiyb je barco jim ma mejy huñdi ca' y'agomity, ma pñjot huñdi yxñ Sirte. Chi ajcxy ñayyejci huen poj yajnñcixigixy. ¹⁸ Com jabom, com ooy mic anajty je poj, chi ajcxy je chimy mejy cöjibijptaayi. ¹⁹ Je midugñg xñibi, chi ñich ajcxy nmejycöjibijptay je tungbejt huñdi yajtumyb ma je barco. ²⁰ Ti anajty canaagxñ ñajxñi e ñich ajcxy ca' ma xñ madza' n'oc'ñjxcixñi, mñid je mñj poj ycixpi huñdi anajty ñich ajcxy xychachyajtüyöyp. Hue' ñich ajcxy ndijcixy co ti ndigóoygixyich, ca' ndijy ñich ajcxy ndzögipy.

²¹ Ti anajty xñ tiempo ñich ajcxy nyajnajxcixy jaygay, chi Pablo ytinayñgy, nñmay je jäy ajcxy:

—Yëydijctijc, co ñich miich ajcxy xycacapxymidooy ca' ngatzoonim jim Creta ñaaxjot, e ca' ixypy jada ayo'n yam jadu'n nbaatim. ²² Jadachambi ca' mdajcixy mmaygixy, ca' ni pin ytigoya'ñ, oy je barco yjatigoy. ²³ Amygoodz je nHuñdzin Dios tüg y'ángel ti ñayguëxigiyi ma ñich, je Dios huñdi ñich ngapxymidooybich, yi' ti quexy. ²⁴ Je ángel ti xyñimäyich: “Ca' mdzigñy, Pablo, copicy co mjatyjädipy ma je mñj'ane'mbi, je César yhuñduu. Mñid miich ycixpi, Dios ñihuänamy yajtzögamy tüg'óciy huñdi ji barcojoty, ca' ni tüg y'ögipy.” ²⁵ Paady nayjot'amijmóoyigix, yëydijctijc, nmñbijcpiych Dios co jadu'n yjada'ñ jadu'n nej yi' y'ángel ti xyñimäyich. ²⁶ Ooy ycopicyity nicxy nmñjpojpejtñ ma tüg naax mejy agujcpi.

²⁷ Majmactz xñ je mic poj anajty yajyöyñ je barco oyñinej jim ma je mejy huñdi yxñ Adria, chi mñjcutz je barco yajyöybi jihui'ñybijcy co anajty ti mihuingoñ naax. ²⁸ Chi ajcxy quipxy je nñ jadu'ñi anajty ycicyity, e hue' ajcxy quipxy iipx xap ycicyity. Jahuengi huñ'it jadüg'oc ajcxy quipxy je nñ, e hue' oy quipxcixy majmocx xap ycicyity. ²⁹ E co anajty chigñygyixy co tijy je barco jñpcobonñhuipy ma tzaagop, chi ajcxy pidacy nñjoty mñdaax pujx ma barco y'ijx, je huñdi yxññip anclas, janch tzigñyb anajty ajcxy y'ahuijxcixy

cooní ximihuiipy. ³⁰ Chi je' ajcxy huídi anajty barco yajyöyp yhuinma'ñybaty co yquëga'ñ ameech. Chi ajcxy pidacy nihuingíxy je mutz barco. Chi ajcxy ñaybidaaci jadu'n nej jihuíy je ancla jac yajminagaangíxy jim ma barco yhuinduu. ³¹ Huin'it Pablo ñimay je soldado huindzin etz je soldadtijc:

—Pen ca' jada huímgíxy ma barco, ca' miich ajcxy mejy ypidzimípy.

³² Huin'it ajcxy tzujctujcy je tzaay huídi je mutz barco anajty mñid ycoxochity, chi ajcxy yajcäy je mutz barco ñijoty, e chi je mejy yajnicxyí.

³³ Moñyi Pablo migapxy je jäy ajcxy, chi ajcxy ñimay co huen huin-gayñajxcíxy, chi Pablo ymínañ:

—Cham majmactz xii ma miich ajcxy ca' mmaagíxy, e ni ca' mgaaygíxy m'uuccíxy. ³⁴ Tun may'ajt caaygíxy oy jadu'ñyi, copicy jada co njatyñidzooctähuaanim, ni tüg ngöhuay ca' ytigoyaanim.

³⁵ Co Pablo jadu'n yminanday, chi tüg tzajcaagy conígy, chi jayijp Dioscojuyip yajnajxy mayjäy agujc, chi tujc-huäcxy etz ytigíy ajcxy caaybi.

³⁶ Mic'amy je jäy ajcxy yjotmigíyday nidüg'óciy, e chi ajcxy ytigíy caaybi.

³⁷ Hue' anajty ñaybátigíxy barcojoty mejtz migo'px jatugi'px majmocxtüg jäy.

³⁸ Co ajcxy ycayday, chi jacnigöjibijpy je trigo, jigix huen cöminacy je barco chimy.

Chi barco tüg yquiñ

³⁹ Co yximíy, chi je barco yajyöybi ca' ijxcapy je naax, e y'ijxpaty tüg it ma mejy huen ycoguegíy, e jim anajty püjot. Chi ajcxy yhuinma'ñybaty co'ixaangíxy pen jébi jim yjäty je barco. ⁴⁰ Chi ajcxy tzujctujcy je tzaay huídi anajty mñid yxochity je anclas, e chi anclas yhuí'mni ñijoty, huin'it ajcxy miguejíy je ñigaap huídi tumb co tümöy je barco. Chi huit jadüg'oc ajcxy pidacy huídibi pojmajtzp. Chi je barco ytigíy yöyb, tñy ajcxy yajnicxy ma püjot. ⁴¹ E chi oy minaybadyii ma anajty je mejy mejtz it oy mic ycujiñ, chi oy yjépxy püjoty. Je barco jijp oy ytigíy tätzpcy ca' huaad y'ocyücxni, e je barco ijx oy ytigíyñ aguejthuäcxpi ymñid je mejy püjoty ymíjaa. ⁴² Chi je soldado yjayaj'ögaañ je machyjäy ca'ydi yqueeccíxy ayaahuip. ⁴³ Je soldado huindzin ca' a'ixíy nicxy yaj'ögyii Pablo, chi ñimay soldado ajcxy co huen ixmajtzcíxy yi machyjäy. Chi je soldado huindzin ñimay je jäy ajcxy co huen ñidigíygyxy pinjaty jajtp yau. ⁴⁴ E huídi ca' jajtcíxy yau jaydëbi ñidigíygyxy mñid pu'y etz mñid barco pedasi. Jadu'n ajcxy nidüg'óciy ymejy ypidzimday.

28

Pablo yjädy ma tüg naax mejy'agujcpi huídibi yxii Malta

¹ Co ñch ajcxy ñibidzimday, chi ñch ajcxy nejhuíy co je naax mejy agujcpi hue' anajty yxii Malta. ² Je conaax ajcxy ooy oyjäy'ajtin tuuñ mñid ñch ajcxy, chi ajcxy yajmijíy jñn mij, mñid co anajty ooy ytñchity, etz co anajty ooy ytuubojy. Chi xyñimay ñch ajcxy co miiñ n'ocxáamgíxyich. ³ Chi Pablo ytigíy jäxycajpmujcpi, e chi pidacy jñnjoty. Chi tüg ahua'n iyujc pidzimy, yquëgy anajty mñid je anbi, chi Pablo ymajtzí ma yci'. ⁴ Co je cogajp ajcxy ijxy je ahua'n iyujc ytñyñäy ma Pablo yci', chi ajcxy ñayñimaayi miñ xyípy:

—Jadayaabi yëydijc, jäy yaj'öcpi jada. Oy ca' ti y'ögy mejyjoty, je tñydumbi tzajpjoty ca' a'ixíy nicxy yjactzinäy.

⁵ Chi Pablo yci' huinxidicxy, e jñnjoty oy ycäy je ahua'n iyujc, e ca' Pablo ni nej yjajty. ⁶ E tüg'óciy je jäy tzach'ahuijxcíxy mña anajty y'ocquixígy, o mña anajty y'oc'ögy. Ti anajty ooy y'ahuijxcíxy jecy; co ajcxy ijxy ca' ni nej yjaty, chi ajcxy yhuinma'ñ yajtigajch. Ymínañ ajcxy co Pablo hue' jada' yi tüg dios.

⁷ E mihuingon anajty je Publio ytijc, je huidi nigohuajc'ajty je jimbi naax mejy'agujcpi. Je Publio xyajjättacich ajcxy, e xyajcaay xyaj'uucich ich ajcxy yajxon tugüg xii. ⁸ Jadu'n yjajti co je Publio anajty yteedy ypiigyii miid tooy gohuajc etz miidity anajty ni'pypa'm. Chi Pablo oy icy je pa'mjäy. Chi Pablo Dios mibijctzoy, e chi cinixajy, e yajtzoocy. ⁹ Miid jadaay miñ ajcxy nijëjity pa'mjäy huidi anajty ajcxy tzinaayb ma je naax mejy'agujcpi e chi ajcxy chooctäy. ¹⁰ Miid jada ycipi nyajcömay ich ajcxy, e nyajmooyich ich ajcxy tijaty huidi ich ajcxy nidüyöyipy barcojoty.

Chi Pablo oy yjädy jim Roma

¹¹ Tugüg po' ich ajcxy anajty ti n'ijtni jim. Chi ich ajcxy nbarcotigiiy ma tüg barco huidi anajty je tuuboj tiempo ti yajnaxy jim Malta. E je barco capitán jim anajty ycogajpity Alejandría. E je barco ymiid anajty ahuinax huidi anajty yxii Cástor etz Pólux huidi ajcxy dios'ajtpy. ¹² Chi ich ajcxy oy njäty ma je barco jättac huidi anajty yxii Siracusa. E jim ich ajcxy nhui'miiy tugüg xii. ¹³ Ndzoñich ajcxy Siracusa barcojoty, nicxy ich ajcxy mejypa' mejypa', ixti nja'tyich ajcxy jim Regio. Com jabom oy ypidzimy jinboj, chi co maax oy nja'ty ich ajcxy Puteoli. ¹⁴ E jim ich ajcxy nbaaty nijëjity jäy huidi anajty mijpidaacp Jesús. Je' ajcxy xycohuaniiyich co ich ajcxy jim huimipy tüg semaan. Chi ich ajcxy jadüg'oc ndzoñ, nnicxyich ajcxy jim Roma. ¹⁵ Je mibijcpidijc ajcxy huidi anajty jim Roma ymidou ajcxy ayuc co ich anajty ajcxy jim nicxy, chi ajcxy choon nijëjity oy xyjijpcobadiyigixyich ma je cajp mercado miid huidi anajty yxii Foro de Apio. Jacjadyii mibijcpidijc oy xyjijpcobadiyich ma tüg jättac huidi anajty yxii, Tres Tabernas. Co Pablo jijpc'oixiiy je mibijcpidijc ajcxy, chi Dioscojuyip yajnaxy etz ñayjihuiy janch jotcujc. ¹⁶ Co ich ajcxy nja'ty jim Roma, chi je soldado huindzin cäyeycy je machyjäy ma je comandante, per a'ixiiy co Pablo tzinäy ahuingujc ma tüg pijctzoydijc, jëyi anajty tüg soldado ycuend'adyii.

Chi Pablo Dios y'ayuc capxhuäcxi jim Roma

¹⁷ Tugüg xii maabi Pablo anajty yjäty jim Roma co capxyñiguejxy je judío huinmij'anäctijc huidi anajty ajcxy tzinaayb jim Roma. E co ajcxy ñaymujci, chi Pablo ymiñañ:

—Migügtijc ajcxy, oy ich ca' ti ndundigooyich miidi judío jäy ajcxy etz miid ajt nmij'ap nmijteedy ycötújcin, chi je judíojäy ajcxy xymajchich etz xyciyejcich ma romano tungmüdpí jim Jerusalén. ¹⁸ Co je romano tungmüdpí ajcxy xy'amidooyich, huin'it ajcxy xyjanajtzmadzihuaañich, ca' ti ajcxy paaty ma ich huidi ajcxy xyajco'ögihuibich. ¹⁹ Co je judíojäy yjotmätcoty ajcxy, ca' ajcxy a'ixiy co nyajnajtzmadzihuibich, chi nayñibijctzohuiyich co nyajtiydunipyich ma je mij'ane'mbi ya Roma, oy ich ca' ti xihuin nmidity miid ich nmigonaax nmigogajpich. ²⁰ Paady ti ngapxyñiguejxcixy co nyajmüdmüydäga'ñ ajcxy tigix co nmach'ityich. Miid co ich ajt n'ahuijxim co Dios nihuäna'ñ yajnüzöga'ñ yi Israel jäy etz yajjugypiga'ñ je jäy tiibi y'öccixy. Paady jadachambi nyajpaadyich mach.

²¹ Chi ajcxy y'adzooy:

—Ca'ni ich ajcxy ni ti necy xyñijäty huidi tzoomb jim Judea miid miich ycipi. E ni tüg ajt nmigügtijc ca' jibic xyñimüydägy. ²² Nja'amido'idaamyich jadu'n nej miich mmiydägy, com nnejhuiybich co huen yma'amyity jäy ymidzip'ajty je jemybi y'ijxpijcin.

²³ Chi tüg xii ajcxy agapxtujcy. Co oy paady mina anajty ti agapxtujccixy, chi mayjäy ñayyöymujci ma je Pablo anajty jättac miidity. Jopy ajcxy yajtzondacy capxi müydägi ixti ycootztzuu'iiy, jadu'n Pablo tzachyajnimaaygixy je Dios

y'ayuc nej Dios yhuinma'ñ m̄id̄ity. E yajjothuimbidaangixy anajty ma je Jesús m̄id̄ co capxt̄icxy je Moisés yc̄otujc̄in nej anajty yjaybetyity, etz jacjadyii ayuc cojaaybi ñecy. ²⁴ Nijējity c̄obijc̄ ajcxy nej Pablo anajty ym̄ina'ñ, etz nijējity ca' ajcxy m̄ibijcy. ²⁵ Co ca' anajty ajcxy miñ xyipy yajtūḡiy yhuinma'ñ, chi ajcxy icy ca'ixy yōychóongixni. Chi Pablo ym̄inañ:

—T̄iytudāgy je Esp̄iritu Santo nimay je nm̄ij'ap nm̄ijteedy ajt co yajcapxy je profeta Isaías co ym̄inañ:

²⁶ N̄icx n̄ima' je jāy ajcxy: Miich ajcxy oy m̄jam̄idohuipy n'ayucich, per ca' ajcxy mhujnj̄ihūhuip; oy m̄jahuind̄ic̄xc̄ixipy, e ca' ajcxy mhujnj̄ihūhuipy.

²⁷ Com jada jāy ajcxy hue' yjot'ahuimbijtc̄ixy janch juuñ, e ym̄idoogixy oyñinej, jadu'n nej j̄ihūiy yhuimb̄idz'ijtc̄ixy, e ni ca' y'oc'lj̄xc̄ixy m̄id̄ yhuin e ni ca' ocm̄idoogixy m̄id̄ yta'tz'ac, ni ca' huinj̄ihūiyḡixy m̄id̄ yjot yhuinma'ñ, ni ca' m̄inipy ajcxy ma ñch j̄iḡix myajtzōḡibich.

²⁸ Nejhūiyḡixy miich ajcxy co jadachambi etz jacn̄ic̄xp̄i x̄i tiempo Dios y'ahuan̄iyb y'ayuc yty'ajt nej j̄ebi jāy y'alma ajcxy yajn̄dzōḡipy ma je jāy ajcxy hūidi ca' yjud̄ioj̄ayity, e je' ajcxy y'am̄ido'idipy.

²⁹ Co Pablo jadu'n nimay ajcxy, chi ajcxy ñic̄xtāayḡixni chach ñayhuin'ñb̄éjtiḡixy ñayhuingap̄xp̄éjtiḡixy miñ xyipy.

³⁰ Pablo mejtz j̄im̄ijt j̄im̄ chinay ma je p̄ijctzoyd̄ijc̄ j̄im̄ Roma, e yajxon xiic'adzoy capx'adzoy p̄in miñ ycogap̄xyii. ³¹ Janch agujc jotcujc anajty capxhuācxy je Dios y'ané'm̄in, e yaj'ixp̄icy je Huindz̄in Jesús yty'ajt, e ni p̄in ma ycapx'adugyii.

ROMANOS

Yi Necy Huidi San Pablo Yajniejx Je Mibijcpidijc Jim Roma

¹ Hich Pablo tumbich ma Jesucristo ytung. Jesucristo ti xyajñibicyich co nduna'ñich ma yi' ytung quipxy müd yi' y'apóstol ajcxy. Ti xypidägyich ma jada tung tügijp co ngapxhuäcxibich Dios y'ayuc ytiy'ajt oybi.

² Dios jecy'ajty y'ayuc yajhui'my cojay ma yi' y'ayucnajtzcapxhiybi ñecy co quexa'ñ anajty je Cristo ya naaxhuiñ. ³ Ngapxhuäcxich jada ayuc jadu'n nej ajt nHuindzin Jesucristo, je Dios y'ung, yma'xung'ajty ya naaxhuiñ. Hue' yi' ñinicx paty ma ytaj. E yi' ytaj je rey David je' ymij'ap'ajti ymijteedy'ajti. ⁴ Per Jesucristo ti paady ma Dios yi' yjihui'ñ ymic'ajt. Co Dios yajjugypijcy y'ung ma anajty ti y'ögy müd yjihui'ñ ymic'ajt, chi ti yajnejhuïy anajty je naaxhuiñyäj co Jesucristo hue' je' Dios y'ung, huidibi müd huädz yjot huädz yhuinma'ñ, etz nañ ymüd Dios yjihui'ñ ymic'ajt. ⁵ Co Dios yajjugypijcy Jesucristo ma anajty ti y'ögy, chi mijmay'ajt tuñ müd ñch ajt ycixpi. E nañ müd Jesucristo ycixpi Dios ti xyajñibicyich co ngapxhuäcxibich yi' y'ayuc ytiy'ajt ma yi' mayjyä ajcxy ma tüg'öciy naax cajp, jigix jëbi mayjyä mibijccixy e nañ capxymidoogixy Jesucristo. ⁶ E müch ajcxy huidibi tzinaayb jim ma yi' cajp huidibi xijip Roma, nañ jadu'n Dios müch ajcxy ti xyhuin'ijxcixy jëbi ajcxy Jesucristo xyjäy'adyii.

⁷ Jada necy nguejxypich ma müch ajcxy nidüg'öciy huidibi jim yajpatcixp ma yi' cajp huidibi xijip Roma. Dios müch xychojccixp xyjihuiyigixp, e nañ Dios ti xyhuin'ijxcixy jaydëbi yi' xyjäy'adyii, etz nañ jaydëbi mdzinaaygixy müd huädz mjot huädz mhuinma'ñ. Huen ñch ajt nDios Teedy etz ajt nHuindzin Jesucristo may'ajt oy'ajt tunipy müd müch ajcxy etz nañ xyajjotcugihup ajcxy.

Pablo nicxy mibijcpidijc cogapxihua'ñ jim Roma

⁸ Tim jayijp nyajnajxpich jäydaacin ma Dios, müd Jesucristo yxi, co müch ajcxy ti mmibijccixy Jesucristo. Mayjyä ma nidüg'öciy naax cajp ti nejhuïyigixy jadu'n nej müch ajcxy ti mmijpidaaccixy Jesucristo. ⁹ Hich tumbich cixyjot huinijot ma Dios ytung, co ngapxhuäcxich Dios y'ayuc ytiy'ajt müd Jesucristo ycixpi. Dios yi' tiy'ajt yegip jadu'n nej jabom jabom Dios nmibijctzooyich müd müch ajcxy ycixpi. ¹⁰ Dios nmibijctzooyibich pen yi' jadu'n tzojcp co jëbi ñicxyich cham tiempo jim ma müch ajcxy myajpaady. Canaag'oc ñch müch ajcxy nicxy nja'ixaangixy, e ca' y'oyiy nej ñicxibich. ¹¹ Ooy njanijot'atyich co ñch müch ajcxy nicxy n'ixaangixy, jaydëbi ngapxhuäcxibich Dios y'ayuc ma müch ajcxy müd Dios yjihui'ñ ymic'ajt, e nañ ngapxhuäcxibich Dios y'ayuc ma müch ajcxy jaydëbi tiydudägy mmibigipy ajcxy Jesucristo. ¹² Pen oyhiyb nej ñicxibich ma müch ajcxy myajpaady, chi jëbi njotcugihuiyich co anajty n'ixyich nej müch ajcxy mibijccixy Jesucristo, e nañ jaydëbi mjotcugihuiyipy müch ajcxy co anajty m'ijxcixy nej ñch nmibicyich Jesucristo, e jadu'n naysajjotcugihuyim miñ xyipy.

¹³ Ndzojcpich co müch ajcxy mnejhuïhuyipy co canaag'oc ti njapidägyich nhuinma'ñich co anajty ñicxa'ñich ma müch ajcxy myajpaady, e ca' y'oyiy nej ñicxibich. Njijp'ijxypich co oyihuij jadachambi tiempo jadu'n nej jëbi ñicxibich jim ma müch ajcxy. Com njacyaj'ixpigaamybich müch ajcxy, e nañ njacyajmibigaamybich ajcxy Dios y'ayuc. Tim jadu'n nej nduñich canaag agajp ma chinaaygixy yi' jacjadyii jäy huidibi ajcxy ca' yjudíojäyity. ¹⁴ Dios

jadu'n xyajñibijcìch jada tung, paady copicy co ngapxhuäcxibich yì' y'ayuc ma tüg'óciy jäy, etz majaty naax cajp. Ngapxhuäcxamybich Dios y'ayuc ma yì jäy ajcxy huidibi griego ayuc cápxcìxp, etz ñan ma yì jäy ajcxy huidibi ca' griego y'ayuc capxcìxy. Ngapxhuäcxamybich Dios y'ayuc ma yì ixpìcy jäy ajcxy, etz nañ ma yì jäy ajcxy huidibi ca' y'ixpìcyìty. ¹⁵ Paady ycìxpi ooy ndzachcapxhuäcxa'ñich Dios y'ayuc ma miich ajcxy huidibi yajpatp jim Roma nañ jadu'n.

Je ayuc tìy'ajt oybi

¹⁶ Ca' nmìdzo'yduyijcìch Cristo y'ayuc ytiy'ajt. Com je' jada je oybi ayuc huidibi tzoon ma Dios, ymìd yì' Dios ymic'ajt jigìx jèbi tüg'óciy jäy ajcxy paadìpy pocy huinmècxìn, pìnjaty còbigaamb Cristo y'ayuc. Tìm jayìjp tì ngapxhuäcxy Jesucristo y'ayuc ytiy'ajt ma yì judíojäy ajcxy, e jac'axam ma yì huidibi ajcxy ca' yjudíojäyìty. ¹⁷ Jesucristo ytiy'ajt xyajnejhuìyìim co nmìbijcìm co Cristo tì jòch ajt nbocy etz nxìhuìn, chi Dios xycòbigaanìm jadu'n nejjihuìy tudägyjäy. Ca' ji jadüg huinma'ñ nej Dios jèbi xycòbìjìcìm jadu'n nej jihuìy tudägyjäy. Com jadu'n jaybety y'ity ma Dios ñecy ma jadu'n ymìnañ: "Pìnjaty tudägy'ajtìn tì paady mìd co tì mìjpidägy Dios y'ayuc, hue' je' tzinähuip, ca' yjugy'ajtìn ycìxìpy ytigoyìpy."

Je naaxhuiñyjäy ajcxy ypocy

¹⁸ Copìcy nbaatìm tudägy'ajtìn ma Dios, com je Dios huidibi tzìnaayb tzajpjoty tì xyajnejhuìyìim co yì' tzaachytuna'ñ mìctägy tüg'óciy jäy ajcxy huidibi mìdundìgooyb yì' ytiy'ajt, tüg'óciy huidijaty jìbic huinma'ñ ymìd, tüg'óciy yì' ajcxy huidibi yajtìgooyb Dios ytiy'ajt mìd je jìbicpi huidibi ajcxy ytumyb. ¹⁹ Com yì jäy ajcxy huidibi jìbicjot jìbic-huinma'ñ mìd, y'ìjxpy ñejhuìyìyb ajcxy Dios ytiy'ajt, com Dios tì pidägy yì' ytiy'ajt ma yì' ajcxy yjot yhuinma'ñ. ²⁰ Ñejhuìyìyb jäy ajcxy Dios ytiy'ajt, com mabaad oga'n Dios yajcojy naaxhuiñybi ixti chambaad, quèxìcp ya naaxhuiñ Dios ymic'ajt y'ìjxpejt, oy ca' pìn Dios ixy, huidibi Dios tì cojy tì macxy yejcpy i'jxpejt co Dios yjìjìty, etz Dios ymic'ajt huinìxì huinìtiempo ijtp yì', ca' ycìxìpy ytigoyìpy nìmina. Co anajty Dios tzaachytuna'ñ yì' pocyjäy ajcxy, ca' ajcxy ni tì ayuc mìd huaad adzohuimbidìp Dios mìd ajcxy ypocy ycìxpi. ²¹ Com ñejhuìyìyb ajcxy co ji Dios yajpaady, e ca' ajcxy ojadajtcìxy ca' ajcxy huindzìgyìxy Dios. E nañ ni ca' ajcxy yajnaxy Dioscojuyìp ma Dios. E nañ jadu'n ajcxy ñaybidáacìgìxy amìj agìx, yhuinma'ñ ixtaaygìxy huidibi ca' ytiy'ajtìty. Yajtìgooyì ajcxy Dios ytiy'ajt ma ajcxy yjot yhuinma'ñ, e nañ mìd'ajtcìxy tzuuhuinma'ñ. ²² Yì jadu'mbi jäy ajcxy hue' yhuinma'ñ pìdaaccìxy co ajcxy ooy ycohuinma'ñìty, co ajcxy ooy y'ixpìcyìty, e ca' yjanchìty, tzuu huinma'ñ ajcxy ymìd. ²³ Ma yjapadyìi ojadajtcìxìpy huindzìgyìxìpy Dios huidibi ymic'ajtìn y'oy'ajtìn ca' ycìxìpy ytigoyìpy nìmina. Chi ajcxy yajtìgach yjot yhuinma'ñ, e huindzìgyìxy jäy y'ahuìnax e jäy ajcxy yjugy'ajtìn etz y'oy'ajtìn cìxaamb tìgoyaamb. Ixti mìjpidaccìxy nañ jadu'n joon y'ahuìnax, iyujc y'ahuìnax etz tza'ñ y'ahuìnax.

²⁴ Co jäy ajcxy jadu'n ytundìgoy, paady Dios ñajtz'ixìyìn ajcxy, huen tundìgooygìxy nej anajty cì'm jìbìchuinma'ñ nìjot'ajtcìxy. Ñaymìdundìgòoygìxy ñinìcx miñ xyìpy huidibi janch oy mìdzo'yduuni. ²⁵ Ma yjapadyìi ixìpy mìjpidaccìxy je tìy'ajt tìydudägyì nej Dios tì yecy, huin'it ajcxy mìjpidaccìxy anìi huidijaty jäy tì cojy tì macxy. Ma yjapadyìi ixìpy huindzìgyìxy Dios, huidibi cì'm tì yajcojtäy tüg'óciy tìjaty ji yajpaatp, huin'it ajcxy huindzìgyìxy jäy y'ahuìnax joon y'ahuìnax, etz iyujc y'ahuìnax huidijaty ca' tì mìc'ajt mìdìty. Copìcy n'ojadajtìm ngömaayìm Dios huinìxì huinìtiempo. Amén.

²⁶ M̄id co jāy ajcxy tzachhuindziḡiiḡixy jāy y'ahuinax etz jactijaty ahuinax, paady ycixpi Dios ajcxy ñajtz'ixiyii, chi ajcxy tungixy yi jibic-huinma'ñ huidibi ci'm ñijot'ajtcixyp huidibi oy ymidzo'yduuni. Töxyjäy ajcxy ma yjapadyii chináaygixipy tudägy m̄id ñäy, chi ajcxy ñaym̄idtzináayigixy e ñaym̄idtungiḡooyigixy actöxyjäydijc. ²⁷ Yëydijctijc ajcxy nañ jadu'n ñaym̄idtungiḡooyigixy miñ xyipy. Ñaym̄iddzináayigixy ma yjapadyii iyxipy chinaaygixy m̄id töxyjäy ajcxy, huin'it ytundigooygixy ma Dios ytiy'ajt. Ci'm nijot'ajtcixy jibic-huinma'ñ huidibi oymidzo'yduuni, ypátcixipy ma ajcxy ñin̄icx je tzaachypi huidibi Dios ypidacpy m̄id yi' ajcxy ypocy ycixpi.

²⁸ Co yi jāy ajcxy jadu'n ci'm yhuinma'ñ ti pidaaccixy co ca' yajmij'ada'ñ Dios, paady ycixpi Dios ñajtz'ixiyii ajcxy. Huen tim tungixy huidibi ajcxy ci'm ñijot'ajtpy, huidibi Dios ca' jäygidägy. ²⁹ Jāy ajcxy ooy mij jibic-huinma'ñ canaagnax nijot'ajtcixy; yëydijctijc ooy ajcxy jibic-huinma'ñ tungixy; ooy ajcxy migapxtigoy töxyjäy ajcxy; ooy ajcxy adzojccixy comeeñ'ajtin; ooy mi'ljxtinaaygixy ymigügtijc; ca' ajcxy ymigüg ixaangixy; ooy ajcxy yjäyyaj'öccixy; ooy ajcxy chiptunaangixy; ca' ajcxy ycapxymidohuaangixy; ooy ajcxy ymigüg huin'ingixy; ooy ajcxy ypiitzcapxcixy; ca'p ajcxy ymigüg ixaangixy. ³⁰ Jāy ajcxy ooy nigapxy ni'o'jy ymigügtijc; ca' ajcxy ixaangixy Dios; ca' ti jäygidaaccixy; ooy ajcxy amij agix ñayjihuiyigixy; ooy ajcxy ci'm ñaygömáayigixy; ooy ajcxy cojy macxy jibic-huinma'ñ, ca' ajcxy capxymidoogixy ytaj yteedy. ³¹ Jāy ajcxy ca' y'ayuc-huinjihuiyigixy; ca' ajcxy cuydungixy yci'm'ayuc; ca' ajcxy ni pin tzojccixy jihuiyigixy; ca' ajcxy ni pin pa'ayoogixy. ³² Jadayaabi jāy ajcxy ñejhuiyb co Dios ti cojy ti macxy ycötujcin co pinjaty tundigooyb jadu'n m̄id Dios ytiy'ajt, tigooyip ajcxy yjugy'ajtin. Oy iyxipy yi jāy ajcxy janejihuiyigixy co padaangixy y'o'cin, huin'it ajcxy jactimtungixy jibic-huinma'ñ, e nañ jadu'n jotcuyc ajcxy co jac pinjaty jibic-huinma'ñ tungixy.

2

Dios tiydumb jadu'n nejyi' tzocy

¹ Paady co miich migüg m'ix'ixy mba'ixy ti ytumyb, ti migüg ycapxyp ti anajty pocy mnaymöyii, oy iyxipy ypinjäy ñejpyjäyity. Miich ooy ti pocy m'ixy ma huing jāy, e nañ jadu'n miich ooy mij mdundigoy, tim jadu'n nej yi' ajcxy ytundigooygixy. ² Nejhuiyim co Dios tudägy ytuñ co tzaachytuñ tüg'óciy pinjaty tundigooyb. ³ E miich co migüg m'ix'ixy mba'ixy ti ytumyb ti migüg ycapxyp, nañ jadu'n miich Dios xychaachtuna'ñ. ¿Nej mdijy mdzögip co anajty Dios xytiyduna'ñ? ⁴ ¿Nej ca' mjäygidägy nej Dios mij ooy may'ajt oy'ajt ti tuñ m̄id miich, nej ooy mij ti xypa'ayoy, mij ti xymimecxtucy? ¿Nej ca' mnejhuiy co Dios mij ooy xypa'ayoy xymimecxtucy, jigix mjothuimbidity nej mdundigoy ma Dios ytiy'ajt? ⁵ M̄id co ooy mjetjuuñity mgöjuuñity, ca' ajcxy mjothuimbida'ñ, ca' ajcxy m'ixmadza'ñ nej ajcxy mdundigooygixy. Paady ycixpi Dios huidibi tudägy tumb niḡi miich yi' ooy mij xychaachtuna'ñ co anajty xii tiempo ycixy ytigoy, e Dios chaachtunamyb jāy ajcxy m̄id ypocy ycixpi. ⁶ Co anajty Dios tiyduñ yi naaxhuiñ jāy, chi yajnidagihua'ñ nidüg nidüg nej anajty ti chinäy. ⁷ Nijëjity jāy ajcxy oyjot oyhuinma'ñ tungixy jabom jabom, yjijp'ijxpy ajcxy co Dios oybi ymöhuaangixy, nañ yjijp'ijxpy ajcxy co Dios ycömayiyb, yjijp'ijxyp ajcxy yjugy'ajtin huidibi ca' ycixipy ytigoyipy nimina. Yi jadu'mbi jāy Dios ymöhuaamyb jugy'ajtin huidibi ca' ycixipy ytigoyipy nimina. ⁸ Per Dios chaachtunamyb mijcajee yi jāy ajcxy huidibi ca' ycapxymidohuaangixy, huidibi ca' cuydungixy Dios ytiy'ajt, huidibi ajcxy

tumb jibic-huinma'ñ. ⁹ Ayo'n tzaachypi ypadamyb tüg'óciy jäy ajcxy huídibi jibic-huinma'ñ ti tuñ. Nañ jadu'n miich judíojäy ajcxy tim jayijp mbadaangixy tzaachypi, pen mdundigooygixp, e chiini yi jacjadyii jäy padaangixy tzaachypi, pen tundigooygixp. ¹⁰ Tüg'óciy pinjaty oyjot oyhuinma'ñ tungixp, Dios ymóhuamyb yi' ajcxy oy'ajtín, nañ cōmayaanip yi' ajcxy Dios, etz nañ yajjotcugihuüb ajcxy. Tim jayijp yi judíojäy pada'ñ ajcxy oybi, etz jac'axam yi jacjadyii jäy ajcxy.

¹¹ Dios ca' tiyduna'ñ jäy ajcxy huin'ijxpety, quipxyjaty tiyduna'ñ nidüg'óciy jäy ajcxy. ¹² Nidüg'óciy jäy ajcxy huídibi tundigooygixp, Dios yajtigoyaanip ajcxy yjugy'ajtín. Yi jäy ajcxy huídibi ca' mñidity Dios ycötujcín huídibi cojaayip, Dios yajpocycāhuaanip ajcxy, com ymñid ajcxy Dios ytiy'ajt ma yjot yhuinma'ñ. Yi jäy ajcxy huídibi mñid Dios ycötujcín cojay, Dios yajpocycāhuaanip ajcxy mñid yi' ycötujcín huídibi cojaayip. ¹³ Yi jäy ajcxy huídibi nigoob amido'ijtp co yajcapxy Dios ycötujcín, e ca' ycapxymidoogixy, ca' ycöbìga'ñyii Dios jadu'n nej jihuüy ytudägyjäyity. Yi jäy ajcxy huídibi capxymidoob Dios ycötujcín, Dios cöbìgaanip co ajcxy ytudägyjäyity. ¹⁴ Yi jäy ajcxy huídibi ca' mñidity Dios ycötujcín huídibi cojayip, co ajcxy nijot'ajtcixy oyjot oyhuinma'ñ jadu'n nej Dios tzocy, jadu'n nipaady nej jihuüy ajcxy mñidity Dios ycötujcín. ¹⁵ Co je jäy ajcxy oyjot oyhuinma'ñ tungixy, huin'it yajniguëxícixy co ajcxy ymñid Dios ycötujcín ma ajcxy yjot yhuinma'ñ. E co paatcixy jibic jot jibic-huinma'ñ, huin'it jibic ñayjihuiyigixy. E co patcixy oyjot oyhuinma'ñ, huin'it ooy oy ñayjihuiyigixy. ¹⁶ Jada je'du'n je jemybi oybi ayuc huídibi ngapxhuäcxypich co miinip je xii je tiempo co Jesucristo, mñid Dios ycötujcín, tiydunip tüg'óciy jäy ajcxy nej anajty yjot yhuinma'ñ ajcxy mñidity, tüg'óciy pinjaty ti tuñ ayüch ameech tijaty.

Je Dios ycötujcín huídibi Moisés yjay jecy'ajty

¹⁷ Miich ajcxy huídibi minamb co mjudíojäyity, miich ajcxy mmijpidaaccixyp Dios ycötujcín, je jecyip huídibi jaybetyip. Miich ajcxy mnaygömáayigixy co miich ajcxy Dios xyjäy'adyii. ¹⁸ Miich ajcxy mnejhuiyb nej Dios tzocy nej huaad mjäy'ajtcixy. E nañ ti m'ixpicy Dios ycötujcín huídibi ti xyajnejhuiygixy huídibi tiy'ajt jac'oyip. ¹⁹ Miich ajcxy minamb co janch janch co miich ajcxy Dios ytiy'ajt myejci ma yi jäy ajcxy huídibi ca' Dios ytiy'ajt mñidity, jadu'n nipaady nej jihuüy tüg huintzpi mhuijtzöy, e nañ jadu'n nipaady nej jihuüy mgodícxy je jäy ajcxy huídibi agootztuum tzinaayb. ²⁰ Miich ajcxy judíojäy myaj'ixpijcpy yi jäy ajcxy huídibi ayoob, huídibi ca' ti tiy'ajt nejhuiygixy, e mgapxhuijy yi jäy ajcxy huídibi ca' yhuinma'ñymejtzcixy. Miich ajcxy minamb co m'ayuc etz mdiy'ajt mbaatcixy ma Dios ycötujcín huídibi jaybetyip. ²¹ Miich ajcxy myaj'ixpijcpy jacjadyii jäy ajcxy Dios ytiy'ajt. ¿Nej co ca' ci'm mguydungixy nej ti myaj'ixpijccixy? Myaj'ixpijcpy ajcxy jacjadyii jäy co ca' huaad ymeetzcixy, e miich ci'm ajcxy meetzp. ²² Miich ajcxy myaj'ixpijcpy jacjadyii jäy co ca' huaad migapxtigoy töxyjäy ajcxy, e ¿miich ajcxy nej co mmigapxtigooygixy töxyjäy ajcxy? Miich ajcxy ci'm minamb co ca' huaad yajhuindzigiy tzaaboch quipychech, e miich ajcxy ci'm mdzachmeech je meeñ ma je tzajptijc ma je quipychech y'ity. ²³ Miich ajcxy mdzachnaygömáayigixy co mguydungixy Dios ycötujcín. Miich ajcxy m'ixtijy Dios mñid co ca' ajcxy mguyduni yi' ytiy'ajt. ²⁴ Paady jadu'n jaybety miiñ ma Dios ñecy, ma jadu'n ymína'ñ: “Com co miich ajcxy mdundigooygixy, paady ycixpi yi jacjadyii jäy ajcxy nigapxy ni'ojiy Dios yxii.”

²⁵ Co ajcxy mguyduunip Dios ycötujcin, huin'it Dios xytunipcuendi co miich ajcxy mïidity je tïy'ajt ma mninïcx co Dios xyjäy'adyii. Co ca' ajcxy mguyduunip Dios ycötujcin, huin'it Dios ca' xytunipcuendi co miich mïidity je tïy'ajt ma mninïcx co Dios xyjäy'adyii. Jadu'n nipaady nej jihuïy ca' mdiy'ajttïyity. ²⁶ Co yi jacjadyii jäy ajcxy huïdibi ca' mïidity tïy'ajt ma ñinïcx, e cuyduni ajcxy Dios ytïy'ajt, jadu'n nej ajcxy ytïy'ajttïyity. ²⁷ Yi jacjadyii jäy co ajcxy cuyduñ Dios ytïy'ajt, yi' ajcxy capxpaady'idïpy ma Dios. E miich ajcxy judíojäy mbocycähuip miich ajcxy, oy miich ajcxy mjamïidity ixypy Dios ycötújcin huïdi cojaayip, pen ca' mguydungïxy. ²⁸ Je iixpejt janchypï co pinjaty Dios yjäy'ajtyp, canan je' je iixpejt huïdibi ymïid ma ninïcx. E nañ jadu'n canan je' je tïy'ajttïhuï cötujcin huïdibi jäy cuydun jecy'ajty. ²⁹ Je iixpejt janchypï co pinjaty Dios yjäy'ajtyp, je' je' je iixpejt huïdibi ymïid ma yjot yhuinma'ñ, je oyjot oyhuinma'ñ huïdibi ymïid, je iixpejt co je Espiritu Santo ti yajhuächyï yjot yhuinma'ñ, canan je' je tïy'ajt co ti cuyduñ je jecyïp cötujcin huïdibi cojay ijtp. Yi jadu'mbi jäy ajcxy cömay'idïpy ma Dios, e ca' ycömay'ida'ñ ma jäy ajcxy.

3

¹ Pen tïy'ajt jadu'n nej nmïna'ñich, ¿ti jäygidaacin yi judíojäy ajcxy ymïid ma Dios huïdibi yi jacjadyii jäy ajcxy ca' mïidity? ¿Ti jäygidaacin ajcxy ypatpy co ajcxy mïidity tïy'ajt ma ñinïcx co Dios yjäy'adyii? ² Yi judíojäy ooy canagnax oy'ajtin jamïidity. Tim jayïjp Dios yajnïbïjci ajcxy yi' ycötujcin yi' y'ayuc huïdibi cojaayip. ³ ¿Nej mdiy co Dios ca' cuyduna'ñ yi' y'ayuc mïid yi judíojäy ajcxy mïid co nijëjity judíojäy ca' cuyduñ yi' ycötujcin? ⁴ Dios ca' jadu'n huinma'ñ mïidity nej jäy ajcxy huinma'ñ mïidity. Oy ixypy nidüg'óciy jäy y'anïdaaccïxy, Dios ca' y'anïdäga'ñ nimïna. Paady jadu'n jaybety miïñ ma Dios y'ayuc co David jadu'n ymïnañ:

Ñejhuïhuïpy jäy ajcxy co miich, Huindzin Dios, tudägy mguyduñ yi' m'ayuc. Ca' huaad pinjaty ymïna'nïp co ca' miich mguyduñ yi' m'ayuc.

⁵ Pen Dios cömaybidzimïpy mïid ajt nbocy ycïxpi, ¿nej tïy'ajt jadu'n nej jäy ymïnaangïxy co Dios ca' oy ytuñ, co xychaachytuunim mïid ajt nbocy ycïxpi? ⁶ Ca' yjadu'nity. Co ixypy yjadu'nity, Dios ca' yi' tïydunïpy naaxhuiñjäy mïid ajcxy ypocy ycïxpi.

⁷ Co ixypy ytïy'ajttïy jadu'n nej jäy ymïnaangïxy co Dios ooy yjotcujcity co ca' xychaachtunïpyich mïid nbocyich ycïxpi, jac'oy co ixypy ndundigooyich, jigix Dios janch ycömaybidzimïpy. ⁸ Jac'oy ixypy nmïnaanïm: "Tzoc tundigooyim jigix jëbi Dios cömay ypidzimïpy." Ixti nijëjity jäy ti xyñïhuambetyich co ñich jadu'n ti nmïna'ñich. Ca' jadu'n nmïna'ñich co Dios jäy tzaachtunïpy ninigoob. Dios chaachtunïpy pocyjäy ajcxy, com paatïp ajcxy jadu'n yi' tzaachypï.

Nidüg'óciy ñich ajt nbocymïidity

⁹ ¿Nej janch jadu'n co ñich ajcxy huïdibi judíojäy, jac'oyjäy ñich ajcxy ca'ydi yi jacjadyii jäy ajcxy? Ca' yjadu'nity, ca' ñich ajcxy njac'oyjäyity. Com ti jayïjp nyaj'ixpicyich co tüg'óciy jäy ajcxy yajpaady pocymïid, yi judíojäy, etz nañ jadu'n jacjadyii jäy ajcxy. ¹⁰ Com jadu'n jaybety miïñ ma Dios ñecy ma jadu'n ymïna'ñ:

Ca' ji ni tüg jäy tudäcpy, ni tüg.

¹¹ Ca' ji ni pin huïdibi huinjuhuïyb Dios ytïy'ajt. Ni pin huïdibi ixtaayb Dios ytïy'ajt.

¹² Nidüg'óciy jäy ti ixmajtzcïxy Dios ytïy'ajt. Quipxy ycapxy ajcxy ytumyb co ytundigoogyïxy. Ca' ji ni pin, pin huädz oy yjot oy yhuinma'ñ tumb, ca' ji ni tüg.

13 Yi jäy ajcxy ooy ycapxtigooygixy, oy ajcxy yhuin'ññ mïid y'ayuc. Jadu'n ajcxy yöcpajc nipaady nej tüg öcpi jut huïdibi ahuädz. Ooy ajcxy yajtzachïy mïid y'ayuc jadu'n nej jihuïy tza'ñ chüch.

14 Ooy ajcxy ycapxtigooygixy. Ooy ajcxy jibic ayuc capxcixy.

15 Mïid yinjaty huenjatypi ayuc, mic'amy ymigüg yaj'o'ccixy.

16 Ma ajcxy yhuïdity ooy midundigooygixy ymigüg, e nañ yecy ajcxy tajin mayin.

17 Ca' ajcxy nejhuïygixy nej huaad chinaaygixy jotcujc, ca' ma ti tzip ti capxy.

18 Ni cahuinmaaygixy nej Dios tzigïygixipy.

19 Tüg'óciy ayuc ycojaayity ma Dios ycötujcin necy, mic'ajt mïidpi mïid yi jäy ajcxy huïdibi yajmij'ajtp je cötujcin. Dios ti pidägy yi' ycötujcin, jaydëbi pinjaty tundigooyb, huaad ca' ti anïi tuñ ma Dios. Dios ytiydunipy tüg'óciy jäy ajcxy mïid yi' ycötujcin. 20 Dios ca' capxpada'ñ co ytudägyity, mïid co ti cuydunyyi ycötujcin. Dios ti pidägy ycötujcin jaydëbi nejhuïyim co ajt nbocymïidity.

Yi alma nidzoocin, hue' yajpaady mïid mibijcin

21 Jadachambi Dios xyajnejhuïyim jemybi tiy'ajt jadu'n nej tudägy'ajtin jëb nbaatim ma yi', e jada jemybi tudägy'ajtin tiy'ajt, ca' yi' yjadu'nity nej yi' tiy'ajt huïdibi yajpatp ma Dios ycötujcin jecy'ajtpyi. Per yi Dios y'ayucnajtzcapxïybi ñecy etz Dios ycötujcin necy yejc tiy'ajt jecy'ajty co Dios xymöhuaanim tudägy'ajtin. 22 Jadu'n Dios yaj'ahuimbidaangixy tudägy tüg'óciy jäy huïdibi mibijcp Jesucristo, ca' ñejity pinjäy ajcxy, pen judíojäy o pen ca' judíojäy ajcxy.

23 Com nidüg'óciy naaxhuiñjäy ti ytundigooygixy. Ni tüg jäy yhuädz'ajtin ycanaybadyi mïid Dios yhuädz'ajtin y'oy'ajtin. 24 (Mïid co nidüg'óciy jäy ytundigooygixy), paady ycixpi Dios mijmay'ajt mij'oy'ajt tuñ ninigoob mïid tüg'óciy jäy ajcxy, e Jesucristo ti cojuydäy tüg'óciy ajcxy ypocy, e jadu'n yaj'ahuimbity tudägy nidüg'óciy jäy ajcxy huïdijaty mibijccixp Jesucristo.

25 Dios yquejx y'ung ya naaxhuiñ, jaydëbi huinmeecxip jäy ajcxy ypocy, mïid co Jesucristo ti y'ögy mïid ajcxy ypocy ycixpi. Dios yhuinmeecxip jäy ajcxy ypocy co ajcxy mibigipy Jesucristo. Jayijp ca'ni anajty Jesucristo miññ ya naaxhuiñ, Dios ooy mïimecxtujcy jäy ajcxy, ca' anajty mïidity jotcöduuyb jäy ajcxy ypocy. 26 Jadachambi xii tiempo Dios ti yaj'oyïy jadu'n nej jëb huinmeecxipy jäy ajcxy ypocy, e jadu'n yaj'ahuimbidity ajcxy tudägy ma yi' yhuinduu.

Jadu'n Dios tuñ jigix ñiguëxigipy co Dios tudägy yi', e tudägy'adaamni yi', co cöbicy jäy, yi' pinjaty mibijcp Jesucristo.

27 ¿Ti huaad jäy ajcxy tungixy huïdibi jëbi mïid ñaygömayïyb ma Dios? Ca' ni ti. ¿Na'amy co yjadu'nity? ¿Nej jëbi ajcxy ñaygömayïyb mïid co yajmij'ajtcixy Dios ycötujcin? Ca' yjadu'nity. Ca' huaad ñaygömáygixy ci'm, com Dios ti yaj'ahuimbity jäy ajcxy tudägy huïdibi mijpidacp Jesús. 28 Paady nmïna'ñich co jäy ajcxy y'ahuimbity tudägy co ajcxy mibicy Jesucristo, e canan co janch ypaad jacuydungixy canaag cötujcin.

29 ¿Nej miich ajcxy mdijcixy Dios ytuñ mïid ac yi'yi judíojäy ajcxy, e ca' jacmïid pinjaty? Ca' yjadu'nity. Dios tuumb mïid janch nidüg'óciy jäy ajcxy.

30 Ji tügpaajc Dios, e yi' tú'ciy ytuñ mïid judíojäy, etz nañ jadu'n jacjadyi jäy ajcxy. Dios yaj'ahuimbijtaayb tudägy nidüg'óciy jäy ajcxy co ajcxy mibijccixy Jesucristo. 31 Co jadu'n nbaatim ndudägy'ajtin mïid co nmibijcim Jesucristo, ca' nmïnaanïm Dios anajty yi' ycötujcin je jecyip nyajcödigooym. Hue' janchtiy nigï anajty nmic'ajtmooyim Dios ycötujcin.

4

Je ijxpejt huïdi Abraham yejc

¹ ¿Nej n'ocmīnaanīm? ¿Ti oybi ti paady ma Dios je Abraham ñich ajt nmij'ap nmijteedy? ² Co ixypy Dios Abraham tudägy ti ixy, mīd co oybi ti tuñ, jēbi Abraham ixypy ñaygōmayii. Per ca' huaad cī'm ñaygōmayii ma Dios. ³ Jadu'n jaybety ymiñ ma Dios ñecy ma jadu'n ymīna'ñ: “Abraham ymijpīdaaci Dios, e paady Dios jadu'n cōbijcy Abraham jadu'n nej tūg tudägyjäy.” ⁴ Je jāy huīdibi ymuju'ñ patp mīd ytung ycīxpi, jada meēñ huīdibi ymuju'ñ'ajtpy ca' nīgoo ñīmōyīi, hue' tīm paatp jadu'n mīd ytung ycīxpi. ⁵ Yi jāy huīdibi ca' jījp'ixy co tudägy'ajtin pada'ñ ma Dios mīd oy'ajtin ycīxpi huīdibi ytumyb, jēyi ymībījcpy ymijpīdacpy co Dios yaj'ahuimbīda'ñyīi tudägy. Yi jadu'mbī jāy tudägy'ajtin ypadamy mīd ymībījcin ycīxpi. ⁶ Jaybety ymiñ ma Dios ñecy co je David jecy'ajty nīmīydacy tūg jāy huīdibi ooy anajty jotcuyc ñayjihūyīi mīd co Dios ti y'ixyīi jadu'n nej jihūyī ytudägyjāyīty mīd ymībījcin ycīxpi, e ca' nīmīnaanīm mīd oyjāy'ajtin ycīxpi huīdibi ytumyb. ⁷ David jadu'n ymīna'ñ:

Jotcuyc je jāy ajcxy huīdibi ypocy ti yhuīnmeccxyīi, huīdibi ypocy ti yajtigoyīi.

⁸ Jotcuyc je jāy huīdibi Dios cōbijcip jadu'n nej jihūyī ca' ypocy ymīdīty.

⁹ ¿Nej janch tīy'ajt jadu'n co jada jotcuyc'ajtin huīdibi David ñīmīydac jecy'ajty, co ac yi judío jāy yī' ajcxy padaamb huīdījaty mīd tīy'ajt ma ñīnīcx co Dios yjāy'adyīi? Ca' yjadu'nīty, yi jacjadyīi jāy nañ jadu'n yī' ajcxy pada'ñ jotcuyc'ajtin. Ti nīmīnāangīxyīch co Abraham ymībījci Dios, e Dios ycōbijci jadu'n nej jihūyī ytudägyīty. ¹⁰ ¿Nej mdījy Dios ycōbijci Abraham jayījp ca' anajty yajtīy'ajttīy'ñī? o ¿ti anajty yajtīy'ajttīy? Dios ycōbijc Abraham jadu'n nej jihūyī ytudägyjāyīty ca'ni anajty pīdacpy tīy'ajt ma ñīnīcx co Dios yjāy'adyīi.

¹¹ Jayījp anajty Abraham ti mībīcy Dios, e ti anajty Dios ycōbīgyīi. Jac'axam Dios Abraham je cōtūjcin mooy co huen tīy'ajttīhūīpy y'ung etz y'ap y'oc. Je' je' iixpejt'ajtp co Dios anajty jayījp ti ycōbīgyīi jadu'n nej jihūyī ytudägyjāyīty, ca'ni anajty ymōyīi cōtūjcin. Co Dios jadu'n ytuñ mīd Abraham jadu'n nīpaady nej jihūyī Abraham nmijteedy'ajtim ñich ajt nīdūg'ócy huīdibi cham mībījcp Jesús. ¹² Abraham nañ jadu'n ñīmijteedy'ajtyp yi judío jāy huīdibi mībījcp mījpīdacp Dios tīm jadu'n nej yī' mībīcy anajty Dios, jayījp ca'ni anajty mīdīty tīy'ajt ma ñīnīcx co Dios yjāy'adyīi. Jadu'n nīpaady nej jihūyī Abraham ca' nīmijteedy'aty yi judío jāy huīdibi ca' mībīcy Dios.

Je huīdibi Dios ti xyaj'ahuanīyīm ti ycīxy yca'px mīd je mībījcin

¹³ Mīd co Abraham etz y'ap y'oc ymībījcpy ymijpīdacpy anajty ajcxy Dios, e paady anajty Dios yaj'ahuimbīda'anīgīxy tudägy, e paady Dios nīmāy Abraham co yi naaxhūīñybi yī' ajcxy je' adaanīp. Canan jadu'n ajcxy Dios ñīmāyī co ymōhuānīgīxy je naaxhūīñybi mīd co anajty nīdūg'ócy ajcxy ti cuydungīxy Dios ycōtūjcin. ¹⁴ Co Abraham etz y'ap y'oc padaangīxy je naaxhūīñybi huīdibi yaj'ahuanīyī, mīd co ajcxy ti cuydundaayī Dios ycōtūjcin, paady naadīgī'ajtp ixypy co nmībījcin co Dios xyaj'ahuimbīdaanīm tudägy. E nañ naadīgī'ajtp ixypy co Dios je Abraham nīmāy: “Je naaxhūīñybi mīch je' mje'adaanīp, com ti xymībīcyīch.” ¹⁵ Je pīnjaty mījpīdaacp Dios ycōtūjcin je jecyīp, Dios yī' tzaachytunaanīp, com ca' cuydundaaygīxy. Pīnjaty ca' mīdīty Dios ycōtūjcin huīdibi jaybetyīp, ca' yī' mīdūndīgooygīxy jadayaabi cōtūjcin.

¹⁶ Mīd co Abraham anajty Dios ti mībīcy, paady ycīxpi Dios ñīmāyī co je naaxhūīñybi yī' je'adaanīp. Jadu'n Dios may'ajt tuñ mīd Abraham, jaydēbi tūg'ócy pīnjaty mībījcp Dios, tīm jadu'n nej Abraham mībījcy Dios, jēbi ajcxy paatcīxy yi oy'ajtin huīdibi Dios yajnīmāy Abraham co mōhua'ñ je oy'ajtin huīdibi yegamyb nīnīgoobi. Dios ycuydunamyb yī' y'ayuc mīd tūg'ócy jāy huīdibi mībījcp Dios, tīm jadu'n nej Abraham anajty mībīcy Dios, canan yī'yī judío jāy ajcxy padam oy'ajtin, com Abraham iixpejt yejc ma tūg'ócy

jäy ajcxy. ¹⁷ Ma Dios yhuinduu jadu'n nipaady nej jihuüy Abraham ich ajt nmij'ap'ajtm nmijteedy'ajtm nidüg'óciy huídibi mibijcp Dios, com Abraham nañ jadu'n ymibijcyp anajty Dios. Com jadu'n jaybety ymiñ ma Dios ñecy co Dios jecy'ajty jadu'n nimay Abraham: “ñich miich nyajñibijcyp co miich mnmij'ap'adamyb mnmijteedy'adamyb tüg'óciy je mayjäy huindu'mybi naax huindu'mybi cajp.” E Dios ycuydunipy yi' y'ayuc com mic'ajt müd, ixti jaydëbi yajjugypigipy jadüg'oc jäy tübi y'ó'ccixy. E nañ mic'ajt müd jaydëbi ane'min pidägy co huen yji'adipy huídijaty ca' ca'tni.

¹⁸ Müd co Dios anajty ti ñimäyii co ymüd'adamyb may y'ap y'oc, paady ycixpi Abraham ti jipp'ixy anajty co Sara anajty y'ung'ixa'ñ. Canaag jimijt anajty jajipp'ixy co huen y'ung paadip. Ti anajty tiempo ñajxni mina y'ung'ixipy. Hue' Abraham ymibijc huídibi anajty Dios ti yajñimäyii co yi' müd'idamyb may'amy y'ap y'oc. Paady ti ni'ap'aty ti nideedy'aty may'amy y'ap y'oc.

¹⁹ Abraham ti anajty ymic'ajt ycixni com ti anajty ymijäyñi. Ymüd anajty migo'px jimijt, e nañ yi' ytöxyjc Sara ni tüg anajty ti yca'ung'ixy, per Abraham yjacmibijcyp anajty co Dios cuyduna'ñ y'ayuc müd yi'. ²⁰ Abraham ca' anajty ixmach yi' ymibijcin jadu'n nej anajty Dios ymüdity ymic'ajt jaydëbi cuydunip yi'y'ayuc. Chi Abraham ibaty capxpaty Dios. ²¹ Com Abraham ti anajty huinma'ñ ypidägy ma Dios co yi' ymüd ymic'ajt jaydëbi ycuyduniyb yi' y'ayuc huídibi yaj'ahuaniy. ²² Com Abraham ymijpidaacip anajty Dios y'ayuc, paady Dios anajty ti cöbicy Abraham, e jadu'n anajty ti yajnaxy nej jihuüy ytudägyjäyity.

²³ Dios ymoy Abraham jada y'ayuc huídibi jaybety, canan jëda'ajty Abraham yajmoy, nañ yajmoyday mayjäy. ²⁴ Nañ jadu'n jaybety miñ jada ayuc müd ich ajt ycixpi. Dios nañ xycöbigaanim jadu'n nej jihuüy ajt ndudägyjäyity müd co nmibijcim Dios huídibi ti yajjugypicyp anajty jadüg'oc ajt nHuindzin Jesucristo. ²⁵ Dios ycïeyc Jesús huen yaj'ögyii müd ajt nbocy ycixpi. E nañ Dios yajjugypicyp Jesús jadüg'oc jaydëbi xyaj'ahuimbijtm tudägy ma Dios.

Je nej yhuimbizimni co Dios xycöbijcim tudägyjäy

5

¹ Müd co nmibijcim nmijpidaacim ajt nHuindzin Jesucristo, paady Dios ti xyaj'ahuimbijtm tudägy. E müd co Dios ti xyaj'ahuimbijtm tudägy, paady jotcuje n'ijtm müd Dios. ² Co nmibijcim nmijpidaacim Cristo, chi nbaatim je may'ajt je oy'ajt huídibi Dios ytumyb müd ich ajt, e jadu'n oy n'ijtm müd Dios, ca' ma ti tzip. Nañ ooy njotcugiyim, müd co njipp'ijxim co nbadaanim Dios y'oy'ajtm. ³ Canan jëda'ajty nmijotcuje'ajtm co nbadaanim Dios y'oy'ajtm, nañ jadu'n tzoc mijotcuje'ajtm ayo'n tzaachypi. Com nejhuiyim co nminajxim nyajnajxim tzaachypi, huin'it jëbi nyajtunim mecxtujcin. ⁴ E co nyajtunim mecxtujcin, cömay najxim ma Dios, e co anajty cömay ti nnajxim, chi njipp'ijxim co nbadaanim oy'ajtm ma Dios. ⁵ Com njipp'ijxim co nbadaanim Dios y'oy'ajtm, chi ca' ndajim nmayim com Dios ti yi' yEspíritu Santo xy'adigiyim xyjottigiyim huídibi xyajnejhuuyim jadu'n nej Dios xychojcim xyjihuiyim.

⁶ Jecy'ajty co anajty ca'ni Jesucristo ymiñ, je naaxhuiñyäjy ca' anajty mic'ajt müdity nej ci'm y'ahuimbijtcixipy tudägy. Co yhuaad'ajtni je xi je tiempo huídibi Dios ti yaj'ixtägy, huin'it Cristo y'o'cy müd ich ajt nbocy ycixpi müd co ndigooyim müd Dios ytiy'ajt. ⁷ Co ixypy n'ijxtaayim pinjaty codinähuij tüg jäy tudägy ma yi' o'cin, ca' ni pin nbaatim. Co ixypy n'ijxtaayim pinjaty codinähuaamyb tüg jäy huídibi ooy ycömayity ma yi' o'cin, ca' yjecyity co nbaatim tüg metz. ⁸ Per Dios yajniquëxicy jadu'n nej xychojcim xyjihuiyim

mijcajee co quejxy Cristo huen o'cy mïid ajt nbocy ycixpi, oy anajty ïch ajt ooy njacpocytuunim. ⁹ Cristo ti xyaj'ahuimbijtim tudägy co ñi'py ti temy ti yocy mïid ajt nbocy ycixpi, e nañ Cristo ñigi may'ajt tunañ mïid ïch ajt ycixpi co anajty xyajnidzögaanim ajt n'alma, jadu'n nej Dios tzaachytunañ naaxhuiñjây mïid ajcxy ypocy ycixpi. ¹⁰ Co anajty ca' Cristo ymiiñi ya naaxhuiñ, huin'it anajty nmïidzip'ajtim Dios. Je tzip capxy ti Dios yaj'oyïy co quejxy y'ung ya naaxhuiñ, e y'o'cy mïid ajt nbocy ycixpi. Mïid co Cristo xycodinaayim ma yi o'cin, paady ñigi xypubejtim xypudigïyïm cham co yajpaady juugy. ¹¹ Canan jada'ajty co Jesucristo xyajnidzögaanim ajt n'alma, nañ jadu'n tzoc xondaacim mïid co n'ijtim mïid Dios, mïid je may'ajt huidibi ajt nHuindzin Jesucristo ti tuñ mïid ïch ajt ycixpi co yaj'oyïy je tzip nej anajty Dios nmïidzip'ajtim, jëbi jotcuje n'ijtim mïid Dios.

Adán etz Cristo

¹² Mïid jada ycixpi co yi pocytunï chondacy jecy'ajty ya naaxhuiñ mïid tügpi jây. E co jây ytundigoy oga'n mïid Dios, paady ycixpi je o'cin ytigïy ya naaxhuiñ. Mïid co tüg'óciy jây midundigoogyixy Dios, paady tüg'óciy jây patcixy yi o'cin. ¹³ Janch tiy'ajt jadu'n co jây ajcxy ytundigooy jecy'ajty jayïp ca'ni anajty Dios yecy yi' ycötujcin cojaaybi, e co ca' jây anajty ajcxy cötujcin mïidity jecy'ajty, paady ca'pin tiyduñ ajcxy nej ajcxy ytundigooy. ¹⁴ Ca' ñejity, oy ajcxy anajty ca' mïidity Dios ycötujcin, nañ jadu'n y'o'ctay ajcxy, chondacy mïid Adán, ixti yja'ty ma Moisés yxï ytiempo. Nañ o'ctay jây ajcxy huidibi tigachjaty tundigooy, ca' yjadu'nity nej Adán oga'n ytundigooy. ïch ajt nninïcx ymïid je jibicpi huidibi nbaatim ma Adán. Per ajt njemyjot njemyhuinmañ nbaatim ma Cristo.

¹⁵ Je pocytunï huidibi Adán yajtzondac, ca' naybadyii mïid je tudägy'ajtin huidibi Dios ti xyñimooyim. Mïid je pocytunï ycixpi huidibi tüg jây ti yajtzondägy, tüg'óciy jây öcin ti paady. Dios mïid tüg yëydijc, je Jesucristo, mijmay'ajt tuñ mïid jây ajcxy ycixpi co yaj'ahuimbijtcixy tudägy, chi mayjây tudägy'ajtin ti paady. ¹⁶ Per je tudägy'ajtin huidibi Dios xyñimooyim, ca' jadu'n naybadyii mïid huidibi Adán ytuun. Mïid co Adán ytundigoy tügtecy mïid Dios, paady ycixpi mayjây o'cin ti paady mïid tüg pocy ycixpi. Mïid co Dios ti xyñimooyim tudägy'ajtin mïid Jesucristo, paady mayjây tudägy'ajtin y'oy'ajtin ti patcixy huidibi mibijcp Cristo. ¹⁷ Mïid co tüg jây capxycömidodacy Dios, paady tüg'óciy jây ti patcixy yi o'cin. Mïid co tüg jây, je Jesucristo, may'ajt oy'ajt tuñ co xyaj'ahuimbijtim tudägy, paady tüg'óciy jây ajcxy huidibi mibijcp Jesucristo ypadaangixyp jotcuje'ajtin etz nañ chinähuaangixy jilby tzajpjoty ma Jesús y'ane'my.

¹⁸ Mïid co tüg jây ytundigoy oga'n, paady nidüg'óciy je mayjây ypocycäy ajcxy, e patcixy yi o'cin. Nañ tim jadu'n mïid tüg jây huidibi ti chinäy tudägy, Dios mayjây yaj'ahuimbijty ajcxy tudägy, e ti patcixy yjugy'ajtin huidibi ca' ycixipy ytigoyipy nimina xii. ¹⁹ Mïid co tüg jây capxycömidodacy Dios, paady tüg'óciy jây ti patcixy je pocy. Nañ mïid co tügpi jây capxymïdoy Dios, paady je mayjây tudägy'ajtin ti patcixy huidibi mibijcp Jesucristo.

²⁰ Co Dios moy jây ajcxy yi' ycötujcin huidibi cojaayip, chi ñigi jây ajcxy nejhuïygyixy co ypocytungixy. Je may'ajt oy'ajt huidibi Dios ytumyib, ñigi yi' y'oyity, ca'ydi je mijpocy huidibi jây ajcxy ytungixyp. ²¹ Tim jadu'n nej co jây ypocytungixy, huin'it ajcxy pocymïid chinaaygyixy, ixti mabaad anajty y'öccixy mïid ypocy ycixpi. Nañ tim jadu'n co Dios may'ajt tuñ co yaj'ahuimbity jây ajcxy tudägy, huin'it Dios ane'my yi' ajcxy chinaayin mïid tudägy huinmañ, etz nañ xymöhuaanim jugy'ajtin huidibi ca' ycixipy ytigoyipy nimina, co

nmijpidaacim ajt nHuindzin Jesucristo huidibi yjugy'ajtin yejc mïid ajt nbocy ycixpi.

O'cy mïid yi pocy ycixpi, jugy'aty mïid Cristo ycixpi

6

¹ ¿Nej n'ocminaanim? ¿Tzoc ooy ñigi tundigooyim jigix Dios ñigi may'ajt tunipy mïid ñich ajt? ² Ca' jadu'n ytiy'ajtity, ca' huaad njacpocytuunim. Co nmibijcim Jesucristo, chi jadu'n nipaady nejihuïy ti n'o'cim, e cham ca' n'ijtim pocymïid. ³ ¿Nej ca' mnejhuïyigixy jada tiy'ajt? Co nnibejtim mïid Jesucristo yxii, chi n'ijtim mïid Jesucristo. Jadu'n nipaady nej jihuïy ti n'o'cim quipxy mïid Cristo co yi' y'o'cy mïid ajt nbocy ycixpi. ⁴ Co ñich ajt nnibejtim jadu'n nipaady nej jihuïy ti n'o'cim, e ti nnaaxtigïyim quipxyi mïid Jesucristo. Dios Teedy mïid ymic'ajtin oybi yajjugypijcy Cristo co anajty ti y'ögy, chi Cristo paty jemybi jugy'ajtin, nañ jadu'n ñich ajt ti nbaatim jemybi jugy'ajtin quipxy mïid yi', paady copicy ndzinaayim mïid jemybi jot jemybi huinma'ñ.

⁵ Co nmibijcim Jesucristo, chi n'ijtim mïid yi', co yi' ti y'ögy, jadu'n nipaady nej jihuïy ti n'o'cim quipxy mïid yi'. Co Jesucristo yjugypijcy mïid jemybi yjugy'ajtin, nañ jadu'n ñich ajt nbaatim jemybi jugy'ajtin quipxy mïid yi'. ⁶ Nejhuïyim ñich ajt nej anajty jibic-jot jibic-huinma'ñ nmïid'ajtim jayijp'aty ca'ni anajty nmibijcim. Jadu'n nipaady nej jihuïy ajt njibicjot njibic-huinma'ñ ti y'ögy quipxy mïid Cristo co yi' y'o'cy cruudzcïxy. Cristo ti y'ögy mïid ajt nbocy ycixpi, jigix jëbi n'ijxmajtzim pocytunïi huinma'ñ, etz jigix jëbi je pocytunïi ca' xyjac'ane'mim ajt njot nhuinma'ñ. ⁷ Com pinjaty ti y'ögy, yi' ypocytunïi ca' ti mic'ajt jacmïidity ma yjot yhuinma'ñ. ⁸ Pen jadu'n nipaady nej jihuïy ti n'o'cim quipxy mïid Cristo, paady ndzinähuaanim njugy'adaanim quipxy mïid yi'. ⁹ Nejhuïyim co Cristo ti yjugypijcy co y'o'cy, e ca' yi' y'öga'ñ jadüg'oc. Yi' o'cin ca' ti mic'ajt jacmïidity ma Jesucristo. ¹⁰ Co Cristo ti y'o'cy mïid jäy ypocy ycixpi, chi y'ögy tüg tecypajc mïid nidüg'óciy jäy ajcxy ycixpi. Co Jesucristo yjugypijcy, chi tüg'óciy huidibi yi' ytumyb ma yi' chinaydac yjugy'ajttac, yi' ytumyb mïid Dios ycixpi. ¹¹ Nañ jadu'n miich ajcxy mhuinma'ñypidaaccix jadu'n nej jihuïy ti m'öccïxy, e yi' ypocytunïi ca' ti mic'ajt jacmïidity ma miich ajcxy mdzinaayin. E jadachambi xii tiempo tzinaaygix mïid Dios ycixpi quipxy mïid Jesucristo ñich ajt nHuindzin.

¹² Paady ycixpi ca' huaad xy'ane'mgixy je jibic-huinma'ñ huidibi ajcxy mninïcx yjanijot'ajtpy. ¹³ Ca' huaad mgïyejccïxy yi' mninïcx ma pocytunïi. Naygïyëjcgix ma Dios, ixmajtzcix yi' pocytunïi. Jadu'n nipaady nej jihuïy ti m'öccïxy, e ti mjugypijccïxy jadüg'oc. Hue' janchtiy cïyejccix yi' mninïcx ma Dios, jaydëbi mdzinaaygixipy mïid ajcxy tudägy mjot mhuinma'ñ, e cuydungix Dios chojcin. ¹⁴ Jadachambi xii tiempo ca' miich ajcxy mdzinaaygixy pocymïid, jadu'n nej jecy'ajty ajcxy mdzinaaygixy co anajty ajcxy mguydungixy Dios ycötujcin je jecyïp. Hue' janchtiy tzinaaygix mïid Dios ycixpi, com Dios mij may'ajt ti tuñ mïid miich ajcxy.

Tüg ijxpejt huidibi yajpatp ma n'ijtim yajtuñ

¹⁵ ¿Ti huaad nduunim? ¿Nej jëbi huaad njacpocytuunim? Com Dios mijmay'ajt ti tuñ co ti jöch ajt nbocy etz nxïhuin, e Dios ycötujcin, je jecyïp, ca' xyjacyajpocycähuim. Ca' huaad njacpocytuunim. ¹⁶ ¿Mnejhuïyb miich ajcxy jada tiy'ajt? Co ixypy pinjaty ñaygïyeyii co ytuna'ñ mïid tüg huindzin huidibi mic' yajtumb, copicy co je tumbi capxymïdohuipy je yhuindzin. Nañ tim jadu'n nipaady mïid pocytunïi. Pen mnaygïyëjcp mïid pocytunïi, huin'it anajty pocy xy'ane'my ma mdzinaayin, ixti mabaad

anajty m'ögy m'iid mbocy ycixpi. Co mnayg'iyéjciçixipy ma Dios, huin'it ajcxy mgapxymidohipy Dios, e mdzinähuiç ajcxy tudägy. ¹⁷ Jecy'ajty miich ajcxy anajty pocy xy'ane'mgixy, co jibic-huinma'ñ mdungixy. Nyajnajxpyich jäygidaacin ma Dios co jadachambi tiempo ti mgöbijccixy cixyot huinjot Dios ytiy'ajt huidibi xyaj'ixpijccixp, e mgapxymidoogixy Dios. ¹⁸ Cristo ti xyaj'a'oyiçyi ajcxy mjot mhuinma'ñ, ca'ydí mjactzinaaygixy pocymiid. Ti mhuinma'ñ mbidaaccixy co mgapxymidohuaangixy Dios e mdzinähuaangixy tudägy. ¹⁹ (Ngapxhuijpyich miich ajcxy cham m'iid naaxhuiñyäj y'ayuc ytiy'ajt, com ca' yajxon mhuiñihuiyigixy Dios y'ayuc ytiy'ajt.) Jadu'n nej jecy'ajty co ca' anajty mmibijccixy Cristo, ooy anajty mnayg'iyéjciçixy xii ya ma jibic-huinma'ñ, e mdundigooygixy xii ya m'iid mnin'icx. Ooy miich anajty ajcxy m'iidity jibicpi ma mjot mhuinma'ñ, ooy anajty mdundigooygixy. Jadachambi xii tiempo nayg'iyéjciçix ma Jesucristo, jigix jëbi huaad mdungixy m'iid tudägy jot tudägy huinma'ñ, etz jigix jëbi huaad mdzinaaygixy m'iid huädz jot huädz huinma'ñ.

²⁰ Co anajty yi jibic jot jibic-huinma'ñ xy'ane'mgixy, chi ca' je oyot oyhuinma'ñ anajty xy'oc'ané'mgixni. ²¹ ¿Ti jotcuç'ajtin miich ajcxy ti mbaatcixy co jibic jot jibic-huinma'ñ mdungixy huidibi jadachambi tiempo mdzöydu'n'ajtip ajcxy? Yi jibic jot jibic-huinma'ñ xyyajnicxp ajcxy ma yi o'cin. ²² Jadachambi xii tiempo Dios ti yaj'oyiç nej jëbi m'ixmajtzciçixipy yi pocytuni, ca' huaad mjactzinaaygixy pocymiid. Ti m'ahuimbijtcixy Dios ytumbi, jadaayaabi tzinaayin xymöhuip ajcxy mjotcuç'ajtin. Tiydudägy cham tzinaaygix m'iid Dios ycixpi, e mbaadip ajcxy jugy'ajtin huidibi ca' ycixipy ytiçoyipy nimina. ²³ Yi pocytuni ycoju'ñ yi' je' yi o'cin. Per je huidibi Dios xyñimooyim, hue' je' je jugy'ajtin huidibi ni caminaxii ycixipy ytiçoyipy co n'ijtim m'iid ajt nHuindzin Jesucristo.

7

Tüg ijxpejt huidibi yajpatp ma picychinaayin

¹ Miich ajcxy migügtijc huidibi ti m'ixpiçy Dios ycötujcin huidibi Moisés yjaay, mnejhuib miich ajcxy co yi naaxhuiñyäj ycötujcin ym'iid mic'ajt ma ajt ndzinaayin, ixti mabaad anajty n'o'cin. ² Paady co tüg töxyjäy ycivilbicy m'iid tüg yëydijc, ca' huaad ixmach ñäy mabaad china'y yjugy'aty. Co janchtiy anajty je töxyjäy ñiyëydijc ti y'öcni, huin'it anajty ca' ocm'idiñ ñäy y'ane'min. ³ Ooy anajty mij ytundigoy je töxyjäy co ypiçipy m'iid huingbi yëydijc pen jugy'ajtni je ñäy. Cooni janchtiy anajty ñiyëydijc ti y'ögy, huin'itni janchtiy jëbi ypiçy m'iid huingbi yëydijc, e ca'p je' anajty ytundigoy.

⁴ Miich ajcxy nmigügtijcich, judíoçyäjy huidibi mibijcp Cristo, jayijp co anajty ca'ni mmibijccixy Dios, je Dios ycötujcin huidibi Moisés yjaay xy'ane'mgixp anajty ma mdzinaayin. Jadachambi xii tiempo yi jadu'mbi cötujcin ca' yi' xyjac'ané'mgixni. Jadachambi Cristo ytiy'ajt xy'ane'mgixp, je Cristo huidibi Dios yajjugypijc jadüg'oc co y'o'cy. Jadu'n miich ajcxy nipaady nej je töxyjäy huidibi ñiyëydijc ti y'ögy, e ti ypiçtigach. Cristo miich ajcxy xyñigohuajc'ajtp, jigix jëbi mdzinaaygixy m'iid Dios ycixpi. ⁵ Jayijp ca'ni anajty nmibijcim Jesucristo ooy anajty nguyduunim huidibi ajt nnin'icx ñijot'ajt. Je huin'it tiempo anajty je jibic-huinma'ñ xy'ane'mim ma ajt ndzinaayin. Je' je' je jibic-huinma'ñ huidibi Dios xycapx'adujcim m'iid ycötujcin. M'iid co jibic-huinma'ñ xy'ane'mim anajty ajt ma ndzinaayin etz xyajnicxaanim anajty ma yi o'cin. ⁶ Jadachambi xii tiempo Dios ycötujcin huidibi Moisés xymooyim, ca' ti mic'ajt m'iidity ma iich ajt, ti n'ixmajzim. Jadu'n nipaady nejhuib ti n'o'cin, e

njugypijcím jadüg'oc. Paady nguyduuním je jemybi tÿy'ajt huídibi je Espíritu Santo xyajnejhuíyím. Canan je' anajty nguyduuním je jecy'ajtpy cötujcín.

Je pocy huídibi ijtp ma ñch

⁷ ¿Nej n'ocmínaaním? ¿Nej janch co je cötujcín huídibi Moisés xymooyím xyajpocytuuním anajty? Ca' yjadu'níty. Co ixypy ca' anajty nmídidyich Moisés ycötujcín, ca' ixypy ñch ti nnejhuíyich co ti ndundigooyich ma Dios ytÿy'ajt. Co ixypy anajty ca' n'ocnejhuíyich Moisés ycötujcín ma jadu'n ymínañ: “Ca' mmígüg ni ti m'adzojçipy.” Ti ixypy ndundigooyich, e ca' ixypy nejhuíyich ma ti ndundigooyich. ⁸ Míid co ñch jecy'ajty ooy anajty nnijot'atyich pocytuní, paady ycixpi ñch anajty ooy ndundigooyich. E jadu'n anajty nígi ooy n'adzocyich, e jamínam anajty Dios ycötujcín co ca' migüg ni ti m'adzojçipy. Co ixypy Dios ca' jadu'n cötujcín ti pídagy, ni ca' ixypy njihuíñybicyich co ndundigooyich. ⁹ Jayíjp co ca'ni anajty nhuinjihuíyich Dios ycötujcín, huin'ít tiempo ca' anajty njihuíñybicyich nbocy. E co nbatyich Dios ycötujcín, chi njihuínybijcyich nbocy, e nañ ti nejhuíyich co tigoyaamích njugy'ajtín. ¹⁰ Dios ypídac ycötujcín jaydebi nbáadibich jugy'ajtín huídibi ca' ycixipy ytigoyipy. Per ca' jadu'n ti oyíy míid ñch. Yí cötujcín ti xyajpocycáyich anajty, e jadu'n tigoyaambich anajty njugy'ajtín. ¹¹ Jadu'n anajty huinma'ñ nmídidyich co nguydundáhuaamybich Dios ycötujcín huídibi Moisés yjayhuí'm. Pero com ca' njatyich nej nguydundáhuibyich, chi nbocycáyich ma Dios. Je pocytuní ti xyhuin'íñich, e míid je' ycixpi nbadaamybich anajty yí o'cín.

¹² Tüg'óciy Dios yley etz Dios ycötujcín huídibi cojay ijtp, huádz yí', tudägy yí', ooy yí'. ¹³ ¿Nej tigoyaambich anajty njugy'ajtín míid co anajty nmí'ityich Dios oybi cötujcín? Ca' yjadu'níty. ¿Nej je Dios ycötujcín je oybi ti huimbídzím yíbic míid ñch co xyajtigoyaamích anajty njugy'ajtín? Ca' yjadu'níty. Nícxpích anajty ma yí o'cín míid nbocyich ycixpi. Je Dios ycötujcín xyajnejhuíyich co o'cín nbadaamybich míid nbocyich ycixpi. Jadu'n Dios pídac yí o'cín ya naaxhuíñ, jígix jébi jáy ajcxy nejhuíhuípy co míj ajcxy ooy ytundigooy míid Dios.

¹⁴ Nejhuíyím co yí Dios ycötujcín huídibi Moisés xymooyím, jíiby yí' chooñ ma Dios, paady yí' ooy y'oyíty. Hích nnínícx yí' je' huídibi níjot'ajtp yí pocytuní, paady ndzínäyich pocymíid. ¹⁵ Ca' nhuinjihuíyich huídibi ndumyibich. Yí oybi huídibi njatunaamybich, ca' njatyich nej ndunípyich. Yí jíbicpi huídibi ca' y'oychojcníty, yí' ndumyibich. ¹⁶ Co nduñich huídibi ca' ndzocyich, jadu'n níquëxígy co Dios ycötujcín ooy oy yí', tudägy yí'. ¹⁷ Canan jotcujc ñch jadu'n co nbocytuñich. Yí pocy'adzojçín huídibi nmíidích ma njot nhuinma'ñ, yí' yí' xyajtundigooybich. ¹⁸ Nejhuíybich co ca' ti oybi yajpaady ma ñch nnínícx. Ooy njatzocyich co oybi njatuna'ñich, per ca' njatyich nej oybi ndunípyich. ¹⁹ Je oybi huídibi njatunaamybich, ca' njaty nej ndunípyich. Je jíbicpi huídibi ca' ndzocyich, je' ndumyibich. ²⁰ Co yí' nduñich huídibi ca' ndzocyich, yí' je' je pocytuní huídijaty njot'ájtíibich nhuinma'ñ'ájtíibich, yí' xyajtundigooybich.

²¹ Nbaatypích tüg tÿy'ajt, co njatunaamybich oyhuinma'ñ, jíipy jíbicpi nbaadyich ma njot nhuinma'ñich. ²² Jotjoty huinma'ñjoty ooy nmíxondägyich Dios ycötujcín. ²³ E nañ míidích jotjoty huinma'ñjoty yí jíbicpi huídibi mí'íjxtínaayb je oybi. Yí tundígooyí yajpatp ma ñch nnínícx. Yí nnínícxích yajpatp pocymíid.

²⁴ Paady ca' njotcúçigyich. ¿Pín jébi xyñíhua'ñích xyajnídzógíibich ma jadayaab nnínícxích huídibi xyajnícxpích ma yí o'cín? ²⁵ Dioscojuyip nyajnajxypích ma Dios co Dios, míid ajt nHuíndzín Jesucristo, xyñíhuaaním ma

jada jibicpi huidibi ajt nninix xyñi'jot'ajtim. Paady miid n'oyjot n'oyhuinma'ñ nguyduñich Dios ycötujcin. Miid nninixich nijot'atyich pocytonii.

8

Je jugy'ajt miid je Dios yjihui'ñ ymic'ajt ycixpi

¹ Jadachambi tiempo janchtiy Dios ca' tzaachytuna'ñ yi jäy ajcxy huidijaty tú'ciy ijtp miid Cristo Jesús, huidibi ajcxy cuydumb Espíritu Santo chojcin, e ca' ajcxy tungixy nej je ninix nijot'ajtcixy. ² Je Espíritu Santo ti xyyajpidzimim ma yi pocytonii etz ma yi o'cin huidibi yi jecy'ajty cötujcin ti xymooyim. Je Espíritu Santo xyajtzinaayim huinixii, ñich ajt huidibi ijtp tú'ciy miid Jesucristo. ³ Miid co ñich ajt ooy ninix ñijot'aty jibicpi, paady Dios xymooyim ycötujcin jecy'ajty jaybety. Per je naaxhuiñjäy yajtigoy ajcxy je cötujcin ymajaa, e ca' ymadacy nicxy xyajtzinaayim miid tudägy jot huinma'ñ. Paady Dios yquejxy yci'm'ung huidi ti chinäy ya naaxhuiñ miid ñinix jadu'n nej ñich ajt nmüidity nninix, jigix jëbi ndzinaayim miid huadz jot huinma'ñ. Jadu'n Dios y'ung chinay miid ñinix, per ca' ni ti bocy anajty müidity. E yi' ti y'ögy miid ajt nbocy ycixpi, e jadu'n yajtigoy je pocy huidibi ajt nigix'ajtim. ⁴ Jadu'n Dios ytuuñ jigix jëbi xyajtzinaayim miid tudägyjot tudägyhuinma'ñ jadu'n nej yi' ycötujcin y'ane'my. Miid co nmüid'ajtim Dios yjihui'ñ ymic'ajt ma ajt njot nhuinma'ñ, paady jëbi huaad ndzinaayim miid tudägy-jot tudägy-huinma'ñ.

⁵ Yi jäy ajcxy huidibi ca' müidity Dios yjihui'ñ ymic'ajt ma yjot yhuinma'ñ, hue' ajcxy ycapxymidooyb je jibicpi huidibi ajcxy ñinix ñijot'ajtpy. Yi jäy ajcxy huidibi tzinaayb miid Dios yjihui'n ymic'ajt ma yjot yhuinma'ñ, hue' ajcxy ycapxymidooyb je Espíritu Santo. ⁶ Yi jäy ajcxy huidibi capxymidoob je jibicpi huidibi ajcxy ñinix ñijot'ajtpy, hue' ajcxy ypadaangixyp o'cin. Yi jäy ajcxy huidibi capxymidoob je Espíritu Santo, hue' ajcxy ypadaangixyp jugy'ajtin huidibi ca' ycixipy ytigoyipy, etz nañ ypadaangixyp jotcuje'ajtin. ⁷ Yi jäy ajcxy huidibi capxymidoob je jibicpi huidibi ajcxy ñinix ñijot'ajtpy, hue' ajcxy Dios ymidzip'ajtpy, ca' capxymidohuaangixy Dios ycötujcin. Ni ca' jajtcixy nej ajcxy capxymidóogixipy Dios ycötujcin. ⁸ Ca' Dios jäygidägy yi' ajcxy chinaayin huidibi ajcxy capxymidoob je jibicpi huidibi ajcxy ñinix ñijot'ajtpy.

⁹ Per miich ajcxy ca' mgapxymidoogixy je jibicpi huidibi mninix nijot'ajtpy. Com miich ajcxy mmüid Dios yjihui'ñ ymic'ajt ma mjot mhuinma'ñ, e mguydungixpy je Espíritu Santo chojcin. Huenpinity huidibi ca' müidity Cristo yjihui'ñ ymic'ajt ma yjot yhuinma'ñ, ca' yi' y'ity miid Cristo. ¹⁰ Pen miich ajcxy ijtp miid Cristo, yi mjogy'ajtin ajcxy ca' ycixipy ytigoyipy nimina, miid co Cristo ti xyaj'ahuimbijtcixy tudägy ma Dios yhuinduu. Yi mnaaxnicx cixamb tigoyamb yi'. ¹¹ Pen ijtp ma miich ajcxy mjot mhuinma'ñ je' yjihui'ñ ymic'ajt je huidibi yajjugypijc jadüg'oc je Cristo co y'o'cy. Nañ jadu'n miich ajcxy Dios xyajjugypigaangixy jadüg'oc, co anajty ti m'öccixy, miid yi' yjihui'ñ ymic'ajt huidi yajpaatp ma miich ajcxy mjot mhuinma'ñ.

¹² Miid co nmüid'ajtim Dios yjihui'ñ ymic'ajt paady ycixpi, miich ajcxy migügtijc, copicy ngapxymidoohuim je Espíritu Santo, e ca' huaad ngapxymidoohuim je jibicpi huidibi ajt nninix ñijot'ajtpy. ¹³ Pen ooy ajcxy xytimy'ane'ngixy je jibicpi huidibi ajcxy mninix ñijot'ajtpy, co m'öccixipy, yi mjogy'ajtin cixip tigoyip yi'. Per pen miid Dios yjihui'ñ ymic'ajt miich ajcxy myajtigoy je jibicpi huidibi mninix ñijot'ajtpy, co m'öccixipy, yi mjogy'ajtin ajcxy ca' yi' ycixipy ytigoyipy.

¹⁴ Tüg'óciy pinjaty ajcxy capxymidoob je Espíritu Santo, Dios yi' ung'ajtip ajcxy. ¹⁵ Je Espíritu Santo huidibi miich ajcxy xy'adigüygixp xyjottigüygixp, ca' xychaachytungixy e nañ ni ca' mdzinähuaangixy miid tzigi'ñ jihui'ñ. Ca' miich

ajcxy jadu'n paady nej tumbidijc huidibi ooy tzigiygixy yhuindzin. Co je Espiritu Santo yajpaady ma ajcxy mjet mhuinma'n, jadu'n nipaady nejhuüy miich ajcxy Dios xy'ung'adyii. E com nmüd'ajtim Dios yjihui'n ymic'ajt, je' jadu'n xyajminaanim: "¡Dios Teedy!" ¹⁶ Je Espiritu Santo tiy'ajt yejcp ma ajt njot nhuinma'n, je' jadu'n xyajminaanim co Dios xy'ung'ajtim. ¹⁷ Pen ich ajt Dios xy'ung'ajtim, chi nbadaanim it lugar quipxyi müid Cristo jiiy tzajpjoty ma Dios yajpaady. Pen nminajxim nyajnajxim tzaachypi jadu'n nej Cristo minajxy yajnajxy tzaachypi, chi nbadaanim Dios y'oy'ajtin quipxyi müid Cristo.

¹⁸ N'a'ixiiybich co yi tzaachypi yi ayo'n huidibi nminajxim nyajnajxim ya naaxhuiñ, ca' yi' ytim ytiiyty, ca' ninej yquipxyjatyty je oy'ajtin etz mijjotcujc'ajtin huidibi Dios xyaj'ixaanim je huin'it xii co Cristo anajty ymiñ jadüg'oc. ¹⁹ Tüg'óciy tijaty ya naaxhuiñ huidibi Dios ti yajcojy yaj'oyiy, y'aa'ijxpy yjijp'ijxpy ajcxy mina Dios ymöhüaanigixy y'oy'ajtin ymij'ajtin yi jäy ajcxy huidibi ajcxy Dios ung'ajtip. ²⁰ Tüg'óciy tijaty Dios ti yajcojy yaj'oyiy ya naaxhuiñ, hue' je' yjugy'ajtin cixamb tigoyamb, ögam ttdzam. E canan ci'm jadu'n tzocy, hue' je' Dios jadu'n ti yajnigödugiy. Per ca' yjugy'ajtin ycixipy ytigoyipy tu'ciyi hue' ajcxy y'aa'ijxpy yjijp'ijxpy co padaangixy oy'ajtin jadüg'oc. ²¹ Co anajty Dios yaj'oyiy nej jëbi ajcxy chinaaygixy, e ca' y'öccixipy, ca' ytüitzcixipy, etz ca' ypügixipy, chi ajcxy padaangixy oy'ajtin etz jotcujc'ajtin quipxyi müid je jäy ajcxy huidibi Dios ung'ajtip. ²² Com nejhuüyim co ixti chambaad tüg'óciy huidijaty Dios yajcojy yaj'oyiy ya naaxhuiñ yjihuiyb tzaachypi, e ca' yjotcujc'ajtcixy. Tim jadu'n nipaady nej tüg töxyjäy paady tzaachypi co yhuaad'ajtni mina y'ung yajma'xung'ada'n. ²³ Canan yi naaxhuiñybi huidi Dios yaj'oyiy yi'yi tzaachypi jihuiyb, nañ jadu'n ich ajt huidijaty müd'ajtp Dios yjihui'n ymic'ajt, huidibi Dios xymooyim jayijp'aty ca'ni anajty nyajtigajtzim nninïcx. Nañ ich ajt tajim mayim njiiyim nyaaxim ixti cooni anajty Dios xyajtigadzaanim ajt nninïcx etz xycöbigaanim ma yi' y'it jiiy tzajpjoty, e xymüid'idaanim ajt jadu'n nej yci'm'ung. ²⁴ Müid co n'aa'ijxim njijp'ijxim co Dios xyajnidzögaanim ajt n'alma, paady ti nbaatim jugy'ajtin huidibi ca' ycixipy ytigoyipy. Co ixipy ti nbaatim huidibi anajty njijp'ijxim, ca' ixipy njacjijp'ijxim co nbadäänimni. Com ca' pin jacjijp'ijxni co padaanip je huidibi ti ocpatpi. ²⁵ Per co njijp'ijxim co nbadaanim huidibi ca' nmüd'ajtim, huin'it n'ahuijxim müid mecxtujcin cooni nbaatim.

²⁶ Tim jadu'n nej jotcujc'ajtin nbadaanim co njijp'ijxim huidibi Dios xymöhüaanim, nañ tim jadu'n je Espiritu Santo xypubejtim xypudigiiyim co njotmetzciiyim, com ca' njajtim nej jëbi huaad Dios nmibijctzoohuim nej ypadyii. Paady je Espiritu Santo xycodinaayim ma Dios, ymibijctzooyb je Dios mictägy müid ich ajt ycixpi müid jiiyin yaaxin, huidi ca' huaad yajcapxpädzimy müid miydacin. ²⁷ Dios ñejhuüyb ti jot ti huinma'n jäy ajcxy ymüd. E Dios nañ huinjihuüyb tüg'óciy ayuc huidibi je Espiritu Santo yajnajxyp ma yi'. Je Espiritu Santo ypijctzooyb may'ajt jabom jabom ma Dios müid tüg'óciy je mibijcpidijc ycixpi. Nañ jadu'n pijctzoy jadu'n nej Dios tzocy jäygidägy.

Mij madaacin ma mibijcin

²⁸ Yi jäy ajcxy huidibi mijpidacp Dios, huidibi ajcxy Dios ti huin'ixy, jëbi chinaaygixy jadu'n nej Dios jäygidägy ajcxy chinaayin. Nejhuüyim co huentimtiiyty huidibi yi' ajcxy yminajxpy yajnajxpy, pen jibicpi o pen oybi, Dios jadu'n ti a'ixiy co huen minajxcixy yajnajxcixy müid yi' ajcxy y'oy'ajtin ycixpi. ²⁹ Je' yi' ajcxy huidibi Dios ti yhuin'ixy, je' yi' ajcxy huidibi Dios ñejhuüy jayijpni co ymibigañyii y'ayuc. Dios jadu'n tumb ma yi' ajcxy yjot

yhuinma'ñ jaydëbi yquipxyjatytyj ajcxy yjot yhuinma'ñ mïd Dios y'ung, jadu'n nej yï' yjot yhuinma'ñ mïdity. ³⁰ Yi mayjäy huïdibi Dios yajniçöduçy ca'ni anajty naaxhuiñybi chondacy co ytuna'ñ mïd yï', yï' ajcxy Dios huin'ixi. Yi mayjäy huïdibi Dios ti yhuin'ixigixy, nañ Dios yï' ajcxy yaj'ahuimbijtip tudägy. E yi mayjäy huïdibi Dios ti yaj'ahuimbity tudägy, nañ Dios yï' yajquipxyjatytihuaanip ajcxy y'oy'ajtin mïd yï' y'ung y'oy'ajtin.

³¹ ¿Ti jada' njacjijp'ixim ti jada' njactzojçim? Ca' ni ti. Pen Dios ñch ajt xypubejtïm xypudigïyïm, çpin ñch ajt jëbi xymimadaaçim? Janch ni ca pin.

³² Dios ixti yci'm'ung ti yecy mïd ñch ajt ycixpi, co oy y'o'cy mïd ñch ajt ycixpi, co oy y'o'cy ma yi cruudz mïd nidüg'óciy ajt nbocy ycixpi. Paady janch janch co Dios xymöhuaanim tüg'óciy oybi quipxyjaty mïd yï' y'ung, Jesucristo.

³³ ¿Pin jada' jëbi ocxïy je jäy ajcxy huïdibi Dios ti huin'ixy? Ca' ni pin. Com Dios ci'm yï' ti yaj'ahuimbijttäy tudägy. ³⁴ ¿Pin yï' ajcxy jëbi ocyajpocycäy? Ca' ni pin. Com Cristo o'c je' mïd ajt nbocy ycixpi, etz yjugypijcy jadüg'oc, e jadachambi xï tiempo yajpaady a'oy'amy ma Dios ymijc, e yï' ane'mdaayb tüg'óciy. E Cristo ñch ajt xyñibijetzohuïyïm, ypijctzooyb may'ajt ma Dios mïd ñch ajt ycixpi. ³⁵ Com Cristo ooy xychojçim xyjihuyïm, paady ni nej ca' xy'ixmadzaanim. Huen ti ndimpaatim ca' xy'ixmadzaanim. Oy ixypy tzaachypï ayo'n nminajxim nyajnajxim, oy ixypy tajin mayin nbaatim; oy ixypy jäy xy'ixhuïdijtim xypahuïdijtim; oy ixypy yuu ayo'n nbaatim; oy ixypy huit tucxy nyajmayajtim; oy ixypy tzig'iñ nyajnajxim; oy ixypy jäy xytimyyaj'o'cim. Oy ti ayo'n ndimbaatim, Cristo ca' xy'ixmadzaanim. ³⁶ Com jadu'n ymiñ jaybety ma Dios ñecy ma jadu'n yminañ:

Mïd miich, Huindzin Dios ycixpi, je nmïdzipich xyjatytimyyaj'ögaambich xïm tzuum. Jadu'n ñch ajcxy nej cöbixy huïdibi yajniçxip ma yaj'öctac co yaj'öga'ñyï.

³⁷ Ca' ti ayo'n nbadaanim. Nmïmadactähuaanim tüg'óciy ayo'n, mïd co Cristo xychojçim xyjihuyïm. ³⁸⁻³⁹ Janch nejhuyibich tiydudägy co Dios xychojçim xyjihuyïm. Ca' ji ni pin jëbi huaad xypijc-huäcxim ma Dios çójçin, oy ixypy nja'o'cim; oy ixypy njajugy'ajtim; oy ixypy xymïdzip'ajtim ángel ajcxy etz jacjadyï huïdibi mic'ajt mïd jii by tzajpjoty. Ca' ajcxy jëbi huaad xypijc-huäcxim ma Dios, ni ti huïdibi ji ijtp cham, ni je huïdibi mimb cidacp, ni yï' jëbi xycapijc-huäcxim ma Dios çojçin. Ajt nHuindzin Jesucristo ti xyajnejhuyïm jadu'n nej Dios xchojçim xyjihuyïm co y'o'cy ma yi cruudz mïd ajt nbocy ycixpi.

9

Dios ti huin'ixy yi Israel jäy ajcxy

¹⁻² Nmïdich je Cristo ytiy'ajt, nyajnijayïybich miich ajcxy yï' ytiy'ajt, ca' n'indägyich, co ooy ndajy nmayich mïd n'amigügtijcich ycixpi je Israel jäy co ajcxy ca' cöbiga'ñ je Cristo. Nañ Dios yjihui'ñ, je Espíritu Santo, tiy'ajt yejcp ma ñch njot nhuinma'ñ co jadu'n tajin mayin njihuïyich mïd yï' ajcxy ycixpi.

³ Com tajy may nayjihuyiijich mïd ñch n'amigügtijc, ñch nmïgogajp, ixti njaccodinähuaamybich ajcxy ma Dios mïd ypocy ycixpi, ixti jëbi ixypy Cristo nja'ixmachich mïd yï' ajcxy ycixpi, ixti jëbi ixypy Dios xychaachytuñich mïd yï' ajcxy ypocy ycixpi, co ixypy jëbi Dios pocyhunmecxy ajcxy. ⁴ Com hue' je' ajcxy Israel y'ap'ajtip y'oc'ajtip, Israel jäy ajcxy. Hue' anajty ajcxy Dios ti ycöbigyï jadu'n nej jihuyi yci'm'ung, Dios anajty ajcxy ti ñi'ijxcidägyï, y'ijx ajcxy Dios y'oy'ajtin. Dios nimay ajcxy co ycuend'adip. Dios ajcxy jadu'n yajni'ixyï nidüg'óciy tiy'ajt nej ajcxy jëbi huaad Dios huindzigïy, e Dios yajhuinhuanïy Israel jäy ajcxy je Cristo. ⁵ Nañ hue' ajcxy ymij'ap'ajtip

ymijteedy'ajtip #ch ajt nmij'ap nmijteedy; je Abraham, Jacob, etz David, e ma je' ymiñ ajcxy, ji ymiñ je Cristo, e je' je' Dios ajtp, yi' tüg'óciy ane'mdaayb jüby tzajpjoty etz ya naaxhuiñ. Je Cristo capxpaady y'idipy huinixi.

⁶ Co jadu'n mina'ñich co may ajcxy Israel jäy ca' ajcxy Dios yjäy'adyii tÿdudägyi, ca' jadu'n mina'na'ñich co Dios ca' cuyduñ yi' y'ayuc huidibi yajhuinhuan#y Abraham etz Moisés. ⁷ Canan nidüg'óciy Abraham y'ap y'oc pada'ñ je oy'ajt huidibi yajhuinhuan#y Abraham, com jadu'n yjaybetyity ma Dios ñecy. Dios jadu'n nimay Abraham: “Yi mmang, Isaac, ti nhuin'ixyich jëbi y'ap y'oc paady je oy'ajt huidibi ti nyajhuinhuan#y.” ⁸ Co Dios jadu'n nimay Abraham, paady ycixpi nejhu#yim co ca' nidüg'óciy Abraham y'ap y'oc jëbi naydijyii Dios y'ung. Jëyi Isaac y'ap y'oc jëbi ñaydijyii Dios y'ung com Dios yajhuinhuan#y co may'ajt tuna'ñ müd yi' ajcxy. ⁹ Com jadu'n yjaybetyity ma Dios ñecy co Dios nimay Abraham: “Nihuimbidaamybich ma je tiempo huidibi ti n'agapxtucyich, e huin'it mdöxyijc Sara y'ungbaadip.”

¹⁰ Ji jadüg tÿ'ajt. #ch ajt nmij'ap Isaac ytöxyijc Rebeca metz ymang paty. ¹¹ Dios yhuin'ijx je jacmutzpi ca'ni anajty yma'xung'aty, e ca'ni anajty ñiguëxigy ti huinma'ñ ymüd, oyhuinma'ñ o jibic-huinma'ñ. Dios ninigoob anajty jayjpnä ti huin'ixy je jacmutzpi. ¹² Com Dios ñimay je Rebeca co je jacmutzpi y'ane'mamyb y'ajch ma ca'ni anajty Jacob yma'xung'atyñi. ¹³ Tim jadu'n nej jaybety ymiñ ma Dios ñecy, Dios jadu'n minañ: “Jac ñigi ti ndzocyich Jacob, ca'ydi Esaú.”

¹⁴ ¿Nej n'ocmīnaanīm? ¿Dios ca' tÿybi tuñyi? Ca' yjadu'nity. Dios tÿdudägy ytuñ. ¹⁵ Com jadu'n Dios nimay Moisés: “Nba'ayohuipyich ninigoobi pinjaty ndzojcpyich.” ¹⁶ Co Dios jadu'n nimay Moisés paady nejhu#yim co canan paady ycixpi Dios pa'ayohua'ñ jay müd co ajcxy chachñaymija'ljxigixy co tunaangixy oyhuinma'ñ. Hue' je' Dios pa'ayo'n tuñ müd jäy ajcxy ninigoob co jadu'n tzocy. ¹⁷ Com jadu'n jaybety ymiñ ma Dios ñecy co Dios jadu'n nimay je Egipto rey:

#ch miich ti nmöy m'ane'min, jigix jëbi jäy ajcxy ixipy je mij ayo'n huidibi ndunaamybich ma miich mnaax mgajp, huin'it jäy ajcxy capxpaady xyaj'idipy huindu'ñybi ñaaxhuiñ.

¹⁸ Dios ypa'ayooyb je' pinjaty chojcpy, e nañ jadu'n yjot yajjuuni pin jadu'n yajmidojcpy.

¹⁹ Huin'it miich ajcxy xyñimähuibich: “Peni janch yjadu'nity, ¿ti co Dios jadu'n jadüg'oc pocy'ixy jäy? ¿Pin jada' occapxhuimbidip nej yi' tzocyi?”

²⁰ Miich jäy, ¿mbin miich co ti myajcapxycoja'ñ myaj'ayuccoja'ñ müd Dios? ¿Nej jëbi pochytüdzt nimäy je pin anajty ti yajcojyii? “¿Nej co jadu'n ti xyajcojyich?” ²¹ Tüdzyajcojpi yi' yaj'oy#yb je mo'ntz nej tim tzocy. Pen yajcojamyb tüz oybi tzooyatypi, yajcojpy je'. Peni yajcojamyb tüz huidibi ca' oyjatyity, yajcojpy je'.

²²⁻²⁴ Tim jadu'n nej je tüzzyajcojpi yaj'oy#y mo'ntz nej tzocy, nañ jadu'n Dios tuñ müd jäy nej tzocy. Dios ti yajcojy jäy, e müd ymic'ajt jëb tzaachytuñ müd ypocy ycixpi. E co jadu'n tzaachytunipy, chi ñiguëxigipy yi' ymic'ajt. Dios ooy jecy ti jamimecxtucy ajcxy huidibi paatip co Dios chaachytun#yb ajcxy. Com Dios ti yajcojy jäy paady jëb nañ jadu'n pa'ayoohuipy etz may'ajt tunipy müd yi' ajcxy, jëbi ajcxy paadip yi' y'oy'ajtin. Dios #ch ajt ti xyhuin'ijxim nijëjity judíojäy, etz nijëjity huidibi ca' yjudíojäyity, jëbi ajt n'alma nidzoocin paady. ²⁵ Com jadu'n jaybety ymiñ ma Oseas ñecy ma Dios jadu'n yminañ:

Yi jäy ajcxy huidibi #ch ca' anajty njäy'adyii, njäy'adāanibich cham. Yi jäy huidibi ca' anajty ndzocyich, ndzogāanibich cham.

26 E nañ jadu'n jadüg'it Oseas cojay: “E je jäy ajcxy huídibi anajty tzinaayb ma canaag naax cajp huídibi anajty ca' Dios yjäy'adyii, jëb ñaydiyii Dios yjäy, je Dios huídibi huinixii tzinaayb.”

27 Nañ jotmay müd co Isaías jada tñy'ajt ycojay ma ñecy ma jadu'n ymína'ñ: “Oy ixypy ajcxy ti yjamayy jadu'n nej tzaa'ung yajpaady ma mejy ypa', nihueñ ajcxy y'alma ñidzoocin pada'ñ. 28 Com Dios mic ooy cötujcin müdity, e ca' mimecxtugipy jäy ajcxy ypocytunii huinixii. E mic'amy tzaachypí möhua'ñ naaxhuinyjäy müd ypocy ycixpi co anajty xii tiempo paatni mabaad agapxtujcy.” 29 Isaías ñajtzcapxiy jadu'n jecy'ajty:

Pen ca' ixypy je Huindzin Dios huídibi ane'mdaayb jilby tzajpjoty etz ya naaxhuiñ, capubejty yi Israel jäy, co ca' ycajacyajtzooci nijejity ajcxy, ycacödigoyday yi' ajcxy, tim jadu'n nej je jäy ajcxy yajty jim ma Sodomo cajp etz Gomorra cajp, cödigoyday ajcxy.

Yi judíojäy ajcxy etz Jesucristo y'ayuc ytiy'ajt

30 Jadu'n jëbi mhujñihuiygyxy huídibi ti nyajnijayygyxy jadu'n nej Dios ytun müd jäy ajcxy. Yi jäy ajcxy huídibi ca' yjudíojäyity, huídibi ca' cuyduñ Dios ycötujcin je jecyip, co ajcxy mijpidägy je Cristo, chi ajcxy paady tudägy'ajtin ma Dios. 31 Per yi judíojäy ajcxy huídibi jip'ixp co tudägy'ajtin padaangixy müd co tzachcuydungixy Dios ycötujcin je jecyip, ni ca' ajcxy mimadägy cuydundähuipy, e ca' ajcxy tudägy'ajtin paady ma Dios. 32 ¿Na'amy co ca' ajcxy mimadägy cuydundäy Dios cötujcin? Je' co ajcxy ca' mijpidägy huídibi Dios ti tuñ müd yi' ajcxy ycixpi. Hue' ajcxy tijy co tudägy'ajtin padaangixy ma Dios müd co tzachcuydungixy Dios ycötujcin je jecyip. Hue' ajcxy ayo'n ypadamyb co ca' Cristo cöbijccixy, tim jadu'n nej jäy ayo'n paady co ycöney ma tüg tzaa. 33 Com jadu'n jaybety ymiñ ma Dios ñecy, ma Dios jadu'n ymína'ñ:

Nguexaamybich jim Jerusalén tüg jäy. Mayjäy ca' mijpidäga'ñ je jäy, e ayo'n ajcxy ypadamyb ma ich. Tim jadu'n nej ixypy ti nbidägyich tüg tzaa ma jäy ajcxy huaad ycönejpcixy, e chi yciday ajcxy. Tüg'óciy jäy pinjaty mijpidaacp je jäy huídibi nbidägaamybich jim Jerusalén, hue' ajcxy yi' ca' ayo'n pada'ñ ma ich, nbocyhuinmecxaamybich yi' ajcxy.

10

1 Miich ajcxy nmigügtjicich, ooy ndzocyich cixyjot huinjot co yi Israel jäy nidüg'óciy pada'ñ y'alma ñidzoocin. Ooy ich ñigi Dios nmibijctzoy müd yi' ajcxy ycixpi. 2 Jëbi ndiy'ajt yecyich co yi Israel jäy ooy ajcxy Dios jayajmij'ajtcixy. Hue' janchtiy ca' ajcxy huinjihuiyi Dios ytiy'ajt. 3 Com nejhuiyb ajcxy co Dios yajpocyñihuädzamyb jäy ajcxy, hue' ajcxy ca' huinjihuiy nej Dios yhuinma'ñ müdity. Ci'm anajty chachhuinma'ñ ixtaaygixy nej ajcxy jëbi ñayajpocyñihuädzigixipy. Ca' anajty ajcxy cöbicy Dios ytiy'ajt nej jëbi huaad ñayajpocyñihuädziyb.

4-5 Yi judíojäy ajcxy ca' huinjihuiygyxy co je Cristo y'oy ya naaxhuiñ, e chi yajtigooyi Dios ycötujcin ymic'ajt huídibi Moisés yjay, jigix jëbi tüg'óciy jäy pinjaty mijpidaacp Cristo ytiy'ajt, huin'it ajcxy paadip tudägy'ajtin. Moisés yjayhuim ma jadu'n ymína'ñ: “Je pinjaty cuydumb je Dios ytiy'ajt, jim mic'ajt paadipy müd chinaayin ycixpi.” 6-7 Per yi jäy ajcxy huídibi mijpidaacp Cristo etz cuyduni yi' ytiy'ajt, yi' ajcxy ymína'ñ: “Ca' huaad judíojäy ajcxy ymínaangixy jotjoty huinma'ñyjoty: ¿Pin ocpättigihuij tzajpjoty nicx je Cristo yajtzoñ? o ¿Pin nicxamb ca'oydactuuby ma ajcxy öcpidijc y'ity e yajjugypigaanip je Cristo?” 8 ¿Nej Dios y'ayuc ymína'ñ? Jadu'n Dios y'ayuc ymína'ñ: “Ti mmidoy miich ajcxy Dios y'ayuc ytiy'ajt ma mgi'm'ayuc, ti jäy ajcxy

capxhuäcxy ma miich, ti mmido'mbijccixy." Pues jada je' je y'ayuc tiy'ajt nej jëb mijpidaaccixy Cristo, huidibi tiy'ajt ñch ajcxy ngapxhuäcxp. ⁹ Pen miich mgapxypidzimyb mayjäy agujc co miich ajcxy Jesús mHuindzin'adyii, etz mmibijcxy ajcxy ma mjot mhuinma'ñ co Dios ti yajjugypijcxy Jesús co y'o'cy, huin'it m'alma paadip ñidzoocin ma Dios. ¹⁰ Co mmijpidägipy Jesús cixyot huinjot huin'it Dios xyajpocyñihuädzipy. Co mgapxypidzimipy mayjäy agujc co miich mijpidägy Cristo Jesús, huin'it yi' m'alma ñidzoocin pada'ñ.

¹¹ Com jaybety jadu'n miiñ ma Dios ñecy, ma jadu'n yminañ: "Nidüg'ociy jäy huidijaty mijpidacp je Cristo, ca' ajcxy ayo'n pada'ñ ma Dios." ¹² Jëbi nidüg'ociy jäy mijpidägy je Cristo Jesús com Dios tú'ciy yajhuinhuanñy pocyñihuaatzin ma yi' judíojäy etz ma huidi ca' yjudíojäyity. Ji tüg Huindzin je Jesucristo huidibi niHuindzin'ajttaayb. Jesucristo may'ajt oy'ajt tunam mijcajee müd huentimpinjäyity pinjaty pijczoob pubejtin ma Dios müd yi' yxi.

¹³ Com jadu'n jaybety ymiiñ ma Dios ñecy, ma jadu'n yminañ: "Nidüg'ociy jäy pinjaty Dios mibijctzoob müd Huindzin Jesucristo yxi, yi' ajcxy y'alma paadip ñidzoocin." ¹⁴ ¿Nej jëbi jäy ajcxy occohuanñy Jesucristo co huen y'alma ñidzögy, pen ca' anajty ti mibijci je ytiy'ajt? Pues ca' yjadu'nity. ¿Nej jëbi jäy mibicy Jesucristo peni ca'ni ajcxy amido'ijti y'ayuc? Pues ca' yjadu'nity. ¿Nej jëbi jäy ajcxy midoogixy Jesucristo y'ayuc, pen ca' pin capxhuäcxy ma yi' ajcxy? ¹⁵ ¿Nej jëbi jäy ajcxy capxhuäcxy Jesucristo y'ayuc ytiy'ajt, pen ca' pin yquexyii ayuccapxhuäcxi? Com jaybety jadu'n ymiiñ ma Dios ñecy, ma jadu'n yminañ: "Ooy oy jäy ñayjihüyii co pinjaty mimimb mija'tp oybi tiy'ajt, pinjaty capxhuäcxp oybi tiy'ajt ma yi' ajcxy."

¹⁶ Per ca' nidüg'ociy jäy mibicy je oybi tiy'ajt, com Isaías jadu'n cojay ma ñecy ma jadu'n yminañ: "Huindzin Dios, ¿pin ti mijpidägy ñch ajcxy n'ayuc?"

¹⁷ Cooni jäy ajcxy capxhuäcxy Jesucristo ytiy'ajt ma jäy chinaaygixy, huin'it ajcxy ymibijccixy com ti amido'ijtcixy je tiy'ajt.

¹⁸ Per n'amidooybich miich ajcxy: ¿Nej ca' jada' yi' judíojäy ajcxy midoy Dios ytiy'ajt? Janch jadu'n ti ajcxy jamidoy, com jaybety jadu'n ymiñ ma Dios ñecy ma jadu'n yminañ:

Ti capxhuäcxy ajcxy Dios y'ayuc ytiy'ajt huindu'mybi naaxhuiñ. Ti ajcxy Dios y'ayuc midodaayi huindu'mybi naaxhuiñ.

¹⁹ Jadüg'oc n'amidoogixy: ¿Nej ca' Israel jäy jada' ajcxy nejhuñy Dios ytiy'ajt? Ñejhuñyb ajcxy. Com jecy'ajty Moisés ycojay ma ñecy ma Dios jadu'n yminañ: Nyajpocyñihuaatztähuibyich yi' jäy ajcxy huidibi ca' ñch njäy'adyii, e huin'it miich ajcxy cohuindoyi mjihuñhuipy müd yi' ajcxy yciixpi. Ndunipyich may'ajt müd yi' ajcxy, e huin'it miich yi' ajcxy mmijotmäcip.

²⁰ Jadu'n jadüg'it Isaías cojay ma yi' ñecy, ma Dios jadu'n yminañ: Yi' jäy ajcxy huidibi ca' xy'ixtäyich, ti xypaadyich ajcxy. Ti nyajniguëxigych ndiy'ajt ma yi' jäy huidibi ca' xyñidiy xyajtñyich.

²¹ Com jadu'n jaybety ymiñ ma Dios ñecy, ma Dios jadu'n nigapxy yi' Israel jäy co jadu'n yminañ:

Jabom jabom ti njamimecxtucyich yi' Israel jäy ajcxy. Ti njayajnimäyich ñch ndiy'ajt, e ca' ajcxy mijpidägy. Hue' ajcxy ca' xycapxymidooyich, xymijotmij'öcpich ajcxy.

11

Yi' Israel jäy ajcxy huidibi ti ypcynñhuaatzcixy

¹ Paady n'amidoogixy: ¿Nej ti jada' Dios ix'ijxni ixtijni yi' Israel jäy ajcxy? Pues ca' yjadu'nity, Dios ca' yi' ixmachñi Israel jäy ajcxy. Com nañ Israel jäy ñch. Abraham nmij'ap'ajtibich nmijteedy'ajtibich e nañ jim ngogájpidyich

ma anajty Benjamín ycogajpity. ²⁻³ Dios ca' ixmach yí yjáy huídibi yhuin'ijx jecy'ajty co jáy'ada'ñyí jígix jébi may'ajt oy'ajt tunipy m̄id yí ajcxy. ¿Nej ca' ajcxy mnejhuíy nej jaybety ymiiñ ma Dios ñecy jadu'n nej Elías nigapxy yí Israel jáy ma Dios? Jadu'n ym̄inañ:

Huindzín Dios, ti yí Israel jáy ajcxy yaj'öctäy huídibi anajty miich m'ayuc xycapxhuäcxip. Ti ajcxy yajhuindigoydäy je tzaa macxy ma anajty jáy xyhuindzigíy. Naydügpajc ñch ti njachui'myich njaccapxhuäcxyich miich m'ayuc, e nañ xyaj'ögaamich jáy ajcxy.

⁴ E chi Dios y'adzooy nimay Elías:

Ca' mim naydügity, ji ñch ahuing nm̄ididyich yujcpicy jahuixtujc mil yëdyjc huídí xy'ojadajtpich xyhuindzigíyibich chambaad, huídibi ca'ni huin-goxtinäy yí Baal, yí dios falso, ca'pi ti mic'ajt m̄idity ni ti tzöc'ajt ca m̄idity.

⁵ Tim jadu'n nej Dios m̄idity anajty huixtujc mil yëdyjctijc jecy'ajty co anajty Elías yjugy'aty, nañ tim jadu'n cham ma ñch ajt nx̄i ndiempo Dios ym̄id nijëjity judíojäy huídibi ti pa'ayoy, e paady ycixpi ti yhuin'ixyí jébi yí jáy'adyíi.

⁶ Com co ixypy ajcxy yajxon cuyduni Dios ycötujcin, ca'p ni ti pa'ayo'n Dios jactunaaní m̄id yí ajcxy, com co ti anajty jim Dios y'ayuc ycuylundäyíi.

⁷ ¿Ti ti ytunyí ti yjadyí m̄id yí Israel jáy ajcxy? May ajcxy ca' may'ajtin oy'ajtin paady ma Dios jadu'n nej ajcxy jipp'ijxcixy. Jëyi ajcxy huídí Dios huin'ijxi ti ajcxy paatcixy oy'ajt ma Dios. Yí jacjadyíi Israel jáy ajcxy Dios nig ooy yajjotm̄ij'öccixy. ⁸ Com jadu'n jaybety ymiiñ ma Dios ñecy jadu'n nej Dios yajjotm̄ij'ögy yí Israel jáy, ma jadu'n ym̄inañ:

Tim jadu'n ajcxy nipaady nej jáy ajcxy huídibi ti ym̄i'öctigooyñi, jadu'n nipaady nej jáy huídibi huiintzip, jadu'n nipaady nej huídibi cönatip.

⁹ David nañ jadu'n ycojay jecy'ajty ma ñecy, ma jadu'n ym̄inañ:

Huindzín Dios, cham je jáy tzachnixondägy yí tzinaayin yí jugy'ajtin, ca' ajcxy xyjäymech. Tim̄itiini ajcxy ayo'n möhuipy; tim jadu'n nej iyujc ayo'n paady co yajtüxuuch o co yjut cögäy.

¹⁰ Yajma'ti ajcxy yjot yhuinma'ñ, huen ahuibijtcixy jadu'n nej jáy huintzpi. Mö ajcxy tzaachypi huinixi huin̄itiempo, tim jadu'n nej jáy ajcxy tzaachypi jihuíy huídibi jemxypi tzim̄iccixp.

Yí ypocyhuinmeecxin huídibi ajcxy ca'p yjudíojäyity

¹¹ Co jadu'n yí maybi Israel jáy ca' cöbijccixy Dios ytiy'ajt, ¿nej mdijy, ti Dios y'ixmachyíi ajcxy tücci'yí, e yajtigoya'ñ ajcxy? Pues ca' yjadu'nity, ca' Dios ixmach yí Israel jáy ajcxy tücci'yí. Co yí Israel jáy ca' cöbijccixy Dios ytiy'ajt nej Cristo y'o'cy m̄id yí ajcxy ypocy ycixpi, paady cöbicy yí huídibi ca' yjudíojäyity, jébi ajcxy y'alma n̄idzoocin paady. Jadu'n Dios ytuñ jígix jébi yí judíojäy ajcxy cohuindoyi jihuíhuipy, e chi nañ jadu'n mijpidägipy ajcxy Jesucristo. ¹² Pen yí mayjäy ajcxy huídijaty ca' y'israeljäyity m̄ij'oy'ajtin mijjotcujc'ajtin ti paady, m̄id co yí jacmaybi Israel jáy ca' cöbijccixy Jesucristo, chi nigí oy'ajtin jotcujc'ajtin pada'ñ yí naaxhuiñyjäy ajcxy co anajty nidüg'óciy Israel jáy yjothuibijttaaygixy etz cöbijctaaygixy je Cristo.

¹³ Cham nijayyigixy miich ajcxy huídí ca' yjudíojäyity, com Dios ti xyquexyich ngapxhuäcxich yí y'ayuc ma yí jáy ajcxy huídibi ca' yjudíojäyity. Ooy nyajcopicyich jada ndungich, jígix jébi judíojäy oy'ajtin paady nañ jadu'n. ¹⁴ Ca' jecyity co ñch n'amigügtijc, yí judíojäy ajcxy, cohuindoyi ajcxy jihuíhuipy, co anajty mayjäy huídí ca' yjudíojäyity mijpidägy ñch n'ayuc. Co jadu'n ajcxy cohuindoyi jihuíhuipy, chi ajcxy nañ jadu'ñ mijpidägipy Jesucristo. ¹⁵ Com pen je naaxhuiñyjäy huídibi ca' yjudíojäyity, huídibi Dios

jecy'ajty ca' jäygidaci ajcxy chinaayin, pen ti ajcxy cöbicy Dios ytiy'ajt, pen ti ajcxy oy'ajtin paady ma Dios, miid co Dios ti ixmach yi Israel jäy huidibi ca' cöbicy yi' ytiy'ajt, chi yi Israel jäy co ajcxy jadüg'oc yjothuimbidity etz cöbigipy Dios ytiy'ajt, nañ jadu'n ooy yjotcugihuipy ajcxy, jadu'n nejjihuüy ti ajcxy y'ögy etz nej jihuiy ajcxy ti yjugypicy jadüg'oc. ¹⁶ Com co Abraham, Isaac etz Israel Dios anajty jäy'ajtip, paady nañ jadu'n tüg'öciy Israel jäy Dios jäy'adyii, miid co Israel y'ap'ajtip y'oc'ajtip ajcxy. Tim jadu'n nejjihuüy judíojäy ajcxy tzajcaagy puuducy möy Dios, nañ jadu'n je ytujtuc huidibi jac-hui'm nañ Dios je' yje', e nañ tim jadu'n nej co jäy ajcxy möy Dios quipy ytictz, tüg'öciyi je' Dios je'ajtäyii quipy y'aacxy.

¹⁷ Hue' je' nijëjity Israel jäy ca' mijpidägy Dios ytiy'ajt, paady ñajtz'ixiyyi, e may'ajt oy'ajt tuñ miid huingbi jäy huidi ca' israeljäyity. Tim jadu'n nej jihuiy tüg oyguipy huidi tim'ajtp yajpubuxy y'aacx, e je ma ti yajjijppujxtüty, je' yjijp yajpidägy ma huingbi quipy y'aacx. Miich ajcxy huidi ca' yjudíojäyity huidibi ti mibicy je Cristo, ti mbaady Dios y'oy'ajt tim jadu'n nej judíojäy ajcxy jecy'ajty miidity Dios y'oy'ajt. ¹⁸ Ca' huaad amij agix mnayjihuiygyxy, e ni ca' huaad m'ixtiycxy yi judíojäy huidibi ca' mijpidaaccxy je Cristo. Miich ajcxy yi m'oy'ajt ti mbaady ma Dios, tim jadu'n nej je quipy y'aacx mic'ajt paady ma yi quipy ytictz.

¹⁹ Ca' yjecyity co miich ajcxy mina'naangxy co Dios najtz'ixiyy yi judíojäy huidibi ca' mibicy Cristo, jaydëbi miich ajcxy mnaydiyii co Dios xyjäy'adyii. ²⁰ Tiy'ajt jadu'n nej miich mina'ñ. Dios ñajtz'ixiyy yi maybi judíojäy miid co ajcxy ca' mibicy Jesucristo. E Dios miich ti xycöbicy miid co ti mmibicy Jesucristo. Per ca' huaad miich amij agix mnayjihuiyii miid co Dios ti xycöbicy. Naygüend'adii yajxon ma Dios ytiy'ajt, tzi'gi' Dios. ²¹ Com Dios ñajtz'ixiyy yi judíojäy ajcxy miid co ca' ymijpidägyii yi' ytiy'ajt. Nañ jadu'n miich ajcxy yi' xyñajtz'ixihua'ñ, pen ca' mmijpidaaccxy yajxon yi' ytiy'ajt. ²² Cuentipic jadu'n nej Dios may'ajt oy'ajt tuñ miid nijëjity jäy, etz mic tzaachytuñ nijëjity jäy. Dios mic tzaachytuñ je judíojäy huidibi ca' ycapxymidooy, etz may'ajt oy'ajt tuñ miid miich ajcxy huidi capxymidoob. Jaccuydun yajxon Dios ytiy'ajt, e nigü Dios may'ajt oy'ajt xytuunipy, pen ca' mguyduni yi' ytiy'ajt, huin'it Dios xyñajtz'ixihuipy. ²³ E nañ jadu'n yi judíojäy ajcxy huidi ca' mibijccxy Jesús, co ajcxy yhuinma'ñ yajtigadzipy, e mijpidägyipy Jesús, huin'it Dios ycöbigiyyb jadüg'oc, etz Dios miid ymic'ajt jëbi may'ajt oy'ajt tunipy miid yi' ajcxy. ²⁴ Com pen miich ajcxy huidi ca' yjudíojäyity huidibi jecy'ajty anajty ca' Dios jäy'adyii, pen miich ajcxy Dios mic'amy ti xycöbicy, nañ jadu'n jactzojc cöbiga'ñ huidibi ajcxy judíojäyip, pen ycöbijcy ajcxy.

Jadu'n nej Dios yajnidzoocogixihua'ñ Israel jäy ajcxy

²⁵ Miich ajcxy nmigügtijcich, nyajnijayiyb ajcxy jadu'n nej Dios tuna'ñ miid yi Israel jäy, jaydëbi ca' miich ajcxy amij agix mnayjihuihuuyb, etz jaydëbi mnejhuihuipy jada tiy'ajt huidibi ca' pin nejhuüy, co yi Israel jäy ajcxy ooy ajcxy y'aamijity yjotmijity, ca' ajcxy capxymidooy Dios. E jadu'n ajcxy y'ida'ñ mabaad anajty yca'pxy je mayjäy, ca'pi y'israeljäyity je huidibi mijpidägam Jesucristo ytiy'ajt. ²⁶ Nejhuuyim co Dios may'ajt oy'ajt tunamb jadüg'oc miid tüg'öciy Israel jäy ajcxy, com jadu'n jaybety ymiñ ma Dios ñecy ma Dios jadu'n ymina'ñ:

Jacjiini tüg Israel jäy ymina'ñ huidibi yajnidzögamb ajcxy ma yi' ypocy. Yi' yajtigoyaani Israel jäy ypocy.

²⁷ Jadüg'it jaybety ymiñ ma Dios jadu'n ymina'ñ: Jadu'n nyajhuinhuanuyich yi Israel jäy co yi' ajcxy ypocy nyajtigooybich.

²⁸ Co yí Israel jáy ca' mijpidaaccixy Jesucristo ytiy'ajt, chi Dios ajcxy ñajtz'ixiyyi. E co ñajtz'ixiyyi ajcxy, paady ycixpi miich ajcxy Dios ti yxcöbicy, co ti mmijpidaaccixy Jesucristo. Per chambaad Dios jactzojctay yí Israel jáy miiid co Dios huin'ijxy yí Abraham, Isaac etz Jacob jecy'ajty jëbi yí yjäy'adyii. ²⁹ Dios ti huin'ixy yí Israel jáy ajcxy jëbi yí yjäy'adyii, etz tüg'óciy huidi yajhuinhuaniiy co möhua'ñ, co may'ajt tuna'ñ miiid yí ajcxy ycixpi. Ymöhuiipy yí, ytunipy yí. Dios ca' y'ayuc yajxigy. ³⁰ Miich ajcxy huidi ca' yjudíojäyity jecy'ajty ca' anajty mmijpidaaccixy Dios. Jadachambi xii tiempo Dios miich ajcxy ti xypa'ayoy, miiid co yí Israel jáy ca' mijpidägy Cristo ytiy'ajt. ³¹ Yí judíojäy jadachambi xii tiempo ca' mijpidaaccixy Dios ytiy'ajt, tim jadu'n nej jecy'ajty miich ajcxy ca' anajty mmijpidaaccixy Dios ytiy'ajt. Jacjiini Dios pa'ayoohuin tuna'ñ jadüg'oc miiid yí judíojäy ajcxy tim jadu'n nej ytuñ miiid miich ajcxy jadachambi xii tiempo. ³² Com Dios anajty ti yajpocycädäy tüg'óciy jáy co ajcxy ycapxycömidodacy, yí judíojäy etz nañ huidi ca' yjudíojäyity, paady ycixpi Dios pa'ayo'n tuñ miiid nidüg'óciy jáy, judíojäy etz nañ huidi ca' yjudíojäyity, tüg'óciy pin mijpidacp yí ytiy'ajt.

³³ ¡Ooy ycodzigijity Dios! Dios ooy mijcajee may'ajt oy'ajt tuñ miiid jáy ajcxy ycixpi. Dios ooy mijcajee mijhuinma'ñ ti tuñ miiid jáy ajcxy ycixpi. Dios ooy mijcajee ycohuinma'ñity. Ca' ni pin jëbi huinjihuiydäy je ayuc huinma'ñ huidi Dios ymiiid. Etz nañ ca' ni pin jëbi huinjihuiydäy huidibi Dios ytumy. ³⁴ Com jaybety jadu'n miiñ ma Dios ñecy ma jadu'n ymiiina'ñ: Ca' ni pin jëbi huinjihuiydäy nej Dios yhuinma'ñ miiidity. Ca' ji ni pinjäy huidi ti capxhuijy Dios.

³⁵ Ca' ji ni pinjäy huidi tijaty ti ocmooybi Dios. Dios ca' ni ti nuucxy miiidity miiid ni pinjäy.

³⁶ Tüg'óciy huidijaty ñich ajt ya nbaatim, ac jiiby choondäy ma Dios. Yí tüg'óciy ti yaj'oyiydäy, e yí je'ajttaayip tüg'óciy. ¡Tzoc Dios capxpaatim ojadajtim huinixii huinitempo! Jadu'n jadu'n. Amén.

12

Je jugy'ajtin cixyjot ma Dios

¹ E jadu'n nmigügtijcich, cham ñich miich ajcxy nimaaygixy mictägy, com co Dios ti xypa'ayoogixy, paady ycixpi nay'ayéjicigix naygiyéjicigix amuumdügjot ma Dios. Cuychinayí yí ytiy'ajt yajxon jabom jabom. Tzinaaygix miiid huadz mjot mhuinma'ñ, jadu'n nej Dios jëbi jäygidägy yí mdzinaayin. Jada je tiy'ajt nej jëbi Dios m'ojadajtcixy tiydudägy. ² Ca' ajcxy mguydungixy mguychinaaygixy yí naaxhuiñyjäy ajcxy yjibicjot yjibic-huinma'ñ huidibi tzinaaygixp jadachambi xii jadachambi tiempo. Com Dios ti xymooygixy jemybi mjot jemybi mhuinma'ñ, paady mguydunipy ajcxy yí ytiy'ajt. Ixpijccix Dios ytiy'ajt, jigix ajcxy mnejhuñhuiipy huidibi tiy'ajt Dios chojcyp mguydunipy, etz jigix mhuinjihuiipy je oyhuinma'ñ, je tudägyipi huinma'ñ huidibi Dios yjäygidacpy, je huinma'ñ huidi huadzip ca'pxyip.

³ Com Dios may'ajt oy'ajt ti tuñ miiid ñich etz ti xymöyich jada tung co ngapxhuäcxich yí y'ayuc, paady ñich miich ajcxy nimäy nidüg'óciy co ca' huaad amij agix mnayjihuiiyigixy, ca' huaad nigi anaxy mnaygömáayigixy ci'm. Nidüg nidüg ci'm huinmaaygixy yajxon huidi tung jëbi myajnicxcixy, jadu'n nej Dios huijy'ajt cujc'ajt ti xymooygixy. ⁴ Jadu'n nej ñich ajt nninixc ymiiid yhuin y'ahuac etz yci' ytecy, je ninixc abicy ytung miiidity, je huin abicy ytung miiidity, je y'ahuac abicy ytung miiidity, etz je ci' tecy abicy ytung miiidity.

⁵ Nañ tim jadu'n ñich ajt huidi mijpidacp Cristo, e ni may ñich ajt, e tügpicy jáy

ñich ajt com tú'ciy nmibijcim. E nije' nije' Dios huijy'ajt cujc'ajt ti xymooyim abicyjaty, nej jëbi nije' nije' Dios ytung nyajnicxim.

⁶ Com abicyjaty Dios ti xymooyim huijy'ajt cujc'ajt, paady copicy nyajtuunim nije' nije' je huijy'ajt cujc'ajt huidi Dios ti xymooyim. Pen Dios ti xymooyim huijy'ajt cujc'ajt jëbi ngapxhuäcxim yi' y'ayuc, copicy ngapxhuäcxim mibaad ixpijcin nmüd'ajtim. ⁷ Pen Dios huijy'ajt cujc'ajt ti xymooyim co jëbi nbubejtim nmigügtijc, copicy nmigügtijc nbubejtim. Pen Dios huijy'ajt cujc'ajt ti xymooyim jëbi nyaj'ixpijcin nmigügtijc, copicy ndung'ajtim yaj'ixpigii. ⁸ Pen Dios huijy'ajt cujc'ajt ti xymooyim co jëbi ngapxhuijim nmigügtijc, co jëbi njot'amijmooyim nmigügtijc, copicy ngapxhuijim nmigügtijc, etz njot'amijmooyim nmigügtijc agujc jotcujc. Pen nyejcin tijaty ma nmigügtijc, copicy agujc jotcujc nyejcin. Je huidi ajcxy nigohuajc'ajtp mibijcpidijc copicy yajxon y'ané'mgixipy. Pen Dios huijy'ajt cujc'ajt ti xymooyim co jëbi nbubejtim jäy ajcxy huidibi ayo'n müd jotmay müd, copicy agujc jotcujc nbubejtim pinjaty ayo'n müd jotmay müd.

Nej mibijcpidijc huaad jugy'ajtcixy chinaygixy

⁹ Naychójcigixy nayjihuiyigixy miñ xyipy amuumdügjot, ca' y'ametz yjotmetzity. Ca' mnijot'ajtcixy jibic jot jibic-huinma'ñ. Nijot'ajtcix nigi oyjot oyhuinma'ñ. ¹⁰ Naychójcigix nayjihuiyigix amuumdügjot, jadu'n nej ypadyii mnaymigüg'ajtigixipy ma Jesucristo. Nayyajmij'ajtigix nigi nidüg nidüg miich ajcxy.

¹¹ Naymic'ijxigix cixyjot huinijot, ca' mnuux'ajtcix. Tungix amuumdügjot müd mHuindzin Jesucristo ycixpi.

¹² Tzinaaygix agujc jotcujc, com mnejhuuyb ajcxy co mbada'ñ oy'ajtin ma Dios. Mecxtujccix yi' tzaachypí ayo'n huidibi mmínajxyp myajnajxyp. Mibijctzoogix Dios jabom jabom.

¹³ Naybubéjtigix miñ xyipy, pen yajmayajtpy migüg tijaty. Nayyajättácigix miñ xyipy oy yajxon.

¹⁴ Nibijctzohui' ma Dios huidibi ajcxy xy'ixhuidijtp xypahuidijtp. Nibijctzohui' mmidzip huen Dios may'ajt oy'ajt tuñ müd yi' ycixpi. E ca' mnibijctzohuiy co huen ayo'n paadipy.

¹⁵ Tzoc jotcujc nayjihuiyim co ajt nmigügtijc jotcujc ñayjihuiyi. Tzoc müdtajim müdmayim nmigügtijc pen tajp mayb.

¹⁶ Ooy yajxon nayyaj'igtigix naygodigiiyigix. Ca' amij agix mnayjihuiyigixy. Migüg'adiyb yi' mmigüg huidi ayoob. Yung naxy müd'at mjot mhuinma'ñ, ca' mnaygömayigixy.

¹⁷ Co jäy xymidundigóoygixipy, ca' huaad jibic myaj'ahuimbijtcixy. Hue' janchtiy oybi ajcxy mdunipy jadu'n nej jäy jëbi jäygidägy. ¹⁸ Oy nayyaj'igtigix müd nidüg'óciy jäy mabaad mmadägy. ¹⁹ Miich ajcxy migügtijc, co jäy jibic xymidundigóoygixipy, ca' nañ jadu'n ajcxy myaj'ahuimbidipy, mimecxtugipy ajcxy, com Dios yi' tzaachytunip yi' jäy ajcxy huidi anajty xymidundigóoygixp. Com jaybety jadu'n ymiñ ma Dios ñecy jadu'n yminañ: "ñich nyaj'ahuimbidipyich nej anajty jäy xymidundigóoygixy." ²⁰ Co jäy xymidundigóoygixipy myaj'ahuimbidipy ajcxy oybi, com jaybety jadu'n ymiñ ma Dios ñecy, ma jadu'n yminañ:

Pen yi' mmidzip yubo'cip, myajcayipy myaj'ügipy, pen yi' mmidzip tidziyip, myajni'ügipy. Co jadu'n mdunipy müd mmidzip huin'it tzöydu'n jihuihuipy.

21 Pen myaj'ahuimbijtpy jibic co jäy xymidundigoy, ti anajty jibic-huinma'ñ xymimadägy. Hue' janchtiy yajtun mecxtujcin etz oyhuinma'ñ, e jadu'n jibicpi mimadägipy müd oybi.

13

1 Copicy co nidüg'óciy jäy capxymidóogixipy yi cajp tungmüdpi etz yi gobierno tungmüdpi. Ca' ji ni tüg tungmüdpi huidibi jëbi y'ane'my pen Dios ca' a'ixiy. Com Dios jadu'n cötujcin ti yajhui'my co huen jii'aty tungmüdpidijc, paady ycixpi tungmüdpidijc nidüg'óciy jim mic'ajt paady ma Dios. 2 Paady jäy ajcxy pinjaty ca' ycapxymidoy ma tungmüdpidijc, hue' tundigooyb ma Dios e tzaachypi ajcxy ypadaamyb. 3 Yi mijtungmüdpi ca' yi' ajcxy adzigiy yi jäy huidijaty oyhuinma'ñ müd. Hue' janchtiy yi' ajcxy chaachytunipy yi jäy huidi jibic-huinma'ñ müd. Pen mdzojcp co ca' tzaachypi mbaadipy ma yi tungmüdpi, hue' janchtiy oybi mdunipy, e huin'it m'idipy jotcuyc. 4 Com Dios ti pidägy jada tungmüdpi müd miich ajcxy ycixpi, jigix jëbi jotcuyc ajcxy mdzinaaygixy. Pen mdundigooyb huin'it je tungmüdpi mdzighuipy, com yi' ymüid mic'ajt jëbi tzaachytuñ jäy ajcxy huidibi tundigooyb. Com Dios ytung ytuunipy etz ycuymunipy Dios ycötujcin jadu'n nej Dios xyñajtz'ane'miym, copicy co tzaachytuñ je jäy ajcxy huidibi tundigooyb. 5 Paady ycixp copicy mgapxymidohuipy tungmüdpidijc, jigix ca' miich ajcxy Dios xychaachytunipy e nañ jotcuyc mnayjihuihuib co ca' anajty ti ti mdundigoy. 6 Yi tungmüdpidijc Dios ycixpi ajcxy ytuñ, e ymüid ajcxy ycötujcin, paady ycixpi copicy mmigüedipy ajcxy.

7 Mgüedipy ma yi tungmüdpidijc huidibi xypaatp. Co ajcxy cajp meeñ yajmucy, migüedipy. Co je gobierno tungmüdpi pidägy impuestos, migüedipy. Jäy ajcxy huidijaty tungmüid myajmij'adipy, etz huidi mijtungmüid mgömayipy. 8 Ca' pin minuucxy'adib. Tzoc jihu' mmigügtijc, e mgüedipy oy'amy huidibi mnuucxyp. Co yi mmigügtijc mdzogipy mjihuipy ti anajty mguydundäy Dios ycötujcin. 9 Jadu'n Dios ycötujcin jaybety ymiiñ, ma jadu'n ymüina'ñ: "Ca' mmigapxtigoyipy huingbi töxyjäy. Ca' mmigüg mmeedzipy. Ca' mjäy'ogipy. Ca' mmigüg m'adzojcpy ti ymüid." Pen mdzojcpy mjihuib migüg nej miich ci'm mnaychogyii ti anajty mguydundaayi Dios y'ane'min ycötujcin. 10 Je naychojcin je nayjihuiyin ca'p je' ti jibicpi ti tzaachypi tuñ ma je migüg, co jadu'n jada mguydundaahuipy ti anajty Dios ycötujcin mguydundaayi.

11 Com miich ajcxy mnejhuib co huingon je xii je tiempo mina Jesucristo mina'ñ jadüg'oc ya naaxhuiñ, paady ycixpi jipp'ijxcix ajt nHuindzin Jesucristo co tzojc ymünipy. E jadachambi ti yjac-huingoni mina miina'ñ iich ajt nHuindzin Jesucristo, ca'ydi co oga'n nmibijcim. 12 Canaag jimijt jäy ajcxy ahuijxy jipp'ijxpy co Dios yajnödöga'ñyii ajcxy y'alma, jadachambi ti yhuingoni je xii je tiempo mina n'alma ajt nüdzoocin padaanim. Paady ycixp tzoc ixmajtzim yi jibic-huinma'ñ yi huidibi jäy ycuymunyb huidibi ca' Dios ytiy'ajt nejhuib. Tzoc cuychünaayim cuyjy'ajtim Dios ytiy'ajt. 13 Tzoc tzinaayim juy'ajtim tudägy. Tzoc cuyduunim Dios ytiy'ajt. Ca' huaad jadu'n ndzinaayim amügyjäy. Ca' huaad n'agootzhuidijtim xiicyaax xiictinaayim. Ca' huaad ndundigooyim müd huingbi töxyjäy. Ni ca' huaad ndziptuunim ahua'nduunim. Ni ca' huaad nmigüg nmi'ijxtinaayim. 14 Tzoc cuychünaayim cuyjy'ajtim Jesucristo ytiy'ajt. Tzoc tzinaayim tiydudägy jadu'n nej Jesucristo tiydudägy ti chinäy ya naaxhuiñ. Ca' nguyduunim ti jibicpi ajt n'aa njot yja'adzojcpy.

14

Ca' migüg mbocy'ixy

¹ Miich ajcxy nmigügtijcich, copicy mgöbigipy agujc jotcuje ma miich mnayyöymújcigixy ajcxy yi migügtijc huidibi mibijcp je Cristo, per ca' tıydudägy huinjihuıy je Cristo ytiy'ajt. Mgöbigipy per ca' mhuingapxpedıpy, ca' ti myaj'ayucyoonıpy mıid yi' ajcxy. ² Ti migügtijc huidibi minamb co Dios ca' ti jıicxy capx'aducy, etz jėbi ajcxy jıicxy huenytım ti jıicxyıty. Etz nañ ji migügtijc huidibi minam co Dios ti capx'aducy tzüch, paady ajcxy jıicxy'adyii je'jada'ajty aay ujtz. ³ Yi migüg huidibi tzüch tzützp ca' huaad ıxtıy je ymigüg huidibi yjıicxpy je'jada'ajty aay ujtz. E nañ ni yi migüg huidibi jıicxp aay ujtz ca' huaad ıxtıy yi migüg huidibi tzüch tzu'tzp, com Dios ycöbijctaayb je jäy ajcxy huidibi ti mibicy Jesucristo. ⁴ Ca' huaad miich ajcxy mnımähuıpy yi mmigüg co ca' oytuñ, tim jadu'n nipaady nej co tüg jäy nımähuıpy huingbi jäy ytumbi co ca' oy ytuñ. Dios ci'm nımähuıp huıdi ajcxy mibijcp Jesucristo, pen oytuñ o ca' oytuñ. Dios ypubejtyp pinjaty mibijcp, paady madaacp ajcxy ma chinaayın.

⁵ Nijėjıty ajt nmigügtijc ymına'ñ co ooy ycopıcyıty n'amay'ajtim nijėjıty xıı, jacjadyii jäy ymına'ñ co ca' ycopıcyıty n'amay'ajtim jada xıı. Huen nidüg nidüg yci'mhuınma'ñ yajtuñ pen y'amay'adamyb, o pen ca' amay'ada'ñ nije' nije' xıı.

⁶ İch ajt nmigügtijc huıdi amay'ajtp nijėjıty xıı, hue' ajcxy tijy co Dios jadu'n tzojcp. E nañ İch ajt nmigügtijc huıdi tzüch tzu'tzp, hue' ajcxy tijy co Dios jadu'n tzojcp, etz nañ yajnaxyp Dioscojuyip ma Dios mıid yjıicxy ypıcy ycıxpi. Nañ tim jadu'n ajt nmigügtijc huıdi ca' tzüch tzüdza'ñ, hue' tijy co Dios jadu'n tzojcp, etz nañ yajnaxyp Dioscojuyip mıid yjıicxy ypıcy ycıxpi.

⁷ Ca' İch ajt nayyajtınaayım amidzooci'm, nañ jadu'n ca' İch ajt ci'm ndzojcin co n'o'cim. ⁸ Pen njactınaayım hue' anajty nguyduunım ajt nHuındzin Jesucristo chojcin. Pen n'o'cim yi' anajty jadu'n ti yajcöducy. Pen njactınaayım, o pen n'o'cim, tú'ciy nipaady, com Jesucristo nHuındzin'ajtim ma yi tınaayın etz ma yi o'cin. ⁹ Paady ycıxp Cristo y'o'cy etz yjugypıjcy jadüg'oc jigıx jėb nihuındzin'ajttäy yi' yjäy huıdibi jactınaayb jacjugy'ajtp, etz jigıx jėb nihuındzin'aty yi' tiıbi y'ögy.

¹⁰ ¿Na'amy co mmigüg mdzachpocy'ixy? o ¿Nej co mmigüg mdzach'ıxtıy? Ca' jadu'n y'oyıty co ajcxy jadu'n m'ıdİch. Com nidüg'öciy ajt njădaanıı ma Dios ytiydundac. ¹¹ Com jadu'n jaybety ymiñ ma Dios ñecy, ma jadu'n ymına'ñ:

Janch janch co İch, je tügpaıjcpı Dios, jadu'n nmına'ñıch co tüg'öciy naaxhuıñjıy xyhuıngoxtınaıhuıbıch xyhuındzigıhuıbıch, etz nañ tüg'öciy naaxhuıñjıy xycapxpaadıbıch co İch je' tügpaıjcpı je Dios.

¹² Com Dios nhuındzin'ajtim, paady ycıxp nidüg'öciy İch ajt nayguėxıctăhuaanıı ma Dios yhuınduu, chi Dios xy'amıdohuaanıı nej ti ndzınaayım ti njugy'ajtim nidüg nidüg.

Ca' migüg myajhuınma'ñyđıgooygıxy

¹³ Paady ycıxpi ca' huaad naynixiic naynıgapxım miñ xyıpy. Hue' janchtıy miich pıdaaccıx mhuınma'ñ co ca' ti mdúngıxıpy huıdi mmigügtijc ca' jäygidägy, huıdi mmigüg yajpocycăhuıb. ¹⁴ Nnejhuııybıch tıydudägy co ajt nHuındzin Jesucristo ytiy'ajt xyajnejhuııyım co jėbi njıicxım huen tim huıdi jıicxy tim huıdi pıcy. Je jıicxy je pıcy ca' ma ycobocy. Per pen tüg migüg yhuınma'ñ pıdacp co Dios ca' jäygidägy co yi' yjıicxpy nijėjıty jıicxy pıcy, pues ca' yhuaadıty co yi' jadu'mbi jäy jıicxy huıdi yi' ytıjpy co ca' huaad njıicxım.

¹⁵ Pen ca' m'oy'ıty mıid tüg migüg co ti mjıicxy je jıicx pıcy huıdibi yi' ytıjpy co Dios ca' jadu'n yaj'cöducy, chi ca' anajty mdzocy mjıihuıy yi' mmigüg nej

ypadyii. Com nañ Cristo ti y'ögy mïid yi mmigüg ypcocy ycixpi, paady ca' huaad myajtigoy yi mmigüg, mïid co mjicxy huidi yi' ca' jäygidägy. ¹⁶ Ca' ajcxy m'a'ixi'ygixipy co jibic yajni'gapx yajnimiydägi'py huidibi miich ajcxy myajnajxp co y'oyity. Oy miich mjahuinjihuïy Dios ytiy'ajt, per ca' huaad mdunipy huidi yi mmigüg ca' jäygidägy, e huin'it xyñigapxipy jibic. ¹⁷ Canan Dios jadu'n ytiy'ajt xyñajtz'ane'mi'iyim hu'idijaty huaad njicxim n'uucim, o huidi ca' huaad njicxim n'uucim. Hue' janchtiy ti xyñajtz'ane'mi'iyim nej jëbi tiydudägyi ndzinaayim njugy'ajtim. Nej jëbi jotcuje n'ijtim mïid ajt nmigügtijc. Nej jëbi jotcuje nayjihui'iyim mïid Dios ym'ic'ajt ma njot nhuinma'ñ. ¹⁸ Co jadu'n nguyduunim nej Cristo ytiy'ajt ti xyñajtz'ane'mi'iyim, huin'it jäygidägi'py Dios etz nañ jadu'n jäygidägi'py jäy ajcxy nej anajty nduunim.

¹⁹ Tzoc panicxim je huinma'ñ jadu'n nej jëbi ndzinaayim agujc jotcuje mïid ajt nmigügtijc, ca' ma ti tzip ti capxy nmïid'ajtim. Tzoc yajtuunim je huinma'ñ jadu'n nej jëbi huaad naybubejtim nidüg nidüg nej jëbi huaad nguych'inaayim Dios ytiy'ajt. ²⁰ Ca' huaad nyajtigooyim Dios ytung mïid tzip capxy jadu'n nej huidi jëbi huaad ndzüdzim, etz huidibi ca' huaad ndzüdzim. Janch tiy'ajt co Dios ca' ti jicxy ti picy capx'aducy, per pen njicxim hu'idijaty nijëjity ajt nmigügtijc yajcobo'jcpy, e jadu'n nyajhuinma'ñy'digooyim ajt nmigüg, chi nmidundigooyim Dios ytiy'ajt. ²¹ Tiy'ajt jadu'n co ca' huaad tzüch ndzüdzim etz ca' huaad vino n'uucim, o jactijaty hu'idibi ajt nmigüg yajcobo'jcpy. Com co jadu'n ajt n'id'udzim, hue' anajty ajt nmigüg nyajhuinma'ñy'digoyaanim ma ym'ibijcin. ²² Miich ajcxy hu'idibi huinjihuïyb Dios ytiy'ajt co Dios ca' capx'aducy ti jicxin ti pijcin, ca' mnimiydacconaxipy mïid jäy ajcxy. Dios ñejhuïyb co miich mhuinjihuïy yi' ytiy'ajt. Jëbi jotcuje mdzinähuipy pen nguych'inaayb je huinma'ñ hu'idibi miich mnejhuïy'igixyp co ytudägyity, e huin'it ca' jibic mnayjihuihuïyb ajcxy. ²³ Tundigooyb yi migügtijc hu'idibi jotmetz jicxp nijëjity jicxy picy, mïid co tzig'iyb yi' co Dios ym'ijotmädiyb co ti jicxy huidi yti'jpy co ycobocy. Tundigooyb jadu'n com ca' ti cuyduni Dios ytiy'ajt nej ci'm ti yajni'guejy. Pen ca' nguyduunim jadu'n nej nhuinjihuïyim Dios ytiy'ajt, tundigooyim anajty.

15

Tzoj'icx migügtijc, ca' ñaydüg mnaychogyii

¹ Hich ajt hu'idibi tiydudägy nm'ibijcin etz nhuinjihuïyim Dios ytiy'ajt, copicy nmimecxtujcim ajt nmigügtijc hu'idibi ca'ni huinjihuïy yajxon Dios ytiy'ajt. Ca' huaad ti nduunim mïid ngi'm jäygidaa'cin ycixpi. ² Copicy nyajtuunim oyhuinma'ñ mïid ajt nmigügtijc, jadu'n nej jëbi ajt nmigüg jäygidägy, etz jadu'n nej jëbi nbubejtim ajt nmigüg mïid ym'ibijcin. ³ Com nañ Cristo ca' ti ytuñ mïid yci'm jäygidaa'cin ycixpi, com jaybety jadu'n miñ ma Dios ñecy, ma je Cristo nimay Dios Teedy: "Miich mmidzip ajcxy hu'idibi xyñigapxp xyñi'oj'iyb, xyñigapxpich xyñi'oj'iybich ajcxy nañ jadu'n." ⁴ Com tüg'óciy Dios y'ayuc hu'idibi ycojay jecy'ajty, hue' cojay mïid ñch ajt ycixpi, jigix jëbi Dios ytiy'ajt nbaatim. Dios ytiy'ajt xyajnejhuïyim co Dios jadu'n tzocy co nmimecxtujcim ajt nmigügtijc. Nañ Dios y'ayuc xyjot'amijmooyim, e nañ xyajnejhuïyim jadu'n jëbi njijp'ijxim pubejtin ma Dios. ⁵ Com Dios, yi' je' huidi xypubejtim mïid mecxtujcin, e nañ xyjot'amijmooyim, paady huen Dios may'ajt tunipy ma miich ajcxy mjot mhuinma'ñ, jigix jëbi mmïid'idipy tú'ciy mjot mhuinma'ñ nej Jesucristo yjot yhuinma'ñ mïidity, e jadu'n jëbi mnayyaj'oy'ijtigixy jotcuje ca' ma tzip capxy. ⁶ Dios miich ajcxy xypubedipy xypudigihuipy, jigix jëbi myajtüg'iygixy mjot mhuinma'ñ, etz tú'ciy

m'ojadájtcixipy mhuindzigíygyixipy Dios Teedy etz ñich ajt nHuindzin Jesu-
cristo.

Jesucristo y'ayuc yajcapxhuäcxy ma huídibi ca' yjudíojäyity

⁷ Naygöbícigix nidüg nidüg agujc jotcuyc, tim jadu'n nej Cristo xycöbijccixy agujc jotcuyc. Co mnaygöbícigixipy nidüg nidüg agujc jotcuyc, huin'it Dios capxpaady y'idipy. ⁸ Janch tiy'ajt co Cristo y'oy ya naaxhuiñ, oy pubety judíojäy ajcxy, e jadu'n cuyduñ Dios ytiy'ajt huídi yajhuinhuaníy Abraham, Isaac etz Jacob jecy'ajty co jadu'n tuna'ñ mñid yí' ajcxy ycixpi. ⁹ Nañ jadu'n Cristo ooy pubejty yí huídibi ca' yjudíojäyity, jaydëbi ajcxy capxpaadipy Dios, mñid co ti ypa'ayoyii ajcxy. Com jaybety jadu'n ymiñ ma Dios ñecy, ma jadu'n David ymínañ:

Com miich Huindzin Dios ti xycohua'ñich paady miich ngapxpaady ma yí jäy
ajcxy huídibi ca' yjudíojäyity. ñich miich nhuin'ñhuipy mñid himnos.

¹⁰ E nañ jaybety jadu'n ymiñ ma Dios yñecy:

Jotcuyc'ajtcixy quipxy mñid Dios yjäy miich ajcxy huídi ca' yjudíojäyity.

¹¹ E nañ jaybety jadu'n ymiñ ma Dios ñecy, ma jadu'n ymína'ñ:

Capxpaatcix yí Huindzin Dios miich ajcxy huídi ca' yjudíojäyity. Capxpaatcix
yí Huindzin Dios miich ajcxy nidüg'óciy naaxhuiñyjäy.

¹² E Isaías ycojay nañ jadu'n ma yí' ñecy, ma jadu'n ymína'ñ:

Ma'xung'adamb tüg Isaí y'ap y'oc, e yí' ane'mamb yí jäy huídibi ca'
yjudíojäyity. Co yí jäy ajcxy huídibi ca' yjudíojäyity mijpidägipy je
mij'ane'mbi, hue' ajcxy yjijp'ijxpy co möhuaanip oy'ajt.

¹³ Nmíbijctzooybich Dios mñid miich ajcxy ycixpi huídijaty mibijcp Je-
sucristo, com njijp'ixxim co Dios xymöhuaanim oy'ajtin. Nmíbijctzooybich
Dios mñid miich ajcxy ycixpi co huen xyajjotcugíhuip ajcxy, e nañ co huen
xyajpooxipy mjot mhuinma'ñ. Nmíbijctzooybich Dios co huen xypubejtcixy
xypudigíygyixy mñid yí' yjihui'ñ ymic'ajt, jaydëbi mijjp'ixipy ajcxy co mbaadip
oy'ajtin mijcajee ma Dios.

¹⁴ Miich ajcxy migügtijc, jotcuyc nayjihuíyijich mñid miich ajcxy ycixpi, com
nejhuíyibich co miich ajcxy mñidity oyjot oyhuinma'ñ, e nañ mhuinjihuíyb
ajcxy tüg'óciy Dios ytiy'ajt, paady jëbi mnayyaj'ixpícgixy nidüg nidüg.
¹⁵⁻¹⁶ Jotmic'amy ti nyajjäymejtzcodyich miich ajcxy nijëjity Dios ytiy'ajt ma
jada necy huídi nyajnijayíyb ajcxy cham, com Dios may'ajt oy'ajt ti tuñ
mñid ñich, e ti xyhuin'ixyich jaydëbi nduñich Jesucristo ytung ma yí jäy ajcxy
huídi ca' yjudíojäyity. Jadu'n nduñich mñid Dios ycixpi, co ngapxhuäcxyich
je oybi tiy'ajt jadu'n nej Jesucristo y'o'cy mñid jäy ajcxy ypocy ycixpi. Jadu'n
Jesucristo ytuñ jigix jëbi Dios cöbigipy yí mayjäy ca'pi yjudíojäyity huídi ti
míbicy Jesucristo etz huídibi yí Espíritu Santo ti yajhuäch je jibicp ma ajcxy
yjot yhuinma'ñ.

¹⁷ Com Jesucristo ytiy'ajt yajpaatp ma ñich njot nhuinma'ñ, paady ycixp
ooy jotcuyc nayjihuíyijich co nduñich mñid Dios ycixpi. ¹⁸ Jada janchtiy ñich
nyajmñidmíydacy miich ajcxy je may'ajt huídi Cristo ti tuñ co ngapxhuäcxyich
yí' y'ayuc. Ca' nyajmñidmíydaaccixy huídi Cristo ytumyby mñid jacpinjaty. Mñid
co ngapxhuäcxyich Cristo y'ayuc, e nañ mijhuinma'ñ ndumyby mñid Cristo
ymic'ajt, paady mayjäy ycapxymidooyb Dios huídi ca'p ajcxy yjudíojäyity.

¹⁹ Ti ngapxhuäcxyich tüg'óciy Cristo ytiy'ajt nej jëbi ajcxy y'alma ñidzoocin
paadip. Jim nyajtzondacyich Jerusalén, e ti nhuidijttäyich canaag agajp
mabaad nja'tyich jim Ilirico ñaaxjot. E Dios yjihui'ñ ymic'ajt xypubejtich
xypudigíyich co ñich mijhuinma'ñ nduñich, etz Dios ytiy'ajt nyéjicibich. ²⁰ Ooy
nijot'atyich co ngapxhuäcxyibich Jesucristo ytiy'ajt ma anajty ca' pin jayijp

capxhuäcxyñi. Iich oga'n Jesucristo y'ayuc jim nminicxi ma yi jäy ajcxy huidi ca' anajty midoy Jesucristo ytiy'ajt. Jadu'n nduuñich, jigix ca'ydi njijptigiyyich ma huingbi anajty jayijp ti capxhuäcxi Jesucristo ytiy'ajt.

²¹ Com jaybety jadu'n ymiñ ma Dios ñecy, ma Dios jadu'n ymina'ñ:

Yi jäy ajcxy ymidohuaanip Cristo y'ayuc huidibi ca'ni anajty midoogixy. Yi jäy ajcxy yhuinjihuñhuaamyb je Cristo ytiy'ajt huidibi ca'ni anajty nejhuñygyxy co yjijity je Cristo.

Pablo huinmay co ñicxa'ñ jim Roma

²² Com ooy ndzachcapxhuäcxich Cristo ytiy'ajt canaag agajp, paady ca' nya-njibadiyich nicxibyich ma miich ajcxy. ²³ Canaag jimijt ndzachnijot'atyich anajty nicxa'ñich ma miich ajcxy. Ixti chamni ti nhuidijttäyich majaty anajty nhuidida'ñich. ²⁴ Paady njijp'ijxypich co jëbi nnaxihuibich ma miich ajcxy co anajty nicxyich jim España ñaaxjot. Huäcxibaambich jim ma miich ajcxy jëbi hueeni ajcxy ngapxim nmydaacim. Nañ hue' njijp'ijxypich co xypubedaambich miich ajcxy miid ndu'amgixpich. ²⁵ Jayijp nnicxa'ñich jim Jerusalén, chiini nnicxa'ñich ma miich ajcxy. Nminicxaamybich jim Jerusalén hueeni meen huidibi nyegaamybich ma yi mibijcpidijc jim Jerusalén miid ayoobtjic ycixpi. ²⁶ Com yi mibijcpidijc ya Macedonia etz Acaya ñaaxjot ti ajcxy yhuinma'ñ pidaaccixy co ajcxy pubeda'ñ yi ayoobtjic jim Jerusalén huidibi mijpidacp Jesucristo. ²⁷ Ooy ajcxy jotcujc ñayjihuiyii co ymigügtjic pubeda'ñ jim Jerusalén. Paatip co pubedipy ajcxy, com ma yi judíojäy ajcxy, jim ajcxy ti paady Dios ytiy'ajt, paady paatip ajcxy huidi ca' yjudíojäyity co pubedipy yi judíojäy ajcxy. ²⁸ Co anajty ti nyajc'idigiydaagyxy je meen huidibi yimigügtjic ya Macedonia etz Acaya ti yajmujccixy miid je mibijcpidijc ycixpi huidibi yajpatp jim Jerusalén, huin'it nnicxa'ñich jim España ñaaxjot. Nnaxihuaambich ma miich ajcxy co anajty jim nnicxich. ²⁹ Nejhuñybich co anajty jim naxiyich ma miich ajcxy, je Cristo xypubedipich je ymic'ajt, e nyegipich Cristo ymic'ajt ijxpejt etz nyaj'ixpigipyich miich ajcxy je Cristo ytiy'ajt.

³⁰ Miich ajcxy nmigügtjicich, com miich ajcxy mijpidaaccixyp ich ajt nHuindzin Jesucristo, e com miich ajcxy miid Dios yjihui'ñ ymic'ajt ma m'aa mjot, e nañ xychojcpich xyjihuiybich, paady ycixp nbijctzooyich may'ajt, yajtüggyxy m'ayuc mhuinma'ñ miid ich, jëbi tú'ciy Dios nmibijctzoohuim mictägy miid ich ycixpi. ³¹ Mibijctzoogix Dios co huen xyñihua'ñich xycohua'ñich ma yi judíojäy ajcxy jim Judea naaxjot, huidibi xyca'ixaambich co ajcxy ca' mijpidägy Jesús. Nañ mibijctzoogix Dios co yi mibijcpidijc jim Jerusalén cöbigipy ajcxy oy yajxon je pubejtin huidibi ich jim ngiyegaamy. ³² Mibijctzoogix Dios co huen xypubedipy xypudigihuibich, jëbi nicxibich ma miich ajcxy agujc jotcujc, ca' ti jotmay, pen Dios jadu'n tzojcp, etz nañ jëbi nhuäcxibipich jim ma miich ajcxy agujc jotcujc, e jim ich nhuinma'ñ nyajpocxip. ³³ Mibijctzooybich Dios miid miich ajcxy ycixpi, je Dios huidibi jotcujc'ajtin yejcp, co huen miich ajcxy xypubedipy xypudigihuiy. Jadu'n jadu'n. Amén.

16

Capxpocxin nidüg nidüg ma pinjaty y'ixy'ajtyp

¹ Cham ich miich ajcxy nyajnibijccixy, cöbijccixy je ajt nmigüg töxyjäy je Febe co anajty nicxy ma miich ajcxy. Yi' je' nidügti huidibi pubejtin tumb ma je mibijcpidijc jim Cencrea. ² Mdunipy may'ajt mgöbigipy Febe miid ajt nHuindzin Jesús ycixpi. Com jadu'n ycopicyity co jäy huidibi mibijcp

Jesucristo huen naymigüg'ájtigixy. Mbubedip mbudigihuijpu jadu'n nej yi' jotmay müidity. Yi Febe ti ooy mayjäy pubety, e nañ ti xypubetyich.

³ Nguejxypyich capxpooxín ma jada necy müid yi Priscila etz Aquila huidibi ich anajty müid ooy oy nduñ co ngapxhuäcxyich Cristo ytiy'ajt. ⁴ Yi Priscila etz Aquila yojx ytooc ajcxy yjugy'ajtin müid ich ycixpi, ca'ydi n'ögyich. Nyajnajxypich jäygidaacín ma Dios müid yi' ajcxy ycixpi, co ti xypubetyich ajcxy. E nañ jadu'n tüg'óciy jäy ajcxy huidibi ca'pi yjudíojäyity yajnajxcixy jäygidaacín ma Dios müid yi' ajcxy ycixpi. ⁵ Nguejxypich capxpooxín nañ jadu'n ma jada necy müid yi mibijcpidijc ajcxy huidijaty naymujccip ma Priscila etz Aquila ajcxy ytijc. Etz nañ nguejxypyich capxpooxín ma yi Epeneto huidibi ooy ndzocyich. Yi' je' tim jayijp huidibi mijpidaac Cristo jim Acaya ñaaxjot. ⁶ Etz nañ nguejxypich capxpooxín ma María, yi' ooy ti ytuñ müid miich ajcxy müid Cristo ycixpi. ⁷ Etz nañ nguejxypyich capxpooxín ma yi Andrónico etz Junias. Ich n'amigüg ajcxy huidibi ti ypujxtijc ñäy quipxy müid ich. Capxpaady ajcxy y'ity müid yi apóstoltijc. Jacjayijp ajcxy mijpidacy Jesucristo ca'ydi ich.

⁸ Etz nañ nguejxypich capxpooxín ma yi Amplias, huidibi ooy yajxon mijpidägy ajt nHuindzin Jesucristo. ⁹ Nañ nguejxypich capxpooxín ma yi Urbano huidibi xymüidtuñich co ich anajty ngapxhuäcxyich Jesucristo ytiy'ajt. Nañ jadu'n nguejxypich capxpooxín ma yi Estaquis huidibi oy ndzocy njihuüyich. ¹⁰ Nañ nguejxypyich capxpooxín ma yi Apeles, huidibi ooy tiy'ajt ti yecy co yi' ymibijcpy Cristo tiydudägy. Nañ nguejxypich capxpooxín ma yi Aristóbulo etz jac pinjaty huidibi yajpatp ma yi' ytijc. ¹¹ Nañ nguejxypich capxpooxín ma ich n'amigüg yi Herodión. Etz nañ nguejxypich capxpooxín ma yi Narciso yjuugy ymigüg huidibi mijpidacp ich ajt nHuindzin Jesucristo. ¹² Nañ nguejxypich capxpooxín ma yi Trifena etz Trifosa huidijaty tumb ma ajt nHuindzin Jesús ytung. Nañ nguejxypich capxpooxín ma Pérsida, je migüg huidi oy ndzocyich, etz nañ huidi ooy ytuñ ma ajt nHuindzin Jesucristo ytung. ¹³ Nañ nguejxypich capxpooxín ma yi Rufo, je huidibi yi mibijcpidijc ycömaayb. Nañ nguejxypich capxpooxín ma yi' ytaj, com jadu'n njihuüyich jadu'n nej jihuüy yi' ndaj'adyijich. ¹⁴ Nañ nguejxypyich capxpooxín ma yi Asíncrito, yi Flegonte, yi Hermas, yi Patrobas, yi Hermes etz ñan tüg'óciy yi mibijcpidijc huidi jim yajpatp ma yi' ajcxy. ¹⁵ Nañ nguejxypyich capxpooxín ma yi Filólogo, yi Julia, yi Nereo etz yi' y'uch töxyjäybi, yi Olimpás, etz nañ tüg'óciy yi mibijcpidijc huidibi yajpaatp jim ma yi' ajcxy.

¹⁶ Naygapxpooxigix xic xon nidüg nidüg. Naygímájtzigix miñ yxipy agujc jotcuje. Tüg'óciy huidibi mibijcp Jesucristo ma yi jacjaydyii cajp, yquejxyp ajcxy capxpooxín ma miich ajcxy.

¹⁷ Miich ajcxy migügtijc, may'ajt nbijctzooybich naygüend'adi' ajcxy ma yi jäy ajcxy huidibi mimiimb ayuc ca'pi ytiy'ajtiy, huidibi nigooob yjäyyajtziptuna'ñ yjäybijc-huäcxa'ñ, huidibi ca' ixa'ñ yi Dios ytiy'ajt huidibi ti m'ixpijccixy. Puuhuäctüd miich yi' ajcxy. ¹⁸ Com yi jäy ajcxy huidibi ymigügtijc yajhuinma'ñydigoooyb, ca' ajcxy tuñ Jesucristo ytung. Hue' ajcxy yaj'ixpijcp huidi yci'mhuinma'ñ yci'mdzojcín. Je' ajcxy huin'ñnigixp je jäy ajcxy huidibi ca' mijcajee y'ixpiyity. Yi ayuc huidibi ymihuidijtyp, jadu'n yajmidooy nej jihuüy oy ytiyity yjanchity, per ca' yi' yjanchity. ¹⁹ Com mayjäy ti xyajmidooyich jadu'n nej miich ajcxy mgapxymidooy Jesucristo, paady jotcuje nayjihuiyijich müid miich ajcxy ycixpi. Ndzojcypich co miich ajcxy mnejhuihuiipy huidibi oyhuinma'ñ jaydebi mdúngixipy ajcxy etz ca' jibic-huinma'ñ mdúngixipy. ²⁰ Dios oyhuinma'ñ etz mic'ajt ti xymooyim jebi ndzinaayim müid ajt nmigügtijc agujc jotcuje, ca' ma tzip capxy. Tim huington

je xii je tiempo mina Dios yajcödigoya'ñ yi mujcu' ymic'ajt, e yi' xypubedip xypudigihuiy jëbi mmimadägipy yi ca'oybi. Nmibijctzooybich Dios müd müch ajcxy ycixpi co ich ajt nHuindzin Jesucristo huen may'ajt oy'ajt tuñ müd müch ajcxy jabom jabom.

²¹ Je Timoteo huidibi tumb müd ich co ngapxhuäcxich Jesucristo ytüy'ajt xyajniguejxp ajcxy capxpooxín. Nañ jadu'n Lucio, Jasón etz Sosípater ich n'amigüg ajcxy, xyajniguejxp capxpooxín.

²² Ich Tercio huidibi cojaayb Pablo y'ayuc ma jada necy, nañ nguejxypich capxpooxín ma müch ajcxy, com ich nañ jadu'n nyajpaadyich ma ajt nHuindzin Jesucristo.

²³ Nañ jadu'n Gayo xyajniguejxp capxpooxín, yi' xyajjättacich. E nañ je jäy ajcxy huidibi mijpidacp Jesucristo huidibi ajcxy nayyöymujcip ma Gayo ytijc yquejxyp ajcxy capxpooxín ma müch ajcxy. Erasto je cajp ytesorero etz ajt nmigüg huidibi yxi Cuarto, nañ xyajniguejxp ajcxy capxpooxín.

²⁴ Nmibijctzooybich Dios müd müch ajcxy ycixpi jabom jabom co ich ajt nHuindzin Jesucristo huen may'ajt oy'ajt tuñ ma müch ajcxy. Amén.

Je capxpooxín ma yaj'ibbaady yajcapxpaady Dios

²⁵ Tzoc cömayim Dios, tzoc ojadajtim, tzoc huin'ihuim müd himnos. Dios müd ymic'ajt jëbi xypubedipy xypudigihuiy ajcxy, jaydëbi ajcxy tıydudägy mmibigipy Jesucristo, ca'ydi mjotmetzcıygıxy. Tim jadu'n nej je oybi tıy'ajt huidibi ngapxhuäcxpich tim jadu'n nej je Jesucristo ytüy'ajt huidibi jacjadyii jäy ycapxhuäcxıxyp. Jada je tıy'ajt huidibi jecy'ajty ca' pın huinjihuiy huidibi Dios ti xyajnejhuııyım. ²⁶ Dios ti xyajhuinjihuiııyım nej yhuimbızımy je ayuc huidibi je profetas ajcxy ycojay jecy'ajty. Dios huidibi tzınaayb huinıxii huinıtiempo, ane'mb co huen yajcapxhuäcxıy jada tıy'ajt oybi ma tüg'ócıy naaxhuiñjäy, jigıx jëbi mayjäy mijpidägıp etz capxymıdoohuiy Dios.

²⁷ Müd co Jesucristo ooy mijhuinma'ñ tuñ müd ich ajt ycixpi, paady tzoc cömayim, tzoc ojadajtim etz tzoc huin'ihuim müd himnos huinıxii huinıtiempo yi tügıajcı Dios huidibi ñejhuiydaayb tüg'ócıy. Jadu'n ngapxcıxyich. Amén.

1 CORINTIOS

Yi Midügpí Necy Huidibi San Pablo Yajniejx Je Mibijcpidijc Jim Corinto

1-2 Hich Pablo, Dios jadu'n tzojcp co Jesucristo xyajniejx co ngapxhuäcxibyich yí' y'ayuc. Hich etz ajt nmigüg Sóstenes nijayiybich miich ajcxy tüg'óciy huidibi jim Corinto huidibi mijpidacp Dios etz ñayyöymújcigixy jim miid Dios ycixpi. Nijayiybich miich ajcxy huidibi Dios ti yaj'ahuimbijttäy tudägy miid Jesucristo co y'o'cy miid ajcxy mbocy ycixpi. Nijayiybich miich ajcxy huidibi Dios ti huin'ixy, jaydëbi mmid'idipy huädz jot huädz huinma'ñ. Nañ jadu'n nijayiybich tüg'óciy je jäy huenyma'amyity huidibi Dios mibijctzooob ojadajtp miid ich ajt nHuindzin Jesucristo yxi. ³ Ndzoycypich co ich ajt nDios Teedy etz ajt nHuindzin Jesucristo oy'ajt may'ajt tunipy miid miich ajcxy, etz xyajjotcugihuipy ajcxy.

Oy'ajt miid Cristo ycixpi

⁴ Nyajnajxypich Dioscojuyip ma Dios jabom jabom miid miich ajcxy ycixpi, miid co Dios may'ajt oy'ajt ti tuñ miid miich ajcxy ycixpi ma Jesucristo. ⁵ Co ti mmijpidaaccixy Jesucristo, oybi ti mbaatcixy ma tüg'óciy mdzinaayin mjogy'ajtin. May'amy capxy ayuc oybi ti mbaatcixy, etz may'amy huinma'ñ oybi ti mbaatcixy. ⁶ Ma miich ajcxy mdzinaayin mjogy'ajtin etz mgapxy m'ayuc ñiguëxigipy Cristo ytiy'ajt etz ymic'ajt. ⁷ Dios miich ajcxy ti xymöy tüg'óciy ymic'ajt. Ca' ti myajtigoy'ijtcixy ma mdzinaayin mjogy'ajtin huidibi Dios ñiyejcpy, ma je' m'ahuijxcixy co Dios yajnieguëxiga'ñ jadüg'oc ya naaxhuiñ ajt nHuindzin Jesucristo. ⁸ Jesucristo miich ajcxy xyhuijtz'ijtp tudägy, ixti cooni ycixipy tigoyipy je naaxhuiñybi, e co anajty yí' tyduñ naaxhuiñjäy ajcxy miid ypocy ycixpi, ca' miich ajcxy mbocycähuipy. ⁹ Dios yjatytimycuydunipy yí' y'ayuc miid miich ajcxy, ca' xyixmadzaangixy ni mina xii, com yí' ti xyhuin'ijxcixy co miid mnaymigüg'ájtigixy yí' y'ung, ich ajt nHuindzin Jesucristo.

Naybijc-huäcxii ma je mibijcpidijc

¹⁰ Migügtijc, ich miich ajcxy nmínucxtacyp miid Jesucristo yxi co tungixy may'ajt nay'ayuc-huinjihuiyigix, e ca' mnaybijc-huäcxigixy. Tzinaaygix xic xon miid tú'ciy mjot mhuinma'ñ. ¹¹ Miich ajcxy migügtijc, ti je Cloé y'amigügtijc xyajnimäyich co ooy miich ajcxy mnaychip'ijxigixy, e ca' mnay'ayuc-huinjihuiyigixy. ¹² Miid jada ycixpi nmína'ñich co nijëjity miich ajcxy jadu'n mínaangixy: "Hich Pablo nmijnicxpejtpyich." E nijëjity ymínaangixy: "Hich Apolos nmijnicxpejtpyich." E nijëjity ymínaangixy: "Hich Pedro nmijnicxpejtpyich." E nijëjity ymínaangixy: "Hich Cristo nmijnicxpejtpyich." ¹³ ¿Nej Cristo ti ñaybijc-huäcxyiiji? Ca'. ¿Nej Pablo yajcruudzpejti miid miich ajcxy ycixpi? Ca'. ¿Nej ti miich ajcxy mnibejtcixy miid Pablo yxi? Ca' yjadu'nity. ¹⁴ Nyajnajxypich Dioscojuyip ma Dios co ca' jac ni pin ich ti ngayajniebety. Jëda'ajty ti nyajniebetyich Crispo etz Gayo. ¹⁵ Jadu'n ti nduñich je'gixpi co ca' huaad jäy ajcxy ymínaangixy co ti ajcxy ñibety miid Pablo yxi. ¹⁶ Nañ jadu'n ti nyajniebetyich yí' Estéfano miid yí' yjuugy ymigüg ajcxy. Jac ni je' ca' njäymechich pen ti nyajniebetyich. ¹⁷ Com Cristo ca' xyquejxyich jäy yajniebejtpi. Hue' janchtiy ti xyquexyich co ngapxhuäcxibich yí' y'ayuc ytiy'ajt oybi. Ca' nyajtuñich xpicytijc y'ayuc yhuinma'ñ. Co ixipy

nyajtuñich ixpicytjic y'ayuc yhuinma'ñ, naadig'ajt ixypy co Cristo y'o'cy ma y'i cruudz m'iid ajt nbocy ycixpi.

Cristo ym'iid Dios ymic'ajt etz y'i y'ixpijcin etz ytiy'ajt

¹⁸ Yi j'ay ajcxy hu'idibi y'alma tigoyam, loci huinma'ñ y'i tijcixy co Cristo y'o'cy ma y'i cruudz m'iid ajcxy ypocy ycixpi. Per ñich ajt pinjaty y'alma n'ndzögam, hue' m'inaanim co jada ayuc tiy'ajt m'iid Cristo ycixpi, ym'iid y'i Dios ymic'ajt. ¹⁹ Com jaybety jadu'n ma Dios ñecy, ma Dios jadu'n ymina'ñ:

Nyajtigoyaamybich y'i ixpicytjic y'ayuc yhuinma'ñ.

Njibijcibich y'i cohuinma'ñyäjydijc ajcxy yhuinma'ñ.

²⁰ ¿Ti mic'ajt ym'iid y'i cohuinma'ñyäjydijc ajcxy? ¿Ti mic'ajt ym'iid y'i ixpicytjic? ¿Ti mic'ajt ym'iid y'i hu'idibi ajcxy nay'ixquixip m'iid ixpijcin? Ca' ti mic'ajt m'iidity y'i ajcxy, com Dios ti yaj'ahuimbity y'i naaxhuiñ y'ixpijcin tzuu huinma'ñ loci huinma'ñ. ²¹ Com Dios jadu'n ti tzocy co j'ay ajcxy ca' padaangixy Dios ytiy'ajt ma y'i naaxhuiñj'ay ajcxy y'ixpijcin. Dios yj'aygidacpy co j'ebi j'ay ajcxy y'alma n'ndzögipy co ajcxy m'ibigipy je Dios y'ayuc hu'idibi ngapxhuäcxypich. Je Dios y'ayuc ytiy'ajt hu'idibi ñich ajcxy ngapxhuäcxpy, y'i y'i naaxhuiñj'ay ajcxy huinjihu'iygixyp nej tzuu huinma'ñ loci huinma'ñ.

²² Yi judío'j'ay ajcxy ooy tzachtzojccixy co Dios tunipy i'xpejt m'ijhuinma'ñybi. Yi griego j'ay y'ixtaaygixyp ayuc huinma'ñ etz huenhu'idibity ixpijcin. ²³ ñich ajcxy ngapxhuäcxich co Cristo y'o'cy ma y'i cruudz m'iid j'ay ajcxy ypocy ycixpi. Yi maybi judío'j'ay ajcxy ca' m'ijpidägaangixy ca' cöb'igaangixy ñich ajcxy n'ayuc. Etz y'i maybi j'ay ajcxy hu'idibi ca'p yjudío'j'ayity, hue' tijcixy co tzuu huinma'ñ loci huinma'ñ ñich ajcxy n'ayuc. ²⁴ Per y'i j'ay ajcxy hu'idibi Dios ti yhuin'ixy, huen yjudío'j'ayity, o huen ycajudío'j'ayity, hue' ajcxy tijcixy co je Cristo ym'iid anajty Dios ymic'ajt etz ym'iid anajty Dios y'ayuc ytiy'ajt. ²⁵ Co ixpicytjic tijcixy co Dios ytung, tzuu huinma'ñ loci huinma'ñ je', n'igi jac'oyhuinma'ñ y'i hu'idibi Dios tumyb, ca'ydi hu'idibi j'ay ajcxy ytumyb. Co ixpicytjic yminaangixy co Dios ca' ymic'ajt m'iidity, n'igi jacmic'ajt m'iid y'i, ca'ydi hu'idibi j'ay ajcxy ym'iid.

²⁶ M'igügtjic ajcxy, huinmay miich ajcxy jadu'n nej Dios ti xyhuin'ixcixy. Ni may miich ajcxy hu'idibi ca' y'ixpicyity, tim nihueeni hu'idibi ixpicyip ma miich ajcxy. Ni may miich ajcxy hu'idibi ca' ti mic'ajt, ca' ti ane'm'in m'iidity. Ni hueeni miich ajcxy hu'idibi mic'ajt m'iid etz ane'm'in m'iid. Ni may miich ajcxy hu'idibi oyñipinj'ayity. Ni hueeni miich ajcxy hu'idibi y'ap yteedy rey'ajtp. ²⁷ Per Dios ti huin'ixy y'i j'ay ajcxy hu'idibi ca' y'ixpicyity co jadu'n yajtzo'y'duna'ñ y'i ixpicyj'ay y'i cohuinma'ñj'ay. Dios ti huin'ixy y'i j'ay ajcxy hu'idibi ca' ti mic'ajt m'iidity, m'iid co jadu'n yajtzo'y'duna'ñ y'i j'ay ajcxy hu'idibi mic'ajt m'iid, ane'm'in m'iid. ²⁸ Dios ti huin'ixy hu'idibi j'ay ajcxy ca' m'ij'ix m'ijpidaaccixy, hu'idibi j'ay ajcxy yti'jpy co ca' y'oyity. Dios jadu'n tuuñ co yajcödigoya'ñ y'i hu'idibi j'ay ajcxy m'ij'ix m'ijpidacp, je hu'idibi j'ay ajcxy yti'jpy co y'oyity. ²⁹ Jadu'n Dios ytuñ co ca' tzocy co ni pinj'ay ca' ñaygömayyib ci'm ma y'i yhuinduu. ³⁰ Per Dios ci'm yaj'oyy nej j'ebi miich ajcxy myajpatcixy m'iid Cristo Jesús. Dios ci'm yaj'oyy nej j'ebi ajt nbaatim ixpijcin ma Cristo. Nañ jadu'n yaj'oyy nej j'ebi Cristo xyaj'ahuimbijtim tudägy, jayd'ebi Dios xycöbijcim nej tudägy j'ay. Nañ jadu'n Dios yaj'oyy nej j'ebi huaad nbaatim ajt nhuädzjot nhuädzhuinma'ñ ma Cristo. Nañ jadu'n Dios yaj'oyy nej j'ebi Cristo xyñihuanim ajt n'alma etz njugy'ajtin. ³¹ Paady ycixpi jaybety ymiñ ma Dios ñecy, ma jadu'n ymina'ñ: "Pinjaty naygömayaanip ci'm, huen naygömayii m'iid co m'ibicy ajt nHuindzin Dios."

2

Je y'ayuc ytiy'ajt, je Cristo hu'idibi cruudzpejt

1 Per co n'oyich ma miich ajcxy jayhuin, ngapxhuäcxyich anajty Dios y'ayuc ytiy'ajt, oy'amy nyaj'ixpijcyich, ca' nyajtuñich ixpijcyäy ajcxy y'ayuc, etz nañ jadu'n ca' nyajtuñich tzipjatypi ayuc. 2 Co jim n'ijtyich ma miich ajcxy jayhuin, chi nhuinma'ñybidacyich co ca' jac ti ayuc ti huinma'ñ nyajmüdmüydägaangixy, jë'yì janchtiy nyajmüdmüydägaangixy Jesucristo etz jadu'n nej je' yajcruudzpejti müd jäy ajcxy yocy ycixpi. 3 Co jim üch anajty nyajpaadyich ma miich ajcxy, chi ooy yung naxy naybidaacich, ooy ndzigüy njihuüyich. 4 E co nmüdmüydaacyich miich ajcxy, co ngapxhuäcxyich Dios ytiy'ajt ma miich ajcxy, ca'pi üch miich ajcxy nyajmübcy müd ixpijcytjyc y'ayuc müd tzipjatypi ayuc. Je Espiritu Santo xypubejtpich anajty co ajcxy nyaj'ijxy Dios ymic'ajt, e paady ycixpi ti ajcxy mmübjccixy Dios y'ayuc. 5 Jadu'n je Espiritu Santo xypubetyich anajty, jigix miich ajcxy müjpidägipy Dios, ca' nmünaanim müd co ti müdoogixy oyjatypi ayuc hüidibi jäy ajcxy ti cojy ti macxy. Ti müjpidaacixy Dios com ti müjxcixy ti müjhuüygixy Dios ymic'ajt.

Dios xyajnejhuüyüm yì ytiy'ajt müd y'Espiritu Santo

6 Oy co ti nyajmübcyich miich ajcxy müd ayuc hüidibi ca' chipjatyty, per nañ jadu'n nyaj'ixpijcyich oyjatypi ayuc tzipjatypi ayuc yì mübjcpidjic ajcxy tübi yhuinma'ñ ymiinni ymejchni. Tigachjaty üch n'ayuc ndiy'ajt e ca' ñaybadyii müd naaxhuüñyjäy ajcxy y'ayuc ytiy'ajt hüidibi ca' mübjccixy hüidibi tzinaayb jugy'ajtp jadachambi xii jadachambi tiempo. Üch n'ayuc ndiy'ajt ca' ñaybadyii müd je jäy ajcxy y'ayuc ytiy'ajt hüidibi ane'mb ya naaxhuüñ, yì jadu'mbi jäy yì ajcxy yjugy'ajtin cixamb tigoyamb tücc'iyi. 7 Üch ajcxy nyaj'ixpijcpy Dios y'ayuc ytiy'ajt hüidibi ca' ni pin jecy'ajty nejhuüy huinjhuüy, je ayuc tiy'ajt hüidibi Dios ymüd coyüch, je ayuc tiy'ajt hüidibi Dios ti cojy ti macxy jecy'ajty ca'ni anajty naaxhuüñybi chondacy. Dios ycoj ymacx jada ayuc, jaydëbi ajt n'alma ñüdzoozim huinixii huinitiempo. 8 Ni tüg müj'ane'mbi hüidibi tzinaayb jadachambi xii jadachambi tiempo, ca' huinjhuüy jada ayuc. Co ixypy ajcxy huinjhuüy, ca' ajcxy cayajcruudzpejty je Huindzin Dios y'ung, je hüidibi müd Dios y'oy'ajtin ymüj'ajtin. 9 Com ca' ajcxy huinjhuüy Dios y'ayuc, paady ycixpi jaybety ymiñ ma Dios ñecy, ma jadu'n ymüna'ñ:

Ni tüg jäy ca' icy, ni tüg jäy ca' müdoy, ni tüg jäy ca' yhuinma'ñybaady jadu'n nej Dios ni'ixü müdüty müd je jäy ajcxy ycixpi hüidibi yì müjpidaacip yajmüj'ajtp.

10 Müd co müjpidaacim Dios, paady ycixpi Dios yaj'oyüy nej jëbi je Espiritu Santo xyajnejhuüyüm yì ytiy'ajt. E je Espiritu Santo yhuinjhuüydaayb ñejjhuüydaayb tüg'óciy, ixti yhuinjhuüydaayb nej Dios yhuinma'ñ ti pidägy co tuna'ñ, je hüidibi ca' pin nejhuüy.

11 Ca' pinjäy jëbi huinjhuüy nej jadügpì jäy yjot yhuinma'ñ müdüty. Je jäy yci'mhuinma'ñ jëbi huinjhuüy nej je' yci'mjot yci'mhuinma'ñ müdüty, ca' jac pin. Nañ jadu'n ca' jac pin jëbi huinjhuüy nej Dios yjot yhuinma'ñ müdüty. Dios yci'mjhuüñ huinjhuüyb nej Dios yjot yhuinma'ñ müdüty. 12 Dios ca' xyaj'adigüyüm xyajjottigüyüm huingjäy yjhuüñ ymic'ajt. Hue' Dios xyaj'adigüyüm xyajjottigüyüm yì yci'mjhuüñ yci'mmic'ajt, paady ycixp jëbi nhuinjhuüyüm tüg'óciy hüidibi ti xymooyim. 13 Üch ajcxy nyajmüdmüydacpy miich ajcxy je ayuc tiy'ajt hüidibi je Espiritu Santo xyaj'ixpijccixyich. E ca' nyajmüdmüydaaccixy je tiy'ajt hüidibi ti n'ixpijcyich ya naaxhuüñ hüidibi jäy ajcxy ti cojy ti macxy. Nyaj'ixpijccixy Dios y'ayuc ytiy'ajt hüidibi je Espiritu Santo xyajnejhuüyich. Üch ti nyaj'ixpijcyich yì ajcxy hüidibi müd Dios yjhuüñ ymic'ajt ma y'aa yjot.

¹⁴ Pınjaty ca' mıdıty Dios yjhui'ñ ymic'ajt, ca' yí cöbiga'ñ je tıy'ajt hıdıbí je Espıritu Santo xyajnejhuıym. Com yí ajcxy ytıjp co jada tıy'ajt tzuu huınma'ñ locı huınma'ñ yí. Nañ ni ca' ajcxy Dios ytıy'ajt huınjıhuıyı, com ca' ajcxy mıdıty Dios yjhui'ñ ymic'ajt hıdıbí yajnejhuıyb Dios ytıy'ajt. ¹⁵ Je jayı hıdıbí ymıd'ajtıpy Dios yjhui'ñ ymic'ajt, yí jėbí yajcıyöy yajtecyöy tög'öcıy pınjaty yjot yhuınma'ñ. Per ca' yí huaad pınjaty yajcıyöy yajtecyöy yjot yhuınma'ñ. ¹⁶ Com jadu'n Dios ymına'ñ ma ñecy: “¿Pın jayı huınjıhuıyb nej Dios yhuınma'ñymıdıty? Ca' ni pın. ¿Pın jayı huaad Dios yaj'ıxpıcy? Ca' ni pın.” Oy ca' pın huınjıhuıy jecy'ajty nej Dios yhuınma'ñymıdıty, jadachambi ñıch ajt nhuınjıhuıym nej Cristo yhuınma'ñymıdıty.

3

Je hıdıbí ajcxy mıbjıcp ytungıxy ma Dios

¹ Mıgügtıjc ajcxy, co tı n'oyıch ma mııch ajcxy, chi nmıdmıydaaccıxy jadu'n nej jıhuıy mııch ajcxy mhıunma'ñymıdıty nej naaxhuıñjıy ajcxy yhuınma'ñymıdıty hıdıbí ca' ymıbjıccıxy. E ca' anajty mııch ajcxy mıdıty je mhıunma'ñ hıdıbí je Espıritu Santo yejcpy. Mııch ajcxy mmıbjıcın ma Cristo jadu'n yí nıpaady nej ma'xungdıjc ymıbjıcın. ² Tı nyaj'ıxpıccıxy Dios y'ayuc hıdıbí ca' jėbí tzip mhıunjıhuıygıxy. Jadu'n nıpaady nej jayı ajcxy yaj'ügy leche yı ma'xungdıjc, mııd co cacöbiga'ñ caayın uucın hıdıbí jemxy cidacp ma yjot. Ca' mııch ajcxy anajty tı mnayñı'ıxıyıgıxy ma mjot mhıunma'ñ nej jėbí mhıunjıhuıygıxy Dios y'ayuc yı tzipjatypi. Chambaadni ca' mnayñı'ıxıyııni ajcxy ma mjot mhıunma'ñ nej jėbí mhıunjıhuıygıxy yı tzipjatypi ayuc. ³ Chambaadni mııch ajcxy myajtuñ mjot mhıunma'ñ jadu'n nej naaxhuıñjıy ajcxy mıdıty huınma'ñ ca'pı ymıbjıccıxy, chambaad mmi'ıjxtınaaygıx yı mıgügtıjc, chambaad mnaychıp'ıjıgıx naybjıc-huäcxıgıx. Jadu'n mıdıttıccıxy nej jacjadyıı jayı ajcxy yıdıttıccıxy hıdıbí ca' ymıbjıccıxy. ⁴ Com nıjėjıty mııch ajcxy mınaangıxy: “ñıch naygomajtıp ma Pablo.” Etz nıjėjıty mınaangıxy: “ñıch naygomajtıp ma Apolos.” Jada je tıy'ajt co ca' mnay'ayuc-huınjıhuıygıxy tım jadu'n nej jayı ajcxy ca' nay'ayuc-huınjıhuıygıxy hıdıbí ca' mıdıty Dios yjhui'ñ ymic'ajt.

⁵ ¿Pın je' je Apolos? ¿Pın je' je Pablo? ñıch Pablo etz Apolos nımetz ajcxy nduñ ma Dios ytung, e ñıch mııch ajcxy nyajmıbjıccıxy Cristo. ñıch ajcxy nduñ nıdüg nıdüg je tung hıdıbí Dios xymooyıch. ⁶ ñıch jayıjp'aty mııch ajcxy tı nyaj'ıxpıcyıch, e Apolos jac'axam. Jadu'n mııch ajcxy nıpaady nej tög moc cam hıdıbí ñıch tı nıpy, e Apolos jac'axam tı pıdägy nıı. Per Dios tı yajyeegy je moc. ⁷ Ca' ytımyñejıty pın tı yñıpy, e pın tı pıdägy je nıı. Dios yı tögpaıc copıcyıp. Com yı yajyeecp je moc. ⁸ Yı' hıdıbí nııp etz yı' hıdıbí nıı pıdacp, quıpxyaty ajcxy. Dios yegamb je oy'ajt ma nıdüg nıdüg jadu'n nej anajty tı ytungıxy. ⁹ Com ñıch etz Apolos naymıgüg'ajtıbıch ajcxy ma Dios ytung. Jadu'n mııch ajcxy nıpaady nej Dios ycam hıdıbí Apolos tı tuñ etz hıdıbí ñıch tı nduñ.

Nañ jadu'n mııch ajcxy nıpaady nej tög tıjc hıdıbí Dios ycojpy. ¹⁰ Dios tı xyajnıbıcyıch yı' ytung ndunıpyıch. Tı nyaj'ıxpıcyıch mııch ajcxy Dios y'ayuc ytıy'ajt. Jadu'n ñıch nıpaady nej tög pojtzpı oybí hıdıbí tı yajtzondägy je tzaadıjc poch. Chi huıngjıy xyjacyaj'ıxpıccıxy. Jadu'n yı' nıpaady nej huıngbí pojtzpı hıdıbí je tzaadıjc poch jacıjıppodzıyb. Copıcy co nıdüg nıdüg hıdıbí yaj'ıxpıcp Dios ytıy'ajt yajxon yaj'ıxpıccıxy. ¹¹ Dios tı pıdägy Jesucristo tögpaıc hıdıbí huaad nmıbjıcım, e ca' huaad pıdacy huıngbí. Jadu'n Jesucristo nıpaady nej tög tıjcpoch chondägy. ¹² Co pınjaty yaj'ıxpıcy Dios y'ayuc ytıy'ajt tıydudägy, chi jadu'n nıpaady nej jıhuıy pınjaty tıjcpojtզ

müid ori, müid plata etz müid tzaa oyjatypi. Pinjaty ca' yaj'ixpicy yajxon Dios ytiy'ajt, jadu'n nipaady nej jihuüy pinjaty tijcpojtzp müid quipy, müid miy, etz müid moc'aay. ¹³ Jiini co anajty xii tiempo paady mina Cristo tiyduna'n yi' yjáy huin'it ñiguëxigipy nej Dios ytumbi ajcxy ti ytungixy co ti yaj'ixpijccixy. Niguëxigip pen oy ti yaj'ixpijccixy Dios ytiy'ajt, o pen ca' oy ti yaj'ixpijccixy. Jadu'n nipaady nej Dios jün pidägy ma je tijc, e je quipy, je miy, etz je moc'aay tigoydähuipy ma je jün. Etz je ori, plata etz tzaa oyjatypi ca' ytigoydähuipy müid je jün. ¹⁴ Peni oy yajxon pinjaty ti yaj'ixpicy Dios ytiy'ajt, chi Cristo premio möhua'n jada jäy co ooy yajxon ti yaj'ixpicy. E jadu'n yi' ytung nipaadip nej je ori, plata, etz tzaa'oyjatypi huidibi ca' ytiigooy ma je jün. ¹⁵ Pen je Dios ytumbi ca' oy yajxon ti yaj'ixpicy Dios y'ayuc ytiy'ajt, chi ca' premio pada'n. Jadu'n yi' ytung nipaadip nej je quipy, je miy, etz je moc'aay huidibi ti ytigoy ma je jün. Jadu'n nipaadip müid jada jäy nej jihuüy ti ñaxy jünjoty, e ti ytigoydäy ma je jün tijaty ymüid, je'yi yjugy'ajtin ti yajtzögy.

¹⁶ ¿Nej ca' mnejhuüygyxy? Pen Dios yjihui'n ymic'ajt yajpat ma miich ajcxy, jadu'n nipaady nej jihuüy Dios ci'm ti chinaydacpicy ma miich ajcxy, nej jihuüy miich ajcxy Dios xytijc'adyii. ¹⁷ Pen ji pinjaty huidibi yajhuindigoy Dios chinaydac, huin'it Dios yajtigoya'n jada jäy. Yi Dios chinaydac huadz'it amay'it yi', com Dios ti chinaydacpicy ma miich ajcxy huidibi mibijccixp.

¹⁸ Ix mnayhuin'ünigix ci'm. Pen nidügti miich ajcxy mnaydiyii co oy ixpicyity ma naaxhuiñjáy y'ixpijcin, copicy jäydigoyipy yi' y'ixpijcin, jigix ixpigipy Dios ytiy'ajt. ¹⁹ Yi naaxhuiñjáy y'ixpijcin jadu'n nipaady müid Dios nej tzuu huinma'n loci huinma'n. Paady jadu'n yjaybetyity ma Dios ñecy ma jadu'n ymina'n: "Dios yajpocycähuip yi' ixpicytijc müid yci'm'ayuc müid co chachnaygömayii." ²⁰ E jadu'n yjaybetyity jadüg'it ma Dios ñecy ma jadu'n ymina'n: "Je Huindzin Dios ñejhuüy co yi' ixpicytijc y'ayuc yhuinma'n ca' choobaady." ²¹ Ni pin ca' huaad amij agix ñayjihuiyii, müid co mijnicxpety oyñipin y'ayuc. Miich ajcxy müid'ajttaayb tüg'óciy tijaty. ²² Miich ajcxy müid'ajtpy Pablo, Apolos etz Pedro. Nañ jadu'n miich ajcxy müid'ajtpy je naaxhuiñybi, je tzajp, je jugy'ajtin, je o'cin, je xii je tiempo huidibi ji yajpatp, etz huidibi mim cidaacp. ²³ Je Cristo müid'ajtpy miich je' ajcxy ci'am etz Dios ymüid'ajtpy Cristo ci'am.

4

Je apóstoles ajcxy ytung

¹ Jëbi jadu'n co ich etz Apolos, ich miich ajcxy xytijcixy Cristo ytumbi huidibi Dios ti xyajnibijccixyich, nyaj'ixpijccixyich etz nguend'ajtcixyich yi' y'ayuc ytiy'ajt huidibi jecy'ajty ca' pin nejhuüy huinjihuüy. ² Pinjaty cuend'ajtp huinjáy yje', copicy tiydudägy ytunipy, jaydëbi yi' yhuindzin yjäygidägyyb yi' ytung. ³ Per ca' ooy nduñich cuendi co miich ajcxy xyajciyöy xyajtecyyöyich nbcy. Nañ jadu'n ca' ooy nduñich cuendi co ixypy tüg juez yajciyöy yajtecyyöyich nbcy. Nañ jadu'n ca' nyajciyöyich nyajtecyyöyich ngi'mbcyich. ⁴ Ca' nayjihuiyijich co nmidundigooyich miich ajcxy. Ca' jadu'n nmina'nich co ca' ma ndundigooyich. Hue' ajt nHuindzin Jesucristo yi' je' xyajciyöyip xyajtecyyöyip ich nbcy, ca' jac pinjaty. ⁵ Paady yixpi ixmajtzcix jadu'n nej miich ajcxy xypocy'ijxcixy jayijpni ma ca'ni Jesucristo ymiñ jadüg'oc ya naaxhuiñ. Ahuixcix co Jesucristo yajniguëxigaani je jäy ajcxy ypocy huidibi cham ca' ñiguëxigy, huidibi jadu'n nipaady nej jihuüy yuch y'ity agootztuuby. Jesucristo co anajty ymiñ jadüg'oc, chi yajniguëxigipy nej

jäy ajcxy yjot yhuinma'ñ miiidity. E Dios nidüg nidüg jäy cömaya'ñ pen oy ti ytuñ, e ca' cömaya'ñ pen ca' oy ti ytuñ.

⁶ Migügtijc ajcxy, ci'm ti naybidägyiiyjich miiid Apolos jadu'n nej tüg iixpejt ma jada tiy'ajt huiidibi cham ti nyajnijayiiygixp. Jadu'n ti nduñich miiid miich ajcxy m'oy'ajtin ycixpi, jigix jëbi miich ajcxy m'ixpijccixy jadu'n nej jëbi mguydundaygixy Dios ytiy'ajt, e ca' mjactungixy huiidibi Dios ycapxcödujc ma ñecy. Nañ jadu'n iich ti nduñich miiid Apolos nej tüg iixpejt, jigix miich ajcxy ca' mnaygömayiib ci'm, e ca' mminaangixy co mnaygomájtzigixy ma tüg Dios ytumbi, e jadüg m'ixtijcixy. ⁷ ¿Pín ti xyajnajxcixy jadu'n nej jihuüy ajcxy ooy mgömayity? Ca' ni pín. ¿Ti miich ajcxy miiidity, huiidibi Dios ca' ti xymoogyixy? Ca' ni ti. E pen Dios ti xymoogyixy tijaty ajcxy mmiiidity, ¿na'amy co mnaygömáygixy ci'm, jadu'n nej jihuüy ci'm ti mganar'ajtcixy tijaty ajcxy mmiiidity?

⁸ Jadu'n miich ajcxy mnaybidáacigixy nej jihuüy ti mgüxigixy, nej jihuüy ti mgomeeñygojixy, nej jihuüy mrey'ajtcixy, e ca' mdzojccixy co nyaj'ixpiyipich. ⁹ Miich xytijcixyich nej jihuüy iich ajcxy apóstoltijc Dios ti xypidaaccixich nej huiidibi ca' ytimcapxpaadyity, nej huiidibi ypocy co'ögiiyb, co ángeles ajcxy etz jäy ajcxy xyñixíccixyich xyñiyáaxcixyich. ¹⁰ Miich ajcxy xytijcixyich co iich ajcxy apóstoltijc jadu'n nej jäy tzuu locip co ndúngixyich miiid Cristo ycixpi. E miich mnaybidáacigixy co'ayuc cohuinma'ñ co ti mmibijccixy Cristo. Miich ajcxy xytijcixyich co ca' ti mic'ajt ajcxy miiidityich, e miich ajcxy mnaybidaacip nej jihuüy ooy ti mmicpijccixy, nej jihuüy ooy mgömayity, e iich ajcxy ca' nyaj'ixaangixyich. ¹¹ Chambaad iich ajcxy nyuubögyiiyjich etz ndidziyijich. Minaajity n'íjtcixyich ca' iich ajcxy nhuit. Jäy ajcxy xyñi'ojiiygixyich etz xyhuingoixy xyjijpcójxcixich, ni ndijc iich ajcxy ycaca'tcixy. ¹² Ndúngixyich xuuyii miiid ngi'm ngijich. Co pinjaty xyñi'ojiiygixyich, chi n'adzóogixyich miiid oy ayuc. Co iich ajcxy xy'ixhuidityich xypahuidityich, ooy nmecxtújccixyich yi tzaachypi. ¹³ Co pinjaty jibic xyñigápccixyich, chi huinma'ñ ixtáaygixyich oy'amy miiid mecxtujcin n'ihuújcixyich ngapxhuújcixyich nej jëbi y'ayuc-huinjihuüyigixy. Ca' naaxhuiñjyäj ajcxy xychójccixyich. Ixti chambaad jadu'n ajcxy xy'íjxcixyich nej püx, jadu'n iich ajcxy nipaady nej jibicpi huiidibi ca' jäy ajcxy tzocy.

¹⁴ Ca' iich miich ajcxy nyajnijayiy jada ayuc co nyajtzöydunaangixy. Hue' janchtiy jada ayuc nyajnijayiyb ajcxy co ngapxhuijáangixy. Jadu'n ndzojccixy njihuüyigixy nej ndzocyich njihuüyich ngi'm'ung. ¹⁵ Oy ixypy yjanchity co miich ajcxy miiid majc mil huindzindijc huiidibi xyaj'ixpijccixy Cristo ytiy'ajt. Per tügpaicpi je mhuindzin huiidibi oga'n xyajmibijcy ajcxy Cristo, ca' nan canaag. Iich jadu'n oga'n ti nyaj'ixpicixyich miich ajcxy Jesucristo ytiy'ajt nej jëbi ajcxy m'alma ñidzögipy. Paady ycixpi jadu'n iich nipaady nej miich ajcxy mdeedy ma mmibijcin. ¹⁶ Iich miich ajcxy nimaayb mictägy, com ti nyajmibijccixy Cristo oga'n, paady cuydungix ajcxy Dios ytiy'ajt, jadu'n nej iich nguyduñich.

¹⁷ Paady ycixp nguexyich Timoteo ma miich ajcxy. Yi Timoteo ooy ndzocyich ooy njihuüyich. Ti iich Timoteo nyajmibicyich Cristo, e ooy xycapxymidooyich yajxon, jadu'n yi' nipaady nej ngi'm'ungich. Yi Timoteo xyajjäy medzip miich ajcxy je ayuc je tiy'ajt jadu'n nej nyaj'ixpicixyich ma tüg'óciy cajp ma yi jäy ñaymújcigixy huiidibi miiidaccixp Jesucristo. ¹⁸ Cham nije' nije' miich ajcxy amij agix mnayjihuüyii co jadu'n mminaangixy co ca' nicxy n'ixa'ñich miich ajcxy jadüg'oc. ¹⁹ Per ca' jadu'n mminaangixy co

ca' nnícxá'ñich ma miich ajcxy. Tzoc nícxibich ma miich ajcxy, pen Dios jadu'n tzojcp. Co anajty jim nmechich, huin'it ca' n'amído'o'ida'ñich yí' ajcxy y'ayuc huídibi amij agix najjihuúyip. Hue' janchtiy nejhuíhua'ñich pen ymíid yí' ajcxy Dios ymic'ajt chög'ajt. ²⁰ Pinjaty míid Dios ymic'ajt Dios chög'ajt, je' yajniguëxícp Dios y'ane'mín. Pinjaty míid oyñiti ayuc, ca' je' yajniguëxígip Dios y'ane'mín. ²¹ Co nnícxibich jim ma miich ajcxy, ¿ti ajcxy mdzojccixyp ndunípyich? ¿Nej oy nminícxibich ma miich ajcxy tüg matz jigix ajcxy nhuójpíxipy? o ¿Mdzojccixyp co nnícxibyich ma miich ajcxy míid yungnaxy njot nhuinma'ñich, etz oy'amy ajcxy nmigapxipy, jadu'n nej jihuúy ooy ndzojccixy njihuúyigixy?

5

Moy ajcxy castigo tüg jáy huídibi anajty tí ytundigooy

¹ Mayjáy nejhuúy co ma miich ajcxy jim tüg yéydíjc huídibi tundigooyb míid tüg töxyjáy. Nígi yí' ytundigooy ca'ydi huídi ajcxy ca' Dios y'ayuc míjpidaci. Ti nnejhuíyich co jim tüg yéydíjc huídibi míiddzinaayb ycoo'uu. ² Jim miich ajcxy míidty je míjpocytumbi, e miich ajcxy amij agixy mnayjihuúyigixy co ajcxy mdzach'ixpícyity ma Dios ytiy'ajt. Jac'oy co ixipy mdajcixy mmaygixy. Yajpidzimgix ma miich ajcxy yí jáy huídibi jadu'n tundigooyb. ³ Ca' ytimyñejity co ca' nyajpaadyich jim ma miich ajcxy. Jadu'n nipaady nej jihuúy ích njimíty, míid co ooy njihuúyich nej miich ajcxy mjaítcixy m'ayoogixy. Paady ycíxpi tí nyajpocycáyich míid Jesucristo y'ane'mín yí jáy huídibi jim ooy míj ytundigooy, tím jadu'n nej ixipy jim nyajpaadyich ma miich ajcxy. ⁴ Huomujctaaygix yí mibíjcpíidíjc, e jadu'n nipaadípy nej jihuúy ích njimíty quipxyi míid miich ajcxy. Huin'it miich ajcxy míid'ájtíxipy ajcxy ajt nHuindzín Jesucristo y'ane'mín ymic'ajt. ⁵ Míid je ane'mín mic'ajt huídibi Jesucristo tí xymöyich, myajpidzimípy je pocytumbi ma miich ajcxy. Jadu'n míjhuin nipaadípy nej jihuúy myajcídígíygixy je mujcu', jaydëbi yí' ñinícx ytigoyípy, per je' y'alma nídzögíp mína anajty ích ajt nHuindzín Jesús yhuimbity ya naaxhuíñ jaydëbi tíydunípy jáy ajcxy míid ypocy ycíxpi.

⁶ Ca' mnaygömáayigixy cí'm míid huídibi mdungíxyp. ¿Nej ca' mnejhuúyigixy nej jáy mína'ñ co levadura huídibi ca' y'oyity yajhuindigooyb tüg'ócíy yí harina jích? ⁷ Jadu'n je pocytuní nipaady nej levadura huídibi ca' y'óyity, paady ycíxpi yajtígooygix je pocytuní nej anajty mdundígóoygixy taabi anajty ajcxy ca'ni mmibíjccixy. Jadu'n mdúngíxipy, jigix jëbi m'íjtcixyp huädz ca' ma pocy. Co jadu'n mdúngíxipy, jadu'n nipaadíp miich ajcxy nej tzajcaagy oyjatypí. Nejhuúybich co miich ajcxy tí mbocyñíhuaatzcixy, com Cristo nayyejci huen yaj'ögyi míid ajt nbocy ycíxpi. Jesucristo jadu'n nipaady nej ajt ngöbixy mang huídibi míid nhuindzígíyím Dios míid ajt nbocy ycíxpi. ⁸ Tzoc tzinaayím míid huädz njot huädz nhuinma'ñ, jadu'n nipaady nej judíojáy co ajcxy amay'ajtcixy yí pascua xí. Tzoc yajtígooyím ma ajt ndzinaayín njugy'ajtín yí jíbíc jot jíbíc huinma'ñ. Tzoc cuyduním Dios ytiy'ajt.

⁹ Tí nníjayíygixy jayhuin co ca' huaad mígüg'ájtígixy pínjaty huídibi tundigooyb míid töxyjáy ajcxy. ¹⁰ Ca' nan jadu'n nmína'ñich co túccí'yí mbuhuáctútcíxipy yí naaxhuíñjáy ajcxy huídibi ca' ymibíjccixy, huídibi tundigooygixp míid töxyjáydíjc, huídibi ooy y'adzojccixy, huídibi ajcxy meetzp, huídibi ajcxy tzaadzech quipychech ojadaítcixp. Co ixipy túccí'yí mbuhuáctútcíxipy yí naaxhuíñjáy ajcxy, copícy co ixipy miich ajcxy mbídzimgix ya naaxhuíñ. ¹¹ Jayhuin tí níjayíygixy co ca' huaad mnaymígüg'ájtígixy míid yí jáy ajcxy huídibi naydíjígixp co ymibíjccixy, je

huidibi tundigooygixp mïd töxyjäydijc, huidibi ajcxy ooy adzojccixy, huidibi ajcxy ojadajtp tzaadzech quipychech, huidibi ooy ycapxtigooygixy, huidibi ajcxy amügy jäy, etz huidibi ajcxy meetzp. Nañ ni ca' huaad mgaymujccixy m'uucmujccixy mïd yi' ajcxy. ¹²⁻¹³ Com ca' yhuaadity co ïich nyajcïyöyipy nyajtecyöyipy yi jäy ajcxy ypocy huidibi ca' mijpïdaaccixy Jesucristo. Dios ci'm yajcïyöyam yajtecyöyam yi' ajcxy ypocy. Hue' janchtiy copicy co miich ajcxy myajcïyöyip myajtecyöyip yi mïbijcpïdijc ajcxy ypocy. Yajpïdzimgixp yi pocytumbi ma miich ajcxy.

6

Tzip capxy ma je juez ajcxy huidibi ca' ymïbijccixy

¹ Pen xymïdundigooyb tüg mïbijcpi, ¿nej oy mnayjihuiyïi co nicxy mxïy yi mmïgüg ma yi tungmïdipi huidibi ca' mïbijccixy Dios y'ayuc? ¿Cay jac'oy co myaj'abigipy je mïbijcpïdijc ajcxy, e jim y'oyïhuipy je ayuc nej anajty ti xymïdundigoy? ² ¿Nej ca' mnejhuïygixy co yi jäy ajcxy huidibi Dios ti ypocyhuinmëecxigixy, yi' ajcxy yajcïyöyamyb yajtecyöyamyb yi naaxhuiñjây ajcxy ypocy huidibi ca' mijpïdaaccixy Dios? Pen miich ajcxy myajcïyöyip myajtecyöyip yi naaxhuiñjây ajcxy ymïjpcy, ¿nej co ca' mjaïtcixy nej ajcxy myajcïyöyipy myajtecyöyipy yi mïbijcpïdijc ajcxy ypocy huidibi ca' ytimymij ytimycajeejity? ³ ¿Nej ca' mnejhuïygixy co miich ajcxy myajcïyöyamyb myajtecyöyamyb ixti yi ángeles ajcxy ypocy? Pen miich ajcxy myajcïyöyamyb myajtecyöyamyb yi ángeles ajcxy ypocy, niçi ca' chipity co ajcxy myajcïyöyipy myajtecyöyipy yi mïbijcpïdijc ajcxy ypocy huidibi tzinaayb jugy'ajtp ma jadachambi xï tiempo. ⁴ Pen miich ajcxy mnaymïdundigóoyigixp, ¿nej co nicxy mbïdaaccixy yi mxïhuin ma yi jäy ajcxy huidibi ca' yajpaady ma miich ajcxy myöymujccixy? ⁵ Jadu'n nnimáaygixyich miich ajcxy, jaydëbi mdzöydu'njihuiygixy mïd jada ycixpi. ¿Nej ca' yajpaady ma miich ajcxy ni tüg yëydijc huijy ycuipi huidibi jëbi yaj'oyïy je capxy je ayuc ma je mïbijcpïdijc ajcxy? ⁶ ¿Nej ooy jada ytimycopicyity co yi mïbijcpïdijc ajcxy ñayxïhuigixipy ma je tungmïdipi huidibi ca' mijpïdaaccixy Dios?

⁷ Co miich ajcxy mnayxïhuigixy ma cajp tungmïdipi, je' je tiy'ajt co ca' ajcxy mguydúngixy Cristo y'ayuc ytiy'ajt. ¿Nej cay jac'oy co mnaymïmecxtújcigixipy, ca'ydi co mnayxïhuigixy? ¿Nej cay jac'oy co xytigóoyigixipy tijaty, ca'ydi co mnayxïhuigixy? ⁸ Ma yjapadyïi ixipy mnaymïmecxtújcigixy, chi miich ajcxy ac mïbijcpïdijc naymïdundigóoyigixp, e nañ jadu'n mjanaymëetzigixy ti ajcxy ymïd.

⁹ ¿Nej ca' mnejhuïygixy co yi jäy ajcxy huidibi tundigooyb, ca' ajcxy it lugar pada'ñ ma Dios y'ane'my? Ca' mnayhuin'ingixy, ca' ajcxy it lugar pada'ñ ma Dios y'ane'my yi jäy ajcxy huidibi migapxtigooyb töxyjäydijc, huidibi ajcxy ojadajtp tzaadzech quipychech, huidibi ajcxy migapxtigooyb ymïgüg ytöxyijc, huidibi ajcxy adöxyñi'aa. ¹⁰ Ca' ajcxy it lugar pada'ñ ma Dios y'ane'my huidibi ajcxy meetzp, huidibi ajcxy tijaty adzojcp, huidibi ajcxy amügyjäy'ajtp, huidibi ajcxy capxtigooyb, etz huidibi ajcxy ayucmïhuïdijtp. Nidüg'óciy yi jäy ajcxy huidibi jadu'n tundigooyb, ca' ajcxy it lugar pada'ñ ma Dios y'ane'my. ¹¹ Jadu'n anajty nijëjity miich ajcxy mdundigooygixy jecy'ajty, per co ti mmïbijccixy Cristo, chi Dios ti xyhuinmecxy ajcxy mbocy, e ti yajhuäch je jïbïcpi ma ajcxy mjot mhuinma'ñ, etz mnayyéjcigixy amumdügjot ma Dios. Co miich ajcxy mmïjïpïdaaccixy je nHuïndzin Jesús yxï e xy'adigïygixy xyjottigïygixy Dios yjihui'ñ ymïc'ajt, paady ajcxy ti m' ahuimbïjtcixy tudägy ma Dios yhuïnduu.

Je tudägy'ajt'n hu'idibi ijtp ma ajt ndzinaacy'n

¹² Janch tiy'ajt nej jäy ym'inaangixy co jëbi huaad tungixy hueñytiijity hu'idibi ñijot'ajtcixyp. Per ca' tüg'óciy hu'idibi jäy ajcxy tuñ y'oyjäygidaacnity. Janch jadu'n jëbi p'injaty tunipy hueñytiijity, per ca' huaad ym'imadägyii je hu'idibi ajcxy ytumyb. ¹³ Janch tiy'ajt nej jäy ym'inaangixy co je jicxy p'icy ytungbaady ma je jäy y'aa ym'ox, e je aa möx ytungbaady m'iid je jicxy p'icy ycixpi. Per Dios yajcödigoyamyb je jicxy p'icy, e nañ jadu'n yajcödigoya'ñ je jäy y'aa ym'ox. Per nañ tiy'ajt co Dios ca' ti yaj'oyiy je yëydijc ñin'icx, co midundigooyipy töxyjäydijc. ¹⁴ Dios ti yajjugyp'icy jadüg'oc ñich ajt nHuindzin Jesucristo co y'o'cy. Nañ jadu'n Dios m'iid ym'ic'ajt co xyajjugyp'igaanim jadüg'oc co anajty ti n'o'cim.

¹⁵ ¿Nej ca' mnejhu'iy miich ajcxy co yi mnin'icx ajcxy Cristo yi' yje'? ¿Nej cay Cristo anajty midundigooyibich co n'nicxy m'iidm'äyich yi töxyjäy hu'idibi jibic-huinma'ñ m'iid? ¿Ca' jadu'n y'óyity nim'ina! ¹⁶ ¿Nej ca' mnejhu'iygixy co tüg yëydijc puhuäg'iy tüg töxyjäy hu'idibi jibic-huinma'ñ tumb, tügity ajcxy y'ijtcixy? Com jadu'n yjaybetyity ma Dios ñecy, ma Dios jadu'n ym'ina'ñ: "Nimetz y'idaangixy jadu'n nej tügpi nin'icx." ¹⁷ Co tüg jäy m'iid y'ity yi Huindzin Jesucristo, huin'it je jäy yjihu'i'ñ ym'ic'ajt etz Dios yjihu'i'ñ ym'ic'ajt y'ijtcixy tú'ciy.

¹⁸ Ixmajtcix je jibic-huinma'ñydun'i, ca' mdundigooygixy m'iid töxyjäy ajcxy jibic-huinma'ñydumbi. Yi jacjadyii pocy hu'idi jäy ajcxy ytumyb, ca' yi' ajcxy midundigoy nin'icx. Per co ytundigooygixy m'iid töxyjäy ajcxy, huin'it janchtiy yci'mnin'icx anajty ymidundigooygixyp. ¹⁹ ¿Nej ca' mnejhu'iygixy co je Esp'iritu Santo hu'idibi Dios xymooyim, ti chinaydacp'icy ma miich ajcxy mjot mhuinma'ñ? Paady ycixpi miich ajcxy ca' ci'm nay'ané'migixy. ²⁰ Tzohui Cristo ti cojuy miich ajcxy mbocy, paady ycixpi ooy ycop'icyity co oybi mdungixip m'iid mnin'icx, jigix Dios cömay y'idipy m'iid co oy anajty ti mdungixy.

7

Capxhuijin ma je pijcin

¹ Cham n'adzohua'ñich je hu'idibi miich ajcxy ti xyaj'amidoobich ma je necy hu'idibi ti xyajniguéjxcixyich. Oy jadu'n co tüg yëydijc ca' ypigipy. ² Per com may yëydijc hu'idibi ooy ytundigoya'ñ m'iid töxyjäydijc, paady ycixp jac'oy co nidüg nidüg yëydijc pigipy e m'iid'idipy yci'mdöxyijc. E nañ jadu'n jac'oy co nidüg nidüg töxyjäy ypigipy, e m'iid idipy yci'm ñäy. ³ Cop'icy je yëydijc chinähuiipy m'iid ytöxyijc nej ypadyii, nan tim jadu'n je töxyjäy chinähuiipy m'iid ñäy nej ypadyii. ⁴ Com je töxyjäy ca' ane'my yci'mnin'icx, hue' ñay'ané'migixy miñ xyipy. Nañ jadu'n je yëydijc ca' ane'my yci'mnin'icx, hue' ñay'ané'migixy ymiñ xyipy. ⁵ Ca' huaad je yëydijc nimay je töxyjäy co ca' m'iid mähua'ñ m'iid pocxa'ñ. Nañ jadu'n je töxyjäy ca' huaad nimay je ñäy co ca' m'iid mähua'ñ m'iid pocxa'ñ. Jëbi janchtiy m'inaajity ñay'ayuc-huinjihuiygyixy co amay'adaangixy co Dios m'ibijctzohuaangixy ycapxtägaangixy. Co Dios m'ibijctzohuin myajm'äygixipy, huin'it jëbi máagixni pócxixni agujc jotcujc, ca'ydi je mujcu' m'imadägyii ajcxy.

⁶ Jada je' tiy'ajt nej jëbi yëydijc m'iidzinäy ytöxyijc, hue' jada capxhuijin, ca' jada y'ané'minity. ⁷ Jadu'n njadzocyich co miich ajcxy ixypy m'ijtcixy adüg jadu'n nej n'ityich adüg. Per Dios ti xymooyim nidüg nidüg ngi'mhuinma'ñ ngi'mmic'ajt. Paady ji canaagnax jäy yhuinma'ñ, e nidüg nidüg m'iid yci'mhuinma'ñ nej ytunaangixy, pen p'igaangixp o ca' ypi'gaangixy.

⁸ Jada ayuc nyajniimaaybich yi adügtijc etz yi co'ögytjic ajcxy. Jac'oy co ajcxy huen tzinaaygixy adüg, jadu'n nej ñich ndzinäyich. ⁹ Pen ca' ajcxy mimadäga'ñ yi chinaayin adüg, etz nijot'ajtcixy co ypigaangixy, jac'oy co ypijcxixy. Com jac'oy co ypijcxixy ca'ydi co cuydúngixipy ninicx chojcin.

¹⁰ Jada ayuc nyajniimaaybich huídibi ajcxy ti ypijccixy. Ca' y'oyity co töxyjäy tüg ixmach yi' ñäy. Nañ jadu'n ajt nHuindzin Jesús xymooyim jada ane'min. ¹¹ Co tüg töxyjäy ixmach ñäy, copicy co huen tzinäy adüg, e ca' huaad ypicy müd huingbi yëydijc. Jëbi janchtiy jadüg'oc pudigiy ñäy. Nañ jadu'n ni ca' y'oyity co tüg yëydijc ixmadzip ytöxyijc.

¹² ñich jada ngi'm'ayuc jada huídibi nyajniimaaybich je jacjadyii mibijcpidijc. Yi Huindzin Jesús ca' ti ane'min yecy müd jadayaabi ycixpi. Pen tüg yëydijc mibijcp tzinay müd tüg töxyjäy huídibi ca' mijpidägy Cristo, jac'oy co ca' ñay'ixmájtzigixipy, pen je töxyjäy jadu'n jotcuyc jacmüddzinähua'ñ je yëydijc. ¹³ Nañ tim jadu'n co tüg töxyjäy huídibi mibijcp tzinay müd tüg yëydijc huídibi ca' mijpidägy Cristo, jac'oy co ca' ñay'ixmájtzigixipy pen je yëydijc jotcuyc jacmüddzinähua'ñ je töxyjäy. ¹⁴ Je töxyjäy ñäy huídibi ca' mijpidägy Cristo, jadu'n yi' nipaady nej jäy huídibi ypocy ti yajnihuäch müd co ytöxyijc ti mijpidägy Cristo. Nañ jadu'n je töxyjäy huídibi ca' mijpidägy Cristo, jadu'n yi' nipaady nej jäy huídibi ypocy ti yajnihuäch müd co ñäy ti mijpidägy Cristo. Pen ca' ixypy yjadu'nity, yi' ajcxy y'ung y'anäg, hue' ixypy nipaady nej jäy ajcxy y'ung huídibi ca' mibicy. Per com ti je yëydijc etz je töxyjäy yajpocyñihuächyii, nañ jadu'n je y'ung ajcxy ti yajpocyñihuächyii. ¹⁵ Per pen je yëydijc huídibi ca' mibicy Cristo ca' müddzinähua'ñ ni jadu'ñyi yi' ytöxyijc huídibi ti mibicy Cristo, huin'it jëbi ñay'ixmájtzigixy. Nañ jadu'n co je töxyjäy huídibi ca' mibicy Cristo, e ca' müddzinähua'ñ ni jadu'ñyi yi' ñäy huídibi ti mibicy Cristo, huin'it jëbi ñay'ixmajtzigixy. Com Dios jadu'n tzocy co jotcuyc ñaymüddzináayigixipy. ¹⁶ Jëbi ñay'ixmájtzigixy com je töxyjäy ca' tiydudägy ñejhuüy pen mimadacy yñäy yajmibigipy Cristo. Nañ jadu'n je yëydijc ca' tiydudägy ñejhuüy pen jëbi ytöxyijc yajmibigipy Cristo.

¹⁷ Oy ixypy ñejity jada tiy'ajt cuydúngixy. Copicy co nidüg nidüg miich ajcxy mdzinähuiipy mjugy'adipy jadu'n nej Dios ti xyajni'ixiygixy mdzinaayin mjugy'ajtin, e jadu'n nej anajty myajpatcixy co Dios xyhuin'ixy jëbi mmibigipy Cristo. Yi jadu'mbi ane'min nyaj'ixpijcpyich yi mibijcpidijc ma tüg tüg cajp. ¹⁸ Yi jäy huídibi ti yajtiy'ajttiy jayjip, e Dios yhuin'ixyii jac'axam, huen jadu'nity, ca' huaad yajtigoy je iixpejt nej ti yajtiy'ajttiy. E yi jäy huídibi ca'ni yajtiy'ajttiy e ti yhuin'ixyii Dios, huen jadu'n y'ity, ca' ycopicyity yajtiy'ajttihuipy. ¹⁹ Ca' ytimyñejity pen miich ajcxy ti myajtiy'ajttiy, o pen ca'ni myajtiy'ajttiygixy. Huídibi copicyip, mguyduunip ajcxy Dios y'ane'min ycotujcin. ²⁰ Nidüg nidüg mibijcpi huen ijtcixy nej anajty yajpatcixy co Dios ajcxy yhuin'ixy. ²¹ Pen miich anajty codoogiy tumb ma tüg jäy co Dios ti xyhuin'ixy, ca' mdajy may müd yi' ycixpi, hui'm müd mhuindzin. E pen mhuindzin a'ixiyb co mbidzima'ñ ahuätztuum, jëbi mbidzimy ma codoogiy anajty m'ity. ²² Pinjaty codoogiy ijtp ma yhuindzin co mibicy ajt nHuindzin Jesucristo, chi Jesús yi' yajnihuädziäctüdyii ma yi pocy y'ane'myii. Pinjaty tungixp yci'ndung, co mibicy ñich ajt nHuindzin Jesucristo, chi jadu'n nipaady nej jihuüy codoogiy y'ity ma Cristo. ²³ Tzoohui ooy Jesucristo xycojuuyi miich ajcxy mbocy, paady ycixpi cuydúngix ajt nHuindzin Jesucristo y'ayuc ytiy'ajt. E ca' mguydúngixy naaxhuiñjy ajcxy y'ayuc ytiy'ajt huídibi ajcxy xpidägip ma pocy xy'ane'mgixy. ²⁴ Migügtijc ajcxy, nidüg nidüg mibijcpi, huen ijtcixy nej anajty yajpatcixy co Dios yhuin'ixy ajcxy.

²⁵ Jada ayuc nyajniimaaybich yi mibijcpidijc huidibi ajcxy adüg yajpatcixp. Je Huindzin Jesús ca' ti tiy'ajt ahuing ti xymöyich mïd miich ajcxy ycixpi. Hue' ajcxy nyajniimaayb ahuing je huinma'ñ huidibi nmïdich. Com Dios ti xypa'ayooyich, paady ycixpi jëbi mgöbigipy ajcxy ïch n'ayuc ïch ngapxhuijin. ²⁶ Jadu'n huinma'ñ nmïdidyich co jac'oy co nidüg nidüg mij'anäg huen jac'ijtcixy nej yajpatcixy. Mïd co tzaachypï ayo'n nminajxim nyajnajxim jadachambi xï tiempo, paady ycixpi ngapxhuijyich jadu'n. ²⁷ Pen mbijcyp tüg töxyjäy, mïddzina'. Pen ca' ti pïcy tüg töxyjäy, jac'oy co ca' mbigipy. ²⁸ Pen ti mhuinma'ñ mbidägy co mbiga'ñ, jëbi mbicy, ca' anajty mdundigoy co mbigipy. Nañ jadu'n tüg töxyjay mutz'anägnip ca' anajty ytundigoy co ypigipy. Janch tiy'ajt jada co yi' ajcxy huidibi pijccixp ypadamyb ajcxy jotmay ma chinaayin. Paady ycixp ti nnimaaygixy co jac'oy co ca' mbijccixipy, e ca'ydï ti jotmay mbáatcixipy.

²⁹ Migügtijc ajcxy, jada njacyajniimaaygixpy. Hueeni xï tiempo njactzinähuaanim ya naaxhuiñ. Jadu'n nej je xï je tiempo yjacnicxni miich ajcxy pinjaty ti ypicy, tzinaaygix jadu'n nej ixypy ca' mdöxijc ajcxy mïdity. ³⁰ Miich ajcxy huidibi yaaxp etz ayo'n jihuïyb, tzinaaygix jadu'n nej ixypy ca' ti ayo'n mïdity. Miich ajcxy huidibi xondacp, tzinaaygix jadu'n nej ixypy ca' mxondaaccixy. Miich ajcxy huidibi ajuuyb adoocp tzinaaygix jadu'n nej ixypy ca' ti ajcxy mïdity. ³¹ Miich ajcxy huidibi mic'ajt comeen'ajtp, tzinaaygix jadu'n nej ixypy ajcxy ca' ti mgomeen'ity.

³² Hue' ndzocyich co ca' ti jotmay miich ajcxy mmïd'adipy ma yi mdzinaayin mjogy'ajtin. Yi jäy ajcxy adügpi ymijottigooyb ajcxy je Huindzin Dios ytung, yajjäygidäga'ñ ajcxy je Huindzin Dios. ³³ Je tiibi ajcxy ypijccixy, chi ymijottigooyb ajcxy yi' ytung ya naaxhuiñ, jadu'n nej jëbi yajjotcuyc'ajtcixy ytöxyijc. ³⁴ Nañ tim jadu'n tigachjaty yhuinma'ñ mïdity je töxy'anäg huidibi ti ypicy. Je töxy'anäg adügpi ymijottigooyb Dios ytung, etz yecy ñinicx etz yjihui'ñ ymic'ajt cixyot huinijot ma ajt nHuindzin Jesucristo. Per je töxy'anäg huidibi ti ypicy, hue' je' ymijottigooyb ti ga ti ya naaxhuiñ, jadu'n nej huaad jäygidägyii ñäy.

³⁵ Jada jadu'n ti nyajniimaaygixy mïd miich ajcxy m'oy'ajtin ycixpi. Ca' nan tzipjaty ane'min ti nmooygixy. Jadu'n ti ngapxhuijcixy jaydëbi jotcuyc mdzinaaygixy mjogy'ajtcixy, etz jaydëbi ajcxy amumdügjot mdungixy ma ajt nHuindzin Jesucristo ytung, e ca' mdungixy ametz jotmetz.

³⁶ Pen ji pin jotmay mïdity mïd ñïx ycixpi, mïd co yxï yjimijt ti yujc-huäcni, jada je' ooy ytimycapxpaadyity, jëbi tuñ huidibi y'a'ixiïyb jac'oyip, jëbi ypicy, ca' yi' ypocyity. ³⁷ Pen ji pinjaty ñïx yhui'ma'ñ jaybicy, e ca' pin ycohuanïyïi, nañ ni pin yca'adugyïi co tuñ nej tzocyin, e ñijot'ajtyp tudägy'ajt janch cixyot huinijot co yñïx yhui'ma'ñ jaybicy, oybi anajty ytumyb. ³⁸ Je jäy huidibi yñïx yajpijcp, oybi anajty ytumyb, e pinjäy yñïx cayajpijcp, nigi anajty oybi tuñ ca'ydï co ypigipy.

³⁹ Copicy co je töxyjäy mïddzinähuiipy yi' ñäy mabaad yñäy yjogy'aty. Co janch anajty yñäy y'ögy, huin'it jëbi ypigipy mïd huingbi, pen jadu'n anajty najtztzogïy. Hue' janchtiy copicy co pigipy je pin mibijcp je Huindzin Jesucristo. ⁴⁰ Ooy nigi je töxyjäy co'ögyipi agujc jotcuyc chinähuiipy yjogy'adipy pen ca' ypijctigach, jadu'n nmïdidyich nhuinma'ñ, e nminambich co naybaatip ïch nhuinma'ñ mïd je tiy'ajt huidibi je Espíritu Santo yejcp.

8

Je tzüch huidibi ajcxy yajhuindzigïyb quipychech

¹ Jadüg nax, jada ayuc ajcxy nyajnijay#yb ma yi tzüch ymiñ huidibi jäy ajcxy yajhuindzig#yb tzaadzech quipychech. Janch tiy'ajt co nidüg'óciy #ch ajt nmüd'ajtim ixpijcin. Per pen ooy mij nayjihuiyim ajt n'ixpiyity, chi amij agix nayjihuiyim. Per pen naychojcin nayjihuiyim nidüg nidüg, huin'it nyajeecim nmibijcin. ² Pen ji nidüg ma miich ajcxy ñaydiyii co y'ixpiyity, ca'ni yi' jajtäy ixpijcin huidibi jaccopicy yjadipy. ³ Co tüg jäy yajmij'aty Dios, Dios ñejhuiyb nej jada jäy yjot yhuinma'ñ müdity.

⁴ Jadu'n jada je tiy'ajt maabi je tzüch huidibi jäy ajcxy ti yajhuindzig#ygixy tzaadzech quipychech ajcxy. Nejhuiyim co yi tzaadzech yi quipychech ca' ti jugy'ajtin müdity. Ji tügpajc Dios huidibi tzinaayb jugy'ajtp. ⁵ Janch tiy'ajt co yi naaxhuiñjäy ajcxy Dios'ájtigixy canaagnax huidibi yajpatp tzajpcix etz ya naaxhuiñ huidibi ca' Diosity. Etz nañ tiy'ajt co may yhuindzin'ajtcixy huidibi ca' yhuindzinity. ⁶ Per #ch ajt n'ojadajtim tügpajcpi Dios, je Dios Teedy. Je Dios Teedy coj macx tüg'óciy huidibi ji'ajtp. Müd yi' ycixpi #ch ajt ndzinaayim njugy'ajtim. Nañ tim jadu'n nmüd'ajtim tügpajcpi ajt nHuindzin Jesucristo, e yi' huijtz'ijtaayb tüg'óciy tijaty huidibi ji'ajtp, e nañ yi' ajt xyhuijtz'ijtim.

⁷ Janch tiy'ajt co yi tzaadzech quipychech ca' ti mic'ajt müdity, per nije'jity mibijcpidijc ca' huinjihuiy jada tiy'ajt. Nijejity ajcxy jecy'ajty ooy huindzig#ygixy tzaadzech, ixti chambaadni tijcixy co yi tzüch huidibi jäy müd huindzigiy tzaadzech, tzaadzech yi' yje'. Co ajcxy tzüdzixy yi' jadu'mbi tzüch, jibic nayjihuiyigixy, nayjihuiyigixy nejjihuiy ti ytundigooygixy. Ca' tiydudägy y'ijtcixy ma ymibijcin. ⁸ Ca' Dios xycöbiganim müd je' ycixpi co ti njücxim ti ndzüdzm tijaty tzüch, o müd co ca' ti njücxim ca' ti ndzüdzm tijaty tzüch. Nañ tim jadu'n Dios ca' oybi xymöhuaanim müd je' ycixpi co ti njücxim ti ndzüdzm ti tzüch, o müd co ca' ti njücxim ca' ti ndzüdzm tijaty tzüch. ⁹ Oy Dios a'ixiy co jëbi ndzüdzm huenhuidibi tzüchity. Per müd je migügtijc ycixpi huidibi ca' tiydudägy müdity ymibijcin, tzoc naygüend'ajtim ca'ydí je' jibic yñayjihuiyii müd huidibi #ch ajt ndunim. ¹⁰⁻¹¹ Tzoc ocpidaacim co miich ajcxy mnejhuiy je tiy'ajt, e xy'ixipy tüg migüg co mgay m'uucy ma tüg mesa jüiby tigoty me je tzaadzech y'ity. Ca' jecyity co jada jäy huidibi ca' tiydudägy müdity ymibijcin, etz co xy'ixpaadipy jüiby, huin'it je' cöbiganñ je tzüch huidibi huindzig'ñ'ajtp. E jadu'n yhuimbizimy co miich jibic ijxpejt ti myecy müd yi' m'ixpijcin ycixpi, com yi' mmigüg ti ytundigoy müd huidibi miich ti mduñ. E Cristo ti y'ögy müd yi' ypocy ycixpi nañ jadu'n. ¹² Co tüg mibijcpi jibic nayjihuiyii müd co ti xy'ixy ma je caydac mdzüch je tzüch huidibi jäy ajcxy yajhuindzig#yb tzaadzech, miich anajty tundigooyb müd Cristo ytiy'ajt, müd co yi' mibijcpi jibic ñayjihuiyii. ¹³ Paady ycixp ca' ndzüdza'ñich ni mina tzüch huidibi tzaadzech yhuindzig'ñ'ajtp. Pen jadu'n nduñich, jibic ijxpejt anajty nyejcpyich ma nijejity migügtijc, e chi yi' ajcxy yhuinma'ñyigoya'ñ.

9

Je tung huidibi Pablo paatip

¹ Janch janch co jëbi nduñich huentijity huidibi ndzojcpich. Nañ jadu'n janch co Jesucristo ti xyajni#icyich jada apóstol tung. Etz janch co ti n'ixyich ajt nHuindzin Jesucristo. Nañ jadu'n janch co miich ajcxy ijxpejt'ajtp ma #ch ndung, com ti ajcxy mmijpidaaccixy je nHuindzin'ajtim Jesús y'ayuc huidibi ti ngapxhuäcxyich ma miich ajcxy. ² Ca' jecyity co jacjadyii jäy ajcxy ca' xycöbiganñich jadu'n nej Jesús xy'apóstol'adyijich. Per com miich ajcxy ti mmijpidaaccixy ajt nHuindzin Jesucristo, etz miich ajcxy mmibijcin

nidiy'ajtp co Jesús ti xyyajñibicyich jada tung, paady ycixpi copicy co ñich miich ajcxy xycöbigipyich jadu'n nej Jesús y'apóstol.

³ Jadu'n n'adzohuimbityich yí' ajcxy huidibi jibic xyñigapxip ñich ndung.
⁴ Com Jesucristo xyajñibijcich jada tung co ngapxhuäcxyich yí' y'ayuc ytiy'ajt, paady ycixpi xypatpich jadu'n co je mibijcpidijc xymöhuibich ngaayin n'uucin. ⁵ Nañ jadu'n xypaatpich co nmü'dadipyich tüg ndöxyijcich huidibi mibijcp, etz huidibi nmü'dhuididipyich tim jadu'n nej yí' jacjadyii apóstol ajcxy mü'dity, etz je Huindzin Jesús y'uch ajcxy mü'dity, etz Pedro. ⁶ ¿Nej miich ajcxy mminaangixy co ñich etz Bernabé nimejtzpajc ca' ñich ajcxy huaad ixmajtzcixy yí' ndungich co ngapxhuäcxyich Cristo y'ayuc ytiy'ajt? ⁷ ¿Huidibi soldado yí' ma je ejercito ci'm ygasto cojuy? ¿Pin ji cam nidungñyb, e ca' jicxipy je huidibi ti yaj'ity? Pin ychibo cuend'ajtp, ¿e ca' ügipy je chibo yleche? ⁸ Ca' miich ajcxy mina'niy co jäy y'ayuc jada. Nañ jadu'n jaybety y'ity ma Dios ñecy tim jadu'n nej mmina'ñich. ⁹ Com jaybety jadu'n ymiñ ma Moisés ñecy, ma Moisés jadu'n ymina'ñ: "Ca' huaad huajyuub y'ajen mbidaaci ma yam ten moody yí' trigo co yajpajc'aty." ¿Nej jëyi mü'd huajyuub ycixpi Dios jadu'n ymina'ñ? ¹⁰ Canan jëyi mü'd huaj yuub ycixpi Dios jadu'n ymina'ñ. Nañ jadu'n Moisés jaybejty jada tiy'ajt mü'd ñich ajt ycixpi. Com yí' jäy ajcxy huidibi naaxjidziztp, etz yí' ajcxy huidibi trigo yajpajc'ajtp, hue' ajcxy yijp'ijxyp co padaangixy je moc tim huidibi ajcxy ti nidungiy. ¹¹ Nañ jadu'n ñich ajcxy huidibi Jesús ytung tuunip, ti ngapxhuäcxyich Dios y'ayuc ma miich ajcxy, e miich ajcxy oybi ti mbaatcixy ma Dios. ¿Nej ca' jadu'n y'oyity co nbaadyich meñ etz jicxy picy mü'd ndungich ycixpi? ¹² Pen jacjadyii Dios y'ayuccapxhuäcxi ti paatcixy meñ etz jicxy picy ma miich ajcxy mü'd ytung ycixpi, ¿nej ca' jëbi ñigi ñich nbaadyich meñ etz jicxy picy mü'dich ndung ycixpi? Oy njamü'didyich je mic'ajt nej nja'ane'mgixy co xymöhuibyich ajcxy meñ etz jicxy picy mü'd ñich ndung ycixpi, per ca' jadu'n ti n'ane'mgixy. Jadu'n ñich tzaachypí nyajnajxich jim ma miich ajcxy, jaydëbi jäy ajcxy cöbijccixy Cristo agujc jotcujc ca' ti adzippin. ¹³ Mnejhuñyb miich ajcxy co yí' huidibi ajcxy tumb ma Dios ytijc, paatcixy ninigoobi caayin uucin. Nañ jadu'n yí' pin ajcxy huidibi iyujc yajhuindzigñyb Dios, paatip ajcxy je huindzig'ñ tzüch. ¹⁴ Nañ jadu'n je Huindzin Jesucristo ane'my co huen yajcaaygixy yaj'uuccixy etz mooygixy yhuit ytucx yí' ajcxy huidibi capxhuäcxixp yí' y'ayuc ytiy'ajt. ¹⁵ ñich ca' ti nyajtuñich jada mic'ajt jada ane'min huidi nmü'dich. Nañ jadu'n ca' jada ayuc nyajnijayñygixy, mü'd co ndzocy co pada'ñich tijaty ma miich ajcxy. Jacjotcujc co n'ögibich mü'd yuu, ca'ydi co n'ané'mibich caayin uucin ma miich ajcxy, e jadu'n tzöydu'n nbáadibyich jadu'n nej cham naygömayiijich, mü'd co ci'm nnayyajcayijich mü'd ndungich.

¹⁶ Com ca' huaad naygömayiijich co ngapxhuäcxyich Cristo y'ayuc. Mü'd co Cristo xyyajñibijcich jada tung, paady ycixpi copicy ngapxhuäcxyich Cristo y'ayuc. Ayo'n nbadaamybich, pen ca' ngapxhuäcxich Cristo y'ayuc. ¹⁷ Pen ngi'mdzójcinich ycixpi ngapxhuäcxich Cristo y'ayuc, njijp'ijxypich ixypy co jäy ajcxy xymijuyipyich. Per ca' yjadu'nity. Hue' janchtiy je Huindzin Jesucristo xyajñibijcich jada tung, e paady nduñich yí' ytung. ¹⁸ ¿Ti muju'ñ nbáadibich mü'd ndungich ycixpi? Nbáadibich jotcujc'ajtin co ngapxhuäcxibich Cristo y'ayuc jadu'ñyi, ca' ymeñygixyity. Ca' nyajtuñich je ane'min huidibi Cristo xymóyich mü'd caayin uucin ycixpi.

¹⁹ Ca' ji ni pin jäy mic'ajt mü'dity jaydëbi xy'ane'myijich. Oy ixypy ytimyñejty ti nnaybidägyijich mü'd ñich njot nhuinma'ñ jadu'n nej jihuñy tüg'óciy jäy ajcxy xy'ane'myich. Jadu'n nduñich jaydëbi jac mayjäy ajcxy nyajmibigipyich Cristo. ²⁰ Co ngapxhuäcxyich Cristo y'ayuc ma yí' judíojäy,

hue' naybidägyiijich judíojäy, jaydëbi nyajmibicyich ajcxy Cristo. Co ngapxhuäcxyich Cristo ma yi judíojäy ajcxy huídibi cuydumyb yi' ajcxy ycötujcin etz ycostumbre, nañ jadu'n ñich nguyduñich yi' ajcxy ycötujcin, jaydëbi nyajmibicyich ajcxy Cristo. Ooy yjanchity co ca' yi judío ycötujcin etz ycostumbre xy'ane'myich. ²¹ Co ngapxhuäcxyich Cristo y'ayuc ma yi' ajcxy huídibi ca' yjudíojäyity, chi naybidägyiijich jadu'n nej yi' ajcxy. Ca' nan nmınaambich co ca' nguyduñich Dios ytiy'ajt. Hue' njatytimycuydumybich Cristo ycötujcin, jaydëbi nyajmibicyich ajcxy Cristo. ²² Co ngapxhuäcxyich Cristo y'ayuc ma yi' ajcxy huídibi ca' tiydudägy ymibijccixy, chi naybidägyiijich jadu'n nej yi' ajcxy, jaydëbi nyajmibicyich ajcxy Cristo. Ma nidüg'óciy jäy ajcxy ma ngapxhuäcxyich Cristo y'ayuc, chi nbidägyich njot nhuinma'ñ nej yi' ajcxy yjot yhuinma'ñ mïdity, jaydëbi nijëjity ajcxy nyajmibicyich Cristo y'ayuc ytiy'ajt. ²³ Jadu'n nduñich tüg'óciy mïd Cristo y'ayuc ycixpi, je ayuc nej jëbi jäy ajcxy y'alma ñidzooccixy. Jadu'n nduñich, jaydëbi nbaadyich je jotcujc'ajtin etz oy'ajtin huídibi nbaatim nidüg'óciy co nmijpidaacim Cristo.

²⁴ Mnejhuügyixy co jäy ajcxy ñayboyicquípxigixy co premio padaangixy, huin'it nidüg'óciy ajcxy ñaymic'íjxigixy, per tügpajc huídi je premio patp. Nañ jadu'n miich ajcxy mijottigooygix cuydungix Dios y'ayuc ytiy'ajt, jaydëbi Dios xymóoygixipy ajcxy tüg premio. ²⁵ Tüg'óciy pinjaty nayñi'ixiiyip co ñay'ixquipxáanigixy ma iyihuijin, ooy ñayguend'ájtigixy mic, jigix jëbi ymadaaccixy co ganar'adaangixy premio huídibi ca' huinixi ajcxy mi'ijtcixy. Pero ñich ajcxy Dios y'ayuc capxhuäcxy, yi' ñich ajcxy mijottigooygixy nganar'adáangixyich huídibi ca' nimına ycixipy ytigoyipy. ²⁶ E jadu'n ñich ndung mijottigooyich, ca' yhuimbídzity agoodzity, jadu'n nejihuüy ngoxich e nipin ca ypegyii. ²⁷ Nnaychaachytumybich ngi'mninicxich, jaydëbi ngi'mninicxycapxymidooyich. Jadu'n nduñich co ti ngapxhuäcxyich Cristo ma je mayjäy ajcxy, ca'ydi nyajtigoyipyich nbremio huídibi Dios xymöhuambich.

10

Capxhuijin ma yi pin ajcxy jac-huindzigüyb quipychech

¹ Com ndzojcpich co miich ajcxy migügtijc mnejhuügyixipy co ajt nmij'ap nmijteedy mïd yhuídijty Moisés co Dios nidüg'óciy ajcxy cuend'ajttay, huinhuoy jecy'ajty mïd tüg joc. E nañ jadu'n Dios yajnihuañ yajtzoocy nidüg'óciy ajcxy ma ymídzip co ajcxy yajnaxxy je tzaptz mejy cujc'amy. ² Co nidüg'óciy ajcxy panicxy je joc, e co ñidzoocstay ajcxy nidüg'óciy ma je mejy, hue' nidüg'óciy ajcxy cöbijcy Moisés y'ane'min, e jadu'n nipaady nej jihuiy ni'amugí ajcxy yñibejty mïd Moisés yxi. ³ Nañ jadu'n nidüg'óciy ajcxy caay jicxy je maná huídibi Dios anajty yejcpy, choñ je' anajty tzajpjoty. ⁴ Etz nañ jadu'n y'uuc ajcxy nidüg'óciy je ñi huídibi Dios anajty yejcpy, com y'uuc ajcxy je ñi huídibi yajpidzim ma je tzaa. E je tzaa hue' je' anajty Cristo, e paady Cristo ymïd'ijtpy etz ypubejtpy ajcxy anajty nidüg'óciy. ⁵ Oy ajcxy Dios ooy yjapubejti, e ni may ajcxy ooy Dios yajjotma'ty, etz jahueen ajcxy yca'öctay jim mijtigíduum jecy'ajty, com ca' Dios jäygidacy je' ajcxy yhuinma'ñ.

⁶ Jadu'n nej je ayo'n yjajti mïd ajt nmij'ap nmijteedy jecy'ajty, je' ijxpejtíp ma ñich ajt, ca'ydi n'adzojcm tijaty jibicpi, jadu'n nej je' anajty ajcxy adzojccix jibicpi. ⁷ Nañ jadu'n ca' yhuaadity ca' y'oyity co miich ajcxy m'ojadajtcixy tzaadzech quipychech jadu'n nej nijëjity ajt nmij'ap nmijteedy tuñ jecy'ajty. Com jadu'n yjaybetyity ma Dios ñecy ma jadu'n ymına'ñ: "Ixtactay je jäy ajcxy caaybi uucpi, e huin'it ajcxy ypidigý etz ytigüygixy iyiiybi ejtzpi." ⁸ Nañ jadu'n ca' y'oyity co ndundigooyim mïd töxyjäy ajcxy jadu'n nej nijëjity nmij'ap

nmijteedy tuñ jecy'ajty, e iipx tugüüg mil ajcxy y'o'cy tüg xüübi. ⁹ Nañ ni ca' y'oyity co njot'ijxim nhuinma'ñ'ijxim ñich ajt nHuindzin Jesucristo, jadu'n nej ajt nmij'ap nmijteedy ajcxy idüich jecy'ajty, e may ajcxy tza'ñchüdzi, e ytigooy ajcxy yjugy'ajtin. ¹⁰ Nañ ni ca' y'oyity co nnigapxim ni'ojüym Dios, jadu'n nej nijëjity ajcxy idüich jecy'ajty, e müid je' ycixpi Dios y'ángel yaj'o'cy mayjäy ma yi' ajcxy.

¹¹ Tüg'óciy yi jadu'mbi ayo'n yajti müid ajt nmij'ap nmijteedy, e jay-bety yhuim'y ma Dios ñecy, jigix n'ijxpejt'ajtim, e jadu'n t'y'ajt nbaatim, ca'ydí ndundigooyim müid Dios, ñich ajt pinjaty tzinaayb ma jadachambi xü jadachambi tiempo huidibi janch tim huingónip ma Dios yajcixa'ñ yajtigoya'ñ jada naaxhuiñybi. ¹² Com nmüid'ajtim je t'y'ajt nej nmij'ap nmijteedy ajcxy ytundigooy, paady ycixp pinjaty yci'mhuinma'ñ pidacp co ooy mic'ajt müidity ma ymibijcin, huen naygüend'adyii, ca'ydí ytundigoy etz ypocycähuiy ma Dios. ¹³ Tüg'óciy tzaachypi ayo'n, jot'ijxin huinma'ñ'ijxin huidibi mi-ich ajcxy mminajxyp myajnaxyp, nañ jadu'n jacjadyii mibijcpidijc ajcxy minajxcixy yajnajxcixy. Per yajmij'ajtcix jot'amij'ajtcix Dios, com Dios ca' a'ixihuiy co mjacminájxcixipy mjacyajnájxcixipy tzaachypi ayo'n anaxy huidibi ca' ajcxy mmimadäga'ñ. Co anajty tzaachypi ayo'n mminajxcixy myajnajxcixy mictägy, huin'it Dios xymöhuiy ajcxy huinma'ñ jadu'n nej jëbi mminaxtaygixy myajnaxtaygixy yi tzaachypi ayo'n.

¹⁴ Paady müich ajcxy migügtijc, huidibi ooy ndzocy njihuiyich, ixmajtzcixy ca' m'ojadajtcixy tzaadzech quipychech. ¹⁵ Nyajmüidcapxy nyajmüidmiydacpy ajcxy jadayaabi ayuc, com nejhuüybich co müich ajcxy ooy oy huinma'ñ mmüidity. E jëbi ci'm mhuinmaaygixy pen t'y'ajt jada ñich n'ayuc, o pen ca'. ¹⁶ Ma je “Santa Cena” co nyajnaxxim Dioscojuyip ma Dios müid je ügy, e n'uucim. Je' je' ñidiy'ajt'ajtpy co Cristo ti xyajtügmüjcm ajt njot nhuinma'ñ co yajcruudzpejti etz ñi'py yteemy yojcy müid ajt nbocy ycixpi. Nañ jadu'n ma je “Santa Cena” co ndujchuäcxim, e ngaayim je tzajcaagy, je' je' ñidiy'ajt'ajtpy co Cristo xyajtügmüjcm ajt njot nhuinma'ñ müid ñinix co ñaygïejci ma ymidzip huen yajcruudzpedyii. ¹⁷ Oy ajt ooy njanimaayity, per nidüg'óciy ñich ajt ngaayim je tügpi “Santa Cena” tzajcaagy. Jada tzajcaagy tüg yi', paady ycixpi tügpicy jäy ñich ajt, e jadu'n ñich ajt nipaady nej tügpi ninix.

¹⁸ Oc-huinmaaygixy müich ajcxy yi Israel jäy ajcxy, co ajcxy tzützcixy je huidibi ajcxy yajhuindzigüyb Dios, chi ajcxy naydücmüjcgixy müid Dios ycixpi ma je Dios ojadajttac. ¹⁹ ñich nmïna'ñich co yi tzaadzech ca' ti mic'ajt müidity, e nañ jadu'n yi tzüch huidibi yajhuindzigüyb tzaadzech ca' jac nigí oy'ajtin müidity, ca'ydí jac huidibi tzüch. ²⁰ Jadu'n nmïna'ñich, co yi jäy ajcxy huidibi ca' mijpidaaccixy Dios, co ajcxy yejccixy yhuindzigí'ñ, hue' ajcxy yajhuindzigüyb ca'oybi, e ca' Dios ajcxy yajhuindzigüy. E ca' ndzocyich co müich ajcxy migügpigipy je ca'oybi. ²¹ Co müich ajcxy m'uuccixy je ügy ma je “Santa Cena”, ca' huaad m'uuccixy je ügy huidibi ca'oybi ajcxy yhuindzigí'ñ'ajtpy. Etz co mgaaygixy je tzajcaagy ma je “Santa Cena”, ca' huaad mgaaygixy je tzajcaagy huidibi ca'oybi yhuindzigí'ñ'ajtip. ²² ¿Nej tzoc yajjotma'tim yi Jesucristo? ¿Nej jacmic'ajt müid jada' ñich ajt, ca'ydí yi'?

Je tzojcin huidibi tüg mibijcpi huaad tuñ müid ymigüg

²³ Janch t'y'ajt nej jay ymïnaangixy co jëbi huaad nduñich huentijity huidibi nijot'ajtpyich, per ca' tüg'óciy nmigügtijcich jäygidaaccixy huidi ndumybich. Janch jadu'n jëbi huaad nduñich huentijity huidibi nijot'ajtpyich, per huidibi ndumybich ca' tüg'óciy xypubetyich ma ñich nmibijcin. ²⁴ Ca' y'oyity nnijot'ajtim ngi'm'oy'ajtin. Oy co nbubejtim nbudigüym nmigügtijc.

²⁵ Jëbi ajcxy mdzüch huen ti tzüch huidibi yajtoocp ma je mercado. Ca' ajcxy myajtiihuipy ma je tzüch chooñ, ca'ydi jibic mnayjihuiyigixy. ²⁶ Com Dios y'ayuc jadu'n ymïna'ñ: "Je Huindzin Dios yi' nihuindzin'ajtp je naaxhuiñybi, etz ñihuindzin'ajttaayb tüg'óciy huidibi ji yajpatp."

²⁷ Pen jim pinjaty huidibi ca' ymibicy, xyajnihuohuïy tüg caayin uucin ma yi' ytijc, e pen ti mhuinma'ñ mbidägy co nicxy mgaya'ñ ma yi' ytijc, oy co mgaayipy mdzüdzip huentiiyty huidibi ajcxy xymooyb. E ca' mnidihuipy myajtiihuipy ma je tzüch chooñ, ca'ydi jac pinjaty jibic ñayjihuiyii müd huidibi ti mduñ. ²⁸ Per pen je jäy xyñimaayb: "Jada tzüch ti jäy yajhuindzigiy tzaadzech." Pues ca' mdzüdzip je tzüch, jigix ca' jibic ñayjihuihuïyb je migüg huidibi ti xyñimäy co je tzüch ti yajhuindzigiy tzaadzech. ²⁹ Hue' nimiydacypich je mmigüg huidibi jibic nayjihuihuïyb pen miich mdzu'chpyi tzüch huidibi tzaadzech yhuindzig'i'ñ'ajtp. Ca' nnimiydägyich nej miich ci'm mnayjihuiyii. Ca' yjeyity co nijety jäy xyñimähuibich: "¿Na'amy co xycapx'adujcich tijaty nigoob müd co huingbi jäy jibic ñayjihuiyii müd jëgixpi?" ³⁰ Pen nyajnajxypich Dioscojuyp müd tijaty ycixpi huidibi ngaaybich n'uucypich, ¿na'amy co xyñigapxa'ñich xyñi'ojihua'ñich co ti ngay ti n'ügyich tijaty?" ³¹ Paady ycixp huentiiyty huidibi mdungixyp, pen mgaaygixyp m'uuccixyp, o jac ti ga ti mdungixy, tungix tüg'óciy müd Dios y'oy'ajtin ymij'ajtin ycixpi. ³² Ca' mdúngixipy tijaty huidibi yi' judíojäy ajcxy müd huing ñayjihuiyii. Ca' mdúngixipy tijaty huidibi yi' griegojäy ajcxy müd huing nayjihuiyii. Etz ca' mdúngixipy tijaty huidibi yi' mibijcpidijc ajcxy müd huing ñayjihuiyii. ³³ Tüg'óciy huidibi ndúmybich, hue' nduñich jigix tüg'óciy jäy jäygidägyipy huidibi ndumyibich. Ca' ni ti nduñich nej jëbi ñich ci'm nayjäygidägyiijich. Hue' nduñich müd jacjadyii jäy ajcxy y'oy'ajtin ycixpi, jaydëbi ajcxy y'alma ñidzögyipy.

11

¹ Jadu'n ndzocyich co miich ajcxy mdunipy jadu'n nej nduñich. E ñich tumbich jadu'n nej Cristo ytuuñ.

Nej huaad töxyjäydijc ajcxy yjäy'ajtcixy co migügtijc naymújigixy

² Miich ajcxy migügtijc, ngapxpatypich miich ajcxy, com miich ajcxy xyjatytimyjäymejtzpich, etz nañ mguydungixyp je ayuc je t'y'ajt huidibi ñich miich ajcxy ti nyaj'ixpijccixy. ³ Per ndzojcpich co mhuinjihuïyigixipy je t'y'ajt co Cristo nigohuajc'ajtpy nidüg nidüg yi' mibijcpi yëydijcpi. E nañ nidüg nidüg yëydijc nigohuajc'ajty ajcxy ytöxyjic. E Dios nañ nigohuajc'ajtpy je Cristo. ⁴ Co tüg yëydijc cöjuuxy cöbe'ñ ñihuäcxy capxhuäcxy je t'y'ajt huidibi Dios ti ymöyii, tüg je' tzo'ydu'ñ anajty naymöyii. ⁵ E co tüg töxyjäy cöjuxtüdy cöbe'ndüdy ñihuäcxy capxhuäcxy je t'y'ajt huidibi Dios ti ymöyii, tüg je' anajty tzo'ydu'n ñaymöyii. Jadu'n je' nipaady nej jihuiy je' ycöme'pxity cödza'm. ⁶ Pen tüg töxyjäy ca' ñaygöbe'na'ñyii, jac'oy co huen yajcöme'pxy cödza'm. Per pen je töxyjäy cho'ydu'n jihuihuamyb co ycöhuay yme'pxity, o co ycöme'pxity cödza'm, jac ñigi oy co ñaygöbe'ñyib. ⁷ Je yëydijctijc ca' y'oyity co ajcxy ycohuajc cöjuuxy cöbe'ñ m'idipy ma ajcxy Dios mibijtzoogixy o yaj'ixpijccixy Dios y'ayuc. Com je yëydijc jadu'n yi' nipaady nej Dios, e Dios yajcoj je yëydijc müd yi' y'oy'ajtin ycixpi. Per Dios yajcoj je töxyjäy müd je yëydijc y'oy'ajtin ycixpi. ⁸ Co Dios yajcoj je yajjipi yëydijc, ca' yajtuuñ je töxyjäy ycaachypajc. Hue' janchtiy co Dios yajcoj je yajjipi töxyjäy, je' yajtuuni je ñiyëydijc tüg ycaachypajc. ⁹ Dios yajcoj je töxyjäy müd je yëydijc ycixpi. E ca' nan yajcoj je yëydijc müd je töxyjäy ycixpi. ¹⁰ Paady ycixp copicy co je töxyjäy ajcxy

y'ijtcixy cöbe'ñ co Dios mibijctzoogixy o najtzcaxxiygixy Dios ytiy'ajt. Je' je' je tiy'ajt co yajpaady ajcxy ane'my, nañ jadu'n yi ángeles ajcxy yajpaatcixy ane'my. ¹¹ Per ca' ñejity, ñich ajt huídibi nmibijcim Cristo, ma ajt ndzinaayin je yëydijc ca' je' yajpaady naydüg, etz ni ca' je töxyjäy yajpaady naydüg, hue' ajcxy naymüddzináayigixyp. ¹² Com tiy'ajt jadu'n co Dios yajcojy je jayijpi töxyjäy müd je ñiyëydijc ycaachypajc. Etz tiy'ajt jadu'n co je töxyjäy ajcxy yajma'xung'ajtcixy je yëydijc ajcxy. Per Dios ti yaj'oyiydäy, e tüg'óciy jüby chondäy ma Dios.

¹³ Miich ajcxy ci'm ocminaangix oc-huinmaangix, pen oy jadu'n o pen ca' y'oyity jadu'n co tüg töxyjäy Dios mibijctzoy jaygöbe'ñ. ¹⁴ Jëbi tiy'ajt nbaatim huenma'amyity ya naaxhuiñ co je yëydijc huídibi ymüd ycöhuay yoñ ooy cho'ydu'n yecy. ¹⁵ E je töxyjäydijc ajcxy ooy ycömaypidzimigixy co ajcxy müdity ycöhuay yoñ. Com yi' je' huídí ycöbe'n'ajtip. ¹⁶ Pen jim pinjaty ca' mijotcujc'aty ñich n'ayuc, copicy nejhuihuipy co ñich ajcxy etz nañ jadu'n tüg'óciy jäy huídibi ajcxy mijpidaaccixyp Dios ma tüg'óciy cajp, cuydungixy nej ti nyaj'ixpicyich miich ajcxy, ca' pin jac huingbi costumbre müdity.

Pin tundigooyb “Santa Cenajoty”

¹⁷ Jada ayuc nyajnimähuaangixyp jadu'n nej mdungixy ma mnayyöymújcigixy co Dios m'ojadajtcixy. Ca' ngapxpaadyich miich ajcxy, com jibic yhuimbizimy jadu'n nej mdungixy. ¹⁸ Jayijp nimähuaangixy co nijëjity migügtijc ti xyñimäyich co miich ajcxy mnaybijc-huäcxigixy co mnayyöymújcigixy ma je nayyöymujctac. E ñich nmibijcpiyich ma ga ma co yjanchity nej je migügtijc ajcxy ymína'ñ. ¹⁹ Ca' yjecyity paady miich ajcxy mnaybijc-huäcxí müd ajcxy mjibic-huinma'ñ ycixpi, jaydëbi ñiguëxigy pin je' janch tiydudägy cuydumb Dios ytiy'ajt. ²⁰ Co miich ajcxy mnayyöymújcigixy ma je nayyöymujctac, jadu'n yhuimbizimy co ca' mguydungixy nej ypadyii ñich ajt nHuindzin Jesucristo ytiy'ajt co mjatungixy je “Huindzin je' ySanta Cena”. ²¹ Com co je hora paady ma yam mdungixy je “Huindzin je' ySanta Cena” nidüg nidüg miich ajcxy mgaangixy abicyjaty, e ca' mdungix cuendi yi jacjadyii migügtijc, paady nijëjity migügtijc ayuu y'ijtcixy, e nijëjity anaxy ycaangixy y'uuccixy, ixti ymuucigixy nijëjity. ²² ¿Nej ca' miich ajcxy müdity mjün mdijc ma jëbi mgaangixy m'uuccixy? Jadu'n nej miich ajcxy mdungixy ca' mmij'ijxcixy ca' mijpidaaccixy je jäy ajcxy nidüg'óciy huídibi mijpidaacp Dios. E nañ jadu'n myajtzo'ydungixy yi ayoobi jäy huídibi ajcxy ca' ti müdity. ¿Huam ñich miich ajcxy nimähuiipy? ¿Nej jëbi ngömaangixy miich ajcxy jadu'n nej mdungixy? Ca' huaad ngömaangixy miich ajcxy co jadu'n m'iditcixy.

Jadu'n nej njäymejzim ajt nHuindzin Jesús ma yi “Santa Cena”

²³⁻²⁴ Com ñich ajt nHuindzin Jesucristo ci'm xyaj'ixpicyich je tiy'ajt huídibi ti nyaj'ixpicyich miich ajcxy, co je huin'it coodz co agojñix ajcxy cäyeycy je nHuindzin Jesús, huin'it je' conigy je tzajcaagy, e co jayijp yajnaxxy Dioscojuyip ma Dios, chi tujc-huäcxí je tzajcaagy, e moy nidüg nidüg ydiscípulos ajcxy. E co ajcxy moyday, chi nimay ajcxy: “Caangix jada tzajcaagy. Jadu'n ñich jada nninícx huídibi ngiyegaamybich ma yi o'cin müd miich ajcxy ycixpi. Jadu'n ñich ti nduñich, jadu'n jada miich ajcxy mdunipy jäymejtziig müd ñich ycixpi.” ²⁵ Co ajcxy ycayday, chi Jesús nañ jadu'n conigy je ügy copí'am, e ymínañ: “Jada ügy je' jada je Dios y'ayuc jemybi huídibi Dios yajhui'my müd jäy ajcxy ycixpi, je huídibi ñich nni'py ñidiy'ajt'ajtpy. Naag'oc naag'oc m'uuccixy jada ügy tungixy jäymejtziig müd ñich ycixpi.” ²⁶ Paady naag'oc naag'oc miich ajcxy mgaangixy jada tzajcaagy, etz m'uuccixy jada ügy,

myegipy ajcxy tiy'ajt jadu'n nej Cristo y'o'cy mïid ajt nbocy ycixpi, ixti cooni anajty Jesucristo yhuimbity ya naaxhuiñ.

Nej huaad ngaayim je “Santa Cena”

²⁷ Paady ycixp pinjaty mïid ca'oyjot ca'oyhuinma'ñ caaygixy je tzajcaagy etz uuccixy je vino'ügy, huidibi ajt nHuindzin Jesús ñinïcx'ajtpy etz ñi'py'ajtpy, hue' ajcxy ymidundigooygixy ajt nHuindzin Jesús ñaaxnïcx etz yi' yñi'py.

²⁸ Paady ycixpi copicy nidüg nidüg mibijcpidijc jayijp yaj'oyihuipy yci'mjot yci'mhuinma'ñ, e huin'it jëbi cayipy je tzajcaagy etz ügipy je vino ma je “Santa Cena”. ²⁹ Com pinjaty caayb je tzajcaagy etz ügy je vino ma je “Santa Cena”, e ca' tuñ cuendi co je' je' ñch ajt nHuindzin Jesús ñinïcx etz ñi'py, hue' je' ci'm ñaymidundigoyii, e Dios tzaachytunïb mïid ypocy ycixpi. ³⁰ Paady ycixp may miich ajcxy myuumïidity mba'mmïidity, pumäy mnayjihuiyigixy. May miich ajcxy yuu ba'm xyaj'ayoogixy etz may ma miich ajcxy ti m'öccixy. ³¹ Co tiydudägy njot nhuinma'ñ nyaj'oyiyim ci'm, ca' ajt nHuindzin Jesucristo xychaachytuunim. ³² Co ajt nHuindzin Jesucristo xychaachytuunim mïid yuu ba'm, paady ycixpi jadu'n xychaachytuunim, jigix ca'ydi nidigooyim ajt n'alma yjugy'ajtin quipxyi mïid je naaxhuiñjây ajcxy huidibi ca' ajcxy Dios tzigiygixy.

³³ Paady ycixpi miich ajcxy migügtijc co ajcxy mgaya'nip m'üga'nip je “Santa Cena” nay'ahuïjigixy miñ xyipy, e jadu'n mgáaygixipy amugi'. ³⁴ Pen jim pinjaty ma miich ajcxy ooy yuubögyii, jac'oy co ycaayipy y'ügipy ma yci'mdijc jacjayijp ma ca'ni ymiñ ma je nayoymujctac. Jadu'n mdúngixipy, ca'ydi Dios xychaachytuungixy mïid co ca' oy mduungixy je “Santa Cena”. Yi jacjadyii ayuc huinma'ñ jim nyaj'oyihuibich co anajty nicxy ci'm n'ïjxcixyich miich ajcxy.

12

Je mic'ajt huidibi Espíritu Santo yejcy ma nidüg nidüg mibijcpidijc

¹ Migügtijc ajcxy, ndzojcpich co miich ajcxy mnejhuïhuipy jadu'n nej je Espíritu Santo xymooyim mic'ajt. ² Miich ajcxy mnejhuïyb co jayijp'ajty co ca'ni anajty mmibijccixy Cristo, ooy anajty je ca'oybi xyajnidigooygixy xyajtüdigoooygixy, co m'ojadajtcixy tzaadzech quipychech huidibi ca' ymidoy ca' ycapxy. ³ Paady ycixpi ndzojcpich co miich ajcxy mnejhuïhuipy co pinjaty ymina'nipy: “¡Ca' oy jây yi Jesús!” je jây huidibi jadu'n minamb, ca' je' anajty yajcapxyii je Dios y'Espíritu. E pinjaty minamb: “¡Jesús ñch ajt nHuindzin!” je' anajty yajcapxip je Espíritu Santo.

⁴ Dios yjihui'ñ ymic'ajt yejcpy ymic'ajt canaag nax, per tügpajc jëyi je Dios yjihui'ñ huidibi mic'ajt yejcp. ⁵ Ji yajpaady canaagnax Dios ytung, per tügpajc ajt nHuindzin Jesús huidibi xyajniïbjcim nije' nije' tung. ⁶ Ji yajpaady canaagnax huinma'ñ nej jëbi ndunim Dios ytung. Per tügpajc Dios huidibi xymooyim nidüg nidüg je nhuinma'ñ nej huaad ndunim Dios ytung. ⁷ Dios yajniguëxigyp ma nidüg nidüg mibijcpidijc je tiy'ajt co ajcxy mïidity yi' yjihui'ñ ymic'ajt ma ajcxy yjot yhuinma'ñ. Jadu'n Dios ytuñ mïid tüg'óciy ymibijcpidijc y'oy'ajtin ycixpi. ⁸ Dios mïid yjihui'ñ ymic'ajt ymooyb nijëjity mibijcpidijc ayuc huinma'ñ nej jëbi ajcxy yaj'ixpicy Dios y'ayuc. E nañ jadu'n Dios mïid yjihui'ñ ymic'ajt möy nijëjity mibijcpidijc xpijcin ma yi' ytiy'ajt, per tügpajc je Espíritu Santo huidibi mic'ajt yejcp. ⁹ E nañ jadu'n Dios mïid yjihui'ñ ymic'ajt möy nijëjity jây mibijcin, per tügpajc je Espíritu Santo huidibi mic'ajt yejcpy. E nañ jadu'n jacnaagity möy mic'ajt jaydëbi yajtzögy pa'mjäy. ¹⁰ E nañ jadu'n Dios mïid yjihui'ñ ymic'ajt ymooyb nijëjity mibijcpidijc mic'ajt,

jaydēbi mijhuinma'ñytúngixy milagro tungixy. E jac nijējity ymooyb mic'ajt, jaydēbi najtzcapxiiygixy Dios ytiy'ajt. E jac nijējity Dios ymooyb ixpijcin etz huijy'ajtin, jaydēbi ijxajpcixy je espíritu huídibi ca' tiy'ajt mūdity, etz nañ jadu'n ijxajpcixy je espíritu huídibi tiy'ajt mūdip. E jac nijējity Dios ymooyb je mic'ajt, jaydēbi capxcixy huingbi ayuc, etz nañ jadu'n jac nijējity ymooyb je ixpijcin jaydēbi yajñiguejicixy je huingbi ayuc. ¹¹ Per tūgpajc je Espíritu Santo huídibi ymooyb nije' nije' mibijcpidijc mic'ajt etz huinma'ñ. Ymooyb nidüg nidüg nej yi' tzocy.

Nidüg'óciy ajt nyajpaatim ma Cristo

¹² Cristo jadu'n yi' nej tūg ninīcx, je ninīcx ymūd canaag nax huídibi yu'cxp. Oy canaag jamūdity huídibi yu'cxp, per tūgpajc ñinīcx'aty. ¹³ Co nidüg nidüg iich ajt nnibejtim, chi iich ajt nyajpaatim nej tūgpicy jāy. Com Dios yjihui'ñ ymic'ajt tūgpajc yajpaady ma nidüg'óciyi iich ajt njot nhuinma'ñ, ca' ñejity pen judío jāy ajt, o pen ca' ajt njudío jāyity; pen jāy xytumbi'ajtim o pen ndunim ngi'ndung; hue' n'ijtim nej tūgpicy jāy. Dios xy'adigiim xyjottigiim yi' yjihui'ñ ymic'ajt nidüg'óciy iich ajt, paady ycixpi tú'ciy nyajpaatim, com tú'ciy nmi'ijtim Dios yjihui'ñ ymic'ajt.

¹⁴ Tūgpi jāy ñinīcx mūd canaagnax huídibi yu'cxp, huídibi mīdoob, huídibi ijxp. ¹⁵ Co ixypy je tecy jadu'n ymīna'ñ: “Ca'p iich ngijity, paady ca' nyajpaadyich ma je ninīcx.” ¿Nej paady ycixpi ca' yajpaady ma ninīcxin? ¹⁶ O co ixypy je tādzac ymīna'ñ: “Ca'p nhuinity, paady ca' nyajpaadyich ma je ninīcx.” ¿Nej paady ycixpi ca' yajpaady ma ninīcxin? ¹⁷ Co ixypy tūg'óciy je jāy ñinīcx y'oc-huin'aty, ¿ma ixypy mūdity huídibi mīdooyb? O co ixypy tūg'óciy je jāy ñinīcx ytādzac'aty, ¿ma ixypy mūdity huídibi jēbi mūd tijaty xuugyii? ¹⁸ Dios ti pidaci jāy ytecy yhuin y'ahuac etz jac tijaty ma tūgpi ninīcx jadu'n nej yi' tzojcy. ¹⁹ Pen huind'ajty ixypy ninīcx'ajtp, ¿ti ninīcx ixypy jada? ²⁰ Dios ti möy nidüg nidüg jāy yci' ytecy, yhuin y'ahuac, yjijpput etz ytādzac, per tūgpajc ñinīcx'aty.

²¹ Ca' huaad je huin ixypy nimāy je ci': “Ca' iich miich nyajmayjaty.” Nañ jadu'n ca' huaad ixypy je cohuaajc nimāy je tecy: “Ca' iich miich nyajmayjaty.” ²² Tūgpi ninīcx copicy ca'pxy tijaty mūd. Huídijaty je ninīcx ymūd oy yjaquēxigy nej jihuiy ca' y'oy'ojadajtnity, per copicy yi'. ²³ Jadu'n iich ajt njāy'ajtim. Muum ma ajt nninīcx ca' oy n'ijxim, paady nayxoixim, jigix jac'oy quēxigip. Nañ jadu'n muum ma ajt nninīcx huídibi y'oymidzo'yduni, paady nyūdzim mūd huit, jaydēbi oy quēxigity. ²⁴ Muum ma ajt nninīcx oy n'ijxim paady ca' nyūdzim mūd huit. Jadu'n Dios yaj'oyiy ajt nninīcx, jigix ma ca' oy y'ijxity, nxoixim mūd huit, jigix jēbi oy quēxigy. ²⁵ Jadu'n Dios yajcojy yaj'oyiy ajt nninīcx tú'ciy, jigix ca'ydi ñaychiptúnigixy nije' nije' huídibi yūcx ma ajt nninīcx. Tūg'óciy huídibi nmūd'ajtim ma ajt nninīcx naybubéjtigixp miñ xyipy. ²⁶ Pen pijcp muum ma je ninīcx, tūg'óciy je ninīcx jihuiy je pijcin. Pen muum ma ajt nninīcx ooy capxpaady y'ity, chi tūg'óciy je ninīcx jotcuyc ñayjihuiy.

²⁷ Miich ajcxy nidüg'óciy Cristo xyñinīcx'ajtcixyp, e nidüg nidüg miich ajcxy myajpatcixy ma Cristo ñinīcx. Jadu'n nidüg nidüg iich ajt nipaady nej huídibi yūcxp ma tūg ninīcx. ²⁸ Dios yajñibicjpy nije' nije' mibijcpidijc, jigix ajcxy yajñicxip nidüg nidüg yi' ytung. Tim jayijp yajñibijcy je apóstol ajcxy huídibi je mījtung yajñicxip. E mimetz Dios yajñibijcy nijējity mibijcpidijc huídibi najtzcapxiiyb yi' y'ayuc, je mīdugigpi Dios yajñibijcy nije' nije' je mibijcpidijc huídibi yaj'ixpijcp yi' ytiy'ajt. Dios yajñibijcy mibijcpidijc nijējity huídibi mij huinma'ñ tumb. E Dios yajñibijcy mibijcpidijc nijējity huídibi yajtzoocp

pa'mjäy. E Dios yhuin'ijx huídibi pubejtp ymigügtijc. E Dios yhuin'ijx je mibijcpídiyc huídibi ane'míp je ymigügtijc. E Dios yhuin'ijx je mibijcpídiyc huídibi jadíp nej capxíp huingbí ayuc. ²⁹ Ca' nan nidüg'óciy mibijcpídiyc huídibi Dios huin'ijxyp y'apóstol'ajtcixy. Nañ ni ca' nan nidüg'óciy ajcxy najtzcapxiygixy Dios y'ayuc. E nañ ni ca' nidüg'óciy yi' ajcxy mijhuinma'ñytungixy. ³⁰ Ca' nan nidüg'óciy mibijcpídiyc huídibi Dios huin'ijxíp ymíid ajcxy mic'ajt cötujc yajtzögípy pa'mjäy. Nañ jadu'n ni ca' ajcxy nidüg'óciy jajtcixy nej yajniguéjciixy huingbí ayuc. ³¹ Píjctzoogix cixyjot huinjot ma Dios je mic'ajt etz je huinma'ñ oybi. ñich miich ajcxy nyajniñihuipy tüg ni'aa tü'aa jac'oybi.

13

Je tzojcin je oyyäy'ajtin

¹ Co ixypy ngapxyich tüg'óciy jäy ajcxy y'ayuc, etz nañ jadu'n ngapxyich ángeles ajcxy y'ayuc, e ca' ndzocyich ca' njihuüyich nmigügtijcich, jadu'n yhuimbídzimiy ñich n'ayuc jadu'n nej tüg tambor o tüg platillo huídibi nigoob ooy ñe'my. ² E co ixypy najtzcapxiyich Dios y'ayuc, etz co ixypy njatyich tüg'óciy ixpijcin huídibi pinjaty nejhuüy etz huídibi pinjaty ca' nejhuüy, etz co ixypy nmijpídägyich Dios ymic'ajt, ixti jëbi nyajpídägyich tüg cop, pen ca' ndzocyich njihuüyich nmigügtijcich, ca' ñich ti ndzoohuity. ³ E co ixypy nmoydayich ayoobitijc tüg'óciy tijaty nmíidich, e nañ co ixypy ngiyecyich nninícx ma jäy ajcxy co huen nöctigoydäy, e ca' ndzocyich njihuüyich nmigügtijcich, ni ti oybi ca' nbada'ñich.

⁴ Yi jäy ajcxy huídibi ooy tzocy ooy jihuüy ymigügtijc, hue' ajcxy ooy mecxtujcin míidity, nañ ooy ajcxy yung naxy yjot yhuinma'ñ. Nañ ca' ajcxy ymigüg ti yajcohuindoyii, e nañ ca' ajcxy ñaygömayii ci'm. ⁵ Yi mibijcpídiyc huídibi ajcxy tzojcp jihuüyb ymigügtijc, ca' ajcxy oyñinej ycapxcixy, ca' ajcxy yci'm tzojcin adzip tungixy, nañ ni ca' ajcxy yhuindzipity, nañ ni ca' ajcxy ymigüg mijotma'tcixy. ⁶ Yi mibijcpídiyc huídibi ajcxy tzojcp jihuüyb ymigügtijc ca' ajcxy yjotcujcity co pinjaty ytundigooy. Jotcujc ajcxy co pinjaty tudägy yjäy'ájtciixip. ⁷ Co naychojcin nayjihuüyim, huin'it yajtunim mecxtujcin, huin'it nmibijctayim huídijaty tiy'ajtip, huin'it nmibijctaayim co tüg'óciy tijaty oy yhuimbídzimipy, huin'it nmecxtujctayim tüg'óciy tzaachypi ayo'n.

⁸ Yi naychojcin nayjihuüyim ca' yi' ycixipy ytigoyipy ni mina. Minip je xii tiempo ma ca' y'ocyaj'ijxnipy y'ocyajmídoonipy Dios ycapxy y'ayuc huídibi jäy ajcxy ñajtzcapxiygixyp, nañ ni ycayajmídoohuipy pin huingbí ayuc capxp, ni ycayajtzocy anajty ti diy'ajt. ⁹ Com ca' yca'pxity je ixpijcin huídibi ñich ajt nmíid'ajtim. Nañ jadu'n ca' yca'pxity je Dios y'ayuc huídibi ñich ajt nnajtzcapxiyim.

¹⁰⁻¹¹ Per co anajty nmíid'ajtim ca'pxy Dios y'ayuc ytiy'ajt, chi ycixipy ytigoyipy je ayuc huídibi nmíid'ajtim cham huídibi ca' yca'pxity. Co nmutz'ajtyich nbi'c'anäg'ajtyich, jadu'n anajty ngapxyich nmíydägyich n'iyíyich nejtyin pi'c'anäcin. Per co oy nmíj'anäciyñich, chi n'ixmajznich je pi'c'anäg'atypi huinma'ñ. ¹² Nañ tim jadu'n nyajnajxim jadachambi xii tiempo ca' n'ixpijctaayim, ca' nhuinjihuüydaayim Dios y'ayuc ytiy'ajt. Jadu'n nipaady nej jihuüy nay'a'ixnajxim ma tüg iix, huídibi ti chixni ti yjibiciyñi. Co anajty Jesús yhuimbity jadüg'oc, huin'it huädz nhuinjihuüydaayim Dios y'ayuc ytiy'ajt, com naybadaanim míid Jesús ahuin ajijp. Jadachambi magama nhuinjihuüyich. Per co nnaybadíyibich míid Jesús, huin'it nhuinjihuüydaayim nej Dios y'ixpijcin míidity, tim jadu'n nej Dios nejhuüyday nej ñich n'ixpijcin nmíidity. ¹³ Nmibigaanim Cristo huinixii

huinitempo, ca' n'ixmadzaanim nmibijcin ni mina. Nañ njjpp'ijxim co oybi nbadaanim ma Dios huinixi huinitempo. Nañ jadu'n ndzojcin njihuuyim migügtjc huinixi huinitempo. Hue' jac nigü copicyip co naychojcin nayjihuuyim ca'ydi jac ti.

14

Co huingbi ayuc yajcapxy

¹ Naychójcigixy nayjihuuyigixy miñ xyipy. Mijottigooygixy nej mbaatcixy Dios yjihu'iñ ymic'ajt canaagnax. Yi Dios yjihu'iñ ymic'ajt huidibi jac'oybi, yi' je' yejcpy mic'ajt jaydēbi mnajtzcapxyygixy Dios y'ayuc ytiy'ajt. ² Yi jāy ajcxy huidibi Dios ymic'ajt mūd jaydēbi capxy huing ayuc, hue' ajcxy ymīgapxyp Dios, e ca' nan jāy, com yi jāy ajcxy ca' huinjihuuyigixy je' ajcxy y'ayuc huidibi capxp. Je Espíritu Santo yejcp je ayuc ma je huidibi capxp. Jadu'n nipaady nej jihuiy ameech je' ycapxy. ³ Pinjaty najtzcapxyb Dios ytiy'ajt, yi' ycapxhuäcxyp Dios y'ayuc ma yi jāy ajcxy, jaydēbi yujcpedipy ajcxy y'ixpijcin ma Dios y'ayuc, nañ jadu'n jaydēbi ajcxy yjotmicpigipy etz yjotcugūygixipy. ⁴ Pinjaty capxp huing ayuc, hue' ci'm naybubedyi. Pinjaty najtzcapxyb Dios y'ayuc ma yci'm ayuc, hue' ypubejtyp tūg'óciy yi mibijcpidijc.

⁵ Huaad co ixypy nidüg'óciy miich ajcxy mgapxcixy huingbi ayuc. Per jac nigü oy co miich ajcxy mnajtzcapxyygixy Dios ytiy'ajt, ca'ydi co mgapxcixy huingbi ayuc. Pinjaty huidibi najtzcapxyb Dios y'ayuc, jac nigü oy tuñ, ca'ydi jac pinjaty huidibi capxy huingbi ayuc, pen ca' pinjaty capxticxipy je huingbi y'ayuc, jigix je mibijcpidijc jotcuje'ajtin pátcixip. ⁶ Migügtjc ajcxy, co ixypy nnicxyich ma miich ajcxy, e ngapxyich ixypy huingbi ayuc, ¿ti oybi miich ajcxy mbadamyb ma ich? Pen ca' anajty ti pubejtin nduñich ma miich ajcxy, pen ca' nyajnejhuuyigixy Dios ytiy'ajt jemybi, pen ca' nyaj'ixpijccixy Dios ytiy'ajt o pen ca' nnajtzcapxyich Dios y'ayuc, o pen ca' nyecyich xpijcin.

⁷ Tzoc ocpidaacim tūg'ijxpejt ma je xüxy, jadu'n nej je flauti o je arpa. Pen ca' nmido'mbijcim je nota je tono nidüg nidüg, ca' nmido'mbijcim ti pieza ti xüxy yajxuxp o yajcoob. ⁸ Nañ jadu'n co soldados ajcxy chiptunaangixy, pen je trompeta ca' huadz yxüxy, ca' ni tūg soldado ñayñ'i'ixihuañyii ma je tzip ytuna'ñyii yjada'ñyii. ⁹ Nañ tim jadu'n mūd miich ajcxy, pen mgapxcixyp huingbi ayuc huidibi ca' pin huinjihuuyi, ¿nej yajnejhuuihuipy ti miich anajty mgapxyp? Jadu'n je' anajty yhuimbizimni nej nigoob mdim'ixmiydaaccixy. ¹⁰ Janch co ji yajpaady canaagnax ayuc ya naaxhuiñ ac tigachjaty. Etz janch co nidüg nidüg jāy ayuc mūdity e ci'm je' ajcxy huinjihuuyigixy. ¹¹ Per pen ca' nhuinjihuuyich je ayuc huidibi jāy xyajmigapxpich jadu'n ich yi' nyajnaxyich nej agatz. O pen ca', yi' xyajnaxpich nej agatz. ¹² Paady miich ajcxy co ooy mnijot'ajtcixy Dios yjihu'iñ ymic'ajt canaagnax, yajtungix je mic'ajt huidibi pubedam yi mibijcpidijc, jigix yujcpedipy ajcxy ymibijcin etz y'ixpijcin ma Dios y'ayuc.

¹³ Paady pinjaty jajtp nej capxip huingbi ayuc, copicy co Dios mibijctzohuipy co mic'ajt ymōhuib, jaydēbi yajñigüeje je ayuc huidibi ycapxamyb. ¹⁴ Pen nmibijctzooybich Dios mūd huingbi ayuc, nmibijctzooybich mūd ich n'espíritu, per ich nhuinma'ñ ca' ti jāygidaacin paady. ¹⁵ ¿Ti huaad ndunipyich? Pues copicy nmibijctzooyich n'ojadatyich Dios mūd ich njihu'iñich, e nañ jadu'n nmibijctzooyich mūd ich nhuinma'ñich. N'ibadaamyich ngapxpadaamyich Dios mūd ich njihu'iñich etz mūd ich nhuinma'ñich. ¹⁶ Com pen miich mhuiñigixyp mhuingapxtaaccixyp Dios mūd yi mjihu'iñ, je migüg huidibi amidoo'ijtp

ca' je' huinjihuïy je huing ayuc huïdibi mgapxyp, e ca' jëbi ymïna'nïp "jadu'n jada, Amén." Com ca' yï' huinjihuïy ti yï' mgapxyp. ¹⁷ Ca' yjecyity co oyjaty ayuc ti myajtuñ co ti myajnaxy Dioscojuyip ma Dios, per yï mmïgüg huïdibi ca' huinjihuïy miich m'ayuc ca' yï' ti jäygidaacin paady. ¹⁸ Nyajnajxypich Dioscojuyip ma Dios co nïgi njatyich nej ngäpxibyich huingbi ayuc, ca'ydi miich ajcxy nidüg'óciy. ¹⁹ Per co nyajpaadyich ma je mïbijcpïdijc ti ñayyöymújicigixy, jac'oy co ngapxyich mïgoox ayuc huïdibi mïbijcpïdijc yhuinjihuïygixyp, ca'ydi co ngäpxibich majc mil huingbi ayuc huïdibi ca' pïn huinjihuïy.

²⁰ Migügtijc ajcxy, ca' ajcxy mmïd'adïpy mhuinma'ñ, jadu'n nej pi'ctijc yhuinma'ñ mïdity. Ma yï jïbicpi huinma'ñ ymiñ naybidägi jadu'n nej ma'xungdijc huïdibi ca' ti jïbic huinma'ñ huinjihuïygixy. Mïd'adïp miich ajcxy oyjot oyhuinma'ñ jadu'n nej mïj'anäctijc huïdibi yhuinma'ñ ti ymejtznï ti yca'pxni. ²¹ Jaybety y'ity ma Dios ycötujcïn necy ma Dios jadu'n ymïna'ñ: "Nmïgapxaamybich je may Israel jäy mïd huingbi ayuc, e huingbi jäy najtzcaxïhuamb ïch n'ayuc ma yï' ajcxy, per ni jadu'n ajcxy xycatuna'ñich cuendi." Jadu'n je Huindzïn Dios ymïna'ñ. ²² Paady je' je Dios ymic'ajt huïdibi yajcapxp huingbi ayuc, yejcp Dios ymic'ajt ijxpejt ma yï jäy ajcxy huïdibi ca' mïbijccixy Dios. Per je Dios ymic'ajt huïdibi jäy ymïd co najtzcaxïy Dios ytiy'ajt, yejcp ijxpejt ma yï mïbijcpïdijc, ca' yecy ijxpejt ma yï' ajcxy huïdibi ca' ymïbijccixy. ²³ Ca' yjecyity jadu'n yjadïp, co anajty ti ñayyöymújicigixy je mïbijcpïdijc, e nidüg'óciy anajty ajcxy ytigïygixy capxpi mïd huingbi ayuc huïdibi ca' pïn huinjihuïy, chi ytigïhuïp ma ajcxy ñayyöymugyïi nijëjity huïdibi ca' ymïbijccixy. ¿Ca' yï' ajcxy ymïnáangixyipy co je mïbijcpïdijc anajty ajcxy ti y'ahuimbijtcixy loci? ²⁴ Pen nidüg'óciy je mïbijcpïdijc ma je nayyöymujctac najtzcaxïygixy Dios ytiy'ajt mïd yci'm ayuc, e co ytigïhuïpy pïnjaty huïdibi ca' ymïbicy, e co yï' midohuïpy Dios y'ayuc yjïhuïhuamyb ypocy. E ci'm huinmayïp nej anajty ti ytundïgooy mïd Dios co midohuïpy co nidüg'óciy mïbijcpïdijc anajty najtzcaxïygixy Dios y'ayuc. ²⁵ E Dios y'ayuc yajnejhuïhuïb nej anajty ameech ti ytundïgooy jotjoty huinma'ñjoty. E chi jada' ycojxtinay'ïhuïhuïpy, e ojadadïpy Dios, e nañ jadu'n ymïna'nïp co janch Dios miich ajcxy xymïd'ijtp.

Tungixy tüg'óciy mïd tudägy'ajt etz yajxon

²⁶ Migügtijc ajcxy, ¿ti huaad mdúngixipy? Co mnayyöymújicigixipy, nijëjity miich ajcxy mhuin'ixipy tüg salmo, tüg ayuc huïdibi yaj'ixpïgamyb, tüg tiy'ajt huïdibi Dios ti xyajnejhuïygixy, etz capxïp huingbi ayuc, etz capxtïcxipy nej yhuimbïdzïmyb je huingbi ayuc. Tüg'óciy jadu'n tungix, jaydëbi ajcxy jäygidägiy etz yujcpedïpy ajcxy ymïbijcïn huïdibi ti ñayyöymújicigixy. ²⁷ Pïnjaty capxamb ma je naymujctac mïd huingbi ayuc, huen capxy metz o tugïg jäy je'yï, e huindüg padüg huen capxcixy, ca' y'animayity. E pïnjaty capxtïcxamb je' je' yajnïguejïp nej yhuimbïdzïmyb je ayuc tïbi capxcixy. ²⁸ Pen ca' yajpaady ma je nayyöymujctac tüg jäy huïdibi capxtïcxïp je huingbi ayuc, jac'oy co ca' ni ti yajcapxipy mïd huingbi ayuc, jac'oy co mïgapxïp Dios jotjoty huinma'ñjoty, e ca' capxïp mayjäyjoty. ²⁹ Nañ jadu'n mayjäyjoty jëbi metz o tugïg jäy najtzcaxïhuïp Dios ytiy'ajt, e yï jacjadyïi mïbijcpïdijc huïdibi amïdo'ijtp, jëbi ajcxy huinmay pen janch Dios je' ytiy'ajt huïdibi ajcxy ti najtzcaxïy, o pen ca' je' Dios tiy'ajt'adyïi. ³⁰ Pen jim mayjäyjoty jadüg jäy Dios yajnejhuïyïi nej ycapxïp, nej tiy'ajt najtzcaxïhuïpy, huen je jäy y'amonïpy huïdibi anajty jayïjp ti ytigïy najtzcaxïyï Dios y'ayuc ytiy'ajt. ³¹ Jëbi miich ajcxy nidüg'óciy mnajtzcaxïygixy Dios ytiy'ajt huindüg padüg, jaydëbi

tüg'óciy je mibijcpidijc ixpijccixy Dios ytiy'ajt, e nañ jadu'n jëbi nidüg'óciy yjotmicpíjccixipy. ³² Copicy co yi' ajcxy huidibi najtzcaxhuyb Dios ytiy'ajt, huen ajcxy nay'ané'migix ci'm, e huen capxcixy mina y'ahuaatzciy. ³³ Dios ca' xyajmidzojcm nicx nhuinma'ñyidigooyim, Dios chojcpy co servicio ndunim agujc jotcujc.

³⁴ Jadu'n nidüg'óciy mibijcpidijc ma canaag cajp yminaangixy co ca' huaad töxyjäydijc ycapxcixy serviciojoty, com Dios ti capx'aducy co ajcxy ca' ycapxipy serviciojoty. Copicy co je yëydijc ajcxy ane'mip je servicio, e ca' töxyjäydijc ajcxy huaad ane'mgixy je servicio, com jadu'n Dios ycötujcin ymina'ñ. ³⁵ Pen ñejhuñhuamyb ajcxy töxyjäydijc ti ayuc ti tiy'ajt, jëbi ajcxy ñiyëydijc amidoogixy co anajty ajcxy yhuimbijtcixni ma ytijc, com tzo'ydu'n yejcp töxyjäydijc ajcxy co ycapxcixy serviciojoty.

³⁶ Miich ajcxy hue' mdzachnaybidáacigixy nej jihuñy miich ajcxy jayijp tim nejhuñyigixy Dios y'ayuc, ca'ydi jac pin. Miich ajcxy mnaybidáacigixy jadu'n nej jihuñy jimyi jadu'n yajcapxhuäcxy Dios y'ayuc, ca' yjacmaajity. ³⁷ Pen jim pinjaty ma miich ajcxy huidibi naybidaacip nej jihuñy Dios ti ymöyii mic'ajt nej jëbi najtzcaxihuipy Dios ytiy'ajt, o ti yhuinma'ñymöyii je Espíritu Santo tijaty tiy'ajt, hue' copicy nañ jadu'n yñejhuñhuipy co je ayuc huidibi ñch miich ajcxy nyajnijayuyb, Dios jada y'ane'min ycötujcin. ³⁸ Pinjaty jim ma miich ajcxy huidibi ca' mijpidäga'ñ etz ni ca' cöbiga'ñ je ayuc tiy'ajt huidibi Dios ti xyaj'ane'myich, Dios ca' cöbiga'ñ yijadu'mbi jäy.

³⁹ Com ñch jada ayuc nyaj'ixpijcpich, paady cham nimaaybich nmigügtijcich, co huen najtzoguyigixy nej mnajtzcaxhuyigixy Dios ytiy'ajt, e nañ jadu'n ca' mgapx'adújccixipy yi' ajcxy huidibi capxamb huingbi ayuc. ⁴⁰ Hue' janchtiy tüg'óciy tungixy yajxon, etz miid tudägy'ajt, ca' oyñinej mdúngixipy.

15

Co Cristo yjugypijcy jadüg'oc co y'o'cy

¹ Jadügnax, migügtijc ajcxy, ndzojcpich co miich ajcxy mjäyméjtzcxixipy je Jesucristo y'ayuc ytiy'ajt huidibi ti ngapxhuäcxyich ma miich ajcxy. Je' je' je ayuc tiy'ajt huidibi miich ajcxy ti mgöbijccixy etz huidi ajcxy tudägy mibijccixyp. ² Jëbi ajcxy m'alma ñdzögipy, pen mguydumyib ajcxy ñch n'ayuc huidibi ngapxhuäcxypich, e pen ca' anajty ti mmibijccixy.

³ Ti ngapxnaxyich ma miich ajcxy je ayuc huidibi Dios jayijp ti xymöyich, etz ti nyajnimaaygixy huidibi jaccopicyip co Cristo y'o'cy miid ajt nbocy ycixpi, jadu'n nej Dios y'ayuc ymina'ñ huidibi jaybety ijtp ma yi' ñecy. ⁴ Chi ajcxy yajnaxtiguy Jesús, e codugüig xii yi' yjugypijcy jadüg'oc jadu'n nej Dios y'ayuc ymina'ñ huidibi jaybety ijtp. ⁵ E co je Cristo yjugypijcy, chi ñayguëxici jayijp ma Pedro, e jac'axam ñayguëxici ma yi' jacjadyii ni majmetzpi apóstol ajcxy. ⁶ Jahueeni xii tiempo yjacnicxy co je Cristo oy ñayguëxigyii nañ jadu'n ma migox nimigo'pxnaxy mibijcpidijc tügpi tiempo. E may yijadu'mbi mibijcpidijc jacjugy'ajtni chambaad, etz naagity ajcxy ti y'ó'ccixni. ⁷ Jahueeni xii tiempo yjacnicxy co Cristo ñayguëxici ma Jacobo, etz nañ jadu'n ma nidüg'óciy yi' y'apóstol ajcxy.

⁸ Jac tim axam ñayguëxici je Cristo nañ jadu'n ma ñch. Jacjayijp Jesús huin'ijxy yi' jacjadyii apóstol ajcxy, etz jac'axam ñch xyhuin'ijxyich. Jadu'n ñch nipaady nej tüg jäy huidibi ooy ti ñinajxni je tiempo co ti yma'xung'aty. ⁹ Jaccapxpaady yi' jacjadyii Jesús y'apóstol ajcxy ca'ydi ñch. Nañ jadu'n ni ca' ñch xypaady co jäy ajcxy xytíjibich Jesús y'apóstol, miid co ooy ti n'ixhuidityich

ti nbahuidityich Dios yjāy ajcxy. ¹⁰ Ich nje'ajtpich nej nje'atyich mīd co Dios may'ajt mīd ich tuñ. Je mijmay'ajt je mij'oy'ajt huīdibi Dios ti tuñ mīd ich, ca' ñaadig'aty, ti y'oybidzimyb. Nigi mictāgy ti nduñich ma Dios ytung, ca'ydi jacpinjaty. Ca' nan co ich ndzachmadāgyich ma Dios ytung. Hue' Dios oy xymīd'ityich, etz ooy may'ajt tuñ mīd ich. ¹¹ Paady pen ti miich ajcxy mbaady Dios ytiy'ajt ma ich, o ma yi jacjadyii apóstol ajcxy, ca' ñejity. Je' je' je Cristo y'ayuc huīdibi ich ajcxy ngapxhuācxypich, e nañ Cristo yi' y'ayuc tiibi mmībijccixy.

Co öcpi ajcxy yjugypigipy ajcxy jadüg'oc

¹² Per pen ich ajcxy ayuc ngapxhuācxpich co je Cristo yjugypijcy jadüg'oc co y'o'cy, ¿na'amy co nijējity miich ajcxy mīnaangixy co yi jāy ajcxy tiibi y'o'ccixy ca' ajcxy yjugypigaangixy jadüg'oc? ¹³ Pues pen janch ca' yjugypigaangixy tiibi y'o'cy, nañ jadu'n ni Cristo ca' ycajjugypijcy jadüg'oc. ¹⁴ Co ixypiy janchity co Cristo ca' yjugypijcy, nañ tim jadu'n je ayuc huīdibi ngapxhuācxypich ca' ti mic'ajt ixypiy mīdity. E nañ jadu'n miich ajcxy mmībijcin ca' ixypiy chobaady. ¹⁵ Pen tiy'ajt ixypiy co je öcpi ca' yjugypigaangixy, huin'it je Dios y'ayuc huīdibi ngapxhuācxpich ixypiy yhuimbīdzimyb anī. Com ngapxhuācxpich co Dios yajjugypijcy Cristo co y'o'cy, paady pen tiy'ajt ixypiy co pinjaty tiibi y'o'ccixy ca' yjugypijcy. Nañ jadu'n ixypiy ca' ytiy'ajtity co Dios yjugypijcy Cristo. ¹⁶ Pen je öcpidijc ajcxy ca' jugypijccixy etz ca' ajcxy yjugypigaangixy jadüg'oc, nañ jadu'n ni je Cristo ca' ycajjugypijcy jadüg'oc co y'o'cy. ¹⁷ Co je Cristo ca' ycajjugypijcy jadüg'oc co y'o'cy, chi miich ajcxy mmībijcin ixypiy ca' choobaady. E ca' miich ixypiy ajcxy Dios mbocy xyhuinmecxi. ¹⁸ E pen janch tiy'ajt ixypiy co je Cristo ca' ycajjugypijcy, huin'it je mībijcpidijc tiibi y'o'ccixy tigoyaangixy y'alma. ¹⁹ Pen janch tiy'ajt ixypiy co nmībijcin Cristo jēyi ma jadachambi tzinaayin ya naaxhuiñ, ca' jac ni ti ixypiy njijp'ijxim co n'o'cim. Jadu'n ich ajt nipaady nej locijāy, e jāy ajcxy nigi xyñixiicim xyajxiicim, ca'ydi jac ni pin.

²⁰ Per janch co Cristo yjugypijcy jadüg'oc co y'o'cy, je Cristo yi' je' je jayijp jāy huīdibi jugypijc jadüg'oc. Co je Cristo yjugypijcy, chi ñicxy jadüg'oc ma Dios yajpaady, e nañ jadu'n mīd yi' ycixpi mayjāy yjugypiga'ñ ajcxy co anajty ti y'öccixy, e yñicxaangixy ma Dios yajpaady. ²¹ Com mīd tūg jāy, je Adán, chondacy yi' o'cin ya naaxhuiñ. Nañ tim jadu'n mīd tūg jāy, je Cristo, chondacy je jugypijcin co jāy y'o'ccixy. ²² Mīd jada ycixpi co Adán ytundigooy oga'n, paady nidüg'óciy jāy patcixy yi' o'cin. Mīd jada ycixpi co Cristo yjugypijcy jadüg'oc co y'o'cy, paady nidüg'óciy jāy ajcxy yjugypigaangixy jadüg'oc co anajty ti y'öccixy. ²³ Nidüg nidüg jāy yjugypiga'ñ jadüg'oc jadu'n nej anajty ñigueeg'iyii. Cristo ti yjayijp'aty co yjugypijcy. Tüg'óciy yi' jacjadyii jāy ajcxy huīdibi mijnicxpejtcixp Cristo, yi' ajcxy jugypigamb jadüg'oc co anajty Cristo yhuimbity ya naaxhuiñ. ²⁴ Co anajty je Cristo yhuimbity ya naaxhuiñ, chi ycixipy ytigoyipy je naaxhuiñybi. Cristo yajtigoyamyb tüg'óciy naaxhuiñyāy y'ane'min, tüg'óciy naaxhuiñyāy ycötujcin, etz tüg'óciy naaxhuiñyāy ymic'ajt. Jesucristo ypīctāhuaanip tüg'óciy naaxhuiñyāy ajcxy y'ane'min, e pidactāhuipy ma Dios y'ane'min, e Dios Teedy je' je'ajttāhuīb. ²⁵ E tim copicy co je Cristo y'ane'mdāhuamyb tüg'óciy, ixti cooni Dios anajty ti mīmadactāy tüg'óciy Cristo ymīdzip, e ti pidactāy anajty ma Cristo y'ane'min. ²⁶ Jesús yajcixamyb yajtigoyamyb jac'axam je o'cin, ca' ni pin yjac'öcnipy. ²⁷ Com Dios ymīmadactāhuip tüg'óciy je Cristo ymīdzip, e pidactāhuip ma je Cristo y'ane'min. Per co Dios y'ayuc huīdibi jaybety ijtp ymīna'ñ co je Cristo ti mīmadactāy tüg'óciy, ca' nan hue' je' yajhuinjihuīy co Cristo ti mīmadāgy Dios. Com Dios yi' je' huīdibi ti mīmadactāy, e ti pidactāy ma Cristo y'ane'min.

²⁸ Co anajty Dios mĩmadactay tũg'ócĩy pĩnjaty etz tijaty huĩdĩbĩ mĩc'ajt mĩĩd, e co anajty pĩdactay ma je Cristo y'ane'mĩn, chi je Dios y'ung ypidactãhuĩpy yĩ y'ane'mĩn ma Dios Teedy, etz ane'my yhuĩ'mã'ñ ma Dios Teedy, je huĩdĩbĩ anajty tĩ mĩmadactay. Jadu'n Jesucristo tuna'ñ, jĩgĩx jėbĩ Dios mĩĩd'ajttãy tũg'ócĩy mĩc'ajt etz ane'm'ajt.

²⁹ Pen ca' yjadu'nĩty, ¿na'amy co mdzachnĩbejtĩcĩxy co öcpi tzach-codinaaygĩxy? Co ixĩpy ca' pĩn yjugypĩga'ñ jadũg'oc co anajty tĩ y'o'cy, ¿na'amy co jã y'ñbejtĩcĩxy mĩĩd öcpi ycxĩpi?

³⁰ ¿E tĩ ycxĩpi co ĩch ajcxy nyajpatcĩxy ayo'nduum jabom jabom? ³¹ Mĩgũgtĩjc ajcxy, janch janch ĩch mĩĩch ajcxy nĩmaaygĩxy co ooy njãygĩdãgyĩch mĩĩch ajcxy. Mĩĩd co mmĩbĩjccĩxy je nHuĩndzĩn Jesucristo, paady ycxĩpi ĩch mĩĩch ajcxy nĩmaaygĩxy co jabom jabom nyajpaadyĩch öcjĩjp'am. ³² Mĩnaambĩch jadu'n co ooy nhuĩndĩnã y njĩjptĩnã yĩch nmĩdzĩp ya Efeso. Tĩm jadu'n nĩpaady nej jĩbĩc ĩyujc ahua'n ĩyujc nhuĩndĩnã y njĩjptĩnã yĩch. Pen ca' yjanchĩty co yĩ öcpi ajcxy yjugypĩgĩpy jadũg'oc, naadĩgĩ'ajtp ixĩpy co ĩch ayo'n jabom jabom nhuĩndĩnã y njĩjptĩnã yĩch. Nĩg oy co ixĩpy nyajtũyöyĩm jadu'n nej ayuc y'ityĩn: "Tzoc caayĩm uucĩm, agujc'ajtm jotcujc'ajtm, com jabom huĩxtĩc njugy'ajtm ycxĩaanĩm mĩĩd yĩ o'cĩn."

³³ Ca' mnayyėjcgĩxy co pĩnjaty xyhuĩn'ĩngĩxĩpy. Jadu'n yjadĩpy nej y'ayuc y'ityĩn: "Yĩ mĩgũgtĩjc ajcxy huĩdĩbĩ jĩbĩc jot jĩbĩc-huĩnma'ñ mĩĩd, yajtĩgooyb ajcxy je oyjot oyhuĩnma'ñ." ³⁴ Ixmajtzcx jĩbĩc jot jĩbĩc-huĩnma'ñ etz tzĩnaaygĩx tudãgy ca' mbocytungĩxy. Nĩjėjĩty mĩĩch ajcxy ca' mnejhuĩygĩxy Dios yty'ajt. Jadu'n nmĩna'ñĩch, jĩgĩx ajcxy mdzo'ydu'n mĩjĩhuĩygĩxĩpy.

Nej ajcxy yĩ ögypĩ yjugypĩgĩpy ajcxy jadũg'oc

³⁵ Ycadĩmjecyĩty co nĩjėjĩty mĩĩch ajcxy xy'amĩdohuĩpyĩch: "¿Ma mĩc'ajt pãtcĩxĩpy je o'cpi ajcxy co jėbĩ yjugypĩjccĩxy jadũg'oc? ¿Huĩdĩbĩ nĩnĩcx ajcxy ymĩ'ĩdamyb?" ³⁶ Ca' mĩĩch ajcxy tĩ mhuĩnjĩhuĩygĩxy. Ca' mnejhuĩygĩxy co je moc tĩm huĩdĩbĩ mĩĩpcĩxyp ca' ymuxa'ñ ĩxtĩ coonĩ anajty jayĩjp tĩ ypũch. ³⁷ Ca' mĩĩch ajcxy mĩĩpcĩxy je mocquĩpy. Hue' mĩĩch ajcxy mĩĩpcĩxyp je tĩmmoc o jacjadyĩ huĩngbĩ tĩm. ³⁸ E co je tĩm ymuxy, chi Dios möy je nĩnĩcx, tĩm jadu'n nej Dios jayĩjp tĩ huĩnmay tĩ tzocy. E Dios nĩje' nĩje' je tĩm möy je nĩnĩcx tĩgachjaty. ³⁹ Canaagnax nĩnĩcx yajpaady ya naaxhuĩñ, ca' ajcxy ytũgnaxĩty. Tĩgach yĩ jã yajcxy mĩĩdĩty nĩnĩcx, tĩgachjaty ĩyujc ajcxy mĩĩdĩty nĩnĩcx, nañ tĩgachjaty joon ajcxy mĩĩdĩty nĩnĩcx, e nañ jadu'n tĩgachjaty acx ajcxy mĩĩdĩty nĩnĩcx. ⁴⁰ Yĩ tzajpjoty tzĩnaayb ajcxy tĩgachjaty mĩĩdĩty nĩnĩcx, nañ jadu'n huĩdĩbĩ ajcxy tzĩnaayb naaxhuĩñ tĩgachjaty mĩĩdĩty nĩnĩcx. Yĩ tzajpjoty tzĩnaayb ajcxy nĩnĩcx mĩĩd tĩgachjaty y'oy'ajtm, ca'ydi jadu'n nej yĩ naaxhuĩñ tzĩnaayb ajcxy y'oy'ajtm. ⁴¹ Yĩ xĩ ytĩcxĩn yjajĩn ca' ñaybadyĩ mĩĩd po' ytĩcxĩn yjajĩn, nañ tĩm jadu'n je po' ytĩcxĩn yjajĩn ca' ñaybadyĩ mĩĩd madza' ytĩcxĩn yjajĩn. Etz nĩje' nĩje' madza' mĩĩdĩty ytĩcxĩn ca' ñaybadyĩ mĩĩd jacjadyĩ madza' ytĩcxĩn yjajĩn. ⁴² Nañ tĩm jadu'n yjada'ñ mĩĩd yĩ jã yajcxy tĩbĩ y'o'ccĩxy co ajcxy yjugypĩjccĩxy jadũg'oc. Jã yajcxy yajnaxtĩgĩy je öcpi naaxnĩcx huĩdĩbĩ yhuĩndĩgooyĩpy, e yjugypĩgĩpy jadũg'oc mĩĩd tũg nĩnĩcx jemybĩ huĩdĩbĩ ca' yhuĩndĩgoya'ñ nĩmĩna. ⁴³ Je öcpi ñaaxnĩcx co ñaaxtĩgĩy, ca' tĩ oy'ajtm mĩĩdĩty, e co yjugypĩjcnĩ jadũg'oc ymĩĩd y'oy'ajtm. Je öcpi ñaaxnĩcx co ñaxtĩgĩy, ca' tĩ mĩc'ajt mĩĩdĩty e chi yjugypĩjcnĩp mĩc'ajt mĩĩd. ⁴⁴ Co je öcpi ñaaxtĩgĩy, hue' yjugypĩjcnĩ, mĩĩd jemybĩ nĩnĩcx ca'p yaj'ixy. Pen jĩ yajpaady nĩnĩcx huĩdĩbĩ Dios tĩ yajcojy mĩĩd naax, nañ tĩm jadu'n jĩ yajpaady nĩnĩcx huĩdĩbĩ Dios yajcojpy mĩĩd yjĩhuĩ'ñ ymĩc'ajt ca'p yaj'ixy.

⁴⁵ Jadu'n jaybety y'ity ma Dios ñecy ma jadu'n ymına'ñ: "Je jayijp Adán ymüd anajty jugy'ajtın." Je axambi Adán (je' je' je Cristo) je' tüg espíritu huıdibi jugy'ajt yejcp. ⁴⁶ Je huıdibi Dios yjihui'ñ ymic'ajt müd ca' je' yjayijp'ajty, je' jayijp'ajt huıdi Dios yajcoj müd naax; jac'axam je' huıdibi Dios yjihui'ñ ymic'ajt müd, je' je' je Cristo. ⁴⁷ Je jayijpi jäy huıdibi Dios yaj'oyıy, hue' je' yaj'oyıy müd naax (e yajpaady ya naaxhuiñ). Je mımetzpi jäy huıdibi Dios yaj'oyıy, ñch ajt nHuıdzın Jesucristo, hue' je' chooñ tzajpjoty. ⁴⁸ Je jäy ajcxy huıdibi tzınaayb ya naaxhuiñ, yi' ajcxy ñinıcx tú'cıy ñaybadyıı müd Adán ñinıcx huıdibi Dios yaj'oyıy müd naax. Yi' jäy ajcxy huıdibi tzınahuamb tzajpjoty, hue' ajcxy ñinıcx tú'cıy ñaybada'ñyıı müd je Cristo ñinıcx huıdibi tzınaayb tzajpjoty. ⁴⁹ Jadu'n nej ñch ajt, tügenax nguëxıcim müd Adán huıdibi Dios yaj'oyıy müd naax. Nañ tım jadu'n tügenax nguëxıgaanıı müd je Cristo huıdibi tzınaayb tzajpjoty.

⁵⁰ Migügtıjc ajcxy, hue' nnımähuaangıxy co je ninıcx huıdibi müd yxıxy etz yñı'py ca' yi' y'ıda'ñ ma Dios y'ane'my. Je ninıcx huıdibi cıxamb tıgoyamb ca' pada'ñ it lugar ma yi' ñinıcx ajcxy ity huıdibi ca' ycıxa'ñ ytıgoya'ñ. ⁵¹ Tungıx cuendi jada ayuc, nyaj'ıxpıgaamybıch mııch ajcxy tüg tıy'ajt huıdibi ca' pın huınjıhuıy. Ca' nan nidüg'ócıy ñch ajt n'ögaanıı, per nidüg'ócıy ñch ajt Dios nnınıcx xyajtıgadzaanıı. ⁵² Co anajty Dios yajxüxy yi' ytrompeta, je huıdibi anajty cogıxıyñıp, chi cıxıpy je naaxhuiñybi. Chi Dios xyajtıgadzaanıı ajt nnınıcx tım tzojcyı, tım tüg jaxıgy tüg huınmıpxy. Dios yajxüxamyb yi' ytrompeta, e je jäy tııbi ajcxy y'öccıxy jugypıgıp ajcxy jadüg'oc, e ni ca' mına ajcxy y'öccıxıpy. E ñch ajt huıdibi jacjugy'ajtnı Dios ñch ajt xyajtıgadzaanıı nnınıcx. ⁵³ Com ñch ajt nnınıcx huıdibi ögam, huıdibi huen tıgoyamb, copıcy ytıgadzip, e nmüd'adaanıı ninıcx huıdibi ca' öga'ñ ca' yhuıdıgoya'ñ. ⁵⁴ Co anajty ytıgajtıım ajt nnınıcx huıdibi cıxamb huıdıgoyamb, nmüd'ajtıım anajty jemybi ninıcx huıdibi ca' ycıxa'ñ yhuıdıgoya'ñ nımına. Co anajty ytıgajtıım ajt nnınıcx huıdibi ögam, e nmüd'ajtıım jemybi ninıcx huıdibi ca' y'öga'ñ, huın'ıt cuydunıpy Dios y'ayuc huıdibi jaybety ijtp huıdibi jadu'n ymınamb: "Co anajty ajt nHuıdzın Dios mımadağy yi' o'cın, huın'ıt cödıgooyñıp je o'cın (ca' jacpın y'oc'o'cnıp). ⁵⁵ ¿Ma yi' o'cın ocjacpada'ñ mıc'ajt co tıjy xy'ocıactzaachytunaanıı? ¿Ma yi' o'cın ocjacpada'ñ mıc'ajt co tıjy xy'ocmımadağgaanıı?" ⁵⁶ Müd co tı ndundıgooyım, paady ycıxp o'cın nbaatım. Müd co ca' tı nguydundaayım Dios ycötıjcin, paady ycıxp o'cın nbaatım. ⁵⁷ Per nyajnajxım Dioscojuyıp ma Dios co mıjmay'ajt tı tuuñ müd ñch ajt ycıxpi, e tı nmımadaacıı yi' o'cın co ajt nHuıdzın Jesucristo y'o'cy müd ajt nbocy ycıxpi.

⁵⁸ Paady ycıxp, mııch ajcxy mıgügtıjc huıdibi ooy ndzocy njıhuıyıch tıydudägy mmıbıjccıx, ca' m'ıxtıgıhuäccıxy ma mmıbıjcin, ca' m'ıxmajtıccıxy yi' mmıbıjcin, ca' ajcxy mjotmetzcııygıxy. Tungıx jabom jabom ma Dios ytung aguıc jotcuıc, com mnejhuıygıxyp co ca' ñaadıgı'aty ajcxy mdung ma ajt nHuıdzın Jesucristo ytung.

16

Je cuejtın müd je hermano ajcxy ycıxpi

¹ Jadu'n nej ymıñ yi' meeñ huıdibi mııch ajcxy myajmıjccıxyp müd je mıbıjcpıdıjc ycıxpi huıdibi jım Jerusalén. Cuydungıx je tıy'ajt huıdibi tı nyaj'ané'mgıxyıch yi' mıbıjcpıdıjc huıdibi canaagpıcy yajpatp jım Galacia. ² Naag naag domingo, je jayijpi xıı ma je semana y'ıxtıgıy nidüg nidüg mııch ajcxy mbıdägıp abıcy hueeni pi'cmeeñ, jadu'n nej anajty ii tı mbaatcıxy. Je pi'cmeeñ huıdibi anajty tı myajmıjccıxy mgüend'ajtıcıxıpy ooy, jıgıx co ñch jım

njädiþ ma miich ajcxy, ca' ycopicyity meeñ myajmújciþy. ³ E co anajty jim nmechich ma miich ajcxy, miich ajcxy myajniþigipy nijëjty migügtijc huiðibi nicþip jim Jerusalén. E ñch nguexipyich jada migügtijc jim Jerusalén miid tüg necy etz miid je meeñ huiðibi anajty miich ajcxy ti myajmujccixy, jayðëbi yajciðigihuiþ je miþijcpidiþc jim Jerusalén. ⁴ E pen ooy ytimycopicyity co ñch nañ jadu'n nnicþibich jim Jerusalén, jëbi ajcxy ñicxy miid ñch.

Pablo huinmay co nicxa'ñ Macedonia

⁵ Co anajty ndübiþyich nnicxaambich ma miich ajcxy, jayijp naxihua'ñich Macedonia naaxjot, com copicy jim Macedonia naxihua'ñich. ⁶ Ca' jecyity co nicxy nhui'myich ma miich ajcxy jecy jecy. Ca' yjecyity co nyajnaþyich tüg'óciy je tichypoþ tiempo miid miich ajcxy. Co anajty ndzooñich jadüg'oc ma miich ajcxy, nnicþyich anajty muumjaty, miich ajcxy xytüþijphuohuihüibich ma ñch anajty nnicxa'ñich. ⁷ Ca' nan tzojccixy n'ida'ñich miid miich ajcxy, hue' jatytimy huäcxibaambich ma miich ajcxy jecy jecy, pen ñch ajt nHuindzin Jesús jadu'n tzojcp. ⁸ Per njac-huäcxibaambich ya Efeso ixti cooni Pentecostés xii anajty ti ñajxtäy. ⁹ Com nmüðich it lugar ya ma jëbi ngapxhuäcxych Cristo y'ayuc, e mayjäy huiðibi miþpðacp ñch n'ayuc, nañ jadu'n mayjäy ya ooy midzip'aty Jesucristo y'ayuc ytiy'ajt.

¹⁰ Co Timoteo anajty yjädy ma miich ajcxy, tungixy may'ajt mgöþijccixipy agujc jotcujc ca' ti mhuihmaaygixy, com Timoteo tumb ma ajt nHuindzin Jesucristo ytung tim jadu'n nej ñch nduñich. ¹¹ Paady ycixp ca' huaad miich ajcxy Timoteo mga'oy'ixipy etz mdüþijphuohuihüipy, jayðëbi ca' ti jotmay miid'adipy etz yjactüþyöyþ agujc jotcujc, e ymedzipy ya Efeso ma nyaþpaadyich. Com nijjp'ijxpyich co Timoteo xyñijädibich quipxyi miid jacjadyii miþijcpidiþc.

¹² Jadu'n nej yjajti miid ajt nmigüg Apolos. May'ajt nbijctzoohüich ma Apolos co yi' miidnicþip nijëjty jacjadyii migügtijc huiðibi nicxamb ma miich ajcxy. Per ca' yi' yjotcujcity co ñicþip jadachambi tiempo. Hue' janchtiy jacjiini yñicþipy, pen yaj'ahuätzcüyb anajty.

Capxpoocxin huiðibi cijxnip je necy

¹³ Ni'ixi m'idipy ajcxy ma mmibijcin. Naygüend'ájtigix ma mmibijcin. Tiydudägy ajcxy mmibigipy, ca' m'ixtigihuäccixy ma mmibijcin. Naybiðáacigix huinmic jotmic ma mhuihmañ. Mic m'idipy ajcxy ma mmibijcin. ¹⁴ Tüg'óciy tijaty ajcxy mdungixy, tungixp miid tzojcin jihuþyin etz oýjä'ajtin.

¹⁵ Migügtijc ajcxy, mnejhuþyb jadu'n nej Estéfanos miid yjugymigüg ti miþijccixy Jesucristo y'ayuc. Yi' je' jayijp ajcxy miþijcp jim Acaya, e ti yhuinma'ñypidaaccixy co ypubedamyb ajcxy yi' miþijcpidiþc. ¹⁶ May'ajt nbijctzooybich ma miich ajcxy co myajmij'ájtciþy Estéfanos, etz jac þinjaty huiðibi pubejtp je miþijcpidiþc etz huiðibi ajcxy tumb Dios ytung. ¹⁷ Ooy njotcúciþyich co Estéfanos, Fortunato, etz Acaico ti ymiñ ma ñch ajcxy ya Efeso. Yi' ajcxy xymüð'ijtpich, com ca' anajty y'oyþ nej nmüð'idipyich miich ajcxy. ¹⁸ E yi' ajcxy ti ooy xyajjotcugþyich, e nañ jadu'n miich ajcxy ti mjotcugþyigixy co yi' ajcxy ymiñ ma ñch. Paady ycixp copicy co miich ajcxy myajmij'adip yi' ajcxy etz jacjadyii tim jadu'n nej yi' ajcxy.

¹⁹ Yi' miþijcpidiþc huiðibi canaagþicy ya Asia naaxjot yquejxyp ajcxy capxpoocxin ma miich ajcxy. Aquila etz Priscila etz yi' miþijcpidiþc huiðibi ajcxy yömujcip ma Aquila ytijc yquejxp ajcxy capxpoocxin ma miich ajcxy ma ajt

nHuindzin Jesucristo yxii. ²⁰ Tüg'óciy je mibijcpidijc huidibi ya Efeso yquejxp ajcxy capxpooxín ma miich ajcxy. Naygapxpóocxigixy miich ajcxy xíc xon.

²¹ Hich, Pablo, njaaybich miiid ngi'mgi' ngi'mletra jada capxpooxín huidibi nguejxypich ma miich ajcxy. ²² Pen jim pinjaty ca' mijpidägy ich ajt nHuindzin Jesucristo, huen Dios yajtigooyip ajcxy y'alma. ¡Maranata! Huen tzojc yminipy ajt nHuindzin Jesucristo.

²³ Huen ajt nHuindzin Jesucristo oy'ajt may'ajt tunipy miiid miich ajcxy etz xyconuucxip ajcxy. ²⁴ Ndzojcypich njihuuybich miich ajcxy nidüg'óciy huidibi yajpaady ma Jesucristo. Jadu'n jada. Amén.

2 CORINTIOS

Yi Mimetz Necy Huidibi San Pablo Yajnigiejx Je Mibijcpidijc Jim Corinto

¹ Hich Pablo, Dios jadu'n ti tzocy, paady ycixpi Jesucristo ti xyajñibicyich co ngapxhuäcxibich yi' y'ayuc. Hich müd ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajn huidibi yajpatp jim Acaya ñaaxjot. ² Huen Dios Teedy etz hich ajt nHuindzin Jesucristo may'ajt oy'ajt tunipy müd miich ajcxy etz xyajjotcugiiygixip.

Nej Pablo yajty y'ayoy

³ Tzoc yajnaxim Dioscojuyip ma Dios, je nHuindzin Jesucristo yTeedy, je Dios Teedy huidibi ajt xypa'ayoohuim, je Dios huidibi yejcp jotcuje'ajtin. ⁴ Dios xyajjotcugiiyim co nminaxim nyajnaxim tzaachypi ayo'n jigix jébi nyajjotcugiiyim jacpinjaty huidibi minajxp yajnaxp tzaachypi ayo'n. Tim jadu'n nej hich ajcxy ti nbaady jotcuje'ajtin ma Dios, nañ tim jadu'n yi' ajcxy padañ jotcuje'ajtin ma Dios huidibi minajxp yajnaxp tzaachypi ayo'n. ⁵ Com tim jadu'n nej hich ajt nminaxim nyajnaxim tzaachypi ayo'n müd Cristo ycixpi, nañ tim jadu'n müd Cristo ycixpi nbaatim jotcuje'ajtin. ⁶ Paady ycixpi hich ajcxy nminaxcixy nyajnaxcixy tzaachypi ayo'n, jaydëbi miich ajcxy mbaadip jotcuje'ajtin etz nañ jadu'n ypaadip ajcxy m'alma ñidzoocin. Dios yejcpy jotcuje'ajtin ma miich ajcxy, jaydëbi miich ajcxy mbaadip jotcuje'ajtin etz nañ jadu'n ñidzögip ajcxy yi' m'alma. E co ajcxy mbaadip jotcuje'ajtin etz ajcxy m'alma ñidzoocin, chi jébi miich ajcxy mmimadägip etz nmecxtugip tzaachypi ayo'n, tim jadu'n nej hich ajcxy nmimadägy etz nmecxtújcixich tzaachypi ayo'n. ⁷ Jotcuje nayjihuijich müd miich ajcxy ycixpi, com njipp'ixpich co mmadägipy ajcxy ma mmibijcin. Com nejhuibich co miich ajcxy nminaxyp myajnaxyp tzaachypi, tim jadu'n nej hich ajcxy nminaxcixy nyajnaxcixy tzaachypi. E nañ jadu'n Dios yejcpy jotcuje'ajtin ma miich ajcxy, tim jadu'n nej yecy jotcuje'ajtin ma hich ajcxy.

⁸ Migügtijc ajcxy, hich ajcxy ndzojypich co miich ajcxy mnejhuühüp jadu'n nej canaagnax tzaachypi ayo'n ti nminaxyich ti nyajnaxyich jim Asia naaxjot. Jayin jahueeni ti ngamimadäga'ñich. Ca' anajty njipp'ixyich co nbidzimipyich juugy ma je jimbi it lugar. ⁹ Jadu'n hich ajcxy nnayjihuiyi nej jäy ajcxy huidibi yajpatcixp o'cjipp'am. Jadu'n ti njatyich, jigix jébi n'ixpicyich nej hich huaad nigi Dios nyajmij'atyich, je Dios huidibi yajjugypigip yi' jäy ajcxy tiibi y'öccixy. E ca' nan ngi'm mic'ajt nmijpidaacpyich. ¹⁰⁻¹¹ Ti hich ajcxy Dios xyñihua'ñ xycohua'ñ, e xyjacnihua'naamb xyjaccohua'naambich ajcxy ma yi' jäy ajcxy huidibi xyaj'ögaambich ajcxy. E co miich ajcxy xypubejtyich, copicy co jacmibijctzoogix Dios müd hich ycixpi. Njipp'ixypich co Dios yi' xyjatyimy xyñihua'naambich xycohua'naambich. E pen mayjäy Dios mibijctzoogixy müd hich ycixpi, nañ jadu'n yajnaxcixyipy ajcxy jäygidaacin ma Dios müd je may'ajt oy'ajt ycixpi huidibi Dios ytumyb müd hich ajcxy.

Ti Pablo co yhuäcxippy, ca' chojc nicxy jim Corinto

¹² Jotcuje nayjihuijich müd jada ycixpi com nejhuibich co ti ndzinäyich müd tudägy'ajtin etz müd oyjot oyhuinma'ñ müd yi' mayjäy ajcxy canaag agajp etz jacnigi ma miich ajcxy. Dios müd may'ajtin oy'ajtin ti xypubetyich co tudägy ti ndzinäyich, e ca' nguyduñich ngi'mjot ngi'mhuinma'ñich ma

ndzináayinich. ¹³ Hich miich ajcxy nyajnijay#yb je ayuc t#y'ajt hu#dibi miich ajcxy j#bi mgapxc#xy etz mhuint#hu#yg#xy. E na# jadu'n nj#p'ijxyp#ch co miich ajcxy mhuint#hu#hu#py #ch n'ayuc t#g'óc#y. ¹⁴ Jadu'n nej miich ajcxy cham cujc-hu#cx#y mhuint#hu#yg#xy #ch n'ayuc nd#y'ajt. Jac#ini co anajty je x# je tiempo ymi# co ajt nHuindzin Jesús y'ane'ma'ñ ya naaxhuiñ, chi miich ajcxy jotcu# mnay#hu#hu#yb m#d #ch yc#p#. E na# tim jadu'n nej #ch ajcxy jotcu# nay#hu#hu#yb m#d miich ajcxy yc#p#.

¹⁵ Com nejhu#yb#ch co miich ajcxy xychojcp#ch xy#hu#yb#ch, paady yc#p# nhuinma'ñ nb#d#gy#ch co n#cx#y n'ixaang#xy miich ajcxy jad#g'oc, e jadu'n nyajjotcug#huaang#x#ch miich ajcxy mejtz'oc. ¹⁶ Jadu'n nhuinma'ñ ti nb#d#gy#ch co n#cx#a'ñ#ch Macedonia. Per jay#p nnaxa'ñ#ch ma miich ajcxy mgajp. E co anajty ndzooñ#ch Macedonia, jad#g'oc n#cx#a'ñ#ch ma miich ajcxy. E jadu'n j#bi miich ajcxy xyt#j#p#huohu#hu#b#ch co anajty n#cx#y#ch jim Judea. ¹⁷ ¿Nej mdijy, co #ch aametz jotmetz nduñ#ch co ca' ti n#cx#y#ch ma miich ajcxy nej anajty ti n#m#na'ñ#ch? ¿Nej mdijy, nhuinma'ñ m#d#dy#ch jadu'n nej naaxhuiñj#y hu#dibi m#namb co ñ#cx#a'ñ, e chi ca' ñ#cx#n#? ¹⁸ Per Dios j#bi t#y'ajt yeg#py co je ayuc t#ibi nyajnimaa#y#xy, nguydun#py#ch y#'. Hich n'ayuc janch y#'. ¹⁹ Hich m#d Silvano etz Timoteo ngapxhu#cx#y#ch Cristo Jesús y'ayuc, je Dios y'ung. E Cristo Jesús y'ayuc janch y#, ycu#dumyb je' y'ayuc, tud#gy je' ycapxy. ²⁰ T#g'óc#y je ayuc hu#dibi Dios yejc jecy'ajty m#d #ch ajt yc#p#, hue' Cristo Jesús cuydundaayb. Paady co ngapxpaat#m n'ojadajtim Dios, chi n#m#naan#m. “Amén, jadu'n jada,” com Cristo Jesús ti cuydud#y Dios y'ayuc. ²¹ Com je' je' Dios hu#dibi xyajm#b#j#c#m Cristo, e Dios hu#dibi xyajm#d'ijt#m Cristo. Jadu'n Dios ytuñ m#d #ch ajcxy etz na# jadu'n m#d miich ajcxy. Je' je' Dios hu#dibi xyajn#b#j#c#m etz xyp#daac#m t#g#j#p ma y#' ytung. ²² Dios ti p#d#gy ma ajt njot nhuinma'ñ je t#y'ajt co nyajpaat#m ma Cristo Jesús. Co Dios xy'adig#y#m xyjottig#y#m y#' y#hu#ñ ym#c'ajt, chi t#y'ajt yecy co nyajpaat#m ma Cristo Jesús.

²³ Dios j#bi t#y'ajt yeg#py co m#d tud#gy njot nhuinma'ñ nm#ydacy#ch co ca' jad#g'oc n#cx#yñ#ch ma miich ajcxy m#c'amy, jadu'n nej anajty nhuinma'ñ ti nb#d#gy#ch, m#d co ca' ndzocy#ch n#cx#y n'o#cx#y huin j#p. ²⁴ Ca' n#cx#a'ñ#ch m#c'amy ma miich ajcxy, com ca' adzip nyajm#b#gaang#xy miich ajcxy hu#dibi cop#cy ajcxy mm#b#g#py. Miich ajcxy t#y#dud#gy ti mm#b#j#cc#xy. J#y# co nbubedaang#xy jayd#bi ajcxy nig# jotcu#ajt m#m#d'ad#py ma ajcxy mdzinaay#m mjy#ajt#n.

2

¹ Paady yc#p# jadu'n nhuinma'ñ ti nb#d#gy#ch co ca' n#cx#a'ñ#ch m#c'amy jad#g'oc ma miich ajcxy, m#d co miich ajcxy nyajtaj#py nyajmay#py co ngapxhuijy#ch m#d ajcxy mbocy yc#p#. ² Com pen #ch miich anajty ajcxy nyajtajpy nyajmaayb, ¿p#n jada' #ch xyajjotcug#hu#b#ch? Pues miich ajcxy hu#dibi tajp mayb, miich ajcxy xyajjotcug#hu#b#ch. ³ Paady yc#p# ti n#n#jay#yg#xy jadu'n co ca' n#cx#a'ñ#ch m#c'amy ma miich ajcxy, com ca' jadu'n ndzocy#ch co #ch miich ajcxy nyajtajpy nyajmay#py. Jac'oy co #ch miich ajcxy nyajjotcug#hu#py. Com nejhu#yb#ch co #ch jotcu# nay#hu#y#j#ch m#d miich ajcxy yc#p#. Na# jadu'n miich ajcxy jotcu# mnay#hu#hu#yb co mnejhu#hu#py co ti njotcug#hu#b#ch m#d miich ajcxy yc#p#. ⁴ Co ti njay#ch je necy hu#dibi ti nguexy#ch ma miich ajcxy, ooy mij jotmay ti nj#hu#y#ch, ixt# nyaaxich. Per ca' nan paady yc#p# ti njaay#ch je necy co nyajtajaang#xy nyajmayaang#xy. Hue' jancht#y ti njaay#ch je necy jayd#bi mnejhu#yg#xy co mijcajee ndzoc#cx#y nj#hu#yg#xy.

Meecxin ma je pin anajty jibicpi ti tuñ

⁵ Per pen jim ma miich ajcxy pinjaty ti yecy tajin mayim co ti ytundigooy, pues ca' nan ich tügpajc tajin mayim jihuuybich. Nañ jadu'n miich ajcxy nidüg'óciy mjihuuygixyp tajin mayin. Jadu'n nmına'ñich co huenjaty tajin mayin miich ajcxy mjihuuygixy, jigix ca' anaxy ajcxy nyajtajip nyajmayip. ⁶ Yajhuäcxijp je tzaachypí huidibi miich ajcxy mooyb je migüg huidibi ti ytundigooy. Ti müid jadu'ñi. ⁷ Jadu'n tzocy cham co miich ajcxy meecx je migüg jadu'n nej ti ytundigooy, etz nañ jadu'n ajcxy myajjotcugihuipy. Ca' yjecyity co je migüg anaxy oy jihuuihuip tajin mayin. ⁸ Paady ycixp may'ajt nbijctzooyich ma miich ajcxy co myajniguëxigipy ajcxy co mdzocy mjihuuy ajcxy je migüg huidibi ti ytundigooy. ⁹ Ich miich ajcxy ti nijayiy jayhuin müid je migüg ycixpi huidibi ti ytundigooy, jigix jëbi nnejhuuyich, pen mguydumyb miich ajcxy ich n'ayuc, o pen ca' mguydungixy. ¹⁰ Jadachambi co pinjaty ti ytundigooy ma miich ajcxy, e miich ajcxy mhuinmeexi yi' ypocy, nañ jadu'n nhuinmeexip ich yi' nej ytundigooy. Com ich co nhuinmeexyich tüg nmigügich nej ti ytundigooy, jadu'n nduñich müid miich ajcxy ycixpi, com Cristo y'ijxyp ñejhuuyb tüg'óciy tijaty nduunim. ¹¹ Jadu'n nhuinmeexim nmigüg ypocy, jigix Satanás, je mujcu', ca' xymimadaacim. Nejhuuyim yajxon nej Satanás mañ'ajt müidity.

Pablo ca'p anajty yjotcujc'aty jim Troas

¹² Co nja'tyich ma je cajp huidibi xiijip Troas, chi ngapxhuäcxa'ñich anajty Cristo y'ayuc ytiy'ajt, etz mij ooy tigiydac nбатыich, nej jëbi nduñich ma ajt nHuindzin Jesucristo ytung. ¹³ Per ca' anajty jotcujc nayjihuuyiijich. Com ca' nmınaybatich je ich ajt nmigüg Tito jim Troas. Paady ycixp ngapxycijxyich müid je mibijcpidijc ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴ Nyajnaxypich jäygidaacin ma Dios co müid Jesucristo ymic'ajt jatytimy nmimadacypich jabom jabom tüg'óciy huidibi xymidzip'ajtpich ma tüg'óciy naax cajp. Nañ jadu'n Jesucristo ti xymöyich yi' y'ayuc huidibi ngapxhuäcxypich ma tüg'óciy naax cajp. Je mayjäy ma canaag cajp ooy jäygidaccixy Cristo y'ayuc. Co ngapxhuäcxich Jesucristo y'ayuc xi ya, jadu'n nipaady nej tüg xuucin huidibi ooy oy xuugy, e y'abojiy xi ya. ¹⁵ Co ngapxhuäcxych Cristo y'ayuc ma yi mayjäy huidibi padamb ajcxy y'alma ñidzoocin ooy Dios jäygidägy. E ñañ jadu'n Dios ooy jäygidägy co ngapxhuäcxych Cristo y'ayuc ma yi jäy ajcxy huidibi ajcxy y'alma tigoyaamb. Jadu'n ich ajcxy ndung nipaady nej jihuuy nboomjócxich jabom jabom ma Dios yhuinduu müid Cristo ycixpi. ¹⁶ Pinjaty mijpidacp Cristo y'ayuc huidibi ngapxhuäcxypich, hue' je' y'alma nidzögamb. E pinjaty ca' mijpidägy Cristo y'ayuc, hue' je' y'alma tigoyaamb. Ooy chachchipity chachmijhuinma'ñity ich ajcxy ndung. ¹⁷ Ca' ich ajcxy nduñ jadu'n nej jacnaagity ajcxy huidibi Dios y'ayuc mihuudijtip meeñgixy. Cixyjot huinijot ich jäy nyaj'ixpijccixy Dios y'ayuc ytiy'ajt. Com Dios ti xyajñibicyich co yi' y'ayuc ngapxhuäcxich. Müid co nyajpaatim ma Cristo, paady ycixp nduunim jadu'n nej jihuuy nyajpaatim jabom jabom ma Dios yhuinduu.

3

Je jemybi ayuc tiy'ajt huidibi Dios xymooyim

¹ Co jadu'n nmına'ñich ¿nej m'ijxcixy nej jihuuy huinjemy nyajtzondäga'ñich ayuc co ndzachnaymayáanigixyich ci'm? ¿Nej mdzojccix co ajcxy nyaj'ixipy tüg tiy'ajt necy co nduñich ma Dios ytung? o ¿Nbijctzohuipich tüg tiy'ajt necy

ma miich ajcxy, jadu'n nej nijëjity jäy ytungixy? ² Ca' ñch ajcxy ndiy'ajt necy ycopicyity. Com jëbi yi mayjäy ajcxy tïy'ajt pigipy ma miich ajcxy mdzinaayin mjogy'ajtin co tudägy ti nyaj'ixpicyich miich ajcxy Dios ytiy'ajt. Jadu'n miich ajcxy nipaady nej ñch ajcxy ndiy'ajt necy yjaayity ma ñch ajcxy njot nhuinma'ñ. E jadu'n jäy ajcxy ijxcabipy etz huinjihuipy. ³ Cristo ci'm ti pidägy yi' ytiy'ajt ma miich ajcxy mjot mhuinma'ñ mïid je ayuc huïdibi ti ngapxhuäcxyich ma miich ajcxy. Jadu'n miich ajcxy nipaady nej tüg tïy'ajt necy huïdibi Cristo ti jaay. E huïdibi ñch miich ajcxy ti nyaj'ixcixy ti nyajñimaaygixy. Miich ajcxy ca' jadu'n ocpaatni nej tüg tïy'ajt necy huïdibi jäy ti jay mïid tinta. Nañ jadu'n ni ca' yjëjity je tïy'ajt huïdibi cojayip ma tüg tzaadzech. Hue' miich ajcxy janch nipaady nej tïy'ajt necy huïdibi je Dios jugypï yjihui'ñ ymic'ajt ti jaay ma jäy ajcxy yjot yhuinma'ñ.

⁴ Nejhuïybich tïydudägy co janch tïy'ajt nej nmïna'ñich co Cristo ti xya-jnïbicyich jada tung mïid Dios ycixpi. ⁵ Ca'p ñch ajcxy jëbi ci'm madägy ma Dios ytung. Tüg'öciy mic'ajt etz tïy'ajt jiiby nbáatcixyich ma Dios, huïdibi mïid jëbi ndüungixich yi' ytung. ⁶ Dios ti xymóoygixyich mic'ajt co ndunipyich ajcxy ma yi' ytung. Dios ti pidägy ma ñch ajt jemybi ayuc tïy'ajt, huïdibi mïid xy'ane'mim. Jada jemybi ayuc tïy'ajt je Espiritu Santo pidaacp ma ajt njot nhuinma'ñ. E ca' je' yjadu'nity nej je ayuc tïy'ajt huïdibi Moisés yjayhui'm jecy'ajty. Mïid je Moisés y'ayuc huïdibi jaybety ijtp, Dios xymooyim je o'cin. Mïid je jemybi ayuc tïy'ajt huïdibi je Espiritu Santo yejcpy, Dios xymooyim jugy'ajtin huïdibi ca' ycixipy ytigoyipy ni mïna.

⁷⁻⁸ Je Dios ycötujcin huïdibi Moisés yjayhui'm hue' jaybejty oga'n ma tüg tzaa. E je huin'it tiempo ooy Moisés anajty yhuiñyijp mic' y'adäcxy mïid Dios y'oy'ajtin. E je Israel jäy ajcxy ni ca'p je' anajty huaad y'ijxcixy Moisés yhuiñyijp, co anajty ooy mic' chach'adäcxy. E jada Dios y'oy'ajtin huïdibi Moisés ymïid, ca' jecy y'ijty. Hue' je' tigooyñip anajty oñydägy'amy. Per pen Dios yaj'ixip anajty yi' y'oy'ajtin co Moisés moy je jäy ajcxy je Dios ycötujcin huïdibi ane'm yi' o'cin, nïgi mi'idipy Dios y'oy'ajtin je jemybi ayuc tïy'ajt huïdibi je Espiritu Santo xymooyim. ⁹ Pen mij anajty oy'ajtin mïidity je cötujcin huïdibi tuuñ co y'ane'my ma ñch ajt nbocy n'o'cin. Nïgi mij'oy'ajtin mïidity Dios y'ayuc ytiy'ajt je jemybi huïdibi mïnaamb co Dios jëbi xyaj'ahuimbijtim tudägy. ¹⁰ Jëbi nmïnaanïm co je jécyp cötujcin y'oy'ajtin ca' yi' ytimytiijity co nyajquixyihuaanïm mïid je jac'oybi oy'ajtin huïdibi Dios y'ayuc ytiy'ajt jemybi ymïid. ¹¹ Com pen ymïid oy'ajtin je cötujcin huïdibi ymic'ajt ca' y'ida'ñ huinixi huinitïempo, nïgi oy'ajtin mïidity Dios y'ayuc ytiy'ajt jemybi huïdibi ca' ycixipy ytigoyipy nimïna.

¹² Mïid co njïp'ijxim je oy'ajtin huïdibi Dios xymöhuaanïm mïid je jemybi y'ayuc, paady ycixp ngapxhuäcxim Dios y'ayuc huinmic' jotmic. ¹³ Ca' jadu'n nduunim nej Moisés idich jecy'ajty co anajty mïidity yhuiñyijp huingobe'nïy, jigix ca'ydi Israel jäy ajcxy ixxy nej je' anajty ytigoy je Dios y'oy'ajtin huïdibi anajty quëxïcp ma je' yhuiñyijpin. ¹⁴ Per yi' Israel jäy jecy'ajty ca' ajcxy yajxon huinjihuïy ti anajty Dios ytumyb mïid Moisés, ixti chambaadni yi' Israel jäy ajcxy ca' yajxon huinjihuïygixy co ajcxy capxcixy je ayuc huïdibi Moisés yjayhui'm. Jadu'n nipaady nejjuïy Moisés chambaadni y'ityñi huingobe'nïy. Co ajcxy mibigipy je Cristo, huin'it ajcxy huinjihuïpy, e jadu'n je' paadipy nej juïy Moisés ti ñayhuingobe'ndüdyi. Co yi' Israel jäy ajcxy mibijccixipy Cristo, e ijxip ajcxy Dios y'oy'ajtin, huin'itni ajcxy huinjihuïpy Dios y'ayuc ytiy'ajt je jécyp. ¹⁵ Ixti chambaadni co yi' Israel jäy ajcxy capxcixy je migooxpï libro huïdibi Moisés yjayhui'm, ca' ajcxy huinjihuïy yajxon Dios y'ayuc, jadu'n nipaady nej ajcxy yhuinma'ñ ymädity. ¹⁶ Pinjaty

jothuimbijtp, e mibicy ñich ajt nHuindzin Jesucristo, oyñip yí' yhuinma'ñ, e yhuinjihuipy Dios ytiy'ajt. ¹⁷ Je Huindzin Jesucristo, yí' je' Dios yjihuí'ñ ymic'ajt ymíd. E ma Dios yjihuí'ñ ymic'ajt yajpaady, Dios yí' yí' jadu'mbi jáy ajcxy yajnihuätzictutp ma yí' Dios ycötujcin je jécyip. ¹⁸ Paady ycixp tüg'óciy ñich ajt jadu'n nipaady nej tüg iix ma nni'ixim ajt nHuindzin Jesucristo y'oy'ajtin. Com ca' jadu'n patni nej jihuíy n'ijtim huingobe'niy. E nañ jadu'n ñich ajt njacyujcpejtim n'oy'ajtin, jaydëbi nguipxyjatytim míd Cristo. Com jabom jabom ñich ajt ñigi nbaatim n'oy'ajtin ma Cristo. Jada je' huídibi je Dios yjihuí'ñ ymic'ajt ytumyb ma ajt njot nhuinma'ñ. E ñich ajt nHuindzin Jesucristo ti pidägy Dios yjihuí'ñ ymic'ajt ma ajt njot nhuinma'ñ.

4

¹ Com Dios ti xypa'ayooyich, e ti xyajñibicyich co ngapxhuäcxibich yí' y'ayuc ytiy'ajt jemybi, paady ycixp ca' njotmetzcíyich. ² Per ooy ti njijpcodijiygixyich ti njijpcogapxíygyxich yí' jáy ajcxy y'ayuc huídibi ajcxy ytungixyp etz ycapxcixpy ayüch ameech, etz huídibi oymídzöyduuni. Ca' ñich ajcxy ti nduñich míd jibic-huinma'ñ. Nañ jadu'n ni ca' nyajtigájtzcixich Dios y'ayuc. Hue' janchtiy ngapxpich ajcxy huídibi janchip. Jadu'n nyaj'ixpíjccixyich yí' jáy ajcxy, jaydëbi ajcxy jotcuje ñayjihuíygyxich ma Dios yhuinduu. ³ Yí' jáy ajcxy huídibi nicxy y'alma ytigoyaangixy ca'oydactuuby, ca' ajcxy huinjihuíy Dios y'ayuc oybi nej jëbi ajcxy y'alma nídžögipy. Jada je' je ayuc huídibi ngapxhuäcxipich. Pinjaty ajcxy y'alma nídžögip yhuinjihuíyb ajcxy jada ayuc. ⁴ Yí' ajcxy huídibi y'alma tigoyaani ca' mibijccixy Dios y'ayuc, com Satanás huídibi ane'mb ya naaxhuiñ ti yajmädyii ajcxy yhuinma'ñ. Ca' je' ajcxy huinjihuíy Cristo y'ayuc oybi. Cristo tú'ciy yaj'ixy, tú'ciy mic'ajt mídity, nej Dios yaj'ixy nej Dios mic'ajt mídity. E Cristo y'ayuc jadu'n nipaady nej tüg mjtixin huídibi Satanás ti ahuijztucy ca'ydi yticxy ma je' ajcxy. ⁵ Co ñich ajcxy ayuc ngapxhuäcxich, ca' ñich ajcxy ngapxhuäcxy ngi'm'ayuc ngi'mdiy'ajt. Hue' ñich ajcxy ngapxhuäcxyp Jesucristo y'ayuc ytiy'ajt. Ngapxhuäcxich ajcxy co Jesucristo ñihuindzin'ajtaayb tüg'óciy. E nañ jadu'n ngapxhuäcxich ajcxy je tiy'ajt co ñich ajcxy jadu'n naydijiygixyich nej jihuíy miich ajcxy xytumbi'adyii míd Cristo ycixpi. ⁶ Je Dios huídibi jecy'ajty ane'm co huen tixxin ji'aty huídibi codicxip ma ycoodzity, yí' ti xymooyim y'ayuc ytiy'ajt. Yí' y'ayuc tim jadu'n nipaady nej tüg tixxin nmíd'ajtim ma ajt njot nhuinma'ñ, jigix jëbi n'ixim je Dios y'oy'ajtin huídibi quëxícp ma Jesucristo yhuíñyijp.

Je jugy'ajtin co nmibijcim

⁷ Je Dios y'oy'ajtin oybi nmíd'ajtim ma ajt njot nhuinma'ñ, ñich ajt ca' ni ti mic'ajt nmíd'ajtim ma ajt ngi'mjot ngi'mhuinma'ñ. Jadu'n Dios pidägyñi yí' y'oy'ajtin ma ñich ajt, tim jadu'n nej jáy ajcxy pidaaccixy pi'cmeen ma pi'c'idzimboch. ⁸ Oy ñich ajcxy nminaxyich nyajnaxyich may ayo'n, per ca' ndajy nmayich ajcxy anaxy. Ooy nhuinmay'ahuídijtcixyich míd je tzaachypi ayo'n ycixpi, per ca' nhuinma'ñyidigóoygixyich. ⁹ Oy ñich ooy nmídzip xy'ixhuídityich xypahuídityich, per Dios ca' xy'ixmachich. Canaag'oc ñich nmídzip ti xycujy ti xyjibipyich. Per ca' ñich njugy'ajtin ti ytigooy. ¹⁰ Hueñyama'amyity nhuidityich ajcxy nmídich je tzaachi'au ma nninícxich, ma jáy ajcxy ti xychaachytúungixich. Je' je' je iixpejt co nhuidityich o'cin jip'am, tim jadu'n nej Jesús anajty huídity o'cin jip'am. Ngöbicycpich jada tzaachypi, jigix tüg'óciy jáy ajcxy nejhuíhuip co Jesús xypubejtpich xypudigíybich. ¹¹ Nami jacjugy'ajtnich ajcxy, o'cijp'am ñich ajcxy nhuidijtcixy

jabom jabom m̄id Jesús ycixpi, jigix jēbi tūg'óciy jāy ajcxy nejhuñhuipy co Jesús xypubejtcixyp xypudiḡiygixyp. ¹² Jadu'n ndzināyich o'cjipp'am, jigix miich ajcxy m̄id'adip jugy'ajtin huídibi ca' ycixipy ytigoyipy.

¹³ Jaybety ymiñ ma Dios ñecy ma jadu'n ymina'ñ: “Ti nmibicyich, e paady ycixpi ti ngapxp̄idz̄imybich nej ti nmibicyich.” Tim jadu'n nej Dios ñecy ymina'ñ, nañ tim jadu'n ñch ajcxy yminaangixy co nmib̄jccixyich Dios, e paady ngapxp̄idz̄imgixyich nej nmib̄jccixyich. ¹⁴ Com nejhuñyim jadu'n nej Dios yajjugyp̄icy Jesús co y'o'cy. Nañ tim jadu'n Jesús xyajjugyp̄igaanim jadūg'oc m̄id Dios ymic'ajt co anajty n'o'cim. E quipxyi m̄id miich ajcxy xyajñcximip ma Dios yhuinduu. ¹⁵ Tūg'óciy tzaachyp̄i huídibi nminajxyp̄ich nyajnajxyp̄ich, hue' nminaxyich nyajnaxyich m̄id miich ajcxy m'oy'ajtin ycixpi. E co anajty Dios jactuñ may'ajtin m̄id jacjadyi mayjāy ajcxy, nañ jadu'n mayjāy yajnāxcixipy jāygidac̄in ma Dios, jigix jēbi mayjāy ñbāatcixipy capxp̄aatcixipy Dios.

¹⁶ Paady ycixpi ni mina x̄i, ñch ajcxy ngajotmetzc̄ihuaangixy. Oy ñch ajcxy nnin̄cx yjacc̄ominajc'id̄ich jabom jabom, per ñch ajcxy njot nhuinma'ñ n̄gi mic'ajt paady jabom jabom. ¹⁷ Je tzaachyp̄i je ayo'n huídibi nminajxim nyajnajxim ya naaxhuiñ, ca' yi' ytimyt̄ij̄ity. Cixip naxip yi'. E m̄id co nminajxim nyajnajxim tzaachyp̄i ayo'n, huin'it nbaatim oy'ajtin n̄gi ym̄j̄ity y'oȳity huídibi ca' ycixipy ñaxipy ni mina. ¹⁸ Ca' huaad ñch ajt nhuinma'ñ nbidaac̄im ma huídijaty cixamb t̄igoyamb. Tūg'óciy tijaty yaj'ijxp̄ yajhuind̄icxp̄ ya naaxhuiñ, cixip t̄igoyip yi'. Per huídijaty ca' yaj'ixy yajhuind̄icxy, id̄ip yi', ca' ycixipy ytigoyipy nimina.

5

¹ Com nnejhuñyim co n'o'cim, naaxn̄cx ajt huídibi nm̄id'ajtim ya naaxhuiñ cixamb t̄igoyamb yi'. Dios ym̄id ni'ix̄i j̄iby tzajpjoty huingbi nin̄cx huídibi yi' ti cojy huídibi xym̄ohuaanim. Je nin̄cx huídibi xym̄ohuaanim jadu'n nipaady ma ajt n'alma nej tūg' t̄ijc huídibi t̄inaayb huin̄x̄i huin̄tiempo. Tūg' t̄ijc huídibi Dios ti cojy, ca' nan huídibi jāy ajcxy ti cojcixy. ² Janch t̄iy'ajt co ca' ooy jotcuje ndzinaayim ya naaxhuiñ m̄id ajt nnin̄cx. Ooy nj̄j̄p'ijxim mina nbadaanim ajt je nnin̄cx huídibi nm̄id'adaanim j̄iby tzajpjoty. ³ Je' nnin̄cx xyūd̄zim tim jadu'n nej co tūg' jemyhuit nyajtiḡiyim, ca'ydi n'ij̄tim n̄ihuādz. ⁴ Nami njactzinaayim ya naaxhuiñ m̄id ajt nnin̄cx, ca' ooy jotcuje nayjihuñyim. Ooy xyajtajim xyajmayim je tzaachyp̄i ayo'n huídibi nminajxim nyajnajxim. Ca' nan co ca' ndzoj̄cim ajt nnin̄cx, o co nyajtiḡoayan̄im ajt nnin̄cx. Hue' ndzoj̄cim co nm̄id'ajtim jemybi jugy'ajtin jemybi nin̄cx jigix co ajt njugy'ajtin huídibi cixamb t̄igoyamb, ahuimb̄id̄ip yi' jemybi jugy'ajtin huídibi ca' ycixipy ytigoyipy. ⁵ Dios yi' ti yaj'oȳiy je jugy'ajtin huídibi nm̄id'ajtim cham, jigix jēbi nm̄id'ajtim huingbi jugy'ajtin huídibi ca' ycixipy ytigoyipy ni mina. Dios ti xymoyim je Esp̄iritu Santo je' je' t̄iy'ajt ma ñch ajtin co nbadaanim jemybi jugy'ajt jembyi nin̄cx.

⁶ Jabom jabom ñch ajt jotcuje naybidaac̄im. Nejhuñyim co nami n'jactzinaayim m̄id ajt nnin̄cx, ca' nm̄id'ajtim jemybi nin̄cx, ca' nyajpaatim ma ajt nHuindzin Jesús chināy. ⁷ Je' nnin̄cx xyūd̄zim tim jadu'n nej co tug' jemyhuit nyajtiḡiyim, ca'ydi n'ij̄tim n̄ihuādz. ⁸ Jotcuje etz jotmic nayjihuñyim. N̄gi jotcuje ixyp̄y nayjihuñyim, e ooy njatzoj̄cim co mic'amy ixyp̄y n'ij̄xmaj̄zim jada nin̄cx, jigix nicxy ndzinaydac̄p̄j̄cim ma ajt nHuindzin Jesús chināy. ⁹ Paady ycixp̄ jadu'n njacjugy'ajtim njactzinaayim jigix jēbi ajt nHuindzin Jesús jāygid̄aḡipy ajt ndzinaayin. Ca' ñej̄ity pen

njactzinaayim ixyipy mïid ajt nninïcx, o pen tzojc n'ijxmajtzim ajt nninïcx ixyipy, e nicxim ma Jesús yajpaady. ¹⁰ Nidüg'óciy ïch ajt nayguëxïgaanim ma Cristo ytiydundac, e jiiiby nidüg nidüg paadïp huïdi anajty nipïdzïmïp jadu'n nej anajty ti chinäy, pen oy, o ca' y'oyïty.

Je ayuc tïy'ajt huïdibi nicy'ajt cidägy'ajt mïid

¹¹ Com nejhuïyïm co copïcy nhuindzigïyïm ajt nHuindzin Jesucristo, paady ycïxpï mïctägy nyajmïbïcyïch yi mayjäy ajcxy Cristo ytiy'ajt. Dios ñejhuïyïb co tudägy ïch njot nhuinma'ñïch. E nañ jadu'n ndzocyïch co mïich ajcxy mnejhuïyïgïxïpy co tudägy ïch njot nhuinma'ñïch. ¹² Ca'p ïch ajcxy yam naygapxpáatïgïxy jadüg'oc co ïch ajcxy ooy n'oyjäyïty, o co ïch ajcxy ooy oy ndúngïxyïch. Hue' janchtiy lugar nyejcpyïch, jaydëbi mïich ajcxy xycapxpadïpyïch etz jotcuyc mneyjihuïyïgïxïpy mïid ïch ajcxy ycïxpï. Jïgïx jëbi mïich ajcxy m'adzohuïp yi jäy ajcxy huïdibi capxpatp pïnjaty yhuïnyïjp ooy oy yquëxïgy, e ca' ajcxy tuñ cuendi pen je' mïid oyjot oyhuinma'ñ, o pen ca'. ¹³ Pen minamb jäy ajcxy co ïch nlocïty, huen xyajnájxcïxyïch locï mïid Dios ycïxpï. Pen jäy minangïxp co oy huinma'ñ nmïdidïyïch, jëbi jadu'n ajcxy xyajnájxcïxyïch jadu'n nej oy huinma'ñ nmïdidïyïch mïid mïich ajcxy m'oy'ajtin ycïxpï. ¹⁴ Com Cristo ooy xychojcm xyjïhuïyïm, paady ycïxp njatytïmcapxymïdoohuïm Cristo. Com nnejhuïyïm ajt nidüg'óciy tïydudägy co Cristo y'o'cy mïid ajt nbocy ycïxpï, e paady ycïxpï jadu'n nipaady nej jïhuïy nidüg'óciy ïch ajt ti n'o'cim quipxyï mïid Cristo. ¹⁵ Cristo o'c mïid tüg'óciy jäy ajcxy ycïxpï, jïgïx co tüg'óciy jäy ajcxy huïdibi jactzinaayb jacjugy'ajtp, ca' ajcxy yajtúngïxïpy yci'mjot yci'mhuinma'ñ ma ajcxy chinaayïn. Huen ajcxy tzïnaaygïxy mïid Cristo ycïxpï huïdibi o'c mïid yi' ajcxy ypocy ycïxpï, etz yjugypïjcy jadüg'oc mïid yi' ajcxy ycïxpï. ¹⁶ Mïid co ndzïnaayïm mïid Cristo ycïxpï, paady ycïxp ca' ndunïm cuendi naaxhuïnyjäy ajcxy nej ñayñïgápïgïxy nayñïmydáacïgïxy. Jayïjp ca'ni anajty nmïbïjcm, ooy anajty ndunïm cuendi nej jäy ajcxy ñayñïgápïgïxy nayñïmydáacïgïxy. Jadachambï etz yjacnicxni xï tiempo, ca' ndunïm cuendi nej naaxhuïnyjäy ajcxy capxcïxy mïydaaccïxy. ¹⁷ Com tïgachjaty cham nhuinjïhuïyïch Cristo, paady ycïxp pïnjaty yajpatp ma Cristo, jemyjot jemyhuinma'ñ je' ymïd'ajtnïp, jadu'n nipaady nej jïhuïy ti ma'xung'aty huinjemy. Je jot je huinma'ñ huïdibi anajty ymïd co anajty ca'ni mïbicy Cristo, ti je' ñajxtäy, jadachambï ac jemyjot ac jemyhuinma'ñ ti y'ahuimbïjttäy.

¹⁸ Tüg'óciy tijaty huïdibi ya yajpatp, jiiiby chooñ ma Dios, Dios yaj'oyïyday. Mïid huïdijaty Cristo ytuun mïid ïch ajt ycïxpï, jotcuyc n'ïjtm mïid Dios. E Dios xyajnïbïcïch co ngapxhuäcxyïch Dios y'ayuc jadu'n nej jäy ajcxy jëbi ajcxy jotcuyc y'ïjtcïxy mïid Dios. ¹⁹ Jadu'n nmïnaanim co Dios ymïd'ïjtpy Cristo. E Dios tuun quipxyï mïid Cristo co yi' yaj'oyïy je tzip nej naaxhuïnyjäy ajcxy mïdzip'aty Dios. Dios ca' yajcomïdohua'ñ jäy ajcxy ypocy huïdibi mïbïjccïxp Cristo, mïid co Cristo ti yajpocyñïhuächyï. E Dios ti xyajnïbïcyïch co ngapxhuäcxyïch yi' y'ayuc nej jäy ajcxy jëbi paadïp pocyhuinmeecxin, etz nañ jadu'n paadïp jotcuyc'ajtin ma Dios. ²⁰ Paady nhuïdityïch mïid Cristo ycïxpï ngapxhuäcxyïch Cristo y'ayuc. Jadu'n huïmbïdzïmyb nej jïhuïy mïich ajcxy Dios xymïnucxtaaccïxy mïid ïch n'ayuc jïgïx nmïbïjccïxïpy Cristo y'ayuc. Paady ngodinäyïch Cristo co nmïnucxtacypïch mïich ajcxy. Jothuimbïjtcïx nej mdundïgooygïxy mïid Dios ycötujcm e Dios xyhuinmeecxpï ajcxy mbocy, jïgïx jotcuyc m'ïdïpy ajcxy ma Dios. ²¹ Cristo ca' ma ytundïgooy, per mïid ajt nbocy ycïxpï Dios yajnax je Cristo jadu'n nej tüg pocyjäy. Jadu'n Dios ytuñ

müid je Cristo, jigix co ich ajt n'ijtim ma Cristo, nbaatim je tudägy'ajtin huidibi Dios chojcpy nmüid'ajtim.

6

¹ Ich ajcxy etz müich ajcxy quipxyi nduunim ma Dios ytung. Nminucxtacpyich müich ajcxy co mgöbigipy ajcxy je may'ajt je oy'ajt huidibi Dios ti tuñ müid müich ajcxy ycixpi, ca'ydi ñaadigi'aty Dios ytung. ² Com jadu'n jaybety y'ity ma Dios ñecy ma Dios jadu'n ymina'ñ:

Co je xii tiempo ti patni, ti ich müich m'ayuc midoohui. Ti nbubety nbudigiyich je huin'it xii je huin'it tiempo co ti yhuaad'aty mina jäy ajcxy y'alma ñidzögipy. Jadachambi xii tiempo ti yhuaad'ajtni mina jäbi Dios xyñidzoocim ajt n'alma.

³ Ca' pin n'adziptyich co nduñich ma Dios ytung, jigix ca'ydi pinjaty ymina'ñ co ca' oy nduñich. ⁴ Nañ jadu'n ca' n'adziba'ñich müich ajcxy. Nigi ndzocyich co ñiguëxigip tüg'ociy ich ndung co nduñich müid Dios ycixpi. Ooy nyajtuñich mecxtujcin. Ooy nmechtucyich ayo'n etz tzaachypi. Ooy nyajmayjatyich nhuit nducxy ngaayin n'uucin. Ooy ich ndzinaayin chipity. ⁵ Ti ajcxy xyci'atyich, ti ajcxy xypidäacixyich pujxtigoty. Ti jäy ajcxy xymibidigyich, e ooy ajcxy yhuaangixy yjihuygixy. Ti tzaachypi nminaxy nyajnaxyich ma ndungich. Minaajity canaag xii ca' nmäyich, e minaajity ayuu n'ityich. ⁶ Nyajniguëxipy ich ajcxy co ich ndungixyich müid Dios ycixpi, müid co huadz jot huinma'ñ nmüididyich ajcxy. Ca' ma jibicpi nmüididyich ajcxy, müid co n'ixpijccixyich ma Dios ytiy'ajt. Ooy mecxtujcin nmüididyich ajcxy. Ooy ich ajcxy nba'ayooyich nmigügtijcich. Dios yjihui'ñ ymic'ajt yajpatp ma ich ajcxy njot nhuinma'ñ. Ooy ich müich ajcxy ndzojccixy njihuygixy cixyot huinijot. ⁷ Nyajniguëxipy ich ajcxy co ndungixyich müid Dios ycixpi, müid co ngapxhuäccixyich Cristo y'ayuc ytiy'ajt tudägyi, e nañ müid co nmüididyich ajcxy Dios yjihui'ñ ymic'ajt, etz müid co nmüididyich ajcxy ca'pxy Dios ytiy'ajt tudägyi. Müid yi' ytiy'ajt tudägy nyajmibicyich jäy ajcxy, etz müid yi' ytiy'ajt naygohua'ñyijich ma nmüidzipich. ⁸ Minaajity jay xycapxpäadygixyich; minaajity jäy ajcxy xyñigapxy xyñi'ojijygixyich; minaajity jäy yminaangixy co oy nduñich; minaajity jäy yminaangixy co jibic nduñich; mina ngamina jäy xytijcixyich co n'indäaccixyich; e minaajity jäy yminaangixy co tiy'ajt ngapxpich. ⁹ Minaajity jäy yminaangixy co ajcxy ca' xy'ixy'ajtigixyich; e minaajity jäy yminaangixy co ooy oy xy'ixy'ajtigixyich; e minaajity ayo'n jipp'am o'cin jipp'am nhuidijtcixyich. Per jactzinaaybich ajcxy jadu'n. Ti je tungmüidpi xychaachtungixyich, per ca' ich ajcxy xyaj'o'cyi. ¹⁰ Ooy ich ajcxy njatajcxixy njamaaygixy, per jabom jabom jotcuje nayjihuygixyich. Ayoobi ich ajcxy ca' ti meen etz ca' ti pidägy nmüid'ajtcixyich. Per nañ jadu'n mayjäy oy'ajtin pada'ñ ma Dios müid ich ajcxy ndung ycixpi, jadu'n jada oy'ajtin nipaady nej meen etz nej pidägy. Oy ca' meen etz ca' pidägy nmüididyich ajcxy, per nmüidich ajcxy tüg'ociy huidibi nimina ca' ycixy ytigooy.

¹¹ Migügtijc ajcxy, huidibi yajpatp jim Corinto, ti nmüidcapxcixy ti nmüidmiydaaccixy ma jada necy müid tüg'ociy tudägy'ajt. Ti ngapxyich nmüidägyich nej njot nhuinma'ñ nmüididyich. ¹² Ca' ich n'ixmach nej ich müich ajcxy ndzojccixy njihuygixy cixyot huinijot. ¹³ May'ajt nbijctzooybich ma müich ajcxy co xyajnimähuibich nej müich ajcxy mjot mhuinma'ñ müidity tim jadu'n nej ti nduñich müid müich ajcxy. Jadu'n may'ajt nbijctzooyich ma müich ajcxy nej ungedeedytjic ajcxy oy'amy y'ung ajcxy ihuijcxixy capxhujcixy.

Ich ajt je' ma Dios jugypí chinaayín

¹⁴ Miich ajcxy, ca' mdungmujccixy m'ayoomujccixy mïid jäy ajcxy huïdibi ca' mïbijccixy Cristo. Com ca' huaad tudägyjäy ajcxy mïddzinaaygixy jäy ajcxy huïdibi ca' tudägy huinma'ñ mïidity. ¿Nej jëbi je huïdibi tiy'ajtip ytügïy mïid huïdibi ca' ytiy'ajtity? ¿Nej jëbi pinjaty tiy'ajt mïid mïid'idipy pinjaty huïdibi ca' tiy'ajt mïidity? Je huïdibi tiy'ajt mïid jadu'n nipaady nej chinäy ma jïin ytïcxin. E je huïdibi ca' tiy'ajt mïidity ñipatp nej jihuïy chinäy agootztuuby.

¹⁵ ¿Nej jëbi Cristo etz Satanás ñay'ayuc-huinjihuïyigixy? ¿Nej jëbi tüg mïbijcpi yajtügïy yhuinma'ñ mïid tüg huïdibi ca' ymïbicy? ¹⁶ Ca' ni nej jëbi tzaadzech quipychech y'idipy ma Dios ytïjc. Com yi' ajcxy huïdibi tzaadzech ojadajtp ca' ajcxy yhuinma'ñ ytügïy mïid Dios ytiy'ajt. Je Dios juugypí ymïd chinaydac ma ich ajt njot nhuinma'ñ, paady ycïxp jadu'n ich ajt nipaady nej Dios ytïjc. Com jaybety y'ity ma Dios jadu'n ymïna'ñ:

Ndzinaydac nbïdägaamybich ma yi' ajcxy. Huïdidaamybich ma yi' ajcxy yajpaady. Yi' ajcxy ich xyDios'adaanip. E ich ajcxy yi' njäy'adaanip.

¹⁷ Paady nañ jadu'n ajt nHuindzin Dios ymïnañ:

Copicy co miich ajcxy m'ixmadzïpy yi' jacjadyïi jäy ajcxy, e tzinaaygix abicy.

Ca' ajcxy mnijot'adïpy je jïbicpi, huin'it ich miich ajcxy ngöbïgïpyich.

¹⁸ Ich miich ajcxy xymïd'adïpyich jadu'n nej jihuïy ich miich ajcxy xy-Teedy'adyïi. E jadu'n miich ajcxy m'idipy nej ich nmang n'anäg.

Jadu'n je mijpi Dios ymïna'ñ.

7

¹ Miich ajcxy huïdibi ooy ndzocy njihuïyich, com Dios jadu'n ymïna'ñ co tzinaaydac pidäga'ñ ma ajt njot nhuinma'ñ, paady ycïxp tzoc yajhuaatzim ajt njot nhuinma'ñ, etz ma ajt n'espïritu, e jadu'n Dios nhuindzigïyim etz nyajmïj'ajtim cïxyjot huinïjot.

Co ajcxy jothuimbijt ma Dios huïdibi ajcxy jim Corinto

² Tungix may'ajt xycöbïgïpïch miich ajcxy cïxyjot huinïjot. Ca' ich ajcxy ni pin ti nmïdundïgöoygixyich, nañ jadu'n ca' ni pin ich ajcxy ti nyaj'ixpïjccixyich jïbic-huinma'ñ. Nañ jadu'n ni ca' ich ajcxy pin ti nhuin'ïñich. ³ Ca' jadu'n nmïna'ñich mïid co nyajpocycähua'ñich miich ajcxy. Com jadu'n jacjayïjp ti mïna'ñich co ooy ndzocy njihuïyich miich ajcxy, tú'cïy ajcxy ndzinaayim, e tú'cïy ajcxy n'ó'cimïpy. ⁴ Ooy ich miich ajcxy njot'amïj'adyïijich. Ooy ich miich ajcxy ngömaaygixy. Ooy jotcujc nayjihuïyïijich mïid miich ajcxy ycïxpi. Oy njayajpaadyich tzip agujc ayo'n agujc, per co njäyechich miich ajcxy, jotcujc nayjihuïyïijich.

⁵ Nej ich ajcxy nja'ty ya Macedonia, ca' njotcujc'ajtcïxyich. Hue' nyajpaadyich ajcxy tzip agujc capxy agujc huen ma'ámyity. Jäy ajcxy xymïdzip'ajtpïch, etz nañ jadu'n tzigïybich jotjoty huinma'ñyoty. ⁶ Per Dios je huïdibi yajjotcugïyb yajjotmïcpijcp pinjaty tajp mayb, yi' ti xyajjotcugïyich co Tito yja'ty ya ma ich nyajpaady co jim choñ ma miich ajcxy. ⁷ Ca' nan ti njotcugïyich mïid tim jëyi co Tito ti xyñijädyich. Hue' ti njotcugïyich co yi' ti xyñimäyich jadu'n nej yi' jotcujc'ajtin ti paady ma miich ajcxy. Yi' ti xyajmïdmiydägyich jadu'n nej miich ajcxy tajin mayin mjihuïygixy mïid mbocy ycïxpi. E nañ jadu'n nej mhuinmaaygixy nej nyajpaadyich. E mïid jada ayuc ñgi ti njotcugïyich.

⁸ Ich ca' ndajy nmayich mïid co ich miich ajcxy ti nyajtajcïxy ti nyajmaygixy mïid je necy huïdibi ajcxy nyajniguejx. Oy anajty ti njajihuïyich jotmay co nnejhuïyich co miich ajcxy ooy mdajy may tüg xïi mejtz xïi mïid

ich nnecy ycixpi. ⁹ Jadachambi ooy jotcuyc nayjihuiyijich. Ca' nminaanim miiid je tajin je mayin ycixpi huudibi miich ajcxy anajty miiid jotcuyc'ajtpich, com co je tajin je mayin ajcxy ti xyajjothuimbijtcixy, Dios ti jaygidägy jadu'n nej miich ajcxy ti mmimadaaccixy je tajin mayin. E ca' ich ti ndundigooyich ma miich ajcxy co ajcxy njotmaymoy. ¹⁰ Com Dios yjaygidacpyi co jäy njothuimbijtcixy, miiid co taj may ñayjihuiyigixy miiid ypocy ycixpi. E co ajcxy yjothuimbijtcixy, huin'it ajcxy je y'alma nidzoocin paadipy. E ca' je' huaad nidajim nimaayim co ajcxy y'alma ñidzögy. Co jäy ajcxy nidajcixy nimaaygixy huudi yajpat ya naaxhuiñ, e ca' yjothuimbijtcixy, jadu'ni nicxy je o'cin nipatcixy. ¹¹ Miiid je tügpi jäy ypocy ycixpi ti mbaatcixy je tajin mayin. Miich ajcxy jadu'n ti mmecxtujccixy je tajin mayin jadu'n nej Dios jaygidägy. Tungix cuendi jada' cham nej ti yhuimbizimy. Tiydudägy janch cham ti mdiydungixy miiid je pocy ycixpi. Ti xyajjotma'tcixy, e ti xy'adzigiygixy, e ni'ixiy miich anajty m'ijtcixy co mdzaachytunaangixy je huudi ti ytundigooy. E miiid jada ycixpi ti miich ajcxy myajniguex'ccixy, co ca' miich ajcxy ti pocy mmiiidty ma jadayaabi huinma'ñ. ¹² Co ich miich ajcxy jayhuin nijayiy, ca' nminaanim miiid je' ycixpi huudibi anajty ti ytundigooy. Nañ ca' nminaanim miiid je huudibi anajty ti yajmidundigooy. Nijayiyich miich ajcxy, jigix jebi mnejhuuygixy je tiy'ajt nej Dios tzocy co nduunich miiid miich ajcxy m'oy'ajtin ycixpi. ¹³ Com miich ajcxy ti mmijottigooyb Dios ytiy'ajt, paady ycixpi miich ajcxy ti mbaatcixy jotcuyc'ajt, e nañ jadu'n ich ajcxy ti nbaatcixyich jotcuyc'ajt miiid miich ajcxy ycixpi. Nañ jadu'n ooy ti njotcugiyich ajcxy miiid co Tito ooy chachjotcuycity. Oy'amy miich ajcxy ti mgöbijccixy Tito, paady yi' ooy ti yjotcugiy miiid miich ajcxy ycixpi.

¹⁴ Co ti nnimäyich Tito co njot'amij'adyijich miich ajcxy, ca' ti tzo'ydu'n ti nbaadyich, co yi' oy ti xyco'ixiygixy. Nigi oy ti yhuimbizimy miiid co tüg'óciy ayuc huudibi ich miich ajcxy ti nyajnimäy ti yhuimbizimy co yjanchity. Nañ jadu'n ti yhuimbizimy co yjanchity jadu'n nej ti nnimiydacyich miich ajcxy miiid Tito co njot'amij'adyijich miich ajcxy. ¹⁵ Jadu'n nej co Tito oy miich ajcxy xycogapxiy, yi' ooy nigi xychojccixy xyjihuiygixy co yi' nejhuüy jadu'n nej miich ajcxy mmijottigooygixy ich n'ayuc, jadu'n nej mgapxymidoohuaangixy. E nañ jadu'n co yi' ijxy nej miich ajcxy yi' mgöbijcy miiid tzi'ñ jihu'ñ. ¹⁶ Ooy jotcuyc nayjihuiyijich, ooy njot'amij'adyijich miich ajcxy.

8

Ycüejticy miiid oyjot oyhuinma'ñ

¹ Jadügnax, miich ajcxy migügtijc, nyajnejhuühuaamybich nyajmiiidmiydägaamybich miich ajcxy, jadu'n nej Dios may'ajt oy'ajt tuñ miiid je mibijcpidijc ajcxy huudibi xii ya yajpatp Macedonia. ² Je mibijcpidijc huudibi ya yajpatp ti ooy ajcxy minaxy yajnaxy tzaachypi etz ayo'n. Per ca' ñejity, ooy ajcxy jotcuyc yajpatcixy. Nañ ayoobi ajcxy, per ti ajcxy may meen yajmujccixy, jadu'n nej jihuiy ajcxy ycomeeñity. ³ Ich testigo co je migügtijc miiid yci'm tzojcin meen yejccixy, nej jebi ajcxy ymadaaccixy miiid meen, ixti anaxy ajcxy yejccixy. ⁴ Ooy xymnucxtägyich ajcxy co n'a'ixihuibich ajcxy co jebi ajcxy meen yajmujccixy huudibi miiid pubedaangixy jacjadyii je mibijcpidijc. ⁵ Nigi anaxy ajcxy ooy meen yajmujcy ca'ydi jadu'n nej anajty njijp'ixyich. Jayijp ajcxy ñayyejci ma ajt nHuindzin Jesucristo, e huin'it ajcxy ñayyéjigixy ma ich ajcxy jadu'n nej Dios tzocy. ⁶ E chi jada' ich ajcxy ooy mninucxtacy Tito co huen nicxy jadüg'oc ma miich ajcxy. Huen nicxy

yajcixy yajmay huídibi ti yajtzondägy ma miich ajcxy. Co huen je meeñ yajmujctäy huídibi cixyot huinijot mïid mbubedaangixy je mibijcpidijc ajcxy huídibi yajpatp jim Jerusalén. ⁷ Miich ajcxy ñigi ooy mmadaaccixy, ca'ydi jacpinjaty ma tüg'ociy Dios ytung. Ooy mij mibijcin miich ajcxy müdity. Ooy myaj'ixpijccixy Dios ytiy'ajt. Ooy mmijottigooygixy mguydunaangixy ñich n'ayuc. E nañ jadu'n ooy miich ajcxy xychojccixy xyjihuiygixyich. Nañ ooy ndzocyich co miich ajcxy ñigi pubejtin myegipy ma je mibijcpidijc huídibi jim Jerusalén.

⁸ Ca' jadu'n n'ane'myich co mbubéjtcixipy je migügtijc huídi jim Jerusalén. Hue' ndzocyich co miich ajcxy mnejhuíhuipy jadu'n nej yi jacjadyii mibijcpidijc yhuinma'ñ bidaaccixyp ci'm co pubedaangixy je ymigügtijc jim Jerusalén. Jadu'n mdunipy ajcxy jigix jëbi nnejhuíhuibich pen janch tiy'ajt jadu'n co mdzojccixy mjihuuygixy yi jacjadyii mibijcpidijc. ⁹ Com miich ajcxy mnejhuuygixyp jadu'n nej ajt nHuindzin Jesucristo mijmay'ajt mij'oy'ajt tuñ mïid ñich ajt ycixpi, jadu'n Jesús nipaady nej tüg mijcomeeñybi jii by tzajpjoty, mïid co yi' xychojccim xyjihuiyim mijcajee, chi yi' ixmajztay yi' y'oy'ajtin jii by tzajpjoty co ycidacy ya naaxhuiñ etz y'ayooy ya. Miich ajcxy ca' anajty ti müdity jii by tzajpjoty, per jadachambi mbadaangixyp mij'oy'ajtin jii by tzajpjoty.

¹⁰ Mïid miich ajcxy m'oy'ajtin ycixpi, ma jada necy nmooybich miich ajcxy ngapxhuijin jadu'n nej jëbi huaad mdungixy ooyäy'ajtin. Jac'oy co miich ajcxy myajcixipy je huídibi ajcxy myajtzondac jadójimijt. Miich ajcxy jacjayijp ca'ydi jac ni pinjaty ti myajtzondaaccixy meeñ yajmugii huídi mïid mbubedaangixy je mibijcpidijc huídibi yajpatp jim Jerusalén. Nañ jadu'n miich ajcxy jacjayijp ca'ydi jacpinjaty mijottigooygixy co mbubedaangixy jacjadyii mibijcpidijc. ¹¹ Jadachambi tiempo jactungix pubejtin, meeñ yajmujccix cixyot huinijot jadu'n nej ti myajtzondaaccixy ixti mabaad myajmaygixy je meeñ yajmugii. Nidüg nidüg yejccix nej ajcxy ii müdity. ¹² Pinjaty y'ofrenda yejcp janch cixyot huinijot Dios ycöbicip yi' je' y'ofrenda, jadu'n nej ii müdity. Dios ca' yi' pijctzoy huídibi ajt ca' nmüdity.

¹³ Ca' nmïina'ñich co oy jadu'n co mbubéjtcixip jacjadyii mibijcpidijc ixti mabaad mnayyajhuí'migixy ayo'ndumb. ¹⁴ Hue' yajmïina'ñ co quipxyjaty mdzïnaaygixy, ni pin cayajconaxipy e ni pin cayajmayjadipy. Jadachambi tiempo miich ajcxy nmüdity ca'pxy je huídibi mnidzïnaáygixip, ixti miich ajcxy conajxpi, paady ycixp jëbi mbubéjtcixipy migügtijc huídibi yajmay-jajtp. Jadüg tiempo miich ajcxy myajmayjadipy, e jacjadyii migügtijc jëbi xypubéjtcixipy, e jadu'n yhuimbïdzimipy co mnaybubéjtigixy quipxyjaty miñ xyipy. ¹⁵ Com jadu'n jaybety y'ity ma Dios ñecy ma jadu'n ymïina'ñ: "Pinjaty anajty may'amy mïid, ca' yajconajxy. E pinjaty anajty hueeni mïid, ca' yajmayjaty."

Tito müd ymigügtijc ajcxy

¹⁶ Per nyajnajxypich jäygidacïn ma Dios, com Dios ti pidägy ma Tito yjot yhuinma'ñ co mijottigooy miich ajcxy m'oy'ajtin, tim jadu'n nej ñich nmijottigooyich miich ajcxy m'oy'ajtin. ¹⁷ Co may'ajt nbijctzooyich ma Tito co nicxipy jadüg'oc ma miich ajcxy, agujc jotcujc cöbicy, com ti anajty jayijp yhuinma'ñ pidägy ci'm co ñicxa'ñ jadüg'oc ma miich ajcxy. Jadachambi Tito nicxip ma miich ajcxy müd ci'mdzojcin.

¹⁸ Quipxyi müd Tito nguexy ñich ajcxy yam tüg nmigüg huídibi ooy chachcapxpaadyity majaty mibijcpidijc, co ooy oy ytuñ capxhuäcxï Jesús y'ayuc ytiy'ajt nej huaad jäy ajcxy y'alma nïdzoocïn paady. ¹⁹ Ca' nan jëyi co je

mibijcpidijc yi' ycapxpadyii. Nañ jadu'n ti yhuin'ixyii mibijcpidijc ajcxy co jëbi yhuidity mïd ïch ajcxy, e tunipy pubejtin mïd je may'ajtin oy'ajtin huidibi ïch ajcxy ndumybich mïd je migügtijc ycixpi jim Jerusalén. Jadu'n nduuñich jaydëbi jäy ajcxy capxpaadip ajt nHuindzin Jesucristo. Etz nañ jadu'n jaydëbi ñiguëxigy co ïch ajcxy nbubeda'ñich ajt nmigügtijc cixyjot huinijot. ²⁰ Ooy ngüend'atyich je meeñ huidibi je mibijcpidijc ti yajmujccixy, jigix ca'ydi pin huaad xyñigapxy xyñi'ojyich, jadu'n nej ïch ajcxy meeñ nyajmújccixyich. ²¹ Jadu'n ïch ajcxy nhuinma'ñ nbidägy co tudägy ndunáangixyich ca' nan jëyi ma ajt nHuindzin Jesús yhuinduu, nañ jadu'n ma je mayjäy ajcxy yhuinduu.

²² Nañ jadu'n nguejxypich mïd yi' ajcxy jadüg ajt nmigüg, je huidibi oy ti ytuuñ ma Dios ytung quipxyi mïd ïch ajcxy e nejhuïybich co tudägy ytuñ cixyjot huinijot. E yi' miich ajcxy ooy xyjot'amij'adyii, e oy ytuna'ñ mïd miich ajcxy ma Dios ytung. ²³ Pen jim pinjaty nidiy yajty je Tito, nimaaygix co ïch yi' nmigüg, e yi' mïd nduuñich ma Dios ytung ma miich ajcxy. E nañ jadu'n pen jim pinjaty nejhuïhua'ñ pinjäy ajcxy yi', yi' jacjadyibi huidibi ajcxy nicxp mïd Tito. Nimaaygix co je mibijcpidijc ajcxy ya Macedonia ti quexy ajcxy, ytungixy mïd Cristo ymij'ajtin ycixpi. ²⁴ Paady ycixp miich ajcxy yi' mdzójccixipy mjihuïygyixyipy je migügtijc ajcxy huidibi mimb mïd Tito, jigix jëbi je mibijcpidijc ma nidüg nidüg cajp ya Macedonia nejhuïhuipy co miich ajcxy yi' mdzojccixy mjihuïygyixy je mibijcpidijc tiydudägy. E paady ycixp jëbi ïch jotcuje nayjihuïyijich mïd miich ajcxy ycixpi.

9

Je cüejtin mïd je mibijcpidijc ajcxy ycixpi

¹ Nañ ca' yjaty ycopicyity co ïch miich ajcxy njacnijayïygyixy co je mibijcpidijc huidibi xï ya pubejtin tunaangixyp ma Dios yjäy huidibi ajcxy jim Judea. ² Com nejhuïybich co miich ajcxy nañ jadu'n mbubedaangixy cixyjot huinijot Dios yjäy huidibi ajcxy jim Judea. Paady ycixp jotcuje ïch jadu'n nnimäyich je mibijcpidijc ya Macedonia jadu'n nej miich ajcxy jim Acaya mhuinma'ñ pidacy jidöjimijt co mbubedaangixy je mibijcpidijc huidibi jim Judea. E mïd co miich ajcxy jayijp mhuinma'ñ ti mbidaaccixy co mbubedaangixy je mibijcpidijc huidibi ajcxy jim Judea, paady ycixp may mibijcpidijc ya Macedonia yhuinma'ñ pidaaccixy co ypubedaangixy nañ jadu'n. ³ Paady nguejxypich Tito mïd jacjadyii migügtijc ma miich ajcxy, jaydëbi xypubéjtcixipy ma je meeñ yajmugii, jadu'n nej ti mbidaaccixy huinma'ñ. E ïch ca' ti tzo'ydu'n nbáadibich mïd miich ajcxy ycixpi ma jada pubejtin huidibi ajcxy mguexamyb jim Judea. Com ïch ti nnimäyich mayjäy co miich ajcxy ni'ixi' m'ijtcixy mïd mbubejtin. ⁴ Ca' yjegyity co nijëjity mibijcpidijc huidibi tzinaayb ya Macedonia ñicxa'nip ajcxy mïd ïch co anajty nncxyich jim ma miich ajcxy. E co anajty ïch ajcxy jim nmejtzcixy, e chi ajcxy nbáatcixipy ca' anajty ajcxy mni'ixijity. Pues chi ooy tzo'ydu'n njihuïhuibich, com ti anajty ooy njot'amij'ájtigixy. Nañ jadu'n miich ajcxy tzo'ydu'n mjihuïhuip. ⁵ Paady ycixp huinma'ñ nbidägyich co oy jadu'n co nijëjity migügtijc nicxy jayijp xycogapxygyixy, e huen xypubejtcixy ma yi meeñ yajmugii jadu'n nej jidöjimijt ti mgapxytungixy. E co anajty nmechich jim ma miich ajcxy, chi ni'ixi' anajty ajcxy mïdity yi m'ofrenda, e jëbi jäy ajcxy nejhuïhuip co yi m'ofrenda ti myejccixy cixyjot huinijot, ca'ydi jäy ymínaangixy co ïch miich adzip ajcxy ti n'ane'mgixy co m'ofrenda nya-jmújccixipy.

⁶ Jäymetz miich ajcxy jadu'n nej ayuc y'oc'ity: Pınjaty hueni niip, nañ jadu'n hueeni ycosecha yajpidıgy. E pınjaty mij niip, nañ jadu'n mij ycosecha yajpidıgy. ⁷ Nidüg nidüg mibijcpi yegipy y'ofrenda jadu'n nej anajty ci'm yhuinma'ñ ti pidägy co yega'ñ. E ca' yegipy ametz jotmetz. E nañ jadu'n ni yca'adzip yca'a'écıty. Com Dios chojcpy yjihuıyb pınjaty cıxyjot huinijot y'ofrenda yejcp. ⁸ Dios jëbi may'ajt oy'ajt tunıpy mıid miich ajcxy mijcajee, e miich ajcxy mbáatcixıpy tüg'ócıy tijaty conuucxin, e ixti mmıid'adıpy tüg'ócıy huıdibi myajmayjajtcıxy, e nañ jadu'n conaxpi naadigıbi nej huaad jacjadyii mibijcpıdıjc mbubejtcıxy, e mdungıxıpy canaagnax oyjäy'ajtin. ⁹ Jadu'n jaybety ymiñ ma Dios ñecy, ma jadu'n ymına'ñ:

Yi oyjäydıjc ajcxy, yi' ajcxy nımooyb ayoobıtıjc huıdibi ajcxy yajmayjajtpy.
Yi oyjäydıjc ajcxy co oyjäy'ajtin tungıxy, yejccıxyp iıxpejt oybi huıdibi y'idıpy huınıxı.

¹⁰ Dios yejcpy je tım huıdibi jäy ajcxy ñııpy, nañ jadu'n Dios yejcpy je jıccxy pıcy huıdibi nidzınaayım nijugy'ajtim. E jadu'n co miich ajcxy oyjäy'ajtin mdungıx mijcajee, je m'oyjäy'ajtin ajcxy ñıpaadıp nej jıhuıy mgosecha myajpidıccıxy may'amy. ¹¹ E jadu'n miich ajcxy mıid'adıpy tüg'ócıy jugy'ajtin comeeñ'ajtin, jaydëbi m'ofrenda myejccıxy mij'amy. E mayjäy ajcxy Dioscojuyıp yajnaxıpy ma Dios mıid je m'ofrenda ycıxpi, co anajty nyecyich miich ajcxy m'ofrenda ma yi' ajcxy huıdibi yajmayjajtp. ¹² Co ıch ajt pubejtin nyejım ma jacjadyii mıgügtıjc, canan jëyi co nbubejtim mıid tijaty yajmayjajtcıxyp. Nañ jadu'n yi' ajcxy jëbi yajnaxcıxy Dioscojuyıp canaag'oc. ¹³ Yi' ajcxy capxadamb Dios mıid co je m'ofrenda huıdibi ajcxy ti myejccıxy, yi' je' tıy'ajtıp co miich ajcxy mgapxymıdoogıxy Cristo y'ayuc ytıy'ajt. Paady ycıxp may mibijcpıdıjc ajcxy Dios ojadajtcıxıpy e nañ jadu'n Dios ıbáatcixıpy capxpáatcixıpy mıid je pubejtin huıdibi miich ajcxy anajty myejcpy mıid yi' ajcxy ycıxpi, etz nañ jadu'n mıid jacjadyii mibijcpıdıjc ycıxpi. ¹⁴ E ci'm yi' ajcxy Dios ojadadıpy mibijctzohıpy mıid miich ajcxy ycıxpi, etz xychóccıxıp xyjıhuıygıxıp ooy mıid co Dios je mıjpi conuucxin ti yecy ma miich ajcxy. ¹⁵ Dioscojuyıp yi' Huındzin'ajtim Dios mıid yi' ymıjconuucxin huıdibi ti yecy ma ıch ajtin, ni pın canejhuıy nej jëbi yajnajtzcaxıy.

10

Pablo mıidity cötujcin co y'apóstol'adyii

¹ ıch Pablo nmıgapxypıch miich ajcxy mıid yungnaxy njot nhuinma'ñ, jadu'n nej jıhuıy Cristo miich ajcxy xymıdmıydaaccıxy. Com Cristo yungnaxy jot huınma'ñ mıidity. Nıjējıty miich ajcxy ymınaangıx co ooy yungnaxy naybıdägyııjıch co n'ıtyıch mıid miich ajcxy, e jadachambi co jıguëgy nya-jpaadyıch, hue' n'ahuımbıtyıch ahua'ñ, ndunaamybıch ti ndunaamybıch. ² May'ajt nbıjctzooybıch co anajty ıch miich ajcxy nıcxıy n'ıjxcıxy, ca' jadu'n ndzocyıch co copıcy n'ahua'ndägıbıch mıid nıjējıty miich ajcxy huıdibi xyñıhuambejtpıch, co nduñıch etz ngapxyıch ngımtzojcin tım jadu'n nej huenpın naaxhuiñjäy ytungıxy etz ycapxcıxy mıid ycımtzojcin. Janch nı'ıxı' n'ıtyıch, co anajty jım nmechıch, chi mıid nnayhuındınähuıybıch yi' ajcxy huıdibi jadu'n xyñıhuambejtpıch. ³ Janch tıy'ajt co ndzınaayıch jadu'n nej naaxhuiñjäy chinaaygıxy. Per ca' ndzıptuñıch nej jäy ajcxy chip-tungıxy. ⁴ Ca' ıch ajt nyajtunım naaxhuiñjäy ymıc'ajt co nnaygohuaanıım ma je jıbıcpı huıdibi xymıdzip'ajtim. Hue' nyajtunım Dios ymıc'ajt, huıdibi jëbi mıid nmımadaacım tüg'ócıy huıdibi ca'oybi mıid. ⁵ Jadu'n ıch ajcxy ca' nyajtzobadáangıxyıch je ayuc tıy'ajt huıdibi ca' yjanchıty, etz je' ayuc

pín amij agix naybídaacip co Dios y'ayuc ytiy'ajt adujci. Tüg'óciy naax-huiñyäjy y'ayuc ytiy'ajt nbídaaccixyich ma Cristo, jigix tüg'óciy jäy ajcxy capxymídohuip Cristo. ⁶ Co anajty miich ajcxy mhuinma'ñybídaaccixy co huädz mgapxymídohuaangixy tüg'óciy Cristo y'ayuc ytiy'ajt, pínjaty cacapxymídooy, hue' ni'ixi' n'ijtcixich co yajmöhua'ñ castigo pínjaty cacapxymídooy.

⁷ Miich ajcxy yi' mdzachuenditungixy jäy ajcxy nej yjäy'ajtcixy. Pen jim pínjaty ñayjihuiyii janch agujc jotcujc co Cristo yhuin'ixyii müd ytung ycixpi, huen huinjihuiyigixy jotjoty co Cristo ti xyhuin'ijxcixyich nañ jadu'n müd yi' ytung ycixpi. ⁸ Ich ca' ti tzo'ydu'n jihuiyich müd co ci'm nnaygömayiijich hueeni müd co Jesucristo xymoogixyich ane'min cötujcin. Com ich ajt nHuindzin Jesucristo ti xymöogixyich jada cötujcin, jigix ich miich ajcxy nyajyeecip mmibijcin, canan nyajtigoyip ajcxy mmibijcin. ⁹ Ca' jadu'n ndzocyich co yquëxigipy jadu'n nej jihuiy n'adzighuaangixy müd je necy huidibi nyajnigüeypich miich ajcxy. ¹⁰ Yminaangixy co ich nnecy ooy tzaachyaty chach chaach. E yminaangixy co ma jäy ajcxy yhuinduu yung naxy njäy'aty, e ngapxin nmiydáacinich ca' pín jäygidägy. ¹¹ Per yi' jäy ajcxy huidibi jadu'n minaangixp, copicy ajcxy nejhuihuipy co jadu'n nej ich ngapxin necyjoty co nijayiygixy, co nyajpaadyich jiguem, nañ tim jadu'n ngapxa'ñich co anajty n'ityich ma miich ajcxy.

¹² Ca' huaad n'ocnay'ijxquipxim o nyajtügüyim müd yi' ajcxy ytung huidibi tzach naygömayaanip ci'm. Tzuu huinma'ñ locihuinma'ñ ajcxy ytungixyp, co pín jadu'n nay'ixquipxip naymídoguipxip müd yci'm'ayuc yci'mhuinma'ñ huidi ii yjajtpy ñejhuüyb. ¹³ Ca' ich ci'm naygömayiyb ma ycapadyii, huidibi ich ajcxy ca' xypátcixyich. Dios ich ajcxy xyajnejhuüybich nije' nije' it lugar ma yi' tzocy ndúngixibich. E Dios jadu'n tzojc co nicxy ndungixy jim Corinto ma miich ajcxy myajpatcixy. ¹⁴ Paady ycixpi ndúngixyich jëyi ma Dios xyquexyich, ca' jac ma. Nej ixypy y'octunyii y'ocjadyii, pen ca' ixypy ich jayijp ti n'ityich ma miich ajcxy. Pues ich tim jayijp ngapxhuäcx Dios y'ayuc ma miich ajcxy, e ca' jac ni pín. ¹⁵ Pen huingbi jäy je Dios ytung yajtzondaacip ma tüg cajp, pues ca' ich huaad jim nduüñich, jadu'n nej jihuiy ich ti nyajtzondägyich je tung. Ca' jadu'n nduüñich, hue' njijp'ixypich co miich ajcxy myajyeegip mmibijcin, huin'it jëbi njactunipich ma miich ajcxy, jadu'n nej Dios tzocy co ndunipyich. ¹⁶ Co anajty jadu'n ti njactuñich ma miich ajcxy, huin'it xi' ya n'ihuäcxa'ñich ngapxhuäcxa'ñich Cristo y'ayuc ytiy'ajt ma je it lugar jactim jiguemjatypi ma miich ajcxy. Per ca' nduna'ñich ma huingbi ti yajtzondägy je tung.

¹⁷ Ooy ycopicyity ngömayim nyajmij'ajtim ajt nHuindzin Jesucristo, e ca' y'oyity co naygömayim ci'm. ¹⁸ Com Dios ca' jäygidägy pínjaty ci'm naygömayip. Hue' Dios yjäygidacypí pínjaty ajt nHuindzin Jesucristo capxpatp.

11

Pablo etz je' ajcxy huidibi y'ayuccapxhuäcxp müd aní

¹ Huaad co miich ajcxy ixypy xy'ocmímecxtujcich hueeni ich nloci huinma'ñ huidibi ngapxaamybich. Oy ixypy ñejity mímecxtuccich. ² Ooy ndzocy ooy njihuiyich miich ajcxy. Dios ti xymöyich je tzojcin jihuiyín huidibi nmüdich müd miich ajcxy ycixpi. Ndzojcypich co cixyjot huinjot miich ajcxy mmijpídaaccixy Cristo. Co miich ajcxy yajmij'adip Cristo cixyjot huinjot, huin'it jadu'n miich ajcxy nipaadipy nej tüg töxy'anäg pi'cnip huidibi pijcp müd tüg yëydijc. ³ Ndzighiybich co huingbi jäy xyajhuinma'ñyidigoyaangixy müd ixpicytije y'ayuc huidibi ca' ytiy'ajtity. E miich ajcxy m'ixmadzaangixy

jadu'n nej cixyot huinjot ti mmijpidaaccixy Cristo. Tim jadu'n nipada'n mi-ich ajcxy mjadaangixy nej yjajty jecy'ajty je Eva co tza'n yhuin'ini. ⁴ Com mi-ich ajcxy mgöbijccixy huingbi jäy huidibi tigachjaty yaj'ixpijcp Jesús ytiy'ajt, ca' yjadu'nity nej ich ajcxy nyaj'ixpiyich. Etz nañ jadu'n miich ajcxy jotcuje mgöbijccixy huingbi espíritu, ca' yjējity je Espíritu Santo huidibi ti mgöbijccixy jayip'aty. Etz nañ jadu'n mgöbijccixy tigachjaty ayuc tiy'ajt, e ca' y'ocjēiñ huidibi ajcxy m'alma xyajnidzoocip. Ca' y'ocjēiñ huidibi ti mmidoogixy ma ich ajcxy. Mic'amy mdzachmijpidaaccixy huingjäy y'ayuc. ⁵ Ca' jadu'n ytiy'ajty co yi huindzindijc ajcxy huidibi naydijigixp Jesús y'apóstol hudi jim ma miich ajcxy, co jac mic'ajt mūd ajcxy etz yjacmūd ajcxy ixpijcin ma Dios ytiy'ajt, ca'ydi ich. ⁶ Oy ich jada' ca' njatyich nej yajxon ngápxibich, ca' ooy ngo'ayúciyich. Per ca' ñejity com yajxon njatyich nnejhuuyich Dios ytiy'ajt. E ti nyaj'ijxcixy nyajnejhuuyigixy co n'ixpicycigich ma Dios ytiy'ajt mūd je ayuc huidibi ngapxhuäcxich ma miich ajcxy etz je mijhuinma'n hudi nduunich co jim n'ijtyich ma miich ajcxy.

⁷ ¿Nej tundigoyich jada' co ngapxhuäcxich Jesucristo y'ayuc ma miich ajcxy e ca' nbijctzooyich meñ mūd ndungich ycixpi? Jadu'n nnyajnajxich anajty nej tüg midumbi jigix miich ajcxy jac'oy jacjotcuje mdzinahuip. ⁸ Ti ngöbicyich meñ huidibi jacjadyii mibijcpidijc ti xymöyich huidibi tzinaayb ma huingbi cajp. Yi' ajcxy ymeñ nyajtuunich co nyaj'ixpijcyich miich ajcxy. ⁹ Co n'ijtyich mūd miich ajcxy jadöjimijt jadöhuix'am ca' nbijctzooyich ma miich ajcxy huidibi nyajmayjajtpyich anajty. Ca' n'adzijpyich ni pin. Yi migügtijc huidibi ajcxy tsoon Macedonia, yi' ajcxy xymooyich huidibi anajty nyajmayjajtpyich, paady ycixp ca' anajty meñ nbijctzooyich ma miich ajcxy, ca' n'adzijpich miich ajcxy. E jadu'n njactuna'nich jadu'n nej nduunich mūd miich ajcxy co n'ijtyich jim jadöjimijt. ¹⁰ Nejhuuybich co yjanchity co nmūdidyich Cristo ytiy'ajt, nañ tim jadu'n nnejhuuyich co ci'm nbaadyich huidibi mūdny'ixyijich. E ca' pin ma tüg'óciy je Acaya naaxjot xycapijcibich jada jotcuje'ajtin. ¹¹ ¿Na'amy co jadu'n nmīna'nich? ¿Je' co ich miich ajcxy ca' ndzojccixy? Ca' yjadu'nity. Dios ñejhuuyb co ndzocy njihuuyich miich ajcxy.

¹² Per njacyajtüyöyaamybich je ndungich huidibi ndumybich, e ca' meñ nbijctzohua'nich mūd ich ndung ycixpi jigix co yi jacjadyii huindzindijc huidibi yaj'ixpijccixp ma miich ajcxy, ca' jēbi y'indaaccixy co yi' ajcxy tú'ciy ytungixy jadu'n nej ich nduunich. ¹³ Yi' ajcxy ymīnaangixy co Cristo ti yaj'nibijcigixy co ajcxy yi' y'apóstol'adyii, e ca' yjanchity, nigoob ajcxy huin'ingixy yi mibijcpidijc. Ñayajnajxigixy ci'm nej jihuuy Cristo y'apóstol'ajtigixy, e ca' yjanchity. ¹⁴ Nañ ni ca' oy nhuinmaayich co jadu'n iditzcixy, com nañ jadu'n je Satanás ñayajtigachyii ñayajnaxyii nej Dios y'ángel huidibi tiy'ajt mūd, e ca' yjanchity. ¹⁵ Paady ycixp nmibijcpich co yi jäy ajcxy huidibi tumb mūd je mujcu' nañ jadu'n nayajnaxyii jadu'n nej jäy tudägypí, e ca' yjanchity. Per Dios chaachytunamyb ajcxy jadu'n nej ypadyii mūd je jibicpi ycixpi huidibi ajcxy ytumyb.

Je tzaachypí je ayo'n huidibi Pablo yjajty co y'ayuccapxhuäcxy

¹⁶ Jadüg'oc ich miich ajcxy nnimaaygixy: Ni pin ycamīna'nipy co ich locijity. Per pen nijējity jadu'n ymīnaangixy, ca' ñejity. Miich ajcxy amidoo'ijtcix ich n'ayuc, jigix jēbi naygōmayijich ci'm. ¹⁷ Ca' ich ajt nHuindzin Jesucristo xycōtujcmöyich, co jadu'n jēbi ngapxyich jadu'n nej cham ngapxa'nich. Hue' ngapxa'nich jadu'n nej tüg loci jäy co naygōmaya'ñyijich ci'm. ¹⁸ Mayjäy ajcxy ooy ci'm chachnaygōmayáanigixyp mūd huidibi ti tungixy mūd yci'm mic'ajt ya naaxhuiñ. Nañ jadu'n ich

nnaygömaya'ñyijich ci'm. ¹⁹ Miich ajcxy mdzachcöbijccixyp loci jäy ajcxy y'ayuc, je' co mdzachnayajanaxáanigixy jadu'n nej jihuüy ajcxy ooy mdzach-cohuinma'ñity. ²⁰ Mgöbijcypy miich ajcxy co jäy ajcxy xytumbi'adiiyb nej tim tzojccixy, huidibi ajcxy xyhuinjicxp xyhuimbijcp xyhuimmeetzp, e huidibi ajcxy xy'ane'mgixp, xycamij'ijxcixy xycamijpidaaccixy, ixti mgöbijccixyp co xycojxcixy ma ajcxy mhuiñyjijp. ²¹ Oy njatzo'ydu'njihuiyich co nmina'ñich co ca' jadu'n nmíididyich je jotmic'ajtin, jigix jëbi ñich miich ajcxy nduuñich jibic, jadu'n nej yi jadu'mbi huindzindijc ti xytungixy.

Per jadu'n nej yi' ajcxy ñaygapxpadyii ci'm, nañ jadu'n naygapxpada'ñyijich ci'm. Ca' ñejity pen capxpich jadu'n nej tüg loci jäy. ²² Pen hebreojäy yi' ajcxy, hebreojäy ñich nañ jadu'n. ¿Conaax cogajp ajcxy Israel? ñich nañ jadu'n. ¿Abraham ajcxy ymij'ap'ajtpy ymijteedy'ajtpy? ñich nañ jadu'n. ²³ ¿Nej tumb ajcxy mñid Cristo? Nñgi nduñyich mñid Cristo, ca'ydi yi' ajcxy. Ca' ñejity oy ngapxyich jadu'n nej tüg loci jäy. Jac mic ti nduuñich mñid Cristo ca'ydi yi' ajcxy. Canaag'oc codungdijc xychaachytuunich. Ti nyajc'atyich mñid matz etz mñid coochac janch canaag ci' janch ycamacho'nity. Canaag'oc codungdijc xypidaacyich pujxtigoty, e yi' ajcxy ca'. Canaag'oc o'cin jijp'am ti nyajpaadyich, e yi' ajcxy ca'. ²⁴ Migoox'oc judíojäy ajcxy ytungmñidpi xyci'ajtyich mñid cochac iipx majmox midaax ci'. ²⁵ Tugñig'oc xychaachytuunich mñid matz. Tügtecy ajcxy xychaagächich. Tugñig'oc je barco yquín mejy'agujc je huidibi ñich anajty nyajnicxiyb. Co je barco yquín tügtecy, chi tüg tzuum etz tüg xi n'ijtyich ma je mejy anajty ooy ypidigy. ²⁶ Ooy viaje nduuñich canaag'oc, e o'cjijp'am n'ijtyich ma mijñigom yjadyii, e nañ jadu'n ooy anajty may meetzpi yajpaady ma anajty nhuidityich. Nmigogajpich, yi judíojäy, xyjayaj'ogaanich ajcxy. Ti ayo'n nbaadyich ciudadjoty etz ma yuugjot etz mejyjoty. E nañ ti ayo'n nbaadyich mñid jäy ajcxy huidibi naybidaacip ajcxy nej ñich ajt nmigüg, e ca' anajty yjanchity. ²⁷ Minaajity ooy mic njihuüyich ndung n'ayo'nich. Canaag'oc ti ndzumnaxyich ca' nmäyich. Canaag'oc nxñnaxyich mñid yuu tidzibi. Janam jatzojc n'ayu'atyich. Minaajity ooy njihuüyich je tüchypi, etz nyajmayjatyich nhuit nducxyich.

²⁸ Mñid jada ycixpi etz mñid jac-huidijaty, nañ jadu'n jabom jabom ooy mic njihuüyich jadu'n nej yajpaady je mibijcpidijc nidüg'óciy canaag picy xi ya. ²⁹ Pen nijejity mibijcpidijc yajpaady amutz ma ajcxy ymibijcin, nañ jadu'n ñich nayjihuiyijich amutz. Pen nijejity mibijcpidijc ypocytungixy, ñich ndzo'ydu'n njihuüyich etz jibic nayjihuiyijich mñid yi' ajcxy ypocy ycixpi. ³⁰ Pen naygömayaanibich ci'm, naygömayaanibich co amutz njihuüyijich. ³¹ Je Dios ñich ajt nHuindzin Jesucristo yTeedy, je huidibi huaad n'ojadajtim n'ñbaatim ngapxpaatim huinixi huinitempo, yi' ñejhuüyb co tiy'ajt jadu'n nej ngapxyich. ³² Jecy'ajty co n'ijtyich jim Damasco, je gobernador huidibi anajty tumb mñid je rey huidibi yxi Aretas, ypidac soldados ajcxy ma jadyii mijtu' ycajptigiy, jigix jëbi xyajnicxyich mach. ³³ Per je mibijcpidijc ajcxy xycodiyñajxich naaxcíxy mijcachjoty ma tüg ventana aguu ma je mijpoch huidibi je cajp mñid yjübojtz'ahuidityity. E jadu'n ndzoocyich ma je gobernador yci'am.

12

Huidibi Pablo yhuin'ijx etz nejhuüy

¹ Ni ti ycayajpaady ycayajganar'aty co ci'm ndzachnaygömaayim ndzach-nayñigaxim ndzachnayñimiydaacim. Per ca' y'ocnejity nimiydägaamybich ti nhuin'ijxypich cumäyjoty, je huidibi je Huindzin Jesucristo xyajhuin'ijxpih

xyajni'ixi'ybich. ² N'ixy'ajtypich tög yëdyjc huídibi mibijcp Cristo. Cham majmactz jimijt ma Dios yajpättigiyi tzajpjoty ma je midugigpi tzajp. E ca' nejhuüyich pen hue' yajpättigiyi müd ñinícx o pen ca'. Dios tügpajc nejhuüyb. ³⁻⁴ Jadüg'oc nmina'ñich co Dios ti yajpättigiy je yëdyjc ma je oybi it. E ca' nnejhuüyich pen janch ti ypättigiy müd ñinícx o pen ca'. Dios tügpajc nejhuüyb. E jüby ma je oybi it midoy capxy ayuc huídibi ca' huaad ni pin jäy capxy miydägy nimina. ⁵ Ooy ich amij agix nayjihuihua'ñyijich müd je jadu'mbi yëdyjc jadu'n nej jëjin huídibi Dios yajpättigiy tzajpjoty. Per ca' ich ci'm nayñimiydäga'ñyijich naygömaya'ñyijich. Hue' janchtiy nayñimiydägaanibich ci'm nej nduñ n'ayooyich ma ich ndzinaayin. ⁶ Oy ixyipy ich ci'm njanayñimiydäga'ñyijich janch oy nej nduñ n'ayooyich, ca'p je' anajty ngapxtigooyich, com je' anajty ngapxpich je janchypi. Per ca' jadu'n naygömaya'ñyijich, com ca' ndzocyich co jäy ajcxy nicxy xycömaayich ñigi anaxy. Huaad jadu'n co ajcxy müd miydacy je migügtijc huídibi ajcxy ijxcixp huídibi ndumybich o huídibi ayuc ajcxy ymidoogixp huídibi ngapxpich.

⁷ Je capxy ayuc huídibi Dios xyajnejhuüyich jüby tzajpjoty, ooy anajty chach y'oyity. Paady ycixpi Dios pidacy jadu'n nej jihuiy tög apy ma ich nninícx, jigix ca'ydi amij agix nayjihuiyijich. E je apy jadu'n nipaady nej mujcu' xyajtzaachiyich. ⁸ Tugig'oc Dios ti nmibijctzooyich co huen xyajpidzimich je huídibi xyajtzaachiybich. ⁹ Per je Huindzin Jesús xyñimaayich: "Jëbi jadu'n co may'ajt ndunipich müd miich ycixpi. Co pinjaty pumäy ñayjihuiyii, huiñit ñigi ñiguëxigy ich nmic'ajt." Paady ycixpi njotcugiyich co pumäy nayjihuiyijich, jigix ñiguëxigipy Cristo ymic'ajt ma ich ndzinaayin. ¹⁰ Paady ycixpi ooy njotcújcidyich co pumäy nayjihuiyijich, co jäy xyñigapxy xyñi'ojiyich, co ti nyajmayjatyich, co jäy xy'ixhuidityich xypahuidityich, co tzaachypi nyajnaxyich müd Cristo ycixpi. Co nayjihuiyijich pumäy, chi ñigi mic nayjihuiyijich müd Cristo ymic'ajt ycixpi.

Pablo ca' yjotcuyc'aty nej je mibijcpidijc ajcxy jim Corinto ytungixy

¹¹ Co ich jadu'n ci'm naygapxpadyijich, tim jadu'n nipaady nej jihuiy ich tög loci jäy. Adzip miich ajcxy jadu'n xytuuñich co copicy naygapxpadyijich ci'm. Hue' yjapaadyii miich ixyipy ajcxy xycömaaybich xycapxpatpich. Ich ca'p ich ti ndzohuity. Oy ixyipy ich ca' ti mic'ajt nmüdidyich, per jatytimy ñigi mic'ajt nmüdidyich, ca'ydi yi huindzindijc huídibi ma miich ajcxy, huídibi ajcxy naydijip apóstol, e ca' yjanchity. ¹² Ma je tung huídibi nduuñich müd mecxtujcin ma miich ajcxy, ti ooy ñiguëxigy müd canaag ijxpejt, mijhuinma'ñ etz milagros, co ich janch Cristo xy'apóstol'adyijich. ¹³ Ca' jadu'n ytiy'ajtity co mminaangixy co ñigi oy ti nduuñich ma yi jacjadyii mibijcpidijc ma jacjadyii cajp, ca'ydi jadu'n nej ti nduuñich ma miich ajcxy. Pen ti ndundigooyich co ca' ti nbijctzooyich meeñ müd ich ndung ycixpi ma miich ajcxy, jadu'n nej jacjadyii ajcxy ytungixy, pues tungix may'ajt meecxcich ajcxy.

¹⁴ Jadachambi ni'ixi' n'ityich co nnicxa'ñich midugig'ocpi jim ma miich ajcxy. Ca' ti pubejtin nbijctzohua'ñich ma miich ajcxy müd ndungich ycixpi. Ca' ndzocyich miich ajcxy mmeñ. Hue' ndzocyich co miich ajcxy xymijnicxpedipyich. Jac'oy co ich miich ajcxy nbubedipy, ca'ydi co miich ajcxy xypubedipyich. Jadu'n ich nipaady müd miich ajcxy nej tög ungedeedy. Je ungedeedy ypubejtpy y'ung, e ca' nan je ung pubejtyp yteedy. ¹⁵ Ich jotcuyc nyajtundähuibich ma miich ajcxy tög'óciy tijaty nmüdidich, ixti ngi'mmic'ajtich tög'óciy nyajtunaamybich müd miich ajcxy ycixpi, jigix jëbi nbubedipyich miich ajcxy. Oy janiguëxigy co ich miich ajcxy njadzojccixy njajihuiyigy, e miich ajcxy ca' xychóccixyich xyjihuiyigyich.

16 Nijëjity miich ajcxy mmînaangixy co janch tîy'ajt co ca' ti pubejtin ti nbijctzooyich ma miich ajcxy, nijëjity ymînaangixy co janch nihuinma'ñ ti nyajcägixyich ma tüg trampî mîd anî. 17 ¿Nej ti ñich miich ajcxy nhuin'ñngix mîd je migügtijc huidibi ajcxy nyajniguejx? 18 Nbijctzoohuich may'ajt ma Tito co huen nicxy xycogapxiygixy jadüg'oc. E nyajpuguexiyyich jadüg ajt nmigüg huidibi mîd ñicxy quipxyi. ¿Nej ti miich ajcxy Tito xyhuin'ñngixy? ¿Nej ca' yjanchity co ñich etz Tito quipxyjaty ñich ajcxy nhuinma'ñ nmîdity, e tú'ciy ndúngixyich?

19 Ca' yjegyity co miich ajcxy mhuinma'ñybidáaccixy co ñich ajcxy ndzachnayñigapxtúutigixy ma miich ajcxy. Ca' yjadu'nity. Ngápxcixpich nmîydáaccixpich ma Dios yhuinduu je ayuc tîy'ajt huidibi Cristo xymóoygixich. E tüg'ócîy huidibi ndúngixpich, hue' ndúngixich jigix yeegip miich ajcxy mmîbijcîn. 20 Com tzigîybich co anajty nicxy n'îjxcixyich miich ajcxy, ca' jegyity co nbadaamybich je tîy'ajt co miich ajcxy ca' mhuinma'ñymîdity jadu'n nej jëbi njäygidägyich yi mhuinma'ñ ajcxy. E miich ajcxy nañ jadu'n ca' mjäygidáaccixipy nej ñich nhuinma'ñ mîdityich. Tzigîybich co miich jada' ajcxy mnaychiptúnigixy, ca' mnay'ixáanigixy nidüg nidüg, mnaymîjotmá'tigixy; mnayñi'ojîiyigixy, e mbiitzcapxcixy; co ooy amij agix mnayjihuíiyigixy, e ca' mnay'ayuc-huinjihuíiyigixy, ca' oy m'ijtcixy. 21 Tzigîybich co jadüg'oc nicxy n'ixyich miich ajcxy, chi ajt nDios xyajjihuíhuibich tzo'ydu'n mîd miich ajcxy ycixpi, etz njihuíhuibich tajin mayin mîd miich ajcxy mbocy ycixpi, e com ca'ni mjothuimbijtcixy mjäyigooygixy je mjibic-huinma'ñ jadu'n nej mmîgapxtigooygixy e mmîdundigooygixy huingbi töxyjädyjc, etz jadu'n nej mmîdundigooygixy migüg ytöxyijc, etz jadu'n nej jibic-huinma'ñ miich ajcxy mmîdity.

13

Ane'mîn capxhuijîn etz capxpooxîn huidibi cijxnîp je necy

1 Jada je' ymîdugîg'oc co ñich miich ajcxy nicxy ngo'ixîhuaangixyp. Pen miich ajcxy mxîhuaangixyp tüg migüg ma ñich co ti ytundigooy mîd Dios ytîy'ajt, hue' tzocy mîd metz o tugîg testigos. 2 Co je mîmejtz'ocpi ñich miich ajcxy oy ngo'ixîy, chi nnîmaayich yi' ajcxy huidibi ti ytundigooygixy anajty, e nañ jadu'n nnîmaayich je huidibi jacpocytungixp co ñich anajty jadüg'oc nicxy miich ajcxy n'îjxcixy, ca' nyajtuna'ñich mecxtujcîn ma yi huidibi ajcxy pocytungixp. E cham co nyajpaadyich jigüëgy ma miich ajcxy, nnîgapxpejtpyich ma jada necy co jadüg'oc nicxy n'ixa'ñich miich ajcxy, ca' nmîmecxtuga'ñich yi' ajcxy huidibi pocytungixp. 3 E jadu'n miich ajcxy mmîd'adîpy tîy'ajt co ngapxnajxich Cristo y'ayuc. E Cristo ca' je' yjadu'nity nej tüg jäy huidibi ca' mîc'ajt mîdity. Hue' je' yajnigüëxîgyp ymîc'ajt ma miich ajcxy. 4 Janch tîy'ajt co jadu'n ajcxy yajcruudzpejty Jesucristo nej jihuïy ca' anajty mîc'ajt mîdity. Per jadachambi Jesucristo jugy'ajtp mîd Dios ymîc'ajt. Nañ tim jadu'n co n'ijtm mîd Jesús, jadu'n yquëxîgy nej jihuïy ca' mîc'ajt nmîd'ajtm. Per co n'ida'ñich mîd miich ajcxy, nmîd'adaanibich Dios ymîc'ajt mîd co nyajpaadyich ma Cristo.

5 Ci'm naydiy'ajtpîjcîgix nidüg nidüg, pen janch tîydudägy mmîbijccixy Cristo. Ci'm huinmaaygix ma ajcxy mgî'mdzînaayin, pen janch mmîbijccixy. ¿Nej ca' mîdmîjihuí'mybîjccixy, pen mîd ajcxy Cristo ma mjot mhuinma'ñ? Pen ca' yjadu'nity hue' anajty Cristo mmîbijccixy nîgîxy cohuajc. 6 Per njîp'ijxypich co miich ajcxy mnejhuïhuïpy co yjanchity co Cristo ti xya-jnîbicyich yi' ytung, e ca' n'îndägyich. 7 Dios nmîbijctzooybich mîd miich

ajcxy ycixpi, jigix ca' ti jibic-huinma'ñ mdúngxixipy. Canan co ñch ajcxy ndzachcömaybidzimmáangixyich, o co ñch ajcxy ñgi nmüidity Dios ytiy'ajt ca'ydi jac ni pinjaty. Jadu'n ndúngxixyich, jigix miich ajcxy mdunipy oybi. Ca' ñejity oy jadu'n yquëxigipy nej jihuïy ñch ajcxy ca' oy mij n'ixpícyigich. ⁸ Com ca' huaad ni ti nej ndunim huidibi ca' yjanchity huidibi ca' ytiy'ajity. Hue' tzocy co tüg'óciy huidibi ndunim, naybadüib müid Dios ytiy'ajt. ⁹ Paady jotcuje ñch ajcxy co nyajpáatcixyich nej jihuïy ca' ñch ajcxy mic'ajt nmüidity, jigix miich ajcxy mic'ajt mmüid'adipy ma mmibijcin. Nmibijctzoohuaamybich ajcxy Dios müid miich ajcxy ycixpi, jigix ajcxy mmibijcin mi'íjtcixipy ca'pxy. ¹⁰ Jada necy ñch jayijp nguexamyb ma miich ajcxy, ma yam ca'ni nicxy n'íjxcixyich miich ajcxy jadüg'oc, jigix ca'ydi adzip ahua'n anajty nyajtuuñ ñch n'ane'min ma miich ajcxy. ñch ajt nHuindzin Jesucristo ti xymöyich mic'ajt, jigix jëbi ñch miich ajcxy nyajyeegipy ma mmibijcin. Ca' nyajtigoyaanich miich ajcxy yi mmibijcin.

¹¹ Migügtijc ajcxy, capxcijxpich müid miich ajcxy, huen Dios xypubéjtcixipy xypudigüiygixyipy. Mijottigooygix cuydunaangix tüg'óciy Dios ytiy'ajt ma mdzinaayin. Jotcuje'ajtcix. Chinaaygix müid tú'ciy mjot mhuinma'ñ. Naymüid'íjtgixy agujc jotcuje. Huen ajcxy Dios xymüid'íjtcixy. Je Dios huidibi jotcuje'ajtin yejcp, e nañ jadu'n Dios xychojctáaygixipy xyjihuiydáaygixipy. ¹² Naygapxpóocxigix xic xon. ¹³ Tüg'óciy Dios yjáy huidibi ya, yquejxyp ajcxy capxpóocxin ma miich ajcxy.

¹⁴ Huen ajt nHuindzin Jesucristo may'ajt oy'ajt tunipy müid miich ajcxy ycixpi. Huen Dios xychojccixy xyjihuïygyxy. Huen Dios yjihuiñ ymic'ajt ity ma nidüg'óciy miich ajcxy mjot mhuinma'ñ. Jadu'n ngapxycixyich. Amén.

GÁLATAS

Yi Necy Huidibi Pablo Yajniejx Je Mibijcpidijc Jim Gálatas

¹ Hich Pablo, Jesucristo xyquejxich co ngapxhuäcxibyich yi' y'ayuc. Ca' nmīnaanīm jāy ajcxy xyajñibijcīch jada tung. Jesucristo etz Dios Teedy ajcxy ti xyajñibicyīch jada tung. Je' je' je Dios huidibi yajjugypijc Jesucristo co y'o'cy. ² Hich etz tūg'ócīy migūgtijc ajcxy huidibi ya yajpatp ma hich nyajniejxpīch jada necy ma nidūg'ócīy pīnjaty mijpidacp Jesucristo, huidijaty naymujcip ma nidūg nidūg cajp jim Gálatas naaxjot. ³ Nmībijctzooybīch Dios Teedy etz hich ajt nHuīndzīn Jesucristo co huen oy'ajt etz may'ajt tuñ ma miich ajcxy etz nañ jadu'n xyajjotcugīhuip ajcxy. ⁴ Hich ajt nHuīndzīn Jesucristo ti nayyoxyī ti naydogyī cī'm anajty ma yi o'cīn mīid hich ajt nbocy ycīxpi. E jadu'n ti xyñihuaanīm ma je jāy ajcxy huidibi jībīc huīnma'ñ ymīid huidibi tzīnaayb ajcxy ma jadachambī xī tiempo. Jadu'n Jesucristo tuñ mīid hich ajt ycīxpi, com hich ajt nDios Teedy jadu'n tzojcp. ⁵ ¡Ooy y'oyīty co Dios Teedy huen mij etz cōmay y'idīpy huīnīxī huīnītiempo! Jadu'n jada. Amén.

Ca'p ji huingbi tīy'ajt huidibi jāy y'alma yajñidzocp

⁶ Ooy ndzachhuīnmaayīch jadu'n nej tīm tzojcy ti mijjpyöyduťcīxy je Huīndzīn Dios ytīy'ajt. Dios xyhuīn'ījxcīxy jīgīx jēbī mmībijccīxy je oy'ajt je may'ajt huidibi Jesucristo ytuun mīid miich ajcxy ycīxpi. E miich ajcxy ti mhūnma'ñ myajtigajťcīxy, e ti mmībijccīxy huingbī jāy ajcxy y'ayuc, jadu'n nej ca' jēbī m'alma nīdzocīn padaangīxy. ⁷ Ca' nmīnaanīm co ji jadūgnax Dios ytīy'ajt. Hue' je'nījējīty jāy ajcxy ti xyajhuīnma'ñyđīgooygīxy, ooy ajcxy yajtigadzaangīxy je Dios y'ayuc ytīy'ajt nej Jesucristo xyajñidzōgaanī ajcxy m'alma. ⁸ Co īxyīpy hich, o co īxyīpy nidūg hich ndiscīpulo, o co īxyīpy tūg āngel huidibi tzajpjoty tzomb capxhuäcx īxyīpy ma miich ajcxy ayuc tīy'ajt tīgachjaty huidibi ca' ñaybadyī mīid je tīy'ajt huidibi nyaj'īxpīj c ajcxy oga'n'aty, ca' mgōbījccīxīpy yījadu'mbī ayuc huidibi ajcxy xyajñīđīgoyaangīxy xyajťūđīgoyaangīxy, Dios tzaachytunīb yī' ajcxy y'alma. ⁹ Tī jayīp nyajñīmay, e cham jadūg'oc nīgāxpetyīch, pen jī pīnjaty capxhuäcxī ma miich ajcxy tīy'ajt tīgachyjatypī, huidibi ca' ñaybadyī mīid je tīy'ajt je tībī miich ajcxy m'īxpījccīxy, copīcy Dios chaachytunīpy jada jāy mīid ypocy ycīxpi huidibi xychachyajñīđīgooygīxp xychachyajťūđīgooygīxp.

¹⁰ Co jadu'n nmīna'ñīch, ¿nej mdījy co ndzocyīch co jāy ajcxy xyjāyđīdāgīpy o co Dios xyjāyđīdāgīpy? ¿Nej ndzachyajjot'adaanīch jāy ajcxy? Ca' huaad nduūñīch huidibi jāy ajcxy chojcpy, yī' janchťīy ndumybīch huidibi Dios chojcpy. Co īxyīpy nduūñīch huidibi jāy ajcxy yjāyđīdacpy, ca' īxyīpy nguyduūñīch Cristo ytīy'ajt.

Nej Pablo oy paady je apóstol'at

¹¹ Paady ndzocyīch migūgtijc co mnejhuīhuip ajcxy jada co je Dios y'ayuc ytīy'ajt huidibi ngapxyhuäcxpīch anajty ma miich ajcxy jadu'n nej jēbī ajcxy m'alma nīdzōgīpy, ca' yī' ayuc'adyī tīy'ajt'adyī huidibi jāy cī'm ti cojcxīy ti maacxcīxy. ¹² Com je Dios y'ayuc ytīy'ajt huidibi nmīdīch, ca' ti nbaadyīch ma jāy ajcxy, nañ ca' nmīnaanīm jāy ajcxy ti xyaj'īxpīcyīch. Jesucristo cī'm ti xyajhuīnjīhuīyīch jada tīy'ajt.

¹³ Com miich ajcxy mnejhuīyīgīxp jadu'n nej jecy'ajty hich ti ndzīnāyīch, co hich anajty nmījpidāgyīch yī judío jāy ajcxy ycostumbre. E mnejhuīyīgīxp

jadu'n nej jecy'ajty n'ixhuidijtyich nbahuidijtyich mictägy je jäy ajcxy nidüg'óciy huidijaty anajty mijpidaaccixp Dios ytiy'ajt. ¹⁴ Nigi ñch anajty n'ixpicyidyich ma yi judíojäy ajcxy y'ixpijcin ca'ydi jac pinjaty judíojäy, ca'ydi jac pinjaty nmigügtijcich huidibi tügnax yjimijt müd ñch. Com ooy anajty nigi ndzachmijpidägyich n'ap ndeedyich y'ayuc. ¹⁵ E Dios xyhuin'ijxich jayijpni ca'ni anajty ma'xung'atyñich co ndúnibich yi' ytung. Müd co Dios ooy ti xychocyich ti xyjihuiyich, paady xyhuooyich müd ytung ycixpi. ¹⁶ Dios xyajnejhuüyich yi y'ung y'ayuc ytiy'ajt, jigix ngapxhuäcxibich yi' y'ayuc ma yi jäy ajcxy ca'pi yjudíojäyity ajcxy. Ca' pinjaty n'ixtaayich huidibi jëbi xyaj'ixpicyich Dios ytiy'ajt, hue' Dios ci'm xyaj'ixpijcyich yi' ytiy'ajt. ¹⁷ Nañ jadu'n ni ca' nbättigüyich jim Jerusalén ma yajpaady y'apóstoles ajcxy huidibi anajty ajcxy Dios ti yhuin'ixyii. Chi tüyi nnicxyich jim Arabia ñaaxjot. Co ñch jim hueeni n'ijtyich, chi nhuimbijtyich jim Damasco.

¹⁸ Cooni tugig jimijt nhuäcxijpyich huin'itni nbättigüyich jim Jerusalén. Chi n'oyich ma Pedro anajty yajpaady, e chi jim nmüd'ijtyich jëyi majmocx xi. ¹⁹ E ca' nminaybaattich yi jacjadyii apóstoles. Jëyi ñch müd naybaati je Jacobo, je Huindzin Jesús y'uch. ²⁰ Je huidibi cham ñch müch ajcxy niyajjayüygixyp, tiy'ajt yi'. Y'ijxyp ñejhuüyb Dios co ca' n'ñndägyich.

²¹ Co ndzooñich Jerusalén, chi nnicxyich Siria naaxjot etz jim Cilicia naaxjot. ²² Je huin'it tiempo yi Cristo yjäy ajcxy huidibi nayoymujcip cajp cajp jim Judea naaxjot, ca' ajcxy anajty xy'ix'adyiijich huingixy jipcixy. ²³ Jëyi ajcxy nejhuüy anajty co jäy chachminaangixy: "Yi jäy huidibi anajty xychach'ixhuidijtim xychachpahuidijtim, cham yi' tzachcapxhuäcxy je Cristo ytiy'ajt, je tiy'ajt huidibi anajty ytimyyajcödigoyamyb." ²⁴ Co je mibijcpidijc oy jadu'n tiy'ajt nejhuüyigixy, chi ajcxy yajnajxy Dioscojuyip ma Dios müd ñch ycixpi.

2

Jacjadyii Jesús y'apóstoles ajcxy cöbijccixy yi Pablo

¹ Co majmactz jimijt, chi jadüg'oc nnicxyich jim Jerusalén quipxyi müd Bernabé. Nañ jadu'n Tito xypanicxyich. ² Dios jadu'n ti xyajnejhuüyich co copicy nícxibich jadüg'oc jim Jerusalén. Chi jim nyajmüdmüydacyich nijëjity jäy huidibi Jesús ti yhuin'ixyii ajcxy, je huidibi ajcxy nigohuajc'ajtp anajty je mibijcpidijc. (Ahuingujc ñch ajcxy nxiicmujcy ngapxmujcy, ca'ydi ymayjäy'agujcity.) Nyajmüdmüydactaayich je Dios y'ayuc ytiy'ajt huidibi ngapxhuäcxypich ma yi jäy ajcxy ca'p yjudíojäyity. Jadu'n ngapxticxyich n'ayucich ndiy'ajtich, jigix ca'ydi ajcxy xycapx'aducyich, e ti anajty jadu'ñyi ñaadigí'aty ñch ndung huidibi jayijp ti nduuñich etz huidibi njactunaamybich anajty. ³ Je jäy ajcxy huidibi nigohuajc'ajtp anajty je mibijcpidijc jim Jerusalén yjäygidac ajcxy ñch n'ayuc jadu'n nej ngapxticxyich, e nañ ni ca' ajcxy ymínañ adzip co copicy yajtiy'ajttihuiy je Tito huidibi xypa'oyich jim, com griegojäy je' anajty, paady ca' yajtiy'ajttiy anajty. ⁴ Ca' ixypy pin huaam ycamínañ jim Jerusalén co Tito ca' yajtiy'ajttiy, co ca' nijëjity mibijcpidijc ycatigiy ayüch ameech huidibi ca' ymibijccixy cixyjot huinijot Cristo ytiy'ajt. Hue' ajcxy amido'ijtcixy n'ayucich nej huaad xyijpcogapxiygixyich. Ca' ajcxy yjotcujcity co ngapxhuäcxyich co nmibijcim Jesucristo, e ca' copicy nguy-dunim judíojäy ycostumbre. Yi' ajcxy adzip xyajnihuidzaambich yi judíojäy ycostumbre, jadu'n nej jäy codoogiyi ajcxy adzip ytuungixy ma yhuindzin ytung. ⁵ Ni catügjaxigy ajcxy xycamimadacyich, e ni xycayaj'amoñ ñch ajcxy,

com hue' ndzocyich co huen Dios y'ayuc ytiy'ajt oybi ity huädz ma miich ajcxy ca' ma anii.

⁶ Yi apóstoles ajcxy huídibi Jesús ti yhuin'íjxigixy huídibi ajcxy nigo-huajc'ajtp yi mibijcpidijc, ca' ajcxy ni ti tiy'ajt xyjacmöyich jemybi huídibi ca' jayijp nnejhuíyich. (Peni capxpaady ajcxy o peni ca' ycapxpaadyity, ca' nduuñich cuendi. Com Dios ca' huin'ixpety jáy ajcxy tiyduñ.) ⁷ Co oy ajcxy nejhuíy co Dios ti xyquexyich ngapxhuäcxyich yi' y'ayuc ytiy'ajt ma yi jáy ajcxy huídijaty ca' yjudíojäyity, tim jadu'n nej ti quexy Pedro co capxhuäcxi yi' y'ayuc ma yi judíojäy ajcxy, ca' ich yi' ajcxy anajty n'ayucich xyjijpcogapxiyich, ooy ajcxy jáygidacy yi' n'ayucich ndiy'ajtich. ⁸ Yi Dios huídibi Pedro quejx huen yi' y'ayuc capxhuäcxy ma yi judíojäy ajcxy, nañ jadu'n ich xyquejxich co yi' y'ayuc ngapxhuäcxiyich ma yi jáy ajcxy ca'p yjudíojäyity.

⁹ Je Jacobo, je Pedro etz Juan ajcxy, je huídi nigohuajc'ajtcixp yi mibijcpidijc, co ajcxy nejhuíy jadu'n nej anajty Dios may'ajt oy'ajt ti tuuñ müd ich, chi ajcxy xycöbijcyich agujc jotcujc Bernabé etz ich. E chi ich ajcxy müd nay'ayuc-huinjihuíy co jébi ich etz Bernabé nícxibich ma yi ca'p yjudíojäyity ajcxy, etz jébi yi' Jacobo, Pedro etz Juan ajcxy ñicxcixy ma yi judíojäy ajcxy. ¹⁰ Jéyi ajcxy may'ajt pijctzoy ma ich etz Bernabé co jadu'n pa'ayo'n ndunipyich ma yi judíojäy ayoobitijc. E chi ich ngo'adzoy co ndunamybich jadu'n agujc jotcujc.

Pablo ogy yi Pedro jim Antioquía

¹¹ E jadu'n anajty müd ti n'ocnay'ayuc-huinjihuíyibich ixti coon Pedro ycidacy jim Antioquía. Chi jim nnímaayich huinjijp co ti anajty jim Dios ytiy'ajt midundigooyi co puhuäctuutni je huídibi ca' yjudíojäyity, ca' y'ocmüdcaymujcni. ¹² Com co ca'ni anajty ymiñ jim Antioquía je judíojäy ajcxy huídibi anajty tzomb ma Jacobo jim Jerusalén, chi Pedro müdcaymujcni je jáy ajcxy ca'p judíojäyity. Co ajcxy ymiñ chooñ Jerusalén, chi Pedro oy puhuäctuutni je huídibi ca'p yjudíojäyity, ca' y'ocmüdcaymugaani anajty. Com Pedro tzigiyb anajty co ñi'ojihuíyib je judíojäy huídibi minamb co ooy ycopicyity yajtiy'ajttihuíyib tüg'ócíy jáy ajcxy huídibi mibijccixp Jesucristo. ¹³ Co Pedro jadu'n oy y'idíich, chi je jacjadyii judíojäy ajcxy huídi anajty jimip nañ tim jadu'n oy y'idíitczixy. Oy ajcxy janejhuíy tiy'ajt, e huädz cuydungixy. Ixti Bernabé nañ jadu'n y'idíich nej Pedro, com ca' anajty yjotmicity. ¹⁴ E co ich jadu'n oy n'ixyich co ca' ajcxy cuydungixy yajxon Jesucristo ytiy'ajt, chi ich nnímaayich Pedro mayjáy'agujc: “Peni müch judíojäy, e ti m'ixmajtzní judíojäy ycostumbre co ti mibicy Jesucristo, e ti m'occuydumyib je huinmañ huídibi judíojäy ca' cuydungixy, ¿nej tijy cham co adzip mdzachmínaandägy co yi' ajcxy huídibi ca'p yjudíojäyity, copicy cuydúngxixipy judíojäy ycostumbre, huídijaty müch ti m'ixmajtzní?”

Yi judíojäy ajcxy quipxyjaty müd jacpinjaty

¹⁵ Jadu'n njacnímaayich Pedro: “Ich etz müch judíojäy ich ajt, huídibi ndaj'ajtim ndeedy'ajtim nañ judíojäy. E ca' ich ajt njadu'nity nej jáy ajcxy ca'pi yjudíojäyity, huídibi ca' cuydungixy Dios ycötujcin je jecyip huídibi Moisés yjayhuim. ¹⁶ Müch Pedro ich ajt nnejhuíyim co jáy ajcxy ca' jébi Dios yajpocyñihuächyii müd tim jéyi co ajcxy cuydungixy Dios ycötujcin je jecyip huídibi Moisés yjayhuim. Co yi' jáy ajcxy mibijccixy Jesucristo, huin'it janchtiy Dios yajpocyñihuätziyb ajcxy. Nañ tim jadu'n ich ajt, ti nmibijcim je Cristo jigix jébi Dios xyajpocyñihuaatzim. E ca' jébi huaad Dios xyajpocyñihuaatzim ajt müd tim jéyi co ti nguyduunim Dios ycötujcin je jecyip.

Ca' ni tög jäy huídijaty jëbi Dios yajpocynñhuaächyí, mïid tím jëyi co cuyduuni Dios ycötujcín je jécyíp.”

¹⁷ Co ajt nhuinmañ nbidaacim co nmibijcim Cristo jigix Dios jëbi xya-jpocyññhuaatzim, huin'it je judíojäy ymínaangixy co jibic-huinmañ nyaj-tuunim co ca' njaccuyduunim yi' ajcxy ycostumbre. ¿Nej mdiy je Cristo xya-jtundigooyim jadu'n nej judíojäy ymínaangixy? Ca' yjadu'nity. Ca' jëbi huaad je Cristo xyajtundigooyim. ¹⁸ Co ixypy nmijpidaacim jadüg'oc Dios ycötujcín je jecyíp, je huídibi ti n'ixmajtzim, jada ixypy ijxpejt'ajtp co ndundigooyim ma Cristo ytiy'ajt. ¹⁹ Jecy'ajty co nguyduunich anajty Dios ycötujcín je jecyíp, huin'it ca' anajty nbaadyich tiy'ajt nej jëbi huaad Dios xyajpocyññhuaachich, e jadu'n nipaady nej jihuíy ti n'ögyich. Paady ycixpi ti n'ixmachich je jécyíp cötujcín, e ti nmijpidägyich Jesucristo ytiy'ajt jigix jëbi njactzinäyich mïid Dios ycixpi. ²⁰ Jadu'n nayjihuíyijich jadu'n nej jihuíy ti n'oc'o'cpich, jadu'n nej jihuíy ti ngruudzpetyich quipxyi mïid Cristo. Jadachambi ca' n'octzinaayñich mïid ngi'm jugy'ajtin ycixpi. Hue' je' je Cristo ymic'ajt etz ytiy'ajt ti chinaydacpicy ma ñch njugy'ajtin. E jadu'n nej cham njactzinäyich mïid ñch nninïcx, jactzinaaybich mïid Dios y'ung ycixpi, nmijpidacypich Dios y'ung. Dios y'ung ti xychocyich ti xyjihuíyich, e ti nayyoxyii naydogyii ma yi' o'cín mïid ñch nbocy ycixpi. ²¹ Ca' nniyajtigoya'ñich je may'ajtin je oy'ajtin huídibi Dios ti tuuñ mïid ñch ycixpi. Co ixypy jëbi Dios xyajpocyññhuaatzim mïid co ajt nguydunim Dios ycötujcín jëyi, huin'it ixypy ti ñaadig'aty je Cristo co y'o'cy mïid ajt nbocy ycixpi.

3

Je ycötucín huídibi Moisés yejc o je mibijcín

¹ Janch loci miich ajcxy migügtijc huídibi tzinaayb jim Gálatas naaxjot. Ti jäy ajcxy xyajhuinmañyidigooygixy mïid jibic-huinmañ. Paady ycixp mdzach'ixmadzaangixy je Dios ytiy'ajt. ñch oy njacapxhuächxyich ma miich ajcxy mhuinduu je tiy'ajt jadu'n nej Cristo yajcruudzpejtí mïid ñch ajt nbocy ycixpi. ² Yi' nyaj'amidooyb: ¿Nej ti mbaatcixy Dios yjihuíñ ymic'ajt mïid co mdzachcuyduuni Dios ycötujcín je jecyíp? o ¿Nej ti mbaatcixy Dios yjihuíñ ymic'ajt mïid co ti mmidoogixy Jesucristo y'ayuc e ti mmibijccixy? Hue' janchtiy ti mbaatcixy Dios yjihuíñ ymic'ajt co ti mmibijccixy Jesucristo, ca' nmínaanim co ti mguydungixy Dios ycötujcín je jecyíp. ³ Co Dios oga'n yjihuíñ xy'adigíygixy xyjottigíygixy, chi mguychínaaygixy Jesucristo ytiy'ajt nej Dios yjihuíñ xyhuinmañmooygixy. ¿Nej co cham miich ajcxy mloci huinmañ mdzachtungixy? Jadachambi jadüg'oc mdzachtunaangixy mgi'mhuinmañ. ⁴ ¿Nej naadigíixpi miich ajcxy tzaachypi ti mmínajxcixy ti myajnajxcixy mïid Cristo ytiy'ajt ycixpi? Janch naadigí' jadu'n tzaachypi ti mmínajxcixy ti myajnajxcixy, pen janch tüccíyi ti m'ixmájtzcixni Cristo ytiy'ajt. ⁵ Jada nyaj'amidoogixyp: ¿Nej ti Dios yjihuíñ ymic'ajt xy'adigíygixy xyjottigíygixy etz tuñ mijhuinmañ ma miich ajcxy mïid co ti mguydungixy Dios ycötujcín je jecyíp? Ca' yjadu'nity. Hue' Dios xy'adigíygixy xyjottigíygixy etz tuñ mijhuinmañ mïid miich ajcxy mïid co ti mmidoogixy Jesucristo ytiy'ajt etz ti mmibijccixy.

⁶ Jadu'n ymiñ cojay ma Dios ñecy co Abraham mibijcy Dios, e co yi' mijpidacy Dios y'ayuc jadu'n nipaady nej jihuíy Dios yhuinmecxi ypocy, jigix jëbi y'ity tudägy ma Dios yhuinduu. ⁷ Jadu'n yjajty mïid Abraham. Je' ymibijc Dios, e yajpocyññhuaatzi Dios, jëbi ñaydiyii tudägy jäy ma Dios yhuinduu. ⁸ Dios jecy'ajty yajnihuinmayiy co yajpocyññhuaadza'ñ je jäy ajcxy huídibi ca' yjudíojäyity, jëbi ajcxy ñaydiyii tudägy jäy ma Dios yhuinduu, mïid co ajcxy

mijpidägy je may'ajt huidibi Dios ytunamyb müid yi' ajcxy ycixpi. Paady ycixpi jaaybety ymiñ ma Dios ñecy co jadu'n Dios müidmiydac Abraham jecy'ajty co yi huidibi ca' yjudíojäyity ypaadipy ajcxy y'alma nüdzoocin, com jadu'n Dios yminañ: "Müid müich tüg m'ap m'oc may'ajt oy'ajt nduna'ñich müid naaxhuiñjyäy ajcxy ycixpi." ⁹ Paady ycixpi jadu'n nej jäy ajcxy tüg'óciy pinjaty mibijcp Dios, Dios may'ajt tunamb müid yi' ajcxy ycixpi co mibijccixy, tim jadu'n nej may'ajt tuun müid Abraham.

¹⁰ Dios chaachytunamy jäy ajcxy müid ypocy ycixpi, pinjaty huinmañ tzachpidacp co y'alma nüdzoocin padaangixy müid co cuydungixy Dios ycötujcin je jecyip. Com jadu'n jaybety ymiñ ma Dios ñecy: "Dios chaachytunamyb jäy ajcxy müid ypocy ycixpi, pinjaty ca' mijpidägy tüg'óciy Dios ycötujcin, etz nañ jadu'n pinjaty ca' cuydundäy jada cötujcin." ¹¹ Jadachambi müid je ayuc huidibi ti nyajnijayiygixy ma jada necy, jëbi müich ajcxy mnejhuñhuip co ca' ni pin jäy jëbi Dios yajpocyñihuächyü müid huidijaty ti tungixy co cuydungixy Dios ycötujcin je jecyip. Com jadu'n ymiñ jaybety ma Dios ñecy ma Dios jadu'n yminañ: "Yi jäy ajcxy pinjaty mibigip ich n'ayuc, yi' ajcxy nyajpocyñihuádzaamybich jëbi ajcxy y'alma paadip nüdzoocin." ¹² Dios ca' jadu'n yminañ ma yi' ycötujcin huidibi Moisés yjayhui'm co jëbi nmijpidaacim, e huin'it Dios xyajpocyñihuaatzim. Hue' je' yminañ ma ycötujcin co jëbi xychaachytuunim müid ajt nbocy ycixpi. Com jadu'n ymiñ jaybety ma Dios ñecy: "Yi jäy ajcxy pinjaty cuydumb Dios ycötujcin huidibi Moisés ycojay, copicy cuydundähuip, ni ma ycatundigoyipy."

¹³ Cristo xyñihuaanim xyyajtzoocim ma anajty Dios xychaachytunaanim müid co ca' nguydundaayim Dios ycötujcin je jecyip. Cristo ci'm ti yajnicxy je tzaachypi huidibi Dios ajt xymöhuaanim anajty. Com jadu'n jaybety ymiñ ma Dios ñecy: "Pinjaty anajty yajmijxotzpejtp ma tüg cruudz, hue' anajty je' yco'ayooyb ypocy tiibi tuñ." ¹⁴ Cristo o'c je' müid ich ajt nbocy ycixpi, jigix Dios jëbi cuyduñ yi' y'ayuc jadu'n nej yaj'ahuanüy Abraham jecy'ajty, co may'ajt tuna'ñ müid yi' jäy ajcxy ycixpi huidibi ca'p yjudíojäyity, etz nañ jadu'n may'ajt tuna'ñ müid ich ajt ycixpi, jigix jëbi ich ajt nbaatim je Dios yjihui'ñ co nmibijcim je Cristo.

Je cötujcin huidibi Moisés yejc etz huidibi Dios y'ahuanüy

¹⁵ Migügtijc ajcxy, ngapxticxaamybich jadu'n nej Dios ti tuñ müid tüg iixpejt nej jäy ajcxy ytuñ. Co ixypy tüg jäy necy yajcojy ma nigapxy jadu'n nej ypidägy yajhui'mañ, e co yajcojtäy je necy, e chi firmijiy, e nañ jadu'n je testigo ajcxy yfirmijiy, huin'it ca' huaad pinjaty nixigy yajxigy jada tiy'ajt, e nañ jadu'n ni ca' huaad yaj'ungiy. ¹⁶ Cuenditungixy Dios y'ayuc ytiy'ajt, Dios ma yi' y'ayuc yaj'ahuanüy Abraham etz tüg yi' y'ap y'oc co may'ajt tuna'ñ müid yi' ajcxy jëyi. Ca' nminaanim Dios y'ayuc yminañ co Dios yaj'ahuanüy Abraham co may'ajt tuna'ñ müid tüg'óciy yi' y'ap y'oc. Hue' je'Dios y'ayuc yminañ co may'ajt tuna'ñ müid tügpajc yi' y'ap y'oc, je' je' je Cristo. ¹⁷ Dios ca' yi' nixigy yajxigy ytiy'ajt huidibi jayijp ymoy Abraham co yajniguejxy ycötujcin yi' Moisés. Co Abraham y'o'cy, ti anajty ñajtninicxyñi midaax migo'px ja'üpxmajc jimijt, chiini oy Dios möy Moisés yi' ycötujcin. Tim jadu'n nej ca' huaad yajtigach je jäy ñecy ma nigapxy jadu'n nej ypidägy yajhui'mañ, nañ tim jadu'n ca' huaad Dios yajtigach y'ayuc huidi yajnimay Abraham jadu'n nej may'ajt tuna'ñ müid naaxhuiñjyäy ajcxy ycixpi. ¹⁸ Dios y'ahuanüy yi' ytiy'ajt ma Abraham jecy'ajty co may'ajt tuna'ñ müid yi' y'ap y'oc ycixpi etz müid tüg'óciy naaxhuiñjyäy ajcxy ycixpi. Co ixypy jëbi jäy padaangixy y'alma nüdzoocin müid huidibi ajcxy ytumyb co ajcxy cuyduuni Dios ycötujcin

je jecyip, ca' ixypy may'ajt ti tuñ co ti quexy je Cristo ya naaxhuiñ co jäy yajñihuädzip.

¹⁹ ¿Ti ycxipi Dios co moy Moisés je cötujcin huidibi ycojaj? Hue' je' Dios moy jada cötujcin jigix jëbi niguëxigy co jäy ajcxy ca' ycapxymidoogixy. Tunamb anajty Dios ycötujcin huidibi Moisés ycojaj mabaad ti quexy ya naaxhuiñ yi' y'ung, je' je' je Cristo, je Abraham y'ap y'oc huidibi yajpocyñihuätzp jäy ajcxy. Dios ycötujcin hue je' yajñigiejx Moisés miid ángeles ajcxy. E chi Moisés capxnajxy ma ymígügtijc ajcxy. ²⁰ Co Dios ti quexy yi' oybi y'ayuc ya naaxhuiñ miid y'ung, paady ycxipi Dios ca' tzocy co huíngbi capxnaxipy yi' y'ayuc. Dios etz Dios y'ung tú'ciy yi'.

Tigixpi Dios je Moisés cötujcin yejc

²¹ ¿Nej mdijy ca' ñaybadyii yi' Dios ycötujcin huidibi Moisés ycojaj, miid je ayuc huidibi Dios yajnimay Abraham? Naybaatip ajcxy y'ayuc. Co ixypy cayejcy Dios cötujcin ma jëbi jäy ajcxy y'alma ñidzoocin padaangixy, huin'it ixypy jëbi nbocyñihuaatzim co ixypy nguyduunim yajxon jada cötujcin. ²² Ca' yjanchity co jëbi Dios xyajpocyñihuaatzim miid co tijaty nduunim. Com ma Dios y'ayuc ymiñ cojay co nidüg'óciy jäy ajcxy ti ytundigooy, ac pocy ymiid ajcxy. Jadu'n Dios y'ayuc yminañ, jigix jëbi Dios yajpocyñihuäch tüg'óciy pinjaty mijpidacp Jesucristo, jadu'n nej yajnimay Abraham jecy'ajty co jadu'n tunañ.

²³ Ca'ni anajty Cristo ymiñ ya naaxhuiñ, huin'it anajty Dios ycötujcin ytuñ, yajpocycäy jäy ajcxy, e ca' Dios yajcomidooy jäy ajcxy ypocy. Jadu'n nej jihuüy jäy ixypy ypujxtijc'iñaaygixy e ahuijxcixy mina je juez ytiydunáanigixy. Jadu'n anajty n'ijtim jadu'n nej jihuüy nbujxtijc'iñaayim, ixti cooni Jesucristo ymiñ ya naaxhuiñ yajpocyñihuaatzp. ²⁴ Jadu'n anajty Dios cuend'aty yi' judíojäy anajty miid ycötujcin huidibi Moisés ycojaj. Tim jadu'n nej jäy cuend'aty huíngjäy y'ung. Jadu'n anajty Dios cuend'aty judío jäy ajcxy ixti cooni Jesucristo ymiñ ya naaxhuiñ jëbi yajpocyñihuäch jäy ajcxy. ²⁵ Jadachambi co Jesucristo ti y'oy ya naaxhuiñ, e ti nmibijcim (tzojcingix) yi' ytiy'ajt, paady ycxipi cham ca' n'oc'ijtim cuend'aty miid Dios ycötujcin huidibi Moisés ycojaj.

²⁶ Com miich ajcxy ti mmijpidaaccixy Jesucristo ytiy'ajt, paady ycxip jëbi nidüg'óciy miich ajcxy naydíjigixy Dios y'ung. ²⁷ Tüg'óciy miich ajcxy huidijaty ti mnibejtcixy, ti mnibejtcixy jigix jëbi mdügmujccixy miid Cristo, jadachambi niducy m'ijtcixy miid Cristo. ²⁸ Nidüg'óciy miich ajcxy ti mgöbijccixy Jesucristo jadu'n nej ajcxy mHuindzin. Jadu'n miich ajcxy judíojäy etz nañ jadu'n ca'pi yjudíojäyity, nañ jadu'n miich ajcxy midumbidijc etz miich ajcxy huidibi ci'm nay'ane'mip, miich ajcxy yëydijctijc etz miich ajcxy töxyjäydijc; tú'ciy miich ajcxy myajpattaaygixy ma mHuindzin Jesucristo. ²⁹ Huenpinity miich ajcxy co mmijpidaaccixy Jesucristo, huin'it jëbi ajcxy mnaydijiyb Abraham y'ap y'oc, e huin'it jëbi mbáatcixipy tzinaydac jiiyby tzajpjoty, je huidibi Dios yaj'ahuanüy Abraham, Abraham y'ung y'anäg etz Abraham y'ap y'oc.

4

¹⁻² Cha jadüg ijppejt nyajnimäyich miich ajcxy huidibi capxticxp Dios ytiy'ajt. Tüg comeeñjyäy ymang hue' anajty mutzni pi'cni je' anajty jëdaanip yteedy ypidägy. E chi yteedy tüg jäy yajñibicy huidibi jëbi cuend'aty je pidägy etz je pi'c'anäg mabaad paady je tiempo mina ycidigihuiigy je pidägy. Je comeeñjyäy y'ung com co anajty ca'ni yeegy, ane'my anajty y'ity, tim jadu'n nej ane'my y'ity je jäy huidibi midumb. ³ Tim jadu'n nej je comeeñjyäy

y'ung anajty y'ity ane'my, nañ tim jadu'n ñich yi judíoñäy ajcxy ane'my anajty n'íjtcixyich co anajty ca' tiydudägy naydijñygixyich Dios y'ung. ⁴⁻⁵ Co oy Dios yajhuaad'ajtni, chi oy quejxni y'ung ya naaxhuiñ. Yi' y'ung ma'xung'ajt judíoñäy, jigix jëbi codinäy jäy ajcxy ma Dios ycötujctac. Nañ jadu'n yi' ma'xung'ajt judíoñäy jigix jëbi yajpocyñihuäch yi jäy ajcxy huidibi ti yajpocycähuiçixy Dios ycötujcin huidibi Moisés ycojaj. Dios ti quexy y'ung jigix jëbi xycodinaayim mïd ajt nbocy ycixpi, e jadu'n Dios jëbi xycöbijci jadu'n nej jihuiy xyci'm'ung'ajtim.

⁶ Jadachambi mïd co naydijim Dios y'ung, paady ycixp Dios ti xy'adigñyim ti xyjottigñyim yi' yjihuiñ ymic'ajt, paady ycixp ajt mïnaanim co Dios ajt nDeedy'ajtim etz nmïnaanim: “¡Padre Nuestro!” ⁷ Mïd co miich ajcxy ti mmibijccixy Jesucristo, jadachambi ca' ane'my m'oc'íjtcixyñi ma Dios ycötujcin je jecyip, jadu'n nej je jäy ytumbidiç mïdity ane'my. Paady ycixp jëbi Dios xymóoyçixipy jugy'ajtin huidibi ca' ycixipy ytigoyipy, jadu'n nej Dios mïdity jugy'ajtin. Jadachambi miich ajcxy Dios xy'ung'ajt, etz jëbi mbáatçixipy pidägy ma Dios.

Pablo yjotmaybaady mïd je mibijçidijc ycixpi

⁸ Jecy'ajty ca' anajty mnejhuñygixy Dios ytiy'ajt tiydudägy, ooy anajty m'ojadajtcixy oyñiti huidibi ca' ymic'ajt mïdity. E ca' anajty m'ojadajtcixy je Dios tzajpjotyp huidibi mic'ajt mïdity. ⁹ Jadachambi ti mnejhuñygixy Dios ytiy'ajt etz Dios ti xycöbijccixy. ¿Nej co jadüg'oc mdzachnihuimbidaangixy yi judíoñäy ycötujcin, ca'p ti mic'ajt mïdity, huidibi ti m'ijxmajtzcixy? E jadüg'oc xy'ane'myçixy je judíoñäy ycötujcin. ¹⁰ Jadachambi mdzachcuy-dunaangixy judíoñäy ycostumbre, jadu'n nej ajcxy myajmij'ajtcixy xïbo' xïjimijt. ¹¹ Huinmaaybich ooy mïd miich ajcxy ycixpi co naadigí ti nyaj'ixpiçyich miich ajcxy. Ninigoob ayoohuañ ñich ndung ma miich ajcxy.

¹² Migügtijc ajcxy, cham may'ajt nbijctzooyich ma miich ajcxy. Yajtügñygix yi mhuinmañ jadu'n nej ñich nhuinmañ. ñich ti nyajtügñyich nhuinmañ mïd miich ajcxy mhuinmañ co ti n'ixmachich yi judíoñäy ycostumbre. Je taab anajty n'ityich mïd miich ajcxy, ca' miich anajty ajcxy ñich n'ayuc xyjijpcogapxñyi. ¹³ Miich ajcxy mnejhuñyb co anajty n'ityich ma miich ajcxy, pumäy ñich anajty nyajpaady mïd yuu pa'm ycixpi, paady ycixp ñich jim jecy nhuächijpyich, ngapxhuächyich Jesucristo ytiy'ajt je jayijp'aty. ¹⁴ Mïd ñich nba'm ycixpi ooy n'adzijpy miich ajcxy ma mjñn mdijc, e miich ajcxy ca' ti xy'ixtijy e ni ca' miich ajcxy xymidzijpich. Jadu'n ñich miich ajcxy xycöbijcy agujc jotcuç, tim jadu'n nej ixypy ti mgöbijccixy Jesucristo ci'm. ¹⁵ Jadachambi çti ti ytunyii ti yjadyii co ca' mmijotcuç'ajtcixy ñich n'ayuc? Com nyejçich tiy'ajt co je taabi anajty oga'n jim n'ityich ma miich ajcxy co janch xypubedaambich miich ajcxy. Ixti mgí'm huiin anajty ajcxy mjayajpidzimaangixyp etz xymöhuaangixyich anajty co ñich ngaa'a'ixiy. ¹⁶ ¿Nej ñich ti n'ahuimbityich miich ajcxy mmidzïp mïd co ti nyajñimaaygixy huidibi janchip?

¹⁷ Yi huindzindijc jim ma miich ajcxy huidibi xychachyaj'ixpiçcixp huidibi ca' ytiy'ajtity, ca' ajcxy oyhuinmañ mïdity. Hue' ajcxy tzachtzocy co miich ajcxy m'ixmájtçixip ñich n'ayuc ndiy'ajt. Hue' ajcxy tzachtzocy co miich ajcxy yi' mgömayipy. ¹⁸ ñich njajotcuçich jadu'n co huingbi huindzin ajcxy jëbi xyaj'ixpiçcixy. Niçoobi co ixypy jëbi ajcxy m'oy'ajtin mbaatçixy. Ca' oy copicyity co ñich ci'm miich ajcxy nmïd'ijttihuiçy. ¹⁹ Migügtijc huidibi ooy ndzocy njihuiyich jadu'n nej jihuiy ngi'm'ung'ájtigixy, ooy tzaachypï ndzachjihuiyich mïd miich ajcxy ycixpi jadüg'oc. Jadu'n

tzaachypí njihuíyich jadu'n nej ungda j tzaachypí jihuíy co y'ung ya-jma'xung'ada'ñ. Njihuíhuaamybich tzaachypí ixti cooni miich ajcxy anajty Cristo mhuinma'ñ xyaj'oyíyí. ²⁰ Ooy íich njanay'ijxpada'ñyí ma miich ajcxy cham cham. Njamíidcapxaangíxy njamíidmíydāgaangíxy, chí íxyipy tíy'ajt njacyajnímaaygíxy jac huädz. Ooy íich ndajy nmayích míid miich ajcxy ycíxpi, nej n'ocjacnímaaygíxyípy.

Je Agar etz Sara y'ijxpejt

²¹ Miich ajcxy huídibí mdzachcuydunamyb Dios ycötujcín je jecyí. Nmímaaygíxy ajcxy, ¿nej ca'ni ajcxy mídoogíxy huídibí Dios ycötujcín nigapxypí? ²² Com Dios y'ayuc huídibí jaybetyí jadu'n ymína'ñ co Abraham ymíid anajty metz ymang. Tüg je'anajty ytaj'ajtí huídibí ypödumb'ajtpy. Je jadügpi ymang anajty ytaj'ajtí huídibí ytimytöxíjc'ajtpy. ²³ Je huídibí je pödumbí y'ung'ajti, hue' je' ypi'c'ajty jadu'n nej pi'ctíjc jadyí yma'xung'ajtcíxy. Je huídibí Abraham ytöxyíjc y'ung'ajti Dios je' míid ymíic'ajty ypi'c'ajty, Dios ycuyduun y'ayuc huídibí yajhuinhuaníy Abraham. ²⁴ Jada jihuimbit ayuc jadu'n yhuimbidzímby: jada Abraham ytöxyjāy ajcxy metz íjxpejt'ajtp jadu'n nej Dios tí ytuñ míid yí' yjāy. Je ypödumbí huídí anajty yxíí Agar, yí' míid yquipxíy yí Dios ycötujcín huídibí Dios ymoy Moisés ma je cop huídí yxíí Sinaí. E tüg'óciy jāy ajcxy huídibí cuyduungíxp Dios ycötujcín huídibí Moisés ycojay, ane'my ajcxy je' yaj'idyí, tím jadu'n nej tüg comeeñjāy ane'my yaj'ity yí' ytumbí ajcxy. ²⁵ Agar yí' nīgíx'ajtp je cop Sinaí jím Arabia ñaaxjot ma Dios moy Moisés je cötujcín. Agar je tōxyjāy huídibí anajty pödumb, je' míid yquipxíy yí judíojāy huídibí tzachcuyduungíxp Moisés ycötujcín, etz nañ yquipxíy míid Dios y'ít ya naaxhuíñ jím Jerusalén. Yí judíojāy etz y'ung y'anāg ajcxy huídibí tzach cuyduungíxy Moisés ycötujcín je jecyí, ane'my ajcxy y'ity ma jada cötujcín, tím jadu'n nej jāy ajcxy huídibí tumb ma comeeñjāy, e y'ane'my ajcxy y'íjtcíxy. ²⁶ Je Sara huídibí Abraham ytöxyíjc'ajtpy, yí' míid yquipxíy íich ajt huídibí cuydumb je Cristo ytíy'ajt, e je Cristo yí' yajpatp tzajpjoty. ²⁷ Com jaybetyíty ymíñ ma Dios ñecy co mayjāy paada'ñ oybí ma Dios, com Dios jadu'n ymína'ñ:

Jotcugí' jadüg'oc miich Sara huídibí ca' y'ungbaady. Xíc yāx miich míid jotcujc'ajtín, miich huídibí ca' ungmoy. Nīgí ymayíhua'ñ miich m'ap m'oc ca'ydi Hagar y'ap y'oc.

²⁸ Íich ajt huídibí nmíjpidaacím Jesucristo tūgíyím míid Abraham ymang Isaac. Com jadu'n nej Dios cuyduuñ y'ayuc huídibí yajhuinhuaníy Abraham co Isaac yma'xung'ajty, nañ tím jadu'n Dios cuyduuñ yí' y'ayuc míid íich ajt co je Cristo y'oy ya naaxhuíñ. ²⁹ Tím jadu'n nej Abraham ymang Ismael jecy'ajty mízípc'ajty Abraham ymang huídibí Dios yajhuinhuaníyí Abraham; nañ tím jadu'n yí jāy ajcxy huídibí tzachcuydungíxp Dios ycötujcín je jecyí, ooy ajcxy tzach mízípc'adyí yí jāy ajcxy huídibí míbíjcp Jesucristo. ³⁰ Oc-huinmay miich ajcxy nej jaybetyíty ymíñ ma Dios ñecy co jadu'n Dios nímay Abraham: Yajpídzím ma mđíjc je mbödumbí míid ymang. Com ca' jadu'n ytíy'ajtíty co je pödumbí ymang paadípy miich mbídāgy. Yí' je' padamb je mbídāgy huídibí miich mdöxyíjc ymang'ajtpy.

³¹ Mígügtíjc ajcxy, ca' íich ajt n'ocjadu'niñ nej je pödumbí y'ung y'anāg ajcxy huídí ane'my íjtp. Jadu'n íich ajt nipaady nej Abraham ytöxyíjc y'ung y'anāg huídibí ca' y'ane'my y'ity.

5

Cristo tí xyajníhuaatzím ma je cötujcín huídibí Moisés yejc

1 Je Cristo ti xyajpidzimim ma Dios ycötujcin je jecyip ma anajty n'ijtim y'ane'my, jigix jëbi tzojcingix nguyduunim yi' ytiy'ajt. Mibijccixy tiydudägy Cristo ytiy'ajt, ca' m'ixmajtzcixy. Ca' mni'ahuimbijtcixipy jadüg'oc Dios ycötujcin je jecyip ma anajty m'ijtcixy tim jadu'n nej comeeñjyay ytumbi ajcxy y'ijtcixy ane'my.

2-3 Amidoo'ijtcix ich n'ayuc. Jadachambi ich Pablo minaambich pen miich ajcxy mgöbigamyb jada ayuc co copicy myajtiy'ajtihuipy, huin'it ñaadig'adañ co mmibijccixy Jesucristo ytiy'ajt. Ca' Jesucristo may'ajt tunañ miid miich ajcxy pen jadu'n m'ididzañ. Jadüg'oc nmınañich co pinjaty jadu'n ycuydunamyb tüg Dios ycötujcin, copicy ycuydundähuipy tüg'óciy. 4 Pen mjipp'ijxyp ajcxy co Dios xyajpocyñihuátzaangixy miid co mguyduungixy tüg Dios ycötujcin, jadu'n nipaady nej jihuüy ti m'ixmájtzcixni Cristo y'ayuc ytiy'ajt. Pen ca' mmijpidaaccixy je may'ajt oy'ajt huídibi Cristo ti tuñ ninigoob miid miich ajcxy ycixpi, huin'it ca' Dios xyajpocyñihuátzcixipy. 5 Njipp'ijxim co Dios xyajpocyñihuádzaanim jigix jëbi naydijim tudägy ma Dios yhuinduu miid co nmibijcim Cristo etz miid co je Espíritu Santo xypubejtim. 6 Co nmibijcim ajt Jesucristo, Jesucristo ca' cuendituñ pen ti nyajtiy'ajttiyim o pen ca'. Jëyi yi' tzocy co naychojcin nayjihuiyim nidüg nidüg, e jada je' je ijxpejt co nmibijcim yi' ytiy'ajt.

7 Jayjip'aty oy yajxon anajty m'occuydungixp Jesucristo ytiy'ajt. ¿Pin ti xy'agapxiygixy co ca' mgapxymidohuaangixy tiy'ajt? 8 Yi jäy ajcxy huídibi ti xy'agapxiygixy ca' ajcxy tiy'ajt patcixy ma je Dios huídibi ti xyhuin'ijxim jigix jëbi nmibijcim Cristo. 9 Miich ajcxy mnejhuuyb co jäy pidaaccixy levadura ma harina jich je levadura yajtiyiydaayb je jich. Nañ tim jadu'n jada anii huídibi jäy ajcxy ti pidaaccixy ma miich ajcxy yajtiyidähuamyb miich ajcxy mjot mhuinmañ. 10 Com ich nmibijcpich co ajt je nHuindzin Jesucristo oyhuinmañ xymöhuipy ajcxy, paady ycixp njipp'ijxypich co miich ajcxy mmibigaamyb ich ngapxy ich n'ayuc. Dios chaachytunipy je jäy ajcxy huídibi ti xyajhuinmañdygooygixy. Oy ooy yjamij yjajanchity ajcxy, ca' ytimyñejity, Dios yi' ajcxy tzaachytunib.

11 Migügtjic ajcxy, co ixypy yjanchity co ich ngapxhuäcxyich co copicy nidüg'óciy jäy yajtiy'ajttihuipy, ¿nej co je'ni chambaad judíojäy xychach'ixhuidityich xychachpahuidityich? Pen ca' ixypy xy'ixhuidityich xypahuidityich jadu'n nipaady nej jihuüy nyaj'ixpicyich co je Cristo ca' y'o'cy miid ich ajt nbocy ycixpi. 12 Yi' huídi ajcxy xyajhuinmañdygooygixyp, ooy ixypy y'oyity co ixypy ajcxy xypuhuäctuatni tücciyi.

13 Dios miich ajcxy ti xymijhuoogixy ma yi' ytiy'ajt jemybi jigix jëbi m'ixmájtzcixni je Dios ycötujcin je jecyip, etz tzojcingix mijpidägipy Cristo ytiy'ajt. Dios ti ajcxy mdü'aa xy'ahuaatzi, per ca' huaad mduungixy je jibicpi huídibi mjot mhuinmañ chachñijot'ajtcixpy. Hue' a'oy naymi'oyjäy'ajtigix nidüg nidüg, naybubéjtigix miñ xyipy. 14 Dios y'ayuc ymınañ: "Mi'oyjäy'adipy mmijin mmidijc, tim jadu'n nej miich ajcxy mdzocy co mmijin mmidijc xymi'oyjäy'adipy." Co jadu'n ajcxy mnaymi'oyjäy'aduyb miñ yxipy, ytimyñipaty jadu'n nej jihuüy ti mguydundäy tüg'óciy je Dios ycötujcin. 15 Pen miich ajcxy mnaymidundigooyip etz mnaymijotma'tip miñ xyipy, ca' yjetyity co ci'm anajty jadu'n mdzachnayyajhuinmañdygooyigixy miñ xyipy.

Je jugy'ajt huídibi yi' Espíritu Santo yejcpy

¹⁶ Jada capxhuijin ñich miich ajcxy nyajnijayñyb. Cuychinaaygix je Dios ytiy'ajt jadu'n nej je Espíritu Santo xyhuinma'ñymooygixy ajcxy. Ca' mguyduungixy je jibic-huinma'ñ huidibi mdzachnijot'ajtcixyp ci'm. ¹⁷ Je jibic-huinma'ñ huidibi mdzachnijot'ajtcixyp, hue'ymidzip'ajtpy je oybi huinma'ñ huidibi je Espíritu Santo xymooygixp. Dios y'ayuc obyí ca' ñaygodigiyii miiid miich ajcxy mjibic-huinma'ñ. Paady ycixp miich ajcxy ooy mjacuydunaangixy Dios y'ayuc, e ca' ajcxy mmimadäga'ñ ñicxy mguydundaaygixy. ¹⁸ Pen tzojcingix mguyduungixy je Cristo ytiy'ajt huidibi Dios yjihui'ñ xymooyb ajcxy, huin'it ca' copicy mguydúngxixy Dios ycötujcin je jecyip.

¹⁹ Com nnejhuuydaayim jadu'n nej jäy ajcxy yjot yhuinma'ñ tzachnijot'ajtcixy jibicpi. Jadu'n nej yeydijctijc tzachmigapxtigoyaangixy töxyjäydijc; e nañ jadu'n nej töxyjäydijc ajcxy ooy yeydijctijc tzachmiiid'ügangixy etz miiid'edzaangixy etz ma yjiibi ji ajcxy yhuinma'ñyigooygixy. ²⁰ E nañ nnejhuuyim jadu'n nej jäy ajcxy tzach'ojadajtcixy tzachhuingoxtinaaygixy je huidibi jäy ajcxy ci'm ti yajcojy, etz nej jäy ajcxy tzach'ojadajtcixy tzachyajtunaangixy caxpojcpiidijc, nej jäy ajcxy ymigüg tzachmijotma'tcixy; nej jäy ajcxy ca' tzip yjot'ambijccixy miiid yinjaty huenjaty ayuc; nej jäy ajcxy tzachmidzip'ajtcixy ymigügtijc; nej jäy ajcxy tzachyajca'oy'ijxcixy ymigüg co tijaty miiidity; nej jäy ajcxy chachnaybijc-huäcxáanigixy, huidibi abicy tzachmiiid'adamb yjäy. ²¹ E nañ nnejhuuyim jadu'n nej jäy ajcxy abijctigihuaangixy tijaty ymigüg ymiiid; nej jäy ajcxy ymigüg yaj'o'ccixy; nej jäy ajcxy nijot'ajtcixy ügñ etz adzuuhuididñ agoodzhuididñ, etz yi jäy ajcxy huidibi tzachnijot'ajtcixp yi jadu'mbi huinma'ñ. ñich miich ajcxy cham njacyajniimaaygixy jadu'n nej ñich jayijp'aty ti n'ocnigapxpich, co yi jäy ajcxy huidibi yi jadu'mbi jibic-huinma'ñ chachnijot'ajtcixp jadu'n nej cham ti nijayiygixy, ca' ajcxy tzinaaydac paadaangixy ma Dios y'ane'my.

²² Hue' ajt jadachambi nejhuydaayim je oybi huinma'ñ huidibi Espíritu Santo yejcy. Co yi jäy ajcxy huidibi ymiiid Dios yjihui'ñ ymic'ajt ma yjot yhuinma'ñ, hue' ytungixyp ajcxy yi oyjäy'ajtin miiid ymigügtijc; miiid ajcxy xondaacin etz miiid ajcxy jotcuyc'ajtin; etz ymimexctujcixyp ymigügtijc; etz chojccixyp yjihuygixyp ymigügtijc; etz ytungixp oybi; etz tudägy yjäy'ajtcixyp, ²³ nicy xeemy yjäy'ajtcixy ma ymigügtijc; etz ci'm yajxon ñay'ané'migixy ma yi oybi. Ca' ji huingbi cötujcin huidibi jada oybi huinma'ñ jipcogapxihiipy. ²⁴ Tüg'óciy jäy ajcxy pinjaty Jesucristo Huindzin'ajtp, miiidacpy ajcxy yi jibic-huinma'ñ huidibi ci'm nijot'ajtcixyp miiid Cristo ymic'ajt. ²⁵ Miiid co nmiiid'ajtim je Espíritu Santo ymic'ajt ma ajt ndzinaayin njugy'ajtin, paady ycixp tzoc tzinaayim jadu'n nej xy'ane'mim xyhuinma'ñymooyim je Espíritu Santo.

²⁶ Ca' huaad amij agix ndzachnayjihuyim, etz nañ jadu'n ca' huaad nmigügtijc nyajjotma'tim; etz ca' huaad ni ti nyajca'oy'ijxim.

6

Naybubéjtigixy miñ xyipy

¹ Migügtijc ajcxy, pen mbatpy tüg migüg huidibi jibic-huinma'ñ ti ymimadägyii, miich ajcxy huidibi miiidacyp yi jibic-huinma'ñ miiid Dios ymic'ajt mbubéjtcixipy jada migüg, e co mbubéjtcixipy jada migüg, ñigi jotmic mmigapx miiid oy gapxy oy ayuc. Naygüend'adii ajcxy ci'm, ca'ydi jibic-huinma'ñ xymimadaaccixy. ² Naybubéjtigix nidüg nidüg pinjaty ayo'n jotmay miiid. Co jadu'n mdúngxixy, hue' anajty ajcxy mguydungixyp Cristo ycötujcin huidibi ti xymooyim ajt.

³ Pen ji pín ñayjihuiyíi amij agix etz chach naygömaya'ñyíi cí'm co chach y'oyjäyity, ca' je' choobaady ma Dios yhuinduu. ⁴ Jëbi nidüg nidüg jäy ñayjihui'ñybigyíi nej chinäy yjugy'aty, pen oy o peni ca'yoyity. Peni ycuychinaayb yajxon Dios ytiy'ajt oybi, jotcuje ñayjihuihuíyb je' cí'm e ca' huaad yajquipxíy chinaayín mïid huingbi. ⁵ Nidüg nidüg jäy cí'm chinaayín jëbi yajnicxy nej Dios jäygidägy. Ca' huaad ni'ijxtüdy nej ymígüg jibic-huinma'ñ mïidity.

⁶ Yi jäy ajcxy pínjaty ti ixpicy Dios y'ayuc ytiy'ajt, copicy co möhuipy tijaty yajmayjajtpy je huindzín tiibi yaj'ixpigyíi.

⁷ Ix ajcxy cí'm mnayhuin'ñngix com Dios ca' yí' ni pín huaad nixígy yajxígy. Com pen miich ajcxy jibic-huinma'ñ mdumyb, Dios xychaachytunip ajcxy. Pínjaty oybi tuumb, nañ ypaadipy oybi, e pínjaty jibicpi tumb, nañ jibicpi ypaadipy. ⁸ Pínjaty jibic huinma'ñ tum jadu'n nej jibicpi tzachnijot'aty, co y'ögipy yí' y'alma ñicxip ayoodactuuby. Pínjaty cuydumb Dios ytiy'ajt jadu'n nej je Espíritu Santo huinma'ñ ymöyíi, co y'ögipy yí' y'alma huingbi jugy'ajtin ypaadamyb huídibi nimína ycaacixy ycaatigooy huídibi je Espíritu Santo möhuíib. ⁹ Peni nduunim jabom jabom oy huinma'ñ ca' huaad ndzippim, jëbi nmecxtujcim ixti cooni anajty nbaatim oybi ma Dios. E ca' huaad njotmetzcíyím. ¹⁰ Tzoc oyjäy'ajtin tuunim ma nidüg'óciy jäy ajcxy, jadu'n nej Dios xyhuinma'ñymooyím. Nígí tzoc pubejtím nmígügtijc huídibi mibijcp mijpidacp Cristo.

Ane'mín, capxhuijin etz capxpooocxín huídibi cijxnip je necy

¹¹ Ijxcix huindicxcix jada letra mijjatypí huídibi ñch cí'm njaayb, com ndzocpyich co mnejhuíyigixipy nej yam nijayíyigixy. ¹² Yi jäy ajcxy huídibi mibijcp co Cristo o'cy ma yí' cruudz mïid ajt nbocy ycixpi etz nañ jadu'n mijpidacp yí' tiy'ajttíhuíi, hue' ajcxy tzach ñaygömayaanigixy ma yí' judíojäy ajcxy, jigix ca' pín y'ixhuídidiyb ypahuídidíyb. ¹³ Yi huídí ajcxy tzach mijpidacp tiy'ajttíhuíi, nañ ni ca' ajcxy cuydundäy tüg'óciy jada Dios ycötujcim je jecyí. Hue' yí' ajcxy tzojccixy co miich ajcxy myajtiy'ajttíhuip jigix ajcxy jëbi ñaygömáayigixy mïid co miich ajcxy ti myajtiy'ajttíyigixy. ¹⁴ Yi jäy ajcxy huídibi jim yaj'ixpijcp aní, cí'm ajcxy chach ñaygömayaanigixy. Per ñch ca' jadu'n naygömaya'ñyíich mïid huídibi ndumybich huídibi nyaj'ixpijcpyich. Hue' janchtiy ngapx-padaamybich ñch ajt nHuindzín Jesucristo ytiy'ajt, jadu'n nej yajcruudzpejti mïid ajt nbocy ycixpi. Co ti nmibicyich Cristo Jesús, huin'it ti n'ixmachich je naaxhuiñyjäy yjibic-huinma'ñ. E paady cham ni nga'ocnijot'ajtnich yí' jibic-huinma'ñ. ¹⁵ Co nmibijcim Jesucristo, oy ixypíy ti nyajtiy'ajttíyím o oy ixypíy ca' ti nyajtiy'ajttíyím, ca' ma choobaady. Huídibi tzoubatp yí' je' co nmibijcim Jesucristo, etz co nmïid'ajtim jemybi jot huinma'ñ. ¹⁶ Huen Dios xyajjotcugíhuipy etz xypa'ayoohuipy, etz nañ jadu'n yajjotcugíhuipy etz pa'ayoohuipy nidüg'óciy jäy huídijaty cuydumb Cristo ytiy'ajt, tüg'óciy Dios yjäy janchypí tiydudägyí.

¹⁷ Jadu'n nej jadachambi, etz jadu'n nej xí tiempo jacmiimb jaccidaacp, ca' ñch pín huaad xyjac'amayíyich, com nmïidich je tiy'ajt ma nninícxich jadu'n nej jäy ajcxy ti xyhueenduuníich ti xychaachytuuñíich mïid co ti nduuníich mïid Jesucristo ycixpi.

¹⁸ Mígügtijc ajcxy, huen ñch ajt nHuindzín Jesucristo tunipy nígi may'ajt oy'ajt ma miich ajcxy. Jadu'n jada ngapxycíxyich. Amén.

EFESIOS

Yi Necy Huidibi San Pablo Yajnigujx Je Mibijcpidijc Jim Efeso

¹ Hich Pablo, Dios jadu'n tzojcp co Jesucristo ti xyajñibicyich co n'apóstol'adipyich. Jada necy cham nguejxypich jim Efeso ma yi jäy ajcxy huidibi Dios yjäy'ajtip, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'. ² Huen ajt nDios Teedy etz ajt nHuindzin Jesucristo may'ajt oy'ajt tunipy mïid miich ajcxy etz xyajjotcugihup ajcxy.

Nej je Espiritu Santo conucxy Cristo yjäy

³ Tzoc ñbaatim capxpaatim Dios ñch ajt nHuindzin Jesucristo yTeedy. Mïid co nyajpaatim ma Cristo, paady Dios ti xyconuucxim mïid tüg'óciy huidijaty tzomb tzajpjoty. ⁴ Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jëbi nyajpaatim ma Cristo, etz jigix jëbi nya-jpaatim ma Dios yhuinduu huädz oy njot nhuinma'ñ, ca' ti bocy nmïd'ajtim. ⁵ Mïid co Dios ooy xychojcm xyjihuiñyim, paady ycixp yi' capxcödujcy jecy'ajty, ca'ni anajty naaxhuiñybi yajcojy yaj'oyiy, co xycöbigaanim nejjihuiñy yci'm y'ung. Co Dios jadu'n quejxy je Cristo ya naaxhuingixy, chi yi' yaj'oyiy nej jëbi xycöbajcm nej yci'm y'ung, e jadu'n xymïd'adaanim tzajpjoty. Dios jadu'n ytuñ jadu'n nej yi' anajty tzocyin. ⁶ Tzoc ñbaatim capxpaatim Dios ooy mïid co mijmay'ajt mij'oy'ajt tuuñ mïid ñch ajt ycixpi, co quejxy y'ung ya naaxhuiñ mïid ñch ajt nbocy ycixpi, jigix jëbi nyajpaatim ma yi' y'ung, je' y'ung huidibi ooy tzocy jihuiñy. ⁷ Mïid co Dios ooy xychojcm xyjihuiñyim paady ycixp yi' y'ung ñi'py teemy yojcy co y'o'cy mïid ajt nbocy ycixpi, ti ajt n'alma xyajñidzoocim etz nbocy ajt ti xyhuinmeecxim. Co jadu'n ytuuñ, chi Dios mijmay'ajt mij'oy'ajt tuuñ mïid ñch ajt ycixpi. ⁸ Co Dios jadu'n mijmay'ajt mij'oy'ajt tuñ mïid ñch ajt ycixpi, ti xyajhuinjihuiñyim ti xyajnejhuñyim yi' ytiy'ajt yi' yhuinma'ñ. ⁹ Dios yjäygidacpy jadu'n co ti xyajnejhuñyim nej anajty mïidty capxcöducy huidibi ca' pin jecy'ajty huinjihuiñy. Nañ jadu'n Dios ti xyajnejhuñyim nej ti yhuinma'ñypidacy jecy'ajty nej ytuna'ñ anajty mïid Cristo. ¹⁰ Je huidibi Dios jecy'ajty ti yajnihuinmayiy co tuna'ñ anajty, ytunamyb yi' mina anajty je tiempo ti yhuaad'ajtni. Dios ti yajnihuinmayiy anajty co pidäga'ñ tüg'óciy huidi yajpatp tzajpjoty etz tüg'óciy huidibi yajpatp ya naaxhuiñ ma tüg ane'min, e je Cristo je' ane'mamb nigohuajc'adamb tüg'óciy.

¹¹ Tüg'óciy tijaty tuni yjajti jiiyby tzajpjoty etz ya naaxhuiñ Dios jayijp capxcödujcy. Hich ajt huidibi nyajpaatim ma Cristo, Dios ti xyhuin'ijxim jecy'ajty co oga'n je naaxhuiñybi chondacy jigix jëbi nbaatim tüg'óciy huidibi Dios xymöhuaanim. E tüg'óciy jada nicxy yjaty tim jadu'n nej Dios jayijp capxcödujcy, e Dios ytumyby jadu'n nej yi' tzocy etz nej jäygidägy. ¹² Jadu'n Dios cuydumyby mïid ñch ajt ycixpi, huidibi jayijp ti nmibijcm ti nmijpidaacim Cristo, jigix jëbi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios mïid yi' ymij'ajtin etz yi' y'oy'ajtin ycixpi. ¹³ Nañ jadu'n miich ajcxy co mmïdooy je ayuc tiy'ajt nej jëbi m'alma ñidzögipy ajcxy, e ti mmibijccixy Cristo, huin'it ajcxy myajpaatcixy ma yi', e je Dios yjihuiñy ymic'ajt huidibi miich ajcxy mïid ma mjot mhuinma'ñ, je' nidiy'ajt'ajtp co myajpaatcixy ma Dios. Jada je' je Espiritu Santo huidibi Dios y'ahuaniy jecy'ajty co xymöhuaanim. ¹⁴ Jada Dios yjihuiñy ymic'ajt jada je' nidiy'ajt'ajtp

co nbadaanim it lugar ma Dios y'it. Dios xymöhuaanim it lugar ma y' y'it co anajty xii tiempo yhuaad'ajtni huin'it Dios nihua'na'nñ yajndzöga'nñ pinjaty yjây'ajtip ajcxy. Jadu'n Dios tuna'nñ, jigix jëbi ñch ajt n'ibaatim ngapxpaatim Dios müd y'oy'ajtin ycixpi.

Pablo mibijctzoy Dios co huen ajcxy yajmoy huijy'ajt cujc'ajt

15-16 Com ti nnejhuüyich jadu'n nej tydudägy müich ajcxy ti mmibijccixy ñch ajt nHuindzin Jesús, e nañ jadu'n ti nnejhuüyich jadu'n nej mdzojccixy mjihuüygyxy tüg'óciy huídibi mibijccixp Jesucristo. Paady ycixp jabom jabom co Dios nmibijctzooyich, nyajnajxpich jäygidacín ma Dios müd müich ajcxy ycixpi. 17 Mibijctzooybich Dios, nHuindzin Jesucristo yTeedy, je mijpi Dios Teedy, co y' xymöhüip ajcxy je huinma'nñ je xpijcin huídibi je Espíritu Santo yejcpy, etz nañ jadu'n xyajnejhuüipy xyajhuinjihuüipy ajcxy jac'oy y' y'ayuc, e tüg'óciy nej y' ti ytuuñ. 18 Dios nmibijctzooybich müd müich ajcxy ycixpi, co xyaj'anüyp ajcxy mjot mhuinma'nñ müd y' ytiy'ajt, jigix jëbi mnejhuüygyxy tyjaty huídibi ajcxy m'ahuijxyp ma Dios, nidüg'óciy müich ajcxy huídibi Dios ti huin'ixy. Nañ jadu'n jigix jëbi mnejhuüygyxy nej ymijty yjanchity je pidägy huídibi Dios yegamyb müd tüg'óciy ajcxy huídibi Dios yjây'ajtip. 19-20 Dios nmibijctzooybich jigix jëbi ajcxy mnejhuüipy jadu'n nej Dios ymic'ajt müdity. Je' ymic'ajt ca' ycixipy ytigoyipy, e ni pin ca quipxy. Etz y' ymic'ajt tumb ma ñch ajt njot nhuinma'nñ nidüg nidüg co ajt nmibijcim. Dios ti xyajnejhuüyim y' ymic'ajt huídibi ymüd may'amy co yajjugypjcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jüby tzajpjoty. Y' ñaayb a'oy'amy ma Dios ymijc, etz ane'mdäy tüg'óciy naaxhuiñ etz tzajp quipxy müd Dios. 21 Cristo jac mij'ane'min ymüd, jac mic'ajt müd, ca'ydi jacpinjaty huídibi jayajpatp tzajpjoty, etz huídibi jayajpatp ya naaxhuiñ, huídibi cham tzinaayb etz huídibi jacjiini tzinähuaamni. Jesucristo cömay y'ity nigi, ca'ydi jac pin huídibi cham tzinaayb, etz huídibi jacjiini tzinähuaamni. 22 Dios ti pidägy tüg'óciy ane'min ma Cristo jëbi ane'mdäy. Jadu'n nipaady nej jihuü Cristo nihuäcejtty tüg'óciy ane'min. E nañ jadu'n Dios ti pidägy Cristo jigix jëbi nigohuajc'adipy tüg'óciy mibijcpidijc. 23 Je mibijcpidijc jadu'n nipaady nej Cristo ñinix, paady ycixpi y' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcijxtaayb yajca'pxtaayb tüg'óciy tyjaty ji ajtp.

2

Dios chojcpy yjihuüyb jäy ajcxy, paady ñidzoocixy y'alma

1 Ca'ni müich anajty ajcxy mmibijccixy Cristo, ooy anajty mdundigoogyxy müd Dios ytiy'ajt, ooy anajty ajcxy mbocymüdity, e jadu'n nipaady nej jihuü ti m'o'ccixy müd mbocy ajcxy ycixpi etz Dios xyajjugypjccixy huinjemy müd jemybi jugy'ajtin. 2 Co ca'ni anajty müich ajcxy mgöbijccixy mmijpidaaccixy Cristo, ooy anajty mguydungixy naaxhuiñjây ajcxy ytiy'ajt, etz nañ mgapxymidoogyxy anajty ajcxy je ca'oybi huídibi ane'mb je poj naaxhuiñ, je ca'oybi huídibi tumb ma y' jäy ajcxy yjot yhuinma'nñ huídibi ca' capxymidoogyxy Dios. 3 Ma je tiempo tiibi ñaxy, nañ jadu'n anajty ndzinaayim jadu'n nej y' jacjadyii naaxhuiñjây ajcxy huídibi capxymidoob y' ca'oybi. Ngapxymidoohuim anajty nninix chojcin. Ndundigooyim anajty müd ngi'mjot ngi'mhuinma'nñ. Nguipxyiyim anajty müd y' jacjadyii naaxhuiñjây ajcxy huídibi Dios tzaachytunaanip müd ypocy ycixpi, etz nañ jadu'n nmihuaad'ajtim co Dios xychaachytuunim müd ajt nbocy ycixpi. 4-5 Oy ixypy ñch ajt mihuaadity tzaachyp müd ajt nbocy ycixpi, per Dios mij ooy

ti xypa'ayoohuim, e mij ooy ti xychojcm ti xyjihuuyim, paady ycixp tuuñ may 'ajt miid ich ajt ycixpi co yajjugypijcy je Cristo. E jadu'n quipxyi miid Jesucristo ich ajt nbaatim jemybi jugy'ajtin huudibi ca' ycixipy ytigoyipy ni mina. Jadu'n Dios may'ajt tuuñ miid ich ajt ycixpi co anajty nbadaanim o'cin miid ajt nbocy ycixpi. Miid co Dios may'ajt oy'ajt tuuñ miid miich ajcxy ycixpi, paady miich ajcxy ti mbatcixy jemybi jugy'ajtin huudibi ca' ycixipy ytigoyipy ni mina. ⁶ Com jadu'n nipaady nej Dios xyajjugypijcm quipxy miid Jesucristo, paady ycixp Dios xymohuaanim it lugar jiiby tzajpjoty quipxy miid Jesucristo. ⁷ Jadu'n nej xii tiempo mimb cidacp Dios jadu'n oy tuñ jigix jebi tiy'ajt nmuid'ajtim jadu'n nej Dios xychojcm xyjihuuyim etz xypa'ayoohuim mijcajee, etz mijmay'ajt mij'oy'ajt tuun miid ich ajt ycixpi co nyajpaatim ma Cristo. ⁸ Miid co Dios miich ajcxy ti xychojccixy ti xyjihuuygixy, paady ycixp yi m'alma ajcxy ti patcixy nidzoocin co ti mmibijccixy Jesucristo. Ca' nminaanim co tijaty ti mdungixy, paady ycixp yi m'alma ajcxy ti patcixy nidzoocin. Hue' janchtiy Dios ti xymoogygixy ninigoob ajcxy m'alma nidzoocin. ⁹ Ca' nminaanim huin'it jay ajcxy y'alma nidzoocin paadip co oybi tungixy. Hue' janchtiy Dios jadu'n ci'm ti yaj'oyiy ninigoob nej jay ajcxy jebi patcixy y'alma nidzoocin, jigix ca' pin jebi huaad amij agix nayjihuyii. ¹⁰ Com Dios ci'm ti oyduñ ich ajt njemybi tzinaayin jugy'ajtin miid je may'ajt huudibi Cristo ytuun co y'o'cy miid ajt nbocy ycixpi. Jadu'n Dios tuuñ miid ich ajt ycixpi, jigix jebi nduunim oyjay'ajtin ma ajt ndzinaayin. Dios, jecy'ajty ca'ni naaxhuiñybi anajty chondacy, cojy macxy je tiy'ajt jadu'n nej yi' tzocy co nduunim oyjay'ajtin.

Jotcuyc cham n'ijtim miid Dios, com Cristo xyajpocyhuaatzim

¹¹ Jadu'n miich ajcxy ocjamejtzcodii nej miich ajcxy anajty myajpatcixy co anajty ca'ni mmibijccixy Jesucristo. Ca' miich anajty ajcxy mjudiojyity, e ni ca' miich anajty ajcxy myajtiy'ajtiygixy nej huaad mnaydijigixy Dios yjay. Paady ycixp yi judiojay ajcxy yminañ co Dios je' yjay ajcxy, e miich ajcxy ca', miid yi'da'ajty co miich ajcxy ca' myajtiy'ajtiygixy. ¹² Co ca'ni anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judiojay xycobijccixy, etz ni ca' anajty mbadaangixy huudibi Dios y'ahuaniiy ma yi judiojay ajcxy, etz ni ca' anajty ti mjijp'ijxcixy ma Dios, etz ni ca' miich anajty ajcxy myajpatcixy ma Dios. ¹³ Jadachambi, miich ajcxy huudibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo miid co yi' ni'py teemy yojcy miid miich ajcxy mbocy ycixpi. ¹⁴ Jesucristo ci'm yaj'oyiiy je tzip je capxy nej anajty ich ajcxy judiojay etz miich ajcxy huudibi ca' yjudiojyity naymidzip'ajtim, e cham jotcuyc n'ijtim. Jesucristo ci'm yajtigoy je judiojay ycotujcin huudibi anajty tzipcojp capxycojp ma ich ajcxy etz ma miich ajcxy. Jesucristo yajtugmujc judiojay, etz huudi ca' yjudiojyity. ¹⁵ Jesús miid yci'm ninicx yajtigoy je jecy'ajtypi cotujcin co oy yaj'ogyii cruudzcixy. Co Jesús y'o'cy, huin'it yajtugmujcy judiojay etz huudibi ca' yjudiojyity. Huin'it oy yaj'ahuimbity tugpicy jay jemybi huudibi Dios yjay'ajtip. E jadu'n ajcxy yajcijxy yajmay je tzip capxy. ¹⁶ Co Cristo oy yaj'ogyii cruudzcixy, huin'it yajcijxy yajnaxxy je tzip capxy jadu'n nej yi judiojay anajty midzip'adyii yi' ajcxy huudibi ca' yjudiojyity. Etz nañ huin'it Cristo yajtugmujcy yi judiojay miid huudibi ca' yjudiojyity. Paady ycixp Dios ycobiga'nyii judiojay ajcxy etz huudibi ajcxy ca' yjudiojyity agujc jotcuyc.

¹⁷ Je Cristo miin anajty ya naaxhuiñ etz capxhuäcxy oybi tiy'ajt jadu'n nej jebi ajt nbaatim jotcuyc'ajtin ma Dios. Ycapxhuäcxyp anajty ma miich

ajcxy huidibi ca' yjudíojäyity, huidibi ca' anajty müdity Dios ytiy'ajt. Etz nañ jadu'n ycapxhuäcxp Dios ytiy'ajt anajty ma ñich ajcxy judíojäy huidibi jamüid anajty Dios ytiy'ajt. ¹⁸ Müid co Cristo may'ajt ti tuuñ co xy'adigüim xyjottigüim Dios yjihu'iñ ymic'ajt, paady ycixp nidüg'óciy ñich ajt nyajpaatim ma Dios jadu'n nej tügpicy jäy, tanto judíojäy etz nañ jadu'n huidibi ca' yjudíojäyity. ¹⁹ Paady ycixp miich ajcxy jadachambi myajpaady ma Dios. Jadu'n miich ajcxy myajpaady ma Dios tim jadu'n nej je jäy ajcxy huidibi tzinaayb ma yci'mgajp, ca' yjadu'nity nej adzinaaybi ajcxy. Paady ycixp tú'ciy miich ajcxy mnaygomájtzigixy ma Dios müid judíojäy ajcxy. Jadu'n miich ajcxy etz judíojäy ajcxy nipaady cham nej jihuüy ajcxy mdüguugy mdügmigüg. ²⁰ Miich ajcxy ti mmijpidaaccixy je tiy'ajt huidibi Jesús y'apóstol ajcxy ti capxhuäcxy etz je tiy'ajt huidibi Dios y'ayucnajtzcaxüyb ti capxhuäcxcixy. E yi' ajcxy ytiy'ajt jadu'n nipaady nej poch'ijx ma chondägy. E Jesucristo yi' jëdu'n yajpatp nej tüg tzaa huidibi jaccopicyip ma je poch'ijx chondägy. ²¹ Dios jadachambi tiempo ycojyp ymacxyp jadügpicy jäy huidibi yjäy'adaanip huidibi tügjip mijpidaaccixy Cristo, huidibi tú'ciy ijtcixyp müid Cristo. Jadu'n jadaayaabi tügpicy jäy nipatcixy nej tüg tijc ma jäy ajcxy Dios ojadajtcixy. ²² Miich ajcxy myajpatp ma Cristo quipxy müid nidüg'óciy yi' mayjay ajcxy huidibi mijpidacp Dios etz huidijaty müi'ijtp je Espíritu Santo ma ajcxy yjot yhuinmañ, jadu'n miich ajcxy mjogy'ajtin nipaady nej Dios chinaydac.

3

Pablo yi' je' müid cötujcin co capxhuäcxy Dios y'ayuc ma pin ca' yjudíojäyity

¹ ñich Pablo, nyajpatpich pujxtigoty müid co nduuñich ma Jesucristo ytung ma miich ajcxy huidibi ca' yjudíojäyity. Paady ycixp nmibijctzooybich Dios müid miich ajcxy m'oy'ajtin ycixpi. ² Mnejhuüy ajcxy com Dios mijmay'ajt ti tuuñ müid miich ajcxy ycixpi, paady yi' ti xyajñibicyich ngapxhuäcxibich ma miich ajcxy yi' y'ayuc ytiy'ajt. ³ Dios ti xyajnejhuüyich yi' ytiy'ajt huidibi jecy'ajty yüch y'ijtp. Jada tiy'ajt yinjaty hueeñjaty ñich miich ajcxy ti nni-jayüygixy jayijp'aty. ⁴ Co miich je necy mgapxip, huin'it ajcxy mnejhuüipy co ñich nnejhuüyich je Cristo ytiy'ajt huidibi ijtp yüch. ⁵ Jada tiy'ajt maabi Jesucristo, Dios ca' ni pin yajnejhuüy jecy'ajty. Jadachambi xi tiempo Dios müid je Espíritu Santo yajnejhuüy Jesucristo ytiy'ajt je Jesús y'apóstoles ajcxy etz je Dios y'ayuc najtzcaxüyb ajcxy. ⁶ Jada je' je tiy'ajt huidibi jecy'ajty yüch anajty ijtp, co yi' jäy ajcxy huidibi ca' yjudíojäyity ypadamyb ajcxy Dios y'oy'ajtin quipxy müid yi' judíojäy ajcxy, etz nañ jadu'n yi' ajcxy yajpaady ma Dios tú'ciy müid yi' judíojäy ajcxy, etz nañ jadu'n yi' ajcxy padaangixy oybi huidibi Dios jecy'ajty yajnimay yi' judíojäy co möhuaangixy pinjaty mibijccixp Jesucristo.

⁷ Dios mijmay'ajt ti tuñ müid ñich ninigoob co ti xyajñibicyich jada tung, e xymöyich mic'ajt co ngapxhuäcxibich Jesucristo y'ayuc ytiy'ajt oybi ma yi' jäy ajcxy huidibi ca' yjudíojäyity. ⁸ ñich jactimmudzip ma yi' maybi mibijcpidijc ca'ydi jacpin, per ca' ñejity. Dios may'ajt oy'ajt ti tuuñ ma ñich, e ti xypidägyich ma yi' ytung co ngapxhuäcxyich jada oybi tiy'ajt ma jacjadyii jäy ajcxy jigix jëbi ajcxy patcixy ma Cristo Jesús mij'oy'ajtin, huidibi ca' pin huinjhuüy jadu'nyi ymijity. ⁹ Dios ti xyajñibicyich co ngapxticxibich ma tüg'óciy jäy ajcxy je Dios y'ayuc ytiy'ajt oybi huidibi yüch anajty ijtp. Yi' je' je ayuc huidibi Dios ti cojy ti macxy jecy'ajty, jadu'n nej yi' tunañ je oybi müid tüg'óciy jäy ajcxy. Yi' je' Dios huidibi ti yajcojtäy tüg'óciy tijaty ya naaxhuñ etz jilby tzajpjoty yajpatp. ¹⁰ Jadu'n Dios capxcödujcy co je tzajpjoty tzinaaybi ajcxy huidibi ane'min etz mic'ajt müid, tiy'ajt padaangixy ma yi' mibijcpidijc jadu'n nej

Dios mijhuinma'ñ canaagnax tuñ mïd jäy ajcxy nidüg'óciy huidibi mibijccixp Cristo Jesús. ¹¹ Jadu'n Dios ti cuyduuñ mïd ajt nHuindzin Jesucristo jadu'n nej jecy'ajty capxcödujcy. ¹² Mïd co nyajpaatim ma Jesucristo paady ycixp agujc jotcujc nmigapxim nmihuingonim Dios. Mïd co nmibijcim Jesucristo paady ca' ndzigüyim ndzo'yduunim ma Dios yhuinduu. ¹³ Paady ycixp may'ajt nbijctzooyich mïd miich ajcxy co ca' nïgi m'ixtigühuäccixy ma ajcxy mmibijcin. Etz ca'ajcxy xyñidajipy xyñimayípyich co tzaachypi nminaxyich nyajnaxyich mïd miich ajcxy ycixpi. Com mïd co ti nyajnaxyich tzaachypi mïd miich ajcxy ycixpi, paady jëbi miich ajcxy oy'ajtin mbatcixy.

Cristo chojpy yjihuüyb jäy ajcxy

¹⁴ Com Dios mijmay'ajt ti tuuñ mïd judíojäy etz mïd huidibi ca' yjudíojäyity, paady njatyhuingoxtinaaybich Dios, ñch ajt nHuindzin Jesucristo yTeedy, e nmibijctzooybich Dios mïd miich ajcxy ycixpi. ¹⁵ Tüg'óciy tzajpjoty tzinaayb etz tüg'óciy naaxhuiñyjäy huidibi mibijccixp Dios, jëbi nidüg'óciy ymïnaangixy: “Dios ñch ajt nDeedy.” ¹⁶ Paady nmibijctzooybich Dios Teedy mïd miich ajcxy ycixpi, co Dios je huidibi mic'ajt etz oy'ajt ymïd mijcajee, co xymöhüipy mic'ajt ma ajcxy mmibijcin mïd yi' yjihu'ñ ymic'ajt huidibi yajpatp ma ajcxy mjot mhuinma'ñ. ¹⁷ Dios nmibijctzooybich mïd miich ajcxy ycixpi co Cristo ymic'ajt yajpaadip ma miich ajcxy mjot mhuinma'ñ mïd co mmibijccixy Cristo. Jadu'n Cristo ymic'ajt yajpaadip ma ajcxy mjot mhuinma'ñ, jigix jëbi miich ajcxy huidibi mmibijccixp Cristo, jëbi mdzójcxixipy mjihuüygixipy mijcajee huinixi huinitempo je mibijcpidijc etz tüg'óciy jac-jadyii jäy. ¹⁸ Nañ jadu'n Dios nmibijctzooybich mïd miich ajcxy ycixpi co miich ajcxy etz tüg'óciy mibijcpidijc mnejhuüygixipy jadu'n nej Cristo xychojcm xyjihuüyim mijcajee. E yi' chojcin yjihuüyïn jadu'n nipaady nej tüg' tije huidibi jac cixip jac mijip, jac yooñip jac cücyip ca'ydi ni huidi tijc. ¹⁹ Nmibijctzooybich Dios co xyajnejhuüygixipy xyajhuinjihuüygixipy nej Cristo xychojcm xyjihuüyim mijcajee nidüg'óciy ñch ajt, ixti ca' huaad nhuinjihuüydaayim jadu'n nej Cristo xychachchojcm xychachjihuüyim. Nmibijctzooybich Dios co xypubéjtcixip, ixti mabaad mmïd'ajttaaygixy Dios y'oy'ajtin.

²⁰ Jadachambi, cömay Dios y'ity huidibi mic'ajt mïd, etz huidi yejcp mijcajee jac'anaxy ca'ydi nej njapijctzoohuim etz nej njahuinmaayim, mïd je ymic'ajt ycixpi huidi tumb ma ñch ajt. ²¹ Huen tüg'óciy mibijcpidijc ajcxy jäymejtcixy ojadájtciy Dios etz Cristo Jesús jabom jabom huinixi huinitempo. Jadu'n jada. Amén.

4

Tú'ciy n'ijtim mïd Espíritu Santo ycixpi

¹ Nyajpatpich pujxtigoty mïd ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzináaygixipy jadu'n nej mihuaad jäy chinaaygixy huidibi Dios ti yhuin'ijxigixy, com Dios miich ajcxy ti xyhuin'ijxcixy. ² Pidaaccix mjot mhuinma'ñ yung naxy, nicy xeemy jäy'ajtcixy, naymecxtújcigix miñ xyipy, naymi'oyjäy'ájtigixy, jigix ñiguëxigip co mnaychójcgixy mnayjihuüygixy miñ xyipy. ³ Mïd'adipy ajcxy mjot mhuinma'ñ tú'ciy mïd je Espíritu Santo ypubejtin jigix jëbi mdzinaaygixy jotcujc ca' ma tzip capxy. ⁴ Nidüg'óciy mibijcpidijc tú'ciy yajpatcixy ma Cristo etz tügpajc Espíritu Santo huidibi yajpaady ma ajt njot nhuinma'ñ. Dios ti xyhuin'ijxim, jigix jëbi quipxyjaty njijp'ijxtaayim je oybi huidibi nbadaanim jüiby tzajpjoty. ⁵ Ji yajpaady tügpajc ajt nHuindzin Jesucristo, etz tügpajc

je ayuc tiy'ajt huídibi jëbi nmijpidaacim, etz tügpajc nnibejtim mïid Jesucristo yxi. ⁶ Ji yajpaady tügpajc Dios Teedy huídibi cuendi'ajtp yajtzinaayb nidüg'óciy mibijcpidijc. Yi' je' huídibi nihuindzin'ajttaayb. Yi' je' huídibi may'ajt tumb mïid nidüg'óciy ajcxy, etz yi' ymic'ajt yajpatp ma nidüg'óciy ajcxy yjot yhuinma'ñ.

⁷ Dios may'ajt oy'ajt ti tuñ mïid nidüg nidüg ïch ajt co Cristo xymooyim mic'ajt, jigix jëbi nidüg nidüg tuunipy Dios ytung nej ypadyii. ⁸ Paady ycixp jaybety ymiñ ma Dios jadu'n ymina'ñ:

Co Cristo ypättigiyy tzajpjoty, chi ymïidpättigiyy may machjäy, e nañ jadu'n Cristo moy jäy ajcxy mic'ajt (dones).

⁹ ¿Nej co jadu'n Dios y'ayuc ymina'ñ co je Cristo ypättigiyy tzajpjoty? Hue' je' jadu'n ymina'ñ mïid co je Cristo jayjip ycidacy etz ooy ayoooy ya naaxhuiñgixy. ¹⁰ Je Cristo yi' je' huídibi cidaac ya naaxhuiñ choon tzajpjoty, nañ jadu'n ypättigiyy jadüg'oc tzajpjoty jactim'o'c'am. E yi' je' ymic'ajt yajpatp ma tüg'óciy huídijaty jiiy tzajpjoty etz tüg'óciy huídijaty ya naaxhuiñ.

¹¹ Je Cristo ymooygixyp nidüg nidüg yi' ytumbi mic'ajt. Nijëjity mooygixy mic'ajt jëbi nidiy'ajt'ajtigixy co je' je' je' Cristo. Nijëjity mooygixy mic'ajt jëbi najtzcapxiygixy Dios y'ayuc. Nijëjity mooygixy mic'ajt jëbi capxhuäcxixy yi' y'ayuc. Nijëjity mooygixy mic'ajt jëbi capxhuijcixy yi' mibijcpidijc mïid Dios ytiy'ajt. Nijëjity mooygixy mic'ajt jëbi yaj'ixpijccixy Dios ytiy'ajt. ¹² E jadu'n je' Cristo mic'ajt moydaaygixy yi' yjäy, e jadu'n yajni'ixiydaaygixy mïid ytung ycixpi. E mïid yi' ajcxy ytung yjacyujcpedipy yi' mibijcpidijc y'ixpijcin, ixti mabaad jac mïid'adipy ajcxy Cristo y'oy'ajtin. ¹³ Jadu'n Cristo mic'ajt xymooyim, jigix jëbi nidüg'óciy ïch ajt ytügiyim nmibijcin, etz nañ jadu'n quipxyjaty n'ixpijctaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot yhuinma'ñ, nmi'ijtim Jesucristo ytiy'ajt cixy ca'pxy. ¹⁴ Ca' n'idaanim mïid ajt yhuinma'ñ nej pi'ctijc yhuinma'ñ ymïidity. Je pi'ctijc ajcxy janam jadzoc yhuinma'ñ ytigajtzcixy. Jadu'n ajcxy nipaady nej je miy huídibi je poj yajpojmiyby yajpojxiypy. Co cixy ca'pxy nmïid'ajtim Cristo ytiy'ajt, ca' pinjaty xyhuin'änim mïid huing ayuc oymibijcnip huídibi ca' yjanchity. ¹⁵ Hue' janchity ngapxim je tiy'ajt tiybi mïid tzojcin jihuüyin, jaydëbi njacyeecim ajt nmibijcin etz njacnejhuüyim tüg'óciy Cristo ytiy'ajt jadu'n nej ytuuñ ya naaxhuiñ, je Cristo huídibi nigohuajc'ajtp tüg'óciy mibijcpidijc. ¹⁶ Cristo etz je mibijcpidijc nipatp nej tüg ninïcx. Cristo ñipatp nej je ninïcx cohuajc huídibi ane'mb etz mic'ajt mooyb je ninïcx. Etz yi' mibijcpidijc ñipatp ajcxy nej je ninïcx huídibi Cristo y'ane'myb etz mic'ajt möy. Ma Cristo tüg'óciy mibijcpidijc mic'ajt patcixy huídibi yajtügüyip ajcxy ymibijcin etz nañ jadu'n yaj'ijtigixy tügmucy. Nidüg nidüg mibijcpi ymic'ajt patcixy ma Cristo, jëbi tungixy Cristo ytung nej ypadyii. E jadu'n yeeccixy nidüg'óciy ma ajcxy ymibijcin, etz nañ jadu'n yajyeeccixy chojcin yjihuüyin mïid ymigügtijc.

Je jemybi jugy'ajt huídibi nbaatim ma Cristo

¹⁷ Paady ycixp nnimäyich miich ajcxy etz nyajnibijccixy mïid ajt nihuindzin Jesucristo ycötujcin, co ca' huaad mdungixy loci huinma'ñ huídibi ca' choubaady ma Dios, jadu'n nej jacjadyii jäy ytungixy huídibi ca' mijpidaaccixy ajt nihuindzin Jesucristo. ¹⁸ Ca' huaad mdzinaaygixy jadu'n nej jacjadyii jäy ajcxy chinäy mïid loci huinma'ñ. Ca' ajcxy yajpaady ma Dios, je huídibi jugy'ajtin yejcp huinixibi. Ooy ajcxy yjotjuuñity, ca' ajcxy ixpigaangixy Cristo ytiy'ajt. ¹⁹ Ca' ajcxy ti tzo'ydu'n jihuüy co ytundigooygixy. Ooy ajcxy minicxnajxcixy yi' jibic-huinma'ñ. Ooy ajcxy nijot'ajtcixy mijcajee co túngixipy tüg'óciy tijaty jibic-huinma'ñ. ²⁰ Per miich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy

Cristo ytiy'ajt, ²¹ pen janch miich ajcxy ti mmidoogixy yi' y'ayuc, pen ti m'ixpijccixy je tiy'ajt huudibi yajpatp ma Cristo. ²² Ti miich ajcxy m'ixpiy co copicy m'ixmájtzcixipy yi jibic-huinma'ñ nej anajty mnijot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy müid je jibicpi huudibi anajty ajcxy mnijot'ajtcixyp, ci'm anajty mnayhuin'ünigixy. ²³ Ixmajtzcix jibicjot jibic-huinma'ñ. Pidaaccix mjot mhuinma'ñ co mguydunaangixy Cristo ytiy'ajt jemybi. ²⁴ Müid'ajtcix jemybi jot jemybi huinma'ñ com Dios ti yajtigajch huinjemy ajcxy mjot mhuinma'ñ müid tudägy'ajtin etz huädz'ajtin.

²⁵ Paady ycixp ca'huaad m'üindaaccixy, nidüg nidüg cápxcix huudibi janchip müid migügtijc, müid co quipxyjaty nyajpaatim ma Jesucristo.

²⁶ Pen miich ajcxy mmijotma'tpy yi mmigüg, ca' mmigüg migapxtigooygixy midundigooygixy, mic'amy ajcxy mjäydigóoygixipy yi mjotmädi yajijp ca'ni anajty xii ycidacyñi. ²⁷ Ca' mnayyéjicigixy ma je mujcu' co je mujcu' xymimadägiy.

²⁸ Yi jäy ajcxy huudibi meetzcixp, huen ixmajtzcixy meedzii, etz ijxtähuipy ytung. Co ytunipy ma ci'mdung jëbi pubedipy ajcxy ymigügtijc huudibi yajmayajtcixp tijaty.

²⁹ Ca' mgápxcixipy jibic ayuc. Cápxcix oy ayuc huudibi jëbi migüg ajcxy jäygidaaccixy, huudibi pubejtp etz yajyeegy je mibijcin, huudibi yejcp oy'ajtin ma pin ajcxy amido'ijtp. ³⁰ Ca' huaad mgapxcixy mmiydaaccixy ayuc huudibi yajjotmaybijcp je Espíritu Santo huudibi Dios yjë'ajtpy. Je Espíritu Santo huudibi miich ajcxy müid ma mjot mhuinma'ñ, yi' je' huudibi tiy'ajt yejcp co miich ajcxy Dios yjäy'ájtigixy, co anajty Cristo ymiñ ya naaxhuñ jadüg'oc huin'it mbadaangixy jugy'ajtin etz tzinaayin huudibi ca' ycixipy ytigoyipy ni mina.

³¹ Yajqueeccix yi jibicpi ma ajcxy mjot mhuinma'ñ, jadu'n nej co mjot mhuinma'ñ ta'm mjihuüygixy, jadu'n nej co tzojc mjotma'tcootcixy, jadu'n nej co mnaymijotmä'tigixy, jadu'n nej co mnayhuin'ójiigixy nayijp'ójiigixy. Ca' huaad mmigüg mnigapxcixy mni'ojüygixy. Ca' jibicpi mnijot'ajt'adütcixy müid ajcxy mmigüg ycixpi. ³² Hue' janchtiy oybi mhuinmáaygixipy müid mmigüg ajcxy ycixpi. Nayba'ayóohuigixy nidüg nidüg. Nayméecxigix nidüg nidüg. Com nañ jadu'n Dios ti huinmecxy miich ajcxy mbocy müid co myajpatcixy ma Cristo.

5

Nej jëbi chinaaygixy yi Dios yjäy ajcxy

¹ Com miich ajcxy ñipatpy nejjihuüy Dios y'ung'ájtigixy, e Dios ooy xychojccixy xyjihüüygixy, paady copicy naychójcigixy nayjihüüygixy miñ xyipy, jadu'n nej Dios ti xychojccixy ti xyjihüüygixy. ² Jabom jabom ma mdzinaayin naychójcigix nayjihüüygix nidüg nidüg, tim jadu'n nej Cristo xychojcin xyjihüüyim, e yjugy'ajt yejcy müid ajt nbocy ycixpi, e jadu'n Dios jäygidacy nej Cristo ytuñ.

³ Müid co miich ajcxy Dios xyjäy'ájtigixy, paady tzinaaygixy müid huädz mjot mhuinma'ñ. Ca' huaad m'oc'üibáatcixyñi m'occapxpáatcixyñi yi töxyjäy migapxtigoyii, etz yi jibic ayuc capxi, yi jibic-huinma'ñ nijot'adi etz yi meeñ adzogi. ⁴ Müid co mDios miich ajcxy xyjäy'ajtp, paady ycixp ca' huaad mgápxcixipy ayuc huudibi tzo'ydu'ñ yejc, ni ca' huaad mgápxcixipy huudi ca' y'oyjäygidaacnity, etz ni ca' huaad mguxiiccixy m'anüdaaccixy, com yi jibic ayuc ca' Dios jäygidägy. Tzoc yajnaxim jäygidacin ma Dios com Dios ti xyajhuaatzim ajt njot nhuinma'ñ. ⁵ Janch tiy'ajt jada co pinjaty tundigooyb

müid huingbi töxyjäy, pinjaty jibic-huinma'ñ müid, ca' ajcxy padaangixy pidägy etz oy'ajtin ma Cristo etz ma Dios y'ane'min. Pinjaty meen adzojcp, Dios ca' tzocy, tim jadu'n nej yi' ca' tzocy pinjaty ojadaajtp tzaadzech etz quipychech. ⁶ Ca' mnayyéjcgixy co jäy ajcxy xyhuin'ingixipy müid ayuc huidibi ca' ytiy'ajtity ca'p choubaad. Müid co jäy ajcxy capxcixy ayuc huidibi ca' ytiy'ajtity, paady ycixpi Dios tzaachytuna'ñ tüg'óciy jäy ajcxy huidibi capxycömidodacp yi' y'ayuc. ⁷ Ca' huaad miich ajcxy mnaymüg'ájtigixy, ca' müid mnayyöymújcgixy yi' jadu'mbi jäy ajcxy huidibi ca' capxymidoogixy Dios.

⁸ Jayjip ca'ni anajty mmibijccixy Cristo, ca'ni anajty Cristo ytiy'ajt ajcxy mnejhuüy, e jadu'n nipaady anajty nej jihuüy myajpaady ajcxy agootztuum. Jadachambi mnejhuüygyxyp Cristo ytiy'ajt, e jadu'n nipaady nejjihuüy mdzinaaygixy ma tüg tñcxin. Paady ycixp jatyim cuydungixyp Cristo ytiy'ajt ma yi' mdzinaayin mjogy'ajtin ajcxy, jadu'n nej jebi huaad quëxigy co mmibijccixy Cristo. ⁹ Co nmüid'ajtim Cristo ytiy'ajt, chi nduunim huidibi y'oyip, huidibi tudägyip, huidibi tiy'ajtip. ¹⁰ Ixpjccix je tiy'ajt huidibi Dios yjäygidacpy. ¹¹ Ca' miich ajcxy mnaymüg'ájtigixy müid yi' jäy ajcxy huidibi yajpatcixp agootztuum, huidibi tungixy huidibi Dios ca' jäygidägy. Miich ajcxy capxhuicix müid Dios ytiy'ajt yi' ajcxy huidibi agootztuum tzinaayb. ¹² Tzo'yduunim ajt co jay nigapxcixy nimydaaccixy je jibicpi huidibi ajcxy ytumyb ayüch ameech. ¹³ Co n'ixquipxim yi' jadu'mbi jäy ajcxy ayuc müid Dios y'ayuc, chi niguëxigy pen janch tiy'ajt o pen ca' ytiy'ajtity, jadu'n nipaady nej ti nyajpidzimim je ajcxy ayuc ma yi' agootztuum, etz nbidaacim ma yi' tñcxin. ¹⁴ Paady ycixpi Dios y'ayuc jadu'n yminañ:

Mäyhuijip miich ajcxy huidibi jadu'n nipatp nejjihuüy mdzachmaagixyp. Juyypjccix miich ajcxy huidibi jadu'n nipaady nejjihuüy ti m'öccixy. Cristo xycodñcxcixipy müid yi' ytiy'ajt.

¹⁵ Paady naygüend'ájtigixy huidibi tiy'ajt yajtungixp ma yi' chinaayin. Tzinaaygix jadu'n nejjihuüy mnejhuüygyxyp Cristo ytiy'ajt, e ca' mdzinaaygixy jadu'n nej huidibi ajcxy ca' nejjihuüygyxyp Cristo ytiy'ajt. ¹⁶ Ni'ix'ijtcix jabom jabom jebi mguydungixy Cristo ytiy'ajt. Jadachambi xii tiempo mayjäy ytundigooygixy müid Cristo ytiy'ajt. ¹⁷ Ca' loci huinma'ñ myajtungixy, per nejhuygyxyp nej Dios tzocy co mdúngixipy. ¹⁸ Ca' huaad m'ijtcixy amügy jäy, com yi' jocni xyajñcxcixipy ayo'nduum. Nigi oy m'ijtcixy Dios yjihu'iñ ymic'ajt may'amy ma ajcxy mjot mhuinma'ñ. ¹⁹ Naymügápxigixy miñ xyipy müid yi' salmo ayuc, müid yi' himnos. Huin'ügix Dios müid je iy' huidibi je Espíritu Santo xymooygixyp. Huin'ügix etz ojadaajtcix Dios cixyjot huinijot. ²⁰ Jatyim yajnajxcixy jabom jabom jäygidaacin ma ajt nDios Teedy ma ajt nHuindzin Jesús yxii, müid tüg'óciy ycixpi nej ndunim n'ayoohuim.

Nej huaad chinaaygixy pinjaty picychinaaygixy

²¹ Müid co miich ajcxy mhuindzigiy Dios, paady ycixp miich ajcxy mnayyajmij'ájtigixy mnaygapxymidóohuigixy miñ xyipy.

²² Miich ajcxy töxyjäydijc yajmij'ajtcix capxymidoogix yi' mñäy ajcxy, tim jadu'n nej myajmij'ajtcixy mgapxymidoogixy ajt nHuindzin Jesucristo.

²³ Com je töxyjäy ñäy nigohuajc'ajtp ma ytöxyijc ymiñ, tim jadu'n nej Cristo nigohuajc'aty ma yi' mibijcpidijc ymiñ. Yi' Cristo yi'je' huidibi nihuänamb yajnödögamb yi' mibijcpidijc. ²⁴ Tim jadu'n nej yi' mibijcpidijc capxymidoogixy Cristo, nañ tim jadu'n tzocy co je töxyjäy ajcxy capxymidóogixipy yi' ñäy ajcxy.

²⁵ Nañ jadu'n tzocy co je yëydijc huen tzocy jihuüy ytöxyijc, tim jadu'n nej Cristo tzocy jihuüy yi' mibijcpidijc, e paady ycixp yejc yi' yjogy'ajtin müid yi'

ajcxy ycixpi. ²⁶ Cristo yejc yjugy'ajtín m̄id je m̄ibijcp̄idijc ycixpi, jigix jēbi huinmecxy ajcxy ypocy, yajhuaatzip ajcxy yjot yhuinma'ñ. Cristo yajhuaatzí yí m̄ibijcp̄idijc ajcxy yjot yhuinma'ñ m̄id yí'y'ayuc etz co n̄ibejt ajcxy m̄id n̄i. ²⁷ Jadu'n Cristo yajhuäch yí m̄ibijcp̄idijc ajcxy yjot yhuinma'ñ, jigix jēbi ajcxy nayguëx̄iḡiib ma yí' yhuinduu m̄id huädz yjot yhuinma'ñ. Je m̄ibijcp̄idijc ajcxy nipaady nej t̄üg n̄jen huídibi huädzip, ca' ma ytijy ymächity. ²⁸ Jadu'n tzocy co je yēydijc huen tzocy jihuiy ytōxyjc t̄im jadu'n nej c̄i'm naychogyii. Yí yēydijc huídibi tzojcp̄ jihuiyb ytōxyjc nañ jadu'n c̄i'm ñaychogyii. ²⁹ Ca' ji ni p̄in huídibi ca' ñaychogyii c̄i'm. Hue' jancht̄iy ycuend'ajtpy etz yajcūxyii yajpedyii yci'm nin̄icx, t̄im jadu'n nej jāy ajcxy cuend'ajtcixy yci'm ñin̄icx nañ t̄im jadu'n Cristo ycuend'ajtpy yí m̄ibijcp̄idijc. ³⁰ Jadu'n Cristo cuend'ajtpy yí' yjāy, com jadu'n ajcxy nipaady nej yí' ñin̄icx. ³¹ Com cop̄icy je yēydijc tzoḡip jihuihuip ytōxyjc jadu'n nej Cristo tzocy jihuiy yí m̄ibijcp̄idijc. Paady ycixp je yēydijc ixmadzipy ytaj yteedy, e ypudiḡihuipy ytōxyjc, e jadu'n ajcxy chin̄ahuipy nej jihuiy yt̄ügpajcity. ³² Ooy chachm̄ijhuinma'ñity jada t̄iy'ajt huídibi yüch anajty ijtp, e yí' ñich jadu'n tijpy yí Cristo etz je m̄ibijcp̄idijc. ³³ Cuend̄ip̄ic̄cix jada t̄iy'ajt co nidüg nidüg miich yēydijc̄ijc ajcxy huídibi p̄ijccixp cop̄icy mdzogipy mjihuipy ajcxy mdōxyjc, t̄im jadu'n nej c̄i'm ajcxy mnaychogyii, e nañ jadu'n cop̄icy co nidüg nidüg tōxyjāydijc yajm̄ij'adipy ñāy.

6

¹ Pi'ct̄ijc ajcxy huídibi m̄ibijcp̄ Jesucristo, cop̄icy mgapxym̄idoohuipy ajcxy mdaj mdeedy, com t̄iy'ajt jadu'n. ² Yí Dios ycōt̄ujc̄in huídibi m̄inaamb: “Yajm̄ij'ajtcix mdaj mdeedy”, yí' ooy ytimycop̄icyity. Nañ jadu'n co nguyduunim jada cōt̄ujc̄in, huin'it Dios jecy xyajtzinaayim. ³ Co miich ajcxy jadu'n myajm̄ij'adipy mdaj mdeedy, huin'it Dios xymōhuipy ajcxy jotcujc'ajt̄in, e nañ jadu'n xyajtzinaayiḡixipy jecy ya naaxhuiñ.

⁴ E miich ajcxy huídibi ungedeedy'ajtcixp, ca' nigoo myajjotma'tcotcixy yí m'ung ajcxy. Ane'mgix yajyeccix yí m'ung ajcxy m̄id Dios y'ayuc ytiy'ajt, jaydēbi capxym̄idōogixipy ajcxy Dios.

⁵ Miich ajcxy huídibi tumbi'ajtp ya naaxhuiñ, capxym̄idoogix yí mhuindz̄in ajcxy, etz tungix m̄id tudāgy'ajt̄in, etz yajm̄ij'ajtcix etz tziḡiiḡix. T̄im jadu'n nej jihuiy mgapxym̄idoogixy yí mHuindz̄in Jesucristo.

⁶ Tungix yajxon m̄id ajcxy mhuindz̄in. Ca' janch xypaat oy mic̄ mduungixy co ajcxy mhuindz̄in jim xyhuind̄ic̄cixy, e chi co je' yjihuäc̄ni, chi nigoo mhuäccixni mdinaayixni. Tungix jadu'n nej huaad jāy ytuungixy yí huídibi mijp̄idaaccixp Jesucristo. Tungix cixyjt̄ huin̄ijot jadu'n nej Dios tzocy mdungixipy.

⁷ Tumb̄idijc ajcxy, tungix mdung cixyjt̄ huin̄ijot, t̄im jadu'n nej jihuiy mdungixy je Huindz̄in Jesucristo ytung, e ca' yjāydungity. ⁸ Mnejhuib̄i miich ajcxy co ajt̄ nHuindz̄in Jesucristo oybi mōhua'ñ nidüg nidüg jadu'n nej t̄i ytuuñ, ca' ñejity pen yci'mdung ytumyb, o pen ytumb̄ m̄id t̄üg huindz̄in.

⁹ Miich ajcxy huídibi nihuindz̄in'ajtp tumb̄idijc, oy'amy ane'mgix mdumbi ajcxy. Ca'm'adz̄iḡiiḡixipy ca' mdzaacht̄ungixipy. Ajihūiyiḡixy co miich ajcxy etz nañ jadu'n mdumbi ajcxy m̄id ajcxy mHuindz̄in tzajpjoty, e yí mHuindz̄in tzajpjotypi quipxyjaty t̄iyduna'ñ nidüg'óc̄iy miich ajcxy.

Je mic'ajt huídibi je m̄ibijcp̄idijc ajcxy ypatcixyp m̄id Dios yjihuiñ

¹⁰ Jadügnax, migügt̄ijc ajcxy, yí mmic'ajt mbaadip ajcxy ma ajt̄ nHuindz̄in Jesucristo. Com Jesucristo ooy mic'ajt m̄idity, paady jēbi miich ajcxy mbatcixy yí mmic'ajt̄in ma yí'. ¹¹ Naygohuaaniḡixy miich ajcxy ma je mujcu' m̄id

tüg'óciy tìy'ajt huidibi Dios xymooyim, huidi miid naygohuaanim ma je mujcu', e jadu'n ca'ydi je mujcu' xymimadaacim miid anii. Jadu'n Dios ytìy'ajt nipaady nej tujt etz pujxnijen huidibi soldados ajcxy miid naygohuaangixy tzipjoty. ¹² Hue' janchtiy xymidzip'ajtim poj naaxhuiñ, ca'oybi, mujcu'dijc, etz tüg'óciy mic'ajt miidpi huidibi midzip'ajtp Dios ya naaxhuiñ etz jilby tzajpjoty, ca'p ñch ajt nmidzip'ajtim naaxhuiñjáy. ¹³ Paady ycixp yajtúngixy tüg'óciy mic'ajt etz tìy'ajt huidibi Dios ti xymooygixy, jigix jëbi mmimadaaccixy je ca'oybi co anajty xyajtundigoyaangixy. E jadu'n jëbi mimadaaccixy je ca'oybi miid ajcxy mmibijcin. E co anajty ti mmimadactaaygixy, huiñ'it m'ijtciixipy mic ma ajcxy mmibijcin. ¹⁴ Ca' m'ixtigihuáccix ma ajcxy yi mmibijcin. Nayñi'ixiiygix miid Dios ytìy'ajt, jadu'n nej jáy ajcxy ñayhuñndädzigixy co ytunaangixy. Nayñi'ixiiygix tim jadu'n nej soldados ajcxy ñayñi'ixiiygixy miid pujx nijen ma caach co chiptunaangixy. ¹⁵ Nayñi'ixiiygix miid Dios y'ayuc, jigix jëbi ajcxy nicxy mgapxhuäcxí Dios y'ayuc huidibi jotcujc'ajtin yejcp. Co jadu'n mdúngixipy, jadu'n nibaadip tim jadu'n nej soldados ajcxy ñayñi'ixiiygixy co yajtigiiygixy yzapato co ytüyöyaangixy. ¹⁶ Yi' huidibi jac copicyip ca'ydi jac ni ti, mibijccix tiydudägy Jesucristo. Miid ajcxy yi mmibijcin jëbi mnaygohuáangixy ma je mujcu'. Miich ajcxy mmibijcin jadu'n nipaady nej tüg escudo huidibi je soldados ajcxy yajtumyb co ñaygohuáangixy ma je tip huidibi yajnajtztübyb miidi jün. ¹⁷ Nayñi'ixiiygix miid Cristo ytìy'ajt huidibi miid ajcxy m'alma xyajnidzoocip, tim jadu'n nipaady nej soldados ajcxy ñaygohuáangixy co pidaaccixy ypujx cöjup co chiptunaangixy. Naygohuáangixy miich ajcxy miid Dios y'ayuc huidibi jadu'n nipatp nej tüg espada huidibi je Espíritu Santo ti xymooygixy. ¹⁸ Mibijctzoogix Dios miid tüg'óciy ycixpi huidibi ajcxy mdumyb. Mibijctzoogix etz pijctzoogix may'ajt ma Dios jabom jabom miid je Espíritu Santo ypubejtin. Huijy ycujc m'ijtciixipy, ca' mjetmetzciiygixipy. Mibijctzoogix Dios miid tüg'óciy mibijcpidijc ajcxy ycixpi. ¹⁹ Nañ jadu'n mibijctzoogix Dios miid ñch ycixpi, co huen xymöyich ayuc etz jotcujc'ajtin, jigix jëbi ngapxhuäcxibich huiñmic jotmic yi' y'ayuc ytìy'ajt huidibi ca' pin jecy'ajty nejhuüygixy. ²⁰ Dios ti xyajñibicyich jada tung jëbi nyajnicxyich yi' y'ayuc ytìy'ajt ma je mayjáy ajcxy. Paady ycixp nyajpaadyich pujxtigoty cham. Tungix may'ajt mibijctzoogix Dios miid ñch ycixpi co xyajjotmicpiigipyich jigix jëbi ngapxhuäcxych yi' y'ayuc huiñmic jotmic.

Capxpooxin huidibi cogixiiyñip

²¹ Ooy ndzocy njihuüyich je Tíquico, nañ jadu'n yi' ooy xypubejtyich ma ajt nHuindzin Jesucristo ytung. Yi Tíquico miich ajcxy xyajmídmíydägipy tüg'óciy je tìy'ajt nej nyajpaadyich ya, etz tüg'óciy tung huidibi ya ndumybich.

²² Nguexaamybich Tíquico ma miich ajcxy jigix jëbi xymídmíydägipy ajcxy jadu'n nej nyajpaadyich ya, e miid jada tìy'ajt jëbi miich ajcxy mjetcugiiygixy.

²³ Huen Dios Teedy etz ajt nHuindzin Jesucristo may'ajt tunipy miid miich ajcxy, jigix jëbi jotcujc mdzinaaygixy, etz nañ jadu'n jëbi mnaychójcigixy mnayjihüüygixy miñ xyipy, etz jigix jëbi mjacmibijccixy Cristo. ²⁴ Huen Dios may'ajt oy'ajt tunipy miid miich ajcxy huidibi yajmij'ajtcixp ajt nHuindzin Jesucristo huiñixi huiñitiempo. E ca' m'ixmájtzcixip nimina nej ajcxy mijpidaaccixy Jesucristo. Jadu'n jada. Amén.

FILIPENSES

Yi Necy Huidibi San Pablo Yajnigüeje Je Mibijcpidije Jim Filipos

¹ Ich Pablo müd Timoteo tumbich ma Jesucristo ytung. Jada necy ich ajcxy nguejxpy ma tüg'óciy huidibi mibijcp Dios jim Filipos huidibi yajpaatp ma Jesucristo. Nañ jadu'n jada necy nyajnigüexyich yi' ajcxy migtungmüdpí etz mutztungmüdpí ma Dios ytung. ² Huen ich ajt nDios Teedy etz ajt nHuindzin Jesucristo may'ajt etz oy'ajt tunipy müd miich ajcxy ycixpi etz xyajjotcugíyigixipy.

Pablo mibijctzoy Dios müd je mibijcpidije ycixpi

³ Naag'oc naag'oc njäymeich miich ajcxy njatytimyajnaxpyich jäygidacín ma Dios müd miich ajcxy ycixpi. ⁴ Njatytimjotcuje'ajtpich ooy naag'oc naag'oc Dios nmibijctzooyich müd miich ajcxy ycixpi. ⁵ Jotcuje'ajtpich com miich ajcxy ti xypubéjtcixyich co ngapxhuäcxich Jesucristo y'ayuc ytiy'ajt. Jadu'n ti xypubéjtcixyich maabi nyajtzondägyich ngapxhuäcxych Jesucristo y'ayuc ixti chambaad. ⁶ Nejhuüybich tüydudägy co Dios ti yajtzondägy yi oybi ytung ma miich ajcxy mjot mhuinma'ñ, etz jactunaamni ma miich ajcxy mjot mhuinma'ñ ixti mabaad Jesucristo anajty ymiiñ jadüg'oc ya naaxhuiñ müd y'ane'mín etz ymic'ajt. ⁷ Ooy ytudägyity co jadu'n jotcuje'ajtpich müd miich ajcxy ycixpi, com ooy ndzocy njihuüyich miich ajcxy. Dios may'ajt oy'ajt ti tuñ co ti xyajñibicyich jada tung, etz miich ajcxy myajpaady quipxy müd ich ma Dios ytung, müd co miich ajcxy xyjäymeich etz nañ xypubetyich ajcxy, huenma'amy ich nyajpaady, oy ixyipy pujxtigoty, oy ixyipy ma tungmüdpí yhuinduu co nnigapxpetyich Dios y'ayuc ytiy'ajt etz nañ nnigapxpetyich co yjanchity. ⁸ Dios ñejhuüyb jadu'n nej mijcajee ooy ndzocy njihuüyich miich ajcxy müd je tzojcin jihuüyin huidibi Jesucristo ti xymöyich. ⁹ Nmibijctzooybich Dios müd miich ajcxy ycixpi co xypubedipy ajcxy jigix jëbi nigi mdzogipy mjihuüipy migügtijc, etz jigix ajcxy nigi m'ixpigipy je tiy'ajt tudägypí, etz nañ nigi mhuinjihuüipy tüg'óciy nej Dios tzocy co nduunim. ¹⁰ Nañ nmibijctzooybich Dios müd miich ajcxy ycixpi jigix jëbi mnejhuüyigixipy, etz nañ jigix jëbi mhuin'íjxcixipy huidibi jac'oy mdúnggixipy. Co oy mdúnggixipy, huin'it jëbi mdzináaygixy müd huadz jot huadz huinma'ñ, e ca' ni ti jotmay miich anajty ajcxy mmüdiñ, co anajty je xii je tiempo paady co Jesús anajty miñ ya naaxhuiñ jadüg'oc müd y'ane'mín müd ymic'ajt. ¹¹ Dios nmibijctzooybich müd miich ajcxy ycixpi co ajcxy mbattähüip tüg'óciy oyjot oyhuinma'ñ, je oyjot oyhuinma'ñ huidibi Jesucristo tügpajc jëbi xymooygixy. E jadu'n jäy ajcxy capxpaadip Dios etz nañ huin'ígixip Dios co ajcxy ixipy nej tudägy mdzinaaygixy.

Müd ich, yi njugy'ajtich, yi' yi' Cristo

¹² Ndzocjpyich co miich ajcxy mnejhuüipy co müd je tzaachypí ycixpi huidibi nminaxyp nyajnaxypich ya pujxtigoty, nigi mayjäy ti midoy Jesús y'ayuc ytiy'ajt. ¹³ Jadu'n ti yhuimbizimy co tüg'óciy soldadtijc etz jacjadyii jäy ya ma je gobierno ymijtijc ti nejhuüydäy ajcxy co nbujxtijc'íñayich müd co nduunich ma Jesucristo ytung. ¹⁴ Nañ jadu'n müd co nbujxtijc'íñayich, paady ycixpi yi jacjadyii mibijcpidije ti yjotmicipijccixy ma ajt nHuindzin Jesucristo tung, etz ycapxhuäcx'y'adiichpy ajcxy Dios y'ayuc ytiy'ajt, ca' ma tzig'íñ jihu'íñ.

¹⁵ Janch t̄iy'ajt jada co nij̄j̄ity jāy capxhuäcxy je Cristo y'ayuc yt̄iy'ajt m̄id co ca' xyajmidzojccixy, etz nañ m̄id co xyajmidzip'ajtcixy. Nañ t̄iy'ajt jada co jacjadyii migügt̄ijc xychojcp xyjihuiyb ajcxy, e capxhuäcxy ajcxy je Cristo y'ayuc yt̄iy'ajt m̄id oyjot oyhuinma'ñ. ¹⁶ Janch t̄iy'ajt co nij̄j̄ity migügt̄ijc capxhuäcxcixy Jesucristo y'ayuc m̄id co ñaygömaya'ñyii ci'm, ca' nminaanim ycapxhuäcxp ajcxy cixyjot huinijot. Yi' ajcxy y'ixtaayb nej xyajtaj̄ipy xyajmaȳipyich, jadu'n nej ñich pujxtigoty n'ityich. ¹⁷ Yi' ajcxy huidibi xychojcpich xyjihuiybich ycapxhuäcxpy ajcxy Cristo y'ayuc com ñejhuuiyb ajcxy co ñich yam n'ityich pujxtigoty, m̄id co ti nhuinma'ñ nbidägyich co nn̄igapxpeda'ñich Jesucristo y'ayuc yt̄iy'ajt. ¹⁸ Pen jāy ajcxy capxhuäcxp Cristo y'ayuc m̄id co ñaygömaya'anigixy ci'm, o pen ycapxhuäcxp m̄id oyjot oyhuinma'ñ, ca' ñej̄ity, jotcuje'ajtpich co capxhuäcxy ajcxy Jesucristo y'ayuc.

¹⁹ Com nnejhuuiybich co miich ajcxy mm̄ib̄ijctzoogixy Dios m̄id ñich ycixpi, e nañ nnejhuuiybich co Jesucristo yjihui'ñ ymic'ajt xypubetyich, paady ñigi njotcuḡiyich, e nañ nj̄jp'ijxypich co nbidzima'ñich pujxtigoty. ²⁰ Ndzojcpyich etz nañ nj̄jp'ijxpyich co nm̄imadactähua'ñich t̄üg'óciy ma ñich mdzinaayin, e ca' ti tzöydu'n nbáadibich ma Dios yhuinduu. Ndzojcpyich nañ nj̄jp'ijxpyich co njaccapxhuäcxibich Jesucristo y'ayuc huinmic jotmic, jigix Jesucristo ycōmay'idipy. Ca' ñej̄ity pen jactzinaayb, o pen n'o'cpich. ²¹ ñich ndzinaayin njuugy'ajtin Cristo yi' ycixpi, e peni n'o'cpich, ti ñich anajty mij nmadägy. ²² Pen njactzinaaybich, mayjāy oybi pada'ñ m̄id ñich ndung ycixpi. Ca' nnejhuuiybich huidibi jac'oy nhuin'ixipyich co tzojc n'ögibich, o co njactzinähuibich. ²³ Ooy chachchipity nnejhuuiybich huidibi jac'oy nhuin'ixipyich, co n'ögibyich, o co njactzinähuibyich. ñich ci'm nayjihuiyijich ñigi jotcuje co ixypy tzojc n'ögyich, jigix ixypy mic'amy nicxy n'ityich j̄iby tzajpjoty ma Cristo yajpaady. ²⁴ Per jaccopity m̄id miich ajcxy m'oy'ajtin ycixpi, co njactzinähuibich. ²⁵ Com nnejhuuiybich co copicy njacpubeda'ñich miich ajcxy, paady nnejhuuiybich co njactzinähuibich, e jigix j̄ebi nbubejtcixy ma Dios ytung etz ma yi mm̄ib̄ijcin. E jadu'n miich ajcxy ñigi mjotcuje'adipy ma mm̄ib̄ijcin. ²⁶ Miich ajcxy huidibi yajpaatp ma Jesucristo, ñigi jotcuje m'idipy co nicxy n'ida'ñich jadüg'oc ma miich ajcxy.

²⁷ J̄eyi jancht̄iy co mdzinaayin mjugy'ajtin mi'ijtcixy jadu'n nej Cristo y'ayuc yt̄iy'ajt y'ane'my. Pen nicxp̄ich anajty ci'm ma miich ajcxy, o pen ca' nn̄icxyich, per ndzojcp̄ich co xypáadibich t̄iy'ajt co miich mic m'ijtcixy ma mm̄ib̄ijcin, tú'ciy cixyjot huinijot mdungixy. Mic mjanchmidinaaygixy ni'amugi' yi mm̄ib̄ijcin, jadu'n nej ti mm̄ijp̄idaaccixy Jesucristo yt̄iy'ajt, ²⁸ e ca'ajcxy mdziḡihui co jāy ajcxy xym̄idziptzóngixipy, jada je' t̄iy'ajt co t̄igoyamb ajcxy y'alma, e nañ jada je' t̄iy'ajt co miich ajcxy chóocixipy yi m'alma, e nañ jadu'n jada t̄iy'ajtip co Dios y'ity m̄id miich ajcxy. ²⁹ Dios may'ajt oy'ajt ti tuñ m̄id miich ajcxy ycixpi co yaj'oȳy nej j̄ebi miich ajcxy m̄ib̄ijccixy Jesucristo etz nañ nej j̄ebi tzaachyp̄i m̄inajxcixy myajnajxcixy m̄id Jesucristo ycixpi. ³⁰ ñich etz miich ajcxy quipxyi ti n̄inajxim ti nyajnajxim tung ayo'n m̄id Jesucristo ycixpi. Miich ajcxy ti m'ixy ti mnejhuuiy jadu'n nej ñich ndung n'ayo'n ti n̄inaxy ti nyajnaxyich, co jim anajty n'ityich ma miich ajcxy. E nañ miich ajcxy mnejhuuiyb nej ñich chambaad n̄inaxy nyajnaxyich ndung n'ayo'nich m̄id Cristo ycixpi.

2

Cristo yung'ajt ñax'ajt etz ymij'ajt

¹ Pen Cristo miich ajcxy mjet'amijmooyb mïd yjihu'iñ mïd ymic'ajt, pen ti jotcuyc'ajtin mbatcixy mïd co Cristo xychojccixy xyjihu'iygixy, pen y'i yjihu'iñ ymic'ajt ijtp ma miich ajcxy, pen mdzojccixyp mjihu'iygixyp etz nañ mba'ayoogixy migügtijc, ² jotcuyc'adipich mïd co mdzinaaygixy ooy yajxon, xic xon, tügyi mnaychójcigixy mnayjihu'iygixy miñ xyipy, tzinaaygixy quipxyjot quipxyhuinma'ñ. ³ Ca' ajcxy ti mdunipy mïd mg'i'ndzojcin ycixpi. Nañ ni ca' amij agix naybidáacigixy co ti mdungixy. Tüg'óciy huidibi mdungixyp, mdunipy ajcxy mïd yung naxy mjet mhuinma'ñ. Nidüg nidüg myajmij'adipy nig'i migügtijc, ca'ydi nej miich ci'm mnayyajmij'adyii. ⁴ Ca' huaad pin naydügpajc yci'm'oy'ajt ixtäy, nañ jadu'n tzocy co migügtijc myajmidzogipy y'oy'ajt.

⁵ Pidaaccix mjet mhuinma'ñ tú'ciy jadu'n nej Jesucristo anajty yhuinma'ñ mïdity co ya naaxhuiñ chinay. ⁶ Oy Jesucristo yjaDiosity ti yhuinma'ñpidägy co jëbi ixmach y'i ymij'ajtin huidibi anajty yjamïd. ⁷ Jesucristo ahuingujc pidaactay je mij'ajt huidibi anajty ymïd, e chi jadu'n chinay nej tüg tumbi co oy jadu'n ypi'c'aty jadu'n nej jäy. ⁸ E co jadu'n ñaybidaaci nej naaxhuiñjäy, chi yung naxy pidacy yjot yhuinma'ñ, e nañ capxymidooy Dios ixti mibaad ñayejci, huen jäy yaj'ögyii. E ooy anajty cho'ydu'nity co jäy yaj'o'ci cruudzáxy. ⁹ Paady ycixp Dios ti cömay jacnigi Jesucristo, e ti pidäci y'i yxi jaccömay, ca'ydi jacpinjäy yxi. ¹⁰ Jadu'n Dios ti cömay Jesús, jigix jëbi tüg'óciy tzajpjoty tzinaaybi etz tüg'óciy naaxhuiñjäy, etz tüg'óciy jäy ajcxy huidibi ti ñaaxtigiy, co anajty ajcxy nidüg'óciy midoogixy co Dios capxpaatip Jesús yxi, chi ycojxtinaay'ihu'ydähuipy ajcxy ma y'i yhuinduu, etz y'ojadadipy ajcxy Jesús nidüg'óciy. ¹¹ E co nidüg'óciy ajcxy cöbigipy etz yajmij'adipy Jesucristo jadu'n nej ajcxy yHuindzin, jadu'n Dios Teedy ycömay'ida'ñ.

Yi pin ajcxy Cristo mibijcp, y'i y'i ajcxy jadu'n nej tüg tixcin jajin

¹² Migügtijc ajcxy huidibi ooy ndzocy njihu'iyich, com Jesucristo jadu'n ijxpejtin ti yecy, capxymidoogich cham co jigügy nyajpaadyich ma miich ajcxy, tim jadu'n nej jayhuin ich miich ajcxy xycapxymidooy co n'ijtyich ma miich ajcxy. Naymijottigóoyigix jabom jabom mguydungixy Jesucristo ytiy'ajt etz mmi'ijtcix huädz mjet huädz mhuinma'ñ. Tungix Dios ytung mïd yung naxy ajcxy mjet mhuinma'ñ, e huindziggygix Dios. ¹³ Com Dios y'i tumb jabom jabom ma miich ajcxy mjet mhuinma'ñ, jigix jëbi miich ajcxy mdunipy y'i ytung y'i chojcin cixyot huinjot jadu'n nej Dios tzocy.

¹⁴ Tungix cixyot huinjot Dios ytung, ca'y'aametzity yjotmetzity, nañ ni ca' mïd tzip ejcin. ¹⁵⁻¹⁶ Jadu'n mdunipy ajcxy ca'ydi pinjaty yxigixy co ti mdundigoogixy. Miich ajcxy Dios xy'ung'adiib, ca' mnigix'adiyb ajcxy ti jibicpi. Tzinaaygix mïd oyjot oyhuinma'ñ ma y'i jäy ajcxy yajpaady huidi jibic-huinma'ñ tumb huidibi tundigooyb ma Dios ytiy'ajt. Co miich ajcxy myajhuäcxy Dios y'ayuc ytiy'ajt huidibi alma yjogy'ajtin mooyb ma jibicjäydijc ajcxy, jadu'n nipaady nej tüg madzä ytixcy coodz. Pen jadu'n mdungixy, co anajty Cristo ymiñ jadüg'oc ya naaxhuiñ, jotcuyc'adipich co anajty nnejhu'iyich co ca' ich ndung etz nxi ndiempo yñadig'i'aty co n'ijtyich ma miich ajcxy. ¹⁷ Co n'ögibich mïd Cristo ytung ycixpi, jadu'n nipaady nejjihu'iy ich nni'py ti ndem ti nyocyich mïd miich ajcxy ycixpi co ti ngapx-huäcxich Dios y'ayuc ma miich ajcxy. E co miich ajcxy ti mmijpidaaccixy ich n'ayuc, jadu'n nipaady nejjihu'iy miich ajcxy ti myoxy ti mdoogy y'i mjogy'ajtin ma Jesucristo. Jotcuyc'ajtpich jadu'n co miich ajcxy mjogy'ajtin ti myoxy ti mdoogy ma Jesucristo. ¹⁸ Nañ jadu'n miich ajcxy mjetcuyc'adipy quipxy mïd ich.

Timoteo etz Epafrodito

¹⁹ Pen ñich ajt nHuindzin Jesús tzojczy, njjyp'ijxypich co jëbi nguexipyich Timoteo ma miich ajcxy, jaydëbi njotcuje'adipyich co anajty yí' xyajnimiiñich tiy'ajt nej miich ajcxy myajpaady. ²⁰ Timoteo tügpaic huídibi huinma'ñ tú'ciy mïd jadu'n nej ñich nhuinma'ñ nmïdidyich, etz nañ huídibi janch naybidaacip mïd miich ajcxy m'oy'ajtin ycixpi. ²¹ Yi jacjadyii migügtijc huídibi yajpatp ma ñich, yajcopijczy ajcxy yci'm'oy'ajtin, e ca' ajcxy yajcopicy Jesucristo ytung. ²² Miich ajcxy mnejhuñyb jadu'n nej Timoteo tudägy ytuñ mïd ñich co ngapxhuäcxyich Jesucristo y'ayuc ma miich ajcxy, tim jadu'n nej tüg ung ytuñ mïd yteedy. ²³ Paady ycixp njjyp'ijxypich co jëbi nguexyich Timoteo ma miich ajcxy mina anajty nnejhuñyich nej ycixipy ñich njotmay huídibi nmïdich ya. ²⁴ Nañ nmibijcypich ajt nHuindzin Jesucristo co yaj'ahuädzip ñich nnñ'a ndü'a co jëbi ñich ci'm ñicxy tzojc n'ixyich miich ajcxy.

²⁵ Nañ jadu'n nhuinmaayich co copicy jadüg'oc nguexipyich ajt nmigüg Epafrodito ma miich ajcxy, yí' huídibi xypubejtpich ma ndung n'ayo'nich ya. Yi' huídibi miich ajcxy ti mguexy ma ñich, jëbi xypubetyich ma tüg'óciy huídijaty nyajmayajtypich. ²⁶ Epafrodito ooy nijot'aty co jëbi ñicxy y'ixaangixy miich ajcxy nidüg'óciy. Ooy yí' ytajy ymaay co miich ajcxy ti mnejhuñy co ypygyii. ²⁷ Janch tiy'ajt co Epafrodito ooy ti ypygyii, jago jago ti yca'ögy. Per Dios ti pa'ayoy Epafrodito, e nañ jadu'n ti xypa'ayooyich, jigix ca'ydi ñigi ayo'n jotmay nbaadyich. ²⁸ Paady ycixp ñigi ndzocyich co jëbi nguexipyich Epafrodito ma miich ajcxy jadüg'oc, jigix miich ajcxy mjotcugihup co m'ixipy. E nañ jadu'n jëbi yquëgy ñich ndajin mayin mïd yí' ycixpi. ²⁹ Cöbijccix Epafrodito jotcuje, jadu'n nej tüg migüg huídibi yajpaatp ma ajt nHuindzin Jesús. Yajmij'ajtcix tüg'óciy migügtijc huídibi yjugy'ajtin yojxp toocp mïd Jesucristo ytung ycixpi, jadu'n nej yí' ti ytuñ. ³⁰ Com jago jago Epafrodito ti yca'ögy mïd Cristo ytung ycixpi. Tzip tzaach yjugy'ajtin ti minaxy ti yajnaxy co ti xypubetyich ya. Com miich ajcxy ca' ci'm jëbi xypubéjtcixyich ya, paady yí' miich ajcxy ti xycodinäy.

3

Je tudägy'ajt je janchypí

¹ Jadügnax, migügtijc ajcxy, jotcuje'ajtcix co myajpatcixy ma ajt nHuindzin Jesucristo. Ca' ti adzjpin njihuñyich co nnëgapxpetyich jada tiy'ajt jadüg'oc huídibi jayhuin ti nyajnijayiygixy. Jadu'n nduñich mïd miich ajcxy m'oy'ajtin ycixpi. ² Naygüendi'ajtigix mïd yí' ajcxy y'ayuc huídibi ajcxy tundigooyb co ajcxy yajcopijczy yí' tiy'ajt huídibi pidacp ma jäy ñinïcx mïd tzujc. Jibic jäy yí' ajcxy, jadu'n ajcxy nipaady nej uc. ³ Yi jäy ajcxy huídibi tiydudägy mibijcp Dios, ca' nmïnaanim je' yí' ajcxy huídibi tiy'ajttiyip ñinïcx. Yi Dios yjäy ajcxy janchypí, yí' ajcxy cixyjot huinijot mibijcp mijpidacp Dios ytiy'ajt jadu'n nej ñich ajt. ñich ajt n'ojadajtim Dios mïd ajt n'espíritu, etz mïd ajt njot nhuinma'ñ. Jotcuje'ajtim com je' co nyajpaatim ma Cristo Jesús, e ca' nyajcopijcim tijaty tiy'ajt huídibi jäy ajcxy ytumyb. ⁴ Co ixypy ytiy'ajtiy yí' jadu'mbi huinma'ñ, jëbi ixypy naygömayijich ci'm, com jecy'ajty ca' anajty ni pin huídibi ñigi cuyduun yí' jadu'mbi tiy'ajt ca'ydi ñich. ⁵ Co nductujcxijiyich ma anajty ti nma'xung'atyich, chi oy nyajtiy'ajttiyich. Raza hebrea ñich, Benjamín nmij'ap'ajtpyich nmijteedy'ajtpyich. Nma'xung'ajtich hebreojäy. ñich ndaj ndeedy hebreojäy ajcxy anajty. Nañ nmijpidaacich fariseo y'ixpijin, jadu'n nej ajcxy yajnëguejy judíojäy ycötujcin. ⁶ ñich janchmictägy anajty nguyduñich ngi'mhuinma'ñich, ixti mabaad anajty n'ixhudity nbahudityich

mictägy yi jäy ajcxy huídibi anajty mijpidacp Jesucristo. Ti nguydundäyich tüg'óciy judíojäy ycötujcín. Ni pin ca' huaad yxíyich co ti ndundigooyich ma yi' ajcxy ycötujcín. ⁷ Tüg'óciy yi judíojäy yhuinma'ñ huídibi ti nyajcopicyich anajty, jadachambi ca' ytimychobaady mïd ñich, co ti nmijpidägyich Cristo ytiy'ajt. ⁸ Jadachambi janchtiy, huídijaty anajty nyajcopijcpiyich, ti nnajtz'ixíydäyich, jigix jëbi nnejhuíhuibich etz nguydunipich yajxon ajt nHuindzin Jesucristo oybi y'ayuc ytiy'ajt. Mïd co ti nmijpidägyich Jesucristo, paady nnajtz'ixíydaayich tüg'óciy huídibi anajty nyajcopijcpiyich, yi jadu'mbi huinma'ñ cham ca' chobaady mïd ñich, jadu'n nipaady nej püx. Jadu'n nduúñich mïd Jesucristo ytiy'ajt oy'ajt ycixpi. ⁹ E jadu'n nduúñich jigix jëbi nyajpaadyich ma Jesucristo. Jadu'n ti nnajtz'ixíydäyich je tudägy'ajtin huídibi ti nbaadyich co ti nguyduúñich Moisés ycötujcín je jecyip. Nañ jadu'n nduúñich jigix jëbi nbáadibich je tudägy'ajtin huídibi Dios yejcpy co nmibijcim nmijpidaacim Jesucristo. ¹⁰ Ndzojcpyich co njacnejhuíhuibich Cristo y'ayuc ytiy'ajt. Nañ ndzojcpyich co njacnejhuíhuibich Cristo ymic'ajt, jadu'n nej yjugypicy co y'o'cy. Nañ ndzojcpyich co njacminaxipyich njacyajnaxipyich tzaachypi jadu'n nej Jesús minaxy yajnaxy tzaachypi, ixti mabaad jadu'n njatyich jadu'n nej Cristo yajty co y'o'cy. ¹¹ E paady ycixpi njijp'ijxpyich co n'ögibich njugypigipyich jadüg'oc co anajty Dios yajjugypicy yi jäy ajcxy tiibi y'öccixy.

Naymic'ijxim jigix nbaatim huídibi Dios ti xyaj'ahuaníyim

¹² Ca' nminaanim jadu'n nmína'ñich co ti nmimadactäyich nej Cristo ti mimadactäy. Nañ ni ca' jadu'n nmína'ñich co ñich njot nhuinma'ñ ti nyajhuätztäyich. Njactumnich, jigix jëbi Cristo y'oy'ajtin nbáadibich. Com Jesucristo ti xyhuin'ixyich jayijp, jaydëbi jada oy'ajtin nbáadibich. ¹³ Migügtijc ajcxy, ca'ñich ci'm naygömayiijich, co ti nmimadactäyich Cristo y'oy'ajtin. Jada janchtiy ndumbyich, njäydigoydaaybich tüg'óciy huídibi ti ñaxy, e mictägy nduúñich jëbi nbáadibich je oy'ajtin huídibi Dios jiiby tzajpjoty xymöhuaambich mïd co nyajpaadyich ma Jesucristo. ¹⁴ Mictägy nduúñich mïd tüg'óciy nmic'ajtich, jigix jëbi nbáadibich je oy'ajtin huídibi Dios jiiby tzajpjoty xymöhuaambich. Jadu'n nipaady nejhuíy mïd pin nayboyicquipxyiijich co nbada'ñich tüg premio.

¹⁵ ñich ajt ti nhuinma'ñ ycixni yca'pxni, tzoc panícxim je ixpijcin huídibi nmïd'ajtim. E pen nidügti miich ajcxy tigachjaty huinma'ñ mïdity, Dios xyajnejhuíhuip ajcxy je tiy'ajt. ¹⁶ Jada janchtiy, je tiy'ajt huídibi ti nbaatim copicy nguydundaayim, ca' n'ixmajtzim.

¹⁷ Migügtijc ajcxy, paníxcix ñich n'ijxpejt jadu'n nej ti ndzinäyich ma miich ajcxy. Nañ jadu'n miich ajcxy ixpejt mbigipy ma yi' ajcxy chinaayin huídibi ixpejt ti patcixy ma ñich. ¹⁸ Canaag'oc ti nnimaaygixy, e nnimaaygixy jadüg'oc mïd tajin mayin co may nmigügtijc chinaaygixy jadu'n nej jihuíy midzip'ajtcixy je Cristo huídibi o'c cruudzcíxy mïd ajt nbocy ycixpi. ¹⁹ Dios yajtigoyip je ajcxy y'alma. Yi' ajcxy ypidacpy yhuinma'ñ ma yi' caayin uucin jicxy ypiy, ma yjapadyii huen yjot yhuinma'ñ pidaaccixy ma Dios. Yi' ajcxy chachñaygömáayigixy ci'm ma yjapadyii tzo'ydu'n jihuíyigixipy. Hue' pidaaccixy yhuinma'ñ ma naaxhuiñ jäy chinaayin. ²⁰ ñich ajt hue' nyajpaatim njäy'ajtim tzajpjoty, e njijp'ijxim co ñich ajt nHuindzin Jesucristo miinaamb ya naaxhuiñ jadüg'oc, chona'ñ tzajpjoty, je huídibi xyajnïdzögaanim ajt n'alma. ²¹ Jesucristo xyajtigadzaanim ajt nninícx pocymïdipi, e xymöhuaanim tüg ninícx jemybi oybi, tim jadu'n nej yi' ñinícx mïdity. Cristo xyajtigadzaanim ajt nninícx mïd yi' ymic'ajt huídibi mïd ane'mdäy mimadactäy.

4

Jotcuje'ajtcixy ajcxy ma je mHuindzin Jesús

¹ Com Jesús xyajtigadzaanim ajt nninix, paady ycixpi migügtijc huidibi ooy ndzocy njihuiyich, tiydudägy mibijccix ajt nHuindzin Jesucristo, ca' m'ixtigihuäccixy ma mmibijcin. Migügtijc ajcxy huidibi ooy nicxy nja'ixa'ñich, ooy njotcuje'atyich miid miich ajcxy ycixpi. Miid miich ajcxy ycixpi nbada'ñich n'oy'ajtin ma Dios.

² Nbijctzooybich may'ajt ma Evodia etz ma Síntique co huen ajcxy ixmajtcixy yi tzip etz huen naymigügpjicigixy jadüg'oc, com hue'ajcxy yajpaady mibijcpi ma Cristo. ³ Miich migüg huidibi ti xypubetyich ma Cristo ytung, may'ajt nbijctzooybich ma miich co mgapx'oyihuipy je tzip ma ajcxy je metzpi töxyjäy. Yijibi metzpi töxyjäy tumb anajty ajcxy quipxyi miid ñich co ngapxhuäccixyich Jesucristo y'ayuc ytiy'ajt. Yi' ajcxy xypubejtich quipxyi miid Clemente etz yi jacjadyii huidibi anajty tumb quipxyi miid ñich. Jada metzpi töxyjäy ajcxy yxi ycojayiy ymiin ma Dios ñecy, je necy ma Dios midity cojay je jäy ajcxy yxi huidibi padamb jugy'ajtin huinixibi.

⁴ Jotcuje'ajtcix huinixi, miid co myajpatcixy ma ñich ajt nHuindzin Jesucristo. Jadüg'oc nigapxpetyich co huen jotcuje'ajtcixy. ⁵ Jadu'n tzinaaygix jadu'n nej jëbi jäy ajcxy nejhuuygixy co miich ajcxy myajtungixy mecxtujcin ma mdzinaayin. Com huington je xi je tiempo mina ymiina'ñ ñich ajt nHuindzin Jesucristo jadüg'oc.

⁶ Ca' ni ti mnidajcixy mnimaygixy. Capxpizimdaaygix ma Dios tüg'óciy ti jotmay miich ajcxy mmid. Mibijctzoogix Dios, e nañ yajnajxcix jäygidaacin ma Dios. ⁷ Co Dios mmibijctzóogixipy, huin'it ajcxy yi' xymöhuip jotcuje'ajtin mijcajee, e mayñaaxhuiñyjäy ajcxy ooy yhuinmay ahuididipy miid miich ajcxy m'oy'ajtin ycixpi. Co myajpaady ajcxy ma Cristo Jesús, paady ycixpi Dios xyajtzinahuipy ajcxy jotcuje etz xymöhuip ajcxy huinma'ñ tudägyip.

Tzojccix nijot'ajtcix huidibi oyip

⁸ Jadügnax, migügtijc ajcxy, pidaaccix mhuinma'ñ ma tüg'óciy tiy'ajt huidibi janchip, tüg'óciy tiy'ajt huidibi jëbi nyajmij'ajtim. Pidaaccix mhuinma'ñ ma tüg'óciy tiy'ajt huidibi tudägyip. Pidaaccix mhuinma'ñ ma tüg'óciy huinma'ñ huidi huädzip etz tüg'óciy huinma'ñ huidi oy jäygidaacni. Pidaaccix mhuinma'ñ ma tüg'óciy huinma'ñ huidibi jëbi yajcapxpaady. Huinmaaygix tüg'óciy jada oybi huinma'ñ etz huidibi huaad njäygidaacim.

⁹ Yajtungix je tiy'ajt huidibi ti nyaj'ixpijicixy, etz je cötuje huidibi ti nmooygixy, etz je ayuc huidibi ti mmidoogixy co ti ngapxyich. Etz nañ tungix je iixpejt huidibi ti nyecyich. Cuydungix jada tiy'ajt, huin'it yi Dios yajpaadipy ma miich ajcxy etz xyajjotcuje'idipy ajcxy.

Filipenses ajcxy y'ofrendi miid Pablo ycixpi

¹⁰ ñich ajt nHuindzin Jesucristo ti ooy xyajjotcugiyich co je tiy'ajt xypaadyich co miich ajcxy xyjäy mechich jadüg'oc. Ca' nminaanim nmina'ñich co miich ajcxy ti xyjäy digoydaayñich. Hue' anajty ycanibidzimy nej jëbi xypubejtixyich. ¹¹ Ca' nminaanim jadu'n nmina'ñich co ooy ti jaty nyajmayajtnich. Com ti huinma'ñ nbidägyich co njotcuje'adipyich miid tijaty nmidich, oy tim minaaxi tim mnaatiempo. ¹² Com ñich ci'm nejhuuybich nej jay ajcxy y'ayoy yjottigooy, e nañ nejhuuybich nej jäy ajcxy chinäy co miid'aty tijaty may'amy. Ti nnejhuuydäyich nej jëbi ndzinäyich, nej jëbi nyajnajxich xi tiempo; pen cu'xyi ngaayich, o pen ca' cu'xyi ngayich, pen nmidich conax, o pen ca' ti nmididyich. ¹³ Jëbi ndzinahuibich jotcuje huenti huennejity, com

Cristo xymic'ajtmooybich. ¹⁴ Ooy oy ti mdungixy co ti xypubéjtcixyich ma ich n'ayo'n n jotmay.

¹⁵ Jadu'n nej miich ajcxy huidi jim Filipos mnejhuib ajcxy, je taabi nyajtzondacyich co ngapxhuäcxyich Jesucristo y'ayuc ytiy'ajt, co ndzooñich jim Macedonia miich ajcxy ti xymiooxyich, e jac tigati ti mguejxcixy ma ich. E miich ajcxy jim Filipos huidibi mibijcp Jesús, miich ajcxy tügpajc xypubejtich ca' jac ni pin. ¹⁶ Co n'ijtyich jim Tesalónica miich ajcxy xyajnigüe-jxyich pubejtin metz'oc tugig'oc, e jadu'n miich ajcxy xypubejtyich müd huidibi anajty nyajmayjajtpich. ¹⁷ Ca' nminaanim ooy ndzachjipp'ixynich pubejtin, jada janchtiy ndzojcpyich co miich ajcxy nig' oy'ajtin mbaadipy co anajty mmejtzcixy ma Dios yhuinduu. ¹⁸ Ti ooy yhuaadiy yi mbubejtin ixti nyajconajxpich. Müd je pubejtin huidibi ti myajmiguejxcixy Epafrodito cham nmüdidyich ca'pxy, ca'ti n'ocyajmayjajtnich. Müd jada pubejtin huidibi miich ajcxy ti xymöyich, ti ooy njäygidägyich, tim jadu'n nej Dios jäygidacy je poomjoc huidibi yajhuindzigiyi. ¹⁹ Ich nDios miich ajcxy xymöhüip tüg'óciy huidibi miich ajcxy myajmayjajtpy. Mijcajee yi' miich ajcxy xymöhüip yi oybi mijpi oy'ajtin huidibi yi' ymüd ma yi Jesucristo. ²⁰ ¡Huen ich ajt nDios Teedy cömay'idipy huinixi huinitempo! Jadu'n jada. Amén.

Capxpoox'in huidibi cijxnip je necy

²¹ Tungix may'ajt capxpooxcix müd ich ycixpi tüg'óciy migügtijc huidibi yajpatp ma ajt nHuindzin Jesucristo. Je migügtijc huidibi yajpatp müd ich nañ jadu'n xyajnigüe-jxcixy capxpoox'in. ²² Tüg'óciy je mibijcpidijc huidibi yajpatp ya cajpjoty xyajnigüe-jxp ajcxy capxpoox'in, yi' ooy ytimyjayijpity huidibi ajcxy yajpatp ma je mij ane'mbi César ycötujctac xyajnigüe-jxyp ajcxy capxpoox'in.

²³ Huen ich ajt nHuindzin Jesucristo may'ajt oy'ajt tunipy müd tüg'óciy miich ajcxy. Jadu'n ngapxycixyich. Amén.

COLOSENSES

Yi Necy Huidi San Pablo Yajniejx Je Mibijcpidijc Jim Colosas

¹ Hich Pablo, Dios jadu'n tzojcp, paady Jesucristo ti xyajniejcyich jëbi ngapx-huäcxyich yi 'y'ayuc. ² Hich müd ajt nmigüg Timoteo cham nguexyich jada necy ma miich ajcxy huidibi tzinaayb jim Colosas. Hue' nguexyich jada necy ma miich ajcxy huidibi Dios yjäy'ajtíp e mmibijccixy yi Cristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy müd miich ajcxy etz xyajjotcugüygixip.

Pablo mibijctzoy Dios müd mibijcpidijc ycixpi

³ Jabom jabom co ich ajcxy Dios nmibijctzoy, chi nyajnaxich jäygidacín ma Dios, nHuindzin Jesucristo ajt yTeedy, müd miich ajcxy ycixpi. ⁴⁻⁵ Ti nnejhuüyich jadu'n nej miich ajcxy ti mmibijccixy Cristo Jesús, e nañ jadu'n nej mdzojccixy mjihuüygixy tüg'óciy migügtijc. Müd co miich ajcxy mjijp'ixy co Dios müdity tijaty yujcpicy tzajpjoty huidibi miich ajcxy mbadamyb, paady ycixpi ajcxy mmibijccixy Cristo Jesús, e paady ycixpi mdzojccixy mjihuüygixy migügtijc. Co jayhuin migügtijc capxhuäcxy Jesucristo y'ayuc ytiy'ajt ma miich ajcxy, huin'it ti mnejhuüygixy co Dios müdity tzajpjoty huidi njijp'ijxyp mbadaangixp. ⁶ Jadayaabi tiy'ajt huidibi migügtijc ti capxhuäcxy ma miich ajcxy, nañ yajcapxhuäcx'adützní ma tüg'óciy naax cajp etz mayjäy mijpidaaccixy. Miich ajcxy ti mmibijccixy jadu'n nej oga'n yajnimiydacy e chambaadni co Dios may'ajt ti tuñ müd jäy ajcxy ycixpi, e nañ miich ajcxy mnejhuüyb tiydudägy Dios ytiy'ajt. ⁷ Jada tiy'ajt ti xyajnejhuüygixy je Epafras, ich ajt nmigüg huidibi ooy ndzocy njihuüyich, huidibi tudägy tumb ma Dios y'ayuc quipxyi müd ich. Epafras ti xycodinäyich ma miich ajcxy, e tiydudägy miich ajcxy xyaj'ijxpjicy Cristo ytiy'ajt. ⁸ Epafras ti xyajnejhuüyich tiy'ajt jadu'n nej miich ajcxy myajpatcixy, etz jadu'n nej je Espíritu Santo ymic'ajt xymoogyixy, jigix ajcxy mdzogipy mjihuüipy tüg'óciy migügtijc.

⁹ Müd jada ycixpi ich ajcxy jabom jabom Dios nmibijctzooyich müd miich ajcxy ycixpi, jadu'n nduunich chondacy co oga'n nnejhuüyich co miich ajcxy ti mmijpidaaccixy Jesucristo, ixti chambaadni. Dios nmibijctzooybich co ajcxy mhujnhuüipy mnejhuüipy tüg'óciy Dios chojcin. Dios nmibijctzooybich co yi' Espíritu Santo miich ajcxy xyaj'ijxpigipy xyajnejhuüipy ajcxy tüg'óciy yi' ytiy'ajt etz yi' chojcin. ¹⁰ Dios nmibijctzooybich jaydëbi mguyduunip ajcxy Dios ytiy'ajt jadu'n nej huaad mibijcpidijc chinaaygixy huidibi yajpaatp ma ajt nHuindzin Jesús, mabaad Dios jäygidägy yajxon ajcxy mdzinaayin mjogy'ajtin. E nañ jaydëbi ajcxy mdunipy oyjäy'ajtin. E nañ jaydëbi jabom jabom yjacyujcpejtcixy yi' m'ixpjin ma Dios. ¹¹ Dios nmibijctzooybich jigix yi' xymöhuipy ajcxy mic'ajt jadu'n nej yi' müdity ymic'ajt mijpi, jigix jëbi miich ajcxy jotcuyc myajnaxipy etz mecxtujctähuip tüg'óciy tzaachypi etz ayo'n. ¹² Dios nmibijctzooybich co miich ajcxy agujc jotcuyc myajnaxipy Dioscojuyip ma Dios Teedy, com Dios Teedy ajt xyajpocyñhuaatzim, e jadu'n ti xyñ'ixiyim jëbi nbaatim tüg it lugar tzajpjoty quipxyi müd tüg'óciy mibijcpidijc huidibi tiydudägy tzinaaygixp müd Dios ytiy'ajt, jadu'n nipaady nejhuüy nej miich ajcxy mdzinäy ma je ticxin. ¹³ Ti Dios xyajniehuädzictuutim ma yi' jibic-huinmañ ma je mujcu' xy'ane'mim, jadu'n nipaady nejhuüy ti xyajpidzimim agootztuum. Ti Dios

xypidaacim ma y'ung y'ane'my, je' y'ung huidibi yi' ooy tzocy ooy jihuüy.
¹⁴ Dios y'ung ti xyajñihuädzictuutim ma yi jibic-huinma'ñ co ñi'py temy yojcy ma yi cruudz miid ajt nbocy ycixpi, e ti xypocyhuinmeecxim.

Co Cristo y'o'cy miid ajt nbocy ycixpi, chi jotcuyc n'ijtim miid Dios

¹⁵ Ca' pin ti ixyc Dios. Pinjaty ti ixyc Dios y'ung, jadu'n nipaady nej ti ixyc Dios. Dios y'ung yi' je' anajty tim jayijp ma anajty Dios ca' ti yaj'oyiñi. ¹⁶ Dios y'ung ti cojtay tüg'óciy tijaty yajpaatp jiiyby tzajpjoty etz ya naaxhuiñgíxy. Dios y'ung cojtay tüg'óciy huidibi jébi huaad n'ijxim etz nañ cojtay huidibi ca' huaad pin ixyc. Dios y'ung pidaactay tüg'óciy y'ane'min tüg'óciy mic'ajt ya naaxhuiñ, etz nañ jadu'n pidactay ane'min miid yi tzajpjoty tzinaaybi. Dios y'ung ti yajcojtäy ti yaj'abadiydäy tijaty miid yigixp. ¹⁷ Je Cristo jayijp y'ane'm'ajt ymic'ajt ti paady, ca' jac ni pin. Je Cristo yaj'ijtpy tüg'óciy huidijaty ya yajpatp huijtz'ijttaayb. ¹⁸ Je Cristo ñihuindzin'ajttaayb ñigohuajc'ajttaayb, etz y'ane'mdaayb tüg'óciy jäy huidibi mibijcip mijpidaacip. Je Cristo yajtzinaayb yajjugy'ajtpy tüg'óciy mibijcpidijc, com yi' je' huidibi jayijp ti yjugypicy co y'o'cy. Paady ycixp yi' cötujcin mijpi miidity. ¹⁹ Dios hue' tzojcy co tüg'óciy yi' ymic'ajt etz ymij'ajt yajpaadip ma yi' y'ung. ²⁰ Je naaxhuiñyäjy etz je tzajpjoty tzinaayb ajcxy ca'oy'ijtcixy miid Dios miid je mijpocy ycixpi. Dios oy jäygidägy ooy jotcuyc nayjihuiyi co y'ung y'o'cy cruudzcixy miid je mijpocy ycixpi e jadu'n oyiiy nej jébi je naaxhuiñyäjy etz je tzajpjoty tzinaaybi ajcxy oy'ijtcixy miid Dios.

²¹⁻²² Miich ajcxy co anajty ca' mmibijccixy je Cristo, ca' anajty oy m'ijtcixy miid Dios. E jadu'n anajty m'ijtcixy nej tüg midzip ma Dios, miid co jibicpi anajty mdungixy, etz miidity ajcxy jibic ma mjot mhuinma'ñ. Per jadachambi je Cristo ti capx'oyiy miich ajcxy je mdzip m'ejcin huidibi ajcxy miid Dios, co ti chinäy ya naaxhuiñ miid ñinïcx, e nañ co ti y'ögy miid miich ajcxy mbocy ycixpi. Miid co Cristo y'o'cy miid miich ajcxy mbocy ycixpi, jaydëbi myajpáatcixipy ma Dios yhuinduu janch oyjäy, janch huätzjäy, ca' ti pocy mmidity, ca' ti xihuïn yjac-hu'my ma Dios miid miich ajcxy ycixpi. ²³ Pen myajcopijccixyp tiydudägy je Cristo y'ayuc ytiy'ajt huidibi ti mmidoogixy, jadu'n nej mijp'ijxcixy co je Cristo xyajñdzögaani ajcxy yi' m'alma. Je ayuc huidibi miich ajcxy ti mmidooy, je' je' huidibi migügtijc ti capxhuäcxy etz ycapxhuäcx'adiichñi ma tüg'óciy naax cajp, jadu'n nej jébi jäy ajcxy y'alma yajñdzögipy. Nañ jadu'n iich, Pablo ngapxhuäcxypich jada ayuc quipxy miid nmigügtijcich.

Pablo cötujcmoy co ytunipy ma mibijcpidijc ajcxy

²⁴ Jotcuyc nnayjihuiyijich co tzaachypi nminaxy nyajnaxyich miid nninïcxich miid miich ajcxy ycixpi e jadu'n njacyajcixy njacyajca'pxich je tzaachypi huidibi Cristo yajtzondac co yi' tzaachypi minaxy yajnaxy miid je mibijcpidijc ycixpi e je mibijcpidijc ni paady nej Cristo ñinïcx. ²⁵ Dios ti xyyajñibicyich co ndunipyich miid yi jäy ajcxy huidibi mijpidaacip. Dios ti xypidägyich ma jada tung, jigix ngapxhuäcxibich tüg'óciy Dios y'ayuc ytiy'ajt ma tüg'óciy jäy ajcxy. ²⁶ Jecy'ajty canaag jimijt ti ñaxy co Dios ca'ni anajty yajniguëxigy yi' ytiy'ajt. Cham Dios ti yajniguëxigy yi' ytiy'ajt ma yi jäy ajcxy huidibi yi' yjäy'ajtipy. ²⁷ Dios oy nihuinmayiy co anajty yajnejhuñhua'ñ yi jäy ajcxy nidüg'óciy je oybi ayuc tiy'ajt huidibi jecy'ajty ca' pin nejhuüy. Yi' je' je' tiy'ajt co Cristo yajpaady ma miich ajcxy mjot mhuinma'ñ, paady ycixpi jébi miich ajcxy mbaadip oy'ajtin jiiyby tzajpjoty.

²⁸ Hich ajcxy ngapxhuäcxypich Cristo y'ayuc, n'ihuijpyich ngapxhuijpyich, nyaj'ixpijcpyich yajxon yi Cristo ytiy'ajt ma tüg'óciy jäy ajcxy, jaydëbi nya-jquëxigibich ma Cristo yhuinduu nidüg nidüg mibijcpidijc ca'pxy yhuinma'ñ. ²⁹ Müid jada ycixpi nduñich mictägy müid tüg'óciy je nmic'ajtich huidibi Cristo xymooybich jabom jabom.

2

¹ Ndzojcpyich co miich ajcxy mnejhuihuipy jadu'n nej mictägy nduuñich müid tajin mayin müid miich ajcxy ycixpi, etz müid yi mibijcpidijc huidi jim Laodicea ycixpi, etz nañ tüg'óciy mibijcpidijc ycixpi huidibi ti xy'ixyich ahuin ajijp. ² Mictägy nduuñich jaydëbi yi mibijcpidijc paadipy jotcuje'ajtin ma y'ay yjot, etz jaydëbi ajcxy ñaychójcigixipy ñayjihuiyigixipy mabaad jëbi mi'ijtcixy yjot yhuinma'ñ tú'ciy. Mictägy nduuñich jaydëbi je mibijcpidijc mi'ijtcixy mij jotcuje'ajtin co ajcxy huinjihuidyähuib Dios ytiy'ajt, je tiy'ajt huidibi jecy'ajty anajty ca' pin nejhuüy, je Dios ytiy'ajt maabi Cristo Jesús. ³ Ma je Cristo jim tüg'óciy tiy'ajt janchypi etz ixpijcin janchypi yajpaady. Jadu'n yi ytiy'ajt etz y'ixpijcin nej tüg' jugy'ajtin. ⁴ Jadu'n nimaaygixy jigix ca' pin oy cohuiñini e midigihuipy oy ayuc ma miich ajcxy ooy ymibijcni, e ca'yjanchity. ⁵ Ooy ich ngadim jimity, ixna' guëxna' ma miich ajcxy myajpatcixy. Hich njot nhuinma'ñ ca' yi jim ytigoy'ity ma miich ajcxy myajpatcixy. Jotcuje nayjihuiyijich co n'ijxcixy yajxon myajtüyöygixy tüg'óciy etz mic yi mmibijcin müidity ajcxy ma Cristo.

⁶ E müid jada ycixpi jadu'n nej miich ajcxy ti mgöbijccixy je Huindzin Jesús oga'n'aty, jadu'n ajcxy jactzinaaygix jacjugy'ajtcix ma yi'. ⁷ Je tiy'ajt etz je mic'ajt jim yi' mbaatcixy ma Cristo. Yjacyujcpedipy ajcxy yi m'ixpijcin ma Cristo ytiy'ajt jabom jabom. Ca' m'ixtigihuäccixy ma yi mmibijcin. Jacmibijcix jadu'n nej anajty ti nyaj'ixpijccixy Cristo ytiy'ajt. Jatytim myajnájxcixipy jäygidacın ma Dios cixyot huinijot jabom jabom.

Je jemybi jugy'ajtin huidibi Cristo xyajni'ixiyim

⁸ Ooy naygüend'ájtigix, ca' myajhuin'ingixy, co huingjäy xya-jhuinma'ñytigóoygixipy müid huingbi ayuc huingpi ixpijcin huidibi jäy ci'm ti cojy ti macxy, huidi ca' choobaady, huidi nigoo xychachhuin'ingixp müid canaag ayuc huinma'ñ jadu'n nej poj naaxhuiñ huinma'ñ. Yi jadu'mbi ixpijcin huidibi jäy ti cojy ti macxy ca' ajcxy paady ma Cristo.

⁹ Tüg'óciy nej Dios yajpaady nañ jadu'n yajpaady ma Cristo. ¹⁰ Com je Cristo ñihuindzin'ajttaayb tüg'óciy ane'min ya naaxhuiñ, etz nañ jadu'n tzajpjoty, paady ycixpi co miich ajcxy myajpaady ma Cristo, miich ajcxy müid'ajttaayb tüg'óciy huidi Cristo ymüid. ¹¹ Co anajty Cristo miich ajcxy xyjäy'adyii, chi yi'pidacy ma ajcxy mjot mhuinma'ñ je tiy'ajt co myajpatcixy ma Dios. Hue' je' yajtigooyb yi pocytunii huinma'ñ. Jada je' je tiy'ajt huidi Cristo Jesús ypidac, ca' miich ajcxy xyjäy'adyii. Ca' miich ajcxy mdiy'ajttiy ma mninix. Tigach Jesús ytuuñ müid miich ajcxy, ca' yjadu'nity nej judíojäy ajcxy tiy'ajt pidaaccixy ma ninix müid tzuje. ¹² Co ti mnibejtixy müid Cristo yxii, jadu'n nipaady nejhuüy ti mnaaxtigiiygixy quipxyi müid Cristo co yi' ñaaxtigiiy. Co ti mmijpidaaccixy Dios ymic'ajt jadu'n nipaady nejhuüy quipxyi müid Cristo ti mjugypijccixy co Dios yajjugypijcy y'ung co y'o'cy. ¹³ Co ca' anajty miich ajcxy Dios xyjäy'adyii, müid miich anajty ajcxy pocytunii huinma'ñ jadu'n miich anajty m'ijtcixy nej öcpi. E co ti mmijpidaaccixy Cristo, Dios ti xyhuinmeecxi ajcxy tüg'óciy mbocy, e jadu'n nipaady nejhuüy Dios ti xyajjugypijccixy quipxyi müid Cristo. ¹⁴ Co Cristo y'o'cy ma yi cruudz müid ajt nbocy ycixpi, jadu'n nipaady nejhuüy Dios ti xyjödzim xihuin huidi

anajty xychaachytunaanim. Co Dios anajty yajtigooy #ch ajt nxihuin, jadu'n nipaady nejihuüy ti mijxojtzpety je xihuin necy ma Jesús ycruudz. ¹⁵ Co Cristo y'o'cy cruudzcíxy, chi ycödigooy je ca'oybi ymic'ajt, etz je poj naaxhuiñybi ymic'ajt. Chi je Cristo yajtzo'yduñ je ca'oybi etz je poj naaxhuiñybi co yajcixy yajnaxy ma jäy yhuinduu.

Tzoccix nijot'ajtcix tüg'ócy huídijaty tzomb ma Dios tzajpjoty

¹⁶ Ca' mdungixy cuenti co pinjaty ajcxy xy'agapxihuipy etz xyñimahuipy:

—Amay'at jada jicxy picy, etz amay'at jada xii, etz amay'at je jemybo', etz amay'at yi Sábado xii. ¹⁷ Jecy'ajty jäy jadu'n ti yajtuñ yijadu'mbi huinma'ñ, jayijpni ca' anajty Jesucristo ymiiñi ya naaxhuiñ. Jadachambi xii tiempo Jesucristo ytiy'ajt tügpajc yi' je' ooy ycopicyity. ¹⁸ Ca' huaad yi jäy ajcxy xypijci je Cristo y'oy'ajtin huídibi ajcxy mbadamyb. Yi' ajcxy huídí oygohuin'iniñi naybidaacip jadu'n nejihuüy ooy yung naxy ajcxy yjäy'ajtcixy, e ca' yjanchity. Yi' ajcxy yi' y'ojadajtpy ángeles. Yi' ajcxy naygömayip co ti tiy'ajt patcixy ma cumäy, ninigoob ajcxy amij agix ñayjihuiñyigixy miid co tzachmijpidaaccixy yci'mhuinma'ñ etz ñinix chojcín. ¹⁹ Yi' jadu'mbi jäy ca' ajcxy yajpatcixy ma Cristo, je huídibi nigohuajc'ajtp tüg'ócy mibijcpidijc. Je mibijcpidijc Cristo yajyeecp ma ajcxy ymibijcín jadu'n nej Dios tzocy, e yi' ajcxy patcixy tüg'ócy mic'ajt etz tiy'ajt ma yi'. Miid co Cristo nigohuajc'aty je mibijcpidijc, paady ajcxy y'ijtcixy tügpicy, jadu'n ajcxy nipaady nej tüg' jäy ñinix miid ycohuajc huídí ane'm je ñinix etz miid emy huídibi yajyücxtaayb je ninix.

²⁰⁻²¹ Co miich ajcxy ti mmibicy Cristo, jadu'n nipaady nejihuüy ti m'öccixy quipxyi miid Cristo, e nañ ti mbidzimgixy ma yi' naaxhuiñyjäy yhuinma'ñ xyaj'ane'mgixy. ¿Na'ámy co chambaad mjactzinaaygixy jadu'n nej jihuiy yi' naaxhuiñyjay yhuinma'ñ xy'ane'mgixy? ¿Na'amy co mjaccuydungixy yi' jäy ajcxy ycötujcín huídibi mínaamb co ca' huaad mgonigy jada, ni ca' huaad mjicxy jada, ni ca' huaad nidoñ yijimbi? ²² Tüg'ócy huídibi ngonicim, njicxim, e nnidonim, co ytundäy, chi ytigoydäy. Yi' jadu'mbi huinma'ñ c'i'm jäy ajcxy cojcixy macxcixy, e nañ c'i'm jäy ajcxy yaj'ixpijccixy huídibi ca' yajpaady ma Cristo. ²³ Yi' jadu'mbi cötujcín jadu'n yquëxigy nej ooy y'oyity ooy y'oymibijco'cnity, e ca' yjanchity. Co jäy ajcxy cuydungixy ooy ajcxy ñaybidaacigixy tudägy, etz nañ chaachytungixy ñicx ycohuajc. Yi' jadu'mbi cötujcín ca' ti mic'ajt m'idity, com co ca' jadu'n jëb yajtigoy jibic-huinma'ñ yi' jadu'mbi cötujcín.

3

¹ Miich ajcxy huídibi ti mmibicy je Cristo jadu'n nipaady nejihuüy ti mjugypijccixy quipxyi miid Cristo, e jemybi jugy'ajtin ti myajtzondaaccixy. ² Ixtaaygix je tiy'ajt huídibi tzomb tzajpjoty ma je Cristo yajpaady ma Dios ymijc a'oy'amybi, e yi' je' je' mij'ane'mbi. ³ Co ti mmibijccixy je Cristo jadu'n nipaady nejihuüy co ti m'o'ccixy miid yi', etz ma je Cristo jemybi jugy'ajtin miich ajcxy ti mbaady. Jadachambi yi' mjugy'ajtin Cristo miid c'i'am, e yi' yajpaatp ma Dios. ⁴ Co anajty je Cristo ñayguëxigyii jadüg'oc ya naaxhuiñ, huin'it xii miich ajcxy mnaybada'ñyii miid yi' jiiiby tzajpjoty ma yi' oybi it.

Je jecy jugy'ajt etz je jemybi jugy'ajt

⁵ Yajtigooygix je jibic-huinma'ñ huídibi miich ajcxy miid, huídibi naaxhuiñyjäy ajcxy yhuinma'ñ'ajtip. Ca' huaad miidcapxtigoyipy töxyjäydijc. Ca' huaad jibic-huinma'ñ mdunipy. Ca' huaad mdungixy ninix chojcín, etz huídibi ca'p y'oyhuinma'ñity. Ca' huaad m'adzogipy comeeñ'adii, com ñipaapty jadu'n nej ajcxy huídibi tzaadzech quipychech ojadajtp. ⁶ Miid co

jäy ajcxy jadu'n ytundigooygixy, paady ycixpi jacjiini Dios tzaachytunip jäy ajcxy huidibi ca' ycapxymidoogixy yi' ycötujcin. ⁷ Nañ jadu'n miich ajcxy jayijp co ca'ni anajty mmijpidaaccixy je Cristo, mdzinaaygixy anajty müd jibic-huinma'ñ quipxy müd je jacjadyii naaxhuiñyjäy co anajty mguydungixy yi' jäy ycötujcin huidibi ca' ytiy'ajtiy. ⁸ Jadachambi ixmajtzcix miich ajcxy yi' jibic-huinma'ñ jadu'n nej co migüg mmijotma'tcixy, jadu'n nej co ooy mjot'ambijccixy, jadu'n nej co jibic mdungixy, jadu'n nej co migüg mni-gapxcixy ni'ojüygixy, jadu'n nej co jibic ayuc mgapxcixy. ⁹ Ca' huaad mnay-huin'iniigixy miñ xyipy. Co ti mmibijccixy Cristo ti m'ixmajtzcixy je jibicjot je jibic-huinma'ñ huidi anajty ajcxy müd. ¹⁰ Jemybi jot jemybi huinma'ñ ti mbatcixy e Dios yjacyejcyp jemybi jot jemybi huinma'ñ jabom jabom ma miich ajcxy co m'ixpijccixy yi' ytiy'ajt. Jadu'n Dios tzocy co mjot mhuinma'ñ mbidáaccixipy jadu'n nej Cristo jot huinma'ñ müdity, je Cristo huidibi ti yaj'oyiy je jemybi jot jemybi yhuinma'ñ. ¹¹ Co jäy ajcxy mijpidägy Cristo, chi tú'ciy ajcxy yajpaady ma Dios, ca' ñejity co nijejity ajcxy müd griegojäy y'ixpijcin etz jacjadyii müd judíojäy y'ixpijcin, ca' ñejity pen ti myajtiy'ajtiy o ca' mdiy'ajtiyity. Ca' ñejity co nijejity ajcxy jigügy chooñ, e ca' y'ixpiyity, etz jacjadyii ooy adzip ahua'n ñaybidáacigixy. Ca' ñejity co nijejity ajcxy moso'ajtp etz jacjadyii huidibi ci'm naymiduunip. Nidüg'óciy ajcxy tú'ciy ñaybidägyii co ajcxy mijpidägy Cristo. Nidüg'óciy mibijcpidijc tú'ciy pattay ajcxy mic'ajt oy'ajt ma Cristo, e nañ Cristo yajpaady ma nidüg'óciy ajcxy yjot yhuinma'ñ.

¹² Com Dios miich ajcxy ti xyhuin'ixy, e ti xychojccixy ti xyjihuiygixy, e Dios ti xyajhuädzi ajcxy mjot mhuinma'ñ, paady ycixpi pidaaccix mjot mhuinma'ñ co mba'ayoohuaangixy migügtijc. Pidaaccix mjot mhuinma'ñ co oyjäy'ajtin mdunaangixy etz co nicy xemy mnaybidägaangixy. Pidaaccix mjot mhuinma'ñ yung naxy etz mimecxtujccixy migügtijc ajcxy. ¹³ Naymimecxtújcigix nidüg nidüg. Co mmigüg ajcxy xymidundigooyipy jëbi mhuinmeecxipy tim jadu'n nej iich ajt nHuindzin Jesucristo ti mecxy miich ajcxy mbocy. Com Cristo ti xyhuinmeecxcixy, paady copicy miich ajcxy meecxip yi' migüg huidibi ajcxy xymidundigooyb. ¹⁴ Mnaychójcigix mnayjihuiygix nidüg nidüg. Co mnaychójcigixipy nayjihuiygixipy, chi jëb huaad mdzinaaygixy müd mjot mhuinma'ñ tú'ciy. ¹⁵ Je jotcuje'ajtin huidibi Dios xymooyim, huen ajcxy xy'ane'mi mjot mhuinma'ñ. Dios ti xyajnibijccixy, jaydëb tú'ciy m'ijtcixy müd mjot mhuinma'ñ. Mjatytim yajnaxipy ajcxy jäygidacín ma Dios jabom jabom.

¹⁶ Naybidáacigix co je Cristo y'ayuc ytiy'ajt yajtigüydähuamyb ajcxy mjot mhuinma'ñ. Nayyaj'ixpijcgix etz nay'ihuüjigix naygapxhuüjigix müd je Cristo y'ayuc ytiy'ajt, jadu'n nej Dios iixpijcin yecy. Iigix Salmo etz igix himno etz yi' iy' ihuidibi je Espíritu Santo ypidägip ma mjot mhuinma'ñ, e jadu'n jäygidacín mi'ijtcixy ma ajcxy mjot mhuinma'ñ müd Dios ycixpi. ¹⁷ Huen ti ayuc huidibi ajcxy mgapxyp, huen ti tung huidibi ajcxy mdumby, hue' capxcix tungix müd ajt nHuindzin Jesús yxii. Etz jatytim yajnaxcixy Dioscojuyip ma Dios Teedy ma Jesucristo yxii.

Je mibijcpidijc ajcxy chinaayin ma ypicchinaaygixy

¹⁸ Miich töxyjäydijc ajcxy, capxymidoogix mñäy ajcxy com jadu'n iich ajt nHuindzin Jesucristo tzocy co mgapxymidohipy ajcxy mñäy. ¹⁹ Miich yëydijctijc ajcxy, tzojccix jihuiygix ajcxy mdöxyijc, ca' ejcin mmii'dipy müd mdöxyijc. ²⁰ Miich ajcxy ung anäg, mgapxymidohipy ajcxy mdaj mdeedy müd tüg'óciy. Jadu'n Dios jäygidägy co ung anäg ajcxy capxymidooy ytaj yteedy. ²¹ Miich ajcxy ungdeedy ca' oyñinej mmigapxcixy m'ung m'anäg

ajcxy. Co jadu'n oyñinej m'ojipy m'ung ajcxy, ca' yjeyity co ñicxy ajcxy taj may chinaaygixy yjugy'ajtcixy. ²² Miich ajcxy tumbidijc, capxymidoogix yi mHuindzin, ca' janch xypaat oy mic mdungixy co mhuindzin jim xyhuindicxcixy, e chi co je' yjihuacni, chi nigoo mhuaccixni mdinaaygixni. Hue' janchtiy oy tungixy miid oyjot oyhuinmañ, com je' je' je tiy'ajt co Dios mhuindzigiygixy. ²³ Je tung huidibi mdungixyp, tungix cixyjot huinijot. ²⁴ Com miich ajcxy mnejhuib co Cristo xymöhuaangixy it lugar tzajpjoty, paady ycixpi oy tunggix jigix Cristo jäygidägipy huidibi ajcxy mdumyb. ²⁵ Dios chaachytunipy pinjaty tundigooyb. Ca' Dios huin'ijxpety tzaachytunipy jäy.

4

¹ Miich ajcxy yajtumbidijc, yajtungix mdumbi nej ypadyii etz nej ytudägyity, com miich ajcxy mnejhuib co nañ miid miich ajcxy tüg mHuindzin jilby tzajpjoty.

² Jabom jabom Dios mibijctzoogix, ca' m'ixmajtzcixy Dios mibijctzoohuin. Huijy ycujc m'idipy ajcxy etz jatytim yajnajxcixy jäygidaacin ma Dios co anajty mgapxtaaccixy. ³ Nañ jadu'n miich ajcxy tun may'ajt mibijctzoogix Dios miid ich ajcxy ycixpi. Mibijctzoogix Dios co huen it lugar xymöhuiyich ma jëbi ngapxhuäcxyich Dios y'ayuc ytiy'ajt. Ngapxhuäcxyñich je Cristo ytiy'ajt huidibi jecy'ajty anajty ca' pin nejhuib. Miid co ngapxhuäcxyich Cristo ytiy'ajt, paady ycixp nyajpaadyich pujxtigoty. ⁴ Mibijctzoogix Dios miid ich ycixpi, jigix jëbi ngapxhuäcxyich je Cristo ytiy'ajt huadz oy, nej jäy ajcxy jëb huadz huinjihuigixy, jadu'n nej ypadyii ngapxhuäcxyibich.

⁵ Tiydudägy mdzináaygixipy miid yi jäy ajcxy huidibi ca' mibijccixy Cristo. Yajniguëxiccix miich ajcxy Dios ytung jabom jabom, ca' huaad xi tiempo myaj'ayoogixy. ⁶ Yi mgapxin yi mmiydaacin yajtungix oy'amy huindzigiñ'amy nej jëbi huaad jäy ajcxy jäygidaacixy. Copicy mhuinmayipy ajcxy jayijp nej jäy huaad m'adzoogixy.

Je capxpooxin huidibi cogixiyñip je ñecy

⁷ Tíquico co ñicxipy jim ma miich ajcxy, yi' xyyajmüdmüydáaccixipy tüg'óciy nej ytunyii yjadyii ma ich. Ooy ndzocy njihuüyich ich ajt nmigüg Tíquico. Yi' ooy tudägy ytuuñ quipxyi miid ich ajcxy ma ajt nHuindzin Jesucristo ytung. ⁸ Paady yam nguexyich Tíquico ma miich ajcxy jigix ajcxy xyajmüdmüydägipy nej yam ich ajcxy nyajpaatcixy, etz nañ jigix xyjotmicmigápxcixipy. ⁹ Quipxyi miid Tíquico yam nguexyich Onésimo, tüg ajt nmigüg huidibi ooy ndzocy njihuüyich, huidibi tudägy ti ytuuñ miid ich ajcxy. Onésimo miich ajcxy yi mmigogajp. Tíquico y Onésimo xyajmüdmüydägip ajcxy tüg'óciy tijaty tuunip jajtíp yam ma ich ajcxy.

¹⁰ Je Aristarco, huidibi pujxtijc iñayb quipxyi miid ich, cham quexy capxpooxin ma miich ajcxy. Marcos, je Bernabé y'uch, cham quexy capxpooxin nañ jadu'n ma miich ajcxy. Ti ich ayuc nguexyich jayhuin ma miich ajcxy co ixypy ñicxy Marcos ma miich ajcxy, mgöbigipy ajcxy agujc jotcujc. ¹¹ Nañ jadu'n je Jesús huidibi jäy ytijpy Justo, cham quexy capxpooxin ma miich ajcxy. Yi Aristarco, Jesús etz Marcos yi' ajcxy ni tugigpajc, judíojäy huidibi tumb miid ich ma Dios ytung co ngapxhuäcxyich Dios y'ane'min. Yi nidugügipi ich ooy ti xyajjotcuje'atyich. ¹² Je Epafras, miich ajcxy mmigogajp je Cristo ytumbi, nañ jadu'n cham quexy capxpooxin ma miich ajcxy. Je Epafras jabom jabom Dios mibijctzoy miid miich ajcxy ycixpi. Yi' mibijctzoo Dios co miich ajcxy cuydunda' tüg'óciy je Cristo y'ayuc ytiy'ajt, etz co nanyéjigix amumdügot ma Dios, e jadu'n ajcxy mguydunipy nej Dios tzocy. ¹³ Ich jëbi tiy'ajt nyecyich co Epafras ooy jotmay jihuüy miid miich ajcxy

ycixpi, etz nañ ooy nidajy nimay mïd yi' ajcxy ycixpi huidibi tzinaayb jim Laodicea etz jim Hierápolis. ¹⁴ Je Lucas, je doctor, huidibi je mibijcpidijc ooy tzojccixy ooy jihuuygixy etz Dimas nañ cham ajcxy quexy capxpooxïn ma miich ajcxy.

¹⁵ Yajnajxcix ñch ngapxpooxïn ma yi mibijcpidijc jim Laodicea. Nañ yajnajxcix ñch ngapxpooxïn ma yi Ninfas etz ma yi mibijcpidijc huidibi yöymujccixp ma yi' ytijc. ¹⁶ Co anajty jada necy ti mgapxtaaygixy, tungix may'ajt quejxnajxcix jada necy ma yi mibijcpidijc ajcxy jim Laodicea. Huen ajcxy nañ jadu'n capxcixy jada necy, nañ jadu'n miich ajcxy capxcix je necy huidibi ti nguexyich jim Laodicea. ¹⁷ Tungix may'ajt mñimähuipy je Arquipo co huen cuydundäy je tung huidibi ñch ajt nHuindzin je Cristo ti yajñibedyii.

¹⁸ ñch Pablo, ñch ci'm njaaybich jada capxpooxïn ma miich ajcxy. Ca' ajcxy mjäydgoyipy co ñch nbujxtijc iñäy. Huen Dios may'ajt oy'ajt tunipy mïd miich ajcxy ycixpi. Jadu'n ngapxcixyich. Amén.

1 TESALONICENSES

Yi Jayijp Necy Huidi San Pablo Yajniguejx Je Mibijcpidijc Jim Tesalónica

¹ Hich Pablo muid Silvano etz Timoteo cham nguexyich jada necy ma miich ajcxy jim Tesalónica huidibi yajpaatp ma Dios etz ma ajt nHuindzin Jesucristo. Huen hich ajt nDios Teedy etz ajt nHuindzin Jesucristo may'ajt oy'ajt tunipy muid miich ajcxy etz xyajjotcugiygixip.

Je mibijcin huidibi anajty yejcpy ijxpejt

² Jabom jabom hich ajcxy nyajnaxyich jäygidaaacin ma Dios muid tüg'óciy miich ajcxy ycixpi. Jabom jabom hich ajcxy Dios nmibijctzooyich muid miich ajcxy ycixpi nidüg'óciy. ³ Co Dios Teedy nmibijctzóoygixyich, chi njäyechich jadu'n nej miich ajcxy ti mmibijccixy Jesucristo, etz jadu'n nej oy mdungixy ma yi' ytung. Nañ njäyechich jadu'n nej oyyä'ajtin mdungixy etz jadu'n nej mdzojccixy mjihuuygixy mmigügtijc. Nañ jäyemjtzpich jadu'n nej miich ajcxy mjijp'ixy jabom jabom co hich ajt nHuindzin Jesucristo xymöhuaangixy it lugar jii by tzajpjoty, e ca' mnotmetzcuygixy. ⁴ Migügtijc ajcxy, hich ajcxy nejhuuyb co Dios xychojccixy xyjihuygixy, e nañ hich ajcxy nejhuuyb co Dios ti xyhuin'ijxcixy. ⁵ Co hich ajcxy jayhuin ngapxhuäcxy Jesucristo y' ayuc ytiy'ajt ma miich ajcxy, chi ca' jëyi Dios y'ayuc ngapxhuäcxich, nañ nduunich mjihuinma'ñ muid Dios yjihui'ñ ymic'ajt. Jotcujc nduunich ma miich ajcxy. Miich ajcxy mnejhuuyb co tudägy nduunich jigix jëbi mmijpidáaccixipy Jesús y'ayuc ytiy'ajt.

⁶ Oy anajty ooy mjayaj'ixhuidijtcixy mjayajpahuidijtcixy co Dios y'ayuc ytiy'ajt jemybi ajcxy ti mgöbijccixy, e chi ajcxy ti mbadüdigiygixy hich je n'ijxpejt, e nañ jadu'n ajt nHuindzin Jesús y'ijxpejt. ⁷ Co tzaachypi ti mmijnajxcixy ti myajnajxcixy muid Jesucristo ycixpi, chi tiy'ajt ti myejccixy ma tüg'óciy mibijcpidijc jim Macedonia naaxjot etz jim Acaya naaxjot jadu'n nej jëbi ajcxy nañ jadu'n mijpidaaccixy Jesucristo y'ayuc ytiy'ajt. ⁸ E jadu'n miich ajcxy ti myejccixy je ijxpejt muid Jesús y'ayuc ytiy'ajt, canan jëyi jim Macedonia etz Acaya, nañ ti myejccixy ijxpejt ma canaag'it naax cajp. Je mayjäy ti nejhuuydäy jadu'n nej miich ajcxy ti mmibijccixy Jesús y'ayuc ytiy'ajt, paady ycixpi ca' ycopicyity nicxy hich ajcxy njacyajnimäy je mayjäy jadu'n nej miich ajcxy ti mmibijccixy. ⁹ Je mayjäy ma canaag'it naaxcajp ooy ñaymuidmüydáacigixy jadu'n nej hich oy ngogapxyich miich ajcxy, etz nañ jadu'n nej hich miich ti xycöbijccixyich e nañ je mayjäy ñaymuidmüydáacigixy jadu'n nej ti m'ixmajtzcixy yi tzaadzech ojadadi, e ti mbadüdigiygixy je Dios juugypj janchypj etz tudägypj. ¹⁰ Nañ jadu'n je mayjäy ajcxy ñaymuidmüydáacigixy jadu'n nej miich ajcxy m'ahuijxcixy mjijp'ijxcixy co Jesús, Dios y'ung, yhuimbida'ñ ya naaxhuiñ, chona'ñ tzajpjoty. Je huidibi Dios ti yajjugypijc co ti y'ögy. Yi' je' je Jesús huidi ti xycohuaanim ma yi mijpi tzaachypi huidibi Dios yquexamyb muid co jäy ajcxy chach pocytungixy.

2

Pablo ytung huibidi anajty ymuid jim Tesalónica

¹ Migügtijc ajcxy, mnejhuuyb ajcxy co ca' ñaadig'aty, co hich oy ngapxhuäcxy Dios y'ayuc ytiy'ajt ma miich ajcxy. ² Miich ajcxy mnejhuuyb co jayijp ca'ni anajty nmechich ma miich ajcxy hich ajcxy ooy tzaachypi etz ayo'n ti

nyajnajxcixy jim Filipos. Ti jäy xyhuin'ojy xyjijp'ojyich. Co nmejchich ma miich ajcxy, ca' ñejity co tzaachypi ti nminaxyich ti nyajnaxyich jayijp, chi Dios ti xyajjotmicpicyich, jigix huinmic jotmic ngapxhuäcxibich Jesús y'ayuc ytiy'ajt. Ti ngapxhuäcxyich Dios y'ayuc ma miich ajcxy, oy ñich jäy anajty xyca'ixa'ñ xycatzoga'ñ. ³ Ca' ñich ngapxhuäcxyich anii, ni jibic ayuc, e ni ngamiydägyich jibic ayuc jibic huinma'ñ nej huaad nhuin'ingixy. ⁴ Ca' ti nhuin'ingixy. Dios ti xyajni bicyich co ngapxhuäcxibich yi' y'ayuc ytiy'ajt, e jadu'n nguyduuñich. Ca' nduuñich co huen jäy ajcxy jäygidägy ñich ndung. Jada janchtiy ndumybich jigix Dios jäygidägipy ñich ndung. Com Dios yi' ñejhuñyb nej jäy tüg'óciy yjot yhuinma'ñ müdity. ⁵ Miich ajcxy mnejhuñyb co ca' nyajxondaaccixy müd ayuc oyjatypi huidi ca' choobaady. Nañ ni ca' ñich ajcxy nhuinma'ñ 'ijxtäy nej jëbi ñich ajcxy nmeeybaat. E Dios nañ ñejhuñyb co yjanchity jada. ⁶ Nañ ni ca' ñich ajcxy njijp'ixy co jäy ajcxy xycömayipyich, ni miich ajcxy etz ni jac-huingbi jäy. Com je Cristo ti xyquexyich co ngapxhuäcxibich yi' y'ayuc, paady ycixp jëbi ixypy n'ane'myich co ixypy miich ajcxy xyajmij'atyich etz xypubetyich, per ca' jadu'n ti nduuñich. ⁷ Oygixy oy'amy ti nduuñich ma miich ajcxy, jadu'n nej tüg ungday müdity y'ung y'anäg müd oyjot oyhuinma'ñ. ⁸ Ti ñich miich ooy ndzojccixy njihuñygyixy, canan jëyi Dios y'ayuc ytiy'ajt ti nmooygixy, nañ naygïyegáanibich anajty ma yi' o'cin müd miich ajcxy ycixpi. ⁹ Co jayhuin ngapxhuäcxyich Dios y'ayuc ma miich ajcxy, mjäymejchpy miich ajcxy jadu'n nej ñich ajcxy nduuñ n'ayooyich anajty xim tzuum müd ñich ajcxy ngaayin n'uucin ycixpi. Ca' anajty n'adzibaangixy, paady ñich ajcxy nduuñ n'ayooyich xim tzuum müd ñich ajcxy ngaayin n'uucin ycixpi.

¹⁰ Miich ajcxy huidibi mibijcp mnejhuñyb ajcxy, e nañ ñejhuñyb Dios, co ñich ajcxy ndzinaayich ma miich ajcxy tudägy, huadz ñich anajty ajcxy njot nhuinma'ñ müdityich. Ca' ma ndundigooyich ajcxy nej pin xy'ocnihuambedipyich ajcxy. ¹¹ Mnejhuñyb miich ajcxy nej n'ñhuijcixy ngapxhuijcixy etz njotmicmigapxcixy nidüg nidüg, tim jadu'n nej tüg ungdeedy ñhuijy capxhuijy y'ung y'anäg. ¹² Ti ngapxhuijcixy co ooy chach copicyity co mdzinaaygixipy nej Dios jëbi jäygidägipy yi' mdzinaayin. Com yi' miich ajcxy ti xyhuin'ijxcixy jëbi mdigïygyixipy ma yi' chinaaydac, ma yi' müdity y'oy'ajtin ymij'ajtin.

¹³ Paady ycixpi nyajnajxpich jäygidaacin ma Dios jabom jabom, jadu'n nej miich ajcxy anajty ti mmido'mbijccixy etz ti mgöbijccixy Dios y'ayuc ytiy'ajt huidi ngapxhuäcxich ma miich ajcxy. Ti mmibijccixy anajty co ñich ajcxy ti ngapxhuäcxy Dios y'ayuc ytiy'ajt. Canan je' ti ngapxhuäcxyich ayuc huidi jäy ti cojy ti macxy. E janch tiy'ajt co Dios y'ayuc ytiy'ajt cham ytuñ ma miich ajcxy mjot mhuinma'ñ, miich ajcxy huidibi mibijcp. ¹⁴ Migügtijc ajcxy, jadu'n ti mjajtciy jadu'n nej yjajty müd je judíojäy huidibi anajty tzinaayb jim Judea co ajcxy mijpidägy Dios y'ayuc ytiy'ajt, chi je ymigogajp ajcxy ooy y'ixhuidijti ypahuidijti. ¹⁵ Je judíojäy ymidziptzoon ñich ajt nHuindzin Jesús, e chi yaj'o'cy ajcxy, tim jadu'n nej ajcxy y'ap yteedy yaj'o'cy huidijaty anajty Dios y'ayuc najtzcapxñyip jecy'ajty. Etz nañ jadu'n ajcxy xyajpidzimyich jim ma ajcxy judíojäy chinäy. Dios ca' jadu'n jäygidägy jadu'n nej ajcxy ytundigooy, nañ ooy ajcxy ymijotmädyii tüg'óciy jäy. ¹⁶ Yi' judíojäy ajcxy ti capx'adujccixy co ca' huaad ngapxhuäcxyich je Cristo ytiy'ajt ma yi' jäy ajcxy huidibi ca' yjudíojäyity, nej huaad ajcxy y'alma ñidzóoccixipy. Co jadu'n ajcxy ytundigooy, chi ajcxy ooy nigï ypocy ñibety ma Dios. Per Dios ti ooy chip y'ejin pidacy ma judíojäy müd ajcxy ypocy ycixpi.

Pablo ñijot'ajtp co nicxy cogapxihuaangixy yi mibijcpidijc

¹⁷ Migüctijc ajcxy, cham hueeni xi tiempo ti ñaxy ma ca' n'oc'íxcixni ajcxy, per ca' ich miich ajcxy njäydigoy. Ooy ich ajcxy nja'nicxa'ñ ma miich ajcxy jadüg'oc, e ca' y'oyiy nej ich ajcxy nicxiybich ma miich ajcxy. ¹⁸ Ooy ich ajcxy njanicxa'ñ anajty ma miich ajcxy. E ich, Pablo, ci'm anajty njanicxa'ñich mejtz'oc tugig'oc, e je mujcu' nnii'aa ndü'aa ti xy'adujcich. ¹⁹ ¿Ti mij'ajt miich ajcxy mdiy njjip'ijxpich? ¿Ma mdiy ajcxy nbada'ñich njotcujc'ajtin n'oy'ajtin? Co anajty ajt nHuindzin Jesucristo yhuimbity ya naaxhuiñ, nbadaamybich jotcujc'ajtin etz oy'ajtin mij'ajtin müd je tibi nduunich ma miich ajcxy co ti mmijpidaaccixy Dios y'ayuc ytiy'ajt. ²⁰ Müd miich ajcxy ycixpi nmüdich jotcujc'ajtin etz xondaacin.

3

¹⁻² Müd jada tajin mayin co ich anajty ca' nmimadäga'ñ müd miich ajcxy ycixpi, paady ich ajcxy nhuinma'ñ nbidägy co jëbi nhui'ma'ñich naydüg jim Atenas, etz jëbi nguexyich ich ajt nmigüg Timoteo ma miich ajcxy. Timoteo nañ jadu'n ytuñ ma Dios ytung quipxy müd ich co ngapxhuäcxyich je Cristo y'ayuc ytiy'ajt oybi. Yi Timoteo ñigapxpedipy ich n'ayuc etz xyjotmicmigapxip ajcxy, jigix jac mic ajcxy myajpaadip ma mmibijcin. ³ Jadu'n Timoteo ytunipy ma miich ajcxy jigix ca' mhuinma'ñtigóoygixip müd je tzaachypi huidibi ajcxy mmijnajxyp myajnajxyp. Miich ajcxy mnejhuüyb co copicy myajnaxipy ajcxy tzaachypi müd Jesucristo ycixpi. ⁴ Co oga'n n'ijtyich ma miich ajcxy, chi ich miich ajcxy nnimaayich co tzaachypi mmijnáxcixipy myajnáxcixipy müd Jesucristo ycixpi. E miich ajcxy cham mnejhuüygyxyp co janch tiy'ajt jadu'n nej nnimaaygixy, müd co cham tzaachypi mmijnajxcixy myajnajxcixy. ⁵ Com nejhuüybich co tzaachypi mmijnajxyp myajnajxyp ajcxy, paady ycixpi tajpich maybich müd miich ajcxy ycixpi. E com ca' nmimadäga'ñich je tajin je mayin, paady ycixp ti nguexyich Timoteo ma miich ajcxy jaydëbi tiy'ajt xypaadibich pen tiydudägy miich ajcxy mmibicy. Tzigüybich anajty co ndiy je mujcu' ti xyajhuinma'ñtigooygixy, etz jadu'n anajty ñaadig'ada'ñ ich ndung ma miich ajcxy.

⁶ Jadachambi Timoteo ti xyñihuimbityich, chooñ ma miich ajcxy jim Tesalónica, etz ti xyajnejhuüyich jadu'n nej miich ajcxy mmüdity mmibijcin, etz nañ ti xyajnejhuüyich jadu'n nej mnaychójcigixy mnayjihuiüyigixy nidüg nidüg. Timoteo nañ jadu'n xyñimaaybich jadu'n nej miich ajcxy xyjäymechich etz xychocy xyjihuiüyich, etz nañ ooy miich ajcxy xyja'ixáangixyich jadüg'oc, jadu'n nej ich miich ajcxy nañ jadu'n ooy nja'ixaangixy. ⁷ Migügtijc ajcxy, ooy capxy agujc ayuc agujc nyajpaadyich. E co Timoteo ti mimiñ je oybi ayuc tiy'ajt jadu'n nej miich ajcxy mjacpanicy tiydudägy yi mibijcin, chi mij ooy ti njotcugiyich. ⁸ Jadachambi jëbi njactzinäyich jotcujc, com ti nnejhuüyich co miich ajcxy ca' m'ixtigihuäccixy ma mmibijcin. ⁹ Nyajnajxpich jäygidaacin ma Dios yhuinduu müd miich ajcxy ycixpi, müd co janch jotcujc nayjihuiüyijich co miich ajcxy ca' m'ixtigihuägy ma mmibijcin. ¹⁰ Xim tzuum nmibijctzooyich Dios müd tüg'óciy njot nhuinma'ñich, jigix Dios xyaj'ahuáatzibich nnii'aa ndü'aajich, jëbi nicxyich ci'm ma miich ajcxy, jaydëbi njacyaj'ijxpigipy ajcxy Dios y'ayuc ytiy'ajt, e jadu'n jëbi ajcxy mjacyajca'pxy mmibijcin ma mjacyajtigoy'ijtcixy.

¹¹ Njijp'ijxypich co Dios Teedy ci'm etz ajt nHuindzin Jesús xyaj'ahuáatzibich nnii'aa ndü'aa jigix nicxy n'ijxcixy jadüg'oc. ¹² Ich ajcxy ndzojcpy co ajt nHuindzin Jesucristo xyjacmóoygixipy tzojcin jihuüyin, jigix nigü ajcxy mnaychogüyb mnayjihuiüyib miñ xyipy, e nañ nigü mdzójcixipy

mjhuiyigixipy tüg'óciy je mayjäy, tim jadu'n nej ich miich ajcxy ndzocy njhuüy. ¹³ Ich ajcxy ndzojcpy co Dios xyaj'ijtip ajcxy mjot mhuinma'n tücci'y ma Jesucristo ytiy'ajt, e ca' m'ixtigihuaccixy, jigix co anajty ich ajt nHuindzin Jesús ymiñ jadüg'oc ya naaxhuiñ miid tüg'óciy je mibijcpidijc huidibi miid huadz yjot yhuinma'n, jëbi miich ajcxy mnayguëxigiyb ma Dios Teedy yhuinduu miid huadz mjot mhuinma'n, ca' ti xihuñ ma Dios miid miich ajcxy.

4

Je tzinaayin jugy'ajtin huidibi Dios yjäygidacyp

¹ Jadüg nax, migügtijc ajcxy, jadachambi may'ajt nbijctzooyich, e nyajnbijccixy miid ajt nHuindzin Jesucristo ycixpi co ajcxy mjaccuychinahuipy Dios y'ayuc ytiy'ajt, jadu'n nej ti nyaj'ixpicoyich miich ajcxy, etz mjactzinahuipy ajcxy jadu'n nej jëbi Dios jäygidägy ajcxy mdzinaayin, jadu'n nej ti mdungixy.

² Miich ajcxy mnejhuüyb je cötujcin huidibi ti nyaj'ixpijccixy. Jada cötujcin ich ajt nHuindzin Jesucristo ti xyajnbicyich. ³ Miich ajcxy mnejhuüyb je cötujcin jadu'n nej Dios tzocy co huadz jot huadz huinma'n myajtungixipy ma yi mdzinaayin mjogy'ajtin. Ca' huaad mmigapxtigooygixy tüg töxyjäy.

⁴ Miich ajcxy mnejhuüyb Jesús ycötujcin co copicy nidüg nidüg yëydijc pigipy tüg töxyjäy etz yajmij'adip ytöxyijc, etz nañ miiddzinahuipy miid oyjot oyhuinma'n. ⁵ Ca' Dios jadu'n tzocy co je yëydijc nijot'aty töxyjäy miid jibichuinma'n, jadu'n nej yi jäy ajcxy y'idich huidibi ca' nejhuüy Dios ytiy'ajt.

⁶ Ca' huaad ni pin migapxtigooyi ymigüg ytöxyijc, com Dios y' tzaachytunib mijcajee pinjaty migapxtigooyb ymigüg ytöxyijc. Jada cötujcin ti nyajni'ixiygixy jayhuin. ⁷ Com Dios jadu'n ti xyhuin'ixim jigix oyjot oyhuinma'n ndunim, canan co ndunim jibic jot jibichuinma'n. ⁸ Co tüg jäy ytundigooy miid huingbi töxyjäy huidibi ca' töxyijc'adyii, hue' je' ñixiicpy yajxiicpy Dios ycötujcin, canan jäy ycötujcin ñixiicpy yajxiicpy, e nañ ñixiicpy yajxiicpy je Espíritu Santo huidibi Dios ti quexy ma ich ajt.

⁹ Miich ajcxy mnejhuüyb je cötujcin co copicy mdzogipy mjihuühuipy ajcxy mmigügtijc huidibi tzinaayb jim Macedonia ñaaxjot. Migügtijc ajcxy, may'ajt nbijctzooybich co jacnaychójcigix jacnayjihuüyigix. ¹⁰ Janch tiy'ajt jadu'n co miich ajcxy ndzocy mjihuüy tüg'óciy je migügtijc huidi tzinaayb jim Macedonia ñaaxjot. Nmigügtijc ajcxy, may'ajt nbijctzooybich co jacnaychójcigixy nayjihuüyigixy etz mnayyajmij'ajtigixy mij cajee. ¹¹ Jatyim tzinaaygix nicy xeemy, agujc jotcuyc. Pidäg ajcxy mjot mhuinma'n ma mgi'mdzinaayin, etz nañ jatyim naymidúunigix. Jada tiy'ajt ti najtzcapxiiyi ajcxy jayhuin. ¹² Tungix mgi'mdung, jigix yi jäy ajcxy huidibi ca' ymibicy xyajmij'adip ajcxy, etz nañ jadu'n ca' myajmayjadipy ajcxy ni ti.

Co anajty je Huindzin Jesús ymiñ ya naaxhuiñ jadüg'oc

¹³ Migügtijc ajcxy, ndzojcpyich co miich ajcxy mhujnhuühuip je tiy'ajt ma je' yajpaady y'alma je migügtijc tiibi y'occixy, jigix ca' mdajcixipy mmäyigixipy, jadu'n nej je jäy ajcxy nidajcixy nimaygixy huidibi ca' mibijccixy co Jesús yajjugypiga'n jadüg'oc je tiibi ajcxy y'o'ccixy. ¹⁴ Jadu'n nej ich ajt nmibijcim co Jesús yjugypijcy co y'o'cy, nañ jadu'n Dios yajjugypijctähua'n je öcpidijc huidijaty ajcxy mibijc Jesús.

¹⁵ Paady ycixpi ich miich ajcxy nnimaaygixy co ajt nHuindzin Jesús tiy'ajt ti yecy co ich ajt huidibi jacjugy'ajtp co anajty Jesús yhuimbity ya naaxhuiñ, tügmucy xyajnicxaanim miid yi mibijcpidijc tiibi y'o'ccixy. Ca'

ich ajt njayijp'adaanim yi tibi y'o'ccixy, yi' ajcxy jayijp'adamb. ¹⁶ Ich ajt nHuindzin Jesús c'm yhuimbida'n ya naaxhuiñ chona'n tzajpjoty mid ycotujcin, mid ymic'ajtin, e yi' mic capxamb ane'mamb. Huimbidamb Jesús quipxyi mid tüg ángel mijtungmidpi huidibi nañ jadu'n mic capxamb ane'mamb. E co anajty yhuimbity, chi Dios yajxuxa'n yi' ytrompeta, e tim huin'itiy Jesús xyajpidictáhuaanim ya naaxhuiñ, e chi ajt naybadaanim mid Jesús jocjoty. ¹⁷ E chi ich ajt huidijaty anajty jactzinaayim, naybadaanim mid ajt nHuindzin Jesús jocjoty quipxyi mid je'ajcxy huidibi anajty ti yjugypicy jadüg'oc. E jadu'n ndzináhuaanim huinixi huinitempo mid ajt nHuindzin Jesús. ¹⁸ Mid jada ayuc tiy'ajt nayyajotcugiyigix miñ xyipy.

5

¹ Migügtijc ajcxy, ca' ycopyity njacnijayiygixipy jadu'n nej je xii je tiempo yca'pxa'n. ² Miich ajcxy mnejhuib co ich ajt nHuindzin Jesucristo yhuimbida'n ya naaxhuiñ tzaachytuna'n yi mayjäy mid ypocy ycixpi. Jesús miinaamb mina anajty je mayjäy ca' ti ocijp'ijxni. Jadu'n ymiina'n jadu'n nejjihuüy tüg meetzpi ymiñ coodz co ymeedza'n. ³ Co anajty je mayjäy ymiinaangixy: "Cham ooy jotcujc ndzinaayim, ca' ma tzip capxy", chi timitiina jotcömoñi Dios yajtigoya'n je naaxhuiñybi. Timitiina ayo'n ñimiinib jäy ajcxy. Tim jadu'n nipaady nej töxyjäydijc timitiina ypa'mbety co tiempo ti yhuaad'ajtni co y'ung yajma'xung'ada'n. E ni pin huaad cacöguëgipy je tzaachypi co Dios anajty ymiñ ya naaxhuiñ yajtigoydähua'n yi mayjäy. ⁴ Per migügtijc ajcxy mid miich ajcxy Dios ytiy'ajt, paady miich ca' jadu'n myajpáatcixni nejjihuüy mdzinaangixy agootztuuby. Ca' ajcxy mgixipy mgüedípy mina anajty Jesús miñ jotcömoñi, jadu'n nej jäy nigoobi ycixy ycuery co ti ymeechyii. ⁵ Com tüg'óciy miich ajcxy Dios y'ayuc ytiy'ajt mhuinjihuüygy, jadu'n nipaady jadu'n nejhuy ti mgoximiygy ti mgodixccixy. Ich ajt ca' njacyajpaatim agootztuuby. ⁶ Paady ycixpi ca' huaad njäyigooyim Dios ytiy'ajt, ca' huaad nmi'öctigooyim jadu'n nej yi jacjaydyii jäy ajcxy huidibi ca' cuenditüñ Dios y'ayuc ytiy'ajt, jadu'n yi' ajcxy nipaady jadu'n nejjihuüy ajcxy ti ymi'öctigoy. Ijtcix ni'ixi mid tüg'óciy Dios y'ayuc ytiy'ajt. Mi'ijtcix huivy cujc mjot mhuinma'n. ⁷ Yi jäy ajcxy huidibi maab, coodz ajcxy ymäy. Yi jäy ajcxy huidibi muucip, coodz ajcxy ymúucigixy. ⁸ Ich ajt huidibi nnejhuüyim Dios ytiy'ajt, copy huivy ycujc ajt ndzinaayim, e nañ copy nmibijcim Jesucristo e nañ naychójigix nayjhuüyigix miñ xyipy, jadu'n nipaady nej soldadtijc ñaygohuáangixy mid pujx huidibi ymid ma ycaach. E mid co njijp'ijxim co Dios xyajnidzögaanim ajt n'alma, jadu'n nipaady nejjihuüy soldadtijc ñaygohuáangixy mid ypujxcójup. ⁹ Com Dios xyajjugy'ajtim co xychaachytunaanim xyajtigoyaanim, Dios xyajjugy'ajtim nej n'alma jébi paatim ndzoocin co nmijpidaacim ich ajt nHuindzin Jesucristo. ¹⁰ Jesucristo ti y'ögy mid ajt nbocy ycixpi, jigix jébi huaad ndzinaayim jilby tzajpjoty quipxyi mid yi', ca' ñejity pen ti anajty n'o'cim o pen jiini anajty njugy'ajtim co anajty Jesucristo yhuimbity ya naaxhuiñ. ¹¹ Paady ycixpi jacnayjotmicmigápxigix, e nañ jacnaybubéjtigix nidüg nidügti, tim jadu'n nej cham mdungixy.

Pablo capxhuijy yi mibijcpidijc ajcxy

¹² Migügtijc ajcxy, may'ajt nbijctzooybich co yajmij'ajtcixy ajcxy yi migügtijc huidibi tumb ma miich ajcxy mid Dios y'ayuc ycixpi. Yi' ajcxy huidibi xyajni'ixiyb Dios y'ayuc ytiy'ajt, yi' ajcxy xycapxhuijip mid ajt nHuindzin Jesucristo y'ayuc ytiy'ajt. ¹³ Copy myajmij'ajtcixipy ooy, etz nañ mdzójicixipy

müid je Dios ytung ycxipi hüidibi ajcxy ytumyb ma miich ajcxy. Tzinaaygix jotcuje ca' ma tzip capxy.

¹⁴ Nañ jadu'n, migügtijc ajcxy, nyajñibijcipy ajcxy co myaj'ojip yi migüg ajcxy hüidibi ca' ti dung tuna'ñ, etz nañ mjotmicmigapxip hüidibi ajcxy tajp maayb, etz nañ mbubedipy ajcxy hüidibi hueeni müid ymibijcin, etz yajtungix mecxtujcin müid tüg'óciy migügtijc.

¹⁵ Hich miich ajcxy nimaayb co ca' ni pin huaad yaj'ahuimbidip jibic ma ymigüg hüidibi ti ymidundigoyii. Nañ jadu'n nimaaygixy co naymi'oyjäy'ájtigix nidüg nidügti. Nañ jadu'n oyjäy'ajtin mdunipy ajcxy müid tüg'óciy naaxhuiñyây.

¹⁶ Jatytim müid'ajtcix jotcuje'ajtin jabom jabom. ¹⁷ Capxtaaccix etz mibijctzoogix Dios jabom jabom. ¹⁸ Yajnajxcix jäygidaacin ma Dios pen ji ajcxy mjajtcixy ayogixy nejaty, com Dios ooy yjotcujeity co je migügtijc hüidibi mibijcp Cristo Jesús yajnaxy ajcxy jäygidaacin ma yi' jabom jabom müid tüg'óciy hüidibi tuunip jajtíp ma yi' ajcxy.

¹⁹ Capxymidoogix je Espíritu Santo, co ngacapxymidoohuim je Espíritu Santo huin'it nyajtigooyim Dios yjihui'ñ ymic'ajt hüidibi yajpatp ma hich ajt. ²⁰ Yajjotcuje'ajtcix huenpinity pin Dios y'ayucpidzimb ma miich ajcxy. ²¹ Jeyi janchtiy m'ixipy peni quipxyiyb müid Dios y'ayuc hüidibi ajcxy ycapxyp. Mijpidaaccix je ayuc tiybi. ²² Ixmajtzcix tüg'óciy jibic ayuc jibic-huinma'ñ.

²³ Dios nmibijctzooybich, je Dios hüidibi yejcpy jotcuje'ajtin, co ajcxy xya-jhuaatztaayip mjot mhuinma'ñ ma yi jibicpi. Dios nmibijctzooybich co yi' ci'm xycuendi'ajtip huadz oy yi m'alma ajcxy, etz yi mjihui'ñ, etz mnicx mgohuajc, ca' ma pocy yquëxigy, ixti mabaad anajty hich ajt nHuindzin Jesucristo ymiñ ya naaxhuiñ. ²⁴ Je Dios hüidibi ti xyajmibijccixy, tudägy yi', e ycuydunipy yi' y'ayuc müid miich ajcxy.

Capxpooxñin hüidibi cijxnip je necy

²⁵ Migügtijc ajcxy, mibijctzoogix Dios müid hich ajcxy ycxipi.

²⁶ Naygapxpóocxigix xic xon nidüg nidüg müid oyjot oyhuinma'ñ.

²⁷ Nhuindzin Jesucristo ajt ti xyajñibicyich jada tung, paady nyajñibijccixy co jada necy mgápccixipy ni'abidzimy ma tüg'óciy mibijcpidijc.

²⁸ Dios nmibijctzooybich co hich ajt nHuindzin Jesucristo xyconuucxip ajcxy. Jadu'n jada. Amén.

2 TESALONICENSES

Yi Mimetz Necy Huidi San Pablo Yajnigujx Je Mibijcpidijc Jim Tesalónica

¹ Ich Pablo müd Silvano etz Timoteo cham nguexyich jada necy ma je migügtijc huidibi ajcxy jim Tesalónica yajpatp, etz yajpatcixy ma ich ajt nDios Teedy etz ajt nHuindzin Jesucristo. ² Huen ich ajt nDios Teedy etz ich ajt nHuindzin Jesucristo may'ajt oy'ajt tunipy müd miich ajcxy etz xyajjotcugiygixip.

Dios tiydunipy yi pocyjäydijc ajcxy co anajty Cristo ymiñ jadug'oc

³ Migügtijc ajcxy, njatytimyajnajxypich jabom jabom jäygidaacin ma Dios müd miich ajcxy ycixpi. E jadu'n copicy nyajnaxyich jäygidaacin ma Dios, com miich ajcxy mibijcxy Jesucristo nigü jabom jabom, etz nañ nigü jabom jabom naychójcigixy nayjihuiyigixy nidüg nidüg. ⁴ Com miich ajcxy ooy nuucxy meecxy m'ijtcixy ma yi tzaachypü etz ayo'n huidibi ajcxy mminajxyp myajnajxyp, e nañ ooy mmijpidaaccixy Jesucristo, paady ycixpi ngapx-paadyich miich ajcxy ma yi migügtijc huidibi mijpidaacp Dios majaty tüg tüg cajp. ⁵ Miich mmibijcin etz mmecxtujcin yi' je' ijxpejtíp co Dios ytudägyity müd ajcxy ytiyduunin, e xycöbijccixy co jëbi mdigüygixipy ma yi y'ane'mdac müd mmibijcin ycixpi. Müd jada ycixpi miich ajcxy mminajxcixy myajnajxcixy tzaachypü ayo'n.

⁶ Müd co Dios ytudägyity, yi' tzaachytunamb yi jäy ajcxy huidibi miich ajcxy xy'ixhuidijtp xypahuidijtp. ⁷ E nañ yi' ajcxy xymöhuipy jotcuyc'ajtin tim jadu'n nej xymöhuáangixyich jotcuyc'ajtin je huin'it xü co anajty ajt nHuindzin Jesucristo ñayguexigyü co anajty miñ ya naaxhuiñ jadüg'oc choñ anajty tzajpjoty. Nañ je ángeles ajcxy mic'ajt müdpü miinaamb quipxy müd Jesucristo. Miinaamb Jesús müd ane'min cötujcin e yajtigoydähua'ñ pocyjäydijc, tim jadu'n nej tüg mijjin yajhuindigoydäy huen ytiijity. ⁸ Jesucristo chaachytunamyb je mayjäy ajcxy huidibi ca'p cöbicy Dios, etz huidibi ca' mijpidägy ajt nHuindzin Jesucristo y'ayuc ytiy'ajt oybi. ⁹ Yi jäy ajcxy huidibi miich ajcxy xy'ixhuidijtp xypahuidijtp, Dios yi' tzaachytunaanip ajcxy y'alma huinixü huinitempo. Dios ypidägaanip yi' ajcxy y'alma jigüegy ma ni camanaxü ajcxy ijxcixyp je nHuindzin Jesucristo etz yi' y'oy'ajtin etz ymic'ajtin. ¹⁰ Jadu'n yjadipy je huin'it xü huin'it tiempo co anajty ajt nHuindzin Jesús miñ ya naaxhuiñ, Jesús je mibijcpidijc yajmij'ada'ñ etz huindzigihua'ñ, e nañ jadu'n miich ajcxy myajmij'adipy etz mhuindzigihuipy müd co anajty y'ayuc ajcxy ti mmibijcci, je ayuc huidibi ti ngapxhuäcxyich ma miich ajcxy.

¹¹ Paady ycixpi jabom jabom Dios nmibijctzooyich müd miich ajcxy ycixpi, jaydëbi tudägy ajcxy mdzinähuiipy, e Dios huidibi ti xyhuin'ijxcixy yjäygidägyipy yi' miich ajcxy mdzinaayin. Nañ jadu'n Dios nmibijctzoogixy müd jada ycixpi co yi' cuydunipy huidibi miich ajcxy mbijctzooyb m'amidooyb müd oyjot oyhuinma'ñ. E nañ ycuydunipy yi' huidibi miich ajcxy mdumyby müd mmibijcin. ¹² Com Dios jadu'n tunamb ma miich ajcxy mjot mhuinma'ñ, paady ycixpi ajt nHuindzin Jesucristo yxü capxpaady y'idipy ma miich ajcxy mdzinaayin etz nañ jadu'n miich ajcxy capxpaady m'idipy ma Jesucristo. Jadu'n yjadipy com ich ajt nDios etz ajt nHuindzin Jesucristo may'ajt oy'ajt tuñ ma miich ajcxy.

2

Je jibic jäy huudibi huin'imb mayjäy

¹⁻² Migügtijc ajcxy, cham nyajmüdmiydaaccixy je xii je tiempo co anajty ajt nHuindzin Jesucristo huimbidaanü jadüg'oc ya naaxhuiñ, etz naybadaanim müd yi'. Nminucxtaacyich müch ajcxy, ca' mhuinma'ñyitigooygixy co pinjaty ymina'ñ co Jesucristo ti yhuimbity. Ca' mmibijccixy, ca' jada ayuc yjanchity. Ca' mdungixy cuendi yi jäy ajcxy y'ayuc huudibi minamb co tüg espíritu ti yajnejhuuygixy co yjadu'nity, o co muum a'ijxnaxy amidoonaxy capxy ayuc, o co muum ijxpizimy jada ayuc ma tüg necy huudibi ajcxy ytijpy co ich nnecy'adyii. ³ Ca' myajhuin'ingix janch ni nej. Jayijp ca'ni anajty je xii je tiempo yhuaad'atyñi ma anajty Jesucristo ymiina'ñ jadüg'oc ya naaxhuiñ, mayjäy ajcxy midziptzona'ñ Dios tiydudägy co ñayguëxigiyb tüg jibic jäy mic jäy huudibi Dios yajcödigoyamy tücc'yi. ⁴ Jada jibic jäy ymidziptzonamyb tüg'óciy tijaty huudibi jäy Dios'ajtpy, e nañ ymidziptzonamyb huudibi jëbi yaj'ojadaty. E nañ yi' naybidägiib amij agix jadu'n nejhuüy yjacmijity ca'ydi Dios. E nañ yi' ypidägamb y'ane'mdac ma Dios ytijc, e naybidägaanip nejhuüy Diosity.

⁵ ¿Nej ca' mjäymejtzcixy co jadu'n nimiydacyich tüg'óciy jada tiy'ajt jayhuin je taab anajty n'ityich ma müch ajcxy? ⁶ Jadachambi müch ajcxy mnejhuüyb pin yajhuäcxijp jada mic jäy jada jibic jäy, jigix ca'ydi ñayguëxigyii jayijpni ma ca'ni tiempo yhuaad'atyñi mina Dios a'ixihuüp co ymiinipy. ⁷ Je mic jäy je jibic jäy cham ñi'ixiiyb ameech je jibicpi huudibi ytunamyb, jëyi ytigoy'ityñi mina je tü'aa y'ahuächyii, je huudibi yajhuäcxijpip. ⁸ Co anajty je jibic jäy ytü'aa y'ahuäch, chi ajt nHuindzin Jesús yajcödigoyipy müd tüg puxujin. Jesús yajcödigoyipy je jibic jäy müd yi' y'oy'ajtin etz ymij'ajtin co anajty yhuimbity ya naaxhuiñ. ⁹ Je jibic jäy, yi' je' ymüid je mujcu' yhuinma'ñ etz ymic'ajt, e ytunamyb mijhuinma'ñ etz ijxpejt huudibi anijip. ¹⁰ Je jibic jäy ytunamyb tüg'óciy tijaty jibic-huinma'ñ jigix jëbi huin'iniip yi jäy ajcxy huudibi y'alma tigoyipy, müd co ca' ajcxy cöbijccixy, e nañ ca' tzojccixy Dios y'ayuc ytüy'ajt huudi müd jëbi y'alma ñidzooccixy. ¹¹⁻¹² E je' ycixpi co ca' ajcxy cöbiga'ñ Dios ytüy'ajt, paady Dios y'ixmadzáanigixy huen yajhuin'ingixy, huen mibijccixy je mujcu' y'anii, e müd jada ycixpi jëbi Dios yajtigooyi yi' ajcxy y'alma nidüg'óciy huudibi ca' mibiga'ñ Dios ytüy'ajt. Jacjotcuyc ajcxy co jibic-huinma'ñ tungixy.

Je jäy ajcxy tibi Dios yhuin'ixyü jigix ypocyñihuädziipy

¹³ Migügtijc ajcxy huudibi ajt nHuindzin Jesucristo ooy tzocy jihuüy, jabom jabom nyajnaxyich jäygidaacin ma Dios müd müch ajcxy ycixpi, müd co Dios ti xyhuin'ijxcixy oga'n'aty, jigix jëbi m'alma ñidzooccixy müd Dios yjihui'ñ ymic'ajt, etz nañ müd Dios y'ayuc ytüy'ajt huudibi ti mmibijccixy. Je Dios yjihui'ñ ymic'ajt xyajhuaatzip ajcxy mjibicjot mjibic-huinma'ñ. ¹⁴ Paady ycixpi Dios ti xyhuin'ijxcixy, e nañ xyajmibijccixy müd yi' y'ayuc ytüy'ajt huudibi ich ajcxy ngapxhuäcxyp, jigix jëbi mbáatcixipy oy'ajtin ma ich ajt nHuindzin Jesucristo.

¹⁵ Paady migügtijc ajcxy, mibijccix tiydudägy, ca' m'ixtigihuäccixy, e ca' mjäydigoygixy je tiy'ajt huudibi ich ajcxy ti ngapxhuäcxy ma müch ajcxy, etz jadu'n nej ti nnimaaygixy necyjoty. ¹⁶⁻¹⁷ Huen ich ajt nHuindzin Jesucristo ci'm etz ajt nDios Teedy may'ajt oy'ajt tunipy müd müch ajcxy, e xya-jjotmicpijccixipy etz xyajmibijccixipy tiydudägy, jigix oybi ayuc mgápccixipy etz mdunipy ajcxy tüg'óciy oybi huinma'ñ. Ich ajt nDios Teedy etz ich ajt nHuindzin Jesucristo xychojcm xyjihuyim, e ti xymooyim jotcuyc'ajtin

huinixibi, e nañ ti tuñ may'ajt oy'ajt mïd ïch ajt ycixpi, jaydëbi njijp'ijxim oy'ajtin jiiyby tzajpjoty.

3

Mibijctzoogix Dios mïd ïch ajcxy ycixpi

¹ Jadügnax, migügtijc ajcxy, tungix may'ajt mibijctzoogix Dios mïd ïch ajcxy ycixpi, jigix jëbi ngapxhuäcxibich huinmic jotmic Jesús y'ayuc ytiy'ajt huingnaax huinggajp. E nañ mibijctzoogix Dios jëbi yi jäy ajcxy mijpidägipy Jesús y'ayuc ytiy'ajt oybi, tim jadu'n nej miich ajcxy ti mmijpidaaccixy. ² Nañ mibijctzoogix Dios mïd ïch ajcxy ycixpi, jigix ïch ajcxy Dios xyñihua'nipy xcohua'nipy ma yi jäy ajcxy huidibi jibic-huinma'ñ ymïd, huidibi jibic ïch ajcxy xytunamb, com mayjäy ca' mijpidägy Jesús y'ayuc ytiy'ajt. ³ ïch ajt nHuindzin Jesúcriso tudägy yi', e xypubedip xypudigihuij ajcxy jigix miich ajcxy ca' mjetmetzcïhuipy ma yi mmibijcin, e nañ xypubedip ajcxy, jigix ca' xymimadáaccixipy je jibicjäy huidibi Dios ca' capxymïdoy. ⁴ ïch ajt nHuindzin Jesús jotcuyc'ajtin ti xymóoygixyich mïd miich ajcxy ycixpi. Nmibijcipyich co miich ajcxy mguydumyb je Dios y'ayuc ytiy'ajt huidibi nyaj'ixpijccixy etz mjaccuydunaamyb ajcxy. ⁵ Com ca' ïch njaty nej njijpcogapxihuibich, chi nguejxyich cogapxy, nnejhuñhua'ñich nej anajty ajcxy myajpatcixy ma yi mibijcin, tzigiïyb ïch anajty co nicxy mujcu' xypidaaccixy jibictuum, chi ïch anajty ajcxy ndung ti ñaadigi'aty.

Ooyycopicyity co nduunim ma ajt ndung

⁶ Migügtijc ajcxy, mïd ajt nHuindzin Jesús yxi etz ymic'ajt jada ane'min ajcxy nyajnibijcipy, co copicy ajcxy m'ixmadzipy yi mmigüg huidibi ca' ytuna'ñ ma ycïmdung, etz huidibi ca' cuyduñ Dios ytiy'ajt jadu'n nej ïch tiy'ajt ti nyecy. ⁷ Miich ajcxy mnejhuïyb jadu'n nej ïch ti ndzinäyich ti njugy'atyich co ti n'ityich ma miich ajcxy. E jëbi tiy'ajt ajcxy mbigipy ma ïch ndzinaayin nej jëbi miich ajcxy mdzinaaygixy. Co anajty ïch njimity ma miich ajcxy, ca' ïch n'ixmajch ngi'mdung. ⁸ Tüg'óciy ïch ajcxy ngaayin n'uucïn ngojuuyich. Nduñ n'ayooyich anajty xim tzuum, co anajty ca' n'adziba'ñich ni tüg. ⁹ Dios ti xymöyich mic'ajt ane'min co ixipy ajcxy mbubejtin ti nbijctzoohui o ti nbijctzoohui ixipy ajcxy mgaayin m'uucïn, per ca' ïch ajcxy jadu'n ti ndungixyich, jigix ijxpejt ajcxy mbigipy ma ïch ajcxy. ¹⁰ Com co anajty n'ityich ma miich ajcxy jada cötujcin ajcxy nyajnibijc co pinjaty ca' ytuna'ñ, ca' ajcxy myajcayipy myaj'ügipy. ¹¹ Jadu'n ïch ti nnejhuïy co nijëjity miich ajcxy ca' mdunaangixy mgi'mdung, jëyi myöygixy mnajxcixy jäyjin jäydijc. ¹² Yi jadu'mbi jäy ajcxy nyajnibijcipyich mïd ïch ajt nHuindzin Jesús yxi co huen tungixy jabom jabom ma ycïmdung, ca' huaad pin adzijpcix anajxcix jigix jëbi paadip ajcxy ycaayin y'uucïn.

¹³ Migügtijc ajcxy, oybi jatyim tungixy jabom jabom, ca' mjetmetzcïygixipy. ¹⁴ Pen nidügti ma miich ajcxy ca' tuñ cuendi jada ayuc huidibi ajcxy nyajni-jayïyb, ijxcix pin je', e chi ca' mjactungixip cuendi, e ni ca' mïd myöymujc mnaxmujcixipy, jigix chöydunipy. ¹⁵ Ca' ajcxy huaad midzip'ajtcixy yi jäy ajcxy huidibi ca' yajxon cuyduñ Dios ytiy'ajt. Hue' janchtiy mgapxhuijcx oy'amy jadu'n nej tüg mibijcpi.

Capxpoocxin huidibi cijxnip je necy

¹⁶ Huen ïch ajt nHuindzin Jesucristo huidibi jotcuyc'ajtin yejcp, ci'm xya-jjotcugïygixipy jabom jabom oytim minaaxijity oytim yma'amyity. Huen je Huindzin Dios xypubejtcixy xypudigïygixy.

¹⁷ Hich, Pablo, jada capxpooocxin ci'm njaayich. Jadu'n nfirmajiyich tüg'óciy hich nnecy, e jadu'n miich ajcxy mnejhuñhuipy co hich jada necy'adyii. ¹⁸ Huen hich ajt nHuindzin Jesucristo may'ajt oy'ajt tunipy mid tüg'óciy miich ajcxy. Jadu'n jada. Amén.

1 TIMOTEO

Yi Jayijpi Necy Huidibi San Pablo Yajniguejxy Timoteo

¹ Hich Pablo, Cristo Jesús xyaj'apóstol'ajtpich. Yi Dios huidibi xyñihuaanim xyyajnidzoocim ajt n'alma, etz Cristo Jesús huidibi xymöhuaanim jugy'ajtin huinixibi, yi' ajcxy ti xyajnbicyich co yi' y'ayuc ngapxhuäcxibich. ² Cham hich miich nijayiy Timoteo. Jadu'n njihuüy nej hich miich ngi'm'ung'adyii, co miich Dios ytiy'ajt ti mbaady ma hich. Huen Dios Teedy etz Cristo Jesús hich ajt nhuindzin may'ajt tunipy mid miich, huen xypa'ayoohuipy etz xya-jjotcugihuipy.

Nijëjity jäy yaj'ixpicy huidibi ca' ytiy'ajtity

³ Hui'mi' miich jim Efeso, jadu'n nej nimay je taabi anajty ndzona'nich jim Efeso nnicxa'nich anajty Macedonia. Hui'mi' jim, jigix mgapxadugipy je jäy huidibi najtzcaxiyb je ayuc ca'p ytiy'ajtity. ⁴ Mgapxadugipy je nigoobi y'ayucity. Mgapxadugipy yi' ajcxy huidibi tzachnigapxp tzachnimiydacpy yi' judiojäy ajcxy y'ayuc jadu'n nej huidibi ñi'ap'ajtpy ñideedy'ajtpy ajcxy. Yi jadu'mbi ayuc nigoob yajhuinma'nydigoy pinjaty ixpijcp Dios ytiy'ajt.

⁵ Jadu'n Dios tzocy co huen jäy ajcxy naychojctäyüi mid oyjot oyhuinma'n. Huen ajcxy Dios yajmij'aty janch cixyjot huinjot. Co pin yajmij'aty Dios janch cixyjot huinjot, ooy ajcxy oy ñayjihuiyigixy. ⁶ Nijëjity jäy ajcxy ti ixmajtzn je Dios ytiy'ajt, ti ajcxy jiptigiyüi je ayuc huinma'n huidibi ca'p choobaady. ⁷ Ooy yi' ajcxy jayaj'ixpiga'n yi' Dios ycötujcin, ni ca' huinjihuiyigixy huidibi ycapxcixyp, ni huidibi ajcxy ñgapxpejtpy.

⁸ Hich ajcxy nnejhuüyim co yi' Dios ycötujcin oy yi' pen nyajtunim nej ypadyii nej ytiy'ajtity. ⁹ Nejhuüyim co yi' Dios ycötujcin ca' yi' tzaachytuñ oyjäydijc, jëyi tzaachytuñ pin ca' capxymidooy Dios, pin midundigooyb Dios ycötujcin. Je Dios ycötujcin chaachytumyb jäy huidibi ca' cuydungixy, jäy ajcxy huidibi ca' ytuädgyity, jäy huidibi ca' capxymidoogixy Dios, jäy huidibi pocytungixy, jäy huidibi ca' huindzigi'n yajtungixy mid Dios, jäy ajcxy huidibi capxtigooyb, huidibi ytaj yteedy yaj'öccixy, huidibi jäy yaj'öccixy. ¹⁰ Je Dios ycötujcin chaachytumyb pin migapxtigooyb töxyjäydijc etz yëydijctijc, huidibi miyëydijc ymahua'n. Dios nañ chaachytumyb je jäy huidibi jäy majtzip etz toognaxy, chaachytumyb indaacpidijc etz ñihuambejtpidijc. Je Dios chaachytumyb jac-jadyii jäy huidibi y'ayuc ca' ytiy'ajtity nej Dios tiy'ajt midity. ¹¹ Jadayaabi tiy'ajt huätzpi oybi tügüyb mid Jesucristo y'ayuc ytiy'ajt oybi huidibi hich nDios, je conuucxy yTeedy, ti xyyajnbicyich co ngapxhuäcxibich.

Pablo yjäygidacpy co Dios may'ajt ti tuñ mid yi'

¹² Ooy njäygidägyich co hich ajt nhuindzin Cristo Jesús ti xyajmicpicyich, yi' ti xy'ijxtiyyich, yi' ti xyajnbicyich Dios y'ayuc co ngapxhuäcxpich. ¹³ Hich jecy'ajty jibic anajty nigapxy ni'ojuyich Jesús. N'ixhuidijty nbahuidijtyich Jesús yjäy. Hich yi' ajcxy nmidundigooyich. Ti yi' Dios xypa'ayooyich com hich jadu'n anajty ti n'adich mid co nganejhuüyich je tiy'ajt, ngamibicyich Jesús ngamijpidägyich Jesús. ¹⁴ Paady ycixpi hich ajt nhuindzin Dios may'ajt oy'ajt ti tuñ mijcajee mid hich, co ti xyajmibicyich Jesús. E Jesús ti xymöyich tzojcin jihuiyün mid yi' yjäy ycixpi.

¹⁵ Ooy jada yjanchity, e nidüg'óciy jäy ajcxy jëbi mibijccixy co Cristo Jesús miñ ya naaxhuiñ co yajpocynihuädza'n pocyjäydijc. E hich ñigi pocy

nmídidyich ca'ydi ni pinjäy. ¹⁶ Míid jada ycixpi Dios ti xypa'ayooyich ti xymimecxtucyich, jigix co jäy ajcxy ijxip nej Dios ti ytuñ míid íich, huin'it ajcxy mijpidägipy yi' y'ayuc etz ypaadipy jugy'ajtin huinixíibi ma Jesús. ¹⁷ Paady chojcpy co ngömayim Dios, je rey huidibi ane'mb huinixii, huidibi niminaa yca'o'cy, etz nipin ca'ixy. Je Dios tügpajc huidibi Dios'ajtp huen ycömay'idipy cham etz tüg'óciy xii tiempo huidibi mimb cidacp.

¹⁸ Timoteo, ooy íich miich ndzocy njhuüy. Jada ayuc íich miich nyajnimaydaayb. Mihuindináhuip Dios y'ayuc ca' mhuinma'ñyidigoyipy. Mgyudunipy jadu'n nej Dios y'ayucnajtcapxíybi xy'íhuuijy xycapxhuijy co mdung mnímajch. ¹⁹ Mihuindináhuip Dios y'ayuc ytiy'ajt, huin'it ca' jibic mnayjihuühuüybi, jadu'n nej ajcxy jadyii huidibi nejhuüyb je tiy'ajt, e ca' cuydungixy, e jadu'ñyi yhuinma'ñyidigooygixy. ²⁰ Jadu'n nej Himeneo míid Alejandro ajcxy jaty, huidibi íich ti nyajcidigüygixy je mujcu', jigix ajcxy yhuinma'ñymedzipy, ca'ydi yajjotma'tcixy Dios.

2

Jadu'n nej jëb Dios mibijctzoohuim

¹ Yi' njatyyajnimayb co ooy ycopicyity capxtaaccixy mibijctzoogixy Dios etz yajnajxcixy Dioscojuyip míid tüg'óciy jäy ajcxy ycixpi. ² Copicy nnibijctzoohuim ma Dios: reydiyc, ane'mbidijc etz codungdiyc, jigix jëbi jotcuyc ndzinaayim, ca' ma tzip. Co jadu'n nduunim, yi' anajty ngoduunim Dios y'ayuc, etz huin'it tiydudägy ndzinaayim. ³ Com yi' jadu'mbi huinma'ñ ooy yi' y'oyity, e Dios huidibi íich ajt n'alma yajnidzoocp, oy yi' jäygidägy. ⁴ Dios chojcpy co tüg'óciy je jäy ajcxy huen y'alma nidzooccixy, huen ijccixy nejhuüygixy Dios y'ayuc ytiy'ajt. ⁵ Tüg je' je nHuindzin'ajtim Dios, etz tüg je' je huingapxpi huidibi jëbi ytiy'ajt ma Dios míid íich ajt ycixpi, etz huidibi jëb Dios y'ayuc capxnajxy ma íich ajt: je huingapxpi, je' je' je jäy, je Cristo Jesús. ⁶ Cristo Jesús nayyojxi naydooci míid íich ajt nbocy ycixpi, ñaygíyeci huen jäy yaj'ögyii, jigix jëb íich ajt nbidzímim ma je mujcu' anajty cí'am xymíid'ajtim. Jadu'n nej Dios cham jäy yajnejhuüy co je tiempo yhuaad'ajtni, ⁷ paady Dios ti xyajníbicyich ngapxhuäcxibich y'ayuc ytiy'ajt, etz Jesús xy'apóstol'adyiijich. Je tiy'ajt jada ngapxpich, ca' n'indägyich. Ti xyajníbicyich jada tung nej jëb huaad nyaj'ixpicyich, nej jëb huaad mibijccixy Dios, etz nyaj'ixpicyich Dios ytiy'ajt ma yi' jäy ajcxy huidibi ca' yjudíojäyity.

⁸ Ndzojcpyich co yi' yëydijctijc huen mibijctzoogixy ojadaajtcixy Dios ma tüg'óciy naymujctac míid oyjot oyhuinma'ñ, ca' y'adzip y'ahuan'nity, ca' y'ametz yjotmetzity. ⁹ Nañ jadu'n ndzojcpich co yi' töxyjäydijc huen yhuit yxojx yajtungixy nej ypadyii, huidibi quipxpaady ajcxy paatip. Huen yhuit yxojx pidaaccixy nej töxyjäydijc huidib tudägyip. Huen ycöhuay cüdigy caaxigy nej ypadyii, ca' ymígügtijc huinnaxtugipy míid yhuit yxojx, ca' nayxójxigixy míid oori, míid perla, e míid tijaty ooy choohuity. ¹⁰ Ca' huaad töxyjäydijc ñaygómáyigixy míid yhuit yxojx, huen janch yajcömaygixy míid y'oyjäy'ajtin, jadu'n nej je jäy ajcxy tungixy huidibi ti ñaygíyécigixy cixyjot huinijot ma Dios. ¹¹ Co jäy ajcxy yaj'ixpicy Dios y'ayuc ma je naymujctac, huen töxyjäydijc ajcxy amoyñi amidoo'ijtcixy míid yungnaxy yjot yhuinma'ñ. ¹² Yi' töxyjäydijc ca'p niducyich yaj'ixpigipy jäy ajcxy ma je naymujctac. E ni ca' ypadyii nicxy yëydijc ane'my. Huen ajcxy amoyñi y'ity. ¹³ Dios jayijp yajcojy Adán, jac'axam Eva, paady ycopicy yi' yëydijctijc huen ane'my yi' töxyjäydijc. ¹⁴ Adán ca' yajtzu'ijxy. Eva yajtzu'ijx, je' ca' Dios capxymidoy. ¹⁵ Paady yi' töxyjäydijc ca' ypadyii nicxy nigohuajc'aty yi' mibijcpidijc. Dios jotcuyc ñayjihuüyii míid

co jëyi y'ung'ijxcixy, etz yajmij'ajtcixy Dios, etz tzojctaaygixy ymígügtijc, etz huen ajcxy cuydungixy Dios y'ayuc ytiy'ajt, etz huen tudägy jäy'ajtcixy müd oyjot oyhuinma'ñ.

3

Nej jëbi ytungixy huídibi ajcxy nigohuajc'ajtp

¹ Tiy'ajt jada nej jäy ymínaangixy. Pen ji pin najtzogiy nigohuajc'ada'ñ yi mibijcpidijc tüg yi' oybi anajty ytunamyb. ² Pin nigohuajc'ajtp yi mibijcpidijc ooy ycopicyity je' jadu'n naydijib huídibi ca' ti tundigoy, huídibi tüg töxyjäy müd ca'p ycanaagity, huídibi huijycujc jäy'ajtp, huídibi müd oybi yhuinma'ñ etz tudägy pi yhuinma'ñ, huídibi ooyjäy'ajtin tumb, huídibi jajtp nej jäy ajcxy yaj'ixpigipy. ³ Pin nigohuajc'ajtp chojcpy tüg jäy huídibi ca' y'amügity, huídibi ca' yhuindzipity, huídibi yajtumb mecxtujcin, huídibi ca' chipcapxy y'ahua'ngapxy, huídibi ca' ti adzocy. ⁴ Pin nigohuajc'ajtp chojcpy tüg jäy huídibi tiydudägy tzinaayb ma yjin ytijc, huídibi y'ung y'anäg yajtzinaayb nicy xeemy. ⁵ Pen ca' jaty nej y'ung y'anäg migapx ane'mip ma yjin ytijc, ¿nej oc'ane'ma'ñ yi mibijcpidijc? ⁶ Nañ ca'p yjéjity huídibi namni mibicy Dios y'ayuc ytiy'ajt. Ycadimjegyity nicxy ooy amij agix ñayjihuiyüi, e nicxy camadägy je ane'min, e yjadipy jadu'n nej Satanás yjaty co jibic tumb ñayyajhui'mi müd Dios. ⁷ Chojcpy tüg jäy huídibi nidüg'óciy je mayjäy oy ijaxip. Pen ca' yjadu'nity nicxy pin yxiyüi, e chi jada anajty je mujcu' ti ymímadägyüi co jäy jibic ñigapxiyb.

Yi mutz tungmüd nañ chojcpy huídibi oyjot oyhuinma'ñ müd

⁸ Yi mutz tungmüd huídibi yajpat ma mibijcpidijc chojcpy jäy tudägy pi, huídibi nicy xeemy jäy'ajtp, huídibi ca' jäy'aty aguejtmíñ aguejtxipy, huídibi ca' y'amügity, huídibi ca' y'adzocy ca' y'ameeñity. ⁹ Huen naybidáacigixy cixy jot huinjot ma je tiy'ajt janchypi. Je tiy'ajt huídibi je mayjäy ca' huinjihuiy. Je tiy'ajt huídibi ich ajt nmibijcim. Je' chojcpy pinjaty huídibi ca' ti jibicpi jot'adyüi huinma'ñ'adyüi. ¹⁰ Pinjaty mutztung yajnicxamb, jajjip jot'ix huinma'ñ'ix pen tudägy yhuinma'ñ. Huin'it jëbi mdungmöy. ¹¹ Yi mutz tungmüdpi ytöxyijc chojcpy co huen tudägy jäy'aty, huídibi ca' ñigapx ñi'ojy ymígüg, huídibi nicy xeemy jäy'ajtp, huídibi cuydundaayb tüg'óciy. ¹² Yi jäy huídibi mutztung yajnicxamb chojcpy tüg jäy huídibi picy chinaayb, huídibi ca'p müdity metz o tugiig töxyjäy, huídibi y'ung y'anäg yajtzinaayb nicy xeemy, huídibi tiydudägy tzinaayb ma yjin ytijc. ¹³ Yi mutz tungmüdpi huídibi yajxon ytung cuydungixy, cómay yi' ajcxy idipy ma mibijcpidijc. Nañ ñigi ajcxy ixpijcidich Cristo y'ayuc.

Dios mijhuinma'ñ tuun müd ich ajt ycixpi

¹⁴ Jada necy ich müch nyajniguejxyp. Njijp'ijxypich co tzojc nnicxa'ñich jim ma müch. ¹⁵ Pen ca' y'oyy nej tzojc nnicxibich ma müch, ti yam nyajnijayy je janchypi. Müd jada necy huaad jëbi nidüg nidüg mibijcpi yjäy'ajtigixy ma yi mibijcpidijc huídibi mijpidacp Dios juugypi, je Dios huídibi huijtz'ijtaayb etz cohuandaayb je tiy'ajt janchypi. ¹⁶ Janch tiy'ajt jada co mij yi' yi Dios y'ayuc ytiy'ajt huídibi ti xyajnejhuüyim, je huídibi jecy'ajty ca' pin nejhuüy. Je tiy'ajt huídibi xyajnejhuüyim co quexy y'ung ya naaxhuiñ.

Dios y'ung hue' je' yaj'ijxy müd ñinícx. Tudägy nayguëxici müd Dios yjihui'ñ ymic'ajt. Je Dios y'ángeles ajcxy ti ixüi. Ti yajnigapxy yajnimiydägy Dios y'ung ma huídibi ca' yjudiojäyity nañ ti jäy yajmij'ajtcixy Dios y'ung ya naaxhuiñybi. E ti ycöbigyüi tzajpjoty ma yi oybi it.

4

Mayjäy ixmadza'ñ yí Dios ytiy'ajt

¹ Yí Espíritu Santo mīnaan co anajty je xī tiempo ycīxa'ñ, mayjäy ixmadzaangixy yí Dios y'ayuc ytiy'ajt. Mijpīdaaccixy anajty jäy ajcxy y'ayuc huidibí yí huin'ñmbí etz ca'oybí ytiy'ajt mīid. ² Jada jäy ajcxy mīid anñ anajty naybīdáacīgixy nej ytudägyity, e ca' anajty yjanchity. Ca' ajcxy nej ñayjihuiyí co ajcxy ytiy'ñ anñdaacpí. Tí jadu'n yhuinma'ñypīdaaccixy janch mīc. ³ Yí ajcxy ymīna'ñ co ca' huaad jäy ypijccixy, etz ca' huaad caaygixy nijējity caayin uucín. Yí caayin uucín Dios yí tī conucxy jigix jēbí jäy ajcxy huidibí mībījccixy etz huinjīhuīyīgixy je tīy'ajt, jēbí yajnajxcixy Dioscojuyip ma Dios etz cōbīgipy ajcxy agujc jotcujc je caayin uucín. ⁴ Tüg'ócīy huidibí Dios tī yaj'oyīy, oy yí'. Ca' huaad pīn ymīna'ñ co ca' y'oyity. Agujc jotcujc ngōbījcm, jēyí nyajnajxīm Dioscojuyip ma yí'. ⁵ Dios ymīna'ñ co huen huidibí caayin huidibí uucín ooy y'oy yí'. Jēyí co nyajnajxīm Dioscojuyip, e huin'it Dios conucxy je caayin uucín.

Ca' ajcxy mmijpīdāgīp yí nīgoobí'ayucity

⁶ Pen mīich ajcxy jada ayuc jada tīy'ajt myajñīmaayb yí mīgūgtījc, oy anajty mduñ ma Cristo ytung. Co jadu'n myaj'ixpīcy Dios y'ayuc janch cīxyjot huinjot, chí anajty myajyēgy yí mībījcm. Ca' mjāydgōyipy yí oybí ayuc huidibí nyajñīmaayb, huidibí ayuc mbanīcxyp mbayōyp. ⁷ Ca' mmijpīdāgy yí nīgoobí'ayucity huidibí ca' choobaady ma Dios. Panīcxī' payōyí' Dios ytiy'ajt. ⁸ Jac'oy co n'ixpījcm Dios y'ayuc, ca'ydi co nīncx ymīc'ajt nbaatīm. Co yajyujctāy jäy ñīncx, chí ñīncx ymīc'ajt paady jēyí. Co n'ixpījcm nguyduunīm Dios ytiy'ajt, chí tīy'ajt nbaatīm nej ya naaxhuiñ ndzīnaayīm, etz nañ jadu'n nbaatīm jadüg jugy'ajtīn ma Jesús co anajty n'o'cīm. ⁹ Jada tīy'ajt huidibí tī nyajñīmāy, janch tudāgy jada, jēbí ngōbījctaayīm, e nidüg nidüg jēbí mībījccixy. ¹⁰ Paady nduunīm n'ayoohuīm oy pīn xyca'īxaanīm. Njīp'ījxīm co je Dios huidibí jugy'ijtp xyajñīdzōgaanīm n'alma. Jēyí yajñīdzōgīpy ajcxy y'alma huidibí mijpīdaacīp Dios y'ayuc.

¹¹ Yajñīma' yí mīgūgtījc huen cuydundaaygixy jada ayuc. Yaj'ixpīc jada tīy'ajt. ¹² Huen jäy ajcxy m'ayuc xymijpīdaacī, oy mīich mutz anācīnity. Myegīpy ijxpejt ma mīgūgtījc nej jēb huaad ycapxcixy ymīydaaccixy, nej jēb huaad ytungixy, jadu'n nej jēb huaad oyjāy'ajtīn tungixy, jadu'n nej jēb huaad mībījcm yajtungixy ma Dios, jadu'n nej jēb huaad huädz yhuinma'ñ mīid'ajtcixy. Co jadu'n mdunīpy, huin'it ajcxy mijpīdāgīpy mīich m'ayuc. ¹³ Mabaad ñch anajty nīcxy ma mīich, capx Dios ñecy ma yí naymujctac, capx huäcx etz yaj'ixpīc yí tīy'ajt. ¹⁴ Yajtun yí huīj'ajt cujc'ajt huidibí Dios xymoy je taabí je mībījcpīdjīc mījtungmīdīpī xycīñīxajy, e xy'ayucmoy xymīc'ajtmoy ajcxy mīid je Espíritu Santo ymīc'ajt.

¹⁵ Naybīdāgīñ yajcopījc tüg'ócīy huidibí tī nyajñīmāy, e nīgūēxīgīpy mayjäyduum co tī yajxon m'ixpīcy je tīy'ajt. ¹⁶ Nayguend'adīñ mīich ooy cī'm, nañ jadu'n naygūend'adīñ ma yí Dios ytiy'ajt, ca' m'ixmach Dios y'ayuc. Co mīich jada mdunīpy cī'm anajty nayyajñīdzōgyī, nañ jadu'n anajty myajñīdzōccixy huidibí anajty ajcxy amīdoo'ijtp mīich m'ayuc.

5

Nej jēbí huaad mīgūgtījc m'ñhuijīpy mgapxhuijīpy

¹ Ca'p huinjīp m'ojīp mīj'anāctījc. Oy'amy ñhuijīcixy capxhuijīcixy jadu'n nej jīhuīy mdeedy'adyī. Nañ jadu'n yí yujcyēcytījc ñhuijīcixy capxhuijīcixy oy'amy jadu'n nej jīhuīy mgi'mjuugy mgi'mmīgüg. ² Yí mīj'anāctījc ajcxy

töxyjäybi nañ jadu'n oy'amy m'ihhuijcixy capxhuijcixy, jadu'n nej jihuïy yí ajcxy mdaj'adyii mdzitz'adyii. Yí töxy'anäctijc ajcxy mutz'anäcniþ mïd'ijtcixy mïd tudägyi mjot mhuinma'ñ.

³ Huen yí mibijcpidijc ajcxy yajmij'adipy etz pubedipy yí töxyjäydijc ajcxy co'ögypi, huidibi janch ni ypin ycaca'ty. ⁴ Pen jim töxyjäydijc co'ögypi huidibi mïd y'ung etz y'oc'ung, huen ajcxy jaty nej ytaj ñambiid yajmij'adipy, huen oybi yajhuimbidity mïd ytaj etz ñambiid. Com yí jadu'mbi huinma'ñ Dios yjäygidacpy. ⁵ Je töxyjäy co'ögypi ca'p pin tim mïdity, yí yjijp'ijxyp co Dios ypubediiyb etz Dios ymibijctzooyb y'ojadajtpy jabom jabom xim tzuum. ⁶ Je co'ögy töxyjäy huidibi tzinaayb mïd mayñax xondaacin, jadu'n Dios yajnaxyii jadu'n nej jihuïy y'ögity ytigoyity. ⁷ Yajñima' ajcxy huen cuydungixy Dios ytiy'ajt, jigix ca' jibic ajcxy yajnigapxy. ⁸ Pen ji pin huidibi yajmij'ajtp Dios, e ca' pubeda'ñ y'amigüg, pen ca' y'ung ytöxyijc yajxon icy may'aty, ca' yí cuyduni Dios y'ayuc ytiy'ajt. Nigi anajty yjibicity nej ti y'idich ca'ydi jadu'n nej huidibi ca' ymibicy.

⁹⁻¹⁰ Yí töxyjäy co'ögypi ajcxy tiibi ytugi'px jimijtiy, jëbi mgojayiiyi yxi ma yí lista huidibi yí mibijcpidijc ypubedamyb. Yí mibijcpidijc ypubedamyb pen tüg ñäy anajty mïddzinäy, pen oyjot oyhuinma'ñ ymïd, pen ti y'ung yajxon yajyeegy, pen ti migügtijc mi'oyjäy'aty, pen ti may'ajt tuñ mïd Dios yjäy, pen ti pa'ayooy huidibi ayooob huidibi jottigooyb, pen ti yajtüyöy yajxon nej ytiy'ajtity.

¹¹ Yí co'ögy töxyjäy mutz'anäcniþi ca' mgojayiiyipy yxi ma yí lista huidibi yí mibijcpidijc ypubedamyb. Pen capxytumb co tuna'ñ mïd Cristo ycipi tijaty tung ma naymujctac, ycajegyity co je oybi anajty yam y'octumyþ, chi nijot'ajtni ypigaani, chi ytung ixmajtznip. ¹² Co yí mibijcpidijc ajcxy ca' jäygidacaci yí ytung, chi jibic ñayjihuiyii co ca' cuyduñ y'ayuc nej ti ycapxytuñ mïd yí Cristo Jesús. ¹³ Jadügnax ca' ytung yajcopicy, jëyi yhuidijtni jayjin jaydijc, e ca' yí'yity, nañ jadu'n ymigüg nigapxni ni'ojiiyñi, capxni miydaacni huidibi ca' y'oyity. ¹⁴ Ndzojcpyich co yí töxyjäy co'ögy mutz'anäcniþi huen pijccixy, huen tzinaaygixy jugy'ajtcixy yajxon, huen ung'ijxcixy anäc'ijxcixy, huen yajxon cuend'ajtcixy yjin ytiy, jigix ca' ajcxy nihuambediiyb ni'ojihuiyib huidibi ca' Dios y'ayuc ixaani midohuaani. ¹⁵ Nijëjity töxyjäy ajcxy co'ögypi ti ixmajtzcixni Dios y'ayuc ytiy'ajt, e ti ajcxy jijptigyiygixni yí mujcu' yhuinma'ñ.

¹⁶ Pen ji mibijcpidijc yëydijcpi o töxyjäybi mïdity y'ajuugy y'amigüg co'ögypi, yí je' paatip ixipy may'adipy je y'ajuugy y'amigüg co'ögypi, e ca' yaj'idipy ma yí mibijcpidijc nigixp. E jadu'n je' huaad je mibijcpidijc ajcxy pubejtcixy co'ögypi ca'p ti tim mïdity.

¹⁷ Yí ajcxy huidibi nigohuajc'ajtp yí mibijcpidijc huidibi yajxon tumb capxpaady y'idipy. Nigi ajcxy capxpaady y'idipy huidibi Dios y'ayuc capxhuäcxip etz yaj'ixpicy. ¹⁸ Jadu'n yjaybetyity ma Dios y'ayuc: "Ca' huaad huajyuub y'ajen nbidaacim ma yam ten moody trigo miy co yajpajc'ada'ñ yí trigo tim." Nañ jadu'n jadüg'it yjaybetyity: "Yí huidibi tumb paatip yí ymuju'ñ." Jadu'n jada ayuc yhuimbidity: Yí huidibi yaj'ixpijcp Dios y'ayuc paatip huen yajmujuy.

¹⁹⁻²⁰ Ca' mic'amy mdiydunipy pin tungmïdipi ma yí mibijcpidijc pen tügpajc huidibi xihuip. Ca' mdiydunipy pin tungmïdipi ixti cooni metz o tugüg testigo yquëxigipy pen janch ti ytundigooy. Pen ytundigooy yí huidibi nigohuajc'ajtp, capxidzim mayjäydumb jigix jacjadyii chigi'ñ pijccixipy. ²¹ Jada tiy'ajt miich nyajñimaayb, Dios Cristo Jesús etz yí y'ángeles ajcxy huidibi Dios

ti huin'ixcixy ñidiy'ajt'ajtcixy co yjanchity jada ayuc. Co mbanicxip jada tiy'ajt, ca' huin'ixpety mdiydunip mdzaachytunip mibijcpidijc. ²² Ca' mic'amy mginixajipy co myajtungbiga'nip jäy huidibi ca' m'ixy'adyii. Ycajegyity ypocytunipy, e tú'ciy mbocycâhuaangixy miich müd yi'. Miich nayguend'adi jigix ca' mbocycâhuipy.

²³ Miich Timoteo, pen pijcp mjot, tzoy'adi hueen vino, com jac'oy yi' ca'ydi co m'ügipy huadz ni.

²⁴ Jadyii jäy huidibi jibic-huinma'ñ müd yajnejhuihuipy yi' ajcxy yjibic-huinma'ñ ma anajty ca'ni yajtiydungixy. Jacjadyii jäy ca' yajnejhuüy yjibic-huinma'ñ ixti cooni yajtiydungixy. ²⁵ Nañ jadu'n jadyii jäy yajnejhuihuip co oyjäy'ajtin anajty ti tungixy, jacjadyii jäy ca' mic'amy yajnejhuihuipy co oyjäy'ajtin ti tungixy. Yi oyjäy'ajtin ca'p yi' yhuimipy coyüch.

6

¹ Tüg'óciy tumbidijc huidibi ajcxy mibijcp huidibi ajcxy ijtp cojuyiy codoogiy, huen yajxon yajmij'ajtcixy yhuindzin. Pen ca' jadu'n tungixy, chi je huingjäydijc jibic nigapxaani ni'ojihuaani yi Dios etz yi' ytiy'ajt. ² Pen yi tumbi müd yhuindzin huidibi yajmij'ajtp Dios, ca' y'oyity co nixigipy yajxigipy yhuindzin. Huen ajcxy nigä yajxon yajmij'ajtcixy, com hue' je' Dios yjäy. Yi huidibi nihuindzin'ajt ypadamyb je oybi huidibi je' ytumbi ytung'ajtpy. Jada tiy'ajt yaj'ixpic etz capxhuäcx.

Jotcuyc'ajtin nbaatim ma Dios ytiy'ajt

³⁻⁴ Pen ji pin huingbi tiy'ajt yaj'ixpicy huidibi ca' ñaybadyii müd je Huindzin Jesucristo y'ayuc ytiy'ajt, e ni ycanaybadyii müd je tiy'ajt huidibi ich ajt nmijpidaacim, hue' jada nej tüg jäy huidibi amij agixip huidibi ca' ni ti nejhuüy. Chachnijot'aty tzip capx, e jadu'n yhuimbizimy jada tzip capxy co migüg ca' yaj'oy'ixy, chi ñaymidziptzoongixy nihuambejtcixy etz jibic nigapxcixy ymigügtijc. ⁵ Yi jadu'mbi jäy huidibi ca' mijpidägy Dios ytiy'ajt cojpy ymacxpy tzip capxy huidibi ca' ycixy ytigoy. Yhuinma'ñdigoy ajcxy, ca' huinjihuüygyxixy tiy'ajt. Hue' ajcxy yaj'ixpicy Dios y'ayuc müd co ycomeñ'adaangixy. Puhuäctuat miich jadu'mbi jäy ajcxy. ⁶ Co Dios y'ayuc ytiy'ajt nguydunim, huin'it jotcuyc ndzinaayim, etz nbaatim oy'ajt mijpi. ⁷ Ni ti ich ajt ya naaxhuiñ ca' ti nmimiinim co nma'xung'ajtim, nañ ni ti ngaminicxim co n'o'cim. ⁸ Pen nmüd'ajtim caayin uucin huit tucxy, jëbi njotcuyc'ajtim müd yi'yi. ⁹ Je' ajcxy huidibi ooy nijot'aty comeñ'adi, hue' je' ajcxy jibic tumb ajcxy ycâhua'ñ. Je' ajcxy chachtunamyb huidibi ca' oyhuinma'ñity, huidibi nayjotmayduunip. Ayo'n ajcxy ypadamyb, tigoyamb ajcxy y'alma. ¹⁰ Yi meeñy'adzojin yi' je' yi jibic-huinma'ñ cop'ajtip. Müd yi meeñy'adzojin may yi jäy huidibi jäydigoy Dios ytiy'ajt. Hue' je' ajcxy nayjotmayduunip.

Timoteo, tiydudägy mdzinähuipy miich

¹¹ Timoteo, Dios yjäy, cöguëg yi jäy huidibi müd yi jadu'mbi jibic-huinma'ñ. Tiydudägy mdzinähuipy, cuyduni Dios y'ayuc ycötujcin, mijpidäg Dios y'ayuc ytiy'ajt, tun oyjäy'ajtin, mihuindina' yi tung, müd'at mjot mhuinma'ñ yung naxy. ¹² Mic mjot mhuinma'ñ pidäg ma Dios ytiy'ajt, ca' mjotmetzciy. Tun jadu'n nej jäy huidibi nayboyicquípaxigixy naymic'ixigixy. Nijot'at cixyot huinjot yi jugy'ajtin huidibi m'alma ypadamyb ma Dios. Dios xyajni bicy jigix mgapxhuäcxip jada tiy'ajt. Ti miich mgapxypidzimy nej mmibicy mayjäyoty. ¹³ Dios je huidibi yajjugy'ajttaayb tüg'óciy, yi' nidiy'ajt'aty co ooy ycopicyity jada ayuc jadu'n nej cham nyajni maayb. Nañ jadu'n je Cristo Jesús je huidibi

tíy'ajt capxypídzim ma Poncio Pilato ñidiy'ajt'ajt co oy ycopicyity jada ayuc jadu'n nej cham nyajnímaayb. ¹⁴ Copicy cuydun jada ayuc ane'mín. Huädz mguydundähuipy, huädz myaj'ixpigipy je tíy'ajt jigix ca' pín jibic ni'ojíhuipy Dios ytíy'ajt. Jadu'n mdunípy ixti cooni ñch ajt nHuindzin Cristo Jesús ñayguëxigíyib ya naaxhuiñ jadüg'oc. ¹⁵ Dios yajniguëxigamyb Cristo Jesús mína anajty je tiempo yhuaad'aty. Dios je' je mij'ane'mbí, je mijpi rey, etz je mijpi huindzin. Yí' je' je Huindzin Dios huídibi ane'mdaayb. ¹⁶ Yí' je' tügpaic je jugy'ajt cop ymíid. Yí' ijtp ma je tíicxin je jajín huídibi ca' pín huaad ninej míhuingoñ. Janch ni tüg jáy tí ca' ixí, e ní ca' íxa'ñ. Yí' je' cómay'idípy etz yí' ane'mdaayb tüg'óciy. Amén. Jadu'n jada.

¹⁷ Yí' comeeñydíjc huídibi jadachambi tiempo tzínaayb jugy'ajt, níma' miich yí' ajcxy co ca' huaad amíj agíx ñayjihuíyigíxy, ní ca' nígi adzojccíxy anaxy yí' meeñ huídibi jadu'ñyí tígoydaayb. Huen ajcxy mijpidägy yí' Dios huídibi xy-mooyim tüg'óciy mijmay mijcajee jigix njotcujc'ajtim. ¹⁸ Huen yí' comeeñydíjc oybí tungíxy, jigix ajcxy cómay ypidzimípy co oyjáy'ajtin tungíxy. Huen ajcxy pa'ayoogíxy ymígügtíjc huídibi ca' tí mídity míid oyjot oyhuinma'ñ. ¹⁹ Co ajcxy jadu'n tungíxpy, chí padaangíxy je oybí huídibi miimb gídaacp. Ypadamyb ajcxy je jugy'ajtin huínixíibi.

Timoteo, mijpidäg jada tíy'ajt

²⁰ Timoteo, mijpidäg jada íxpíjcín huídibi tí myajníbic'aty. Ca' mmijpidägípy yí' nígoobi y'ayucity, yí' huídibi ca' Dios huindzigíy. Ca' mmijpidägípy yí' jáy huídibi ajcxy naybidaacíp jadu'n nej jíhuíy ooy ycohuinma'ñity, e ca' yjanchity, huídibi mídzíp'ajtp Dios ytíy'ajt. ²¹ Jadu'n nej níje' ajcxy paníxcíxy jada ca'pí ytíy'ajtity, e jadu'ñí ñitígoy.

Huen Dios je oy'ajtin tuñ míid miich. Amén. Jadu'n jada.

2 TIMOTEO

Yi Mimetzpi Necy Huidibi San Pablo Yajniguejx Timoteo

¹ Ich Pablo, Dios ti xyajñibicyich huen Cristo Jesús xy'apóstol'adyiijich. Yi ti xyquexyich co yi' y'ayuc ngapxhuäcxibich. Dios ti yajhuinhuaniiygixy yi jäy co pin mijpidägiipy Cristo Jesús yajjugypigipy co anajty ti y'ögy. ² Ooy ich miich ndzocy njihuiy nej ngi'm'ung'adyii. Dios Teedy etz ich ajt nHuindzin Cristo Jesús huen tuñ oy'ajt may'ajt mid miich, huen xypa'ayooy, huen xyyajjotcugiy.

Pablo jotcujc co Timoteo ti mijpidägy Dios y'ayuc

³ Nyajnajxypich Dioscojuyip ma Dios co miich ti mmijpidäg yi' y'ayuc. Nmibijctzooybich Dios mid miich ycixpi jabom jabom xim tzuum. Janch cixyjot huinijot nyajmij'atyich Dios, paady ooy oy nayjihuiyijich. Nañ jadu'n n'ap ndeedy jecy'ajty janch cixyjot janch huinijot yajmij'ajty Dios. ⁴ Ooy miich nicxy njaco'ixihua'ñ jigix njotcugihuibich. Ooy njajäymejtzcodyiijich nej miich mjiiy myaax mid ich ycixpi je taabi jim ndzooñich. ⁵ Njäymejtzpich jadu'n nej miich mmijpidägy yi' Dios janch cixyjot huinijot co xymid'ityich. Nañ njäymejtzpich co jayijp mnambiid Loida etz yi mdaj Eunice mijpidacy Dios janch cixyjot huinijot. Minambich co chambaad miich mmijpidägy Dios janch cixyjot huinijot.

⁶ Jada nyajjäymejtzcootpy: Nijot'at yi mic'ajtin huidibi Dios ti xymöy, je taab anajty Dios ytung mnimadzaani co ngi'nixajy, jigix Dios ytung jacyajxon mduunipy. ⁷ Dios ca' xyajhuindzigy'aty, hue' xyajjotmic'ajtp. Mid Dios ymic'ajt jeb mnaychójcigixy mnayjihuiyigixy, jeb oyjot oyhuinma'ñ myajtungixy. ⁸ Paady ca' mmidzöyduniiyb ich ajt nHuindzin Cristo Jesús ytiy'ajt. E nañ ca' xymidzöyduniiybich co ti nbujxtijc iñayich mid ich ajt nHuindzin Cristo Jesús ytiy'ajt ycixpi. Mecxtuc yi ayo'n yi tzaachypi huidibi myajnajxpy co mgapxhuäcxy yi' Cristo Jesús ytiy'ajt. Dios xyajjotmicpigipy. ⁹ Canan paady ti xyajñidzoocim n'alma co ajt ndzach'oyjäyity. Com Dios jadu'n ti yajnihuinmayiy tuna'ñ oy'ajtin mid ich ajt ycixpi co quejxy Cristo Jesús ya naaxhuiñ. Dios jayijp ti huinmay co quexa'ñ je Cristo Jesús ca'ni anajty pin ya naaxhuiñ. ¹⁰ Dios ti cham jada oy'ajtin yajniguëxigy co yaj'ijxy ya naaxhuiñ ich ajt nnihuambi nyajñidzoocpi, je Cristo Jesús, huidibi ti yajcödigooy yi' o'cin. E ti yajnejhuüy yi jäy mid yi' ytiy'ajt nej jeb huaad ndzinaayim huinixii ma yi Dios y'it oybi.

¹¹ Dios ti xyajñibicyich co y'ayuc ngapxhuäcxich, etz xy'apóstol'adyiijich jigix nyaj'ixpigipyich yi' huidibi ajcxy ca' yjudíojäyity. ¹² Paady ycixpi tzaachypi nbaadyich. Per ca' ndzo'yduñich, com ich nejhuüyb pin nmijpidacpyich, nejhuüybich co yi' ymid cötujcin etz mic'ajt jeb xycuend'adipyich, ixti huin'it xii minaa Cristo Jesús tiyduna'ñ yi' naaxhuiñjäy.

¹³ Mijpidäg je tiy'ajt tiydudägyi' huidibi ti nyaj'ixpicy, jada je' tiy'ajt iixpejt nej jeb mbanicxy mbayöy. Yajmij'at Cristo Jesús, ca' m'ixmajtzä yi' ytiy'ajt, mdunipy ojjäy'ajtin jadu'n nej yi' tzocy. ¹⁴ Mihuidina' yi' oybi ayuc tiy'ajt huidibi ti nyaj'ixpicy. Huen je Espíritu Santo huidibi miich mid jotjoty huinma'ñjoty xypubedipy xypudigihuipy.

¹⁵ Ti jada' mnejhuüy co tüg'óciy yi' mibijcpidijc jim Asia naaxjot ti ixmach je tiy'ajt jadu'n nej ti nyaj'ixpicyich. Yi Figelo etz Hermógenes etz

jacjadyii jadu'n ajcxy ti y'aditczixy. ¹⁶ Yi Huindzin Jesús yi' pa'ayoohuipy yi Onesífero yjuugy ymigüg, com ooy ich mij xypa'ayooyich etz xypubejtyich, ca' xymidzo'yduyijich co nmach'inäyich. ¹⁷ Co Onesífero oyja'ty ya Roma, chi mictägy xy'ixtaayich cooni xypatyich. ¹⁸ Huen yi Huindzin Dios ypa'ayoohuigy Onesífero co anajty Cristo Jesús tyduna'n naaxhuiñjy. Huadz miich mnejhuüy nej yi Onesífero xypubejtyich jim Efeso.

2

Huen Cristo Jesús may'ajt tunipy müd miich Timoteo

¹ Miich Timoteo, jadu'n njihuüy nej ngi'm'ung ngi'm'anäg. Huen Cristo Jesús may'ajt tunipy ma miich, huen xyajjotmicpigipy. ² Miich ti mmidoy may'ayuc tity'ajt huídibi ti nyaj'ixpicy. Jada ayuc mayjy midoy e jeb ajcxy nidiy'ajt'ajtcixy. Jada tity'ajt miich mgapxnaxipy mgapxhuäcxipy ma jacjadyii yeydijctijc huídibi oyhuinma'n ymüd, jigix yi' ajcxy nañ jadu'n capxnaxipy ma jacjadyii jäy.

³ Miich mämädäg yi ayo'n yi tzaachypi huídibi mminajxyp myajnajxyp, jadu'n nej tüg Cristo Jesús ysoldado huídibi oy tumb. ⁴ Yi soldado huídibi soldad'ajtp ca' huaad huingbi tung nicxy tuñ, jigix je' yjotcuje'adipy pin anajty ti ypidägyii soldado, nañ jadu'n miich adügiijp Dios ytung mdunipy. ⁵ Pin jäy nayboyicquipxip ca' yi' premio pada'n, oy ti yjamadägy, pen ca' cuyduñ yi tity'ajt. Nañ tzocy co miich mguydunipy yi tity'ajt. ⁶ Je jäy huídibi tumb ma ycam ytu' je' jayijp huídib huen yajpidigy yi ujtztim huídibi ti y'ity. Nañ jadu'n miich co Dios ytung mduunip mbaadip yi oy'ajtin. ⁷ Yajxon mhuinmayipy huídibi nyajnimaaayb, yi Huindzin Cristo Jesús xyajnejhuiydähuipy tüg'óciy je' ytity'ajt.

⁸ Jäymetz jadu'n nej Jesucristo, yi David y'ap y'oc, y'o'cy, chi Dios yajjugypijcy jadügtecy. Jada je' je ayuc tity'ajt oybi huídibi nnajtzcapxyibich. ⁹ Müd yi' ycixpi n'ayooyich etz tzaachypi nyajnajxyich. Nbujxtijc inäyich jadu'n nej jihuiy njibicjäyich. Oy njapujxtijc inäyich ca' ñejity, Dios y'ayuc ca' yi' mach y'ity, yajcapxhuäcx'aditzp nigi. ¹⁰ Paady ich tüg'óciy jada tzaachypi ngöbijctäy nmecxtujctäy, jigix jebi je jäy ajcxy huídibi Dios ti yhuin'ixigixy chinähuipy ajcxy huinixi ma yi' y'it oybi, Cristo Jesús yajnidzögüib yi' ajcxy y'alma.

¹¹ Tity'ajt jada ayuc:

Pen ti ich ajt n'o'cim müd Cristo ycixpi, yi' müd ndzinaayim tzajpjoty.

¹² Pen nyajnajxim tzaachypi ayo'n müd Jesús ycixpi, nañ quipxyi müd yi' n'ane'maanim. Pen ca' ya Jesús y'ayuc ngöbijcim, nañ ca' jüib tzajpjoty xycöbigaanim.

¹³ Oy ich ajt nyajmij'ajtim Cristo Jesús o ngayajmij'ajtim, Dios ycuydundaayb yi' y'ayuc. Com ca' huaad yci'm ayuc yajxigy.

Naybidägi cixyjot huinjot ma Dios ytity'ajt

¹⁴ Yajjäymejtzcood yi mibijcpidijc jada tity'ajt huídibi ti nyajnimäy. Nima' je jäy ajcxy co je Huindzin Dios ca' oy'ixy tzip capxy ayuc huídibi ca' choobaady. Müd yi' tzip capxy ca' ni ti oybi nbaatim, jeyi yajhuinma'nydigoy huídibi amidoo'ijtp. ¹⁵ Naybidägi cixyjot huinjot ma Dios y'ayuc ytity'ajt, nej jeb huaad cömay mbidzimy ma Dios, jadu'n nej Dios ytumbi huídibi ca' ni ti midzöyduyii, huídibi Dios y'ayuc ytity'ajt yajxon yajhuinjihuیداayb ymigügtijc. ¹⁶ Ca' mgöbigipy yi ayuc huídibi ca' ytity'ajtity, yi nigoob ayuc huídibi yajtüöyp mayjäy ajcxy, yi tity'ajt huídibi ca' Dios ytity'ajt'adyii. ¹⁷ Yi huídibi ajcxy y'ayuc ca' ytity'ajtity yajhuinma'nydigoooyb ymigügtijc. Yi' ajcxy

müid jibic ayuc yajhuinma'nydigoy yi mayjäy ajcxy, jadu'n nej pützpa'm huídibi ninicx jicxp oñydägy. Jadu'n nej ti yjaty müid Hemeneo etz Fileto co ajcxy yhuinma'nydigooy. ¹⁸ Yi' ajcxy anajty Dios y'ayuc cuyduuni, chi oyhuinma'nydigooyñi. Chi ajcxy yminángixni co je tiibi y'öccixni, ti ajcxy je' yjugypicy, e jadu'n ajcxy yajhuinma'nydigoy nijëjity jäy. ¹⁹ Huídibi Dios ti cojy ti macxy, niminaxi ycacixy ycatigooy, com yi' ytiy'ajt ijtp yi' huinixi. Tiy'ajt jada co yi Huindzin Dios y'ijxcajpy pinjaty yjäy'ajtpy. Tüg'óciy pin mijpidacp yi nHuindzin Jesucristo y'ayuc, huen jipphuäctüdy yi jibic-huinma'ñ yi jibic-tung.

²⁰ Ma tüg mij comeeñydijc jim oori taasi, oori texy, etz oori cuchara, etz tijaty oyjatypí. Nañ ymüid jim naax taasi, naax texy, quipy cuchara etz jactijaty ca'p y'oyjatyity. Yajtuñ yi oori taasi etz oori texy ma tügi caayin uucin oybi. Yajtuñ yi naax taasi etz naax texy oyñiminaa. ²¹ Jadu'n yi' pin jäy jibic-huinma'ñ ixmajtzp etz tuñ oyhuinma'ñ, jadu'n yi' nej oori taasi oori texy. Cömay'idip yi' ma yi Dios. Huädz yi' yjot yhuinma'ñ, jëbi nHuindzin'ajtim Dios yajtunipy ma tüg'óciy oybi tung.

²² Ixmatz müich yi yujcyec'anäg ajcxy yjibic-huinma'ñ. Tudägy mdzinähuipy. Yajmij'ajtcix Dios cixyjot huinijot. Mdunipy oyjäy'ajtin. Ixmatz yi tzip. M'ojadadipy yi Huindzin Dios müid oyjot oyhuinma'ñ. ²³ Ixmatz yi nigoobi'ayucity yi loci huinma'ñ, ca' yi' y'oyity. Mnejhuüyb co yi nigoobi'ayuucity tzipcojp capxycojp yi'. ²⁴ Yi Huindzin Dios ca' yi' tzocy co yi' ytumbidijc nicxy tzip capxy yajtzondägy. Hue' janchtiy tzocy huen jäy'ajtcixy yung naxy müid tüg'óciy jäy etz pe'cy y'idipy müid yaj'ixpijin. Nañ chojcpy co mimecxtugipy ymigügtijc ajcxy. ²⁵ Müich müid yung naxy mjot mhuinma'ñ capxhuij je jäy huídibi midzip'ajtp je tiy'ajt. Ycadimjegyity co Dios ytiy'ajt nijothuimbijtcixipy, e nejhuüygyxyipy je tiy'ajt oybi. ²⁶ Co anajty ajcxy ti ymejtzcixy yhuinma'ñ, chi ajcxy ycöguëgyyb je mujcu' huídibi ajcxy ycapxymidooyb ma anajty ymüid'ajtcixy cijoty etz ycapxymidoogixpy yi Dios.

3

Jäy jotmay müid y'idaangixy

¹ Müich mnejhuüyb ma je xii tiempo anajty ycixaani jadaanip ayo'n, je jäy ajcxy jotmay müid y'idaangixy. ² Ji adipy jäy huídibi adzojcp, huídibi amij agix nayjihuiyip, jäy huídibi ameeñ, jäy huídibi ci'm naygömayib, huídibi oyñinej capxtigooyb ma Dios, jäy huídibi ca' capxymidohua'ñ ytaj yteedy, jäy huídibi ni ti ca' jäygidäga'ñ, jäy huídibi ca' yajmay'aty Dios. ³ Co anajty tiempo ycixaani, ji adipy jäy huídibi ca' ymigüg ixa'ñ tzoga'ñ, jäy huídibi ca' pa'ayo'n müidity, jäy huídibi ymigüg nihuambejtp, jäy huídibi oy ahua'nity, jäy huídibi midzip'ajtp yi oybi. ⁴ Ji adipy jäy huídibi ymigüg agojix midundigooyb, jäy huídibi ytunamyb ti ytunamyb, ca' ajcxy tuñ cuendi capxhuijin, jäy huídibi amij agix nayjihuiyip, huídibi tzachnijot'ajtcixy mayñaxy xondaacin, e ca' cuyduna'ñ Dios ytiy'ajt. ⁵ Ji adipy jäy huídibi naybidácigixp jadu'n nej jihuiy ajcxy mijpidaaccixp Dios ytiy'ajt e ca' yjanchity. Chi ma ajcxy chinaayin ma ajcxy yjugy'ajtin ñiguëxcp co ca' tiy'ajt yajtuñ. Cöguëg yi jadu'mbi jäy. ⁶ Ma yi jadu'mbi jäy ajcxy jim chooñity huídibi coyöyib conaxib ma je töxyjäy huídibi ca' ytudägyty, huídibi oy ypocyjäyity, huídibi jibic-huinma'ñ nijot'ajtp. ⁷ Yi jadu'mbi töxyjäy ajcxy panicxp payöyp canaagnax huinma'ñ, e niminaa ajcxy cahuinjihuihuipy yi Dios ytiy'ajt. ⁸ Jadu'n nej Janes etz Jambres midziptzooñ je Moisés, yi jadu'mbi yëydijc ajcxy nañ jadu'n midziptzoonip yi tiy'ajt. Jibicjot jibic-huinma'ñ ajcxy ymüid. Ñaybidägyib ajcxy jadu'n nej jihuiy cuydungixy

yí tìy'ajt, e ca' cuydungixy. ⁹ Ca' ajcxy mímadaǵipy nej huin'ñinipy Dios yjáy. Niguëxigipy yí' ajcxy yjibic-huinma'ñ jadu'n nej Janes etz Jambres yjajty.

Tüg'óciy Dios ñecy Dios ci'm ti huinma'ñymöy je huidibi jaay

¹⁰ Miich ti mhuinjihuidäy nej ñich ti nyaj'ixpicy Dios y'ayuc nej njäy'atyich, nej nhuinma'ñ nduunich, nej Dios nmijpidägyich cixyjot huinjot, nej ñich jäy nmimecxtucyich, nej oyjäy'ajtin nduunich, nej ti nmihuindinäyich Dios ytung.

¹¹ Miich m'ijxyp mnejhuüyb nej ti nyaj'ixhuidityich nej ti nyajpahuidityich, miich mnejhuüyb je ayo'n je tzaachypi huidibi ti nminaxyich ti nyajnaxyich jim Antioquía, jim Iconio, etz jim Listra. Jadu'ñyibaad yí ayo'n tüibi nbaadyich Dios ti xyñihua'ñ ti xycohua'ñich. ¹² Huen pin huidibi yajxon cuydumb Dios ycapxy y'ayuc jadu'n nej Cristo Jesús ti xyyaj'ixpicyich, nañ tim jadu'n ajcxy yaj'ixhuididipy yajpahuididipy. ¹³ Yí jibic jäydijc huidibi naybidáacigixp jadu'n nej jihüy cuydungixy yí tìy'ajt, e ca' yjanchity, ñigi jibic y'ididzaangixy. Huin'ñaangixy ymigügtijc ajcxy, e ñayhuin'ñanáangixy ci'm.

¹⁴ Miich Timoteo, ixmatz yí jadu'mbi jäy ajcxy etz panicx yí tüibi m'ixpicy, yí tüibi myajnibic'aty. Mnejhuüyb co ñich ti nyaj'ixpicyich je tìy'ajt. ¹⁵ Com miich pi'cni mutzni ti mjaty ti mnejhuüy yí Dios ñecy. Jada necy ti xyajnejhuüy nej huaad mijpidägy yí Cristo Jesús, e ñigi jadu'n jëb huaad yí m'alma nízocin paady. ¹⁶ Tüg'óciy Dios ñecy Dios ci'm ti huinma'ñymöy je huidibi jaay. Paady jëbi nyajtuunim co jäy nyajni'ixiyim nyaj'ixpicim. Jëb nyajtuunim co njijpcogapxiyim huidibi ca' ytiy'ajtity, etz co n'ihuijim ngapxhuijim. Jëb nyajtuunim co nyaj'ixpicim nej jëb huaad tìy'ajt nbanicxim, ¹⁷ jigix yí jäy ajcxy huidibi mijpidacp Dios ytiy'ajt, jëb ni'ixi' y'idipy, tunipy tüg'óciy oybi huinma'ñ oybi tung.

4

¹ Ooy ycopicity mido'mbic jada ayuc jadu'n nej cham ñich miich nijayiy. Dios etz ñich ajt nHuindzin Cristo Jesús tìy'ajt yejc co copicy jada ayuc. Cristo Jesús ytiydunamyb yí jäy ajcxy juugypi etz yí jäy ajcxy tüibi y'o'ccixy, e chi yajjugypigipy jadüg'oc ajcxy. Yí' yajtiydunamb ajcxy co anajty ymiñ ya naaxhuiñ pidäga'ñ y'ane'min. ² Nyajnibijcipy mgapxhuäcxip Dios y'ayuc ytiy'ajt hueñytimyminaajity, oy pin midoohua'ñ o camidoohua'ñ. Copicy co mjijpcogapxihiipy huidibi ca' ytiy'ajtity, capxhuij pin yinjaty huenjaty camadacp, ñhuij capxhuij yí jäy ajcxy miid Dios y'ayuc ytiy'ajt. Mimecxtuc etz yaj'ixpic yí jäy ajcxy. ³ Minip je xii je tiempo ma jäy ajcxy ca' cöbiga'ni oybi tìy'ajt. Nijëjity miid yci'mdzojcin miid yci'm-huinma'ñ ixtähuip ajcxy yhuindzin huidibi yaj'ixpigüib nej ajcxy jäygidägy, oy ca' ytiy'ajtity. ⁴ Chi ajcxy anajty jijphuäctúutcixni camidoohuáangixni je Dios y'ayuc ytiy'ajt. Mijpidaacni anajty ajcxy ñigi yí ñigoobi'ayucity. ⁵ Miich huijy ycuje m'idipy. Mecxtujcta' nej jäy ajcxy xy'ixhuidity xypahuidity. Yajnima' jäy ajcxy Dios ytiy'ajt, jëb ajcxy mijpidägy etz jothuimbidity ajcxy Dios. Yaj'ixpic Dios y'ayuc ytiy'ajt nej ypadyii.

⁶ Jadu'n miich cham njacnimäy, je' co ti yhuaad'ajtni je tiempo minaa ndzanaanich ya naaxhuiñ xyaj'ögaamich jäy, ti nayxoxyiijich naydogyiijich miid Cristo Jesús ycixpi. ⁷ Ti ñich ooy mic nmihuindinäy Dios y'ayuccapxhuäcxii ma anajty ypadyii. Ti nyajcixy nyajmayich je tung huidibi anajty xypatpich. Ooy ti nyajmij'atyich Cristo Jesús, ni ca' ti n'ixmajchich yí y'ayuc ytiy'ajt. ⁸ Cham njijp'ijxypich co Cristo Jesús je tiydumbi tudägyi xycömayipyich jiiyb tzajpjoty, miid co tiydudägy ti ndzinäyich ti njugy'atyich.

Pablo pijctzoy may'ajt ma Timoteo co tzojc yminipy ma yí'

⁹ Tun may'ajt tzojc yminiꝑy ma ñich. ¹⁰ Yi Demas ti ñich yam xycögueecni co yjactzojꝑy yi mayñax xondaacin ya naaxhuiñ. Hue' ti ñicxy jim Tesalónica. Crescente nañ hue' ti ñicxni Galacia. Yi Tito ti ñicxy Dalmacia. ¹¹ Jëyi naydügpajc Lucas yam müd ñich. Co mminiꝑy, müdminiꝑy Marcos, com ooy ti xychachpubetyich ma Dios ytung. ¹² Yi Tíquico ti nguexyich jim Efeso. ¹³ Je joxhuit huidibi nyajhui'müyich jim Troas ma Carpo ytijc miminiꝑy. Nañ jadu'n mîmindähuipy je necy. Je' ooy ytimycopyity yi pergamino necy.

¹⁴ Alejandro je ca'tzpi ti yi' ooy mij xymidundigooyich. Yi nhuindzin'ajtim Dios paatip nej yajmidzogyii. ¹⁵ Naygüend'adii ca' miich yi' mmijyöybedipy, com ooy mic ti jipꝑogapxy Dios y'ayuc huidibi ñich ajcxy nyaj'ixꝑijꝑy.

¹⁶ Co yi' oga'n xyxyich ma je mij tungmüdpi, naydüg ayuc nmihuindinaayich. Nipin xycapubejtyich, nigi ajcxy xycögueectayich. Huen Dios ocmeecxy nej ajcxy ti y'idütcixy. ¹⁷ Ca' y'ocnejity Dios ti xypubetyich ti xypudigiyich. Dios ti xyyajotmicꝑicyich, jigix ngapxhuäcxtähuibich yty'ajt ma tüg'óciy jäy. Jëb tüg'óciy jäy huidibi ca' yjudiojyity huen mido'mbijtaaygixy Dios yty'ajt. Dios ti xyñihua'ñich ti xycohua'ñich ma yi o'cin. ¹⁸ Yi Huindzin Dios yi' xyñihua'ñ xycohua'ñibich ma tüg'óciy jäy huidibi ajcxy jibic-huinma'ñ müd. Yi'xycuend'adipich, ca' ni ti xyjadipyich, cooni anajty njädyich jilby tzajꝑjoty ma y'ane'my. ¡Huen Dios cömay idipy janch huinixi huinítiempo!

Pablo ymigügtijc capxpooꝑxñ yajniꝑy

¹⁹ Yajnañ ñich ngapxpooꝑxñ ma yi Prisca etz ma Aquila etz ma Onesífero yjuugy ymigüg. ²⁰ Éraſto ti je' yhui'my jim Corinto. Je Tróſimo com ꝑijꝑ anajty, ñich je' n'ixmajch jim Mileto. ²¹ Tzojc mjatyminiꝑy ma ca'ni tüchꝑy ymiini. Yquejxyp ajcxy capxpooꝑxñ ma miich, je Eubulo, je Pudente, je Lino, je Claudia etz jacjadyii migügtijc.

²² Huen je Huindzin Cristo Jesús xypubedipy xypudigihuipy. Huen Dios tuñ may'ajt müd miich ajcxy. Amén. Jadu'n ngapxcixyich.

TITO

Yi Necy Huidibi San Pablo Yajnigujx Tito

¹ Ich Pablo, Dios jada miid nduunich, Jesucristo xy'apóstol'ajtpich. Yi ti xyquexyich ma yi jäy ajcxy huidibi Dios ti yhuin'ixyii, jigix ajcxy mibigipy yi' ytiy'ajt. Nañ nyajnimähuibich nej jëb ajcxy cuyduuni Dios ytiy'ajt. ² Jadu'n nduunich jigix co anajty y'o'ccixy, chi jadüg'oc yjugypijccixipy e tzináaygixipy huinixi. Dios yajhuinhuaniy je jäy ajcxy je jugy'ajtin huinixibi, ca'ni anajty naaxhuiñybi chondägy. Jada tiy'ajt jëb nmijpidaacim com Dios ca' yi' y'anidägy. ³ Jada jugy'ajtin huidibi ijtp huinixi, Dios ti yajnejhuüy je jäy ajcxy cham co je tiempo ti yhuaad'ajtni, miid yi' y'ayuc huidibi ngapxhuäcxibich. Je Dios huidibi xyajnidzoocim ich ajt n'alma ti xyajniñicyich co yi' y'ayuc ngapxhuäcxpyich. ⁴ Miich Tito, cham nijayiy jadu'n nej jihuüy nijayiyich ngi'm'ung. Com tú'ciy nmij'ixim nmijpidaacim Dios. Huen Dios ich ajt nDeedy tzajpjotpy etz Cristo Jesús ich ajt nihuambi yajtzoocpi tuñ may'ajt oy'ajt miid miich, huen xypa'ayooy etz xyajjotcujc'adipy.

Myajniñigipy yëdyjc huidibi jëb nigohuajc'aty ymügütjic

⁵ Paady ich miich jim Creta ñaaxjot nyajhui'my, jigix mjacyajniñihuipy je migügtjic jadu'n nej ich ca' ti nyajni'ixiydäyich ajcxy. Tügpi cajp nidüg nidüg myajniñigipy yëdyjctjic huidibi nigop'adiñ nigohuajc'adiñ yi mibijcpidijc, jadu'n nej ti nyajnimäy. ⁶ Yi' myajniñigipy yi' huidibi ca' ti tundigoy; huidibi tüg töxyjäy miid, ca'p ycanaagity; huidibi y'ung ajcxy ca' nijot'aty mayñaax tzinaayin; huidibi y'ung ajcxy ycapxymidooyb. ⁷ Copicy huidibi nigohuajc'adamb yi mibijcpidijc huen jäy'aty tiydudägy, ca' huaad ti tundigoy; huen yajxon cuend'adipy huidibi Dios yje'ajtpy; jäy huidibi ca' ycöjuuñity; huidibi ca' yhuindzipity; huidibi ca' y'amügity; huidibi ca' chip'ixtäy; huidibi ca' y'adzocy. ⁸ Yi' jëbi myajniñigipy huidibi oyjäy'ajtin tuñ miid hueñytimypinity; huidibi ooy y'amügügit; huidibi huijycujc; huidibi tiydudägy yhuinma'ñ; huidibi huindzigüib Dios; huidibi ci'm yajxon naygüend'ajtip. ⁹ Huen cixyjot huinijot naybidáacigixy ma je ayuc tiy'ajt huidibi ti ixpijccixy, jigix jëbi ajcxy jot'amijmöhuiipy jacjadyii jäy ajcxy miid tiy'ajt janchypi, e capxjotcidägyipy ajcxy je pin ajcxy ca' ixa'ñ Dios y'ayuc.

¹⁰ Com ji may judíojäy huidibi ca' ycapxymidoogixy, huidibi niñoobi tijaty ayuc tzachnimiydacp; huidibi ajcxy huin'imb ymügütjic, jadu'n nej yi' ajcxy huidibi minamb co copicy tüg'ócay mibijcp i huen yajtiy'ajtiy ymang ajcxy, jadu'n nej judíojäy tungixy. ¹¹ Copicy co mgapx'adugipy yi' ajcxy huidibi ymügütjic yajco'inñyb tüg jin tüg tjc; huidibi ajcxy yaj'ixpijcp mujuy; huidibi ca' tiy'ajt yaj'ixpijccixy.

¹² Nidüg yi' ajcxy cohuinma'ñybi nigapxy ymügütjic ymina'ñ co yi' Creta jäy ooy ajcxy y'anijity, ooy ajcxy huinducity, ooy ajcxy ñuuxity, ooy ajcxy ycaaxity. ¹³ Tiy'ajt jadu'n nej jada cohuinma'ñyjäy ymina'ñ. Yaj'oj ajcxy mictägy, huen huinjihuuygixy yajxon Dios y'ayuc. ¹⁴ Ca'p ajcxy mijpidaacipy yi' judíojäy ycostumbre etz ni ca' ajcxy mijpidaacip yi' y'ane'min huidibi jäy ci'm ti nihuinma'ñ'aty, huidibi ajcxy ti jipyoöduutni Dios y'ayuc ytiy'ajt.

¹⁵ Pin jäy huädz yjot yhuinma'ñ miid, oy ti jacuyduñ costumbre, o oy ca' ti cuyduñ, Dios yjäygidacpy yi' co oyjot oyhuinma'ñ miidity. Pin jäy ca' huädz yjot yhuinma'ñ miidity, oy ti jacuyduñ costumbre, Dios ca' jäygidägy yi' com jibic ajcxy yjot yhuinma'ñ miidity, ca' ajcxy nej ñayjihuiyigixy. ¹⁶ Yi' jadu'mbi

jäy hue' ñaybidáacigixy jadu'n nej jihuïy nej ooy Dios ytiy'ajt ajcxy mijpidaaci, chi ma huidibi ajcxy ytumyb ji yajniguëxëccixy co ca' ajcxy cuydungixy Dios ytiy'ajt. Dios ca' yi' oy iix ajcxy yhuinma'ñ, ca' ajcxy capxymidoogixy Dios, ca' ajcxy Dios ytung mihuaadity.

2

Nej jëb huaad chinaaygixy yjugy'ajtcixy

¹ Miich huädz myaj'ixpigipy yi migügtijc nej jëb huaad cuydungixy Dios ytiy'ajt. ² Miich m'ihuijip mgapxhuijip yi mijjäydijc huen ca' ajcxy y'amügyjäy'adipy; huen huijycujc jäy'ajtcixy; huen miid'ajtcixy oyjot oyhuinma'ñ; huen mijpidaaccixy Dios ytiy'ajt cixyjot huinjot; huen oyjäy 'ajtin tungixy miid huentimypinjäyity; huen ajcxy mecxtujcin yajtungixy ma yi chinaayin. ³ Nañtymyjadu'n mijjäydijc ajcxy töxyjäybi huen ajcxy jadu'n jäy'ajtcixy nej huidibi ajcxy Dios yajmij'ajtp; ca'p ajcxy ymigügtijc nigapxip ni'ojihuipy, ni ca' ajcxy nihuambedipy; nañ ni ca' ajcxy y'amügyjäy'adipy; huen ymigügtijc ihuijixy capxhuijixy miid ayuc oybi tudägy. ⁴⁻⁵ Yi mijjäydijc ajcxy töxyjäybi huen ihuijixy capxhuijixy yi mutz'anäg töxyjäydijc ajcxy nej jëb huaad chinaaygixy yjugy'ajtcixy; nej jëb huaad ytiyc ñay yajmij'ajtcixy; nej jëb huaad tzojccixy jihuïygixy y'ung y'anäg; nej jëb huaad oyjot oyhuinma'ñ yajtungixy. Ihuij capxhuij yi töxyjäy mutz'anäcpi co huen tiydudägy chinaaygixy, ca' ti jibic-huinma'ñ ajcxy mibidzimipy. Huen ihuij capxyhuij ajcxy nej jëb huaad yjin ytiyc cuend'ajtcixy yajxon; nej jëbi y'amigüg'ajtcixy, nej jëb huaad capxymidoogixy ñäy. Pen jibic-huinma'ñ anajty ajcxy ytumyb, chi anajty Dios ytiy'ajt yajnigapxy yajni'ojiy.

⁶ Miich Tito, nañ jadu'n jaty ihuij jaty capxhuij yujcyeecpidijc etz anäctijc nej jëb huaad oyjot oyhuinma'ñ yajtungixy, ca' huaad ytundigooygixy ycapxtigooygixy. ⁷ Tito, tiydudägy mdzinähuipy, oyjot oyhuinma'ñ myajtunipy. Jim yi migügtijc iixpejt pigipy ma miich, nej jëb huaad ytungixy. Huädz ajcxy myaj'ixpigipy yi tiy'ajt, huijycujc m'idipy. ⁸ Tito, m'ihuijip mgapxhuijip yi migügtijc miid oy'ayuc oyhuinma'ñ, jigix co pinjäy jipcogapxihuaanip miich m'ayuc, chi tzo'ydu'ñ jihuïhua'ñ, e jadu'n ca' jadipy nej jibic xyñigápccixipy xyñi'ojiygixipy.

⁹⁻¹⁰ Je tumbidijc huidibi ijtp cojuyiy codoogiy, huen yhuindzin imidoogixy capxymidoogixy nej ypadyii. Huen tungixy nej huaad yhuindzin jäygidägy, ca' adzo'nmay yjäy'adipy. Ca' meedzip tijaty yhuindzin yjë'ajtpy, huen yajmij'adipy yajxon yhuindzin, huen yajxon ytung tundaayi. Pen jadu'n ajcxy yhuindzin midungixy yajxon, huin'it cömay y'idipy yi Dios ytiy'ajt, je Dios huidibi xyajnidzoocim ajt n'alma.

¹¹ Cham n'ijxim nnejhuïyim nej Dios may'ajt ti tuñ miid tüg'óciy jäy ajcxy ycixpi, co ti yaj'oyiy nej jëb huaad hueñypinity pinjaty mijpidaacip yi' y'ayuc, ypadamyb ajcxy y'alma ñidzoocin co anajty y'o'ccixy. ¹² Dios cham ti xyajnejhuïyim pen tzögamb ich ajt n'alma, chojcpy co n'ixmajtzim je jibic-huinma'ñ huidibi Dios ca' jäygidägy. Ca' huaad ooy nijot'ajtim yi mayñaxpi tzinaayin ma jadachambi xii tiempo yjacyöy. Copicy ndzinaayim huijycujc etz tudägy, e nguydunim Dios y'ayuc ytiy'ajt. ¹³ Njipp'ijxim mina Jesucristo, je huidibi xy'ane'mdaayim, ymiina'ñ ya naaxhuiñ jadüg'oc miid ich ajt ycixpi. Njotcugüyim ich ajt co n'ijxim ymiin miid y'oy'ajtin ymic'ajtin, yi Dios huidibi yajnidzögam ich ajt n'alma. ¹⁴ Yi Cristo Jesús ti ñayyoxyii ti ñaydoogyii co y'o'cy ma yi cruudz miid ich ajt ycixpi. Yi ti xyjuybidzimim

ma anajty yi mujcu' cï'am xymiid'ajtim, co anajty ti nbocytuunim. Yi' ti xya-jpocyñihuätztaayim nidüg'óciy, jigix Dios xyjäy'ajtimip miid huädz jot huädz huinma'ñ, jëb nduunim oyjäy'ajtin cixyjot huinijot.

¹⁵ Tito, jada tiy'ajt migügtijc myajnimaydähuipy. M'ihhuijip mgapxhuijip ajcxy yajxon. Dios ti xymöy cötujcin co m'ojipy pinjaty xycacapxmidoob, jëb ajcxy yi m'ane'min xyajmij'ajtip.

3

Huen mijnicxpejtcixy yi gobierno ytungmiidpi

¹ M'ihhuijip mgapxhuijip yi migügtijc huen capxymidoogixy yi gobierno ytungmiidpi etz cajpjäy ytungmiidpi. Huen capxymidoogixy jadu'n nej y'ane'myii ajcxy. Huen tungixy huidibi tiydudägyip huidibi ajcxy yaj'ane'mip.

² M'ihhuijip mgapxhuijip yi migügtijc ajcxy ca'p ajcxy ni pin nigapx ni'ojihuip, nañ ni ca' tzipcapxy ajcxy ixtähuip, huen ñaybidáacigixy amigüg, huen mimecxtujctaaygixy yi ymigügtijc ajcxy, huen nicy xyeemy jäy'ajtcixy miid yi mayjäy ajcxy.

³ Jecy'ajty ma ca'ni anajty nmijpidaacim Cristo Jesús, hue' anajty nyajpaatim miid jibic-huinma'ñ. Ca' anajty n'imidoohuim ngapxmidoohuim. Je mujcu' anajty ti xyhuin'inim, paady anajty nnidigooyim ndüdigoooyim. Ndzachnijot'ajtim mayñaxpi tzinaayin, ni ngajajtim anajty nej n'ixmajtzim yi jadu'mbi huinma'ñ. Jibic-huinma'ñ nduunim. Jadu'n njäy'ajtim njot anajty n'iditizim, nga'oy'ijxim anajty nmigügtijc. Paady jäy anajty xymiddziptzoonim, chi naymijotma'tcootim miñ xyipy. ⁴ Jadu'n anajty nduunim ixti cooni Cristo Jesús ñayguëxigüyb ya naaxhuiñ, etz nnejhuuyim jadu'n nej Dios ich ajt nihuambi yajtzoocpi may'ajt oy'ajt ti tuñ miid tüg'óciy jäy ajcxy ycixpi. ⁵ Yi' xyajnidzoocim ajt n'alma canan co ich ajt ndzach'oyjäyity. Hue' je' jadu'n ti tuñ miid co pa'ayo'n ti yajtuñ miid ich ajt ycixpi. Ninigoob ti tuñ may'ajt oy'ajt miid ich ajt ycixpi. Chi yaj'oyüyñi ajt njot nhuinma'ñ huinjemy miid je Espiritu Santo huidibi xyajtigüyim njot nhuinma'ñ, e jadu'n ajt njugy'ajtin ndzinaayin chondaacni huinjemy.

⁶ Dios ti yecy yi Espiritu Santo janch mijcajee ma ich ajt njot nhuinma'ñ. Jadu'n Jesucristo xytuunim, je huidi ich ajt nihuaanim yajtzoocim. ⁷ Yi' ti xyaj'ahuimbijtim tudägy miid je may'ajtin oy'ajtin huidibi ti tuñ co yi' ti y'ögy miid ich ajt ycixpi. Jëyi cham y'oy'ahuixnity mina anajty nbadaanim je jugy'ajtin huidibi Dios miid huidibi ca' ycixipy ni minaa xi.

⁸ Jada ayuc jada tiy'ajt ndzojcpyich co miich mnigapxpedipy. Ooy ycopicyity co yi' ajcxy huidibi mijpidacp Dios huen oyjäy'ajtin tungixyp. Ooy y'oyity co oyjäy'ajtin tungixyp ajcxy. Yjäygidägipy yi jäy ajcxy miid je oyjäy'ajtin huidibi anajty ajcxy ytumyb etz ypaadipy ajcxy oy'ajt. ⁹ Ixmatz yi jäy ajcxy huidibi nigapxy nimiydägy yi nigooobi'ayucity, yi huidibi ca' choobaady. Nañ jadu'n yi' ajcxy huidibi nigapxp nimiydacp huidibi ñi'ap'ajtpy ñideedy'ajtpy. Ca' mijjptigiyihuipy yi tzip capxy ma yi judiojäy ycötujcin huidibi ajcxy ypanicxyp. Yi jadu'mbi tzip capxy ninigoob yi', ca' yi' ni ma choobaady, ca' jugy'ajt miidity.

¹⁰ Yi jadu'mbi jäy huidibi tzip capxy ixtaayb, miid tüg'oc mejtz'oc myaj'ojipy pen ca' ycapxcöbicy, tim ix'oj, huen nicxy. ¹¹ Mnejhuuyb co yi jadu'mbi jäy ajcxy ti ixmajtzicixy je tiy'ajt, tundigooyb yi' ajcxy, ci'm jadu'n nayya-jpocycähuuygixy.

Pablo nimay Tito co miid naybadaanip

¹² Nyajniguexipich nidüg, aver huidibi ich anajty n'ocquejxyp yi Artemas o yi Tíquico. Co yi' jim yjadipy, chi miich xyjatyñiminipyich mic'amy jim Nicópolis

com jim nyajnaxa'ñich yi tich poj tiempo. ¹³ Co yi Zenas, yi huingapxi, etz Apolo ajcxy jim yjadipy, quejxnajxcix miich yi', e mooygixy ytu'amgixpi ca'ydi ti yajmayajtcixy tü'am. ¹⁴ Huen yi nmigügtijc'ajt ixpijccixy nej jäy y'oyjäy'aty, huen pubejtcixy pin tijaty yajmayajtp. Pen ca' jadu'n tungixy, Dios ca' yi jäygidaacip yi' ajcxy yhuinma'ñ.

Pablo ycapxcíxy mñd Tito

¹⁵ Yi migügtijc ajcxy huidibi ya yquejxyp ajcxy capxpocxin ma miich. Nquejxpich ngapxocxin ma tüg'ócay yi nmigügtijc ajt huidijaty jim yajmij'ajtp Cristo Jesús. Huen Dios mij may'ajt tunip mñd miich ajcxy ycixpi. Amén. Jadu'ñyi ngapxcíxyich.

FILEMÓN

Yi Necy Huidibi San Pablo Yajnigiejx Filemón

¹ Hich Pablo etz Timoteo, ich ajt nmigüg, nijayiybich miich Filemón huidibi ooy ndzocyich, huidibi quipxyi müd nduunim. Nmach'ihñayich müd co nyajmij'atyich Cristo Jesús. ² Nañ jadu'n nijayiybich yi Apía, ich ajt nmigüg töxyjäybi, etz yi Arquipo, huidibi capxhuäcx Dios y'ayuc tú'ciy müd ich ajcxy, etz tüg'óciy yi migügtijc huidibi naymújigixp ma miich mdijc Dios ojadajtcixy. ³ Huen Dios Teedy etz yi Huindzin Jesucristo tuñ may'ajt oy'ajt ma miich ajcxy etz xyajjotcugiygixipy.

Pablo capxpaady Filemón co mijpidägy Dios

⁴ Nyajnajxpyich Dioscojuyip ma Dios müd miich ajcxy ycixpi. Njatyimjäymeitzpich miich ajcxy jabom jabom co Dios nmibijctzooyich. ⁵ Ti ich ayuc nmidooy jadu'n nej miich mdzocy mjihuüy yi Huindzin Jesús etz tüg'óciy pinjaty yajmij'ajtp Jesús. ⁶ Nañ jadu'n nmibijctzooybich Dios müd miich ajcxy ycixpi, huen oyjäy'ajtin mdunipy müd je migügtijc, jadu'n nej Dios ti xyajnejhuüy yi tiy'ajt jigix ajcxy tiy'ajt paadipy ma miich nej jëb ajcxy cuyduñ Cristo y'ayuc. ⁷ Hermano, ti ich ooy njotcugiyich müd yi m'oyjäy'ajtin huidibi miich mdumyb co ti mbubety yi Dios yjäy.

Pablo pijctzoy tüg may'ajt ma Filemón müd Onésimo ycixpi

⁸⁻⁹ Njapijctzoohuamybich tüg may'ajt ma miich. Oy njamüdidyich cötujcin huidibi Jesús xymooyich jëb nja'ane'my co miich mgöbigipy Onésimo oy'amy. Per ca' jadu'n n'ane'mañ müd co ooy ndzocy ooy njihuüyich miich. Paady cham may'ajt nbijctzooyich ma miich co mgöbigipy yi Onésimo oy'amy. Hich Pablo, ti nmijjäyñich. Cham jäy ti xypidägyich pujxtigoty müd co ngapxhuäcxich Jesús y'ayuc ytiy'ajt. ¹⁰ Cham may'ajt nbijctzooyich ma miich co mba'ayoohuipy yi Onésimo. Jadu'n njihuüyich nej n'ung'adyiijich müd co yi' ti mijpidägy Jesús ya ma ich nbujxtijc'ihñayich co ti nyajnimäyich Dios y'ayuc.

¹¹ Tiibi xii tiempo ñaxy co yi Onésimo ca' yi' ti xy'ümidooy ti xycapxymidooy. Jadachambi janchtiy capxymidoohuam jadu'n ma miich etz jadu'n ma ich. ¹² Cham nyajnigüexy Onésimo. Ooy njajihuüyich co yam nguexyich. ¹³ Ooy ich yam njayaj'idañich ma ich jigix ixipy yam xymüdtuñich. Ytimyñipaatpy ixipy jadu'n nej miich xymüdtuñich ma yam nbujxtijc'ihñayich müd co ngapxhuäcxich je jemybi oybi ayuc nej Jesucristo yjaty ayooy. ¹⁴ Per ca' ich n'a'ixiyich nicxy nyajhuim'yich, pen ca' miich jadu'n minañ. Ca'p ndzocyich adzip ahuañ tijaty miich mdunipy. Jëyi ndzocyich co miich oy'amy xypubedipyich. ¹⁵ Ca' yjeczyty paady ycixpi ti xycöguëgy jëbi mijpidägy Jesús. Hueeni xii tiempo ti y'ity ya, e cham co yhuimbidipy ma miich, müd y'idipy jim huinixii. ¹⁶ Ca' jadu'n m'ocmüd'ajtnip cham jadu'n nej jac'oyñipin cojuyiy codoogiy tumbi. Hue' je' mmü'adip jadu'n nej Jesús yjäy huidibi ooy mdzocy mjihuüy. Pues ooy ich yi' ndzocy njihuüyich. Jac nigü cham miich mdzogipy mjihuüipy müd co yi' cham y'oyjäyity, etz co cham mijpidägy yi Huindzin Jesús.

¹⁷ Pen janch miich xymigüg'adyiijich cöbic yi Onésimo jadu'n nej ich miich ixipy xycöbicyich. ¹⁸ Pen ti yi' yinjaty huenjaty xymüdundigoy o xyminucx'adyii ich miich nmigüedipy. ¹⁹ Hich Pablo, ich miich njaaybich nfirmajyich müdich ngi'mgi' ngi'mletra. Hermano, nmigüedipyich nej

Onésimo xymínucx'adyii. Oy ìich yam ca' n'ìibaady ngapxpaady co miich xymínucx'adyiijich mîid co Dios ytîy'ajt tî mbaady ma ìich. ²⁰ Xypubedîpîch mîid Onésimo. Yi nHuindzin'ajtm Jesús yjâygidägîpy pen jadu'n mduñ. Mdunîpy may'ajt mîid Onésimo mîid Jesús ycîxpi, e jadu'n ìich jêb huaad njotcujc'atyich.

²¹ Nnejhuîybîch co ooy m'îimîdoy mgapxmîdoy, e jadu'n nej yam njacni-jayîy, jac'anaxy mduna'ñ. ²² Nañ jadu'n yam nîmäy. Tun may'ajt nî'ixî tûg jättac. Njîjp'îjxypîch co nbujxtîjcpîdzîmîpyîch tzojc mîid co miich ajcxy Dios mîbîjctzoogîxy mîid ìich ycîxpi, e jadu'n jêbî nîcxîbîch ma miich.

Pablo ycapxycîjxy mîid Filemón

²³ Nañ nbîdacpyîch necyjoty yam. Xycapxpooocxp Epafras ìich nmîbujxtîjc jây mîid Cristo Jesús ycîxpi. ²⁴ Nañ xycapxpooocx Marcos, Aristarco, Demas etz Lucas. ìich yi' ajcxy xypubejtp ya. ²⁵ Huen yi nHuindzin'ajtm Jesucristo may'ajt oy'ajt tunîpy ma miich ajcxy, jêb miich ajcxy oy m'ity. Amén. Jadu'n ngapxcîxyîch.

HEBREOS

Yi Necy Huidi Pinjaty Yajniguejx Je Hebreo jäy

¹ Jecy'ajty Dios ayuc yejcy ma ajt nmij'ap nmijteedy canaag'oc etz canaag-nax mïid je yprofetas ajcxy, je' ajcxy huidibi najtzcaxiïy Dios y'ayuc. ² E jadachambi ma xii tiempo yhuingooni co je naaxhuiñybi ycixani, Dios ayuc yecy ma ïich ajt mïid je' y'ung. Dios mïid y'ung yaj'oyiïy je naaxhuiñybi etz tüg'óciy tijaty huidibi yajpatp. E Dios ti y'ung yajmïgo'ixmadziydäy tüg'óciy. ³ Dios y'ung ymïid Dios y'oy'ajtïn, yi' je' Dios ytïcxin'ajtpy yjain'ajtpy. Yi' je' codinaayb etz yajniguëxïgy nej je' je Dios. Dios y'ung huijtz'ijtaayb tüg'óciy mïid je' y'ayuc etz ane'mïn mic'ajt mïidpi. Co Dios y'ung ti xyajhuaatzim ajt nbocy, chi cöbijcy je mij'ane'mïn jiiby tzajpjoty, jadu'n nej jihuïy y'ixtacy a'oy'amy ma je mijpi Dios ymïjc jiiby tzajpjoty.

Dios y'ung jacmij yi'ca'ydï ángeles ajcxy

⁴ Je Dios y'ung jac mij je' ymic'ajt y'ane'mïn mïidity, ca'ydï je ángeles ajcxy. Com yi' je' Dios y'ung, paady ycixpi mic'ajt mïidity jaydëbi ane'my huidibi Dios yje'ajtpy, e ca'ydï yi' ángeles ajcxy yi' jadu'mbi mic'ajt mïid. ⁵ Com Dios ca' yi' ni tüg ángel nimay:

ïich miich n'ung'ajtpy. ïich miich ti nyajpi'c'aty jadachambi xii.

Nañ jadu'n ca' Dios ni tüg ángel nimay:

Miich xyteedy'adïbich, ïich miich n'ung'adïyb.

⁶ Co Dios y'ungoob oy quexy ma naaxhuiñyjäy chinäy, chi yi' ane'mïn pidacy: Huen je ángeles ajcxy nidüg'óciy huindziği huïpy pa'tjihuïhuïpy je' y'ung.

⁷ E mïid je ángeles ycixpi, Dios ymïna'ñ:

Yi ángeles jadu'n yi' ajcxy nej poj. Yi' ajcxy huidibi tzajpjoty tzinaayb, jadu'n yi'ajcxy nej huidzuc, nej jïinye'n.

⁸ Jadu'n Dios ymïnañ mïid y'ung ycixpi:

Miich, Dios'ajtp, miich m'ane'mïn huinixii huinitiempo yi' y'idïpy. Mïid mdudägy'ajtïn miich m'ane'mïpy.

⁹ Ti mdzocy je tiy'ajt tiybi, e ca' ti m'ixa'ñ je jibicpi. Paady ycixpi Dios, miich mDios, ti xyhuin'ixy, e ti yejctäy nïgi ma miich je jotcuju'ajtïn je xondaacin, ca'ydï ma yi' mmi'ane'mbidïjc.

¹⁰ Dios nañ jadu'n ymïna'ñ:

Miich, Huindzin Dios, oga'n'aty mbidac nej naaxhuiñybi chondacy, e mïid miich mmic'ajt myaj'oyiïy je tzajp.

¹¹ Cijxtähuiip yi' naaxhuiñybi etz yi' tzajp, per miich hui'mïp huinixii huinitiempo. Jadu'n yi' naaxhuiñybi etz yi' tzajp y'amijïydähuiipy nej huit.

¹² Jadu'n miich yi' naaxhuiñybi etz yi' tzajp m'anëgiipy nej tüg huit yaj'anëgyïn. Jadu'n miich yi' naaxhuiñybi etz yi' tzajp myajtigadzïpy nej jäy ajcxy yajtigach yhuït. Chi miich je'ni m'idïpy, je mxii mjimïjt ni mïna ycacixïpy ycatigoyïpy.

¹³ Ni camïna Dios canïmay ni tüg je ángeles ajcxy:

ïña' ma ïich nmïjc a'oy'amy, ixti mabaad ïch miich je mmïdzip nmïmadactäyich, jadu'n yi'ajcxy nipaadïpy nej yi' miich mdecypocxpejt'adyii.

¹⁴ Tüg'óciy je ángeles ajcxy ac espíritu yi' ajcxy, e ytungixy ma Dios, yquexyöygiy jïgix pubedïpy je jäy ajcxy huidibi ajcxy y'alma padam ñidzoocïn.

2

Ca' n'ijxnajx nmidonajxim nigoo yi pocyhuinmeecxin

¹ Miiid jadaayaabi tiy'ajt ycixpi, oy co yajxon n'ocjäygugiiyim Dios ytiy'ajt huidibi ti nmidoohuim, jigix ca' nijjpyöyduutim je Dios ytiy'ajt huidibi jadu'n nipatp nej tü'aa oybi. ² Pen je ayuc tiy'ajt huidibi ángeles ajcxy yejc jecy'ajty, huim je' co yjanchity. E pinjaty pocytumb, e ca' cuyduuni Dios ytiy'ajt, Dios chaachytunipy je' nej padyii miiid ypocy ycixpi. ³ ¿Nej tijy ich ajt co Dios ycastigo nga'ocpaatim, pen je' je' yam ca' nmijpidaacim je Dios ytiy'ajt jadu'n nej jébi xyajnidzoocim ajt n'alma? Yi Huindzin Jesús jayijp'aty ci'm nigapxy Dios ytiy'ajt jadu'n nej jébi Dios xyajnidzoocim ajt n'alma. E jac'axam je discipulos ajcxy nañ jadu'n najtzcaxix Jesús y'ayuc, e nigapxpejty ajcxy co yjanchity je Jesús y'ayuc, e chi capxnajxy ajcxy jada tiy'ajt ma ich ajt. ⁴ Jadu'n anajty capxhuäcxix Jesús y'ayuc ma ich ajt, chi Dios yajniguëxíc Jesús y'ayuc co yjanchity co tuñ ijxpejt, mijhuinma'ñ etz milagro. E co Dios xymooyim je yihu'ñ ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ymigüg

⁵ Dios ca' yi ángeles ajcxy ti cötujcin möy co y'ane'mity ya naaxhuiñ, jadu'n nej xii tiempo min cidägy, je xii je tiempo huidibi ich ajt nnimiydaacim. ⁶ Hue' janchity ji tüg'it yjaybetyity ma Dios ñecy, ma ymina'ñ:

Miich Dios, ¿ti yi' je naaxhuiñjyäy, co miich yi' ajcxy mjäymedziyb? ¿Ti yi' je naaxhuiñjyäy, co miich je' ajcxy mjotmay'adyii?

⁷ Janch con xii tiempo miich ti mmöy yi' naaxhuiñjyäy ajcxy e nañ ti mmöy jacminacy ymic'ajt y'ane'm'ajt ca'ydi yi' ángeles ajcxy. Per jac'axam miich mmöhua'ñ naaxhuiñjyäy ajcxy nigä ymic'ajt y'ane'm'ajt, ca'ydi je ángeles ajcxy. Tüg'óciy huidijaty miich ti myaj'oyiy anajty ti mbidactahuip yi' ma yi' naaxhuiñjyäy ajcxy ane'min.

⁸ E co anajty ti mbidactäy anajty ma yi' ajcxy y'ane'min, jadu'n nipaady nej jihuüy tüg'óciy tijaty huidibi ti myaj'oyiy, y'idipy ma yi' ajcxy ytecypa't.

E jadu'n yi', co Dios moyday ane'min je Cristo. Dios ni ti yi' ca'ixmach nicxy yca'ity ma yi' y'ane'min. Oy ixypy ca'ni cham n'ixim co tüg'óciy tijaty ya naaxhuiñ etz tzajpjoty ca'ni amugi' ycapxycöbigyii. ⁹ Dios ti xyaj'ixim co Jesús miiid mij'ajt ane'm'ajt. Je ángeles ajcxy nigä mic'ajt oy'ajt anajty miiidity, ca'ydi Jesús co yi' chinay ya naaxhuiñ. Jadu'n Dios tuñ jaydëbi Jesús y'ögy miiid jäy ajcxy ypocy ycixpi. Jadachambi Dios ti möy Jesús mij oy'ajtin, etz mij ooy ti cömay miiid je tzaachy'o'cin huidibi ypaat.

¹⁰ Tüg'óciy huidijaty ya yajpatp, ji'ajtp yi' miiid Dios ycixpi etz Dios ymic'ajt yaj'ijtaayb tüg'óciy huidibi ji'ajtp. Dios tudägy ytuuñ co yajca'pxi Jesucristo y'oy'ajtin miiid je tzaachypä huidibi ti minaxy ti yajnaxy. Miiid co Jesucristo tzaachypä ti minaxy ti yajnaxy, paady ycixp jäy ajcxy padaangixy Cristo y'oy'ajtin. ¹¹ Miiid co Jesucristo, je huidibi jäy ajcxy yajpocyñhuaatzp, jibiy mic'ajt ti paady ma Dios Teedy, paady ycixp yi' ajcxy huidibi patcixp pocyñhuaatzin nañ jim mic'ajt patcixy ma Dios Teedy. E miiid co Jesucristo etz yi' yjäy mic'ajt patcixy ma Dios Teedy, paady ycixp Dios y'ung je Jesucristo ca' ti tzo'ydu'n jihuüy co yi' ymina'ñ co je mibijcpidijc jadu'n nipaady nej yi' yjugytijc ymigügtijc. ¹² Paady je Cristo ymina'ñ ma yjaybetyity:

Miich Dios, ich miich ngapxpadipyich ma nmigügtijcich. N'ihuipyich iy miiid miich ycixpi ma je jäy ajcxy ti nayoymújciixy.

¹³ Nañ jadu'n Cristo ymina'ñ ma yjaybetyity:

Nmijpidägyich Dios.

E jadüg'oc ymínaanip:

Cha ñich, mîd je ung anäg ajcxy tîbî Dios xymöyich.

¹⁴ Ma jäy ajcxy ytügquëx'ajtcixy, tûgpi yxiixy, tûgpi ni'py je' ajcxy. Nañ jadu'n Jesús ymîd je' anajty yxiixy ñi'py jadu'n nej jäy ajcxy ymîdity jigix jëbî y'ögy, e jadu'n je' yajhuindigoydâhuipy je huîdibî anajty jamîc'ajtmîd co jäy yaj'ögiiyb, je' je' je' mujcu'. ¹⁵ E jadu'n je Cristo yajnihuädzictuty tûg'ócîy pinjaty anajty cojuyîy codoogîy y'ijtp ma je mujcu', mîd co tzigiiygixy yî y'o'cîn. ¹⁶ Janch co Jesús ymîiñ ya naaxhuiñ, ca' nmînaanîm co pubedañ je ángeles ajcxy, je' janchtiy ypubedamyb Abraham y'ap y'oc. ¹⁷ E mîd jada ycîxpi, Jesucristo jadu'n anajty mîdity ñinîcx etz yjugy'ajtîñ tú'cîy mîd je jugytîc ymîgügtîc ninîcx etz jugy'ajtîñ, jigix jëbî yî' naydügpajc codinây naaxhuiñjäy ajcxy ma Dios yhuînduu mîd tudägy'ajt etz pa'ayoohuin. Etz nañ jadu'n jigix jëbî huîndzigîy Dios mîd yci'm ñinîcx mîd jäy ajcxy ypocy ycîxpi, e jadu'n yajpocyhuaatztâhuip yî mayjäy ajcxy. ¹⁸ Com Jesucristo ci'm tzaachypî minajx yajnax, etz nañ jadu'n je mujcu' Jesucristo jot'ijxy huinma'ñ'ijxy, paady ycîxp Jesucristo jëbî pubety pinjaty jadu'n tzaachypî minajxp yajnaxp, etz ma yjot'ixyii yhuinma'ñ'ixyii je mujcu'.

3

Jesús jacnîgi mijîty yî' ca'ydi Moisés

¹ Mîd co Jesucristo jadu'n ti tuñ, paady ycîxp miich ajcxy mîgügtîc huîdibî cixyot huinîjot mijpîdacp Jesucristo, je huîdibî ajcxy Dios ti xyhuin'ijxcixy co xyje'adâanîgixy. Pîdaaccîx mhuinma'ñ yajxon ma je Cristo Jesús, je huîdibî nejhuîyîm co Dios ti quexy ya naaxhuiñ, je huîdibî tûgpajc mîjtungmîd ma Dios, huîdibî tûgpajc xycodînaayîm ma Dios. ² Jesús tudägy yî' ti y'ity ma Dios yhuînduu, je Dios huîdibî ti yajnîbigyii je mîjtung, tim jadu'n nej Moisés y'ijty tudägy ma je ytung mîd tûg'ócîy jäy huîdibî anajty ti cöbijccixy Dios ycötujcîn ma Moisés. ³ Jesús ymîhuaad nîgi huîndzigî'ñ etz cömayîñ, ca'ydi Moisés. Tim jadu'n nej pin tûg tîjcojpi je' je' ijtp cömay, ca' nmînaanîm je tîc ijtp cömay. ⁴ Tûg tûg tîj cîm je' pin cojp. Per Dios yî' ti yajcojtây yaj'oyîydây tûg'ócîy huîdibî jî'ajtp. ⁵ E jadu'n je Moisés tudägy je' ytuñ mîd tûg'ócîy jäy huîdibî ti paady Dios ycötujcîn ma yî'. Je Moisés je' ytung'ajti yejcy je tîy'ajt huîdibî anajty Dios jac'axam yegamyb. ⁶ Je Cristo tudägy ytuñ mîd tûg'ócîy ñich ajt huîdibî mijpîdacp Dios, tim jadu'n nej tûg jäy y'ung tudägy ytuñ ma yteedy ytîc yteedy ypidägy. Jadu'n ñich ajt nbaady nej Dios ytîc, e Cristo tudägy ytuñ mîd ñich ajt, pen tudägy nmîbijcîm Dios y'ayuc, ca' n'ixmajtzîm ajt nmîbijcîn. Pen nmîjpîdaacîm Dios agujc jotcujc îxtî mabaad n'o'cîm mîd je' ycîxpi huîdibî nîjîp'ijxîm ma Dios.

Dios yjäy ajcxy ypoocxîñ

⁷ Paady ycîxp jadu'n yjaybetyîty ma Dios ñecy ma je Espíritu Santo jadu'n ymînañ:

Jadachambî pen mîdooyb miich ajcxy nej Dios ymîna'ñ,

⁸ ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huîdibî mîbîdîgy Dios jecy'ajt (co ajcxy y'ijty jîm mîjtîgîduum). Je xî je tiempo jecy'ajty co ajcxy jot'ijxy huinma'ñ'ijxy Dios.

⁹ Chi Dios ymîna'ñ:

Miich ajcxy mmîj'ap mmîjteedy ajcxy jîm mîjtîgîduum xyjot'ijx xyhuinma'ñ'ijxîch ajcxy jecy'ajty. Ca' ajcxy jäymech co ajcxy y'ijxy anajty canaag mîjhuinma'ñ huîdibî ndumybiç anajty mîd yî' ajcxy ycîxpi huixchiguîpx jîmîjt.

10 Paady njotma'tyich mïd miich ajcxy mmij'ap mmijteedy jecy'ajty, e nmïnaañich: "Nïdigoy tïdigoy ajcxy jabom jabom ma yjot yhuinma'ñ. E ca' ajcxy nejhuïhuaangixy anajty ïch nnï'aa ndü'aa."

11 Paady yi' ajcxy nmijotma'tyich, e janch janch nmïmaayich ajcxy, e ca' n'ïndägyich, co ca' ajcxy ytigïhuipy ma ïch nbocxtac.

12 Migügtijc, naygüend'ájtigix nidüg nidüg co ni tüg miich ajcxy mgamïd'adip jibicjot jibic-huinma'ñ, e ni mga'ixmájtzcixipy Dios juugypi y'ayuc, mïd co ca' mmïbijccixy. 13 Hue' janchtiy nayjot'amijmóoyigixy miñ xyipy jabom jabom nami xï tiempo yjacnicxñi. Jadu'n miich ajcxy mdunipy, ca'ydi ajcxy yi pocytunï xyhuin'ïngixy, e chi anajty mnaybidáacigixy jotjuuñ.

14 Pen nmïbijcim nmijpïdaacim Cristo y'ayuc tïbi nbaatim oga'n'aty, e ca' n'ixtigïhua'cim mabaad n'o'cim, chi jëbi n'ijtim mïd Cristo.

15 Je' je' je huïdibi jaybetyity ma Dios y'ayuc:

Cham, pen mmïdooyb miich ajcxy nej Dios ymïna'ñ, ca' ajcxy m'ijtcixy jotjuuñ, jadu'n nej je' anajty ajcxy huïdibi Dios mijotma'tp anajty mïd co ajcxy mïbidïgy Dios.

16 ¿Pinjaty ajcxy huïdibi jecy'ajty midou Dios y'ayuc e mïbidïgy Dios? Nidüg'óciy je' ajcxy huïdibi tzomb Egipto naaxjot jecy'ajty mïd Moisés.

17 ¿Pinjaty je Dios ymijotma't jadu'n huixchiguïpx jimij? Je huïdijaty ajcxy tundigoy mïd Dios ytiy'ajt, e je' ajcxy cijx y'öctaaygixy jim mijtigïduum.

18 ¿Pinjaty Dios ñimay co ni camina ytigïhuipy ma je Dios y'it ylugar ma jëbi ypooxcixy mïd yi'? Je' ajcxy huïdibi ca' ycapxymïdoy. 19 Paady nnejhuïyim co janch ca' ajcxy jaty nej ytigïyigixyipy ma Dios y'it ylugar mïd co ajcxy ca' mïbijcy Dios y'ayuc.

4

1 Com nmïdni ajt Dios y'ayuc, jadu'n nej ti xyaj'ahuanïyim co ndigïyim ma yi' chinaydac yjugy'ajttac, e nboocxim mïd yi'. Paady ooy tzocy co ndzigïyim Dios. Ca' jecyity co nidüg miich ajcxy ca' mdigïhuipy mïd co ca' mmïbijccixy Dios y'ayuc. 2 Nañ jadu'n ti ïch ajt nmïdoohuim je Dios y'ayuc oybi, tim jadu'n nej yi' ajcxy jecy'ajty ti mïdooy. Per ca' Dios y'ayuc ma ti ypubedyii ajcxy co ti jamïdoogixy je tiy'ajt. Com hue' ajcxy ymidou, e ca' ajcxy mijpïdacy. 3 ïch ajt com ti nmïbijcim je Dios y'ayuc oybi, ïch ajt je' tigïyimip ma je it huïdibi Dios ti tijy ma jëbi nboocxim mïd yi'. Com Dios jadu'n ymïnañ:

Paady yi' ajcxy nmijotma'tyich, e nmïmäyich ajcxy, n'ïbaadyich ngapx-paadyich n'ayuc, co ni camina xï yi' ajcxy ypocxtac capaadipy ma ïch.

Tüg'óciy huïdibi Dios yajcojy yaj'oyïy, hue' ti yajcojy ti yaj'oyïy jayijpni ca'ni anajty naaxhuïnybi chondacy. 4 Com ma yjaybetyity je tiy'ajt jïby muumity nigapxy je mïhuixtujcxïbi ma jadu'n ymïna'ñ:

Dios ypooxcy je mïhuixtujcxïbi mïd je' ytung ycixpi tïbi anajty tuñ.

5 E jadüg it yjaybetyity ma Dios ñecy ma jadu'n ymïnañ:

Ca'p yi' ajcxy ytigïyigixyipy ma ïch nbocxtac.

6 Hue' janchtiy Dios yjacmïd'ajtyñi it lugar ma ypocxtac ma jëbi pinjaty ytigïhuip. Yi' ajcxy huïdibi tzinay jecy'ajty huïdibi jayijp midou Dios y'ayuc, ca' je' ajcxy ytigïy ma Dios ypocxtac, mïd co ajcxy capxycömïdoodacy Dios.

7 Paady ycixpi Dios ti pïdägy tüg xï tüg tiempo mina jëbi pinjaty tigïhuipy ma yi' ypocxtac. Je' jadachambi xï tiempo Dios ti pïdägy. Dios ti xyñïmaayim nej David ymïnañ tzach com jecy, nej miñ jaybety huïdibi ti yajnigapxy co jadu'n ymïna'ñ:

Jadachambi pen midooyb miich ajcxy nej Dios ymina'n, ca' ajcxy mnaybidáacigixy jotjuuñ.

⁸ Co Josué je Israel jäy ajcxy camoy je poox'in, ca' Dios canigapxy huingbi xii mina ytigihua'n ajcxy ma Dios ypocxtac. ⁹ Paady ycixp, jadu'n yjac-hui'myñi jadüg xii tiempo mina Dios yjäy ytigihua'n ma Dios ypocxtac. ¹⁰ Com pinjaty tigiyb ma Dios ypocxtac hue' je' ypocxy miid je' ytung ycixpi tiibi anajty tuñ, tim jadu'n nej Dios ypooxxy je mihuixtujcxibi miid je' ytung ycixpi tiibi anajty tuñ. ¹¹ Hue' tzocy co naymic'ijxim nej huaad ndigiyim ma je Dios ypocxtac, ca' yjegyty co nijety miich ajcxy mbaduunipy nej ajcxy y'idich huidibi ajcxy ca' mibijcy Dios y'ayuc, e ca' mdigiygixipy ma Dios ypocxtac.

¹² Com yi Dios y'ayuc ijtp yi' huinixii huinitempo, e ymiid mic'ajt. Nigi yajtigiyñajxtäy ninicx, jot almi, ca'ydi tüg espada huidibi mejtz'adu'm'amy jijpip etz yjijpxu'ñity. E Dios y'ayuc nehuiydaayb nej jäy ajcxy yjot yhuinma'n miidity, e tüg'óciy tijaty ajcxy ñijot'ajtcixyp. ¹³ Ca' ji ni ti huidibi Dios ti yajcojy nicxy ñayyüchyii ma yi' yhuinduu. Tüg'óciy nej ajt njot nhuinma'n nmidity ñiguëxictähuiip yi' ma Dios, je Dios ma ich ajt nguendi ngiyegaanim, yi' ijxtaayb ajt njot nhuinma'n.

Jesús yi' je' je' mijhuingapxy ma Dios

¹⁴ Jesús, je Dios y'ung, yi' je' tügpajc jacmijtungmiid huidibi xycodinaayim ma Dios miid ajt nbocy ycixpi. E Jesús ti ytigiy ma Dios yhuinduu, paady ycixp tzoc ijtım tudägy ma ajt nmibijcin. ¹⁵ Pues com Jesucristo, je huidibi tügpajc mijtungmiidip ma Dios, je huidibi xycodinaayim etz xyhuingapxim ma Dios, com Cristo tzaachypi etz ijxta'ni canaagnax ti yajnaxy, tim jadu'n nej ich ajt tzaachypi etz ijxta'ni nyajnajxim, per je' ca' ma ti bocy tuuñ. Paady ycixpi jëbi Cristo ajt xypa'ayoohuim co ajt nyajnajxim tzaachypi etz ijxta'ni. ¹⁶ Tzoc agujc jotcuyc nmihuingoonim je Dios y'ane'mdac e n'ojadajtim nmibijctzoohuim Dios, jaydëbi co anajty jotmay nmid'ajtim, chi Dios may'ajt oy'ajt tunipy miid ich ajt ycixpi.

5

¹ Tüg tüg mijtungmiidpi huidibi huingapxp jäy ajcxy ma Dios, hue' je' yajhuin'ijxp ma yëydijctijc, etz yajnigapxpejty, jaydëbi yhuingapx jäy ajcxy ma Dios etz yajnaxipy Dioscojuyip miid jäy ajcxy ma Dios, etz yegipy huindzig'i'n ma Dios miid jäy ajcxy ypocy ycixpi. ² Je mijtungmiidpi jäy ajcxy yajnibijc huidibi huingapxp jäy ajcxy ma Dios, jëbi yi' ajcxy pa'ayooy huenpinity huidibi pocy ymiid, com nañ jadu'n yi' ajcxy pocy jihuüy. ³ E miid yci'mbocy ycixpi copicy yegipy huindzig'i'n ma Dios etz miid jacjadyii jäy ajcxy ypocy ycixpi.

⁴ Ni pin huaad ci'm ycanaymöyii je jadu'mbi tung co yhuingapxity ma Dios. Dios yhuin'ijxpy pinjaty huingapxip ma yi' miid jäy ajcxy ycixpi, tim jadu'n nej Dios huin'ijxy Aaron jecy'ajty etz yajnibijcy yi' jadu'mbi tung. ⁵ Jadu'n yjajty miid je Cristo, ca' ci'm nayñibijctzoohuüy ma yi' jadu'mbi tung. Dios yajnibijci co huingapxip miid jäy ajcxy ycixpi, e ti ymöyii je mij'ajt jadu'n nej anajty ti nimäy:

Miich je' ich n'ung. Ich miich mjogy'ajt ti mmöy cham.

⁶ Nañ jadu'n ymina'n jadüg'it ma Dios ñecy:

Miich je' mhuingapxyp je jäy ajcxy ma Dios huinixii huinitempo, tim jadu'n nej Melquisedec ytuuñ.

⁷ Co Cristo chinay ya naaxhuiñ, chi ooy mijuydägy minucxtägy Dios, chi ooy mibijctzoy janch mic je Dios huidibi jëbi ycohua'ñyii ma je o'cin. Miid co ooy mibijcy ooy huindzigiy Dios miid yung naxy yjot yhuinma'n, paady

Dios ymidoohui. ⁸ Je Cristo oy je' anajty Dios ja'ung'adyii, yjajti nej ycapxymidoohuipy Dios, miid je' ycixpi nej anajty ti y'ayoy ya naaxhuiñ. ⁹ Co Cristo yajca'pxy yi' y'oy'ajtin miid je' tzaachypí huídibi yminajxy yajnajxy, chi ni'ixi' anajty y'ity jébi cop'adyii alma nidoocin huinixii, jaydēbi tūg'óciy pinjaty capxymidoob Cristo, ypaadip ajcxy y'alma nidoocin. ¹⁰ Dios jadu'n yajnibjcy Jesús co yajnicxip je' jac mijpi tung ma yi' co huingapxip jāy ajcxy ma Dios, tim jadu'n nej Melquisedec ytuñ jecy'ajty.

Je ayo'n co nijjpyöduutim yi mibjcin

¹¹ Ooy ñich miich ajcxy mij nmíidmíydäga'ñ ma jadyaabi tiy'ajt, per ooy chachchip nimíydaacnity, com ca' miich ajcxy mic'amy mhuinjihuipy Dios ytiy'ajt. ¹² Jadu'n nej jada xii tiempo ti yječni ma miich ajcxy oga'n ti mmibicy. Hue' miich ixypy ajcxy mniyaj'ixpijcnip Jesucristo ytiy'ajt je tzipjatypi. Per miich ajcxy mdzojcyñi co myajnajtzcaxihuipy huinjemy je Dios y'ayuc huídibi ca' chipity. Ti miich ajcxy m'ahuimbijttaaygixy ca' mic majaa ma mmibjcin. Hue' jēyi miich ajcxy jadu'n nipaady nej pi'ctijc huídibi leche uucp, e ca' jadu'n paady nej mij'anactijc huídibi caagy caayb. ¹³ Pinjaty yajpatp ma jada ixpijcin huídibi ca' chipity, jadu'n yi' nej ma'xungdijc com ca' jajtciy je ayuc tiy'ajt tiybi. ¹⁴ Je' tzipjatypi tiy'ajt je je' winjihuiyigixp, je' huídibi ymibjkin mij may mid'ajtkixpin, jidu'n nej je' huídibi y'aa ytitz jim ajkixyin je' títzpi jich kaagy je' ykaaygixpy, je' ko yajtkixpy je' nej winjiwiiygixichin je' huídibi oy, etz je' huídibi ka'oyin.

6

¹ Paady tzoc ñigi yajyujcpejtím n'ixpijcin ma Dios ytiy'ajt, tzoc ajt yajyeecim nmibjcin, jigix jadu'n nipaadip jadu'n nej jāy tiibi yhuinma'ñ yca'pxtaayñi. Ca' n'agapxiyo'cim canaag'oc jabom jabom je' tiy'ajt huídibi ti nbaatim co oga'n nmibjcin Cristo. Ca' janam jatzojc n'ixpijco'cim huídibi oga'n ti n'ixpijcin jadu'n nej co njothuimbijtim nej anajty ndunim jibicpi huídibi xyajnicxim ma yi' o'cin, e jadu'n nej nmibjcin Dios oga'n. ² Ca' jadüg'oc n'ixpijco'cim je' ixpijcin miid je' nibejtin ycixpi, etz jadu'n nej yajcñixajy je' mibjcpidijc jaydēbi paadip ajcxy je' Dios yjihui'ñ ymic'ajt, etz jadu'n nej yi' öcpi ajcxy yjugypigipy co anajty ti öccixy, etz jadu'n nej Dios tzaachytuna'ñ huinixii pocyjädijc. ³ Chi njac'ixpijcin Dios y'ayuc je' tzipjatypi, pen Dios jadu'n tzojcpy.

⁴ Com pinjaty ti huinjihuỹ Dios y'ayuc ytiy'ajt, e jāygidägy huídibi Dios yejcpy, etz miidity Dios yjihui'ñ ma y'ay yjot, jadu'n je' nipaady nejjihuỹ chinay ma jin ytixcin. ⁵ Etz ti ajcxy jāygidägy Dios y'ayuc ytiy'ajt, e ti jihuiyigixy Dios yjihui'ñ ymic'ajt huídibi yajtzinaayip ajcxy y'alma ma je' xii je' tiempo huídibi miimb cidacp. ⁶ Yi' jadu'mbi jāy, pen tundigooyb ajcxy jadüg'oc miid Dios ytiy'ajt, e ixmach ajcxy nej anajty ti mibjccixy Jesucristo, ca'p jēbi jadüg'oc jothuimbijtcixy ma Dios miid pocy ycixpi e pijctzoogixy pocyhuinmeecxin jadüg'oc. Co ixypy jadu'n ajcxy tuñ, chi huimbizimy nej ajcxy jadüg'oc yajcruudzpejtciy je' Dios y'ung miid ajcxy ypocy ycixpi, e nixiiccixy yajxiiccixy nej Jesucristo y'o'cy miid ajcxy ypocy ycixpi. ⁷ Jadu'n yi' ajcxy nej naax nū'uuctich naag'oc naag'oc ytu'y. E pen je' naax yejcpy ooy cosecha ma pin ti ñipy ti ytuñ, Dios je' anajty yconuucxin ymiid. ⁸ Pen actim apy etz actim jibic ujtz ypidzimy ma je' naax, ca' je' ti tzoohuity, e Dios je' yajtigoyamb etz nöctāhuip ma je' mij jin. (Jada naax jadu'n jada' nipaady jadu'n nej jāy huídibi ti ixmach ymibjcin.)

Yi huídibi nmibjcin yi xyhuijtz'ijtim tudägy

9 Migügtijc ajcxy huidibi ooy ndzocyich, oy ich ajcxy jadu'n njamidmıydägyich miich ajcxy, janch nejhuiybich co ca' ajcxy ti m'ixmach yi mibijcin, etz nejhuiybich co oybi conuucxin mbaadaangixyp ma Dios etz m'alma ajcxy nidzoocin paadaangixy. 10 Com Dios ooy yi' ytudägyity, e ca' yi' jäydigoy huidibi miich ajcxy mdumyb müd yi' ycixpi, jadu'n nej oyjäy'ajtin ti mdungixy müd jacjadyii mibijcpidijc, e chambaad jadu'n mdungixy. 11 Hue' ich ajcxy ndzocyich co miich ajcxy nidüg nidüg mnixondaaccix tungix oyjäy'ajtin ixti mabaad m'öccixy, jigix mbaadipy ajcxy tüg'ócıy huidibi ajcxy mjıjp'ıjxyp ma Dios. 12 Ca' ich ajcxy ndzojccixy co miich ajcxy m'ahuimbidity nuux. Padungix miich ajcxy jadu'n nej ajcxy ytungixy huidibi mibijcp Jesucristo etz huidibi yajtungixp mecxtujcin, jaydëbi mbaatcixy tıibi Dios xyaj'ahuanıygyxy.

13 Co jecy'ajty Dios moy Abraham je' y'ayuc, ci'm je' nıgapxpejty y'ayuc, com ca'anajty ji jac mıjpi pin nıgapxpedipy je' y'ayuc. 14 Chi Dios Abraham nımay: "Janch co ich miich ngonucxıp, e nmöhıpy may m'ap'ung m'apmang." 15 E jadu'n Abraham y'ahuijxy müd mecxtujcin, e jadu'n ycıdigııyı huidibi anajty Dios ti yaj'ahuanıyıı. 16 Co ajcxy jäy ycapxcixy co yjanchıty, jim je' pin nıgapxpejtp je' y'ayuc, je pin jacmıjip, je' nıgapxpejtpy jada ayuc. E co nıgapxpety je' y'ayuc, chi je ayuc y'ity, e ca' huaad pinjaty ymına'n co ca' yjanchıty. 17 Paady ycıxpi Dios nıgapxpejty ycı'm'ayuc, müd co anajty yajnejhuıhua'n je jäy ajcxy co cuyduna'n y'ayuc tıibi ahuanıy. 18 Ji yajpaady mejtnax Dios y'ayuc huidibi ca' huaad capxtıgach, e Dios ca' y'anıdägy nımına. E co Dios jadu'n tuñ, chi xyajjotcugııyım mij, ich ajt huidibi n'ixtaayım e ndzojcin yi' ypubejtın. E ti nmıjpidaacım yi' y'ayuc jadu'n nej jıjp'ıjxım co xymöhuaanıım ajt n'alma jugy'ajtin huidibi ca' ycıxıpy ytıgoyıpy ni mına. 19 E müd co nıjıjp'ıjxım co Dios xymöhuaanıım ajt n'alma jugy'ajtin huidibi ca' ycıxıpy ytıgoyıpy, paady ajt n'alma jotcuyc ıjtim ca' ma tzigı'n jıhuı'n. Jadu'n Dios y'ayuc nıpaady müd ich ajt ycıxpi nej tüg pujx huidibi je barco huon'ıjtp mejyoty, ca'ydi nej yjaty je barco. Ich ajt nıjıjp'ıjxım co ndıgıhuaanıım ma Dios y'ıt tzajpjoty, tim jadu'n nej je judıo sacerdote mıjtungmııdpi ytıgıy anajty jecy'ajty ma Dios y'ıt ma je Dios ytıjc, je it huidibi anajty adıyducııp müd huit. 20 Tıgıhuaanıım ich ajt ma je Dios y'ıt tzajpjoty ma Jesús ytıgıy müd ich ajt ycıxpi, Jesús ti yaj'ahuäch nej jëbi ndıgııyım ma Dios y'ıt. E jadu'n Jesús naydügpajc huıngapxy etz codınäy mayjäy ma Dios yhuınduu huınıxıı huınıtiempo. Jesús ytung tim jadu'n nıpaady nej Melquisedec ytuñ jecy'ajty.

7

Yı Jesús tim jadu'n ymıjıty nej Melquisedec

1 Je Melquisedec hue' je' anajty rey'ajtp ma je cajp huıdı yxıı Salem, e je' anajty huıngapxp ma je mıjpi janchpy Dios tzajpjotyıı. Co anajty Abraham yhuımbıty co anajty oy ti chıptuñ, ma anajty je reydıjc oy ti yajqueec-huächxtäy ti mımadactäy, chi Melquisedec choon oy jıjpcoyöyıy Abraham, e chi ooy Dios mıjıyudacy mınuuxtacy müd Abraham ycıxpi. 2 Huidibi anajty Abraham ti paady ma anajty oy ti chıptuñ, chi je' pıjc-huächxy majcpıcy, chi pugooñ tüg-pıcy mooy je Melquisedec. Melquisedec yxıı hue' yhuımbıdzıımy "rey tudägyıı". E com co anajty yrey'aty jim Salem, hue' Salem yhuımbıdzıımy "jotcuyc'ajtin", paady jëbi nımınaanıım jadu'n, "je rey huidibi jotcuyc'ajtin yejcp". 3 Je Melquisedec ca'p anajty yajnejhuıy ytaj yteedy, ni y'ap yteedy. Ni ycayajnimıydägy nej ypi'c'ajty etz nej y'ögy. Tim jadu'n je' anajty yajpaady nej je Dios y'ung, tüg huidibi huıngapxp jäy ajcxy ma Dios huınıxıı huınıtiempo.

⁴ Occuenditungixy miich ajcxy nej je Melquisedec anajty ooy ymijity. Je Abraham, ñch ajt nmij'ap nmijteedy ci'm mooy Melquisedec je tüg picypí huídibi anajty ti pijci je rey ajcxy ma oy chiptuñ. ⁵ Nej Moisés ycötujcin y'ane'my je' anajty ajcxy yhuingapxy ma Dios ytijc je pinjaty Leví y'ung'ajtpy y'anác'ajtpy, y'ap'ung'ajtpy y'apmang'ajtpy. Je' ajcxy cötujc miid co jäy ajcxy yajcuend'adipy tügpicy je majc-picypí huídibi xii diezmo. Oy je' anajty ajcxy ja'ajugy'adyii ja'amigüg'adyii, com hue' anajty ajcxy Abraham y'ap y'oc nidüg'óciy. ⁶ Per Melquisedec oy je' anajty ca' Leví ap'adyii teedy'adyii, yajcujt je Abraham tügpicy je majc-picypí. Je' je' anajty huídibi cidigüiyi tibi anajty Dios yaj'ahuaníyii. Jadu'n Melquisedec yajpuhuaníy Dios je Abraham. ⁷ Ni pin ycamina'nip co ca' yjanchity co je pin conuucxin yejcp, jac mij je', ca'ydi je pin yajconuucxp. ⁸ Ya ma ñch ajt, pin cidigüiyip tügpicy je majcpicypí (diezmo), hue' je' ajcxy jäy huídibi öcp. Per jadu'n nej anajty Melquisedec, jadu'n ymina'nñ ma yjaybetyity co je' yjactzinaayñi. ⁹ E jëbi yajmina'nñ co je Leví etz jadu'ñyibaad je y'ap y'oc huídibi ajcxy huingapxp ma Dios, e yajcujtcixy Israel jäy huídibi Dios patip, nañ jadu'n nipaady nej jihuüy ymigüety je' ajcxy je Melquisedec huin'it co Abraham ymigüejti. ¹⁰ Jadu'n nipaady nej jihuüy Abraham ñigix'ajtyñi y'ap'ajtin yteedy'ajtin Leví etz jacjadyii je huídibi anajty ajcxy ca'ni ypi'c'atyñi yma'xung'atyñi co oy Melquisedec yijpcobadíyii.

¹¹ Je Israel cajp yajcidigüiyi je' je Dios y'ane'min ycötujcin je Levita ajcxy huídibi anajty huingapxp je mayjäy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttäy tudägy pinjaty anajty je Dios ycötujcin payöyb, ca'p tim je' anajty ycopicyity co ycajacquëxigy jadüg huídibi codinähuij je mayjäy ma Dios, ca' y'ocje'jiñ ma ymiñ Aarón y'ap y'oc. Je jadügpí huídibi codinähuyb je mayjäy ma Dios, hue' copicy co tú'ciy naybadüyb miid Melquisedec. ¹² Co ytigadzipy pinjaty huingapxp ma Dios, nañ jadu'n ytigadzip je tiy'ajt je cötujcin. ¹³ ñch ajt nHuindzin Jesucristo, je huídibi ñimiydacy ma Dios ñecy co huingapxa'nñ je mayjäy ma Dios, huingbi ap huingbi Teedy je' anajty, ca' y'ocLevíjin. E ni tüg yi' y'amigüg ca' yhuingapxy ma Dios. ¹⁴ Huädz yajnejhuüy co ñch ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yi' capxpaty Judá y'ap y'oc co nimiydacy pinjaty anajty huingapxp je mayjäy ma Dios ytijc.

¹⁵ Jacnigüëxícp jada ooy co jadüg ytigüiy huídibi tumb ma Dios, huídibi tú'ciy naybaatip miid Melquisedec. ¹⁶ Ca'p Jesucristo yajtungbijci co huingapxip je mayjäy ma Dios miid je cötujcin huídibi minaamb co yi' y'amigügtijc pátip yi' jadu'mbi tung, je huídibi ajcxy yjugy'ajtin cixip tigoyip. Hue' je Jesucristo chinaayin yjugy'ajtin ca' ycixipy ytigoyipy ni mina, paady ycixp Jesucristo yajtungbijci huingapxip je mayjäy ma Dios. ¹⁷ Com miid je' ycixpi jadu'n Dios tiy'ajt yejcy co jadu'n ymina'nñ:

Miich je' cham mhuingapxyp je mayjäy ma ñch. Tüg nax miich mhuingapxin nej Melquisedec anajty yhuingapxy.

¹⁸ E jadu'n je oga'nbi je ane'min cötujcin huídibi Moisés yejcp, ca' y'octuni cham, ca' jac ti mic'ajt miidity co jaydëbi yajtzögipy jäy ajcxy y'alma. ¹⁹ Je Dios ycötujcin huídibi Moisés jayhui'm jecy'ajty, ca'p je' ni ti yaj'oybidzimy yajhuätzpidzimy. Miid je huingapxpi ycixpi huídibi nmíid'ajtim cham jac'oy yi' huídibi njijp'ijxim ma Dios.

²⁰ Co Dios Jesucristo yajtungbicy, chi nügapxpejty yci'm ayuc co yjanchity.

²¹ Jacjadyii ajcxy huídibi anajty tungixp ma Dios ytijc, hue' je' ajcxy tungmooyi, e ca' Dios nügapxpejty yi' ajcxy y'ayuc. Per co Jesucristo ytungbijcy,

chi Dios nġapxpejty yci'm'ayuc. Com jaybety jadu'n ma Dios ñecy ma jadu'n ymġna'ñ:

Je Huindzin Dios ti nġapxpety yci'm'ayuc, e ni mġna ycajotmetzcġhuipy.

Jadu'n Dios nimay y'ung:

Miich mhuġgapxamyb etz mgodinġhuamyb je mayjġy ma ġch huinixġ huinġtiempo. Jadu'n miich mdunġpy nej Melquisedec ytuuñ.

²² Com Dios nġapxpejty yci'm'ayuc co yjanchġty co Jesucristo ytungbġjcy, paady yġ Jesús yġ je' majamoy mic'ajtmoy je jemybġ ayuc huġdibġ yajhuġ'm mġd jġy ajcxy ycġxpġ, je jac'oybġ cġtujcġn. ²³ Jacjadyġ huġdibġ anajty yhuġgapxcġxy ma Dios ytġjc, nimay anajty ajcxy ooy. Com co tġg y'o'cy, chi huġgbġ ytġġy ma je' ytung. ²⁴ Jesús com ca' yġ yjugy'ajtin ycġxġpy ytġgoyġpy ni mġna, paady ca' ytung ixmach, etz ca' yġ'ytungmġy ni pġn. ²⁵ Mġd je' ycġxpġ Jesucristo mic'ajt mġdġty jaydġbġ yajnġdzoocġpy jġy ajcxy y'alma huinixġ huinġtiempo, pġnjaty mġbġjctzooyb Dios ma Jesucristo yxġ. Jesucristo jġbġ tunġpy jadu'n, com yġ yjugy'ajtin ca' ycġxġpy ytġgoyġpy ni mġna. E yġ Dios mġbġjctzodġb mġd jġy ajcxy ycġxpġ jabom jabom huinixġ huinġtiempo.

²⁶ Je Jesús je' je' tġgpajc je mġjtungmġd pġ ma Dios, huġdibġ ġch ajt nyajmay-jajtim, je huġdibġ mġd huġdz yjot huġdz yhuinma'ñ, e ca' je' mġdġty ni ti jġbġc pġ ni ti pocy. Je' ca' tġgnax y'ġty mġd pocytumbġdġjc. Nġġ je' ymġġty ycġxġty, ca'ydġ jac ti huġdibġ yajpat tzajpjoty. ²⁷ Ca' Jesús yjadu'nġty nej ajcxy jacjadyġ huġdibġ tuun ma Dios ytġjc jecy'ajty, co yaj'ocġxġ ġyujc, e je' ajcxy yejcpġ huġdzġġ'ñ jabom jabom, mġdġg co je' ajcxy ñayyajpocyñġhuġchyyġ, e chi jada' mġd jġy ajcxy ypocy ycġxpġ. Jesús tġgtecypajc je' yejc huġdzġġ'ñ mġd mayjġy ycġxpġ, co je' cġ'm ñayyejci ma yġ o'cġn jadu'n nej tġg huġdzġġ'ñ. ²⁸ Je Dios ycġtujcġn huġdibġ Moisés yjayhuġ'm jecy'ajty, hue' y'ane'my co huen tungmġy jġy ajcxy huġdibġ pocy mġd, co mġjtungmoy ma Dios ytġjc. Chi jac'axam Dios yajhuġ'my jemybġ ayuc jemybġ cġtujcġn, e nġapxpejty yci'm'ayuc co yjanchġty. E mġd je jemybġ ayuc Dios tungmoy yci'm'ung, huen yajnġcxġp je mġj pġ tung ma yġ y'ġt, je Dios y'ung huġdibġ ġjtp huinixġ ca' ti bocy mġdġty.

8

Jesús yġ je' je' mġjhuġgapxpġ ma yġ Dios y'ayuc jemybġ

¹ Huġdibġ ooy nġġ ycġpġcyġty, huġdibġ yajnimġydaacp, co ġch ajt nmġd'ajtim pġn xycodġnaayġm ma Dios, je' je' je' Cristo, je huġdibġ jġby ġjtp mġj'ane'mbġ tzajpjoty, jadu'n nġpaady nej jġhuġy yġ y'ñġy a'oy'amy ma Dios ymġjc. ² Jġby je' ytuñ ma je janchypġ Dios y'ġt ylugar, je amaaybġ, huġdibġ oyhuġdzġġy ġjtp. Je it huġdibġ Dios yajcoj, e ca' nmġnaanġm jġy ajcxy yajcoj. ³ Tġg'ocġy pġnjaty huġgapxp ma Dios, yajnġbġcy je' paady, e copġcyġty co cġyegġpy ofrenda etz tijaty huġdzġġ'ñ ma Dios mġd jġy ajcxy ypocy ycġxpġ. Paady ooy ycġpġcyġty nañ jadu'n co Jesucristo yegġpy ofrenda etz huġdzġġ'ñ ma Dios mġd jġy ajcxy ypocy ycġxpġ. ⁴ Co Jesucristo ġxyġpy ya y'ocyajpaady naaxhuġñ, ni ycahuġgapxy ġxyġpy mayjġy ma Dios. Com jġnġ ya yajpaady pġn huġgapxġp ma Dios ytġjc, pġn yejcp ofrenda etz huġdzġġ'ñ jadu'n nej Moisés ycġtujcġn y'ane'my. ⁵ Jadayaabġ huġgapxpġ ajcxy ytungġxy ma Dios ytġjc ya naaxhuġñ. Je' je' tġg ġjxpejt nej Dios y'ġt jġby tzajpjoty, jadu'n yġ nġpaady nej tġg anecpġ huġdibġ tzomyb jġby tzajpjoty. Co Moisés jecy'ajty Dios ytġjc je' cojġ mġd huġt, chi Dios ñġmaayġ: “Cuendġtun yajxon co anajty mgojy je tġjc tġgnax jadu'n nej je ġjxpejt huġdibġ nyaj'ġjx jġm copġxġy.” ⁶ Per je mġjtung huġdibġ Jesús ytumyb ma Dios mġd jġy ajcxy ycġxpġ, jac'oydung yġ ca'ydġ je tung huġdibġ je jġy ajcxy ytumyb huġdibġ mġjtung mġd ma Dios ytġjc ya naaxhuġñ. Com jemybġ etz jac'oy etz jacmic'ajt mġd je cġtujcġn huġdibġ Dios ymoy Jesús, ca'ydġ je cġtujcġn

huidibi Dios ymoy Moisés jecy'ajt. Com hue' je' jac'oy alma nīdzocin Dios yaj'ahuanīy jāy ajcxy ma je jemybi cōtujcin.

⁷ Co je jayījp'atypī cōtujcin huidibi Moisés ymooyī cayaj'oyīydaayī jāy ajcxy ypocy mīd Dios, ca' yī' ixyipy ycopīcyīty je mīmetzpi cōtujcin huidibi Dios ymoy jāy huinjemy. ⁸ Per Dios y'ijx co je jāy ajcxy ca' yajxon cuydungixy je cōtujcin huidibi Moisés ymoy, jadu'n nej ymīna'ñ ma yjaybetyīty ma Dios ñecy mīd je' ajcxy ycīxpi, ma jadu'n ymīna'ñ:

Jadu'n je Huindzin Dios ymīna'ñ: “Mimb xī tiempo ma huingbi cōtujcin nmōhuībich yī Israel jāy etz Judá jāy ajcxy.

⁹ Ca' y'ocjadu'nīñ nej īch ngōtujcin huidibi nmooyīch je' ajcxy y'ap yteedy jecy'ajty, je huin'it tiempo taabi nyajtzooñīch ajcxy jim Egipto naaxjot. Ca'p je' ajcxy cuyduñ je cōtujcin huidibi ajcxy nmooyīch, e paady ca' nduūñīch cuendī yī' ajcxy.” Jadu'n ymīna'ñ je Huindzin Dios.

¹⁰ Jadu'n je Huindzin Dios ymīna'ñ:

Je cōtujcin huidibi nyegaamybīch ma Israel jāy ajcxy co anajty yījadu'mbi xī tiempo tī ñaxy, jadu'n je'. Nbidāgībīch ngōtujcin ma yī' ajcxy yhuinma'ñ, e jadu'n nipaady nej jihuīy tī njayīch n'ayuc ma ajcxy y'ay yjot. E īch yī' ajcxy xyDios'adīb, e yī' ajcxy njāy'adiybīch.

¹¹ Tūg'ócy ajcxy nejhuīhuīpy pīn īch. Nī pīn jī cayaj'ixpīgīpy pīn je' je Huindzin Dios, nī pīn, nī ymīgūg, nī ymījīn ymīdījc, nī pī'ctījc nī mīj'anāctījc. Com nidūg'ócy ajcxy nejhuīhuīpy pīn īch; ypi'city ymutzīty, ymījjāyīty, etz ymīj'anācity.

¹² E īch yī' ajcxy nmeecxīp yjībīcjāy'ajtn, nī camīna ngajac'ajihuīhuīybīch ajcxy ypocy. Jadu'n Dios ymīna'ñ.

¹³ Co Dios je' ycōtujcin jemybi nīmīydāgy, je' je' co yaj'amījīyñī je jayījp'atpyī cōtujcin. Je huidibi amījīyñīp ca' je' y'octuunīp, tzojc yī' yaj'ijxtīgoyaani.

9

Je Dios ytījc huīdi ya naaxhuīñ etz Dios y'it huīdi tzajpjoty

¹ Je Dios ycōtujcin jayījp'atpyī ymīd je' anajty ñīdīy'ajt nej huaad ytuñ ma Dios ytījc ya naaxhuīñ, ma jāy ajcxy huindzīgīhuīpy Dios. ² Je Dios ytījc jadu'n je' ycojīty. Je jayījpī cuarto hue' anajty xījīty Lugar Santo, jīby anajty y'ity je candelero etz je mesa ma tzajcaagy y'ity ma Dios yhuinduu. ³ Jīxcī'py'amy ma je mīmetzpi huit y'agīyducyīty jīby jadūg'it huīdibi xījīp Lugar Santīsimo (ma Dios nī'ixcīdāgy je jāy). ⁴ Jīby anajty tūg mīj mesa ac tīm orī je' anajty ma ajcxy ypoomjojccīxy, e ma je' jīm anajty y'ity tūg cajoon ac orī je' anajty yñīnīcx huīdityī. Jīby cajoonjoty anajty y'ity tūg tu'tz ac orī huīdibi anajty mīd je jīcxy ijxpejt huīdibi Dios Israel jāy ajcxy ymooy jecy'ajty. Etz jīby anajty Aarón ytajc huīdibi huījp huam. Etz jīby anajty je tzaa y'ity ma je' anajty ycījxjāyīty Dios y'ane'mīn. ⁵ Ma je cajoonnīcx jīm anajty je querubines ñīgojtūdyīty huīdibi Dios y'oy'ajtn mīd. Je querubines anajty codīnaayb Dios, e je' anajty ajcxy yajnīdīgooyb mīd yqueec je cajonnīcx ma ajcxy je huīdzīgī'ñ ñī'py ypidacy mīd jāy ajcxy ypocy ycīxpi. Ca' huaad yjacyajnimīydacy mījcajee jadachambi tijaty huīdibi anajty yajpatp jīby ma Dios ytījc.

⁶ Jabom jabom co anajty jadu'n y'ijttāy nī'ixī', chī je huingapxpi ytīgīygyīxy ma Dios ytījc ma je jayījpī cuarto, je Lugar Santo, tuñ ajcxy huīdzīgī'ñ etz cuydungixy yī' ajcxy ytīy'ajt mīd Dios ycīxpi. ⁷ Jīmījt jīmījt ma je mīmetzpi cuarto huīdibi je huit adīydujcp, jīby ytīgīy tūgtecypajc je huingapxpi huīdibi jacmījtungmīd ma Dios ytījc. E co jīby ytīgīy, chī mīdīgīy huaj ñī'py, huīdibi mīd huīdzīgīy Dios mīd yci'mbocy ycīxpi etz mīd tūg'ócy jāy ajcxy ypocy ycīxpi etz mīd ajcxy ypocy ycīxpi co ca' nejhuīygyīxy co ytundīgooygyīxy.

8 M̄id jada yc̄ixpi je Esp̄ritu Santo xyajnejhūiyim co je tungm̄idpi hūidibi hūingapxi je mayj̄ay ma Dios, ma ajcxy jacyajtungixy anajty je jayijp cuarto ma Dios yt̄ijc, chi ca'ni je' anajty y'ahuächñi nej jēbi pinjaty yt̄iḡiy ma je it lugar Sant̄ísimo ma Dios yhūinduu. 9 Je Dios yt̄ijc hūidibi ijtp anajty ya naaxhuiñ ca' je' yjējity je janchypi. Hue' je' anajty ijxpejt'ajtp hūid̄i Dios y'it'ajtpy tzajpjoty. Jiiby je tungm̄idpi hūindziḡiy Dios m̄id ofrendas etz m̄id hūindziḡiñ. Per jada hūindziḡiñ ca' yajtigoy je pocytun̄i ma je jāy ajcxy yjot yhūinmañ. 10 Je jud̄ioj̄ay yt̄iy'ajt hūidibi tuun ma Dios yt̄ijc jecy'ajty, hue' je' ñigapxy caayin uucin, etz jadu'n nej ajcxy ñayyajpocyñ̄ihuáatziḡixy m̄id n̄i etz canaag costumbre hūidibi ajcxy cuydumyb. Jadu'n ajcxy ytuñ ixti coon̄i Dios yajtigajztay t̄üg'óciy y' yc̄otujcin.

11 Per ti y'oy ya naaxhuiñ je Cristo, e y' je' cham ijtp jacm̄ijtungm̄idpi ma Dios, y' ti mimiñ jemybi c̄otujcin jac'oybi. E y' je' codinaayb je mayj̄ay ma Dios y'it tzajpjoty, je it jac'oybi jacm̄ijpi, jacca'pxypi, ca' nm̄inaanim jāy ti cojy, e ca' yaajity naaxhuiñ. 12 Cristo ti yt̄iḡiy ma je Dios y'it, je lugar Sant̄ísimo. Ca' ti yt̄iḡiy m̄id co jiiby yajquēx̄igañ pi'cchivo ñi'py o toro ñi'py, hue' yci'mni'py jiiby yejcpy ma Dios. Jadu'n ti yt̄iḡiy t̄ügtecy t̄iḡiy hūinix̄i hūinitempo, etz xyyajñidzoocim ajt n'alma hūinix̄i. 13 Ooy yjanch̄ity co y' toro ñi'py etz je chivo ñi'py etz y' cuyjam co ajcxy nõccixy huaj n̄ix ma je Dios ojadajttac, co ajcxy je pocyj̄ay yajñihuāxcixy je ni'py etz yajñix̄idujtcixy je cuyjam ym̄id mic'ajt co yajpocyhuáatziḡixy ñin̄icx, per jotjoty ca' yajhuäch. 14 (Je hūingapxi hūidibi tumb ma Dios yt̄ijc ya naaxhuiñ ca' ymad̄agy co jāy yajpocyhuādzipy m̄id toro ñi'py), Jesucristo ñigi ti ymad̄agy yajpocyhuäch jāy ajcxy m̄id yci'mni'py. Com Jesucristo ym̄id je Dios yj̄ihuiñ ymic'ajt hūidibi ca' yc̄ixipy yt̄igoyipy ni m̄ina, chi ñaygiyejci ci'm ma Dios m̄id Dios yj̄ihuiñ ymic'ajt, jadu'n nej t̄üg hūindziḡiñ huātzpi, com ca'ni ma ni ti tundigoy. E m̄id yci'mni'py Jesucristo xyajhuaatzim je jib̄icpi ma ajt njot nhūinmañ, ca'ydi ndunim hūidibi Dios ca' jāygid̄agy, e jadu'n ajt huaad ndunim ma je Dios juugypi ytung.

15 Paady y' Jesucristo y' je' hūingapx'ajtp ma Dios m̄id ñich ajt yc̄ixpi m̄id je jemybi yc̄otujcin hūidibi Dios yajhuim. Y' Jesucristo co y'o'cy, y' ajt je' nbocy xymecxim tiibi ndundigooyim ma je jayijp'atyp c̄otujcin hūidibi Moisés jayhuim. E jiḡix pinjaty Dios ti yhūin'ixyii, jēbi ajcxy yc̄idiḡiyii je tz̄inaydac ma jēbi n'ijtim hūinix̄i. Je tz̄inaydac hūidibi Dios ti xy'ahuan̄iyim. 16 Co t̄üg jāy j̄ijp'ixy y'o'cin, e yajcojy t̄üg testamento, ooy ycop̄icyity co yajnejhūihuipy pen janch je' ti y'ögy je pin yajcoj je t̄iy'ajt jiḡix je' yt̄iḡihuipy tumbi je t̄iy'ajt. 17 Co t̄üg jāy j̄ijp'ixy y'o'cin e yajcojy t̄üg testamento, ca' je' ti mic'ajt m̄id̄ity je testamento pen jugy'ajtni pin je' anajty ti yajcojy. Huin'itni janch̄ity co anajty ti y'ögy, huin'it je testamento mic'ajt m̄id̄ity. Je jemybi t̄iy'ajt hūidibi Dios xyajhuim y jadu'n y' nipaady nej jāy testamento yajcojy co anajty j̄ijp'ixy je y'o'cin, e co Jesús y'o'cy, huin'it mic'ajt moy je Dios yt̄iy'ajt je jemybi. 18 Paady yc̄ixpi jecy'ajty co Dios Moisés moy c̄otujcin, yajtzoobaat je' m̄id iyujc ñi'py. 19 Moisés je' capxhuācx je Dios yt̄iy'ajt ma t̄üg'óciy mayj̄ay. Chi jada' hūijtz̄igy t̄üg lana tzaptzpi m̄id t̄üg quipy aacx hūidibi ooy oy yxuugy. Je' yajxooc ma huaj mang ñi'py etz chivo ñi'py teemhūidity m̄id n̄i, chi Moisés yajñihuim ch je libro m̄id je ni'py, je libro hūidibi anajty ti capxy etz nañ jadu'n jāy ajcxy yajñihuim ch je ni'py. 20 Co Moisés jadu'n ytuñ, chi ym̄inañ: "Jada je' je ni'py hūidibi yajtzoobatp je ane'm̄in je t̄iy'ajt hūidibi Dios ti yecy ma miich ajcxy." 21 Moisés nañ jadu'n ñi'pyñihuim ch je cochac t̄ijc ma anajty yDios ojadajtcixy, e t̄üg'óciy tumbejt hūidijaty jiiby tumb. 22 Dios yc̄otujcin, je jecyip, ym̄inañ

co tüg'óciy huídijaty yajtungixyp co Dios ojadajtcixy, copicy yajhuádzipy miid ni'py. E pen ca' ajcxy teemy yocy ni'py, Dios ca' huinmecxa'ñ yí' ajcxy ypocy.

Co Cristo y'o'cy miid ajt nbocy ycixpi, yí' yajnicxy ajt nbocy

²³ Ooy jada anajty ycopicyity iyujc ñi'py huindzigi'ñ, jigix yhuádzip huídijaty tumb ma Dios ytijc ya naaxhuiñ, je huídibi iixpejt'ajtp anajty nej Dios y'it jii by tzajpjoty. Per je Dios y'it huídibi jii by tzajpjoty chojcpy jac'oybi huindzigi'ñ ca'ydi huídi ya naaxhuiñ. ²⁴ Com Cristo ca' je' ytigíy ma Dios ytijc huídibi jáy ajcxy ti cojy. Je tijc huídibi jáy ajcxy ti cojy, je' je' ñigojtuutin je it lugar janch janchypi huídi jii by tzajpjoty. Cristo tigíy ma je Dios y'it ylugar jii by tzajpjoty, ma je' cham xycodinaayim ma Dios yhuinduu. ²⁵ Je judío mǎjtungmǎdipi huídibi huingapxp ma Dios ytijc, huinjimǎjtity ytigíy ma je Dios ytijc co yecy ni'py huídibi ca' cí'mni'py'adyii. Cristo ca' yí' ñay'ahuaníyii y'ögipy canaag'oc, jéyi tügtecypajc ytigíy ma Dios y'it miid yci'mni'py. ²⁶ Co ixypiy ca' yjadu'nity, canaag'oc Cristo ixypiy patni chaachy'öcin maabi naaxhuiñybi chondagy. Per jadachambi ma xii tiempo ycixaani ytigoyaani, Cristo tügtecypajc ñayguéxici ya naaxhuiñ, jigix codináhuipy tüg'óciy jáy ma Dios miid ajcxy ypocy ycixpi. Jadu'n Cristo tuuñ jigix yajtigoyipy pocytuni. ²⁷ Dios ane'min pidac ya naaxhuiñ co nidüg nidüg jáy paadip yí' o'cin tügtecypajc. E Dios ti pidägy je xii je tiempo mina tiyduna'ñ nidüg nidüg jáy miid ypocy ycixpi. ²⁸ Je Cristo jotcuyc tügtecypajc nayyejci ma je o'cin co yajpocyñhuaatztäy je mayjäy. Chi jada' ñayguéxiga'nyii je mǎimejtz'ocpi ya naaxhuiñ, e ca' nmǎinaanim co yajpocyñhuaatzaanip jadüg'oc je mayjäy, hue' je' nihua'namyb ycohua'namyb tüg'óciy pinjaty jipp'ixip cixyjot huinjot co je' miina'ñ miid yí' ajcxy ycixpi.

10

¹ Je Dios ycötujcin huídibi Moisés jayhuí'my jecy'ajty, hue' je' anajty ñidiy'ajt je oybi huídibi miinamb. Ca'p je' anajty yjéjity je oybi. Paady je cötujcin huídibi Moisés yjayhuí'm ca' je' jébi huádz yaj'ahuimbity pinjaty pocy ytumb, pinjaty mijhuäcp anajty ma Dios miid je iyujc huídibi ajcxy Dios yajhuindzigi'yb, huídibi ytun'ahuimbijtcixyp jimíjt jimíjt. ² Co ixypiy je cötujcin y'ocmadägy huídibi Moisés yjayhuí'm yaj'ahuimbity ixypiy huádz ajcxy je pocy ytumbi, ca' ixypiy je jadu'mbi huindzigi'ñ y'ocyajtuuni jimíjt jimíjt. Com pin je jadu'mbi huindzigi'ñ yejcp, co ixypiy je' ypocy yajnicxtäy, ca'p je' ma ñayjihuihuíybi ti bocy miidity jadüg'oc. ³ Co jadu'n yaj'öccixy je iyujc miid ypocy ycixpi, je' je' je' tiy'ajt co ajihuiygotigixy ypocy jimíjt jimíjt. ⁴ Com yí' huaj mang ñi'py etz yí' chivo ñi'py ca' mic'ajt miidity co pocyyajnicxtähuiipy nimina.

⁵ Paady co Cristo ymiiñ ya naaxhuiñ, chi nimay je Dios:

Ca' miich ni ti huindzigi'ñ mdzojcní ma ymiiñ iyujc'ögy, ti miich xyñi'ixíyich tüg ninícx.

⁶ Ca' m'ocjäygidaacni huindzigi'ñ iyujc huídibi yajno'cp. Ca' miich m'ocjäygidaacni co jáy xyajhuindzigi'y iyujc miid ypocy ycixpi.

⁷ Chi nmǎina'ñich: “Dios, cha nmiiñich jigix miich mdzojcin yajcuydunipy, jadu'n nej yjaybetyity ma miich mnecy miid ich ycixpi.”

⁸ Tim jayjip, Cristo ymǎina'ñ co Dios ca' octzojcní, ni cajäygidägy je iyujc ögy huídibi yajhuindzigi'yip, ni je huídibi yajno'cp, jigix je pocyñicxtähuiipy, oy yí' yjajéjity huídibi ñigapxy yajtunipy ma je Dios ycötujcin huídibi Moisés yjayhuí'm. ⁹ Chi jada' jadüg'it yjaybetyity co Cristo jadu'n ymǎina'ñ: “Cha ich nmiiñ, jigix miich mdzojcin yajcuydunipy, miich huídibi Dios'ajtp.” Hue' mǎinaanim, yajtigoy je cötujcin huídidi ane'mb co jáy ajcxy huindzigi'y iyujc miid ypocy ycixpi, etz mic'ajt mo' je jemybi cötujcin huídibi Jesucristo

xymooyim. ¹⁰ Dios jadu'n ti xyajhuaatzim ajt nbocy, com Jesucristo ti tuuni Dios chojcin co ci'm ñinixc tügtecpajc yejcy ma yi o'cin mïd tüg'óciy jäy ypocy ycixpi.

¹¹ Tüg'óciy judío sacerdote huidibi tungmïd ma Dios ytijc jabom jabom jadu'n tun'ahuimbijtcixy tügpi huindzig'i'ñ, huidibi ni camina yajnicxtaayi jäy ajcxy ypocy. ¹² Yi Jesucristo tügtecpajc yi' yejcy ñinixc ma yi o'cin huinixi huinítiempo, chi jada' y'ixtacy a'oy'amy ma Dios ymijc ma ane'mdäy tüg'óciy. ¹³ Jiiby tzajpjoty Jesucristo cham y'ahuixy, ixti cooni Dios yi' ymidzip mimadactaayip, e jadu'n ajcxy nipaadipy nej jihuiy Jesucristo ytecpocxpejt. ¹⁴ Mïd tügpaic je huindzig'i'ñ huidibi Jesucristo yejc, tudägy yaj'ahuimbijttäy huinixi huinítiempo pinjaty ti ypocyhuäch. ¹⁵ Yi Espiritu Santo nidiy'ajtp ma ñich ajt jadu'n nej Cristo ti tuñ. Com jaybety miiñ ma Dios ñecy ma Dios jadu'n ymina'ñ:

¹⁶ Je huin'it xii je huin'it tiempo nyajmihu'i'maamybich je Israel jäy jemybi ayuc jemybi tiy'ajt. Nbidägibich ngötujcin ma ajcxy yjot, e njayamybich ngötujcin ma ajcxy yhuinma'ñ.

¹⁷ Chi jac'axam Dios ymina'ñ:

Ni camina njäymedzaanich ajcxy ypocy, etz jadu'n nej ajcxy ytundigooy.

¹⁸ Co je pocy ti yajhuinmecxtäy, ca'p ycopicyity yjacyajtunipy tijaty huindzig'i'ñ mïd pocyhuinmeecxin ycixpi.

Chojcpy nmihuingoonim yi Dios

¹⁹ Paady miich ajcxy migügtijc, jëbi ñich ajt ndigiiyim agujc jotujc ma Dios yajpaady mïd co Jesucristo ti temy ti yocy ñi'py mïd ñich ajt nbocy ycixpi.

²⁰ Cristo ti yaj'ahuäch je ñii'aa je tü'aa mïd ñich ajt ycixpi mïd yci'm ñinixc, je ñii'aa tü'aa jemybi oybi huidibi tigiiyb ma Dios y'it. E je' yñinixc jadu'n nipaady nej je huit huidibi anajty adujcp je Lugar Santísimo ma Dios ytijc ya naaxhuiñ, je huit huidibi cüchhuäcx co Cristo y'o'cy. ²¹ Jesucristo yi' je' je mijtungmïdpi huidibi xycodinaayim ma Dios ytijc jiiby tzajpjoty. ²² Paady ycixpi jëbi nmihuingoonim Dios mïd oyjot oyhuinma'ñ, etz mïd je mibijcin janchypi. Cristo ajt ti xyajhuaatzim njot nhuinma'ñ co ñi'py temy yojcy mïd ajt nbocy ycixpi jigix ca'ydí nayjihuiiyim pocymïd, jadu'n nej jihuiy ti ndziihuim mïd huädz ñii. ²³ Tzoc tudägy n'ijtim ma nmibijcin, ca' nyajtigajtzim nmibijcin, com Dios cuydunipy yi' tii'bi xyaj'ahuaniiyim. ²⁴ Tzoc nhuinma'ñypidaacim co njot'amijmooyim ajt nmigügtijc, jaydëbi naychojcin nayjihuiiyim miñ xyipy, e nduunim oyyäy'ajtin. ²⁵ Ca' n'ixmajtzim je nayyöymugii, jadu'n nej ajcxy nijëjity costumbre mïdity co ca' ajcxy yöy ma naymujctac. Nigi tzoc nayjot'amijmooyim, e jadu'n nej cham yaj'ijxni co yhuingooni ma je Huindzin Jesucristo ymiinaani jadüg'oc ya naaxhuiñ, chona'ñ tzajpjoty.

²⁶ Pen ñich ajt jacpocytunim tzojcingixy ma anajty ti nejhuuiyim Dios ytiy'ajt, ca'p ji huingbi huindzig'i'ñ huidibi xyajpocyhuaatzim. ²⁷ Je' janchtiy njacjijp'ijxim mïd tzig'i'ñ jihui'ñ je tzaachypi co anajty Dios xtyidyunim, e xypidaacim mijjinjoty huidibi yajhuindigoydähuamb Dios ymidzip. ²⁸ Co pin cacuyduun Dios ycotujcin huidibi Moisés yjayhui'm, e jim metz o tugüg testigo co yjadu'nity, yajmoy je' y'o'cin ca' mïd'ajty ti pa'ayoohuin. ²⁹ ¿Nej miich ajcxy minaangixy? ¿Nej cay jac'öctiy je tzaachypi mihuaad'ajtcixy? Je pinjaty ca' ixa'ñ Dios y'ung etz nixiici yajxiici Cristo ñi'py huidibi yajpocyñhuaatzp, jadu'n nej je jemybi ayuc ymina'ñ huidibi Dios yajhui'm. Etz nañ jadu'n ajcxy ni'ojiiygixy Dios yEspiritu huidibi may'ajt oy'ajt tumb mïd je' ajcxy. ³⁰ Nejhuuiyim co je Huindzin Dios ymina'ñ: “ñich xypatp ndzaachytunipyich jäy ajcxy mïd ypocy ycixpi. ñich yi' nyajcomidohuiy ajcxy ypocy.” Etz nañ jadu'n yjaybetyity ma Dios ñecy: “Yi Huindzin Dios yi' yjäy tiydunipy.” ³¹ ¡Ooy

chach mij y'ayo'nity pen je Dios juugypí xychaachytunim miid ajt nbocy ycixpi!

³² Per ajihuúyigixy miich ajcxy je xi je tiempo tibi ñaxy, je taabi miich anajty ajcxy ti xycidigíyigixy je tiy'ajt janchypí, ñipaty je' anajty nej tüg tücxin jain ajcxy miidity. Ti ooy mhuindinaaygixy mijiptinaaygixy tzaachypí ayo'n miid yi mmibijcin ycixpi. ³³ Nijëjity miich ajcxy ti myajhuingapxnajxcixy, e ti myaj'ojcixy mayjäyduum. Nañ jadu'n jacjadyii ti abaatcixy tzaachypí jadu'n nej je tibi ajcxy ooy yajtzaachytungixy. ³⁴ Ti miich ajcxy myajtungixy pa'ayo'n ma pinjaty anajty pujxtigotyip, e janch agujc jotcuyc ajcxy ti myajtungixy mecxtujcin co ajcxy xypijci tijaty anajty ajcxy miid. Nejhuiyim co jiiby tzajpjoty miich ajcxy miidity ti jaty jac'oybi huidibi huinixi huinitiempe ijtp. ³⁵ Jacmijpidaaccixy Dios, ca' mjetmetzciiygixy. Co mmijpidaaccixy Dios, huin'it ajcxy mbaadipy oybi may'amy ma Dios. ³⁶ Chojcxy co miich ajcxy myajtungixy mecxtujcin co mguydunaangixy nej Dios tzocy, e Dios xyajcidigíyigixy hudibi yi' ti ahuaníy. ³⁷ Jaybety jadu'n ma Dios ñecy ma jadu'n yminañ:

Tzojc, janch tzojc ymiina'ñ je huidibi tzonamb tzajpjoty, e ca'p je' jecyñity.

³⁸ Jadu'n Dios ymina'ñ:

Pinjaty ich ti ngöbicy co ytudägyjäyity, tzinahuip je' miid ymibijcin. E pen ixtigihua'cp ma ymibijcin, ca' jadu'n njotcuyc'adipyich miid je'.

³⁹ Ca'p ich ajt njëjity hudibi ixtigihua'cp ma nmibijcin, e ytigoy y'alma, je' ich ajt pin mibijcp, e jadu'n n'alma paadipy nidzoocin.

11

Yi mibijcin

¹ Jotcuyc najjihuüyim jadu'n co hudibi nmibijcin janch yi', oy co ca' n'ijxim. Je hudibi nmibijcin je' xymooyim jotcuyc'ajtin miid hudibi njjp'ijxim ma Dios. Je hudibi nmibijcin nejhuüyim co janch janch jadu'n, oy ca' n'ijxim.

² Com miid co ajt nmij'ap nmijteedy ajcxy mibijci Dios y'ayuc paady Dios cöbijcy ajcxy jadu'n nej tudägyjäy.

³ Miid ajt nmibijcin ycixpi nejhuüyim co Dios oyduñ tüg'óciy hudibi jii'ajtp miid y'ayucti'ajty, jigix hudibi cham n'ijxim je' yi' yaj'oyiy hudibi ca' yaj'ixy.

⁴ Miid co Abel mibijcy Dios, paady Abel ymoy Dios huindzigí'ñ jac'oybi ca'ydi Caín, e Dios cöbijci Abel yhuindzigí'ñ, e miid je' ycixpi Abel ooy ycomaybidzimy ma Dios co anajty ytudägyity. E jadu'n oy Abel ti yja'o'cini, jadu'n nipaady nej jihuüy yjacmiydägyñi chambaad. Com miid je mibijcin hudibi anajty ymiid yejc ijxpejt ma ich ajt.

⁵ Miid co Enoc mibijcy Dios paady yajnicxi jadügpí tzinaydac ni yca'o'cy, ni ca' ajcxy paty, com Dios anajty ti yajnicxyii. Jadu'n ymina'ñ ma yjaybetyity ma Dios ñecy, ca'ni anajty yajnicxyii: "Dios jäygidacpy anajty Enoc chinaayin."

⁶ Pen ca' nmid'ajtim mibijcin ni jadu'ñyi, ca' Dios jäygidägy ajt ndzinaayin. Com co nmihuingonaanim Dios, hue' tzocy co nmibijcin co Dios yjijity, e co yaj'ahuimbipy oybi miid pin mibijcp.

⁷ Miid co Noé mibijcy Dios, paady Dios ñimaayi jayijp co ytuna'ñyii yjada'ñyii mijnigom hudibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg ñigomdzögipy. Miid co anajty Noé miidity mibijcin, paady yajpocycäy je naaxhuiñjyäj ajcxy ca'pi ymibicy. Chi Dios cöbijcy Noé jadu'n nej tudägyjäy miid co mibijci Dios y'ayuc.

⁸ Miid co Abraham anajty Dios mibicy, paady Dios yhuin'ijxi e ycapxymidouhui. Chi je' chooñ ma ñaax ycajpin ñicxy ma je it lugar

huidibi Dios anajty möhuaanip co je'adüyb. Choñ, ni ca' anajty nejhuüy ma ñicxy. ⁹ Mïd co Abraham mibijcy Dios, paady chinaydacpijcy nej tüg huingjäy ma je naax huidibi Dios yaj'ahuanüyi, huidibi ca' yjëjity. Chinay ma huittijc, nañ jadu'n ajcxy y'idüich Isaac etz Jacob huidibi ajcxy nañ jadu'n Dios yaj'ahuanüyi je naax. ¹⁰ Abraham je' anajty y'ahuijxyp mina jëbi chinaydacpijcy ma Dios y'it ylugar huidibi jadu'n nipatp nej tüg cajp huidibi müd y'ijx ta'tzpijcy y'oyduñity, je huidibi Dios ñihuinmayüy, je huidibi Dios yajcojy yaj'oyüyb.

¹¹ Sara hue' anajty pumäy, ti anajty ymijäyüyñi, ti ñajxni tiempo mina jëbi y'ung'ixy. Per müd co mibijcy Dios y'ayuc huidibi ti ñimaayü co y'ung'ixa'ñ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'ñ tiibi ahuanüy. ¹² Müd tügpi jäy, je Abraham, ti choondacy tügpijcy y'amigügtijc huidibi oy ti ymayüy. Abraham, oy anajty je' ti yjahuingoni mina y'ögaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³ Tüg'óciy je jäy ajcxy huidibi ya yajnimiydacp, öctay ajcxy ni ycacidigüy je tzinaydac huidibi anajty Dios ti yaj'ahuanüy. Müd co ajcxy mibijcy Dios, paady nejhuüy ajcxy co jacjiini Dios ymöhuüyb je huidibi ti yaj'ahuanüy. Com ymibijc ajcxy Dios, paady jotcuyc ñayjihüy co Dios möhua'ñyii jacjiini huidibi ti yaj'ahuanüy. Yminañ ajcxy co anajty y'adzinaaygixy ya naaxhuñ. ¹⁴ Pinjaty jadu'n minamb co adzinaaybi ajcxy yajpaady, hue' yajhuimbizimy co chinaydac yjugy'ajttac ajcxy y'ixtaayb. ¹⁵ Co ixypiy ajcxy jäymejtzó'cigixy je naax ma anajty ti choongixy, janch ycahuimbijty ajcxy jim jadüg'oc. ¹⁶ Per je' ajcxy ñigi anajty nijot'ajtcixy it lugar jac'oybi, je' je' je' tzajpjoty. Müd jada ycixpi Dios ca' y' cho'yduñ co ñaydijyii Dios ma je' ajcxy. Com ti ñixüy ajcxy chinaydac jiiby tzajpjoty.

¹⁷ Abraham mibijcy Dios, e co Dios Abraham y'ijxmajtzi, chi yajmiiñ Isaac co anajty yajhuindzigihua'ñ Dios. E janch cixyjot je y'ung tügpaic anajty yecy, je y'ung huidibi Dios ti yaj'ahuanüy anajty. ¹⁸ Dios ñimay Abraham co müd Isaac müd'ada'ñ may y'ap y'oc. ¹⁹ Abraham yhuinmaayb anajty ooy co Dios tügpaic cötujcmüdp yajjugypigipy öcpi. Paady jëbi ñich ajt nmïnaanim co Abraham ycidigüy jadüg'oc y'ung co anajty ti yjugypicy co anajty ti y'ögy.

²⁰ Isaac mibijcy Dios, paady Isaac Dios mibijctzoy müd Jacob etz Esau ycixpi co huen ajcxy oybi paadip ma je tiempo huidibi mim cidacni. ²¹ Jacob ymibijcy anajty Dios, paady co anajty y'ögaani, chi ahuanüy conuucxin ma nidüg nidüg José y'ung y'anäg. E jadu'n Dios ooy huindzigüy ojadaoty yam ñaygodajc'adyii müd ytajc co anajty ooy ti ymijäyüyñi. ²² José co anajty Dios mibicy ma anajty y'ögaani, yminañ co Israel jäy ajcxy anajty ypidzimaangixy comjeyc jim Egipto, chi yajhu'my t'y'ajt nej ypajc ytunüyb co anajty choñ ajcxy jim Egipto.

²³ Müd co anajty ajcxy mibicy Dios, paady co Moisés yma'xung'ajty, chi ytaj yteedy yützi tugig po'. Com co ajcxy ijxy co anajty ooy y'oyity je ma'xung, ca' ajcxy anajty tzigüy je rey y'ane'min co anajty yaj'öctähua'ñ tüg'óciy ungmä'xung yëydijcpi. ²⁴ Müd co Moisés mibijcy Dios, paady co oy ymij'anäcojni, ca' tzojcy co ñaydijüyb co rey ñix y'ung'adüib. ²⁵ Hue' janchtiy Moisés ñigi nijot'ajty co ayo'n tzaachypi minaxipy yajnaxipy quipxy müd Dios yjäy, ca'ydi co nixondägipy je jugy'ajtin ma je rey ytijc huidibi Dios ca' jäygidägy. ²⁶ Moisés ñigi ñayjihüy jotcuyc co tzaachypi ayo'n anajty minaxy yajnaxy müd Cristo ycixpi, ca'ydi co müd'ajttähüpy jugy'ajt comeeñ'ajt jim

Egipto. Com Moisés ti anajty yhuinma'ñypidägy co Dios yega'ñ je oybi. ²⁷ Mïid co Moisés mibicy anajty Dios paady choñ jim Egipto, ni catzigiy co anajty rey yjotmädy, jadu'n y'ijty tudägy nej jihuïy ixty je Dios ca'pi yaj'ixy.

²⁸ Mïid co mibicy Dios paady Moisés tuuñ je pascuaxii, chi ni'ane'mdïy co huen tijc'aguu tüg tüg yajni'pyïy, jigix co je ángel huidibi yaj'öcp, ca'p je' je israelitajäy y'ungoob yaj'o'cipy. ²⁹ Mïid co ajcxy mibicy Dios paady je israelitas ajcxy yajnajxy je tzaptz meyy jadu'n nej jihuïy ñajxcixy huindïztuuy, e co ajcxy je Egipto jäy nañ jadu'n yjanaxañ, cijx ajcxy ñii'o'ctäy.

³⁰ Mïid co ajcxy mibicy Dios, paady ycidäday je poch ma je Jericógajp, taab anajty je israelitas ajcxy ti jühuidijtcixy huixtujc xii. ³¹ Mïid co Rahab, je töxyjäy jibic tzinaaybi, mibicy Dios, paady ca' y'o'cy quipxyi mïid je huidibi anajty ca' capxymidoogixy Dios. Com co je' yajjättacy ma ytijcin je huidibi anajty ti choongixy ma Israel jäy ajcxy anajty yajpaady, co anajty ayüch ameech yajcïyögyixy yajtecyögyixy Canaán naaxjot.

³² ¿Ti njacmïydägibich? Nyajtigoy'idaamybich tiempo co nimïydägibich Gedeón, Barac, Sansón, Jefté, David, Samuel, e jacjadyii Dios y'ayucnajtzcaxïybi. ³³⁻³⁴ Mïid co ajcxy mibicy Dios, paady ymïmadac ajcxy ymidzip canaag picy, ane'my ajcxy yajxon yi cajpjäy, ypaat ajcxy pubejtin huidibi Dios anajty ti yaj'ahuanïyigixy. Yaj'adujc ajcxy caa y'ahuac, yajxeem ajcxy jin huïdi anajty ooy ymïjity, tzooc ajcxy co anajty yaj'ögaangixy mïid espada. Pinjaty anajty pumäyip ypaat je' ajcxy ymic'ajt ymïjaa, mij je' ajcxy ooy y'ijtcixni ma chiptungixy, e ymïmadactay ajcxy maymidzip.

³⁵ Jim anajty töxyjäy yjätigixy huidibi ajcxy cidigïy y'ung juugy huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nidzoocin. Jadu'n ajcxy paty o'cin, jaydëbi patcixy jugy'ajtin etz tzinaayim jac'oybi ma Dios. ³⁶ Jadyii Dios y'ayucnajtzcaxïybi ooy ñixiici yajxiici, yajcï'ajty, etz tzumy mach ypujxtijc'iñäy. ³⁷ Jadyii Dios y'ayucnajtzcaxïybi y'o'cy ajcxy tzaagögäch, jadyii yaj'ajidïy ajcxy janch tim cup y'ijxmajtzi ajcxy, jadyii yaj'o'ci mïid espada. Ymiñ xyijpy xii yaa yhuïdijtcixy ymïd ajcxy ñinïcx yüch mïid cöbixy'ac etz mïid chivo'ac, ayooob jäy ajcxy, jotmay mïid, yajtzaachtungixy yajca'oydungixy. ³⁸ Yi jadu'mbi Dios y'ayucnajtzcaxïybi ajcxy ni je naaxhuiñjäy anajty camihuaadity. Mïid ymidzip pahuidijtcixy, paady yhuïdijtcixy anajty titznaaxtuum etz yuugjoty, chinaaygixy naaxpa'tci'py etz majaty ang. ³⁹ Nidüg'óciy je' ajcxy oy cömay ajcxy yjanajxy mïid co mibicy ajcxy Dios, ca' ajcxy paty tiibi anajty Dios y'ahuanïy. ⁴⁰ Com Dios jac'oybi je' anajty yegamyb mïid ñich ajt, paady ca' ajcxy paty je oybi tiibi Dios y'ahuanïy. Ti anajty Dios nihuinmayïy co yajca'pxaani yi' ajcxy ytudägy'ajtin quipxyi mïid ñich ajt co Cristo y'o'cy mïid ñich ajt nbocy ycixpi.

12

Tzoc ñich ajt nhuinma'ñybidaacim ma Jesús

¹ Com nmïid'ajtim canaag ijxpejt nej jäy jecy'ajty mibicy Dios, paady ñich ajt jadu'n nipaady nej jihuïy huïnduy jajïxcï'py nmïid'ajtim jäy huidibi ti yajniguëxigy ymibijcin. Paady ycixp tzoc ahuing pidaacim je huïdijaty xy'adzijpim ma ajt nmibijcin, e nañ jadu'n tzoc ahuing pidaacim je pocy huidibi xyajhuinma'ñydidgooyim, e tzoc naymic'ijxim cuydunim yi tiy'ajt mïid mecxtujcin ma ajt ndzinaayin, jadu'n nej jäy ñaymic'ijxigixy co nayboyicquixigixy. ² Tzoc nhuinma'ñybidaacim ma Jesús. Jim ijxpejt nbaatim ma Jesús nej jëbi nmibijcim Dios. Jesús yi' je' ti xyajnejhuïyim Dios ytiy'ajt.

Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuuyb anajty co jadu'n y'oc'ayoohuipy, chi ypaadipy jotcuyc'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy miich ajcxy je Jesús y'ijxpejt, nej pocyjäydijc chaachytuungixy etz ñi'ojiiygixy, etz ca' y'ixaani, paady ca' mdzljpcigixy ni mgamijotmetzciiygixy. ⁴ Ca'ni miich ajcxy ayo'n tzaachypi myajnaxy mabaad ni'py ajcxy mxiiibidyii jadu'n nej Cristo yjajty. ⁵ ¿Nej ti miich ajcxy mjäydidgooygixy je capxhuijin huidibi Dios ti xymooygixy nej jihuiy yci'm'ung? Jadu'n ymĩna'ñ ma Dios ñecy:

Miich n'ungich, ca' mbidägy nej jihuiy ca' ytim ytiiity je tzaachypi huidibi Dios miid xycapxhuijy, ni ca' mjetmetzciihuipy co xyaj'ójipy.

⁶ Dios ycapxhuijpy yi' pinjaty chojcpy yjihuiyb. Dios chaachtumby yi' ajcxy co ytundigooy, pinjaty yi' ti cöbicy nej jihuiy yci'm'ung.

⁷ Mimadaaccix miich ajcxy je castigo, com Dios jadu'n yi' xymiidity ajcxy nej jihuiy yci'm'ung. ¿Nej ji jada' tüg ung, e ca' yteedy chaachtunuyb co ytundigooy? ⁸ Pen ca' miich ajcxy Dios ti tzaachypi xymooygixy, jadu'n nej yi' moy castigo tüg'óciy y'ungdijc y'anäctijc, ca' miich ixypiy ajcxy Dios xy'ung'adyii tiydudägy. Jadu'n miich ajcxy m'idipy nej tüg pi'canäg huidibi yteedy ca' y'ixa'ñyii. ⁹ Jadüg nax, taabi anajty ajt nbi'cnity, ich ajt ndeedy ya naaxhuiñ xy'iihuijim xycapxhuijim anajty, e xychaachytuunim co ca' ngapxymidoohuim nhuindzigiiyim ajcxy. ¿Nej co ca' huaad n'ijtim ane'my ma ajt ndeedy huidibi tzajpjoty yajpatp? E jadu'n jëbi nbaatim je jugy'ajtin huidibi ca' ycixipy ytigoyipy nimina. ¹⁰ Ich ajt ndeedy ya naaxhuiñ xy'iihuijim xycapxhuijim anajty miid jada conbi jugy'ajt ycixpi, jadu'n nej je' anajty ajcxy oy'ixy. Nañ jadu'n Dios ich ajt xychaachytuunim miid ajt n'oy'ajt ycixpi etz jigix nmiid'ajtim huädz jot huädz huinma'ñ nej Dios ymiiidity huädz yjot huädz yhuinma'ñ. ¹¹ Oy yjanchity co ca' ti tzaachypi ndzojcm ma yam nbaatim je tzaachypi, com ooy ndzachjihuiyim je tzaachypi, e ca' jotcuyc nayjihuiyim. Per pinjaty ixpijcp Dios chojcin miid je tzaachypi ycixpi, chi je' yhuimbizimiiygixy tüg jugy'ajtin tädägy etz jotcuycpi.

Je huidibi ayo'ngojp co Dios y'ayuc ngacöbiganim

¹² Paady miich ajcxy jotmicpijccix ma mmibijcin, jadu'n nipaadip nej jihuiy myajpidiccixy mgi' tiibi y'anucxiiyñi, etz mgoxcohuajc mic'ajt paady huidibi anajty ca' mic'ajt miidity. ¹³ Ixtaaygix ñi'aa tü'aa tiybi ma mdzinaayin, jadu'n nipaadip nej jihuiy yi' mdecy huidibi mädiip ti chögy, e camina jadüg'oc yhuiidip.

¹⁴ Tzinaaygix miid oyjot oyhuinma'ñ miid nidüg'óciy jäy. Ca' mdungixipy ti tzip. Miid'ajtcix tüg tzinaayin huätzpi, pen ca' jadu'n mdungixy, ni pin ca'ixipy je Huindzin Jesucristo. ¹⁵ Ooy cuenditungixp co ni pin cajijpyöydüdiipy je pubejtin huidibi Dios ti ahuanñy, jigix nañ jadu'n ni pin ycayajpaadipy janch mät yjot yhuinmañ, e yajhuindigoydäy yajmättäy jacjadyii ymügütijc, tim jadu'n nej tüg ujtz ta'mbi ypa'mduñ. ¹⁶ Ni tüg miich ajcxy ca' huaad ti ayuc miid'aty miid huingbi töxyjäy huidibi ca' miich mdöxyijc'adyii. Ca' nañ jadu'n m'ixtijipy je ayuc huidibi Dios yajhui'my miid miich ajcxy ycixpi, jadu'n nej y'idich Esaú. Miid tüg caayin uucin Esaú toocnax je huidibi anajty möhuaanip yteedy co y'unggoobity. ¹⁷ Miich ajcxy mnejhuuyb co Esaú tocy huidi anajty paatip co japada'ñ je conuucxin huidibi anajty yteedy möhuaanip, ca' jadu'n Dios cöbijcy, chi Esaú ooy yjayaaxni, per ca' anajty ñihuinma'ñ nej yjothuimbidip miid je' ycixpi tiibi anajty tuñ.

¹⁸ Ca' miich ajcxy ti mjayty ti m'ixy, nej jecy'ajty yi israelitas ajcxy yjayty etz y'ixy co ajcxy mihuingoñ je cop Sinaí ma anajty Dios ti pidägy mij jñn, ma anajty ooy yhuudzucy yjidity etz mijpoj mijtigoy ñaxy, ma anajty ooy y'agoodziy anaxy. ¹⁹ Ni mgamidoy ajcxy je trompeta ni je Dios y'ayuc huídibi anajty ajcxy je' migapxi. Pinjaty je' midou je ayuc ypijctzou ajcxy may'ajt co ca' huaad yjacmigápxigixy com ooy anajty chigiiygixy. ²⁰ Je' je' anajty ycixpi co anajty ca' mimadägaangixy je ane'min cötujcin huídibi anajty minamb: "Pin anajty ytecy pidacp ma yi cop, hue' yi' y'oyyaj'o'cnity cögäch mäd tzaa o mäd quipyjipxu'ñ, oy ixypy y'iyujcity." ²¹ Oy chigiiyñi huídibi anajty yaj'ixp, Moisés ci'm minaan: "Tziyuuybich yam mäd tzig'i'ñ."

²² Per miich ajcxy jadu'n nipaady nej jihuüy ti mmihuingoongixy yi cop huídibi yxi Sión etz je Dios juugypí ycajp. Je' je' je Jerusalén tzajpjoty ma canaag mil je ángeles ajcxy yöymujccixy. ²³ Ti miich ajcxy mmihuingoongixy ma ti yöymujccixy je jaccómaaybi jäy huídibi ajcxy yxi cojaay ma Dios ñecy jiiyby tzajpjoty, je huídibi ajcxy huin'ib huingapxtacp Dios. Ti miich ajcxy mihuingoongixy Dios je huídibi nijuez'ajtp tüg'óciy. Nañ jadu'n ti miich ajcxy mihuingoongixy je' ajcxy je oyjäydijc y'espíritu huídibi Dios ti yaj'ahuimbijttäy tudägy. ²⁴ Miich ajcxy ti mihuingoñ yi Jesús, yi huídibi xycodinaayim ma Dios mäd je jemybi cötujcin huídibi Dios yajhuim'y mäd ich ajt ycixpi. Yi Jesús huídibi mic'ajtmoy je Dios y'ayuc jemybi, co ñi'py teemy yojcy mäd ajt nbocy ycixpi. Yi Jesús co ci'm ñi'py teemy yojcy mäd jäy ajcxy ypocy ycixpi, nigí oy yi' ca'ydí co Abel iyujc ñi'py teemy yojcy mäd ypocy ycixpi.

²⁵ Paady ycixp ooy cuenditungix miich ajcxy, ca'ydí yaj'ixtijy Dios, je pin ti xyajmihui'mim jemybi y'ayuc. Je jäy ajcxy huídibi tzinay jecy'ajty, ca'p je' ajcxy chocy co ajcxy ixtijy Dios co jecy'ajty yjamigapxi ajcxy ya naaxhuiñ. O'ctíy ich ajt ca' ndzoocim, pen nmooyim ajt njix je Dios, je pin y'ayuc xyajmihui'mim huídí tzoon tzajpjoty.

²⁶ Co Dios y'ayuc yecy jecy'ajty, chi yajtzuyuuy ooy naax. Jadachambi Dios ymina'ñ: "Jadügtecypajc nyajtzuyuya'ñich je naax, e ca' nminaanim naaxti'ajty, nañ jadu'n nyajtzuyuya'ñich je tzajp." ²⁷ Co jadu'n Dios ymina'ñ: "Jadügtecypajc nyajtzuyuya'ñich je naax." Hue' yajhuinjihuüy co ytigoydähuipy huídijaty yücxp huídibi Dios yaj'oyiy, e je' huim'ip je huídijaty ca' yu'cxy. ²⁸ Paady je Jesucristo ycötujcin huídibi Dios xyajmihui'mim, ca' yi' huaad ytigoy. Tzoc yajnaxim Dioscojuyip mäd Jesús y'ayuc ycixpi, e nyajmij'ajtim n'ojadajtim Dios mäd tudägy'ajt etz mäd huindzig'i'ñ nej je' jäygidägyin. ²⁹ Ich ajt nDios jadu'n yi' nej tüg jñn huídibi nöctaayb tüg'óciy.

13

Nej jëbi nyajjäygidaacim Dios

¹ Miich ajcxy huídibi mibijcp Jesucristo, ca' mjäydiogooygixy co ajcxy mnaychójcigixipy miñ xyipy nej jihuüy ajcxy mdügquëxyity. ² Ca' ajcxy mjäydigóoygixipy co oyjäy'ajtin mdúngixipy mäd pinjaty ajcxy xycojädiyb. Mäd co oyjäy'ajtin ajcxy tuuñ, chi nijëjity ajcxy yajjättacy ángeles ajcxy, ni ca' ajcxy huinjihuüy co ángeles anajty ti yajjättaaccixy.

³ Mjäymedzip ajcxy pinjaty tzumy'iñaayb mach'iñaayb jadu'n nej jihuüy miich ajcxy nañ jadu'n mdzumy'iñaaygixy mmach'iñaaygixy quipxy mäd je' ajcxy. Jäymedzip miich ajcxy pinjaty tzaachypí ayo'n minajxp yajnaxp, com nañ jadu'n miich ajcxy mädity je ninicx huídibi jëbi y'ayoy.

⁴ Huen nidüg'óciy jäy huindzigiiygixy yajmij'ajtcixy je pijcin casada'ajtin. Huen je yëydijc etz je ytöxyijc naymüdtzináaygixy yajxon, com Dios yi' tzaachytunipy pinjaty tundigooyb mäd huingbi töxyjäy.

⁵ Ca' m'adzojccixy meen. Mijotcuyc'ajtcixy ti ajcxy ii m'iid. Dios ti je' ym'ina'n: "Cam'ina xii ñch miich ajcxy n'ixmadzi'py, ni ñch miich ajcxy ngajäy digoy'ipy."

⁶ Jadu'n jëbi nm'inaanim agujc jotcuyc: "Yi Huindzin Dios yi' xypubejtpich, ca' ndzig'ihua'n'ich jäy nej xyjatuna'n'ich."

⁷ Jäymejtzcix miich ajcxy je pinjaty ti xyñigohuajc'ajtcixy, je pinjaty ti xyajm'iidmydaaccixy Dios y'ayuc ytiy'ajt. Huinmaaygix nej je' ajcxy anajty ytudägy'aty, padungix nej je' anajty ajcxy m'iidity ymibijcin.

⁸ Jadu'n nej Jesucristo oybi tuñ jecy'ajty, nañ tim jadu'n oybi tuñ chambaad, etz oybi tuna'n huinixii huinitiempo, ca' yi' yajtigadzip yi yhuinma'n ni m'ina.

⁹ Ca' miich ajcxy myajhuin'ingixy m'iid canaag ixpijcin huidibi ca' ytügnaxity m'iid Jesucristo ytiy'ajt. Nigi oy co ajt nbidaacim nhuinma'n ma je Dios y'ayuc, nej yi' xychojcim xyjihuyim, nej yi' may'ajt tuñ m'iid ñch ajt. Ca' mbidaacim mhuinma'n ma je cötujcin huidibi adujcp nijëjity caayin uucin. Ni ti jotcuyc'ajt ajcxy capaty pinjaty panixp yi' jadu'mbi cötujcin.

¹⁰ Je judío tungm'iidpi huidibi huindzigi'n tumb anajty ma Dios yhuittijc je jecy'ip, ca' yi' jëbi yjactuuni ma ñch ajt nmibijcin jadu'n nej Jesucristo tuñ huindzigi'n m'iid ñch ajt ycixpi. ¹¹ Je judío m'ijtungm'iidpi ma Dios ytiyc ypidac iyujc ñi'py ma je Lugar Santísimo nej tüg huindzigi'n huidibi yajpocyñihuaatzp je mayjäy. Je iyujc ögy ñin'icx jiguem je' yajnögy, ca' jiibyity cajpjoty ma je Dios anajty huindzigi'yigixy. ¹² Tim jadu'n nej je judío sacerdote yajnögy je huindzigi'n iyujc ñin'icx cajp n'naxy, nañ tim jadu'n Jesús paty tzaachy'o'cin cajp n'naxy jigix m'iid je' yci'mni'py pocyñihuädzip je mayjäy.

¹³ Tzoc m'ijpidaacim je Jesús tiibi y'ögy cajp n'naxy m'iid ñch ajt nbocy ycixpi. Tzoc minajxim yajnajxim je canayyajmij'adii je canay'ixa'nii, tim jadu'n nej Jesús minajx yajnajx je canayyajmij'adii je canay'ixa'nii. ¹⁴ Ya naaxhuiñ ca' ya ajt nm'iidity tüg ciudad ma jëbi n'ijtim huinixii huinitiempo, je' ñch ajt njijp'ijxim je tzinaayin huidibi miimb cidaacp. ¹⁵ Paady ycixp chojcpy co Dios n'ojadajtim nmibijctzoohuim jabom jabom huinixii m'iid Jesucristo yxi. Co jadu'n n'ojadajtim nmibijctzoohuim Dios jadu'n nipaady nej tüg huindzigi'n nmooyim. Tzoc ii m'ibijctzoohuim, tzoc ojadajtim m'iid ajt ngi'm'ahuac ngi'm'ayuc. ¹⁶ Ca' mjäy digóoygixipy co oybi mdúngixipy etz naybubéjtigix naybudig'iyigix miñ xyipy. Co jadu'n mdúngixipy jadu'n nipaady nej tüg huindzigi'n ti myejccixy ma Dios huidibi yi' ooy jäygidägy.

¹⁷ Capxymidoogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtip yi' m'alma. Nejhuuyim co c'iyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb m'iid yi' ajcxy, jotcuyc ajcxy ñayjihuihuuyb. Pen jibic miich ajcxy mduñ m'iid yi' ajcxy, tajp mayip ajcxy. E pen yi' ajcxy tajp maayb, chi miich ajcxy ca' ni ti jotcuyc'ajt mm'iid'adipy.

¹⁸ Mibijctzoogix Dios m'iid ñch ycixpi etz je pinjaty xym'iidhuidijtpich. Jatytim naymic'ijxibich tudägy nduuñich ma tüg'ócixy ñch ndung, paady ycixp jotcuyc nayjihuyijich. ¹⁹ May'ajt nbijctzooybich ma miich ajcxy co Dios mmibijctzoogix m'iid ñch ycixpi, jigix Dios a'ixihuipy co n'icxibich tzojc ma miich ajcxy.

Oy'ajt etz capxpoocxin huidibi cogixiyñip je necy

²⁰ Dios nmibijctzooybich m'iid miich ajcxy ycixpi. Je Dios huidibi yajjugypijc jadüg'oc ñch ajt nHuindzin Jesucristo co y'o'cy, je huidibi cuend'ajtp je maymibijcpidijc. Co Jesucristo ñi'py teemy vojcy, chi mic'ajt moy je jemybi cötujcin huidibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymibijcpidijc. Jadu'n yi' nipaady nej tüg

cöbixy cuend'ajtpi huídibi cuend'ajtp may ngöbixy. ²¹ Je Dios huídibi xya-jjotcujc'ajtm je' huen xyaj'ahuimbijtcixy huädz etz oyjäy ma tüg'óciy ajcxy mmibijcin etz ma tüg'óciy ajcxy mdzinaayin, jigix ajcxy mdunipy nej yi' tzocy. Dios huen tuñ ma ñich ajt njot nhuinma'ñ mñid Cristo ymic'ajt nej yi' tzocy. ¡Huen Cristo y'idipy mij cömay huinixi huinítiempo! Amén. Jadu'n jada.

²² Nmigügtijc, nbijctzooybich may'ajt yajtungixy mecxtujcin ma jada ayuc capxhuijn. Ti ajcxy ii con nijayiygixy. ²³ Nejhuíygix miich ajcxy co ajt nmigüg Timoteo y'ity ahuätztuum. Pen tzojc yjädy ya ma nyajpaadyich, chi yi' xymñidñicxibich co ñich anajty miich ajcxy nicxy n'ijxcixy.

²⁴ Nguejxpyich ngapxpooxñ ma nidüg'óciy pñ ajcxy xyñigohuajc'ajtp etz je migügtijc ajcxy huídibi mibijccixyp. Je migügtijc huídibi ajcxy yajpatp ya Italia yquejxyp ajcxy capxpooxñ ma miich ajcxy.

²⁵ Dios ajcxy xyconuucxip nidüg'óciy miich ajcxy. Amén. Jadu'n jada.

SANTIAGO Yi Neczy Huidi Santiago Yajniguejx Je Judío Mibijcpidijc

¹ Hich Santiago, ndzojcingíx hich nduñ ma Dios etz je Huindzin Jesucristo ytung. Cham jada necy nyajniguesyich yi Israel jäy huidi ajcxy yajmij'ajtp Dios, huidi ajcxy xim yam yajpatp cajp cajp mïd co yqueecpidzimy ajcxy Judea naaxjot co ymidzip ajcxy chach'ixhuididyii chachpahuididyii ajcxy.

Je tïy'ajt huïdib tzoon ma Dios

² Migügtijc ajcxy co yi mmidzip ajcxy xychach'ijxmadzaangixy nej miich ajcxy mjot mhuinma'ñ mïdity, co yi' ajcxy xy'ixhuïdijtcixy xypahuïdijtcixy, co xyñigapxcixy xyñi'ojiiygixy, co xyajhuinma'ñydigoyaangixy, ca' mdajipy mmayipy ajcxy, jotcuyc ajcxy mnayjihuihuïyb. ³ Miich ajcxy mnejhuïygixyp co jadu'n mmimecxtujccixyp je tzaachypi ayo'n huïdibi mminajxcixyp myajnajxcixyp mïd co ti mmijpidaaccixy Jesucristo, huin'it mbáatcixipy mic'ajt, jigix jëbi mimadactaygixy tüg'óciy jibic-huinma'ñ. ⁴ Copicy miich ajcxy mimadactáaygixipy tüg'óciy jibic-huinma'ñ, ca' ma mdundigóoygixipy, e huin'it huädz mjot mhuinma'ñ mmïd'adipy ajcxy, ca' ti myajtigoy y'idipy ajcxy.

⁵ Pen nidüg miich ajcxy myajmayjaty oyhuinma'ñ, co jäy ajcxy xychach'ijxmadzaani mjot mhuinma'ñ nej mïdity, mibijctzou Dios huen xymöy je oyhuinma'ñ, com yejcpy yi' oyhuinma'ñ mïd tüg'óciy jäy co pijctzoy. Ca' yi' cohuindugyii, ca' huaad xy'ojim co nbijctzoohuim oyhuinma'ñ. ⁶ Copicy pijctzohui Dios huïjy'ajt cujc'ajt cixyot huinijot, ca' y'ametz yjotmetzity. Pinjaty ametz jotmetz Dios mibijctzoob, ca' tú'ciy mïdity yjot yhuinma'ñ, janam jatzojc yajtigach yhuinma'ñ jadu'n nej je mejy co ypidigy y'ixtägy mïd je poj. ⁷ Co jäy ajcxy ametz jotmetz mibijctzoogixy Dios, Dios ni ti jadu'n cayecy. ⁸ Yi jadu'mbi jäy ajcxy ametz jotmetzpi canaagnax yhuinma'ñ ajcxy mïdity, ca' tügijp yhuinma'ñ pidaaccixy ma Dios.

⁹ Yi ayoobitijc huïdibi mijpidaaccixyp Dios, ooy jäygidägaangixy co Dios ypubediiyb ypudigihuiyb. ¹⁰ Yi comeñjyay ajcxy huïdibi mijpidaacp Dios, ooy jotcuyc ajcxy ñayjihuihua'nyii co ajcxy ymeeñ ytictähuiipy jadu'nyii. Com yi' ajcxy ymeeñ tigoyamb yi' jadu'n nej tüg pijy co ñiicxni mïd xi an. ¹¹ Co xi ypejtni, chi ooy y'andaacni mic, e chi je jünboj ypidzimy, chi je pijyquipy ytich, chi yhuingädaayñi je pijy, e jadu'nyii ytigoydäy je pijy oy'ajtin. Jadu'n nej yjaty yi pijy, ñan tim jadu'n yjada'ñ comeñydijc ajcxy, jadu'nyii ñitigoyaangixy yjugy'ajtin.

Co yjot yhuinma'ñ chach'ijxmadza'nyii

¹² Jotcuyc pinjaty mimecxtujctaayb jadu'n nej ajcxy yjot yhuinma'ñ chach'ijxmadza'nyii. Co jadu'n mimecxtujctáaygixipy, Dios möhuib ajcxy jugy'ajtin huinixibi, huïdibi yajhuinhuanïy tüg'óciy jäy ajcxy huïdijaty Dios tzojcp yajmij'ajtp. ¹³ Co pin nijot'aty co tuna'ñ ti jibicpi, ca' ymina'nipy co Dios anajty jadu'n yajtundigoyaani. Dios ca' ti jibicpi tuñ mïd jäy ajcxy. E nañ ni pin ca' huaad ijxmach Dios nej yjot yhuinma'ñ ymïdity. ¹⁴ Ci'm ajcxy jadu'n ñaydunyii, co tzachnijot'ajtcixy canaagnax jibic-huinma'ñ. ¹⁵ Co jäy ajcxy nijot'ajtcixy jibic-huinma'ñ, pocy anajty ytungixy. Ti ajcxy anajty ooy ypocyñibejtni co nicxy y'ó'ccixni.

¹⁶ Migügtijc ajcxy, huídibi ooy ndzocy njihuïyich, ca' mnayhuin'ínigixy. ¹⁷ Ich ajt nDios Teedy huídibi tzajpjoty tzinaayb, yi' huídibi yajcojtaay xii madza' huídibi jajp tixcp, yi' je' yejctaayb tüg'ociy tijaty oybi, tüg'óciy yhuinma'ñ huídibi ich ajt nmíid'ajtm. Dios ca' yi' yjot yhuinma'ñ yajtigach jadu'n nej yi' xii madza' yjajin ytíxcin ytigach. ¹⁸ Dios y'oydumyb huinjemy ich ajt njot nhuinma'ñ míid yi' y'ayuc ytíy'ajt, jigix jébi ich ajt nmi'ijtm oyjot oyhuinma'ñ. Yi' jáy ajcxy huídibi yajmij'ajtcixp Jesucristo, Dios nígi tzocy ajcxy ca' jac ti huídibi oyduñ.

Je tíy'ajt tíydudäcypí

¹⁹ Migügtijc huídibi ich ooy ndzocy njihuïyich, mnejhuíhuipy miich ajcxy jada co ooy ycopicyity mmído'mbíctáhuipy ajcxy Dios y'ayuc ytíy'ajt, ca' mjäydgóoygixipy, ca' mgapxmayíygixipy, pen mjotmätcotp ajcxy ca' anajty mguydungixy Dios ytíy'ajt. ²⁰ Je jáy huídibi jotma'tp, ca' je' tuñ huídibi Dios yjäygdacyp. ²¹ Ixmajtztaaygix yi' jibic ayuc, ca' mnijot'ajtcixy yi' jibic-huinma'ñ. Cöbiccix míid oyjot oyhuinma'ñ yi' Dios y'ayuc ytíy'ajt, yi' huídibi Dios ti yajnicödugy, huin'it jébi ajcxy m'alma nídzoocin paady.

²²⁻²⁴ Cuydungix ajcxy Dios y'ayuc ytíy'ajt, ca' ajcxy mjotcujc'adipy míid yi'yi co m'amído'ijtcixy, hue' anajty nígo mnyahuin'ínigixy. Peni nígoob Dios y'ayuc m'amído'ijtcixy, e ca' mmíjpidaaccixy ca' mguydungixy, naadigi' anajty m'amído'ijtcixy. Jadu'n miich ajcxy nipaady nej pin yhuíñyjipp aa'ijxnajxp ma tügi ixx. Co ñay'aa'ijxnajxtäyíi, chi yjihuägy, e mic'amy jäydgoydäy nej yhuíñyjipp ti ixxy. Naadigi' anajty ti ñay'aa'ijxnaaxyíi. ²⁵ Pen miich ajcxy yajxon m'ixpijcy Dios ytíy'ajt, je tíy'ajt huídibi yaj'oyíhuip ajcxy mjot mhuinma'ñ, pen mmíjpidaaccixyp, pen mguydungixyp Dios y'ayuc, e ca' mjäydgóoygixy, chi jada' Dios xyconuucxip ajcxy míid jégixpi huídibi anajty mguydungixyp.

²⁶ Pen ji pin ñayjihuíyíi co cuyduni Dios ytíy'ajt, e ca' ñay'ahuíjtzyíi, ci'm anajty ñayhuin'íñyíi, tundigooyb anajty, e ca' yjanchity co míjpidaaci Dios ytíy'ajt. ²⁷ Pen miich ajcxy huädz míjpidaaccixy Dios etz mguydungixy yi' ytíy'ajt jadu'n nej jébi Dios jäygdägy, hue' tzocy co mbubéjtcixipy mba'ayóogixipy co'ögy'ungdjic, etz co'ögy ytöxyjäydjic ma ayo'n jotmay ajcxy patcixy. E ca' huaad jibic-huinma'ñ mjactungixy, jadu'n nej jadyíi naaxhuíñjáy y'idíitcixy, huídi ca' míjpidaaccixy Dios.

2

Ca' huin'ijxpety migüg myajmij'ájtciixipy

¹ Migügtijc ajcxy, co m'ojadajtcixy co mmíjncxpejtcixy ich ajt nHuindzin Jesucristo, yi' huídibi tzajpjoty ane'm, ca' ajcxy huin'ijxpety migügtijc myajmij'ajtcixipy. ² Pen jim jáy ytigíy ma mnayyöymújcigixy comeñybi míid oori cijiit, etz míid yhuít yxojx janch oybi, etz pen nañ tigíy tüg jáy ayoob huídibi yhuít ytucxy cíitz tuc nübüdy ixpüdy. ³ Chi miich ajcxy je' jac nígi myajmij'ada'ñ je comeñybi huídibi oyxoxy, e chi mnímähua'ñ: "Íña' miich ya ma jada oybi íñaaybejt." E je ayoob jáy mnímähuaangixy: "Íña' naaxcíxy o jim jadu'n tina'." ⁴ Co jadu'n m'idítzíp ajcxy, ca'p anajty jadu'n ytíy'ajty. Mdundigooygixy anajty ma Dios ytíy'ajt co huin'ijxpety ajcxy migüg mdzogipy. Hue' anajty myajtungixyp jibic-huinma'ñ co jadu'n m'ixtíjciixipy jáy huídibi ayoob.

⁵ Migügtijc ajcxy, Dios ti huin'ixy yi' ayoobíjic, jébi ajcxy míjpídagy Dios etz jébi ajcxy paadipy it lugar ma Dios y'it tzajpjoty. Jadu'n Dios yajhuinhuaniy pinjaty tzojcp jihuíyip co it lugar möhua'ñ jüby tzajpjoty. ⁶ Myajtzo'yduungixyp miich ajcxy ayoobíjic. ¿Nej cayí comeñyjáy ajcxy

huidibi miich ajcxy xychachxip ma cötujctac, e xyajnicxcixy ma tungmüdpi yhuinduu, oy ajcxy mdzocy mgatzocy? ⁷ ¿Nej ca yjējity ajcxy huidibi jibic nigapxp ni'oj#yb Jesucristo, je oyjäy huidibi miich ajcxy myajmij'ajtcixyp?

⁸ Pen janch miich ajcxy mguydungixy je tiy'ajt huidibi jaybety ma Dios ylibro: “Mdzogipy mjihuñhuipy mmigügtijc hueñytimypinity, jadu'n nej miich ajcxy ci'm mnaychogyii mnayjihuiyii.” Pen jadu'n anajty mdungixy, tüg anajty oybi mdungixyp. ⁹ Pen huin'ijxpety ajcxy anajty jäy myajmij'ajtcixy jadu'n nej yhuit yxoxy ajcxy müdity, mdundigooygixp, e ti anajty mnayya-jpocycähuiyixy ma Dios ytiy'ajt. ¹⁰ Pen tüg jäy cuydundaayi Dios ycötujcin, co nicxy tüg cacuyduñ, jadu'n nipaady nej jihuiy anajty janch ni tüg cötujcin ti cacuyduñ. ¹¹ Je Dios je cötujcin ti pidägy co ca' huaad mmigapxtigooyipy töxyjäydijc, etz nañ ti cötujcin pidägy co ca' huaad njäyyaj'o'cim. Pen mmigapxtigooyb töxyjäydijc, oy ca' ti mjäyyaj'ögy, ti anajty mdundigooy mij ma Dios ytiy'ajt. ¹² Capxcix miydaccix, tungix nej jēbi huaad jäygidägy #ch ajt nHuindzin Jesucristo nej je' cuyduñ yi' ytiy'ajt. ¹³ Ca' ti pa'ayoohuin paadipy ma Dios, pin ca' tuñ ti pa'ayoohuin ma ymigügtijc. Pin pa'ayoohuin tumb ma ymigügtijc, je' capxpaady y'idip co anajty Dios tiyduñ yi' yjäy.

Je mibijcpi etz je oyjäy'ajtin

¹⁴ Migügtijc ajcxy, ni ti m'alma capadañ pen miich mmınaamb co myajmij'ajtyp Dios, e pen ca' myajniguēxigy ni ma co oybi mduñ. Ca' Dios yajnidzōga'ñ yi' m'alma müd co nigooob mmınañ co Dios mmijpidägy, e ca' mguyduni yi' ytiy'ajt. ¹⁵⁻¹⁶ Pen miich ajcxy müd tüg migüg yēydijcpi o töxyjäybı huidibi yajmayjajtp yhuit ytucxy caayin uucin, e chi nigoo miich ajcxy mnimähuiy: “Nicx agujc jotcujc, Dios xypubedipy xypudigihuiy, ca' mdich'ögipy ca' myuu'ögipy.” E miich ca' anajty ti ti mmöy huidijaty yajmay-jajtpy. ¿Ti oyjäy'ajtin anajty ti mduñ? ¹⁷ Pen miich minamb co myajmij'ajtyp Dios, e ca' oyjäy'ajtin mduñ müd mmigügtijc, ytimyñipaty jadu'n nej ixipy ca' mmibicy yi' Dios ytiy'ajt.

¹⁸ Ca' yjeczyty co tüg jäy xyñimähuibich jadu'n: “Miich mdzachmijpidacpy yi' Dios ytiy'ajt, e #ch ndumybich oybi.” #ch n'adzohuiyich yi' jadu'mbi jäy co ca' jadu'n ytiy'ajtiny nej miich minañ. Pen ca' miich mmijpidägy Dios y'ayuc, ca' mjadipy nej mdunipy oybi jadu'n nej Dios huaad jäygidägy. Co #ch oybi nduñ, jadu'n ñigüexigy co nmijpidägyich Dios. ¹⁹ Miich mmibijcpi co Dios ji tügpajc, e oy jadu'n co mmibicy. Nañ jadu'n yi' ca'oybi ajcxy mibijcp etz chigiyb ajcxy Dios. ²⁰ Loci miich, ca' mhujnihuihua'ñ je tiy'ajt. Co pinjaty mibicy Dios, e ca' yajniguēxigy co oybi tuñ, ca' tiydudägy mibicy Dios. ²¹ Je Abraham yejc tüg ijxpejt nej jēbi huaad ngapxymidoohuin Dios co jecy'ajty je' ymang Isaac cıyejcy nej tüg huindzigi'ñ ma Dios. ²² Je Abraham ymibijc co Dios yjijity etz nañ ycapxymidou nej Dios ñimaayi. Paady nejhuuyim co yjanchity co Abraham mijpidacy je' Dios müd co cuyduñ jadu'n nej Dios ñimaayi. ²³ E jadu'n oy cuydundäy nej yjaybetyty ma Dios ñecy: “Yi' Abraham ymijpidac Dios, paady Dios ymecxtaayi ypocy, e ycöbijci jadu'n nej jihuiy ca' anajty ytundigoy.” Paady ycixpi Abraham oyñaydiyii: “Co Dios minaymigüg'adyii.”

²⁴ Cham nejhuuyigix co Dios ycöbijcpi jäy huidibi cuydungixp yi' ytiy'ajt, e ca' mmınaanim müd jēy co ymibijccixy. ²⁵ Tim jadu'n nej Abraham yjajty, nañ tim jadu'n yjajty müd je töxyjäy huidi anajty yxi Rahab, huidibi anajty ooy ti ytundigoy müd mayyēydijc. Je Rahab ycoyüdz ma ytijc nimetz jäy huidibi anajty Israel jäy yaj'ijx'ijtyp, e chi yajqueegiy ma huingbi tü'aa, e jadu'n ajcxy yajtzoocy ma ymidzip. Müd co jadu'n oyjäy'ajtin tuñ müd je Israel jäy, chi Rahab oy paady je nidzoocin ma Dios. ²⁶ Je ninicx huidibi ca' alma müdity,

ca' ni ti mic'ajt miidity. Nañ tim jadu'n pinjaty mibijcp co Dios yjiijity, e ca' cuyduñ Dios ytiy'ajt, yi' ymibijcin ca' Dios cuendipicy.

3

Co pinjaty nigapxy ni'ojy ymigüg

¹ Migügtijc ajcxy, huinmaygix yajxon pen janch mnajtztzogiygixy co ajcxy mnihuindzin'adaangixy Dios y'ayuc. Com ich ajt huidibi nyaj'ixpijcin Dios y'ayuc, pen tundigooyim nigü mij nyajtiydunaanim. ² Nidüg'ócüy ich ajt ndundigooyim minajity. Pen ji pin ca' y'idigooy ycapxtigooy, yi' tiydudägy anajty yjyä'aty, jëbi ñaygüend'adyii yajxon, e ca' huaad y'ocjactundigooyñi. ³ Ypidacpy jäy freno ma cohuay y'ahuac jigix jëbi ane'my je cohuay nej tzocy. Nañ jadu'n tzocy co jäy ajcxy huen y'ahuac ahuijtzocy jadu'n nej jäy cohuay ane'my miid freno. ⁴ Nañ jadu'n yi' barco oy mabaad ooy yjamijity, per ooy poj ytijminyii ytijxybyii. Je barco yaj'ane'm yajxon miid tüg pi'c pujx yindi'cni huidib xijip timón. Yajxon ytüyöy je barco ma je timdzocy je huidibi ane'mip. ⁵ Nañ jadu'n yjaty miid yi' tootz, janch tim yindi'cni yi', per ooy mij cajee tuñ jibicpi, jëbi y'idigooy ycapxtigooy mij cajee. M'ijxyp miich ajcxy nej tim yindi'cni jin mij ooy nögy quipychaa miy'ujtz. ⁶ Yi' jäy ajcxy y'ahuac nañ tim jadu'n nej pi'c jin, miid nhuin n'ahuac mijcajee n'idigooyim ngapxtigooyim. Co jadu'n n'idigooyim ngapxtigooyim, chi jëbi mijcajee midundigooyim mayjäy. Co n'idigooyim ngapxtigooyim, etz nayyapocycähüm, chi ñiguëxigy canaagnax jibic-huinma'ñ huidibi nmid'ajtim. Jada jibic-huinma'ñ jim yi' nbaatim ma je mujcu' huidibi tzinaayb ma yi' inferno. ⁷ Yi' naaxhuiñyjäy ti mimadaaccixy yi' iyujc animal huidibi queegicp queec-huidijtp, naag iyujc ahua'nbi, etz iyujc nijotyp. Ti ooy yajmaxiygixy yajxon iyujc huindzicyp etz ahua'nbi. ⁸ Yi' naaxhuiñyjäy oy ti mimadaaccixy yi' iyujc animal, per nitüg ycaca'ty pin yajxon y'ahuac ahuijtzigipy, ac'idigooygixp capxtigooygixp ajcxy. Pin ymigüg nigapxy ni'ojyib, huin'it je ymigüg ooy jibic ñayjihuihua'ñyii, jadu'n nej jihuiy veneno ti möy ymigüg. ⁹ Miid jada' nhuin n'ahuac ajt ngapxpaatim ich ajt nHuindzin Jesucristo etz ich ajt nDios Teedy. Nañ jadu'n miid nhuin n'ahuac nigapx ni'ojyim nmigügtijc. Dios ti yajcojy yi' jäy miid oyjot oyhuinma'ñ jadu'n nej yi' oyjot oyhuinma'ñ miidity, paady ca' y'oyity co n'idigooyim ngapxtigooyim. ¹⁰ Miid nhuin n'ahuac ajt miid ngapxim oybi ayuc etz jibic ayuc. Miid nhuin n'ahuac yi' miid ngapxpaatim etz ni'ojyim nmigügtijc. Ca' jadu'n y'oyity co jadu'n n'aditizim. ¹¹ ¿Nej jëbi jada' ma tüg nigop ypidzimy ni' päcpi etz ni' ta'mbi? ¹² Migügtijc ajcxy, ¿nej jëbi jada' yi' higeri ytim'aty aceituna etz yi' muuxy'aadz ytim'aty higos? Nañ tim jadu'n ma ni' ymuxy tamtzpi, ca' jim ypidzimy ni' päcpi. Paady ycixp ca' y'oyity co jäy ajcxy capxcixy oybi etz jibicpi.

Je tiy'ajt janchyp

¹³ Pen miich ajcxy huijycujc mnayjihuiyi, pen oyhuinma'ñ ajcxy mmid, yajtungix m'oyhuinma'ñ ma mdzinaayin mjogy'ajtin. Ca' huaad ci'm ñaygömáayigixy. Miid je oyjäy'ajtin huidibi ajcxy mdumyb huen jäy ci'm nejhuiygixy co oyhuinma'ñ miich ajcxy miid'ajtcixyp. ¹⁴ Pen ta'm mjot mhuinma'ñ mjihuiygixy, pen mga'oy'ijxcixyp ymigügtijc, pen mhuinnaxtugaangixyp ymigügtijc, pen jadu'n mjihuiygixy mhuinmaaygixy, huin'it ca' huaad mnaygömáayigixy ci'm co mdzachcuydungixy Dios ytiy'ajt, com ca' yjanchity, nigoo m'anidaaccixy. ¹⁵ Jada jibic-huinma'ñ ca' jada chooñ ma Dios huidibi tzinaayb tzajpjoty. Ya naaxhuiñ jada jibic-huinma'ñ yajpaady, miid co jäy tzachnijot'ajtcixy jibic-huinma'ñ. Yi' mujcu' yejcpy jada jibic huinma'ñ,

e ca' nminanim co Dios yecy jada jibic-huinma'ñ. ¹⁶ Paady ycixp co jäy ajcxy ycanay'ixa'ñyii, co huinnaxaangixy ymigüg, chi ca' oy y'ijtcixy, oy ajcxy ñaymidundigóoyigixy mijcajee. ¹⁷ Je huijy'ajt cujc'ajt huidibi Dios yejcp, ooy yi'. Yi Dios huidi tzinaayb tzajpjoty oyhuinma'ñ ymüid. Pen nyajtuunim je tiy'ajt huidibi Dios ti xymooyim, chi jotcuje ndzinaayim, ca' ma tzip capxy, etz nmimecxtujcim nmigügtijc, etz yung naxy jot huinma'ñ nmüid'ajtim, etz nba'ayoohuim nmigügtijc, etz nduunim oyjäy'ajtin, etz tudägy nhuinma'ñ nmüid'ajtim. E ca' nigoo naybidaacim jadu'n nej jihuüy nmijpidaacim Dios, e ca' yam yjanchity. ¹⁸ Co nyajtuunim je huijy'ajtin cujc'ajtin huidib Dios yejcpy, chi jotcuje ndzinaayim müid tudägy njot nhuinma'ñ, jadu'n nej jëb Dios jäygidägy.

4

Co pinjaty nijot'ajtcixy mayñax tzinaayin

¹ ¿Ma'amy ajcxy mdijy choon je tzip capx huidibi yajpatp ma miich ajcxy? Tüg'óciy yi jadu'mbi jibicpi yajpatp ma ajcxy mjot mhuinma'ñ, paady ycixp mganay'ayuc-huinjihuiyigixy, e tzipcapxy myajcojciy myaj'abadiyigixy. ² Ooy miich ajcxy tijaty mjatzojccixy, e ni ti mgapaatcixy, e huin'it mjäyyaj'öccixy. Ooy m'adzojccixy tijaty migüg yjë'ajtyp, paady ycixpi mdzip-tungixy, etz mganay'ixáanigixy. Ca' ti jotcuje'ajtin mbaatcixy, com ca' ajcxy mbijctzoogixy ma Dios. ³ Co mjamibijctzoogixy Dios, chi ca' ti mbaatcixy, müid co mbijctzoogixy müid jibic-huinma'ñ. Mbijctzoogixyp co myajtunaangixy ma ca' ypadyii. ⁴ Mdundigooyb ajcxy. ¿Nej ca' mnejhuüyigixy co Dios ca' jäygidägy pen mdzachnijot'ajtyp ajcxy yi mayñax tzinaayin? Pinjaty nijot'ajtcixyp yi mayñaxpi tzinaayin, jadu'n yi' ajcxy nej yi jacjadyii jäy ya naaxhuin huidibi ca' yajmij'ajtcixy Dios ytiy'ajt. Hue' je' ajcxy y'ahuimbity Dios ymidzip. ⁵ Nej miich ajcxy mdijy, naadigi' ymiñ jaybety ma Dios yñecy: “Je Espíritu Santo huidibi Dios ti xy'adigüyim ti xyjottigüyim ooy xychojcm xyjihuiyim mijcajee.” ⁶ Dios ninigoobi may'ajt oy'ajt tuun müid ich ajt ycixpi, paady ycixpi ymina'ñ ma Dios ñecy co ca' yi' oy'ixy pinjaty amij agix nayjihuiyip. Dios yejcpy may'ajt oy'ajt ma yi jäy ajcxy huidibi yung naxy jot huinma'ñ müidity. ⁷ Naybidáacigix cixyjot huinijot ma yi Dios. Mic mihuindinaaygix yi mujcu', e jihuägipy yi' ma miich ajcxy. ⁸ Ojadajtcix Dios müid oyjot oyhuinma'ñ, e Dios xypubedipy xypudigihuiyipy ajcxy. Miich ajcxy pocyjäydijc, ixmajtcix yi jibic-huinma'ñ. Yajhuaatcix yi mjot yi mhuinma'ñ miich ajcxy huidibi ametz jotmetz mibijcp. ⁹ Tajcix maygix, amutzciygix. Huen yi mxiiicin yi mxondaacin ahuimbity jüyin yaaxin. E yi mjotcuje'ajtin huen ahuimbity tajii mayii. ¹⁰ Pidaccix yung naxy yi mjot yi mhuinma'ñ ma yi mHuindzin Dios, e yi' may'ajt oy'ajt tunipy müid miich ajcxy ycixpi.

Ca' huaad nigapxcixy ni'ojüygixy ymigügtijc

¹¹ Migügtijc ajcxy, ca' mnayñigápxigixy mnayñi'ojüygixy miñ xyipy. Pen mnigapxyp mni'ojüyib mmigügtijc, hue' mniixiicpy myajxiicpy Dios ytiy'ajt huidibi minaamb co myajmij'adipy yi mmigüg jadu'n nej mnayyajmij'adyii ci'm. Pen mniixigamyb myajxigamyb Dios ytiy'ajt, ca' anajty mguyduñ yi tiy'ajt, e jadu'n yhuimbizimyb nej ixipy miich mina'ñ co Dios ytiy'ajt ca' yi' y'oyity. ¹² Dios tügpajc huidibi ane'min pidägy, e yi' je' tügpajc huidibi tiydunamb pocyjäy. Yi Dios tügpajc huidibi yajtzögip o yajtigoyip jäy ajcxy y'alma. Paady ycixpi miich ajcxy ca' ypadyii nicxy migüg mnigapxcixy mni'ojüygixy.

Dios tügpajc nejhuüy nej je jabombi mimb cidacp

¹³ Tungix cuendi ich n'ayuc miich ajcxy huídibi minamb: “Cham o jabom nnicxim ma yijimbi naax cajp, e jim nyajnajxim jimijt agujc jotcujc, jim negocio nduunim, ooy mijcajee nbaatim.” ¹⁴ E miich ajcxy ni mganejhuuygixy ti je' anajty je jabombi mimb cidacp. Je jugy'ajtin ni pin ca' nejhuuy nej pin chinähua'ñ yjugy'ada'ñ. Jadu'n miich ajcxy mjogy'ajtin nej joc co y'ocquëxigy cham, e tim tögjaxigy ti ñitigooyñi. ¹⁵ Jac'oy ajcxy mmina'ñip: “Pen Dios jadu'n tzojp, pen xymooyim jugy'ajtin, jëbi cham o jabom nduunim tijaty.” ¹⁶ Miich ajcxy ci'm mdzachyajnihuinmaaygixy ti mdunamyb, ci'm mdzachnaygömayyii ajcxy. Ca' jadu'n y'oyity co ci'm mnaygömayyigixy; co ci'm mnaybidáacigixy amij agix, ni Dios mgamibijccixy. ¹⁷ Pin janejhuuyb je oybi, e ca' tuñ, pocytumb anajty.

5

Je comeñjy yjugy'ajtin nitigoyam

¹ Comeñydijc, oc'amidoo'ijtcix nej cham mmina'ñich. Amutzciygix, tajcix maygix co xyñiminaangixy ayo'n. ² Miich ajcxy mmeñ etz ajcxy mjogy'ajt ñitigoyamb yi', miich ajcxy mhuit mducxy ti uucxyting yicxtäyii. ³ Miich ajcxy m'oori, ajcxy mplata, ajcxy mmeñ naadigi' ti myujpijccixy ti m'amay'ajtcixy. Ti ixypy myajtungixy müd oyjäy'ajtin. Co ti myujpijccixy ti m'amay'ajtcixy ji jadu'n je tiy'ajt co mdundigooygixy ma Dios. Müd co yi mmeñ ca' ti myajtungixy müd oyjäy'ajtin, paady ycixpi ayo'n mbadaangixy müd je xii tiempo huídibi mimb cidacp, mina Dios tiydunaangixy pocyjäydijc. Nitigoyamb miich ajcxy m'oy'ajtin. ⁴ Mdundigooygixyp co ca' ca'pxy ti mmujuuygixy mdumbidijc huídibi ti myajtungixy ma ajcxy mgamdu'. Yi mdumbidijc cham ooy miich ajcxy xiy ma Dios. Yi Dios, je Huindzin mijpi, huídi ane'mdaayb tuc'óciy jii by tzajpjoty etz ya naaxhuiñ, yi' ñejhuuydaayb nej miich mdumbi ajcxy ymínaangixy. ⁵ Ti miich ajcxy agujc jotcujc mdzinaangixy ya naaxhuiñ müd mayñax xondaacin. Ti miich ajcxy mgüxyii mbedyii, ti ajcxy mjotcujc'ajtcixy. Cham m'ahuijxcixyp yi tzaachypí yi ayo'n huídibi ajcxy mbadamyb ma Dios, jadu'n nej huaj nixpi ahuixy co jäy ajcxy chüda'ñyii. ⁶ Miich ajcxy comeñjydydjic ti miich ajcxy mxigixy mnihuambejtcixy, mdzaachtungixy ti myaj'öccixy jäy ajcxy tudägypi, e ca' yi' ajcxy xymihuimbijty.

Je mecxtujcin etz je capxtägü

⁷ Migügtijc ajcxy, yajtungixy mij yi mecxtujcin mabaad anajty je Huindzin Jesús ymiñ jadügtecy ya naaxhuiñ. Tim jadu'n nipaady nej naymidumbidijc ahuijxcixy je tibi nidunguygixy, ahuijxcixy müd mecxtujcin je oga'n tuu etz je poj tuu huídi müd je' ypidägy yhuindihuipy. ⁸ Müd'ajtcix nañ jadu'n ooy mecxtujcin, etz ca' mjotmetzcuygixy, com huingomb je tiempo mina ymiina'ñ je Huindzin Jesús ya naaxhuiñ jadügtecy. ⁹ Migügtijc ajcxy, ca' jadüg jadüg mnayñigápxigixy nayñi'ojñyigixy. Pen jadu'n mdungixy Dios miich ajcxy xyajpocycáhuipy, com tim huingonip je xii je tiempo mina Dios tiyduna'ñ jäy ajcxy müd ypocy ycixpi. ¹⁰ Migügtijc ajcxy, pijccix je iixpejt jadu'n nej tzaachypí minajxy yajnajxy je profetas ajcxy huídibi ajcxy ihuácxp capxhuácxp je Huindzin Dios y'ayuc. ¹¹ Minaanim jadu'n, müd co ajcxy ooy mímecxtucy nej jäy jibic ytuuñ müd yi' ajcxy, e chi jotcujc cham yajpaady ma Dios. Ti jada' mjatymidoogixy je ayuc nej Job ayo'n tzaachypí minajxy yajnajxy, e ymímecxtujc je'. Müd co ooy anajty mijpidägy Dios, paady Dios pa'ayoy Job, e conuucx mijcajee.

¹² Migügtijc ajcxy, co tijaty ayuc m'adzohuimbidipy, tıydudägy ajcxy m'adzohuipy: “Janch jadu'n o ca' yjadu'nıty”, ca' ajcxy m'ıındägıpy. Ca' Dios nigoo m'ııbaadıpy mgapxpaadıpy. Ni ca' m'ııbaadıpy mgapxpaadıpy yı naaxhuiñybı o tijaty ya naaxhuiñ. Huin'ıt ca' mnayyajpocycähıyb ma Dios.

¹³ Pen ji pın ma miich ajcxy ti ayo'n mııdıty, huen mııbjctzoogıxy Dios mııd yı jäy ycıxpi huidıbı ayo'n mııd. Pen miich ajcxy jotcuyc nayjıhuıyıp, huen huin'ııgıxy Dios. ¹⁴ Pen ji pın nidügtı ypıgyıı ma miich ajcxy, huoomııngıx yı' huidıbı ajcxy nigohuajc'ajtp yı mııbjcpıdıjc, jıgıx ajcxy mııbjctzoohuıpy Dios mııd je pa'mjäy ycıxpi, etz pıdägıpy hueeni aceite ma je jäy ycohuajc etz capxpaadıpy yı Huındzın Jesús yxıı. ¹⁵ Mııd co miich ajcxy mmııjpıdaaccıxy e mmııbjctzoogıxy Dios, paady ycıxpi tzögıpy yı pa'mjäy. Chi je Huındzın Dios yejcnıp mııc'ajtı oy'ajtı, etz ymecxtaayıpy yı' ypocy huidıbı anajty tı tuñ. ¹⁶ Capxpıdzım yı mbocy nidüg nidüg. Ñayñıbjctzoohuıyıgıx nidüg nidüg ma Dios, jıgıx ajcxy mdzögıpy. Pen tüg tudägypı jäy ymııbjctzooyb yı Dios cıxyjot huınıjot, madägıpy yı' mııd y'oracıón. ¹⁷ Elıas nañ tım jadu'n anajty yjothuınma'ñ mııdıty nej ııch ajtı. Janch cıxyjot huınıjot mııbjctzooy Dios ca'jıty ytüy, e ca' je' jadu'n ytuuy tugııg jımııjt ja tudujc po'. ¹⁸ Chi jadüg'oc Elıas mııbjctzoy Dios co huen tüy, chi Dios yajtuuy, e chi ya naaxhuiñ yhuındıy je jäy ajcxy ypıdägy.

¹⁹⁻²⁰ Migügtijc ajcxy, pen ji miich ajcxy nidüg ñııdıgoy ytüdıgoy ma yı Dios ytıy'ajtı, e huin'ıt tüg quëxıgıpy pın ymııgüg yajhuimbidıpy ma Dios ytıy'ajtı, nejhuıygıx miich ajcxy co pın huıdı yajhuımbıjtp ymııgüg ma Dios ytıy'ajtı, huıdıbı tı ñııdıgooy tı ytüdıgooy, tı je' anajty tüg alma yajtzögy ma yı o'cın, e tı anajty yajpocyıñhuaatztäy.

1 PEDRO

Yi Necy Huidibi San Pedro Yajnigüejsx Je Judio Mibijcpidijc

¹ Hich Pedro, Jesucristo ti xyajniñbicyich ngapxhuäcxibich yi' y'ayuc. Jada necy nyajnigüejsxyp miich Israel jäy huidibi adzinaayb xim yam jim Ponto naaxjot, jim Galacia naaxjot, jim Capadocia naaxjot, jim Asia naaxjot etz jim Bitinia naaxjot. ² Miich ajcxy migügtijc Dios Teedy ti xyhuin'ijxcixy, jayijp Dios ti nejhuüy co xyjäy'ada'ñyii ajcxy. Dios ti yajtigüiyi yi' yjihui'ñ ymic'ajt ma miich ajcxy mjot mhuiñma'ñ, huen oyjot oyhuinma'ñ myaj-tunipy ajcxy jadu'n nej Dios huinma'ñ xymoogyxy. Dios miich ajcxy ti xyhuin'ixy jigix mgapxymidohuipy Jesucristo, je huidib ñi'py teem cuj miid miich ajcxy ycixpi. Pidaaccix mhuiñma'ñ co mgapxymidohuaangixy Dios jadu'n nej jecy'ajty je Israel jäy ytuñ, je taab anajty Moisés yaj'ögy iyujc etz yajniñidicxy ajcxy nidüg nidüg je ni'py, je' anajty ajcxy ytiy'ajt'ajtipy co capxymidohuaangixy Dios. Huen Dios may'ajt oy'ajt mijcajee tunipy ma miich ajcxy, chi jotcuyc mdzináaygixipy.

Jijp'ijxcix jugy'ajtin huinixibi

³ Yi Dios, hich ajt nHuindzin Jesucristo yTeedy, huen capxpaady y'ity, miid co may'ajt oy'ajt ti tuñ miid hich ajt co ti oyduñ huinjemybi hich ajt njot nhuiñma'ñ, jëbi n'ijtim Dios yjäy. Jadachambi ooy njijp'ijxim je jugy'ajtin huinixibi, miid co Jesús yjugypijcy huinjemy ma anajty ti y'ögy. ⁴ Nañ ooy njijp'ijxim tijaty Dios xymöhuaanim jii by tzajpjoty, huidibi ca' yhuindigoy, huidibi ca' yjibicüy, etz huidibi ca' ycixy ytigoy. ⁵ Dios xycuend'adip ajcxy miid yi' ymic'ajt, ixti jiini co anajty ajcxy je m'alma nidzoocin padaangixy, co anajty je naaxhuiñ ycixy ytigoy. Mbadaangixy m'alma nidzoocin miid co ti mmijpidaaccixy Dios ytiy'ajt.

⁶ Paady miich ajcxy ooy jotcuyc'ajtcixp. Oy cham tzaachypi m'ocminajxcixy m'ocyajnajxcixy miid co jäy tzach'ijxmadza'ñ miich ajcxy mjot mhuiñma'ñ. Nigi ooy jotcuyc nayjihuiyigixy co ajcxy yi' m'alma nidzoocin pada'ñ. ⁷ Dios y'ixamyb ñejhuñhuamyb pen janch miich ajcxy cixyjt huinijot mmijpidaaccixy yi' y'ayuc. Paady miich ajcxy ayo'n tzaachypi mminajxcixy myajnajxcixy jëbi nigi myajhuaatzcixy mjot mhuiñma'ñ, tim jadu'n nej jäy yajhuaatzcixy yi' oori miid jin. Dios nigi tzocy miich ajcxy huidib yi' ytiy'ajt mijpidaaccip, ca'ydi oori. Pen tudägy miich ajcxy mhuiñma'ñ, pen ca' mhuiñma'ñytigajtcixy co tzaachypi mminajxcixy myajnajxcixy, chi capxpaady ajcxy m'idipy etz mbaadipy ajcxy jotcuyc'ajtin co anajty Jesús ñayguëxigyii jadügtecy ya naaxhuiñybi.

⁸ Oy miich ajcxy ca' ti m'ijxcixy Jesucristo, per myajmij'ajtpy ajcxy, e cham oy ca' m'ijxcixy Jesucristo, myajmij'ajtip ajcxy yi' ytiy'ajt. Co ajcxy mmijpidaaci Jesucristo ytiy'ajt, chi ajcxy ooy mnayjihuiyii nigi jotcuyc anaxy. Je jotcuyc'ajtin huidib miid Dios je' yejcp. ⁹ Paady ycixpi ti mmijpidaaccixy Jesucristo co ajcxy m'alma xyajnidzögaani.

¹⁰ Jadu'n nej Jesucristo xyajnidzögaani miich ajcxy m'alma je Dios y'ayuc najtzcapxiiybi ooy anajty jecy'ajty janejhuñhuaangixy nej Dios y'ayuc ñigüeje, e ca' ajcxy huinjihuüy, je huin'it tiempo anajty ajcxy capxhuäcxp Dios y'ayuc jadu'n nej Dios may'ajt tuna'ñ miid miich ajcxy ycixpi.

¹¹ Je Dios y'ayucnajtzcapxiiybi jecy'ajty ooy ajcxy jahuinmay, ooy ajcxy

jahuinjihuĩhuaañ nej yhuimbĩdzĩmy je ayuc huĩdibĩ ajcxy ymĩd jotjoty huĩnma'ñjoty, je ayuc huĩdibĩ Jesucristo yajmĩguejx yĩ' yjĩhui'ñ ymic'ajt, je Espĩritu Santo, jadu'n nej ajcxy najtzcapxĩy co je Cristo tzaachypĩ minaxa'ñ yajnaxa'ñ, etz co ñĩcxa'ñ jadũg'oc tzajpjoty. ¹² Dios yajnejhuĩy yĩ' y'ayucnajtzcapxĩybi co je' huĩdib ajcxy ycapxhuäcx jĩni je' ytuna'ñyĩ yjada'ñyĩ, ca' ajcxy ixa'ñ. Mĩgũgtĩc ajcxy, Dios ti yajtuunyĩ ti yajjadyĩ ma miich ajcxy je mxĩ mdiempo nej anajty je' y'ayucnajtzcapxĩybi najtzcapxĩy jecy'ajty je tĩy'ajt. E jadachambĩ jadu'n nej Dios ti yajtuñyĩ ti yajjadyĩ ti jã capxhuäcxtã ma ñch ajt nidũg'ócĩy. Je jã huĩdibĩ capxhuäcx je tĩy'ajt ymĩd anajty ajcxy je Dios yjĩhui'ñ ymic'ajt huĩdibĩ Dios anajty yajnĩguejxĩp, chooñ tzajpjoty. Ixtĩ je ángeles huĩdibĩ ajcxy tzajpjoty tzĩnaayb yjanejhuĩhua'ñ nañ jadu'n nej Dios ti yajtuñyĩ ti yajjadyĩ ma miich ajcxy, e ni ca' ajcxy nejhuĩy.

Chojcpy Dios co tudãgy ndzĩnaayĩm

¹³ Paady ycĩxp ni'ixĩ pĩdaaccĩx mjot mhunma'ñ. Huijy ycujc ajcxy mdzĩnãhuĩp. Jĩp'ijxcĩx je may'ajtĩn oy'ajtĩn huĩdibĩ Dios tunamyb mĩd miich ajcxy ycĩxpĩ co anajty Jesucristo yhuimbity ya naaxhuĩñ. ¹⁴ Capxymĩdoogĩx Dios jadu'n nej pi'c'anãg capxymĩdoogĩxy ytaj yteedy. Ca' huaad m'octundĩgógoygĩxni jadu'n nej anajty mdundĩgooygĩxy co anajty ca'ni mnejhuĩygyxĩ Dios ytĩy'ajt. ¹⁵ Oyjot oyhuĩnma'ñ ajcxy myajtunĩpy jadu'n nej Dios oyjot oyhuĩnma'ñ yajtuñ, je huĩdibĩ ti xyhuĩn'ixy ajcxy. ¹⁶ Com jadu'n ymĩñ jaybety ma Dios ñecy, jadu'n Dios mĩgapxy je' yjã: "Mĩ'idĩp ajcxy oyjot oyhuĩnma'ñ jadu'n nej ñch nm'ĩtyĩch oyjot oyhuĩnma'ñ."

¹⁷ Miich ajcxy m'ojadajtpy je Dios Teedy. Dios ca'p tzaachytuna'ñ yĩ jã ajcxy huĩn'ixpety. Hue' je' chaachytunĩpy ajcxy nidũg nidũg jadu'n nej ajcxy yhuĩnma'ñymĩdĩty, pen jĩbic-huĩnma'ñ ymĩd, chi tzaachytunĩpy ñĩgĩ. Paady ycĩxp tĩydudãgy ajcxy mdzĩnãhuĩpy. Tzĩgĩygyx Dios. ¹⁸ Je Dios canan hue' ti xyajpocyñĩhuaatzĩm co ti cojuy ñch ajt nbocy mĩd oorĩ o plata, jadu'n nej anajty nbocytuunĩm co nmĩjpĩdaacĩm n'ap ndeedy y'ayuc ytĩy'ajt huĩdibĩ ca' ytĩy'ajtĩty. ¹⁹ Hue' janchtĩy Dios ti xyajpocyñĩhuaatzĩm mĩd Cristo co y'o'cy cruudzcĩxy, e chi ñĩ'py teemy yojcy mĩd ñch ajt nbocy ycĩxpĩ. Jadu'n nej anajty Israel jã ñayajpocyñĩhuaatzĩgĩxy co yaj'ögy tũg boregĩ ung, huĩdibĩ ca' anajty ti jĩbicpi mĩdĩty, e chi ñĩ'py teemĩ cujĩ. ²⁰ Jadu'n nej Cristo y'o'cy mĩd ñch ajt nbocy ycĩxpĩ, Dios jayĩpni jadu'n yajnihuĩnmayĩy co jadu'n tuna'ñ, ca'ni anajty naaxhuĩñybi chondãgy. Jecy'ajty ca'ni anajty pĩn nejhuĩy, e jadachambĩ Dios ajt ti xyajnejhuĩyĩm. ²¹ Paady ycĩxp miich ajcxy mĩjpĩdãgy Dios. Dios yajjugypĩc huĩnjemy je Cristo co y'o'cy, e Cristo cõmay ooy ypĩdzĩmy jĩby tzajpjoty. Yajmĩ'ajtcĩx Dios etz jĩp'ijxcĩx co Dios xyajndzõgaanĩp ajcxy m'alma.

²² Ti myajhuaatzcĩxy mjot mhunma'ñ co ti mmĩjpĩdaaccĩxy Dios ytĩy'ajt. Naychójcgĩx nayjĩhuĩyĩgĩx nidũg nidũg cĩxyjot huĩnĩjot, ca' y'ametz yjot-metzĩty. ²³ Com ti Dios oyduñ miich ajcxy mjot mhunma'ñ huĩnjemybi mĩd yĩ' y'ayuc ytĩy'ajt, co ti mmĩjpĩdaaccĩxy je tĩy'ajt huĩdibĩ tudãgyĩp, je huĩdibĩ ca' ycĩxy ytĩgoy, huĩdibĩ huĩnixĩ ijtp, je tĩy'ajt huĩdibĩ jugy'ajt yejcpy. ²⁴ Jadu'n ymĩñ jaybety ma Dios y'ayuc:

Je jã ninĩcx nidĩgooyb yĩ' etz je ninĩcx y'oy'ajtĩn nidĩgooyb yĩ'. Tĩm jadu'n nej tũg pĩjy co ñĩdecy ytĩtznĩ, chi je pĩjy jadu'ñyĩ yca'ni, e chi jadu'ñyĩ je pĩjy y'oy'ajtĩn ytĩgooy.

²⁵ Dios y'ayuc ytĩy'ajt huĩnixĩ y'ity, ca' ycĩxy ytĩgooy nimĩna.

Jada je ayuc je tĩy'ajt huĩdibĩ Dios yjã ycapxhuäcxyp ma miich ajcxy.

2

¹ Paady ycixp copicy co m'ixmájtzcixipy yi jibic-huinma'n nej migüg ajcxy jibic mnigapxcixy. Ca' m'anidáaccixipy. Ca' ajcxy mnaybidägiiyb jadu'n nej jihuüy ooy m'oyjäyity, e ca' yjanchity. Ca' mmigüg ajcxy ti myajca'oy'ixipy. Ca' ajcxy m'idigoyipy mgapxtigoyipy. ² Jadu'n nej yi ma'xungdijc tzocy chidz, nañ tim jadu'n miich ajcxy tzojccixy jot'ajtcixy Dios y'ayuc ytiy'ajt, jigix jëbi ca'pxy yi mhuinma'n m'idipy ajcxy miid je ixpijcin huidibi Dios xymooygixp, e chi ajcxy m'alma paadipy nidzoocin. ³ Nidzögip miich ajcxy m'alma, peni janch ti mmijpidaaccixy je Huindzin Jesucristo y'ayuc, etz ti mnejhuüygixy nej Dios may'ajt oy'ajt ti tuñ miid miich ajcxy ycixpi.

Cristo je tügpajcpi jaccopicyip

⁴⁻⁵ Yajmij'ajtcix yi Huindzin Jesucristo. Dios ti yhuin'ixyii jëbi yHuindzin'aty ma naaxhuiñjyay etz ooy tzocy. Yi naaxhuiñjyay ca' ajcxy ti tuñcuend, tim jadu'n nipaady nej tüg tzaa huidibi pojtzpidijc ninigoob ca' yajtuna'n ma yi tzaadijc ycojy. Yajmij'ajtcix miich ajcxy je Huindzin Jesucristo. Dios yaj'oyi huamyb miid miich ajcxy tügpicy jäy huidibi yi' yjäy'adaanip, huidibi ojadadaangixp Dios, huidibi Dios ytung tunaangixp. ⁶ Jadu'n yjaybetyity ma Dios ylibro, Dios jadu'n ymina'n:

Jim ma Israel jäy nbidägibich tüg mij'ane'mbi huidibi ti nhuin'ixyich, huidibi ooy ndzocyich, e pinjaty je' mijpidacp ooy njäygidägibich. Je mij'ame'mbi jadu'n je' nipaady nej tüg tzaa oybi huidibi tighuamb ma tijctaatz co tzaadijc ycojy.

⁷ Miich ajcxy huidibi mijpidacp Jesús, miid miich ajcxy je mij'ame'mbi ooy je' ymijity yjanchity. Per yi' ajcxy ca' mijpidägy Jesús, je' yi' ajcxy ycuydumyby nej ymina'n ma jaybetyity:

Pinjaty ca' capxymidohua'n Dios, ca' ajcxy ixaangixy je Cristo, e jadu'n ajcxy nipaady nej pojtzpidijc huidibi ca' yajtunaangixy tüg tzaa oybi co tzaadijc cojciy. Yi Cristo yi' je' je' mij'ane'mbi huidibi ane'mdähuamb tüg'óciy.

⁸ Nañ jadu'n yi' ajcxy huidibi ca' mijpidägy Jesús cuydumyby nej ymina'n ma yjaybetyity:

Jadu'n je Cristo nipaady nej tüg tzaa ma jäy ajcxy yconejpcixy etz ycidaagixy. Je jäy ajcxy huidibi ca' mijpidägy Jesús, jadu'n nipaady nej jihuüy yconejpcixy ma tüg tzaa co ajcxy ca' tungixy cuendi Jesús y'ayuc, paady ycixpi padaangixy tzaachypi miid ypocy ycixpi, jadu'n nej Dios ti yajcöducy.

Je huidibi Dios yjäy'adyii

⁹ Miich ajcxy huidibi yajmij'ajtp Jesucristo, ca' miich ajcxy mjadu'nity nej yi' ajcxy huidibi ca'capxymidoy Dios. Dios miich ajcxy ti xyhuin'ixcixy. Je rey Jesús je' miich ajcxy ytung mduunip. Oyjot oyhuinma'n miich ajcxy myajtumyby. Dios miich ajcxy xyjäy'ajtip. Miich ajcxy je' xypaat mnidiy'ajt'adipy jadu'n nej Dios ti xyajpidzimgixy ma anajty mdundigooygixy, e ti xya-jhuinjihuüygixy je' ytiy'ajt nej jëb huaad mguydungixy. Jadu'n nipaady nej jihuüy Dios ti xyajtzoongixy agootztuuyb, e ti xyajtigiiygixy ma yticxy yjajy.

¹⁰ Co anajty ca'ni mmijpidaaccixy Jesucristo, ca' anajty Dios xytungixy cuendi. Cham co ti mmijpidaaccixy Jesucristo, Dios ti xypa'ayoogixy. Dios miich ajcxy xyjäy'ajtp cham.

Yajtungix Dios y'ayuc ma mdzinaayin

¹¹ Migügtijc ajcxy huidibi ooy ndzocy njihuüyich, jada nyajnimaaaygixyp, jadu'n nej tüg adzinaaybi huidibi ca' chinäy ma ycajp, huidibi nihudijtp, ca' tüg it mdzinaaygixy, copicy co ca' mnijot'adipy ajcxy yi jibic-huinma'n,

jadu'n nej je jäy ajcxy ma m'adzinaaygixy nijot'ajtcixy jibic-huinma'ñ. Je jibic-huinma'ñ ca' ñaygodigiiygixy miid oyhuinma'ñ. ¹² Tiydudägy mdzinähuiipy ajcxy, yajtúngix oyhuinma'ñ miid je jäy ajcxy ma miich ajcxy m'adzinaaygixy, je jäy ajcxy huidibi ca' nejhuuygixy Dios ytiy'ajt. Oy ajcxy ca' xy'ixaangixy etz jibic xyñigapxcixy xyñi'ojiiygixy, miid co oyjäy'ajtin mdungixyp, chi ajcxy jäygidägipy, etz miich yi' ajcxy xycapxpátcixipy ma Dios, mina anajty Dios ñinmiñyii ajcxy.

¹³ Miid je Huindzin Jesucristo ycixpi, capxymidoogixy tüg'óciy gobierno tungmiidpi etz cajp tungmiidpi y'ane'min ycötujcin, nañ capxymidoogixy jadu'n nej je mij'ane'mbi y'ane'my. ¹⁴ Nañ capxymidoogix tungmiidpi ajcxy huidibi je mij'ane'mbi yquejxyp jigix tzaachytunipy je' ajcxy huidibi tundigooyb etz capxpaadipy je' ajcxy huidi oyhuinma'ñ ytumyb. ¹⁵ Dios chojcyp co tiydudägy mdzináaygixipy, jigix jëbi je jäy ajcxy huidibi ca' huinjihuuygixy Dios ytiy'ajt, huidibi tzuu huinma'ñ miid, ca' ajcxy mihuinma'ñybaady nej jibic xyñigapxip.

¹⁶ Tzinaaygix jadu'n nej jäy chinäy huidibi cuydumb Dios ytiy'ajt, huidibi ti ixmach yi ayuc tiy'ajt huidibi ca' ytiyity. Pen mmidundigooyb ajcxy tunmiidpi y'ane'min ycötujcin, ca' huaad mnaybidáacigixy jadu'n nej jihuiy Dios xylugarmooygixy jigix jëbi mdundigooygixy. Copicy mdzinähuiipy ajcxy jadu'n nej Dios ytumbi huidibi oy tumb. ¹⁷ Migüg'adii ajcxy tüg'óciy jäy. Naychójcigix nayjihuiyigix nidüg nidüg huidijaty yajmij'ajtp Dios. Yajmij'ajtcix Dios. Capxymidoogix yi mij'ane'mbi.

Jadu'n nej Cristo tzaachypi yajnajx

¹⁸ Tumbidijc ajcxy, iimidoogix capxymidoogix mhuindzindijc. Pen oyjäy yi mhuindzin huidibi yung naxy yjot yhuinma'ñ miidity, o pen ahua'njäy jibicjäy, ca' yñejity, capxymidoogix. ¹⁹ Yjäygidägipy Dios pen mmecxtujctaaygixyp nej jäy ajcxy xychaachtungixy miid co oyhuinma'ñ miich ajcxy mmidity. ²⁰ Pen ti anajty mdundigooygixy, e paady anajty myajtzaachytungixy, ca' pin xycömáaygixipy xycapxpáadygixipy, oy ti mjamecxtujctaaygixy huidijaty tzaachypi. Pen ooy mdungixy etz tzaachypi mbaatcixy, chi janchtiy Dios jäygidägipy nej mmimecxtujctaaygixy. ²¹ Dios chojcyp co mmecxtujctáaygixipy je tzaachypi huidibi mminajxyp myajnajxcixyp miid co oybi mdungixy. Paady ycixpi je Cristo tzaachypi ayo'n minajxy yajnajxy miid ich ajt ycixpi, e yejc ijxpejt jadu'n nej jëbi huaad mminajxcixy myajnajxcixy tzaachypi ayo'n, nañ nej jëbi huaad mbanicxcixy mbayöygixy yi' y'ijxpejt. ²² Je Cristo ca' je' ma ytundigooy, e nañ ca' pin huin'ññ. ²³⁻²⁴ Je Cristo co jäy ajcxy y'oji, ca' je' y'adzouhuimbijty; e co jäy ajcxy chaachytuuni, ca' mijotmäthuimbijty je jäy ajcxy, nigü Dios yajpuhuaniiy. Com Dios je' paatip nej chaachytuna'ñ huidi ajcxy tundigooyb. Je Cristo ci'm yajnicx ich ajt ndzaachypi co y'o'cy cruudzcixy. E miid co jadu'n y'o'cy cruudzcixy miid ajt nbocy ycixpi, chi jëbi n'ixmajzim jibic-huinma'ñ etz tudägy jëbi ndzinaayim. Miid co Cristo je tzaachypi minajxy yajnajxy miid ich ajt nbocy ycixpi, paady nidzoocim ajt n'alma. ²⁵ Miich ajcxy jecy'ajt mnidigooyb mdüdigoyb anajty ajcxy ma Dios, mgi'mhuinma'ñ anajty ajcxy myajtumyb nidüg nidüg, jadu'n nej jäy yborregi ñidigoy ytüdigoy ma yuugjot. Cham miich ajcxy ti mni-jothuimbijtcixy Dios, ti ajcxy mhuinma'ñyech ti mmijpidaaccixy Jesucristo je huidibi xycuend'ajtp ajcxy.

3

Nej huaad chinaaygixy pinjaty ti pijccixy

1-2 Jadu'n nej tumbidijc capxymidooy yhuindzin, nañ tim jadu'n miich ajcxy töxyjäydijc capxymidoogixy mñäy. Pen mñäy ca' capxymidooy Dios, ca' mijpidäga'ñ Jesucristo, miid co miich oyjot oyhuinma'ñ myajtunipy miid yi', ycadimjetyity huin'it mñäy yhuinma'ñymedzip etz mijpidägiipy Jesucristo, co y'ixipy nej miich mmiidity tudägy'ajtin. ³ Töxyjäydijc ajcxy, ca' mnaygömayiyb miid mhuit mxojx oyjatpyi tzoujatypi, miid oori cijiitz etz oori taatztiy, miid co mgöhuay mdzachcüdägy miid cüd oyjatyp. ⁴ Hue' janchtiy jäy miich ajcxy xycömayip miid co oyjot oyhuinma'ñ anajty myajtungixy, miid co yung naxy mjot mhuinma'ñ ajcxy mmiidity. Co jadu'n mdungixipy jada je' oy jäygidaacni ma Dios huinixii. Yi mhuit yi mxojx etz oori taatztiy cixip tigoyip yi'. ⁵ Nañ tim jadu'n anajty jecy'ajty je töxyjäydijc huidibi anajty ajcxy cömay ijtp, yajtuuñ anajty ajcxy oyjot oyhuinma'ñ, ymijpidacyp anajty ajcxy Dios, nañ ycapxymidooyb anajty ajcxy ñäy. ⁶ Jadu'n nej Sara capxymidooy Abraham. Sara xiigoyäxy Abraham: "Ich nhuindzin." Pen myajtumyib miich ajcxy oyjot oyhuinma'ñ jadu'n nej Sara, jadu'n miich ajcxy anajty nej jihuüy Sara ajcxy xy'ung'adyii, pen ooybi mdunipy ajcxy, ca' ti ajcxy mdzigihuipy.

⁷ Nañ jadu'n miich ajcxy yëydijctijc, yajtungix pa'ayo'n miid mdöxyijc, yajmij'ajtcix. Com jac mic miich ajcxy ca'ydi yi töxyjäydijc. Dios may'ajt ti tuñ tú'ciy miid miich ajcxy, paady ycixpi copicy yajxon naymüddzináayigix jigix Dios cuendipigipy etz xymöhuipy tijaty ajcxy myajmibijctzooyb.

Co pinjaty xymidundigooy, ca' myaj'ahuimbidipy

⁸ Jada ayuc cham njacyajnimaydaayb nidüg'óciy miich ajcxy. Tú'ciy mjot mhuinma'ñ mi'ijtcix, naymigüg'ájtigix yajxon, naychójcigix nayjihuiiyigix nidüg nidüg, nayba'ayouhuigix nidüg nidüg, pidaaccix yung naxy mjot mhuinma'ñ. ⁹ Co ajcxy migüg xymidundigoyipy, ca' myaj'ahuimbidipy jadu'n nej anajty ti xytuñ. Co ajcxy migüg xyñi'ojihuipy, ca' myaj'ahuimbidipy jadu'n nej anajty ti xyñi'ojiy. Nigi nibijctzohui' ma Dios miid yi' ajcxy ycixpi, nigi mi'oyjäy'at mmigüg. Huin'it nigi Dios xyconuucxip. ¹⁰ Com jiiyby ymiñ jaybety ma Dios ñecy:

Pinjaty jotcuyc tzinähuamb e yajnaxa'ñ xii tiempo agujc jotcuyc, nay'ahuijtzigiib ca'ydi y'idigooy ycapxtigooy, ca'ydi y'anidägy.

¹¹ Huen jihuägy ma je jibicpi e huen oyjäy'ajtin tuñ. Huen ixmach tüg'óciy tzipcapxy, ca' tzipcapxy ixtähuipy.

¹² Je Huindzin Dios ycuend'ajtpy yi' je jäy huidibi tiydudägy tzinaayb etz ypubejtcixyp ypudigiygixyp migügtijc co tijaty mibijctzoy. Dios ymijotma'tpy je jäy ajcxy huidibi jibic-huinma'ñ tumb.

¹³ Pen mdumyib oyjot oyhuinma'ñ ajcxy, huin'it ca' pin ajcxy xymijotmädiipy. ¹⁴ Co oyjot oyhuinma'ñ myajtunipy ajcxy e huin'it jäy xychaachtungixy, huin'it Dios xyconuucxip ajcxy, e ca' mdzigüygixipy, ni ca' mhuinma'ñydidigóoygixipy. ¹⁵ Mijpidaaccix yi Jesucristo ich ajt nhuindzin Dios cixyot huinijot. Pen ji jäy xy'amidoogixy: ¿Ti co mdzachmijpidaaccixy Jesucristo? Tiydudägy m'adzouhuipy miid yung'ajt nax'ajt jadu'n nej mijp'ijxcixy co Jesucristo xyajnidzögaani ajcxy yi m'alma. ¹⁶ Ca' mgapxipy ajcxy je ayuc huidibi xyajtzo'yduunip. Pen jäy ajcxy xymi'idigooygixp xymigapxtigooygixp, chi ajcxy jihuihuamyb tzo'ydu'n miid co ca' yjanchity nej ajcxy ymina'ñ com oybi anajty ti mdungixy. ¹⁷ Pen Dios miich ajcxy jadu'n xyajnijot'ajt co tzaachypi mminájxcixipy myajnáxcixipy, jac'oy co tzaachypi mminájxcixipy myajnáxcixipy miid yi m'oyjäy'ajtin ycixpi, e ca' anajty tzaachypi mminájxcixy myajnáxcixy miid co anajty ti mdundigooygixy.

¹⁸ Je Cristo nañ jadu'n tzaachypi minajxy yajnaxxy co y'o'cy cruudzcixy miid jäy ajcxy ypocy ycixpi. Oy je' anajty ca' tibocy miidity, chi je' ti codinäy je jäy ajcxy ypocy, e jadu'n ñch ajt ti naymi'oyñiyim miidi Dios. Oy je Cristo ñinix y'o'cy, per je' y'alma ca' je' y'o'cy, jugypijcy je' jadügtecy miid jemybi ninix. ¹⁹ Huin'it co Cristo y'o'cy, chi je' y'alma ñicxy, e capxhuäcxy yi' y'ayuc ma jäy y'alma ajcxy huidibi jibictuuyb ijtp. ²⁰ Je jäy ajcxy je' jiby y'alma ijtp jibictuuby huidibi anajty ca' capxymidoy Dios. Je taab Noé yajcojy je mij barco, ooy Dios ajcxy jecy ymimexujci, huen tijy cayjothuimbijty ajcxy. Jeyi niductujc je jäy choocy ma je mijtuu je mijñigom. Je' co je jacjadyii ca' ajcxy yjothuimbijty. ²¹ Jadu'n nej je nidujtucjpc ajcxy mijpidacy Dios y'ayuc, e chi ajcxy choocy, nañ tim jadu'n ñch ajt co nnibejtim je' ñch ajt ndiy'ajt'ajtim co nmijpidaacim Jesucristo je huidibi co y'o'cy jugypijc miid jemybi ninix, etz ti xyajhuaatzim njot nhuinma'ñ jigix ooy oy nayjihuñiyim, etz nañ jadügtecy co anajty n'o'cim xyajjugypijcim miid jemybi ninix. Co nnibejtim, je' je' je' tiy'ajt co Dios ti xyajhuaatzim njot nhuinma'ñ. ²² Je Cristo ti je' ñicxy tzajpjoty. Jiby je' cham y'ity mij'ane'mbi ma Dios, yi' je' ane'mb je angeles ajcxy huidi tzajpjoty tungmiid etz huidijaty mic'ajt miid tzajpjoty.

4

Yajtungix je mic'ajt huidibi Dios ti xymoogyixy

¹ Je Cristo ayo'n tzaachypi minajx yajnaxx co yhuidijty ya naaxhuiñybi, e chi yajtuuñ oyjot oyhuinma'ñ miid jäy ajcxy ycixpi. Paady ycixpi copicy miich ajcxy myajtunipy oyjot oyhuinma'ñ miid migügtijc jadu'n nej Cristo yajtuuñ. Pen miich ajcxy mminajxyp myajnaxyp tzaachypi miid co oyjot oyhuinma'ñ myajtuñ, chi ca' mjacnijot'ajtip ajcxy jibic-huinma'ñ. ² Jadu'n nej ajcxy mjactzinähua'ñ mjacjugy'ada'ñ, ca' huaad mjacnijot'ajtcixy je jibic-huinma'ñ. Hue' janchtiy mdunipy ajcxy jadu'n nej Dios tzocy. ³ Jecy'ajty co anajty ca'ni mnejhuñygyixy Jesucristo ytiy'ajt, jibic-huinma'ñ anajty ajcxy myajtumyb ma mdzinaayin mjugy'ajtin, jadu'n nej jäy ajcxy jacjadyii huidibi ca'ni nejhuñygyixy Dios ytiy'ajt. Chi anajty myajtungixy canaagnax je jibic-huinma'ñ, ooy ajcxy mnijot'ajtcixy maynax jibic-huinma'ñ. Ooy anajty anaxy mdzach'üccixy vino, huin'it anajty ooy ajcxy ymügyii. Ooy anajty mnixondaaccixy coodz huididi, huin'it anajty ooy m'uuccixy anaxy. Ooy mnijot'ajtcixy xii, ooy anajty m'ojadajtcixy tzaadzech quipychech huidibi Dios ca' jäygidägy. ⁴ Paady ycixpi je jäy ajcxy huidibi ca' nejhuñygyixy Dios ytiy'ajt, ca' ajcxy jäygidägy co ca' miich ajcxy cham jadu'n m'idich jadu'n nej yi' ajcxy y'idich, chi ajcxy jibic xyñigapxcixy xyñi'ojñygyixy. ⁵ Ca' mdungixy cuendi yi' ajcxy, com Dios paatip nej ytiyduna'ñ ajcxy. Je Dios je' tiydunamb nidüg'óciy jäy ajcxy huidibi cham jugy'ajtp, etz tiibi y'öccixy. ⁶ Paady ycixpi ti yajnimäy Jesucristo ytiy'ajt je jäy tiibi y'öccixy jigix yajtiydunipy ajcxy miid Dios ytiy'ajt jadu'n nej yajtiyduna'ñ yi' ajcxy huidibi jacjugy'ajtp cham. Jëbi huaad ajcxy yjugypijccixy jadügtecy etz y'idipy ajcxy jadu'n nej Dios y'ity.

⁷ Ti ytimyhuingoni je xii je tiempo mina ycixaani ytigoyaani tüg'óciy tijaty ya naaxhuiñybi. Paady ycixp tzocy co tiydudägy etz huijycujc mdzinaygixipy, etz tzocy co mjac'ojadadipy mjacmibijctzohuipy ajcxy Dios. ⁸ Ooy ycopicyty co jacnaychójcigix jacnayjihuñygyix nidüg nidüg. Miid co mnaychójcigixy, paady ycixpi jëbi mnayméecxigixy. ⁹ Naymi'oyjäy'ajtigix nidüg nidüg agujc jotcujc, ca' y'ametz yjotmetzity. ¹⁰ Yajtungix miid je migügtijc jadu'n nej Dios xymoogyixy ixpijcin nidüg nidüg. Naybubéjtigix naybudigñygyix miñ xyipy jadu'n nej jäy ajcxy huidibi yajxon Dios ytiy'ajt padungixp. ¹¹ Pen Dios ti xymoogyixy ixpijcin jigix jëbi capxhuäcxy yi' y'ayuc, yajxon Dios

y'ayuc mgapxhuäcxip. Pen miich xypaat puñgii jëdzigii, yajxon mduniy aycxy jadu'n nej Dios huinma'ñ ti xymooygixy. Co yajxon Dios ytiy'ajt mguyduuniy, huin'it Dios cömaya'ñ miich aycxy, müd co ti mmijpidaaccixy Jesucristo. Je Jesucristo je' cömaya'idip etz ane'mip huinixii huin'itempo.

Mimecxtujccixy tzaachypi ayo'n

¹² Migügtijc aycxy huidibi ooy ndzocy njihuüyich, ca' ooy mhuinmay'ahuidijtcixy co jäy xy'ixhuuidijtcixy xypahuidijtcixy, co jäy xychaachytunaangixy jigix jëbi ñiguëxigipy pen janch mmibijccixy Jesucristo. ¹³ Ca' aycxy mdajipy mmayipy, jotcuyc aycxy mnayjihuihuüyib jigix jëbi nañ jadu'n tzaachypi mminajxcixy myajnajxcixy nej Cristo minajxy yajnajxy tzaachypi. Co anajty jadügtecy Jesucristo ñayguëxigyii ya naaxhuiñ müd ymic'ajt y'oy'ajt, jëbi aycxy jotcuyc mnayjihuihuüyib. ¹⁴ Pen xymi'idigooyb xymigapxtigooyb jäy aycxy, müd co miich aycxy ti mmijpidaaccixy Jesucristo, jotcuyc mnayjihuihuüyipy, müd co miich aycxy müd je Dios yjihuiñ etz Dios ymic'ajt ma mjot mhuinma'ñ. ¹⁵ Pen nidüg miich aycxy ayo'n tzaachypi mbaatcixy, oy ca' anajty ti mjäyyaj'öccixy, oy anajty ca' ti mmeetzcixy, oy anajty ca' ti mdundigooygixy, oy anajty ca' ti mnaybidáacigixy ma huingjäy ti ytundigooy, ¹⁶ pen miich aycxy tzaachypi mminajxyp myajnajxyp müd co ti mmijpidaaccixy Jesucristo, ca' ti tzo'ydu'n mjihuühuipy, ñigi Jesucristo cömaya'idipy.

¹⁷ Ti xii tiempo tim paatni mina Dios tiyduna'ñ je jäy aycxy huidibi cuydumb je' ytiy'ajt. Pen Dios ich ajt huidi nmibijcim xtytyduunim e nbaatim hueeni tzaachypi, ñigi tzaachypi padaangixy aycxy huidibi ca' mijpidaaccixy Dios. ¹⁸ Pen je jäy huidibi oyjot oyhuinma'ñ müd mic tzaach padaangixy je' y'alma nidzoocin, çti jada ytunaangixy pinjaty jibic-huinma'ñ müd, pinjaty pocytungix? ¹⁹ Pen tzaachypi mminajxyp myajnajxyp aycxy müd co Dios jadu'n chojcyp, ca' aycxy mjotmetzcühuipy, ñigi aycxy panixcix payöygix oyhuinma'ñ, ñigi cixy jot huinjot mijpidägipy aycxy Dios; com yi' miich aycxy xyajcoj, e yi' xycuend'ajtcixp; com Dios yi' je' tudägy etz ñidinaayb je' y'ayuc.

5

Pedro capxhuijp je mibijpidijc

¹ Jada ich miich aycxy yajnimayyb huidi ni gohuajc'ajtp je mibijcpidijc, ich nañ jadu'n nigohuajc'ajtpyich mibijcpidijc. Ich n'ixyich co je Cristo ayo'n tzaachypi minajxy yajnajxy. Nañ jadu'n ich yi' nmüd'idaamybich jadüg'oc co anajty ymiñ ya naaxhuiñ müd y'oy'ajtin ymij'ajtin. ² Jada ich miich aycxy nyajnimayyb: yaj'ixpijccix etz cuend'ajtcix Dios yjäy agujc jotcuyc. Ca' myaj'ixpigipy aycxy ametz jotmetz, cuend'ajtcix Dios yjäy, tim jadu'n nej jäy ycöbixy cuend'aty. Ca' meeñgixy myaj'ixpigipy aycxy. Müd oyjot oyhuinma'ñ myaj'ixpijccixy. ³ Ca' adzip ahua'n m'ane'mipy Dios yjäy. Hue' janchtiy ixpejt oybi yejccix. Cuydungix Dios ytiy'ajt. ⁴ Co anajty Jesucristo, je huidi ni huindzin'ajttaayb tüg'óciy, ñayguëxigyii ya naaxhuiñ jadüg'oc, chi cömaya' miich aycxy mbidzimipy. Tim jadu'n nej jäy aycxy co y'iyiygixy e co ymadaaccixy, chi cömaya' ypidzim aycxy. Miich aycxy cömaya' nañ jadu'n m'idipy huinixii.

⁵ Myajmij'adipy anäctijc aycxy, je' aycxy huidi ni gohuajc'ajtp je mibijcpidijc. Ooy ycopicyity co nidüg'óciy miich aycxy mnayyajmij'ajtigixipy miñ xyipy müd oyjot oyhuinma'ñ. "Dios ca' je' jäygidägy pinjaty amij agix jäy'ajtigixy. Dios ypubejtyp müd y'oyjot pinjaty yung naxy yjot yhuinma'ñ müd." ⁶ Mgapxcöbigipy aycxy tiydudägy Dios, je mij'ane'mbi, chi Dios

xycömayipy mina anajty. ⁷ Mibijctzougix Dios müd tüg'óciy tijaty jotmay ajcxy müd'ajtyp, chi jëbi Dios xypubedipy xypudigihuiipy ajcxy.

⁸ Huijycujc m'idipy ajcxy. Nixi' m'idipy ajcxy. Com je mujcu' huídibi xymüdzip'ajtim, ooy je' xy'ix'ijxim xypa'ijxim. Hue' xya-jhuinma'nydigoyaanim, tim jadu'n nej je caa co ixtay ti chüdaamyb.

⁹ Huindina' jiptina' ajcxy je mujcu'. Yi jacjadyii jäy huídibi mijpidaaccixy Jesucristo, nañ yminajxcixyp yajnajxcixyp tzaachypi nañ jadu'n. ¹⁰ Co anajty ajcxy hueeni tzaachypi ti m'ocyajnaaxy, huin'it Dios xyaj'oyiipy ajcxy yi m jot yi mhuinma'ñ, xyajmibigip ajcxy yi' ytiy'ajt, xyajjotmicpigip ajcxy. Com Dios yi' je' huídibi may'ajt ti tuñ mijcajee müd nidüg'óciy jäy ajcxy. Yi' je' huídibi ti yaj'oyiy nej jëbi cömay huinixii n'ijtim müd Jesucristo jii by tzajpjoty. ¹¹ Huen Dios y'oy'ajtin etz ymij'ajtin idipy huinixii.

Capxpooxin yajnaxp

¹² Jada necy nyajnigüeexy ajcxy müd Silvano ich ajt nmigüg huídibi ndi-jpyich co ooy yajmij'aty Jesucristo. Hueeni jada ayuc huídibi nyajnijayiyb, nañ ti nbidägyich necyjoty capxhuijin etz ti nbidägyich necyjoty yi Dios ytiy'ajt tudägyyp, nej Dios may'ajt oy'ajt tuuñ müd miich ajcxy ycixpi. Mijpidaaccix nigi Dios ytiy'ajt, ca'ydi mhuinma'nydigoogyixy.

¹³ Je jäy huídibi ya Babilonia huídibi ajcxy yajmij 'ajtcixp Jesucristo, je jäy ajcxy huídibi Dios ti huin'ixy, xyajnigüeexp ajcxy capxpooxin. Nañ jadu'n Marcos ich nmigüg, je huídibi njihuüyibich nej jihuüy ngi'm'ung'adyiijich xyajnigüeexp capxpooxin nañ jadu'n. ¹⁴ Naygapxpóocxigix xic xon nidüg nidüg miñ xyipy. Je' je' je tiy'ajt co mnaychójcigixy mnayjihuiiyigixy miñ xyipy.

Jotcujc mnayjihuihuüyib ajcxy nidüg'óciy huídib yajmij'ajtp Jesucristo. Amén.

2 PEDRO

Yi Mimetzpi Neczy Huidibi San Pedro Yajnigujx Yi Mibijcpidijc

¹ Hich Simón Pedro, tumbich ma Jesucristo ytung. Yi' xy'apóstol'ajtpich etz ngapxhuäcxpyich yi' y'ayuc. Cham hich miich ajcxy jada neczy nyajnijayhygixy huidibi ajcxy ti mbaatcixy mibijcin janch oybi, tim jadu'n nej hich ajcxy ti nbáatcixyich mibijcin janch oybi. Hich ajt nDios je Jesucristo huidibi xya-jnidzoocim ajt n'alma tudägy je', e tudägy ytuñ muid hich ajt nidüg'óciy. ² Huen Dios mijmay'ajt tunipy muid miich ajcxy, etz jotcuyc'ajtin xymöhuipy mijcajee, muid co tiy'ajt ti mbaatcixy ma Dios etz ma je Jesús hich ajt nHuindzin.

Je mibijcpidijc chinaayin jugy'ajtin

³ Dios muid je' ymij'ajt ti xymooyim tüg'óciy huidibi nyajmayjajtim ma ajt njugy'ajtin, nej huaad nguyduunim yi' ytiy'ajt etz nej yi' huaad nyajmij'ajtim. Dios jadu'n mijmay'ajt tuun muid hich ajt ycixpi co ti xyajnejhuuyim Jesucristo y'ayuc ytiy'ajt. Je Jesucristo ti xyhuin'ijxim jigix jébi nmuid'ajtim yi' ymij'ajtin y'oy'ajtin, etz jigix jébi nduunim ojjäy'ajtin nej Jesucristo tuuñ.

⁴ Dios ti xymooyim huidibi janch oydi'cni e janch copicyip jigix jébi miich ajcxy mbaatcixy Dios yjihu'iñ ymic'ajt huidibi xyajtzinaaygixy muid huadz jot huinma'ñ, etz jigix jébi muid jada ycixpi tibi xyaj'ahuanhyim, miich ajcxy mijjpyöyduutcixy je jibicpi huidibi naaxhuiñyäjy ajcxy ñijot'ajtcixyp. ⁵⁻⁷ Com Dios muid ymic'ajt ti xymooyim huidibi nyajmayjajtim, paady ycixp miich ajcxy naymic'ijxigixy co ajcxy mmibijcin mjacyajmijtigihyigixipy tudägy'ajtin; e muid mdudägy'ajtin mjacyajmijtigihyigixipy ajcxy Dios y'ixpijin; e muid je Dios y'ixpijin mjacyajmijtigihyigixipy yi' Dios yjihu'iñ ymic'ajt ma ajcxy mjot mhuinma'ñ huidibi muid mmimadägyipy ajcxy yi' jibicjot jibic-huinma'ñ; e muid je mic'ajt ma ajcxy mjot mhuinma'ñ jacyajmijtigihuipy ajcxy mecxtujcin; e muid je mecxtujcin mnejhuuyigixipy nej jéb huaad myajmij'ajtcixy etz mdzigihyigixy Dios; e muid je mecxtujcin mjacyajmijtigihyigixipy je tzojin je jihuuyin muid migügtijc; e nañ mijtigihuipy nañ jadu'n je mibijcin nej jéb huaad Dios myajmij'ajtcixy etz nej jéb huaad cixyot huinjot mjacyajtungixy ojjäy'ajtin.

⁸ Pen ma miich ajcxy mdzinaayin mjugy'ajtin yajpattäy e ymijiy ymayiy, yi' mjugy'ajt ajcxy ca' yi' ñaadigi'aty; nañ ca' anajty ajcxy naadigi' ti mmibijccixy hich ajt nHuindzin Jesucristo, ti mnejhuuyigixy yi' y'ayuc ytiy'ajt. ⁹ Pin jada ca' capxymidooy tüg'óciy jada yaabi capxhuijin ma yjugy'ajtin, jadu'n yi' nipaady nej tüg huiintzpi o huidibi y'ijxin con, ti jäydigoy co Jesucristo ti yajpocyñhuaatzp. ¹⁰ Paady ycixp miich ajcxy migügtijc, naymic'ijxigixy tungix tüg'óciy jada jigix mnejhuihuipy ajcxy tiydudägy co Dios ti xyajmibijccixy e ti xyhuin'ijxcixy. Pidaaccix mhuinma'ñ co jada tiy'ajt huen copicy, huen tictztigiy ma miich ajcxy mjugy'ajtin. E pen mdumyb ajcxy jadu'n, nimina mgapocycägixipy. ¹¹ E jadu'n miich ajcxy myajmöhuyipy tiydudägy tigiydac mijpi ma hich ajt nHuindzin Jesucristo y'ane'my, je huidibi xyajnidzoocim ajt n'alma. E yi' y'ane'min ca' ycixipy ytiyopy nimina.

¹² Paady ycixp hich miich ajcxy jatymy yajjäymejtzcoodaangixy jada tiy'ajt. Oy miich ajcxy jada tiy'ajt mjajajtcixy mjanejhuuyigixy, e tudägy ajcxy mmibijccixy etz mmi'ijtcixy je tiy'ajt huidibi miich ajcxy cham muid. ¹³ Minaambich co yjanchity nami njactzinaayñich co hich miich

ajcxy nmöhuipy capxhuijn. ¹⁴ Hich ajt nHuindzin Jesucristo ti xyajne-jhuüyich co tzojc n'ixmadzipyich jada njugy'ajtin (n'ögibich). ¹⁵ Paady ycixp naymic'ixyijich mictägy ma miich ajcxy co ngapxhuijicy jigix co anajty n'ögyich mjäymetziiyb ajcxy tüg'óciy jada tiy'ajt.

Yi' ajcxy huídibi y'ijxy je Cristo ymij'ajtin y'oy'ajtin

¹⁶ Hich miich ajcxy ti nyaj'ixpicy je tiy'ajt maabi nHuindzin Jesucristo, jadu'n nej Dios ymij'ajt müdity, e jadu'n nej je' yhuimbidañ jadüg'oc ya naaxhuiñ. E ca' hich ajcxy nyaj'ixpicy nigoo'ayuc anii'ayuc huídibi ci'm ti ngojyich ti nmacxyich. Müd hich ngi'mhuin ti n'ijxcixyich je Huindzin Jesús ymij'ajtin. ¹⁷ N'ijx hich ajcxy co je Dios Teedy mooy ajt nHuindzin Jesucristo oy'ajt etz mij'ajt. E nañ nmidooyich ajcxy ayuc choñ ma je oybi Dios y'it, xyñimaayi: “Jada je' hich n'ung huídibi ooy ndzocyich njihuüyich, e ooy jotcuyc nayjihuiyijich müd yi' ycixpi.” ¹⁸ Hich ajcxy nañ jadu'n ci'm ti nmidóogixyich je ayuc huídibi anajty tzomb tzajpjoty. Jim hich ajcxy anajty quipxyi müd je Huindzin Jesús ma je amay gop.

¹⁹ Nañ jadu'n nmüd'ajtim je ayuc jac'oybi jactiiybi. Je' je' je tiy'ajt je ayuc huídibi ajcxy yjay je Dios y'ayucnajtzcaxiiybi jecy'ajty. Oy miich ajcxy oybi mduñ co m'amidoo'ijtcixy je oybi tiy'ajt maabi Jesucristo huídibi jadu'n nipaady nej tüg'jin tixcp agootztuum etz jadu'n nipaady nej je xii co yxii'miydäy, etz jadu'n nipaady nej je mijmadza' jayhuixtujcp co ypidzimy. Jada tiy'ajt xycodiixcip ajcxy mjot mhuinma'ñ. ²⁰ Cuendtungix miich ajcxy jada: tüg'óciy je tiy'ajt, huídibi Dios ytiy'ajtmüdp yejc huídibi ijtp jaybety ma Dios ylibro, ca' huaad pin yajniagejip müd yci'mhuinma'ñ. ²¹ Com je Dios y'ayucnajtzcaxiiybi camina je' ajcxy ayuccapxhuäcxy müd yci'mdzojc in yci'mhuinma'ñ. Dios anajty ajcxy huin'ixyip jëbi ayuccapxhuäcxy müd Dios ycixpi com je Espíritu Santo anajty ajcxy mooyip ayuc huídibi ajcxy ycapxhuäcxyp.

2

Yi' ajcxy huídibi yaj'ixpijcp anii

¹ Per nañ ji anajty nañ jadu'n ayucnajtzcaxiiybi huídibi anajty ajcxy anii daacp ma je Israel jäy. E nañ jadu'n yji'adipy ayuccapxhuäcxpi huídibi anii yaj'ixpigipy ma miich ajcxy. Je' ajcxy ayüch ameech yaj'ixpigipy yci'm'ayuc yci'mhuinma'ñ huídibi ajcxy yajhuinma'ñ ydigooyipy je mibijcpidijc. Ymina'ñ ajcxy co ca' yjanchity je Huindzin Jesús y'ayuc, je huídibi yajnidzooc ajt n'alma, e jadu'n ci'm ñay'ayo'nmóoyigixy müd Dios mic'amy. ² Mayjäy ooy panicxa'ñ je jibicpi huídibi ajcxy ytungixyp, e müd je' ajcxy ycixpi yajniápxipy yajnimiydägipy ajcxy jibic je huídibi ajcxy cuydumb je tiiybi ayuc, je Jesucristo y'ayuc oybi. ³ Müd co anajty tzach'adzojccixy meen, chi anajty xyhuimbijccixy xyhuimmeetzixy müd ajcxy y'ixpijcin ca'p yjanchity. Per je pocycähuin ajcxy ahuijxip, ca' ma ñidzooy. Ti yjejni maabi ajcxy ypocycani ma Dios. Dios tzaachytunib ajcxy müd ypocy ycixpi.

⁴ Dios ca' je' huinmecxxy je ángeles ajcxy huídibi tundigooygixp. Hue' janchity ycötijnajxtaayb ayoodactuuyb etz yajhui'my agootztuuyb, cadeniijy y'ijtcixy cuend'aty, ixti cooni anajty paady xii tiempo co anajty yajtiyduna'ñ naaxhuiñjäy müd ypocy ycixpi. ⁵ Nañ ni ca' Dios huinmecxxy je naaxhuiñjäy huídibi tundigooy jecy'ajty. Chi quejxy ayo'nduu etz mijniigom ma je jibicjäydijc. Jëyi yajtzoocy je Noé huídibi capxhuäcx je tiy'ajt. Quipxy müd Noé yajtzoocy jahuixtujc y'amigügtijc. ⁶ Dios nañ jadu'n tzaachytuñ müd ypocy ycixpi etz yajhuindigoy müd jin metz cajp, Sodoma etz Gomorra, ixti cooni yajhui'my accuyjam jigix y'idipy je iixpejt ma je jibicjäydijc huídibi ajcxy

jac'axam jactzināhuam jacjugy'adam. ⁷ Dios yajtzooc je Lot, hue' je' anajty janch oyjāy, e janch ymīd anajty jotmay co anajty je jibicjāydijc ajcxy ijxi chinaayin yjugy'ajtin janch jibic. ⁸ Jabom jabom anajty je Lot, je jāy oyjāybi huidibi anajty tzinaayb quipxyi mīd je jibicjāydijc, ni ca' anajty yjotcuyc'aty co anajty ixymīdoy nej anajty ytundigooygixy je jāy ajcxy ca'pi ytudāgyity. ⁹ Dios mīd mic'ajt jēbi nihua'ñ yajtzōgy pinjaty mibijccixp cixygot huinijot co je mujcu' yjot'ijxigixy huinma'ñ'ijxigixy. Nañ jadu'n Dios mic'ajt mīdity jigix jēbi yaj'ijtcixy je jibicjāydijc mīd tzaachypi ayo'n, huidibi ymōhuamy co anajty naaxhuiñyāy tiyduñ mīd ypocy ycixpi.

¹⁰ Dios ymīd mic'ajt jēbi tzaachytunipy pinjaty tumb jibic-huinma'ñ nej ñinīcx nijot'ajtcixy, e ca' ixaangixy je Huindzin Jesús y'oy'ajtin ymij'ajtin. Amij agix etz jotmic ajcxy nayjihuiyīi. Ytumb ajcxy yci'mjot yci'mhuinma'ñ. Ni ycatzigiygixy co oyñinej ajcxy ni'ojhiygixy pinjaty mic'ajt mīd ma Dios ytung. ¹¹ Oy je ángeles ajcxy mīdity mijcōtujcin etz ane'min, ca'p je' ajcxy yjot yhuinma'ñ mīdity nicxy ni'ojhiygixy ma Dios yhuinduu pinjaty mic'ajt mīd ma Dios ytung.

¹² Per jadayaab jibicjāydijc ajcxy jadu'n ajcxy yi' nej iyujc, ca' yhuinma'ñ; nigoob ytimyhuidity etz yma'xun'ajtcixy jigix jāy ymadzhiyb etz yaj'ōgihyb. Ñixiicpy yajxiicpy ajcxy yi' huidib ca' huinjihui'y. Per nañ tim jadu'n ajcxy y'ōgipy nej iyujc y'ōgy ytigoy. ¹³ Cobadihuaangixy jadu'n nej ti ytundigooygixy. Hue' nayjihuiygixy capin yjadu'nity, yxondaaccixy tūg jaxicyjaty. Jadayaab jāy ajcxy pocy ypa'tcipy ajcxy yi' chinaaygixy yjugy'ajtcixy. Tūg tzo'ydu'n co ajcxy nañ jadu'n xymijyōybejtcixy ma m'amughiygixy.

¹⁴ Co ajcxy huindīcxcixy tōxyjāydijc, chi ajcxy ooy nijot'ajtcixy co mīd tundigoya'ñ. Ca'p ajcxy chíjpigixy y'anucxhiygixy mīd pocytunīi. Yaj-tundigooygixy pinjaty amútzip ma mibijcin, ooy ajcxy yhuijity ycuycity yco-huinma'ñity ma meeñ'adzoogīi. Dios yajtigoyib ajcxy y'alma. ¹⁵ Tigoyjāy yi' ajcxy, je' co ti ñīdigajtcixy ti ytūdigajtcixy ma je tīybi je janchypi tiy'ajt. Je' ajcxy ypanicxy ypayōyp je profeta Balaam y'ijxpejt, je Beor y'ung, co ooy ymeeñybada'ñ anajty mīd yjibic-huinma'ñ. ¹⁶ Chi Balaam oy yaj'ojyīi ypocy tūg tōxyburro, ycapxy jadu'n nej tūg jāy, e jadu'n je' yajhuācxijpy je profeta Balaam mīd je' ylocihuinma'ñ.

¹⁷ Com jada jāy ajcxy ca' panīcxcixy je janchypi tiy'ajt, paady ycixp jadu'n ajcxy nipaady nej tūg niipozojut ca'pi ñī mīdity, etz jadu'n ajcxy nipaady nej joc huidibi poj yajyōyip (ca' ytu'y). Dios mōhuīb ajcxy tzaachypi mīd ypocy ycixpi, idam ajcxy agootztuuyb huinixī huinītiempo. ¹⁸ Com ycapxyp ajcxy ayuc huidibi ca' choubaad. E mīd je jibic-huinma'ñ ycixpi huidibi ajcxy chachnijot'ajtpy yajtundigooygixy pinjaty tīibi choongixy ma je huidibi ajcxy tzinaayb mīd jibic-huinma'ñ. ¹⁹ Yi' ajcxy yaj'ixpijcp je mayjāy co jēbi tungixy huentim ti huidibi ajcxy ñijot'ajtpy. Per yi' ajcxy huidib jibic-huinma'ñ yaj'ixpijcp, ci'm ajcxy ñay'ijtigixy pocypa'tcipy, je pocy tzach'ane'mb ajcxy yjot yhuinma'ñ, ixti jadu'n nipaady nej jihuiy ajcxy ane'my y'ity. ²⁰ Pinjaty ti ymibijccixy ti ñejhuiygixy je Huindzin Jesucristo ytiy'ajt huidibi yajnīdzoocp ajcxy y'alma, e jadu'n ti yjihuāccixy ma je naaxhuiñyāy yjibictzinaayin yjibicjugy'ajtin, pen jadūg'oc anajty y'ayōyhiyñip ma je jibicpi, e je jibicpi ymīmadāgyīi ajcxy, o'ctiy anajty nigī yhui'mgixy ca'ydi nej je jayijp'atypi. ²¹ Nigī oy co ixypy je' ajcxy ca' ytimnejhuiygixy je janchypi tiy'ajt. Com ti ocnejhuiygixyp, e chi jada' y'ixtigihuāccixy ma je huātzpi Dios ycōtujcin huātzpi Dios ytiy'ajt tīibi anajty y'ocjamōoyigixy. ²² Per je' yi' ajcxy ytimycuydumy nej je ayuc y'ity: “Je uc yci'm'ich ñihuimbijtpy, e je idzim huidibi namdziidaayb, nicxy je' yajtznip yquitnīp mo'ntzjoty jadūg'oc.”

3

Je Huindzin Jesús huimbidaamb ya naaxhuiñ

¹ Miich ajcxy migügtijc huídibi ñich ooy ndzocyich ooy njihuüyich, jada je' je mímetzpi necy huídibi ajcxy nyajnijayñyb. Ma jada metzpi necy hue' ñich ndzoga'ñich co nyajhuinma'ñymedzip ajcxy ma Dios ytiy'ajt mñid jada capxhuiñ huídibi ti njaayich. ² Ti nnijayñygixy jigix m'ajihuñhuñyb ajcxy je ayuc huídibi ajcxy pa'tcipy'aty ñajtzcapxñy je Dios y'ayucnajtzcapxñybi ajcxy huídibi huádz yhuinma'ñ anajty ymñid. Nañ ajihuñyigix je Huindzin Jesucristo je' y'ane'mñin huídibi yajnñdzoocp ajt n'alma, je ane'mñin huídibi apóstoltijc miich ajcxy xyajñimaayb.

³ Nejhuñygixy miich ajcxy jada jayijp ma yam ca'ni yhuaad'ajtni mña naaxhuiñ ycixipy, miinip jäy ajcxy huídibi nixigip yajxigip huídibi Dios yjè'ajtpy. Chinaaygixy yjugy'ajtcixy anajty mñid jibic-huinma'ñ huídibi ci'm ñijot'ajtcixyp. ⁴ Chi ajcxy ymñina'ñip: “¿Ti co mdzachmibijccixy co Cristo yhuimbida'ñ jadüg'oc ya naaxhuiñ? Nej ajcxy je' y'o'ctay je mij'ap je mijteedy, je'ni y'ijttäy tüg'óciy jadu'n nej naaxhuiñybi chondacy. Paady ca' yjanchity co je Cristo yhuimbida'ñ jadüg'oc ya naaxhuiñ,” jadu'n ymñinaangixy. ⁵ Yi' ajcxy ca' huinjihuñhuaangixy cuendtunaangixy co mñid Dios y'ayuc yi tzajp ji'ajtp anajty yi' tzachjeyip, e mñid Dios y'ane'mñin huin'it je naax oy yguëxigy huídibi ijtp anajty ñijoty. ⁶ Nañ jadu'n mñid Dios y'ayuc je jecy'ajtpy naaxhuiñyjäy y'ayo'nbaty, ñijicxtay nidüg'óciy e ytigoyday ñijoty. ⁷ Per Dios mñid yi' y'ayuc yaj'ijtpy jada naaxhuiñybi etz tzajp huídibi cham ji'ajtp ixti coon yajtigoydähuiipy mñid jñin. Je jñin huin'it je' nöctähua'ñ co anajty yhuaad'ajtni ma Dios tiyduna'ñ je camadacpidijc je jibicjäydijc, etz yajtigoya'ñ ajcxy y'alma.

⁸ Jadügnax miich ajcxy migügtijc huídibi ooy ndzocy njihuüyich, ca' mjäydigooygixy co ma yi Huindzin Dios, tüg xñi jadu'n yi' nej tüg mil jimijt, e tüg mil jimijt jadu'n yi' nej tüg xñi. ⁹ Ca' nmñinaanim co yi Dios yajhuäcxibaamyñi yi' mña cuyduna'ñ huídibi yi' ti ahuanñy, jadu'n nej nijejity jäy a'ixñygixy. Dios yajtumyb mecxtujcin mñid miich ajcxy, com hue' yi' tzocy co ni tüg jäy ayo'n paadipy. Yi' chojcpy co nidüg'óciy jäy huen jothuimbijtcixy etz ixmajtzcixy pocytni.

¹⁰ Co anajty je Huindzin Jesús ymñiñ jadüg'oc ya naaxhuiñybi chaachytunipy je' tüg'óciy jibicjäydijc, hue' je' ytunñyb yjadñyb ma anajty ca' pin jijp'ixy, jadu'n nej tüg meetzpi ymñiñ coodz co meedza'ñ tijaty. Huin'it je tzajp yhuindigoydähuiipy mñid tüg ne'mñin jidijtin oychigñyñip. E tüg'óciy huídibi mñid ndzinaayim njugy'ajtim toydähuiip yi' mñid jñin, yi naax toydähuiip yi', etz tijaty yajpatp ya naaxhuiñ toydähuiip nañ jadu'n.

¹¹ Com tüg'óciy tijaty huídibi ji'ajtp yhuindigoydähua'ñ mñid jñin, paady ycixpi ñigi copicy miich ajcxy co mdzinaaygixp tudägy e myajmij'ajtcixyp Dios. ¹² Ahuijxcix ajcxy je xñi tzuu mña Dios anajty yajhuaad'aty co yajhuindigoya'ñ je naaxhuiñybi. Naymic'ijxigix co tzojc ymñipy yi' jadu'mbi xñi tzuu. Co yhuaad'ajtnip huin'it xñi, je tzajp yhuindigoydähuiip mñid jñin; je xñi po', je pojpp xemembi, je tuu enee jadu'ñyi yticxtähuiipy yjyidähuiipy jñinjoty. ¹³ Per ñich ajt n'ahuijxim je jemybi tzajp jemybi naax huídibi Dios ti xyaj'ahuanñyim, tüg tzinaaydac janch'oybi ma ca' ti jibicpi.

¹⁴ Paady ycixp miich ajcxy migügtijc huídibi ñich ooy ndzocyich njihuüyich, namí m'ahuijxyp miich ajcxy co Dios yajhuindigoyaanip jada naaxhuiñ, naymic'ijxigix ma tüg'óciy ajcxy yi' mdzinaayin co mguydunipy ajcxy Dios ytiy'ajt jigix ajcxy Dios xypaady, ca' ajcxy ti tzip ti gapxy, ni ti jibicpi, e ni ti pocy, ac huádz jot huádz huinma'ñ anajty mñid'ajtcixy. ¹⁵ Cuenditungix

je mecxtujcín huídibí ñch ajt nHuindzín Jesucristo yajtumyb mñd ñch ajt jigix jëbí xyajñidzoocím ajt n'alma. Nañ jadu'n yí, ñch ajt nmigüg Pablo huídibí ooy ndzojcím, tí miich ajcxy xyñijayñygixy, jadu'n nej ixpijcín Dios tí ymöyí ma yí y'ayuc. ¹⁶ Ma tüg'óciy Pablo ñecy tíbí xyajñigüejxcixy, jada tíy'ajt tí xyajmñdmíydaaccixy. Nijëjity Pablo ñecy ooy chachchiphuinjihuñity, e nijëjity jäy ajcxy tigach ajcxy huinjihuñy Pablo y'ayuc, ca' ajcxy huinjihuñy nej Pablo yjamína'nañ. Huingjaty ajcxy ñigüej Pablo y'ayuc, e cí'm ñayyajhuinma'ñydgóoyigixy.

¹⁷ Paady ycixp miich ajcxy migügtijc huídibí ooy ndzocy njihuñyich, miich mnejhuñydaaygix jada tíy'ajt. Nayguend'ájtigix ca'ydi jibicjäydijc mñd y'aní xyajñidigajtcixy xyajtüdigajtcixy, e ca'ydi m'ixtigñhuäccixy ma ajcxy mmibijcín jadu'n nej tíydudägy tí mmibijccixy. ¹⁸ Huen ñch ajt nHuindzín Jesucristo huídibí yajñidzoocp ajt n'alma ñgi may'ajt oy'ajt tunipy mñd miich ajcxy, e nañ ñgi yujcpedipy ajcxy yí m'ixpijcín ma yí y'tiy'ajt. Huen Jesucristo cōmay y'idipy etz m'idipy oy'ajtín mij'ajtín jadachambi xí tiempo etz jadu'n nej xí tiempo miimb cidacp. Jadu'n ngapxycíxyich. Amén.

1 SAN JUAN

Yi Jayijpi Necy Huidibi San Juan Yajnigujxy Je Mibijcpi dijc Nidüg'óciy

¹ Dios y'ayuc jiiyim anajty co naaxhuiñybi chondacy. E tiy'ajt nyejcypich jadu'n nej nmidooyich ci'm yi' y'ayuc, jadu'n nej n'ixyich mïd ngi'mhuinich, jadu'n nej nhuindicxyich yi' ci'm, e nañ jadu'n nej nnidoñich mïd ngi'mgijich. Nyajnijayiybich miich ajcxy jada necy jadu'n nej je Cristo je Dios y'ung yjugy'ajtin yegañ huidibi ca' cixañ tigoyañ niminaabi. ² Ti ñayguëxigyii ya naaxhuiñ je Dios y'ung huidibi ymïd jugy'ajtin huidibi ca' niminaabi ycixipy ytigoyipy. Ti n'ixyich ajcxy jigix jëbi tiy'ajt nyéjccixyich co ti ñayguëxigyii ya naaxhuiñ, etz ti n'ixyich jigix jëbi nyajnimaaigyxy nej jëbi huaad huingbi jugy'ajtin nbaatim co anajty ti n'o'cim. Je Dios y'ung, je huidibi jiiy ijtp ma Dios Teedy, nayguëxici je' ma ñich ajcxy. ³ Je huidibi ñich ajcxy n'ixyich nmidoohich, cham miich ajcxy nyajnimaaigyxy jigix jëbi ajt tú'ciy n'ijtim ma Dios ytiy'ajt, etz nañ jigix jëbi tú'ciy ajt n'ojadajtim Dios etz je' y'ung. ⁴ Paady ycixp jada tiy'ajt nyajnijäyiy ajcxy jigix ajcxy jotcujc'ajtin mbattáaygixipy mïd jada ayuc tiy'ajt.

Dios yi' je' je tñcxin jájin

⁵ Jadayaabi Dios y'ayuc ytiy'ajt Jesucristo ti xyajnimäyich e nañ cham ñich miich ajcxy nyajnimaaigyxy. Dios huädz ytiy'ajt mïdity, ca' ma Dios anïdägy. Jadu'n Dios nipaady nej tüg jün ytñcxy ma tüg it e ni ca' ni mina ypich. ⁶ Co nmïnaanim co Dios ajt mïd n'ijtim tú'ciy, e ca' yjanchity, ca' anajty ajt Dios ytiy'ajt nyajtuunim, jadu'n nipaady nej jihuiy ndzinaayim agootztuum. Nigoo n'ñindaacim, ca' anajty ajt nguyduunim Dios ytiy'ajt. ⁷ Co nguyduunim Dios ytiy'ajt jadu'n nej yi' ytiy'ajt mïdity, jadu'n nipaty nej jihuiy ndzinaayim ma jün ytñcxy. Huin'it jëbi ajt n'ijtim tú'ciy miñ xyipy, e Dios xyajpocynihuaatztaayim co Jesucristo y'o'cy etz ñi'py teemy gujy mïd ñich ajt nbocy ycixpi.

⁸ Co ixypy nmïnaanim co ca' nbocytuunim, nigoob nayhuin'ñnim ci'm, e ca' jadu'n Dios ytiy'ajt yajpaady ma ñich ajt njot nhuinmañ. ⁹ Pen ngapxypidzimim ajt nbocy ma Dios, yi' ñidinaayb yi' y'ayuc huidibi ti xyajnimaaayim co ymecxamy ajt nbocy, e nañ tudägy ytuñ mïd ñich ajt ycixpi. Dios xyhuinmeecxim ajt nbocy etz xyajhuaatzim njot nhuinmañ jëbi n'ixmajtzim jibic-huinmañ. ¹⁰ Co ajt nmïnaanim co ca' nbocytuunim, hue' anajty Dios nyajnajxim anñ, e ca' anajty ti ngöbijcim cixyjot huinijot yi' ytiy'ajt.

2

Cristo, ñich ajt nhuingapxi ma Dios

¹ Miich ajcxy migügtijc huidibi ooy ndzocy njihuiyich jadu'n nej ixypy ngi'm'ungich ngi'm'anäcich, cham jada tiy'ajt nyajnijayiygixy, jigix ca' ajcxy mdundigóoygixipy. Pen ji nidügti miich ajcxy huidibi tundigooyb, jada migüg huidibi tundigooyb huen mibijctzoy Dios ma Jesucristo yxi mïd ypocy ycixpi. Jesucristo yi'je' huingapxp ma Dios Teedy mïd ajt nbocy ycixpi. Tudägy je', e jëbi xyhuingapxim ma Dios Teedy. ² Com Jesucristo ti y'ögy mïd ñich ajt nbocy ycixpi, paady ycixp jëbi capx'oyiy ma Dios mïd ñich ajt ycixpi e xycapx'oyiyim ñich ajt nbocy etz nañ capx'oyiyip tüg'óciy naaxhuiñ jäy ajcxy ypocy, yi' jäy ajcxy pinjaty yi' y'ayuc ytiy'ajt mijpidaacip.

³ Co Jesucristo ytiy'ajt nguyduunim yajxon, huin'it nejhuuyim tiydudägy jadu'n nej Dios may'ajt oy'ajt ti tuñ mïd ïch ajt ycixpi. ⁴ Co ixipy pinjaty ymïna'ñ co ñejhuuyi Jesucristo ytiy'ajt e ca' cuychinaayi yi' ytiy'ajt hue' yi' tzach anïdaacpi, e ca' mïdity Dios ytiy'ajt. ⁵ Yi jäy ajcxy pinjaty cuychinaayb cuyjugy'ajtp yajxon Jesucristo y'ayuc ytiy'ajt, janch tiydudägy anajty yajmij'aty Dios. Co nguychinaayim nguyjugy'ajtim yajxon Jesucristo ytiy'ajt, huin'it jëbi nejhuuyim co nyajmij'ajtim Dios. ⁶ Yi jäy ajcxy pinjaty minamb co ymïd Jesucristo y'ayuc ytiy'ajt ma je' y'ay yjot, copicy ajcxy chinaaygixipy jugy'ajtcixipy tim jadu'n nej Jesucristo chinay jugy'ajty.

Je jemybi ane'min

⁷ Miich ajcxy migügtijc huïdibi ooy ndzocy njihuuyich, ca' nmïnaanim jemybi tiy'ajt ajcxy nyajnimähuamy ma jada necy. Je' jada je tiy'ajt huïdibi jecy'ajty ti mnejhuuygixy co oga'n ajcxy mmijpidacy Jesucristo. Jada tiy'ajt jecyip jada je' huïdibi cham ajcxy mmïdooyb jadüg'oc. ⁸ Nañ jemy jada tiy'ajt nañ jadu'n huïdibi nyajnimaaygixyp ma jada necy. Jada je'je tiy'ajt huïdibi Jesucristo ymïd ma yjot yhuinma'ñ etz nañ ïch ajt nmïd ma ajt njot nhuinma'ñ. Yi jecyip ayuc huïdibi ca' ytiy'ajtiy, ti yi' ñaxy e cham Dios ytiy'ajt tiydudägy nyajtuunim, jadu'n nej jihuuy je coodzpi ti ñaxy e cham ti yximïy.

⁹ Yi jäy ajcxy huïdibi minam co Dios y'ayuc ytiy'ajt ajcxy cuyduuni e ca' ixáanigixy ymigügtijc, ca' yi' ajcxy tiydudägy Dios y'ayuc yajtuuni, jadu'n yhuimbizimy jadu'n nej jihuuy agootztuuy ijtcixy. ¹⁰ Yi jäy ajcxy pinjaty tzojcp jihuuyb ymigügtijc hue' yi' yajpaatcixy mïd Dios ytiy'ajt ma ajcxy yjot yhuinma'ñ, jadu'n nipaady nej jihuuy y'ijtcixy ma xï ytïcxy, ca' ajcxy ñïdigoy ytüdigoy ma Dios ytiy'ajt. ¹¹ Yi jäy ajcxy pinjaty ca' ymigüg ixaangixy, ca' yi' ajcxy Dios ytiy'ajt ajcxy yajtuuni, jadu'n nipaady nej jihuuy agootztuuby y'ijtcixy, ca' ajcxy chinaaygixy nej Dios ytiy'ajt yja'ané'migixy, ca' ajcxy nejhuuygixy huïdibi tiy'ajt jëbi yajtungixy, com jibic-huinma'ñ chachtuumyb ajcxy huïdibi ca' Dios tiy'ajt'adyii.

¹² Miich ajcxy migügtijc huïdibi ooy ndzocy njihuuyich ajcxy jadu'n nej ixipy ngi'm'ung ngi'm'anäcïch, com Dios ti miich ajcxy mbocy xyhuinmecxtayi co Jesucristo y'o'cy mïd ajcxy mbocy ycixpi, paady ycixp cham nnijayïygixy. ¹³ Cham nnijayïygixy miich ajcxy mij'anäctijc, com ti mmijpidaaccixy Jesucristo huïdibi jii'ajt co naaxhuiñybi oga'n choondacy etz chambaad yjii'atyñi. Cham nnijayïygixy miich ajcxy anäctijc, com ti mmimadaaccixy je ca'oybi.

Cham nnijayïygixy miich ajcxy pi'ctijc mutztijc com ti mmijpidaaccixy Dios Teedy. ¹⁴ Cham nnijayïygixy miich ajcxy mij'anäctijc, com ti mmijpidaaccixy ajcxy Jesucristo huïdibi jii'ajt co naaxhuiñybi oga'n chondacy etz yjii'atyñi chambaad. Cham nnijayïygixy miich ajcxy anäctijc, com mic mjot mhuinma'ñ mïdity ajcxy etz Dios ytiy'ajt yajpatp ma ajcxy mjot mhuinma'ñ, paady ycixp ajcxy ti mmimadaaccixy yi' ca'oybi.

¹⁵ Migügtijc, ca' anaxy m'adzójccixip yi huïdibi mïd ndzinaayim ya naaxhuiñ. Yi jäy ajcxy huïdibi adzojctaaayb anaxy yi huïdi mïd ndzinaayim, ca' ajcxy Dios Teedy yajmij'ajtcixy. ¹⁶ Ca' anaxy m'adzojctähuipy ajcxy tüg'ócïy huïdijaty ya naaxhuiñ yajpatp, jadu'n nej njot nhuinma'ñ tzojcm, jadu'n nej tijaty n'ijxim, jadu'n nej huïdibi amij agix mïd ndzachnayjihuuyim. Com yi' jadu'mbi huinma'ñ ca' yajpaady ma Dios Teedy, hue' yi' yajpaady ya naaxhuiñ. ¹⁷ Huïdijaty ya naaxhuiñ yajpatp cixipy tigoyipy yi', nañ jadu'n ytigoya'ñ huïdijaty yi' huinma'ñ y'adzojcpy. Yi jäy ajcxy pinjaty Dios ytiy'ajt yajtuunip jadu'n nej Dios tzocy, jugy'adipy ajcxy e co y'ó'ccixipy, ca' ajcxy y'alma ytigóoygixipy.

Je t̄iy'ajt etz je an̄i

¹⁸ Miich ajcxy migügt̄ijc huiḁibi ooy ndzocy njihūiyich nej ixyipy ngi'm'ung ngi'm'an̄ac̄ich, tim c̄ixn̄ip tiempo ya naaxhuiñ. Ti jada mnejhūiyḡixy co miinaam jāy ajcxy huiḁibi nayyajnaxaan̄ip nej Cristo' e ca' yjanch̄ity. M̄id co cham ji mayjāy ajcxy huiḁibi nayyajnajx̄ip jadu'n nej Cristo, paady ne-jhūiyim co tim c̄ixn̄ip ȳi tiempo m̄id ḁch naaxhuiñyāy ajt yc̄ixpi. ¹⁹ Ȳi jāy ajcxy huiḁibi nayyajnaxaan̄ip jadu'n ixyipy nej Cristo, naybijc-huācxaan̄ip ȳi ajcxy m̄id ḁch ajt, ca' anajty ajcxy yt̄üḡiy ȳi' ajcxy yhuinma'ñ m̄id ḁch ajt nhuinma'ñ, t̄ügmucy ixyipy ajt xym̄id'ijtim. Ji jadu'n ñiguēx̄igy co ca' yt̄üḡiy yhuinma'ñ m̄id ḁch ajt nhuinma'ñ co ti ajcxy xypuhuāctuutim.

²⁰ Ti miich ajcxy xy'adiḡiy xyjottiḡiy Dios yjihūi'ñ ymic'ajt, paady miich ajcxy mhujihūiy t̄üg'óciy Dios y'ayuc yt̄iy'ajt. ²¹ Ca' nm̄inaan̄im paady miich ajcxy nijaȳiyḡixy co ca' mhujihūiyḡixy Dios yt̄iy'ajt. Paady nnijaȳiyḡixy miich ajcxy jiḡix mnejhūiyḡixyip Dios yt̄iy'ajt etz mnejhūiyḡixyip co ȳi jāy ajcxy huiḁibi indaacp, ca' ȳi' ajcxy Dios yt̄iy'ajt m̄id̄ity.

²² Ȳi' je' indacp huiḁibi minamb co Jesús ca' ȳi' yjējity je Cristo huiḁibi Dios yquejx. Ȳi' indacpi je'midzip'ajtp Jesucristo etz ca' mibicy Dios Teedy etz nañ ca' mibijci Dios y'ung. ²³ Je jāy ajcxy huiḁibi indacp minam co Jesús ca' yjējity je Cristo, e nañ ca' ajcxy m̄id̄ity Dios Teedy yt̄iy'ajt. Ȳi' jāy ajcxy huiḁibi minam co Jesús yjējity je Cristo je Dios y'ung, nañ ym̄id ajcxy Dios Teedy yt̄iy'ajt.

²⁴ Je ayuc t̄iy'ajt huiḁibi miich ajcxy mm̄idou co oga'n ajcxy mm̄ijpidacy Jesucristo, jada ayuc t̄iy'ajt mguyd̄unḡixyipy e ca' mjāydḡooyḡixyipy. Pen mmi'ijtc̄ixp ȳi' ayuc huiḁibi Dios yjāy oga'n ajcxy xyaj'ixpijc, huin't̄i jēbi miich ajcxy myajpatc̄ixy ma Dios y'ung etz je' yajpaady ma Dios Teedy. ²⁵ Dios ti xyajhuinhuan̄iyim co xyajzin̄ahuaan̄im ajt n'alma huinix̄i huin̄itiempo.

²⁶ Jada t̄iy'ajt ajcxy nyajnijaȳiyb jiḡix ca' mm̄ijpidáacc̄ixyipy ȳi' ajcxy y'ayuc huiḁibi xyajhuinma'ñydḡoyaam ajcxy. ²⁷ Ȳi' Dios yjihūi'ñ ymic'ajt huiḁibi ti xy'adiḡiyḡixy ti xyjottiḡiyḡixy ijtt̄ib ȳi' ma miich ajcxy mjot mhujihūi'ñ. Paady yc̄ixp ca' myajmayajtc̄ixy pin xyaj'ixpiḡip ajcxy com je Esp̄iritu Santo xyaj'ixpiḡip ajcxy. Je Esp̄iritu Santo xyajni'ix̄iydaayb ajcxy t̄üg'óciy Dios yt̄iy'ajt, t̄iydudāgy ȳi', ca' ȳi' y'an̄ijity. E jadu'n nej je' xyajni'ix̄iyḡixy, jadu'n mguydun̄ipy ajcxy. Mi'ijtc̄ix Dios yjihūi'ñ ymic'ajt ma mjot mhujihūi'ñ ajcxy.

²⁸ Miich ajcxy migügt̄ijc, mi'id̄ipy ajcxy Jesucristo yt̄iy'ajt ma mjot mhujihūi'ñ jiḡix co ñayyajniguēx̄igyb Jesucristo ya naaxhuiñ jad̄üg'oc, huin't̄i jotcujc ajt nnayjihūiyim etz ni ca' j̄ibic nayjihūiyim co anajty xyñimiin̄im. ²⁹ Ti mnejhūiyḡixy co ȳi' Jesucristo t̄iydudāgy ytuñ, e ti mnejhūiyḡixy nañ jadu'n co t̄üg'óciy ȳi' jāy huiḁibi t̄iydudāgy tumb, ȳi' je' ajcxy Dios y'ung'ajtp.

3

Dios ḁch ajt xy'ung'ajtim

¹ Jihūi'ñyb̄ijcc̄ix t̄üg'óciy je m̄ijpi may'ajt Dios Teedy ti tuñ m̄id ḁch'ajt yc̄ixpi jiḡix jēbi naydijim Dios y'ung. Ȳi' naaxhuiñyāy ajcxy huiḁibi ca' m̄ijpidaacc̄ixy Jesucristo ca' ajcxy nejhūiyḡixy huinjihūiyḡixy Jesucristo yt̄iy'ajt, paady yc̄ixp ca' ajcxy nejhūiy huinjihūiy co Dios xy'ung'ajtim. ² Miich ajcxy migügt̄ijc huiḁibi ooy ndzocy njihūiyich, jadachambi Dios ḁch ajt xy'ung'ajtim. Jadachambi ca'p y'ocniguēx̄igyñi nej ḁch ajt jiini n'idaan̄im. Co anajty Jesucristo ym̄iñ jad̄üg'oc ya naaxhuiñ, huin't̄i nguipxyjatyt̄iyim m̄id je', com n'ixaan̄im ajt Jesucristo jadu'n nej je' yajpaady. ³ T̄üg'óciy jāy ajcxy huiḁibi j̄ijp'ijxp co Jesucristo ymiina'ñ jad̄üg'oc ya naaxhuiñ, copicy

yajhuädziipy ajcxy yjot yhuinma'ñ. Huen mi'ijtcixy oyjot oyhuinma'ñ jadu'n nej Jesucristo mi'ity oyjot oyhuinma'ñ.

⁴ Tüg'óciy jäy ajcxy huidibi pocytumb, hue' ajcxy ymidundigooyb Dios ycötujcin. Co ajcxy ytundigoy, ca' ajcxy ymadägy nej cuydunipy Dios ycötujcin.

⁵ E mnejhuüyb miich ajcxy co yi Jesucristo ti ñayguëxigyii ya naaxhuiñ jigix jëbi xyajpocyñihuaatzim. Jesucristo ca' anajty ti pocy müidity, ca' anajty ma ti ytundigoy.

⁶ Tüg'óciy jäy ajcxy huidibi cuydundähuam Jesucristo ytiy'ajt, ca' huaad pocytuñ. Yi jäy ajcxy huidijaty pocytundib, ca'ni icy ajcxy yi Jesucristo, nañ ca'ni ajcxy huinjhuüy yi' ytiy'ajt. ⁷ Miich ajcxy migügtijc huidibi ooy ndzocy njihuüyich jadu'n nej ngi'm'ung ngi'm'anäcich, ix ni pin xychuin'ingix. Yi jäy ajcxy huidibi oyjot oyhuinma'ñ yajtumb, tiydudägy yi' ajcxy chinäy yjugy'ajty, tim jadu'n nej Jesucristo tiydudägy chinay yjugy'ajty.

⁸ Yi jäy ajcxy huidibi tzachpocytundibni, yi' ajcxy mujcu' yjäy'ajtip. Com jadu'n nej chondacy je naaxhuiñybi oga'n yi mujcu' jëni anajty jadu'n chachpocytuñ. Paady ycixp Dios quejxy y'ung ya naaxhuiñ co je mujcu' yhuinma'ñ yajcödigoyaani.

⁹ Yi jäy huidibi Dios ajcxy ti ymöyii jemybi jot jemybi huinma'ñ, ca' ajcxy ypocytundüy com je'co tú'ciy ajcxy yjot yhuinma'ñ müidity, jadu'n nej anajty Jesucristo yjot yhuinma'ñ müidity, ca' huaad ajcxy ypocytundüy com Dios ti ymöyii ajcxy jemybi jot jemybi huinma'ñ. ¹⁰ Paady ycixp yñiguëxigy yi jäy ajcxy pinjaty Dios y'ung'ajtip etz pinjaty mujcu' ung'ajtip. Yi huidibi ajcxy ca' tiydudägy cuydungixy Dios ytiy'ajt etz ca' ajcxy ixa'ñ ymigügtijc, etz ca' ajcxy tzocy jihuiy ymigügtijc, hue' ca' ajcxy Dios ymöyii jemybi jot jemybi huinma'ñ, mujcu' ajcxy y'ung'ajtip.

Naychojcin nayjihuiyim miñ xyipy

¹¹ Jada je' je ayuc tiy'ajt huidibi miich ajcxy ti mmidoogixy co oga'n ajcxy mmijpidacy Jesucristo co copicy naychojcin nayjihuiyim nidüg nidüg. ¹² Ca' huaad jadu'n n'iditzim nej Caín y'idich co anajty mujcu' huinma'ñ müidity, chi y'uch yaj'o'cy. ¿Nej co y'uch yaj'o'cy? Je' co anajty je' jibic-huinma'ñ yajtuñ, e je' y'uch oyhuinma'ñ anajty yajtumyb paady ycixp je y'uch yaj'o'cy.

¹³ Miich ajcxy migügtijc, ca' ooy ndzachhuinmaay ajcxy co ca' yi naaxhuiñyjäy ajcxy xy'ixa'ñ, huidibi ajcxy ca' Dios y'ayuc mijpidaaci. ¹⁴ Com ich ajt nnejhuüyim co je nmigügtijc ajcxy ndzojcin njihuüyim co n'o'cim, huin'it njugypigaanim e ndzinähaanim jiiby tzajpjoty huinixi huin'it tiempo. Yi jäy ajcxy pinjaty ca' ymigügtijc ixa'ñ ajcxy co ajcxy y'ögipy, huin'it ca' ajcxy chinähua'ñ jiiby tzajpjoty. ¹⁵ Huenpinjäyity huidibi ca' ymigüg ixa'ñ, nipatpy nej ytundigoy jadu'n nej jäyyaj'o'cpi ytundigoy e nañ jadu'n nejhuüyim, co je' y'ögipy, ca' chinähua'ñ jiiby tzajpjoty. ¹⁶ Ya icyipy jëbi ich ajt ijxpejt nbjicim nej huaad migügtijc ndzojcin njihuüyim, jadu'n nej Jesucristo ijxpejt yejcy co ñayyojxi ñaydooci co y'o'cy müid ich ajt nbocy ycixpi. Paady ycixp ich ajt jëbi huaad ndzojcin njihuüyim nmigügtijc, oy jada ndimco'ögyim. ¹⁷ Janch pinjaty yjamid ymadaacin, e yja'ixpy co ymigüg tigati yajmayjaty, e amij agix ñayjihuiyii, ca' pa'ayo'n müidity, ca' pubeda'ñ ymigüg, ca' je' anajty tzocy jihuiy ymigüg jadu'n nej Dios chogyii yjihuiyii. ¹⁸ Miich ajcxy migügtijc huidibi ooy ndzocy njihuüyich jadu'n nej icyipy ngi'm'ungich, müid oyjäy'ajtin etz müid Dios ytiy'ajt tzoc yajxon naychojcin nayjihuiyim miñ xyipy. Ca' nminaanim nigoo ngapxim nmiydaacim ahuac aguuy.

Cixyjot huinjot naybidaacim ma Dios

¹⁹ Co nyajtuunim oyjäy'ajtin müid ich ajt nmigügtijc, huin'it nejhuüyim co Dios ytiy'ajt nguyduunim e jotcuyc nayjihuiyim co Dios n'ojadajtim. ²⁰ Co jibic

njot nhuinma'ñ ajt njihuüyım, mıd co ca' oյjäy'ajtin nduunım, jac nigı Dios jıbic ñayjihuiyii com yı' jacmıjhuinma'ñ mıd, ca'ydi ñch ajt, e yı' nejhuiydaayb tüg'óciy tijaty ajt nduunım. ²¹ Miich ajcxy migügtıjc huıdibi ooy ndzocy njihuıyich, co ca' ti jıbicpi njihuıyım ma ajt njot nhuinma'ñ mıd co oybi nduunım, huin'it jotcuyc ajt n'ıjtım mıd Dios. ²² E huentımtııjıty huıdibi ñch ajt Dios nyajmıbjctzoohuım, yı' xymooyım mıd co yı' y'ayuc nguyduunım, e nduunım je huıdibi yı' yjägıdacpy. ²³ Dios jada ti xyajnajtz'ane'mıyım co tzoc mıbjcım mıjpıdaacım yı' y'ung Jesús etz tzoc naychojcım nayjihuiyım mıñ xyıpy, jadu'n yı' ti xyajnajtz'ane'mıyım. ²⁴ Yı jäy ajcxy pinjaty cuydumb Dios ytıy'ajt, yajpatp ajcxy ma Jesucristo e nañ Jesucristo yajpatp ma je'ajcxy. Nejhuiyım co Jesucristo ytıy'ajt yajpaady ma ñch ajt mıd co je Dios yjihui'ñ ymic'ajt ti xy'adigıyım xyjottıgıyım.

4

Dios yjihui'ñ ymic'ajt etz je ca'oybi yjihui'ñ

¹ Miich ajcxy migügtıjc huıdibi ooy ndzocy njihuıyich, ca' ajcxy mmıbjctähuıpy tüg'óciy jäy huıdibi Dios y'ayuc capxhuäcxıp. Mıdo'mbjccıxy jayıp penı janch ajcxy mıdıty Dios yjihui'ñ ymic'ajt. Com ji mayjäy ya naaxhuiñ huıdibi mınam co Dios y'ayuccapxhuäcxı yı' ajcxy e ca' yjanchıty. ² Jada je' je tıy'ajt ma huaad mjihuı'ñıbjccıxy pen janch mıdıty ajcxy Dios yjihui'ñ ymic'ajt, yı' ajcxy huıdibi Dios y'ayuccapxhuäcxıp: tüg'óciy jäy huıdibi capxhuäcxp co Jesucristo yma'xung'ajty ya naaxhuiñ mıd ñinıcx, Dios yı' ytıy'ajt ymıd. ³ E tüg'óciy jäy ajcxy huıdibi ca' ñıgapxpety ajcxy co Jesucristo chinäy ya naaxhuiñ mıd ñinıcx, ca' yı' Dios ytıy'ajt mıdıty. Ti miich ajcxy ayuc mıdoogıxy oga'n co mınaam yı' naaxhuiñjjäy ajcxy mıd je mujcu' yjihui'ñ ymic'ajt, huıdibi mıdzip'ajtp Jesucristo. E ti je'du'n ajcxy ymiingıxy. Jada je'du'n ajcxy huıdibi ca' ñıgapxpejtcıxy co Jesucristo yma'xung'ajty ya naaxhuiñ mıd ñinıcx.

⁴ Migügtıjc huıdibi Dios yjihui'ñ ymic'ajt ti xy'adigıygıxy ti xyjottıgıygıxy, e ti miich ajcxy mmımadaaccıxy yı' huıdibi ajcxy ñıgapxpejtp co Jesucristo ca' ma'xung'ajty ya naaxhuiñ mıd ñinıcx. Com Dios huıdibi miich ajcxy xy'ane'mb, jac mıj yı' ca'ydi je mujcu', paady miich ajcxy ti mmımadaaccıxy je mujcu'. ⁵ Je huıdi ajcxy jadu'n jamınaamb co Dios y'ayuc capxhuäcxı e ca' yjanchıty ya naaxhuiñ ajcxy tıy'ajt ti patcıxy ma je mujcu', paady ycıxp yı' naaxhuiñ yhuijy'ajtin ajcxy tzachcapxhuäcx, e yı' naaxhuiñjjäy tzachmıjpıdaaccıxy etz amıdoo'ıjti ajcxy y'ayuc. ⁶ ñch ajt tıy'ajt ti nbaatım ma Dios. Tüg'óciy jäy ajcxy huıdibi Dios ytıy'ajt huınjihuiyıp, y'amıdoo'ıjtyp ajcxy ñch ajt n'ayuc. Yı jäy ajcxy huıdibi ca' Dios ytıy'ajt mıdıty, ca' ajcxy amıdoo'ıjtcıxy ñch ajt n'ayuc, paady ycıxp n'ıjxcajpım je jäy ajcxy huıdibi tudägyıp, etz je jäy ajcxy huıdibi ñıgoo tzach'anıdaacp.

Dios ooy xychojcım xyjihuiyım

⁷ Miich ajcxy migügtıjc huıdibi ooy ndzocy njihuıyich, tzoc oy yajxon naychojcım nayjihuiyım mıñ xyıpy. Dios ti yecy ymic'ajt ma ajt njot nhuinma'ñ jıgıx jėbi ajt naychojcım nayjihuiyım mıñ xyıpy. Tüg'óciy jäy huıdibi ymigügtıjc chojccıxyp yjihuiyıgıxyp, ti Dios yjihui'ñ y'adigıyıgıxy yjottıgıyıgıxy etz ñejhuiyıp yhuınjihuiyıp ajcxy Dios y'ayuc ytıy'ajt. ⁸ Pinjaty ca' ymigüg tzocy jihuiy, ca' yı' nejhuiyı huınjihuiyı Dios ytıy'ajt, com Dios tüg'óciy yı' tzojctäy. ⁹ Jada je'je tıy'ajt co Dios ajt xychojctaaıyım co je y'ung huıdibi tügıajcpi ymıd, quejxy ya naaxhuiñ jıgıx ñch ajt nbaatım Dios yjihui'ñ ymic'ajt mıd yı' ycıxpi. E Dios yjihui'ñ ymic'ajt ca' ycıxa'ñ ytıgoya'ñ

nimina, paady ich ajt njugy'ajtin ca' ycixa'ñ ytigoya'ñ. ¹⁰ Dios ti xychojcin ti xyjihuiyim, paady quejxy y'ung ya naaxhuiñ jigix jëbi xycodinaayim ma yi Dios ycötujctac miid ich ajt nbocy ycixpi. Ca' nminaanim miid co Dios ti ndzachmijpidaacim ooy mijcajee, hue' janchtiy yi' ninigoob may'ajt tuñ miid ich ajt ycixpi.

¹¹ Miich ajcxy migügtijc huidibi ooy ndzocy njihuiyich, miid co Dios jadu'n ajt ti xychojcin ti xyjihuiyim mijcajee oga'n, paady ycixp tzoc ich ajt naychojcin nayjihuiyim miñ xyipy. ¹² Ni minaabi pin ca' icyñi Dios. Co naychojcin nayjihuiyim miñ xyipy, huin'it Dios yjihui'ñ ymic'ajt ijttiy ma ich ajt njot nhuinma'ñ. Jadu'n Dios yjihui'ñ ymic'ajt xypubejtim xypudigiyim, jëbi nigë naychojcin nayjihuiyim nidüg nidüg jadu'n nej Dios jäygidägy. ¹³ Nejhuiyim ich ajt co nyajpatim ma Dios, e nañ jadu'n Dios yajpaady ma ich ajt, miid co yi' yjihui'ñ ymic'ajt ti xy'adigiyim ti xyjottigiyim. ¹⁴ E ich ajcxy, ti ich ajcxy yi' Jesucristo n'ixyich, paady ich ajcxy nidiy'ajt'ajtyich co je Dios Teedy quejxy y'ung ya naaxhuiñ co yajnëdzöga'ñ tüg'óciy naaxhuiñyây co anajty Dios nbocy ajt xyajcomidoohuaanim. ¹⁵ Tüg'óciy jäy huidibi nigapxp co Jesús je' yi' Dios y'ung, Dios yajpatp ma yi' e nañ yi' yajpatp ma Dios.

¹⁶ Ich ajt nnejhuiyim etz nmijpidaacim jadu'n nej Dios ajt xychojcin xyjihuiyim nidüg'óciy. Dios chojctaayb yi' nidüg'óciy yi' jäy. Pinjaty tzojccixp jihuiyigixp ymigügtijc, hue' yajpatp yi' ajcxy ma Dios e nañ Dios yajpatp ma yi' ajcxy. ¹⁷ Miid co yajxon nmijpidaacim Dios paady jotcuje nnaaxanim ma Dios ycötujctac, mina anajty xyajcomidouhuim ajt nbocy. Com tú'ciy ich ajt nyajpaatim ya naaxhuiñ, tim jadu'n nej yi' Jesucristo. ¹⁸ Co nmijpidaacim Dios, huin'it ca' ajt nmidzigiyim nmidzo'yduunim. Peni yajxon nmijpidaacim Dios, huin'it jëbi tzig'i'ñ nyajqueecim. Yi' jäy ajcxy huidibi tzig'i'yb etz tzo'yduim, ca' ajcxy Dios mijpidägy yajxon.

¹⁹ Com Dios jayijp ti xychojcin ti xyjihuiyim, paady ycixp tzoc ajt naychojcin nayjihuiyim nidüg nidüg etz nañ nmijpidaacim Dios. ²⁰ Yi' jäy ajcxy pinjaty jadu'n minamb co mijpidaaccixy Dios, e ca' ymigüg tzogaangixy ixaangixy, hue' je' ajcxy anidaacp. Com peni ca' jajtciy nej tzojccixipy jihuihuyigixipy yi' ymigügtijc huidibi ajcxy icy'ajtpy, ca' ajcxy jadip nej mijpidaaccixipy Dios huidibi ca' icy'ajtigixy. ²¹ E Dios ich ajt xyñajtz'ane'miyim co pin Dios mibijcp mijpidacp, huen nañ jadu'n ymigügtijc tzocy jihuiy.

5

Yi pin huidibi ca' ixa'ñ midohua'ñ Cristo y'ayuc

¹ Tüg'óciy jäy huidibi mibijccixp co Jesús je' je' je Cristo huidibi Dios yquejx ya naaxhuiñ, Dios ajcxy y'ung'ajtip. Tüg'óciy jäy huidibi mibijccixp mijpidaaccixp Dios Teedy, nañ jadu'n huen tzojccixy yjihuiyigixy je' ajcxy huidibi Dios y'ung'ajtip. ² Co ndzojcin njihuiyim huidibi Dios y'ung'ajtip, je' jada je' je' ijxpejt co nañ jadu'n jëbi nmijpidaacim Dios etz jëbi nguyduunim nej xyñajtz'ane'miyim. ³ Co nmijpidaacim Dios, huin'it nguyduunim jadu'n nej Dios xyñajtz'ane'miyim e yi' y'ayuc ca' ooy chipity co nguyduunim. ⁴ Com tüg'óciy yi' jäy ajcxy huidibi Dios ti y'adigiyii ti yjottigiyii yjihui'ñ ymic'ajt, ymihuindinaayb ajcxy yi' jibic-huinma'ñ ya naaxhuiñ. Co mibijcin Dios, huin'it jëbi mihuindinaayim yi' jibic-huinma'ñ ya naaxhuiñ. ⁵ Yi' jäy ajcxy pinjaty mibijcp co Jesús Dios je' y'ung, yi' ajcxy mihuindinaayb yi' jibic huinma'ñ ya naaxhuiñ.

Je ayuc huidibi nidiy'ajt yi' Dios y'ung

⁶ Yi Jesucristo je' je' huídibi miin ya naaxhuiñ, je' je' huídibi niibejt etz ñi'py teemy gujy co y'o'cy miid jāy ajcxy ypocy ycixpi. Ca' nmīnaanīm jēyi anajty ti ñībety, hue' nañ jadu'n ti y'ōgy miid ajt nbocy ycixpi. ⁷ E yi Espíritu Santo yi' tiy'ajt yejcp co Dios Jesús y'ung'adyii, com je Espíritu Santo yi' Dios ytiy'ajt ymiid. ⁸ Ji tugñgnax huídibi tiy'ajt yejcp co Dios Jesús y'ung'adyii: je Espíritu Santo, je niibejtīn, etz Jesús ñi'py co teemy cujy miid iich ajt nbocy ycixpi. E jadu'n nidugñg ñaybáatigixy tūgnax, e tūgnax ytiy'ajt yejccixy. ⁹ Miipidaacīm iich ajt jāy y'ayuc co Dios Jesús y'ung'adyii, niigi copicy co nmīpidaacīm Dios ytiy'ajt huídibi ti yecy miid y'ung ycixpi, com jac mic'ajt miid yi' ca'ydi jāy ajcxy. ¹⁰ Yi jāy huídibi miipidaaccixp Dios y'ung, ymi'ijtpy ajcxy je tiy'ajt ma yjot yhuinma'ñ. Yi jāy ajcxy huídibi ca' miibijccixy miipidaaccixy je Dios y'ayuc ytiy'ajt, hue' ajcxy yajnajcixy Dios nej anñdāgyīn co ca' miibijccixy yi' Dios ytiy'ajt co y'ung nigapxy. ¹¹ Jada je' tiy'ajt co Dios ti xymooyīm ajt n'alma yjugy'ajtin huídibi ca' ycixipy ytiyoyipy nimina. Dios y'ung ca' y'alma ycixipy ytiyoyipy nimina, paady yi' ti yaj'oyiy nej jēbi ajt n'alma y'ijtim huinixii huinitiempo. ¹² Pinjaty ti miipidaaccixy Dios y'ung, yi' ajcxy y'alma ca' ycixipy ytiyoyipy nimina. Pinjaty ca' miipidāgy Dios y'ung, yi' ajcxy y'alma cixipy tiyoyipy co y'ōgipy.

Capxycijxin etz capxhuijin

¹³ Jadayaabi ayuc ajcxy nyajnijayiygixp ma jada necy jigix jēbi miipidaaccixipy Dios y'ung, etz jēbi mnejhuīyigixy tiydudāgy co mjugypijccixipy jadūgtecy co anajty ti m'o'ccixy e ca' ajcxy m'alma ycixipy ytiyoyipy.

¹⁴ Jada jotcuyc'ajtin iich ajt nmīd'ajtim co nmībijctzouhuīm Dios jadu'n nej Jesucristo xyñajtz'ane'miīyīm, yi' iich ajt jēbi xymīdouhuīm. ¹⁵ Miid co nnejhuīyīm co yi' ajt xymīdouhuīm ma tijaty Dios nyajmiibijctzouhuīm, paady ycixp nejhuīyīm co nmīd'ajtim tijaty anajty ti nyajmiibijctzou.

¹⁶ Co pinjaty ixy co ymīgūg ypocytuñ huídibi huaad jēbi Dios meecxy, huen miibijctzooyi Dios miid yi' ycixpi, e Dios yajtzināhuīyb pen ca' anajty ooy ymiipocyity je tiibi anajty tuñ. Com ji tūg miipocy huídibi Dios ca' huinmecxy. Pen ti miipocytuñ ca' huaad Dios ocjacmiibijctzooni com ca' yi' y'oc-huinmecxaani. ¹⁷ Tūg'ócy jibic-huinma'ñ huídibi jāy ytumyb, pocy yi', per ji jibic-huinma'ñ huídibi jāy ytumyb, huídi jēbi Dios huinmecxy e ca' y'alma ytiyoyip.

¹⁸ Nejhuīyīm co tūg'ócy pinjaty Dios ti ymōyīi jemybi jot huinma'ñ, ca' yi' y'ocpocytuni. Yi Dios y'ung, huídibi ti ymōoyigixy jemybi jot huinma'ñ, cuend'ajtip yi' ajcxy, ca'ydi je mujcu' xyajhuinma'ñydgōoyigixy.

¹⁹ Nejhuīyīm iich ajt co Dios jadu'n xy'ane'mīm njot nhuinma'ñ etz nejhuīyīm co tūg'ócy jacjadyii naaxhuiñjāy huídibi ca' miipidaaccixy Dios, je mujcu' jadu'n yjot yhuinma'ñ y'ane'mip ajcxy.

²⁰ E nejhuīyīm co yi' Dios y'ung ya y'oy naaxhuiñ e ti xyajnejhuīyīm yi' y'ayuc ytiy'ajt, jigix jēbi nejhuīyīm huinjihuīyīm yajxon je Dios janchypi tudāgypi. Nmī'ijtim ma iich ajt ndzinaayīn je janchypi je tudāgypi je Dios y'ung je Jesucristo. Jada jēdu'n je tiydudāgypi Dios, etz je Dios yjugy'ajtin caminaabi ycacixy ycatigoy. ²¹ Miich ajcxy migūgtijc huídibi ooy ndzocy njihuīyich jadu'n nej ixyipy ngi'm'ung ngi'm'anācīch, ca' nigoo mdzachDios'ajtigixy tijaty huídibi ca' ni ti mic'ajt miidity, jadu'n nej Dios Teedy tzajpjtopy ymic'ajt miidity.

2 SAN JUAN

Yi Mimetzpi Necy Huidibi San Juan Yajniguejx Tüg Mibijcpi Töxyjäybi

¹ Ich Juan huidibi nigohuajc'ajt Dios yjäy. Nyajniguejxpich miich töxyjäy jada necy, miich Dios xyjäy'ajtp, e ti mmijpidägy Jesucristo. Nañ nyajniguejxpich jada necy tüg'óciy miich m'ung m'anác ajcxy. Ooy ndzocy njihuüyich miich ajcxy. Ca' nminaanim ich naydügpajc ndzojcyp njihuüybich miich ajcxy, nañ jadu'n tüg'óciy jäy ajcxy, huidibi hujihuüygixp Dios ytiy'ajt, xychojccixp xyjihüüygixp ajcxy. ² Ich miich ajcxy ndzojccixyp njihuüygixyp com Dios ytiy'ajt yajpatp ma ich ajt njot nhuinma'ñ, etz yi' ijtp huinixi ma ich ajt. ³ Huen Dios Teedy etz ich ajt nHuindzin Jesucristo, yi Dios y'ung oy'ajt may'ajt tuñ müd miich ajcxy, huen xypa'ayoogixy huen xyajjotcugüygixy müd co mguydungixy yi' ytiy'ajt etz mnaychójcigixy mnayjihüüygixy miñ xyipy.

⁴ Ti nminaybadyiijich nijëjity miich m'ung m'anác, e ooy njotcugüyich müd co tıydudägy ajcxy payöy Dios ytiy'ajt, jadu'n nej Dios Teedy ajt ti xyñajtz'ane'müyım. ⁵ Cham njacnimäyich miich ajcxy co jëbi ajcxy mnaychójcigixy mnayjihüüygixy miñ xyipy. Ca' nminaanim hujemy jada tiy'ajt huidibi cham nyajnijayüygixipy. Je' jada je ayuc huidibi oga'n'aty ti nbaatim co ti nmibijcim Jesucristo. ⁶ Co ndzojcm njihuüyım nmigügtıjc, jada je' tiy'ajt co nguyduunim nej Dios ajt ti xyajnajtz'ane'müyım. Jada huidibi Dios ti xyajnajtz'ane'müyım huidibi miich ajcxy ti mbaatcixy, co oga'n ti nmibijccixy Jesucristo, copıcy co ajcxy mnaychójcigixipy mnayjihüüygixipy.

Yi jäy ajcxy huidibi anıdaaccıxp

⁷ Com ji mayjäy ya naaxhuiñ huidibi huin'ımb yi jäy ajcxy. Yi' ajcxy ti puhüactüdy mibijcpıdıjc, yaj'ixpijcp ajcxy co Jesucristo ca' ñayguëxıci ya naaxhuiñ müd ñinıcx. Jadayaabi jäy ajcxy yhuin'ımyb yhueñypııty etz Jesucristo ymıdzip'ajtyp ajcxy. ⁸ Naygüendi'ájtıgıx cı'm. İx mgamıjpidıaccıxy yi' ajcxy y'ayuc. Co ajcxy myajhuin'ıngıxıpy, huin'ıt anajty myajtıgooygıxy je oy'ajt huidibi mbadaangıxyp ma Cristo. Co mguydüngıxıpy Jesucristo ytiy'ajt, huin'ıt mbaatcıxıpy tüg oy'ajt ca'pxypı jııby tzajpjoty.

⁹ Tüg'óciy jäy huidibi ca' cuydungıxy je Jesucristo y'ayuc ytiy'ajt, ca' ajcxy müdity Dios ytiy'ajt ma ajcxy yjot yhuinma'ñ. Je jäy ajcxy huidibi cuydundııb je Cristo y'ayuc ytiy'ajt, ymıd ajcxy Dios Teedy etz je y'ung ytiy'ajt ma ajcxy yjot yhuinma'ñ. ¹⁰ Penı jı pınjaty ñıcxı ma miich ajcxy huidibi yaj'ixpijcp huidibi ca' ytiy'ajtıty, ca' ajcxy mgöbıguıpy ma mdıjcın, e ni ca' ajcxy mjıjp'ixıhuıpy. ¹¹ Com Dios yjäy pınjaty anajty jıjp'ixııyb je jäy ajcxy huidibi yaj'ixpijc huidibi ca' ytiy'ajtıty, hue' je' tundıgooyb ma Dios ytiy'ajt. Hue' je' anajty paady jadu'n nej jıhuıy ti jıjptıgııyñı ajcxy je huingbı ixpijcın huidibi ca' ytiy'ajtıty.

Capıycıjıxın

¹² Oy ich ooy mij may miich ajcxy njamıdmıydägaangıxy per ca' miich ajcxy jadu'n nijayıhuaangıxy necy'am. Hue' janchtıy njıjp'ixııch co cı'm nnıncıxaangıxy jım, e nmıd mıydägaangıxy au'am jıgıx ajcxy ooy jotcuje mnayjihüüygıxıpy.

¹³ Je mdzi' y'ung ajcxy huídibi ya yajpatcixp xyajniguejxp ycapxpocxin, je huídi ajcxy Dios nañ jadu'n ti yhuin'íjxiǵixy. Jadu'n ngapxycíxyich miíd miich. Amén.

3 SAN JUAN

Yi Necy Huidibi San Juan Yajniguejx Gayo

¹ Señor Gayo:

Nguejxypich capxocxin ma miich. Hich miich nyajniguejxyp jada necy. Nnigohuajc'ajtypich ma je mibijcpidijc. Ooy ndzocy njihuïyich miich.

² Miich migüg, ooy nmigüg'adyii. Dios nmibijctzooybich müd miich ycixpi, huen agujc jotcuyc mdzinähuiipy etz mmic'idipy m'oy'idipy. Nejhuïybich co oy m'ity ma Dios. ³ Com oy ti njotcugiyich co je mibijcpidijc ajcxy ymiin ya huidibi jim tsoon ma miich ajcxy, e yi' ajcxy xytiy'ajtmooyich jadu'n nej tiydudägy mdzinäy e nañ jadu'n nej yajxon mguyduni Dios ytiy'ajt. ⁴ Ooy njotcújcidyich jac nigí co tiy'ajt nbaadyich jadu'n nej nmigügtijcich cuydungixy Dios ytiy'ajt.

⁵ Miich migüg huidibi ooy ndzocy njihuïyich, ooy njäygidägyich co oyjäy'ajtin mduñ müd je migügtijc. Nigi oy co oyjäy'ajtin mduñ müd je migügtijc huidibi ca' m'ixy'adyii. ⁶ Yi mibijcpidijc, huidibi ti choon ma miich ajcxy, ti tiy'ajt yejccixy ma je mibijcpidijc ya jadu'n nej miich oyjäy'ajtin mdzachtuñ. Ooy oy mduñ co mmöy yi migügtijc yi ytü'amgixpi e mguejxnaxy yajxon jadu'n nej Dios jäygidägy. ⁷ Yi jadu'mbi jäy huidibi mguejxnajxyp anajty hue' Dios y'ayuc ycixpi yhuidity, e ca' yi' ajcxy ti pijctzoy ma je jäy ajcxy huidibi ca' Dios ytiy'ajt nejhuïyi. ⁸ Copicy nbubejtim ajcxy je mibijcpidijc ajcxy huidibi Dios y'ayuc ycixpi yhuidijtcixy. Co jadu'n nbubejtim, chi jadu'n paady nej jihuïy tú'ciy nduunim müd yi' ajcxy ma Dios y'ayuc capxhuäcxii.

Je Diótrfes yjibic-huinma'ñ

⁹ Ti nnijayiyich jayhuin je mibijcpidijc huidibi nayoöymújcigixp jim. Jim yajpaady tüg jäy huidi xii Diótrfes huidibi ca' cöbiga'ñich n'ayucich etz ngötújcínich. Amij agix jada jäy chachñayjihuiyii, yi' ci'm tzach'ane'mam ma miich ajcxy. ¹⁰ Paady ycixp co nnicxibich jim ma miich ajcxy nyajnimähuamy ajcxy tüg'óciy yi jibic-huinma'ñ huidibi Diótrfes ytumyb, jadu'n nej jibic xyñigapxy xyñi'ojiyich etz jadu'n nej anii yaj'ixpicy. E nañ ni yi' ca' mmüidity jotcuyc'ajtin jadu'n nej chach'idich. Nigi ytundigoy co ca' yajjättäga'ñ ajt nmigügtijc huidibi Dios müd ycixpi yhuidity. E co hich ajt nmigüg pinjaty yajjättäga'ñ, chi yi' capx'aducy e yajpidzimy je mibijcp huidibi jäy yajjättäc, e ca' je' cöbiga'ñ ma miich mnayoöymujctac.

¹¹ Miich hermano, huidibi ooy ndzocy njihuïyich, ca' mguydunipy jada jibic-huinma'ñ. Cuydun janchtiy yi oybi huinma'ñ. Yi jäy ajcxy huidibi oybi tungixp, yi' ajcxy ymiid Dios ytiy'ajt ma yjot yhuinma'ñ. Yi jäy ajcxy huidibi jibic tungixp, ca' yi' ajcxy Dios ytiy'ajt nejhuïyi.

Je Demetrio tüg y'ijxpejt oybi

¹² Yi jäy, huidibi yxii Demetrio, tüg'óciy jäy ajcxy yminaangixy co ooy y'oyjäyity, e janch yajpaady ma Dios ytiy'ajt. Hich nañ jadu'n nmına'ñich co ooy y'oyjäyity yi Demetrio, e miich mnejhuïyb co hich ajt ndiy'ajt janch janch yi'.

Capxycíjxin

¹³ Ooy hich anajty miich mijcajee ayuc njayajmüdmüydäga'ñ. Per ca' nijayihua'ñ necy'am. ¹⁴ Hue' janchtiy njijp'ixyich co nnicxa'ñich tzojc ma miich ajcxy, e nmüdmüydäga'ñich miich ajcxy ci'm.

¹⁵ Jotcujc'ájtciɣ. Yi mibijcpidiɣ ajcxy huidibi ya yajpatp yajnaxpy ajcxy capxocxin ma miich ajcxy. Tun may'ajt yajnájxigich ngapxocxin ma nmigügtičich jim nidüg nidüg etz xibety xibety. Cham ngapxycíxyich, Juan je Apóstol.

SAN JUDAS

Yi Necy Huidibi Judas Nijayiy Je Huidibi Dios Ti Huin'ijxigixy

¹ Hich Judas, tumbich ma Jesucristo ytung, Jacobo xy'uch'ajtpich. Nijayiybich miich ajcxy nidüg'óciy huidibi Dios Teedy ti huin'ijxcixy jëbi mibijccixy yi' y'ayuc huidibi jëbi xyajpocyñihuaatzcixy. Nijayiybich miich ajcxy tüg'óciy huidibi Jesucristo ycuend'aty ymüd. ² Huen Dios miich ajcxy mijcajee xypa'ayoogixy etz xyajjotcugiygixy etz chojccixy xyjihuygixy.

Yi' ajcxy huidibi yaj'ixpijcp anii

³ Miich ajcxy migügtijc huidibi ooy ndzocyich njihuüyich, müd je nüdzoocin ycixpi müd ajt n'alma huidibi miich ajcxy etz hich cham nmüd'ajtim, ooy chachycopicity co nijayihuibich miich ajcxy müd yi mibijcin ajcxy ycixpi, e ngohuanüyb ajcxy co jëbi mic m'ijtcixy ma ajcxy yi mibijcin e ca' m'ixtigihua'ccixy ma yi ayuc tiy'ajt huidibi Dios yejc ma tüg'óciy naaxhuiñyäj.

⁴ Naagity jäy ajcxy ti ytihiygixy ma miich ajcxy ayüch ameech müd anii. Jecy'ajty Dios tiy'ajt yejcy ma yi' y'ayuc co yi jadu'mbi jäy tigoyam ajcxy y'alma müd ypocy ycixpi. Hue' yi' ajcxy jibic jäy huidibi ca' huindzigiygixy Dios. Anüdaacp yi' ajcxy co yminaangixy co Dios ti xypa'ayoohuim etz ti xyhuinmeecxim ajt nbocy paady ycixpi jëbi nduunim huen tiijity huidibi nijot'ajtim. Ca' cöbijccixy je Dios huidibi nHuindzin'ajtim, etz ca' cöbijccixy hich ajt nHuindzin Jesucristo.

⁵ Oy miich ajcxy ti mjanejhuiydaaygixy jada tiy'ajt, per nyajjäymetzcodamy ajcxy jadu'n nej Dios jayijp yajpidzimy jecy'ajty jim Egipto je Israel jäy ajcxy, e jac'axam tzaachytuuñ müd o'cin je huidibi anajty ajcxy nijëjty ca' ymibijccixy. ⁶ Je ángeles huidibi ajcxy ca' yhui'my ma Dios ytung huidibi ajcxy capxycömüdadacy Dios, y'ixmajztay ajcxy y'it chinaydac. Dios je' cham müd'ajtp ajcxy ahuing. Mach ajcxy y'ity agoodztuuby huinixi huinitiempo ixti cooni je mij xii anajty Dios ti yajhuaad'aty, mina anajty tiyduna'ñ naaxhuiñyäj ajcxy müd ypocy ycixpi. ⁷ Jadu'n nej Sodoma etz Gomorra etz jacjadyii mij cajp huinduy agonbi ytundigoyday ajcxy ma jejimbi cajp ycuudungixyp ñinücx chojcin, naygïyejci ajcxy ma je jibic-huinma'ñ. Yëdijctijc ytundigooygixy müd huingbi yëdijc. Je' jadu'n hui'm ijxpejt ma tüg'óciy jäy co je tzaachyp ajcxy paatcixy.

⁸ Jim yajpaady ma miich ajcxy jäy huidibi nejhuüyb co Dios jecy'ajty tzaachytuuñ ángeles ajcxy etz cajp jäy huidibi ajcxy tundigooy. Yi' ajcxy chinaayin jadu'n yi' nej tüg cumäy. Yajjibicciygixy je ñinücx müd pocytunü. Jijpcogapxiygixy je Dios ycotujcin, nigapxcixy ni'ojiygixy je huidibi ajcxy Dios mooyip mij'ajtin. ⁹ Je arcángel, Miguel, je ángel huidibi mij'ane'min müd, co anajty ychiptuñ müd je mujcu', yajcapxyoongixy yaj'ayucyoongixy je Moisés ñinücx, ca'p je' müd'ajty huinma'ñ nicxy yajpocycäy je mujcu' müd nay'ojii. Jëyi janch co nimay: "Yi Huindzin Dios miich xy'ix'ojip." ¹⁰ Per jada jäy ajcxy jibic ooy nigapxcixy huidibi ca' nejhuüygixy. Tügüyb ajcxy yhuinma'ñ müd iyujc animal yhuinma'ñ, etz iyujc animal ca' ajcxy müdity huinma'ñ tiydudägyi. Ci'm jada jäy ajcxy ñayyajhuinma'ñyidigóoyigixy, e jadu'n ajcxy y'alma yajtigoyaangixy.

¹¹ Ypadamyb ajcxy tzaachyp mijcajee müd pocy ycixpi com je' yi' ajcxy ypadumyib nej Caín y'idüch. Müd co meen' tzach'adzojccixy, paady

ñidigooygixy ytüdigooygixy jadu'n nej Balaam ñidigoy ytüdigooy jecy'ajty, e jadu'n ajcxy y'ayoogixy jadu'n nej Coré, co y'o'cy co ycacapxymidohuañ anajty co Moisés oy y'ayucjijpcogapxñiyi. ¹² Yi jadu'mbi jäy tzo'ydu'n yejcp ma miich ajcxy co mgaaygixy m'uuccixy tügmucy miid yi' ajcxy, e jadu'n iixpejt yejccixy co mnaychójcigixy. Caaygixp uuccixp tügmucy miid miich ajcxy agujc jotcuje per ni ca' ajcxy mñidity huindzig'iñ miid ymigügtijc. Jadu'n ajcxy nipaady nej cöbixycuend'ajtpi huidibi ci'm ñaygüend'ájtigixyp, e ca' tungixy cuendi je cöbixy. Jadu'n ajcxy nej joc huidibi ca'pi nñi mñidity, huidibi je poj yajhuidijtip. Jadu'n ajcxy nej quipy huidibi ca' ytiim'aty mina yjapadyü, jayijp y'ocniicxy, e chi jada ytüich, e ytimypidigy miid ñidictz. ¹³ Yi' ajcxy ytundigoyñi ooy cho'ydu'n yecy, tim jadu'n nipaady nej je meyy y'oobigy co ypidigy. Jadu'n ajcxy nipaady nej madza' huidibi ytu' ti yajtigach. Hue' y'ijtcixy pocypa'tci'py huinixñi huinítiempo, mij'agootztuuyb y'idipy ajcxy.

¹⁴⁻¹⁵ Nañ jadu'n Enoc, je mihuixtujcpi co anajty Adán ti yjayijp'aty, yminañ co Dios yhuinma'ñymooyi miid jada ycixpi, e yminañ: "N'ijxich je Huindzin Dios co anajty ymiñ miid janch canaag mil je huidibi ajcxy tudägyity etz huätzip. Co anajty tyduna'ñ ajcxy tüg'óciy naaxhuiñyäj miid ypocy ycixpi, chi yajpocycähua'ñ je jibic jäydijc ajcxy jadu'n nej ajcxy ti ytundigooygixy miid yjibicjäy'ajt etz miid jibic ayuc tübi miid nigapxcixy ni'ojñygixy Dios." ¹⁶ Jada jibic jäydijc ca' ajcxy ni ti mijotcuje'ajtcixy, ooy nigapxcixy ni'ojñygixy ymigügtijc. Jeyi ajcxy yci'm jotcuje'ajt ixtaaygixy. Ycapxcixy amij agix. Ooy oy nigapxcixy nijejty jäy miid co ti oybi padaangixy ma je' ajcxy.

Judas capxhuijp je' ymigügtijc ajcxy

¹⁷ Per miich ajcxy migügtijc huidibi ñich ooy ndzocy, jäymejtzciix je ayuc huidibi jécyip ti najtzcapxñygixy je Huindzin Jesucristo y'apóstoles ajcxy. ¹⁸ Je apóstoles miich ajcxy xyñimay: "Ma anajty xñi tiempo ycixaani, j'adip jäy ajcxy huidibi nixigipy yajxigipy huidibi Dios yje'ajtpy, e chináaygixipy jadu'n nej yi' ajcxy ci'm tzachnijot'ajtcixy jibic-huinma'ñ." ¹⁹ Je' ajcxy yajnaybijc-huäcxñib mibijcpidijc co ca' ajcxy mñidity je Dios yjihu'iñ ymic'ajt.

²⁰ Per miich ajcxy migügtijc huidibi ooy ndzocyich njihuñyich, ijtcix miich ajcxy tudägy ma yi mmibijcin. Jäymejtzciix mibijctzoogix Dios miid je Espiritu Santo ypubejtin. ²¹ Naygüend'ájtigix jigix jëbi Dios xychojccixy xyjihuñygixy ajcxy, e ahuijxcix je xñi mina anajty ñich ajt nHuindzin Jesucristo xymöhuaanim je jugy'ajtin huidibi ca' ycixipy ytigoyipy ni mina miid co ti xypa'ayoohuin.

²² Capxjotcidaaccix pinjaty ca' ti mijpidägy janchypidägy. ²³ Yajmñdmñydaaccix jacjadyii migügtijc jigix ajcxy jëb paatcixy nañ jadu'n nñdzoocin miid ajcxy y'alma. Jadu'n anajty paady nej jihuñy myajpidzimgixy jñinjoty. Yajtungix pa'ayo'n miid jacpinjaty pocytumbi. Naygüend'ájtigix ma yi' ajcxy ypocytunñi, ca' mbocytungixy nañ jadu'n. Jadu'n yi' ajcxy ypocytunñi nipaady nej huit huidibi ti yjibicci'y.

Judas capxycixy miid je' ymigügtijc

²⁴⁻²⁵ Je Dios tügpajcpi, je Dios huidibi xyajnñdzoocim ajt n'alma, je huidibi yjajtaayb ñejhuñydaayb, ymiid je' mic'ajt etz cötujcin jëbi miich ajcxy xy-cuend'adipy jigix ca' mbocycägixipy, etz je' ymiid mic'ajt jigix jëbi xyajja'tcixy agujc jotcuje ma Dios yhuinduu, ma yi' yajpaady miid y'oy'ajtin ymij'ajtin ca' ti mbocymñidity ajcxy. Yi' paatip je oy'ajtin etz mij'ajtin etz mic'ajt etz cötujcin miid nHuindzin Jesucristo ycixpi, tñyip etz cham etz huinixñi. Amén. Jadu'n ngapxycixyich.

EL APOCALIPSIS O Je Huidibi Dios Yajhuin'ijx San Juan

¹ Jayhui'my ity ma jada necy je Jesucristo y'ayuc ytiy'ajt huidibi ca' pin nejhuiy huiñihuñy jecy'ajty. Dios moy Jesucristo jada tiy'ajt jigix ya-jni'ixiydähuipy je Dios ytumbi ajcxy ti anajty tunaanip jadaanip ya naaxhuiñ, e ca' ooy jecy yhuäcxiiba'ñ mina ytuna'ñyii yjada'ñyii. Jesucristo yquejxy jada ayuc tiy'ajt mñd tüg ángel ma Juan. E je ángel yajhuin'ijxy Juan jada y'ayuc etz ijxpejt. ² E Juan yejcy tiy'ajt janchypi tüg'óciy jadu'n nej anajty ti huiñ'ixy ti huiñmidoy. E Juan ñidiy'ajt'ajtpy jada Dios y'ayuc etz nañ jadu'n ñidiy'ajt'aty je ayuc tiy'ajt huidibi Jesucristo yajnejhuñyi.

³ Janch jotcuyc je' pinjaty capxp jada necy etz pinjaty mido'mbñc jada Dios y'ayuc huidibi Juan ñidiy'ajtpy etz ñajtcapxiyb. E jotcuyc je' pinjaty cuydumb tüg'óciy huidibi jaybety ma jada necy, com je xñ je tiempo huingoññ je' mina ytuna'ñyii yjada'ñyii.

Juan nijayñy huixtujc'itpi mibijcpidijc

⁴ ñich Juan nijayñybich yam je mibijcpidijc huixtujcpicypñi huidibi yajpatp jim Asia naaxjot. Huen Dios etz je huixtujcpñi espíritu huidibi yajpatp ma je' y'ane'mdac may'ajt oy'ajt tunipy mñd miich ajcxy etz xymóoygixipy jotcuyc'ajtin. Dios je' huidibi cham ijtp, je huidibi jecy'ajty ijt, etz je huidibi miinaamb. ⁵ Huen Jesucristo may'ajt oy'ajt tunipy mñd miich ajcxy etz xymóoygixipy jotcuyc'ajtin. Jesucristo je' huidibi tydudägy Dios ytiy'ajt yejci, je jayijpi jäy huidibi ti yjugypicy jadüg'oc co y'o'cy, je' nigohuajc'ajtp tüg'óciy pinjaty jugypigip jadüg'oc co anajty ti y'öccixy. Jesucristo nigohuajc'ajtp etz ane'my tüg'óciy reydiyc huidibi ane'mb ya naaxhuiñ. Je Cristo, huidibi xychojcin xyjihuiyim, ti xyñihuaanim mñd ñi'py ma je tzaachypi huidibi mihuaad'ajtim mñd ajt nbocy ycixpi. ⁶ Jesucristo ti xycötujcmooyim etz ti xytungmooyim mñd Dios Teedy, huidi yi' yteedy'ajtpy. Jadu'n ñich ajcxy ndung etz ngötujcin nipaady nej je tung etz cötujcin huidibi reydiyc etz teedytjic ajcxy ymñd. Huen Jesucristo y'idipy cömay huiñixñi huiñitiempo etz huen yi' y'ane'min cötujcin y'idipy huiñixñi huiñitiempo. Jadu'n jada. Amén.

⁷ Cuendtungix ñich n'ayuc, ¡Cristo miinaamb jocjoty e tüg'óciy je mayjäy y'ixa'ñyii! E y'ixamyb je' ajcxy huñijaty Cristo yaj'ayoo yajtzaachypijc. Tüg'óciy naaxhuiñyñy yjihuihua'ñ yäxa'ñ ytaja'ñ ymaya'ñ mñd je'ycixpi. Jadu'n jada. Amén.

⁸ Jadu'n je mijpi Dios huidibi tüg'óciy mic'ajt mñd ymñañ:

—ñich je' huidibi yajtzondacp je naaxhuiñybi, je tzajp etz je huidibi jac-cogixiñyb. Jadu'n ñich nej letra A huidibi yajtzondacp je alfabeto etz je letra Z huidibi cogixiñyb ma je alfabeto. ñich je' huidibi cham'ijtp, etz huidibi jecy'ajtyp ijt etz huidibi miinaamb.

Juan ijxy yi Cristo oybi ymijity

⁹ ñich Juan, miich ajcxy mmigüg, quipxyi mñd miich ajcxy nminaxy nyajnaxyich ayo'n tzaachypi. Quipxyi mñd miich ajcxy ndzinäyich ma Dios y'ane'my. Etz quipxyi mñd miich ajcxy nyajtuñich je mecxtujcin ma ndzinaayin huidibi Jesucristo ti xymooyim. Jim ñich anajty mach n'ityich ma je naax huidibi mejy agujc, huidibi xñ Patmos, mñd Dios y'ayuc ytiy'ajt ycixpi, je ayuc tiy'ajt huidibi Jesucristo xyajnejhuñyim. ¹⁰ Jadu'n tügtecy ti njatyich, hue' anajty tüg domingo xñ co ñich Dios n'ojadajtyich, e Dios yjihui'ñ ymic'ajt ti anajty xymimadactayich njot nhuinma'ñich. Chi nmidooyich jñxc'i'py'amy

tüg huidibi mic capx, jadu'n yi' ycapxin nmidooyich nej tüg trompeta yxüxy.

¹¹ Chi je huidibi xymigapxpich anajty yminañ:

—Hich je' huidibi yajtzondacp etz je huidibi yajcogixiyb tüg'óciy tijaty ya naaxhuiñybi etz tzajpjoty. Jadu'n hich nej je letra A huidibi yajtzondacp je alfabeto etz je letra Z huidibi yajcogixiyb je alfabeto. Cojaay miich ma tüg libro huidibi mhuiñijxyp, e quex je necy jim Asia naaxjot ma je huixtujc picypí mibijcpidijc ma je huixtujcpi cajp: Efeso, Esmirna, Pérgamo, Teatira, Sardis, Filadelfia etz Laodicea.

¹² Chi n'ijxhuimbityich n'ixañich pin hich anajty xymigapxpich. Co nnayjñijxich, huin'it nhuin'ijxyich huixtujc candelero ac tim oori. ¹³ E cujc'amy ma je huixtujc candelero nhuin'ijxyich tim jadu'n nej je jäy huidibi tzoon tzajpjoty (je Cristo), yxoxyity mid tüg huit yjädy anajty mabaad ytecy, e yhuññity ma ycaach mid tüg oorihuñ. ¹⁴ Yi' ycohuajc etz ycohuay janch poob, jadu'n nej lana huidibi janch poob, jadu'n nej nieve ypoobity, e je yhuñ jadu'n nej jñnye'n. ¹⁵ Je' ytecy tim jadu'n nej latón huidibi janch oy, nej jihuñy jñnjoty ornojoty yam ypidzimy. E je ymiydaacin janch mic, tim jadu'n nej canaag mijñi y'a'hich y'agimimy. ¹⁶ E ymid anajty ma a'oygi' huixtujc madza'. E ypidzimy ma y'ahuac tüg espada mejtz'adu'm'amy yjijpity. E yhuññijp jadu'n anajty nej xñ janch mic y'añ.

¹⁷ Co je' nhuin'ijxyich, chi janch ögy oy ngidägyich ma ytecy ymijc, chi xycñixajyich mid y'a'oygi', chi xyñimaayich:

—Ca' mdzig'iy; hich je' huidibi jayijp'ajtp ya naaxhuiñ etz tzajpjoty etz hich je' je huidibi cogixihuamb. ¹⁸ Jugy'ajtpich; ti n'ögyich, e ti njugypicyich jadüg'oc, e jugy'adipich huinixñ huinitiempo. Nmñidich mic'ajt jigix ane'mibich yi' o'cin etz je it ma je öcpi ajcxy y'alma ity. Jadu'n nipaady nej jihuñy nmñididyich je öcpi it ahuaazti. ¹⁹ Cojay cham tijaty mhuiñijxpy mhuiñidooyb, jadu'n nej huidibi tunaanip jadaanip jadachambi xñ tiempo, etz huidibi tunaanip jadaanip jacjiini. ²⁰ E jadu'n yhuimbizimy je tiy'ajt janchypí huidibi ca' pin nejhuñy maabi je huixtujcpi madza' tiibi mhuiñixy ma hich n'a'oygi', etz je huixtujcpi oricandelero. Je huixtujcpi madza', je' je' je ángeles ajcxy huidibi cogapxy'ajtp mid Dios ycixpi ma je huixtujcpi cypí mibijcpidijc. E je huixtujcpi candelero huidibi ti m'ixy, je' yi' je huixtujcpi cypí mibijcpidijc.

2

Je ayuc huiidi yajmoy yi mibijcpidijc jim Efeso

¹ Nijayi' miich je ángel huidibi cogapxy'ajtp jim ma je huidibi ajcxy mibijcp jim Efeso: “Nima' ajcxy co jadu'n yminañ je huidibi huixtujc madza' mid ma y'a'oygi', je huidibi jim yajpatp agujc'amy ma je huixtujcpi candelero, je' jadu'n minamb: ² Hich nejhuñybich tüg'óciy ti miich ajcxy mdumy, jadu'n nej mictägy mdungixy ma Dios ytung, etz jadu'n nej mmimecxtujccixy migügtijc. Nejhuñybich co ca' m'ocmimecxtugaani ajcxy jibicjäydijc, e ti m'ijxmajtcixy je ajcxy huidibi naydijp co Cristo ti huin'ijxigixy, per ca' je' ajcxy ytudägyity, e miich ajcxy ti mnejhuñy co ajcxy ooy y'anñdaaccixy. ³ Nejhuñybich co ooy ayo'n mij miich ajcxy mmñajxcixy myajnajxcixy mid hich ycixp, etz ooy mij mecxtujcin ajcxy myajtungixy, etz ooy janch mic mdungixy mid hich ycixp, e ca' ti mmñdzijpigixy hich ndung. ⁴ Per nejhuñybich ma miich ajcxy mduñdigoy. Ca' miich ajcxy xyajmij'atyich mijcajee, jadu'n nej anajty xyajmij'atyich ajcxy mijcajee co oga'n ajcxy mibijcy. ⁵ Mid jada ycixpi jäyetz miich ajcxy ma oy m'agñajxcixy. Jothuimbijtcix, e tungix nej anajty m'octungixp co ogañ ajcxy mmñbijcy. Pen ca' ajcxy jadu'n mdungixy, chi tzojc n'icxibich ma miich ajcxy, chi huingbi nbidägyibich ma miich ajcxy

xyjapaady, tim jadu'n nipaady nej jihuïy nbicyich yi mgandelero. Jadu'n ndunipyich pen ca' anajty mjothuimbity ajcxy. ⁶ Per njäygidäacypich jadu'n nej miich ajcxy m'ijxtigoydaaygixy mjäydgoydaaygixy je jibicjäydijc ajcxy yhuinma'ñ. Nej je nicolaïtas ajcxy ytungixy, miich ajcxy ca' mjäygidäaccixy e nañ jadu'n ñich ca' njäygidägyich. ⁷ Pinjaty ytädzac müid huen amidoo'ity nej je Espíritu Santo ymína'ñ ma je mibijcpidijc huidibi yajpatp xi ya. Pinjaty madacp ma ymibijcin, ñich yi' nmöhuipy tzinaayin jugy'ajtin ma Dios y'ane'my, jaydeb jotcuje chinahuipy ma Dios y'it, jadu'n nipaady nej jihuïy ajcxy jicxy je quipytim ma Dios y'it huidibi jugy'ajtin yejcp.”

Je ayuc huïdi yajmoy yi mibijcpidijc ajcxy jim Esmirna

⁸ Nijayi' je ángel, je cogapxy'ajtpi huidibi yajpatp ma je mibijcpidijc jim Esmirna: “Jadu'n ymína'ñ je huidibi yajtzondac je naaxhuiñybi etz tzajp etz huidibi cogixihuip, je huidibi o'c e yjugy'aty jadüg'oc: ⁹ ñich nejhuïybich tüg'óciy ti miich ajcxy mdumyb. N'ijxcajpyich nnejhuïybich je m'ayo'n mjotmay ajcxy, jadu'n nej ti myaj'ixhuidijtcixy ti myajpahuidijtcixy. Nejhuïybich co ayooob jäy miich ajcxy, per müid miich ajcxy Dios y'oy'ajtin, e jadu'n nipaady miich ajcxy nej comeeñydijc. Nejhuïybich co nijëjity jäy miich ajcxy xyñigapxyp xyñi'ojñyb. Ñaydiyii ajcxy co yjudíojäyity, e ca' yjanchity. Hue' ajcxy müid y'ijtcixy je mujcu'. ¹⁰ Ca' ni ti mdzigëy miich ajcxy nej mjadaangixy m'ayoohuaangixy. Yi mujcu' miich ajcxy nijëjity xya-jpujxtijccähuamb, m'ocyaj'ijxmadzangixy pen janch miich ajcxy nidüg'óciy myajpatcixy ma Dios. Jadu'ñyi miich ajcxy m'ayohuipy majc xi. Ijtcix tudägy mabaad ajcxy m'öccixy. E ñich miich ajcxy je jugy'ajtin huinixibi nmöhuipy jadu'n nej premio co ti mmadaaccixy ma mmibijcin. ¹¹ Pinjaty müid ytädzac, huen mido'mbiccixy nej je Espíritu Santo nimäy je pinjaty mibijcp Dios. Pinjaty mimadacp cuyduñ Dios y'ayuc ytiy'ajt, ca' je' y'alma ayoohuipy ayoodactuuyb, ca' y'öga'ñ mimejtz'ocpi.”

Je ayuc huïdi yajmoy yi mibijcpidijc jim Pérgamo

¹² Nijayi' je ángel huidibi cogapxy'ajtp jim ma je mibijcpidijc ajcxy jim Pérgamo: “Nijayi' je ayuc co jadu'n ymína'ñ je huidibi y'espada müid mejtz'adu'm'amyb yjipity: ¹³ ñich nejhuïydaaybich jadu'n nej miich ajcxy mdzinaaygix mjogy'ajtcix. Nejhuïybich co miich ajcxy mdzinaaygixy mjogy'ajtcixy ma tüg cajp ma je mujcu' y'ane'my. Per mi'ijtyñi je nxñijich, e ca' m'ixmach je mmibijcin ma ñich. Ni mga'ixmajch je mmibijcin je huin'it xi co Antipas yaj'o'ci jim ma miich ajcxy, tüg ñich nmigüg, je tudägypi testigo, jim je' y'o'cy ma mujcu' chinäy. ¹⁴ Nmüidich tigati huidibi ca' n'oy'ixyich ma miich ajcxy huidibi mdumyb ajcxy jim Pérgamo. Nijëjity miich ajcxy ca' m'ixmadza'ñ je Balaam y'ixpijin, je huidibi yaj'ixpijc jecy'ajty co huen jicxcixy je huidibi anajty tzaadzech quipychech ti yajhuindzigëygyxxy. E nañ jadu'n yaj'ixpic co huen tundigooygixy müid huingbi töxyjäy. ¹⁵ Nañ jadu'n miich ajcxy mmüidity nije' jäy huidibi ajcxy ca' ixmadzaangixy nicolaïtas y'ixpijin, je ixpijin huidibi ñich ca' ndim'ixa'ñich. ¹⁶ Paady jothuimbijtcixy miich ajcxy, yajtigajtzni ajcxy mjot mhuinma'ñ. Pen ca' jadu'n mdunipy, n'icxibich jim tzojc ma miich ajcxy. Chi jada' ndziptunipyich müid yi' ajcxy huidibi midundigooyb ñich ngötujcin huidibi ngapxpich. ñich n'ayuc jadu'n nipaady nej espada. ¹⁷ Pin ytädzac müid, huen mido'mbicy je ayuc huïdibi je Espíritu Santo ñigapxyp ma je huidibi ajcxy Dios y'ayuc ytiy'ajt mibijcip. Pin jada tiydudägy mimadacp cuyduunni Dios ytiy'ajt, ñich yi' nmöhuipy oy'ajtin huidibi Dios yjë'ajtpy. Jada oy'ajt jadu'n nipaady nej maná huïdibi yüch ijtp ma Dios chinaydac. Nañ jadu'n ñich yi' nmöhuibich tüg pi'cpoobtzaa, e ma je

poobtzaa jim yaayity tög xii jemybi huidibi ca' ni pin ijxcabipy, jëyi janchity ijxcabip je xii pin anajty cöbijcp je tzaa.”

Je ayuc huidi yajmoy yi mibijcpidijc jim Tiatira

¹⁸ Nijayi' je ángel huidibi cogapxy'ajtp ma je mibijcpidijc jim Tiatira: “Niima' ajcxy, jadu'n je Dios y'ung ymina'n, je huidibi yhuin miid jadu'n nej jihuïy jinye'n, e ytecy jadu'n miidity nej bronca tibi ytoyhuäch ma jin: ¹⁹ Jadu'n yi' ymina'n: Nejhuïybich tög'óciy ti ajcxy mdumyb. Nejhuïybich jadu'n nej miich ajcxy mijcajee myajmij'ajtcixy Dios etz mdzojccixy mjihuïygixy ymüggtijc; jadu'n nej mmibijccixy mmijpidaaccixy Dios y'ayuc ytiy'ajt; jadu'n nej mictägy mdungixy ma Dios ytung; etz jadu'n nej myajtungixy mecxtujcin ma mdzinaayin; etz nejhuïybich co cham nigi mdungixy ma Dios ytung, ca'ydí jadu'n ajcxy nej myajtzondacy. ²⁰ Ji tög huidibi miich ajcxy mdumyb huidibi ich ca' n'oy'ixyich. Mdzachmimcxtujccixy yi töxyjäy Jezabel huidibi naydijip co ycapxyp Dios y'ayuc e ca' yjanchity. Je' yajnidigooyb yajtüdigooyb ich ndumbi miid anii. Jadu'n je' ymina'n co jëbi huingbi töxyjäy migapxtigooygixy e co jëbi caaygixy jicxcixy je huidibi ajcxy yajhuindzigüyb quipychech tzaadzech. ²¹ Ti ich je Jezabel nmöy tiempo co ixypy yothuimbity, per yi' ca' ixmadza'n yjibic-huinma'n. ²² Jdachambi nyajcähua'nich je Jezabel cijx'am miid pa'm, e jadu'n ajcxy nmöhua'nich ayo'n je yëydijc ajcxy huidibi miid chachtundigoy. Jadu'n ndunipyich pen ca' ajcxy yothuimbijtcixy nej ajcxy chachpadungixy je jibic-huinma'n huidibi je Jezabel ymiid. ²³ E nyaj'öctähuibich tög'óciy ajcxy pinjaty panixp cixyot huinijot je Jezabel y'ixpijin jigix nidüg'óciy je mibijcpidijc ajcxy nejhuïydähuipy co ich je' nejhuïydaayb tög'óciy jäy ajcxy yjibic-huinma'n. Chi nmöhuibich oybi nidüg nidüg jäy pen ti anajty oybi tuñ, o nmöhuibich nidüg nidüg jibicpi pen ti anajty jibicpi tungixy. ²⁴ Per jacjadyii miich ajcxy jim Tiatira ca' mbanixcixy mbayöygixy Jezabel y'ixpijin, e ni ca' mmijpidaaccixy huidibi ajcxy ytippy mujcu' y'ixpijin huidibi tzip huinjihuïyb. Ich miich ajcxy nimaayb co ca'p ich miich ajcxy huingbi ixpijin njacmóoygixipy. ²⁵ Mi'ijtcixy je Dios ytiy'ajt huidibi miich ajcxy miid, ixti cooni anajty nhuimbityich. ²⁶ Pin madacp ma ymibijcin etz pin cuydumb ich ndiy'ajt mabaad anajty je' y'ögy, ich je' nmöhuibich je cötujcin, jaydeb ane'my naaxhuiñjäy ajcxy. ²⁷ Ich je' nmöhuiipy je ane'min cötujcin ma naaxhuiñjäy huidibi Dios Teedy, ich nDeedy, ti xymöyich. E je' ane'mipy miid Dios ymic'ajt. E je' yajhuindigoydähuipy naaxhuiñjäy y'ane'min, tim jadu'n nej jäy püy pochutu'z miid pujxtajc. ²⁸ Nañ jadu'n ich je' nmöhuiipy ich nmic'ajt huidibi nipaady nej je madza' jayhuixtujc. ²⁹ Pin ytädzac miid, pin midoohuamb, huen midoy nej je Espiritu Santo ymina'n ma yi mibijcpidijc nidüg'óciy.”

3

Je ayuc huidi yajmoy yi mibijcpidijc jim Sardis

¹ Nijayi' je ángel huidibi cogapx'ajtpi ma yi mibijcpidijc ajcxy huidibi yajpatp jim Sardis: “Jadu'n ymina'n je pin miid je huixtujcpi Dios y'espíritu, huidibi miid je huixtujcpi madza': Ich nejhuïyb ti mdumyb. Nejhuïybich co cömay ajcxy m'ijtcixy co mmidity yjugy'ajtin huinixibi e ca' yjanchity. Jadu'n miich ajcxy nipaady nej öcpi. ² Cuenditungix miich ajcxy yi mmibijcin, com jago jago ajcxy mgayajtigoydäy yi mmibijcin. Jayajmicpijccixy yi mmibijcin huidibi ajcxy mjacmidity. Ti ich n'ixy co huidibi ajcxy mdumyb ca' yi' yhuädzity ytudägyity ma Dios yhuinduu. ³ Jäymejtzcootcixy je Cristo ytiy'ajt je tibi m'ixpijccixy, je tibi mmidoogixy. Panixcix Cristo ytiy'ajt e jothuimbijtcixy ma yi oybi. Pen ca' mgüendtungixy yi mmibijcin, nicxibich ma miich ajcxy

jadu'n nej tög meetzpi, ni mganejhuühuüygixipy anajty nnicxyich. ⁴ Miich jacmüdni mibijcipi ajcxy jim Sardis huidibi ca'ni ajcxy ymibijcin yajtigooygixy, ca'ni ajcxy ytundigooygixy, tim jadu'n nipaady nej jihuüy ajcxy müdity poob huit huidibi ca' yjibiciy. Yi' ajcxy xymüid'idipich müd huädz jot huädz huinma'ñ, tim jadu'n nipaady nej ypoob huit ajcxy müdity, com ajcxy ypadyii jadu'n. ⁵ Pin mimadacp cuyduñ etz mijpidägy Dios y'ayuc ytiy'ajt, ymüid'adipy ajcxy je huätzpi jot huinma'ñ, huidibi jadu'n nipatp nej poob huit ajcxy müdity. E ni ca' ajcxy yxiü yajjödzip ma je libro ma ycojaayity je tudägyipi jäy ajcxy yxiü. E üch yi' ajcxy ngapxquëxüccixy yxiü ma nDeedyich yhuinduu, e nañ jadu'n ma nDeedyich y'ángeles yhuinduu ajcxy. ⁶ Pin midoohuamb, pin ytädzac müd, huen midoy nej je Espiritu Santo ymina'ñ majaty je huidibi ajcxy Dios y'ayuc ytiy'ajt mibijcip.”

Je ayuc huidi yajmoy yi mibijcipidijc jim Filadelfia

⁷ Nijayi' je ángel huidibi capxy'ajtp ma je mibijcipidijc jim Filadelfia: “Jada ayuc tiy'ajt ñigapxyp je tögpaicpi huätzpi, tögpaicpi janchyp, huidibi ane'my Dios yjäy jadu'n nej David ane'my Dios yjäy jecy'ajty. Je huidibi yaj'ahuatp e co yaj'ahuäch ni pin ca' huaad yaj'aducy. Je huidibi yaj'adujcp e co yi' yaj'aducy, ni pin ca' huaad yaj'ahuäch: ⁸ Cuenditungix nej nmina'ñich: Üch nejhuüybich nej mdungixy. Ti nyecyich mic'ajt ma müch ajcxy huidibi nipaady nej tög tigydac ahuätzpi ma müch mhuinduu, huidibi ni pin ca' huaad yaj'aducy. Nejhuüybich co hueeni Dios yjihu'ñ ymic'ajt müch ajcxy müdity. Per ti mguydungixy üch n'ayuc, e ca' nxüjich xycoyüti. ⁹ Cuenditungix nej nmina'ñich. Yi' ajcxy huidibi mijpidacp Satanás y'ayuc, je huidibi anüdacp ajcxy co ñaydijigixy judíojäy, e ca' yjanchity. Üch yi' ajcxy nmimadägibich jigix yi' ajcxy müch xyhuingojxtinähüipy xyajmij'adipy. E chi nejhuühuip ajcxy co üch müch ajcxy ti ndzocy. ¹⁰ Müd co ti myajtungixy mecxtujcin ma mdzinaayin, ti mguydungixy üch n'ayuc n'ane'min. Paady üch nihua'ñip yajtzögip müch ajcxy ma anajty jäy ajcxy mictägy xyjot'ijxcixy xyhuinma'ñ'ijxcixy ajcxy. Miinipy je xiü je tiempo mina je mujcu' jot'ixipy huinma'ñ'ixipy tög'óciy je mayjäy huidibi yajpatp ya naaxhuiñ. ¹¹ Üch tzojc nnicxa'ñich jüby naaxhuingixy. Mi'ijtcixy yi' Dios y'ayuc huidibi müch ajcxy müd jigix ni pin xycapijcip ajcxy mbremio, huidibi ti mganar'ajtcixy ma Dios. ¹² Pin mimadacp cuyduñ Dios y'ayuc ytiy'ajt etz cuyduñ yajxon, üch yi' nbidägibich mij'ane'mbi ma üch nDios y'it, jadu'n yi' nipaadip nej tög pilar huidibi midinaayb jemxypi ma Dios ytiyc. E yi' ni camina ypidzimipy ma Dios y'it, e njayüybich ma yi' ñinücx üch nDios yxiü, e nañ jadu'n njáayibich je üch nDios ycajp yxiü, je Jerusalén jemybi huidibi tzoön tzajpjoty ma Dios yajpaady. E nañ jadu'n njáayibich nxü jemybi ma yi' ñinücx. ¹³ Pin ytädzac müd huen midoy ti je Espiritu Santo ñigapxyp ma tög'óciy je mibijcipidijc.”

Je ayuc huidi yajmoy yi mibijcipidijc jim Laodicea

¹⁴ Nijayi' je ángel huidibi cogapxy'ajtpi ma je mibijcipidijc jim Laodicea: “Jadu'n ymina'ñ je huidibi janchip tudägyip, je huidibi tudägy yejcp Dios ytiy'ajt e ca' yajtigach y'ayuc, je huidibi yajtzondac tög'óciy tijaty huidibi Dios ti oyduñ: ¹⁵ Nejhuüybich nej mdungixy. Nejhuüybich co müch ajcxy mibijccixy huenjaty, ca' myajtigoydaygixy yi' mmibijcin, e ni ca' ooy mij mmibijccixy. Jadu'n müch ajcxy nipaady nej niü huidibi ni ca' ytichity, e ni ca' y'anity. Jac'oy ixypy co ooy mij mmibijccixy, o co ca' ixypy mdimmibijccixy. ¹⁶ Müd co tim yinjaty tim huenjaty ajcxy mmibijccixy, ca' ooy mmibijcin ymijity ajcxy, e ni ca' ajcxy mmibijcin ytigoydaaygixy, müd jada ycixpi üch müch ajcxy njijpcogapxiüipy müd je ndzip n'éjcinich, tim jadu'n nej jäy

ajcxy ixtzujy huídibi y'ahuac yca'tzojcpy. ¹⁷ Miich ajcxy minamb co ooy ajcxy mgomeeñity, ooy ajcxy mij mdzinaayin mjugy'ajtin mmüidity, e ca' ti ajcxy myajmayajtcixy, e ni ca' miich ajcxy nejhuüygixy co ayo'nduum myajpatcixy. Jadu'n miich ajcxy nipaady nej ayoobitijc, nej huüintzpi, nej huídibi nihuädz ixhuädz huídijtp. ¹⁸ Paady iich miich ajcxy nimaaygixy co copicy ajcxy mbaadip ma iich Dios ytiy'ajt janchypi, huídibi jadu'n nipaadipy nej jihuüy ajcxy mjuuygixy huädz oori ma iich, huídibi ti y'oybidzimy müid jün jigix mgomeeñ'ajtcixip. Nañ jadu'n iich miich ajcxy nnimaaygix co copicy ajcxy mbáatcixip pocyhuinmeecxin ma iich, huídibi jadu'n nipaady nej jihuüy huit oyjatypi poopjatypi mjuuygixy ma iich, jigix mxóxcixipy mninícx ca'ydi tzo'ydu'n mbáatcixipy. Nañ jadu'n iich miich ajcxy nnimaaygix co mbaadip tiy'ajt ma iich nlibro, huídibi jadu'n nipaady nej jihuüy huindzooy mjuuygixy, jigix mdzoydúngixipy mhuin e huin'it ajcxy m'íxcixipy huädz. ¹⁹ N'ojypich etz ndzaachytumyb tüg'óciy pinjaty ndzojcpyich njihuüybich, paady ycixpi miich ajcxy mhuindina'mjijptina' mic iich ndiy'ajt etz jothuümbijtcix nej mbocytungixy. ²⁰ Cuenditungix nej cham nnimaaygix. Jadu'n nipaady nej jihuüy ndinayich ma nidüg nidüg jäy ytijc'aguu e ngojxnojcich ajcxy ytijc agi'. Nbijctzooybich co xyajtigihuüibich ajcxy ma ytijcin. Pinjaty xyyöcmidoobich, e yaj'ahuäch ytijc, tigihuüibich ma yi', e cayipich müid yi', e yi' müid iich. ²¹ Pinjaty cuydundaayb Dios y'ayuc ytiy'ajt, iich je' nmöhuüpy it lugar tzajpjoty quipxy müid iich ma iich n'ane'mdac. Ti nguydundaayich Dios y'ayuc, e nmüidich it lugar ma iich nDeedy y'ane'mdac, paady ycixp jëbi nmöhuüibich miich ajcxy it lugar ma nyajpaadyich. ²² Pin ytádzac müid, pin midoohuamb, huen midoy huídibi je Espíritu Santo ycapxyp majaty mibijcpidijc huídibi canaagpicy yajpatp.”

4

Íbaatcixy capxpaatcixy yi Dios huídibi tzajpjoty tzinaayb

¹ Co jada jadu'n yjajti, chi nhuindicxyich tzajpjoty, e nhuin'ijxyich tüg tijc aguu ahuädz jii by tzajpjoty. E nmidooyich tüg ayuc janch tim jadu'n nej tüg trompeta yxüxy huídibi iich anajty jayijp ti xy'ocmigapxpi, xyñimäyich:

—Pet ya ma iich, cham nyajni'ixihua'ñ tijaty copicy tunaanip jadaanip co anajty jadayaabi xii tiempo ñaxy.

² Chi Dios yjihui'ñ ymic'ajt xymimadactaayich njot nhuinma'ñich, e nhuin'ijxyich tüg ane'mdac jii by tzajpjoty. E ma je ane'mdac jim anajty tüg iñäy. ³ E je huídibi anajty jim iñäy ma je ane'mdac, jadu'n anajty yquëxigy nej tüg tzaa janch oybi janch adicxp. E jühuüidity ma je ane'mdac je Dios yhuätz'ajt quëxigy nej tüg i'ñch janch oycolor huídibi janch adicxp nej tüg tzaa tzuxjatypi. ⁴ Nañ jadu'n jühuüidity ma je ane'mdac jii by anajty iipx madaax silla, e ma je silla iñäy iipx madaax mijjáy, ac poob huit müid. E ymüid anajty ajcxy ma ycohuajc coroni ac tim oori. ⁵ Ma je ane'mdac anajty ypidzimy huídizuc, e ooy anajty enee yjidijtin ñe'my. E ma je ane'mdac huinduu jii by anajty Dios yjihui'ñ ymic'ajt je huixtujcpi, huídibi quëxig nej huixtujc tzinhuaty huídibi ooy mic ytixcy. ⁶ E je tigot ma je ane'mdac huinduu jadu'n quëxigy nej vidrio meyy, janch huädz janch adicxp.

E cujc'amy jühuüidity ma je ane'mdac madaax iyujc huídibi müid mayhuin jahuinduu yajixcipy. ⁷ Je midügpi iyujc tim jadu'n anajty nej tüg jamгаа. Je mimetzpi iyujc tim jadu'n nej tüg huajmang. Je midugigpi tim jadu'n anajty yhuiñyijp nej jäy. Je mimadaaxpi tim jadu'n nej me'ty yqueec-huüidityin. ⁸ Je nimidaaxpi iyujc ymüid anajty ajcxy nidüg nidüg tudujc yqueec, e ymüid

anajty ajcxy yhuiin queecnigixy etz queecpa'tci'py. E ca' anajty ajcxy ypocxy xim tzuum, chachminaangixy:

Santo, Santo, Santo, je Huindzin Dios huidibi tög'óciy nejhuiydaayb, huidibi tög'óciy mic'ajt mïd, je huidibi anajty ji'ajtp, je huidibi cham ji'ajtp, etz je huidibi miinaamb.

⁹ Je iyujc ajcxy huin'igixy etz huindzigiygixy etz yajmij'ajtcixy Dios, etz yajnajxcixy Dioscojuyipy ma Dios je huidibi anajty iñaayb ma je ane'mdac, je huidibi tzinaayb jugy'ajtp huinixi huinítiempo, e ni camina y'ögipy. ¹⁰ Co je iyujc ajcxy jadu'n ytuñ, chi je iipx madaaxpi mijjáy ycojxtinaydaaccixy ma je' yhuinduu huidibi anajty iñaayb ma je ane'mdac. E ooy anajty huindzigiygixy je huidibi tzinaayb huinixi huinítiempo. Pidaaccixy anajty ajcxy ycorona ma je' yhuinduu, cham chachminaangixy:

¹¹ Miich, ich ajt nHuindzin, ich ajt nDios, miich mihuaad co mmidity tög'óciy oy'ajtin mij'ajtin etz mic'ajtin, mihuaad co miich nyajcömayip, mihuaad co miich mid'ity tög'óciy mic'ajt etz mij'ajt. Jadu'n miich mihuaad, com miich ti myajcojy, ti myaj'abadïy tög'óciy huidibi ji'ajtp. Com miich jadu'n ti mdzocy, paady ycixpi tög'óciy tijaty ji'ajttäy.

5

Je libro etz je Dios y'ung, je Cordero

¹ Chi jada' nhuin'ijxyich ma je huidibi anajty iñaayb ma je ane'mdac midity anajty ma y'a'oygi' tög libro abugucy, yjaayity jotjoty'amy etz nigixy'amy, yco'aducyity mid huixtujc selli. ² Chi nañ jadu'n nhuin'ijxyich tög ángel huidibi mij cötujcin mid, yajtiy mid ycapxin janch mic:

—¿Pin jada' janch tudägyip co yaj'ahuädzip jada libro etz migidziydähuipy yi yseli?

³ Ni tzajpjoty, ni naaxhuiñ, ni naaxpa'tci'py ycacá'ity pin tudägyip huidibi mihuaad je libro co yaj'ahuädzip, o oy nigoodi'ajty ja'ixaanip. ⁴ Ich janch yaaxpich mid tajin mayin anajty, com ca' anajty yajpaady pin je libro mihuaad co yaj'ahuädzip, o oy nigoodi'ajty huindicxip. ⁵ Chi nidüg je mijjáy xyñimaayich:

—Ca' myäxy. Chi je' je mic'ajt midpi ma yi judíojäy, je David y'ap y'oc huidibi nipatp nej tög ama'ycaa, yi' ti mimadactäy tög'óciy jibicpi. Yi' mihuaad yi libro yaj'ahuädzip, etz miguejydähuipy je huixtujcpi yseli.

⁶ Chi nhuindicxpejtyich, e agujc'amy ma je ane'mdacin, etz agujc'amy ma je midaaxpi iyujc, etz agujc'amy ma je mijjädijc ajcxy, jim anajty ytinäy je Dios y'ung, je Cordero. Ooy anajty ñiguëxigy chaachi'au nej anajty ayo'n tzaachypi ti yajnaxy. Ymid anajty huixtujc ymu'n, e huixtujc yhuiin, je' je' je huixtujcpi Dios yihui'ñ ymic'ajt huidibi yquejx huindu'my naaxhuiñ. ⁷ Chi je Cordero, je Dios y'ung, ninicxy je huidibi anajty iñaayb ma je mij'ane'mdac, e chi oy cychoy je libro huidibi je mij'ane'mbi anajty ymid ma je a'oy'amybi yci'. ⁸ Co je' anajty ti cychoy je libro, chi je midaaxpi iyujc etz je iipxmidaaxpi mijjáy ycojxtinay'ahuiday ajcxy ma je Dios y'ung, je Cordero, yhuinduu. Ymid anajty ajcxy nidüg nidüg y'arpa etz oori copí ujtzyty mid poom, je' je' anajty nipaady nej ajcxy chajpcapxy capxy je huidibi ajcxy mibijcp Dios. ⁹ Janch y'iyb anajty ajcxy iy jemybi, yminaangixy:

Miich mihuaad co mgiyigy yi libro, e mmiguejydaayi je huixtujcpi yseli. Com miich ti myaj'ögyii, ti mgojuy jäy ajcxy ypocy ma Dios mid mgimni'py. Ti mgojuy ma Dios nidüg'óciy jäy ajcxy ypocy, huen huidibi razity, pinjaty capx huen huidibi ayucity, pinjaty tzomb huen huidibi cajpity huen huidibi naciónity.

¹⁰ Miich ti xymóoygixyich ane'min etz je tung mijpi nej huaad ich ajcxy n'ojadajtcixy nmibijctzoogixy Dios, jigix jëbi ich ajcxy n'ane'ngixy yi naaxhuiñjyäy etz n'ojadajtcixy nmibijctzoogixy Dios mïd jäy ajcxy ycixpi.

¹¹ Chi ich oy nhuin'ixyich e nhuinmidooyich may ángeles ajcxy ycapxin ymïydaacin jühuidity ma je ane'mdac, ma je iyujc ajcxy yajpatcixy, etz ma je mijjäy ajcxy yajpatcixy. E janch canaag millon je ángeles anajty ajcxy. ¹² Janch mic je' anajty ajcxy chachmïnaangixy:

Je Dios y'ung, je Cordero, je huïdibi öc mïd jäy ajcxy ypocy ycixpi, yi' mihuaad paadip ane'm'ajtin, comeñ'ajtin, xpijcin, mic'ajt, cömayin, oy'ajt mij'ajt, etz huin'ïhuin huïnyaaxin.

¹³ E tög'óciy iyujc animal je huïdijaty Dios ti yajcojy ti yaj'abadïy huïdibi jiiby tzajpjoty, etz huïbi ya naaxhuiñ etz naaxpa'tci'py, huïdibi jiiby mejyjoty, nhuinmidooyich co tög'óciy ajcxy chachmïnaangixy:

Tzoc huin'ïhuim tzoc cömayim, tzoc mooyim oy'ajtin etz mij'ajtin huinixi huïntiempo je Dios y'ung, je Cordero, etz je huïdibi ñaayb ma je ane'mdaacin.

¹⁴ Je mïdaaxpi iyujc anajty chachmïnaangixy:

—Jadu'n huen tuñyii jadyii. Amén.

Chi nañ jadu'n je iïpxmïdaaxpi je mijjäy ajcxy ycojxtinaygidactay, chi ajcxy ooy huïndzigïy patjïhuïy je huïdibi huinixi huïntiempo tzinaayb.

6

Je huïxtujcpi selli

¹ Huin'it nhuin'ijxyich je Dios y'ung, je Cordero, quejtzciich tög selli ma je huïxtujcpi chi nmïdooyich, co nidüg je mïdaaxpi iyujc ycapxy, jadu'n nmïdooyich nej enee yjidity, chi ymïnañ:

—Min ya, e chi m'ixipy.

² Chi nhuïndicxpejtyich, chi nhuin'ijxyich tög poob cohuay. E je huïdibi yaj'ñaayb je poob cohuay ymajtz'ijtpy anajty tög tip ma yci'. Chi je' yajmoy tög coronï co yrey'adïpy. Chi jada' choñ tziptunaangixy jigix jacmïmadägïpy ymïdzip.

³ Co je Dios y'ung, je Cordero, yaj'ahuaach je mïmetzpi selli ma je necy, huin'it nmïdooyich je mïmetzpi iyujc ma je mïdaaxpi ymïna'ñ:

—Min ya, e chi m'ixipy.

⁴ Chi ypidzimy jadüg cohuay tzaptzpi ycolor. E huïdibi yaj'ñaayb je cohuay chaptzpi, ycïdigïyi cötujcin co je naaxhuiñjyäy canayyajjotcujc'adïb ajcxy, e ñayyaj'öcigixipy miñ xyipy. E yajmooy tög espada mijpi.

⁵ Co je Dios y'ung, je Cordero, agïtztuudy je mïdugïgpi selli ma je necy, chi nhuinmidooyich je mïdugïgpi iyujc ma je mïdaaxpi, ymïna'ñ:

—Min ya, e chi m'ixipy.

Chi nhuïndicxpejtyich, chi nhuin'ijxyich tög cohuay tzixypi. E je huïdibi anajty yaj'ñaayb je cohuaychixy, ymïd tög pujxtzim ma yci'. ⁶ Huin'it nhuinmidooyich tög ayuc choñ ma je mïdaaxpi je iyujc ajcxy yajpaatcixy, ymïna'ñ:

—Tög denario meeñ chohuïy tög libra trigo; nañ jadu'n tög denario meeñ chohuïy tudujc libra cebada, ca' myaj'ayoohuipy aceite etz vino.

⁷ Co je Dios y'ung, je Cordero, yaj'ahuaach je mïmadaaxpi selli ma je necy, chi nhuinmidooyich co je mïmadaaxpi iyujc ma je madaaxpi ymïna'ñ:

—Min ya, chi m'ixipy.

⁸ Huin'it nhuin'ijxyich tüg cohuay nitzuxy pu'tz, e je huídibi anajty yaj'iñaayb je cohuay, hue' anajty yxi öcpi. Axam anajty ymiiñ je huídibi ane'mb je it ma je öcpi ñimucy. Chi ajcxy yajmoy cötujcin je huídibi yaj'iñaayb je cohuay, jigix yaj'ó'ccixipy je tügpicypi ma je madaaxpicypi naaxhuiñjáy ajcxy. Chi yaj'ögip ajcxy miid tzíp, miid yuuba'm, etz miid iyujc ahua'nbi huídibi ya naaxhuiñ.

⁹ Co Dios y'ung yaj'ahuaach je mimigooxpi selli ma je necy, chi nhuin'ijxyich pa'tci'py'amy ma y'ane'mdac yhuinduu, je' ajcxy y'alma huídibi ajcxy yaj'öcpat miid Dios y'ayuc ycixpi, huídibi anajty ajcxy capxhuäcxixp etz nidiy'ajt'ajtcixp Dios y'ayuc. ¹⁰ Je' anajty ajcxy huídibi yaj'ögy patp miid Dios y'ayuc ycixpi chachminaangixy janch mic:

—Huindzin, janch mijpi janch huätzpi, huídibi cuydundaayb yi m'ayuc huídibi myejc ma ñch ajcxy. ¿Jadu'ñyi jada' mjac-huäcxiba'ñ mina anajty yi jäy ajcxy mdiydunaangixy mdzaachytunaangixy miid ypocy ycixpi huídibi xyaj'o'c ñch ajcxy, yi' ajcxy huídibi tzinaayb naaxhuiñgixy?

¹¹ Huin'it ajcxy yajmoy nidüg nidüg poobhuit, e yajnimay ajcxy co huen jacpooxcixy jayinjaty jahuenjaty, ixti cooni anajty yajca'pxy je mibijcpidijc micho'n, je' ajcxy huídibi quipxy miid miich ajcxy tumb ma Dios ytung, je' ajcxy huídibi yaj'ögy paadipy miid Dios y'ayuc ytiy'ajt ycixpi, tim jadu'n nej miich ajcxy ti mbaatcixy yaj'ögy.

¹² Chi n'ijxyich co je Dios y'ung, je Cordero, yaj'ahuaach je midudujcpi selli ma je necy, huin'it ooy naax yhuiñxijty, chi je xii yajty janch tzixy, jadu'n nej tzixyhuit huídibi co'ögytjic ypidacpy, e je po' y'ahuimbijty nej ni'pyin.

¹³ Chi madza' ooy yca'y naaxcixy tim jadu'n nej piidztim tzuxpi ycäy co micpoj mixidiy. ¹⁴ Chi je tzajp yjihüacni jadu'n nej tüg libro'abidity. Tüg'óciy tungop huídibi naaxhuiñgixy etz huídibi mejy'agujc, cijx chondägy ypidictäy ma anajty y'ity. ¹⁵ Huin'it ñayyützaayi je reydiyc, je mjtungmüdpidijc, generaltjic, comeñydiyc, pinjaty ymic'ajt miid, je tumbidijc etz je midumbidijc ñayyützaayi ajcxy nidüg'óciy majaty tzaajut tzaa'ang. ¹⁶ Tzachnimaaygixy anajty tungop tzaajot:

—Ñigägootcich ñigägootcich, ca'ydi ñch ajcxy njac'ijxi yhuiñyjip je huídibi iñaayb ma Dios y'ane'mdac, e nañ ca'ydi nbáatcixyich je tzaachypi ayo'n huídibi yegamyb Dios y'ung, je Cordero.

¹⁷ Com ti je xii je tiempo yhuaad'ajtni mina Dios etz Dios y'ung y'ahua'ndägaangixy etz tzaachytunaangixy naaxhuiñjáy. ¿Pin je' ocmimadägip ajcxy chip y'ejin?

7

Huídibi anajty ajcxy tiy'ajtmüid ma je Israel jäy ajcxy

¹ Chi co jadu'n yajti, chi nhuin'ijxyich madaax ángeles ajcxy ytinaaygixy ma madaax'itpi naaxhuiñybi ytatzcíy. Adujccixy anajty je midaax'it poj ca'ydi ypoj ya naaxhuiñ, ni ma mejy, ni ma quipy. ² Chi nhuin'ijxyich jadüg ángel ymiiniy anajty xibidzimy'amy, müidity ma yci' je Dios juugypí ysellí. Jadayaabi ángel ooy mic miyaaxy je jamidaaxpi ángeles ajcxy huídibi anajty ajcxy ti ycidigiiyigixy je mic'ajt je cötujcin nej huaad yajhuindigooygixy tijaty ya naaxhuiñ etz ma ñi mejy.

³ Chi je ángel ymina'ñ:

—Ca' ti ayo'n mdungixy naaxhuiñ, ni ma mejy, ni ma quipy chaa, ixti cooni anajty Dios ytiy'ajt y'ijxpejt nbidaacim ma je' ajcxy yhuimbocin, je tibi ajcxy huin'ixy huídibi tungixp ma Dios ytung.

⁴ Chi nmidooyich jadu'ñyi je' tibi anajty ajcxy Dios ytiy'ajt y'ijxpejt ti ymóoyigixy. Migo'px jahuixchiguipx mīdaax mil je' ñaybaati huídibi anajty ajcxy tiy'ajt mīd ma yhuimboc ma nidüg'óciy Israel jāy ajcxy. ⁵⁻⁸ Majmetz mil anajty ajcxy tiy'ajt y'ijxpejt mīdity je Judá jāy, majmetz mil je Rubén jāy, majmetz mil je Gad jāy, majmetz mil je Aser jāy, majmetz mil je Neftalí jāy, majmetz mil je Manasés jāy, majmetz mil je Simeón jāy, majmetz mil je Leví jāy, majmetz mil je Isacar jāy, majmetz mil je Zabulón jāy, majmetz mil je José jāy, etz majmetz mil je Benjamín jāy.

Je mayjāy ajcxy huídibi yxoxip mīd poob huit

⁹ Chi jada' nhuin'ijxyich janch mayjāy chooñ ma canaag nación, hue' ajcxy canaagnax raza'adyii, e capxy ajcxy canaagnax ayuc, etz chooñ ajcxy ma canaag cajp. Hue' je mayjāy ytīnay'ahuiyday ma je mij'ane'mdac huinduu, etz ma Dios y'ung, je Cordero yhuinduu. Janch mayjāy ñimujcy ma je Dios y'ung yhuinduu, ni pīn je' anajty huaad camichoudāy ajcxy. Ac poob huit anajty ajcxy mīd yxoxyity, e ymīd anajty ajcxy tixy'aay ma yci'. ¹⁰ E janch mic anajty ajcxy miyaaxcixy Dios, chachmīnaangixy:

ñich ajt nDios yi' je' tūgpajc huídibi xyajpocyhuaatzim. ñich ajt nDios yi' je' huídibi ane'mdaayb tūg'óciy, e nañ jadu'n yi' y'ung, je Cordero.

¹¹ E nidüg'óciy je ángelestijc anajty ajcxy ytīnaaygixy jūhuídityi ma je Dios y'ane'mdac. E cham je mijjāy ajcxy etz je mīdaaxpi iyujc huíjoj'ihuñy ajcxy ma je ane'mdac huinduu, huindzīgīyigixy yajmij'ajtcixy je Dios.

¹² Chachmīnaangixy:

Jadu'n jada. Amén. ñich ajt nDios, je' mīhuaad huinixii huinītiempo tūg'óciy je ñhuin, je xondaacīn, je oy'ajtin, je xpijicīn, je jāygidacīn, je cōmayīn, je ane'mīn, je mij'ajtin. Amén. Jadu'n jada.

¹³ Huin'it nidūgti je mij jāy ycapxy, e xy'amīdooyich:

—¿Pīn jada ajcxy jada' huídibi poob huit mīd yxoxyity, e ma yi' jada' ti choongixy?

¹⁴ Chi ñich je' n'adzooy:

—Huindzīnich, miich mnejhuñyb.

Huin'it je' xy'adzooyich:

—Jada je' ajcxy tibi je mij ayo'n minajxcixy yajnajxcixy, e ti ypocyhuaatzcixy mīd je Dios y'ung, je Cordero ñi'py, tim jadu'n nej jihuñy yhuit ti yajhuaatzcixy janch poob ma Dios y'ung ñi'py. ¹⁵ Paady yi' ajcxy yajpaady ma Dios chinaydac yjugy'ajttac, e ytungixy xīm tzuum ma Dios ytijc tza-jpjoy. E yi' Dios y'ung huídibi ñaayb ma je mij'ane'mdac, yi' yi' mī'ijttaayb cuend'aty ma yi' yhuinduu. ¹⁶ Ca'p ajcxy jacjihuñyigixipy yuu tidzibi, ni xī'an ycajacnōgīyb ajcxy, ni anbi ycajacyajtzibīyb ajcxy. ¹⁷ Com je Dios y'ung, je Cordero, huídibi cujc'amy yajpatp ma je Dios y'ane'mdac, je' yi' cuend'ajtp ajcxy, jadu'n nej jihuñy cōbixy cuend'aty, e yajnicxip ma je ñi' huätzpi ymuxy huídibi yejcp jugy'ajtin. Dios yajquēgipy yi' ajcxy ytajin ymayīn jigix ca' yjacjīyigixipy yjacyáaxcixipy mīd tajin mayīn.

8

Je mīhuixtujcpī selli etz je poomjogī'ñ ac oori

¹ Co Dios y'ung, je Cordero, yaj'ahuaach je mīhuixtujcpī selli, huin'it y'ijty oy jahuengi cup hora amōñi jīiby tzajpjoy. ² Chi nhuin'ijxyich Dios y'ángeles huixtujc ajcxy ytīnaaygixy anajty ma Dios yhuinduu, e yajmoy ajcxy huixtujc trompeta. ³ Huin'it jadüg ángel mīñ, chi je' ytīnaay'ihuñy ma mesi huinduu ma je Dios ojadajttac. Je ángel ymīd anajty tūg poomjogī'ñ ac oori. Chi

ymooyi poom may'amy huídibi jojcp. E je poomjoc tigiiyb ma Dios yhuinduu quipxi miid juydacin nuucxtacin huídibi je jäy ajcxy ytumyb huídibi Dios ti huin'ixy ajcxy. ⁴Ma je ángel yci'am jim je poomjoc choon ñicxy ma Dios yhuinduu quipxyi miid je oración huídibi ajcxy ytumyb je tiibi ypocyhuaatzcixy. ⁵Huin'it je ángel majch je poomjogi'ñ, chi yaj'ujch miid jinbajc huídibi anajty jim ma je Dios ojadajttaacin, chi najtzjibibi'y naaxcíxy, huin'it ooy yajmidooy jidijtin micpi etz huídizuc e je naax ooy yücxy.

Je maytrompeti

⁶Je huixtujcpi ángeles ajcxy huídibi anajty miid je huixtujcpi trompeti, ñayni'ixiiyi ajcxy co yajxüxaangixy.

⁷Je midügpi ángel yajxuuxy je ytrompeti, e huin'it ooy eneediitz yca'y mihuídidi jin etz ni'py. Chi oy ycäy naaxcíxy. E jahueengi cujc-huäcxy oy nögy je naax, je quipy etz je aay ujtz tzuxjatyp etz nöctay miy.

⁸Je mimetzpi ángel yajxuuxy ytrompeti, chi ooy ycäy meyyjoty jadu'n nej tüg mijcop janch tooyb anajty miid jin, e jahuengi cujc-huäcxy je meyy oy y'ahuimbity ni'py. ⁹E jahuengi cujc-huäcxy oy y'ögy huídijaty anajty tzinaayb ma je meyy. E je maybarco huídijaty anajty ma je meyy, nañ jadu'n jahuengi cujc-huäcxy oy ytimyhuindigoydäy.

¹⁰Chi je midugigpi ángel yajxuuxy je' ytrompeti, e huin'it oy tüg madza' mijpi ycäy. Je madza' jadu'n nipaady nej tüg mijjin huídibi nayyajcodicxim. Je madza' oy ycäy ma jahuen cacujc-huäcxy mijni, etz ma ni müxy. ¹¹Je madza' hue' je' anajty xii'adyii ta'm'ujtz. E je ni jahuen cacujc-huäcxy oy yjajtni ta'm, jadu'n yta'mity nej ta'm'ujtz, e ooy jäy may y'o'cy miid je ni ycixpi co anajty ti y'ahuimbity ta'm.

¹²Je mimadaaxpi ángel yajxuuxy je' ytrompeti, e huin'it jahuen cacujc-huäcxy je xii oy yhuindigooy, e nañ jadu'n je po' etz je madza' jahueng cacujc-huäcxy oy yhuindigooy. E miid jadu'n ycixpi je po' etz je madza' yhuimgixy jahuen cacujc-huäcxy agootz, e jahuen cacujc-huäcxy yticxin ocyejcn ajcxy xim tzuum.

¹³Chi nhuin'ijxyich tüg me'ty anajty yqueec-huidity cuptzajp, e nmidooyich co ymina'ñ janch mic:

—¡Ay! ¡Naaxhuiñjyäy ajcxy ayoobidijc! co anajty trompeti yajxüxy je jatugigpi ángeles ajcxy, huin'it ayo'n ypadañ je naaxhuiñjyäy ajcxy, ayo'n ypadamy ajcxy, ayo'n ypadamy ajcxy.

9

¹Chi je migooxpi ángel yajxuuxy je' ytrompeti, chi nhuin'ijxyich tüg madza' anajty ti ycäy naaxcíxy. E chi je madza' yajmoy je ahuaasti huídibi miid yaj'ahuädzi je ayoodac ma Dios cuend'aty miidity je ca'oybidijc. ²Chi je ángel yaj'ahuaach je jut ma je ayoodac, e ma je jut jiiby ypidzimy jadu'n nej jinjoc huídibi pidzim ma tüg horni. ³E ma je joc ypidzimy ooy maymu' naaxhuiñgixy chachqueec-huidijtcixy ooy, e je mu' ajcxy ymooyi mic'ajt, jadu'n nej ca'ty miidity ytijp. ⁴Chi je' ajcxy yajcötujcmoy co ca' ni ti aay ni ti ujtz yajhuindigóoygixipy huídibi yajpatp naaxhuiñ, ni ujtz ni quipy. Jëyi janchtiy ycötujcin mooyi co huen yajtzaachihuipy je jäy ajcxy huídibi ca' miidity Dios ytiy'ajt y'ijxpejt ma yhuimboc. ⁵Ca' ajcxy yajcötujcmoy co yjäy'aj'ó'ccixipy, jëyi co janchtiy ayo'n ajcxy yegipy migoox po'. E je ayo'n huídibi anajty ajcxy yejcipy jadu'n je' nej co ca'ty jäy yajtzaachiy miid ytijp. ⁶Je huin'it xii je huin'it tiempo jäy ajcxy ooy anajty o'cin ja'ixtaaygixy e ni ca' pátcixipy. Ooy anajty janijot'ajtcixy o'cin, e cöguëgib ajcxy je o'cin.

⁷ Je maymu' jadu'n je' anajty yquëxïgy nej maygohuay huïdibi ni'ixi'ijtcixp co yajnicxáanigixy ma tzip ytuna'nyii. Ymïid anajty je maymu' ma ycohuajc jadu'n anajty quëxïgy nej oori coroni. E je maymu' yhuiñyjïp jadu'n yquëxïgy nej jäy yhuiñyjïp. ⁸ Je maymu' ymïid anajty ycöhuay jadu'n nej töxyjäy ycöhuay, e ytïitz jadu'n nej jamгаа ytïitz. ⁹ E je maymu' ymïid anajty ajcxy jadu'n nej pujx huïdibi mïid ñinïcx cohuangixy. E co ajcxy queec-huïdity, ooy ajcxy yqueec yaj'amüy jadu'n chachne'mïy nej je carro huïdibi cohuay ajcxy yjugujcypy co ñicxcixy ma tzip ytuñyïi. ¹⁰ Je maymu' ymïid anajty ajcxy ypïxy tim jadu'n nej ca'ty ypïxy, e ma ajcxy ypïxy ymïid anajty ytïjp. E ma ajcxy ypïxy mïidity anajty je mic'ajt co jäy ajcxy yajtzaachïhuïpy migoox po'. ¹¹ E je maymu' je' ajcxy yrey'ajtpy je ángel huïdibi nigohuajc'ajtp je ayoodac, hue' xii'adyii hebreo'amy Abadón, e griego'amy yxii'ity Apolión, hue' je yxii yhuimbïdzïmy: je huïdibi yajhuindïgooyb.

¹² Najx je' je ayo'n jayïjpi, e ytïgoy'ity je jametzpi ayo'n co je jayïjpi ti y'ocjadyii.

¹³ Je midudujcpi ángel yajxuuxy je ytrompeti, chi nmïdooyïch tüg ayuc chooñ ma je mïdaaxpi huaj mu'n ity ma je altar ac óoribi, huïdibi anajty ijtp ma Dios yhuinduu. ¹⁴ Je ayuc ymïna'ñ:

—Nïma' je midudujcpi ángel huïdibi anajty trompeti mïd: “Najtzmazdi' yi mïdaaxpi ángeles huïdibi ajcxy coxoch ijtp ma Eufraates mïjnïba'.”

¹⁵ Huin'it oy yajcoguejttuutcixy je mïdaaxpi ángeles, jigix yjäyyaj'o'ccixipy jahuen cacujc-huäcxy huïdibi yajpatp ya naaxhuiñ. Je mïdaaxpi ángeles ni'ixi' je' anajty y'ijtcixy, je huin'it hori, je huin'it xii, je huin'it po', je huin'it jimïjt co anajty yaj'ögaangixy jahuen cacujc-huäcxy je naaxhuiñybi jäy ajcxy. ¹⁶ E nmïdooyïch co ajcxy mïchoy je soldadtïjc huïdibi anajty ajcxy cohuaygïx. E hue' mejtz mïgo'px millón anajty ajcxy ñaybattáayigixy je soldados ajcxy.

¹⁷ Jadu'n nhuin'ijxyïch je cohuay ajcxy, e mïid je ñijäy ajcxy huïdibi anajty yaj'ïñaayb. E je ñijäy ymïid anajty ajcxy pujx ma ycaach, je' mïid ñinïcx cohuaangixy. E je pujx hue' anajty ycolor tzaptz, azul etz pu'tz. Je cohuay ajcxy jadu'n anajty ycohuajc nej jamгаа ycohuajc, e ma ajcxy y'ahuac ypidzïmy nej jïin, nej jïinjoc, etz nej azufre. ¹⁸ E mïid jada jahueng cacujc-huäcxy naaxhuiñyjäy chach'o'cy ajcxy mïd je jïin, je jïinjoc etz je azufre ycixpi huïdibi anajty pidzïmb ma je cohuay ajcxy y'ahuac. ¹⁹ Je cohuay ajcxy ymïid anajty mic'ajt ma y'ahuac etz ma pïxy. Com je' ajcxy ypïxy jadu'n je' anajty nej xoox mïid ycohuajc, e je cohuay ajcxy chach'ahua'ndaaccixy mïid ypïxy.

²⁰ E je jacjadyii jäy ajcxy huïdibi ca' y'o'cy mïd jadayaabi ayo'n, ca' ajcxy yjothuimbïjty ma Dios, ca' ajcxy ixmajch je jibïcpi huïdibi ytungïxp. E ni ca' ajcxy ixmajch nej ajcxy je ca'oybi huindzïgïygixy. Nañ jadu'n ca' ajcxy ixmajch nej ajcxy huindzïgïygixy huïdijaty ajcxy oyduñyïp mïd plata, mïd bronce, etz tzaadzech etz quipychech. Je huïdijaty ajcxy y'oydumyb etz ñïdzejtztuutcixy, ni yca'ijxcixy, ni ycamïdoogixy, ni yca'yöygixy. ²¹ E ni ca' je jäy ajcxy yjothuimbïjtcixy ma Dios, ca' ajcxy ixmajch jadu'n nej ajcxy chachjäyyaj'o'ccixy, jadu'n nej ajcxy tzachcaxpojccixy ymïgügtïjc, jadu'n nej ajcxy huingbi töxyjäy tzachmïgapxtïgooygixy, etz jadu'n nej ajcxy chachmeetzcixy.

10

Je ángel mïd je mutz libro

¹ Nhuin'ijxyïch co chooñ tzajpjoty tüg ángel micpi ñïducyity mïd joc, e mïidity i'ñch ma ycohuajc. Je yhuiñyjïp yquëxïgy nej xii. Je' ytecy jadu'n yquëxïgy nej mïjïinye'n. ² E ma yci' mïidity tüg libro yëphuäcxy, e pidacy

y'a'oydecy mejyhuingíxy, e y'anajtytecy pidacy naaxhuiñgíxy. ³ Chi je ángel oy janch mic yaaxquécy jadu'n nej tüg jamгаа yäxy. E co anajty jadu'n ti yaaxquëgy, chi oy yajmidoy huixtujc jidijtin huidibi ycapx yci'm'ayuc. ⁴ Co je huixtujcpi jidijtin oy ycapxtaaygíxy, chi ñich anajty njaayañich huidibi ti capxy. Chi nmidooyich tüg ayuc chooñ tzajpjoty xyñimäyich:

—Mi'it jada ayuc yüch huidibi yi huixtujcpi jidijtin ti capxy, ca' mjaay.

⁵ Chi je ángel huidibi nhuin'ijxich co mejyhuingíxy etz naaxhuiñgíxy ytinäy, yujcxajy yci' a'oy'amybi tzajpcíxy. ⁶ Chi je ángel capxcödujcy co je Dios huidibi jugy'ajtp huinixi huinitempo, je huidibi yajcojy je tzajp, je naaxhuiñybi, je mejy etz tüg'óciy huidibi jiihy yajpattaayb; e je Dios jadu'n yminañ:

—Ca' jada yjac-huäcxibani mina nguexañich tzaachypi ayo'n ya naaxhuiñ.

⁷ Co yhuaad'ajtnip je xii je tiempo ma anajty je mihuixtujcpi ángel yxuux yajxutzondägy, chi cuyduunip je Dios y'ayuc ytiy'ajt huidibi ca'pin anajty huiñihuüy, je ayuc huidibi je Dios ytumbidijc je profetas ajcxy ñajtzcapxiy jecy'ajty.

⁸ Je ayuc huidibi nmidoohuich, je huidibi anajty ti chooñ tzajpjoty, ycapxy je' jadüg'oc, e xyñimaayich:

—Ñicx miich etz ciyig yi libro huidibi yëphuäcxy yi ángel ymiid ma yci'. Je' je' je' ángel huidibi anajty tinaayb mejyhuingíxy etz naaxhuiñgíxy.

⁹ Chi n'óyich ma je ángel nbijctzooyich co huen xymöyich je pi'clibro, chi je' xyñimaayich:

—Matz e cojiicxnax, e xyajta'mmiiyip mjot e ma miich m'ahuac mjihuühuüpy päg jadu'n nej ceripäg.

¹⁰ Huin'it ñich je pi'clibro ngiyigy huidibi je ángel anajty ymiid ma yci', e chi ñich je' ngöjicxnajxy. Ma ñich n'ahuac njihuüyich janch päg jadu'n nej ceripäg. Co oy ngojiicxnajxtäyich, chi oy y'ahuimbijtni janch ta'm ma ñich njot. ¹¹ Chi mic'amy nyajniimaayich:

—Ñicx miich capxhuäcx jadüg'oc je ayuc huidibi Dios ti xymöy, je huidibi ti mgapxhuäcxy ma je mayñaax maygajp, ma je mayñaciones, huidibi canaag ayuc capxcixp, etz ma je reydijc ajcxy.

11

Je metzpi testigo

¹ Chi jada' nyajmooyich tüg paxy, jahuengi jadu'n anajty yquëxigy jadu'n nej baari huidibi quipx yajhuamb. Chi ajcxy xyñimaayich:

—Pidig e quipxta' yi Dios ytijc, nañ jadu'n quipx je mesi ma Dios ya-jhuindzigiy, etz nañ jadu'n michou naag jäy ajcxy jiihy Dios huindzigiygíxy.

² Je Dios ytiba' ahuing miich je' pidäg, ca' mguipxipy. Com yi' yi' ti ycidigiyii yi jäy ajcxy huidibi ca' yjudiojyity. Yi jäy ajcxy huidibi ca' yjudiojyity ymimadägamyb ajcxy je Jerusaléngajp ma Dios miidity tzinaydac etz ane'mamb ajcxy jiihy huixchiguüpx metz po'. ³ ñich metz testigo nguexipyich ma je cajp ma Dios miidity tzinaydac, e yi' ajcxy capxhuäcxamb ñich n'ayuc tüg mil jametzmigo'px jatugi'px xii. Yxoxyity ajcxy miid huit nicuyjaam ixcuyjaam.

⁴ Je metzpi testigo jadu'n nipaady nej je metzpi olivo cop etz je metzpi candelero huidibi tinaaygixp ma je Dios yhuinduu, je huidibi ñaaxhuiñybi ane'mb. ⁵ Pen ji pin nej jaty midundigoyañ je metzpi testigo, je' ajcxy yajpidzimip je' ajcxy jin ma y'ahuac, yjicxtahuüpy yjindahuüpy je' ymidzip. E jadu'n je' y'ögipy pinjaty anajty je metzpi testigo midundigooyb. ⁶ Je

metzpi testigo ymüd yi' ajcxy cötujc co ahuäctúccixity je tzajp, ca'ydi ytüy jadu'ñyi tiempo anajty ihuäcxixy capxhuäcxixy Dios y'ayuc ytiy'ajt. E nañ jadu'n ymüd ajcxy cötujcin co nñ yaj'ahuimbíjtcixipy ni'py. Yi' ajcxy yajtuniib yaj'jadüib canaagnax ayo'n ya naaxhuiñ, naag'oc anajty ytimdzójccixy. ⁷ E co anajty je metzpi testigo ajcxy yajmaaygixy ytung, chi je iyujc huidibi anajty pidzim ma je ayoodac, je abismo, je' je' tziptuunip müd je metzpi testigos etz yaj'öctähuip je metzpi testigo. ⁸ Chi je metzpi testigo ñinicx ajcxy yhui'mipy mijñigujc mijtügujc jim ma je mij ciudad ma je Huindzin Jesucristo yajcru-udzpejtí, je cajp huidibi tundigooy müd Dios tim jadu'n nej Sodoma etz Egipto ytundigooy jecy'ajty. ⁹ Nijëjity jäy ajcxy huidibi xi ya conaaxip cogajpíp, oy ypinjäyity, oy ti ayuc capxcixy, y'ixipy ajcxy tugüg xijagup je metzpi testigo ñaaxnicx mijtügujc, e ni ca'a'ixihuiipy ajcxy co yajnaaxtigihuyb. ¹⁰ Huidijaty ajcxy tzinaayb ya naaxhuiñ ooy yxondáaccixipy etz yjotcugíyigixipy müd je' ycixpi co je metzpi Dios ytestigos ajcxy anajty ti y'o'ccixy. Chi je mayjäy ajcxy miñ xyipy ñaymóoyigixipy tijaty, e ñayyajniguéjigixipy tijaty. Com je metzpi yëdyjc huidibi nidiy'ajt'ajtp anajty Dios ytiy'ajt, ti anajty ooy ayo'n yejccixy ma naaxhuiñyjäy ajcxy. ¹¹ Codugügxi jacup naxy, chi Dios cijx yajjugypijctäy je metzpi öcpi, e chi ajcxy jadüg'oc ypidigy, e pinjaty je' iix, ooy je' ajcxy chachchigüy. ¹² Je metzpi testigo huidibi nidiy'ajt Dios, midoy ajcxy tüg ayuc janch mic jüby tzajpjoty anajty ñimáayigixy:

—Pejtcix yeeby cix.

Chi ajcxy ypa'ttigüy tzajpjoty ma tüg joc, e iixi ajcxy ymidziptijc. ¹³ E janch huin'ity ooy naax yücx müd tüg mic uix. E tüg picypí je majc picypí jäy jim Jerusalén oy ymijähuiyigixy. E müd je uix ycixpi y'o'cy ooy mayjäy, ñaybaati je öcpi huixtujc mil yëdyjc. E jacjadyii jäy ooy chigüyigixy yjihuiyigixy, e ojadajtixy mibijctzoogixy ooy je Dios tzajpjoty.

¹⁴ Ti ñaxy je mimetzpi ayo'n, chi tzojc ymiñ je midugügpi.

Je mihuixtujcpi trompeti

¹⁵ Chi je mihuixtujcpi ángel yajxuxy je' ytrompeti, e huin'it oy yajmidooy may'ayuc tzajpjoty mic ymíañ:

Je ane'min huidibi ya naaxhuiñ, yi' je' cham müd ajt nHuindzin Dios etz yi' yCristo, e yi' je' ane'mip huinixi huinítiempo.

¹⁶ Je iipxmídaaxpi mijjäy huidibi anajty ajcxy iñaayb ma y'ane'mdac ma Dios yhuinduu, cijx je' ajcxy yhuijo'ihuiydaaygixy, e chi ajcxy ooy Dios íbaly capxpaty, ymíañgixy:

¹⁷ Huindzin Dios, Dioscojuyip nyajnájxcixpich ma miich, huidibi jac mic'ajt müd ca'ydi jac pin. Miich tüg'óciy mdundaayb mjajtaayb mne-jhuiydaayb. Miich je' huidibi ijtnaayb, e ti m'ijtnäy, e m'ida'ñyi, com miich ti m'ijxcugüy je mgötujcin, e ti mbidägy m'ane'min.

¹⁸ Mayñaax maygajp mayñaaxhuiñyjäy ooy yjotmäty ajcxy, müd co ti xii hori paady co miich mdzaachytuna'ñ je jäy ajcxy müd ypocy ycixpi. Ti je xii je hora paady co miich mdiyduna'n je jäy ajcxy tiibi y'o'ccixy. Ti je xii je hori paady co miich mmöhua'ñ je mdumbidijc ypremio, je mdumbidijc huidijaty najtzcaxüy ajcxy miich m'ayuc, huidijaty tudägy'ajtin ti patcixp ma miich, je huidijaty miich mxii xychigüyip, huen ymij'ana'city huen ymutz'ana'city. Ti je xii je hora paady co miich myajtigoya'ñ je pinjaty yajhuindigooygixyp naaxhuiñyjäy ajcxy.

¹⁹ Je huin'it tiempo oy Dios je ytiyc y'ahuäch jüby tzajpjoty, e chi nhuin'ijxyich je caax ma Dios ycötujcin y'ity. Nañ jadu'n oy nhuin'ijxyich huizuc, etz nmidooyich co ooy ñe'my, etz nmidooyich enee yjidijtin, etz njihuiyich tüg uix, etz ooy yca'y eneedüitz mijatypi.

12

Tüg töxyjäy etz je ama'y tza'ñ

¹ Je huin'it hora oy yquëxigüy tzajpcíxy tüg ijxpejt mijpi. Tüg töxyjäy ñidigooyity müd xii, jadu'n nej jihuiy müd tüg huit ñimochity, e jadu'n yquëxigüy nej jihuiy anajty po' yajhuäcpety, e ymüd ma ycohuajc tüg corona ac oori huídibi majmetz madza' müd. ² Jadayaabi töxyjäy hue' anajty ungmijäy'ajtp, e janch yaax tinaayb je' anajty müd je tzaachypi, müd co y'ung anajty yajma'xung'ada'ñ. ³ Huin'it oy yquëxigüy jadüg tiy'ajt ijxpejt tzajpcíxy. Tüg ama'y tza'ñ janch mij, tzaptz ycolor, e müdity huixtujc ycohuajc, majc ymu'n, e tüg corona majaty ycohuajc. ⁴ Je mij tza'ñ müd je' ypíxy jugujcmujcy jahueng cacujc-huäcxy je madza' jim tzajpcíxy. Chi je' najtzyemiyday je maymadza' naaxhuiñyigíxy. Je mij tza'ñ oy yhuäcxiy ma je töxyjäy yhuinduu huídibi anajty ungbadamb tzojc, chi tzüdzá'ñ je pi'c'ungma'xung janch tim jëyi anajty yma'xung'aty. ⁵ Chi je töxyjäy yajma'xung'ajty tüg pi'cyëdyjc, huídibi ane'mip müd Dios ymic'ajt, ymüd yi' tüg pujxtajc huídibi ijxpejt ajt co mij ane'min müdity ya naaxhuiñ. E yajpijcy je y'ung, chi yajnicxi ma Dios etz ma je' y'ane'mdac. ⁶ Chi je töxyjäy yqueecy ñicxy mijtigíduum, ma anajty Dios ti ñi'ixiyii y'it ylugar co jim y'idipy, e jim ymöhuiyb ycaayin y'uucin tüg mil jamejtzmiço'px jatugi'px xii.

⁷ Je huin'it tiempo tüg tzip yajti tzajpjoty müd je' ycixpi. Chi Miguel huídi mij cötujcin müd, müd jadyii y'ángeles ajcxy, ooy chiptuñ müd je ama'y tza'ñ etz yi' y'ángeles ajcxy. ⁸ E ca'p je ama'y tza'ñ ajcxy ymadacy ma je tzip, e ca'p je' ajcxy müd'ajty tigíydac tzajpjoty. ⁹ E jadu'n Dios yajqueecy je mujcu', je ama'y tza'ñ mijjäybi, jilby tzajpjoty. Je' je' je ama'y tza'ñ huídibi xii'ajtp diablo etz Satanás, je huídibi huin'imb tüg'óciy naaxhuiñyjäy. Je mujcu', je ama'y tza'ñ, müd je' y'ángeles ajcxy oy yajcötijnajxtäy ya naaxhuiñ.

¹⁰ Je huin'it hora nhuinmidooyich tüg ayuc janch mic tzajpjoty chooñ, yminañ:

—Ti je xii je tiempo nigoody mina Dios ti nihua'ñ ti yajnidzögy jäy ajcxy ma je mujcu'; mina Dios ti yajniguëxigüy yi' ymic'ajt; mina Dios ti yajniguëxigüy yi' y'ane'min; etz mina Cristo ytigüy ane'mbi müd ymic'ajt. Com ti Dios cötijnaxy je mujcu' huídibi tzachxip ich ajt nmigügtijc, je mibijcpidijc. Je mujcu' anajty tzachxip ajcxy xim tzuum ma Dios. ¹¹ Ich ajcxy nhermanotijc ti yi' mimadaaccixy je mujcu' müd je Dios y'ung ñi'py, etz müd je' y'ayuc ytiy'ajt tiibi mibijccixy, je huídibi ajcxy nidiy'ajtcixp ma yi mayjäy. Ca' ajcxy tzigüy anajty co yjugy'ajt ytigóoygixip. Nigi ni'ixi y'ijtcixy anajty müd ymibijcin oy ytimy'óccixipy. ¹² Jotcujc'ajtcix etz jotcugüygix huídibi jilby tzinaaygixp tzajpjoty. Ayo'n ypadamyb ajcxy huídibi tzinaayb naaxhuiñyigíxy etz mejyjoty. Com je mujcu' ti je' ycidägy ma miich ajcxy müd chip y'ejcin. Com je mujcu' ñejhuiyb co tim jayinjaty jahuenjaty xii tiempo jacmüdity.

¹³ Co je mujcu' ijxy co ti yajcötijnaxy ya naaxhuiñyigíxy, chi ooy pahuidijttacy je töxyjäy huídibi anajty ti yajpi'c'aty pi'cyëdyjc. ¹⁴ Chi je töxyjäy metz me'tyqueec mijpi yajmoy, jigix cöguëgipy je ama'y tza'ñ, ñicxip agueegiccip mijtigíduum ma je ama'y tza'ñ ca' ñijädiiby. Jim mijtigíduum yajmoy ycaayin y'uucin tugüj jimijt ja cup. ¹⁵ Chi je ama'y tza'ñ ooy ñi yajpidzimy ma y'ahuac, jigix y'ahuimbidipy mij ñi huídi je töxyjäy pagujip mij ñijoty. ¹⁶ E yi naax ooy je töxyjäy pubejty, chi je naax y'ahuäcxy, e uuctüztay je ñi huídibi anajty je ama'y tza'ñ ti yajpidzimy ma y'ahuac. ¹⁷ Müd jada ycixpi je ama'y tza'ñ ooy y'ahua'ndacy müd je töxyjäy, chi ñicxy tziptumbi müd je töxyjäy y'ap y'oc

huidibi jacjimip, je' ajcxy huidibi cuydumb Dios y'ane'min ycötujcin, je' ajcxy huidibi cuydumb je ayuc huidibi Jesucristo anajty capxhuäcxyp.

13

Je metzpi ca'oy'iyujc

¹ E jim ndinay'ihuuyich ma püjot mejypäbi. Chi nhuin'ijxyich co tüg iyujc janch oy chigüyñi ypidzimy mejyjoty ymüd anajty huixtujc ycohuajc, e majc ymu'n. E ma ymu'n müdity majc corona. E ma ycohuajc müdity anajty cojaay yxüi huidibi yajjotma'tp Dios. ² Jadayaabi ca'oy'iyujc huidibi nhuin'ijxyich, jadu'n anajty yquëxigy nej tüg cuuxyubijy. E ytecy jadu'n anajty yquëxigy nej osi ytecy, e y'ahuac jadu'n anajty yquëxigy nej jamгаа y'ahuac. Chi je ama'y tza'ñ oy cötujc möy, mic'ajt möy, mij'ane'min möy, je ca'oy'iyujc. ³ E n'ijxyich tüg ycohuajc ma je ca'oy'iyujc co mij chaachijity, nej jihuüy je' yaj'ögüib. Chi je chaach'au oy choogy, e tüg'óciy naaxhuiñjyay ooy janch jihuiyigy huinmaaygixy müd jada ycixpi co ti choocy. Chi je mayjáy ajcxy panixy je ca'oy'iyujc. ⁴ Je mayjáy ajcxy ooy huindzigüygixy je ama'y tza'ñ, je mujcu', com je' co anajty ti möy cötujcin ane'min je ca'oy'iyujc. Chi ajcxy nañ jadu'n ooy huindzigüygixy je ca'oy'iyujc, chachminaangixy:

—¿Pin jada' ocjadu'nip nej jadayaabi ca'oy'iyujc, e pin jada' octziptuunip müd yi'? Ca' pin.

⁵ Chi je ca'oy'iyujc yajmooyi mic'ajt, jaydëbi amij agix capxip etz nigapxip Dios oy jibic, nej huaad Dios yajjotmäty. E nañ jadu'n mic'ajt moy, jaydëbi müd'adipy ane'min cötujcin huixchigüipx metz po'. ⁶ E jadu'n je' tuuñ. Nigapxy ni'ojüy ooy Dios. Nigapxi Dios yxüi oy ca'oy, etz nigapxi ni'ojüy Dios ytijc. Nañ jadu'n nigapxy ni'ojüy huidibi ajcxy jüby tzinaayb tzajpjoty. ⁷ Chi mic'ajt ymooyi, jigix chiptuunip müd je huidijaty mibijcp Dios, huidijaty müd ity Dios, ixti mibaad mimadaaccixy. Nañ jadu'n mooyi cötujcin mic'ajt, jigix ane'mip naaxhuiñjyay huen huidibi razaity huen huidibi cajpity, huidibi capxcixp huen huidibi ayucity. ⁸ Tüg'óciy mayñaaxhuiñjyay ajcxy huidijaty janch ni ycamiiñ yxüi jaybety ma je jugy'ajt libro huidibi je Dios y'ung, je Cordero, ymüd. Dios yhuinma'ñypidacy jayijp ca'ni naaxhuiñybi anajty chondägy co y'ung y'öga'ñ müd jäy ajcxy ycixpi, jaydëbi cijxjaayi ajcxy yxüi ma yi jugy'ajt libro.

⁹ Pinjaty tädz'ac müd, pinjaty mido'mbigamb jada ayuc, huen mido'mbijccixy. ¹⁰ Pen Dios ti yhuinma'ñypidägy co pinjaty ymügüg yajnıcx mach, nañ jadu'n je' ajcxy nıcxıp mach ci'm. Pinjaty ymügüg yaj'öcp nañ jadu'n y'ögıp jadu'n nej ymügüg anajty yaj'ögy. Paady ycıxp yi' ajcxy huidijaty mibijcp Dios, huen yajtungixy müd ymügügtıjc mecxtujcin etz mibijcin.

¹¹ Huin'it nhuin'ijxyich jadüg ca'oy'iyujc chooñ naaxjoty, e ymüd anajty metz ymu'n, tim jadu'n nej pi'ccöbixymang ymu'n. E je' jadu'n anajty ycapxy nej je ama'y tza'ñ ycapxy. ¹² Je mimetzpi ca'oy'iyujc ymüd ane'min huidibi je jayijpi ca'oy'iyujc ti ymöyüi. Je mimetzpi ca'oy'iyujc jadu'n ane'my co je poj naaxhuiñ etz je naaxhuiñjyay huen ojadajtcixy huindzigüygixy je jayijp'atypi ca'oy'iyujc huidibi anajty je chaach'au ti chögy. ¹³ Nañ jadu'n ooy anajty tijaty mijhuinma'ñ tuñ, ixti jin yajcödıgıyb tzajpcıxy, yajcay naaxcıxy ma jäy ajcxy yhuinduu. ¹⁴ E müd je mijhuinma'ñ huidibi je mimetzpi ca'oy'iyujc ytuñ ma je jayijpi ca'oy'iyujc yhuinduu, chi je' huin'ıñ huidijaty ajcxy tzinaayb naaxhuiñ. Nañ jadu'n je' pidacy y'ane'min co yajnıgojtıutcıxıpy je ca'oy'iyujc huidibi anajty tzachıjp müd espada, e ca' y'ögy, jadu'n anajty jactzinäy. ¹⁵ Je mimetzpi ca'oy'iyujc yajmic'ajtmoy co yajjugy'adip je tzaadzech tıibi anajty yajnıgojtıutcıxy, jigix je' ycapxıpy etz nañ jadu'n jigix je' ane'min

pidägipy co yaj'öctähuiipy pinjaty ca' y'ojadadyii. ¹⁶ Chi je mimetzpi ca'oy'iyujc ane'my yi pi'ctijc, mij'anäctijc, mijjäydijc, comeeñydijc, ayoobitijc, tumbidijc, midumbidijc etz jac pinjaty co huen ajcxy tiy'ajt ijxpejt jadu'n pidaaccixy ma ajcxy y'a'oygi', o pen ca', ma yhuimboc. ¹⁷ Jadu'n ytuñ jigix ni ca'p anajty pin huaad ti juy toogy, pen ca' je' ajcxy ymüid je ca'oy'iyujc tiy'ajt y'ijxpejt, o yxii, o je' yxii ñinúmero. ¹⁸ Jadayaabi ayuc chojcpy ixpijcin, pinjaty huinjihu#yb jëbi mihuinma'ñybaady ti número je ca'oy'iyujc müid. Je' je' je número huidibi tüg jäy müidity. Je jäy ñinúmero hue' je' tudujc migo'px jatugipx tudujc.

14

Je nimigo'px jahuixchiguipx milbi yëydijc ajcxy y'iy

¹ Chi jada' nhuin'ixyich cumäyjoty je Dios y'ung, je Cordero, anajty ytinäy ma je cögor huidi yxii Sión. Ymüid anajty migo'px jahuixchiguipx madaax mil jäy huidibi anajty ajcxy müid cojay ma yhuimboc je Dios y'ung yxii, etz yi' yTeedy yxii, je Dios Teedy. ² Nhuinmidooyich tüg ayuc chooñ tzajpjoty, jadu'n nmidooyich nej mijñii y'a'ich, nej enee yjidity. Hue' je' anajty nmidooyich nej mayjäy y'arpa yajcoogixy. ³ Ooy anajty ajcxy #gixy tüg iy jemybi ma je mij'ane'mdac yhuinduu, ma je madaaxpi iyujc jugy'ajtmüidpi yhuinduu, nañ jadu'n ma je mijjäy ajcxy yhuinduu. Jac ni pin je' anajty ca' huaad ixpicy je iy, jëyi ajcxy je huixchiguipx madaax milbi jëbi ixpijccixy je iy, je huidibi ajcxy Dios ti yhuin'ixyii etz ti yajnödögy ya naaxhuiñ. ⁴ Jada je' ajcxy huidibi ca' ajcxy migapxtigoogixy töxyjäydijc, huadz tudägy ajcxy yjot yhuinma'ñ müidity, ca' ajcxy pijccixy. E ypanicxyp ajcxy je Dios y'ung, je Cordero, oy tim ma'ámy ñicxy. Yi' ajcxy je jayijp'atypi jäy ya naaxhuiñ huidibi Dios ti yjuybidzimy ma anajty ijtcixy codoogiy müid ypocy ycixpi. Jadu'n ajcxy nipaady ma Dios Teedy etz ma je' y'ung, je Cordero, nej je tim jayijpi je almas ajcxy huidibi ti yajpidzimy ya naaxhuiñ. ⁵ Ni ti anii ti ycajaypaady ma je' ajcxy. Com ca' ajcxy tibocy müidity, ca' ti xihuin ajcxy müidity ma Dios y'ane'mdac.

Je nidugigpi ángeles ajcxy y'ayuc ytiy'ajt

⁶ Chi nhuin'ijxyich jadüg ángel yqueec-huidity cuptzajp, e ymüid anajty Dios ytiy'ajt jemybi oybi huidibi ijtp huinixii. Hue' je' yajcapxhuäcxip ma huidibi anajty ajcxy tzinaaygixp naaxhuiñ, huindu'my nación, huen huidibi jäyity, huidibi capxp huen huidibi ayucity, huidibi tzinaayb ma huen huidibi cajpity. ⁷ E je ángel ymina'ñ anajty janch mic:

—Tzig#ygix Dios, huin'#gix huinyaaxcix cömaygix Dios. Ti paady je xii je hori mina Dios tiyduna'ñ yajtigoya'ñ yi' ajcxy huidibi jibic tumb. Ojadajtcix je huidibi yaj'oyiiy je tzajp etz je naax, je mejy etz majaty nii ymuxy.

⁸ Co je midügpi ángel ycapxtaay, chi je mimetzpi ángel ymina'ñ:

—Ti ymic'ajt ytigoydäy je Babilonia je mijpi cajp. Yi Babilonia jäy ti yajhuinma'ñydgoydäy je naaxhuiñyjäy müid yjibic-huinma'ñ, paady yi Babilonia jäy ayo'n müidity cham, com je Dios ti ymijotmättäyii ajcxy. Jadu'n Babilonia nipaady nej tüg töxyjäy huidibi huin'#imb yëydijctijc müid anii etz jocñii.

⁹⁻¹⁰ Co je mimetzpi ángel ycapxtay, chi je midugigpi ángel ymina'ñ janch mic:

—Pen pinjaty huindzig#yib yajmij'ajtip je ca'oy'iyujc etz je ñigojtuutin etz nañ jadu'n cöbijccixy je ca'oy'iyujc ytiy'ajt y'ijxpejt ma yhuimboc o ma yci', hue' Dios tzaachytun#b yi jadu'mbi jäy ajcxy mictägy, ypaadip ajcxy Dios chip y'ejcñ. Tim jadu'n nipaady nej jihuñy Dios yaj'ügyii ajcxy je vino nii huidibi yi' ti ni'ixiy. Dios ti ni'ixiy je it ma ajcxy ayo'n pada'ñ, tim jadu'n nipaady nej je

tasi ma Dios yvinon¹¹ ijtp. Chi je' ajcxy ayo'n paadipy ma ytoy je mijj¹¹n m¹¹id azufre ma je Dios y'ángeles yhuinduu etz je Dios y'ung, je Cordero, yhuinduu. ¹¹ Je j¹¹injoc hu¹¹idibi anajty p¹¹idzimb ma anajty je mayj¹¹äy ayo'n paatcixy, p¹¹idzimip je' hu¹¹inix¹¹ hu¹¹in¹¹tiempo. E ni p¹¹ocxin ycaca'ty x¹¹im tzuu¹¹m m¹¹id je p¹¹injaty anajty hu¹¹indzig¹¹iyb pa'tjihui¹¹iyb je ca'oy'iyujc etz m¹¹id y'ahu¹¹inax, o pen ycöb¹¹ijcipy anajty je ca'oy'iyujc yx¹¹ ycojay¹¹ty ma yhuimboc o ma yci'. ¹² Com Dios chaachytunamyb je j¹¹äy ajcxy hu¹¹idibi ijtp m¹¹id je ca'oy'iyujc, paady ycixp copicy co y¹¹ j¹¹äy ajcxy hu¹¹idibi ijtp m¹¹id Dios huen cuydungixy yajxon Dios y'ane'min ycötujc¹¹in etz huen mibijccixy mijpidaaccixy tudägy Jesús, etz nañ jadu'n yajtungixy mecxtujc¹¹in ma ajcxy chinaayin.

¹³ Nmidoohuich t¹¹üg ayuc tzajpjoty chooñ xyñimäyich anajty:

—Cojay jada ayuc: “Jadachambi etz jacnicxpi x¹¹i tiempo, jotcujc ajcxy hu¹¹idijaty öccixp co mibijccixy je Huindzin Jesús.” Je Espíritu Santo yminañ co jadu'n tunamb jadamb, pocxnip ajcxy nej ytungixy, e co ajcxy yjädipy tzajpjoty, chi ajcxy nejhu¹¹huip je' ajcxy tzajpjoty tzinaaybi jadu'n nej je mibijcpi ajcxy anajty oybi ti tungixy.

Co Jesús anajty miñ t¹¹yduñ tzaachytuñ jibicjäydijc

¹⁴ Chi jada' nhuin'ijxyich t¹¹üg joc janch poob. E ma je joc n¹¹icx iñäy t¹¹üg yquëxigy nej je j¹¹äy hu¹¹idibi tzoön tzajpjoty (je Cristo). Je' ym¹¹id anajty ma ycohuajc t¹¹üg corona ac oori, e ma yci' m¹¹idity t¹¹üg hoz janch jippi. ¹⁵ E ypidzimy ma je Dios chinaydac jadüg ángel, je' tzachmiyäxy anajty janch mic je hu¹¹idibi anajty iñäyb jocnigixy, yminañ:

—Pidäg y¹¹ mhoz, e yajpidig y¹¹ cosecha, com ti paady je x¹¹i je hori etz je cosecha ti chamni jibby naaxhuiñ.

¹⁶ Huin'it je' pidacy je' yhoz ya naaxhuiñ, je hu¹¹idibi anajty iñäyb jocnigixy, chi ya naaxhuiñ yajpidigy je y cosecha.

¹⁷ Nañ tim jadu'n huin'it jadüg ángel ypidzimy ma je Dios chinaydac jibby tzajpjoty. Nañ jadu'n je' anajty m¹¹idity yhoz janch jipp. ¹⁸ Chi jadüg ángel ypidzimy ma je Dios ojadajttac hu¹¹idibi anajty cötujc m¹¹id ma je j¹¹in. Chi yaaxi janch mic je hu¹¹idibi anajty je' yhoz janch jippi m¹¹id, chi nimay:

—Pidäg y¹¹ mhoz janch jippi ma y¹¹ muuxycha'm cosecha hu¹¹idibi yajpatp jibby naaxhuiñ, com ti ooy chamni.

¹⁹ Chi je ángel yajnaxxy je' yhoz naaxhuiñ, chi yajpidigy je camuuxycha'm cosecha, chi t¹¹üg'it¹¹y yajnigidacy ma huaad yajhuinm¹¹icxy. Hue' je' yhuimb¹¹dzimy co je' je' je mij ayo'n je m¹¹jtzaachypi hu¹¹idibi Dios yquexamyb m¹¹id j¹¹äy ajcxy ypocy ycixpi. ²⁰ Je camuuxycha'm hue' je' oy yajhuinm¹¹icxy Jerusalén cajppa'. Ma anajty ti y'ocnigidacpi ypidzimy ooy ni'py janch com, ycoody mabaad je cohuay ajcxy m¹¹idity yfreno, e ym¹¹jhuin'ajt¹¹n hue' anajty m¹¹idity tugig migo'px kilómetro.

15

Y¹¹ ángeles ajcxy m¹¹id je huixtujcnajxpi ayo'n

¹ Huin'it nhuin'ijxyich jadüg t¹¹y'ajt ijxpejt janch mijpi tzajpjoty, e janch oy huinmaayñi. Huixtujc ángeles anajty m¹¹idity c¹¹'am je huixtujcpi tzaachypi ayo'n hu¹¹idi cogix¹¹iyñip, e m¹¹id jadu'n ycixa'ñ ytigoya'ñ Dios chip y'ejc¹¹in.

² E nhuin'ijxyich jadu'n nej t¹¹üg mejy ac vidrio, e je vidrio mihu¹¹idid¹¹ j¹¹in. E j¹¹m anajty je j¹¹äy ajcxy hu¹¹idijaty madac co ca' hu¹¹indzig¹¹iy anajty je ca'oy'iyujc etz je' y'ahu¹¹inax, je hu¹¹idijaty ca' ajcxy cöb¹¹ijci je ca'oy'iyujc yx¹¹ ñinúmero. E j¹¹m anajty ajcxy ytinaaygixy nigixy ma je mejy ac vidrio hu¹¹idibi janch ad¹¹cxp ajajp anajty, ym¹¹id ajcxy je arpas hu¹¹idibi ajcxy Dios mooyi. ³ Ooy anajty igixy

je Moisés y'iy, je Dios ytumbi etz nañ jadu'n anajty ñgixy je Dios y'ung, je Cordero, y'iy huídibi minamb:

Mij ooy, etz janch mijhuinma'ñ huídibi miich ti mduñ. Huindzin, miich Dios huídibi jac mic'ajt miidip ca'ydi jac pin. Janch tudägy miich mnii'aa mdu'aa. Miich rey'ajtp huindu'myñaaxhuiñ huinixii huinítiempo.

⁴ ¿Pin miich xyca'octzigíhuamb, Huindzin? ¿Pin miich xyca'occömayaanip mxii? Tug'óciy naaxhuiñjáy xyajmij'adipy xyhuindzigíhuipy, com miich naydügpajc je huätzpi Dios, com miich nyaj'ijxp mgötujcin co ytudägy.

⁵ Co jadu'n yajti, chi n'ijxyich co y'ahuaach je Dios y'it jii by ma Dios ytijc huídibi yajpatp tzajpjoty, ma y'ity je tzaa ma yjaybetyity Dios ycötujcin. ⁶ E ma je Dios yajhuindzigíy yajpa'tjihuiy, jii by ypidziimy huixtujc ángeles. Ymíd anajty ajcxy yci'am huixtujc ayo'n tzaachypí. Hue' anajty ajcxy yxoxity míd huit janch oybi janch huätzpi, e janch adicxp ajajp anajty. Ymíd anajty ajcxy oorihuñ mabaad ycaachyjip. ⁷ Nidüg je mídaaxpi iyujc jugy'ajtmídpí moy je huixtujcpi y'ángeles huixtujc tasi ac tím oorí, janch ujtz je tasi míd je Dios chip y'ejcín. ⁸ E je it ma Dios yajhuindzigíy yajpa'tjihuiy yajpa'tjihuiy ujtztay je míd je jijnjoc huídibi jadu'n ñipatpy nej je Dios y'oy'ajtin etz Dios ymic'ajtin. E ni pin anajty huaad ca' jii by ytigíy ma je Dios ytijc jii by tzajpjoty, ixti cooni je' yci'xtáhuipy je huixtujcpi ayo'n, je tzaachypí huídibi je huixtujcpi ángeles ajcxy ymíd.

16

Je tasi huídibi ujtz míd ayo'n tzaachypí

¹ Chi nmidooyich tüg ayuc chooñ ma Dios ytijc jii by tzajpjoty, nimay anajty janch mic je Dios y'ángeles ni huixtujcpi:

—Nícx ajcxy yajyojctuticx jii by naaxhuiñ yi huixtujcpi tasi huídibi ujtziy míd Dios chip y'ejcín.

² Chi ñicxy je midügpi y'ángel, chi je' ytasi yajtemduty jii by naaxhuiñ ujtz míd may'ayo'n. E tüg'óciy je mayjáy huídibi anajty ajcxy míd ma yhuimboc je ca'oy'iyujc ytiy'ajt, pinjaty anajty je ñigojtuutin huindzigíyip pa'tjihuiyip, chi je' ajcxy ypaati ñibidzim tüg nibüdz janch jibicpi, e huídibi janch pijcp.

³ Je mimetzipi y'ángel yajyojctuty je' ytasi huídí anajty ujtz míd ayo'n mejyhuingíxy. Chi je mejy y'ahuimbijty ni'py, jadu'n nej jihuiy öcpi ñi'py. E huídijaty iyujc jii by tzinaayb mejyjoty, cijx je' y'öctäy.

⁴ Je midugígpí y'ángel yajyojctuty je' ytasi huídí anajty ujtz míd may'ayo'n maajaty je miiñi, etz maajaty nii ymuxy, nañ jadu'n ac ñi'py je' y'ahuimbijttay. ⁵ Chi nmidooyich co je ángel ymína'ñ huídibi ane'mb je nii:

—Huindzin Dios, tudägy mduñ co ti mdiyduñ je naaxhuiñjáy ajcxy míd ypocy ycixpi, e jadu'n ti mguexy mij ayo'n ya naaxhuiñ, Huindzin Dios, janchypí huätzpi miich, huídibi ijtnaayb etz ti m'ijtnäy. ⁶ Com je naaxhuiñjáy ajcxy tundigooy co ajcxy teemi yojci je mibijcpídijc ñi'py, je huídibi mhuin'ijx, je huídibi ajcxy miich m'ayuc najtzcaxiiyb anajty. Paady ycixp miich je nii huídibi yi naaxhuiñjáy y'uuccixyp, ti myaj'ahuimbity ni'py, com jadu'n ajcxy mihuaadity je tzaachypí míd ajcxy ypocy ycixpi.

⁷ Nmidooyich co pinjaty ma je it ma yajhuindzigíy Dios, ymína'ñ:

—Janch jadu'n, Huindzin Dios, huídibi tüg'óciy mic'ajt míd, míd mdiy'ajt etz míd mdudägy'ajtin, ti mdiyduñ je naaxhuiñjáy ajcxy míd ypocy ycixpi.

⁸ Je mímadaaxpi Dios y'ángel yajyojctuty ma je xii je' ytasi huídí anajty ujtz míd Dios chip y'ejcín. Chi je xii yajmoy ymic'ajt co jáy nögiib míd je' yjiiñ. ⁹ E tüg'óciy jáy ajcxy yxidzaydaayi janch mic. E ni ca' ajcxy yhuinma'ñ

yajtigajch, ni ca'ojadajtcixy ni ca' cömaygixy Dios. Nīgi ajcxy ooy jibic Dios nigapxy ni'ojñy, je Dios huídibi ane'mdaayb tüg'óciy ayo'n mïd ymic'ajt.

¹⁰ Je mimigooxpi y'ánel yajtemduty je ytasi, huídi anajty ujtz mïd Dios chip y'ejin, ma je ca'oy'iyujc y'ane'my etz ma tüg'óciy it lugar ma je ca'oy'iyujc y'ane'min, e huin'it oy ycoodzygidactäy. Yi jäy ajcxy ooy ytoodz oc'adzütmúccixni mïd je ayo'n tibi anajty ytuñyii yjadyii. ¹¹ Per ni jadu'n ajcxy ca'ixmajch je jibicpi huídibi anajty ajcxy ytumyb. Nīgi ajcxy ooy oyñinej ycapxcixy etz ni'ojñygyxy Dios tzajpjoty mïd je jübii pa'mii etz je nibüdz ycixpi.

¹² Je midudujcpi y'ánel yajtemduty je ytasi huídi anajty ujtz mïd Dios chip y'ejin ma je Eufrates mijñii. Chi je mijñii ytich jigix jëbi ajcxy je reydiyc ñaxy huídibi ajcxy tzoomb xibidzimy'amy.

¹³ Chi nhuin'ijxyich co ypidzimy ma je ama'y tza'ñ y'ahuac, etz ma je ca'oy'iyujc y'ahuac, etz ma je profeta falso y'ahuac ypidzimy tugig ca'oybi. E je tugigpi ca'oybi jadu'n anajty yquëxigy nej tugig Tuc. ¹⁴ E je tugigpi Tuc hue' ajcxy ca'oybi ymïd, e tungixy anajty mijhuinma'ñ mïd je mujcu' ymic'ajt. E oy ajcxy huoomucy huídijaty anajty rey'ajtp huindu'my naaxhuiñ, jigix je' ajcxy chiptungixipy mïd je mijpi Dios huídibi tüg'óciy mic'ajt mïd, co anajty je xii je tiempo yhuaad'ajtni huídibi Dios ti yajniğodugiy. ¹⁵ Jadu'n Dios ymina'ñ:

—Cuenditungix ich n'ayuc. Ameech nhuimbida'ñich naaxhuiñ jadu'n nej meetzpi ameech nicxy meech tijaty. Paady ycixp jotcujc pinjaty ni'ixi xy'ahuijxpich, je huídibi ypocy ti ymecxyii, e tudägy'ajtin ti paady ma ich jigix ca' jadu'n paadip nej tüg jäy huídibi yhuít ti meechyii, e jadu'n je' yhuim'y nihuädz, e tzo'ydu'n jihuüy co jäy yhuindicxyii. ¹⁶ Chi je tugigpi ca'oybi huoomujctay ajcxy je reydiyc ma tüg it huídibi yxii Hebreo'amy Armeğedón.

¹⁷ Je mihuixtujcpi angel yajyojctuty je' ytasi jim pojoty, e ma je it ma ajcxy huindzigiy Dios etz ma je' y'ane'mdac tzajpjoty, jüby tüg ayuc chooñ janch micpi ymina'ñ anajty:

—Ti ytuñyii yjadyii.

¹⁸ Huin'it ooy yajti huídzuc, ne'min micpi etz jidiitin, ooy naax yücxxy mïd tüg uyx janch micpi, niminaabi jadu'n ycajadyii maabi jäy chinay'igtigixy naaxhuiñ. ¹⁹ Chi je mij ciudad, je Jerusalén, oy yhuäcxy tugig picy, nañ jadu'n je may ciudad huídibi huindu'myñaaxhuiñ, cijx ymijähuidäy. Chi Dios jäymejtzcoty je Babilonia cajp nej je jäy ajcxy jim ytundigooygixy, e chi quejxy may ayo'n jim mïd chip y'ejin ycixpi. ²⁰ Tüg'óciy je naax mejy'agujcpi ytigoyday. Etz tüg'óciy tungop naaxhuiñgixy cijx je' ytigoydäy. ²¹ Nañ jadu'n ooy ycäy chooñ tzajpjoty eneeditz mijjatypí majaty jäy ajcxy, janch jempxy anajty je eneeditz, tügiatypí huixchiguüpxy kilo. Chi jäy ajcxy ooy oyñinej nigapxy ni'ojñy je Dios mïd je eneeditz ycixpi, com ooy je' mij chachajti je ayo'n je castigi.

17

Je töxyjäy jibictzinaaybi chaachypí ycastigi

¹ Nidüg je huixtujcpi ángeles huídibi anajty ajcxy mïd je huixtujcpi ytasi ymiiñ. Chi ajcxy ymïydacy mïd ich, xyñimaaygixich:

—Min yam, miiñ nyajni'ixiy je tzaachypí huídibi ypadamyb je töxyjäy pocytumbi, huídibi iñaayb mejyhuingixy. ² Je reydiyc ya naaxhuiñ ti ooy ytundigooygixy mïd jada töxyjäy, e je naaxhuiñjäy ajcxy ti ooy huinma'ñyđigooygixy mïd jada töxyjäy ypocytunii huinma'ñ, jadu'n nej jihuüy ajcxy ooy ti ymúucigixy.

³ E Dios yjihui'ñ ymic'ajt xyajcumäyich e cumäyjoty xyajnicxyich je ángel mijtígíduum. E jim n'ijxyich tüg töxyjäy yaj'iñäy tüg ca'oy'iyujc huídibi ycolor tzaptz, e janch niducy miid pinjaty yxii cojaayip huídibi yajjotma'tp Dios, e ymiid anajty huixtujc ycohuajc etz majc ymu'n. ⁴ Je töxyjäy hue' anajty yxojx miidity miid huit janch oyjatypi, ycolor ucy etz tzaptz, ooy anajty yaj'oyguëxigy miid oori, miid pi'ctzaa janch oybi etz perla. Ymiid anajty ma yci' tüg tasi ac tim oori janch ujtz je' anajty miid jibic-huinma'ñ huídibi ca' y'oyjäygidaacnity, huídibi pocyunii huinma'ñ miid. ⁵ E ymiid anajty cojaay tüg xii ma yhuimboc huídibi ca' pin huinjihuüy. Je letra jadu'n ymina'ñ: "Je mijpi Babilonia, huídibi nigop'ajtip pocyunii huinma'ñ etz tüg'óciy tijaty ca' y'oyjäygidaacnity ya naaxhuiñ." ⁶ Mic'amy ich oy nhuinma'ñ nyajmiñ nyajmech co je töxyjäy hue' je' anajty ti yaj'o'ccixy je huídibi ajcxy mibijcp Dios etz huídibi ajcxy Jesús yjäy'ajtip, e jadu'n nipaady nej jihuüy je töxyjäy ti ooy ymügyii miid je mibijcpidijc ñi'py. Co jadu'n nhuin'ijxyich, chi ooy ngijxy ngüejtyich njihuüy nhuinmaayich. ⁷ Chi je ángel xyñimaayich:

—¿Nej co mgixy mgüety? Ich miich nyajnimähuipy nej yhuimbídzimy huídibi ca' pin huinjihuüy ma yi töxyjäy etz ma yi ca'oy'iyujc huídibi yaj'iñäy, huídibi ycohuajc huixtujc miid etz majc ymu'n. ⁸ Yi ca'oy'iyujc huídibi ti m'ixy, je' yi tiibi chinäy e cham ca'p je' ma. Chi ypidzimipy ayoodactuuyb, jayijp ma anajty ca'ni nicxy y'ayoy ytigoy tücci'yi. E je jäy ajcxy huídijaty tzinaayb naaxhuiñ, e ca'p yxii y'ity cojaay ma je jugy'ajt libro huídibi oyiiy ca'ni anajty naaxhuiñybi chondägy. Ooy je' ajcxy huinmäyigixipy jihuüyigixipy co íjxcixipy je ca'oy'iyujc huídibi jecyip ti y'octzinaaybi, e cham ca' je' ma, e chi jada' jadüg'oc yhuimbida'ñ.

⁹ Ya ii tigati pin jébi huinjihuüy je huixtujcpi cohuajc, je' je' je huixtujcpi copjot ma je cajp y'ity. E je cajp jadu'n je' nipaady nej jada töxyjäy pocyumbi. ¹⁰ Je huixtujcpi cop jadu'n ajcxy nej huixtujcpi rey. Ma je huixtujcpi rey migoox je' ajcxy tiibi ymic'ajt ytigooygixy. Nidüg je' cham y'ane'my. Je jadügpi ca'ni je' ymiñ. E co je' ymiinipy je huídibi cogixiyb, ca'p je' mijcajee yhuäcxibipy. ¹¹ Je ca'oy'iyujc huídibi jecyip tzinay, e cham ca' ma, je' je' je miductujcpi rey, oy je' yjajéjity nidüg ma je nihuixtujcpi rey. Huin'it je' ñicxnipy ayooobi jottigooybi tücci'yi ayoodactuuby.

¹² Je majcpi mu'n tiibi m'ixy, je' je' je majcpi rey huídibi ca'ni ajcxy ytigiygixy ane'mbi. E cidigihuüib ajcxy ycötujcin co yrey'ajtcixipy tüg hora quipxyi miid je ca'oy'iyujc. ¹³ Jada majcpi rey ajcxy tú'ciy ajcxy y'ijtcixy, tú'ciy ajcxy yhuinma'ñ, e yegipy ajcxy y'ane'min ycötujcin ma je ca'oy'iyujc. ¹⁴ Tziptuunip ajcxy miid je Dios y'ung, je Cordero. E je Cordero ymimadactähuipy je' je majcpi rey ajcxy. Com je' je' tügpajc Huindzinip ma pin janaydíjip huindzin. Je' je' tügpajc reyip jac mic'ajt miidpi ma je reydiyc ajcxy. E pinjaty Cristo miid y'ity, Dios je' ti huin'ixy, e tudägy je' panicxy Dios y'ung.

¹⁵ Nañ jadu'n je ángel xyñimaayich:

—Yi mejy tiibi m'ixy ma je töxyjäy pocyumbi iñäy, hue' je' jadu'n nipaady nej maygajp, nej mayñación ma mayjäy chinaygixy huídibi capxcip canaagnax ayuc. ¹⁶ Je majcpi mu'n tiibi m'ixy ma je ca'oy'iyujc, je' ajcxy ca'ixa'nip catzoga'nip je töxyjäy pocyumbi. Chi ajcxy ix'ijxnip je töxyjäy pocyumbi, yajhui'mipy ajcxy nihuadz. Chi ajcxy je töxyjäy pocyumbi ñinicx tzu'tzipy, e nöccixipy miid jin. ¹⁷ Dios ti pidägy ma ajcxy y'aa yjot huen tungixy nej Dios tzocy, miid co anajty ti pidaaccixy tú'ciy yhuinma'ñ. E cötujc möhuaangixy ane'min möhuaangixy co yrey'adipy je ca'oy'iyujc, ixti cooni yajcuydundähuipy je ayuc huídibi Dios anajty ti capxy. ¹⁸ Je töxyjäy

t̄ibi mhuin'ixy, je' je' je mij cajp huidibi ane'mdaayb je reydiyc ajcxy huindu'myñaaxhuiñ.

18

Babilonia cajp oy yhuindigooy

¹ Co jada jadu'n yjajti, chi nhuin'ijxyich jadüg ángel ycidägy naaxhuiñgixy, chooñ tzajpjoty müid ymij'ane'min ymijcötujcin, e ooy je naax yaj'anüy müid je yt̄icxin yjajin. ² Chi je ángel ooy mic yaaxqueecy ymina'ñ anajty:

—Ti ymic'ajt ytigooy, ti ymic' ajt ytigooy je mijpi Babilonia cajp, e hue' ti y'ahuimbity mujcu' chinaydac, etz canaagnaxpi ca'oybi ymaadac chinaydac, etz ti y'ahuimbity joonmaadac joondzinaaydac, je joon ajcxy huidibi ca' yhuädzity, huidibi ca' y'oyjäygidacnity. ³ Com ti je mayjäy huidibi tzinaayb ma tüg'óciy nación yhuinma'ñyidigooygixy müid je Babilonia yjibic-huinma'ñ pocytunü huinma'ñ. Ti je reydiyc huidibi ane'mb ya naaxhuiñ müid ytundigooygixy je Babilonia. Nañ jadu'n je ajuybi adoocpi ajcxy, huidibi ya naaxhuiñ yajpatcixy, ti oy ymeeñybatcixy müid je Babilonia pocytunü ñegocio. Je Babilonia jadu'n yi' nej tüg töxyjäy jibic-huinma'ñ müidpi.

⁴ Chi nmidooyich jadüg ayuc chooñ tzajpjoty, e ymina'ñ anajty:

—Pidzimgix ma yjiibi cajp com ich miich ajcxy një'ajtpy, jigix miich ajcxy ca' m'aminmugipy ma yi' ajcxy ypocy, e ni xycapaadip miich ajcxy je ayo'n tzaachypi huidibi Dios yquexamyb ma je Babilonia cajpjäy. ⁵ Yi' jadu'mbi cajpjäy ypocy ti oy mayñyñi e Dios yi' ajcxy tzachytunü müid ajcxy ypocy ycixpi. Dios yjäymejchp yi' yjibic-huinma'ñ ajcxy huidibi ti tungixy. ⁶ Dios ymoyhuimbidity je tzaachypi yi' Babilonia cajpjäy, jadu'n nej ajcxy yi' je' tzaachytuñ Dios yjäy ajcxy, Dios ymoyhuimbidity je Babilonia cajp tzaachypi mejtz jadu'ñi ca'ydi jadu'n nej yi' ti yecy. ⁷ Mo' yi' Babilonia cajp yi' tzaachypi ayo'n, tim jadu'n nej yi' ti ñaymöyü ma yi' chinaayin etz ñayjihuiyi amij agix. Yi' ymina'ñ jotjoty huinma'ñjoty: “Ich mij'ane'mbi ich. Ca' nyajpaadyich nej tüg co'ögytöxyjäy müidity tajin mayin. Ni nga'ixipyich jüyin yaaxin.” ⁸ Müid je' ycixpi tügxiyi ymiinipy je mij'ayo'n o'cin, tajin mayin, jüyin yaaxin etz yuuba'm ma je Babilonia cajp. Chi ninöghuipy je Babilonia cajp müid jin. Com yi' Huindzin Dios ooy yi' ymijity, e yi' ti yajpocycäy yi' Babilonia cajp, huidibi nipatp nej tüg töxyjäy pocytumbi.

⁹ Je reydiyc ya naaxhuiñ huidibi jibic-huinma'ñ pocytunü huinma'ñ tungixp quipxy müid je Babilonia jäy, chi ajcxy ytáxcixipy ymáygixipy yjüygixipy yáaxcixipy co anajty ijxcixyp je Babilonia cajp jinjoty co anajty ytooybicy.

¹⁰ Jiguem ajcxy yjacmij'ijxcixipy müid co anajty chigüygixy co páatcixipy ayo'n quipxy müid Babilonia, e yminángixipy:

—¡Ay, miich Babilonia mij cajp, huidibi ooy mgapxpaadyity, ooy mmijity, ooy mmic'ajt müidity! Per janch tim tüg jaxigy ti xyñimiiñ je' ayo'n huidibi Dios ti quexy müid mbocy ycixpi.

¹¹ Je ajuybidijc adoocpidijc huidibi ajcxy naaxhuiñ jüygixipy yáaxcixipy ajcxy müid je Babilonia cajp ycixpi, com ca'p anajty pin juuyip ajcxy yjuy ytoocy. ¹²⁻¹³ Je ajuybidijc adoocpidijc ajcxy ymüid oori, plata, tzaa oyjatypi, perla oyjatypi, lino huit oyjatypi, sedi huit oyjatypi, rey yhuit, huit color tzaptzpi, nañ jadu'n ymüid ajcxy canaagnaxpi quipy huidibi oyjaty xuucp, pajc vaso, quipy vaso oyjatypi, cobre vaso, pujx vaso, marmol vaso. Ymüid ajcxy canela, etz tijaty ooy oy xuucin müidity, poom, mirra, perfume, vino aceite, trigo tim, iyujc animal huidibi tzimy yajyöyb, cöbixy, cohuay, carreti, tumbi huidibi codoogyip, etz jacjadyii jäy juugypi. ¹⁴ Je ajuybidijc adoocpidijc ajcxy ñimähuipy je Babilonia jäy ajcxy:

—¡Ca' ajcxy m'ocmüdiñ je tñm tza'm huidibi ajcxy mjot yjatzojcxy, ca' ma anajty y'ocyajpatni. Ti tigoýdäy miich ajcxy mjogy'ajt, je mgomeeñ'ajt, etz m'ijxin huidibi anajty miich ajcxy mmüid, ca' ma ocyajpatnïp jadüg'oc!

¹⁵ Je huidijaty anajty huit ixtaayb meeñ ixtaayb, e ti ycomeeñygojcixy ma yijimbi cajpin, jiguem ajcxy yhui'mdähuipy müid tzig'iñ jihu'iñ, co nañ jadu'n je tzaachypi castigi padaangixy. Yäxip ajcxy etz nidájcxipy nimáaygixipy je Babilonia cajp. ¹⁶ Chi ajcxy ymínaanïp:

—¡Ay! ¡Miich mij cajp huidibi ayo'n patp! Jadu'n miich anajty nej tüg töxyjäy huidibi xoxyip müid huit oyjatypi, huidi ycolor ucy etz tzaptz, yaj'oyguëxigy müid oori, müid pi'ctzaa oyjatypi, müid perla. ¹⁷ ¡Janch tñm tüg jaxigy, janch tñm tüg hori, ti ycixy miich mmijjugy'ajtin mmijcomeeñ'ajtin!

Tüg'óciy pinjaty nihuindzin'ajtp barco etz pinjaty barcojoty viajetumb, marinerotijc ajcxy etz huidibi ajcxy tumb ma je mejy, ti je' ajcxy yhui'mdaaygixy jiguëgy. ¹⁸ Co ajcxy ijxy nej anajty ytoy yjocy je mij ciudad, chi ajcxy ymínañ:

—¿Huidibi cajp jada' ji jadu'nïp nej jada anajty jadayaabi mij cajp?

¹⁹ Chi ajcxy ooy naax ñayyajcöhuoogiyi müid jotmay, cham ooy yaaxcixy, ytajcixy ymaygixy, e mic chachmínaangixy:

—¡Ay! ¡Je mijpi oybi cajp huidibi ayo'n patp, ma je tüg'óciy pinjaty anajty ymüid barco ma mejy, ti ycomeeñygojcixy anajty müid je'! ¡Janch tñm tüg mij jaxigy, tñm tüg hori, ti yhuindigoydäy miich mmijjugy'ajtin mgomeeñ'ajtin!

²⁰ Jotcugíygix müid je Babilonia cajp ycixpi, miich tzajpjoty tzínaayb ajcxy, etz miich ajcxy huidibi Dios xyhuin'ijx co jébi m'apóstol'ajtcixy, etz nañ jadu'n miich ajcxy huidibi najtzcapxíy Dios y'ayuc ytiy'ajt, etz nañ jadu'n pinjaty ijtp ma Dios. Com co Dios ti yajpocycäy Babilonia cajp, je' yi' ti yaj'adigach jadu'n nej ajcxy xymüiddundigoy.

²¹ Huin'it tüg ángel janch mic'ajtmüidpi conigy tüg tzaa, jadu'n nej tüg molino paandzaa mijpi, chi je' cogädziy mejyjoty, e ymínañ:

—Nej jada tzaa ti ytigooyin, nañ tñm jadu'n je mijpi oybi Babilonia cajp ytigoydähuipy. E janch ni mína pin cajac'ixipy. ²² E ni camina ajcxy mgajac'mídohuipy jim Babilonia co pin arpi coob etz flauta yajxuuxp trompeti yajxuuxp mijni mijtu'. E ca' jacyajpaadip pinjaty ti dung ii jajtp, ti oficio jajtp, ni mgamídohuipy je molino paandzaa ñe'mín. ²³ Ni mína ti ycatícxipy jadüg'oc ma je Babilonia cajp. Ni mína ycayajmídohuipy jadüg'oc je xii je xondaacin huidibi jajtip co jäy ypicxy. Oy je Babilonia ajuuybi y'adoocpi ajcxy anajty ooy yjamícjáyity ya naaxhuiñ, e ti ajcxy huin'íñ mayñaaxhuiñjáy müid ajcxy brujerías.

²⁴ Jim ma je Babilonia cajp jim yajpaady je' ajcxy ñi'py je tñbi ajcxy Dios y'ayuc najtzcapxíyi, je huidibi ajcxy huin'ixyip ma Dios etz tüg'óciy mibijcpídiyc tñbi yaj'ögyaatcixy naaxhuiñygyxy.

19

¹ Co jadu'n yjajti, chi nmídooyich may'ayuc micpi co mayjäy ajcxy ooy ycapxcixy ymíydaaccixy tzajpjoty, ymínañ ajcxy:

¡Aleluya! Hich ajt nDios yi' tügpajc ti xyajnidzoocim ajt n'alma. Yi' je' tügpajc mij'oy'ajt müid.

² Com janch etz tudägy Dios y'ane'mín ycötujcín. Ti je' möy ycastigo je Babilonia cajp huidibi ti yajhuinma'ñydgoy je naaxhuiñjáy müid je ycatudägy'ajtin ycixpi. Yi' je' ti yaj'adigach ma je Babilonia cajp je Dios ytumbi, huidibi yaj'ögy ajcxy, pat jim.

³ Chi ajcxy jadüg'oc ymínaanïp:

—¡Aleluya! Je j̄injoc hūidibī j̄im Babilonia co ytoy je cajp, pa'ttigīhuip̄ tzajpc̄ixy hūinix̄ī hūin̄itiempo, ca' yj̄in̄ ypidz̄ip̄ nī m̄ina.

⁴ E je iipx madaaxpī mijj̄äy etz je madaaxpī iyujc, hūidibī jugy'ajt̄ m̄id̄ ñaygojxt̄inaygidaacī naaxc̄ixy, chī ajcxy ooy Dios ojadajty hūidibī anajty ane'mb̄ ma je mij'ane'mdac, e ym̄inaangixy:

—¡Jadu'n jada! ¡Aleluya!

⁵ Huin'it̄ yajm̄idooȳ j̄iibȳ ma je Dios y'ñaydac̄ yc̄otujctac̄ t̄üḡ ayuc̄ ym̄ina'ñ̄: Huindz̄iḡiyḡix̄ īibatc̄ix̄ capxpatc̄ix̄ īich̄ ajt̄ nDios̄ nidüg'óciȳ p̄in̄jatȳ tumb̄ m̄id̄ yí', p̄in̄jatȳ yí' tziḡiyb̄, huen̄ mutzt̄ijc̄itȳ huen̄ ym̄ij'anäct̄ijc̄itȳ.

Je jotcuyc'ajtin̄ hūidibī nbadaan̄im̄ co anajtȳ Cristō yj̄äȳ nim̄iñ̄

⁶ Nm̄idoohūich̄ nañ̄ jadu'n̄ nej̄ j̄ihūiȳ ooȳ mayj̄äȳ ycapxȳ ym̄iydägȳ, nej̄ canaaḡ mij̄nī y'a'ich̄, nej̄ eneē mic̄pī yj̄id̄itȳ, ym̄inaangixȳ:

¡Aleluya! T̄ī y'ane'mdiḡiȳ j̄iibȳ naaxhuiñ̄ je Huindz̄in̄ Dios̄ hūidibī t̄üḡpajc̄ m̄ij̄ip̄.

⁷ Agujc'ajtim̄ jotcuyc'ajtim̄, tzoc̄ c̄ömaayim̄ Dios̄, tzoc̄ mooyim̄ mij'ajt̄. Com̄ t̄ī paadȳ je x̄ī je tiempō m̄inā Dios̄ y'unḡ naybadáan̄iḡixp̄ t̄ümugáan̄iḡixp̄ m̄id̄ yí' yj̄äȳ, tim̄ jadu'n̄ nej̄ j̄ihūiȳ yp̄iga'ñ̄ m̄id̄ yí' ajcxȳ. T̄ī Cristō yj̄äȳ ñayñi'ix̄iyḡixȳ, jaydēbī ñaybáat̄iḡixip̄ yt̄ügm̄úcc̄ixip̄ m̄id̄ yí', tim̄ jadu'n̄ nej̄ t̄üḡ j̄äȳ ñayxox̄ȳiī co yp̄iga'ñ̄.

⁸ Dios̄ t̄ī a'ix̄iȳ co Cristō yj̄äȳ ajcxȳ ñayxox̄iyb̄ m̄id̄ yhūit̄ oyjatyp̄ī, hūidibī ad̄icxp̄ ajajp̄.

Je huit̄ xojx̄ oyjatyp̄ī jadu'n̄ nipaadȳ nej̄ je tudägy'ajtin̄ hūidibī je m̄ib̄ijc̄pid̄ijc̄ t̄ī paatc̄ixȳ ma Dios̄.

⁹ Chī je ángel̄ xyñ̄imaaȳich̄:

—Jaaȳ jadā ayuc̄. “Jotcuyc̄ ajcxȳ p̄in̄jatȳ huooȳip̄ ma yajhuinx̄iduna'ñ̄ Dios̄ y'unḡ, je Cordero, co naydüḡmugáan̄iḡixȳ m̄id̄ yí' yj̄äȳ ajcxȳ.”

Chī je ángel̄ xyñ̄imaaȳich̄:

—Jadā je' Dios̄ y'ayuc̄ janchyp̄ī.

¹⁰ Chī ngojxt̄inay'ihūiȳich̄ ma je ángel̄ yhūinduū co njahuindz̄iḡihuaañ̄ich̄. Chī je' xyñ̄imaaȳich̄:

—Ca' jadu'n̄ m'id̄ich̄. Dios̄ īich̄ xytumb̄i'ajtp̄ jadu'n̄ nej̄ mīich̄ etz̄ nej̄ jacjadȳiī miḡügt̄ijc̄ hūidibī mij̄p̄idaacc̄ixp̄ c̄ixȳjot̄ hūin̄ijot̄ je ayuc̄ t̄iy'ajt̄ janchyp̄ī hūidibī Jesús̄ ycapxhūäcx̄. Huindz̄iḡi' Dios̄.

Jadayaabī ayuc̄ t̄iy'ajt̄ janchyp̄ī hūidibī Jesús̄ ñid̄iy'ajt'ajt̄, yí' je' je Dios̄ y'ayuc̄ hūidibī je profetas̄ ajcxȳ ñajtzcapx̄iȳ.

Je mij'ane'mbī hūidibī poobcohuaȳ yaj'ñ̄aayb̄

¹¹ Chī nhuin'ijxȳich̄ tzajp'ahuädz̄, chī yqūex̄igȳ t̄üḡ poobcohuaȳ, e je p̄in̄ anajtȳ yaj'ñ̄aayb̄ hue' anajtȳ naydijȳiī je tudägȳp̄ī je janchyp̄ī. Je hūidibī t̄iydumb̄ naaxhuiñ̄yj̄äȳ m̄id̄ tudägy'ajtin̄ etz̄ hūidibī tziptumb̄ m̄id̄ tudägy'ajtin̄. ¹² E je' hūidibī yaj'ñ̄aayb̄ je poobcohuaȳ, je' yhūiin̄ jadu'n̄ je' nej̄ j̄iinye'n̄, e ym̄id̄ anajtȳ ma ycohuajc̄ maycoron̄ī hūidibī nid̄iy'ajt'ajtp̄ co yrey'atȳ ma t̄üg'óciȳ j̄äȳ. E je' ym̄id̄ anajtȳ t̄üḡ x̄ī cojaaȳ, e je' anajtȳ naydüḡpajc̄ nejhūiyb̄ yx̄ī ca' jac̄ p̄in̄. ¹³ Hue' anajtȳ yxox̄ȳitȳ m̄id̄ huit̄ y'uucȳitȳ m̄id̄ ni'pȳ, e je' yx̄ī hue' anajtȳ x̄i'adȳiī Dios̄ y'ayuc̄. ¹⁴ Jē ángel̄es̄ ajcxȳ hūidibī soldad'ajtp̄ tzajp̄jotȳ ypayöȳiī anajtȳ ajcxȳ ac poobcohuayḡixp̄ī, yxox̄ȳitȳ ajcxȳ m̄id̄ sed̄ī huit̄ janch̄ oybī, poobī etz̄ huätz̄pī. ¹⁵ Je hūidibī yaj'ñ̄aayb̄ je poobcohuaȳ, ma yí' y'ahuac̄ ypidz̄imȳ anajtȳ t̄üḡ espadā janch̄ j̄ij̄pī, e je' m̄id̄ yajtzaach̄ihua'ñ̄ je maynaaxhuiñ̄yj̄äȳ. E je' ane'ma'ñ̄ m̄id̄ Dios̄ ymic'ajt̄. E m̄id̄ yí' y'ayuc̄ castiḡī möhua'ñ̄ je mayj̄äȳ m̄id̄ ypoc̄ȳ yc̄ixp̄ī hūidibī tz̄inaayb̄ ma je maȳ it̄ lugar̄ ya naaxhuiñ̄. Yí' y'ayuc̄ jadu'n̄ yí' nej̄ t̄üḡ espadā

janch jippi. E yi' m'iid'adaanip je mijpi Dios chip y'ejcin, je Dios hu'idibi t'üg'óciy mic'ajt m'iid. E mictägy tzaachypi castigi yega'n ma je mayñaaxhuiñyäjy m'iid ypocy ycixpi, jadu'n je maynaaxhuiñyäjy nipaady nej jihuiy Dios y'ung tenmicx uvas m'iid ytecy. ¹⁶ E ym'iid anajty cojaay ma yhuit etz ma ypuj jadaayaabi ayuc: "Reydijc ajcxy yrey. Huindz'indijc ajcxy yHuindzin."

¹⁷ Huin'it nhuin'ijxyich t'üg'ängel ytinäy xi'agujc, chi ooy janch mic miyaaxy t'üg'óciy je joon hu'idijaty queec-hu'idijtp tzajpcujc yminañ:

—Miingix naymujctáayigix ma Dios adzuu'ibi yecy. ¹⁸ Miingix, jigix mdzüdzcixipy reydijc ajcxy ñinicx, capitán ajcxy etz micjäydijc ajcxy ñinicx, cohuay chüch etz nañ jadu'n je' ajcxy ñinicx hu'idibi yaj'iñaayb. Mdzüdzip t'üg'óciy jäy ñinicx: tumbidijc midumbidijc, je huindz'indijc, comeeñydijc etz je ayoo'idijc.

¹⁹ Chi nhuin'ijxyich je ca'oy'iyujc etz je rey ajcxy hu'idibi yajpatp ya naaxhuiñ m'iid t'üg'óciy ypubejtpidijc ysoldadotijc ajcxy. Nhuin'ijxyich co ti ñayyöymújigixy co chiptunaangixy midziptzonaangixy je hu'idibi poob-cohuay yaj'iñaayb quipxyi m'iid je' ypubejtpidijc ysoldadtijc ajcxy. ²⁰ Chi je ca'oy'iyujc ymachycäy quipxyi m'iid je profeta ca'pi yjanchity, je t'ibi anajty tuñ mijhuinma'n ma je ca'oy'iyujc yhuinduu. M'iid je mijhuinma'n ycixpi je profeta, ca'piy yjanchity, ti anajty ooy huin'ñ t'üg'óciy je hu'idijaty ajcxy nayyejci co je ca'oy'iyujc ytiy'ajt iixpejt cöbijci ma yhuimboc etz co huindzigixy je ñidzejtzuutin. Jadu'n je ca'oy'iyujc etz je profeta, ca'piy yjanchity, yajcötijnajxy ajcxy ma j'ün ytoy m'iid azufre, jadu'n je j'ün nej t'üg' meyy huädz j'ün. ²¹ Jacjadyii jäy hue' ajcxy o'cin patcixy m'iid espada hu'idibi anajty pidzimb ma je' y'ahuac je hu'idibi anajty poobcohuay yaj'iñaayb. E t'üg'óciy je joon etz luud hu'idibi ajcxy queec-hu'idijtp cijx je' ajcxy ytimycuuxtáayigixy ytimypejtáayigixy m'iid may öcpi chüch.

20

Je mil jimijtpi

¹ Huin'it nhuin'ijxyich t'üg'ängel ycidägy choon tzajpjoty m'iidity je ahuasti hu'idibi m'iid yaj'ahuäch je mij jut hu'idibi oy yciicyity, ym'iid anajty nañ jadu'n t'üg' mijcadena ma yci'. ² Jadaayaabi ángel majch je ama'y tza'n hu'idibi yajtijp mujcu' etz Satanás, chi yajcadenitigixy, e yajhui'my mach t'üg' mil jimijtpi. ³ Chi je ángel cötijnajxy je mujcu' ma je mij jut, chi cö'agixy. Chi t'üg' selli pidacy ma je mij jut aguu. Pidacy je mujcu' ma je mij jut, ca'ydi jac-huin'ñ je mayñaaxhuiñyäjy, ixti cooni t'üg' mil jimijtpi yca'pxipy. E co jadu'n anajty mil jimijtpi ti ñaxy, ooy ycopicyity co yajnajtmadzihuipy je mujcu' tzojccixy.

⁴ Chi canaag ane'mdac nhuin'ijxyich ma anajty ajcxy iñäy t'ibi ajcxy patcixy cötujcin co tiydúngxixipy naaxhuiñyäjy. Nañ jadu'n nhuin'ijxyich ajcxy y'alma hu'idibi anajty ajcxy ti yajyöctzujctuuticixy m'iid co ajcxy capxhuächy je Dios y'ayuc ytiy'ajt hu'idibi Jesús ñidiy'ajt'ajt. Ca'p je' ajcxy anajty huindzigixyixy je ca'oy'iyujc, ni je' ñidzejtzuutin. E nañ jadu'n ni ca' ajcxy cöbijci je ca'oy'iyujc ytiy'ajt ma yhuimboc ni ma yci'. Co ajcxy y'o'cy, chi yjugypigipy ajcxy jadüg'oc etz ane'mip ajcxy quipxyi m'iid Cristo t'üg' mil jimijtpi. ⁵ Je jacjadyii je öcpi, hu'idibi ca'p mijpidacy Cristo, ca' je' ajcxy yjugypigipy, ixti cooni anajty ti ñaxy t'üg' mil jimijtpi huin'itni. Co t'üg'óciy je mibijcpidijc yjugypigipy jadüg'oc, jada je' je ogá'nibi tiempo mina öcpi ajcxy yjugypijccixy, e ca' y'oc'ó'ccixnip jadügtecy. ⁶ Jotcujc etz huädz, ca' tibocy m'iidity, je' ajcxy öcpidijc hu'idibi jugypigipy co Jesús yajjugypigipy y' t'üg'picy öcpi hu'idibi jayijp'adamb. Je mimetzpi o'cin ca' ni ti mic'ajt m'iidity ma je' ajcxy. Hue' janch ajcxy ytung'adiyb huingapxi ma Dios etz Cristo. E je' ajcxy Cristo quipxy m'iid y'ane'mip t'üg' mil jimijtpi.

⁷ Co anajty ti ñaxy je mil jimijt, huin'it je Satanás yajcoguejttüdiipy ma ymach'ity. ⁸ Chi Satanás nicxy huin'ññ je mayñaaxhuiñjyá huindu'mybi ñaaxhuiñ. Je' nicxy huin'ññ Gog jäy etz Magog jäy. E yi' ajcxy y'ane'mbidijc yajmujctähua'ñ soldado ajcxy, jigix chiptúngixipy müd je Dios y'ung. Jadu'n je' ajcxy soldados ymayity jadu'n nej pu' ymayity huidibi mejypá'ám. ⁹ E jadu'n ajcxy ypediyy ma ymijhuiniity naax, chi ajcxy yajnaadujcy je it ma chinaaygixy huidibi Dios ti huin'ixigixy etz yajnaadujccixy je ciudad huidibi Dios chojcpy. Chi Dios quejxy jin huidibi tzoomb tzajpjoty, huidibi oy ñöcigixy huädz huädz je may soldados ajcxy. ¹⁰ Je mujcu', huidibi anajty ti huin'ññ je mayjäy, oy yajcötijnaxy ma je mij jin ytoy müd azufre. Ma anajty ti yajcötijnaxy je ca'oy'iyujc etz je profeta, ca'piy yjanchity. Jiiby je' ajcxy ayo'n tzaachypi paadiipy xim tzuum huinixi huinítiempo.

Je tyduunin ma je mij'ane'mbi yhuinduu

¹¹ Nhuin'ijxyich tüg mij'ane'mdac janch poob, müd je huidibi anajty iñaayb ma je'. Ma je' yhuinduu naax etz tzajp queectigoyday yajxon, ni ca' y'ocyajpatni it lugar ma je naax etz tzajp y'ijtcixipy. ¹² Chi nhuin'ijxyich je öcpi ajcxy, mij'anäcpi mutz'anäcpi, ytinaaygixy ma Dios yhuinduu. Chi yajciyhuäcxtay maylibro. E ñañ jadu'n yajciyhuäcxy jadüg libro huidibi müd je jäy yxi cojay huidijaty ajcxy jugy'ajtin huinixi müd. Chi je' ajcxy yajtyduñ je öcpi ajcxy nej anajty ajcxy ti chinaaygixy ya naaxhuiñ, jadu'n nej yjaybetyity ma je maylibro. ¹³ Je meyy yciyejctay je' je öcpi ajcxy huidibi anajty jiiby yajpatp. E je o'cin etz je öcpijut yciyejctay je' je öcpi huidibi jiiby yajpatp, e tüg'óciy je' yajtydunday nidüg nidüg nej anajty ti chinaaygixy. ¹⁴ Je o'cin etz je it ma je öcpi y'ity yajnajtztijyday jinjoty ma je mijjin ytoy. Je' je' je mimetzpi o'cin ma je mijjin ytoy. ¹⁵ E huidijaty anajty ajcxy ca' yxi ymiiñ ma je libro huidibi jugy'ajtin huinixibi müd, hue' je' ajcxy yajnajtztijy jinjoty ma je mijjin ytoy.

21

¹ Huin'it nhuin'ijxyich tüg tzajp jemybi etz tüg naax jemybi, com je jayjipi tzajp etz je jayjipi naax ti je' anajty ytigoydäy, e ni ma anajty meyy ycacädy. ² Ich, Juan, nhuin'ijxyich je ciudad huätzpi jemybi, je Jerusalén, ycidägy anajty choñ tzajpjoty ma Dios yajpaady, janch oyduñ anajty, jadu'n nej tüg töxyjäy ñay'oyduñyii ñayxoxyii co ypiğa'ñ müd yeydijc. ³ Nmidoohuich tüg ayuc micpi choñ anajty tzajpjoty, e ymíañ:

—Cuenditun ich n'ayuc. Dios tzinaydac pigamb ma naaxhuiñjyá ajcxy. Yi' tzináhuipy müd yi' ajcxy, e yi' ajcxy Dios yjäy'adiyb. E Dios ci'm idaamb müd yi' ajcxy jigix yi' ajcxy Dios'adiyb. ⁴ Dios yajquégüib ajcxy ytajin ymayin etz yajtidzib ajcxy yhuinni, e ca'p yjadib o'cin ni jiyin ni yaaxin, ni jotmay, ni pin ycajihuihuip je ju'pin je pa'min. Com je huidibi anajty ijtñaayb, ti je' ñaxy.

⁵ Huin'it je' ymíañ huidibi anajty iñaayb ma je mij'ane'mdacin:

—Cuenditungix ich n'ayuc. Huinjemy ngojtigadza'ñich tüg'óciy huidibi jii'ijtp.

Ñañ jadu'n ymíañ:

—Jaay jada ayuc. Com jadayaabi ayuc ooy jada yjanchity, e ooy yi' jot'amij'ajt müdity.

⁶ Huin'it je mij'ane'mbi xyñimaayich:

—Ti tüg'óciy ytunyii yjadyii. Ich je' nyajtzondacp tüg'óciy tijaty, etz ich nyajcogixiyb tüg'óciy tijaty, tim jadu'n nej je letra A huidibi yajtzondacp je alfabeto etz je letra Z huidibi yajcogixiyb je alfabeto. Pinjaty tzojcp jemybi jugy'ajtin ich yi' nmöhuip. Jadu'n nipaady nej jihuüy ajcxy

ytidziyigixy, e nyaj'ügich ma ymuxy je nü huidibi yejcp jugy'ajtin, ni ca' ajcxy mimeeñyduunip ni jadu'ñi. ⁷ Pinjaty mimadactaayb jibic-huinma'ñ etz pocytunii, yi' je' cidigihuiib huidibi njè'ajtpy, e ich yi' xyDios'adiib, e yi' ich n'ung'adiyb. ⁸ Je huindzicytjic ajcxy, pinjaty ca' ymibicy ich ndiy'ajt, pinjaty tumb huidibi ca' y'oyjäygidacnity, pinjaty jäy yaj'öcp, pinjaty migapxtigooyb töxyjäydjic, pinjaty tumb capxpogii, pinjaty mijpidacp huijyjäy yhuinma'ñ, pinjaty huindzigiiyb quipychech tzaadzech, etz pinjaty anidacp, je' ajcxy nidüg'óciy nibidzimiiib ñicxipy ma mijjin ytoy miiid azufre, huidibi quëxïcp nej jünmejy. Je' je' je' mimetzpi o'cin.

Yi jemybi Jerusalén

⁹ Huin'it nidüg ángel je nihuixtujcpi huidibi anajty miiid huixtujc tasi ujtz-jatypi miiid je huixtujcpi ayo'n tzaachypi huidibi jac'axam tunaanip jadaanip, je' xyñimaayich:

—Min, e cham nyajni'ixihua'ñ je mibijcpidjic huidibi tügmugamb miiid Dios y'ung, je Cordero, jadu'n nej tüg yëydjic ytügmucy miiid ytöxyjic co ajcxy ypicy.

¹⁰ Je huidibi Dios yihui'ñ ymic'ajt xyaj'ijxich cumäyjoty, chi je ángel cümäyjoty xyajnicxyich ma tüg cop mijpi etz cixpi, chi xyaj'ijxyich je mijpi ciudad santa. Je ciudad santa hue' je' yxi Jerusalén, e ycidägy anajty choon tzajpjoty jiiiby ma Dios yajpaady. ¹¹ Je mij ciudad santa janch adicxp je' anajty miiid Dios y'oy'ajtin. Jim jadu'n anajty y'adixcy nej tüg tzaa janch oybi nej mármol, janch yaj'ijxnajxp nej iixin. ¹² Jühuidityi anajty miiidity je ciudad santo ac poch janch mij etz cixy. Je poch ymiiid anajty majmetz y'aguu. E ma je majmetzpi y'aguu majmetz ángel ajcxy y'ijtcixy, tügpí ángel ma tügjaty ciudad aguu. Etz yjaybetyity je' ajcxy yxi je majmetzpi Israel tribu, tügpí tribu yxi yjaybetyity ma tüg tüg poch y'aguu. ¹³ Tugüg anajty y'aguu miiidity xibidzim'amy, tugüg y'aguu ma tichypo ymiiniiy, tugüg y'aguu ma jünboj ymiiniiyin, etz jatugüg y'aguu ma xiigidägy'amy. ¹⁴ Je poch huidibi anajty ymiiid je cajp, ymiiid anajty majmetz tzaa huidibi y'ijx'ajtip, e majmetzpi tzaa ymiiid anajty cojaay je nimajmetzpi apóstoles ajcxy yxi huidibi Jesús, je Cordero, yhuin'ijx, tügpí apóstol yxi ma tüg tüg tzaa.

¹⁵ Je ángel huidibi anajty miydacp miiid ich, ymiiid anajty tüg quipx ac tim oori je' anajty. Je' anajty miiid quipxa'ñ je cajp, je poch y'aguu, etz je poch. ¹⁶ Je cajp, je ciudad, hue' je' anajty cuadradi; nej anajty yon'ajt, nañ jadu'n anajty y'agon'ajt, etz nañ jadu'n ycix'ajt. Chi je ángel quipxy je ciudad santa miiid je' yquipx. E hue' quipxy mejtz mil jamejtz migo'px kilómetros, y'ayon'ajtin ycix'ajtin etz y'agon'ajtin quipxyjaty je' anajty. ¹⁷ Huin'it je ángel quipxy je poch, hue' quipxy migo'px jahuixchiguipx midaax cïnuux, jadu'n nej naaxhuiñjy ajcxy ycïnuux, huidi je ángel yajtumyb.

¹⁸ Je poch hue' je' anajty ypochity miiid tzaa oyjatypi, e je cajp hue' je' anajty ac tim oori, yguëxigy nej iix huätzpi. ¹⁹⁻²⁰ Je tzaa huidibi je poch y'ijx'ajtip hue' je' anajty y'oyduñity huidi miiid y'oyguëxigy, tzaa janch oy-jatypi canaagnax color. Je jayijpi poch y'ijx hue' anajty y'oyduñity miiid jaspe tzaa, je mimetzpi poch y'oyduñity miiid safiro tzaa, je midugügpi poch y'oyduñity miiid ágate tzaa, je mimadaaxpi y'oyduñity miiid esmeralda tzaa, je mimigooxpi poch y'oyduñity miiid ónice tzaa, je midudujcpi poch y'oyduñity miiid coralina tzaa, je nihuixtujcpi poch y'oyduñity miiid crisólito tzaa, je mituctujcpi poch y'oyduñity miiid berilo tzaa, je midaxtujcpi poch y'oyduñity miiid jacinto tzaa, je mimajmetzpi poch y'oyduñity miiid amatista tzaa. ²¹ Je majmetzpi poch'aguu hue' anajty y'oyduñity miiid tügpí perla. E je mijtu'

huidibi najxp cajpcujc hue' y'oyi'y mïd oori huätzpi, e yquëxïgy nej vidrio huätzpi yaj'ijxnajxp.

²² Ma je Jerusalén cajp jemybi ca'p nhuin'ijxyich ni tüg templo, ni tüg tijc ma jäy ajcxy Dios ojadajtcixy. Com je Huindzin Dios, yi' huidibi tügpaic mijip, etz je' y'ung, je Cordero, jadu'n yi' ajcxy nipaady nej tüg templo nej tüg it ma mayjäy ajcxy y'ojadajtigixy Dios etz je' y'ung. ²³ Je jemybi Jerusalén ca'p je' anajty yajmayjaty xii po' huidibi yaj'anihuip yajtiicxihuip je ciudad, com je Dios y'oy'ajtin etz je' y'ung y'oy'ajtin yi' je' ajcxy nej je tiicxin jajin huidibi amb tiicxp ma je Jerusalén jemybi. ²⁴ Je mayñaaxhuiñyäjy huidibi ti patcixy y'alma nidzoocin naxïpy tigïhuipy ajcxy mïd je jemybi Jerusalén ytïcxin yjajin huidi anajty ti ymöyïi. Je ane'mbidijc ajcxy ya naaxhuiñ ymimiinipy ajcxy mij'ajt, oy'ajt, etz cömay'ajt ma je jemybi Jerusalén. ²⁵ E je cajp aguu ni camina je' agïy yca'idipy xïm, com jim ca' jim ycoodz'idipy, paady ni mina yca'agi' y'idipy. ²⁶ Jim je naaxhuiñyäjy, canaag agajp, minicxip ajcxy ymij'ajt y'oy'ajt ycömay'ajt ma je Jerusaléngajp, je jemybi. ²⁷ Ca'p jim ytigïhuipy ni pin huidibi ca' y'pocynïhuächni, ni pin huidibi tumb ca'pi y'oyjäygidacnity, etz huidijaty jäy huin'ïmb. Jëyi jim tigïhuip pinjaty ijtp yxii cojay ma je libro huidibi Dios y'ung, je Cordero, ymïd, ma cojay y'ity je jäy ajcxy yxii huidibi ymïd jugy'ajtin huinixïbi.

22

¹ Huin'it je ángel xyajni'ixi'yich tüg mijni'ï huätzpi, je nïi huidibi yejcp jugy'ajt huidibi ca' ycixip ytigoyip. Janch huädz janch tiicx je' anajty je nïi nej tüg ijxin. E je nïi jim anajty ymuxy ma Dios etz je Cordero y'ane'mdac. ² Jada mij nïi hue' je' anajty ñaxy cuidad mijtügujc, etz ma je mejtz'adu'm'amybi mijni'ïba', jim anajty je quipy huidibi jugy'ajt mïd, huidibi tïm'ajt majmetz'oc tügpi jimijt, po' po' ytiim'aty, e je quipy y'aay hue' anajty ytuñ jigix huaad naaxhuiñyäjy choocixy. ³ Ca'p jim y'adipy ni ti ayo'n ni ti jotmay mïd pocytunï ycixpi. Je Dios etz je' y'ung je' jim y'ane'mdac ycötujctac yajpaadipy. E je' ytumbidijc je' ajcxy jim yajmij'adiib ojadadiib. ⁴ Y'ijxipy ajcxy je Dios y'ung yhuiñyijp etz yminicxip ajcxy je' yxii ycojay ma ajcxy yhuimboc. ⁵ Ca'p jim ycootzihuity. E pinjaty jim tzinaayb ca'p ajcxy yajmayjadipy linterna jin, lamparajin, ni xïdïcxi, com Dios ïch ajt nHuindzin yi' yi' ajcxy codïcxiib. Je Huindzin Dios etz je' y'ung je' ajcxy jim ane'mip huinixii huinitempo.

Huingooniñ yi Jesucristo ymin'aa

⁶ Huin'it je ángel xyñimaayich:

—Jadayaabi ayuc tiy'ajt ma jada necy, ooy jada yjanchity, e jëbi miich myajmij'adipy. Je Huindzin, je Dios huidibi ayuc moy je profetas ajcxy jecy'ajty, quejxy y'ángel jigix yajni'ixihuipy je' ytumbidijc tijaty tzojc tunaanip jadaanip.

⁷ Jesucristo jadu'n yminañ:

—iMiimbich tzojc! Jotcuje pinjaty tumb cuendi etz cuydumb Dios y'ayuc ytiy'ajt huidibi jaybetyip ma jada libro.

⁸ ïch Juan, nmidoohuich etz nhuin'ijxyich jadayaabi huidibi jaybety ma jada necy. E co oy jadu'n nhuin'ixyich, chi nhuijoj'ihuuyich ma je ángel ytecymijc huidibi anajty yam xyajni'ixiybich. ⁹ Chi je' xyñimaayich:

—Ca' jadu'n m'idïch. ïch, Dios xytumbi'ajtp jadu'n nej miich etz jacjadyii migügtijc huidibi Dios y'ayuc najtzcapxiyip, e tüg'ócïy pinjaty tumb cuendi huidibi jaybetyip ma jada necy. Huindzigi' etz ojadat Dios.

¹⁰ Chi je' xyñimaayich:

—Capxhuäcxi je Dios y'ayuc huídibi ti mjay ma jada necy, ca' myüdzip. Com ti yhuingoñ je tiempo mina Dios cuyduna'ñ yi y'ayuc huídibi yjayhuim ma jada necy. ¹¹ Pinjaty ca' ytuđägyity, huen jadu'n jacyajpaady müđ ycatuđägy'ajt. Pinjaty jibicjot jibic-huinma'ñ tumb, huen niđi jibicjot jibic-huinma'ñ tuñ. E pinjaty tuđägyi tumb, huen jactuñ tuđägy'ajtın. Pinjaty huädz yjot huädz yhuinma'ñ müđ, huen huädz yjot huädz yhuinma'ñ jacm'ity ma Dios.

¹² Chi je Cristo yminañ:

—Timetiini nhuimbidipyich jadüg'oc naaxhuiñ. Co anajty ti nmiiñich, huin'it nyajjotcugihuibich pinjaty oybi ti tuñ, e ndzaachytunipyich pinjaty jibicpi ti tuñ. ¹³ Hich je' ti njayjip'atyich ya naaxhuiñ, etz ich je' cogixihuamb, tim jadu'n nej je letra A chondägy ma je alfabeto etz je letra Z ycogixiy ma je alfabeto. Hich ti nyajtzondacyich je naaxhuiñ etz nyajcixipyich.

¹⁴ Jotcujc ajcxy pinjaty ti ypocyñihuäch, jadu'n nipaady nej ajcxy yhuít ti pujcixy e müđ ajcxy yhuít huätzpi. Com ti ajcxy ypocyñihuaatzcixy, paady jëbi jicxcixip je ujtz tza'm huídibi jugy'ajt jejcpy huídibi ca' ycixipy ytigoyipy ni mina, e jadu'n jëbi ytigiy ma je jemybi Jerusaléngajp. ¹⁵ Dios ca' yi' ajcxy cöbigañ ma je jemybi Jerusalén etz huimip ajcxy cajppa' tüg'óciy pinjaty huídibi jibic-huinma'ñ müđ, pinjaty ca' mibicy Dios, pinjaty mijpidacp huijyäjy yhuinma'ñ brujo yhuinma'ñ, pinjaty ajcxy migapxtigooyb midundigooyb töxyjäydijc, pinjaty ajcxy jäy yaj'öcp, pinjaty ajcxy huindzigiyb quipychech tzaachech, etz tüg'óciy pinjaty tzachnixondacp anii ayuc.

¹⁶ Hich Jesús huídibi capxp. Ti nguexyich n'ángel ma miich jigix jada tiy'ajt capxticxipy majaty mibijcpidijc ma tüg tüg cajp. Hich je' iix'ajtp cop'ajtp ma je rey David miiñ. Etz ich je' nmij'ap'ajtpyich nmijteedy'ajtpyich je rey David. Jadu'n ich nipaady nej je mijmadza' huídibi yajtjip jayxim.

¹⁷ Je Espíritu Santo etz je mibijcpidijc huídibi jadu'n nipatp nej Cristo ytöxyijc yminaangixy:

—Min ma Jesucristo.

E pin amidoo'ijtp ich n'ayuc yminángixipy:

—Min ma Jesucristo.

E pin tzojcp jugy'ajtın huídibi ca' ycixipy ytigoyipy nimina, jadu'n nej jihuiy ytidziyii e tzocy jada nii, huen miiñ, e nmöhuibyich jugy'ajtın, jadu'n nej jihuiy nyajni'ügich je nii huídibi jugy'ajtın müđ e ni ca' mimeeñydunipy ni jadu'ñyi.

¹⁸ Tüg'óciy pinjaty amidoo'ijtp Dios y'ayuc ytiy'ajt huídibi jaybetyip ma jada libro, ich miich ajcxy nimaaybich co pinjaty jacyaj'anajxp jada ayuc ma jada necy, Dios jac'anaxy möhuib tzaachypi ayo'n, ca'ydi huídi jaybetyip ma jada libro. ¹⁹ E pin puuhuijtzp hueeni jada Dios y'ayuc huídibi jaybetyip ma jada Dios ylibro, Dios yi' jötziib yxi huídi cojaayip ma je jugy'ajt libro. Nañ jadu'n ypuhuidziyb huídi anajty japaatip ma je jemybi Jerusaléngajp, huídi jada libro ñimiydacpy.

²⁰ Yi Jesucristo huídibi jada ayuc capxp, yi' minamb:

—Ca' ooy jecy njac-huäcxiba'ñich co nhuimbidipyich naaxhuiñ jadüg'oc.

Jadu'n jada. Amén. ¡Min, Huindzin Jesús!

²¹ Huen je nHuindzin Jesucristo may'ajt oy'ajt tunipy müđ miich ajcxy huídibi mibijcp. Jadu'n ngapxycixyich. Amén.